


Didza' cubi rucá'ana
tsahui



New Testament in Zapotec, Rincón (MX:zar:Zapotec, Rincón)

Didza' cubi rucá'ana tsahui' New Testament in Zapotec, Rincón (MX:zar:Zapotec, Rincón)

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-NonCommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-NonCommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022

58bf86df-ae22-508c-81dc-936dbf138c25

Contents

Salmos	1
San Mateo	103
San Marcos	147
San Lucas	174
San Juan	218
Hechos	251
Romanos	290
1 Corintios	307
2 Corintios	323
Gálatas	333
Efesios	339
Filipenses	345
Colosenses	349
1 Tesalonicenses	353
2 Tesalonicenses	356
1 Timoteo	358
2 Timoteo	363
Tito	367
Filemón	370
Hebreos	371
Santiago	383
1 Pedro	387
2 Pedro	392
1 Juan	395
2 Juan	399
3 Juan	400
Judas	401
Apocalipsis	403

YUGU' SALMO

1

¹ Bica' ba bönni' biti' runë' ca naca le ta'gú'u yöl-la' lë' nupa tu'ca'ana Dios, en biti' ridälënë' tsözxön nupa tun dul-la', en biti' runë' tsözxön le tun nupa ta'zi' quidza' Dios.

² Le raza ládxë'ë nácagaca xibá naguixjë' Xanru', en ca nácagaca xibá na' rëla, en te dza rulaba ládxë'ë.

³ Bönni' ni náquië' ca tu yaga dxe' ga naca ra' nisa, le ribía sizxöni cate' ridxín dza que, en biti' ca' rizóa gubá' ayisö.

Yúgu'të le runë' ta'rúaj dxi' a.

⁴ Biti' raca caní quégaca nupa tuá' dö'.

Nácagaca ca bëbu zxe café ruá' le bö'.

⁵ Que lë ni na' biti' ulu'rúajë' tsahui' bönni' tu'ë dö' cate' Dios uchi'a usöröë' quégaquië', en biti' ila'cu'ë bönni' dul-la' ga tu'dubë' bönni' tsahui'.

⁶ Rapa chi'ë Xanru' Dios nōza ga ta'dë' bönni' tsahui' na', pero uniti tsaz nu ridá gapa ta'dá nupa tuá' dö'.

2

¹ Bizx que tu'tsatsa bönachi yugu' yödzo en tu'pá'a nítisö le ilúngaca?

² Bönni' ta'nná bë'ë luyú ta'dá'baguë'ë Dios.

Tun tuz xtídzá'gaca nupa dë lu ná'agaca

para ila'dá'baga' Xanru', en Nu na' nabö cazë' para inná bë'ë,

³ ta'nná: "Uzxuzxaj uquinnajru' le ta'nná bé'enë' rë'u, en chú'unaru' yugu' le tu'zenë' bach rë'u."

⁴ Dios na' zoë' yehua' yubá uzxídxisë'.

Xanru' Dios utítaj cazë' léguequi.

⁵ Ní'irö lu yöl-la' rilé queë' güi'ilenë' léguequi didza',

en lu yöl-la' ridzá'a queë' uzenë' bach léguequi.

⁶ Innë': "Nuzóa caza' bönni' nabö caza' xilatjë' ga inná bë'ë.

Inná bë'ë lu Gu'á Sión, le naca gu'á lá'ayi quia'."

⁷ Quixjöi'ida' libí'ili' didza' nuzóë' tsaz Dios.

Xanru' Dios gudxi cazë' neda': "Li' nacu' Zxi'ina'.

Na'a dza nuzóa caza' Li'.

⁸ Gunábini neda', ate' guna' ga ilequi quiu' yugu' yödzo.

Guequi ca' quiu' idütë yödzölió.

⁹ Quitsju' léguequi len tu xiyaga guíë.

Uzxuzxju' léguequi ca run nu rilá'a tu zxiga' yö'öna."

¹⁰ Que lë ni na', libí'ili' na' rinná bë'ëli', guli'tséajni'i.

Guli'sedi cuinli', núlöli' ruchi'a rusöröli' le raca luyú.

¹¹ Lu yöl-la' ba'a ladxi' queéli' guli'gún xichinë' Xanru'.

Lu yöl-la' rixxizi queéli' buli'sí' xibë'.

¹² Guli'gún bal Zxi'inë' Dios para cabí ilétenë',

en para cabí udxi queéli' la' nōza.

La' ilentë yöl-la' rilé queë'.

¡Bica' ba yúgu'të nupa tu'zxöni ladxi' Lë'!

3

¹ Xan, chinayángacada' nupa ta'lé neda'.

Zián nupa ta'dá'baga' neda'.

² Zián nupa ta'nnë quia', ta'nná:

"Biti' usölë' Dios lë'."

³ Pero Li', Xan, run chí'itica'su' neda'.

Nacu' yöl-la' ba quia', en Nu rutipa neda'.

⁴ Bë'a zidzaj didza', bulidza'-në' Xanru',

ate' Lë' biyönnë' chi'a ga na' zoë' lataj lá'ayi queë'.

⁵ Neda' rata', en rasia',

ate' rubana', tu' nazöntica'së' Xanru' Dios neda'.

⁶ Biti' gádxida' gayuá' gayuá' bönachi,
nupa na' nagú'ugaca neda' lé'ajlò.

⁷ ¡Guyasa, Xan! ¡Busólá neda', Dios quia'!
Budxía huë' xága'gaca nupa tu'dí'i neda',
en buquínajda' nupa nácgaca xihui'.

⁸ Xan, rusólá cazu' bönachi quiu'.
Ben ga gaca dxi'a quégaca bönachi quiu'.
¡Ca' gaca!

4

¹ Bubí'i didza' cate' rulidza' Li', Dios.

Nacu' Nu ruchi'a rusörö le raca quia'.

Cate' gurö'a böniga, bida cazu' Li' ga zoa', en gúcalenu' neda'.
Ruhuéchi' ladxí' neda', en ruzé' nagu' le rinábida' Li'.

² Rnnë' Dios: "Libí'ili', bönachi, ¿gáca'xte ulidza dítajli' neda'?
¿Gáca'xte caz idxí'ili' le cabí nazaca', en gúf'i ladxí'li' le cabí naca?"

³ Guli'tsöjné nabö cazë' Xanru' nu radxi Lë',
ate' riyönnë' neda' cate' rulidza'-në'.

⁴ Guli'gadxi Lë', en bití'rö gunlí' dul-la'.

Guli'sá' ladxí' ca naca lë ni cate' dëli' ga ráta'li', en guli'sóa dxisö'.

⁵ Guli'cú'u lahuë' Xanru' le naca dxi'a,
en buli'zxöni ladxí' Lë'.

⁶ Zían nupa ta'nná: "¿Nuzxi caz gun ga gaca dxi'a queëru?"

Lu yöl-la' dxi'i ladxí' quiu' buyü netu', Xan.

⁷ Runu' ga rudzéjade'eröda'

ca tu'dzeja nupa tu'zì' xibé zxoá' za guizxi yu, en xisi lubá uva.

⁸ Cate' rata', la' rásitia' lu yöl-la' riböza dxi ladxí' quia',
tu' run cazu' Li', Xan, ga riböza' dxi'a tsáhui'do'.

5

¹ Ruzé' nagu' didza' ruá'a, Xan.

Buyú ca rinnëda' ládxa'a lu yöl-la' ruhuí'ini quia'.

² Dios quia', Nu rinná be'e neda', ruzé' nagu' cate' rinábida' Li'
gácalenu' neda', na' gúf'ilena' Li' didza'.

³ Yugu' zila yönnu' chí'a.

Zílado' idxina' lo', en cöza' didza' ubi'u.

⁴ Nacu' Li' Dios bití' raza ládxi'u le cabí naca,
en bití' ru'u lataj ibiga' ga zu' nu ruá' dö'.

⁵ Bití' ru'u lataj nupa tun ba rahui ila'dxín lo',
en bití' rilé'enu' dxi'a nupa nácgaca xihui'.

⁶ Rusunítíu' dërö nupa ta'zì' ye'e luzé'eguequi,
en bití' rilé'enu' dxi'a nupa tuti bönachi, en ta'zì' yë'.

⁷ Gaca tsu'a neda' lu yu'u lidxi', tu' nadxí'ide'enu' neda'.

Lu yöl-la' ba'a ladxí' quia' tsu'a ga naca yudo' lá'ayi quiu', en tseaj ládxa'a Li'.

⁸ Tu' nacua' zían nupa ta'lé neda', buluí' neda' le naca dxi'a rë'ënu' guna', Xan.
Busëdi neda' para gaca guna' ca rë'ënu' Li'.

⁹ Bití' gaca nu tseajlé' didza' tu'í nupa na' ta'lé neda'.

Nácgaca xihui' icja ládxi'do'guequi.

Naca ruá'agaca ca tu yeru ba nayalaj,
en lu yöl-la' rizí' yë' quéguequi tu'í yulaj didza'.

¹⁰ Ben léguequi xíguia', Dios.

Ben ga bití' udxín xtídza'guequi.

Gurú'una léguequi tu' túntica'sö dul-la',
en tu' ta'dá'baga' xtídz'u.

¹¹ Ulu'dzeja nupa tu'zxöni ladxí' Li'.

Lu yöl-la' rudzeja quéguequi gúl-lagaca quiu' tu' rácalenu' léguequi.

Tu'zì' xibó' nupa nadxí'igaca Li'.

¹² Run cazu' Li' ga raca dxi'a quégaca nupa tun ca rnna xtídz'u, Xan.

Lu yöl-la' dxi'i ladxi' quiu' run chi'u léguequi.

6

¹ Biti' uzenu' bach neda' lu yöl-la' rilé quiu', Xan.

Biti' gunu' neda' xigua' lu yöl-la' ridzá'a quiu'.

² Buéchi' ladxi' neda', Xan, tu' rudú ládxa'a.

Bun neda', Xan, tu' riguí'i rizáca'a.

³ Rö'ö böniga idútê le naca'.

⁴ Gáca' xte caz gaca caní, Xan?

⁴ Gudá dusöló' neda', Xan.

Tu' nadxfí'inu' neda', busólá neda' lu yöl-la' guti.

⁵ Lu lataj chul-la cuntu nu tsójné Lí'.

Cuntu nu zoa ni' nu gaca cu'u Li' yöl-la' ba.

⁶ Rudú ládxa'a tu' rinnética'só ládxa'a.

Yugu' dzö' ribisa le ráti'da' len nisa ribödxí quia'.

Rusubisa' xcúgua' len nisa ribödxí quia'.

⁷ Rö'ö gui guíōj lahua' tu' ribödxítica'sa'.

Biti' gaca ilé'eda' tu' nözígaca nupa tu'dí'i neda'.

⁸ Guli'cuíta ga zoa', libí'ili', ruá'ali' dö',

tu' riyönné' Xanru' ribödxá' neda'.

⁹ Ruzé' nague' le rulidza', ráta'yua' lahué',

en rubi'è didza' cate' bi rinábida' Lè'.

¹⁰ Ulu'tuí'i nupa tu'dí'i neda', en ila'bö' böniga.

Lu yöl-la' rutuí'i quéguequi ulu'biga' ga zoa'.

7

¹ Ruzxöni ládxa'a Li', gácalenu' neda', Xana' Dios.

Busólá neda' lu ná'agaca nupa ta'bía no neda', en gúcalen neda'

² para cabí soa nu cuéaj neda' ca runba' bédxi guixi',

en para cabí usuniti neda' ga cuntu nu zoa gácalen neda'.

³ Xana' Dios, channö caní nuna':

Channö nabága'a xigua',

⁴ o channö bubí'a dö' que nu gúcalen neda',

o channö bi'a dö' que nu bití' bi ben quia' lu bití' rilé'e neda' dxi'a,

⁵ bē' lataj soa regu' neda' nu na' bití' rilé'e neda' dxi'a, en ucul-la neda'.

Bē' lataj nu na' quin neda' lu yu,

en uca'ana neda' cá'asö.

⁶ Lu yöl-la' rilé quiu' guyasa, Xan.

Gudá'baga' nupa na' lu yöl-la' ridzá'a quéguequi tá'baga' neda'.

Guyasa, gúcalen neda' tu' nacu' Nu ruchi'a rusörö le raca quia'.

⁷ Ben ga ulu'dubi quiu' yúgu'tê bönachi,

en gunná be'e léguequi ga ni' zu' xitsá'têrö.

⁸ Ruchi'a rusöröu' quéguequi yúgu'tê bönachi, Xan.

Bubéaj neda' tsahuí', Xan, tsca naca le tsahuí' nuna', en tu' naca' idú tsahuí'.

⁹ Ben ga udxí que le xihuí' tun nupa tuá' dö',

pero buzóa tsutsu nupa tun le naca dxi'a,

tu' nacu' Li' idú tsahuí', Dios, en ruchi'a rusöröu'

le ta'zá' ládxi'gaca bönachi, en le ta'guínnaj ícjaguequi.

¹⁰ Naca cazē' Dios Nu run chi'i neda'.

Rusólé' nupa ná'agaca idú ladxi'.

¹¹ Dios ruchi'a rusöröē' queēru' ca naca le naca tsahuí',

en richúgútica'sé' quégaca nupa tuá' dö'.

¹² Channö cabí ulu'bi' ladxi' bönachi, utuchē' guíē' tuchi' queē'.

Chinucözē' uxiti' yaga queē'.

¹³ Chinupē'ē' yugu' le rudí'inē' lu gudil-la,

en nudxié' lu du uxiti' yugu' yaga túchi'do' zoa guí' láhuiguequi.

¹⁴ Buyútsöca', riguínnaj ícjē' bönni' ru'è dö' le xihuí' gunē'.

Ruí'i ládxi'è le naca dö', en rizí' yē'è.

¹⁵ Nach'ónē' ga rē' tu yeru zxon ga nu ibixi,

pero lè cazè' yòjbixè' lu yeru na' guchò'ònè'.

¹⁶ Budxín la' queéžé' dō' na' bi'è,
en dxíè' huè' ca naca xiguia' nabáguè'è.

¹⁷ Guía'-nè' Xanru': "Xclenu'" tu' náquiè' tsahui',
en gul-la' yól-la' ba que Lè' Xanru', Nu nayépisètèrō.

8

¹ Xana' Dios,

bica' ba Lo' idútè yōdzólió!

¡Xitsá'tērō ca lúzxiba nayépisu' Li'!

² Túl-labi' bí'ido', enca' bi'i hué'énido' yól-la' zxōn quiu'
sal-la' nacuá' nupa ta'dá'baga' Li'.

Uzóa dxíu' nupa na' biti' ta'lé'e Li' dxi'a, enca' nupa ta'dá'baga' Li'.

³ Cate' ruyúa' lúzxiba quiu', le nunu' len xibōn na'zu',
enca' beu', en yugu' bōlaj bení' nuzú' xilátjaguequi,

⁴ ní'irō rnnía': ¿Bizxi caz bōnni', tu' rōjné casu' lé'?

¿Bizxi caz nu naca bōnáchisō, tu' ruí'i ládxi'u Li' nu na'?

⁵ Nunu' ga naquiè' bōnni' ia'lati' cuidi' ca naca casu' Li'.

Nuzú' queè' yól-la' ba quiu', en yól-la' run bal ca
tu le néquini oro dxía icjé'.

⁶ Nunu' ga rinná bé'ené' yugu' le nun casu' Li'.

Yúgu'tè nuzú' xini'è lé'.

⁷ Nuzú' xini'è yúgu'tèba' bō'cu' zxila', en yúgu'tèba' bēdxi,

⁸ en lēs caní nunu' ca' quégacaba' biguínido',

en quégacaba' bōla dzō'ōba' nísado',

enca' quégacaba' yúgu'tèba' bōa' ta'dódiba' lu nísado'.

⁹ Xana' Dios,

bica' ba lo' idútè yōdzólió!

9

¹ Idú ládxa'a rigu'a Li' yól-la' ba, Xan!

¡Usiyōnda' bōnachi ca naca yúgu'tè yól-la' huáca nunu'!

² ¡Udzéjada', en uzi'a xibó'!

¡Gul-la' yól-la' ba que Lo', tu' nayépisètèru'!

³ ¡Ta'zxunnaj nupa ta'dá'baga' neda'!

¡Ta'dzō'ō, en tu'niti lo' Li',

⁴ tu' nubéaju' tsahui' le naca dxi'a runa'!

¡Rō'u ga rinná bē'u, en ruchi'a rusōrōu' queétu' ca naca le naca tsahui'!

⁵ Bulidza zi'u yugu' yōdzō, en busunítu' nupa tuá' dō'.

Tsaz busulu' lu guichi quiu' gapa gula'zúaj láguequi.

⁶ Chigula'niti nupa gula'dá'baga' Li'.

Tsaz naguínnaigaca gapa gula'cuá'.

Busunítu' yugu' yōdzō gapa na' gula'cuá',

ate' cuntu nu zoa rōjné yugu' yōdzō na'.

⁷ Zóatica'sè' Xanru' Dios.

Naguijé' tsaz lataj ga rō'è rinná bē'è en ruchi'a rusōrōè' quégaca bōnachi.

⁸ Uchi'a usōrōè' quégaca bōnachi yōdzólió lu le naca tsahui'.

Uchi'a usōrōè' quégaca yugu' yōdzō lu le nácatè.

⁹ Gun chí'è Xanru' Dios nupa nácacaca yechi'.

Gácalenè' léguequi cate' nu gun léguequi zi'.

¹⁰ Ulu'zxōni ládxi' Li' nupa núnbè'gaca Lo'.

Caní gaca, Xan, tu' cabí nusán ládxi'u nupa tu'guilaj Li'.

¹¹ Gulí'gul-la yól-la' ba queè' Xanru', zoè' ga na' nazí'i le Sión.

Bulí'siyōn bōnachi yugu' yōdzō ca naca yugu' le nunè'.

¹² Biti' ral-la ládxi'è nupa ta'guí'i ta'zaca' cate' tu'lidza Lè',

tu' rōjné léguequi Nu na' ruzi' lébi nu ruti bōnachi.

¹³ Buéchi' ládxi' neda', Xan.

Buyú ca tun neda' zi' nupa tu'dí'i neda'.

Ruchisu' Li' neda' cate' chirequi gátia'

¹⁴ para gaca usiyóna' bônachi yól-la' ba quiu' Li'.

Ga naca ga nu tsaza yödzo quiu' nazí'i le Sión,
udzéjada' tu' nusóló' neda'.

¹⁵ Yöjbíxigaca bônachi yugu' yödzo lu yeru gula' ch'õna ga tsöjbíxigaca luzé'eguequi.
Bila' rôli ni'aguequi lu yõxaj bulu'cachi' para ila'zõn léguequi.

¹⁶ Chinunë' Xanru' Dios ga nünbë'gaca bônachi Lë' tu' buchi'a busöröë' quéguequi.
Lu lë na' nun nu ruá' dö' zõn la' cuinsi.

¹⁷ Ila'yaza lataj chul-la nupa tuá' dö',
yúgu'të nupa na' nal-la ládxi'gaca Dios.

¹⁸ Calëga tsaz ulu'gá'ana cá'asõ nupa ta'yadzaj ta'yudxi,
en bití' iníti tsaz yól-la' run lôza quégaca nupa nácgaca yechí'.

¹⁹ Guyasa, Xan.

Bití' gu'u lataj tsëpisë nu naca bônáchisõ.

Buchi'a busöró quégaca bônachi yugu' yödzo.

²⁰ Buxõs léguequi, Xan.

Ben ga ulu'únbë' le nácgaca, tu' nácgacasõ bônachi.

10

¹ ¿Bizx que zu' zi'tu', Xan?

¿Bizx que rucachi' lo' cate' bi raca quia'?

² Lu yól-la' run ba rahui quégaca nupa tuá' dö'
ta'bia nu nupa nácgaca yechí'.

Ben ga ila'zõn du yalaj na' nucáchi'gaca la' léguequisõ.

³ Run ba zxõn cuinë' bõnni' ru'ë dö' ca naca le xihui' rizë ládxë'ë.

Bõnni' ruhuídi'në' rulidza ditjë' luzë'ë, en ruzóë' Dios tsólá'alõ.

⁴ Lu yól-la' run ba zxõn cuinë' bõnni' huía' dö' bití' ru'í ládxë'ë Dios.

Rizá'asõ ládxë'ë, rnnë': Bití' ca' zoa Dios.

⁵ Ruzi'ë xibé yúgu'të le runë'.

Bití' ca' réquibe'enë' zoë' Dios Nu ruchi'a rusörõ quégaca bônachi.

Ruzóë' tsólá'alõ nupa bití' ta'lé'e lé' dxi'a.

⁶ Rë' la' cuinsë': "Gatga ichíxida'.

Catu caz bi gaca quia'."

⁷ Didza' ru'ë nácgaca le rudxía dö', enca' le rizi' yë', en le rudidza' yudxi yugu' luzë'ë.

Ruí'tica'së' didza' le cabí nácatë, en le naca xihui'.

⁸ Rucachi' cuinë' yugu' lu yödzo.

Bagáchi'sõ rútië' nupa bití' bi nabága'gaca.

Ruyúlanë' nu bi gaca gun que.

⁹ Ribözë' ga na' nucachi' cuinë' ca runba' bëdxi guixi'.

Ribözë' nu gaca sönë'.

Rizõnë' bõnni' yechí' lu du yalaj queë', en rá'ayöjë' lë' ga nagachi' queë'.

¹⁰ Riguinë' luyú nu na' nazõnë'.

Zián nupa rucul-lë' len në'ë nal-la.

¹¹ Rë' la' cuinsë': "Nal-la ládxë'ë Dios.

Nucachi' lahuë', en bití' ca' rilé'enë' le runa'."

¹² ¡Guyasa, Xan!

¡Gulís no'o, Dios!

¡Bití' gal-la ládxu'u nupa ta'gu'í ta'zaca'!

¹³ ¿Bizx que bõnni' na' ru'ë dö' nuzóë' Dios tsólá'alõ?

Gudxë' la' cuinsë': Bití' uzí' lë' Dios neda'.

¹⁴ Li' bilé'e quézinu' lë ni, Xan.

Ruí'í ládxu'u nu riguí'í rizáca', en nu risëbi ladxi',

en zóatica'su' gácalenu' léguequi.

Nu naca bayechí' rigú'u cuini lu no'o, Xan,

tu' zóatica'su' gácalenu' nu riyadza riyudxi.

¹⁵ Bugúa yól-la' unná bë' quégaca nupa tuá' dö', en nácgaca xihui'.

Bubí'í quéguequi ca naca xigua' nabága'gaca.

¹⁶ Inná bë'tica'së' Xanru' Dios.

Nupa tu'béaj ícjaguequi Xanru' ulu'niti tsaz lu xiyú cazë'.

¹⁷ Ruzé nagu', Xan, le ta'nábini Li' nupa nácgaca do' ladxi'.
Rutípu' ládxí'guequi, en ruzé nagu' chí'iguequi.

¹⁸ Ruchi'a rusórou' quégaca nupa nácgaca uzëbi,
en nupa zoa nu ribía no léguequi,
para cabirö ulu'xósa bönachi yödzülió ni luzé'eguequi.

11

¹ Ruzxöni ládxa'a Xanru' gácalenë' neda'.

¿Naru' guíétso' neda':

“Buzxúnnaj lu guí'a ca runba' biguínido”?

² Buyútsöca', zóngaca nupa tuá' dö' yaga uxiti'.

Nuzóagaca yágado' lahui tuchi' lu du rusé,
para ilútië' bagáchi'só nupa nácgaca dxi'a.

³ Channö ila'guínnaj yugu' le tu'zóa tsutsu le naca dxi'a,

¿bizxi caz gaca gun nu naca tsahui'?

⁴ ¿Zoa cazë' Xanru' yudo' lá'ayi queë'!

Yehua' yubá zoa ga rö'ë rinná bë'ë Xanru' Dios.

Rilé'e guiólahuë' para uyüé' le tun bönachi.

⁵ Rizí' bë'ë Xanru' nu naca tsahui'.

Biti' rilé'enë' dxi'a nu ruá' dö', en nu raza ladxi' ta'dá'baga' yúlahui'.

⁶ Gunë' ga sáca'gaca nupa tuá' dö' le usuniti léguequi.

Ubi'ë quéguequi guí', en le ruquéla' guí', en tu bö' régui.

⁷ Caní gunë' Xanru' tu' náquië' tsahui', en nadxi'inë' le naca tsahui'.

Nupa tun le nácaté ila'lé'e lahuë'.

12

¹ Busólá neda', Xan, tu' cabirö zoa nitú nu naca dxi'a,

en bití' gaca nu idzöli nitú nu run ca rnna xtídza'a.

² Ta'zí' ye'e yúgu'të bönachi luzé'eguequi.

Lu yöl-la' rizí' yë' quéguequi tuí'ilen luzé'eguequi didza' yúlajdo'.

³ Xan, buzóa dxisó nupa na' tuí' didza' yúlajdo',

en buzaga' ruí'igaca nupa tun ba zxön cúinguequi.

⁴ Ta'nná: “Güí'iru' didza' ca rizësö ládxí'ru',
ate' cuntu nu tá'baga' rë'u.

¿Nuzxi caz inná be'e rë'u ca naca didza' ruí'iru'?”

⁵ Rnnë' Xanru': “Na'a guída' tu' nacua' nupa tun zi' nupa ta'yadzaj ta'yudxi,
ate' rinnë ládxí'gaca nupa ni tu' zoa nu ribía no léguequi.

Ca ta'zësö ládxí'gaca, la' guídatea' dusólá' léguequi.”

⁶ Huáca uzxöni ládxí'ru' didza' ru'ë Xanru'.

Nácgaca ca guíë plata ba nequi,

le nudxi'a gadxi luzuí tu lu guí' lálë'e.

⁷ Li' caz, Xan, gun chí'u léguequi,

en usóló' léguequi lu ná'agaca nupa tuá' dö' na'a dza.

⁸ Gátí'tës nacua' nupa tuá' dö',

cate' tun zxön bönachi le ruá' dö'.

13

¹ ¿Gáca'xte caz gal-la ládxu'u neda', Xan?

¿Naru' tsaz gal-la ládxu'u neda'?

¿Gáca'xte caz ucache' cuinu' lahua'?

² ¿Gáca'xte caz gun bayudxi guá' ilena' le réquida' zi'?

¿Gáca'xte caz huí'inida' rëla, en te dza?

¿Gáca'xte caz ucúl-lágaca neda' nupa ta'dá'baga' neda'?

³ Buyú neda', Xan, en bubí'i didza'.

Butípa ládxa'a para cabí gátia'.

⁴ Ní'irö bití' gaca ila'nná nupa ta'dá'baga' neda', bití' ila'nná: “Bucúl-laru' lë'.”

Bití' gaca ulu'dzeja tu' nótjada' ládxa'a neda'.

⁵ Neda' ruzxöni ládxa'a yöl-la' dxi'i ladxi' quiu'.

Rudzéjada' tu' rusöló' neda'.

⁶ Gul-la' queé' Xanru',
tu' bené' quia' le naca dxi'a.

14

¹ Lu icja ládxi'da'ahué' rnné' bönni' tu' canóz, rnné': Biti' zoa caz Dios.
Nachixi nanítigaquié' bönni' caní, en tuné' le cabí rilé'ené' dxi'a Dios.
Cuntu nu zoa nu run le naca dxi'a.

² Ga zoé' Dios yehua' yubá buyúé' luyú ni ga nacuá' bönachi
para ilé'ené' channö zoa nu réajni'i, nu na' riguilaj Dios.

³ Yúgu'té' nadódigaquié' tsölá'aló.

Nachixi nanítigaquié' tu tué'.

Cuntu nu zoa nu run le naca dxi'a, nitú bönachi.

⁴ ¿Naru' cabí ta'yéajni'i nupa tuá' dö'?

Le tun nupa na' naca tsca tagu bönachi quia' ca nu ragu yöta.
Biti' ca' tu'lidza neda', Xángaca bönachi.

⁵ Lu yöl-la' radxi ridzöbi quéguequi ta'zxizi
tu' ta'lé'e Xanru' Dios, en zóalené' bönachi tsahui'.

⁶ Tu'titaj xtídza'gaca nupa nácgaca yechi',
pero nupa ni tu'zxóni ladxí' gácalené' Xanru' léguequi.

⁷ Raca ládxa'a irúaj Sión Nu usólá bönachi Israel.

Cate' guné' Xanru' ga ulu'dxin bönachi queé' nadzúngaca xilátjaguequi,
ulu'dzeja xzi'ini xi'sóé' Jacob, bönachi Israel, en ulu'zi' xibé' Dios.

15

¹ ¿Nuzxi caz bönachi tsöjsóa xilatju', Xan?

¿Nuzxi caz tsöjsóa ga naca lá'ayi quiu'?

² Nu na' naca idú ladxí', en run le naca tsahui',
en lu icja ládxi'da'ahui' ruf'i didza' le nácaté.

³ Nu na' bití' rizi' quidza' bönachi,
en bití' ruá' dö' que luzé'e,
en bití' ruzé naga nu rizi' quidza' luzé'e.

⁴ Nu na' bití' run bal nu ruá' dö',
pero run bal nupa tun zxön Dios,
en sal-la' bi uniti cate' chinún xtídza', bití' ca' rutsá' didza' na'.

⁵ Nu na' bití' rizi' icja dumí cate' runódzaj dumí que tu chí'ido'só,
en bití' rizi' dumí para si' yé' ca naca le nun nu bití' nabaga' xigua'.
Nu na' run yúgu'té le caní bití' ca' idzá' xilataj.

16

¹ Ben chí'i neda', Dios, tu' ruzxóni ládxa'a Lí'.

² Lu icja ládxi'da'ahua' gudxa'-né' Xanru':

"Lí' nacu' Xana'.

Bití'rö bi zoa quia' le naca dxi'a, pero tuzu' Lí'."

³ Riyaza ládxi'léna' nupa nácgaca queé' Dios luyú ni,
en nupa nácgaca idú ladxí'.

⁴ Ila'yán le ila'guí'i ila'zaca' nupa ta'yéaj ladxí' yugu' dios izá'a.

Bití' ca' cu'a láhuiguequi rön ca tun bönachi na',
en bití' ulidza' lágaca dios na'.

⁵ Náquié' Xanru' Dios Nu nabánida', en Nu ruzi'a xibé.

⁶ Lí', Xan, nuzú' xilatja'.

Lataj na' nuzú' quia' naca le ruzi'a xibé,
en lachi naca lataj na' nequi quia'.

⁷ Gul-la' yöl-la' ba queé' Xanru', Nu rigú'u yöl-la' neda' le naca tsahui',
ga ridxinté ruzéajni'iné' neda' cate' ni' rasia'.

⁸ Chinuna' ga zóatica'sé' Xanru' lahua'.

Tu' zoé' cuita' bití' bi utsá' neda'.

9 Que lë ni na' budzeja ládxa'a, en buzí' xibé ládxi'da'ahua',
 ate' gun lóza le naca' cate' igácha'a yeru ba,
 10 tu' cabí uca' anu' neda' lataj chul-la,
 en bití' gu'u lataj uniti nu nequi quez quiu'.
 11 Nunu' ga núnbë'a nōza iché' neda' ga soa' ibana'.
 Ga zu' Li' gata' quia' yöl-la' rudzeja idú,
 ate' cuitu' Li' uzi'tica'sa' xibó'.

17

1 Ruzé nagu' neda', Xan.
 Lu le naca tsahui' quia' rulidza' Li'.
 Bë' ladxi' le rinábida' Li' tu' cabí ca' rizi' yë'a.
 2 Buchi'a busörö quia'
 tu' runu' Li' le naca tsahui'.
 3 Núnbë'u Li' le yu'u ládxi'da'ahua'.
 Ruyú' neda' chí'i dzö'ölö.
 Guzxí' bë'u neda', ate' burúaja' tsahui'.
 Biti' ca' ruá'a didza' le cabí naca idú dxi'a.
 4 Runa' ca rinná bë' xibá quiu',
 en bití' ca' ruá'a dö' ca tun bal-la bönachi.
 5 Ridática'sa' la' nōza tsahui' quiu',
 en bití' ca' ridōda' tsōlá'alö.
 6 Rulidza' Li', Dios, tu' rubi'u didza'.
 Ruzé nagu' yugu' didza' ruá'a.
 7 Buluí'i lahui yöl-la' dxi'i ladxi' quiu'.
 Rusólá cazu' nupa tu'zxōni ladxi' Li'
 lu ná'agaca nupa ta'dá'baga' léguequi.
 8 Ben chí'i neda' ca run chí'u la' guiōj lo cazu'.
 Bucachí' neda' cuitu' Li' ca runba' bōra, rucáchí'gacaba' bōrado' zxan xílabá',
 9 para cabí bi ilún quia' nupa tuá' dö',
 nupa na' ta'lé neda', en nagú'ugaca neda' lë'ajlö.
 10 Bití' ca' zóalen léguequi yöl-la' ruhuéchi' ladxi',
 ate' tuí'i didza' lu yöl-la' run ba zxōn cúinguequi.
 11 Gátí'tës ga ridōda' ta'gú'u neda' lë'ajlö,
 en tē'ëni ila'guín neda' luyú.
 12 Nácaqaquië' ca yugu' bédxi guíxi'do'.
 Té'ënë' ulu'sunítië' neda'.
 Nácaqaquië' ca yugu' bédxi guixi'.
 Nucachí' cúingaqië' para ila'zōnë' neda'.
 13 Gudá, Xan, gudá'baga' nupa ta'lé neda', en bucul-la léguequi.
 Busólá neda' lu ná'agaca nupa tuá' dö', ugunu' dxin guíë tuchi' quiu'.
 14 Lu yöl-la' huáca zxōn quiu' busólá neda', Xan,
 lu ná'agaca nupa tu'zí' xibé na'a dza,
 nupa na' nuhuólaj nudzë'egaca yöl-la' tsahui' quiu'.
 Nayángacabi' zxfínigaqië',
 ate' tu'cá'anë' lu ná'agacabi' le dë sizxōni quégaquië'.
 15 pero neda' ilé'eda' lo' tu' naca' tsahui',
 en tsaza ládxa'a gaca' ca nacu' Li' cate' ubana'.

18

1 ¡Nadxfí'ide'eda' Li', Xan!
 ¡Li' rutipa cazu' ládxa'a!
 2 Ruzóë' Xanru' neda' tsutsu, en rapa chí'ë neda', en rusölë' neda'.
 Náquië' Dios quia', en Nu rutipa ládxa'a,
 ate' ruzxōni ládxa'a Lë'.
 Rácalenë' neda' lu gudil-la: Rusölë' neda', en rizōnë' neda'.
 3 Rulidza'në' Xanru' Nu ral-la' cú'uru' yöl-la' ba,
 ate' usölë' neda' lu ná'agaca nupa tu'dí'i neda'.
 4 Ia'látí'sō la' gútiá',
 ate' yōjbaga' neda' le usuniti neda', le ben ga gúdxida'.
 5 Ia'látí'sō la' yōjtsu'a lataj chul-la que yöl-la' guti,

tu' la' gútitia'.

⁶ Lu le guca quia' bulidza'-nè' Xanru'.
Bulidza'-nè' Dios quia' para gácalenè' neda'.
Ga na' zoè' lataj lá'ayi queè' biyönnè' chi'a.
Buzè' naguè' le gunabi yúdxida' Lè'.

⁷ Ní'irö gudödi budó' zxu', en guxzixi luyú.
Guzxízida' xilíbigaca yugu' gu' a sibi.
Guzxízigaca tu' gulénè' Lè'.

⁸ Birúaj dzön zxinè'è,
ate' birúaj gu' ru'è le buzegui le dè idú gásibi'ilè',
ate' buguela' gu' yugu' bo' yalaj.

⁹ Benè' ga bötaj lúzxiba, en bötajè' Lè' cazè',
ate' guzóa zxan ní'è le naca chul-la.

¹⁰ Gudödè' lu bö'ös dxíè' tu le nayépisè nazi'i le querubín.
Carelö gudödè' tu lu bö' budunu'.

¹¹ Busubaga' cuiné' le naca chúl-lasö.
Lè na' naca böaj gasaj le riché'lè'e nisa.

¹² Lu le rèpi yösa queè' lu böaj gasaj na'
bila'ruaj bo' yalaj, en guiöj bögui' yöla sunna.

¹³ Gunnè guziú' que chi'è Xanru' lúzxiba xitsá'.
Biyön chi'è Dios nayépisètèrè',

lu dzön, en yugu' lu bo' yalaj, en lu guiöj bögui' yöla sunna.

¹⁴ Gusól-lè'è yugu' yaga lahui tuchi' queè', en bésilásiè' nupa na' tu'dí'i neda'.
Gusól-lè'è yugu' yösa queè' yugu' le bulu'cul-la léguequi.

¹⁵ Ní'irö bilá' lahui le zoa zxan nísado',
ate' bilá' lahui xilibi yódzolió,
cate' buzenu' bach nupa biti' ta'lé'e Li' dxi'a, Xan,
en lu yöl-la' rilé quiu' bulidza zí'u léguequi.

¹⁶ Bötjè' zaca' xitsá'alö, en gudélè'è neda'.
Bubéajè' neda' lu nisa zili.

¹⁷ Busólè' neda' lu na' nu biti' rilé'e neda' dxi'a, en nál-latèrö,
enca' lu ná'agaca nupa tu'dí'i neda', en nál-lágacatèrö ca neda'.

¹⁸ Cate' ní' chizóa inítia' gula'zóa régu'è neda',
pero Xanru' gúcalenè' neda'.

¹⁹ Bubéajè' neda', en buzóè' neda' tu lu lataj zxon.
Busólè' neda' tu' guyaza ládxè'è neda'.

²⁰ Bubi'è Xanru' quia' tsca le tsahui' naca',
en benè' quia' le naca dxi'a tu' cabí nabága'a xiguia',

²¹ tu' runa' ca naca le rusédinè' Xanru' neda',
en biti' ca' ridá'baga'a Lè'.

²² Runa' ca ta'nná xibá nunè' Xanru',
en biti' ridá'baga'a le rinná bè' naguixjè' Lè'.

²³ Biti' bi le naca dö' nabága'a lahuè' Lè',
ate' ben chi'a le innía' para cabí gu'a dö'.

²⁴ Que lé ni na' bubi'è Xanru' quia' tsca le tsahui' naca',
en tu' cabí nabága'a xiguia' lahuè' Lè'.

²⁵ Ruhuéchi' ládxu'u nupa tu'huechi' ladxi' luzè'eguequi,
en nacu' idú dxi'a len nupa náacagaca idú dxi'a.

²⁶ Rulú'i cuinu' idú ladxi' len nupa náacagaca idú ladxi',
pero ridá'bagu'u nupa ta'dá'baga' xtídzu'u.

²⁷ Rusóló' nupa ta'gu'i' ta'zaca',
pero ruzòtju' nupa tun ba rahui.

²⁸ Ruquéla' casu' guí' quia', Xana' Dios,
en rigú'u quia' bení cate' ridá' ga chul-la.

²⁹ Lu yöl-la' huáca queè' Dios rucul-la' bönni' guizxi yu rójáquiè' gudil-la.
Tu' zóalenè' Dios quia' neda',

rixítia' ribixa' lu zö'ö run chi'i léguequi.

³⁰ Idú dxi'a náacagaca le runè' Dios.

Nurúaj tshui' xtídzë'ë.

Rapa chi'ë yúgu'të nupa ta'nábini Lë' gácalenë' léguequi.

³¹ ¡Tuzë' Xanru' náquië' Dios!

¡Tuzë' Dios rapa chi'ë rë'u!

³² Dios ni ruzalë' neda',

en runë' ga naca' idú ládxa'a.

³³ Runë' ga nácacaca ni'a ca ní'agacaba' bidxina' guixi',

en ruzóë' neda' yugu' lu guí'a zxön.

³⁴ Rusédinë' neda' para gaca tseja' gudil-la,

en para gaca uguna' dxin uxití' yaga néquini guíë bronce.

³⁵ Lu yöl-la' rusölá quiu' run chi'u neda'.

Len no'o nál-la rizönu' neda',

en lu yöl-la' dxi'i ladxí' quiu' nunu' ga nayépisëtëra'.

³⁶ Ruchi'u nöza ga ral-la' tóda',

en runu' ga bití' cuila'.

³⁷ Guzóa régu'a nupa tu'dí'i neda', en bucul-la' léguequi.

Bití' buécja' ga bidxintë busunítia' léguequi.

³⁸ Gudina' léguequi luyú, ate' bití' guca ulu'huóása.

Gula'dzö'ö zcan ni'a.

³⁹ Benu' neda' nál-la para tseja' gudil-la,

en benu' ga bucul-la' nupa gula'dá'baga' neda'.

⁴⁰ Benu' ga bulu'zxunnaj lahua' nupa bití' ta'lé'e neda' dxi'a,

ate' busunítia' nupa na' bulu'dí'i neda'.

⁴¹ Bulu'lidza nu gácalen léguequi,

pero cuntu nu zoa usölá léguequi.

Bulu'lidza ca' Xanru', pero bití' bubí'ë didza'.

⁴² Buzxuzxja' léguequi ca bëchtö yu nachë' lu bö'ös.

Buliba' léguequi ca ruliba' guna' la' nöza.

⁴³ Busöló' neda' lu ná'agaca nupa ta'dá'baga',

en nunu' ga rinná bé'eda' bönachi zián yödzö.

Tun ca rnna xtídzá'a bönachi bití' núnbë'a zí'alö.

⁴⁴ Cate' ta'yöni neda', la' tun ca rnna xtídzá'a.

Tadxí neda' bönachi zián yugu' yödzö izá'a.

⁴⁵ Ta'cuidi' ladxí', en lu yöl-la' rixxizi quéguequi

ta'rúaj yugu' lu yödzö tsutsu quéguequi.

⁴⁶ ¡Zoë' nabanë' Xanru'!

¡Yöl-la' ba Nu na' run chi'i neda'!

¡Gulí'gún zxön Dios Nu rusölá neda'!

⁴⁷ Náquië' Dios Nu rizí' la nupa tu'dí'i neda',

en runë' ga tadxí bönachi guizxi yu neda'.

⁴⁸ Rusölë' neda' lu ná'agaca nupa bití' ta'lé'e neda' dxi'a.

Le nácatë runë' ga rucul-la' nupa ta'dá'baga' neda',

en rusölë' neda' lu na' bönni' ridzá'a.

⁴⁹ Que lë ni na' guía' Li': Xclenu' Xan, lógaca bönachi zián yödzö,

en gul-la' yöl-la' ba que Lo' La'ayi.

⁵⁰ Rusölá cazë' Xanru' bönni' rinná bë'ë uláz queë',

en nadxí'itica'së' nu na' nabö cazë',

nu na' naca David, en yugu' zxi'ini xi'sóë' ga idxinrö dza udxi.

19

¹ Yugu' le nacua' lúzxiba tu'luf'i lo yöl-la' zxön queë' Dios,
ate' yugu' le raca lu bö'ös nácacaca bë' le nunë'.

² Yugu' dza tu'zéajni'i,

en yugu' dzö' tu'luf'i lo yöl-la' réajni'i.

³ Bití' zoa didza' tuf'i, en bití' riyón tu le ta'nná.

Bití' riyón chí'iguequi.

⁴ Le tu'zéajni'i ridxín ga naguéla'të luyú,

en le tu'sedi ridxín idútë yödžölió.

Ga na' nacuá' nuzóë' Dios xilataj gubidza,

⁵ le naca ca tu bönni' utsaga në'ë rirúajë' yu'u,

en naca ca' ca tu bönni' nál-la rudzéjanë' cate' zéajë' carelö lu huitaj.

⁶ Ga naguela' lúzixa rilén gubidza,

en ridódi ga ridxintë ga ribía.

Biti' bi zoa le cabí rutsë'e gubidza na'.

⁷ Tsahui' naca ca rinná bë'ë Xanru', en run ga huóaca ládxi'ru'.

Idútë li naca didza' nuzóë' Xanru', le run ga réajni'i nu naca nöxaj ladxi'.

⁸ Tsahui' nácagaca xibá queë' Xanru', le tun ga rudzeja ládxi'ru'.

Nácagaca idú dxi'a le gunná bë'ë Xanru', en ta'gú'u bení' icja ládxi'do'oru'.

⁹ Dxi'ado' naca gádxiru'-në' Xanru', para sóatica'siru'.

Idú li naca ca ruchi'a rusóróë' Xanru' bönachi, en idú tsahui'.

¹⁰ Nazáca'gacatërö didza' na' ca oro, enca' ca oro ba nequi.

Nácagacatërö zxixi ca bidxina' buz, en ca le zxixi queë'ba'.

¹¹ Didza' na' tu'zéajni'i neda', huen dxin queë'.

Uzi'tërö xibé nu run ca rnna xtídzë'ë na'.

¹² ¿Nuzxi caz gaca inöz channö richixi rinigui?

Busólá neda' lu dul-la' nuna' le cabí gúquibe'eda' bena'.

¹³ Ben chí'i neda' para cabí udódi cuina' lu dul-la',

para cabí inná be'e neda' lë na' naca dul-la'.

Ní'irö ugá'ana' tsahui', en bití' ibága'a xiguia'.

¹⁴ Ben ga ilaca didza' ruá'a, en le rizá' ládxa'a ca raza ládxi'u Li'.

Nacu' Xana' ruzú' neda' tsutsu, en ruhuóá'au' neda'.

20

¹ Rinábida'-në' Xanru' uzë naguë' li' cate' idxín dza qui'i sacu'u.

Dios queë' Jacob gácalenë' li'.

² Rinábida'-në' isól-lë'ë le gácalen li' le irúaj lataj lá'ayi queë'.

Lë na' irúaj Sión gun ga gacu' tsutsu.

³ Rinábida'-në' tsójnenë' yúgu'të le gulú'u queë',

en si' lu në'ë le buzégui'u lahuë'.

⁴ Rinábida'-në' gunné' quiu' tsca naca le rizë ládxi'u,

en gunë' ga gácatë yúgu'të le rizá' ládxi'u.

⁵ Udzéjatu' cate' usólë' li',

en uchísatu' le gaca bë' rulidztu'-në' Dios queë'ru'.

Rinábida'-në' Xanru' gunné' quiu' yúgu'të le rinábinu' Lë'.

⁶ Na'a nözda' rusólë' Xanru' nu nabó cazë'.

Riyönnë' nu na' naböë' ga ni' zoë' yehua' yubá la'ayi queë'.

Isól-lë'ë yöl-la' huáca idú queë' le usólá nu na'.

⁷ Nacuá' nupa tu'zxóni ládxi' yugu' carreta que gudil-la,

ate' nacuá' bönachi yúbölö tu'zxóni ládxi' yugu' böa',

pero rë'u ruzxóni ládxi'ru' Lë' Xanru' Dios.

⁸ Ta'cuídi'në' nupa na', en ta'dzö'ë,

pero rë'u ni zuíru', en zóaru' tsutsu.

⁹ Busólá netu', Xan, tu' nacu' Nu rinná be'e netu'.

Rinábitu' Li' uzë nagu' netu' cate' ulídzatu' Li'.

21

¹ Rudzéjanë' bönni' rinná bë'ë tu' zóalen lë' yöl-la' huáca quiu' Li', Xan.

Tu' busóló' lë', yénni'tërö rudzéjanë'.

² Bunödztu' queë' le rizë ládxi'ë.

Bití' gudá'bagu'u le gunábinë' Li'.

³ Tu' raza ládxi'u lë' ruzú' queë' yugu' le naca dxi'a.

Nudxiu' icjë' tu le néquini oro idú.

⁴ Gunábinë' Li' gu'u queë' yöl-la' na'bán, ate' bë'u le queë'.

Nunu' ga sóatica'së' ibanë' yugu' dza si' zaca.

⁵ Zxöntë naca yöl-la' zxön queë' tu' nisóló' lë'.

Nunu' lë' bal, en nunu' ga nayépisë'.

6 Zóatic'a'sò le naca dxi'a nuzú' queë'.
Runu' ga rudzédjade'ené' tu' zóalenu' lè'.

7 Caní raca queë' bönni' na' rinná bē'è tu' ruzxöni ládxe'ë Xanru'.
Biti' bi utsá' lè' tu' ruhuéchi' ládxe'ë Dios nayépisètèrè' lè'.

8 Huadeli' no'o ga nacua' yúgu'tè nupa ta'dá'baga' Li'.
Huadeli' no'o ibèla ga nacua' nupa tu'dí'i Li'.

9 Cate' idxín dza usiúdxu' léguequi gaca queéquequi ca tu guí' ruzegui bla'do'.

Usunitiu' léguequi, Xan, lu yöl-la' rilé quiu',
ate' tséguiguequi tu lu guí' zxön.

10 Ucuítu' yugu' zxi'ini xi'sóagaca nupa na' luyú ni,
en ubéaju' yugu' zxi'iniguequi ládjagaca bönachi.

11 Caní gunu' tu' gulé'éniguequiné' ilu'è dö' quiu'.

Gulún xtídza'gaquié' bi iluné', pero bití' gaca iluné' ca rnna xtídza'gaquié',

12 tu' gunu' Li' ga ulu'zxünnajé'.

Ichisu' uxiti' yaga quiu', en gunu' léguequi hué'.

13 Len yöl-la' huáca quiu', Xan, uxicju' lu gudil-la.

Gúl-latu', en cú'utu' yöl-la' ba que yöl-la' huáca quiu'.

22

1 Dios quia', Dios quia', ¿bizx que nusán no'o neda'?

¿Bizx que bití' riyönnu' le rinnéda' ládxa'a, en bití' rácalenu' neda'?

2 Dios quia', idú dza rulidza' Li', pero bití' bi didza' rubi'u.

Idú yèla rulidza', en bití' ca' rasia'.

3 Lá'ayi nacu' Li'.

Zu' ga riyön yöl-la' ba ta'gú'u bönachi Israel Li'.

4 Bulu'zxöni ládxe'ë xuz xtó'otu' Li'.

Bulu'zxöni ládxe'ë Li', ate' busöló' légaquié'.

5 Bulu'lidzè' Li', ate' gúcalenu' légaquié'.

Bulu'zxöni ládxe'ë Li', en bití' bulu'tuí'iné'.

6 Naca' neda' ca tuba' bëla guna', en caléga bönni'.

Tu'dí'i bönachi neda', en tu' cá'ana neda' cá'asò.

7 Yúgu'tè nupa ta'lé'e neda' tu'titaj neda'.

Ta'salaj ru'íguequi lu yöl-la' rutitaj, en tu'tá ícjaguequi, ta'nná:

8 "Lé' buzöni ládxe'ë Xanru' para usólé' lè'.

Xanru' usólé' lè' channö tsaza ládxe'ë lè'."

9 Nacu' Li' Nu guléaj neda' lè'ènu xiná'a.

Benu' ga ruzxöni ládxa'a Li'

cate' ni' gúdxá'a luchú'unu xiná'a.

10 Nagá'ana' lu no'o Li' ga gudéla'tè gulja'.

Ga gudéla'tè buzóanu xiná'a neda' nacu' Dios quia'.

11 Bití' su' zi'tu' ga ni zoa', tu' zoa' gagu le gun neda' zi',

ate' cúnturö nu zoa nu gácalen neda'.

12 Gula'gu'è neda' lé'ajló ca tunba' yugu' bédxi.

Ca yugu' bédxi que yödzo Basán gula' bía dí'è neda'.

13 Ta'salaj ruá'agaquié' lahua' neda'

ca runba' bédxi guixi', ridunba', en ribódxí'aba'.

14 Nuhuóaca' ca nisa nalalaj luyú, ate' nazángaca bëch dxita quia'.

Nuhuóaca ládxi'da'ahua' ca bidxina' buz la lu lè'a.

15 Nacuidí' yöl-la' huáca quia' ca tu rö'ö nalá'a,

ate' da' lúdxá'a chíchja'.

Nuzú' neda' lu bëchtö yu que yöl-la' guti.

16 Ta'gu'è neda' lé'ajló ca tunba' yugu' bö'cu'.

Nagú'ugaquié' neda' lé'ajló bönni' tu'è dö'.

Nuzóagaquié' yeru blaga na'a, en ni'a.

17 Nalá gaca yúgu'tè dxita néquinida'.

Ta'né'è neda', en tu'yú yénnié' neda'.

18 Ta'guisié' zxa' que queégaquié',

en tu'yúé' le gaca bë' lahui lari' rixóa cúdza'a.

19 Bití' gá'anu' zi'tu', Xan.

Gúcalentë neda' Li', Nu naca yöl-la' huáca quia'.

²⁰ Busölä neda' lu guïé tuchi'.

Busölä yöl-la' na'bán quia' lu ruá'agacaba' bö'cu'.

²¹ Busölä neda' lu ruá'agacaba' bëdxi guixi',

en lu lúzugacaba' bëdxi gú'una.

Li' riyón quézinu' chí'a.

²² Usiyönda' yugu' böchi' luzá'a ca naca Lo'.

Gatsaj láhui'lô ga na' tu'dubi bönachi lo' cu'a Li' yöl-la' ba.

²³ ¡Guli'cu'ë Xanru' yöl-la' ba, libí'ili' na' rádxili'-në'!

¡Guli'gun zxön Lë', yúgu'téli' zxi'ini xi'sóë' Jacob!

¡Guli'gadxi Lë', yúgu'téli' zxi'ini xi'sóë' Israel!

²⁴ Caní ral-la' gunli' tu' cabí bucá'anë' cá'asó,

en bití' budí'inë' nupa gula'guí' gula'zaca',

en bití' bucachi' lahuë' para cabí ilé'enë' léguequi,

pero cate' bulu'lidza Lë', biyönnë' léguequi.

²⁵ Cu'a Li' yöl-la' ba ga tu'dubi bönachi guizxi yu lo'.

Lógaca nupa tadxí Li' usudxina' le guzxi' lu na'a guna' quiu'.

²⁶ Ilágugaca nupa nácgaca nöxaj ladxí', en ulu'huölaj ulu'dzë'e.

Nupa ta'guilaj Xanru', en ta'gú'u Lë' yöl-la' ba ulu'zítica'só xibë'.

²⁷ Bönachi iduté yödzólió tsójnégaca Xanru', en ulu'huóaca queë'.

Bönachi yúgu'të yödzó luyú ila'gú'u Lë' yöl-la' ba.

²⁸ Caní gaca tu' dë lu në'ë Xanru' inná bë'ë.

Inná bé'enë' yúgu'të bönachi luyú.

²⁹ Yúgu'të nupa dë lu ná'agaca luyú ni ilágugaca, en ila'gú'u Lë' yöl-la' ba.

Yúgu'të nupa ila'niti ulu'zechu zxíbigaca lahuë' Lë',

nupa na' bití' ca' gaca ilún chí'i yöl-la' na'bán quéguequi.

³⁰ Zxi'ini xi'sóali' ilún xichinë'.

Ila'guixjö' lë ni ca naca queë' Xanru' para ila'yöni nupa tsöjsétëgaca luyú ni.

³¹ Iidë', en ulu'luí'inë' lahui náquië' Xanru' tsahui'.

Ulu'siyönnë' ca' nupa ral-la' ilalaj ca naca yugu' le benë' Lë'.

23

¹ Ruyú cazë' Xanru' Dios neda' ca tu nu ruyú bö'cu' zxila'.

Bití' bi riyádzjada'.

² Runë' ga ruzí' ládxa'a ca túngacaba' bö'cu' zxila' tu'zí' ládxi'ba' gapa dëda' le iláguba'.

Ga naca ra' nisa rizá' tsahui' ládxi'do' richë'ë neda'.

³ Runë' ga ruhuóaca ládxa'a.

Richë'ë neda' ga naca nöza tsahui' tu' nadxi'inë' neda'.

⁴ Sal-la' ridá' ga zoa bönadxi gátia',

bití' bi gádxida' tu' zóalen cazu' neda', Dios.

Len xiyaga quiu', en no'o rutipu' ládxa'a.

⁵ Ga nacué' nupa ta'zóa regu' neda', ni' rucú'u quia' le gahua'.

Rigú'u icja' le za rilá' zxixi, en ruliru' le guí'jada'.

⁶ Le nácatë dusóalengaca neda' le naca dxi'a,

en yöl-la' dxi'i ladxí' queë' yúgu'të dza soa' ibana',

ate' lu yu'u lidxë' Xanru' sóatica'sa'.

24

¹ Nequi queë' Xanru' Dios luyú ni, en yúgu'të le dë lahui.

Nequi queë' yödzólió, en yúgu'të nupa nacué' ni'.

² Naguixjë' le lahui nísado' rö'ö zxánilö,

en nuzóë' xilibi luyú ga rë' zcan nísado'.

³ ¿Nuzxi caz bönni' dë lu në'ë cuenë' guí'a lá'ayi queë' Xanru'?

¿Nuzxi caz gaca tsaza lu lataj lá'ayi queë'?

⁴ Huáca bönni' na' naca dxi'a ca runë', en ca rizá' ládxi'ë,

bönni' na' bití' runë' bal budó' guió' budó' yaga,

en bití' rizí' yë'ë cate' rizí' lu në'ë bí'gunë'.

⁵ Gunë' Xanru' ga gaca dxi'a queë' bönni' na'.

Caní gunnë' Dios, Nu rusólá lë', en náquië' tsahui'.
 6 Caní nácacaga nupa ta 'dxín lahuë' Dios,
 nupa na' ta 'biga' lahuë' Dios quégaca xzí'ini xi'sóë' Jacob.

7 Guli'salaj ga nu riyaza yödzö la'ayi.
 Guli'salaj ga nu riyaza xilatjë' Dios le nuzóë' tsaz,
 ate' tsázië' Bönni' unná bë' nayépisëtërë'.
 8 ¿Nuzxi caz Bönni' unná bë' nayépisëtërë' na?
 Náquië' Xanru' nál-latërë', en nápatërë' yöl-la' huáca,
 Lë', Xanru', Nu rideli' lu gudil-la.

9 Guli'salaj ga nu riyaza yödzö la'ayi.
 Guli'salaj ga nu riyaza xilatjë' Dios le nuzóë' tsaz,
 ate' tsázië' Bönni' unná bë' nayépisëtërë'.
 10 ¿Nuzxi caz Bönni' unná bë' nayépisëtërë' na?
 Náquië' Xanru' Dios quéguequi ni'a në'ë guizxi yu.
 Lë' náquië' Bönni' unná bë' nayépisëtërë' na'.

25

1 Idú ládxa'a rulidza' Li', Xan.
 2 Ruzxóni ládxa'a Li', Dios quia'.
 Ben ga cabí utuí'ida',
 en cabí ulu'dzeja nupa biti' ta'lé'e neda' dxi'a.
 3 Biti' ila'bõ' bõniga nupa tun löza Li',
 pero ulu'tuí'i nupa ta'dá'baga' xtídz'u.
 4 Buluí'i neda' le ré'ënu' guna', Xan,
 en buzéajni'i neda' le raza ládxi'u Li'.
 5 Busedi neda' para guna' ca naca le naca idútë li quiu'.
 Tu' nacu' Dios, Nu rusólá neda'
 gúntica'sa' löza Li'.
 6 Yöjné ca naca yöl-la' dxi'i ladxi' quiu', Xan,
 en yöl-la' ruhuéchi' ladxi' quiu', yugu' le naca'tica'sö.
 7 Buniti lo neda' ca naca dul-la' bena',
 en le gudá'baga'a Li' cate' ni' zoa' iz cuidi' quia'.
 Lu yöl-la' ruhuéchi' ladxi' quiu',
 en yöl-la' dxi'i ladxi' quiu' yöjné neda', Xan.
 8 Náquië' Xanru' dxi'a tsahui', en li ladxi'.
 Que lë ni na' rulu'inë' nupa tun dul-la' le ral-la' ilún.
 9 Ca naca le naca tsahui' richë'ë Dios nupa nácacaga nõxaj ladxi',
 en rulu'inë' nupa nácacaga do' ladxi' le ré'ënë' ilún.
 10 Lu yöl-la' ruhuéchi' ladxi' queë', en yöl-la' rusudxín didza' queë',
 richë'ë Xanru' nupa tun ca rinná bë' xibá naguixjé',
 en ca naca didza' rucá'ana tsahui' nunë'.

11 Tu' nacu' dxi'i ladxi', Xan,
 buniti lo neda' ca naca dul-la' nuna', le naca dul-la' zxön.

12 Nupa tun bal Xanru'
 uluí'i quézinë' léguequi le naca dxi'a le ral-la' ilún.
 13 Ulu'zí' xibé le naca dxi'a gunnë' quéguequi,
 ate' guequi quégacabi' xzí'ini xi'sóaguequi luyú ni.
 14 Xanru' zóaléntica'sé' nupa tun ca rnna xtídzë'ë,
 en ruzéajni'inë' léguequi ca naca didza' rucá'ana tsahui' nunë'.
 15 Ruyútica'sa' guidé' Xanru' gácalenë' neda',
 tu' usölë' neda' lu na' nu ré'ëni sön neda'.

16 Buécja quia', Xan, en buéchi' ladxi' neda',
 tu' zoa' tuza', en nacuí'da'.
 17 Nayán le tu'quí'i tu'saca' neda'.
 Busólá neda' lu le ruúbi ruguí'i ládxi'da'ahua'.
 18 Buyú ca riguí'i rizáca'a, en rudú ládxa'a.
 Buniti lo neda' ca naca yugu' dul-la' nabága'a.

¹⁹ Buyú ca nayán nupa tun neda' zi'.

Buyú ca tu'dí'i neda'.

²⁰ Ben chi'i neda', en busölá neda'.

Biti' gu'u lataj utuí'ida' tu' ruzxöni ládxa'a Li'.

²¹ Ben ga ilún chi'i neda' le naca idú ladxi',

en le naca li ladxi', tu' runa' löza Li'.

²² Buá'au' bönachi Israel,

Dios lu yugu' le raca quéguequi.

26

¹ Guléaj neda' tsahui', Xan, tu' runa' le naca dxi'a,
en idú ládxa'a ruzxöni ládxa'a Li'.

² Buyú lu icja ládxi'da' ahua', Xan, en guzxi' bē' neda'.

Buyú le rizá' ládxa'a, en le ribequi icja',

³ tu' richē' yöl-la' dxi'i ladxi' quiu' neda',

ate' runa' ca naca le naca idútē li quiu'.

⁴ Biti' runa' tsözxön nupa ta'zi' yē',

en biti' ridálena' nupa tu'lu' isó cuínguequi tsahui'.

⁵ Biti' raza ládxa'a udúbilena' nupa tuá' dō',

en biti' guna' tuz didza' len nupa nácagaca xihui'.

⁶ Richisa na'a lo' Li', Dios, cabí dxía dō' na'a,

en idú ládxa'a ribíga'a lo bucugu quiu', Xan,

⁷ para gul-la' le guía' Li': "Xclenu"

en usiyönda' bönachi ca nácagaca le zxön nunu'.

⁸ Nadxi'ida' yu'u lidxu' ga na' zu', Xan,

enca' lataj ga na' yu'u bení' lá'ayi quiu'.

⁹ Biti' usunítii' neda' tsözxön len nupa tun dul-la',

en biti' gútiü' neda' len nupa tuti bönachi,

¹⁰ nupa na' ta'yaza ladxi' tuá' dō',

en nacuá'tica'sö ila'guizxaj dumí para ulu'rúaj tsahui'.

¹¹ Gúntica'sa' neda' le naca dxi'a.

Buzá' ladxi' quia', en buá'uö neda'.

¹² Nuzóé' Dios neda' ga zoa' tsutsu ladja bönachi guizxi yu

nudúbigaca queé' para cu'a-nē' yöl-la' ba Xanru'.

27

¹ Náquiē' Xanru' Dios bení' quia', en Nu rusólá neda'.

¿Nuzxi caz ral-la' gáxdida'?

Rapa chi'ē Xanru' Dios caz yöl-la' na'bán quia'.

¿Nuzxi caz gaca gun ga gadxi idzóbida'?

² Cate' gula dá'baga' neda' nupa tuá' dō' para iluti neda',

nupa na' bití' ta'lé'e neda' dxi'a, en tu'dí'i neda',

yöjchégu' gaca, en yöjbíxigaca.

³ Sal-la' ila'dá'baga' neda' bönachi guizxi yu,

biti' ca' tsaza yöl-la' radxi ládxi'da' ahua'.

Sal-la' ila'díl-lalen bönachi neda',

naca' neda' tsutsu ladxi'.

⁴ Tu le rinaba' lahuē' Xanru' Dios, lē na' güí'i ládxi'sa',

le naca para sóatica'sa' lidxē' Xanru' yúgu'tē dza soa' ibana',

para gaca uyúa' yöl-la' lachi queē' Xanru' Dios,

en para sa' ládxa'a ca naca queē' lu yu'u lá'ayi queē'.

⁵ Cate' idxín dza soa bönadxi quia', ucáchē'ē Lē' neda' lu yu'u lidxē'.

Ga nagachi' lu yu'u lidxē' ucáchē'ē neda'.

Uzóé' neda' tsutsu ca tu lu guiójt'o.

⁶ Gunē' ga ucul-la' nupa tu'dí'i neda',

ate' lu yöl-la' rudzeja quia' cōdxi'atica'sa'

cate' bi unódzja' queē' lu yu'u lidxē'.

¡Gul-la' queē'! ¡Ön, gul-la' queē' Xanru' yöl-la' ba!

⁷ Buzé' nagu', Xan, cate' ulidza' Li'.

Buzá' ladxi' quia', en bubí'i didza' ca naca le inábida' Li'.

⁸ Cate' Li' gudxu' neda': "Buguilaj neda'",

idú ládxa'a bubí'a didza', gunnía': Uguilja' Li', Xan.

⁹ Biti' ucachi' lo' lahua' neda'.

Biti' ta'bagu'u neda' lu yöl-la' rilé quiu'.

Li' nacu' Nu rácalen neda'.

Biti' ucá'anu' neda', en biti' usán no'o neda'.

Nacu' Dios, Nu rusólá neda'.

¹⁰ Huáca ulu'sán ládxe'ë xuz xiná'a neda',

pero uzí' cazë' Xanru' Dios neda'.

¹¹ Busedi neda' para guna' ca rë'ënu' Li', Xan.

Bulu'í neda' para guna' le naca tsahui',

tu' nacuá' nupa ta'dá'baga' neda'.

¹² Biti' usanu' neda' lu ná'agaca nupa bití' ta'lé'e neda' dxi'a

para cabí ilún quia' le té'ëni.

Ta'dá'baga' neda' nupa ta'z' yë',

en nupa té'ëni iluá' dö' quia'.

¹³ Guzxi' lu në'ë Xanru' Dios gunë' ga ilé'eda' le naca dxi'a,

en le naca tsahui' queë' ga nacuá' nupa nabángaca.

La'tu' cabí réajlé'a lé ni, chibóaj ládxa'a.

¹⁴ ¡Guli'gún lözë' Xanru'!

¡Guli'gaca tsutsu, en buli'tipa ládxi'li'!

¡Ön, guli'gún lözë' Xanru'!

28

¹ Rulidza' Li', Xan.

Nacu' Guióaj le ruzóa neda' tsutsu.

Ruzë' nagu' chí'a, tu' channö usayju' ru'u,

gaca' ca tu bönni' razië' lataj chul-la.

² Ruzë' nagu' le rulidza' Li' cate' rinábida' Li' gácalenu' neda',

cate' richisa' na'a zaca' Lataj Lá'ayi ga na' zu'.

³ Biti' ichë'u neda' tsözxön len nupa tuá' dö',

en tsözxön len nupa ná'agaca xihui',

nupa na' tu'í didza' dxi'a lahui' lógaca dzaga yu'u qué'guequi,

pero yu'u ládxi'do'guequi le cabí naca tsahui'.

⁴ Bubí' qué'guequi tsca naca le tun, en tsca naca dö' ru'ígaca.

Bubí' qué'guequi tsca naca le tun në'guequi.

Bubí' qué'guequi tsca ral-la' gaca qué'guequi.

⁵ Caní gaca qué'guequi tu' cabí tun bal le nunë' Xanru',

en bití' tun bal le nun në'ë.

Uquínnajë' lé'guequi, en bití' ca' uchisë' lé'guequi.

⁶ ¡Yöl-la' ba Xanru',

tu' riyönnë' cate' rinábida' Lë' gácalenë' neda'!

⁷ Xanru' caz ná'quië' yöl-la' huáca quia', en le run chí'i neda'.

Ruzxöni ládxa'a Lë', ate' rácalenë' neda'.

Que lé ni na' ruzí' xibë' ládxi'da' ahua',

ate' gul-la' le guía' Lë': "Xclenu'."

⁸ Naca cazë' Xanru' yöl-la' huáca qué'guequi bönachi queë',

en ná'quië' ca' Nu run chí'i Bönni' na' bubéajë' quez queë' para inná bë'ë.

⁹ Busólá bönachi quiu', Dios, en ben ga gaca dxi'a qué'guequi nupa né'quiquequi quiu'.

Ben chí'i lé'guequi ca run tu nu ruyú bö'cu' zxila', en guchë'tica'sö lé'guequi.

29

¹ ¡Guli'cu'ë yöl-la' ba Xanru', libí'ili', nácali' zxi'inigaquië' bönni' nayëpisëgaquië'!

¡Guli'cu'ë yöl-la' ba Xanru', en guli'guíë: "Napu' yöl-la' huáca idú'!"

² ¡Guli'cu'ë yöl-la' ba Xanru' le ral-la' gata' que Lë' tu' ná'quië' lá'ayi!

¡Guli'gún bal Xanru', tu' naca lachi le naca lá'ayi queë'!

³ Riyón chí'è Xanru' lu nísado'.
 Riyón chí'è Xanru' nayépisè' ca riyón guziú' rinnè.
 Riyón chí'è Xanru' lu nísado'.
⁴ Nál-latêrô naca chí'è Xanru'.
 Nayépisètêrô chí'è Xanru'.
⁵ Chí'è Xanru' rilá'a yugu' yaga zxôn.
 Ôn, chí'è Xanru' riguitsaj yugu' yaga lu guí'a Líbano.
⁶ Runé' Xanru' ga ta'xiti' guí'a ca tunba' bédxido'.
 Ta'xiti' guí'a Líbano, en guí'a Sirión ca tunba' bédx guí'a.
⁷ Chí'è Xanru' run ga rêpi yôsa.
⁸ Ruxizi chí'è Xanru' la' guixi' ga dè lataj.
 Ruxizi chí'è Xanru' la' guixi' nazí'i le Cades.
⁹ Chí'è Xanru' run ga ta'béquiiba' bidxina' guixi' bôa' huè'énido' quégacaba',
 en run ga ta'guinnaj yúgu'tè laga' dxíagaca yugu' yaga.
 Lu yudo' queé' tuí'i didza' yúgu'tè le nacuá', ta'nná: "¡yôl-la' ba Lè'!"
¹⁰ Gurô'è gunná bē'è Xanru' cate' gurô'ô nisa lu idútē yôdzôlió.
 Ôn, rô'è rinná bē'tica'sē' Xanru'.
¹¹ Rutipē' Xanru' lādxi'do' gaca bônachi queé'.
 Gunē' Xanru' ga gaca dxi'a quégaca bônachi queé',
 en gunē' ga ila'bôza dxi'a tsáhui'do'.

30

¹ Guna' Li' zxôn, Xan, tu' buchisu' Li' neda',
 en biti' bē'u lataj bi ilún quia' nupa biti' ta'lé'e neda' dxi'a.
² Rigu'a Li' yôl-la' ba, Xana' Dios,
 tu' bulidza' Li' gácalenu' neda', ate' bunu' neda'.
³ Bubéaju' yôl-la' na'bán quia' lu yeru ba, Xan.
 Runu' ga zoa' nabana', para cabí tsu'a lataj chul-la ga dzô'ô nupa nátigaca.

⁴ ¡Guli'gul-la yôl-la' ba queé' Xanru', lib'ili' néquili' quez queé'!
 ¡Guli'guié': "Xclenu'" ca naca Lè' le naca lá'ayi!

⁵ Tu chí'isô rilené',
 pero ruzá' lādxi'tica'sē' queéru'.
 Channô cōdxiru' tu yēla,
 lu yôl-la' rudzeja queéru' cōdxi'aru' itô yu.

⁶ Cate' guca dxi'a quia', ní'irô gunniá':
 "Gatga bi utsá' neda'."
⁷ Tu' buzá' lādxi'u quia', Xan, buzú' neda' ga zoa' tsutsu,
 en cate' bucachi' lo', gurô'a bôniga.
⁸ Bulidza' Li', Xan,
 en gúta'yua' lo'.
⁹ ¿Bizxi xibé uzi'tso' channô gátia', en tsöjtsázia'
 lataj chul-la ga dzô'ô nupa nátigaca?
 ¿Naru' huácatsô cu'a Li' yôl-la' ba channô huóáca' bëchtô yu?
 ¿Naru' huácatsô ulu'a lo le naca idú quiu'?
¹⁰ Ruzé nagu', Xan, en ruzá' lādxi'u quia'.
 Gúcalen neda', Xan.
¹¹ Buí'nida', ate' benu' ga buyá'a lu yôl-la' rudzeja quia'.
 Bugú' lari' cá'asô gúcua', en bugacu' neda' le ruzi'a xibé.
¹² Bil-la bô' naca caza' yôl-la' ba quiu', en biti' soa dxisô.
 Guiética'sa' Li': "Xclenu'", Xana' Dios.

31

¹ Ruzxöni lādxa'a Li', Xan.
 Biti' gu'u lataj utu'ida'.
 Tu' nacu' tsahui', busólá neda'.
² Ruzé nagu' quia', en rusóló' neda'.
 Gacu' ca tu guiôjto'o ga soa' tsutsu,
 en ca tu ga soa' dxi'a tsáhui'do' lu gudil-la.
³ Nacu' Li' guiôjto'o ga zoa' tsutsu, en le run chí'i neda'.

Para gaca yöl-la' ba que Lo' guché' neda', en buluf'i neda' le dxi'a guna'.

⁴ Ubéaju' neda' lu du yalaj nucáchi'gaquie' bönni' tu' è dö',
tu' nacu' Li' yöl-la' nál-la quia'.

⁵ Rigu'a lu no'o bö' naca caza'.

Bôá'au' neda', Xan, Dios idú.

⁶ Biti' rilé'eda' dxi'a nupa tun zxön budó' guiöj budó' yaga,
pero neda' ruzxöni ládxa'a Li', Xan.

⁷ Udzéjada', en uzi'a xibé yöl-la' dxi'i ladxi' quiu',
tu' bilé'e quézinu' le gud'f'i guzxáca'a.

Nöz quézinu' yugu' le raca quia'.

⁸ Biti' buca'anu' neda' lu na' nu biti' rilé'e neda' dxi'a,
pero nuzú' neda' tu lataj ga zoa' tsutsu.

⁹ Buzá' ladxi' quia', Xan, tu' zoa tu le raca quia'.

Lu yöl-la' ruhuí'ini quia' ribödxa', en rudú ládxa'a.

¹⁰ Riyechi' dza quia' tu' ruhuí'inide'eda',

en tu' rinné ládxa'a, en riyechi' iz quia'.

Rudú ládxa'a tu' nözi dö' nu'a,

ate' nadxita idúté le naca'.

¹¹ Tu' nözi le gulún nupa ta'dá'baga' neda'
naca' tu le run gadxi yugu' dzaga yu'u quia',

ate' nupa núnbé'gaca neda' tadxi neda'.

Nupa ta'lé'e neda' la' nöza ta'zxunnaj ga rizá'a.

¹² Nál-la ládxi'gaca neda' ca nál-la ládxi'gaca nupa chinátigaca.

Naca' ca tu rö'ö nayuzxaj naguinnaj.

¹³ Biyönda' didza' zi' ta'nné bönachi zían quia' bagáchi'sö.

Gát'i'tës zoa le run gadxi neda'.

Tun xtídza'gaca bi ilún quia'.

Ta'zá' ládxi'gaca nacxi iluti neda',

¹⁴ pero neda' ruzxöni ládxa'a Li', Xan.

Rnnía' nacu' Dios quia'.

¹⁵ Yú'ugaca lu no'o yúgu'té dza soa' ibana'.

Busólá neda' lu ná'agaca nupa bití' ta'lé'e neda' dxi'a,

en lu ná'agaca nupa ta'zóa regu' neda'.

¹⁶ Lu yöl-la' ruzá' ladxi' quiu' buyú neda', huen dxin quiu'.

Lu yöl-la' dxi'i ladxi' quiu' busólá neda'.

¹⁷ Biti' gu'u lataj utuf'ida', Xan, tu' rulidza' Li'.

Ben ga ulu'tuí'i nupa tuá' dö'.

Ben ga ila'cuá' dxisö lu yeru ba.

¹⁸ Ben ga bití' gaca bi inná nu rizí' yé',

nu na' rinné zi' queé' bönni' tsahui',

en run ba zxön cuini, en rulidza ditaj luzé'e.

¹⁹ ¡Bica' zxön yöl-la' dxi'i ladxi' quiu',

lê na' napu' para gácalenu' nupa tadxi Li'!

Runu' caní quégaca nupa tu'zxöni ladxi' Li'

lógaca nupa tun ba zxön cuíniguequi.

²⁰ Rucáchu'u légaquie' ga na' zu' bagáchi'sö,

ga bití' gaca idxín nu bönni' xihui'.

Run chí'u légaquie' bagáchi'sö ga bití' gaca idxín didza' bizxaj.

²¹ ¡Yöl-la' ba Xanru' Dios,

tu' buluf'iné' neda' ca nadxí'iné' neda' cate' ni' zoa' tu yödzo

ga nagú'ugaquie' lé'ajlô bönni' tu'tíl-lalené' neda'!

²² Lu yöl-la' radxi ridzöbi quia' gunnía': "Ílútié' neda' lo' Li', Xan",
pero biyönnu' le gunábita' Li', cate' ni' bulidza' Li'.

²³ ¡Guli'dxí'i-né' Xanru', libí'li' néquili' queé'!

Rapa chí'è Xanru' nupa ta'yéajlé' Lé',

en rubí'è ca sa'yéaj queé' bönni' run ba zxön cuiné'.

²⁴ ¡Guli'gaca tsutsu, en bulí'tipa ládxi'li',

yúgu'téli' na' runlí' löza Xanru' Dios!

32

¹ ¡Bica' ba bönni' na' Dios buniti lahuë' lë' ca naca dö' bi'ë,
en bugtë' dul-la' queë'!

² ¡Bica' ba bönni' na' Dios rnnë' biti' nabáguë'ë xigua',
en biti' zóalen lë' yöl-la' rizi' yë'!

³ Cate' guzóa' dxisö ca naca dul-la' quia',
budú ládxa'a tu' gunnética'sö ládxa'a.

⁴ Rëla, en te dza buquí' busácu'u neda', Dios.
Budú ládxa'a ca raca cate' rö' böchila.

⁵ Ní'irö guxóalëpa' dul-la' nabága'a lo' Li',
en biti' bucácha'a le xihui' bena'.

Gunnía': "Ixóalëpa' dö' bi'a lahuë' Xana",
ate' buniti lo' neda' ca naca xigua' gubága'a.

⁶ Que lë ni na', núti'tës nu nunbë' Li', Dios, ral-la' ulidza Li'
cate' dë lataj gü' ilen Li' didza'.

Cate' rö' nisa bach luyú ni, biti' ca' ideli' idxín ga zoa nu na'.

⁷ Li' nacu' ga gaca ucachi' cuina' cate' zoa bönadxi quia'.
Li' caz gun chí'u neda' para cabí bi gaca quia'.

⁸ Li' gunu' ga gúl-latíca'sa' quíu' Li' tu' rusöló' neda'.

Rnnë' Dios: "Neda' uzéajni'ida' li', en uluí'ida' li' le ral-la' gunu'.
Usédida' li', en uyútica'sa' li'.

⁹ Biti' gacu' ca tu böa' o tu mula cabí ta'yéajni'iba'.

Ral-la' cu'u guë' en du rú'ugacaba' para inná bé'enu' lé'gacaba'."
Channö cabí gunu' caní, biti' ca' ilunba' ca rë'ënu'.

¹⁰ Zián le tun ga tu'hu'íniguequi nupa tuá' dö',
pero bönni' ruzxöni ládxe'ë Xanru' ilé'enë' yöl-la' dxi'i ladxi' queë'.

¹¹ Bulí'dzéjalenë' Xanru', en bulí'sí' xibë', libí'ili' nácali' tsahui' lahuë' Lë'.
Lu yöl-la' rudzeja queëli' guli'cödxí'a, libí'ili' nácali' idú dxi'a.

33

¹ Lu yöl-la' rudzeja queëli' guli'gul-la lahuë' Xanru',
libí'ili' nácali' tsahui' lahuë' Lë'.

Nupa nácacaga tsahui' ral-la' ila'gú'u Lë' yöl-la' ba.

² Guli'guíë' Lë': "Xclenu'", quínnili' lë'e bihuél-la.

Guli'gul-la yöl-la' ba queë', quínnili' le zë chi du que.

³ Guli'gul-la queë' tu le rul-la cubi.

Guli'quinnaj dxi'ado', en lu yöl-la' rudzeja queëli' guli'cödxí'a.

⁴ Xtídzë'ë Xanru' naca idú tsahui',
ate' idú ládxe'ë runë' yúgu'të bi runë'.

⁵ Nadxí'inë' le naca dxi'a, en le naca tsahui'.

Nalá' lahui yöl-la' dxi'i ladxi' queë' Xanru' iduté yödzülió.

⁶ Len didza' bé'ësë' Xanru', benë' lúzhiba,
en benë' yúgu'të böljaj bení' len bö' rirúaj ru'ë.

⁷ Rutubë' nisa rö'ö nísado' para gaca ca tu guí'a.

Napa chí'ë nisa rö'ö zili ga na' nupë'ë xilataj.

⁸ Yúgu'të bönachi ral-la' ila'dxí'i Xanru'.

Bönachi iduté yödzülió ral-la' ila'cuá' nōxaj lahuë' Lë'.

⁹ Bé'ësë' didza' Xanru', ate' la' gúcaté ca na' gunné'.

¹⁰ Gunná' bë'ë, ate' guca tsutsu le nunë'.

Runë' Xanru' ga tu'huóaca cá'asó didza' túngaca bönachi yugu' yödzo.

Runë' ga biti' ilaca le té'ëni ilúngaca bönachi.

¹¹ Sóatica'sö tsutsu didza' nunë' Xanru'.

Le rizá' ládxe'ë ulu'gá'anatica'sö qué'guequi xzí'ini xí'sóaru'.

¹² Bica' bágaca bönachi yödzo na' náquië' Xanru' cazë' Dios qué'guequi,
bönachi na' nabó cazë' Dios para ilaca quez queë'.

¹³ Zoa cazë' Xanru' yehua' yubá, ruyúë' ga zóaru'.

Rilé'enë' le tun yúgu'të bönachi nacua' iduté yödzülió.

¹⁴ Ga na' zoa cazë' ruyúë' idú gásibi'iló,
en rilé'enë' yúgu'të nupa nacua' iduté yödzülió ni.

15 Nun cazë' Lë' lãdxi'do'gaca yúgu'tëguequi.

Réajni'i quézinë' ca naca yúgu'të le túngaca.

16 Biti' ca' ulë' bönni' unná bë' nacuá' queë' bönni' guizxi yu røjáquië' gudil-la.
Biti' ulë' bönni' zoë' gudil-la tu' nál-latërë'.

17 Biti' nazaca' gunru' lőza böa' para idéli'ru' lu gudil-la,
tu' cabi' gaca usőlaba' nu bönni' tu' nál-latërőba'.

18 Buli'yú, ruyútica'së' Xanru' nupa tadxi Lë',
nupa na' tun lőza yöl-la' dxi'i ladxi' queë',

19 para usölë' léguequi lu yöl-la' guti,
en para ughuë' léguequi cate' tsu'u gubín.

20 Idú lãdxi'ru' runru' lőza Lë' Xanru'.

Rácalen cazë' rë'u, en rapa chi'ë rë'u.

21 Rudzeja lãdxi'lenru' Lë',

en uzxöni lãdxi'ru' Lë', tu' náquië' lá'ayi.

22 Lu yöl-la' dxi'i ladxi' quiu' gúcalen netu', Xan,
tu' runtu' lőza Li'.

34

1 ¡Innética'sa' queë' Xanru' náquië' dxi'a!

¡Cú'utica'sa' Lë' yöl-la' ba!

2 Bö' naca caza' gun zxön Xanru'.

Nupa nácacaca nőxaj ladxi' ila'yöni lë ni, en ulu'dzeja.

3 Guli'güi' zxönë' Xanru' tsőzxön len neda',
en tsőzxön usiyönru' bönachi ca naca Lë' La'ayi.

4 Bulidza'-në' Xanru', ate' bubí'ë didza' quia',
en busölë' neda' lu yugu' le gúdxida'.

5 Nupa nácacaca queë' bila'dxín lahuë', en bulu'zì' xibë'.

Bíti'rő caz ulu'tuí'i nupa na'.

6 Bulidza'-në' Xanru', ate' biyönnë' quia' neda', bönni' yechi',
en busölë' neda' lu yúgu'të le guca quia'.

7 Gubáz lá'ayi que ya'abá queë' Xanru' tapa chi'ë nupa tadxi Lë',
en tu'sölë' léguequi lu yúgu'të le raca quéguequi.

8 Guli'sí' bë'ë, ate' inözili' náquië' Xanru' dxi'a.

¡Bica' ba bönni' ruzxöni lãdxë'ë Lë'!

9 Guli'gadxi Xanru', libí'ili' nácali' quez queë',
tu' cabi' bi' ila'yadzaj nupa tadxi Lë'.

10 Ta'yadzaj ta'yúdxiba' bëdxi guixi', en ta'dunba',
pero nupa tu'lidza Xanru' bití' ca' ta'yadzaj le naca dxi'a.

11 Guli'dá libí'ili', bí'ido', en buli'zë' nágali' xtídza'a.
Uzéajni'ida' libí'ili' para gádxili'-në' Xanru'.

12 ¿Nuzxi caz bönni' rë'ënë' soë' ibanë',
en rë'ënë' soë' iz zían para uzi'ë xibé' le naca dxi'a?

13 Ben chí'i lúdxu'u para cabí'gu'u didza' xihui',
en para cabí' si' yé'enu' luzó'o.

14 Bucá'ana le cabí' naca tsahui', en ben le naca dxi'a.
Bë' ladxi' cőzu' dxi'a tsáhui'do',

en ben bayudxi gunu' yugu' lë ni.

15 Ruyútica'së' Xanru' nupa nácacaca tsahui',
en riyön quézinë' cate' tu'lidza Lë'.

16 Uzáguë'ë Xanru' xinőzgaca nupa tuá' dő',
en gunë' ga cuntu nu tsőjné' léguequi.

17 Nupa nácacaca tsahui' tu'lidza Xanru', ate' riyönnë' quéguequi,
en rusölë' léguequi lu yugu' le raca quéguequi.

18 Xanru' zóalen cazë' nupa tu'huí'ini ladxi',
en rusölë' nupa nácacaca nőxaj ladxi'.

19 Zían le riguí'i rizáquë'ë bönni' tsahui',
pero Xanru' rusölë' lë' lu yúgu'të lë na'.

20 Xanru' rapa chí'ë yúgu'të dxita yu'ë,
ate' bití' gatsaj nitú dxita queë'.

21 Le xihui' run nu ruá' dö' gun ga gati nu na',
ate' ila' бага' xigua' nupa biti' ta' lé' e dxi' a le naca tsahui'.
22 Xanru' caz ruhuóá' ué' bö' náca gaca caz huen dxin queé',
ate' biti' irugu que nitú nupa na' tu' zxóni ladxí' Lè'.

35

Tu le bil-lè' David

1 Xana' Dios, gudá' бага' nupa biti' ta' lé' e neda' dxi' a.
Butíl-lalen nupa ta' dí' l-lalen neda'.
2 Guzxón le gun chí' i neda' lu gudil-la,
en gudá' gácalenu' neda'.
3 Guzxón yaga tuchi' quiu' para uzagu' u xinözguequi nupa ta' zó'a regu' neda'.
Gudxi bö' naca caza' nacu' Li' Nu rusölá neda'.
4 Ben ga ulu' tuí' i, en ulu' gá' ana cá' asó nupa té' éni iluti neda'.
Ben ga ulu' huécaj, en ulu' gá' ana cá' asó nupa té' éni ilu' i dö' quia'.
5 Ben ga ilaca ca bëbu zxe café zeaj lu bö' ös,
en ben ga ulagué' gubáz lá' ayi que ya' abá quiu' léguequi.
6 Ben ga gaca chul-la nöza yú' ugaca, en ga cuílagaca,
ate' soa régu' è gubáz lá' ayi quiu' léguequi.
7 Bulu' cáchi' du yalaj le sön neda', en biti' bi nuna' quéguequi.
Gula' ch' óna yeru ga tsójbixa', en biti' bi nuna' quéguequi.
8 Ben ga idxín quéguequi tsáldo' os le usuniti léguequi,
en ben ga du yalaj na' bulu' cáchi' sön la' cuínguequi quez.
Ben ga ila' bixi lu yeru na' gula' ch' óna.
9 Udzeja ladxí' lena'-nè' Xanru',
en uzi' a xibé yöl-la' rusölá queé'.
10 Ila' nná dxita néquinida': "Xan, ¿nuzxi caz naca ca nacu' Li'?"
Rusöló' nu riguí' i rizáca' lu na' nu nál-latèrö ca le.
Rusöló' nu riguí' i rizáca', en riyadzaj riyudxi lu na' bönni' ribanè' le nequi que." 11 Ta' dá' bagué' è bönni' xihui' neda', en ta' nné' quia'.
Ta' nabi yúdxiné' neda' ca naca yugu' le cabí nözda'.
12 Tu' bi' è quia' le naca dö' cate' runa' le naca dxi' a,
ate' ruhui' inide' e ládxa' a.
13 Pero neda' gúcuca' lari' cá' asó cate' guláquié' hué'.
Bena' gubasa, en busaca' zi' bö' naca caza',
en uláz quéguequi bulidza'-nè' Dios zían luzuí.
14 Buí' inide' eda' tsca guca luzá' a o bi' i böchi' caza' nu na' guca hué'.
Guródxi yecha' a ca huí' inide' eda' channó gátinu xiná' caza',
15 pero cate' guchixi guníguida' neda', bulu' dzéjade' e, en bulu' dubi tsözxón.
Yugu' bönni' na' bulu' cá' anè' neda' cá' asó bulu' dubé' para iluné' ga có' a baguí'.
Yugu' bönni' na' biti' núnbè' a gulúnmatica' sè' neda'.
16 Bulu' saca' zi' è neda', en bulu' titjè' quia'.
Lu yöl-la' rilé quégaquié' neda' gulagu zxea láyi' gaquié'.
17 Xan, ¿gáca' xte caz uyú' iná' asu' le tuné' ?
Busólá neda' lu dö' tu' è quia'.
Busólá neda' lu ná' agaquié' bönni' na' náca gaquié' ca yugu' bédxi guixi'.
18 Guía' Li': "Xclenu' " lógaca bönachi zían ulu' dúbigaca quiu'.
Cu' a Li' yöl-la' ba ga nudúbigaca ziantè bönachi.
19 Biti' gu' u lataj ulu' dzeja nupa ta' dá' бага' neda', en ta' z' i' yè',
en biti' gu' u lataj ulu' titaj quia', nupa na' tu' dí' i neda', en biti' bi nuna' quéguequi.
20 Catu caz tu' i didza' le gun ga soa dxisó didza' bizxaj.
Lu yöl-la' rizí' yè' quéguequi ta' nné' quégaca nupa ta' bö' dxi' a tsáhu' do' yödzölió ni.
21 Bulu' salaj ruí' iguequi, en gula' nné' quia', gula' nná:
"¡Ön, bilé' quézitu' le nuné' !"
22 ¡Bilé' e quézinu' Li' lè ni, Xan! ¡Biti' su' dxisó!
¡Biti' ucá' anu' neda', Xan!
23 ¡Guyasa, Xan! ¡Busubán ládxi' u, Xan, para uchi' a usöröu' quia' !
¡Gúcalen neda', Xana' Dios!
24 ¡Tu' nacu' tsahui', buchí' a busörö quia', Xana' Dios!
¡Biti' gu' u léguequi lataj ulu' dzeja ni' a que le raca quia' !

25 jBiti' gu'u léguequi lataj ila'nná:

“Ön, bidéli'ru' le guzê ládxi'ru'!”

jBiti' gu'u lataj ila'nná: “Chibucúl-laru' lè'!”

26 jBen ga ulu'tuí'i, en ulu'gá'ana cá'asó nupa tu'dzeja cate' ruhuí'inida'!

jBen ga ulu'tuí'i, en ulu'gá'ana cá'asó nupa ta'dá'baga' neda'!

27 jBen ga ila'bódxí'a lu yöl-la' rudzeja quéguequi,

en ulu'zí' xibé nupa tuí'i ládxi'gaca urúaja' tsahui'!

jBè' lataj ila'nnática'só: “Nayépisètèrè' Xanru' Dios, tu' raza ládxi'è' gunè' ga gaca dxi'a quégaca huen dxin queé'!”

28 Ní'iró guna' ba nalí quiu', innía: “jNacu' tsahui'!”

en cu'a Li' yöl-la' ba idú dza.

36

1 Le naca xihui' ruí'ilen bönni' nucá'anè' Dios lu icja ládxi'da'ahuè'.

Biti' ca' rádxinè' Dios.

2 Tu' run ba zxön cuinè'

réquinè' bití' nözinè' Dios nabáguè'è' lè' dul-la', en bití' ichúguiè' Dios queé'.

3 Ru'è' didza' xihui', en rizí' yè'è.

Biti' réajni'inè', en bití' runè' le naca dxi'a.

4 Cate' ní' dè' lu le ráti'nè' rizá' ládxi'è' ca naca le xihui' gunè'.

Ruí'i ládxi'è' gunè' le cabí naca dxi'a,

en bití' rusanè' runè' le naca xihui'.

5 Zxöntèrò ca yehua' yubá naca yöl-la' dxi'i ladxi' quiu', Xan,

ate' gúntica'su' ca rnna xtídz'u, tscá zoa yehua' yubá.

6 Naca tsutsu le tsahui' nacu' ca nácgaca tsutsu yugu' guí'a zxön quiu'.

Ca ruchí'a rusóróu' naca ca naca nísado', tu' cabí gaca nu gúnbè'e le.

Run chí'i cazu' bönachi, en yugu' bóa' guixí', Xan.

7 Nazáca'tèrò yöl-la' dxi'i ladxi' quiu', Dios.

Run chí'u yúgu'tè bönachi ca runba' yójede, run chí'iba' yugu' bórado' zxan xílaba'.

8 Tu'huölaj tu'dzè'e bönachi quiu' le nayánda' lu yu'u lidxu',

ate' ruguí'ju' léguequi le naca yöl-la' dxi'i ladxi' quiu'.

9 Yúgu'tè le nacua' nabánigaca Li'.

Tu' naca cazu' bení' rilé'etu' bení'.

10 Bidxí'ítica'só nupa núnbè'gaca Li',

en ben le naca dxi'a quégaca nupa nácgaca tsahui'.

11 Biti' gu'u lataj bi ilún quia' nupa tun ba zxön cuínguequi,

en bití' gu'u nupa tuá' dō' lataj ulu'laga' neda'.

12 Nadzō'ögaca nupa tuá' dō'.

Déguequi luyú, en bití' ca' gaca ulu'huóása.

37

1 Biti' ubi uguí'i ládxi'do'oli' tu' tu'zí'gaca xibé nupa tuá' dō'.

Biti' uzxé'eli' nupa bití' tun le naca dxi'a.

2 Huadödité quéguequi ca raca que guixí' nacuadi,

en udxi quéguequi ca raca quégaca guixí'do' narúgugaca.

3 Buli'zxóni ládxi'è' Xanru', en guli'gún le naca dxi'a.

Bulí'gá'ana luyú queé', en guli'cóz dxi'a tsáhui'do'.

4 Bulí'sí' xibè' Xanru',

ate' gunnè' queéli' le rizé ládxi'li'.

5 Bulí'dódi cuinli' lu nè'è' Xanru'.

Bulí'zxóni ládxi'è' Lè', ate' gunè' le gácalen libí'ili'.

6 Gun cazè' Lè' ga urúajli' tsahui', en gácali' ca bení',

en cate' uchi'a usóróè' queéli', gaca queéli' ca lahui' dza.

7 Guli'sóa dxisó lahuè' Xanru', en guli'cōza le gunè'.

Biti' cuéqui ícjali' tu' nözi bönni' ruzí'è' xibé,

bönni' na' ru'è' dō'.

8 Bítí'rò leli', en bulí'sán yöl-la' ridzá'a.

Biti' ubi uguí'i ládxi'do'oli' tu' gun lè' ni ga guá'ali' dō'.

9 Dios caz uzáguè'è' xinózguequi nupa tuá' dō',

pero nupa tu'zxóni ladxi' Xanru', guequi quéguequi luyú.

10 Ia'látí'só xidzé, en bítí'rò soè' bönni' na' ru'è' dō'.

Uguiljali' xilatjè', pero bitì'rò soè' nì'.

11 Nupa nácagaca nõxaj ladxì', guequi quéguequi luyú,
ate' ulu'zì' xibé yöl-la' tsahui' que.

12 Tun didza' nupa tuá' dõ' bi ilúngaca quégaca nupa nácagaca tsahui',
en lu yöl-la' rilé quéguequi tagu zxea láyi' guequi.

13 Ruzzidxi cazé' Xanru' quéguequi,
tu' rilé'ené' dza udxì quéguequi.

14 Nupa tuá' dõ' chigula'béaj guíè' tuchi' quéguequi,
en nuá'gaca uxiti' yaga quéguequi
para ulu'xicja nupa ta'zaca' zì', en ta'yadzaj ta'yudxi,
en para iluti nupa tun le naca dxi'a.

15 Guíè' tuchi' quéguequi ila'chiza la' ladxì'do'guequisõ,
ate' ila'guítsaj uxiti' yaga quéguequi.

16 Dxi'atèrò le do' dèso' queè' bõnni' tsahui'
ca le zían dè queè' bõnni' ru'è dõ'.

17 Huayúzjagaca ná'agaca nupa tuá' dõ',
pero Xanru' caz rácalenè' nupa nácagaca tsahui'.

18 Ruí'ladxi' cazé' Xanru' nupa bitì' bi xigua' nabága'gaca,
ate' guéquitica'sõ xiyúgaca quéguequi.

19 Bitì' ca' ulu'tuí'i cate' idxín dza bitì' gaca dxi'a,
en cate' tsu'u gubín, gáta'dèra le ilágugaca.

20 Ulu'niti tsaz nupa tuá' dõ',
ate' nupa bitì' ta'lé'e dxi'a Xanru' ilaca ca yöl-la' lachi que guixi'.
La' tóditè' quéguequi, en ilaca ca dzõn le rinítitè.

21 Ta'nábini nu bi gunna quéguequi tu chí'sõ, pero bitì' ca' ulu'bí'i lè na'.
Nu naca tsahui' ruzá ladxì' quéguequi, en runõdzaj quéguequi.

22 Gaca luyú quégaca nupa run lá'ayè' Xanru',
pero ila'niti tsaz nupa rudxié' Lè' dõ'.

23 Le runè' bõnni' dxi'a naca le nuluf'inè' Xanru' lè',
ate' raza ladxè'è Lè' le runè' bõnni' na'.

24 Cate' røjtsõ'è, bitì' ca' røjtsõ'è tsaz,
tu' røjzõnè' Xanru' caz bõnni' na'.

25 Guca' ra'bando', pero na'a nagula',
en catu caz bilé'eda' nusán nè'è Dios bõnni' tsahui',
en catu caz bilé'eda' riyadzaj le ilágubi' zxf'inè'.

26 Yugu' dza ruzá ladxè'è bõnni' tsahui' quéguequi luzè'è
en runõdzjè' le ta'nábini lè' unõdzjè' tu chí'sõ,
Nácagacabi' zxf'ini xi'sóè' tu le run ga raza dxi'a queèru'.

27 Bulí'cá'ana le cabí'nacatè, en guli'gún le naca dxi'a.
Channõ caní gunli', sóali' tsaz,

28 tu' nadxí'inè' Xanru' nu run le naca tsahui',
en catu caz usán nè'è nupa néquiquequi quez queè'.
Gun chí'itica'sè' léguequi,

pero usunítitè' zxf'ini xi'sóagaca nupa tuá' dõ'.
29 Guequi luyú quégaca nupa nácagaca tsahui',
ate' ila'cuá'tica'sõ luyú na'.

30 Ru'è bõnni' tsahui' didza' le napa yöl-la' réajni'i,
ate' raza yöl-la' ruchi'a rusórõ ni'a que didza' na' ru'è.

31 Yu'u icja ladxì'da'ahuè' le gunná bè'è Dios.
Que lè ni na' catu caz ichixi iníguinè'.

32 Ruyuda' nu ruá' dõ' le runè' bõnni' tsahui',
en riguillaj nacxi gaca guti lè'.

33 Xanru' bitì' gu'è nu na' lataj bi gun queè' bõnni' tsahui' na',
en bitì' gu'è lataj irugu queè' cate' nu uchi'a usórõ queè'.

34 Bulí'zxõni ladxè'è Xanru', en guli'gún ca ré'ènè' gunli',
ate' uchisè' libí'ili' para guequi queéli' luyú.

Cate' udxì quégaca nupa tuá' dõ', hualé'e quézili' le.
35 Bilé'eda'-nè' bõnni' huía' dõ'.

Gúquiè' ca tu yaga zxõn, en buzì'de'enè' xibé.

36 Ní'irò gudõdi queè', en bitì'rò zoè'.

Yõjdilja' lè', pero bitì' ca' guca udzõlida' lè'.

37 Bulí'yú ca náquiè' bõnni' tsahui'.

Cuntu nu gaca bi inné queë',
 tu' ila'cuá'abi' zxi'ini xi'sóë' bönni' zxon ladxí'.
³⁸ Ulu'niti tsaz nupa tu' cá'ana le gunná bë'ë Dios.
 Usiúdxë' Xanru' yugu' zxi'ini xi'sóagaca nupa tuá' dö',
³⁹ pero rusólá cazë' nupa nácgaca tsahui'.
 Rutipë' ladxí'guequi cate' bi raca quéguequi.
⁴⁰ Rácalenë' léguequi, en rusólë' léguequi.
 Rubéajë' léguequi lu ná'agaca nupa tuá' dö', en rusólë' léguequi,
 tu' tu'zxöni ladxí'guequi Lë'.

38

¹ Biti' ilenu' neda', Xan, en biti' uzenu' neda' bach.
 Biti' gunu' neda' xiguia' lu yöl-la' rilé quiu'.
² Ben zi'u neda', en budxiú' neda' huë'.
 Nuzötju' neda' len no'o.
³ Yu'a yödzóhuë' zxon tu' rilenu' neda'.
 Dxiá huë' idütë' le naca' tu' nözi dul-la' nabága'a.
⁴ Xiguia' nabága'a naca ca tu nísado' ga ruchicja' nisa.
 Naca ca tu yua' zi'i nabága'a neda'.
⁵ Tu' bena' yugu' le cabí naca dxi',
 dxiá' huë' le rilá' siguti, en rudzu'.
⁶ Narecji' cúdza'a, en nagá'ana' cá'asö.
 Idú dza ruhuí'inide'eda'.
⁷ Idütë' le naca' yú'uda'a xilá,
 ate' nazxi' xipëla'a.
⁸ Rudú ladxá'a, en ricuidi'da'.
 Rinnëda' ladxá'a tu' ruúbi ruguí'i ladxí'da'ahua'.
⁹ Nöz quézinu' Li', Xan, le rizé ladxá'a,
 en riyönnu' le rinnëtica'sö ladxá'a.
¹⁰ Richunchu ladxí'da'ahua', en ricuidi' ladxá'a,
 ga ridxintë richul-la guiöj lahua'.
¹¹ Bítí'rö ta'dzaga neda' yugu' luzá'a, en yugu' böcha'a, tu' nözi xihuë'a,
 ate' tu'biga' dí'a dza quia' ga zoa'.
¹² Nupa té'ëni iluti neda' ta'bequi le ila'zön neda',
 ate' nupa té'ëni ulu'cul-la neda' tun xtídza'guequi nacxi ulu'suniti neda'.
 Idú dza ta'bequi ícjaguequi bi ilún quia'.
¹³ Naca' ca tu bönni' nacódzuë', en bítí'rö riyönda'.
 Naca' ca tu bönni' narugu lúdxë'ë, en biti' risaljé' ru'ë.
¹⁴ Naca' ca tu bönni' bítí'rö riyönnë',
 en que lë ni na' biti' bi didza' rubi'ë.
¹⁵ Tuzu' Li' ruzxöni ladxá'a, Xan.
 Ubí'i cazu' didza', Xana' Dios.
¹⁶ Biti' gu'u lataj ulu'dzeja ni'a que le raca quia'.
 Biti' gu'u lataj ilún ba zxon cuínguequi tu' nagá'ana' cá'asö.
¹⁷ Chizóa' tsöjbixa',
 en zóalenticá'sö xihuë'a neda'.
¹⁸ Que lë ni na' rixóalëpa' xiguia' nabága'a,
 en risëbida' ladxá'a tu' nözi dul-la' nabága'a.
¹⁹ Nacuá' dxi'a, en nál-lagaca nupa téqui neda' zi'.
 Nayánda' nupa tu'dí'i neda', en biti' bi nuna' quéguequi.
²⁰ Ta'dá'baga' neda' nupa tu' bí'i le cabí naca dxi'a que nu run le naca dxi'a.
 Caní tun tu' ruí'i ladxá'a guna' le naca dxi'a.
²¹ Biti' usán no'o neda', Xan.
 Biti' ubigu' ga zoa', Dios quia'.
²² Gudáchi gácalenu' neda', Xan,
 tu' naca cazu' Li' Nu rusólá neda'.

39

¹ Gunnía': Gun chi'i cuina' ca naca le runa',
 en biti' guna' dul-la' ca naca didza' ruá'a.
 Biti' bi didza' gu'a
 cate' nacué' nupa tuá' dö' gal-la' ga zoa'.

² Guzóa' dxisò, en biti' bē'a didza' ga bidxintē
biti' gunniá' le naca dxi'a, pero biyalí' xihuē'a.

³ Bubi buguí'i ládxi'da' ahua',
en cate' guzá' ládxa'a que, guyegui gulá ládxi'da' ahua'.
Que lē ni na' gunábida'-nē' Xanru', gunniá':

⁴ Xan, ¿gáca' xte caz soa' ibana'?
Buluí'i neda' tsca iz soa' ibana'.
Ben ga inózda' channō chizóa caz gátia'.

⁵ Nabábasō dza nuzú' quia' soa' ibana'.
Yugu' iz soa' ibana' biti' bi zeaj naca lo' Li'.

Le nácatē biti' bi nácgaca yúgu'tē bōnachi nacua' luyú ni.

⁶ Nácgacasō ca tu zxul-la rigú'u bōaj.
Nítisō tu' ubi tu' guí'i ládxi'do' guequi, en tun dxin.
Tu'tubi yōl-la' tsahui', pero biti' nōzguequi nuzxi guequi que.

⁷ ¿Bizxi caz gaca guna' lōza, Xan?
Ruzxōni ládxa'a Li'.

⁸ Busólá neda' lu xiguia' nabága'a,
en biti' gu'u lataj ulu'titaj quia' nupa nácgaca canōz.

⁹ Soa' dxisò, en biti' bi didza' gu'a,
tu' ben casu' Li' ga riguí'i rizáca'a lē ni.

¹⁰ Bítirō gunu' neda' xiguia'.
Chizóa gátia' tu' rusaca' zi'u neda'.

¹¹ Runu'-nē' xiguia' bōnni' dul-la', en ruzenu' lē' bach.
Ca tu'tōba' bēlado' que le yú'uba', rusunítu' le ruí'i ládxi'ē bōnni' na'.
Biti' bi naca cazē' bōnni' dul-la' na'.

¹² Buzē nagu' le rulidza' Li', Xan, en le rinábida' Li'.
Biti' su' dxisò cate' ribōdxa' lo' Li',
en biti' gaca' ca tu bōnni' zi'tu' lo' Li',
en ca tu bōnni' ridasē' ca guláquiē' xuz xtó'otu'.

¹³ Benna neda' lataj idipa ládxa'a
zí'alō ca uzá'a yōdzóliō ni, en bítirō soa'.

40

¹ Lu yōl-la' ribōza zxōn ladxí' quia' gulōza' gácalenē' Xanru' neda'.
Ní'irō buzē nague' quia', en biyōnnē' le bulidza'-nē'.

² Bubéajē' neda' ca tu lu yeru ga rē, en lu guna' zili.
Buzōē' neda' tu lu guiōjto'o, en guléquiē' neda' tsutsu.

³ Busédinē' neda' tu le cubi le rul-la' le naca yōl-la' ba queē' Dios queēru'.
Zián nupa ila'lé'eni lē ni, en ilún Lē' zxōn,
ate' ulu'zxōni ladxí'-nē' Xanru'.

⁴ Bica' ba bōnni' ruzxōni ládxi'ē' Xanru'.
Biti' runē' tsōzxōn nu run ba zxōn cuini, nu na' run zxōn yugu' dios núngaca bōnachi.

⁵ Ziántērō naca le nunu' queētu', Xana' Dios, yugu' le tun ga rubánitu'.
Ziántērō le yu'u icja ládxi'do'o ca naca le gunu' queētu'.

Biti' ca' gaca nu ulaba lo' Li' tsca nácgaca.
Channō gué'ēnda' nu usiyōnda' tsca nácgaca,
nayántērō tsca le gaca ulaba'.

⁶ Biti' rē'ēnu' gútigaca'-ba' bōa' guixi' lo', en calēga bi cu'a lo'.
Biti' rinabu' uzégui' gaca'-ba' bōa' hēdxi lo',

en calēga tu le guna' lo' para ugúa dul-la',
pero gusalju' naga' para yōnda' le guío' neda'.

⁷ Que lē ni na' gunniá': Ni zoa caza' neda' quiu'.
Lu guichi lá'ayi quiu' nazúaj caz ca naca quia'.

⁸ Raza ládxa'a runa' ca rē'ēnu' Li', Dios quia'.
Nagu'a icja ládxi'da' ahua' xibá naguixju' Li'.

⁹ Ga tu'dubi bōnachi guixzi yu quiu', Xan,
busiyōnda' léguequi nacu' tsahui'.

Biti' ca' guzóa' dxisò.

Nòz quézinu' lè ni, Xan.

¹⁰ Biti' bucáchi'za' icja ládxi'da'ahua' ca ruúnu' tsahui' bönachi.

Bulu'a lahui ca runu' ca rnno', en ca rusóló' bönachi.

Ga nudúbigaca bönachi quiu' biti' guzóa' dxisò,

pero bē'a didza' ca nacu' dxi'i ladxi', en ca ru'u didza' le nácatē.

¹¹ Biti' ugú' quia' yöl-la' dxi'i ladxi' quiu', Xan.

Yöl-la' dxi'i ladxi' quiu', en ca runu' ca rnna xtídzu'u ilún chí'ítica'sò neda'.

¹² Zián le raca quia' nagú'ugaca neda' lē'ajlō, le cabí gaca nu ulaba.

Nabága'a yugu' dō' bi'a, en bítirō gaca ilé'eda'.

Nayanró ca guitsa' icja', ate' rudú ládxa'a.

¹³ ¡Busólá neda', Xan!

¡Gudáchi gácalenu' neda', Xan!

¹⁴ Ben ga ulu'tuí'i, en ila'bó' baguí'i

nupa na' tē'ēni ulu'suniti neda'.

Ben ga ulu'huécaj, en ulu'gá'ana cá'asò

nupa na' tē'ēni gaca quia' le cabí naca dxi'a.

¹⁵ Ben ga ulu'dú ládxi'gaca tu' nabíxigaca

nupa na' tu'titaj neda', ta'nná: "¡Buyútsōca' le raca queē'!"

¹⁶ Ben ga ulu'dzeja, en ulu'zí' xibó' yúgu'tē nupa tu'guilaj Li'.

Ben ga ila'nnática'sò nupa ta'dxf'i yöl-la' rusólá quiu',

ila'nná: "Nayépsētērē' Xanru'."

¹⁷ Nacuídida', en biti' bi gaca guna',

pero ru'í ladxi' cazu' Li' neda', Xan.

Naca cazu' Nu rácalen neda', en Nu rusólá neda'.

Biti' tsenu' guídu' quia', Dios quia'.

41

¹ Bica' ba bönni' ru'í ládxe'ē nupa nácgaca yechi'.

Xanru' gácalen cazē' bönni' na' cate' bi gaca queē'.

² Xanru' Dios gun chí'ē lē', en gunē' ga soē' ibanē'.

Gunē' ca' ga uzi'ē xibé xiyú cazē'.

Biti' usán nē'ē lē' lu ná'agaca nupa biti' ta'lé'e lē' dxi'a.

³ Xanru' utipē' ládxe'ē bönni' na' cate' ré'enē'.

Uchisē' lē' lu da'a le ráti'nē', en gunē' ga soē' dxi'a.

⁴ Gunnía': Bena' dul-la' lo' Li', Xan.

Buéchi' ladxi' neda', en bun neda'.

⁵ Nupa biti' ta'lé'e neda' dxi'a ta'nnē' quia', ta'nná:

"¿Bátaxi gátie', en huáca gal-la ládxi'gaca bönachi lē'?"

⁶ Channō uduyúgaquiē' neda', ta'zí' yē'ē.

Ta'gúē' didza' ca naca le raca quia',

en cate' ta'rúajē', tu'siyönnē' bönachi.

⁷ Tu'dubi nupa biti' ta'lé'e neda' dxi'a, en ta'nnē' quia'.

Ta'zá' ládxi'gaca zián le naca dō' le ilún quia'.

⁸ Ta'nnē' quia', ta'nná: "Yu'ē yödzhuhē' le guti lē'.

Bítirō caz huóásē' ga na' dē' lu le denē'."

⁹ Lē'sca' caní benē' böchi' luzá'a ruzxöni ládxa'a-nē'.

Bönni' gudágulenē' neda' tsözxön ridá'baguē'ē neda'.

¹⁰ Buéchi' ladxi' neda', Xan, en bun neda',

ate' ubí'i caza' quégaca nupa na' biti' ta'lé'e neda' dxi'a.

¹¹ Gácabe'eda' raza ládxi'u neda',

tu' cabí ulu'xicja neda' nupa biti' ta'lé'e neda' dxi'a.

¹² Gáclen cazu' neda' tu' runa' le naca dxi'a.

Gunu' ga sóatica'sa' lo' Li'.

¹³ ¡Yöl-la' ba Xanru', Dios quégaca bönachi Israel!

¡Guli'cu'ē yöl-la' ba na'a dza, en yugu' dza si' zaca!

¡Ca' gaca!

¡Ön, ca' gaca!

42

¹ Ca rizé ládxi'ba' bidxina' guixi' nisa yégudo',
lësca' caní rizé ládxa'a Li' Dios.

² Ribidxi ládxa'a Li' casu', Dios.

³ Bátaxi udxina' ga dë quia', en tsu'a le yúbölö yudo' lá'ayi quiu'?

³ Rëla, en te dza ribödxá', en biti' bi rahua'.

Yugu' dza nacuá' nupa ta'nábini neda', ta'nná: "¿Gazxi caz zoa Dios quiu'?"

⁴ Risëbi ládxa'a cate' röneda' ca guca zí'alö,

cate' guzá'lena' bönachi guixi' yu, en yöjnórúa' láhuilöguequi ra' yu'u queë' Dios.

Lu yöl-la' rudzeja queëtu' bil-latu', en guyéaj ládxi'tu'-në' Xanru', en bentu' laní.

⁵ ¿Bixz que risëbida' ládxa'a, en bixz que rö'a böniga?

Uzxóni ládxa'a-në' Xanru' Dios, tu' huadxín dza cu'a-në' yöl-la' ba le yúbölö.

Náquië' Nu rusólá neda', en náquië' Dios quia'.

⁶ Risëbida' ládxa'a, Dios quia'.

Que lé ni na' tsöjneda' Li' tsanni ni zoa', ridá' rixxúnna' ra' yegu Jordán,

en tsanni ni ridá' lu guí'a Hermón, en lu guí'a Mizar.

⁷ Ca tu guziú' rinnë lu nísado', en ca bö ruí' tu budoá' nísado' queë' Dios,

caní rinnë ladxí' bö' naca caza' lu yöl-la' risëbi ladxí'.

⁸ Rinábida'-në' Xanru' huéchi' ládxe'ë neda' yugu' dza.

Yugu' dzó' rul-la' yöl-la' ba queë' Lë',

en rulidza' Dios, ruí'lëna'-në' didza', Nu na' runna quia' yöl-la' na'bán.

⁹ Guía'-në' Dios, Nu ruzóa neda' tsutsu, innía': ¿Bixz que nál-la ládxi'u neda'?

¿Bixz que run bayúdx quí' sáca'tica'sa' lu ná'agaca nupa biti' ta'lé'e neda' dxi'a'?

¹⁰ Rutsaba yúgu'të dxi'a yu'a tu' tu'didza' yudxi neda'.

Yugu' dza ta'nábini neda', ta'nná: "¿Gazxi caz zoa Dios quiu'?"

¹¹ ¿Bixz que risëbida' ládxa'a, en bixz que rö'a böniga?

Uzxóni ládxa'a-në' Xanru' Dios,

tu' huadxín dza cu'a-në' yöl-la' ba le yúbölö,

tu' náquië' Nu rusólá neda', en náquië' Dios quia'.

43

¹ Guléaj neda' tsahuí', Dios, en bë' didza' uláz quia' lógaca bönachi tuá' dö' quia'.

Busólá neda' lu na' nu rizi' yë', en biti' naca tsahuí'.

² Li' casu' nacu' Dios, Nu rutipa ládxa'a. ¿Bixz que nusán no'o neda'?

¿Bixz que ruhuí'inida' tu' ta'bía no neda' nupa tu'dí'i neda'?

³ Gusól-la' quia' bení' quiu', en le naca idútë li quiu' para ulu'luf'i neda' nöza.

Ben ga ila'ché' neda' ga naca lá'ayi quiu', ga na' zoa casu' Li'.

⁴ Tsu'a ra' bucugu queë' Dios.

Ibíga'a lahuë' Dios, Nu run ga rudzéjade'eda'.

Gúl-lalena' bihuël-la, cu'a Li' yöl-la' ba, Dios, nacu' Dios quia'.

⁵ ¿Bixz que risëbida' ládxa'a, en bixz que rö'a böniga?

Uzxóni ládxa'a-në' Xanru' Dios,

tu' huadxín dza cu'a-në' yöl-la' ba le yúbölö,

tu' náquië' Nu rusólá neda', en náquië' Dios quia'.

44

¹ Biyön quézitu' le, Dios.

Bulu'siyönnë' netu' xuz xtó'otu'

ca naca yugu' le zxön benu' dza ni'te,

cate' ni' gula'cu'ë légaquië' luyú ni.

² Bulaga casu' Li' bönachi yugu' yödzö izá'a,

en bucuásu' légaquië' luyú ni.

Busaca' zi'u bönachi izá'a na', en gurú'unu' léguequi.

³ Biti' gula'déli'në' xuz xtó'otu' luyú ni rácasó quégaquië',

en biti' bulu'sólá la' cuíngacasë',

pero ben casu' Li' lé na' len yöl-la' huáca zxön quiu',

en lu yöl-la' zxön que le naca cazu',
 ate' bulú'u lahui ca nadxí'inu' légaquië'.
 4 Naca cazu' Li' Dios quia', en Nu rinná be'e neda'.
 Busólá bönachi quiu', yugu' zxi'ini xi'sóë' Jacob.
 5 Uguntu' dxin yöl-la' huáca quiu', uxíjatu' nupa ta'dá'baga' netu',
 ate' tu' zóalen cazu' netu', ucúl-latu' nupa biti' ta'lé'e netu' dxi'a.
 6 Biti' uzxöni ládxa'a uxiti' yaga quia',
 en biti' uzxöni ládxa'a guié tuchi' quia' para ilácalen neda',
 7 tu' rusólá cazu' Li' netu' lu ná'agaca nupa biti' ta'lé'e netu' dxi'a,
 en ruzötju' nupa tu'dí'i netu'.
 8 Cú'utica'stu' Li' yöl-la' ba,
 en guiética'stu' Li': "Xclenu'."
 9 Pero na'a nusán no'o netu', Dios, en bē'u lataj nu buxicja netu'.
 Bítirō réajlenu' bönni' queétu' rōjáquië' gudil-la.
 10 Benu' ga buzxunnajtu' lógaca nupa ta'díl-lalen netu',
 ate' gula'gúë' yugu' le nequi queétu'.
 11 Bē'u lataj gulútië' ziantu' ca nu rúti-gacaba' bō'cu' zxila'.
 Bēsílasiu' netu' ládjagaca yōdzō izá'a.
 12 Naca tsca bēti'u netu', en láti'do'os guzxi'u.
 Biti' ca' buzi'u xibé tsca guzxi'u.
 13 Bönachi yugu' dzaga yōdzō queétu' bila'lé'e lē na' benu' queétu',
 ate' tu'cá'ana netu' cá'asō, en tu'titaj netu'.
 14 Benu' ga tu'didza' yudxi bönachi yugu' yōdzō netu'.
 Tu'tá ícjaguequi lu yöl-la' rucá'ana netu' cá'asō.
 15 Yugu' dza rutuí'ida' ca raca queétu',
 en rō'a böniga lu yöl-la' rutuí' quia',
 16 tu' riyōnda' nupa tu'didza' yudxi neda', en tu'cá'ana neda' cá'asō,
 nupa na' biti' ta'lé'e neda' dxi'a, en tu'dí'i neda'.
 17 Guca queétu' yúgu'tē lē ni sal-la' biti' nál-la ládxi'tu' Li',
 en biti' nucá'anatu' didza' dzaga bēnlenu' netu'.
 18 Biti' ca' bōaj ládxi'tu' ca réajlë'ëtü' Li',
 en biti' gudá'baga'tu' le buluí'inu' netu' guntu'.
 19 pero nusán na' cazu' netu' ladaj nupa nácagaca ca yugu' bōa' gui'a sínia',
 en nucá'anu' netu' ga chizóa tseajtsázatu' lataj chul-la.
 20 La'tu' gul-la ládxi'tu' Li', Dios queétu',
 o la'tu' guyéaj ládxi'tu' tu dios izá'a,
 21 la' gáquibe'etēnu' lē ni, Dios,
 tu' nōz quézinu' le rizá' ládxi'tu'.
 22 Tu' néquitu' quiu' Li' zóatica'sō nu guti netu'.
 Nactu' ca yugu' bō'cu' zxíla'do' lo nu guti légacaba'.
 23 ¡Bubán, Xan! ¿Bizx que rásitso' Li'?
 ¡Guyasa! ¡Biti' usán no'o netu' chadía chacanna!
 24 ¿Bizx que nucachi' lo' lotu' netu'?
 ¿Naru' nál-la ládxi'u ca raca queétu', en ca riguí'i rizáca'tu'?
 25 Naguínagaquië' netu' luyú.
 Nadínitu' lu bēchtó yu.
 26 ¡Gudáchi gácalenu' netu',
 en lu yöl-la' dxi'i ládxi' quiu' busólá netu'!

45

1 Rizá' ládxa'a tu le naca dxi'a.
 Ru'a didza' que le runë' bönni' rinná bē'ë.
 Naca lúdxa'a ca le ruzúajlenë' bönni' nabé'ede'enë' ru'ë didza'.
 2 Nácatëru' Li' lachi ca yúgu'tē bönachi.
 Nabé'ede'enu' ru'u didza'.
 Que lē ni na' nunë' Dios gaca dxi'a quiu' chadía chacanna.
 3 Bega' lē'u guié tuchi' quiu', bönni' nayépisë',
 lu yöl-la' lachi quiu', en lu yöl-la' unná bē' quiu'.
 4 Lu yöl-la' unná bē' quiu' idéli'nu' lu gudil-la,
 ugunu' dxin le naca idútë li, en yöl-la' nōxaj ládxi', en le naca tsahui'.

Yöl-la' huáca zxön quiu' gun ga ilá' lahui yugu' le zxöntërö.
 5 Natúchi'gacada' yaga lahui tuchi' quiu'.
 Bönachi yugu' yödzo' zi'tu' ta'dzö'ö lo', nupa na' ta'díl-lalen li'.
 Yugu' yaga lahui tuchi' quiu' nachöza'gaca ládxi'do'guequi.

6 ¡Chadía chacanna naguixju' ga rö'u rinná bē'u, Dios!
 ¡Ca naca le naca tsahui' rinná bé'enu' bönachi quiu'!

7 Nadxfínu' le naca tsahui', en bití' rilé'enu' dxi'a le bití' nácaté.
 Que lē ni na' Dios quiu' nabö cazē' li'.
 Nachízirē' icja ládxi'do' o yöl-la' rudzeja ca le nápagaca ia'zica'rö bönachi.
 8 Rilá' zxixi lari' nacu' len zi' mirra, en zi' áloe, en zi' casia.
 Tunē' bönni' huil-la ga rudzéjanu' lu yu'u lidxu' zxön.
 9 Yugu' nigula zxfínigaquiē' bönni' ta'nná bē'ē
 nútsa'gacabi' bi'i nigula nacuá'abi' lidxu'.
 Nigula quiu' rinná bé'enu' zúnu' cuitu' ibēla,
 en nácunu le nazí'i biquitaj oro nazaca'.

10 Bē' ládxi' neda', nigúlado'.
 Bē' ládxi' neda', en biyön xtídza'a.
 Gul-la ládxi' bönachi yödzo' quiu', en yugu' di'a dza quiu'.
 11 Ní'irö sē ládxi'ē bönni' rinná bē'ē yöl-la' lachi quiu'.
 Buzóa zxibu' lahuē' tu' náquiē' xanu'.
 12 Ní'irö bönachi yödzo' Tiro ila'dxín lo' nuá'gaca le nazáca'da' le ilunna quiu'.
 Yugu' bönni' ta'lé'enē' yöl-la' tsahui' ila'nábinē' li' bi unödzu' quégaquiē'.
 13 Yugu' bi'i nigula queē' bönni' rinná bē'ē zóagacabi' lidxi', en nácatērögacabi' lachi.
 Lari' nácubi' nadíalen du oro.
 14 Ila'ché'ē-bi' lahuē' bönni' rinná bē'ē, nácubi' lari' nazáca'da'.
 Ila'dabi' yugu' bi'i nigula ra'bando' cúdzi'löbi',
 ate' ila'ché'ē légacabi' lahuē' bönni' na' rinná bē'ē.
 15 Lu yöl-la' rudzeja, en lu yöl-la' ruzi' xibé quégacabi' ila'dxinbi',
 en ila'yázabi' yu'u lidxi' bönni' na' rinná bē'ē.
 16 Ila'cuá'abi' bi'i bönni' quiu' uláz quégaquiē' xuz xto'o.
 Gunu' ga ila'nná bē'ēbi' idútē yödzo'lió.
 17 Gunu' ga tsöjnégacatica'sö bönachi ca nacu' Li'.
 Que lē ni na' yúgu'tē bönachi ilē li' "Xclenu'" yugu' dza si' zaca.

46

1 ¡Náquiē' Dios Nu run chí'i rē'u, en Nu ruzóa rē'u tsutsu!
 ¡Zóatica'sé' gácalenē' rē'u cate' bi' raca queéru'!
 2 Que lē ni na' bití' gádxiru' sal-la' izxizi idútē yödzo'lió,
 en ila'niti yugu' gu'a lu nísado',
 3 en sal-la' chasa idxía, en tsu'u bö nísado' na',
 en ila'zxizi gu'ado' tu' nözi le raca.
 4 Zoa tu yegu le run ga tu'dzeja nupa nacuá' ladzē' Dios,
 ga na' rö'ö yudo' lá'ayi ga zoē' Dios nayépisëtērē'.
 5 Zoa cazē' Dios yödzo' na', le catu caz iníti.
 Cate' ní' soa itó yu gácalenē' nupa nacuá' ní'.
 6 Tadxí ta'dzöbi bönachi yugu' yödzo',
 ate' ta'bö' baguí'i nupa ta'nná bē',
 tu' ru'ē didza' Dios, ate' riniti luyú ni.

7 Xanru' nayépisëtērē' zóalen cazē' rē'u.
 Dios quégaca zxi'ini xí'soé' Jacob rapa chí'ē rē'u.

8 Guli'dá ilé'eli' le nunē' Xanru'.
 Bul'yú ca nusunítiē' luyú ni.
 9 Ruzóa dxiē' gudil-la rácacaca idútē yödzo'lió.
 Riguitsjē' yugu' uxiti' yaga,
 en rusunítiē' yugu' yaga lahui tuchi' que gudil-la.
 Ruzégui'ē yugu' carreta que gudil-la tu lu gu' zxön.
 10 Rnnē': "Guli'sóa dxisö, ate' guéquibe'eli' naca caza' Dios.
 Nayépisëtēra' yugu' lu yödzo', en lu idútē yödzo'lió."

11 Xanru' nayëpisëtërë' zóalen cazë' rë'u.
Dios quégaca xzí'ini xí'sóé' Jacob rapa chi'è rë'u.

47

1 ¡Lu yöl-la' rudzeja queëli' guli'capa' ná'ali', bönachi yúgu'të yödzo!
¡Guli'cu'è yöl-la' ba Dios, len yugu' le rúl-lalenli'!

2 Ral-la' gunru' bal Xanru' Dios nayëpisëtërë'.
Náquië' Nu rinná bë' idütë yödzölió.

3 Benë' ga bidéli'ru' yugu' lu bönachi izá'a.

Benë' ga rinná be'eru' yugu' yödzö.

4 Guró cazë' luyú ga ni nuzóé' rë'u.

Naca tu luyú lachi quégaca xzí'ini xí'sóé' Jacob, nupa na' nadxí'i quézinë'.

5 Len yöl-la' ba zxön ribenë' Dios ga rö'è rinná bë'è.

Le zían le tu'cödxë' cate' ribenë' Xanru' ni'.

6 ¡Guli'gul-la yöl-la' ba queë' Dios! ¡Guli'gul-la!

¡Guli'gul-la yöl-la' ba queë' Bönni' rinná bé'enë' rë'u! ¡Guli'gul-la!

7 ¡Rinná bë'è Dios idütë yödzölió ni!

¡Idú ládxi'li' guli'gul-la yöl-la' ba queë'!

8 ¡Zoa cazë' Dios lataj lá'ayi queë' ga rö'è rinná bë'è!

¡Rinná bé'enë' bönachi yúgu'të yödzo!

9 Tu'dubi nupa ta'nná be'e yugu' yödzö

tsözxön len bönachi queë' Dios queë' Abraham.

10 ¡Nequi queë' Dios yöl-la' zxön quégaca yúgu'të yödzo nacua' yödzölió!

¡Nayëpisëtërë' Lë'!

48

1 Nayëpisëtërë' Xanru', ate' run bayudxi cú'uru'-né' yöl-la' ba idú ládxi'ru'
ga zoa lu yödzo queë' Dios queëru' le zoa lu guí'a lá'ayi queë'.

2 Lachi, en sibi naca guí'a lá'ayi na',
ate' raza ládxi'gaca bönachi idütë yödzölió ca naca.

Caní naca guí'a Sión le rö'ö tsölá'aló ga za' bö' ziaga.

Lu yödzo ná' dë ga zoa Bönni' Unná Bë' nayëpisë'.

3 Rulu'è lahui Dios sóaru' tsutsu cuitë' Lë'
ga zoa lu yu'u lídxë'.

4 Gula'dá'baga' nupa ta'nná bë' lu yu ni,
en gula'bígui'è ra' yödzo lá'ayi na'.

5 Cate' bila lé'enë' yödzo na' bulu'báininë'.

Gula'bö'è böniga, en la' bulu'zxúnajtë'.

6 Ra' yödzo na' gula'zxízië'.

Gula'zaca' zí'è ca raza queënu nigula chizóa uzóanu-bi' bí'ido'.

7 Risól-lë'è Dios tu bö' budunu',
le rusuniti yugu' barco zxön que yödzo Tarsis.

8 Biyönrü' ca nácagaca le zxön benë' Dios,

ate' na' a rilé'e quéziru' le runë',

lu yödzo lá'ayi queë' Dios quégaca ni'a në'è guizxi yu,
en náquië' ca' Dios queëru'.

Tsaz naguixjë' yödzo na'.

9 Ga zoa lu yudo' quiu', Dios,
röjnetu' ca naca yöl-la' dxi'i ladxi' quiu'.

10 Ca nayëpisëtërë Lo', Dios,
ca' ta'gú'u Lí' yöl-la' ba bönachi idütë yödzölió.

Ca naca le naca tsahui' rinná bë'u.

11 Ulu'dzeja bönachi nacua' yödzo Sión.

Ulu'zí'ínu xibé nigula xzí'ini xí'sóé' Judá

tu' ruchi'a rusóröu' netu' ca naca le naca tsahui'.

12 Guli'dá idú gásibi'iló ga dë yödzo Sión,
en buli'laba yugu' yu'u sibi tun chi'i yödzo na'.

13 Buli'yú ca naca zö'ö run chi'i yödzö na',
 en buli'yú ca' le nuzóagaca le tsutsu,
 para gaca quíxjö'i'ili' xzí'ini xi'sóali' ca náquië' Dios zxön ni.
 14 Tsaz náquië' Dios queëru', na'a dza, en dza si' zaca.
 Ulu'inë' rë'u nöza tödi gátiru'.

49

1 Guli'yöni lë ni, libí'ili', bönachi yúgu'të yödzö.
 Buli'zé nágali', libí'ili', zóali' iduté yödzölió.
 2 Libí'ili', nayépsëtëróli', en libí'ili', nácali' cá'asö.
 Libí'ili', dë yöl-la' tsahui' queëli', en libí'ili', nácali' yechi'.
 3 Tsöjsá' ládxa'a ca naca le nápagaca yöl-la' réajni'i,
 en gu'a didza' le nápagaca yöl-la' raca yenni'.
 4 Güf'i ládxa'a ca naca tu le rucudzu' didza',
 en quíxjö'a ca nácagaca tsanni quinnia' lë'e bihuël-la.
 5 Biti' bi rádxida' cate' ridxín bi raca quia',
 cate' ta'gu'ë neda' lé'ajlö bönni' tuá' dö' biti' ta'lé'enë' neda' dxi'a.
 6 Tu'zxöni ládxe'ë bönni' na' yöl-la' tsahui' quégaquië',
 en tun ba zxön cúngaquië' ca nácagaca le dë quégaquië'.
 7 Biti' gaca huó'uë' la' cuinsë' nitüë' bönni' na'.
 Biti' gaca bi ünödzjë' queë' Dios le gun ga usölë' lë',
 8 tu' naca zxöntëró le huó'u yöl-la' na' bán que nu bönni',
 ate' catu caz gaca nu bönni' quíxjë' ca naca,
 9 para idéli'në' sóatica'së' ibanë',
 en cabí tsázië' yeru ba ga yú'ugaquië' bönni' nati.
 10 Rilë'enë' tatië' ca' bönni' ta'yéajni'inë',
 en ta'nitië' tuz ca tati nupa biti' bi nözigaca, en nupa biti' ta'yéajni'i,
 ate' tu'cá'anë' yöl-la' tsahui' quégaquië' le ulu'z'í' xibë bönachi yúbólö.
 11 Téquinë' ila'cuá'tica'sö lídxigaquië' bönni' na',
 ate' tsaz ila'cu'ë ni',
 ate' ta'gu'ë lágaca xiyúgaquië' ca naca la' lágacasë'.
 12 Pero yöl-la' ba zxön napë' bönni' na' biti' gun ga sóatica'së'.
 Gati cazë' ca tátiba' böa' guixi'.
 13 Caní naca le gaca quégaquië' bönni' tu'zxöni ládxe'ë yöl-la' tsahui' quégaquië',
 enca' quégaca xzí'ini xi'sóagaquië',
 yugu' bí'i na' ta'yaza ládxi'gacabi' didza' gulu'ë xúzgcacabi' na'.
 14 Ilátië' ca tátiba' bö'cu' xzila',
 ate' yöl-la' guti gaca quégaquië' ca tu nu uyú bö'cu' xzila'.
 Yugu' bönni' tsahui' ila'nná bé'enë' légaquië' cate' itö yu zila.
 Ila'niti le guta' quégaquië', ate' ila'cuá'tica'së' lataj chul-la ga dzö'ö nupa nátigaca.
 15 Huó'u a cazë' Dios yöl-la' na' bán quia' lu yöl-la' guti,
 tu' ichë'ë neda' ga tsöjsóalena' Lë'.
 16 Biti' gádxinu' cate' idéli'në' nu bönni' yöl-la' tsahui' zxön,
 en cate' xön yöl-la' lachi que yu'u lidxë',
 17 tu' cabí bi u'ë cate' gátië',
 en biti' tséajlen lë' yöl-la' lachi que le guta' queë'.
 18 Sal-la' cate' ni' zoë' nabanë' buzí' xibé bö' naca cazë',
 ate' gula'gú'u bönachi lë' yöl-la' ba cate' bidéli'në' yöl-la' tsahui' na'.
 19 Tsázië' ga na' dzö'ë xuz xtá'ahuë',
 en bití'rö ilé'enë' bení'.
 20 Náquië' bönni' napë' yöl-la' zxön, pero riyádzjanë' yöl-la' réajni'i,
 ca böa' guixi' tati cázaba'.

50

1 Ru'ë didza' Xanru' Dios nayépisëtëré'.
 Nutubë' dërö nupa nacua' yödzölió ga naguéla'të ga rilën gubidza ga ridxintë ga ribía.
 2 Lu yödzö Sión rigu'ë Dios bení'.
 Napa yödzö na' yöl-la' lachi idú.
 3 Zë'ë Dios queëru', en biti' soë' dxisö.
 Tsöjñöru lahuë' tu guí' zxön,
 ate' tsecja tu bö' budunu' idú gasibí'ilë'.
 4 Ulidzë' lúzxiba xitsá', enca' luyú

cate' uchi'a usöröë' quégaca bönachi queë'.

⁵ Rnnë' Dios: "Guli'túbi nupa néquiguequi quez quia', nupa na' gulunlen neda' didza' dzaga, en bulu'lalaj rön lahua' le ben tsutsu didza' dzaga na'."

⁶ Naca bë' náquië' tsahui' Dios lúzhiba xitsá', tu' uchi'a usöröë' Dios bönachi queë'.

⁷ Rnnë': "Buli'zë nágali', bönachi quia', ate' gu'a didza'. Buli'zë nágali', bönachi Israel, ate' uzéguia' libí'ili' didza'. Naca caza' Dios.

Ön, naca' Dios queëli'.

⁸ Biti' uzéguia' libí'ili' didza' ca naca le rúnnali' quia', en caléga ca nácagacaba' bóa' bëdxi ruzégui'li'-ba' lahua'.

⁹ Biti' riquinda'-ba' bëdxi queëli', en caléga chivo biguiú' nacua'aba' queëli',

¹⁰ tu' néquigacaba' quia' yúgu'tëba' bóa' guixi', enca' bóa'-bëdxi nacua'aba' lu gayuá' gayuá' gu'ado'.

¹¹ Néquigacaba' ca' quia' yúgu'tëba' bóa' zoa xiligacaba', enca' yúgu'të le zoa nabán la' guixi'.

¹² La'tu' riduna' biti' guía' ca' libí'ili', tu' nequi quia' yödzülió, enca' yúgu'të le nacua' ni'.

¹³ ¿Naru' gágutsa' xipéla' gacaba' bëdxi, o guí'jatsa' xichóngacaba' chivo?"

¹⁴ Le ral-la' unódzjali' queë' Dios naca yöl-la' rë Lë': "Xclenu" ate' ral-la' gunli' lahuë' Dios nayépisëtërë' ca naca le guzxf' lu ná'ali' gunli'.

¹⁵ Rnnë' ca': "Ral-la' ulídzali' neda' cate' bi gaca queëli'. Gácalen caza' libí'ili', ate' gunli' neda' bal."

¹⁶ Dios rë' bönni' huía' dö', rnnë':

"¿Bizx que ru'u didza' ca nácagaca xibá naguixja'?

¿Bizx que ru'u didza' ca naca didza' dzaga núnlena' bönachi?

¹⁷ Biti' runnu' lataj usédida' li', pero rucá'anú' cá'asö didza' ruá'a.

¹⁸ Cate' rilé'enu'-në' bönni' gubán rácalenu' lë', en runu' tsözxón nupa ta' guitsaj xibá que yöl-la' nutsaga na'.

¹⁹ Zóatica'su' gu'u didza' xihui', en ruí'tica'su' didza' biti' nácatë.

²⁰ Zóatica'su' uzéguiu'-në' böchi' cazu', en rudidza' yudxu' böchi'-zan cazu'.

²¹ Caní benu', ate' biti' bi gunniá', ate' gúquinu' naca' ca naca cazu' li', pero na'a uzéguia' li' didza', en ulu'a lahui le nunu'.

²² Buli'zë nágali' didza' ni, núlöli' ruzóali' neda' tsólá alö.

Channó cabí, usunítia' libí'ili', ate' cuntú nu gaca usólá libí'ili'.

²³ Nu rë neda': Xclenu', runna quia' le run neda' bal, ate' nu run ca rnna xtídza'a, usólá caza' nu na'."

51

¹ Dios quia', buzá' ladxi' quia' tscá naca yöl-la' dxi'i ladxi' zxön quiu', en tscá naca le zían le ruzá' ládxi'u quia', bugúá yugu' le gudá'baga'a lo' Li'.

² Bugubitica'sö neda' tscá naca dö' bi'a.

Buchi'a neda' lu dul-la' nuna'.

³ Nöz quézida' le gudá'baga'a, en röjnétiqi'sida' yugu' dul-la' nuna'.

⁴ Lo' Li' cazu' bena' dul-la',

en lo' Li' ca' bi'a dö'.

Naca bë' nacu' tsahui' cate' ru'u didza', en idú dxi'a, en tsahui' nacu' cate' ruchi'a rusöröu' queëtu'.

⁵ Buyútsöca', nabága'a dö' cate' gusí lotë gulja', en lu dul-la' zoa caza' cate' buzóanu xiná'a neda'.

⁶ Rë'ënu' soa le naca idútë li icja ládxi'do'otu'.

Guchiza icja láchxi'da'ahua' yöl-la' réajni'i.

⁷ Buchi'a neda' len le ruchí'aninu', ate' gaca' dxi'a.

Buguibi neda', ate' huóaca' zxíla'do'os.

⁸ Ben ga yönda' le naché' yöl-la' ruzí' xibé, en yöl-la' rudzeja, para huóaca láchxa'a lu le raca quia' tu' benu' ga réquibe'eda' nabága'a dul-la'.

⁹ Biti' uyú' yugu' dul-la' nuna', en busulu yúgu'té le naca dö' nabága'a.

¹⁰ Dios quia', bun dxi'a láchxi'da'ahua', en guchiza neda' tu bö' cubi le nuzú' tsutsu.

¹¹ Biti' ucuítu' neda' ga zoa' lo' Li', en bití' ugú' Dios Bó' Lá'ayi quiu' Nu zóalen neda'.

¹² Bunna quia' yöl-la' rudzeja que yöl-la' rusólá quiu', en ben ga guna' ca rnna xtídu'u idú láchxa'a.

¹³ Ní'iró usédida' nupa ta'guitsaj xibá quiu' ca nácgaca le ré'enu' ilúngaca, ate' yugu' bönni' dul-la' ulu'huéjca quiu'.

¹⁴ Dios quia', benna neda' lataj cabí íbága'a xiguia'. Naca cazu' Dios, Nu rusólá neda'.

Lu yöl-la' rudzeja quia' gul-la' ca naca cazu' tsahui'.

¹⁵ Xana' Dios, gusalaj ruá'a, ate' usiyönda' bönnachi yöl-la' ba quiu'.

¹⁶ La'tu' raza láchxu'u-ba' böa'-bédxí gútitu'-ba' lo', la' gúntea' caní.

Biti' raza láchxu'u-ba' nu böa' uzégui'tu'-ba' lo'.

¹⁷ Le ré'ënë' Dios le naca ca tu le cú'uru' lahué' naca bö' naca cáziru' le nótaj nagula láchxi'.

Dios quia', bití' ucá'anu' cá'asö láchxi'do'otu' le ruhuí'ini láchxi', en le naca nöxaj láchxi'.

¹⁸ Lu yöl-la' ruzá' láchxi' quiu' ben le naca dxi'a quegaca bönnachi yödzö Sión.

Buchisa zö'ö le run chí'i yödzö Jerusalén.

¹⁹ Ní'iró tsaza láchxu'u yugu' le cú'utu' lo' le naca idú dxi'a, yugu' böa' guíxi'do' gútitu'-ba' lo',

en yugu' böa'-bédxido' uzégui'tu'-ba' lo'.

Ní'iró ilútié'-ba' yugu' bédxí biguiú'do',

en ila'gu'ë-ba' lu bucugu quiu'.

52

¹ ¿Bizx que run ba zxön cuinu' ni'a que dö' ru'u, bönni' nál-la' Zóatica'sö yöl-la' dxi'i láchxi' queé' Dios.

² Len lúdxu'u rúnlenu' luzó'o didza' para usunítu' bönnachi.

Naca lúdxu'u, bönni' rizí' yé', ca tu guié' tuchi'.

³ Nadxí'irönu' le naca dö' ca nadxí'ínu' le naca dxi'a, en nadxí'irönu' le cabí nácaté ca nadxí'ínu' le naca idúté li.

⁴ Nadxí'ínu' yúgu'té didza' tun ditaj bönnachi, li' na', bönni' rizí' yé'ë.

⁵ Tsaz uzótaj cazé' Dios li'.

Söné' li', en ubéajé' li' lu yu'u lidxu',

en ucuíté' li' ga nacua' nupa nabángaca.

⁶ Yugu' bönni' tsahui' ila'lé'ené' lé ni, en iládxiné' Dios.

Ulu'zxidxé' queé' bönni' na' rizí' yé'ë, ila'né':

⁷ “¡Buli'yútsöca! Bönni' ni bití' gú'unné' uzxöni láchxé'ë Dios, pero buzzöni láchxé'ë yöl-la' tsahui' queé',

en le zían le guzé láchxé'ë le cabí bi nazaca'.”

⁸ Naca' neda' ca tu yaga olivo ya'a le rö' ra' yu'u lidxé' Dios.

Uzxöni láchxa'a yöl-la' dxi'i láchxi' queé' Dios yugu' iz si' zaca.

⁹ Guíética'sa' Li': “Xclenu” tu' ben cazu' Li' ga naca caní, ate' guna' löza Lo' le naca dxi'a lógaca nupa néquiquequi quez quiu'.

53

¹ Ta'zá' láchxé'ë bönni' canóz, ta'nné':

“Biti’ ca’ zoë’ Dios.”

Nácaqaquië’ xihui’ bönni’ caní, en núngaquië’ le nácatërö xihui’.
Cuntu nu bönni’ zoë’ runë’ le naca dxi’a.

² Ga na’ zoë’ Dios yehua’ yubá ruyúë’ gáti’tës,
en rilé’enë’ bönachi nacuá’ idútë yödžölió,
para inözínë’ channö zoa nu réajni’i,
o channö zoë’ nu bönni’ ruí’i ládxi’ë Dios.

³ Yúgu’të bönachi sôjáquië’ ga yúbölö.
Yúgu’të’ nácaqaquië’ xihui’.

Cuntu nu zoa run le naca dxi’a, nitúë’ bönni’.

⁴ ¿Naru’ cabí nápaqaquië’ yöl-la’ réajni’i bönni’ na’ tu’ë dö’?
Tu’sunítië’ bönachi quia’ ca tu nu ragu yöta,
en biti’ ca’ tu’lidzë’ neda’.

⁵ Tadxi ta’dzöbinë’ bönni’ caní, en biti’ bi nuna’ quégaquië’.
Caní raca tu’ rusunítië’ Dios caz nupa ta’díl-lalen libí’ili’.
Gunli’ ga ulu’tuí’inë’ tu’ chiguru’unë’ Dios légaquië’.

⁶ Raca ládxi’ru’ irúaj Sión Nu usölá bönachi Israel.
Cate’ uchisa cazë’ Dios bönachi queë’ nadžungaca,
ulu’dzeja xzí’ini xi’sóë’ Jacob, en ulu’zi’ xibë bönachi Israel.

54

¹ Busölá neda’, Dios, para gaca yöl-la’ ba que Lo’.
Len yöl-la’ huáca quíu’ guléaj neda’ tsahui’.

² Ruzë’ nagu’ le rulidza’ Li’, Dios.
Ruzë’ nagu’ didza’ ruá’a.

³ Ta’díl-lalen bönni’ zi’tu’ neda’,
tu’ té’ënë’ bönni’ zidzaj ilútië’ neda’.
Biti’ ca’ tádxinë’ Dios.

⁴ Buli’yútsöca’, naca cazë’ Dios Nu rácalen neda’.
Ruzóë’ tsutsu Xanru’ yöl-la’ na’bán quia’.

⁵ Ubi’ë quégaca nupa ta’díl-lalen neda’ le usuniti léguequi.

Tu’ runu’ ca rnna xtídzu’, Dios, busuniti léguequi.

⁶ Idú ládxa’a gútia’-ba’ böa’-bëdxi lo’.
Guía’ Li’: “Xclenu’” Xan, tu’ naca dxi’a Lo’.

⁷ Busölá cazu’ Li’ neda’ lu yugu’ le guca quia’,
ate’ rilé’eda’ zeaj nanítitica’sö nupa ta’díl-lalen neda’.

55

¹ Ruzë’ nagu’ le rulidza’ Li’, Dios,
en biti’ tá’bagu’ le rinábida’ Li’.

² Ruzë’ nagu’ neda’, en rubí’u didza’.
Rulidza yúdxida’ Li’, en rö’a böniga

³ ni’a que chí’ë bönni’ biti’ rilé’ënë’ neda’ dxi’a,
en tu’ tu’tsá’ neda’ nupa tuá’ dö’, en tu’saca’ zi’ neda’,
en lu yöl-la’ rilé’ quéguequi ta’bía no neda’.

⁴ Réqui zi’ ládxi’da’ahua’,
ate’ yöl-la’ radxi que yöl-la’ guti röjtsaza ládxi’da’ahua’.

⁵ Chigula’yaza yöl-la’ radxi, en yöl-la’ rizxizi neda’,
ate’ nabaga’ yöl-la’ radxi ridžöbi neda’.

⁶ Gunní’a: “Gaca ládxa’a gata’ quia’ xílaba’ gu’dödo’,
para gaca tóda’ lu bö’ös, en idxina’ tu lataj ga gaca uzí’ ládxa’a.

⁷ Raca ládxa’a tseja’ zi’tu’,
en tsöjsóa’ la’ guixi’ ga dë lataj.

⁸ Uyija’ carelö tu lataj ga tsöjsóa’ tsutsu,
para cabí bi gun quia’ le naca ca bö’ budunu’.”

⁹ Busuniti légaquië’, Xan, en buxí ruá’agaquië’,
tu’ bilé’eda’ ta’díl-lë’, en tu’ tsatsë’ lu yödžö.

¹⁰ Rëla, en te dza ta’dödë’ nöza lu yödžö.
Tu’ë dö’, en tunë’ le xihui’ idú gásibi’ilö yödžö.

11 Tu'sunitië' le nacua' ni'.

Tu'saca' zi'ë bönachi, en ta'zi' yë'ë la' nōza que yōdz.

12 Calëga bönni' biti' rilé'enë' neda' dxi'a nu rudidza' yudxi neda',
tu' huáca guá' ilena' le gunë',
en calëga bönni' rudi'inë' neda' nu ridíl-lalen neda',
tu' huáca ucachi' cuina' lahuë',

13 pero nacu' li', tu bönni' ca neda'.

Nacu' böchi' luzá'a, en nacu' tuz len neda'.

14 Lu yöl-la' dxi'i ladxi' queéru' gúcaru' tuz.

Ladaj bönachi zían gudarú', en bidxinru' lidxë' Dios.

15 Xana' Dios, bë' yöl-la' guti lataj idxín quégaquië' bagáchi'sò.

Ben ga tsòjtsázagaquië' nabángaquië' lataj chul-la ga nacua' nupa nátigaca,
tu' yu'u le xihui' lidxigaquië', en lu yu'u ca' gapa tu'dubë'.

16 Pero neda' ulidza'-në' Dios,

ate' usólá cazë' Xanru' neda'.

17 Chi'i dzö'ölö, en zílado', en gatsaj dza ulidza yúdxida' Lë',
en innë ládxa'a lahuë', ate' yön cazë' chi'a.

18 Huóá'uë' yöl-la' na'bán quia' lu na' nupa ta'díl-lalen neda'
en uzóë' neda' lataj ga cōza' dxi'a tsáhui'do',
tu' nayánda' nupa ta'díl-lalen neda'.

19 Huayón quézinë' Dios, en ubi'ë quégaquië'.
Rö'ë rinná bë'tica'së' Lë'.

Caní gunë' Dios tu' cabí tu'sanë' ca tunë',
en biti' tádxinë' Dios.

20 Bönni' ru'ë dö' ribía nahuë' nu ribōza dxi'a tsáhui'do',
en rucá'anë' cá'asó didza' dzaga nunë'.

21 Bë'ë didza' yúlado',
pero yu'u icja ládxi'da'ahuë' yöl-la' ridzá'a.
Bë'ë didza' z'ixido',

pero didza' na' bë'ë gulaca ca guié' tuchi'.

22 Gulú'u le nabágu'u lu në'ë Xanru', ate' utipa cazë' ládxi'u.

Biti' gu'ë lataj iguinaj tsaz nu naca tsahui'.

23 Chú'unë' bönni' tu'ë dö' na' lataj chul-la
ga nacua' nupa nátigaca ga na' ila'nítigaquië'.

Biti' ila'cuá' gatsaj tsa ral-la' ila'cu'ë nabángaquië' bönni' tutië' bönachi,
en bönni' ta'zi' yë'ë.

Pero neda' uzxöni ládxa'a Li'.

56

1 Buéchi' ladxi' neda', Dios, tu' ta'dá'bagá' bönachi neda'.

Yugu' dza nupa tu'dí'i neda' ta'bía no neda'.

2 Yugu' dza nupa biti' ta'lé'e neda' dxi'a tuá' dö' quia'.

Zían nupa ta'díl-lalen neda' lu yöl-la' run ba zxon cuínguequi.

3 Cate' radxi ridzöbida', uzxöni ládxa'a Xanru'.

4 Ruzxöni ládxa'a-në' Dios, en rigu'a yöl-la' ba xtídzë'ë.

Ruzxöni ládxa'a-në', en biti' bi gádxida'.

¿Bizxi caz gaca ilún quia' bönachi?

5 Yugu' dza tun nigui neda' nupa biti' ta'lé'e neda' dxi'a.

Ta'zá' ládxi'tica'sò nacxi iluá' dö' quia'.

6 Tu'dubë' ga nagáchi'sò, en tu'yúlanë' yúgu'të le runa',
para gata' quégaquië' lataj ilútië' neda'.

7 Bubi'ë quégaquië', Dios, ca naca dö' tu'ë,
en lu yöl-la' rilé' quiu' busuniti légaquië'.

8 Nöz quézinu' Li' ca rö'a böniga.

Nurixu' Li' nisa ribödx quia'.

¿Naru' cabí nuzú' léguequi lu guichi quiu'?

9 Cate' ulidza' Li', la' dza ná'asö ulu'huécja gúz cúdzu'lö nupa tu'dí'i neda'.
Nöz quézida' rácalen cazu' neda', Dios.

10 Ruzxöni ládxa'a-nè' Dios, en rigu'a yöl-la' ba xtídzë'ë.
Ruzxöni ládxa'a-nè' Xanru', en rigu'a yöl-la' ba xtídzë'ë.

11 Ruzxöni ládxa'a-nè', en biti' bí gádxida'.
¿Bizxi caz gaca ilún bönachi quia'?

12 ¿Gunna' quiu', Dios yugu' le guzxi' lu na'a!
¿Cu'a Li' yöl-la' ba!

13 Busöló' neda' lu yöl-la' guti, en nuzú' neda' tsutsu.
Ridá caza' lo' Li', Xantu' Dios, lu bení' ru'u quégaca nupa nabángaca.

57

1 ¿Buéchi' ladxi' neda', Dios!
¿Buéchi' ladxi' neda' tu' ruzxöni ládxa'a Li' gun chi'u neda'!
Guxóa no'o neda' ca runba' böra run chí'igacaba' bórado' zxan xílabá',
ga idxinró tödi bönadxi raca quia'.

2 Rulidza'-nè' Dios nayépisëtë'ë.

Náquië' Dios Nu run ga raca dxi'a quia'.

3 Ga zoa cazë' yehua' yubá ubi'ë didza', en usólë' neda'.

Usólë' neda' lu na' nu ribía no neda'.

Lu yöl-la' dxi'i ladxi' queë', en yöl-la' idú ladxi' queë' gácalenë' neda'.

4 Naca quia' tsca zoa' ládjagacaba' bëdxi guixi'.

Yugu' bönni' zidzaj nagú'ugaquië' neda' lë'ajló.

Náčagaca láyi'gaquië' ca yugu' yaga tuchi' que gudil-la,
ate' náçagaca lúdxí'gaquië' ca yugu' guié' tuchi'.

5 Dios quia', buluí'i lahui lúzxiba yöl-la' zxön quiu',
en yödžölió ni buluí'i lahui yöl-la' bení' quiu'.

6 Nupa tu'dí'i neda' nucáchi'gaca du yalaj le sön neda'.

Rudú ládxa'a tu' rō'a böniga.

Gula'chō'önë' yeru ga tsōjbixa' neda',

pero gula'bixë' la' légacasë' lu yeru na'.

7 ¿Chinabá'a quia', Dios!

¿Chinabá'a quia'!

¿Gul-la' quiu', en cu'a Li' yöl-la' ba!

8 ¿Bubán, bö' naca caza'!

¿Guli'bán arpa, en bihuël-la!

¿Zílado' ubana',

9 en gul-la' quiu' Li', Xan, ladaj bönachi yugu' yödžö!

¿Cu'a Li' yöl-la' ba lógaca yúgu'të bönachi!

10 Zxöntë'ö naca yöl-la' ruhuéchi' ladxi' quiu', le ridxintë yehua' yubá,

ate' ridxintë yöl-la' idú ladxi' quiu' lúzxiba xitsá'.

11 Dios quia', buluí'i lahui lúzxiba yöl-la' zxön quiu',

en yödžölió ni buluí'i lahui yöl-la' bení' quiu'.

58

1 ¿Naru' ruí'ili' didza' idútë li, libí'ili' na', rinná bë'ëli'?

¿Naru' ruchí'a rusöröli' ca naca le naca tsahui'?

2 ¿Biti' ca'! Rizá' ládxi'li' yugu' le xihui',

en rusaca' zí'ili' bönachi len yugu' le cabí' nácatë runli'.

3 Ta'dödi tsólá'alö nupa tuá' dö' ga gudéla'të gúl'jagaca.

Ta'zí' yë' ga gudéla'të bulu'cuá' anu xiná'aguequi léguequi.

4 Yu'u ruí'iguequi le naché' yöl-la' guti ca le dxía láyi'gacaba' bëla sínia'.

Náčagaca ca tuba' bëla sínia' nacödžuba',

5 bëla na' biti' riyönba' chi'ë bönni' gudzá',

o le rul-lë' bönni' runë' gudzá'.

6 ¡Dios quia! ¡Buzxuzxaj láyi'gaquié!
 ¡Guladzu' yugu' layi' tuchi' quégacabié'
 nácagaca ca layi' tuchi' quégacaba' bédxi guixi!
 7 ¡Ben ga ila'nítíé' ca raca que nisa yegu gubó'o cate' ruhuí'!
 ¡Ben ga ila'cuádié' ca raca que guixi' rō'ō'la' nōza!
 8 ¡Ben ga ila'nítíé' ca yugu' bōruhuinna tu'únaba' lu gubidza,
 o ca tubi' b'í'ido' nuzóanu-bi' nigula zí'alō ca ral-la' gáljabi', en chinátitēbi'!

9 Zí'alō ca gaca utsē'e yusu' tu guí' zxōn,
 ugúē' Dios légaquié' lu yōl-la' ridzá'a queē',
 bōnni' nabángacabié', en bōnni' chizóa ilátíé'.
 10 Ulu'dzeja nupa nácagaca tsahui' cate' ila'lé'e
 uzí' lēbē' Dios bōnni' tu'ē dō' na'.
 Ulu'zxinē' len ná'agaquié' xichōngaca nupa na' tuá' dō'.
 11 Ila'nná bōnachi: "Le nácatē zoa le rubi'ē Dios quégaca nupa nácagaca tsahui'.
 Le nácatē zoé' Dios Nu ruchi'a rusōrō quégaca nupa nacua' yōdzōlió."

59

1 Busólá neda', Dios, lu ná'agaca nupa ta'zóa regu' neda'.
 Buzóa neda' tsutsu ga biti' gaca ila'dxin nupa ta'díl-lalen neda'.
 2 Busólá neda' lu ná'agaca nupa tuá' dō',
 en guléaj neda' lu ná'agaca nupa tuti bōnachi.
 3 Buyútsōca', ta'bō' nísíé' neda' para ilútié' neda'.
 Ta'zóa régu'ē bōnni' zidzaj neda',
 calēga tu' gudá'baga'a légaquié', o tu' ben zi'a légaquié', Xan,
 4 en calēga tu' bétia' bōnachi, pero ta'zē'ē carelō para tíl-lalenē' neda'.
 Gudá gácalenu' neda', ate' ilé'enu' naca caní.
 5 Xantu' Dios quégaca ní'a no'o guizxi yu,
 en Dios quégaca bōnachi Israel,
 gudá dujenu' xiguaia' bōnachi yúgu'tē yōdzō.
 Biti' uzá' ládXu'u quégaca nupa tuá' dō' lu yōl-la' rizí' yē' quéguequi.
 6 Tu'dxinē' chi'i dzō'ōlō, ta'bōdxi yechē'ē ca runba' bō'cu' ragu yéchi'ba' beo',
 ate' ta'dōdē' idú gásibi'ilō yōdzō.
 7 Buyútsōca', didza' tu'ē nácagaca ca le rēbigaquié'.
 Nácagaca didza' tu'ē ca yugu' guíé' tuchi'.
 Ta'nné': "¿Nuzxi caz yōni?"
 8 Ruzxidxu' ca naca le tunē', Xan.
 Rutitju' ca naca le tun bōnachi yúgu'tē yōdzō.
 9 Tu' nal-la cazu' Lí' guna' lōza Lí'.
 Nacu' Dios Nu run chi'i neda'.
 10 Tu' náquié' Dios quia' dxi'i ladxi', dutsáquié' neda'.
 Uxícja cazē' Dios nupa ta'díl-lalen neda'.
 11 Biti' gútiu' nupa na' tuá' dō' para cabí ilal-la ladxi' bōnachi ladza'.
 Lu yōl-la' huáca zxōn quiu' bésilasi nupa tuá' dō', en buzótaj léguequi luyú.
 Naca cazu' Xantu', Nu run chi'i netu'.
 12 Ben ga sōn légaquié' yōl-la' run ba zxōn cúngaquié'
 tu' nōzi dul-la' tunē' ca tu'isē' didza',
 enca' tu' tu'dxié' dō' luzá'agaquié', en ta'z'í' yē'ē.
 13 Lu yōl-la' rilé quiu' busunítí légaquié'.
 Busunítí légaquié' tsaz para cabí ila'cuá'arē',
 en para iléquite'e bōnachi Dios caz rinná bé'enē' zxi'ini xi'sóē' Jacob,
 ga ridxintē idútē yōdzōlió.
 14 Tu'dxinē' chi'i dzō'ōlō, ta'bōdxi yechē'ē ca runba' bō'cu' ragu yéchi'ba' beo',
 ate' ta'dōdē' idú gásibi'ilō yōdzō.
 15 Ta'dē' ta'guiljē' le ilahué',
 ate' ta'bōdxi'ē channō cabí ulu'huōlaj ulu'dzé'enē'.
 16 Gul-la' neda' ca naca yōl-la' huáca zxōn quiu'.

Yugu' zila gul-la' lu yöl-la' rudzeja quia' ca naca yöl-la' dxi'i ladxi' quiu',
tu' naca cazu' Li' Nu run chi'i neda',
en nacu' Nu rácalen neda' cate' bi raca quia'.

¹⁷ ¡Naca cazu' Li' Nu rutipa ládxa'a!
¡Gul-la' quiu' yöl-la' ba,
tu' nacu' Li' Nu run chi'i neda', Dios, en Nu nadxí'i neda'!

60

¹ Nusán no'o netu', Dios, en nuzötju' netu'.
Buécja queétu' na'a, en gúcalen netu'.
² Ben cazu' ga gudödi budó' zxu', en guyalaj luyú.
Bun luyú ni tu' chizóa iguúmmaj.
³ Sizxöni busaca' zi'u bönachi quiu'.
Le guca queétu' guca tsca bugui'ju' netu' xis uva nal-la
le ben ga yöjchégu'tu' ca tu bönni' nazúdxiné'.
⁴ Bunödzu' quégaca nupa tadxi Li' tu lari' ulu'chisa,
le söjácalen cate' bi raca quéguequi,
⁵ para ulu'lágaca nupa na' nadxí'i quézinu'.
Len yöl-la' huáca zxon' quiu' busölá netu', en bubí'i didza' cate' rulidztu' Li'.

⁶ Lu le naca lá'ayi queé' bē'ē didza' Dios, gunné':
"Uzi'a xibé, en quísia' xiyúgaca bönachi Siquem, en urixa' luyú dē cuita yegu Sucot.
⁷ Nequi quia' xiyúgaca bönachi Galaad, enca' xiyúgaca xzí'ini xi'sóé' Manasés.
Naca ca tu le rusubín icja' xiyúgaca xzí'ini xi'sóé' Efrain.
Xiyúgaca xzí'ini xi'sóé' Judá naca ga rinná bē'a.
⁸ Xiyúgaca bönachi Moab naca ca tu ga riguiubi na'a,
ate' cu'a lóla' uléaja' xiyúgaca bönachi Edom.
Códxi'a tu' uxicja' bönachi Filistea."

⁹ ¿Nuzxi caz gaca ichē' neda' lu yödzo zoa zö'ö idú gásibi'ilö le run chi'i yödzo na'?
¿Nuzxi caz ichē' neda' lu xiyúgaca bönachi Edom?
¹⁰ ¿Naru' cabí nusán ládxi'u netu', Dios?
¿Naru' cabí tséajlenu' bönni' queétu' röjáquiē' gudil-la'
¹¹ Gúcalen netu' cate' tíl-lalentu' nupa ridíl-lalen netu',
tu' cabí gaca gácalen netu' nu naca bönáchisö.

¹² Len yöl-la' huáca queē' Dios idéli'ru'
tu' uxicja cazē' Lē' nupa ta'díl-lalen netu'.

61

¹ Ruzē nagu' le rulidza' Li', Dios.
Ruí'i ládxi'u le rinábida' Li'.
² Ga ni zoa' zi'tu' ga dē ladza' rulidza' Li' tu' rudú ládxa'a.
Guchē' neda' ga zoa Nu na' naca ca tu guiójt'o, Nu na' nál-latērö ca neda'.
³ Nacu' Li' Nu run chi'i neda'.
Nacu' Nu rácalen neda' cate' zoa nu ribía no neda'.
⁴ Bē' lataj sóatica'sa' ga zoa cazu' Li'.
Bē' lataj sóalena' Li', guna' neda' ca tunba' bórado' ta'yázaba' zxan xílabá' yójede.
⁵ Biyón quézinu' Li' le guzxi' lu na'a guna' quiu' Li', Dios.
Benu' ga nequi quia' le runödzu' quégaca nupa tadxi Li'.
⁶ Gunu' ga soē' xidzé bönni' na' rinná bē'ē uláz quiu'.
Zián iz soē' ibanē'.
⁷ Sóatica'sé' lo' Li', Dios.
Bē' queē' yöl-la' dxi'i ladxi', en le naca idútē li, yugu' le ilún chi'i lē'.

⁸ ¡Gúl-latica'sa' yöl-la' ba que Lo',
para gaca guna' tu tu dza le guzxi' lu na'a!

62

¹ ¡Tuzē' Dios ruzxöni ládxa'a, en rizē ládxa'a Lē'!
¡Lē' cazē' rusölē' neda'!
² ¡Tuzē' Lē' rapa chi'ē neda', en rusölē' neda'!

¡Ruzóë' neda' tsutsu, ate' biti' gaca nu uzötaj neda'!

³ ¿Gáca'xte caz güf'i ládxi'li' ucúl-lali' neda'?
Ré'énisili' uzótjali' neda' ca tu zó'ö chízóa iguínmaj,
o ca tu lè'aj yaga le chinatëbi.

⁴ Ré'énisili' uzótjali' neda' ga ni tunë' neda' bal.
Ruzí'ili' xibé yugu' didza' biti' nácatë.
Ruí'ili' dxi'a didza' láchui'só,
pero lu icja ládxi'do'oli' rudidza' yúdxili' neda'.

⁵ ¡Tuzë' Dios ruzxóni ládxa'a,
en runa' löza Lë'!

⁶ ¡Tuzë' Lë' rapa chí'ë neda', en rusölë' neda'!
¡Ruzóë' neda' tsutsu, ate' biti' gaca nu uzötaj neda'!

⁷ ¡Tuzë' Dios rusölë' neda', en runë' ga naca' bica' ba!
¡Dios nuzóë' neda' tsutsu, en rapa chí'ë neda'!

⁸ Libí'ili', bönachi, buli'zxóni ládxi'ë Dios yúgu'të dza.
Buli'siyönnë' yugu' le raca queéli', tu' run chí'i cazë' rë'u.

⁹ Le nácatë nácacaca yúgutë bönachi ca tu bö' ridódisö,
en biti' bi nazáca' gaca nupa na' nadéli' gaca lataj lo.
Tu lu zxigóns biti' bi nál-lí'guequinë'.

Nácacacarë' dzá'asö ca tu bö' riguëla'siru'.
¹⁰ Biti' uzxóni ládxi'li' bi idéli'li' len yöl-la' nál-la queézili'.
Biti' uzí'ili' xibé le cuanli'.

Channö gata' queéli' yöl-la' tsahui', biti' güf'i ládxi'li' le.
¹¹ Tu luzuísö bë'ë didza' Dios.

Chopa luzuí' biyönda' ca naca lë ni rnna:
"Nápatërë' Dios yöl-la' huáca,
¹² ate' zóatica'sö yöl-la' dxi'i ladxi' queë'."

Ubí' i cazu', Xan, quégaca bönachi tsca naca le núngaca.

63

¹ Dios, nacu' Dios quia', ate' idú ládxa'a ruguilja' Li'.
Ribidxi ládxa'a Li', ate' idütë le naca' rizé ladxi' Li'.
Zoa' tu luyú bidxi ga ni rudú ládxa'a, ate' biti' bi dë nisa.

² Ben ga ilé'eda' Li' lu lataj ga na' zoa cazu',
para ilé'eda' yöl-la' huáca quiu', en yöl-la' bení' quiu'.

³ Tu' nácatërö dxi'a yöl-la' dxi'i ladxi' quiu' ca yöl-la' na'bán caz.
Que lë ni na' cu'a Li' yöl-la' ba.

⁴ Guí'a Li': "Xclenu" tsanni ni zoa' nabana'.
Uchisa' na'a, en ulidza' Lo'.

⁵ Ruhuölaj rudzé'e icja ládxi'da'ahua' le nácatërö dxi'a,
ate' lu yöl-la' rudzeja quia' rigu'a Li' yöl-la' ba.

⁶ Rójneda' Li' cate' déa' lu le ráti'da'.

⁷ Rizá' ládxa'a ca nacu' cate' rina'sa' yëla.
Rácalen cazu' neda',

en tu' run chí'u neda', lu yöl-la' rudzeja quia' rul-la' quiu'.

⁸ Nazón cazu' Li' bö' naca caza'.

Rizón cazu' Li' neda',

⁹ pero ila' yaza lataj chul-la
nupa té'ëni iluti neda'.

¹⁰ Ilátigaca lu guíë tuchi'.

Ilágugaca bö' cu' zuga' léguequi.

¹¹ Nu rinná bë' uláz queë' Xanru' udzeja ladxi' lahuë' Dios.

Ulu'zí' xibé yúgu'të nupa tu'zxóni ladxi' Lë',
tu' usayaj cazë' Lë' ruí'igaca nupa ta'zí' yë'.

64

¹ Dios, buzé nagu' chí'a le rinabi yúdxida' Li',
para gun chí'u yöl-la' na'bán quia' tu' rádxida' bi gun nu ridí'l-lalen neda'.

2 Bucachi' neda' para cabí bi ilún quia' bagáchi'sö nupa tuá' dö',
en para cabí ila' bía di'è neda' bönni' tutië' bönachi.

3 Nácagaca lúdxí'gaquië' ca yugu' guíë' tuchi',
ate' nácagaca didza' zí' tu'è ca yugu' yaga lahui tuchi'.

4 Bagáchi'sö tu'zë yugu' yaga lahui tuchi' na'
para ilunë' huë' nupa bití' bi nabága'gaca.
Tsárido'os tu'zë léguequi, en bití' bi tádxinë'.

5 Bití' ca' tu'cá'anë' le naca dö' té'ënë' ilunë'.
Tu'è didza' ca gaca ulu'cáché'ë yugu' du yalaj quégaquië', ta'nnë':
"¿Nuzxi caz gaca ilé'e yugu' du na?"

6 Tunë' didza' ca naca le naca dö' ilunë', ta'nnë': "Chinabá'a le gunru'."
Tu'cáchi'gaquië' le ta'zá' ládxe'ë, en le ta'bequi icjé'.

7 Uzal-lë' Dios tu yaga lahui tuchi' le ideli' légaquië'.
Tsárido'os gunë' légaquië' huë'.

8 La' didza' tu'isë' ilún ga tseajchégu'gaquië'.
Lu yöl-la' rubani quéguequi ulu'tá icjaguequi nupa ila'le'e légaquië'.

9 Ní'iró yúgu'të bönachi iladxi Dios,
en ulu'siyón luzé'eguequi ca naca le nunë' Dios,
en ila'zá' ládxi'gaca ca naca lé na' nunë'.

10 Nu bönni' tsahui' uzi'ë xibë' Xanru', en gunë' löza Lë'.
Yúgu'të nupa nácagaca idú ladxí' ulu'zí' xibë'.

65

1 Dios, nupa nacua' yödzö Sión ila'gú'u Li' yöl-la' ba,
en ilunna quiu' le gula'zí' lu në'eguequi,

2 tu' riyón quézínú' Li' cate' tu'lidza Li',
ate' yúgu'të bönachi ila'dxin lo'.

3 Tun nigui neda' dul-la' nuna',
pero runiti lo cazu' netu' ca naca le ridá'baga'tu' Li'.

4 Bica' ba nupa nabö cazu' quiu', en nulidzu' quiu',
para ila'cuá' yugu' lataj lá'ayi quiu'.
Huölaj udzé'etu' le nácagaca dxí'a yú'ugaca lidxu',
enca' le yú'ugaca yudo' lá'ayi quiu'.

5 Tu' nacu' tsahui' rubi'u didza', en runu' yugu' le zxön le tácalen netu'.
Naca cazu' Dios Nu rusólá netu'.

Nupa nacua' idütë yödzölió ulu'zxöni ladxí' Li',
enca' nupa nacua' zí'tu' ia'tsólá' alö nísado'.

6 Len yöl-la' huáca quiu' nucú'u yugu' guí'a zxön,
le naca bé'gaca nál-latërö cazu' Li'.

7 Ruzóa dxíu' le riyasa ridxía lu nísado', en le ru'u bö que.
Ruzóa dxíu' bönachi cate' tu'tsatsa.

8 Bönachi idütë yödzölió tadxi Li' ni'a quégaca le zxön nunu'.
Le run cazu' Li' tun ga tu'dzeja bönachi idapa la'a yödzölió.

9 Ru'i ládxi'u luyú, en risöl-lu'u nisa guiöj.
Runu' ga ruhuóaca yu ya'a.

Nucú'u luyú na' yugu' yegu yúdzugaca nisa zila,
le run ga dética'sö zxoá'-za, tu' caní raza ládxi'u Li'.

10 Risöl-lu'u nisa guiöj gapa dëgaca na, en rusubisu' gapa chinadúz.
Ruúnu' yúludo' luyú zidzaj, en runu' ga ta'gula guixi' cuando'.

11 Runu' ga rulá' yödx yana' le nadúz luyú ni tu iz tu iz,
en ga zóatica'sö le ilë'aj ilágugaca bönachi.

12 Nacuá'aba' böa'-bëdxi la' guixi',
ate' tu'dzeja bönachi yugu' lu guí'ado'.

13 Gapa naca lachi' nacua'aba' bö'cu' zxila',
ate' dxíada' zxoá' xtila la' yëla.

Lu yöl-la' rudzeja quéguequi ta'bödxí'a,
en tul-la bönachi quiu'.

66

1 Guli'güi' zidzaj didza' lahuë' Dios
lu yöl-la' rudzeja queéli' yúgu'tëli' zóali' yödzölió!

2 ¡Guli'gul-la ca naca yöl-la' ba que Lë'!

¡Guli'cu'ë yöl-la' ba!

3 Guli'guié' Dios: "¡zxöntëro nácagaca le nunu' tu' naca zxöntëro yöl-la' huáca quiu'!"

Nupa bití' ta'lé'e Li' dxi'a ulu'lu'i cuini ca nupa tun ca rnna xtídz'u.

4 Yúgu'të nupa nacuá' yödzoilió ilún Li' zxön, en ilúl-la yöl-la' ba quiu'.

Ilúl-la yöl-la' ba que Lo'.

5 Guli'dá ilé'eli' yugu' le nunë' Dios.

Nayëpisëtërë' Dios lu le runë' quégaca bönachi.

6 Benë' ga böaca ca luyú bidxi ga dë nísado'.

Gula'dödë' gatsaj láchui'ló yegu, ta'zë'esó ní'agaquië'.

Ní'udzéjade'eru' ca náquië' Lë'.

7 Len yöl-la' unná bë' queë' rinná bë'tica'së'.

Ruyútica'së' bönachi yúgu'të yödzo.

Bití' ral-la' ilún ba zxön cuínguequi nupa ta'dá'baga' xtídzë'ë.

8 ¡Guli'gún zxönë' Dios queëtu', libí'ili' bönachi yúgu'të yödzo,

en guli'cu'ë yöl-la' ba gátí'tës!

9 ¡Run cazë' Lë' ga zóaru' nabanru',

en bití' ru'ë lataj cuila ní'atu'!

10 Guzxí' bë' cazu' netu', Dios.

Buchi'u netu' ca run nu ruchi'a guié plata lu guí'.

11 Bë'u lataj bidzuntu' lu du yalaj.

Busubágu'u netu' tu yua' z'i'i.

12 Benu' ga gula'libë' icjtu' bönni' dxíagaquië'-ba' böa'.

Gudödítu' lu guí', en lu nisa,

pero guchë' cazu' netu' tu lataj ga böläj budzé'etu'.

13 Tsu'a lidxu', en cu'a-ba' lo' böa'do' uzégui'a-ba' lo'.

Guna' lo' Li' le guzxí' lu na'a guna',

14 Ië na' bë'a didza' que,

le gunniá' cate' ní' rígu'i rizáca'a.

15 Cu'a-ba' lo' Li' böa'-bëdxi renni' uzégui'a-ba' lo',

tsözxön len dzön quégacaba' chivo biguíú'.

Gútia'-ba' lo' yugu' bëdxi, en yugu' chivo biguíú'.

16 Guli'dá uzë nágali', yúgu'tëli' rádxili'-në' Dios, ate' usiyönda' libí'ili' yugu' le benë' le gulácalen neda'.

17 Len ruá' cuinsa' bulidza' Lë',

en bena' Lë' zxön len lúdxá'a.

18 Channó rucácha'a le naca dö' lu ládxi'da'ahua',

bití' yönnë' Xanru' Dios didza' gu'a,

19 pero le nácatë biyönnë' Dios didza' bë'a.

Buzë naguë' cate' bulidza' Lë'.

20 ¡Yöl-la' ba Dios!

¡Bití' gudá'baguë'ë neda' cate' bulidza'-në',

en bití' bugúë' yöl-la' nadxí'i queë' neda'!

67

1 Xantu' Dios, buzá' ladxi' queëtu', en ben ga gaca dxi'a queëtu'.

Lu yöl-la' dxi'i ladxi' quiu' buyú netu',

2 para gaca bë' le ré'ënu' guntu' yödzoilió ni,

en para ila'nözi bönachi yúgu'të yödzo ca naca yöl-la' rusólá quiu'.

3 Ral-la' ila'gú'u bönachi Li' yöl-la' ba, Dios.

Yúgu'të bönachi ral-la' ila'gú'u Li' yöl-la' ba.

4 Ral-la' ulu'dzeja bönachi yúgu'të yödzo,

en ilúl-la lu yöl-la' rudzeja quéguequi.

Tu' uchi'a usöröu' bönachi ca naca le naca tsahui',

5 ral-la' ila'gú'u Li' yöl-la' ba bönachi, Dios.
Yúgu'tè bönachi ral-la' ila'gú'u Li' yöl-la' ba.

6 Yödxí yana' runödzej luyú ni.
Dios queéru' runè' ga raca dxi'a queéru'.

7 Runè' Dios ga raca dxi'a queéru',
para iladxi Lé' yúgu'tè nupa nacua' yödžölió.

68

1 Raca ládxi'ru' chasè' Dios, en usulásiè' nupa ta'díl-lalen Lè',
en gunè' ga ulu'zxunnaj nupa bití' ta'lé'e Lè' dxi'a.

2 Ca rulaga tu bõ' recja dzõn, ca' bulaga léguequi.

Ca na' ruúna' lu guí' quízxi'ba' buz,
ca' ila'niti nupa tuá' dõ' lahuè' Dios.

3 Ulu'dzeja nupa náçagaca tsahui', en ulu'zì' xibè' Dios.
Lu yöl-la' rudzeja queéquequi ulu'zì' xibè'.

4 ¡Guli'gul-la queè' Dios!
¡Guli'gul-la yöl-la' ba que Lè'!
Buli'pá'a nõza ga tódè' gapa dè lataj.
¡Nazí'i lè' Xanru'!
¡Buli'dzeja lahuè' Lè'!

5 Náquiè' ca xúzçacabi' bi'i uzèbido',
enca' Nu ruchí'a rusórõ queçacanu nigula uzèbi.
Caní náquiè' Dios ga na' zoè' lataj lá'ayi queè'.

6 Rucu'è Dios nupa nagá'anagaca bayechi' tu yu'u.
Rubéajè' nupa nadzúngaca, en runè' ga raca dxi'a queéquequi,
pero ulu'gá'ana tu luyú bidxi nupa ta'dá'baga' Lè'.

7 Yõjnõru casu' lógaca bönachi quiu', Dios,
cate' guchè'u léguequi la' guixi' ga na' dè lataj.

8 Gudõdi budó' xzu' dza ni'.
Lësca' gula guiõjsiu' lahuè' Dios.
Guzxizi guí'a Sinaí lahuè' Dios queçgaca bönachi Israel.

9 Benu' ga gulaj guiõjsiu', Dios.
Benu' ga bõaca ya'a xiyú' ga ni' guca yu bidxi.

10 Yõjcuá' nupa néquiguequi quiu' luyú na'.
Lu yöl-la' dxi'i ladxi' quiu', Dios,
bucõzu' le gácalen nupa náçagaca yechi' luyú na'.

11 Bè' cazè' didza' Xanru' Dios.
Ta'guísinu nigula zían didza' dxi'a queè', ta'nnanu:

12 "¡Ta'zxúnnajè'! ¡Ta'zxúnnajè' bõnni' ta'nná bè'è,
enca' bõnni' rõjáquiè' gudil-la guixi yu quegaquiè'!"
Nigula gula bõzanu lidxigacanu bulu'zínu xibè le gutá' quegaquiè'.

13 Sal-la' buçachi' loli' gapa tun chí'ili' bõ'cu' zxila',
gáculi' le naca lachi ca náçagacaba' gu'dódo' néquiguequiniba' guíè plata,
en xitúbigacaba' néquiguequini guíè oro.

14 Cate' bèsilásiè' Dios bõnni' na' gula'nná bè'è lu guí'a Salmón,
benè' ga gula guiõj bõguí' lu guí'a na'.

15 Nequi queè' Dios guí'a Basán.
Naca guí'a Basán na' tu guí'a zxõn.

16 ¿Bizx que ruzxé'eli', yugu' guí'a zxõn?
¿Bizx que ruzxé'eli' guí'a na' guzè lãdxè'è Dios tsõjsóè' ga na'?
Le nácatè tsaz soè' Dios ni'.

17 Gayuá', en gayuá' náçagaca carreta que gudil-la queè' Dios.
Rizè'è Xanru' lu guí'a Sinaí ga na' tseajtsaziè' lataj lá'ayi queè'.

18 Buèpu' yehua' yubá richè'u bönachi zían gula'dzúngaca.
Nu'u yugu' le bulu'nõdzaj bönachi quiu',

en le gulunna quiu' nupa ta'dá'baga' Li',
para tsójsóë' Dios ni' tsaz.

¹⁹ ¡Yól-la' ba Dios, Nu ruá' sua'ru' tu dza tu dza!
¡Náquië' Dios Nu rusólá rë'u!
²⁰ ¡Dios queéru' rusólë' rë'u!
¡Rusólë' Xanru' Dios rë'u lu yól-la' guti!

²¹ Le nácatë Dios udxíë' huë' ícjagaca nupa ta'dá'baga' Lë'.
Udxíë' huë' icjë' bönni' biti' gusanë' ca naca dö' ru'ë.
²² Ru'ë didza' Xanru', rnnë': "Ubéaja' léguequi lu guí'a Basán,
en ubéaja' léguequi lu nísado',
²³ ate' ulíbili' léguequi ga idxintë írúaj rön quéguequi,
ate' ilë'ajba' zxi'culi' xichóngaca nupa ta'díl-lalen libí'ili'."

²⁴ Ta'lé'e yúgu'të bönachi nupa ta'dalen Li', Dios.
Lu yól-la' run Li' zxon ta'dá lu lataj lá'ayi quiu', Dios quia', Nu rinná be'e neda'.
²⁵ Nupa tul-la, en nupa ta'guínnaj lë'egaca bihuël-la, ta'dá ni',
ate' bi'i nigula ra'bando' tunbi' léguequi tsózxón, ta'gápabi' lë'egaca guídido'.

²⁶ Buli'lidzë' Dios dxi'a tsáhui'do' gapa na' rudúbili' queë',
tu' náquië' Xanru', libí'ili' zxi'ini xi'sóë' Israel.

²⁷ Nacu'ë zxi'ini xi'sóë' Benjamín ga na', bönni' gúcarë' cuidi', ate' ta'nná bë'ë.
Bönni' lo quégaquië' zxi'ini xi'sóë' Judá nútsa'gaquië' ladjagaquië',
enca' ladjagaquië' bönni' lo quégaquië' zxi'ini xi'sóë' Zabalón, en Neftalí.

²⁸ Bulu'i lahui yól-la' huáca quiu', Dios.
Bulu'i lahui yól-la' huáca quiu', Dios, tu' chibenu' zían le gulácalen netu'.

²⁹ Tu' dë yudo' quiu' lu yödzo Jerusalén,
bönni' ta'nná bë'ë ila'chë'ë ni' le ilunnë' quiu'.
³⁰ Buzé le bach bönachi yödzo na' nácagaca ca böa' guixi',
enca' bönachi yugu' yödzo nácagaca ca yugu' bëdxi tsózxón len zxi'iniguequi.
Tu'libi bönachi yechi' tu' ta'zë ladxigaca dumí.
Bësilási nupa na' ta'yaza ladxí' rójaca gudil-la.
³¹ Bönni' gubáz quégaca bönachi Egipto ila'dxinë' lo'.
Bönni' Etiopía ila'chisa ná'agaquië' lo', Dios.

³² ¡Guli'gul-la queë' Dios, bönachi yúgu'të yödzo!
¡Guli'gul-la yól-la' ba queë' Xanru'!
³³ Ró'ë yehua' yubá xitsá'tërö, le zoa caz dza ni'te.
Buli'yútsóca', ru'ë zidzaj didza', en naca chi'ë ca guziú' rinnë.
³⁴ ¡Guli'gún zxonë' Dios!
Yól-la' nayëpisë queë' rusubaga' bönachi Israel.
Yól-la' huáca zxon queë' nalá' lúxziba xitsá'.

³⁵ Rubániru' ca nacu' Li', Dios, lu lataj lá'ayi quiu'.
Runnu' quégaca bönachi quiu' yól-la' nal-la, en yól-la' huáca.

Náquië' Dios quégaca bönachi Israel.
¡Yól-la' ba Lë' Xanru' Dios!

69

¹ Busólá neda', Xana' Dios,
tu' raca quia' tsca nabága'a nisa ga ridxintë ruchicja' nisa.
² Raca quia' tsca ruhuötja' ga rë' lu guna', en biti' zoa ga gaca uliba'.
Zoa' ca tu lu nisa zila, en chizóa uchicja' nisa.

³ Rudú ládxa'a tu' rulidza' nu gácalen neda', ate' da' lubá'a.
Chirichul-la guiöj lahua' tu' ruyúa' ga guídu' dusóló' neda'.
⁴ Nayántërö ca guitsa' icja' nupa biti' ta'lé'e neda' dxi'a,
en biti' bi nuna' quéguequi.
Nál-lagaca nupa ta'díl-lalen neda', en tē'eni iluti neda',

en bití' bí nuna' quéguequi.
Tuné' bayúdx ubí'a dumí le cabí gulana'.

⁵ Nöz quézinu' Li', Dios, yöl-la' canöz quia',
en bití' nagachi' lo' Li' dul-la' nuna'.

⁶ Bití' gu' u lataj nupa tu'zxóni ladxi' Li' ulu'tuf'i ni'a quia' neda',
Xana' Dios nayépisétèru'.

Bití' gu' u lataj nupa tun Li' zxön ila'gá'ana cá'asö ni'a quia',
Dios quégaca bönachi Israel.

⁷ Tu' nadxí'ida' Li' tu'lidza ditjè' neda',
en que lè ni na' rutu'ida'.

⁸ Naca' ca tu bönni' zí'tu' lógacabi' bí'i böcha'a,
en ca tu bönni' zí'tu' lógaquié' di'a dza quia'.

⁹ Tu' rui'í ládxa'a yudo' quiu' régui rilá ládxi'da'ahua'.
Naca ca tu'lidza ditaj neda' nupa tu'lidza ditaj Li'.

¹⁰ Ruzótaj cuina', en runa' gubasa,
en que lè ni na' tu'didza' yudxi neda'.

¹¹ Rácu'a' lari' cá'asö ca run nu ribödxi yechi',
ate' tu'titaj neda'.

¹² Ta'nné' quia' yugu' la' nöza,
ate' nupa nazúdxigaca tul-la ca naca quia',

¹³ pero neda' ulidza' Li', Xan.

Bubí'i didza', Dios, cate' idxín dza raza ládxi'u Li'
tu' nadxí'ide'enu' neda',
en tu' guzxi' lu no'o usöló' neda'.

¹⁴ Guléaj neda' para cabí huötja' lu le naca ca guna'.
Ben ga ulá' lu ná'agaca nupa ta'díl-lalen neda',
en lu le naca ca nisa zila le chizóa ibaga' neda'.

¹⁵ Bití' gu' u lataj ibaga' neda' lè na'.
Bití' gu' u lataj uchicja' lu le naca ca nísado',
enca' cabí huötja' tu lu yeru ba.

¹⁶ Bubí'i didza', Xan, tu' nacu' dxi'i ladxi',
en tu' ruhuéchi' ládxi'u neda', gudá quia'.

¹⁷ Bití' ucachi' cuinu' lahua' neda', huen dxin quiu'.

¡Rö'a böniga! ¡Gudáchi gúcalen neda'!

¹⁸ ¡Gudá ga zoa' dusöló' neda'!

¡Ben ga ulá' lu ná'agaca nupa ta'díl-lalen neda'!

¹⁹ Nöz quézinu' Li' ca tu'didza' yudxi neda',
en ca tu'lidza ditaj neda', en tu'cá'ana neda' cá'asö.

Rilé'e quézinu' yúgu'tè nupa bití' ta'lé'e neda' dxi'a.

²⁰ Rudú ládxa'a tu' tu'didza' yudxi neda', en bití' bí' gaca guna'.
Gulöza' nu huéchi' ladxi' neda', pero cuntú nu guzóa.

Gú'unida' nu huè tsahui' neda', pero cuntú nu bidzöli.

²¹ Cate' guduna' bulu'gahué' neda' tu le silá',
en cate' gubidxa' nisa, bulu'gui'jè' neda' nupe zi.

²² Ben ga huóáca laní quégaquié' ca tu le sön légaquié',
en ben ga huóáca le tu'zi'è xibé ca tu le gun ga ila'chixi ila'níguinè'.

²³ Ben ga ichul-la guió'j lógaquié' para cabiró ila'lé'ené'.

Ben ga ila'zéchuticá'só cúdzu'gaquié' zcan yua' nuá'gaquié'.

²⁴ Busubaga' légaquié' lu yöl-la' rilé quiu',
en bé' quégaquié' yöl-la' ridzá'a quiu'.

²⁵ Ben ga cuntú nu soa ládza'gaquié',
en ga bí'ti'rö nu soa lu yu'u lídxigaquié'.

²⁶ Ta'zóa régu'è nupa na' benu' léguequi xiguia'.

Tu'siyönné' ca ta'guí'i ta'zaca' nupa na' nunu' léguequi hué'.

²⁷ Buzúaj lu guichi yugu' dul-la' tuné',
en bití' gu' u légaquié' lataj ila'déli'né' yöl-la' rusólá quiu'.

²⁸ Busulu lágaué' nazúajgaca lu guichi quégaca nupa nabángaca.

Biti' gu'u légaquië' lataj ila'bábalenë' nupa nácacaga tsahui'.
 29 Neda' riguí' rizáca'a, en rudú ládxa'a.
 Guchisa neda', Dios, en busólá neda'.

30 ¡Cu'a-në' yöl-la' ba Dios len tu le gul-la'!
 ¡Guna' Lë' zxon, en guía'-në': "Xclenu"!

31 Chaza ládxë'ë Xanru' Dios lë ni
 ca raza ládxë'ë-ba' böa'-bëdxi rútia'-ba' lahuë',
 o ca raza ládxë'ë-ba' tuba' bëdxi zxon chinagúlaba'.
 32 Nupa ta'guí' ta'zaca' ila'lé'eni lë ni, en ulu'dzeja.
 Ila'dipa ládxi'gaca nupa tu'guilaj Dios.
 33 Ruzé naguë' Xanru' Dios nupa ta'yadzaj ta'yudxi,
 en biti' ral-la ládxë'ë bönachi queë' nadzúngaca.

34 ¡Guli'cu'ë yöl-la' ba Dios, libí'ili' yehua' yubá, en luyú ni,
 enca' nísado', en yúgu'të le nacua' tu tu lataj na'!

35 Usólá cazë' Dios bönachi Sión,
 en uchisë' yugu' yödzo quégaca zxi'ini xi'sóë' Judá.
 Ila'cuá' bönachi queë' ga na', ate' guequi quéguequi luyú na'.
 36 Zxi'ini xi'sóagaquië' huen xichinë' ila'z'ibi' luyú na',
 ate' ila'cuá'tica'só ni' nupa nadxí'igaca Lë'.

70

1 ¡Busólá neda', Dios!
 ¡Gudáchi gácalenu' neda', Xan!
 2 Ben ga ulu'tuí'i, en ila'bó' böniga nupa na' tē'ëni iluti neda'.
 Ben ga ulu'huécja, en ulu'gá'ana cá'asó nupa na' tē'ëni gaca bi gaca quia'.
 3 Ben ga ulu'huécja lu yöl-la' rutuí' quéguequi
 nupa na' tu'titaj neda', ta'nná: "Ja, ja."
 4 Ben ga ulu'dzeja, en ulu'z' xibó' yúgu'të nupa tu'guilaj Li'.
 Ben ga ilu'ítica'só didza' nupa ta'dxi'i yöl-la' rusólá quiu', ila'nná:
 "¡Zxóntërö náquië' Dios!"

5 Neda' nacuí'da', en biti' bi gaca guna'.
 ¡Gudáchi gácalenu' neda', Dios!
 Nacu' Nu rácalen neda', en Nu rusólá neda'.
 ¡Biti' ca' tsenu' guídu' quia', Xan!

71

1 Nuzóa cazu' neda' dxi'a tsáhui'do' ga na' zu', Xan.
 ¡Biti' gu'u lataj utuí'ida'!
 2 ¡Tu' nacu' tsahui' gúcalen neda', en busólá neda'!
 ¡Buzé nagu' neda', en busólá neda'!
 3 Nacu' le uzóa neda' tsutsu,
 en le gun chí'i neda' ga gaca ucachi' cuina'.
 Chigunná bé'enu' nu usólá neda' tu' nacu' Nu ruzóa neda' tsutsu,
 en Nu run chí'i neda'.
 4 Dios quia', busólá neda' lu na' nu ruá' dö',
 en lu na' nu ridá'baga' Li', en run dzatsa.
 5 Tuzu' Li' runa' lóza, Xan.
 Ruzxöni ládxa'a Li' ga gudéla'të naca' bí'ido'.
 6 Ruzxöni ládxa'a Li' ga gudéla'të gulja',
 tu' guzóalen cazu' neda' cate' ni' buzóanu xiná'a neda'.
 ¡Cú'utica'sa' Li' yöl-la' ba!
 7 Zían nupa tu'bani ca naca quia',
 tu' run chí'i cazu' Li' neda'.
 8 ¡Rigú'utica'sa' Li' yöl-la' ba,
 en tu dza tu dza rulu'a lahui yöl-la' ba quiu'!
 9 ¡Biti' usán no'o neda' na'a, ni naca' bönni' gula!
 ¡Biti' ucá'anu' neda' na'a cate' ni rudú ládxa'a!
 10 Tui' didza' nupa biti' ta'lé'e neda' dxi'a ca gaca bi ilún quia',

ate' tun tuz xtída' gaca nupa té'ëni iluti neda'.

¹¹ Ta'nná: "¡Nusán në'ë Dios lë'!

¡Guli'dá sönru'-në' tu' cuntu nu zoa gácalen lë'!"

¹² ¡Dios, biti' su' zi'tu' ga ni zoa'!

¡Dios quia', gudáchi gácalenu' neda'!

¹³ Ben ga ulu'tuí'i, en ila'niti nupa té'ëni iluti neda'.

Ben ga ulu'tuí'inë', en ila'bö'ë bö'niga bönni' té'ënë' ilu'ë dö' quia'.

¹⁴ ¡Neda' gúntica'sa' löza Li',

en cú'utica'sa' Li' yöl-la' ba!

¹⁵ Idú dza usiyönda' bö'nachi nacu' tsahui',

en rusöló' yúgu'të bö'nachi.

Biti' nözda' bal-laxi luzuí busöló' neda'.

¹⁶ ¡Gu'a didza' ca nácacaga le zxön benu' Li', Xana' Dios!

¡Usiyönda' bö'nachi tuzu' Li' nacu' tsahui'!

¹⁷ Dios, rusédinu' neda' ga gudéla'të ni' naca' bí'ido',

ate' ga ridxintë na'a dza ruá'a didza' ca nácacaga le zxön nunu'.

¹⁸ Na'a naca' bönni' gula, en chinagucha'.

¡Biti' usán no'o neda', Dios!

Benna neda' lataj usiyönda' yugu' xzí'ini xsoa' ca naca yöl-la' huáca quiu',

ate' quíxjói'ida' nupa ilalaj ca naca yöl-la' nál-la quiu'.

¹⁹ ¡Le tsahui' nacu', Dios, ridxintë lúzxiba!

¡Nunu' Li' yugu' le zxöntërö'!

¡Cúnturö nu zoa nu naca ca nacu' Li', Dios!

²⁰ Gusöl-la' casu' quia' yugu' le guca quia' le gulún neda' zi',

pero ruúnu' neda' tsutsu,

en le yúbölö uchisu' neda' para cabí gátia'.

²¹ Gunu' ga tsépisea',

en huë tsahú'u neda' le yúbölö.

²² ¡Le nácatë cu'a Li' yöl-la' ba, en gul-la' tu bihuël-la, Dios!

¡Gul-la' ca runu' ca rnno', en nacu' Nu naca lá'ayi lógaca bö'nachi Israel!

²³ ¡Lu yöl-la' rudzeja quia' cödxí'a cate' gul-la' quiu',

en idú ládxa'a gul-la' tu' busöló' neda'!

²⁴ ¡Idú dza gu'a didza' ca nacu' tsahui'!

¡Tu'tuí'i, en ta'bö' baguí'i nupa gulë'ëni iluá' dö' quia'!

72

¹ Dios, buzéajni'inë' bönni' rinná bë'ë

para gaca uchi'a usöröë' ca ruchí'a rusörö'u' Li'.

Ben ga ilácacagabi' tsahui' xzí'inë' ca nacu' Li' tsahui'.

² Bë'ë lataj uchi'a usöröë' quégaca bö'nachi quiu' ca naca le naca tsahui',

enca' quégaca bö'nachi quiu' ta'guí'i ta'zaca'.

³ Ben ga ila'cuá' dxi'a tsáhui'do' bö'nachi quiu' yugu' lu guí'a,

en ilácacaga tsahui' yugu' lu guí'ado'.

⁴ Bë'ë lataj ubéajë' tsahui' nupa ta'guí'i ta'zaca' ladaj bö'nachi quiu',

en usölé' yugu' xzí'inigaca nupa ta'yadzaj ta'yudxi,

en ucul-lë' nu ribía no léguequi.

⁵ Ben ga iladxi bö'nachi quiu' Li' tsanni ni' soa gubidza,

enca' tsanni ni' soa beo' ga idxintë dza udxi.

⁶ Ben ga gáquië' bönni' rinná bë'ë ca nisa guiöj ribixi lu guíxi'do',

en ca yugu' guiöj gúpa'do' tu'subisa luyú.

⁷ Ben ga gaca dxi'a quégaca nupa nácacaga dxi'a yugu' dza inná bë'ë lë',

en ila'cuá' dxi'a tsáhui'do' ga idxintë bíti'rö soa beo'.

⁸ Ben ga inná bë'ë idapa la'a yödzölió,

ga naguela' ra' yegu Eufrates ga idxintë iduté luyú.

⁹ Ben ga ulu'zechu xzíbigaca lahuë' lë' nupa nacuá' luyú bidxi,

en iladxi lë' nupa ta'díl-lalen lë'.

10 Ben ga ila' dxinè' lahuè' bõnni' ta' nná' bē'è luyú Tarsis en yugu' lu yõdzõ, nuá' gaquiè' yugu' le ulu' nõdzjè' queè'.

Bõnni' ta' nná' bē'è luyú Sabá, en luyú Seba ilá' dxinè' bi ulu' nõdzjè' queè'.

11 Ben ga ulu' zechu zxibigaquiè' lahuè' yúgu' tē bõnni' ta' nná' bē'è, en ilúngaca xichinè' bõnachi yúgu' tē yõdzõ.

12 Usõlè' nu riyadzaj riyudxi cate' ulidza lé', enca' nu riguí' rizaca', en nu biti' zoa nu gácalen nu na'.

13 Huéchi' ládxè'è nupa nátagaca yechi', en nupa ta'yadzaj ta'yudxi, en gun chi'è yõl-la' na' bân quégaca nupa nátagaca yechi'.

14 Usõlè' léguequi lu ná' agaca nupa tun léguequi zi', en lu ná' agaca nupa tuá' dõ',

en güi' i ládxè'è léguequi cate' nu guè' èni guti léguequi.

15 Soè' ibanè', ate' iluá' gaca bõnachi queè' oro que lu xiyúgaca bõnachi Sabá.

Ben ga ulu' lidza Dios bõnachi, ila' nábitica' sõ Li' gácalenu' lé'.

Ben ga ulu' lidza lé' dxi' a tsahui' do' idú dza.

16 Ben ga unõdzjada' zxoá' luyú queè', enca' yugu' lu guí' ado',

le unõdzaj yõdxi yana' xiyúè' ca run guí' a Líbano.

Ben ga ila' yán nupa nacuá' ladzè' ca rō' õ guí' do' lu xiyúè'.

17 Ben ga tsõjnégaca le lé' ga idxintè dza udxi.

Ben ga gaca yõl-la' ba que lé' tsanni ni' soa gubidza.

Ben ga ila' nabi bõnachi Li' yúgu' tē yõdzõ

gunu' ga gaca dxi' a quéguequi ca benu' queè' lé'.

Ben ga ila' gú' u' lé' yõl-la' ba bõnachi yúgu' tē yõdzõ.

18 ¡Yõl-la' ba Xanru' Dios, Dios quégaca bõnachi Israel!

¡Tuzè' Lé' runè' le túngaca ga rubániru'!

19 ¡Yõl-la' ba Lé' le naca lachi ga idxintè dza udxi!

¡Rizè' ládxi' ru' ilí idútè yõdzõlió le naca bení' queè'!

¡Ca' gaca! ¡Õn, ca' gaca!

20 Chibudxi le rinábida'-nè' Dios neda', David, zxi' inè' Isai.

73

1 Le nácatè runè' Dios ga raca dxi' a quégaca bõnachi Israel, nupa na' naca dxi' a tsahui' ládxi' do' guequi.

2 Ia' láti' sõ guchixi guníguida'.

Ia' láti' sõ tsõjdõda' tsólá' alõ,

3 tu' buzxé' eda' nupa tun ba zxõn cuínguequi,

en tu' dèda' yõl-la' tsahui' quégaca nupa tuá' dõ'.

4 Biti' ca' téquinè' zi' bõnni' tu' è dõ' na'.

Nácagaquiè' tsutsu, en nacu' è dxi' a.

5 Biti' ta' guí' i ta' záquè' è ca ta' guí' i ta' zaca' ia' zica' rō bõnachi.

Biti' ca' raca quégaquiè' ca raca quégaca bõnachi yúbólõ.

6 Naca yõl-la' run ba zxõn cuini quégaquiè'

ca tu le néquini oro dxía ícjagaquiè'.

Yõl-la' rutsatsa quégaquiè' naca ca zxágaquiè' nácugaquiè'.

7 Tu' zi' è xibé le ta' dõdi bē' è tē' aj tahuè',

en ta' zá' ládxi' gaquiè' quégaca le zían le ila' déli' nè'.

8 Tu' titjè' ia' zica' rō bõnachi,

en tu' è didza' lu yõl-la' run ba zxõn cuini quégaquiè'.

Tun ba zxõn cuíngaqueiè',

en tē' ènè' ila' bía nahuè' ia' zica' rō bõnachi.

9 Ta' nné' queè' Dios zoè' yehua' yubá,

en tu' didza' yudxè' nupa nacuá' yõdzõlió.

10 Que lé' ni na' ta' dá' bõnachi queè' Dios légaquiè',

en ta' yéajlè' didza' tu' è.

11 Ta' nné': "Biti' ca' nõzinè' Dios,

en biti' ilé' e lé' ni Nu na' zoa xitsá' alõ."

12 Caní nátagaca nupa tuá' dõ'.

Dèda' yõl-la' tsahui' quéguequi, en ta' zítica' sõ ia' lati'.

13 ¿Naru' nítisõ ben chi' i cuina' para gaca' dxi' a

en para cabí ibága'a dul-la'?

¹⁴ Dios, benu' ga gudí'i guzáca'a idú dza.
Yugu' zila benu' neda' zi'.

¹⁵ La'tu' bē'a didza' ca nácgaca lē ni
guzxí' yé'eda' bōnachi quiu'.

¹⁶ Que lē ni na' bē' lādxa'a tséajni'ida' lē ni,
sal-la' gúcada' bōniga

¹⁷ ga bidxintē dza guyu'a yudo' quiu'
en guyéajni'ida' ca gaca quégaca nupa tuá' dō'.

¹⁸ Le nácatē nuzú' léguequi ga ta'chixi ta'nigui,
en runu' ga ila'niti tsaz.

¹⁹ La' ila'nítitē,
en ila'yaza ga udxí quéguequi.

²⁰ Nácgaca ca tu le rinetu' yēla le ridōdi que cate' ritō yu.
Cate' chasu', Xan, la' udóditeu' léguequi tsólá'alō.

²¹ Cate' yōjdín icja' le nácgaca ca tu le silá',
en guzá' lādxa'a yugu' le gúguida' zi',

²² guca' tu' canōz, en bití' bi guyéajni'ida'.
Guca' ca tuba' bōa' guixi' lo' Li'.

²³ Zóatica'sa' lo' Li',
ate' rízn cazu' neda'.

²⁴ Rigú'u yōl-lu'u neda' le rugú'u neda' nōza quiu',
en ga údxitē uzi'u neda', en gunu' neda' bal.

²⁵ ¿Núzxirō zoa yehua' yubá nu gácalen neda'?
¡Tuzu' Li'!

Tu' rácalenu' neda' cúnturō nu zoa yōdzōlió nu riquinda'.

²⁶ Ricuidí' le naca', en rudú lādxa'a.

Le ruzóa tsutsu lādxi'da'ahua',
en le ruzí'tica'sa' xibé naca cazu' Li', Xan.

²⁷ Le nácatē ila'niti nupa tu'cá'ana Li'.
Usunítíu' yúgu'tē nupa tu'zóa Li' tsólá'alō.

²⁸ Raca dxi'a quia' cate' ribiga' ga zu' Li', Dios.

¡Naca cazu' Li', Xana' Dios, Nu run chí'i neda'
para ulu'a lahui yúgu'tē le nun cazu'!

74

¹ Dios, ¿naru' tsaz nusán lādxi'u netu'?

¿Riléde'enu' netu', bō'cu' zxila' queē cazu'?

² Yōjnē netu', bōnachi tu'dubi quiu', nupa bōá'u cazu' dza ni'te,
nupa bōá'u cazu' para gácatu' bōnachi queē cazu'.

Yōjnē guí'a Sión, ga ni guzóa cazu' Li'.

³ Gudá tōdu' ga ni naguínnajdērō yōdzō l'á'ayi quiu'.

Bulu'sunítidērō nupa gula'dá'baga' Li'
yúgu'tē le gula'cuá' lataj l'á'ayi quiu'.

⁴ Tu'tsatsa nupa na' gula'dá'baga' Li'
idú gásibi'ilō ga ni budúbitu' quiu'.

Nucúa'gaquiē' ni le naca bē'gaca
nuxícjagaquiē' yōdzō l'á'ayi quiu'.

⁵ Nalá' lahui yōdzō ni ca nalá' tu guí'a cate' nu gulú'u le bidín,
en nurixi nu na' yugu' yaga gula'cuá' lu guí'a na'.

⁶ Bulu'zuzxjē' le nácgaca lachi lu yōdzō ni
len yugu' guíe huága quégaquiē', en yugu' yaga zidzaj.

⁷ Bulu'zégui'ē idútē lataj l'á'ayi quiu'.

Nucá'anagaquiē' cá'asó lataj ga benru' bal Lo'.

⁸ Lu icja lādxi'do'gaquiē' gula'né': "Nuxícjadērōtu' bōnachi ni."
Idútē lu xiyutu' bulu'zégui'ē yúgu'tē yu'u ga na' budúbitu' lo'.

⁹ Bítí'rō caz rilé'etu' yugu' le bulu'subán lādxi'tu' gulisatu' lu xiyutu'.
Bítí'rō zoa nu bōnni' ru'ē didza' uláz quiu'.

Bítí'rō zóalen netu' nu bōnni' nōzínē' gáca'xte caz gaca caní queétu'.

10 Dios, ¿gáca'xte caz ulu'lidza ditaj netu' nupa ta'díl-lalen netu'?

¿Gáca'xte caz ulu'cá'ana ditaj Lo' nupa ta'dá'bagá' Li'?

11 ¿Naru' cabí gácalenu' netu'?

¿Bizx que nucáchu'u yöl-la' huáca zxön quiu'?

12 Rinná be'e quézinu' netu' Li', Dios, dza ni'te quez, en rusólá casu' bönachi idütë yödzölió.

13 Len yöl-la' huáca zxön quiu' bubéaj casu' choplö nísado'.

Gulá'a casu' ícjagacaba' böa' zxön nacuá'aba' nísado'.

14 Bzxuzxja casu' ícjagacaba' böa' sínia' lëba' Leviatán.

Ben casu' ga guláguba' yugu' böa' guixi' xipéla'ba' böa' sínia' na'.

15 Gusalaj casu' yugu' beaj nisa, en gapa rálajda' nisa.

Busubidxi casu' yugu' yegu nisa gula'yúdzutica'sö nisa.

16 Nequi queë casu' lahui' dza, en nequi ca' quiu' chi'i dzö'ölö.

Ben casu' Li' bení, enca' gubidza.

17 Naguixaj casu' Li' yúgu'të buzá' nacuá' yödzölió.

Nun casu' Li' beo' la, en beo' ziaga.

18 Yöjné lë ni, Dios. Nupa ta'dá'bagá' Li' nucá'anagaca ditaj Lo',

ate' nupa nácaté canöz nucá'anagaca cá'asö Lo'.

19 Biti' usán no'o nupa nadxí'inu' lu ná'agaca nupa nácaté ca yugu' böa' guixi' sínia'.

Biti' gal-la ládxi'u tsaz nupa néquiquequi quiu', en ta'gui' i ta'zaca'.

20 Yöjné didza' dzaga na' núnlenu' netu',

tu' nacuá' nupa tuti bönachi gapa naca chul-la lu xiyutu'.

21 Biti' gu'u lataj ulu'gá'ana cá'asö nupa nácaté bayechi'.

Ben ga ila'gú'u Li' yöl-la' ba nupa ta'gui' i ta'zaca', en ta'yadzaj ta'yudxi.

22 ¡Guyasa, Dios, en ben ca rnna xtídzu'u!

¡Ruzë nagu' ca rulidza ditjë' Li' bönni' canöz idú dza!

23 Biti' gal-la ládxi'u didza' zi' tu'i nupa ta'dá'bagá' Li'.

Yöl-la' dzatsa tun nupa tu'cá'ana Li' cá'asö riyóntica'sö.

75

1 ¡Rëtu' Li': "Xclenu', Dios"!

¡Rëtu' Li': "Xclenu'",

tu' zóatica'su' gal-la' ga zóatu'!

¡Tu'i didza' bönachi ca nácaté le zxön nunu'!

2 Rnnë' Dios: "Nuzóa' dza cate' uchi'a usöröa' bönachi.

Uchi'a usörö caza' léguequi ca naca le nácatë.

3 Tu'suniti yödzölió, en nupa nacuá' ni',

pero tsaz nuzóa caza' le."

4 Gudxa' nupa tun ba zxön cuínguequi, gunnía': "Biti' gun ba zxön cuinli'",

en gudxa' nupa tuá' dö': "Biti' huë tsahui' cuinli'.

5 Biti' huë tsahui' cuinli',

en bití' guí'ili' didza' lu yöl-la' run ba zxön cuinli'."

6 Calëga ga rilén gubidza, en calëga ga ribía gubidza,

en calëga la' guixi' ga dë lataj irúaj le huë tsahui' bönachi,

7 pero uchi'a usörö cazë' Dios bönachi.

Uzötjë' tuë' bönni', en uchisë' ia'tué'.

8 Nuá' cazë' Xanru' lu në'ë tu zxiga' yudzu xisa le ribía lubá uva le ribixi rilëbi.

Chinugútsi'dërë' le, ate' rigu'ë le para ilë'aj le nupa tuá' dö' yödzölió ni,

ate' ilë'jadërö le silá' que.

9 Neda' usiyóntica'sa' bönachi lë ni,

en gul-la' yöl-la' ba queë' Dios queë' Jacob.

10 Ugüë' yöl-la' unná bë' quégaca nupa tuá' dö'.

Quixjë' tsaz yöl-la' unná bë' quégaca nupa nácaté tsahui'.

76

1 Xzí'ini xi'söë' Judá núnbë'gaquië' Dios.

Nayëpisë le lë' ladaj bönachi Israel.

2 Zoa caz lataj lá'ayi queë' lu yödzö Jerusalem,

ate' nazí'i le Sión lataj ga na' zoa cazë'.

³ Ni' guditsjë' yugu' yaga lahui tuchi' zoa guí' láhuiguequi,
enca' yugu' gué' la, en yugu' le ta'díl-lalen bônachi lu gudil-la.

⁴ ¡Yöl-la' ba Li', Dios!
¡Nayépisëteru' ca yugu' guí'a zxon!

⁵ Buxicju' bönni' nál-lagaquié'.
Gudódi yëla guió'j lógaquié' bönni' röjáquié' gudil-la,
en biti' guca ila'chisa ná'agaquié'.

⁶ Cate' Li', Dios queé' Jacob, gudíl-lalen cazu' légaquié'
gulátiba' bóa', ate' gulati ca' nupa dxíagaca légacaba'.

⁷ Li' caz ral-la' gádxitu',
tu' cabí gaca nu soa lo' cate' ilenu'.

⁸ Ga zu' Li' yehua' yubá gunnó' uchi'a usöröu' bônachi.

Ní'irö guladxi nupa nacua' lu yu, en gula'cuá' dxisö,
⁹ cate' guzuinë' Dios para uchi'a usöröé' quégaca bônachi,
para usólé' nupa nácgaca nöxaj ladxi' yödzólió ni.

¹⁰ Sal-la' ta'léde'e bônachi, gaca yöl-la' ba queé' Lé'.

Uzi' é xibégaca nupa ulu'gá'ana ládjaguequi.

¹¹ Guli'sí' lu ná'ali' bi gunlí' lahué' Xanru' Dios,
en guli'gún ca na' innali'.

Yúgu'té nupa nacua' ga na' zoé' ral-la' bi ulu'nödzej queé',
tu' náquié' Nu ral-la' gádxiru'.

¹² Ubéaj cazé' bö' nácgaca caz nupa nadéli'gaca lataj lo.
Bönni' ta'nná bē'ē luyú ni tádxinë' Lé'.

77

¹ Rulidza'-nē' Dios, en ruá'a zidzaj didza'.

Rulidza'-nē' Dios, ate' riyönnē' chí'a.

² Cate' bi guca quia' bulidza'-nē' Dios.

Chí'i dzö'ölö guchisa na'a lahué', en biti' busana' rulidza'-nē'.

Biti' guca nu hué' tsahui' neda'.

³ Cate' röjneda'-nē' Dios, rö'a böniga.

Cate' rinné ládxa'a, ní'irö rudú ládxa'a.

⁴ Bubéaj cazu' yëla guió'j lahua'.

Tu' ribö'a böniga biti' gaca gu'a didza'.

⁵ Chiguzá' ládxa'a ca guca dza ni'te,

ca guca yugu' iz chigula'dódi.

⁶ Tsöjneda' le bulá' chí'i dzö'ölö,

en tsöjsá' ládxa'a ca naca que, ate' rinábini cuina':

⁷ ¿Naru' tsaz nusán Xanru' neda'?

¿Naru' cabirö uzá' ládxe'ë quia'?

⁸ ¿Naru' cabirö gáquié' dxi'i ladxi'?

¿Naru' cabirö tsöjnené' le guxzí' lu nē'ë guné'?

⁹ ¿Naru' nál-la ládxe'ë Dios tu' cabirö ruzá' ládxe'ë queéru'?

¿Naru' bíti'rö huéchi' ládxe'ë rē'u tu' rilené'?

¹⁰ Ní'irö gudxi cuina': Raca caní quia' tu' risëbida' ládxa'a,
en que lé ni na' réquida' nadzá' yöl-la' unná bē' queé' Dios nayépisë'.

¹¹ Tsöjneda' yugu' le nun cazu' Li', Xantu'.

Tsöjneda' yugu' yöl-la' huáca benu' dza ni'te.

¹² Sa' ládxa'a ca nácgaca le nunu',

en cuéqui icja' ca nácgaca le runu'.

¹³ Naca lá'ayi ca run cazu' Li', Dios.

Cúnturö nu zoa naca dios ca nacu' Li', Dios queétu'.

¹⁴ Naca cazu' Li' Dios, runu' yugu' yöl-la' huáca zxon.

Bulú'u lahui yöl-la' huáca quiu' lógaca bônachi yúgu'té yödzö.

¹⁵ Len yöl-la' huáca zxon quiu' busólió' bônachi quiu',

nupa nácgaca xzí'ini xi'sógaquié' Jacob, en José.

¹⁶ Bila'lé'e yugu' nísado' Li', Dios.

Bila lé'e yugu' nísado' Li', en gula'bõ' bõniga.

Gula'zxizilê'e yugu' nísado'.

17 Bulu'lalaj bõaj lúzxiba nisa.

Lúzxiba xítsá' gunnêda' guziú'.

Guyëpi yösa ca yugu' yaga lahui tuchi'.

18 Lu bõ' budunu' biyõn guziú' quiu' gunnêda'.

Yösa gula'yëpi bulu'zení' luyú.

Gudódida' budó' zxu', en guzxizi luyú.

19 Bilá' lahui nõza quiu' gatsaj lálhui'lõ nísado',

ate' guzóa nõza ga gudõdu' gatsaj lálhui'lõ nisa zila.

Biti' nalá' lahui na'a ga na' bulibu'.

20 Guchê' cazu' bõnachi quiu' ca runê' bõnni' richê'ë-ba' bõ'cu' zxila' huê'ënido'.

Guchê'u léguequi lu ná'agaquiê' Moisés, en Aarón.

78

1 Buli'zé nágali' le uzéajni'ida' libí'ili', bõnachi quia'.

Buli'zé nágali' didza' gu'a.

2 Usalja' ruá'a, en ucúdu'a didza'.

Gu'a didza' tu le nagachi' dza ni'te quez,

3 tu didza' chibiyõnru', en núnbê'ëru',

le gulê' xuz xtó'oru' rë'u.

4 Biti' ucáchi'ru' didza' na' lógacabi' zxi'iniru'.

Usiyõnru' yugu' zxi'ini xi'sóaru' yõl-la' ba queé' Xanru',

ca naca yõl-la' huáca queé', en yugu' le zxõn benê'.

5 Gudixjê' tu didza' naca bẽ' queé' Jacob,

en nuzóê' le rinná bẽ'ë quégaca bõnachi Israel,

le gunná bẽ'enê' yugu' xuz xtó'oru'.

Ulu'zéajni'inê' zxi'inigaquiê' ca naca,

6 para ilúnbê'gacabi' le, bi'i si' zá'gacabi', enca' bi'i si' iláljabi',

para ulu'lú'ibi' ca' zxi'inigacabi' ca naca lè na' gunná bẽ'ë Dios.

7 Ulu'zxõni ládxi'gacabi' Dios,

en biti' gal-la ládxi'gacabi' yugu' le nunê' Dios.

Ilunbi' ca nácacaga le gunná bẽ'ë,

8 en biti' ilácagacabi' ca guláquiê' xuz xtó'ogacabi'.

Guláquiê' zidzaj ladxi' tu' gula'dá'baguê'ë xtídzê'ë Dios,

en biti' guláquiê' nõxaj ladxi',

ate' lu icja ládxi'do'gaquiê' biti' gula'yéajlê'ë Dios.

9 Yugu' zxi'ini xi'sóê' Efraín guluá'gaquiê' yaga uxiti',

pero bulu'zxúnajê' lu gudil-la.

10 Biti' gula'dá'gaquiê' didza' dzaga Dios bénlenê' légaquiê',

en biti' gulunê' ca naca le gunná bẽ'enê' légaquiê'.

11 Gulal-la ládxi'gaquiê' yugu' le benê' Dios,

en yugu' yõl-la' huáca zxõn benê' lógaquiê'.

12 Benê' Dios le gulún ga bulu'bánninê' xuz xtó'ogaquiê'

luyú Egipto, en luyú Zoán.

13 Gusaljê' nísado', en benê' ga gula'dõdê' gatsaj lálhui'lõ nísado' na'.

Benê' ga guca nísado' na' ca yugu' guí'ado' tsólá'a huéaj.

14 Buluí'inê' légaquiê' nõza lahui' dza, bugunê' dxin tu bõaj,

ate' chi'i dzõ'õlõ bugunê' dxin tu bõaj ruzení' ca guí'.

15 Bulê'ë tu guiõj ga naca la' guixi' ga dẽ lataj,

en bẽ'ë le gulê'ajê' le guca ca tu nísado'.

16 Gulê'ajê' nisa yegu le gulén lu guiõjto'o.

Benê' ga birúaj nisa ca tu yegu zxõn lu guiõjto'o na'.

17 La' ní'sõ gulunê' dul-la' lahuê' Lẽ',

en gula'dá'baguê'ë Dios nayëpisëtêrê' la' guixi' na'.

18 Lu icja ládxi'do'gaquiê' gula'zi' bẽ'ë Dios quégaquiê',

cate' gula'nábinê' Lẽ' ugahuê' légaquiê' ca gula'zêsõ ládxi'gaquiê'.

19 Ní'irõ gula'nnê' queé' Dios, gula'nnê':

“¿Naru' huáca cu'ë Dios le gáguru' la' guixi' ni ga dẽ lataj?

20 Buli'yútsõca', bẽ'ë guiõjto'o, ate' birúajda' nisa,

le guca ca nisa yegu gubó'o zxõn.

¿Naru' huáca gunnê' ca' queëru' yõta gáguru'?

¿Naru' gaca ughuë' bönachi queë' le naca bëla'?"
 21 Biyönnë' Xanru' Dios didza' ni, en guléde'enë',
 ate' gulén tu guí' le buzegui zían xzí'ini xi'sóë' Jacob,
 tu' guléde'enë' bönachi Israel,
 22 tu' cabí gula'yéajlë'ë Dios,
 en biti' bulu'zxöni ládxi'gaquië' Lë' usölë' légaquië'.
 23 Gunná bé'enë' Lë' yugu' böaj lúzxiba,
 en gusaljë' yehua' yubá.
 24 Gusól-lë'ë yöta maná le ilahuë',
 en bugahuë' légaquië' la' huagu que yehua' yubá.
 25 Gulahuë' bönni' ni' yöta tahuë' gubáz que yehua' yubá.
 Gusól-lë'ë guizxi yu le ilahuë'.
 26 Benë' ga guyecja bö' birúaj ga rilén gubidza,
 ate' len yöl-la' huáca queë' gunná bé'enë' bö' recja
 le birúaj tsólá'aló ga ridödi gubidza beo' ziaga.
 27 Benë' ga böxaj bëla' ca bëchtö yu ládjalö ga na' nacué,
 le naca böa' zoa xiligacaba' gurö'öba' ca yuzxi dé tu ra' yegu zxön.
 28 Benë' ga böxjagacaba' gatsaj lálhui'lö ga na' nacué,
 en ládjagaca yugu' yu'u guídido' quégaquië'.
 29 Ca' guca, gulahuë', en bulu'huólaj gula'dzé'enë',
 tu' bë'ë quégaquië' le gula'zësö ládxi'gaquië'.
 30 Zí'aló ca budxi bulu'huólaj gula'dzé'enë',
 tsanni ni' yu'u ruá'agaquië' le tahuë',
 31 gulénë' Dios légaquië',
 en bëtië' bál-lagaquië', bönni' nál-latërögaquië' ládjagaquië',
 en bucul-lë' bönni' Israel nayëpisëtërögaquië'.
 32 Sal-la' guca caní, gulunrë' dul-la',
 en biti' gula'yéajlë'ë Lë' ni' a quégaca le zxön benë'.
 33 Que lë ni na' benë' ga böáca nítisö dxin gulunë',
 ate' lu yöl-la' radxi gula'zöë' yugu' lu iz quégaquië'.
 34 Cate' bëtië' zíangaquië', ní'irö bulu'lidzë' Lë'.
 Bulu'bí'i ládxi'gaquië', en yöjtá'gaquië' Dios.
 35 Ní'irö yöjnéguequinë' náquië' Dios Nu run chí'i légaquië',
 en náquië' Dios nayëpisëtërë' Nu böá'uó légaquië'.
 36 Gula'zí' yé'enë' Lë' len didza' gulu'ë,
 tu' gulu'ë diza' biti' nácatë' lahuë' Lë' len ruá'agaquië'.
 37 Biti' gudá'gaquië' Lë' idú ládxi'gaquië',
 en biti' gulunë' ca rnna didza' dzaga na' bénlenë' légaquië'.
 38 Tu' buéchi' ládxe'ë Dios légaquië',
 buniti lahuë' ca naca xigua' gulunë', en biti' busunitië' légaquië'.
 Bubequi lahuë' quégaquië', en bítirö gulénë' légaquië',
 en biti' benë' ca sa'yéaj yöl-la' ridzá'a queë'.
 39 Ca' guca, yöjnenë' nácagaquië' bönáchisö.
 Nácagaquië' ca tu bö' recja le ridödisö, en biti' rudxín.
 40 Zían luzuí gula'dá'baguë'ë Lë' ga na' naca la' guixi',
 en bulu'suhu'ínë' Lë' lu yu bidxi na'.
 41 Zían luzuí gula'zí' bë'ë Dios,
 en gulunë' zí' Dios Lá'ayi quégaca bönachi Israel.
 42 Biti' yöjnéguequinë' yöl-la' huáca zxön queë',
 le bulu'e lahui dza ni' böá'uë' légaquië'
 lu ná'agaca nupa biti' bila'lé'e légaquië' dxi'a,
 43 cate' ni' benë' le gulaca bë' luyú Egipto,
 en benë' yugu' yöl-la' huáca queë' luyú Zoán,
 44 cate' benë' ga böáca nisa rön yugu' lu yegu luyú Egipto,
 enca' nisa yugu' lu beaj quégaquië' para cabí guca ilé'ajë' le.
 45 Gusól-lë'ë ládjagaquië' bötsugayu guizxi yu,
 böa' gula'guídxiba' légaquië'.
 Gusól-lë'ë ca' riu bulu'sunitiba' le nequi quégaquië'.
 46 Budödë' le naz nuzóagaquië' lu ruá'agacaba' böchi' zu,
 ate' guláguba' böchi' zu na' le rö'ö yugu' la' yëla quégaquië'.
 47 Busunitië' yugu' lubá uva quégaquië' len nisa guiöj yöla sunna na',
 en busunitië' yugu' yaga higo quégaquië' len bögui'.

48 Bëtië'-ba' böa'-bëdxi quégaquië' len nisa guiöj yöla sunna na',
en lu yösa gula'yëpi.

49 Lu yöl-la' rilé queë' gusöl-lë'ë quégaquië' yugu' lë ni,
en lu yöl-la' ridzá'a queë' busaca' zi'ë légaquië',
en gusöl-lë'ë quégaquië' gubáz que yehua' yubá para bulu'sunítië' légaquië'.

50 Biti' bubequi lahuë' quégaquië' para cabirö lenë' légaquië',
en bití' buniti lahuë' légaquië' para cabí ilátië'.

Budödë' légaquië' lu yöl-la' guti,

51 en bëtië' yúgu'tëbi' bi'i bönni' lo quégaquië' bönni' Egipto,
yugu' bi'i bönni' lo quégaquië' xzí'ini xí'sóë' Ham.

52 Guchë'ë bönachi queë' ca yugu' bö'cu' xzí'la'do',
en buluí'inë' légaquië' nõza la' guixi' ga dë lataj.

53 Guchë'ë légaquië' lu në'ë para cabí bi iládxinë',
pero gubaga' nísado' nupa bití' bila'lé'e légaquië' dxi'a.

54 Ca' guca, guchë'ë légaquië' ga zoa luyú lá'ayi queë',
luyú ni bidéli'në' uláz quégaquië' len yöl-la' huáca queë'.

55 Bulágui'ë bönachi izá'a luyú ni lógaca bönachi queë',
en burixë' que quégaquië' xiyúgaquië' ga ila'cu'ë,

en benë' ga gula'cu'ë bönachi Israel yugu' lu yu'u guidido'.

56 Le yúbólö gula'zí' bë'ë Lë', en gula'dá'baguë'ë Dios nayëpisëtërë',
en bití' gulunë' yugu' le gunná bé'enë' légaquië'.

57 Bulu'huöa ládxi'gaquië', en bulu'cá'anë' Lë' ca gulunë' xuz xtó'gaquië'.

Gula'dödë' tsólá'alö ca run tu yaga lahui tuchi' bití' nácatë li.

58 Gulún lenë' Lë' tu' gulunë' xilátjagaca budó' guiöj budó' yaga yugu' lu guí'a,
en gulunë' ga budúli'në' légaquië' ni'a quégaca budó' na'.

59 Cate' bilé'enë' lë ni Dios, guléde'enë',
en budí'inë' bönachi Israel.

60 Ní'irö buca'anë' xilatjë' lu yödzö Siló,

ga na' guzóa yu'u lá'ayi queë' ládjagaquië' bönni' ni'.

61 Bë'ë lataj gula'chë'ë bönni' zí'tu' guí'ina lá'ayi queë',
guí'ina na' buluí'i lahui yöl-la' xzön queë'.

62 Budödë' bönachi queë' lu ná'agaca nupa bëtigaca léguequi,

63 en gúquinë' zí' nupa ná'agaca quez queë'.

Buzegui tu guí' xzön yugu' bi'i bönni' quégaquië',
ate' cuntú nu bugá'ana nu ulu'tsaga na'lenbi' yugu' bi'i nigula ra'bando'.

64 Yugu' bixúz quégaquië' gulátië' lu guifé tuchi',

ate' bití' guca ila'bódxinu nigula uzëbi quégaquië'.

65 Ní'irö gúquië' Xanru' ca tu bönni' rubané' lu yöl-la' rasi.

Gúquië' ca bönni' rejë' gudil-la gudödi bë'ë gu'ë xisi lubá uva nál-la.

66 Bulágui'ë yugu' bönni' gula'díl-lalenë' bönachi queë',
en tsárido'os burixë' légaquië'.

67 Lë'sca' budödë' tsólá'alö yugu' xzí'ini xí'sóë' José,
en bití' guröë' yugu' xzí'ini xí'sóë' Efraín.

68 Guröë' yugu' xzí'ini xí'sóë' Judá,

en yödzö Siön le nadxí'i quézinë' Lë'.

69 Ni' benë' tu lataj lá'ayi queë' le naca ca tu guí'a xzön,
le zoa tsutsu ca yödzölió ni nuzóë' tsaz.

70 Guröë' ca' David, huen dxin queë',

en bubéajë' lë' ga na' zoë' ruyúë'-ba' yugu' bö'cu' xzí'la'do'.

71 Bubéajë' lë' ga na' rapa chí'ë-ba' yugu' bö'cu' xzí'la' guná',
nacuá'aba' böa' huë'ënido' quégacaba,

para gáquië' nu uyú bönachi queë', yugu' xzí'ini xí'sóë' Jacob,
en bönachi Israel, nupa na' ná'agaca quez queë'.

72 Ca' guca, idú ládxe'ë buyúë' David bönachi na',
en lu yöl-la' rácada' queë' guchë'ë légaquië' lu në'ë.

79

1 Dios, nacué' bönachi izá'a lu xiyúgaca bönachi quiu'.

Nucá'anagaca cá'asö yudo' lá'ayi quiu',

en nusunitigaca yödzö Jerusalén.

2 Bulu'cá'anë' bönachi quiu' ná'tigaca luyú para iláguba' bíchulab léguequi,
en bëla' rön quégaca huen xichinu' ga iláguba' böa' guixi' le.

³ Bulu'laljē' xichōngaca bōnachi quiu' ca nisa idútē lu yōdzō Jerusalén,
ate' cuntu nu bugá'ana nu ucache' léguequi.

⁴ Bōnachi yugu' dzaga luyú queétu' tu'titaj netu'.
Tu'zixdxē', en tu'didza' yudxi netu'.

⁵ ¿Naru' tsaz ilenu' netu', Xan?

¿Naru' sóatica'sō yōl-la' rilé quiu' ca tu guí' ruzegui netu'?

⁶ Gulégaca bōnachi yugu' yōdzō zī'tu' bití' tun Li' bal,
enca' bōnachi bití' tu'lidza Li'.

⁷ Bétigaca bōnachi quiu' nácagaca zxi'ini xi'sóē' Jacob,
en nusunítigaca xiyutu' ga zoa casu' Li'.

⁸ Bití' gunu' netu' xigua' tu' nōzi dul-la' gulunē' xuz xtó'otu'.
Buéchi' ladxi' netu' na'a, tu' rudú ladxí'tu'.

⁹ Gúcalen netu', Dios, Nu rusólá netu', para guntu' bal Lo'.

Busólá netu', en buniti lo netu' ca naca dul-la' nabága'tu' para idxí'itu' Lo'.

¹⁰ ¿Bizx que ta'nabi bōnachi yugu' yōdzō izá'a netu',
ta'nná: "Gázxité zoa Dios queéli'?"

Bē' lataj ilé'tu', en ben ga gaca bē' lógaca yúgu'tē bōnachi
rizí' lo' nupa tu'lalaj xichōngaca huen xichinu'.

¹¹ Buzé nagu' ca ta'nnē ladxí'gaca nupa nadzúngaca.

Len yōl-la' huáca zxōn quiu' busólá nupa na' narugu quéguequi ilátigaca,

¹² en bubí' quégaca bōnachi yugu' dzaga yōdzō queétu'

ia'gadxi cō'lō ca' tscá naca didza' zī' gula'nnē quiu' Li', Xan.

¹³ Netu', bōnachi quiu', enca' bō'cu' zxila' ruyú casu' Li',
guíetica'stu' Li': "Xclenu",

en cú'utica'stu' Li' yōl-la' ba na'a dza, en dza si' zaca.

80

¹ Ruzé nagu' netu', Dios, Nu rapa chi'i bōnachi Israel.

Nacu' Nu ruyú yugu' zxi'ini xi'sóē' José ca nu ruyú yugu' bō'cu' zxila'.

Buzení' queétu', Li' na' rō'u rinná bē'u ga nacua'

nupa nál-lágacatērō quiu' légaca querubín.

² Buluí'i yōl-la' huáca quiu' lógaca zxi'ini xi'sóagaquiē' Efraín, en Benjamín, en Manasés.

Gudá queétu', en busólá netu'.

³ Ben ga huécjatu' quiu' Li', Dios.

Buluí'i netu' nadxí'inu' netu', ate' ulatu'.

⁴ Xantu' Dios quéguequi ní'a no'o guizxi yu,

¿gáca'xte caz ilenu' netu', en bití' yōmnu' le rulidztu' Li'?

⁵ Rugagu' netu' nisa ribōdxi queétu',

en rugui'ju' netu' sizxōni nisa ribōdxi.

⁶ Nunu' ga bōnachi dzaga yōdzō queétu' tu'zixdxi queétu',

ate' nupa bití' ta'lé'e netu' dxi'a tu'titaj netu'.

⁷ Ben ga huécjatu' quiu' Li', Dios quégaca ní'a no'o guizxi yu.

Buluí'i netu' nadxí'inu' netu', ate' ulatu'.

⁸ Guléaju' tu lubá uva le nácatu' netu' luyú Egipto.

Bulagu' bōnachi izá'a yugu' lu yōdzō luyú ni, en budó'o lubá na' ni.

⁹ Buchi'u lataj ga guzxōn lubá na'.

Benu' ga ben luí ga rē', ate' bulí idútē luyú ni.

¹⁰ Gulú'u zxul-la lubá na' yúgu'tē lu guí'ado',

ate' ní'a nē'e gula'baga' yugu' guí'a zxōn.

¹¹ Gula'tunna ní'a nē'e ga bidxintē ra' nísado',

enca' ga bidxintē ra' yegu Eufrates.

¹² ¿Bizx que buquínnaju' yugu' lē'aj gulún chi'i lubá na',

en ru'u lataj nupa ta'dódisō ta'bán le ribía lubá uva na'?

¹³ Tu'libigacaba' cuchi guixi' le,

ate' táguba' bōa' guixi' le.

¹⁴ Buécja queétu', Dios quégaca ní'a no'o guizxi yu.

Ga ni' zu' yehua' yubá buyú ca raca que lubá quiu', en busólá netu'.

¹⁵ Gudá dusóló' lubá ni budá' cazu',
le naca ca tu lubá hué'ëni buxón cazu' Li'.

¹⁶ Nupa bití' ta'lé'e netu' dxi'a gula'chugu ni'a në'e lubá na', en bulu'quela' le guí'.
Buyú ca tun, en lu yöl-la' rilé quiu' busuniti léguequi.

¹⁷ Gúcalen bönni' na' guró cazu' quiu',
netu', bönachi na' nuzóa cazu' tsaz quiu'.

¹⁸ Caní gaca, bíti'ró ucá'anatu' Li'.
Bunna queétu' yöl-la' na'bán, ate' uzxöni ládxi'tu' Lo'.

¹⁹ Ben ga huéjatu' quiu' Li', Dios quégaca ni'a no'o guizxi yu.
Bulu'í netu' nadxí'ínu' netu', ate' ulatu'.

81

¹ Lu yöl-la' rudzeja queéli' guli'gul-la queë' Dios.

Lë' náquië' yöl-la' nál-la queéli'.

Lu yöl-la' rudzeja queéli' guli'cödxí'a lahuë' Dios queë' Jacob.

² Guli'gul-la tu le gúl-lalí', cápa'li' lë'e guídido'.

Guli'quinnaj lë'egaca bihuël-la.

³ Guli'cödxí luzu chivo cate' zoa beo' hué'ëni,
en cate' zoa beo' nál-la, en cate' raca laní.

⁴ Lë ni naca tu xibá quégaca bönachi Israel,
le naca tu le gunná bé'enë' Xanru' Dios zxf'ini xi'sóë' Jacob.

⁵ Gudixjé' le para gaca tu le gun ba nalí queë' lógaca zxf'ini xi'sóë' José,
le gudixjé' cate' gudödë' luyú Egipto,
ga ni' biyönda' didza' izá'a bití' guyéajni'ida'.

⁶ Rnnë' Dios: "Gudúa' yua' zxoá ya' zxicjagaquië',
en bucuíta' le nuá'gaquië' le bulu'subaga' légaquië'
nupa bití' bila'lé'e légaquië' dxi'a.

⁷ Bulídzalí' neda' cate' bi guca queéli', ate' busólá' libí'ili'.
Bubi'a didza' cate' bi gunábili' neda', ni' nucachi' cuina' tu lu böaj gasaj.

⁸ Guzxf' bë'a libí'ili' ga zoa nisa na' lë Meriba.
⁸ Buli'zë nágali', libí'ili', bönachi quia', ate' uxösa' libí'ili'.

Raca ládxa'a uzë nágali' neda', bönachi Israel.

⁹ Bití' ral-la' soa tu díos izá'a ga na' zóali',
en bití' gunlí' zxön tu díos quégaca bönachi zi'tu'.

¹⁰ Neda', Xanli', naca' Dios queéli'.

Guléaja' libí'ili' luyú Egipto.

Guli'salaj ruá'ali', ate' cu'a ruá'ali' le gáguli'.

¹¹ Bití' bulu'zë nágagaca bönachi quia' chí'a.

Bití' gulún bönachi Israel ca rnna xtídza'a.

¹² Que lë ni na' busán ládxa'a léguequi
para gulún ca sa'yéaj yöl-la' ridá'baga' quéguequi,
en para gulún ca gula'za'sö ládxi'gaca.

¹³ Guzá' ládxa'a ulu'zë nágagaca bönachi quia' xtídza'a,
para ilún bönachi Israel ca ré'ënda' neda'.

¹⁴ La'tu' ilún caní, uxicja caza' nupa bití' ta'lé'e léguequi dxi'a,
en tíl-lalena' nupa ta'díl-lalen léguequi.

¹⁵ Ulu'luf'í cuínguequi nupa bití' ta'lé'e neda' dxi'a,
ca nupa tun ca rnna xtídza'a,
pero tsaz guna' léguequi xiguaí'.

¹⁶ Lësca' ugahua' libí'ili', bönachi quia', zxoá' xtila dxi'ado',
en guna' ga huöläj idzé'eli' le zxixi que buz, le irúaj lë'e guiöj."

82

¹ Zuinë' Dios ladaj nupa tu'dubi queë' ni' yehua' yubá.
Ruchi'a rusöröë' nupa ta'nná bë'.

² Rnnë': "¿Gáca'xte caz uchi'a usöröli' quégaca bönachi
lu yöl-la' bití' naca tsahui' queéli'?"

Caní naca tu' rubéajli' tsahui' nupa tuá' dö'.

³ Buli'béaj tsahui' nupa ta'cuidi', en yugu' bi'i uzëbi.

Guli'gún le naca tsahui' quégaca nupa ta'guí'i ta'zaca',
en quégaca nupa ta'yadzaj ta'yudxi.

⁴ Buli'sólá nupa ta'cuidi', en nupa náacagaca yechi'.

Buli'sólá léguequi lu ná'agaca nupa tuá' dō'.

⁵ Biti' nōziguequi, en biti' ta'yéajni'.

Ta'dá ga chul-la.

Rizzizi xilibi yōdzōlió."

⁶ Rnna caza' neda': "Nácali' ca yugu' dios.

Nácali' yúgu'téli' xzí'inē' Dios nayépisètèrē',

⁷ pero gátili' ca tati bōnachi,

en ibíxili' lu gudil-la ca ta'bixi xzí'inē' bōnni' lo."

⁸ Guyasa, Dios, en buchi'a busōrō quégaca bōnachi yōdzōlió ni,

tu' náacagaca queē cazu' yúgu'tē yōdzō bōnachi.

83

¹ Biti' ugá'anu' dxisō, Dios.

Biti' su' dxisō, Dios, en biti' usayaj ru'u,

² tu' tu'tsatsa nupa ta'dá'baga' Li',

ate' nupa biti' ta'lé'e Li' dxi'a tun ba zxōn cúnguequi.

³ Tun tuz xtídza'guequi bi ilún quégaca bōnachi queē cazu',

en tu' pá yugu' le ilún quégaca nupa nadxi'i quézinu', ta'nná:

⁴ "Guli'dá, usunítiru' léguequi para cabirō ilaca tu yōdzō bōnachi,

en para cūnturō nu tsōjné bōnachi Israel."

⁵ Núngaca tuz xtídza'guequi.

Nuzóagaca tsutsu xtídza'guequi ta'dá'baga' Li'.

⁶ Yugu' bōnni' Edom, en yugu' bōnni' Ismael,

en yugu' bōnni' Moab, en yugu' bōnni' Agar,

⁷ en yugu' bōnni' Gebal, en yugu' bōnni' Amón, en yugu' bōnni' Amalec,

en yugu' bōnni' Filisteo, en yugu' bōnni' Tiro,

⁸ enca' yugu' bōnni' Asiria núnagaquiē' légaquiē' tsōzxōn.

Rácalengaquiē' yugu' bōnni' xzí'ini xi'sóé' Lot.

⁹ Ben quégaquiē' ca benu' quégaca bōnachi Madián, nupa na' busunítu' dērō,

en ca na' benu' queē' Sísara, en ca na' benu' queē' Jabín ra' yegu Cisón,

¹⁰ nupa na' busunítu' lu yōdzō Endor,

ate' gulaca ca xiqué'ēba' bēdxi luyú ni'.

¹¹ Ben quégaquiē' bōnni' lo quéguequi

ca benu' quégaquiē' Oreb, en Zeb,

en ben quégaquiē' bōnni' ta'nná bé'enē' léguequi

ca benu' quégaquiē' Zeba, en Zalmuna,

¹² nupa na' gula'nná: "Ilequi queēru'

yugu' lataj gapa na' gulequi queē' Dios."

¹³ Dios quia', ben ga ilácagaquiē' ca bēchtō yu le riché' bō',

en ca bēbu zxe café le ruá' bō' budunu'.

¹⁴ Ca run tu guí' zxōn, ruzegui' yugu' yaga zxōn,

o ca run tu guí', ruzegui' tu guí'a zxōn,

¹⁵ gusí regu' léguequi tu lu bō' budunu',

en ben gadxi léguequi tu lu nisa guiōjsiu' zili.

¹⁶ Ben ga ulu'tuí'i

para ulu'guilaj Li', Xan.

¹⁷ Ben ga ulu'tuí'i, en ila'bō' tsaz bōniga.

Ben ga ulu'gá'ana cá'asō, en tsaz ila'niti,

¹⁸ para iléquibe'e nayépisètèru' tuzu' Li' idútē yōdzōlió

en ulu'zóa xzibiguequi lo', Xantu' Dios.

84

¹ ¡Bica' lachi gapa zoa cazu' Li', Dios!

¡Nacu' Xángaca ni'a no'o guizxi yu!

² Rizé ládxa'a soa' lu yu'u lidxu', Xana' Dios.

Lu yōl-la' rudzeja quia' idú ládxa'a rul-la' quiu' Li', Dios ban.

³ Bidzóliba' bigúinni chulí' lataj ga nuzóaba' lídxiba',

en bidzõliba' xiguichi guziú' ga budxíaba' xicá'aba',
ga na' rigú'uba' biguinnido' queéba',
gala' ga dẽ lu bucugu quiu' Li', Xángaca ni'a no'o guizxi yu.
Nacu' Nu rinná be'e neda', en nacu' ca' Dios quia'.

4 ¡Bica' ba nupa ta'yaza lu yu'u lidxu'!
¡Ta'gú'utica'sõ Li' yõl-la' ba!

5 ¡Bica' ba bönni' nápagaqueié' yõl-la' nál-la le nequi queé cazu',
en ta'zẽ lãdxi'gaquie' ila'yu'ẽ nõza le ridxín yõdzõ Siõn!

6 Cate' ta'dõdẽ' lu yu bidxi tunẽ' ga ruhuõáca gapa ralaj nisa beaj.
Tun ga rizí' xibẽ yu bidxi na' yugu' nisa guiõj ta'dxín bayõn.

7 Lu yõl-la' huáca queégaquie' rõjáquie', en tu'zĩ rõnẽ' yõl-la' huáca.
Ta'dxinẽ' yúgu'tégaquie' lo' Li', Dios, lu yõdzõ Siõn.

8 Ruzẽ nagu' le rulidza' Li', Dios, Xángaca ni'a no'o guizxi yu.
Ruzẽ nagu' neda', Dios queé' Jacob.

9 Buyúẽ' bönni' rinná bé'enẽ' netu', Dios.
Buyúẽ' bönni' na' nabõ cazu'.

10 Nácaraõ dxi'a soa' tu dza lu yu'u lidxu' ca le soa' idú chi gayuá' dza ga yúbõlõ.
Cõa' zĩ'alõ gaca' huen dxin ga nu riyaza yu'u lidxẽ' Dios
ca le soa caza' tu yu'u zxõn ga bití' zoa Dios.

11 Náquie' Xanru' Dios ca gubidza, en le rusubín rẽ'u.
Xanru' caz runnẽ' queẽru' yõl-la' ruzá' ladxi' queé', en yõl-la' zxõn queé'.
Bití' ugúẽ' nitú le naca dxi'a gapa nacuá' nupa tun le naca tsahui'.

12 ¡Li', Xángaca ni'a no'o guizxi yu,
bica' ba bönni' ruzxõni lãdxẽ'ẽ Li'!

85

1 Buzá' lãdxu'u quegaca bõnachi quiu', Xantu' Dios.
Buchẽ' u Li' zxi'ini xi'sõẽ' Jacob gula'dzunẽ'.

2 Buniti lo' bõnachi quiu' ca naca xiguia' gula'baga'.
Bucáchu'u yugu' dul-la' gulúngaca.

3 Buzõa dxíu' yõl-la' rilẽ quiu'.
Bugú' yõl-la' ridzá'a quiu'.

4 Buzõa netu' xilátjatu' le yúbõlõ, Dios, Nu rusõlá netu',
en bití'rõ lenu' netu'.

5 ¿Naru' tsaz ilenu' netu'?
¿Naru' tsaz ilenu' yugu' zxi'ini xsoatu'?

6 ¿Naru' cabí usubanu' lãdxi'tu' le yúbõlõ,
para udzeja lãdxi'lentu' Li' netu', bõnachi quiu'?

7 Lu yõl-la' dxi'i ladxi' quiu' gúcalen netu',
en busõlá netu', Xan.

8 Uzẽ naga' didza' gu'ẽ Xanru' Dios.
Le guie' bõnachi queé' gun ga gaca dxi'a queéquei,
nupa na' nácagaca quez queé',

pero run bayúdx bití' ulu'huõa lãdxi'gaca.
9 Le nácatẽ chizóẽ' usõlẽ' nupa tun Lẽ' bal,

para soa yõl-la' ba queé' luyú queétu'.
10 Dzáagaca yõl-la' dxi'i ladxi', en le naca idútẽ li.

Tagu zxixi luzẽ' eguequi nu naca tsahui', en nu ribõza dxi'a tsáhui'do'.
11 Luyú caz rilẽn le naca idútẽ li,

ate' yehua' yubá rirúaj le naca tsahui'.
12 Le nácatẽ Xanru' unõdzjẽ' queẽru' le naca dxi'a,

ate' xiyuru' unõdzaj le uláparu'.
13 Le naca tsahui' rõjnõru lahuẽ' Xanru',

en gun ga soa nõza gátĩ'tẽs ga ulibẽ'.

86

- ¹ Ruzé nagu', Xana' Dios, en rubí'u didza',
tu' zoa nu rusaca' zi' neda', ate' riyadzaj riyúdxida'.
- ² Ben chi'i bö' naca caza', Dios, tu' naca' quiu' Li'.
Busólá neda', huen dxin quiu', Dios quia', tu' ruzxöni ládxa'a Li'.
- ³ Buzá' ladxi' quia', Xan,
tu' rulidza' Li' idú dza.
- ⁴ Ben ga udzeja ládxa'a neda', huen dxin quiu',
tu' rigu'a lu no'o bö' naca caza', Xan.
- ⁵ Nacu' dxi'a, Xan, en chizú' uniti lo' bönachi quiu'.
Nadxí'ítica'su' yúgu'té nupa tu'lidza Li'.
- ⁶ Ruzé nagu' le rulidza' Li', Xan,
en ruí'i ládxi'u gunu' yugu' le inábida' lo'.
- ⁷ Cate' bi gaca quia' ulidza' Li',
tu' ubí'i cazu' didza' bi gunu' quia'.
- ⁸ Cúnturö nu zoa ládjagaca dios nu naca ca nacu' Li', Xan,
en biti' zoa ia'tú nu run ca nácgaca le runu' Li'.
- ⁹ Ila'dxín bönachi yúgu'té yödzö naguixju' Li', Xana' Dios,
en ila'yéaj ládxi'gaca Li', en ilún zxön Lo'.
- ¹⁰ Nayépisétérösu' Li', en tuzu' Li' runu' yugu' yöl-la' huáca zxön.
Tuzu' Li' nacu' Dios.
- ¹¹ Busédi neda' ca naca le rē'enu' guna', Xan.
Guna' ca naca le naca idúté li naguixju' Li'.
- Ben ga gádxida' Lo' idú ládxa'a.
- ¹² Idú ládxa'a guía' Li': "Xclenu'", Xana' Dios,
en guna' zxön Lo' yugu' iz si' zaca.
- ¹³ Nadxí'ide'enu' neda',
en chibusóló' bö' naca caza' lu lataj chul-la ga nacua' nupa chinátigaca.
- ¹⁴ Dios quia', nupa ta'dá'baga' neda' ta'díl-lalen neda',
ate' yugu' bönni' zidzaj ladxi' té'ené' ilútié' neda',
yugu' bönni' na' biti' tuné' Li' bal.
- ¹⁵ Nacu' Dios ruhuéchi' ládxi'u netu', Xan, en ruzá' ládxi'u queétu'.
Ridzenu' para ilenu' netu', en nadxí'ide'enu' netu', en runu' ca rnna xtídzu'u.
- ¹⁶ Buyú neda', en buzá' ladxi' quia'.
Butípa ládxa'a neda', huen dxin quiu',
en busólá neda', zxi'ininu nigula huen dxin quiu'.
- ¹⁷ Bulu'i neda' tu le gaca bé' gaca dxi'a quia',
para ila'lé'e le nupa biti' ta'lé'e neda' dxi'a.
Ulu'tu'i, tu' gúcalenu' neda',
en bué tsahú'u neda', Xan.

87

- ¹ Nuzóë' Dios xilibi zö'ö que yödzö queé' lu guí'a lá'ayi.
- ² Nadxí'irönë' Xanru' lataj ga na' tu'chi'a tu'sörö bönachi Sión
ca nadxí'inë' ia'zica'rö lataj gapa nacua' bönachi Israel.
- ³ Zián le lachi ta'nná bönachi ca naca
yödz na' nequi queé' Dios.
- ⁴ Cate' ulidza' bönachi núnbë'gaca neda', Dios,
ulidza' bönachi nníta'gaca Egipto, en Babilonia.
Ca naca quégaca bönachi Filistea, en Tiro, en Etiopía
innía' nabábagaca yödzö lá'ayi na'.
- ⁵ Cate' gu'a didza' que yödzö Sión innía':
Bönachi ni, en bönachi izá'a ni nabábagaca le,
ate' neda', Dios nayépisétéré', uzóa' tsutsu yödzö na'.
- ⁶ Cate' ulabë' Xanru' nupa nácgaca queé' inné':
"Bönni' ni nababë' yödzö quia'."
- ⁷ Ní'irö ilu'i didza' nupa tul-la, en nupa tu'cödxí gui, ila'ná:
"Ruzí'itu' xibé tuzi yödzö ni."

88

- ¹ Xana' Dios, Nu rusólá neda',
rulidza' Li' rëla, en te dza.
² Bë' lataj idxín lo' le rulidza' Li'.
Ruzé nagu' le rinaba yúdxida' Li'.
³ Ruúbi ruguí' i ládxi' da' ahua',
en chizóa tsöjtsázia' lataj chul-la.
⁴ Chinábabalena' nupa chinátigaca.
Naca' ca tu bönni' nudú dërö ládxe'ë,
⁵ en nagá'ané' cá'asö ladaj nupa chinátigaca,
en ca nupa dëgaca yeru ba,
nupa na' bití'rö røjnenu',
en nusán no' o léguequi.
⁶ Nuzú' neda' tu lu yeru zila,
ga naca chul-la, en le nácada' zila.
⁷ Rilenu' neda',
en rusaca' zi'u neda' tu lu nísado' quiu'.
⁸ Nucuasú' yúgu'të nupa núnbë'a.
Nunu' neda' ca tu le ta'guti bönachi.
Nadzuna', en bití' gaca írúaja'.
⁹ Tu' riguí' i rizáca' a nudú guió'j lahua'.
Tu dza tu dza rulidza' Li', Xan.
Richisa na' a zaca' ga na' zu'.
¹⁰ ¿Naru' guntso' yugu' yöl-la' huáca zxön
para gácalenu' nupa chinátigaca?
¿Naru' ulu'yasa nupa yú'ugaca lataj chul-la,
en ila'gú'u Li' yöl-la' ba?
¹¹ ¿Naru' ulu'luí' i lahui yöl-la' dxi' i ladxi' quiu'
nupa nagáchi' gaca yeru ba?
¿Naru' ulu'luí' i lahui nupa yú'ugaca lataj chul-la
ca runu' ca rnna xtídzu'u?
¹² ¿Naru' gaca bë' le zxön runu' ga na' naca chul-la?
¿Naru' gaca bë' nacu' tsahuí' ga na' cuntu nu bi røjné?
- ¹³ Rulidza' Li' neda' para gácalenu' neda',
ate' yugu' zila ridxín lo' le rinábida' Li'.
¹⁴ ¿Bizx que nusán ládxi'u neda', Xan?
¿Bizx que rucachi' lo' lahua' neda'?
- ¹⁵ Riguí' i rizáca' a, en chizóa gátia' ga gudela' naca' bí'ido'.
Réquida' zi' tu' ruxösu' neda', en rudú ládxa'a.
¹⁶ Nabága' a neda' yöl-la' rilé quiu',
ate' chizóa usuniti neda' le ruxösu' neda'.
¹⁷ Idú dza naca quia' ca nabaga' neda' nisa.
Nagú'ugaca neda' lë'ajlô yugu' nisa.
¹⁸ Nucuasú' ga zoa' nu nadxi' i neda', enca' luzá'a.
Zóalensö le naca chul-la neda'.

89

- ¹ Gúl-latica'sa' ca naca yöl-la' dxi' i ladxi' quiu', Xan.
Usiyönda' zxi'ini xsoatu' ca runu' ca rnna xtídzu'u.
² Gunnía': "Sóatica'sö yöl-la' dxi' i ladxi' quiu'.
Tsaz naca bë' yehua' yubá ca runu' ca rnna xtídzu'u."
³ Rnnë' Dios: "Naguixja' tsaz didza' dzaga núnlena' nupa nabö caza' quia'.
Bena' tsutsu xtídz'a' a ca guna' queë' David, huen dxin quia'.
⁴ Gunnía': Ucuá'a tsaz zxi'ini xi'sú'.
Guna' ga sóatica'sö nu inná bë' uláz quiu'."
⁵ Nupa nacuá' yehua' yubá quiu' ila'gú'u yöl-la' ba le nunu' le tun ga rubánitu', Xan.
Ga nudúbigaca nupa nácagaca quez quiu' ila'gú'u yöl-la' ba ca runu' ca rnna xtídzu'u.
⁶ ¿Nuzxi caz zoa ni' yehua' yubá naca ca nacu' Li', Xan?
¿Nuzxi caz zoa ladaj nupa nayépisëgaca naca ca nacu' Li', Xan?

7 Nupa nácgaca lá'ayi tun Li' bal, Dios.

Ral-la' gúnróru' Li' bal ca tun nupa nacua' len Li'.

8 Dios, Xángaca ni'a no' o guizxi yu, çnuzxi caz naca ca nacu' Li', Xantu' nayépisètërou'?

Naca bē' rúntica'su' ca rnna xtídzu'u.

9 Rinná be'e quézinu' le riyasa ridxía que nísado'.

Cate' riyasa ridxía nísado', ruzóa cazu' le dxisó.

10 Busuniti cazu' bönachi Egipto, ate' gulaca ca nupa chinátigaca.

Bësilásiu' léguequi len no'o nál-la.

11 Nequi quiu' yehua' yubá,

en nequi ca' quiu' luyú ni, tu' nuzóa cazu' léguequi.

12 Naguixaj cazu' le dē tsólá'a ga za' bō' ziaga,

en le dē tsólá'a ga ridōdi gubidza beo' ziaga.

Lu yól-la' rudzeja quéguequi ta'bódxí'a guí'a Tabor,

en guí'a Hermón cate' ta'yōni Lo'.

13 ¡Nál-latërō naca no'o!

¡Nápatërō no'o yól-la' huáca!

¡Nayépisètërō no'o ibëla!

14 Le naca dxi'a, en le naca tsahui' tun tsutsu le rinná bē'u.

Nacuá' len Li' yól-la' dxi'i ladxi', en le naca idútë li.

15 Bica' bágaca nupa ta'yōni didza' que yól-la' rudzeja.

Ta'dá lu bení' que lo', Xantu' Dios.

16 Idú dza tu'dzeja tu' zóalen Lo' léguequi,

en tu' zóalen léguequi le naca tsahui' quiu', le nayépisètërō.

17 Naca cazu' Li' yól-la' zxón que yól-la' huáca quéguequi,

en tu' ruzá' ládxi'u queëtu' nazxōnda' yól-la' nál-la queëtu'.

18 Nequi queë' Xanru' le run chí'i rē'u,

ate' néquimë' queë' Dios bönni' rinná bé'enë' rē'u.

Dios na' náquië' lá'ayi ladaj bönachi Israel.

19 Dza ni'te bē'lenu' nupa néquiguequi quiu' didza'

lu yugu' le buluí' inu' léguequi,

gunnó: "Gúcalena' tu nu nayépisètërō.

Nuchisa' tu nu guró caza' quia' ladaj bönachi.

20 Budzólida'-në' David, huen dxin quia'.

Gulu'a-në' le za le naca lá'ayi quia'.

21 Len na' caza' naguixja' lë',

ate' len na'a ca' utipa' ládxi'ë.

22 Biti' si' ye'e lë' nu rilé lë',

en bití' usaca' zi' lë' nu ruá' dö'.

23 Uquínna' lahuë' nupa ta'díl-lalen lë',

en gu'a nupa bití' ta'lé'e lë' dxi'a.

24 Sóalena' lë' lu yól-la' run ca rnna xtídza'a,

en lu yól-la' dxi'i ladxi' quia',

ate' tu' ulidzë' La', uxóna' yól-la' nál-la queë'.

25 Guna' ga inná bē'ë ga naguela' ra' nísado',

ga idxintë ra' yegu Eufates.

26 Ulidzë' neda', innë': Li' nacu' Xuza', en Dios quia',

enca' Nu run chí'i neda', en Nu rusólá neda'.

27 Gun caza' neda' ga gáquië' ca bí'i lo queë' caza',

ate' tsépisètërë' ca yugu' bönni' ta'nná bē'ë yödzülió.

28 Lu yól-la' dxi'i ladxi' quia' gun chí'tica'sa' lë',

en uzóa' tsaz queë' didza' dzaga quia'.

29 Ucuá'a tsaz zxi'ini xísóë',

ate' sóatica'só lataj ga inná bē'ë, tsca soa yehua' yubá.

30 Channó ulu' cá'anë' zxi'ini xísóë' xibá quia',

en cabí ilunë' ca naca le buchi'a busóra',

31 en channó ila' guitsjë' xibá que le gunná bē'a,

en cabí ilunë' ca nácgaca le gunná bé'eda' légaquië',

32 ní'iró guna' légaquië' xiguia' ca sa'yéaj le ta'dódi bē' tunë',

en gu'a léguequi ca naca xiguia' nabága'gaquië'.

³³ Pero biti' ugúa' queë' yöl-la' dxi'i ladxi' quia',
en biti' usana' guna' ca rnna le guzxi' lu na'a guna'.

³⁴ Biti' ucá'ana' cá'asö didza' dzaga nuna',
en biti' utsá'a didza' bē'a.

³⁵ Tu le nuzó'a' tsutsu, en nuna' ba nali' que le naca lá'ayi quia'.
Biti' ca' si' yé'eda' David.

³⁶ Gunnía' ila'cuá'tica'sē' zxi'ini xi'sóë',
en ga rō'ë rinná bē'ë sóatica'sö lahua' ca gubidza.

³⁷ Naguixja' le tsaz ca nuzó'a' tsaz beo',
ate' nacuá'tica'sö lúzxiba le tun ba nali."

³⁸ Pero nuzú' tsóla'alö, en nusán ládXu'u,
en riléde'enu' nupa na' gurö cazu' quiu'.

³⁹ Nuzú' tsóla'alö didza' dzaga bénlenu' huen dxin quiu'.
Nuzötju' luyú yöl-la' unná bē' queë'.

⁴⁰ Nuquínaju' zö'ö gulún chí'i lē',
en nusúnitiu' yugu' lataj tsutsu queë'.

⁴¹ Yúgu'tē nupa ta'dōdisö ta'bán le nequi queë',
ate' bönni' dzaga yu'u queë' tu'cá'ana lē' cá'asö.

⁴² Nuchisu' nupa ta'dá'baga' lē',
en runu' ga tu'dzeja nupa biti' ta'lé'e lē' dxi'a.

⁴³ Runu' ga biti' sequi' idéli'nē' lu gudil-la,
ate' cuntu nu sequi' ucul-lē' lu gudil-la na'.

⁴⁴ Bugú' yöl-la' lachi queë',
en nuzötju' yöl-la' unná bē' queë' lu yu.

⁴⁵ Benu' ga chinagulē' sal-la' ni zoë' iz cuidi',
en nunu' ga rutu'inē'.

⁴⁶ ¿Gáca'xte caz gunu' caní, Xan?

¿Naru' tsaz nucachi' lo'?

¿Naru' gácatíca'sö yöl-la' rilé quiu' ca tu guí' réguide'e?

⁴⁷ Yöjné nabábasö iz soa' ibana',
en tu chí'isö nacuá' bōnachi yōdzölió ni.

⁴⁸ ¿Nuzxi caz bönni' gaca sóatica'sē' ibanē', en cabí gátíë'?

¿Naru' huáca usóla' cuin cazē' lu yöl-la' unná bē' que lataj chul-la'?

⁴⁹ ¿Gázxitē zoa yöl-la' dxi'i ladxi' quiu' guzóa zí'alö, Xan,
lē' na' buzú' tsutsu xtídzu'u gunu' queë' David,

len yöl-la' run ca rnna xtídzu'u?

⁵⁰ Yöjné ca tu'cá'ana cá'asö netu', huen dxin quiu', Xan,

enca' ca tu'cá'ana neda' cá'asö bōnachi zían yōdzö izá'a.

⁵¹ Tu'cá'ana neda' cá'asö nupa biti' ta'lé'e Li' dxi'a, Xan.

Tu'cá'ana cá'asö yugu' le runa' neda', bönni' gurö cazu' quiu'.

⁵² ¡Yöl-la' ba Xanru' Dios iz si' zaca!

¡Ca' gaca! ¡Ön, ca' gaca!

90

¹ Naca cazu' Li', Xan, ca yu'u lidxa'.

² Zí'atēlō ca gulata' yugu' guí'a, o ca guta' yōdzölió,
ga naguela' cate' gusí lo ga idxintē dza udxí, tsaz naca cazu' Dios.

³ Runu' ga tu'huóáca bōnachi béchtō yu cate' rno':

"Gulí'huóáca le néquinili', bōnachi."

⁴ Quiu' Li' chí'gayuá' iz nácagaca

ca dza neje le chí'gudōdi que,

o ca tu chí'isö chí'i dzö'ölō.

⁵ Bugacu' bōnachi ca tu lu yegu gubó'o, ate' gúcagaca ca tu yēla rineru'.

Cate' naca zila zéaj naca ca tu guí'xi'do' rilentē luyú.

⁶ Cate' naca lahui' dza rizxōn, en rō' ni'a nē'e,

pero cate' chiral-la, ricuadi', en ridōdi que.

⁷ Rinítitu' tu' rilenu' netu',

ate' tu' ridzó'o ruúbi ruguí'tu'.

8 Nuzú' lo' xiguia' nabága'tu',
 en nubéaju' lu bení' quiu' dul-la' yu'u ládxi'do'otu'.
 9 Tu' riléde'enu' netu' ridódi quégaca dza queétu',
 ate' chibú'u iz queétu' ca tu le rinné ládxi'tu'.
 10 Tsónnalalaj yu' chi ízisö zóatu' nabantu',
 o channö nál-latu', huazóatu' idú tápalalaj iz,
 pero runtu' dxin bayudxi, en ruhuí'initu' yugu' iz na',
 tu' ridódité quéguequi iz na', ate' uzá'atu'.
 11 ¿Nuzxi caz réajni' i tscá naca yól-la' rilé quiu' ?
 ¿Nuzxi caz nözi ca naca tsóbi yu'u nu na' rilenu' ?
 12 Que lé ni na' busédi netu' para guéquibe'etu' tscá gácagaca iz zóatu',
 para gácatu' bönachi ta'yéajni' i lo' Li'.
 13 ¿Gáca'xte caz bití' huéchi' ládxi'u netu', Xan?
 Buéchi' ládxi' netu', yugu' huen dxin quiu'.
 14 Tu' zila tu' zila buluf' i netu' ca naca yól-la' dxi' i ládxi' quiu',
 para gúl-latu' lu yól-la' rudzeja queétu', en uzí'itu' xibé yugu' dza na'.
 15 Ben ga udzéjatu' tscá chigulaca dza busaca' zi'u netu',
 en tscá gulaca iz bití' guca dxi'a queétu'.
 16 Buluf' i netu', yugu' huen dxin quiu', ca naca le nunu',
 en buluf' i xzí'initu' ca naca yól-la' zxön quiu'.
 17 ¡Buzá' ládxi' queétu', Xantu' Dios,
 en ben ga írúaj dxi'a dxin runtu' !
 ¡Ön, ben ga gaca dxi'a lo' dxin runtu' !

91

1 Nu bönni' ruzxöni ládxi'ë Dios para gun chi'ë lé',
 en rizi'ë Dios Nu napa idútë yól-la' huáca, para gácalenë' lé',
 2 gaca guië' Xanru': "Nacu' Nu run chi' i neda', en Nu ruzóa neda' tsutsu.
 Nacu' Dios quia', ate' ruzxöni ládxa'a Li'."
 3 Usóla cazë' Dios Li' lu du yalaj que nu rizön bönachi,
 en lu yödzöhuë' le rusuniti.
 4 Usubáguë'ë li' ca rusbága'ba' böra yugu' bórado' queéba',
 ate' gaca chi'u lu në'ë ca raca quégacaba' bórado' zcan xílaba' yöjede.
 Le run chi' i rë'u, en le ruzóa rë'u tsutsu naca yól-la' run ca rnna xtídzë'ë cheë'.
 5 Bití' gádxinu' le run gadxi bönachi chi' i dzö'ölö,
 en bití' gádxinu' yaga lahui' tuchi' tu'sé bönachi lahui' dza,
 6 en bití' gádxinu' yödzöhuë' le rilén ga naca chul-la,
 en bití' gádxinu' le naca xihui' le ruti bönachi lahui' dza.
 7 Ilátigaca chí gayuá' bönachi cuitu' li',
 en ia' chí cö' chí gayuá' cuitu' ibëla,
 pero bití' bi gaca quiu' li'.
 8 Le nácatë uyú iná'asu',
 en ilé'enu' le rubí' i quégaca nupa tuá' dö'.
 9 Tu' nuzú'-në' Xanru' Nu run chi' i li',
 nuzú'-në' Dios nayépisëtërë' Nu gácalen li',
 10 bití' bi gaca quiu' le cabí naca dxi'a,
 en nitú le nachë' yödzöhuë' bití' tsu'u lidxu',
 11 tu' cu'u cazë' Dios li' lu ná'agaquië' gubáz lá'ayi queë',
 para ilún chí'ë li' gátí'tés ga ridó'.
 12 Lu ná'agaquië' ila'chë'ë li',
 para cabí tsójchégu'u guiöj.
 13 Uléaj ulibu' bédxi guíxi', en bëla sínia'.
 Usunu' lé'e labu' bédxi guíxi'do', en bëla xitsiní'.
 14 Rnnë' Dios: "Nadxi'inë' neda', ate' que lé ni na' usóla' lé'.
 Uzóa'-në' tsax xitsá'tërö tu' núnbë'ë La'.
 15 Ulidzë' neda', ate' ubí'a didza'.
 Sóalena' lé' cate' bi gaca queë'.
 Usóla' lé', en guna' lé' bal.
 16 Uzánda'a dza soë' ibanë',
 en uluf'ida'-në' ca gaca usóla' lé'."

92

1 ¡Bica' tsahui' naca rigú'utu' Li' yöl-la' ba, Xan,
 en rúl-latu' le tun Li' bal, Dios nayépisëtërë',
 2 en rusiyöntu' bönachi yugu' zila ca ruhuéchi' ládXu'u netu',
 en ruluí'itu' lahui yugu' dzó' ca runu' ca rnna xtídzu'u!
 3 Rúl-latu' len yugu' bihuél-la,
 en rúl-latu' yugu' le lachi ca tul-la.
 4 Le zXón nunu' Li', Xan, run ga rudzéjatu',
 ate' ruzi'tu' xibé le núngaca lu no'ó.
 5 Bica' zXón náçagaca le nunu' Li', Xan.
 Zxöntërö le rizá' ládXu'u gunu'.
 6 Zoa tu le cabí gaca inöziné' bönni' naxí icjè',
 en biti' gaca tséjni'inè' bönni' canöz le.
 7 Nupa nucá'anagaca Dios ila'yán ca ta'yán guíxi'dó',
 en ulu'zì' xibé le tun nupa tuá' dö', pero ila'niti tsaz,
 8 tu' nayépsëtëru' Li' tsaz, Xan.
 9 Naca bē' le gaca quégaca nupa biti' ta'lé'e Li' dxi'a, Xan.
 Naca bē' ila'niti nupa biti' ta'lé'e Li' dxi'a.
 Ulu'gá'ana cá'asö yúgu'tè nupa tuá' dö'.
 10 Nunu' ga nácatëra' nal-la ca náçaba' bēdxi.
 Nagú'u neda' le za le run ga rudzéjada'.
 11 Ilé'e quézida' cate' uxicju' nupa biti' ta'lé'e Li' dxi'a,
 en yönda' cate' ila'bödxi yechi' nupa tuá' dö', nupa na' ta'díl-lalen neda'.
 12 Ila'yán nupa náçagaca tsahui' ca ta'yán yaga zina' ca'.
 Ila'zXón ca ta'zXón yaga rö'gaca lu guí'a Líbano.
 13 Náçagaca ca yaga nudá'gacu' ra' yu'u lidXu', Xan,
 le ta'zXón lu lö'a lataj quiu', Dios queétu'.
 14 Cate' ni' yú'ugaca iz zían ila'bia le zXixi quéguequi.
 Iláčagaca tsutsu, en ila'cuá'tica'sö ya'a.
 15 Caní gaca para gaca bē' náquié' tsahui' Xanru', Nu run chí'i neda'.
 Biti' bi zóalen Lē' le cabí naca tsahui'.

93

1 ¡Rinná bē'ë Xanru!
 ¡Nácuē' yöl-la' ba zXón queē'!
 ¡Nácuē' zXē' Xanru', en núguiē' lē'ë yöl-la' unná bē'!
 ¡Nuzóē' tsutsu yödzólió, ate' biti' utá cuini!
 2 ¡Tsaz nuzú' tsutsu ga rö'u rinná bē'u, Xan,
 en zóatica'su' Li'!
 3 Riyasa ridxía nisa yugu' lu nísado', Xan.
 Riyasa ridxía nisa, en ru'u bö que.
 Riyasa ridxía nisa yugu' lu nísado', en yugu' lu yegu.
 4 Xanru' Dios yehua' yubá nápatërë' yöl-la' unná bē'
 ca bö ru' u lu nísado' le riyón ca guziú' rinnē,
 enca' ca le riyasa ridxía nisa lu nísado'.
 5 Tsaz naguixju' xibá quiu', Xan,
 ate' idú lá'ayi naca ga zoa cazu' Li'.
 Caní zóatica'sö na'a dza, en dza si' zaca.

94

1 Nacu' Dios, Xan, Nu ruzí' lēbi bönachi.
 Buluí'i cuinu', Dios, Nu ruzí' lēbi.
 2 Ruchi'a rusörö cazu' yúgu'tè bönachi.
 Guzé, ate' len yöl-la' huáca zXón quiu' bubí'i quégaca nupa tun ba zXón cuínguequi.
 3 ¿Gáca'xte caz ulu'zì' xibé nupa tu'cá'ana Li', Xan?
 ¿Gáca'xte caz ulu'zì' xibé?
 4 ¿Gáca'xte caz ilún ba zXón cuínguequi, en iluí'i didza' zi'?
 ¿Gáca'xte caz ilún ba zXón cuínguequi ní'a que dö' tuá'gaca?
 5 Tu'sunítiē' nupa néquiguequi quiu', Xan.
 Tu'saca' zì'ë nupa néquiguequi quez quiu'.

6 Tútigaquië' nigula uzëbi, enca' yugu' bi'i uzëbido',
en tunë' le naca xihui' ladaj bônachi zi'tu'.

7 Ta'nnë': "Biti' il'é'enë' Xángaquië' rë'u,
en biti' ruí' i lãdxë'ë Dios queë' Jacob lë ni."

8 Guli'tséajni'i, bônachi biti' nõzguequi,
ate' libí'ili', bônachi catún bal, ¿bátaxi tséajni'ili'?

9 Benë' Dios guiði nágaru'. ¿Naru' cabí riyón quézinë'?

Benë' Dios guiðj loru'. ¿Naru' cabí rilé'e quézinë'?

10 Ruzéajni'i quézinë' Dios bônachi yúgu'të yödzo.

¿Naru' cabí gunë' léguequi xiguia'?

Ruchiza cazë' icja lãdxí'do'oru' yöl-la' réajni'i.

¿Naru' cabí réquibe'enë' bi runli'?

11 Nöz quézinë' Xanru' yugu' le ta'zá' lãdxí'gaca bônachi.
Nözinë' canöz naca le ta'zá' lãdxí'gaca.

12 Bica' ba bönni' na' ruzéajni'i quézinu'-në', Xan,
en rusedi quézinu'-në' ca naca xibá naguixju' Li'.

13 Gunu' ga uzí' lãdxë'ë cate' bi gaca queë',
ga idxinrö dza tsú'ugaca yeru ba nupa tuá' dö'.

14 Biti' usán në'ë Xanru' bônachi queë',
en biti' ucá'anë' nupa néquiguequi quez queë'.

15 Ca naca le naca tsahui' uchi'a usöröë' rë'u le yúbölö,
ate' ulu'zí' xibé nupa nácgaca tsahui'.

16 ¿Nuzxi caz tíl-lalen nupa tuti bônachi para gácalen neda'?

¿Nuzxi caz gácalen neda' cate' nacuá' nupa tuá' dö' quia'?

17 La'tu' cabí gúcalenë' Xanru' neda',
la' yöjtsú' utea' lataj chul-la que yöl-la' guti.

18 Gunnía': "Chizóa' ibixa",
ate' lu yöl-la' dxi'i lãdxí' quiu' guzxönu' neda', Xan.

19 Cate' ruúbi ruguí' i lãdxí'da'ahua',
ruhuë' tsahú'u neda', en runu' ga rudzëjada'.

20 Biti' ca' gunu' tsözxön nupa tu'chí'a tu'sörö netu' ca naca le cabí naca tsahui',
nupa na' tu'béaj tsahui' le cabí naca tsahui'.

21 Tu'dubë' tsözxön para ilútië' nupa nácgaca tsahui',
en ta'chúguië' quégaca nupa biti' bi nabága'gaca ilátigaca,

22 pero run chí'i cazë' Xanru' Dios neda'.

Nuzóë' neda' tsutsu, ate' ruzxöni lãdxa'a lë'.

23 Ubi'ë quégaquië' ca naca dö' tu'ë,
en usunítie' légaquië' tu' nözi xiguia' nabága'gaquië'.

Usunítie' dërö Xanru' Dios légaquië'.

95

1 Guli'dá, gúl-laru' queë' Xanru' lu yöl-la' rudzeja queëru'.

Lu yöl-la' rudzeja queëru' cödxi'aru' que Nu na' naca ca tu guiðjto'o ga nuláru'.

2 Uyéajru' lahuë', en guiëru'-në': "Xclenu'."

Lu yöl-la' rudzeja queëru' cödxi'aru' lahuë', gúl-laru' yugu' salmo.

3 Xanru' Dios náquië' Dios nayépisëtë're'.

Nápatë're' yöl-la' unná bë' ca yúgu'të dios izá'a.

4 Lu na' cazë' yu'u le ðë ga rë' zxan luyú,

ate' néquiguequi ca' queë' guí'a sibi.

5 Nequí queë' nísado', tu' nun cazë' le,

en len ná'asë' benë' luyú bidxi.

6 Guli'dá, gunru'-në' zxön, en uzóa zxibiru' lahuë'.

Uzóa zxibiru' lahuë' Xanru' Nu ben rë'u.

7 Naca cazë' Lé' Dios queëru',

ate' nácaru' bônachi rugagu cazë', en ca bö'cu' zxila' richë' cazë'-ba' lu në'ë.

Rnna cazë' Dios: "Na'a, channö rë'ënili' yónili' chí'a,

8 biti' gunli' zidzaj icja lãdxí'do'oli' ca gulunë' xuz xtó'oli' lataj na' lë Meriba,
en calëga ca gulunë' la' guixi' ga ðë lataj lë Masa,

⁹ cate' ni' gula'zì' bē'è xuz xtó'oli' neda'.

Gula'zì' bē'è neda' sal-la' bila'lé'enē' yugu' le bena'."

¹⁰ Idú choá' iz gúquida' zì' bônachi gula'cuá' dza ni',
ate' gunniá': "Ta'chixi ta'níguinē' lu icja ládxi'do'gaquiē',
en bití' nözguequinē' le rē'ènda' ilunē'."

¹¹ Que lē ni na' lu yöl-la' rilē quia' bena' tsutsu xtídza'a,
gunniá': "Bití' ca' ila'yáziē' ga ulu'zì' ládxe'è tsözxon len neda'."

96

¹ ¡Guli'gul-la queē' Xanru' tu le cubi!

¡Guli'gul-la queē' Xanru', yúgu'tēli' zóali' yödzölió!

² ¡Guli'gul-la queē' Xanru'! ¡Guli'gún zxön lē'!

Tu dza tu dza buli'siyön bônachi didza' dxi'a ca rusölē' rē'u.

³ Buli'siyön bônachi yúgu'tē yödzö yöl-la' ba queē'.

Buli'siyön yúgu'tē bônachi le nácagaca zxön nunē'.

⁴ Zxöntērö náquiē' Xanru', ate' runda' bayúdx cú'uru'-nē' yöl-la' ba.

Ral-la' gádxitēru' Lē' ca tadxì bônachi izá'a dios quéguequi.

⁵ Yugu' dios quégaca bônachi izá'a nácagacasó budó' guiój budó' yaga,
pero Xanru' Dios nunē' lúzxiba xítsá'.

⁶ Nacuá' yöl-la' bení', en yöl-la' ba lahuē' Lē'.

Nacuá' yöl-la' huáca, en yöl-la' lachi ga zoa cazē'.

⁷ ¡Guli'cu'è Xanru' yöl-la' ba, bônachi yúgu'tē yödzö!

¡Guli'cu'è yöl-la' ba, en yöl-la' huáca!

⁸ ¡Guli'cu'è Xanru' yöl-la' ba ni'a que Lē'!

¡Guli'guá' le unödzjali', en guli'dá lahuē'!

⁹ ¡Guli'gún Lē' zxön, náculi' le naca ba'a!

¡Guli'zxizi lahuē', bônachi idútē yödzölió!

¹⁰ Guli'nná lógaca bônachi yúgu'tē yödzö: "Rinná bē'è Xanru'.

Naguixjē' tsaz luyú, ate' bití' utá cuini.

Ca naca le naca tsahui' uchi'a usöröē' quégaca yúgu'tē bônachi."

¹¹ Ral-la' udzeja lúzxiba, en ulu'zì' xibé luyú.

Ral-la' cöldxi'a nísado', en ila'bödxì yúgu'tē le nacua' lu nísado'.

¹² Ral-la' udzeja guixi' caz, en yúgu'tē le nacua' la' guixi'.

Lu yöl-la' rudzeja quéguequi ilúl-la yaga

¹³ lahuē' Xanru', tu' si' ulé'.

Guidé' duchí'a dusöröē' nupa nacua' yödzölió.

Ca naca le naca tsahui' uchi'a usöröē' quégaca yúgu'tē bônachi,

enca' quégaca bônachi yúgu'tē yödzö para ilunē' ca rnna xtídzē'è.

97

¹ ¡Rinná bē' cazē' Xanru' Dios!

¡Ral-la' ulu'dzeja bônachi idútē yödzölió!

Buli'sí' xibé', libí'ili' zóali' yúgu'tē yödzö izá'a.

² Ró'gaca böaj, en le chul-la idú gásibi'ilö ga na' zoē'.

Le naca dxi'a, en le naca tsahui' tu'zóa tsutsu le rinná bē'è.

³ Rinöru tu guí' zxön lahuē',

le uzegui' nupa ta'dá'baga' Lē'.

⁴ Tu'zení' le ta'yēpi yösa yödzölió.

Rilé'e luyú lē ni, en rizzixi.

⁵ Tu'úna' guí'ado' ca ruún bidxina' buz lahuē' Xanru'.

Náquiē' Xani idútē yödzölió.

⁶ Lúzxiba xítsá' naca bē' náquiē' tsahui',

ate' ta'lé'e bônachi yúgu'tē yödzö yöl-la' zxön queē'.

⁷ Tu'tuí' yúgu'tē nupa tun zxön budó' guiój budó' yaga,

nupa na' tun ba zxön cúinguequi ni'a quégaca budó' quéguequi na'.

Ulu'gá'ana cá'asó yúgu'tē dios quégaca bônachi izá'a lahuē' Xanru'.

⁸ Bila'yöni bônachi Sión, en bulu'dzeja,

enca' yugu' xzí'ini xí'sóë' Judá.

Tu'dzéjanë' ca ruchi'a rusóröu' netu', Xan.

⁹ Nayépisëtë'rö cazu' Li', Xan, ca yúgu'të nupa nacuá' yödžölió.

Nayépisëtë'rö cazu' Li' ca yúgu'të dios quégaca bönachi izá'a.

¹⁰ Núlöli' nadxí'ili'-në' Xanru', guli'guequi zi' le naca dö'.

Run chí'i cazë' bö' nácacaca caz nupa néquiguequi queë'.

Rusölë' léguequi lu ná'agaca nupa tuá' dö'.

¹¹ Ruzení'tica'sö bení' queë' nupa nácacaca tsahui',

ate' tu'zí' xibë' nupa nácacaca dxi'a.

¹² ¡Buli'sí' xibë' Xanru' núlöli' nácali' tsahui'!

¡Buli'subán ládxi'li' ca nunë' Dios Lá'ayi, en guli'cu'ë yöl-la' ba!

98

¹ ¡Guli'gul-la queë' Xanru' tu le cubi,

tu' nunë' le tun ga rubániru'!

Len yöl-la' unná bë' zxön queë', en yöl-la' huáca lá'ayi queë' nadéli'në' lu gudil-la.

² Nunë' Xanru' ga naca bë' le nadéli'në'.

Nulu'ínë' bönachi yúgu'të yödžö náquië' tsahui'.

³ Len yöl-la' dxi'li' ladxí' queë', en yöl-la' li ladxí' queë'

benë' ca rnna xtídzë'ë le guzxí' lu në'ë gunë' quégaca bönachi Israel.

Bila'lé'e bönachi iduté yödžölió ca busölë' rë'u Dios queëru'.

⁴ ¡Lu yöl-la' rudzeja queëli' guli'gul-la queë' Xanru', yúgu'tëli' zóali' yödžölió!

¡Idú ládxi'li' guli'cu'ë yöl-la' ba, en guli'gul-la queë' le naca lá'ayi!

⁵ ¡Guli'gul-la queë' Xanru' yugu' salmo, en guli'quinnaj yugu' bihuël-la!

¡Guli'quinnaj lé'egaca arpa, en guli'gul-la yöl-la' ba queë'!

⁶ ¡Guli'cödxí lúzugacaba' chivo, en lúzugacaba' bëdxi

lahuë' Xanru' Dios, Nu rinná bë'!

⁷ ¡Buli'lidza zidzaj, nísado', en yúgu'të le nacuá' nisa na'!

¡Guli'gul-la yödžölió, en yúgu'të nupa nacuá' ni'!

⁸ ¡Guli'capa' ná'ali', yugu' yegu,

ate' lu yöl-la' rudzeja queëli' guli'gul-la lahuë' Xanru', libí'ili', gu'ado',

⁹ tu' zë'ë duchí'a dusóröë' quégaca bönachi yödžölió!

Ca naca le naca tsahui' uchi'a usöröë' quéquequi,

en ca naca le naca dxi'a tsahui' inná bé'enë' yúgu'të bönachi.

99

¹ ¡Rinná bë'ë Xanru' Dios! Ta'xzizi yúgu'të bönachi.

Rö'ë rinná bë'ë ladaj nupa nápagacatë'rö yöl-la' huáca,

lé'gaca Querubín, ate' ríxzizi luyú.

² Nayépisëtë'rë' Xanru' lu yödžö Sión,

ate' rinná bé'enë' bönachi yúgu'të yödžö izá'a.

³ Ral-la' ila'gú'u Lë' yöl-la' ba yúgu'të bönachi,

tu' caní sa'yéaj, en le run ga runru' Lë' bal.

¡Lá'ayi náquië' Lë'!

⁴ Nadxí'i quézinu' le naca tsahui', Li', Bönni' unná bë' nayépisë.

Tsaz naguixju' le naca dxi'a tsahui'do',

en nuzú' quégaquië' xzí'ini xí'sóë' Jacob le naca tsahui', en le naca iduté li.

⁵ ¡Guli'gún zxönë' Xanru' Dios!

Buli'zechu zxíbili' lahuë' Lë' ga rö'ë rinná bë'ë.

¡Lá'ayi náquië' Lë'!

⁶ Guláquië' Moisés, en Aarón bixúz queë',

ate' benë' Samuel tsözxön nupa gula'yéaj ládxi'gaca Lë'.

Bulu'lidzë' Xanru', ate' bubí'i cazë' didza'.

⁷ Tu lu böaj bé'lenë' légaquië' didza'.

Gulunë' ca ta'nná bë' xibá queë', en yugu' le gunná bé'enë' légaquië'.

⁸Bubi'u didza' lógaca bönachi quiu', Xantu' Dios.
Bulu'ínu' légaquié' nacu' Dios, en runiti lo' bönachi,
pero rubi'u quégaquié' ca sa'yéaj dö' tu'ë.

⁹¡Guli'gún zxöné' Xanru' Dios!
¡Buli'zechu zxíbili' lahui' lo guí'a lá'ayi ga zoa cazé',
tu' náquié' lá'ayi Xanru' Dios!

100

¹¡Lu yöl-la' rudzeja queéli' guli'gul-la queé' Xanru',
libí'ili' zóali' iduté yódzölió!
²¡Lu yöl-la' rudzeja queéli' guli'cu'ë yöl-la' ba Xanru'!
³Guli'dá lahué' Lë', en lu yöl-la' rudzeja queéli' guli'gul-la queé'!

Buzá' cazé' re'u, en caléga rácasö queéru' zóaru'.
Nácaru' bönachi queé', en nácaru' ca bö'cu' zxila' queé'.
⁴Guli'tsaza zaca'ra' yu'u queé', guiéli'-né': "Xclenu'."
Guli'tsaza gapa naca lö'a queé', cú'uli'-né' yöl-la' ba.
Guli'guié': "Xclenu'", en guli'guné' zxön.

⁵¡Náquié' dxi'a tsahui' Xanru' Dios, ate' zóatica'sö yöl-la' dxi'i ladxi' queé'!
¡Zóatica'sö yöl-la' run ca rnna xtídzé'ë queé'!

101

¹¡Gul-la' ca runu' ca rnna xtídzu'u, en ca nacu' tsahui'!
¡Gul-la' yöl-la' ba quiu' Li', Xan!

²Güf'i ládxa'a guna' le naca idú dxi'a.
¿Bátaxi hué'cju' quia' neda?
Lu yu'u lidxa' guna' le naca idú ladxi'.
³Biti' gu'a lataj sóalen neda' nitú le naca xihui'.
Biti' rilé'eda' dxi'a le tun nupa tu'cá'ana Li'.
Biti' ca' guna' léguequi tsözön.
⁴Biti' ca' gaca' chopaladxi'.
Biti' ca' guna' le naca dö'.
⁵Usunítia' dërö nu bönni' rinné' que luzé'ë balándo'os.
Biti' ca' guá' ilena' nu run ba zxön cuini.
⁶Uyúa' dxi'a tsáhu'ido' nupa tun ca rnna xtídzagüequi luyú ni, para ila'cuá'len neda'.
Nu bití' bi xiguia' nabaga' huáca gun xichina'.
⁷Biti' ca' tsöjsóa lidxa' nu rizí' yé'.
Biti' gu'a lataj ugá'ana lahua' nu ru'f'i didza' le cabí naca.
⁸Yugu' zila usunítia' yúgu'té nupa tuá' dö' luyú ni,
para ucuita' lu yódzö queé' Xanru' yúgu'té nupa tuti bönachi.

102

¹¡Buzé' nagu' le rulidza' Li', Xan!
¡Bë' lataj idxín lo' le rinaba yúdxida' Li'!
²Biti' ucache' cuinu' lahua' cate' bi rusaca' zi' neda'.
Buzé' nagu' neda', en gudáchi ubi'u didza' cate' rulidza' Li'.

³Yöl-la' na'bán quia' ruúlu ca dzön,
ate' régui rilá lu dxita lu bin quia' ca tu guí'.
⁴Rudú ládxa'a ca raca que guíxi' nabidxi,
en bití'rö rizé ládxa'a bí gahua'.
⁵Tu' rinnéda' ládxa'a nadxítalé'a.
⁶Naca' ca tuba' biguínni zóaba' luyú bidxi,
o ca tuba' cuturú dxíaba' tu lu yu'u nadachi.
⁷Nabéaj yéla guió'j lahua',
ate' naca' ca tuba' biguínido' dxíaba' túziba' ícjo'o yu'u.
⁸Yugu' dza nupa bití' ta'lé'e neda' dxi'a tu'didza' yudxi neda'.
Nupa tu'titaj neda' tu'gún dxin la' cate' nu tu'dxía dö'.
⁹Naca le rahua' ca dódo'sö,

en nutsi' nisa ribödxá' le rë'ja'.

¹⁰ Caní raca quia' tu' rilenú' neda' zi'.

Gulisu' neda', en gurú'unu' neda' tsölá'aló.

¹¹ Naca yöl-la' na'bán quia' ca tu zxul-la rilá' cate' ribía gubidza,

en rudú quia' ca raca que guixi' ricuádi.

¹² ¡Li', Xan, zóatica'su',

en zóaléntica'só Lo' bönachi!

¹³ ¡Chasu', en huéchi' ládXu'u bönachi yödZö Sión!

¡ChibidXín dza güf'i ládXu'u léguequi!

¡Ön, chibidXín dza na'!

¹⁴ Netu', huen dxin quiu', nadXí'itu' yugu' guiöj nacua' lu zö'ö run chi'i yödZö Sión,

en ruí'i ládxi'tu' ga rídxinté bëchtö rö'ö la' nöza que.

¹⁵ Bönachi yugu' yödZö izá'a iladxi Lë' Xanru',

ate' nupa ta'nná bë' yödZölió iladxi yöl-la' zXön queë'.

¹⁶ ¡Nuchisë' Xanru' caz yödZö Sión,

ate' uluf'i lahuë' ni' lu yöl-la' zXön queë'!

¹⁷ Riyönnë' le tu'lidza Lë' nupa ta'yadzaj ta'yudxi.

Biti' ca' uzöë' tsölá'aló le tu'lidza yudxi Lë'.

¹⁸ Buli'zúaj lë ni lu guichi para ulu'laba zXí'ini xi'sóali' le,

ate' nupa si' ilalaj ila'gú'u Xanru' yöl-la' ba.

¹⁹ Ga ni' ribözë' Xanru' xitsá' lu lataj lá'ayi queë',

ga ni' zoë' Xanru' yehua' yubá, ruzé' naguë'.

²⁰ Riyönnë' le ta'nnë' ladxi' nupa nadZúngaca,

en usanë' nupa narugu queguequi ilátigaca.

²¹ Soa nu usiyöni bönachi yödZö Sión ca naca Lë' Xanru',

ate' ila'gú'u Lë' yöl-la' ba lu yödZö Jerusalén,

²² cate' ulu'dubi tsözxön bönachi yugu' yödZö izá'a,

en bönachi yugu' luyú,

ate' tsözxön ila'gú'u yöl-la' ba Xanru'.

²³ Benë' Xanru' ga gucuídi'da' la' nöza,

en nunë' ga soa' nabábasö dza.

²⁴ Gunnía': Dios quia', biti' gútiu' neda'

cate' ni zoa' gatsaj iza ral-la' soa' ibana'.

Zóatica'só cazu' Li'.

²⁵ Dza ni'te gudixju' yödZölió,

ate' len na' cazu' benu' lúzxiba.

²⁶ Huadódi queguequi, pero Li', tsaz idi'u.

¡lexu' yúgu'tëguequi ca riyexu' lari',

en ca tu lari' utubu' léguequi, en utsó'o léguequi.

²⁷ Li', biti' ca' utsá' cuinu', en biti' ca' guexu'.

²⁸ ZXí'inigaca huen dxin quiu' ila'böza dxi'a tsáhui'do',

ate' ucú'u tsutsu zXí'ini xi'sóagaquië' lo'.

103

¹ ¡Bil-la yöl-la' ba queë' Xanru', li', bö' naca caza',

ate' idütë le naca', bil-la yöl-la' ba que Lë' lá'ayi!

² ¡Bil-la yöl-la' ba queë' Xanru', li', bö' naca caza',

en biti' gal-la ládXu'u yúgu'të le ruzi'u xibë'!

³ Runiti lo cazë' neda' ca naca yúgu'të dul-la' nabága'a,

en rugüë' yúgu'të xihuë'a.

⁴ Ruhuoá'uë' neda' lu lataj chul-la,

en ruzá' ládXë'ë quia' yöl-la' dxi'i ladxi', en yöl-la' ruhuéchi' ladxi'.

⁵ Rigu'ë xinöza' yugu' le naca dxi'a,

lë na' run ga ruhuoáca' ca tu bönni' zoë' iz cuidi' queë',

ca na' raca queéba' bisía'.

⁶ Runë' yugu' le naca dxi'a,

en ruchí'a rusöröë' quegaca yúgu'të nupa zoa nu rusaca' léguequi zi'.

7 Buzéajni'inè' Moisés yugu' le gun cazè' Lè',
 en buluí'inè' bônachi Israel yugu' le zxôn runè'.
 8 Xanru' ruhuéchi' ladxi' cazè' bônachi, en ruzá' ládxcè'è quéguequi.
 Biti' riléténè', pero nadxí'itiqui'sinè' léguequi.
 9 Biti' ruzétiqui'sinè' rè'u le bach,
 en bití' rilétiqui'sinè'.
 10 Biti' runè' rè'u xigua' ca sa'yéaj dö' nuá'aru',
 en bití' rubi'è queèru' ca naca le xihui' nabágaru'.
 11 Naca caní tu' ca na' naca xitsá'tèrö lúzxiba ca luyú ni,
 la' canísö naca zxôn ca nadxí'inè' Xanru' nupa tadxi Lè'.
 12 Tsca nácatèrö zi'tu' ga rilén gubidza ga ridxintè ga ribía,
 la' canísö rucuitè' yugu' le ta'bágaru' Lè'.
 13 Ca na' ruhuéchi' ládxcè'è xúzgaca cázabi' yugu' zxi'inè',
 la' canísö ruhuéchi' ládxcè'è Xanru' nupa tadxi Lè'.
 14 Caní runè' tu' nōzinè' le nácaru'.
 Röjnenè' néquiniru' bëchtö yu.
 15 Tsca nácgaca dza zóaru' nabanru',
 nácgaca ca raca que xiyija guíxi'do'.
 16 Cate' recaj bö', ruúlu runítisö xiyija na',
 en bití' naca bë' ga na' guzóa.
 17 Xanru', tsaz nadxí'inè' nupa tadxi Lè',
 en runè' quégaca zxi'iniguequi le naca dxi'a.
 18 Caní runè' quégaca nupa tun ca rnna xtídzè'è,
 en quégaca nupa tun ca rinná bë' xibá queé'.
 19 Naguixjé' Xanru' xilatjé' yehua' yubá ga na' rö'è rinná bë'è.
 Rinná bé'enè' yúgu'tè le dè.

20 jGuli'cu'è yöl-la' ba Xanru', libí'ili', gubáz lá'ayi queé',
 nápatèröli' yöl-la' huáca zxôn, en runli' ca rnna xtídzè'è,
 libí'ili' na' runli' ca rnna didza' ru'è!
 21 jGuli'cu'è yöl-la' ba Xanru', libí'ili' nácali' ni'a nè'è guizxi yu,
 libí'ili', huen dxin queé' na', runli' ca rē'ēni quézínè' Lè'!
 22 jGuli'cu'è yöl-la' ba Xanru', yúgu'téli' na' nucu'è libí'ili',
 libí'ili' zóali' yúgu'tè lataj ga na' rinná bë'è Lè'!
 jBil-la yöl-la' ba queé' Xanru', li', bö' naca caza'!

104

1 jGulu'è yöl-la' ba Xanru', li', bö' naca caza'!

jNayépisètèru' Lì, Xana' Dios!
 jZxo' nacu' naca yöl-la' zxôn, en yöl-la' ba!
 2 jNusubaga' cuínu' bení' ca zxo' nacu' cazu',
 ate' naguixaj cazu' lúzxiba ca tu lari' zxôn!
 3 Naguixju' xilataj lidxu' lahui nisa dè xitsá'alö.
 Dxía cazu' lu böaj ca tu lu carreta, en ridó' lu bö'ös.
 4 Rugunu' dxin bö' raca ca tu gubáz quiu',
 enca' yugu' guí' ca huen dxin quiu'.
 5 Nuzú' tsutsu luyú ni lu xilibi,
 en bití' ca' gaca nu utsá' xilataj.
 6 Gudixju' nisa zxôn luyú ni ca tu lari' nabaga' le,
 ate' yōjbaga' nísado' na' yugu' guí'a.
 7 Buzenu' le bach nisa na', ate' burúaj,
 en cate' biyön chí'u, bayúdx buzunnaj nisa na'.
 8 Gurén yugu' lu guí'a, en bōtaj ga naca ra' yegu,
 ga bidxintè yōjsóa ga nupó'o que nisa na'.
 9 Gudixju' buzá' que nísado' ga bití' gaca tōdi.
 Bítirō caz tseajbaga' nisa na' luyú bidxi.
 10 Runu' ga ralaj beaj yugu' lé'e guí'ado',
 enca' ga ta'dōdi yegu ga rō'ögaca rōga'.
 11 Yudzu yugu' yegu na' nisa té'ajba' bōa' guixi',
 le rugúa yöl-la' ribídx quégacaba' burro ta'dásiba' la' guixi'.
 12 Yugu' ra' yegu rō'ögaca yaga ga tu'dxiaba' biguínmido' xcá'agacaba',

en túl-laba' yugu' lu ni'a nê'eguequi.

¹³ Rigú'u nisa guió'j quiu' yugu' lu guí'a,
en runu' ga tu huóla tu'dzé'e yugu' le dzö'ö luyú.

¹⁴ Runu' ga rixón yô le táguba' böa' bédx,
en yugu' cuan guixi' tu'gún dxin bönachi,
le ilagu ni'a que le nudó'o luyú,

¹⁵ en xisi uva le run ga tudzeja ládxi'guequi,
en za olivo le ta'gú'u láhuiguequi lu yöl-la' ruzí' xibé quéguequi,
en yöta le nabániguequi.

¹⁶ Tu'zí' xibé nisa guió'j yaga cedro dzö'ö lu guí'a Líbano,
yugu' yaga na' budó'o, Xantu'.

¹⁷ Ni' tu'dxiaba' biguínmi xcá'agacaba',
ate' tunba' biyúz lédxigacaba' ni'.

¹⁸ Nunu' Li' yugu' guí'a sibi ga dzö'öba' bdxina' guixi',
enca' yugu' znan bulóaj gapa tapa chí'i cuíngacaba' bizxidxu'.

¹⁹ Benu' beo' le naca bé' yugu' beo' que iz,
ate' ribía gubidza ga ral-la' cuía.

²⁰ Benu' chí'i dzö'ölo, en cate' naca chul-la
ta'rúajba' ta'daba' böa' guixi'.

²¹ Ta'bödxi'aba' bédxi guíxi'do, ta'zóa régu'ba' le ila'zónba'.
Tu'guílajba' le nuzóé' Dios iláguba'.

²² Cate' rilén gubidza tu'dxinba' lédxigacaba',
en röjoxagacaba' yugu' lu znan bulóaj quégacaba'.

²³ Ní'iró ta'rúaj bönachi sôjaca huen dxin,
en tun caz dxin ga ridxinté ribía gubidza.

²⁴ Xan, zíánterö yugu' le nunu' Li'.
Len yöl-la' réajni'i zxon quiu' nunu' yúgu'té.

Nalí luyú yödölió ni yugu' le dxi'a nunu'.

²⁵ Ni' zoa nisa nácatërö zxon,
ga na' nacua'aba' böa' guizxi yu,
böa' cuidi', enca' böa' zxon.

²⁶ Ni' ta'dódi barco zxon,
enca' böa' zxon léba' leviatán, böa' na' nuzóa cazu'.

²⁷ Yúgu'téba' ta'bözaba' Li',
cate' idxinrö ugagu' légacaba'.

²⁸ Rugagu' légacaba', ate' táguba'.
Runödzu' le iláguba', ate' tu'huóla' ta'dzé'eba'.

²⁹ Cate' ruhuecju' quiu', tádxiba',
en cate' ruzi'u bö' quiu', tátiba',
en ruhuóáca yu le néquinigacaba'.

³⁰ Cate' rigú'u légacaba' bö', nabángacaba'.
Rucubu' yúgu'té le nacua' yödölió.

³¹ ¡Ral-la' gácatíca'sö yöl-la' ba queé' Xanru'!
¡Ral-la' ila' yaza ládxi'tíca'sö bönachi le nun cazé' Lë'!

³² Ruyúé' Xanru' luyú, ate' rixxizi.
Rigané' yugu' guí'a, ate' rirúaj dzön.

³³ ¡Gul-la' queé' Xanru' yúgu'té dza soa' ibana'!
¡Gul-la' yöl-la' ba queé' Dios tsanni ni zoa' nabana'!

³⁴ ¡Zxixi naca le rízá' ládxa' ca naca queé'!
¡Udzéjalenda-né' Xanru'!

³⁵ ¡Ia'nítié' bönni' dul-la' nacu'é yödölió ni,
en bíti'rö ila'cuá' nupa tuá' dö'.

¡Gulú'u yöl-la' ba Xanru', lí', bö' naca caza'!
¡Yöl-la' ba Lë' Xanru'!

105

1 ¡Guli'guíé' Xanru' Dios: "Xclenu'!"
¡Buli'lídzé' Lë'!

¡Buli'siyón bônachi ca nácagaca le benë'!

² ¡Guli'gul-la queë'! ¡Guli'gul-la yöl-la' ba queë'!

¡Guli'gú' didza' ca nácagaca le zxön nunë'!

³ ¡Buli'sí' xibé Lë' lá'ayi!

Ral-la' ulu'dzeja ladxi' yúgu'të nupa ta'guilaj Xanru'.

⁴ Guli'guiljé' Xanru', enca' yöl-la' huáca queë'.

Guli'gú' ládxi'tica'sö idxinli' lahuë'.

⁵ Guli'tsöjné le nácagaca zxön benë' Lë',

lë na' tun ga rubániru', enca' ca nácagaca didza' bë'ë cate' buchi'a busöröë' bônachi,

⁶ libí'ili', xzí'ini xí'sóé' Abraham, huen dxin queë' Dios,

en libí'ili', xzí'ini xí'sóé' Jacob, nácali' nupa guró cazé' queë'.

⁷ Lë' náquië' Xanru' Dios.

Idútë yödzólió naca bë' ca buchi'a busöröë' bônachi.

⁸ Röjnétiqú'sinë' didza' dzaga nunë',

didza' na' gunná bë'ë ila'zí' lu ná'agaquië' chi gayuá' cö' xzí'ini xí'sóé' Abraham,

⁹ didza' dzaga na' benlenë' Abraham,

le naca didza' na' benë' tsutsu Dios ca gunë' queë' Isaac.

¹⁰ Ní'irö benë' tsutsu didza' na' lahuë' Jacob,

le naca tu le rinná bé'enë' lë' gunë',

para gaca quégaca bônachi Israel tu didza' dzaga le zoa tsaz.

¹¹ Gunnë': "Gunna' queéli' xiyúgaca bônachi Canaán,

le guequi tsaz queéli', en quégaca xzí'ini xí'sóali'."

¹² Caní gunné' Dios cate' ní' gula'cu'ë nabábagaquië' bönni' Israel.

Tu chópasë' guláquië', en guláquië' bönni' zí'tu' luyú.

¹³ Gula'dé' tu ia'tú yödzó izá'a.

Bulu'zë'ë tu ga nu gunná bë', en bila'dxinë' ga nacua' bônachi izá'a,

¹⁴ pero biti' bë'ë lataj Dios nu usaca' zí' bônachi queë' na',

en buzenë' le bach bönni' gula'nná bë'ë para gulácalenë' bônachi queë'.

¹⁵ Gunnë': "Biti' bi gunli' quégaca bônachi nabö caza' quia',

en biti' bi dö' guá'ali' quégaquië' bönni' tu'ë didza' uláz quia'."

¹⁶ Benë' ga guyú'u gubín yödzólió,

en benë' ga biyadzaj yöta ilahuë'.

¹⁷ Gusól-lë'ë tubi' bi'í bönni', bi'í bidxinbi' ní' zí'alö ca légaquië',

tu' gulúti'ë-bi' José para gácabi' bi'í nadó'o.

¹⁸ Gulúgui'ë bönni' Egipto ní'abi' len du guié,

en bulu'dé'ë yen ná'abi' bregui' guié,

¹⁹ ga bidxintë dza budxín xtídzë' Xanru',

tu' guzxí' bë'ë Xanru' Dios José na'.

²⁰ Ní'irö gusól-lë'ë bönni' gunná bë'ë luyú Egipto nu busán-bi'.

Bönni' na' gunná bé'enë' yödzó izá'a zían busólë'-bi'.

²¹ Benë' ga gúcabi' xan yu'u queë',

ate' guta' lu ná'abi' yúgu'të le dë queë' bönni' na' rinná bë'ë.

²² Guta' lu ná'abi' gulú'ubi' lidxi guié bönni' ta'nná bë'ë tsca rë'ëni quézibi',

para busédibi' bönni' gula queë' yöl-la' réajni'í.

²³ Ní'irö bila'dxin ca' bônachi Israel luyú Egipto.

Caní guca, guzóé' Jacob lu xiyúgaca xzí'ini xí'sóé' Ham.

²⁴ Benë' Dios ga gula'yánterö bônachi queë' luyú ní',

ate' guláquië' ziantërë' ca nupa gula'díl-lalen légaquië'.

²⁵ Benë' Dios ga gulunë' zí' bönni' Egipto bônachi queë'.

Lu yöl-la' banis quégaquië' gula'zí' yé'enë' nupa na' nácagaca huen dxin queë' Lë'.

²⁶ Ní'irö gusól-lë'ë Moisés, huen dxin queë', lógaquië',

enca' Aarón, bönni' na' nabö cazé' Lë'.

²⁷ Gulunë' chopë' ni zían yöl-la' huáca zxön queë' Dios lógaca bônachi Egipto na'.

Gulunë' zían yöl-la' huáca que yehua' yubá lu xiyúgaca xzí'ini xí'sóé' Ham.

²⁸ Gusól-lë'ë Dios le naca chul-la, ate' boáca chul-la lahu' dza,

en biti' guca ila'dá'baguë'ë xtídzë'ë.

²⁹ Benë' ga nisa yegu nacua' lu yegu quégaquië' boáca rön,

en benë' ga gulátiba' bôla dzö'öba' yugu' yegu na'.

³⁰ Gula'yanba' riu lu xiyúgaquië',

ga bidxintë gula'yázaba' yu'u lidxë' bönni' rinná bé'enë' légaquië'.

³¹ Bë'ë didza' Dios, ate' gulátsjaba' bôtsugayu guizxi yu,

en gulátsjaba' ca' bö'iyudo' idútë lu xiyúgaquië'.

³² Benë' ga gur'ö'ö guió'j bögui' yöla sunna uláz que nisa guió'j, ate' böxaj ca' guí' lu xiyúgaquië'.

³³ Gudítsjë' yugu' lubá uva quégaquië', en yugu' yaga higo, en busunítië' yaga r'ógaca lu xiyúgaquië'.

³⁴ Bë'ë didza', ate' bila'dxinba' böchi'zu guizxi yu, enca' böchi'zu hué'enido', cuntu nu gaca ulaba légaçaba',

³⁵ ate' guláguba' idútë guixi' cuan rö'ö lu xiyúgaquië', en guláguba' ca' idútë le naz nudá'agaquië' lu xiyúgaquië'.

³⁶ Benë' ga gulátibi' yúgu'tëbi' bi'i bönni' lo idútë lu xiyúgaquië'. Bi'i lo na' quégaquië' bönni' nál-la.

³⁷ Ní'irö bubéajë' Dios yugu' bönni' Israel luyú na', nuá'agaquië' dumí plata, en oro, ate' cuntu nu yó'jchegu' nu nutsa' légaquië'.

³⁸ Bulu'dzeja bönnachi Egipto cate' bulu'zë'ë bönni' Israel lu xiyúgaquië', ate' guladxi gula'dzöbi tu' nöziguequinë' bönni' Israel na'.

³⁹ Gusól-lë'ë Dios tu böaj le gulú'u bönnachi queë' zzul-la, ate' chi'i dzö'ölö gusól-lë'ë guí' le buzení' quégaquië'.

⁴⁰ Gula'nábinë' Lë', ate' gusól-lë'ë böra guixi'do' zían le ilahuë', en benë' ga bulu'huö'ljaj gula'dzé'enë' yöta que yehua' yubá.

⁴¹ Bulu'ë lahui tu guió'jto'o, ate' gulalaj nisa yégudo'. Gudödi nisa na' luyú bidxi ni' ca tu nisa yegu gubó'o.

⁴² Caní benë' Dios tu' yó'jmenë' didza' lá'ayi queë', le guzxi' lu në'ë gunë' queë' Abraham, huen dxin queë'.

⁴³ Bubéajë' bönnachi queë' lu yöl-la' rudzeja quéguequi, ate' lu yöl-la' rudzeja quéguequi gula'bödxí'a bönnachi gurö cazë' queë'.

⁴⁴ Bunödzejë' xiyúgaca bönnachi yugu' yödzo' izá'a quégaquië'. Bulu'zi'ë xibé le ilá' luyú ni'a que dxin gulún bönnachi izá'a na'.

⁴⁵ Caní benë' Dios para ilunë' ca rnna le gunná bé'enë' légaquië' ilunë', en ilunë' ca rinná bë' xibá gudixjë' Lë'.

jGuli'cu'ë yöl-la' ba Xanru'!

106

1 jGuli'cu'ë yöl-la' ba Xanru'!

jGuli'guië' Xanru': "Xclenu'" tu' náquië' idú dxi'a!

jZóatica'sö yöl-la' dxi'i ladxi' queë'!

2 jNuzki caz gaca quixjö' ca nácagaca le zxön nunë' Xanru', en uluf'i lahui ca naca yöl-la' ba queë'?

3 jBica' ba nupa tun le naca tsahui', nupa na' túntica'sö le naca dxi'a!

4 Yöjné neda', Xan, cate' ruzá' ládxi'u quégaca bönnachi quiu'.

Buzá' ladxi' quia' yöl-la' rusólá quiu',

⁵ para gaca ilé'eda' gata' yöl-la' tsahui' quégaca nupa narö cazu' quiu', en para gaca udzë'jalenda' bönnachi quiu' cate' tu'dzeja,

en para gaca uzí'lëna' xibé nupa néquiquequi quiu'.

⁶ Nuntu' dul-la' ca gulunë' xuz xtó'otu'.

Biá'atu' dö', en bentu' le naca xihui'.

⁷ Cate' gula'cu'ë xuz xtó'otu' luyú Egipto, biti' gula'yéajni'inë' le nácagaca zxön benu'.

Biti' yöjnéquequinë' yugu' le benu' quégaquië' lu yöl-la' dxi'i ladxi' quiu', pero gula'dá'baguë'ë xtídxu' cate' gula'cu'ë ra' nísado' lë Nísado' Xíná.

⁸ Busölë' Xanru' Dios légaquië' para gaca bë' runë' ca rnna xtídzë'ë, en para ulu'e lahui yöl-la' huáca zxön queë'.

⁹ Caní guca, buzenë' le bach Nísado' Xíná na', ate' la' gubídxitë.

Guchë'ë légaquië' ga rë'do' lu nísado' na', ate' gula'dé' lu yu bidxi ga na' gur'ö'ö nisa.

¹⁰ Caní guca, busölë' légaquië' lu na' nu na' benë' légaquië' zi', en buá'uë' légaquië' lu na' nu na' gudíl-lalen légaquië'.

¹¹ Ní'irö gubaga' nísado' na' nupa gula'sí regu' légaquië'. Cuntu nu bugá'ana nu bidzaga léguequi.

- 12 Ní'irō gula'yéajlè' bōnachi queè' xtídzè'è,
ate' gulul-la yōl-la' ba queè'.
- 13 Pero la' gulál-latè ládxi'gaquiè' yugu' le benè'.
Biti' gula'nábinè' Lè' uluí'inè' légaquiè' le ral-la' ilunè'.
- 14 Zían le gula'zé ládxi'è cate' ni' gula'cu'è la' guixi' ga dè lataj,
en gula'zì' bè'è Dios la' guixi' na'.
- 15 Ní'irō bè'è Dios quégaquiè' le gula'nábinè' Lè',
pero gosól-lè'è quégaquiè' tu yōdzōhuè' le bēti zíangaquiè'.
- 16 Cate' bulu'zè'enè' Moisés ga ni' gula'cu'è tsōzxōn,
en bulu'zè'enè' ca' Aarón, bōnni' nubéajè' Xanru' quez queè',
17 la' ná'asō guyalaj luyú, en bucachi' Datán.
Bucachi' ca' nupa gulún tsōzxōn Abiram.
- 18 Gulaj tu guí' zōn ga na' nudúbigaquiè',
en buzegui' nupa na' guluá' dō'.
- 19 Lu guí' a Horeb gulunè' tu bēdxido' néquiniba' oro,
en gula'yéaj ládxi'è budó' oro na'.
- 20 Caní guca bulu'cá'anè' Dios nayēpisētèrè',
para gula'yéaj ládxi'è budó' oro le naca ca tu bēdxi ráguba' guixi'.
- 21 Gulal-la ládxi'è Dios Nu busólá légaquiè'.
Lè' benè' zían le zōn le gulácalen légaquiè' luyú Egipto.
- 22 Benè' zían le tun ga rubániru' lu xiyúgaca xzí'ini xí'sóè' Ham,
en zían le tun ga rádxiru' Lè' le benè' ra' Nísado' Xíná.
- 23 Que lè ni na' gunnè' Dios usunítie' légaquiè', ate' la' cá'asō gunè'
la'tu' cabí guzuínè' Moisés, bōnni' rō queè', lahuè' Lè',
en buzóa dxiè' yōl-la' rilé queè' para cabí usunítie' légaquiè'.
- 24 Ní'irō bití' gulè'enè' ila'yáziè' luyú dxi'a na' dē lógaquiè'
tu' cabí gula'yéajlè'è xtídzè'è Dios.
- 25 Gula'nnè' zì'è queè' Dios gapa naca lu yu'u guídí quégaquiè',
en bití' bulu'zé náguie' chí'è Xanru'.
- 26 Que lè ni na' benè' tsutsu Dios xtídzè'è le bē'lenè' légaquiè',
gunnè' gunè' ga ilátie' ga na' naca la' guixi' ga dè lataj.
- 27 Gunnè' gunè' ga ilasi lásiè' xzí'ini xí'sógaquiè' ladaj zían yōdzō izá'a,
en gúsiè' légaquiè' gapa nacuá' bōnachi zì'tu'.
- 28 Ní'irō bulu'dōdi cuíngaquiè' lu na' budó' guíè' lè Baal-peor,
en gulahuè' xipéla'gacaba' bōa' guixi' gulútiè'-ba'
para gulunè' zōn yugu' dios nati.
- 29 Ca' guca, gulún lenè' Dios ni'a que le gulunè',
ate' gulén tu yōdzōhuè' zōn ládjagaquiè'.
- 30 Ní'irō guzuínè' Finees, en benè' le raza ládxi'è Dios,
ate' guzóa dxi yōdzōhuè' zōn na'.
- 31 Buzóè' Dios queè' Finees na' náquie' tsahui' ni'a que
lè na' benè' le nuzóè' tsaz ca naca queè'.
- 32 Lēscá' gulún lenè' Dios ga na' zoa nisa lè Meriba,
ate' Dios gulénè' Moisés tu' nōzi lè na' gulunè'
33 tu' gula'dá'baguè'è xtídzè'è Bō' Lá'ayi queè',
ate' Moisés, lu yōl-la' ridzá'a queè', gunnè' lizè'.
- 34 Bití' bulu'sunítie' bōnachi tuá' dō' gula'cuá' lu yu ni,
ca na' gunná bé'enè' Xanru' légaquiè' ilunè'.
- 35 Gulunè' léguequi tsōzxōn
en bila'zédè' ilunè' ca gulún bōnachi na',
36 ate' gula'yéaj ládxi'è budó' guiōj budó' yaga quéguequi,
le guca quégaquiè' ca tu du yalaj le guzxōn légaquiè'.
- 37 Gulútiè'-bi' xzí'inigaquiè' lógaca bō' xihui',
yugu' bi'i bōnni', en nigúlado',
38 en bulu'laljè' xichōngaca nupa bití' bi nabága'gaca
tu' bulu'laljè' xichōngacabi' bi'i bōnni' quégaquiè', en bi'i nigula quégaquiè',
yugu' bi'i na' gulútiè'-bi' lógaca budó' guiōj budó' yaga nacuá' luyú Canaán,
ate' gúcada' xihui' luyú ni tu' nōzi rōn na' bulu'laljè'.
- 39 Ca' guca, guláquie' xihui' ni'a que le gulunè'.
Guláquie' ca tu nigula udá dzaga tu' bulu'cá'anè' Dios quégaquiè'.
- 40 Que lè ni na' guléde'enè' Xanru' Dios bōnachi queè',
en bití' bilé'enè' dxi'a nupa na' néquiquequi queè'.

41 Ní'irö budödë' légaquië' lu ná'agaca bönachi zían yödzö izá'a,
ate' nupa bulu'dí'i légaquië' gula'nná be'e légaquië'.
42 Nupa na' bití' bila'lé'e légaquië' dxi'a gulunda' légaquië' dxin,
en bulu'zxicaj légaquië' lu yöl-la' unná bë' quéguequi.
43 Zían luzuí' gú'unë' Dios usölë' légaquië',
pero gula'dá'baguë'ë le rë'ënë' ilunë',
ate' guzxöntëro xiguia' nabága'gaquië'.
44 Bilé'enë' Dios yöl-la' bayechi' quégaquië'
en biyönnë' ta'bödxí yechë'ë.
45 Yöjnenë' didza' dzaga núnlenë' légaquië',
ate' bubequi lahuë' quégaquië' tu' nazxöntëro yöl-la' dxi'i ladxi' queë'.
46 Benë' Dios ga bulu'huéchi' ladxi' légaquië'
nupa na' gula'ché' légaquië' nadzúngaquië'.

47 jBusólá netu', Xantu' Dios!
Guléaj netu' ladjagaca yödzö izá'a
para gufëtu' Li': "Xclenu'" ni'a que Lo' lá'ayi,
en lu yöl-la' rudzeja zxön queëtu' cú'utu' Li' yöl-la' ba.
48 jYöl-la' ba Lë' Xanru', Dios quégaca bönachi Israel
na'a dza, en yúgu'të dza sí' zaca!
Ral-la' ila'nná yúgu'të bönachi: "jCa' gaca!
jGuli'cu'ë yöl-la' ba Xanru' Dios!"

107

1 jGuli'guíë' Xanru': "Xclenu'" tu' náquië' dxi'a,
en tu' zóatica'sö yöl-la' dxi'i ladxi' queë'!

2 Ral-la' ila'nná caní nupa na' buá'uë' Xanru',
nupa na' buá'uë' lu ná'agaca nupa gulún léguequi zí',
3 en nubéajë' léguequi zían lu yödzö izá'a,
saca' ga rilén gubidza, en saca' ga ribia,
saca' ga za' bö' ziaga, en saca' ga ridödi gubidza beo' ziaga.

4 Bal-lë' gula'dë' nanítigaquië' la' guixi' ga dë' lataj,
en ga ni' bití' zoa nöza.
Bití' guca ulu'dzölinë' tu' yödzö ga gaca tsöjcu'ë.
5 Gula'dunë', en gula'bidxë' nisa,
en gudú ladxí'gaquië'.

6 Ní'irö lu lë na' raca quégaquië' bulu'lidzë' Xanru',
ate' busölë' légaquië' lu zían le gula'guí'i gula'záquë'ë.

7 Guchë'ë légaquië' tu la' nöza tsahui',
en guchë'ë légaquië' tu lu yödzö ga tsöjcu'ë.

8 Ral-la' ilë' Xanru': "Xclenu'" tu' nadxí'inë' légaquië',
en tu' benë' yugu' le zxön, gúcalenë' légaquië'.

9 Rugui'jë' nupa ta'bidxi ladxi',
en rugahuë' nupa ta'dún le nácgaca dxi'a queë'.

10 Bal-lë' gula'cu'ë ga chul-la, en ga zoa bönadxi ilátië'.
Gula'dzunë' yugu' lu du guíë, en gula'guí'i gula'záquë'ë
11 tu' gula'dá'baguë'ë xtídzë'ë Xanru' Dios,
en bulu'zóë' tsóla'alö le rigu'ë icja ladxí'do'gaquië'.
12 Tu' gulunë' bayúdx dxin, gudú ladxí'gaquië'.
Gula'dzö'ë lu yu zcan yua' nuá'agaquië',
ate' cuntu nu zoa gácalen légaquië'.

13 Ní'irö lu lë na' raca quégaquië' bulu'lidzë' Xanru',
ate' busölë' légaquië' lu zían le gula'guí'i gula'záquë'ë.

14 Bubéajë' légaquië' ga na' gula'cu'ë ga chul-la,
en ga guzóa bönadxi ilátië',

ate' guditsjè' yugu' du guié núga'gaquiè'.

15 Ral-la' ilé' Xanru': "Xclenu'" tu' nadxí'iné' légaquiè',
en tu' bené' yugu' le zxön, gúcalenè' légaquiè'.

16 Ruquínajè' le tá'baga' gapa nu riyaza lidxi guié le néquiniguetqui guié bronce,
en ruzuzxjè' yugu' vara néquiniguetqui guié.

17 Bal-lè' gula'guí'i gula'záquë'è tu' gula'dá'baguë'è Dios,
en tu' nōzi dō' gulu'è.

18 Gula'güti'nè' bití'tès la' huagu,
en gula'zóa ilátiè'.

19 Ní'irō lu lē na' raca quégaquiè' bulu'lidzè' Xanru',
ate' busölè' légaquiè' lu zían le gula'guí'i gula'záquë'è.

20 Gusöl-lè'è quégaquiè' xtídzè'è, en bunè' légaquiè',
en busölè' légaquiè' lu yöl-la' guti.

21 Ral-la' ilé' Xanru': "Xclenu'" tu' nadxí'iné' légaquiè',
en tu' bené' yugu' le zxön, gúcalenè' légaquiè'.

22 Ral-la' ilé' Dios: "Xclenu'", en bi ulu'nōdzjè' queè',
en lu yöl-la' rudzeja quégaquiè' ilul-lè' ca nácagaca le nunè'.

23 Bal-lè' gula'dödè' lahui nísado' yugu' lu barco zxön,
en gulunè' dxin yugu' lu nísado'.

24 Bila'lé'enè' yugu' le nunè' Xanru',
en yugu' le zxön nucu'è lu nísado'.

25 Bè'èsè' didza', ate' guyecja bö' budunu',
ate' guyasa gudxía nísado'.

26 Gula'yasa barco ca tu lu guí'ado' nisa,
en la' bótjatè ga rō'ō rōga' lu nisa na'.

Tu' guzóale'è bōnadxi ilátiè' gudú ládxi'gaquiè'.

27 Gula'zxíziè', en yōjchégu'gaquiè' ca bōnni' ta'zúdxinè',
ate' nítisō guca yöl-la' rácada' quégaquiè'.

28 Ní'irō lu lē na' raca quégaquiè' bulu'lidzè' Xanru',
ate' busölè' légaquiè' lu zían le gula'guí'i gula'záquë'è.

29 Benè' Dios ga guzóa dxisō bö' budunu' na' recja,
ate' guzóa dxi le rasa ridxía lu nísado'.

30 Bulu'dzéjanè' tu' guzóa dxi lu nísado',
en tu' guchè'è Dios légaquiè' dxi'a tsáhui'do' ga na' sōjáquiè'.

31 Ral-la' ilé' Xanru': "Xclenu'" tu' nadxí'iné' légaquiè',
en tu' bené' yugu' le zxön, gúcalenè' légaquiè'.

32 Ral-la' ulu'lu'è lahui yöl-la' zxön queè' ga nudúbigaca bōnachi queè',
en ila'gu'è Lè' yöl-la' ba ga nudúbigaquiè' bōnni' gula tu'chi'a tu'söröè'.

33 Runè' Xanru' Dios ga tu'huí'i dērō yugu' yegu,
enca' yugu' beaj nisa.

34 Ga naca yu ya'a runè' ga ruhuóaca yu bidxi,
ni'a que le xihui' nabága'gaca nupa nacué' ni'.

35 Ga naca yu bidxi runè' ga ruhuóaca yu nabisa,
ate' ralaj nisa ga bití' bi nisa guzóa.

36 Ni' ru'è lataj ila'cuá' nupa ta'dún
para ilunè' ni' yōdzō ga ila'cu'è.

37 Tazè' yugu' le tazè', en tu'dé'è yugu' lubá uva,
yugu' le ta'bia yōdxi yana'.

38 Runè' Xanru' ga raca dxi'a quégaquiè',
en ga ta'cuá'bi' zíanbi' bi' quégaquiè',
en runè' ga ta'yanba' bōa' bēdxi quégaquiè'.

39 Cate' yugu' bōnni' unná bē' zi'tu' tu'zxicjè' bōnachi queè',

en tu'zõtjê' léguequi,
 en tu'saca' zi'ê léguequi, en tu'ê dô' quéguequi,
 40 rucá'anê' Dios bõnni' na' dê lu ná'agaquiê' cá'asö,
 en runê' ga ta'dê' la' guixi' ga dê lataj, en tu luyú bidxi.
 41 Rusölê' yugu' bõnni' yechi' lu le ta'guí' ta'záque'ê,
 en runê' ga ta'yanbi' xzí'inigaquiê' ca ta'yanba' bõ'cu' xzí'la'do'.
 42 Ta'lé'e lê ni nupa ná'cagaca tsahui', en tu'dzeja,
 pero biti' bi ta'nná nupa tuá' dô'.
 43 Nupa ta'yéajni' i ral-la' sa' ládxi' gaca ca ná'cagaca lê ni,
 ate' iléquite'e ná'quiê' Xanru' Dios dxi'i ladxi'.

108

1 ¿Chinabá'a quia', Dios!
 ¿Gul-la' quiu'! ¿Ön, idú ládxa'a gul-la' yöl-la' ba quiu'!
 2 ¿Guli'bán, libí'ili' riguinnali' bihuël-la!
 ¿Gúl-laru' cate' ni' ritö yu!
 3 ¿Guía' Li': "Xclenu" Xan, lád'agaca bõnachi yugu' yödzö izá'a!
 ¿Gul-la' yöl-la' ba quiu' lógaca yúgu'tê bõnachi!
 4 ¿Zxöntêrö naca yöl-la' dxi'i ladxi' quiu', le ridxintê lúxiba xitsá'!
 5 Buluí' i lahui lúxiba yöl-la' zxön quiu', Dios,
 ate' lahui yödzölió ni buluí' i lahui yöl-la' bení' quiu',
 6 para usoló' netu', bõnachi quiu', nupa nadxí'inu'.
 Len yöl-la' huáca zxön quiu' busólá netu', en bubí' i didza'.
 7 Lu lataj lá'ayi queê' bê'ê didza' Dios, gunné':
 "Uzi'a xibé, en quisia' xiyúgaca bõnachi Siquem,
 en urixa' luyú dê cuiti yegu Sucot.
 8 Nequi quia' xiyúgaca bõnachi Galaad,
 enca' xiyúgaca xzí'ini xi'sóê' Manasés.
 Naca ca tu le rusubín icja' xiyúgaca xzí'ini xi'sóê' Efraín.
 Naca ga rinná bê'a xiyúgaca xzí'ini xi'sóê' Judá.
 9 Naca ca tu ga riguibi na' a xiyúgaca bõnachi Moab,
 ate' lu xiyúgaca bõnachi Edom chú'una' lóla'.
 Cõdxi'a tu' uxicja' bõnachi Filistea."
 10 ¿Nuzxi caz gaca ichê' neda' lu yödzö
 dê zó'ö idú gásibi' iló le run chi' i yödzö na'?
 ¿Nuzxi caz gaca ichê' neda' lu xiyúgaca bõnachi Edom?
 11 ¿Naru' cabí nusán ládxi'u netu', Dios?
 ¿Naru' cabí tséajlenu' bõnni' queétu' rójáquiê' gudil-la?
 12 Gúcalen netu' cate' tíl-lalentu' nupa dutíl-lalen netu',
 tu' naca dádusö gácalen netu' nu naca bõnáchisö.
 13 Len yöl-la' huáca queê' Dios idéli'ru'
 tu' uxicja cazê' Lê' nupa ta'díl-lalen rë'u.

109

1 Rigu'a Li' yöl-la' ba, Xana' Dios.
 Biti' su' dxisö,
 2 tu' ta'nná quia' nupa tuá' dô', en ta'zí' yê'.
 Lu yöl-la' rizí' yê' quéguequi tuí' i didza' le tu'zegui' neda'.
 3 Nagú'ugaca neda' lê'ajlô,
 en lu yöl-la' biti' rilé'e neda' dxi' a tu'ítica'sö didza'.
 4 Sal-la' nadxí'ida' léguequi, tu'zegui' neda' didza',
 pero neda' rulidza' Li'.
 5 Bena' quéguequi le naca dxi'a, pero bulu'bí' i quia' le naca dô'.
 Nadxí'ida' léguequi, pero biti' ta'lé'e neda' dxi'a.
 6 Buzóa tu bõnni' huía' dô'
 para uchi'a usórôê' que nu na' biti' rilé'e neda' dxi'a.
 Ben ga soa gagu nu uzegui' nu na' didza'.
 7 Cate' nu uchi'a usórö bõnni' na', biti' gu'u lataj urúajê' dxi'a.

Buyú le rinábinè' Li' tsa naca dul-la' nabáguè'è.

⁸ Ben ga ilaca nabábasò dza soè' ibanè'.

Ben ga tsu'u nu yúbölö uláz queè'.

⁹ Ben ga ilácabi' zxi'inè' bi'i uzèbi,

en ga gácanu nigula queè' nigula uzèbi.

¹⁰ Ben ga ila'dásòbi' zxi'inè' ila'nábibi' nu bi unödzej quégacabi'.

Ben ga ila'guíljabí' le ilágubi' zi'tu' ga zoa lídxigacabi' le nadachi.

¹¹ Ben ga ugúa nu bi benna lè' tu chí'isò idútè le dè queè',

en ben ga ila'banè' bönni' zi'tu' le rulá' dxin runè'.

¹² Ben ga bití' soa nu uzá' ladxi' quégacabi' zxi'inè' nácagacabi' bi'i uzèbi.

en bití' soa nu uzá' ladxi' quégacabi' zxi'inè' nácagacabi' bi'i uzèbi.

¹³ Ben ga udxí quégaca zxi'ini xi'sóè',

en ga ídxín dza bíti'rò soa nu si' la ca guzxi'i lè'.

¹⁴ Yójnética'sò le xihui' gula'báguè'è xuz xtá'ahuè', Xan,

en bití' gal-la ládxu'u dul-la' bennu xinè'è.

¹⁵ Ben ga ila'cuá'tica'sò dul-la' na' lo' Li', Xan,

para cabirò nu soa yödžölió nu tsójné lè'.

¹⁶ Bití' buéchi' ládxè'è luzè'è,

pero gudxía nahuè' nupa gula'gui'i gula'zaca',

en nupa gula'yadzaj gula'yudxi,

enca' nupa gula'sèbi ladxi', ate' hètiè' léguequi.

¹⁷ Bidxi'inè' le rudxía luzè'è dö'.

Ben ga ulu'bí'i ca' queè'.

Bití' raza ládxè'è gaca dxi'a que luzè'è.

Ben ga bití' gaca dxi'a queè'.

¹⁸ Gulaca ca zxè' nácuè' didza' xihui' bè'è,

ate' gula'yaza le nayá' nabanè' ca nisa,

en gula'yú'u ca' dxita queè' ca le za.

¹⁹ Ben ga ilaca queè' ca tu lari' rixóa cúdzè'è,

en ca xipanè' rúgui'è lè'è.

²⁰ Bubi'i caní quégaca nupa tu'zegui' neda' didza', Xan,

enca' quégaca nupa tu'i didza' zi' que bö' naca caza'.

²¹ Li', Xana' Dios, ben quia' le naca dxi'a

para gaca bè' runu' ca rnna xtídzu'u.

Tu' naca dxi'a yöl-la' dxi'i ladxi' quiu', busólá neda'.

²² Riguí'i rizáca'a, en riyadzaj riyúdxida',

en raca zi' ládxí'da'ahua'.

²³ Ridódi quia' ca raca que tu zxul-la cate' ribía gubidza.

Naca' ca tuba' böchi'zu, riché' bö' recja lèba'.

²⁴ Ta'cuidi' zxiba' tu' runa' gubasa.

Nadxita', en bíti'rò rò'ò za lu bèla' rön quia'.

²⁵ Nupa bití' ta'lé'e neda' dxi'a tu'titaj neda'.

Cate' ta'lé'e neda', tu'tá' ícjaguequi.

²⁶ Gúcalen neda', Xana' Dios.

Lu yöl-la' dxi'i ladxi' quiu' busólá neda'.

²⁷ Ben ga iléquibe'e rácalen cazu' neda'.

Nun cazu' Li' lè ni, Xan.

²⁸ Tu'dxía neda' dö', pero Li', ben ga gaca dxi'a quia'.

Cate' ila'yasé', ulu'tuí'inè',

pero udzèjada' neda', huen dxin quiu'.

²⁹ Ben ga ulu'gá'ana cá'asò nupa tu'zegui' neda' didza',

en ben ga gaca yöl-la' rutuí'i quéguequi ca tu lari' nabaga' léguequi.

³⁰ Len ruá' cuina', zían luzuí' guía'-nè' Xanru': "Xclenu",

en ladaj bönachi zían cu'a Lè' yöl-la' ba,

³¹ tu' zuínè' cuita lè'e ibèla nu riyadzaj riyudxi

para usölè' nu na' lu ná'agaca nupa tu'siúdxí bö' naca caz nu na'.

110

1 Xanru' Dios gudxè' Xana': "Gurö'i cuita lè'a ibèla cate' gunra' ga ulu'zachu zxi'bigaca lo'

nupa biti' ta'lé'e Li' dxi'a."

² Ga zoë' yōdzō Siōn gusōl-lē'ē Xanru' yōl-la' unná bē' quiu',
gunné': "Gunná be'e nupa biti' ta'lé'e Li' dxi'a.

³ Ulu'dōdi cuínguequi lu no'o bōnachi quiu'
cate' si'u yōl-la' unná bē' quiu'

tu' napu' yōl-la' lachi que le naca lá'ayi."

Ila'cuá' bí'i bōnni' ga zu' ca ribō'ō buzén zílado'.

⁴ Runē' tsutsu xtídzē'ē Xanru', en biti' utsé'ē le, rnnē':

"Tsz nacu' bixúz ca na' gúquiē' Melquisedec bixúz."

⁵ Zoa cazē' Xanru' cuita lē'u ibēla.

Ucul-lē' bōnni' ta'nná bē'ē cate' idxín dza usiúdxē' luyú.

⁶ Uchi'a usōrōē' quégaca bōnachi yúgu'tē yōdzō izá'a,

ate' ilí yōdzōlió len bēla' rōn quéguequi.

Uzōtjē' nupa ta'nná bē' zían lu yōdzō izá'a.

⁷ Guí'jē' nisa beaj ra' nōza,

en ni'a que lē ni huóaca ládxē'ē.

111

¹ ¡Guli'cu'ē yōl-la' ba Xanru'!

Idú ládxa'a rea-nē' Xanru': "Xclenu'."

Runa' caní tsaxzōn len bōnni' tsahui' zían ga na' nudúbigaca bōnachi queē'.

² Zxōn nácagaca le nunē' Xanru'.

Yúgu'tē nupa ta'yaza ládxi'gaca lē na' benē' tu'sēda ca nácagaca.

³ Idútē dxi'a nácagaca, en nayépisētērōgaca le nunē' Lē',

ate' idiá'tica'sō le naca tsahui' queē'.

⁴ Chinunē' ga tsójneru' yugu' le benē', le tun ga rubániru'.

Náquiē' Xanru' dxi'i ladxi', en ru'i ládxē'ē rē'u.

⁵ Rugahuē' nupa tadxi Lē'.

Rōjnética'sē' dídza' dzaga núnlenē' bōnachi queē'.

⁶ Buzéajni'inē' bōnachi queē' ca naca yōl-la' huáca quégaca le nunē',

le benē' ga gula'déli'nē' xiyúgaca bōnachi izá'a.

⁷ Tsahui', en idútē li nácagaca le núngaca lu nē'ē.

Nácagaca tsutsu yúgu'tē xibá gunná bē'ē.

⁸ Rucuá'tica'sē' tsutsu xibá queē',

en rusudxinē' léguequi lu le naca idútē li, en le naca tsahui'.

⁹ Gusōl-lē'ē Nu buá'uō bōnachi queē'.

Tsz nuzōē' dídza' dzaga nunē'.

Lá'ayi, en ba'a ladxi' naca Lē'.

¹⁰ Lu yōl-la' radxi queēru' Lē' risi loru' ridéli'ru' yōl-la' réajni'i.

Yúgu'tē nupa tun ca ta'nná bē' xibá queē' nápagaca yōl-la' réajni'i.

Ila'cuá'tica'sō nupa ila'gú'u Lē' yōl-la' ba.

112

¹ ¡Guli'cu'ē yōl-la' ba Xanru'!

¡Bica' ba bōnni' na' rádxinē' Xanru',

bōnni' na' raza ládxē'ē runē' ca gunná bē'ē Dios!

² Tsépiségaca zxi'ini xi'sóē' bōnni' na' yōdzōlió ni.

Gáquiē' bica' ba bōnni' na' runē' le naca dxi'a.

³ Lu yu'u lidxē' gata' yōl-la' tsahui',

ate' idiá'tica'sō le naca tsahui' runē'.

⁴ Gulén bení' ga ridé' bōnni' tsahui' ga na' naca chul-la.

Ruzá' ládxē'ē que luzē'ē, en ru'i ládxē'ē lē', en runē' le naca dxi'a.

⁵ Gaca dxi'a queē' bōnni' ruzá' ládxē'ē que luzē'ē,

en rnnē' que tu chí'isō le riyadzaj que.

Urúajē' dxi'a cate' nu uchi'a usōrō queē'.

⁶ Catu caz gaca nu utsá' bōnni' na',

ate' sóatica'sō nu tsójné lē'.

⁷ Biti' gádxinē' cate' nu usiyōni lē' le cabí raca dxi'a.

Ridipa ládxē'ē tu' ruzxōni ládxē'ē Xanru' Dios.

⁸ Dios rutipē' ládxē'ē, ate' bití' gádxinē'

cate' idxinrö dza ilé'ené' nuhuótjagaca nupa ta'díl-lalen lé'.

⁹ Idú ládxë'ë runödzejë' quégaca bönachi yechi'.

Idía'tica'sö le naca dxi'a runë'.

Dios uchisé' lé' ga tsépisë'.

¹⁰ Ila'lé'e lé' ni nupa tuá' dö', en ila'bör' bagu'isö.

Ilagu zxe láyi'gaca, en ila'niti cuínguequi.

Tsaz initi le ta'zé ládxi'gaca nupa tuá' dö'.

113

¹ ¡Guli'cu'ë yöl-la' ba Xanru'!

¡Guli'cu'ë yöl-la' ba, libí'ili' huen dxin queë' Xanru'!

¡Guli'cú'u yöl-la' ba Lé' Xanru'!

² ¡Cú'uru' yöl-la' ba Lé' Xanru',
cate' risí lo na'a, en yugu' iz sí' zaca!

³ ¡Ga naguela' ga rilén gubidza ga ridxintë ga ribía,
cú'uru' yöl-la' ba Lé' Xanru'!

⁴ ¡Nayëpisëtëre' Xanru' Dios ca yúgu'të yödzö izá'a!

¡Nazxöntëro yöl-la' zxön queë' ca naca lúzxiba!

⁵ ¿Nuzxi caz zoa naca ca náquië' Xanru' Dios?

Rö'ë rinná bë'ë ga na' nayëpisëtëre'.

⁶ Ruzötaj cuinë' para uyüë'

le dë lúzxiba, en le dë luyú ni.

⁷ Ruchisé' nupa náca'gaca yechi', rubéajë' lé'guequi lu bëchtö yu.

Ruchisé' nupa ta'yadzaj, rubéajë' lé'guequi lu dö bëbu.

⁸ Runë' ga ta'bö'len nupa ta'nná bë'.

Ta'bö'len nupa ta'nná be'e bönachi queë'.

⁹ Runë' ga zóanu ní'gula huödx yu'u lídxinu.

Rudzeja ládxi'nu tu' runë' ga nacua'abi' zxi'ininu.

¡Guli'cu'ë yöl-la' ba Xanru'!

114

¹ Cate' bila'rúaj bönachi Israel luyú Egipto

bila'rúajë' zxi'ini xi'sóë' Judá ladaj nupa tu'í didza' izá'a.

² Zxi'ini xi'sóë' Judá guláquië' ca lídxë' Xanru' Dios,

ate' gulaca bönachi Israel nupa rinná bë'enë' Dios.

³ Lahuë' Dios bubiga' nísado',

ate' bubí'i nisa yegu Jordán.

⁴ Gula'xiti' guí'a zxön ca yugu' bö'cu' zxila' biguiú',

ate' gula'xiti' ca' guí'ado' ca yugu' bö'cu' zxíla'do'.

⁵ ¿Bi raza quiu', nísado', tu' rubigu'?

¿Bi raza quiu', yegu Jordán, tu' rubí'i nisa quiu'?

⁶ ¿Bi raza queéli', guí'a zxön, tu' rixít'i'li' ca yugu' bö'cu' zxila' biguiú'?

¿Bi raza queéli', guí'ado', tu' rixít'i'li' ca yugu' bö'cu' zxíla'do'?

⁷ Guzxizi lahuë' Xanru', yödzölió.

Guxxizi lahuë' Dios queë' Jacob.

⁸ Benë' Dios ga gulaj nisa tu lé'e guió'jto'o,

en benë' ga bö'aca le guca guió'j jara tu ga rilén nisa.

115

¹ Calëga queëtu', Xan, calëga queëtu',

pero que lo' gaca yöl-la' ba

tu' nacu' dxi'i ladxi', en le naca idútë li.

² ¿Bizx que ta'nná bönachi yugu' yödzö izá'a:

“Gazxi caz zoë' Dios qué'gaquië'”?

³ Zoë' Dios queëru' yehua' yubá.

Runë' le raza ládxë'ë gunë'.

⁴ Né'quínguequini plata, en oro budó' quégaca bönachi izá'a na',

yugu' le núngaca lu ni'a lu na' bönachi.

5 Nacuá' ruí'iguequi, pero biti' gaca ilu'í didza'.

Nacuá' guió'j lógaca, pero biti' gaca ila'lé'e.

6 Nacuá' ná'agaca, pero biti' gaca ila'yöni.

Nacuá' xzíniguequi, pero biti' gaca ila'lé'e.

7 Nacuá' ná'agaca, pero biti' bi gaca ila'gán.

Nacuá' ní'agaca, pero biti' gaca ila'zá'.

Biti' gaca ilún bö lubá'agaca.

8 Nupa tun budó' guió'j budó' yaga ilaca ca ná'cagaca budó' na',

núti'tës nu ruzxöni ladxi' budó' guió'j budó' yaga.

9 Libí'ili', bönachi Israel, buli'zxöni ládxë'ë Xanru' Dios.

Rácalen cazë' libí'ili', en rapa chi'ë libí'ili'.

10 Libí'ili', xzí'ini xi'sóë' Aarón, buli'zxöni ládxë'ë Xanru' Dios.

Rácalen cazë' libí'ili', en rapa chi'ë libí'ili'.

11 Libí'ili' na' rádxili'-në' Dios, buli'zxöni ládxë'ë Xanru' Dios.

Rácalen cazë' libí'ili', en rapa chi'ë libí'ili'.

12 Xanru' Dios ruí'í ládxë'ë rë'u, en gunë' ga gaca dxi'a queéru'.

Gunë' ga gaca dxi'a quégaca bönachi Israel.

Gunë' ga gaca dxi'a quégaca xzí'ini xi'sóë' Aarón.

13 Gunë' ga gaca dxi'a quégaca nupa tadxí Lë',

nupa na' ná'cagaca cá'asö, en nupa na' nayépisëgaca.

14 Gunë' Xanru' Dios ga tsan le nequi queéli',

lë na' nequi queéli', en le nequi quégaca xzí'inili'.

15 Raca ládx'a' a gunë' Xanru' ga gaca dxi'a queéli'.

Náquië' Nu ben lúzxiba, en luyú ni.

16 Nequi queë' Xanru' Dios lúzxiba xitsá',

pero nudödë' lu ná'agaca bönachi luyú ni.

17 Nupa chinátigaca biti' gaca ila'gú'u Xanru' yöl-la' ba,

en calëga nupa nacué' dxisö lataj chul-la que yöl-la' guti.

18 ¡Cú'uru' yöl-la' ba Xanru' Dios

na' a dza, en yúgu'të dza si' zaca!

¡Guli'cu'ë Xanru' yöl-la' ba!

116

1 Nadxí'ida'-në' Xanru' Dios, tu' riyönnë'

le rulidza' Lë', en le rinábida'-në'.

2 Ruzë' nagüë' chi'a.

Que lë ni na' ulidza' Lë' tsanni ni zoa' nabana'.

3 Guzóa bönadxi quía' gátia',

en guyu'a tsöbi que lataj chul-la que yöl-la' guti,

ate' gusëbi ládx'a'a, en buí'inide'eda' ládx'a'a.

4 Ní'irö bulidza'-në' Xanru' Dios, gunnía':

"Ráta'yua' lo', Xan, usöló' neda'."

5 Xanru' Dios ruzá' ládxë'ë queéru', en náquië' tsahui'.

Dios queéru' ruí'í ládxë'ë rë'u.

6 Rapa chi'ë Xanru' nupa ná'cagaca do' ladxi'.

Bulu'xicja bönachi neda', ate' busölë' neda'.

7 Buzí' ladxi' bö' naca caza',

tu' runë' Xanru' Dios ga raca dxi'a quía'.

8 Busöló' bö' naca caza', Xan, lu yöl-la' guti.

Benu' ga buí'í nisa ribödxi guió'j lahua',

en ga bíti'rö cuílagaca ni'a.

9 Ta'a lahuë' Xanru' Dios

ga nacué' nupa nabángaca.

10 Guyéajlë'a Lë' cate' gunnía':

"Zoa le rusaca' neda' zí'."

11 Lu yöl-la' rö' böniga quía' gunnía':

"Ta'z'í' yë' yúgu'të bönachi."

12 ¿Bizxi caz gu'a-në' Xanru' Dios
ni'a que yugu' le runë' le ruzi'a xibé?
13 Si' lu na'a yöl-la' rusölä queë' Xanru',
en ulidza'-në' Xanru' Dios.

14 Ünödza' queë' Xanru' le guzxi' lu na'a ünödza'.
Raca ládxa'a gaca guna' caní lógaca yúgu'të bönachi queë'.

15 Rúndë'ë Xanru' bal
yöl-la' guti quégaca nupa néquiguequi quez queë'.

16 Le nácatë naca' huen dxin quiu', Xan.
Naca' huen dxin quiu', enca' zxi'ininu nigula huen dxin quiu'.
Busedxu' le biröli neda'.

17 Cu'a lo' le ünödza' quiu', en guía' Li': "Xclenu",
en ulidza' Li', Xan.

18 Ünödza' queë' Xanru' le guzxi' lu na'a ünödza'.
Raca ládxa'a gaca guna' caní lógaca yúgu'të bönachi queë'.

19 Ga zoa lö'a que yu'u lidxë' Xanru',
lu yödzö Jerusalén guna' caní.

¡Guli'cu'ë yöl-la' ba Xanru' Dios!

117

1 ¡Guli'cu'ë yöl-la' ba Xanru' Dios, libí'ili', bönachi yúgu'të yödzö izá'a!
¡Guli'cu'ë yöl-la' ba yúgu'tëli',
2 tu' buxönë' queëru' yöl-la' dxi'i ladxi' queë',
en zóatica'sö le naca idú ladxi' queë'!

¡Yöl-la' ba Lë'!

118

1 ¡Guli'guíë' Xanru': "Xclenu", tu' náquië' dxi'a!
¡Zóatica'sö yöl-la' dxi'i ladxi' queë'!

2 Ral-la' ila'nná bönachi Israel:
"¡Zóatica'sö yöl-la' dxi'i ladxi' queë'!"

3 Ral-la' ila'nná zxi'ini xi'sóë' Aarón:
"¡Zóatica'sö yöl-la' dxi'i ladxi' queë'!"

4 Ral-la' ila'nná nupa tadxi Xanru' Dios:
"¡Zóatica'sö yöl-la' dxi'i ladxi' queë'!"

5 Cate' gudí' le guzxacá'a bulidza'-në' Xanru',
ate' bubí'ë didza', en busölë' neda'.

6 Zoë' Xanru' cuita' neda', ate' bití' bi gádxida'.
¿Bizxi caz gaca ilún bönachi quia'?

7 Zoë' Xanru' cuita' neda' ladaj nupa tácalen neda'.
Que lë ni na' idéli'da' láhuigaca nupa bití' ta'lé'e neda' dxi'a.

8 Nácarö dxi'a uzxöni ládxa'a-në' Xanru',
en bití' uzxöni ládxa'a nu naca bönáchisö.

9 Nácarö dxi'a uzxöni ládxa'a-në' Xanru',
en bití' uzxöni ládxa'a nupa ta'nná bë'.

10 Bönachi yúgu'të yödzö izá'a gula'gú'u neda' lë'ajlö.
Len yöl-la' huáca queë' Xanru' buxicja' léguequi.

11 Gula'gu'ë neda' lë'ajlö. Ön, gula'gu'ë neda' lë'ajlö,
pero len yöl-la' huáca queë' Xanru' buxicja' léguequi.

12 Gula'gu'ë neda' lë'ajlö ca tu lu guí' guixi' yötsi' bidx.
Len yöl-la' huáca queë' Xanru' buxicja' léguequi.

13 Bulu'dxíguë'è neda' ga bidxintë guzóa tsöjtsö'a,
pero gúcalenë' Xanru' neda'.

14 Naca cazë' Xanru' yöl-la' huáca quia', en le rul-la'.
Naca cazë' yöl-la' rusólá quia'.

15 Lu yu'u lídxigaca nupa nácgaca tsahui'
ru'u bō que nupa ta'bōdxi'a lu yöl-la' rudzeja queguequi tu' nulágaca.

¡Runda' dxin në'è ibëla Xanru'!

16 ¡Nayëpisëtërö në'è ibëla Xanru'!

¡Runda' dxin në'è ibëla Xanru'!

17 Biti' ca' gátia', pero soa' ibana',
ate' usiyōnda' bōnachi le nunë' Xanru'.

18 Xanru' bëndë'è neda' xiguaia',
pero biti' budödë' neda' lu yöl-la' guti.

19 Guli'salaj quia' ga ta'yazë' bōnni' tsahui'.

Tsu'a ni', en guía'-në' Xanru': "Xclenu'."

20 Naca lataj ni ga riyaza cazë' Xanru' Dios.
Ila'yazë' ni bōnni' tsahui'.

21 ¡Guía' Li': "Xclenu'" Xan, tu' bubi'u didza' quia',
en tu' nacu' Nu rusólá neda'!

22 Zoa tu guiój bulu'zocé' tsólá'aló bōnni' tu'cu'è zō'ö.
Na'a naca guiój na' guiój len squin zō'ö.

23 Benë' Xanru' Dios ga naca caní.
Naca tu le run ga rubániru'.

24 Dza ni naca dza nunë' Xanru' Dios.
Udzéjaru', en uzí'iru' xibé.

25 Ráta'yutu' lo', Xan, usóló' netu'.
Ráta'yutu' lo', Xan, gunu' ga gaca dxi'a queëtu'.

26 Bica' ba bōnni' na' zë'è uláz queë' Xanru'.
Guntu' Li' zxōn lu yu'u lidxé' Xanru'.

27 Dios náquië' Xanru', ate' bennë' queëru' bení'.
Buli'nōdzaj queë' Dios yugu' bēdxi renni' uzégui'ru'-ba' lahuë' lu bucugu queë'.

28 Naca cazu' Li' Dios quia', ate guía' Li': "Xclenu'."
Naca cazu' Li' Dios quia', ate' guna' Li' zxōn.

29 ¡Guli'-guië' Xanru' Dios: "Xclenu'" tu' náquië' dxi'a!
¡Zóatica'só yöl-la' dxi'i ladxí' queë'!

119

Le run le gunná bé'enë' Xanru' rë'u

1 ¡Bica' ba nupa nácgaca idú dxi'a tsáhui'do',
nupa na' tun ca rnna xibá naguixjë' Xanru'!

2 ¡Bica' ba nupa tun ca nácgaca le benë' ba nalí,
en idú ládxi' gaca ta'zë ladxí' Lë'!

3 Biti' bi le cabí naca tsahui' tun,
pero tun ca nácgaca le nulu'è lahui.

4 Nuzú' queëtu' xibá quiu', Xan,
para idú ládxi'tu' guntu' ca ta'nná.

5 Raca ládxa'a gúntica'sa' ca ral-la' guna',
en guna' yugu' le gunná bë'u.

6 Ní'irö biti' ca' utu'ida'
channö gapa chí'a yugu' le gunná bë'u.

7 Lu yöl-la' ba'a ladxí' quia' guía' Li': "Xclenu'"
cate' chinazi'a le buchí'a busóröu' le naca tsahui'.

8 Guna' ca ta'nná le gunná bē'u.
Biti' usán no'o neda' tsaz.

Ral-la' gunru' ca gunnē' Dios

9 ¿Nacxi gaca gunbi' tu bi'i bönni' ga ugá'ana tsahui' ládxi'do'obi'?
Ral-la' gunbi' ca rnna xtídz'u.

10 Idú ládxa'a rizē ládxa'a Li', Xan.

Biti' gu'u lataj ucá'ana' yugu' le gunná bē'u.

11 Lu ícja ládxi'da'ahua' runa' ca rnna xtídz'u,
para cabí guna' dul-la' lo' Li'.

12 ¡Bica' xibó', Xan!

Busedi neda' yugu' le gunná bē'u.

13 Len ruá' cuina' ru'a didza'
ca nácacaga yúgu'tē le rusedi quézinu' netu'.

14 Rudzējada' ca nácacaga le nunu' ba nalí
ca nu rudzeja tu' dē yöl-la' tsahui' que.

15 Sa' ládxa'a ca nácacaga xibá quiu'
en gü'i ládxa'a yugu' le nulú'u lahui.

16 Udzējada' ca nácacaga le gunná bē'u.

Biti' gal-la ládxa'a xtídz'u.

Rudzējade' eru' runru' le rnna cazē' Dios

17 Ben ga gaca dxi'a quia' neda', huen dxin quiu', Xan,
para soa' ibana', en guna' ca rnna xtídz'u.

18 Gusalaj guiój lahua' para gaca ilé'eda'
le tun ga rubánitu' nazúajgaca lu xibá naguixju' Li'.

19 Zoa' yödzölió ca tu bönni' ridasó.

Biti' ucachu'u yugu' xibá nunu' ga bití' gaca ilé'eda' léguequi.

20 Yúgu'tē dza ruhui'ini ládxa'a tu' rizē ládxa'a
yugu' le nusédinu' netu' ca ral-la' guntu'.

21 Ruzenu' le bach nupa tun ba zxön cuínguequi, en nupa nudxiagaca dö',
nupa na' tu'zóa tsölá'alö yugu' xibá gunná bē'u.

22 Biti' gu'u lataj nu guequi neda' zi' o nu ucá'ana neda' cá'asó,
tu' runa' ca ta'nná le nunu' ba nalí.

23 Sal-la' ta'bó' nupa ta'nná bē', en ta'nnē quia',
rizá' ládxa'a neda', huen dxin quiu', ca nácacaga le gunná bē'u.

24 Raza ládxa'a yugu' le nunu' ba nalí.

Nácacaga le tu'zéajni'i neda'.

Idú ládxi'ru' gunru' ca gunná cazē' Dios

25 Nadinni lu yu bö' naca caza'.

Busubán ládxa'a, ugunu' dxin xtídz'u.

26 Buluí'ida' Li' yugu' le nuna', ate' bubí'u didza'.

Busedi neda' yugu' le gunná bē'u.

27 Buzéajni'i neda' ca nácacaga xibá quiu',
ate' sa' ládxa'a ca nácacaga le nunu', le tun ga rubánitu'.

28 Ribódxí bö' naca caza' tu' risébida' ládxa'a.

Butipa ládxa'a, ugunu' dxin xtídz'u.

29 Ben ga bití' guna' le cabí sa'yéaj,
en buzá' ládxi' quia' xibá naguixju' Li'.

30 Guró'a' le naca idútē li para guna' ca rnna.

Nuzó'a' lahua' yugu' le nusédinu' netu'.

31 Nazí' lu na'a yugu' le nunu' liná' lo.
Biti' gu'u lataj bí gun ga utuí'ida', Xan.

32 Guna' ca ta'nná xibá gunná bē'u,
tu' rutipa cazu' ládxa'a.

Rē'éniru' tséajni'iru' xtídzē'ē Dios

33 Busedi neda', Xan, ca ta'nná le gunná bē'u,
ate' gun chí' a léguequi ga idxinró dza udxi.

34 Benna quia' yöl-la' réajni'i para gun chí'a xibá quiu',
en para idú ládxa'a guna' ca ta'nná.

35 Ben ga guna' ca ta'nná le gunná bē'u,
tu' raza ládxa'a guna' ca ta'nná xibá na'.

36 Ben ga güi'i ládxa'a yugu' le nunu' ba nalí,
para cabí güi'i ládxa'a yöl-la' ruhuidi'.

37 Buchi'a guiöj lahua' para cabí uyúa' le cabí nazaca'.
Butípa ládxa'a para guna' le uluí'nu' netu'.

38 Ben tsutsu didza' bé'lenu' neda', huen dxin quiu',
para gádxida' Li'.

39 Bucuíta ga zoa' nu rudidza' yudxi neda', lé na' rádxida'
tu' nácgaca dxi'a tsahui' le nusédinu' netu' ca guntu'.

40 Buyútsöca', rizé ládxa'a yugu' xibá quiu'.
Busubán ládxa'a, ugunu' dxin le tsahui' quiu'.

Ruzxöni ládxi'ru' xtídzé'ë Dios

41 Lu yöl-la' dxi'i ladxí' quiu' buyú neda', Xan,
en busölá neda' ca rnna xtídzu'u gunu'.

42 Ubi'a didza' bi guía' nu run ga rutuí'ida', innía':
"Ruzxöni ládxa'a xtídzu'u", Xan.

43 Biti' ucuútu' tsaz didza' idúté li lu ru'a
tu' runa' löza yugu' le nusédinu' netu'.

44 Gúntica'sa' ca ta'nná xibá naguixju' Li'
yúgu'té dza, en yúgu'té iz si' zaca.

45 Lu yöl-la' rusölá quiu' soa' ibana'
tu' bé' ládxa'a guna' ca ta'nná bé' xibá quiu'.

46 Gu'a didza' que le nunu' ba nalí lógaquié' bönni' ta'nná bé'ë
en bití' ca' utuí'ida'.

47 Tsaza ládxa'a yugu' xibá gunná bé'u,
yugu' lé na' nadxí'ida'.

48 Guna' ca' ca ta'nná xibá nunu', lé na' sē ládxa'a,
en sa' ládxa'a ca nácgaca le gunná bé'u.

Zóatica'sö xtídzé'ë Dios

49 Yöjné didza' na' bé'lenu' neda', huen dxin quiu',
tu' benu' ga runa' löza le.

50 Didza' na' ruhué tsahui' neda' cate' riguí'i rizáca'a,
tu' tu' subán ládxa'a didza' bé'u.

51 Tu'títjalé'e neda' nupa tun ba xzön cuínguequi,
pero bití' ca' usana' xibá naguixju' Li'.

52 Röjneda' yugu' le busédinu' netu' dza ni'te, Xan,
ate' lé na' ruhué tsahui' neda'.

53 Lu yöl-la' ridzá'a quia' rö'a böniga ni'a quégaca nupa tuá' dö',
nupa na' tu' cá'ana xibá naguixju' Li'.

54 Rul-la' ca nácgaca le gunná bé'u.

Zoa' ni ca tu bönni' ridé' zi'tu'.

55 Chi'i dzö'ölö röjneda' Lo', Xan,
en run chi'a xibá naguixju' Li'.

56 Nacuá'len neda' le ruzi'a xibé
ate' runa' ca rnna yugu' xibá quiu'.

Raza ládxi'ru' xtídzé'ë Dios

57 Nacu' Li', Xan, le ruzi'a xibé.

Chigunnía' guna' ca rnna xtídzu'u.

58 Idú ládxa'a inábida' Li' sóalenu' neda'.

Buéchi' ladxí' neda' ca rnna xtídzu'u gunu'.

59 Guzá' ládxa'a ca nácgaca le runa',
ate' bubí'i ládxa'a para guna' ca rnna le nunu' liná' lo.

60 Bénd'a bayúdx, en bití' gudzedá'
para guna' ca rinná bé' xibá quiu'.

61 Bönachi' zían bönachi' tuá' dö' gula'gú'u neda' lé'ajlö,
pero bití' gul-la ládxa'a xibá naguixju' Li'.

62 Gulahuéla riyasa', en rigú'a Li' yöl-la' ba
tu' nácgaca tsahui' yugu' le nusédinu' netu'.

63 Runa' tsözxön nupa tadxi' Li',
enca' nupa tun ca rnna xibá quiu'.

64 Ridxín idúté yödzölió yöl-la' dxi'i ladxí' quiu', Xan.

Busedi neda' yugu' le gunná bē'u.

Naca le saca' le gunná cazē' Dios

⁶⁵ Benu' quia' neda', huen dxin quiu', le naca dxi'a, ca rnna xtídz'u' gunu', Xan.

⁶⁶ Busedi neda' yól-la' réajni'i idú, en yól-la' raca yenni', tu' réajlē'a yugu' xibá gunná bē'u.

⁶⁷ Zí'alō cate' buzótju' neda' gudá' nanitia', pero na'a runa' ca rnna xtídz'u'.

⁶⁸ Idú dxi'a tsahui' nacu', en runu' le naca dxi'a. Busedi neda' yugu' le gunná bē'u.

⁶⁹ Nupa tun ba zxön cuínguequi ta'zì' yē' ca naca quia', pero idú ládxa'a guna' ca rnna xibá quiu'.

⁷⁰ Chul-la niti naca icja ládxi'do'guequi, pero raza ládxa'a neda' xibá naguixju' Lí'.

⁷¹ Naca dxi'a buzótju' neda' para bizédida' yugu' le gunná bē'u.

⁷² Nácagacarō dxi'a quia' xibá rinná bē'u ca nácagaca gayuá' gayuá'só dumí oro, en plata.

Naca tsahui' le gunná cazē' Dios

⁷³ Len no'o benu' neda', en buzú' neda'.

Buzéajni'i neda' para gúnbē'a xibá gunná bē'u.

⁷⁴ Nupa tadxi Lí' ila'lé'e neda', en ulu'dzeja ládxi'guequi, tu' runa' löza xtídz'u'.

⁷⁵ Nözda' naca tsahui' ca ruchi'a rusöröu' quia' neda', Xan, ate' lu yól-la' li ládxi' quiu' busaca' zì'u neda'.

⁷⁶ Na'a, lu yól-la' dxi'i ládxi' quiu' buē tsahui' neda', ca rnna didza' chibé'lenu' neda', huen dxin quiu'.

⁷⁷ Gudá duhuechi' ládxi'u neda' para soa' ibana', tu' raza ládxa'a xibá naguixju' Lí'.

⁷⁸ Ben ga ulu'tuí'i nupa tun ba zxön cuínguequi, tu' gula'nnē quia', en biti' bi bena' qué'guequi, pero neda' sa' ládxa'a ca naca xibá quiu'.

⁷⁹ Ral-la' udxín quia' nupa tadxi Lí', nupa na' núnbē'gaca le nunu' ba nalí.

⁸⁰ Ben ga udxín ca rnna le gunná bē'u, para cabí utuí'ida'.

Runē' Dios ca rnna xtídzē'ē

⁸¹ Rudú ládxa'a tu' ribōza' yól-la' rusölá quiu', pero runa' löza xtídz'u'.

⁸² Chirequi ichul-la lahua' tu' rizēda' ládxa'a xtídz'u', rnniá: "¿Bátaxi huē tsau'u neda'?"

⁸³ Caní raca tu' naxú'unida' ca tu buzudi guídi nal-la' lahui guí', pero catu caz gal-la ládxa'a yugu' le gunná bē'u.

⁸⁴ ¿Bál-laxi dza soa' ibana' neda', huen dxin quiu'? ¿Bátaxi usiúdxu' nupa ta'bia no neda'?

⁸⁵ Nupa tun ba zxön cuínguequi gula'chō'ōna tu yeru ga tsōjbixa', nupa na' bití' tun ca rnna xibá naguixju' Lí'.

⁸⁶ Idútē li nácagaca yúgu'tē xibá gunná bē'u. Lu yól-la' rizí' yē' qué'guequi ta'bia no neda'.

¡Gúcalen neda'!

⁸⁷ Gula'zóa ulu'sunítiē' neda' lu yōdzólió ni, pero biti' busán na'a xibá quiu'.

⁸⁸ Lu yól-la' dxi'i ládxi' quiu' busubán ládxa'a, para gapa chí'a le nunu' ba nalí len ruá' cuinu'.

Réajlē'ēru' xtídzē'ē Xanru'

⁸⁹ Rulidza' Lí', Xan.

Tsaz naguixju' xtídz'u' yehua' yubá.

⁹⁰ Gunu' ca rnna xtídz'u' quégaca bōnachi na'a dza, en yúgu'tē dza si' zaca. Gudixaj cazu' yōdzólió, ate' idía'tica'sō.

⁹¹ Ni'a que le gunná bē'u nacua' caz yúgu'tē ga ridxintē na'a dza,

tu' tun xichinu' yúgu'tè lè na'.

⁹² La'tu' cabí raza ládxa'a xibá naguixju' Li',
chigunítia' lu le busaca' zi' neda'.

⁹³ Catu caz gal-la ládxa'a yugu' xibá quiu',
tu' busubanu' ládxa'a ni'a quéguequi.

⁹⁴ Néquida' quiu'.

¡Busölá neda', tu' ruí'i ládxa'a xibá quiu'!

⁹⁵ Nupa tuá' dö' ta'bö' nisi neda' para ulu'suniti neda',
pero neda' güi'i ládxa'a le nunu' ba nalí.

⁹⁶ Chibilé'eda' ruúdxí que yúgu'tè le naca idútè yödzölió ni,
pero catu caz udxí que le gunná bē'u guntu'.

Nadxí'iru' xtídzē'ē Xanru'

⁹⁷ Nadxí'ide'eda' xibá naguixju' Li'.

Idú dza rizá' ládxa'a ca naca que.

⁹⁸ Réajni'iröda' ca nupa ta'dá'baga' neda'

tu' ruí'i ládxa'a yugu' le gunná bē'u, en tu' dá'tica'sa' léguequi.

⁹⁹ Réquibe'eröda' ca yúgu'tè nupa tu'sedi neda',

tu' rizá' ládxa'a le nunu' ba nalí.

¹⁰⁰ Réajni'iröda' ca yugu' bönni' gula,

tu' rapa chí'a xibá quiu'.

¹⁰¹ Gudapa chí'i cuína' para cabí guna' le cabí naca tsahui',

en para guna' ca rnna xtídz'u.

¹⁰² Biti' ca' nucá'ana' yugu' le nusédinu' netu',

le nusedí quézinu' neda'.

¹⁰³ Bica' zxixi nácagaca xtídz'u.

Ön, nácagacarö zxixi ca le zxixi que buz.

¹⁰⁴ Tu'zéajni' i xibá quiu' neda'.

Que lè ni na' réquida' zi' yúgu'tè le cabí naca.

Xtídzē'ē Dios ruzení' lu icja ládximo'oru'

¹⁰⁵ Ca tu bení' naca xtídz'u ga ridá',

en le ruzení' nöza ga ral-la' töda'.

¹⁰⁶ Guzxí' lu na'a bí guna', en nuna' tsutsu xtídz'a'a.

Gapa chí'a le nusédinu' netu' le naca tsahui'.

¹⁰⁷ Zoa le rusaca' zi' neda'.

Busubán ládxa'a, Xan, ugunu' dxin xtídz'u.

¹⁰⁸ Guzxí' yöl-la' ba rigu'a Li' len ru'a, Xan,

en buzéajni'i neda' yugu' le nusédinu' netu'.

¹⁰⁹ Zóatica'sö bönadxi gátia',

pero bití' ral-la ládxa'a xibá naguixju' Li'.

¹¹⁰ Nupa tuá' dö' bulu'zè tu du yalaj le sön neda',

pero bití' bucá'ana' xibá quiu'.

¹¹¹ Tsaz nazí' lu na'a le nunu' ba nalí,

ate' run ga rudzeja ládxa'a.

¹¹² Ruí'i ládxa'a gúntica'sa' ca ta'nná le gunná bē'u.

Guna' caní ga idxintè dza udxí.

Nagá'anaru' dxi'a ni'a que xtídzē'ē Dios

¹¹³ Réquida' zi' nupa nácagaca chopa ladxí',

pero nadxí'ida' xibá naguixju' Li'.

¹¹⁴ Nacu' ca tu ga rucachi' cuína', en le run chí'i neda'.

Runa' löza xtídz'u.

¹¹⁵ Guli'cuíta ga zoa', libí'ili' ruá'ali' dö',

tu' guna' ca ta'nná le gunná bē'ē Xana' Dios.

¹¹⁶ Buzóa neda' tsutsu, ugunu' dxin xtídz'u, ate' soa' ibana'.

Bití' gu'u lataj utuí'ida' ca naca le runa' löza.

¹¹⁷ Buzóa neda' tsutsu, ate' ulá',

en güi'ítica'sa' ládxa'a le gunná bē'u.

¹¹⁸ Nusán no'o yúgu'tè nupa nusángaca le gunná bē'u,

tu' naca yöl-la' sina' quéguequi le cabí nazaca'.

¹¹⁹ Ugú' nupa tuá' dö' luyú ni ca nu rugúa bēbu.

Que lè ni na' nadxí'ida' le nunu' ba nalí.

120 Rizzixi idútè le nayá' nabana' tu' rádxida' Li',
en rádxida' le gaca cate' usiúdxu' bônachi.

Ral-la' gunru' ca rnna xtídzë'ë Dios

121 Bena' le naca tsahui', en le naca li.

Biti' usán no'o neda' lu ná'agaca nupa tu'saca' zi' neda'.

122 Nacu' quia' neda', huen dxin quiu', le naca bë' gaca dxi'a quia'.

Biti' gu'u lataj ulu'saca' zi' neda' nupa tun ba zxon' cuínguequi.

123 Richí guió'j lahua' tu' ribóza' yöl-la' rusólá quiu',

enca' didza' tsahui' quiu'.

124 Lu yöl-la' dxi'i ladxí' quiu' ben quia' neda', huen dxin quiu',

ca rë'ëni quézinu' gunu'.

Busedi neda' yugu' le gunná bë'u.

125 Naca' huen dxin quiu'.

Benna quia' yöl-la' réajni' para gaca gúnbë'a le nunu' ba nalí.

126 Chibidxín dza bi gunu', Xan,

tu' gula'guitsjë' xibá naguixju' Li'.

127 Que lé ni na' nadxí'iróda' xibá naguixju' Li' ca nadxí'ida' oro.

¡Ön, ca oro banéquini,

128 en réquida' nácagacarö dxi'a xibá quiu' ca yúgu'tè le dë!

Biti' rilé'eda' dxi'a yúgu'tè le cabí naca.

Raca ladxí'ru' gunru' ca rnna xtídzë'ë Dios

129 Run ga rubánida' le nunu' ba nalí.

Que lé ni na' bö' naca caza' nazí' lu në'e le.

130 Cate' nalá' lahui xtídzu'u, ruzení' queétu'.

Run ga ta'yéajni' nupa nácagaca nōxaj ladxí'.

131 Gusalja' ru'a, en gunné ladxá'a,

tu' guzë ladxá'a xibá gunná bë'u.

132 Buyú neda', en buzá' ladxí' quia',

ca run cazu' quégaca nupa ta'dxi'i Li'.

133 Buzóa neda' tsutsu para guna' ca rnna xtídzu'u.

Biti' gu'u lataj le naca xihui' inná be'e neda'.

134 Buá'u neda' lu na' nu rusaca' zi' neda',

para gaca guna' ca naca xibá quiu'.

135 Ben ga gaca bë' nazí' lu no'o neda', huen dxin quiu',

en busedi neda' yugu' le gunná bë'u.

136 Raca nisa ribödxí' guió'j lahua' ca tu yegu gubó'o,

tu' cabí tun bônachi ca rinná bë' xibá quiu'.

Idutë li naca le rnna cazë' Xanru'

137 Nacu' Li' tsahui', Xan.

Dxi'a tsahui' naca le ruchi'a rusöröu' queetu'.

138 Nugú'u lu na'tu' le nunu' ba nalí.

Naca tsahui', en tsaz zoa.

139 Tu' ribóza' le naca quiu' run ga régui rilá ladxí'da'ahua',

ate' gulal-la ladxí' xtídzu'u nupa ta'dá'baga' neda'.

140 Idú dxi'a tsahui' naca xtídzu'u.

Que lé ni na' neda', huen dxin quiu', nadxí'ida' le.

141 Nōxaj ladxí' naca', ate' tu'cá'ana bônachi neda' cá'asö,

pero bití' ral-la ladxá'a le gunná bë'u.

142 Zóatica'sö le naca tsahui' quiu',

en idútë li naca xibá naguixju' Li'.

143 Ba bidxín le raca quia', en le rusaca' zi' neda',

pero raza ladxá'a xibá gunná bë'u.

144 Nácatica'sö tsahui' le nunu' ba nalí.

Buzéajni' neda' para soa' ibana'.

Ral-la' ulaba ladxí'ru' le gunná cazë' Dios

145 Idú ladxá'a rulidza' Li'.

Bubí' didza', Xan, ate' guna' ca naca le gunná bë'u.

146 Rulídzatica'sa' Li'.

Busólá neda', ate' guna' ca naca le nunu' ba nalí.

147 Riyasa' zí'alö ca ritó yu zila, en rulidza' Li' para gácalenu' neda'.

Riböza' yugu' didza' gu'u.

¹⁴⁸ Chi'i dzó'ölö rubéaja' yéla guiój lahua',
para ulaba ládxa'a ca naca xtídzu'u.

¹⁴⁹ Lu yöl-la' dxi'i ladxi' quiu' buzě nagu' chi'a.
Busubán ládxa'a, Xan, ca naca le nusédinu' netu'.

¹⁵⁰ Ta'biga' nupa tuá' dö' ga zoa' para ila'bía no neda'.
Nucá'anagaca xibá naguixju' Li'.

¹⁵¹ Zu' gala' ga zoa', Xan,
ate' idútě li naca le gunná bē'u.

¹⁵² Dza ni'te quez núnbē'a le nunu' ba nalí,
en nózda' tsaz nuzú' le.

Le gunná cazě' Dios run rē'u tsahui'

¹⁵³ Buyú le rusaca' zi' neda', en busólá neda',
tu' cabí ral-la ládxa'a xibá naguixju' Li'.

¹⁵⁴ Bubi'i didza' uláz quia', en buá'u neda'.
Busubán ládxa'a ca naca xtídzu'u.

¹⁵⁵ Zi'tu' zoa yöl-la' rusólá ga nacua' nupa tuá' dö',
tu' cabí tuí'i ládxi'gaca le gunná bē'u.

¹⁵⁶ Zxóntěro naca yöl-la' ruhuéchi' ladxi' quiu', Xan.
Busubán ládxa'a ca naca le nusédinu' netu'.

¹⁵⁷ Zíangaca nupa ta'bía no neda', en ta'dá'baga' neda',
pero bití' nucá'ana' le nunu' ba nalí.

¹⁵⁸ Bití' rilé'eda' dxi'a nupa nucá'anagaca Li',
en bití' tun ca rnna xtídzu'u.

¹⁵⁹ Buyú ca nadxí'ida' xibá quiu', Xan.

Lu yöl-la' dxi'i ladxi' quiu' busubán ládxa'a.

¹⁶⁰ Idútě li náca'gaca yúgu'tě xtídzu'u,
en tsaz nacua' yúgu'tě le nusédinu' netu' le náca'gaca tsahui'.

Ral-la' udódi cuínru' lu nē'ě Dios

¹⁶¹ Ta'bía no neda' nupa ta'nná bē', en bití' bi'bena' quéguequi,
pero runa' bal xtídzu'u lu icja ládxi'da'ahua'.

¹⁶² Rudzėjalenda' xtídzu'u,
ca rudzeja nu rudzöli tu yöl-la' tsahui' zxön.

¹⁶³ Réquida' zi', en bití' rilé'eda' dxi'a le cabí nácatě,
pero nadxí'ida' xibá naguixju' Li'.

¹⁶⁴ Gadxi luzuí tu dza rígu'a Li' yöl-la' ba,
ni'a que le nusédinu' netu', le naca tsahui'.

¹⁶⁵ Ta'bóza dxi'a tsáhui'do' nupa nadxí'igaca xibá naguixju' Li',
en bití' bi'run ga rójchégu'gaca.

¹⁶⁶ Runa' löza yöl-la' rusólá quiu', Xan,
en runa' ca rnna xibá nunu'.

¹⁶⁷ Yugu' le nunu' ba nalí tun chi'i bö' naca caza',
ate' nadxí'ide'eda' léguequi.

¹⁶⁸ Runa' ca ta'nná xibá quiu', en yugu' le nunu' ba nalí
tu' rilé'e quézínu' yúgu'tě le runa'.

Rudzėjalenru' xtídzě'ě Dios

¹⁶⁹ Ruzě nagu' le rulídza' Li', Xan.

Ruzéajni' neda' ca rnna xtídzu'u.

¹⁷⁰ Ruzě nagu' le rinábida' Li',
en busólá neda' ca rnna xtídzu'u gunu'.

¹⁷¹ Bē' neda' lataj cu'a Li' yöl-la' ba,
tu' rusédinu' neda' le gunná bē'u.

¹⁷² Bē' lataj gul-la lúdx'a'a ca naca xtídzu'u,
tu' náca'gaca tsahui' yúgu'tě xibá nunu'.

¹⁷³ Guzótaté gácalenu' neda',
tu' nabó'a' xibá quiu'.

¹⁷⁴ Rizé ládxa'a yöl-la' rusólá quiu', Xan,
en raza ládxa'a xibá naguixju' Li'.

¹⁷⁵ Bē' lataj soa ibán bö' naca caza' para cu'a Li' yöl-la' ba,
en ben ga gácalen neda' le nusédinu' netu'.

176 Ridöda' tsölá'alö ca tuba' bö'cu' zxila' nanítiba'.
Gudá dudilju' neda', huen dxin quiu', tu' cabí ral-la ládxa'a xibá nunu'.

120

1 Cate' gudí'i guzxáca'a bulidza'-në' Xanru',
ate' Lé' bubí'ë didza'.
2 Busölá bö' naca caza', Xan, lu na' nu rizi' yë',
en lu na' nu bití' run ca gunná caz.
3 Bizxi gunë' quiu' Dios, en bizxi ubi'ë quiu', li' na' rizi' yë'u?
4 Ichizë' li' yugu' yaga lahui tuchi' que nu reaj gudil-la,
en cu'ë icju' bo' yalaj que ya' yórido'.
5 Bica' bayechi' neda' tu' zóasa' yödzö Mesec,
en zoa' tu lu yu'u guídí quegaca bönachi Cedar.
6 Xidzélë'ë chiguzóa bö' naca caza'
len nupa tu' suniti yöl-la' riböza dxi'a tsáhui'do'.
7 Ré'ënda' cöza' dxi'a tsáhui'do', pero cate' ruá'a didza'
të'ënnë' ila' dí'l-lalen neda'.

121

1 Uchisa icja' uyúa' le raca yugu' lu guí'a.
¿Gazxi' za' le gácalen neda'?
2 Le gácalen neda' za' lu në'ë Xanru'.
Lë' benë' lúzxiba, en luyú.
3 Bití' gu'ë lataj cuilu' ga ridó'.
Bití' ca' gasi Nu na' run chí'i li'.
4 Buyútsöca', bití' ridödi yëla guiöj lahuë',
en bití' rásië', Lé' na' rapa chí'ë bönachi Israel.
5 Run chí'ë Xanru' Dios li'.
Zoë' Xanru' Dios cuitu' ibëla, rigu'ë li' zxul-la.
6 Bití' uzeguí' gubidza li' lahui' dza,
en bití' bi gun beo' quiu' chí'i dzö'ölö.
7 Gun chí'ë Xanru' Dios li' ga rizó'o, en ga rudxinu',
dza ni zóaru' na'a, en yugu' dza si' zaca.
8 Xanru' Dios gun chí'ë li' ga rizó'o, en ga rudxinu',
dza ni zóaru' na'a, en yugu' dza si' zaca.

122

1 Budzëjada' cate' gulë bönachi neda', gula'nná:
"Uyëajru' yu'u lidxë' Xanru' Dios."
2 Na' a zuíru' ni
ga nu riyaza yödzö Jerusalén.
3 Dxi'ado' gulunë' yödzö Jerusalén,
ate' naca lachi, en tuz ca röjlözgaca yu'u zxön que.
4 Ta'yaza yugu' cö' bönachi queë' Xanru' ga ni
ca na' nusédinë' Dios bönachi Israel,
para ila'gú'u yöl-la' ba Xanru' Dios.
5 Ta'bö' nupa tu'chí'a tu'sórö queëru' ga ni,
ga ta'bö' ta'nná bé' zxi'ini xi'sóë' David.
6 Guli'nábinë' Dios gunë' ga gaca dxi'a que Jerusalén,
en ga ulu'zì' xibé nupa ta'dxi'i yödzö ni yöl-la' tsahui'.
7 Dios gunë' ga ila'böza dxi'a tsáhui'do' nupa nacué' yödzö ni,
en ga ulu'zì' xibé nupa ta'nná bé' yöl-la' tsahui'.
8 Tu' nadxi'ida' yugu' böcha'a, en yugu' böchi' luzá'a,
rnná': "Gaca yöl-la' riböza dxi ladxí' lu yödzö ni."
9 Tu' nadxi'ida' lidxë' Xanru' Dios,
rinábida'-në' gunë' ga gaca dxi'a que yödzö ni.

123

1 Uchisa lahua' uyúa' ga zu' Li',
rö'u rinná bé'u yehua' yubá ni'.
2 Ca runë' bönni' nadó'o, ruyüë' bi ulu'ë xanë',
ate' ruyubi' bi'i nigula nadó'o bi ulú'unu nigula xanbi',

lësca' caní ruyuru' rë'u bi ulu'ë Xanru' Dios,
ga idxinrö dza uzá' ládxi'ë queëru'.

³ Buzá' ladxi' queëtu', Xan. Buzá' ladxi' queëtu',
tu' nacuá' nupa tu' cá'ana netu' cá'asö.

⁴ Rudú ládxi' tu' tu' titaj netu' nupa tu' zí' xibé yúgu'tè le dë,
en tu' cá'ana netu' cá'asö nupa tun ba zxön cuínguequi.

124

¹ "La'tu' cabí gúcalenë' Xanru' rë'u",
ral-la' ila' nná bönachi Israel:

² "La'tu' cabí gúcalenë' Xanru' rë'u
cate' nupa bití' ta'lé'e rë'u dxi'a gula' díl-lalen rë'u,

³ la' gulútité rë'u
tu' gula' léde'e rë'u.

⁴ Guca queëru' ca la' usubága'tè rë'u nisa,
en la' uchícjatëru' lu nisa na'.

⁵ La' uchícjatëru' tu lu nisa zila."

⁶ ¡Bica' lá' ayi Xanru' Dios
tu' cabí bí'ë lataj nupa bití' ta'lé'e rë'u dxi'a ulu'suniti rë'u!

⁷ Bularu' ca rulaba' biguínido' tu lu le zön lëba'.
Naröza' du yalaj, ate' nuláru'.

⁸ Le rácalen rë'u za' lu në'ë Xanru' Dios.
Lë' benë' lúzxiba, en lu yu.

125

¹ Nupa tu'zxóni ládxi'gaca Xanru' Dios náca gaca ca guí'a Sión,
tu' cabí bi gaca utá guí'a na', pero tsaz zoa caz.

² Ca rō'gaca guí'a idú gásibi'ilō yōdzō Jerusalén,
la' canisō zoë' Xanru' Dios idú gásibi'ilō bönachi queë',
na'a dza, en yúgu'tè dza si' zaca.

³ Bití' ral-la' ila' nná bë' nupa tuá' dö' lu xiyú gaca bönachi tsahui',
para cabí iún ga ilu'ë dö' bönni' tsahui' na'.

⁴ Xan, ben ga gaca dxi'a quégaca nupa náca gaca dxi'a,
en quégaca nupa idú ládxi'gaca tun ca rnna xtídz'u.

⁵ Nupa tu' dōdi cuínguequi lu le cabí nácatë,
ben léguequi xiguia' tsózxön len nupa tuá' dö'.
Ben ga ila'cuá' bönachi Israel dxi'a tsahui'do'.

126

¹ Cate' Xanru' Dios buchë'ë bönachi yōdzō Sión
nupa gula'dzún zítu', gúquiru' yélasō rineru'.

² Ní'irō idú ládxi'ru' buzídxiru',
en lu yöl-la' rudzeja queëru' gurōdxi'aru'.
Ní'irō gulufi' didza' bönachi yugu' yōdzō izá'a, gula'nná:
"Dios, Xángaqië', benë' le náca gaca zxön, gúcalenë' légaqië'."

³ Xanru' Dios benë' le náca gaca zxön, gúcalenë' rë'u,
ate' ruzí'iru' xibë'.

⁴ Buchë' netu', irúajtu' ga ni nadzuntu', Xan,
para gácatu' ca nisa rudxín lu yegu nuhuí'igaca.

⁵ Lu yöl-la' rudzeja ila' bōdxi'a cate' ila' lapa
nupa lu yöl-la' ribōdxi' quéguequi rōjōzagaca.

⁶ Nu bönni' lu yöl-la' ribōdxi' rizë'ë, nu'ë bínnedo' rōjōzë',
lu yöl-la' rudzeja cōdxi'ë cate' udxinë', nu'ë le nulapë'.

127

¹ Channō cabí runë' tsutsu Xanru' Dios tu yu'u,
nítisō tunë' dxin bönni' tunë' yu'u na'.

Channō cabí run chí'ë Xanru' Dios tu yōdzō,
nítisō ruyúë' bönni' na' yu'u lu në'ë yōdzō na'.

² Nítisō naca rubanu' zílado', en rōjōxu' cate' chigúl-lada',

en ragu' le guzxi'u ni'a que le busaca' zi' cuinu',
 tu' runnë' Xanru' Dios que nu nadxi'inë' cate' ni' rasi nu na'.
³ Buli'yú, nácacacabi' zxi'iniru' le runnë' Xanru' Dios queëru',
 ate' bí'ido' tu'cuá'anu nigula queëru'
 nácacacabi' le rubi'ë' Xanru' Dios queëru'.
⁴ Ca nácacaga yaga lahui' tuchi' lu na' nu bönni' rejë' gudil-la
 nácacacabi' zxi'inë' bönni' zoë' iz cuidi' queë'.
⁵ Bica' ba bönni' nacuá'abi' queë' ziantërobi'.
 Biti' ca' utuí'inë' cate' ru'ë' didza' láhui'gaquië'
 bönni' tu'chi'a tu'söröë' queë', en lógaca nupa ta'díl-lalen lë'.

128

¹ Bica' ba yúgu'të nupa tadxi Xanru' Dios,
 nupa na' tun ca rë'ëni quezinë' Lë'.
² Cate' gagu' le gata' quiu' ni'a que dxin nun cazu',
 uzi' u xibé lë na', en gaca dxi'a quiu'.
³ Gácanu nigula quiu' ca tu lubá uva dxía ga naca lö'a lidxu',
 ate' ilácabi' zxi'inu' ca yugu' yaga olívodo' ta'bö'öbi' ga ni' ráguli'.
⁴ Buli'yútsöca', caní gáquië' bica' ba
 bönni' na' rádxinë' Xanru' Dios.
⁵ Xanru' Dios zoë' Sión gunë' ga gaca dxi'a quiu',
 en gu'ë li' lataj ilé'enu' le dxi'a gaca que yödzö Jerusalén
 yúgu'të dza su' ibanu'.
⁶ Dios gu'ë li' lataj ilé'enu' yugu' zxi'ini xi'sú',
 en gunë' ga ila'böza dxi'a tsáhui'do' bönachi Israel.

129

¹ "Zian luzuí gula'bía no netu' ga gudela' nácatu' ra'bando",
 huáca ila'nná bönachi Israel:
² "Zian luzuí gula'bía no netu' ga gudela' nácatu' ra'bando',
 pero biti' gula'deli' ulu'xicja netu'.
³ Guca tsca bulu'gá'ana-ba' bëdxi lu bëla' cúdzu'tu',
 en gulún tunna ga gudödi xiyágaba' bëdxi quegaquië'."
⁴ Tshui' náquië' Xanru' Dios.
 Chinachúguë' du quegaca nupa tuá' dö' le gulúgui'ni netu'.
⁵ Ben ga ulu'tuí'i, en ulu'huécja guz cúdzu'lö
 yúgu'të nupa biti' ta'lé'e dxi'a netu', bönachi Sión.
⁶ Ben ga ilácacaga ca guíxi'do' da' ícjo'olö yu'u,
 le ribídxité cate' ni' naca huë'ënido'.
⁷ Biti' gaca ulí nê'e nu tsöjchugu le,
 en biti' gaca nu gachi tsólén guizxi que,
⁸ en biti' ta'nná nupa ta'dödi ni':
 "Rinábitu'-në' Xanru' Dios gunë' ga gaca dxi'a quiu'.
 Lu Lë' Xanru' rinábitu' Lë' gunë' ga gaca dxi'a quiu'."

130

¹ Ga ni nötjada' rulidza' Li', Xan.
² Ruzé nagu' chí'a, Xana' Dios.
 Ruzëda' nagu' le rinábida' Li'.
³ La' nnaru' tsöjnenu' xigua' nabága'gaca bönachi,
 çnuzxi caz urúaj tshui' lo', Xan?
⁴ Runiti lo cazu' netu', Xan,
 para guntu' Li' bal.
⁵ Runa' löza Li', Xana' Dios. Run löza bö' naca caza' Li',
 ate' runa' löza gaca ca rnna xtídu'u.
⁶ Bö' naca caza' runrö löza Li', Xan,
 ca tunë' bönni' tapa chi'ë yödzö chi'i dzö'ölö ta'bözë' itö yu zila,
 ca tunë' löza itö yu zila yugu' bönni' na'.
⁷ Gulí gún löza Xanru' Dios, libí'ili', bönachi Israel,
 tu' náquië' dxi'i ladxi' Xanru',

en ruhuá'uë' bönachi Israel.
 8 Xanru' Dios huóá'uë' bönachi Israel
 lu yúgu'të xigua' nabága'gaca.

131

1 Biti' run ba zxön cuina', Xan, en biti' rigú'u cuina' yöl-la' ba,
 en biti' ulapa' na'a le náca'gaca zxön, en le náca'gaca böniga.
 2 Idú ládxa'a nuzóa cuina' nõxaj, en zoa' dxisó.
 Ca runbi' bi'i huë'ëni ruzí' ládxi'bi' cuítanu xiná'abi',
 ca' ribóza bö' naca caza' lu icja ládxi'da'ahua'.

3 ¡Libí'ili', bönachi Israel, guli'gunë' löza Xanru' Dios
 ga naguela' na'a dza, en yúgu'të dza si' zaca!

132

1 Rinábida' Li', Xan, uláz queë' David tsöjnénu'
 yúgu'të le gudí'i guzxáque'ë,
 2 en ca benë' tsutsu xtídzë'ë, Xan, en guxzí' lu në'ë bi gunë' lo',
 nacu' Nu nál-latërö lálhuigaquië' xzí'ini xí'sóé' Jacob, gunné':
 3 "Biti' ca' tsu'a lidxa',
 en biti' gáta'a le ráti'da',
 4 en biti' gu'a lataj tódi yëla guiój lahua',
 en biti' utsudi' lahua',
 5 ga idxinrö dza ucóza' tu lataj ga soë' Xanru' Dios,
 le gaca yu' u lidxi Nu na' nál-latërö lálhuigaquië' xzí'ini xí'sóé' Jacob."
 6 Biyónitu' didza' que guí'ina lá'ayi queë' Dios cate' ni' zóatu' Efrata,
 ate' budzólitu' le lu xiyúë' Jaar.
 7 Uyéajru' ga na' zoa cazë' Xanru' Dios.
 Tseaj ládxi'ru'-në' ga naca xilibi ni'ë.
 8 Gudödi, Xan, ga na' soa cazu' Li'.
 Gudá tsözön len guí'ina lá'ayi que yöl-la' zxön quiu'.

9 Ben ga sóalen le naca tsahui' yugu' bixúz quiu'
 ca tu lari' ta'xóë' cúdzu'gaquië'.
 Ben ga ilúl-la bönachi quiu' lu yöl-la' rudzeja quéguequi.

10 Uláz queë' David, huen dxin quiu', rinábida' Li'
 cabí ucá'anu' bönni' na' guró cazu' Li'.

11 Xanru' Dios benë' tsutsu xtídzë'ë bi gunë' queë' David,
 le naca idútë li, ate' Lë' biti' unítë' xtídzë'ë na', gunné':
 "Uzóa' tuë' xzí'ini xí'sú' xilatju' ga inná bë'ëbi'.

12 Channö ilunbi' xzí'ini xí'sú' ca rnna didza' dzaga quia',
 en le nuna' ba nalí para uzéajni'ida' lé'gacabi',
 ila'nná bë'ëbi' ga rö'u rinná bë'u yúgu'të dza si' zaca."

13 Xanru' Dios nabö cazë' queë' yödzo Sión.

Raca ládxe'ë gaca Sión ga soa cazë' Lë'.

14 Rnnë': "Nácatíca'sö lataj ni ga soa caza' neda'.

Soa' ni tu' raca ládxa'a soa' ni.

15 Guna' ga gátada' le ilágugaca bönachi ni,
 en guna' ga ulu'huólaj ila'dzé'e yöta xtila
 nupa ta'yadzaj ta'yudxi lu yödzo ni.

16 Guna' ga sóalen yöl-la' rusölá yugu' bixúz quia'
 ca tu lari' ila'xóa cúdzu'gaquië',

ate' ilúl-la bönachi quia' lu yöl-la' rudzeja quéguequi.

17 Guna' ni ga ilá' lahui yöl-la' unná bë' queë' David.

Guna' ga sóaticá'só nu inná bë' xilatjé' bönni' na' nabö caza'.

18 Guna' ga sóalen nupa biti' ta'lé'e lë' dxi'a yöl-la' rutufí
 ca tu lari' ilácuguequi, pero tsépi yösa bení' le dxía icjé'."

133

1 Buli'yútsöca': ¡Bica' dxi'a tsahui' naca
 cate' nupa náca'gaca böchi' luzë'e

ta'böza lu yöl-la' tuz quéguequi!

² Naca ca le za ta'gú'u ícjaguequi bönachi,
le ridzún lu guitsa' láhuiguequi,
en bidzún lu guitsa' lúzxuë' Aarón,
le bidzún ga ridxintë lu yeni zxë'.

³ Naca ca buzén le ridinni lu guí'a Hermón,
en ca le ribö'a lu guí'a Sión,
tu' gunná bë'ë Xanru' gaca dxi'a queëru' lu guí'a na',
en gata' yöl-la' na'bán idú queëru'.

134

¹ ¡Buli'yútsöca'!

¡Guli'cu'ë Xanru' Dios yöl-la' ba, yúgu'tëli' runli' xichinë' Xanru',
yúgu'tëli' na' zóali' yu'u lidxë' Xanru' chi'i dzö'ölö!

² ¡Guli'chisa ná'ali' ga zóali' lataj lá'ayi queë',
en guli'nná dxi'a queë'!

³ Xanru' Dios, zoa cazë' yödzo Sión, gunë' ga gaca dxi'a queëli'.
Naca cazë' Nu ben yehua' yubá, en yödzólió ni.

135

¹ ¡Guli'cu'ë yöl-la' ba Xanru' Dios!

¡Guli'cu'u yöl-la' ba La la'ayi queë' Xanru' Dios!
¡Guli'cu'ë yöl-la' ba, libí'ili' runli' xichinë' Xanru',
² libí'ili' na' zuili' yu'u lidxë' Xanru',
ga na' zóali' lö'a que yu'u lidxë' Dios queëru'!

³ ¡Guli'cu'ë yöl-la' ba Xanru' Dios tu' náquië' dxi'a!
¡Guli'gul-la yöl-la' ba que La la'ayi queë', tu' naca lachi!

⁴ Nabó cazë' Xanru' zxi'ini xi'sóë' Jacob para ilaca quez queë'.
Guröë' bönachi Israel para ilequi queë'.

⁵ Nözda' nayépisë' Xanru' Dios.

Nayépisëtërë' ca yugu' dios quégaca bönachi izá'a.

⁶ Run cazë' Xanru' ca riyaza ladxí' cazë' yehua' yubá ni',
en luyú ni, en lu nísado', en zcan lu yu.

⁷ Runë' ga rö' böaj gátitës luyú ni,
en runë' ga rëpi yösa cate' ralaj guió.
Rubéajë' bö' recja ga rapa chi'ë le nequi queë'.

⁸ Bëtië' yugu' bi'i bönni' zí'aló quégaca bönachi Egipto,
zxi'inigaca bönachi, en böa' huë'ënido' quégacaba böa' guixi'.

⁹ Benë' yugu' yöl-la' huáca zxon le gulaca bë' luyú Egipto,
yugu' lë na' gulaca queë' Faraón, en quégaca huen xichinë'.

¹⁰ Busunítie' Dios bönachi zían yödzo izá'a,
en bëtië' bönni' lo ta'nná bë'ë.

¹¹ Bëtië' Sehón, bönni' gunná bé'enë' bönachi Amorreo,
en Og, bönni' gunná bé'enë' bönachi Basán,
en bönni' gula'nná bé'enë' bönachi yödzo nacua' luyú Canaán.

¹² Budödë' xiyúgaquië' bönni' na'
lu ná'agaquië' bönni' Israel, bönachi queë' cazë'.

¹³ Tsaz zoa caz Lo', Xan.

Ila'cuá'tica'sö nupa tsöjnégaca Li', Xan,

¹⁴ tu' uchi'a usöröu' bönachi queu', Xantu' Dios,
en huéchi' ládxi'u nupa tun xichinu'.

¹⁵ Budó' quégaca bönachi yugu' yödzo izá'a néquiniguequi
plata, en oro, yugu' le nungaca lu ní'a lu ná'agaca bönachi.

¹⁶ Zóagaca ruí'iguequi, pero biti' bi didza' tuí'i.

Zóagaca guió'j lóguequi, pero biti' bi ta'lé'e.

¹⁷ Zóagaca náagaca, pero biti' bi ta'yöni,
en biti' ta'guela' bö' ruí'igaca.

¹⁸ Nupa tun léguequi ilaca ca náagaca budó' na',
en caní ilaca yúgu'të nupa tu'zxöni ladxí' léguequi.

19 Libí'ili', bönachi Israel, guli'guié' Xanru' náquië' dxi'a.
 Libí'ili', zxf'ini xi'sóë' Aarón, guli'guié' Xanru' náquië' dxi'a.
 20 Libí'ili', zxf'ini xi'sóë' Levi, guli'guié' Xanru' náquië' dxi'a.
 Libí'ili', núlöli' rádxili'-në' Xanru', guli'guié' Xanru' náquië' dxi'a.
 21 Núlöli' zóali' yödzo Sión ral-la' guiéli'-në' Xanru' náquië' dxi'a,
 tu' zoa cazë' Xanru' Dios yödzo Jesusalén.

¡Guli'cu'ë yöl-la' ba Xanru'!

136

1 ¡Xclenë' Xanru' Dios tu' náquië' dxi'a!
 Zóatica'sö yöl-la' dxi'i ladxi' queë'.
 2 ¡Xclenë' Dios nayépisëtêrë' ca yugu' dios izá'a!
 Zóatica'sö yöl-la' dxi'i ladxi' queë'.
 3 ¡Xclenë' Xanru', nayépisëtêrë' ca yugu' xángaca bönachi!
 Zóatica'sö yöl-la' dxi'i ladxi' queë'.
 4 ¡Xclenë' Dios, tuzë' Lë' runë' yugu' yöl-la' huáca zxön!
 Zóatica'sö yöl-la' dxi'i ladxi' queë'.
 5 ¡Xclenë' Dios, len yöl-la' rácada' queë' benë' lúzxiba!
 Zóatica'sö yöl-la' dxi'i ladxi' queë'.
 6 ¡Xclenë' Dios, gudixjë' luyú láhuilö nísado'!
 Zóatica'sö yöl-la' dxi'i ladxi' queë'.
 7 ¡Xclenë' Dios, benë' gubidza, en beo'!
 Zóatica'sö yöl-la' dxi'i ladxi' queë'.
 8 ¡Benë' Dios gubidza para tsení' lahui' dza!
 Zóatica'sö yöl-la' dxi'i ladxi' queë'.
 9 ¡Benë' Dios beo', en yugu' böljaj para ulu'zení' chi'i dzö'ölö!
 Zóatica'sö yöl-la' dxi'i ladxi' queë'.
 10 ¡Xclenë' Dios, bëtië' yugu' bí'i bönni' lo quégaca bönachi Egipto!
 Zóatica'sö yöl-la' dxi'i ladxi' queë'.
 11 ¡Bubéajë' bönachi Israel ladaj bönachi Egipto na'!
 Zóatica'sö yöl-la' dxi'i ladxi' queë'.
 12 ¡Len yöl-la' huáca zxön queë', en lu yöl-la' nadxi' queë' benë' caní!
 Zóatica'sö yöl-la' dxi'i ladxi' queë'.
 13 ¡Xclenë' Dios, bubéajë' choplö Nísado' Xiná!
 Zóatica'sö yöl-la' dxi'i ladxi' queë'.
 14 ¡Benë' ga gula'dódi bönachi Israel gatsaj láhui'lö nísado' na'!
 Zóatica'sö yöl-la' dxi'i ladxi' queë'.
 15 ¡Lu nísado' na' busunitié' Faraón, en bönni' queë' rójáquië' gudil-la'!
 Zóatica'sö yöl-la' dxi'i ladxi' queë'.
 16 ¡Xclenë' Dios, guchë'ë bönachi queë' la' guixi' ga ni' naca yu bidxi!
 Zóatica'sö yöl-la' dxi'i ladxi' queë'.
 17 ¡Xclenë' Dios, bëtië' bönni' gula'nná bë'ë, guláquië' nal-la'!
 Zóatica'sö yöl-la' dxi'i ladxi' queë'.
 18 ¡Bëtië' bönni' gula'nná bë'ë, dëda' lu ná'agaquië' yöl-la' unná bë'!
 Zóatica'sö yöl-la' dxi'i ladxi' queë'.
 19 ¡Bëtië' Sehón, bönni' gunná bé'enë' bönachi Amorreo!
 Zóatica'sö yöl-la' dxi'i ladxi' queë'.
 20 ¡Bëtië' Og, bönni' gunná bé'enë' bönachi Basán!
 Zóatica'sö yöl-la' dxi'i ladxi' queë'.
 21 ¡Budödë' xiyúgaquië' lu ná'agaca bönachi queë'!
 Zóatica'sö yöl-la' dxi'i ladxi' queë'.
 22 ¡Budödë' le lu ná'agaca bönachi Israel, bönachi tun xichinë'!
 Zóatica'sö yöl-la' dxi'i ladxi' queë'.
 23 ¡Yöjnenë' rë'u cate' ni' bugá'anaru' cá'asö!
 Zóatica'sö yöl-la' dxi'i ladxi' queë'.
 24 ¡Busölë' rë'u lu ná'agaca nupa gula'díl-lalen rë'u!
 Zóatica'sö yöl-la' dxi'i ladxi' queë'.
 25 ¡Rugahuë' yúgu'të bönachi!
 Zóatica'sö yöl-la' dxi'i ladxi' queë'.
 26 ¡Xclenë' Dios, zoa cazë' yehua' yubá!
 Zóatica'sö yöl-la' dxi'i ladxi' queë'.

137

¹ Ra' yegu nacuá' lu yu Babilonia gurō'ōtu',
en gurōdxi yéchi'tu', cate' yōjnetu' yōdzō Sión.

² Lu yaga rō'gaca yugu' ra' yegu ni'
bugála'tu' yugu' le rúl-lalentu'.

³ Caní bentu' tu' gula'nabi yudxi nupa gulaché' netu' nadzuntu' ni' gúl-latu'.
Nupa bulu'saca' zi' netu' gula'naba queétu' yól-la' ruzxidxi, gula'nná:
"Guli'gul-la queétu' tu le rul-la que yōdzō Sión."

⁴ ¿Nacxi caz gaca gúl-latu' le rul-la queé' Xanru'
ga ni nadzuntu' tu lu yōdzō izá'a?

⁵ Channō gal-la ládxa'a yōdzō Jerusalén,
rinábida'-nē' Dios ugúé' yól-la' raca que na'a ibēla.

⁶ Rinábida'-nē' guné' ga ta' lúdxa'a chíchja'
channō cabí tsōjneda' ladza',
en channō cabí huí' zxōnra' yōdzō Jerusalén ca ia'tú le ruzí'ida' xibé.

⁷ Yōjné le guluné' zxi'ini xi'sóé' Edom, Xan,
le guluné' dza busiúdxu' yōdzō Jerusalén,
ca na' gula'nné': "Guli'quinnaj dēra.
Guli'quinnaj dēra ga idxintē xilibi zō'ō yōdzō na'."

⁸ Libí'ili', bōnachi Babilonia, libí'ili' rusunítli',
bica' ba nu ubí'i queéli' ca na' benli' queétu'.

⁹ Bica' ba nu quela' yugu' bí'ido' queéli'
en uzxuzxaj légcabi' yugu' lu guiōj.

138

¹ Idú ládxa'a guía' Li', "Xclenu" Xan.

Gul-la' yól-la' ba quiu' lógaca le tun zxōn bōnachi yugu' yōdzō izá'a.

² Uzóa zxiba' saca' yudo' lá'ayi quiu', en guía' Li', "Xclenu"
ni'a que Lo', tu' nacu' dxi'i ladxi', en runu' ca rnna didza' bē'u,
tu' benu' ca naca lu xtídzu'u, en lu le naca ca nazí'i lo.

³ La' dza ná'asō cate' bulidza' Li', bubi'u didza'.

Tu' butipú' ládxa'a, guca' rugu ladxi'.

⁴ Yúgu'té bōnni' ta'nná bē'ē ilé' Li': "Xclenu" Xan,
cate' ila'yōnné' didza' ru'u.

⁵ Ilul-lé' ca nácgaca le runé' Xanru' Dios,
tu' nácatērō zxōn yól-la' ba queé' Xanru'.

⁶ Sal-la' nayépisētērē' Xanru' Dios
ruf'i ládxe'ē nupa nácgaca cá'asō,
pero zi'tu' zí'tu'sō ruyúé' nupa tun ba zxōn cuínguequi.

⁷ Sal-la' ridá' ga zoa bōnadxi quia', Li' utipa cazu' ládxa'a.
Tíl-lalen cazu' nupa ta'díl-lalen neda',
ate' len yól-la' huáca quiu' usóló' neda'.

⁸ Xanru' gun cazé' quia' ca chinuzóa cazé' guné'.

Zóatica'sō yól-la' dxi'i ladxi' quiu', Xan.

Biti' usán no'o le nun cazu' len na' cuinu'.

139

¹ Ruyú cazu' le yu'u icja ládxi'da'ahua', Xan, en nunbē' cazu' neda'.

² Nōz quézinu' cate' ribō'a, en cate' riyasa'.

Nōzinu' le rizá' ládxa'a ni' zu' zi'tu'.

³ Ruyú cazu' neda' cate' bi runa', en cate' rasia',
en nōzinu' yúgu'té le runa'.

⁴ Zí'atélō ca bi didza' ru'a,
chí nōz quézinu' bi innía', Xan.

⁵ Rōjnōru cazu' lahua', en za' cazu' cúdza'a,
en naxóatica'sō no'o neda'.

⁶ Run ga rubánida' tu' nōz quézinu' Li'.

Biti' séqui'da' tséajni'ida' ca naca.

⁷ ¿Naru' huáca tseja' ga biti' idxín Bō' quiu'?

¿Naru' huáca izxúnnaja' ga biti' zoa cazu' Li'?

⁸ La'tu' huabena' lúzxiba, ni' soa cazu' Li',
en la'tu' huótja' lataj chul-la, ni' zoa cazu' ca'.

⁹ La'tu' uyija' ga rilén gubidza,
o la'tu' huadóda' ia'tsólá'aló nisado',

¹⁰ ni' caz iché'u neda',

ate' len no'ó ibéla sôn cazu' neda'.

¹¹ La'tu' innía': "Ucachi' neda' le naca chul-la",

en la'tu' huóaca chul-la bení' zóalen neda',

¹² biti' gaca chul-la lo' Li' lē na' naca chul-la quia',

pero chí'i dzó'óló gaca quiu' ca lahui' dza.

Tuz ca nácgaca lo' Li' le naca chul-la, en le naca lahui' dza.

¹³ Nun cazu' Li' le zoa icja ládxi'da'ahua'.

Benu' ga guya' lé'enu xiná'a le naca caza'.

¹⁴ Guía' Li': "Xclenu'" tu' run ga rubánida' ca nun cazu' neda',

ate' rádxida' Li' tu' tun le nunu' ga rubánida',

ate' bō' naca caza' nōzi caz naca caní.

¹⁵ Biti' bigachi' lo' le naca caza' cate' ni' si' galja',

cate' ni' yu'a lé'enu xiná'a.

¹⁶ Bilé'e quézinu' neda' cate' ni' si' galja',

tu' chinuzúajgaca lu guichi quiu'

yugu' dza ral-la' soa' ibana',

sal-la' biti' ridxini nitú dza na'.

¹⁷ Nazáca'tērógaca quia' le rizá' ládxi'u, Dios.

Ziántērō nácgaca lē na' rizá' ládxi'u.

¹⁸ La'tu' huáca nu ulaba léguequi,

ilácgaca ziántērō ca nácgaca guíoj yuzxi.

Cate' rubana', ni' zóalena' Li'.

¹⁹ Raca ládxa'a usunítui' nupa tuá' dō', Dios.

Que lē ni na', guli'cuíta ga zoa', núlōli' rútili' bōnachi.

²⁰ Tuí'i didza' zi' ca nacu' Li', Dios,

ate' nupa ta'dá'baga' Li' ta'nnē liz que Lo'.

²¹ ¿Naru' cabí rileda' nupa ta'lé Li', Xan?

¿Naru' cabí ruzó'a' tsólá'aló nupa ta'dá'baga' Li'?

²² Idú ládxa'a biti' rilé'eda' léguequi dxi'a.

Nuzó'a' léguequi ca nupa ta'díl-lalen neda'.

²³ Buyú neda', Dios, en gúquibe'e le zoa icja ládxi'da'ahua'.

Guzxí' bē' neda', en gúquibe'e le rizá' ládxa'a.

²⁴ Buyú channō zóalen neda' le naca dō',

en buluí' neda' nōza tsahuí' quiu' zóatica'sō.

140

¹ Busólá neda', Xan, lu ná'agaca nupa tuá' dō'.

Ben chí'i neda' para cabí bi ilunē' bōnni' zi' quia'.

² Ta'zá' ládxi'ē le nácgaca xihui' ilunē',

en tunē' ga ila'díl-lalen bōnachi luzé'eguequi.

³ Didza' tu'ē tun ga nácgaca lúdxí'gaquiē' ca yugu' bēla sínia'.

Yu'u ruá'agaquiē' le naché' yól-la' guti' ca le dxía lu láyi'ba' bēla na'.

⁴ Ben chí'i neda', Xan, para cabí bi ilunē' bōnni' tu'ē dō' quia'.

Ben chí'i neda' para cabí bi ilunē' bōnni' zidzaj quia',

bōnni' na' té'ēnē' ilunē' ga ichixi iníguida'.

⁵ Nupa tun ba zxón cuínguequi nucáchi'gaca le sôn neda',

enca' du yalaj irōli neda'.

Nucáchi'gaca du yalaj ga ral-la' tōda'.

Nucózagaca le ila'zón neda'.

⁶ Gudxa'-nē' Xanru': "Nacu' Dios quia'.

Ruzé nagu', Xan, yugu' le rinábida' Li'.

⁷ Xana' Dios, naca cazu' Nu rusólá neda' len yöl-la' huáca quiu'.

Ben chí'i cazu' icja' cate' ni' zoa' lu gudil-la.

⁸ Biti' gu'u lataj, Xan, gaca quia' le ré'ëné' guné' bönni' ru'ë dö'.

Biti' gu'u lé' lataj idéli'né' le rizá' ládxe'ë, para cabí tsépisé'.

⁹ Nacuá' nupa nagú'ugaca neda' lé'ajlō.

Busubaga' ícjagaquië' dö' té'ëné' ilu'ë quia'.

¹⁰ Ben ga ila' bixaj bo' yalaj lahui ícjagaquië'.

Bé' lataj tsójtásagaquië' tu lu guí' zxon,

en yugu' lu yeru zila ga bití' ila' zéqui'né' ulu'rúajé'.

¹¹ Biti' gu'u lataj soé' bönni' rizi' yé'ë luyú ni.

Ben ga udxín queé' bönni' zidzaj dö' ru'ë."

¹² Nózda' guné' Xanru' ga ulu'rúaj tsahui' nupa ta'guí' ta'zaca',
en uchi'a usóróë' quégaca bönachi yechi'.

¹³ Le nácaté ilé Li': "Xclenu'" nupa nácacaga tsahui' tu' tu'lidza Lo'.
Ila'cuá' ga zoa cazu' Li' nupa nácacaga dxi'a.

141

¹ Rulidza' Li', Xan. Gudáchi ga zoa'.

Ruzé nagu' chí'a cate' rulidza' Li'.

² Buyú le rulidza' Li' ca dzön yalaj le ridxín lo',

en cate' richisa na'a, buzí' le ca tu bóa'do' uzégui'a-ba' lo'.

³ Ben chí'i ruá'a, Xan,

en gudapa chí'i guídi ruá'a para cabí gu'a didza' zi'.

⁴ Biti' gu'u lataj gaca ládxa'a le cabí nácaté,

para cabí guna' le naca xihui'

len yugu' bönni' tutië' bönachi.

Biti' gu'u lataj guna' léguequi tsözxön.

⁵ Bé' lataj gu'ë neda' bönni' tsahui' lu yöl-la' nadxí' queé'

para uzéajni'iné' neda'.

Le guné' gaca quia' ca le za cu'ë icja'.

Biti' gu'u lataj tá'baga' icja' le ilún nupa tuá' dö'.

Rinábida' Li' uzagu' xinözguequi.

⁶ Ila'ládzu'gaquië' bönni' lo' quéguequi lé'e guí'a guiöj,

ate' iléquibe'e gulaca dxi'a didza' bé'a.

⁷ Ca raca cate' nu rugá'ana-ba' bédxi, en rulá'a yu,

ca' gaca que dxita yú'ugaquië',

le gulásilasi ra' ba que xilátjagaca nupa nátigaca.

⁸ Richisa lahua' ruyúa' ga zu' Li', Xantu' Dios.

Rucachi' cuina' ga na' zu'. Biti' usán no'o neda'.

⁹ Ben ga bití' tsöjbixa' lu le sön neda', lé na' nucáchi'gaca,

en ga bití' tsójtásaza' lu du yalaj nucözagaca nupa tuá' dö'.

¹⁰ Bé' lataj ila'yaza la' cuíngacasö lu du yalaj bulu'cachi' nupa tuá' dö',

pero benna lataj tódisa' neda' ga na' nagachi' du yalaj na'.

142

¹ Rulidza'-né' Xanru', ru'a zidzaj didza'.

Ráta'yua' lahuë' Xanru' uzá' ládxe'ë quia'.

² Rudöda' lahuë' yöl-la' rinaba yudxi quia',

en rusiyönda' Lé' le rácacaga quia'.

³ Cate' budú ládxa'a,

gunözi quézinu' Li' le guca quia'.

La' nöza ga ridá' neda'

bulu'cachi' le sön neda'.

⁴ Buyú cuita' íbëla

tu' cuntu nu zoa nu ruí'i ladxi' neda'.

Biti' bi zoa le gácalen neda'.

Cuntu nu run chí'i bö' naca caza'.

⁵ Gurödxi'a lo' Li', Xan, gunnía':

Run chí'i cazu' neda' Li',
 en naca cazu' Nu rácalen neda' ladaj nupa nabángaca.
 6 Ruzě nagu' le rulidza' Li',
 tu' nagá'ana' cá'asö.
 Busölä neda' lu ná'agaca nupa ta'zóa regu' neda',
 tu' nácatërögaca nál-la ca neda'.
 7 Guléaj bö' naca caza' lu yu'u lidxi guíë,
 para gaca guía' Li': "Xclenu'" tu' rulidza' Lo'.
 Nupa nácgaca tsahui' ulu' dubi idú gásibi'ilö ga zoa',
 tu' gunnu' sizxöni quia' le riquinda'.

143

1 Ruzě nagu' le rulidza' Li', Xan.
 Ruzě nagu' le rinabi yúdxida' Li'.
 Tu' runu' ca rnna didza' bē'u, en nacu' tsahui' gunnú'
 2 bití' ichē'u neda' lo' ga uchi'a usöröu' quia', huen dxin quiu'.
 Cuntu nu zoa naca tsahui' lo' Li'.
 3 Nu bití' rilé'e neda' dxi'a zoa regu' bö' naca caza'.
 Nuzöjtjē' yöl-la' na'bán quia' lu yu.
 Benē' ga zoa' lataj naca chul-la ca raca quégaca nupa gulati dza ni'te.
 4 Que lé ni na' rudú ládxa'a, en rö'a böniga.
 5 Rójneda' dza chígula'dödi.
 Rizá' ládxa'a ca nácgaca le benu' Li'.
 Ribequi icja' ca nácgaca le nun no'o.
 6 Richisa na'a zaca' ga zu' Li'.
 Rizě ládxa'a Li' ca tu luyú bidxi rizě ladxi' nisa guiöj.
 7 Bubi'itē didza', Xan, tu' rudú ládxa'a.
 Bití' ucachi' lo' lahua' neda',
 para cabí gaca' ca tu bönni' ru'ë lataj chul-la ga nacua' nupa nátigaca.
 8 Ben ga yönda' yugu' zila ca naca yöl-la' dxi'i ladxi' quiu',
 tu' ruzxöni ládxa'a Li'.
 Busēdi neda' ca ral-la' guna',
 tu' ruchisa' lo' Li' bö' naca caza'.
 9 Busölä neda', Xan, lu ná'agaca nupa bití' ta'lé'e neda' dxi'a.
 Nacu' Nu ruzóa neda' tsutsu.
 10 Busedi neda' para guna' ca rē'enu' Li',
 tu' naca cazu' Li' Dios quia'.
 Bē' lataj ichē' Bö' Lá'ayi quiu' neda' lu nöza tsahui'.
 11 Butipa ládxa'a, Xan, para gaca yöl-la' ba que Lo'.
 Tu' nacu' tsahui' busölä neda' lu le raca quia'.
 12 Lu yöl-la' dxi'i ladxi' quiu' guchugu quégaca nupa bití' ta'lé'e neda' dxi'a.
 Busuniti yúgu'tē nupa tu'saca' zi' bö' naca caza',
 tu' naca' huen dxin quiu'.

144

1 jYöl-la' ba Lē, Xanru' Dios!
 jNáquiē' ca tu guiöj ga zoa' tsutsu!
 Rutipē' na'a para gaca tseja' gudil-la,
 en rutipē' ca' xibön na'a para gaca tíl-lalena' bönni' nácaquie' nál-la.
 2 Naca cazē' Xanru' yöl-la' dxi'i ladxi' quia',
 enca' ca tu ga zoa' tsutsu lu gudil-la.
 Rusölē' neda', en náquiē' ca tu ga zoa' tsaz.
 Náquiē' ca tu le run chí'i neda' lu gudil-la, ate' rucachi' cuina' ga na' zoē'.
 Runē' ga tun nupa rinná bé'eda' ca rnna didza' ru'a.
 3 ¿Bíxatē caz náquiē' bönni' tu' runu' lē' ba lá'ana, Xan?
 ¿Bíxatē caz náquiē' bönni' tu' ru'i ladxi' cazu' lé'?'
 4 Naca cazē' bönni' na' ca tu bö'do' recja,
 ate' yugu' dza zoē' nabanē' nácgacasó ca tu xzul-la le rigú'u tu böaj ridödisö.
 5 Buzötaj lúxiba, en bdinne ni, Xan.
 Gudán yugu' gu'a, ate' irúaj dzön lē'eguequi.
 6 Ben ga tsépi yösa quiu', en bésilasi léguequi.

Busé yugu' yaga lahui tuchi', en ben ga ila'bõ' baguf'isõ.

⁷ Bulí no'o ga na' zu' xitsá'alõ.

Busõlá neda', en guléaj neda' lu ná'agaca bõnachi zi'tu',
le gaca ca rubéaju' neda' lu nisa zila.

⁸ Ta'zi' yè' bõnachi na',
ate' le cabí nácatè naca yõl-la' unná bè' quéguequi.

⁹ ¡Gul-la' quiu' Li', Dios, tu le cubi!
¡Gul-la' quiu' yõl-la' ba, en quínnia' bihuël-la nuá' chi du que!

¹⁰ Rusõlá cazu' bõnni' ta'nná bè'è.

Busõló' David, huen dxin quiu', lu gué tuchi' queè' bõnni' ru'è dõ'.

¹¹ Gúcalen neda', en busõlá neda' lu ná'agaca bõnachi zi'tu'.

Ta'zi' yè' bõnachi na',
ate' le cabí nácatè naca yõl-la' unná bè' quéguequi.

¹² Ben ga ilácabi' bi'i bõnni' queétu' ni yu'ugacabi' iz cuidi'
ca yugu' yaga nazxõngaca,
en ben ga ilácabi' bi'i nigula queétu'
ca nácagaca ya'zxén que tu yu'u nazaca'.

¹³ Ben ga ilígaca yu'u queétu' zxoa' za utúbitu',
en ben ga ilájjaba' gayuá' gayuá'aba' chíbodo',
en bõ'cu' zxíla'do' ga nucuá'atu'-ba'.

¹⁴ Ben ga ulu'cuá'aba' bõa' hué'énido' quégaca bõa' guixi' queétu',
en ga bití' bi gaca quégacaba' bédxi zxõn, en bédxido' ca'.
Bití' gu'u lataj soa nu cõdxi yechi' la' nõza que ládzatu'.

¹⁵ ¡Bica' bágaca bõnachi raca caní quéguequi!
¡Bica' bágaca bõnachi na' Xanru' Dios náquiè' Dios quéguequi!

145

¹ ¡Guna' Li' zxõn, Dios!

¡Nacu' Nu rinná be'e neda'!

¡Gádxítica'sa' Lo', Xana' Dios!

² ¡Tu dza tu dza cu'a Li' yõl-la' zxõn,
en cú'utíca'sa' Lo' yõl-la' ba!

³ ¡Nayépisètèrè' Xanru' Dios, ate' cú'uru'-nè' yõl-la' ba!
¡Bití' ca' gaca gúnbè'èru' ca naca yõl-la' zxõn queè'!

⁴ Yúgu'tè bõnachi ila'gú'u yõl-la' ba le nun cazu' Li',
para ulu'siyõn xí'inígaca,
en ulu'lui' lahui le nácagaca zxõn benu'.

⁵ Sa' ládxa'a ca naca yõl-la' zxõn que yõl-la' unná bè' quiu',
en ca nácagaca yõl-la' huáca zxõn runu'.

⁶ Iluí' didza' yúgu'tè bõnachi ca naca yõl-la' zxõn
quégaca yõl-la' huáca runu'.

Úsiyõnda' bõnachi ca naca yõl-la' zxõn quiu'.

⁷ Idú ládxi'gaca iluí' didza' cate' tsõjnégaca yõl-la' dxi'i ládxi' zxõn quiu'.
Lu yõl-la' rudzeja quéguequi ila'bõdxi'a tu' nacu' tsahuí'.

⁸ Xanru' Dios ruzá' ládxi'è' queèru', en ruhuéchi' ládxi'è' rē'u.
Bití' ilética'sè', ate' zxõntèrõ naca yõl-la' dxi'i ládxi' queè'.

⁹ Runé' Xanru' Dios le naca dxi'a quégaca yúgu'tè bõnachi,
en ruhuéchi' ládxi'è' yúgu'tè le nuné'.

¹⁰ Yúgu'tè le nunu' ilè Li': "Xclenu'" Xan,
ate' nupa néquiguequi quez quiu' ilún Li' zxõn.

¹¹ Iluí' didza' ca naca yõl-la' zxõn que le rinná bè'u,
en ulu'lui' lahui yõl-la' zxõn quiu',

¹² para ulu'siyõn bõnachi ca nácagaca le zxõn runu',
en ca naca yõl-la' zxõn que le rinná bè'u le nayépisètèrõ.

13 jZóatica'sò le rinná bè'u,
ate' idíá'tica'sò yòl-la' unná bè' quiu'!
jLu le naca idú ladxi' quee' runè' Dios ca rnnágaca yúgu'tè didza' ru'è,
en lu yòl-la' dxi'i ladxi' quee' runè' yúgu'tè le runè'!

14 jRòjzönè' Xanru' yúgu'tè nupa ròjtsò'ògaca,
en ruchisè' yúgu'tè nupa ndínnegaca!

15 jYúgu'tè bönachi tu'yú Li', Xan,
ate' runödzu' le ilágugaca cate' ridxín dza que!

16 jRusalaj cazu' no'o
en rugagu' yúgu'tè le nacuá' nabángaca!

17 Náquiè' tsahui' Xanru' Dios ca naca yúgu'tè le runè'
en náquiè' ca' dxi'i ladxi'.

18 Zoè' Xanru' gala' ga nacuá' yúgu'tè nupa tu'lidza Lè',
nupa na' tu'lidza Lè' idú ládxi'guequi.

19 Gunnè' le ta'zè ládxi'gaca quégaca nupa tadxi Lè'.
Riyönnè' cate' tu'lidza Lè', en rusölè' léguequi.

20 Run chi'i cazè' Xanru' yúgu'tè nupa nadxí'igaca Lè',
pero usunítie' nupa tuá' dö'.

21 Len ru'a cuina' cu'a-nè' Xanru' yòl-la' ba,
ate' yúgu'tè bönachi ilúntica'sò Lè' zxon.

146

1 jGuli'cu'è yòl-la' ba Xanru'!

jLi', bö' naca caza', gulu'è yòl-la' ba Xanru'!

2 jCu'a-nè' Xana' yòl-la' ba tsanni ni zoa' nabana'!

jGul-la' yòl-la' ba quee' Dios quia' tsanni ni zoa bö' naca caza'!

3 Biti' uzxöni ládxi'li' bönni' ta'nná bè'è,
en caléga bönni' tati cazè', bönni' biti' ca' gaca ulu'sölè' rè'u.

4 Rurúaj bö' yu'è nu bönni', ate' ruhuóáquiè' yu.

La' dza ná'asò riniti le rizá' ládxe'è gunè'.

5 Bica' ba bönni' rácalenè' Dios quee' Jacob lé',
bönni' na' runè' lóza Xanru' Dios.

6 Nunè' Xanru' Dios lúzxiba, en luyú ni,
enca' nísado', en yúgu'tè le nacuá' yugu' lataj na'.

Rúntica'sè' Lè' ca rnna didza' bè'è,

7 en ruchi'a rusóròè' nupa zoa nu rusaca' zi' léguequi.

Rugagu' cazè' nupa ta'dún.

Rusanè' Xanru' Dios nupa nadzúngaca.

8 Rusaljè' Xanru' Dios guiój lógaca nupa náçagaca lo chul-la.

Ruchisè' Xanru' Dios nupa nadzò'ògaca.

Nadxí'inè' Xanru' Dios nupa náçagaca tsahui'.

9 Rapa chi'è Xanru' Dios yugu' bönni' zi'tu'.

Rácalenè'-bi' yugu' bi'i uzèbi, enca' yugu' nigula uzèbi,

pero ruzagué' xinózguequi nupa tuá' dö'.

10 Inná bè'tica'sè' Xanru' Dios.

Náquiè' Dios queèli', bönachi Sión.

jGuli'cu'è yòl-la' ba Xanru'!

147

1 jGuli'cu'è yòl-la' ba Xanru'!

jTsahui' naca gúl-laru' yòl-la' ba quee' Dios queèru'!

jNaca lachi, en le ral-la' gunru', cú'uru'-nè' yòl-la' ba!

2 Runè' Xanru' Dios ga rizxon yödzò Jerusalén.

Rutubè' bönni' Israel násilasigaquiè'.

3 Ruúnè' bönni' náçagaquiè' yechi' ladxi',

en rudè'è lari' ga dxíagaquiè' huè'.

4 Rulabè' tsca nacuá' bölaj lúzxiba.

Nucu'ë lágacaba' tu tuba' yúgu'të böläj na'.
 5 Nayépisëtërë' Xanru' Dios, en näl-latërë'.
 Ga rë'ë dzu réajni'inë' yúgu'të.
 6 Xanru' Dios rácalenë' nupa ta'guí' ta'zaca'.
 Ruzötjë' nupa tuá' dö' lu yu.

7 ¡Guli'gul-la queë' Xanru' Dios, guiëli'-në': "Xclenu"!
 ¡Guli'gul-la yöl-la' ba queë' Xanru', quínmili' lë'egaca bihuél-lado'!

8 Riguísië' yugu' böaj lúzxiba,
 en risól-lë'ë nisa guiöj luyú.
 Runë' ga rilén yö yugu' lu guí'ado'.
 9 Rugahuë' yugu' böa' guíxi'do',
 enca' bóiquaijado' ta'bödxi'aba'.
 10 Biti' raza ládxë'ë yöl-la' näl-la queë'ba' böa',
 en biti' ruzi'ë xibë yöl-la' näl-la queë' bönni'.
 11 Raza ládxë'ë Xanru' Dios nupa tadxi Lë',
 nupa na' tun löza yöl-la' dxi'i ladxi' queë'.

12 ¡Guli'cu'ë yöl-la' ba Xanru', libí'ili' zóali' Jerusalén!
 ¡Guli'cu'ë yöl-la' ba Dios queë'li', libí'ili' zóali' Sión!

13 Bucu'ë tsutsu le tu'baga' gapa nu riyaza yödzö queë'li',
 en runë' ga raca dxi'a queégaca xzí'inili' ga na' zóali'.
 14 Runë' ga ribözali' dxi'a tsáhui'do',
 en runë' ga ruhuölaj ridzé'eli' zxo'a' xtila dxi'atërö.
 15 Rinná bé'enë' yödzölió ni,
 ate' xtidzë'ë ridödité gáti'tës.
 16 Risól-lë'ë guiöj bögui' ca zxila',
 en riguísië' buzén ca dö.
 17 Riguísië' bögui' ca yugu' guiöj ruaj.
 ¿Nuzxi caz gaca guá' ilén le naca ziaga queë'?
 18 Risól-lë'ë xtidzë'ë, ate' ruúna' bögui' na'.
 Runë' ga recja bö', ate' ruhuóáca nisa.
 19 Ruí'ilenë' xzí'ini xi'sóë' Jacob didza',
 en riguíxjë' xibá queë' para ilún bönachi Israel ca rnna.
 20 Biti' benë' caní n'a queégaca bönachi ia tú yödzö izá'a,
 ate' biti' nözigaca ca náca'gaca le gunná bë'ë.

¡Guli'cu'ë yöl-la' ba Xanru'!

148

1 ¡Guli'cu'ë yöl-la' ba Xanru'!
 ¡Guli'cu'ë yöl-la' ba, libí'ili' zóali' yehua' yubá!
 ¡Guli'cu'ë yöl-la' ba, libí'ili' zóali' xitsá'aló!
 2 ¡Guli'cu'ë yöl-la' ba, libí'ili' gubáz lá'ayi queë'!
 ¡Guli'cu'ë yöl-la' ba, libí'ili' tscali' dá'ali' Lë'!
 3 ¡Guli'cu'ë yöl-la' ba, libí'ili' gubidza, en beo'!
 ¡Guli'cu'ë yöl-la' ba, libí'ili' böläj bení'!
 4 ¡Guli'cu'ë yöl-la' ba, libí'ili' zóali' zxan lúzxiba!
 ¡Guli'cu'ë yöl-la' ba, libí'ili' nisa, zxóali' láhuilö lúzxiba!
 5 ¡Guli'cu'ú yöl-la' ba La la'ayi queë' Xanru', yúgu'tëli',
 tu' bé'ëse' didza', en canísö benë' libí'ili'!

6 Naguíxjë' tsaz libí'ili'.
 Naguíxjë' xtidzë'ë le catu caz tódi que.

7 ¡Guli'cu'ë yöl-la' ba Xanru' iduté yödzölió,
 en libí'ili' böa' ridali' lu nísado', en nísado' caz,
 8 en libí'ili' guí', en guiöj bögui' yöla sunna, bögui', en böaj,
 enca' li', bö' budunu', runu' ca rnna xtidzë'ë,
 9 en libí'ili' yugu' guí'a, en yúgu'të guí'ado',
 en libí'ili' yaga dxi'agaca le ta'bia, en yugu' yaga dxi'a,

10 en libí'ili' böa' guixi', en böa' bédxi,
 böa' tá'ayöj lè'èba' lu yu, en böa' zoa xiligacaba',
 11 enca' libí'ili' rinná b'é'èli' yòdzölió, en bönachi yugu' yòdzö izá'a,
 yugu' xzí'inigaquiè' bönni' ta'nná b'é'è, en bönni' ruchí'a rusórolí' yòdzölió,
 12 enca' libí'ili' bi'i bönni', en bi'i nigúlado',
 yugu' bönni' zxön, en yugu' b'í'ido'
 13 ¡Guli'cu'ú yöl-la' ba La la'ayi queè' Xanru'
 tu' nayépisètèrö tuzè' Lè'!
 ¡Nayépisètèrö yöl-la' ba queè' ca luyú ni, en ca lúzxi ba xitsá'!

14 Nuchisè' tu le nuzóa tsutsu bönachi queè',
 le naca yöl-la' ba ta'gú'u Lè' nupa néquiquequi queè',
 yugu' xzí'ini xi'sóé' Israel, nupa na' nadxí'inè'.

¡Guli'cu'è yöl-la' ba Xanru'!

149

1 ¡Guli'cu'è yöl-la' ba Xanru'!
 ¡Guli'gul-la queè' Xanru' Dios tu le cubi,
 en guli'gul-la yöl-la' ba queè' ga nudúbigaca nupa néquiquequi quez queè'!

2 Ral-la' ulu'z'í xibé' Xanru' Dios bönachi Israel,
 tu' náquiè' Nu ben léguequi.

Ral-la' ulu'dzéjalen Dios nupa nacuá' Sión,
 tu' náquiè' Nu rinná be'e léguequi.

3 Ral-la' ila'gú'u yöl-la' ba La la'ayi queè',
 en lu yöl-la' rudzeja ulu'yá'a lahuè'.

Ral-la' ilúl-la' yöl-la' ba queè', ila'capa' lè'e guídi,
 en ila'quínni lè'egaca bihuél-lado',

4 tu' raza ládxé'è Xanru' Dios bönachi queè'.
 Uchisè' nupa ta'guí'i ta'zaca', en usólé' léguequi.

5 Nupa néquiquequi quez queè' ral-la' ulu'dzeja ládxí'gaca lu bení' queè'.
 Lu yöl-la' rudzeja quéguequi ral-la' ilúl-la' queè' cate' ni' dégaca lu le ráti'gaca.

6 Yöl-la' ba queè' Xanru' Dios ral-la' sóatica'só ruí'iguequi,
 en tu guíè tuchi' natuchi' iropa la'a lu ná'agaca,

7 para ulu'z'í lèbi bönachi yugu' yòdzö izá'a,
 en ilún xigua' bönachi izá'a na',

8 para ilúguè'è bregui' guíè ná'agaquiè' bönni' ta'ná bé'enè' bönachi yòdzö izá'a na',
 en ulu'cu'è bregui' guíè yen ná'agaquiè' bönni' lo quégaquiè',

9 para ilunè' quéguequi ca nachuguè' Dios gaca quéguequi.
 Naca lè ni le run bal nupa néquiquequi quez queè' Dios.

¡Guli'cu'è yöl-la' ba Xanru'!

150

1 ¡Guli'cu'è yöl-la' ba Xanru'!

¡Guli'cu'è yöl-la' ba Dios lu lataj lá'ayi queè'!

¡Guli'cu'è yöl-la' ba ga dèda' lataj queè'!

2 ¡Guli'cu'è yöl-la' ba ca nácagaca le zxön nunè'!

¡Guli'cu'è yöl-la' ba ca naca yöl-la' zxön queè'!

3 ¡Guli'cu'è yöl-la' ba, ucódxili' lúzgacaba' chivo!

¡Guli'cu'è yöl-la' ba, quínnili' lè'egaca bihuél-la ca'!

4 ¡Guli'cu'è yöl-la' ba, cápa'li' lè'e guídi, en uya'ali'!

¡Guli'cu'è yöl-la' ba, quínnili' lè'egaca bihuél-la, en ucódxili' gui!

5 ¡Guli'cu'è yöl-la' ba, utíl-lali' guíè lè'e luzé'e!

¡Guli'cu'è yöl-la' ba, utíl-lali' guíè zxön lè'e luzé'e!

6 ¡Guli'cu'è yöl-la' ba Xanru', tscali' rizi'ili' bõ'!

¡Guli'cu'è yöl-la' ba Xanru'!

DIDZA' DXI'A BUZÚAJĚ' MATEO

Yugu' xuz xině'e gudōdi queē' Jesús

(Lc. 3:23-38)

¹ Ni ruzúaja' lágaquiē' xuz xině'e gudōdi queē' Jesucristo. Nabábagaquiē' David, enca' Abraham xuz gudōdi queē'.

² Abraham gúquiē' xuzē' Isaac.

Isaac gúquiē' xuzē' Jacob.

Jacob gúquiē' xúzgaquiē' Judá, en yugu' bōnni' bōchě'ě.

³ Judá gúquiē' xúzgaquiē' Fares, en Zara, ate' Tamar gúcanu xiná'agaquiē'.

Fares gúquiē' xuzē' Esrom.

Esrom gúquiē' xuzē' Aram.

⁴ Aram gúquiē' xuzē' Aminadab.

Aminadab gúquiē' xuzē' Naasón.

Naasón gúquiē' xuzē' Salmón.

⁵ Salmón gúquiē' xuzē' Booz, ate' Rahab gúcanu xině'ě.

Booz gúquiē' xuzē' Obed, ate' Rut gúcanu xině'ě.

Obed gúquiē' xuzē' Isai.

⁶ Isai gúquiē' xuzē' David.

David na' gunná bé'eně' bōnachi Israel, ate' butsaga ná'aleni'-nu nigula na' gúcanu zí'aló nigula queē' Úrias, ate' David, en nigula ni guláquiē' xuz xině'ě Salomón.

⁷ Salomón gúquiē' xuzē' Roboam.

Roboam gúquiē' xuzē' Abías.

Abías gúquiē' xuzē' Asa.

⁸ Asa gúquiē' xuzē' Josafat.

Josafat gúquiē' xuzē' Joram.

Joram gúquiē' xuzē' Úzías.

⁹ Úzías gúquiē' xuzē' Jotam.

Jotam gúquiē' xuzē' Acaz.

Acaz gúquiē' xuzē' Ezequías.

¹⁰ Ezequías gúquiē' xuzē' Manasés.

Manasés gúquiē' xuzē' Amón.

Amón gúquiē' xuzē' Josías.

¹¹ Josías gúquiē' xúzgaquiē' Jeconías, en yugu' bōnni' bōchě'ě.

Yugu' bōnni' ni gula'cu'ě dza ni' cate' yugu' bōnni' Babilonia gula'chě'ě bōnachi Israel nadzúngaca lu xiyúgaquiē'.

¹² Jeconías gúquiē' xuzē' Salatiel.

Salatiel gúquiē' xuzē' Zorobabel.

¹³ Zorobabel gúquiē' xuzē' Abiud.

Abiud gúquiē' xuzē' Eliaquim.

Eliaquim gúquiē' xuzē' Azor.

¹⁴ Azor gúquiē' xuzē' Sadoc.

Sadoc gúquiē' xuzē' Aquim.

Aquim gúquiē' xuzē' Eliud.

¹⁵ Eliud gúquiē' xuzē' Eleazar.

Eleazar gúquiē' xuzē' Matán.

Matán gúquiē' xuzē' Jacob.

¹⁶ Jacob gúquiē' xuzē' José.

José ni gúquiē' bōnni' queēnu María, ate' María ni gúcanu xině'ě Jesús, lě' ca' Cristo, Bōnni' na' tun lōza bōnachi judío guídě' idinná bé'eně' légaquiē'.

¹⁷ Caní naca, gulaca chidá' cō' di'a dza ga gusí lo zoē' Abraham ga bidxintě zoē' David, ate' gulaca ca' ia'chidá' cō' di'a dza ga gusí lo zoē' David ga bidxintě dza yugu' bōnni' Babilonia gula'chě'ě bōnachi Israel nadzúngaca, ate' gulaca ca' ia'chidá' cō' di'a dza ga gusí lo dza ni' gula'chě'ě léguequi ga bidxintě dza guljě' Cristo.

Yugu' le guca cate' guljě' Jesucristo

(Lc. 2:1-7)

¹⁸ Caní guca cate' guljě' Jesucristo. Cate' ni' chinazí lu ná'abi' María, xině'ě Jesucristo utsaga ná'aleni' José, en zí'atělo cate' sí' utsaga ná'aleni'-bi', en cabí ne sóaleni'-bi', guyú'ubi' tubi' bí'ido' lě'ěbi' María na'. Guca caní ni'a que yōl-la' huáca queē' Dios Bō' Lá'ayi.

¹⁹Náquië José na', bönni' queëbi' María, bönni' tsahui', pero biti' gú'unnë' uzéguië'-bi' didza' lógaca bönachi. Gú'unnë' ulá'alenë'-bi' bagáchi'sö. ²⁰Tsanni ni' rizá' ládxe'ë José ca na' gunë', bulufi' lahuë' gubáz lá'ayi queë' Xanru' lahuë' José lu yëla bëchigal, en gudxë' lë':

—José, xzi'ini xzi'sóë' David. Biti' gádxinu' si'u-bi' María, para gácabi' nigula quiu', tu' yú'ubi' bi'i bönni'do' lë'ëbi' ni'a que yöl-la' huáca queë' Dios Bõ' Lá'ayi. ²¹Gáljabi' tubi' bi'i bönni'do' queëbi', ate' gu'u labi' gaca, tu' usölábi' bönachi queëbi' lu dul-la' nabága'gaca.

²²Caní guca yúgu'të lë ni para gaca lë na' gunnë' Xanru' lu ru'ë bönni' bë'ë didza' uláz queë' Dios, gunnë':

²³Buli'yútsöca', tu nigula ra'bando',

tsú'ubi' bí'ido' lë'ëbi',

ate' gáljabi' tubi' bi'i bönni'do',

ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

²⁴Cate' bubanë' José lu yëla bëchigal, benë' ca na' gudxë' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'. ²⁵Biti' guzóalenë'-bi' cate' bidxinrö dza chigúlajbi' bi'i bönni'do' queëbi', bi'i zí'aló queëbi', ate' gulu'ë labi' Jesús.

2

Bönni' ta'yéajni'inë' ridiyúgaquië' bí'ido' Jesús

¹Cate' gúljabi' Jesús lu yödzo Belén, luyú Judea, rinná bë'ë Herodes luyú ni', ate' bila'dxinë' bönni' ta'yéajni'inë' Jerusalén, narúajgaquië' tu yödzo dë saca' ga rilén gubidza. ²Gula'nabë' bönni' ni, ta'nnë':

—¿Gazxi zóabi' bí'ido' na' ral-la' inná bé'ëbi' bönachi judío, bí'ido' na' si' gúljabi'? Cate' ni' zóatu' ga rilén gubidza bilé'etu'-ba' bôlaj bení' naca bë' chigúlajbi', ate' za tu' ni para tseaj ládxi'tu'-bi'.

³Cate' gúquibe'enë' Herodes, bönni' rinná bë'ë, lë ni, guró'ödë' böniga, en lësca' caní gula'bõ' böniga yúgu'të bönachi nacua' Jerusalén. ⁴Ní'irö Herodes na' bulidzë' yúgu'të bixúz unná bë', len bönni' yudo' tu'sédinë', ate' gunábinë' légaquië' gazxi ral-la' galjé' Cristo, bönni' na' tunë' löza bönni' judío ilá' lahuë' para inná bé'ëni' légaquië'. ⁵Të' lë':

—Lu yödzo Belén luyú Judea. Caní naca tu' buzúajë' tu bönni' bë'ë didza' uláz queë' Dios le rnna caní:

⁶Biti' nácarö cá'asö yödzo Belén luyú Judá lahuë' Dios

ca nácacaga yödzo gapa nacua' nupa ta'nná bë' luyú ni,

tu' irúajë' tu bönni' yödzo Belén, en gáquië' lo,

bönni' na' gun chí'ë bönachi Israel quia'.

⁷Ní'irö Herodes bulidzë' bagáchi'sö bönni' ta'yéajni'inë' na', en gunábinë' légaquië' para inözinë' dxi'a gáca'xte chiguca bulufi' lahui bôlaj na' bila'lé'enë'. ⁸Ní'irö gusól-lë'ë légaquië' tsójáquië' Belén. Rë' légaquië':

—Guli'tséaj ni', en guli'tsójnaba dxi'a nacxi naca queëbi' bí'ido' na'. Cate' chibidzölili'-bi', ididixjoi'ili' neda', para tseja' ca' neda', tseaj ládxa'a-bi'.

⁹Gudödi bila'yönnë' didza' bë'ë Herodes na', sójáquië' bönni' ta'yéajni'inë' na', ate' bôlaj na' bila'lé'enë' cate' ni' nacu'ë ládzaquië' sójnóruba' lógaquië' ga bidxintë yöjsóa ga na' dëbi' bí'ido' na'. ¹⁰Cate' bila'lé'enë' bôlaj na', bulu'dzëjade'enë'. ¹¹Cate' gula'yázië' yu'u, bila'lé'enë'-bi' bi'i bönni'do' na', zóalenbi'-nu María, xiná'abi'. Bulu'zóa zxibigaquië' lobi', en gula'yéaj ládxi'gaquië'-bi'. Gudödi na' gula'saljé' yugu' yóxaj queégaquië', ate' bulu'nödzejë' queëbi' oro, en yalaj, en nórüdo' rilá' zxiq que yaga mirra. ¹²Tu' chibuzéajni'inë' Dios légaquië' lu yëla bëchigal para cabi' tsójhuójquië' ga zoë' Herodes na', que lë ni na' yójhuójquië' ládzaquië' nöza yúbólö.

José, en María, ta'chë'ë-bi' Jesús luyú Egipto

¹³Gudödi bulu'zë'ë yugu' bönni' ta'yéajni'inë' ni', bulufi' lahuë' tuë' gubáz lá'ayi queë' Xanru' lu yëla bëchigal, ga na' dë' José, en rë' lë':

—Guyaschi. Guchë'-bi' bí'ido' ni, enca' xiná'abi', ate' buzxunnaj ni. Guyéaj luyú Egipto, ate' ugá'anu' ni' cate' guiëra' li' ia'tú. Caní gunu' tu' uguiljé' Herodes bí'ido' ni para gútië'-bi'.

¹⁴Ní'irö guyasë' José, en ni' naca chí'i dzó'ölö, guchë'ë-bi' bí'ido' na', enca' xiná'abi', ate' yójáquië' luyú Egipto. ¹⁵Bulu'gá'anë' ni' cate' gútirë' Herodes. Caní guca para gaca lë na' gunnë' Xanru' Dios lu ru'ë tu bönni' bë'ë didza' uláz queë', gunnë': “Ga naca luyú Egipto bulidza' Xzi'ina'.”

Risöl-lë'ë Herodes bönni' ilútië'-bi' bi' huë'enido' nacua'abi' yödzo Belén

¹⁶Cate' gúquibe'enë' Herodes biti' gulunë' bönni' ta'yéajni'inë' ca rnnë', gulënë', ate' gunná bé'enë' bönni' tsójáquië' ni' para ilútië'-bi' yúgu'tëbi' bi'i bönni'do' nacua'abi' yödzo

Belén, en idú gásibi'lò ga dè Belén na', yugu' b'í'ido' chiyú'ugacabi' chopa iz, en b'í'ido' nahué' ènigacaròbi'. Caní bené' ca busáquié' queé' Herodes na', tsa chiguca dza buluf'i lahui bôlaj na', dza na' bulu'zèajni'iné' bônni' ta'yéajni'iné' na' lè'. ¹⁷ Caní guca, bidxín lè na' gunné' Jeremías, bônni' b'è'è didza' uláz queé' Dios, gunné':

¹⁸ Lu yödzo Ramá riyõn ch'ígaca

nupa ta'bòdxi, en nupa ta'bòdxi yechi'.

Raquel ribòdxi nu ní'a quegacabi' xzí'ininu.

Biti' gaca nu hué tsahui' lènu, tu' chinátigacabi'.

¹⁹ Gudòdi gútié' Herodes na', ní'irò buluf'i lahué' gubáz lá'ayi na' queé' Xanru' lu yèla béchigal lahué' José ga ní' zoé' luyú Egipto, ate' rè' lè':

²⁰ —Guyasa. Guché'-bi' bi'i bônni'do' ni, enca' xiná'abi', ate' bôaj luyú Israel, tu' chigulatié' bônni' ní' gulé'enné' ilútié'-bi' bi'i bônni'do' ni.

²¹ Ní'irò guyasé' José, ate' guché'-bi' bi'i bônni'do' na', enca' xiná'abi', ate' yòhuòjquié' luyú Israel. ²² Cate' gúquibe'ené' José rinná b'è'è Arquelao luyú Judea tu' chigútié' Herodes, xuzé' Arquelao na', que lè ni na' gúdxiné' José huòjé' ni'. Cate' buzéajni'iné' Dios lè' lu yèla béchigal, guyijé' luyú Galilea. ²³ Cate' bidxiné' ni', yòjsóé' lu yödzo Nazaret. Caní guca para gaca lè na' gula'nné' yugu' bônni' gulu'è didza' uláz queé' Dios ca ral-la' gaca queé' Jesús, si' Lè', Bônni' Nazaret.

3

Juan, bônni' ruquilé' bônachi nisa runé' libán lu lataj cá'asó

(Mr. 1:1-8; Lc. 3:1-9, 15-17; Jn. 1:19-28)

¹ Yugu' lu dza ní' buluf'i lahué' Juan, bônni' na' buquilé' bônachi nisa, en runé' libán lu lataj cá'asó luyú Judea. ² Juan na' rnné':

—Buli'bi'i ládxi'li', tu' chizóa idxín dza idinná b'è' Nu na' zoa yehua' yubá luyú ni.

³ Ca naca queé' Juan na', buzúajé' Isaias, bônni' b'è'è didza' uláz queé' Dios dza ní'tè, le rna caní:

Riyõn chi'è bônni' rulidzé' lu lataj cá'asó, rnné':

“Buli'pá'a nõza para idxín Xanru' ga zóali'.

Guli'béaj li yugu' nõza lasi tódé' lu icja ládxi'do'oli'.”

⁴ Nácuzé' zxé' Juan lari' néquini litsa'ba' b'ò'a', ate' núgué'è lè'è le néquini guídi. Rahué'-ba' b'òchi'zu, en re'jé' bidxindo' que buzdo'. ⁵ Yugu' bônni' yödzo Jerusalén len bônachi narúajgaca idú luyú Judea, en idú gásibi'lò ga dè yegu Jordán bila'dxiné' ga zoé' Juan na'. ⁶ Cate' gula'xóalépé' dul-la' nabága'gaquié', Juan na' buquilé' légaquié' nisa lu yegu Jordán na'.

⁷ Cate' bilé'ené' Juan ta'dxiné' zían bônni' yudo' fariseo len yugu' bônni' yudo' saduceo ga zoé' para ila'dilè' nisa, gudxé' légaquié':

—Libi'ili', di'a dza quegacaba' bèla sínia'. ¿Zoa nu buzéajni'i libi'ili' para izxúnajli' yòl-la' rusiúdxí na' si' gaca quegaca bônachi? ⁸ Guli'gún le gaca b'è' chibubí'i ládxi'li'. ⁹ Biti' cuéqui ícjali', bití' innali' nácali' tsahui' tu' naca Abraham xuz gudòdi queéli'. Rea' libi'ili', huáca guné' Dios ga ulu'huóaca yugu' guió'j nacua' ni di' a dza queé' Abraham. ¹⁰ Chizó'a ribóza guíé huáca para ichugu yugu' yaga le rulu'í ca gaca queéli'. Yúgu'té yaga bití' ta'bia le naca dxi'a, irúgugaca, ate' ila'gu'è léguequi lu guí'. ¹¹ Le nácaté neda' ruquila' libi'ili' nisa lu nisa, núlòli' chibubí'i ládxi'li', pero Bônni' na' ral-la' guíde' cate' tódi quia' neda', Lè' guné' le rulu'isó yòl-la' ridila nisa ni, uchizíé' libi'ili' Dios Bó' Lá'ayi len guí' queé'. Bônni' ni nácatéré' lo ca neda', ate' neda' bití' naca' lesaca' ilecja' xiráchué' nudé'è. ¹² Zóné' lu nè'è b'òc'ò' queé', le ulúbiné' ga ridxi'a xzoa' xtíla queé'. Cu'è xzoa' xtíla queé' lu yu'u' ga ní' gun chi'è le, pero uzéguí'è bèbu que lu guí', ate' guí' na' bití' ca' ulu.

Ridíle' nisa Jesús

(Mr. 1:9-11; Lc. 3:21-22)

¹³ Ní'irò buzé'è Jesús luyú Galilea, ate' bidxiné' ra' yegu Jordán ga na' zoé' Juan, para idilé' nisa lu nè'è Juan na'. ¹⁴ Juan buzágué'è xinözé', en rè' Jesús:

—Neda' ral-la' idila' nisa lu no'ò Li'. ¿Za'tso' Li' quia' neda'?

¹⁵ Bubi'è didza' Jesús, rè' lè':

—Benna lataj na'a, tu' caní ral-la' gunru' idúté le naca tsahui'.

Ní'irò Juan b'è'è Lè' lataj. ¹⁶ Cate' chinadilé' Jesús nisa, la' burúajté' lu nisa. Ní'irò guyalaj lúzxiba lahué' Jesús, ate' bilé'ené' ruhuójté' Dios Bó' Lá'ayi, en bidxiné' ga na' zoé', riné'è ca riná'aba' gu'dódo'. ¹⁷ Ní'irò biyõn chi'í nu ru'í didza' yehua' yubá, rna:

—Bônni' ni náquié' Xzí'ina'. Nadxí'ida' Lè', en raza ládxa' a Lè'.

4

Rë'ëni Satanás tu' xihui' ibaga' Jesús dul-la'

(Mr. 1:12-13; Lc. 4:1-13)

¹ Ní'irò la' guchè'tè' Dios Bò' Lá'ayi Jesús lu lataj cá'asò para gata' lataj si' bè' Satanás tu' xihui' Lè'.

² Idú choá' dza choá' yèla biti' bi gudahué' Jesús, ate' gudödi ni' ridunè'. ³ Ní'irò tu' xihui', nu na' run ga tá'bagá' bönachi dul-la', bidxín ga zoè' Jesús, en rë Lè':

– Channò nacu' idú Xzí'inè' Dios, gunná na' a ulu'huóaca guió'j nacuá' ni yöta xtila.

⁴ Bubi'è didza' Jesús, rë' le:

– Nazúaj lu guichi lá'ayi le rnna: “Calégasò yöta xtila nabánigaca bönachi, pero lësca' yúgu'tè didza' ru'è Dios nabánigaca bönachi.”

⁵ Ní'irò tu' xihui' guché' Jesús lu yödzo lá'ayi Jerusalén, ate' budxía Lè' ga naca xitsá' ícjo'olò yudo'. ⁶ Ní'irò tu' xihui' rë Lè', rnna:

– Channò nacu' Li' idú Xzí'inè' Dios, busuladzu' cuinu' ni, tu' nazúaj lu guichi lá'ayi le rnna:

Dios isöl-lè'è gubáz lá'ayi queé' para ilún chi'è Li',

ate' ulu'chisé' Li' lu ná'agaquié',

para cabí tsó'jchégu'u guió'j, en cabí gunu' zi' ni'u.

⁷ Bubi'è didza' Jesús, rë' le:

– Ia'stú nazúaj lu guichi lá'ayi, le rë bönachi, rnna: “Biti' ugunu' dxin Xanu' Dios.”

⁸ Ní'irò tu' xihui' guché' Jesús ga naca tu lu gu'a sibi, ate' ni' bulu'i Lè' yúgu'tè yödzo nacuá' yödzo'lió ni, en yúgu'tè yöl-la' tsahui' quéguequi. ⁹ Ní'irò rë Lè':

– Yúgu'tè lè ni udóda' lu no'o channò uzóa zxibu' lahua', en gunu' neda' zxon.

¹⁰ Jesús rë' le:

– Böaj quiu' li', Satanás tu' xihui', tu' nazúaj lu guichi lá'ayi le rë netu', rnna: “Xanu' Dios tseaj ládxi'u, en udódi cuinu' lu na' tuzè' Lè'.”

¹¹ Ní'irò buzá' Satanás tu' xihui' ga na' zoè' Jesús, ate' gubáz lá'ayi queé' Dios bila'dxiné' ga zoè', en gulácalenè' Lè', en gula'gu'è le gudahué'.

Risí lahué' Jesús runè' libán luyú Galilea

(Mr. 1:14-15; Lc. 4:14-15)

¹² Cate' biyönnè' Jesús nadzunè' Juan lidxi guié, guyijé' luyú Galilea. ¹³ Buzé'è yödzo Nazaret, ate' yöjsóé' lu yödzo Capernaum ga naca ra' nísado', lu buzá' quégaca bönachi Zabalón, en bönachi Neftalí. ¹⁴ Caní guca, bidxín lè na' gunné' Isaías, bönni' bè'è didza' uláz queé' Dios, gunné':

¹⁵ Luyú Zabalón, en luyú Neftalí,

la' nóza ra' nísado' ia'tsólá'a yegu Jordán saca' ga rilén gubidza.

Luyú Galilea, ga nacuá' bönachi biti' náccagaca judío.

¹⁶ Bönachi chul-la niti ni' bila'lé'e bení',

ate' bönni' ni' náccagaquié' ca nupa chinátigaca, gulén quégaquié' bení'.

¹⁷ Cate' ní'irò gusí lahué' Jesús runè' libán, en rë' bönachi ni':

– Buli'bí'i ládxi'li', tu' chizóa idxín dza idinná bè' Nu na' zoa yehua' yubá luyú ni.

Jesús rulidzè' tapé' bönni' uzxön böla para tsójtá'gaquié' Lè'

(Mr. 1:16-20; Lc. 5:1-11)

¹⁸ Cate' gudé' Jesús ra' nísado' que Galilea, bilé'ené' chopè' bönni'. Tué' lè' Simón, en zoa ia'tú lè' Pedro, ate' dzáguié' Andrés, bönni' böché'è, lè'. Chopè' ni ta'chiljé' yóxaj böla quégaquié' lu nísado' na' tu' náccagaquié' uzxön böla. ¹⁹ Jesús rë' légaquié':

– Gulí'dutá' neda', ate' guna' ga iché'èli' bönachi quia', gunli' ca runli' rizónli'-ba' böla.

²⁰ Chopè' ni la' bulu'cá' anaté' yugu' yóxaj böla quégaquié', ate' sójácalenè' Jesús.

²¹ Cate' gudodé' Jesús ia'lati' ní'ilo, bilé'ené' ia' chopè' bönni'. Tué' lè' Jacobo, ate' dzáguié' Juan, bönni' böché'è lè'. Náccagaquié' xzí'iné' Zebedeo. Nacu'è lè'e bárcodo' dzágaquié' Zebedeo, xúzgaquié', en tu'úné' yóxaj böla quégaquié'. Ní'irò Jesús bulidzè' chopè' ni para tsójtá'gaquié' Lè'. ²² La' bulu'cá' anaté' bárcodo' na', enca' xúzgaquié', ate' sójácalenè' Jesús.

Jesús rusédinè' bönachi zían

(Lc. 6:17-19)

²³ Gudé' Jesús idú luyú Galilea, rusédinè' bönachi gapa naca lu yu'u ga tu'dubé' bönni' judío, en tu'sèdè' queé' Dios. Bené' libán ni' que didza' dxi'a ca si' idinná bè'è Dios luyú ni', en buné' yúgu'tè nupa te'e tsca naca yödzo'hué' té'eguequi. ²⁴ Guzè' didza' que yöl-la' huáca queé' Jesús, ate' bila'yöni bönachi idú luyú Siria, ate' dujuá'gaquié' yúgu'tè bönni' té'ené' zían yödzo'hué' que quégaquié', en ta'guí'i ta'zaquié', ga zoè' Jesús. Dujuá'gaquié' ca' yugu' bönni' yú'ugaquié' bõ' xihui', en yugu' bönni' té'ené' hué' xjote', en yugu' bönni'

nacu'unigaquië' bin ni'a ná'agaquië', ate' Jesús bunë' yúgu'të bönni' na'. ²⁵ Bönnachi zían bila'ruajaca luyú Galilea, en yugu' yödzo Decápolis, en yödzo Jerusalén, enca' luyú Judea, en yugu' yödzo nacua' ia'tsólá aló yegu Jordán saca' ga rilén gubidza, ate' rójacalen Jesús.

5

Libán benë' Jesús ga naca lu gu'ado'

(Lc. 6:20-23)

¹ Cate' bilé'enë' Jesús bönnachi zían sójacalen Lë', ní'irö gurenë' tu lu gu'ado' ga naca xitsá'aló, ate' gurö'ë lu gu'a ni'. Ní'irö bulu'dubë' bönni' usëda queë' ga zoë'. ² Gusí lahuë' rusédinë' légaquië', rnnë':

³—Bica' ba yugu' bönni' téquibe'enë' ta'yádzjanë' le naca queë' Dios, tu' nadéli'gaquië' lataj ga rinná bë'ë Bönni' na' zoë' yehua' yubá.

⁴'Bica' ba yugu' bönni' tu'huí'ini ládxi'gaquië' tu' nabága'gaquië' dul-la', tu' huë' tsahuë'ë Dios caz légaquië'.

⁵'Bica' ba yugu' bönni' nácagaquië' nōxaj ladxí' lahuë' Dios, tu' gata' quégaquië' luyú ni.

⁶'Bica' ba yugu' bönni' ta'zë ládxi'gaquië' le naca tsahuí' lahuë' Dios, ate' raca quégaquië' ca raca quégaca nupa ta'dún, en ta'bidxi nisa, tu' gunë' Dios ga ulu'zi'ë xibé lé na' ta'zë ládxi'gaquië'.

⁷'Bica' ba yugu' bönni' tu'huechi' ládxi'gaquië' luzá'agaquië', tu' huechi' ládxë'ë Dios légaquië'.

⁸'Bica' ba yugu' bönni' naca tsahuí' icja ládxi'do'gaquië', en biti' bi dul-la' nabága'gaquië', tu' ila'lé'enë' Dios.

⁹'Bica' ba yugu' bönni' ta'bequi dxië' didza' bizxaj, tu' ila'zí' légaquië' xzí'ini cazë' Dios.

¹⁰'Bica' ba yugu' bönni' ta'zaca' ta'gui'ë lu le ta'bía ládxi'gaca bönnachi légaquië' cate' tunë' le naca tsahuí', tu' dë lataj quégaquië' ga rinná bë'ë Bönni' na' zoë' yehua' yubá.

¹¹'Bica' ba libí'ili' cate' tu'lidza bönnachi libí'ili' zi, en ta'bía ládxi'gaquië' libí'ili', ate' lu yöl-la' rizí' yë' ta'nnë' queë'li' le xihuí' tu' dá'ali' neda'. ¹² Buli'dzeja, en guli'chaza ládxi'li', tu' uzí'da'ali' xibé yehua' yubá. Ca raca queë'li', guca quégaquië' bönni' gulu'ë didza' uláz queë' Dios, en gula'cu'ë zí'atëló ca libí'ili', tu' gula'bía ládxi'gaca ca' bönnachi légaquië'.

Bönnachi dá'gaca Cristo ilaca ca zödi', en ca bení'

(Mr. 9:50; Lc. 14:34-35)

¹³ Gunnë' ca' Jesús:

—Libí'ili' nácali' ca zödi' luyú ni, pero channö initi zödi' na' yöl-la' siná'a que, biti' gaca gunru' ga huóaca siná'a. Bítirö naca lesaca', pero chinaca tu le chú'unaru', ate' ulu'libi bönnachi le.

¹⁴'Libí'ili' nácali' ca bení' yödzólió ni para ulu'ili' lahui le naca queë' Dios. Ral-la' gácali' ca tu yödzo rö'ö tu lu gu'a, tu' cabi gaca igachi' yödzo na'. ¹⁵ Cate' ruquéla'ru' guí', biti' rigú'uru' le tu xzan gu'ina, pero ruzóaru' le ga liná' para uzení' yúgu'të nupa nacua' lu yu'u'. ¹⁶ Ca na' run bení', ral-la' gunli' ca' libí'ili', güí'ili' lataj gaca bë' le nácali' lógaca yúgu'të bönnachi, para cate' ila'lé'e le naca tsahuí' runli', ila'gú'u-në' Xúzili' Dios zoë' yehua' yubá yöl-la' ba.

Rusédinë' Jesús que le gunná bë'ë Dios lu në'ë Moisés

¹⁷ Gunnë' ca' Jesús:

—Biti' guéquili' bida' para usunítia' yugu' le gunná bë'ë Moisés, o xibá na' bulu'sédinë' bönni' gulu'ë didza' uláz queë' Dios. Bida', caléga para usunítia' yugu' lé na', pero para ulu'a lahui iduté le tu'sedi lé na'. ¹⁸ Le nácatë' rea' libí'ili'. Tsanni nacua' lúzxi'ba, en yödzólió ni, biti' tōdi cá'asō nitú dídzá'do', en nitú le rinná bë' xibá na', cate' gácarö yúgu'të le ral-la' gaca. ¹⁹ Que lé ni na', nútí'tës bönni' quítsjë' tu xibá cuídí'do'os le zoa lu xibá na', en usédinë' bönnachi para ilún caní, bönni' ni gácatërë' cuídí'do'os ca yúgu'të nupa ila'cuá' ga rinná bë' Bönni' na' zoë' yehua' yubá, pero nútí'tës bönni' gunë' ca rinná bë' xibá na', en usédinë' bönnachi para ilún ca' caní, bönni' ni tsëpisëtërë' ga rinná bë' Nu na' zoa yehua' yubá. ²⁰ Rea' ca' libí'ili': Channö cabi gunli' le nácatërö tsahuí' ca le tunë' bönni' yudo' usedí, enca' ca tunë' bönni' yudo' fariseo, biti' ca' tsú'uli' ga rinná bë'ë Dios yehua' yubá.

Rusédinë' Jesús ca naca que nu rilé luzë'e

(Lc. 12:57-59)

²¹ Gunnë' ca' Jesús:

—Chibiyónili' ca gula'nnë' bönni' guta' lu ná'agaquië' le gulë' xuz xtó'oli': "Biti' gútili' bönnachi. Nu bönni' gútië' bönnachi, nabáguë'ë xíguia', ate' huadxinë' ga uchi'a usöröë' Dios lé." ²² Na'a, neda' rea' libí'ili': Nu bönni' rilënë' böchi' luzë'ë, nabáguë'ë xíguia' huadxinë' ga uchi'a usöröë' Dios lé'. Lë'sca' caní, nu bönni' innë' zí'ë queë' böchi' luzë'ë nabáguë'ë xíguia'

ulu'chi'a ulu'söröë' bönni' lo tu'chi'a tu'söröë' lë', ate' nu bönni' guié' luzë'ë: "¡Böa' canöz!" nabáguë'ë xíguia' tsójtú'ë lu guí' gabila.

²³ 'Caní naca, channö chizóa cu' u tu le unödzu' lu bucugu lá'ayi, ate' tsöjnenu' ni' zoa bizx que rilenë' böchi' luzó'o li', ²⁴ bucá'ana lë na' unödzu' lu bucugu ni', en bóaj lidxu'. Zí'alö yó'cá'ana tsahui' le benu' queë' böchi' luzó'o, ate' ní'ró gudá unödzu' lë na' nu'u.

²⁵ 'Channö zoa nu bönni' rinábinë' li' bi ubi' u queë', en ichë'ë li' ga uchi'a usöröë' tu bönni' li', budzágatë tsahui' bönni' na' tsanni ni' yú'ulenu' lë' nōza, para cabí udödë' li' lahuë' bönni' ruchi'a rusöröë', ate' bönni' ni udödë' li' lu në'ë bönni' rusayjë' lidxi guié', ate' lë' cu'ë li' lidxi guié' na'. ²⁶ Le nácatë rea' li', biti' ca' uruju' ni' cate' idxinrö dza quizzju' ga buitë le ral-lu'u.

Rusédinë' Jesús ca naca que nu riguitsaj xibá que yöl-la' nutsaga na'

²⁷ Gunnë' ca' Jesús:

—Chibiyónili' ca na' gula'nnë': "Biti' gunu' dul-la' le riguitsaj xibá que yöl-la' nutsaga na'." ²⁸ Na'a, neda' rea' libí'ili': Núti'tës bönni' ruyúë' tu nigula len yöl-la' rizë' ladxi' le ruá' dö', chibenë' dul-la' len lënu lu icja ládxi'da'ahuë'.

²⁹ 'Que lë ni na', channö guió'lo' ibëla gun ga gunu' dul-la', guléaj le, en gurú'una le. Gácarö dxi'a quiu' unítu' tu guió'lo', en calëga idúteo' tsójtú'u lu guí' gabila. ³⁰ Channö no'o ibëla gun ga gunu' dul-la', guchugu le, en gurú'una le. Gácarö dxi'a quiu' unítu' tu no'o, en calëga idúteo' tsójtú'u lu guí' gabila.

Rusédinë' Jesús ca naca que nu bönni' rulá'alenë' nigula queë'

(Mt. 19:9; Mr. 10:11-12; Lc. 16:18)

³¹ Gunnë' ca' Jesús:

—Lëscá' gula'nnë': "Núti'tës bönni' rusanë'-nu nigula queë', ral-la' unödzejë' queënu tu guichi le rnna rulá'alenë'-nu." ³² Na'a, neda' rea' libí'ili', channö zoë' nu bönni' rusanë'-nu nigula queë', en biti' zoa le ruá' dö' runnu, gunë' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni' yúbölo, ate' bönni' na' si'ë-nu nigula na', lëscá' gunë' dul-la' le riguitsaj xibá que yöl-la' nutsaga na'.

Rusédinë' Jesús ca naca que nu ruzötaj La la'ayi queë' Dios

³³ Gunnë' ca' Jesús:

—Lëscá' biyónili' ca yugu' bönni' guta' lu ná'agaquië' gulë' xuz xtó'oli', gula'nnë': "Biti' si' yë' u cate' run tsutsu xtídzu' u ni'a queë' Dios, en ral-la' gunu' lahuë' Xanru' Dios idútë lë na' run tsutsu xtídzu' u ni'a queë' Lë'." ³⁴ Na'a, neda' rea' libí'ili', biti' ca' gun tsutsu xtídza'li'. Biti' gun tsutsu xtídza'li' ni'a que yehua' yubá, tu' naca ga rö'ë rinná bë'ë Dios. ³⁵ Biti' gun tsutsu xtídza'li' ni'a que luyú ni, tu' naca luyú ni ca xilibi ni'ë Dios, en calëga ni'a que Jerusalén, tu' naca ladzë' Bönni' nayëpisëtë'rë' rinná bë'ë. ³⁶ Biti' gun tsutsu xtídzu' u ni'a que icju', tu' cabí gaca gunu' ga huóaca chiguichi o gasaj nitú guitsa' icju'. ³⁷ Ral-la' innásili': "Ön", o innásili': "Biti'", tu' naca que tu' xihui' le nadódi bë' ca náacagaca didza' ni.

Rusédinë' Jesús ca naca que nu ruzí' lëbi luzë'e

(Lc. 6:29-30)

³⁸ Gunnë' ca' Jesús:

—Chibiyónili' ca naca le gunná bë'ë Moisés, gunnë': "Nu bi run que guió'j lahui luzë'e, ubí' ca' que, enca' nu bi run que layi' luzë'e, ubí' ca' que." ³⁹ Na'a, neda' rea' libí'ili': Biti' tá'baga'li' nu guá' dö' queë'li', ate' channö nu capa' xagu' ibëla, bë' lataj capa' ca' ia' tú xagu' yögöla. ⁴⁰ Channö zoa nu gun ga uchi'a usöröë' tu bönni' li', en cuë' xzo', bë' ca' queë' lari' rixóa cúdz'u. ⁴¹ Channö zoa nu gun bayudxi gu' u yua' que tu chi'i, guyéajlen nu na' chopa chi'i. ⁴² Nu bi rinábini li', bunódzaj que, en nu bi guë'ëni gunnu' que tu chi'i, biti' tá'bagu' u lë na' inabi li'.

Rusédinë' Jesús ca ral-la' idxi'iru' nupa biti' ta'lé'e rë' u dxi'a

(Lc. 6:27-28, 32-36)

⁴³ Gunnë' ca' Jesús:

—Lëscá' caní biyónili' lë na' gula'nnë': "Ral-la' idxi'inu' nu nadxi' i li', en udf'inu' nu biti' rilé' e li' dxi'a." ⁴⁴ Na'a, neda' rea' libí'ili', guli'dxi'i nupa biti' ta'lé' e libí'ili' dxi'a. Guli'nábinë' Dios gácalenë' nupa tu lidza libí'ili' zi'. Guli'gún le naca tsahui' quégaca nupa tu d'í' libí'ili', en buli'lidzë' Dios inábili'-në' gúnë' ga gaca dxi'a quégaca nupa ta'nnë' queë'li', en tuá' dö' queë'li'. ⁴⁵ Channö gunli' caní, gácali' xzi'ini cazë' Xúziru' Dios, zoë' yehua' yubá, tu' runë' Lë' ga ruzeni' gubidza queë' ga nacuá' bönachi tuá' dö', enca' ga nacuá' bönachi tsahui'. Risóli-lë'ë tu nisa guió'j lu yu quégaca bönachi tsahui', enca' lu yu quégaca bönachi biti' náacagaca tsahui'. ⁴⁶ Channö nadxi'isili' bönni' nadxi'iguequinë' libí'ili', çnuzxi caz cu' u libí'ili' yöl-la' ba? Lëscá' caní tunë' bönni' biti' náacagaca tsahui' na', bönni' tu'quizzjë' uláz que yödzo zi' tu', nadxi'iguequinë' luzá'agaquië'. ⁴⁷ Channö rugápali' Dios tuzë' böchi' luzá'ali', çbizxi

caz runli' le nácatërö dxi'a? Lësca' caní tunë' bönni' bití' núnbë'gaquië' Dios. ⁴⁸ Pero libí'ili', guli'gaca idú tsahui', ca na' náquië' Xúziru' Dios, zoë' yehua' yubá, náquië' idú tsahui'.

6

Rusédinë' Jesús ca ral-la' gácalenru' bönachi

¹ Gunnë' ca' Jesús:

—Guli'güí' ládxi'li' gaca idú ca reaj ládxi'li'-në' Dios. Bití' gúnsili' lë ni lógaca bönachi para ila'lé'e ca na' runli'. Channö runli' caní, bití' bi gunnë' Xúziru' Dios zoë' yehua' yubá queëli'. ² Cate' bi unödzu' que nu bi riyadzaj, bití' gunu' ga ilá' lahui lë na' runu' ca tunë' bönni' tu'luí'isö tsahui' cuíngaquië' ga naca lu yu'u ga tu'dubë' bönni' judío, en tu'sëdë' queë' Dios, enca' ga naca lu yë'ëyi. Caní tunë' para ila'gú'u bönachi légaquië' yöl-la' ba. Le nácatë' rea' libí'ili', cá'asö naca yöl-la' ba gata' quégaquië'. ³ Pero lí', cate' bi unödzu' que nu bi riyadzaj, bití' ca' gu'u lataj nu inözi. ⁴ Na'a, lë na' unödzu', bagáchi'sö ral-la' unödzu', ate' Xúziru' Dios, Nu rilé'e ca na' runu' bagáchi'sö, Lë' ubi'ë quiu'.

Rusédinë' Jesús ca ral-la' ulídzarü'-në' Dios

(Lc. 11:2-4)

⁵ Gunnë' ca' Jesús:

—Cate' ulídzali'-në' Dios, bití' gunli' ca tunë' bönni' tu'luí'isö tsahui' cuíngaquië', tu' ta'yaza ládxi'gaquië' ta'zuínë' tu'lidzë' Dios gapa naca lu yu'u ga tu'dubë' tu'sëdë' bönni' judío queë' Dios, en gapa naca lu yë'ëyi para ila'lé'e bönachi légaquië'. Le nácatë' rea' libí'ili', cá'asö naca yöl-la' ba gata' quégaquië'. ⁶ Pero libí'ili', cate' ulídzali'-në' Dios guli' tsaza lídxi'li', en buli'sayaj yu'u. Buli'lidzë' Dios inábili'-në' Xúziru' Dios, zóalenë' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sö, Lë' ubi'ë queëli'.

⁷ 'Cate' ulídzali'-në' Dios bití' gunli' la' yë'ëyi la' lez ca na' tunë' bönni' bití' núnbë'gaquië' Dios, tu' téquinë' huayönnë' Dios légaquië' tu' tu'lidzë' la' yë'ëyi la' lez. ⁸ Bití' gunli' ca na' tunë' légaquië', Xúziru' Dios, zí'atëlö cate' sí' inábali'-në', chinöz quézinë' le riyadzaj queëli'. ⁹ Que lë ni na', ral-la' ulídzali'-në' Dios innali' caní: Xuz netu', zu' yehua' yubá, gaca zxon Lo'.

¹⁰ Gudá inná bë'u luyú ni.

Ben ga gaca luyú ni ca raza ládxi'u Li'

ca na' raca yehua' yubá.

¹¹ Benna le gágutu' na'a dza.

¹² Buniti lo netu' le huiá' dö' bentu' Lo' Li'

ca runtu' netu', runiti lotu' nupa bi tun queëtu'.

¹³ Bití' gu'u lataj sí' bë' tu' xihui' netu',

pero busólá netu' lu na' nu ruá' dö'.

Nequi quiu' ga rinná bë'u, en yöl-la' unná bë', en yöl-la' ba.

Caní rë'ënitü' gácatíca'sö. ¡Ca' gaca!

¹⁴ Channö uniti loli' luzá'ali', nupa tuá' dö' queëli', uniti lahuë' Xúziru' Dios, zoë' yehua' yubá, libí'ili'. ¹⁵ Channö cabí uniti loli' luzá'ali', bití' uniti lahuë' Xúziru' Dios libí'ili' ca naca dul-la' nabága'li'.

Rusédinë' Jesús ca ral-la' gunru' gubasa

¹⁶ Gunnë' ca' Jesús:

—Cate' gunli' gubasa, bití' gunli' bayechi' loli' ca tunë' bönni' tu'luí'isö tsahui' cuíngaquië', tu' tunë' bayechi' lógaquië' para iléquië'e bönachi tunë' yubasa. Le nácatë' rea' libí'ili', cá'asö naca yöl-la' ba gata' quégaquië'. ¹⁷ Libí'ili', cate' gunli' gubasa, buli'pá'a ícjali', en guli'quibi loli', ¹⁸ para cabí iléquië'e bönachi runli' gubasa. Bagáchi'sö ral-la' gunli' gubasa, ate' Xúziru' Dios, zóalenë' libí'ili' ga na' zóali' queézili', Lë' ubi'ë queëli'.

Yehua' yubá ral-la' utúbiru' yöl-la' tsahui' queëru'

(Lc. 12:33-34)

¹⁹ Gunnë' ca' Jesús:

—Bití' utúbili' yöl-la' tsahui' luyú ni, ga ni bëlado' que tu'töba' le, ate' raca ditaj, en ga ni ta'yaza gubán, ta'banë'. ²⁰ Buli'tubi' yöl-la' tsahui' yehua' yubá, ga ni' bëlado' que bití' ulu'töba' le, en bití' gaca ditaj, en ga ni' bití' ila'yázië' bönni' gubán, en bití' ila'banë'. ²¹ Ga ni' dë yöl-la' tsahui' queëli', ni' güf'i ládxi'li' idxinli'.

Le rigú'u bení' icja ládxi'do'oru'

(Lc. 11:34-36)

²² Gunnë' ca' Jesús:

–Guiöj loru' naca ca tu le rigú'u beni' icja ládxi'do'oru'. Que lê ni na', channö guiöj loli' naca tsahui', idútéli' tsépili' yósa beni'. ²³ Channö guiöj loli' biti' naca tsahui', idútéli' nachúl-lali'. Que lê ni na', channö beni' zóalen libí'ili' nuhuóáca le naca chul-la, yénmi'terö nachúl-lali'.

Dios, en dumí

(Lc. 16:13)

²⁴ Gunné' ca' Jesús:

–Cuntu nu bönni' gaca guné' xichíngaquei' chopa xané', tu' uzóè' tué' tsólá'alö, ate' ia'tué' na' idxi'iné', o ugá' analené' tué', ate' ia'tué' na' usán ládxé'ë. Biti' gaca gunli' xichiné' Dios, enca' dumí.

Dios rapa chi'ë nupa néquiquequi queé'

(Lc. 12:22-31)

²⁵ Gunné' ca' Jesús:

–Ia'stú rea' libí'ili': Biti' ubi uguí'ili' ni'a que le gáguli' o ni'a que le guí'jali', yugu' le nabánili', o ni'a que lari' gáculi'. Nazáca'terö yöl-la' na'bán queéli' ca le gáguli', ate' nácatèrö lesaca' le nácali' ca lari' gáculi'. ²⁶ Buli'yú ca raca quégacaba' biguínido' ta'daba' lúxiba. Biti' bi taz tu'zóaba', en biti' tu'lápaba', en biti' tu'túbiba' ga bi ila'gú'uba' quégacaba', pero Xúziru' Dios zoé' yehua' yubá, rugagu cazé' légacaba'. Nazáca'teröli' libí'ili' ca yugu' biguínido' na'. ²⁷ ¿Nuzxi caz bönni' nútsé'ë ládjali' gaca guné' ga soé' ibané' ia'túz dza tu' ruubi ruguí'iné' para gaca caní queé'?

²⁸ ¿Bizx que ruubi ruguí'ili' ni'a que le gáculi'? Buli'yútsöca' ca raca quégaca yöjdo' rő'gaca la' guixi' ca ta'zxön. Biti' tun dxin, en biti' tun du lari'. ²⁹ Neda' rea' libí'ili', Salomón, bönni' ni' gunná bē'ë, sal-la' gúta'da' yöl-la' tsahui' queé', lari' gúcué' biti' gunná'terö lachi ca rinná gaca yöjdo' na'. ³⁰ Dios caz runé' lachi yöj guixi'do', le rő'gaca la' guixi', le nacua' na'a dza, ate' cuxó huidzaj ila'yegui lu guí'. Channö caní ruí'i ládxé'ë yöj guixi'do', runé' léguequi lachi, gúnda'aré' ca' queéli', sal-la' biti' réajlé'ëli'-né' idú ládxi'li'. ³¹ Que lê ni na', biti' ubi uguí'ili', en biti' innali': "¿Bizxi gágutsatu?" o "¿Bizxi guí'jatsatu?" o "¿Bizxi lari' gáčutsatu?" ³² Bönachi yödzölió ni tu'ubi tu'guí'ili' ni'a que yúgu'té lê ni, pero zoé' Xúziru' yehua' yubá, ate' Lē' nöziné' naquímili' yúgu'té lê ni. ³³ Na'a, guli'gú'irö ládxi'li' inná bē'ené' Dios libí'ili', en gunli' le naca tsahui' lahué' Lē', ate' Lē' cu'ë xinözali' yúgu'té lê ni. ³⁴ Que lê ni na', biti' ubi uguí'ili' ni'a que le ral-la' gaca cuxó huidzaj, tu' huáca gú'í' ládxi'li' cuxó huidzaj le gaca queéli' dza na'. Tu tu dza ilaca le ral-la' gú'í' ládxi'li' dza na'.

7

Biti' ral-la' ichugu bē'ëru' böchi' luzá'aru'

(Lc. 6:37-38, 41-42)

¹ Gunné' ca' Jesús:

–Biti' ichugu bē'ëli' böchi' luzá'ali', para cabí ichugu bē'ë Dios queéli', ² tu' ichugu bē'ë Lē' queéli' la' leze ca na' richugu bē'ëli' queé' böchi' luzá'ali', ate' ca na' rurixi rudódlili' que luzá'ali', la' cá'asö urixi udödé' Dios queéli'. ³ ¿Bizx que ruyú' bēbudo' yu'u guiöj lahué' böchi' luzó'o, en biti' réquibe'enu' yu'u le zxöntèrö guiöj lo' li'? ⁴ ¿Guié'tso' böchi' luzó'o: "Gulöz, cueja' bēbudo' yu'u guiöj lo'", ate' li', le zxöntèrö ca' yu'u guiöj lo' li'? ⁵ Li', bönni' ruluí'isö tsahui' cuinu'. Guléaj zí'alö le zxön yu'u guiöj lo' li', ate' ní'irö ilé'enu' tsáhui'do' para gaca cueju' bēbudo' yu'u guiöj lahué' böchi' luzó'o.

⁶ Biti' guí'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en biti' chú'unali' le naca lesaca' queéli' láhuigacaba' cuchi, para cabí ulu'zadi' ní'aba' le.

Guli'naba, guli'guilaj, en buli'lidza ra' yu'u

(Lc. 11:9-13; 6:31)

⁷ Gunné' ca' Jesús:

–Guli'naba, ate' Dios gunné' queéli'. Guli'guilaj, ate' gunné' lataj idzöli queéli'. Buli'lidza ra' yu'u, ate' Lē' isaljé' queéli'. ⁸ Núti'tés bönni' rinabé', ridéli'né', ate' bönni' riguljé', ridzöli queé', ate' bönni' rulidzè' ra' yu'u, ralaj queé'.

⁹ Channö zoé' nu bönni' ládjali' libí'ili', ate' zóabi' bi'i queé', channö inábibi' lē' yöta xtila, ¿naru' unödzejé'-bi' guiöj? ¹⁰ Channö inábibi' lē' tuba' böla, ¿naru' unödzejé'-bi' bëla? ¹¹ Libí'ili' nácali' huia' dö', pero nözili' unödzejali' xxi'inili' le naca tsahui'. Nácatèrö löza, Xúzili' zoé' yehua' yubá unödzejé' nupa ta'nábimi Lē' le naca dxi'a.

¹² Que lê ni na', ca na' rē'ënili' ilún bönachi queéli', lē'sca' caní guli'gún quégaquié'. Lê ni naca le rinná bē' xibá queé' Moisés, enca' le gula'nné' bönni' gulu'ë didza' uláz queé' Dios.

Tu ga ral-la' tsú'uru' le naca tsúpi'do'

(Lc. 13:24)

¹³ Gunnë' ca' Jesús:

—Guli'tsáz ga nu riyaza le naca tsúpi'do'. Bлага' naca ga nu riyaza, en yalaj naca nõza le rójácalenë' bõnni' ga ni' ila'nítie', ate' ta'yázië' bõnni' zían ni'. ¹⁴ Tsúpi'do' naca ga nu riyaza, en lásido'os naca nõza le rójácalen bõnachi ga ni' ila'deli' yõl-la' na'bán idú, ate' nabábasõ nupa ta'dzõli le.

Le runru' naca bë' le nácaru'

(Lc. 6:43-45)

¹⁵ Gunnë' ca' Jesús:

—Guli'gún chí'i cuinli' para cabí ila'zì' yé'enë' bõnni' ta'zì' yë'ë libí'ili', ta'nnë' tu'ë didza' uláz queë' Dios. Ila'dxinë' bõnni' caní ga zóali', en ulu'lufí' cuíngaquië' nõxaj lãdxi'do' ca nãcagacaba' bõ'cu' zxíla'do', pero lu icja lãdxi'do'gaquië' nãcagaquië' ca bõ'cu' guí'a sínia'. ¹⁶ Yugu' le tunë' ilaca bë' le nãcagaquië'. Biti' ruchíbiru' le ribía lubá uva lu yaga yõtsi', en biti' ruchíbiru' le ribía yaga higo lu guixi' legui lásido'. ¹⁷ Caní naca, yúgu'të yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a. ¹⁸ Yaga dxi'a na' bití' gaca cuía le cabí naca dxi'a, ate' yaga na' bití' naca dxi'a bití' gaca cuía le naca dxi'a. ¹⁹ Yúgu'të yaga bití' ta'bía le naca dxi'a ila' rugu, ate' ila'gu'ë léguequi lu guí'. ²⁰ Caní naca, yugu' le tunë' bõnni' na' ilaca bë' le nãcagaquië'.

Nupa bití' ila'yázië' ga rinná bë'ë Dios

(Lc. 13:25-27)

²¹ Gunnë' ca' Jesús:

—Zian nupa tè neda: “Xan, Xan”, pero calëga yúgu'të' ila'yázië' ga rinná bë'ë Dios yehua' yubá. Ila'yázasë' ni' bõnni' tunë' ca rë'ënë' Xuza' Dios, zoë' yehua' yubá. ²² Cate' idxín dza údxi que yõdzõliõ ni, bõnni' zían ilë' neda', ila'nnë': “Xan, Xan, bentu' libán que xtídzë'ë Dios, buguntu' dxin Lo', en buguntu' ca' dxin Lo' para bubéajtu' yugu' bõ' xihui', en buguntu' ca' dxin Lo' bentu' zían yõl-la' huáca zxon.” ²³ Ní'irõ neda' guía' légaquië': “Bití' ca' núnbë'a libí'ili'. Guli'cuíta ga zoa', libí'ili' ruá'ali' dõ'.”

Chopa ca gaca udxíaru' xilibi zõ'õ

(Lc. 6:47-49; Mr. 1:22)

²⁴ Gunnë' ca' Jesús:

—Ia' stú ca', nu bõnni' riyõnnë' xtídza'a ni, en gunë' ca rRNA, bõnni' ni náquië' ca tu bõnni' réajni'inë', budxíë' lidxë' ga naca lu guiõj. ²⁵ Cate' gulaj guiõjsiu', en guzxõn yegu gubõ'õ, en guyecja bõ', gudibi nisa cuita yu'u na', pero bití' gubixi, tu' dxia xilibi lu guiõj. ²⁶ Na'a, nu bõnni' riyõnnë' xtídza'a ni, en bití' runë' ca rRNA, bõnni' ni náquië' ca tu bõnni' bití' réajni'inë', budxíë' lidxë' lu yu dzõbi. ²⁷ Cate' gulaj guiõjsiu', en guzxõn yegu gubõ'õ, en guyecja bõ', ní'irõ gudá'a nisa cuita yu'u na', ate' gubíxitë, en tsaz biguinnaaj.

²⁸ Cate' Jesús budxi bë'lenë' légaquië' didza' ni, bulu'bani bõnachi zían nacua' ni' ca naca le rusédinë', ²⁹ tu' rusédinë' légaquië' ca tu bõnni' dë lu në'ë, en calëga ca tunë' bõnni' yudo' usedi quëgaquië'.

8

Ruhuõáquië' tu bõnni' ré'enë' huë' nudzu' ruzõdi

(Mr. 1:40-45; Lc. 5:12-16)

¹ Cate' bõtjë' Jesús lu guí'a na', sõjácalen bõnachi zían Lë'. ² Bidxinë' tu bõnni' ré'enë' huë' nudzu' ruzõdi ga zoë' Jesús, ate' buzõa zxibë' lahuë' Jesús, en rë' Lë':

—Xan, channõ rë'ënu', huáca unu' neda'.

³ Ní'irõ Jesús la' bulitë në'ë, en gudanë' lë'. Rë' lë':

—Rë'ënda'. Huõácu' dxi'a.

La' bunítitë xihuë'ë bõnni' huë' na'. ⁴ Ní'irõ Jesús gudxë' lë':

—Buyú, cuntu nu guí' caní, pero guyéaj, yõjlufí' cuinu' lahuë' bixúz, ate' yõjnõdzaj le gunná bë'ë Moisés le ulufí' bõnachi chibõácu'.

Jesús ruinë' bi'i huen dxin queë' tu bõnni' rinná bë'ë lu gudil-la

(Lc. 7:1-10)

⁵ Cate' guyázië' Jesús yõdzõ Capernaum, bidxinë' tu bõnni' ga zoë', bõnni' rinná bé'enë' tu gáyu'ë bõnni' rójáquië' gudil-la, ate' gúta'yuë' lahuë' Jesús, ⁶ en rë' Lë':

—Xan, bi'i huen dxin quia' dëbi' yu'u, ré'ebi' huë' nacú'unibi' bin, ate' riguí' rizáca'da'abi'.

⁷ Jesús rë' lë':

—Neda' guída' una'-bi'.

⁸ Bubi'ë didza' bõnni' na' rinná bé'enë' bõnni' rójáquië' gudil-la, en rë' Jesús:

—Xan, bití' naca' zi tsáziu' lidxa', pero tsa innasu' quia', ate' huõácabi' bi'i huen dxin quia'. ⁹ Lë'sca' neda', zoa nu rinná bé'e neda', en nacú'ë ca' bõnni' rójáquië' gudil-la rinná

bé'egacada'-nè'. Cate' rea'-nè' tuè': "Guyéaj ni'", rejè'. Cate' rea'-nè' ia'tuè': "Gudá ni", ridè'. Cate' rea'-nè' bönni' huen dxin quia': "Ben dxin ni", la' runtè' dxin na'.

¹⁰ Cate' biyönnè' Jesús didza' ni, bubáinè', ate' gudxè' bönni' sôjácalenè' Lè', rnnè':
 –Le nácatè' rea' libí'ili', ga nacua' bönnachi Israel, cuntu nu bönni' rôjxéqui'da'-nè' réajlè'è neda' ca runè' bönni' ni. ¹¹ Ia'stú' rea' libí'ili': Ila'ruáj bönnachi zían saca' ga rilén gubidza, en saca' ga ribía gubidza, ate' ila'bô'len tsôzxôn Abraham, en Isaac, en Jacob, yehua' yubá ni' ga rinná bē'è Dios, ¹² pero yugu' bönni' na' guró cazè' Dios para ila'yázíe' ga na' rinná bē'è Lè', chú'unè' légaquiè' ní'ilò ga na' naca chul-la, ate' ni' ila'bôdxè', en ulu'til-la láyè'è lu yöl-la' ruhu'ini quégaquiè'.

¹³ Ní'irò Jesús gudxè' bönni' na' rinná bé'enè' bönni' rôjáquiè' gudil-la, rnnè':
 –Böaj lidxu'. Ca na' réajlè'u, ca' gaca quiu'.
 La' ná'asò böácatèbi' bi'i huen dxin queè' na'.

Jesús ruínè' xíná'anu nigula queè' Pedro

(Mr. 1:29-31; Lc. 4:38-39)

¹⁴ Bidxinè' Jesús lidxè' Pedro, ate' ni' bilé'enè'-nu xíná'anu nigula queè', dènu lu da'a, en yú'unu tu xilá. ¹⁵ Gudanè' Jesús ná'anu, ate' la' burúajtè xilá na' yú'unu. Ní'irò böásanu, en bunódzjanu le gulahuè'.

Jesús ruínè' zían nupa te'e

(Mr. 1:32-34; Lc. 4:40-41)

¹⁶ Cate' chiridzò' dza na', dujuá'agaquiè' zían bönni' yú'ugaca bö' xihui' légaquiè' ga zoè' Jesús, ate' len yöl-la' rinnèsò queè' bubéajè' yugu' bö' xihui' na', en bunè' ca' yúgu'tè nupa te'e. ¹⁷ Caní guca para gaca ca na' gunnè' Isafas, bönni' bē'è didza' uláz queè' Dios, gunnè': "Lè' bu'è yugu' le rizáca'ru', en bu'è ca' yugu' yôdzôhué' queéru'."

Nupa gulè'èni tsôjácalen Jesús

(Lc. 9:57-62)

¹⁸ Cate' bilé'enè' Jesús nacua' bönnachi zían gásibi'ilè', gunná bé'enè' yugu' bönni' uséda queè' ila'dòdè' ia'tsólá'a nísado' ni'. ¹⁹ Bidxinè' tu bönni' yudo' usedi ga na' zoè' Jesús, en rē' Lè':

–Bönni' Usedi, sá'lena' Li' gátitès ga tseju'.

²⁰ Jesús rē' lè':

–Yugu' böza' nacua' zzan guiöj quégacaba', ate' yugu' biguínido', nudxiágacaba' xicá'agacaba', pero neda', Bönni' Guljè' Bönnachi, biti' dè ga quíxaj'icja'.

²¹ Ia'tuè' bönni', náquiè' bönni' uséda queè' Jesús, gudxè' Lè':

–Xan, benna neda' lataj huója' ga idxinrò dza chibucácha'a-nè' xuzá'.

²² Jesús gudxè' lè':

–Gudá' neda'. Bè' lataj yugu' bönni' tati cazè' ulu'cáché'è nupa ilátigaca quégaquiè'.

Jesús ribequi dxíe' bö' budunu'

(Mr. 4:35-41; Lc. 8:22-25)

²³ Gurenè' Jesús lè'e bárcodo', ate' dzágagaquiè' Lè' bönni' uséda queè'. ²⁴ Ní'irò guyecja bö' budunu' lu nísado' na', ate' riyasa ridxiada' nísado' na' ga bidxintè riyaza nisa lè'e bárcodo' na'. Dè' rásíe' Jesús lè'e barco na'. ²⁵ Ní'irò bila'dxinè' bönni' uséda queè' Jesús ga na' zoè', ate' bulu'subanè' Lè', en tē' Lè':

–Xan, busólá netu'. Chirigáchi'ru' lu nisa.

²⁶ Bubi'è didza' Jesús, en rē' légaquiè':

–¿Bizx que rádxili'? Láti'do'os réajlè'èli'-nè' Dios.

Ní'irò guyasè' Jesús, en bulidzè' bö' na' recja, en nísado' na', ate' la' guró'ötè dxi.

²⁷ Bulu'báinè' bönni' na', ta'nnè':

–¿Nuzxi caz bönni' ni? Ruf'isè' didza', ate' bö' recja, en nísado' tun ca rnnè'.

Yugu' bönni' Gadara yú'ugaca bö' xihui' légaquiè'

(Mr. 5:1-20; Lc. 8:26-39)

²⁸ Cate' bidxinè' Jesús ia'tsólá'a nísado' ga na' naca lu xiyú yôdzò Gadara, bila'ruájè' chopè' bönni' ga nacua' ba quégaca nupa nátigaca, dutságagaquiè' Jesús. Nácagaquiè' sínía', ate' cuntu nu gaca tódi la' nôza ni'. ²⁹ La' gulu'itè' zidzaj didza' chopè' ni, ta'nnè':

–¿Bizxi ral-la'tu' quiu', Jesús, Zxí'inè' Dios? ¿Naru' bidxintso' ni dusaca' zì'u netu' zí'alò ca idxin dza queètu'?

³⁰ Ga ni' nacu'è nacua'aba' cuchi zían ta'daba' táguba', nacua'aba' láti'do' ga naca zì'tu'.

³¹ Gula'naba yechi' bö' xihui' na' Jesús, en tē' Lè':

–Channò ubéaju' netu', benna lataj tsójtú'ugacatu'-ba' cuchi zían ni'.

³² Ní'irò Jesús gudxè' léguequi:

–Guli'tséaj.

La' bila'ruájtë bö' xihui', en yöjcházagaca cuchi zían ni'.

Ní'irö yúgu'tëba' cuchi zían na' yöjbíxitégacaba' ga naca lë'e guiöj, en yöjcházagacaba' lu nísado', ga ni' gula'yépiba' nisa, en gulátiba'.

³³ Guládxinë' bönni' tu'yúé'-ba' cuchi na', ate' bulu'zúnajë'. Cate' bila'dxinë' lu yödzo, gula'guixjö'ë yúgu'të lë na' guca queégaquië' bönni' ni' gula'yú'u bö' xihui' légaquië'. ³⁴ Ní'irö bila'ruáj bönachi lu yödzo ni', yöjtságagaquië' Jesús. Cate' bila'lé'enë' Lë', gulá'tyué' lahué' uzé'ë lu xiyúgaquië' na'.

9

Jesús ruínë' tu bönni' nacú'unië' bin

(Mr. 2:1-12; Lc. 5:17-26)

¹ Ní'irö bubenë' Jesús lë'e bárcodo', en gudödë' ia'tsólá'a nísado' ni', ate' budxinë' ga naca ladzë'. ² Ni' dujuá'gaquië' tu bönni' nacú'unië' bin ga zoë' Jesús, zxoë' lu da'a yaga. Cate' bilé'enë' Jesús ca na' ta'yéajlë'ë bönni' ni Lë', gudxë' bönni' na' nacú'unië' bin, rnnë':

—Butipa ládxi'u, zxi'ina'do'. Chibuníti lahua' dul-la' nabágu'u.

³ Nacu'ë ca' bönni' yudo' tu'sédinë' ni', ate' ta'nnë' lu icja ládxi'do'gaquië', ta'nnë': “Didza' ru'ë bönni' ni ruzóa Dios tsólá'aló.”

⁴ Cate' réquibe'enë' Jesús le ta'zá' ládxi'gaquië', rë' légaquië':

—¿Bixz que rízá' ládxi'li' caní le cabí naca tsahui'? ⁵ Biti' naca böniga nu guiësö bönni' ni: “Yugu' dul-la' nabágu'u chibuníti lahua’”, pero naca böniga nu gun ga huóásë', en uzé'enë'.

⁶ Na'a, uluf'ida' libf'ili' neda', Bönni' Guljé' Bönachi, dë lu na'a yöl-la' unná bë' uniti lahua' dul-la' luyú ni.

Ní'irö Jesús gudxë' bönni' na' nacú'unië' bin, rnnë':

—Guyása. Buchisa da'a yaga quiu', en böaj lidxu'.

⁷ Ní'irö la' guyásatë' bönni' na' nacú'unië' bin, en böajë' lidxë'. ⁸ Cate' bila'lé'enë' bönni' nacú'ë ni' lë ni, bulu'bájinë', ate' gula'gu'ë Dios yöl-la' ba tu' bunödzejë' yöl-la' huáca caní queéga bönachi.

Jesús rulidzë' Mateo

(Mr. 2:13-17; Lc. 5:27-32)

⁹ Cate' buzë'ë Jesús ni', bilé'enë' bönni' lë' Mateo, rö'ë ga na' ruquíxjé' uláz que yödzo zì'tu', ate' Jesús gudxë' lë':

—Gudá' neda'.

Ní'irö la' guyásatë' Mateo na', ate' sa'yéajlenë' Jesús.

¹⁰ Ia'tú le guca, cate' ni' rö'ë Jesús rahué' ga naca lidxë' Mateo, zían bönni' tu'quíxjé', en yugu' bönni' cá'asö bila'dxinë' ga zoë', ate' gula'bó'lenë' Jesús tsózxón len yugu' bönni' uséda queé'. ¹¹ Cate' bönni' yudo' fariseo bila'lé'enë' lë ni, gula'nábinë' yugu' bönni' uséda queé' Jesús, ta'nnë':

—¿Naru' bönni' rusédinë' libf'ili' rágulentsë' tsózxón bönni' tu'quíxjé', en iá'zica'rë' bönni' dul-la'?

¹² Cate' biyönnë' Jesús lë ni, rë' légaquië':

—Biti' naquíniguequinë' bönni' nácagaquië' dxi'a nu un bönachi, pero bönni' té'enë' naquíniguequinë' nu un bönachi. ¹³ Guli'tséaj, en buli'séda le rnna lë na' nazúaj lu guichi lá'ayi, le rnna caní: “Rë'ënda' ulu'huéchi' ládxi'gaquië' bönni' luzá'agaquië', en caléga ilútië'-ba' bóa' bédxi lu bucugu lá'ayi quia'.” Bida' ni, caléga para ulídzagaca'-në' bönni' tsahui', pero bida' para ulídzagaca'-në' bönni' dul-la' para ulu'bi'i ládxi'gaquië'.

Rusédinë' Jesús ca ral-la' gunru' gubasa

(Mr. 2:18-22; Lc. 5:33-39)

¹⁴ Ní'irö bönni' dá'gaquië' Juan, bönni' na' buquilë' bönachi nisa, bila'dxinë' ga zoë' Jesús, ate' gula'nábinë' Lë', ta'nnë':

—¿Bixz que na' netu', enca' yugu' bönni' yudo' fariseo, zían luzuí runtu' gubasa, pero yugu' bönni' uséda quiu' Li' bití' tunë' gubasa?

¹⁵ Bubi'ë didza' Jesús, en rë' légaquië':

—¿Naru' huácatsö ila'sëbi ládxi'gaca nupa nacú'á laní que yöl-la' rutsaga na' tsanni ni' bönni' rutsaga në'ë zóalenë' légaquië'? Za' dza cate' idúë' bönni' na' rutsaga në'ë ga nacú'ë. Dza ní'irö ilunë' gubasa.

¹⁶ Bucúdzu'ë didza' Jesús, rnnë':

—Cuntu nu un tu lari' tēbi len lari' cubi, tu' uxú'uni lari' cubi na' nugu'ë lari' tēbi na', ate' ichóza'rö lari' tēbi na'. ¹⁷ Lësca' caní, cuntu nu bönni' riguë'ënë' xisi uva cubi tu lu buzudi guídi gula, tu' galaj ilēbi xisi uva cubi na', en uzxuzxaj buzudi guídi gula na', ate' gaca ditaj xisi uva na', ate' iníti ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatë' taca chí'i.

Rubanbi' bi'i nigula queë' Jairo, en ruhuóacanu tu nigula gudannu lari' nácuë' Jesús
(Mr 5:21-43; Lc. 8:40-56)

¹⁸ Tsanni ni' Jesús ruí'ilenë' légaquië' didza' ni, tu bönni' rinná bé'enë' bönachi judío bidxinë' ga zoë', ate' buzóa zxi'bë' lahuë' Jesús, en rë' Lë':

–Bi'i nigúlado' quia' la' gütitëbi'. Gudá íxóa no' o' lëbi', ate' ubanbi'.

¹⁹ La' guzúitenë' Jesús, en sa'yéajlenë' lë'. Dzágagaquië' bönni' usëda queë' Lë'.

²⁰ Ní'irö bidxinnu tu nigula zaca' cúdzu'lë' Jesús, chiguca chinnu iz ré'enu, biti' ruhuí' rön queënu que huë' quegaca cázanu nigula, ate' gudannu lari' nácuë' Jesús. ²¹ Caní bennu tu' rizá' ládxi'nu, rnnanu: Channö cansa' zxe', huóaca'. ²² Ní'irö buécjë' Jesús, en ruyúë' lënu, ate' rë'ë-nu:

–Butipa ládxu'u, zxi'ina'do'. Chibóacateu' tu' réajlë'u neda'.

La' ná'asö böácátënu.

²³ Cate' bidxinë' Jesús lidxë' bönni' unná bé' na', bilé'enë' nacu'ë ni' bönni' tu' cödxë' gui, en nupa ta'bödxí yechi'. ²⁴ Jesús rë' légaquië':

–Gulí'cuita ni, tu' cabí nátibi' bi'i nigúlado' ni. Rásisibi' na'.

Ní'irö nupa nacuá' ni' bulu'titaj Lë'.

²⁵ Cate' chinubéajë' Jesús bönachi na' ní'ilö, guyázië', en gudélë'ë ná'abi' bi'i nigula na', ate' la' guyásatëbi'. ²⁶ Guzë didza' ca guca lë ni, ate' bila'yöni bönachi nacuá' idütë luyú na'.

Jesús ruínë' bönni' nachul-la guiöj lógaquië'

²⁷ Cate' Jesús burúajë' ni', chopë' bönni' nachul-la guiöj lógaquië' sójacalenë' Lë'. Tu'ë zidzaj didza', ta'nnë':

–Zxi'ini xí'sóë' David, buéchi' ladxí' netu'.

²⁸ Cate' bidxinë' Jesús ga naca lu yu'u, bila'dxinë' chopë' bönni' na' nachul-la guiöj lógaquië' ga zoë'. Jesús gunábinë' légaquië', rnnë':

–¿Ba réajlë'ëli' neda', huáca una' libí'ili'?

Légaquië' ta'nnë':

–Ön, Xan.

²⁹ Ní'irö Jesús gudanë' guiöj lógaquië', ate' rnnë':

–Ca réajlë'ëli', ca' gaca queë'li'.

³⁰ La' böáljatë guiöj lógaquië'. Ní'irö Jesús buzenë' bach légaquië', rnnë':

–Gulí'gü'ítica sò ládxi'li' cuntu nu inözi lë ni.

³¹ Cate' bulu'rúajë' ni', la' bulu'zëtë' didza' idütë luyú ni' ca naca lë na' benë' Jesús.

Jesús ruínë' tu bönni' biti' ru'ë didza'

³² Cate' Jesús, en yugu' bönni' usëda queë' bulu'rúajë' tu lu yu'u, bila'dxinë' bönni' ga zoë' Jesús nachë' gaquië' lahuë' tu bönni' biti' ru'ë didza', tu' yu'u lë' bö' xihui'. ³³ Cate' bubéajë' Jesús bö' xihui' na', la' gunnëtë' bönni' na' biti' guca gu'ë didza'. Bulu'baninë' bönni' nacu'ë ni', ta'nnë':

–Catu caz rilë'etu' le caní ladaj bönachi Israel.

³⁴ Ní'irö bönni' yudo' fariseo gula'nnë' queë' Jesús, ta'nnë':

–Bönni' ni rubéajë' yugu' bö' xihui', rugunë' dxin yöl-la' unná bé' que xángaca bö' xihui' na'.

Jesús ruhuéchi' ládxë'ë bönachi zían

³⁵ Gudë' Jesús idü gásibi'ilö gapa nacuá' yödzo zxon, en gapa nacuá' yödzo'do', ate' gapa naca lu yu'u ga tu'dubë' tu'sedë' bönni' judío queë' Dios. Rusédinë' Jesús bönachi nacuá' ni', en runë' libán que didza' dxi'a ca rinná bé'ë Dios. Bunë' yúgu'të nupa bi ta'guí'i ta'zaca' yugu' lu yödzo na'. ³⁶ Cate' Jesús bilé'enë' bönni' zían ni', buéchi' ládxi'ë légaquië', tu' ta'guí'i ta'záquië', en nudú ládxi'gaquië' ca raca quegacaba' bö'cu' zxila' biti' zoa nu ruyú légacaba'. ³⁷ Ní'irö Jesús rë' yugu' bönni' usëda queë', rnnë':

–Le nácatë' dëda' yöla, pero nabábasö nupa tu'lapa. ³⁸ Que lë ni na', gulí'gáta'yu lahuë' Dios, náquië' Xan yöla na', inábili'-në' isöl-lë'ë bönni' huen dxin ulu'lapë' yöla queë'.

10

Jesús riböë' bönni' ilácagaquië' gubáz queë'

(Mr 3:13-19; Lc. 6:12-16)

¹ Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöl-la' unná bé' para ulu'béajë' bö' xihui' yú'ugaca bönachi, en ulu'ünë' yúgu'të nupa te'e, en yúgu'të nupa bi ta'guí'i ta'zaca'.

² Caní naca lágaquië' idxínnutë' gubáz na' nasöl-lë'ë Jesús:
Simón, (lë' ca' Pedro),
Andrés, (böché'ë Simón na'),

Jacobo, (zxi'inè' Zebedeo),
 Juan, (bòchë'è Jacobo na'),
³ Felipe, Bartolomé, Tomás,
 Mateo, (bõnni' uquízaxaj),
 Jacobo, (zxi'inè' Alfeo),
 Lebeo, (lè' ca' Tadeo),

⁴ Simón, (bõnni' ruí'i ládxë'è yödzo queë'),
 Judas Iscariote, (bõnni' udödë' Jesús lu ná'agaquië' bõnni' ilútië' Lè').

Jesús risól-lè'è gubáz queë' tsójéngaquië' libán
 (Mr. 6:7-13; Lc. 9:1-6)

⁵ Ní'irò Jesús gusól-lè'è idxinnutë' bõnni' ni tsójéngaquië' libán, ate' gunná bé'enë' légaquië', rnnë':

—Biti' tséajli' ga nacua' bõnachi biti' nácagaca judío, en biti' tsú'uli' ládzagaca bõnachi nacua' luyú Samaria. ⁶ Guli'tséaj ga nacua' bõnachi Israel, nácagaquië' ca bõ'cu' zxíla'do' nanítigacaba'. ⁷ Guli'tsójén libán, innali': "Chibidxín gala' dza Dios, Nu na' zoa yehua' yubá, inná bé'è luyú ni." ⁸ Buli'ún nupa te'e. Buli'ún dxi'a nupa te'e huë' nudzu' ruzodi. Buli'subán nupa chinátigaca. Buli'béaj bõ' xihui' yú'ugaca bõnachi. Bénnasa' queéli' yõl-la' unná bé' ni. Buli'gún dxin le, en biti' bi uquízaxjali'.

⁹ Biti' bi guá'ali' lu buzudi queéli', calëga dumí oro, en calëga dumí plata, en calëga dumí lásido'. ¹⁰ Biti' guá'ali' yõxaj yõta queéli' le gáguli' la' nõza. Tuz lari' ixõa yenli', en biti' guá'ali' xiráchuli' o xiyaga queéli', tu' idzõli quézínë' bõnni' huen dxin le gahuë'.

¹¹ Gátitës yödzo zõn o yödzo'do' ga idxinli', guli'naba nuzxi naca idú ladxi' lu yödzo ni', ate' ugá'anali' lidxi nu na' cate' gála'rò dza urúajli' yödzo na'. ¹² Cate' tsú'uli' tu lu yu'u, buli'gapa Dios bõnachi nacua' lu yu'u na', inábili'-në' Dios unódzjë' quégaquië' le cuéqui dxi icja ládxí'do'gaquië'. ¹³ Channò bõnachi nacua' lu yu'u ni' nácagaca lesaca', ugá'anale' le ribequi dxi ladxi' na' léguequi, pero channò bõnachi na' cabí nácagaca lesaca', inábali' cabí ugá'ana lè na' ribequi dxi ladxi' len léguequi. ¹⁴ Gátitës ga idxinli' ga bõnachi ni' biti' ilún libí'ili' bal, en biti' ulu'zë nagui xtídzá'li', buli'rúaj lu yu'u ni' o yödzo ni', ate' guli'cuíbi bëchtò da' lè'e lábali', le ulu'i léguequi nabá'gaca xíguia'. ¹⁵ Le nácatë rea' libí'ili', cate' idxín dza ichúguie' Dios quégaca bõnachi, ila'gu'i ila'záca'rò bõnachi yödzo na' ca ila'gu'i ila'záca' bõnachi gula'cuá' yödzo Sodoma, en yödzo Gomorra, nupa ni' busunitië' Dios.

Nupa biti' ta'yéajlë' ulu'saca' zi' nupa dá'gaca Cristo

¹⁶ Gunnë' ca' Jesús:

—Buli'yútsõca', neda' risól-la'a libí'ili', ate' gácali' ca bõ'cu' zxíla'do' ta'daba' ga dzó'õba' bõ'cu' guí'a sínia'. Guli'gaca sina' ca nácagacaba' sina' bëla sínia', pero guli'gaca ca' nõxaj ladxi' ca nácagacaba' gu'dòdo'. ¹⁷ Guli'gún chi'i cuinli' quégaca bõnachi, tu' ulu'dödë' libí'ili' lu ná'agaquië' bõnni' yúlahui', en ila'guínë' libí'ili' gapa naca lu yu'u ga tu'dubë' tu'sedë' bõnni' judío queë' Dios. ¹⁸ Lësca' caní, ila'chë'è libí'ili' lógaquië' bõnni' lo, en lógaquië' bõnni' ta'nná bé'è, tu' dá'ali' neda'. Caní gaca para gaca gunli' ba nali' quia' lógaquië' bõnni' ni', en lógaquië' bõnni' biti' nácagaquië' judío. ¹⁹ Ní'irò cate' ulu'dödë' libí'ili' lu ná'agaquië' bõnni' unná bé' na', biti' cõ'õli' bõniga nacxi innali', tu' ichizë' Dios icja ládxí'do'oli' didza' guí'ili', en ca innali' la' dza ná'asó. ²⁰ Calëga libí'isili' na' innali', pero Dios Bõ' Lá'ayi, Nu na' risól-lè'è Xüziru' Dios queéli', Lè cazë' sóalënë' libí'ili', en gu'è didza'.

²¹ Ila'cuá' bõnachi ulu'dõdi bõchi'guequi lu ná'agaquië' bõnni' ilútië' légaquië', en lësca' caní, bõnni' nácagaquië' xuz ulu'dödë' zxi'inigaquië', ate' ila'cuá'abi' bi' ila'dá'baga'bi' xúzagacabi', en ilunbi' ga ilátië' xúzagacabi' na'. ²² Yúgu'è bõnachi ulu'zõa libí'ili' tsólá'alò tu' dá'ali' neda', pero nu ugá'ana tsutsu ga idxinrò dza údxi, nu ni ulá. ²³ Cate' ulu'saca' zi' bõnachi libí'ili' tu lu yödzo, buli'zxunnaj ni', ate' tséajli' ia'tú yödzo, tu' rea' libí'ili', huõda' neda', Bõnni' Guljë' Bõnachi, zí'alò cate' údxi gunli' libán gapa nacua' yugu' yödzo quégaca bõnachi Israel.

²⁴ Núti'tës bõnni' náquië' bõnni' usëda biti' nácarë' lo ca nu rusëdi lë', en lësca' caní, nu bõnni' náquië' huen dxin biti' nácarë' lo ca xanë'. ²⁵ Nu na' naca bõnni' usëda ral-la' udzéjanë' channò huadéli'në' gáquië' ca naca nu rusëdi lë', ate' bõnni' huen dxin na' ral-la' udzéjanë' channò gáquië' ca naca xanë'. Channò ta'nnë' quia' neda', bõnni' xan yu'u, ta'nnë' naca' Belzebú tu' xihui', ila'nnë' zí'irë' quégaca bõnachi tá'gaquië' neda'.

Nu ral-la' gádxiru'
 (Lc. 12:2-9)

²⁶ Gunnë' ca' Jesús:

—Que lè ni na', biti' gádxili' bõnachi. Hualá' lahui yúgu'të le raca bëdxi lándos, ate' huáca bé' yúgu'të le nagachi'. ²⁷ Yugu' didza' ru'ílëna' libí'ili' ga naca chul-la, guli'quixjõ' ga

naca lu bení, ate' le rea' libí'ili' ga nagachi', guli'nně zidzaj ga naca lahui' lógaca bönachi. ²⁸ Biti' gádxili' nupa tuti le nácgaca caz bönachi, pero bití' gaca ulu'suniti bō' naca cázaru'. Guli'gaxi Dios, Bönni' na' gaca gútiě' idútě le nácali', en chū'uně' bō' naca cázali' lu guí' gabila.

²⁹ Ta'dá'uba' chópaba' biguinnido' len tu dumí lásido', pero bití' ibíxiba' tuba' lu yu channō cabí ru'ě Xúziru' Dios lataj gaca caní. ³⁰ Lěsca' caní, nabábagaca yúgu'tě guitsa' ícjali' lahuě' Dios. ³¹ Que lě ni na', bití' gádxili'. Ru'ítěrō lădxě'ě Dios libí'ili' ca ru'í lădxě'ě-ba' zianba' biguinnido'.

Yugu' bönni' ta'z' lu ná'agaquiě' Cristo lógaca bönachi
(Lc. 12:8-9)

³² Gunně' ca' Jesús:

–Nu bönni' si' lu ně'ě neda' lógaca bönachi, neda' si' lu na'a bönni' na' lahuě' Xuza' zoě' yehua' yubá. ³³ Bönni' ta'dá'baguě'ě lógaca bönachi, ila'nně' bití' ta'dě'ě neda', lěsca' caní neda' tá'baga'a légaquiě' lahuě' Xuza' zoě' yehua' yubá.

Jesús náquiě' le run ga ila'rúaj choplō bönachi
(Lc. 12:51-53; 14:26-27)

³⁴ Gunně' ca' Jesús:

–Bití' guéquilí' za'a idigu'a le ribequi dxi bönachi yōdzólió ni. Bití' za'a idigu'a le ribequi dxi, pero za'a idigu'a le gun ga ila'rúaj choplō bönachi. ³⁵ Za'a ni, ate' guna' ga ila'dá'baga' bönachi xúzguequi, ate' yugu' nigula ila'dá'baga'nu ca' xiná'agacanu. Lěsca' caní, yugu' nigula zxoá' lădxigacanu ila'dá'baga'nu xto' zxi'íninu. ³⁶ Caní gaca, la' di'a dzasō quégaca bönachi ulu'saca' z'í luzě'eguequi.

³⁷ Nu nădxí'irō xuz xině'e ca nădxí' neda', bití' naca bachi nu na' ta' neda', ate' nu nădxí'irō bi'í bönni' que o bi'í nigula que ca nădxí' neda', bití' naca bachi nu na' ta' neda'. ³⁸ Nu bití' si' lu ně'e gaca ca tu bönni' sōjtě'ě lě'e yaga cruz, en ta' neda', bití' naca bachi guequi quia' neda'. ³⁹ Nu ru'í lădxi' gun chi' i yōl-la' na'bán que, uniti le, pero nu uniti yōl-la' na'bán que tu' da' neda', alá nu na'.

Yugu' le ubi'ě Dios queěru'
(Mr. 9:41)

⁴⁰ Gunně' ca' Jesús:

–Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasōl-lě'ě neda'. ⁴¹ Nu gun bal tu bönni' ru'ě didza' uláz queě' Dios tu' ru'ě didza' uláz queě' Dios, huadeli' nu na' lu ně'ě Dios la' leze na' idéli'ně' bönni' ru'ě didza' uláz queě' Dios. Lěsca' caní, nu gun bal tu bönni' tsahui' tu' náquiě' bönni' tsahui', huadeli' nu na' lu ně'ě Dios la' leze na' idéli'ně' bönni' tsahui'. ⁴² Núti'tės nu unōdzaj queě' tu bönni'do' ni tu zxi'bíndo'os nisa tu' náquiě' bönni' usěda quia' neda', le nácatě rea' libí'ili', bití' uniti nu na' le ral-la' si' lu ně'ě Dios.

11

Ta'dxině' bönni' nasōl-lě'ě Juan ga zoě' Jesús
(Lc. 7:18-35)

¹ Cate' Jesús budxi buzéajni' ině' yugu' bönni' usěda queě', buzě'ě ni', sa'yéajě' rōjsédině' bönachi, en rōjeně' libán yugu' lu lădzagaca bönachi na'.

² Juan, bönni' buquilě' bönachi nisa, ni' yu'ě lidxi guíě, ate' biyōnně' ca nácgaca le runě' Jesús. Ní'irō Juan na' gusōl-lě'ě chopě' bönni' dá'gaquiě' lě', ate' bila'dxině' ga na' zoě' Jesús. ³ Chopě' ni' gula'nábině' Jesús, tē' Lě':

–¿Nacu' Lí' Cristo, Bönni' na' ral-la' idxině' yōdzólió ni, o ral-la' cōztu' dza idxině' ia'túé' bönni'?

⁴ Bubi'ě didza' Jesús, rě' légaquiě':

–Guli'tséaj tsōjtíxjōi'ili'-ně' Juan lě ni riyōnili', en rilé'eli'. ⁵ Guli'tsōjōdxě' ca raca, tu'lé'eně' bönni' guchul-la guíōj lógachiě', ate' tu'zě'ě bönni' bití' guca ila'dě'. Nuhuōácagaquiě' bönni' gu'iguequině' huě' nudzu' ruzōdi, ate' ta'yōnně' bönni' gula'cōdzuě'. Nnita' nabángaquiě' bönni' gulátiě', ate' raca libán que didza' dxi'a lógaca bönachi yechi'. ⁶ Bica' ba nu bönni' bití' gáquiě' chopa lădxě'ě, bití' ubéaj lădxě'ě neda'.

⁷ Cate' yugu' bönni' na' dá'gaquiě' Juan bulu'zě'ě sōjhuōjgaquiě', ní'irō gusí lahuě' Jesús ru'íleně' bönachi nacua' ni' didza' ca naca queě' Juan na'. Rě' légaquiě':

–¿Bizxi gú'unilí' ilé'eli' cate' ni' guyéajli' lu lataj cá'asō? ¿Naru' gú'unilí' ilé'eli'-ně' tu bönni' náquiě' ca tu guí ruzecaj bō' recja le? ⁸ Channō cabí, ¿bizxi gú'unilí' ilé'eli'? ¿Naru' gú'unilí' ilé'eli'-ně' tu bönni' nácué' lari' dxi'ado'? Nōz quézili' bönni' nácuagaquiě' lari' dxi'ado' nacué'

lédxigaquiè 'bõnni' ta'nná bē'ē. ⁹ Channō cabí, ¿bizxi gú'unilí' ilé'eli'? ¿Naru' gú'unilí' ilé'eli-nē' tu bõnni' ru'ē didza' uláz queē' Dios? Ca' naca, réquida'. Rea' libí'ili', bilé'eli'-nē' tu bõnni' nácatērē' lo ca ia'zica'rē' bõnni' gulu'ē didza' uláz queē' Dios. ¹⁰ Caní naca, tu' náquiē' Juan bõnni' na' ruí'i didza' le nazúaj lu guichi lá'ayi ca naca queē', le rnna:

Buyú, risól-la'a bõnni' gubáz quia', inóruē' ca Lí'.

Lē' upē'ē nōza ga tōdu'.

¹¹ Le nácatē rea' libí'ili'. Idútē yōdzóliō ni, cuntu nu zoa nácarō lo ca Juan, bõnni' ni' buquilē' bõnachi nisa, pero nu naca cuídí'do'os ga rinná bē' Nu na' zoa yehua' yubá nácatērō lo ca Juan na'.

¹² 'Cate' ni' gusí lahuē' buquilē' Juan bõnachi nisa, ga ridxintē na'a dza, bayudxi túngaca bõnachi para ta'yaza ga rinná bē'ē Bõnni' na' zoē' yehua' yubá, ate' nupa tunsō bayudxi ta'deli' le. ¹³ Ga bidxintē dza na' blē'ē Juan, le rinná bē' xibá queē' Moisés, en le bulu'zúajē' lu guichi yúgu'tē bõnni' gulu'ē didza' uláz queē' Dios gulu'í didza' ca rinná bē'ē Bõnni' na' zoē' yehua' yubá. ¹⁴ Channō ré'ēnili' si' lu ná'alí' lē ni, ral-la' inózili' Juan na' náquiē' Elías, bõnni' ni' bē'ē didza' uláz queē' Dios, bõnni' na' Dios gunnē' ral-la' ilá' lahuē' leyúbólō dza ni zóaru' na'a. ¹⁵ Nu zoa nagui, en riyōni ral-la' uzē nagui.

¹⁶ '¿Bizxi ubéqui'tseda' ca nácacaga bõnachi nacua' dza ni zóaru' na'a? Nácagaquiē' ca yugu' bí'ido' ta'bō'ōbi' lu yē'ēyi. Zidzaj tu lídzabi' luzá'agacabi', ¹⁷ ta'nnabi': "Rucódxitu' queéli' gui. ¿Bizx que bití' ruyá'ali'? Rul-la yéchi'tu' queéli'. ¿Bizx que bití' ribōdxi yéchi'li'?" ¹⁸ Caní nácalí', tu' bidē' Juan, ate' tu' cabí gú'í' gudahuē' ca ráguli' libí'ili', gunnēli' queē', gunnali': "Tu' xihui' dzágu' lē'." ¹⁹ Ní'irō bidxina' neda', Bõnni' Guljē' Bõnachi, ate' re'aj rahua', ate' rnnēli' quia', rnnali': "Náquiē' bõnni' huágulē'ē, en bõnni' re'jē'. Náquiē' luzá'agaquiē' bõnni' uquízxaj, en ia'zica'rō huen dul-la'." Yól-la' réajni'i queē' Dios naca bē' ni'a que le tun nupa ta'z'í' lu nē'eguequi le.

Le gaca que nu bití' run ca rnna xtídzē'ē Dios

(Lc. 10:13-15)

²⁰ Ní'irō gusí lahuē' Jesús ruzenē' bach bõnachi nacua' yugu' yōdzō gapa ni' benē' zían yól-la' huáca, tu' cabí tu'bí'ini ládxi'guequi. ²¹ Gudxē' léguequi:

—Bica' bayechi' libí'ili', bõnachi Corazín. Bica' bayechi' libí'ili', bõnachi Betsaida. La'tu' gulaca lu yōdzō Tiro, en lu yōdzō Sidón yugu' yól-la' huáca bena' ga zóali', dza ni t'elō ulu'bfí' ládxi'gaca bõnachi yōdzō Tiro, en yōdzō Sidón na', en ilácugaca lari' tēbi, en ulu'dxia dō ícjaguequi, le ulu'lu'í' tu'bfí' ládxi'gaca bõnachi na'. ²² Na'a, neda' rea' libí'ili', cate' idxín dza ichúguie' Dios quegaca bõnachi, quí'í' sáca'rōli' libí'ili' ca ila'gu'í' ila'zaca' bõnachi yōdzō Tiro, en yōdzō Sidón, nupa na' busunítie' Dios. ²³ Libí'ili', bõnachi Capernaum, guca queéli' ca bidxintēli' ga nu riyaza yehua' yubá. Huó'tjali' lu guí' gabila. La'tu' gulaca yugu' yól-la' huáca bena' ga zóali' lu yōdzō Sodoma, ulu'gá'ana bõnachi yōdzō ni' ga ridxintē na'a dza. ²⁴ Na'a, neda' rea' libí'ili', cate' idxín dza ichúguie' Dios quegaca bõnachi, quí'í' sáca'rōli' libí'ili' ca ila'gu'í' ila'zaca' bõnachi Sodoma na'.

Rnnē' Jesús: "Gulí'dá ga zoa', uzí' ládxi'li'"

(Lc. 10:21-22)

²⁵ Dza na' bē'ē didza' Jesús, rnnē':

—Xuza', nacu' Xani yehua' yubá, en Xani luyú ni. Rigu'a Lí' yól-la' ba, tu' bucáchu'u lē ni, para cabí ila'lé'enē' bõnni' ta'yéajni'ide'enē' le, pero buluí'inu' nupa nácacaga ca yugu' bí'ido' le. ²⁶ Ca' gaca, Xuza', tu' caní guyaza ládxi'u Lí'. ²⁷ Yúgu'tē nudōdē' Xuza' lu na'a. Cuntu nu nunbē' neda', Zxí'inē' Dios, pero tuzē' Dios Xuz, en cuntú nu nunbē' Dios Xuz, pero tuza' neda', Zxí'inē' Dios, enca' nupa na' ré'enda' ulu'í'da' léguequi Dios Xuz. ²⁸ Gulí'dá ga zoa' yúgu'téli' rōjxéqui'li' tu' rúntica'sili' dxin que yól-la' yudo', en nuá'ali' yua' z'í' quégaca xibá que, ate' neda' guna' ga uzí' ládxi'li'. ²⁹ Lu yól-la' nōxaj ladxí' queéli' gulí'gún xichina', gácali' ca bédxi ta'z'í'iba' yugu' quégacaba'. Gulí'sēda lu na'a neda', tu' naca' nōxaj ladxí', en do' ladxí', ate' idzólí yól-la' ruzí' ladxí' queéli', le cuéqui dxi ládxi'li'. ³⁰ Yugu' na' ugu'a libí'ili', le naca le inná bē'eda' libí'ili', bití' naca bõniga, ate' yua' ugu'a libí'ili' le naca le rusédida', dzá'do'os naca.

12

Ta'lecjē' do bõnni' usēda queē' Jesús dza lá'ayi

(Mr. 2:23-28; Lc. 6:1-5)

¹ Dza ni', le naca dza lá'ayi quégaquiē' bõnni' judío, gudōdē' Jesús gapa dē yōla xzoa' xtila, ate' ta'dunē' bõnni' usēda queē', en gusí lógaquiē' ta'lecjē' do ga dxia xzoa' xtila, en tahuē' xzoa' xtila na'. ² Cate' bila'lé'enē' bõnni' yudo' fariseo lē ni, tē' Jesús:

—Buyútsōca', tunē' bõnni' usēda quíu' le cabí ral-la' gunru' dza lá'ayi.

³ Ní'irō Jesús gudxē' légaquiē':

—¿Naru' cabí nulábanili' lu guichi lá'ayi bi bené' David cate' guduné', ate' gula' dún ca' nupa gula' cuá' len lé'? ⁴ Guyu' è lu yu'u queé' Dios, en gudahué' yugu' yöta xtila nagú' ugaquié' lu bucugu lá'ayi, le cabí ral-la' gahué' lé', en bití' ral-la' ilahué' bönni' gula' cuá' lené' lé', pero légacsé' bixúz dē lataj ilahué' le. ⁵ ¿Naru' cabí nulábanili' le rinná bē' xibá queé' Moisés ca tuné' bixúz yugu' dza lá'ayi? Tuné' dxin lö'a yudo' yugu' dza lá'ayi, en bití' ta' bágué' è xíguia'. ⁶ Na'a, neda' rea' libí'ili', zoa' neda' ni, en naca' bönni' nácaré' lo ca yudo'. ⁷ Bití' réajni' ili' lé' na' nazúaj lu guichi lá'ayi, le rnna: “Rē' ènda' huéchi' ládxi'li' luzá'ali', en caléga gütgacali' -ba' bōa' bédxido' ruzégui' gacali' -ba' lu bucugu lá'ayi quia'.” La' tu' réajni' ili' lé' ni, bití' ichúguli' quégaca nupa bití' nabága' gaca xíguia'. ⁸ Ca' naca, tu' naca' neda', Bönni' Guljé' Bönachi, Xani dza lá'ayi.

Jesús ruíné' tu bönni' narequi' nē'ē
(Mr. 3:1-6; Lc. 6:6-11)

⁹ Ní'irō buzé'ē Jesús ni', ate' guyu' è lu yu'u ga tu'dubé' bönni' judío, en tu'sédé' queé' Dios. ¹⁰ Lu yu'u na' zoé' tu bönni' narequi' nē'ē, ate' tu' té'enné' bönni' judío unná bē' ila'dzöliné' bi ulu'zégui' è Jesús didza', que lé' ni na' gula'nábiné' Lē', ta'nné':

—¿Naru' dē lataj unru' nu re'e cate' naca dza lá'ayi?

¹¹ Bubi' è didza' Jesús, rē' légaquié':

—Nu bönni' nútsé' è ládjali', channō zóaba' tuba' bō'cu' zxila' queé', en channō íbixiba' lu yeru cate' naca dza lá'ayi, ¿naru' cabí tsójxōné' -ba', en tsójlájé' -ba'? ¹² Nazáca'teré' tu bönni' ca tuba' bō'cu' zxila'. Que lé' ni na', dē lataj gunru' le naca dxi'a' quégaca bönachi cate' naca dza lá'ayi.

¹³ Ní'irō Jesús gudxé' bönni' hué' na':

—Bulí no'o.

Cate' bulí nē'ē, la' bōacaté dxi'a' ca naca ia'tsölá'a nē'ē.

¹⁴ Ní'irō bulu'rúajé' bönni' yudo' fariseo na', ate' gulún xtídza'gaquié' para gaca ilútié' Jesús.

Le gunné' tu bönni' bē' è didza' uláz queé' Dios ca ral-la' gaca queé' Jesús

¹⁵ Cate' réquibe'ené' Jesús lé' ni, buzé'ē ni', ate' sōjácalen bönachi zían Lē'. Jesús buné' yúgu'té nupa te'e ladaj bönachi na', ¹⁶ en gunná bē'ené' léguequi bití' usiyōnguequi bönachi Nu náquié'. ¹⁷ Caní gunné', para gaca lé' na' gunné' Isaías, bönni' bē' è didza' uláz queé' Dios, gunné':

¹⁸ Bulí'yútsöca', Bönni' ni náquié' Huen Dxin quia', na' guró caza' neda' Lē'.

Nadxi'ida' Lē', en raza ládxa'a Lē'.

Ichiza' Lē' Bō' Lá'ayi.

Lē' usiyōnné' yúgu'té bönachi ca guna', uchi'a usörōa' quéguequi.

¹⁹ Cuntu nu tíl-lalené' didza', en bití' ulidzé' zidzaj.

Cuntu nu yōni chí' è ga naca zì'tu'.

²⁰ Tu guido' zoa bō bití' quítsjé' le,

ate' guí' chizóa ulu, bití' usúlue' le,

cate' uzóaré' le naca tsahui' queé'.

²¹ Yúgu'té bönachi ilún löza Lē'.

Ta'nné' bönni' judío unná bē': "Dzaga Jesús tu' xihui'"
(Mr. 3:19-30; Lc. 11:14-23; 12:10)

²² Ní'irō dujuá'gaquié' tu bönni' ga zoé' Jesús, nachul-la lahué', en bití' raca gu'è didza', tu' yu'u bō' xihui' lé', ate' Jesús buné' bönni' na'. Caní guca, rilé'ené', en ru'è didza' bönni' na' guchul-la lahué', en bití' guca gu'è didza'. ²³ Que lé' ni na' bulu'bani yúgu'té bönachi nacua' ni', ta'nná:

—¿Naru' nácatsé' bönni' ni Zxi'ini Xi'sóé' David, Bönni' na' ral-la' guidé'?

²⁴ Cate' bila'yōnné' bönni' yudo' fariseo lé' ni, ta'zá' ládxi'è, ta'nné': Bönni' ni rubéajé' yugu' bō' xihui' tu' dzaga Beelzebú tu' xihui', xángaca bō' xihui', Lē'.

²⁵ Réquibe'ené' Jesús lé' na' ta'zá' ládxi'gaquié', ate' rē' légaquié':

—Gáti'tés ga ta'nná bē' bönachi, channō bönachi ni' ila'rúaj choplö, en ila'díl-lalen luzé'eguequi, initi yöl-la' unná bē' quéguequi. Lésca' caní, channō ila'rúaj choplö bönachi nacua' tu' yōdzō o tu yu'u, en ila'díl-la, bití' gaca ila'día' bönachi nacua' yōdzō na' o yu'u na'. ²⁶ Lésca' caní, channō ubéaj Satanás tu' xihui' la' luzé'esó, ate' yugu' bō' xihui' na' ila'díl-lalen la' léguequisō, ¿naru' idía' yöl-la' unná bē' que tu' xihui'? ²⁷ Rnnali' quia' rubéaja' yugu' bō' xihui' tu' dzaga Beelzebú tu' xihui' neda'. Channō runa' caní, ¿nuzxi dzaga nupa dá'gaca libí'ili' cate' tu'béaj yugu' bō' xihui'? Que lé' ni na' le túngaca caz naca bē' nachixili'. ²⁸ Na'a,

channö neda' rubéaja' yugu' bö' xihui' tu' zóalen yöl-la' huáca queë' Dios Bö' Lá'ayi neda', le nácaté chibidxín le rinná bē'ē Dios ga zóali'.

²⁹ '¿Naru' huácatsö nu bönni' tsu'ē lidxē' bönni' nal-la, en cuéajē' yöl-la' tsahui' dzö'ö lidxē' channö cabí gúguē'ē bönni' nal-la na' zí'aló? Ní'irö gaca tsu'ē, en ulatjē' lidxē' bönni' nal-la na'.

³⁰ 'Nu bití' run neda' tsözxön, ridá'bagá' neda', en nu bití' rutubi tsözxön len neda', rusilasi nu na'.

³¹ 'Que lē ni na' rea' libí'ili', ca naca yúgu'tē dul-la' tun bönachi, en yugu' didza' xihui' ta'nná, uniti lahuē' Dios léguequi, pero nu bönni' innē zí'ē queē' Dios Bö' Lá'ayi, bití' ca' uniti lahuē' Dios lé'. ³² Lēscá' caní, nu bönni' innē' quia' neda', Bönni' Guljē' Bönachi, Dios uniti lahuē' lé', pero nu bönni' innē' queē' Dios Bö' Lá'ayi, bití' ca' uniti lahuē' Dios lé'. Bití' uniti lahuē' lé' dza ni zóaru' na'a, en bití' uniti lahuē' lé' dza si' za'.

Le runru' naca bē' le nácaru'
(Mt. 7:15-20; Lc. 6:43-45)

³³ Gunnē' ca' Jesús:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bē' yaga na'. ³⁴ Libí'ili' nácali' dí'a dza quegacaba' bēla sínía. ¿Nacxi gaca gü'ili' dxi'a didza', channö cabí nácali' dxi'a? Ca naca le ta'zá' lādxi' gaca bönachi, lēscá' caní tu'í didza'. ³⁵ Tu bönni' tsahui' ru'ē didza' tsahui' tu' yu'u le naca tsahui' icja lādxi' da' ahuē', pero tu bönni' huiá' dö' ru'ē didza' bití' naca tsahui' tu' yu'u le cabí naca tsahui' icja lādxi' da' ahuē'. ³⁶ Que lē ni na' rea' libí'ili', cate' idxín dza ichúguie' Dios quegaca bönachi, uchi'a usöröē' tu tu bönni' ca naca yúgu'tē didza' gula'nnazē' ca'. ³⁷ Ca naca didza' ru'u, uchi'a usöröē' lí, ate' uruju' tsahui' o'ibágu'u xíguia' ní'a que didza' na' bē'u.

Ta'nábinē' Jesús gunē' le gaca bē' nu náquiē'
(Mr. 8:12; Lc. 11:29-32)

³⁸ Ní'irö bulu'bi'ē didza' yugu' bönni' yudo' fariseo, en yugu' bönni' yudo' tu'sédinē', en tē' Jesús:

—Bönni' Usedi, rē'énitu' ilé'etu' tu le gunu' le gaca bē' dē lu no'o yöl-la' unná bē'.

³⁹ Bubi'ē didza' Jesús, en rē' légaquiē':

—Yugu' bönni' tuá' dö' ni, bití' zoa idú lādxi'do'gaquiē', ta'nábinē' neda' guna' tu le gaca bē' nu naca'. Bití' bi le gaca bē' ila'lé'enē', pero le naca bē'sö na' ca guca queē' Jonás, bönni' bē'ē didza' uláz queē' Dios. ⁴⁰ Ca na' guca queē' Jonás na', bugá'anē' lē'ēba' tu bóla zxön idú tsonna dza tsonna yēla, lēscá' caní gaca quia' neda', Bönni' Guljē' Bönachi, tsonna dza tsonna yēla ugá'ana' zxan yu. ⁴¹ Ila'yasē' bönni' gula'cu'ē yödzo Nínive dza ichúguie' Dios quegaca bönachi cate' uchi'a usöröē' bönachi nacua' dza ni zóaru' na'a, ate' le gulunē' usubaga' bönachi ni xíguia' tu' bulu'bí'ládxi'gaquiē' bönni' Nínive na' cate' ni' busiyönnē' Jonás légaquiē' xtídzē'ē Dios, ate' na' a zoa' ni neda', en nácatēra' lo ca Jonás na'. ⁴² Lēscá' caní, nigula ni' gunná bē'enu yödzo dē saca' ga ridöi gubidza beo' ziaga chásanu dza ichúguie' Dios quegaca bönachi cate' uchi'a usöröē' bönachi nacua' dza ni zóaru' na'a, ate' le bennu usubaga' légaquiē' xíguia', tu' birúajnu nigula na' ga nácatēro' zí'tu' para yóninu didza' réajni' i bē'ē Salomón, ate' na' a zoa' ni neda', en nácatēra' lo ca Salomón na'.

Cate' rudxín tu bö' xihui' xilatja'
(Lc. 11:24-26)

⁴³ Gunnē' ca' Jesús:

—Cate' rirúaj tu bö' xihui' yu'u bönni', ridá' gapa nabidxi, riguillaj ga uzí' lādxi'. Channö cabí idzöli ga na' uzí' lādxi', ⁴⁴ ní'irö inná: "Huöja' xilatja' ga ní' birúaja'." Cate' udxín ga ní' birúaj, tsöjxaca' bönni' na', náquiē' ca tu yu'u nadachi', en nalúaj, en chinabá'a para nu tsöjsóa ni'. ⁴⁵ Ní'irö tseaj, tsöjzxi' ia'gadxi bö' xihui' nácatatēro' xihui' ca le, ate' ila'yaza yúgu'tē, en ila'cuá' icja lādxi' ahuē' bönni' na', ate' ga údxi huayáli'tērö ca gaca queē' bönni' na' ca guca queē' zí'aló. Lēscá' caní gaca quegaca bönachi tuá' dö' ni.

Xinē'ē Jesús, en yugu' bönni' böchē'ē
(Mr. 3:31-35; Lc. 8:19-21)

⁴⁶ Cate' ni' ruí'ilenē' Jesús bönachi didza' ni, xinē'ē, en yugu' bönni' böchē'ē bila'dxinē' ni'. Gula'cu'ē lö'aló, en gulē'éniguequinē' ilu'í'ilenē' Jesús didza'. ⁴⁷ Ní'irö tu bönni' busiyönnē' Jesús, en rē' Lē':

—Buyútsöca', nacu'ē xinó'o, en yugu' bönni' böchu'u lö'aló, en tē'ennē' ilu'í'ilenē' Lí' didza'.

⁴⁸ Bubi'ē didza' Jesús, en rē' bönni' na' busiyönnē' Lē' caní, rnnē':

—¿Nózili' nuzxi caz xiná'a, en nupxi caz bönni' böcha'a?

⁴⁹ Ní'irö bulí' nē'ē, en bulu'e yugu' bönni' uséda queē', en rnnē':

—Buli'yútsöca', bönni' ni nácaqaquié' ca xiná' caza', en yugu' böchi' caza'. ⁵⁰ Núti'tës nu run ca rë'ëni quëziné' Xuzá' zoé' yehua' yubá, nu ni naca bi'i böchi' caza', en bi'i zan caza', en xiná' caza'.

13

Rucúdz'u'ë didza' Jesús ca naca queë' tu bönni' guz

(Mr. 4:1-9; Lc. 8:4-8)

¹ La' dza ní'isö birúajë' Jesús niu' yu'u, ate' yöjchö'ë ra' nísado'. ² Tu' bila'dxin bönnachi zían ga zoé' Jesús, gurenë' tu lë'e bárcodo', en gurö'ë ni', ate' bönnachi zían na' gula'cuá' luyú bidxi ra' nísado' na'. ³ Ní'irö Jesús bë'lenë' légaquié' didza', zían le busediné' légaquié'. Bucúdz'u'ë didza', rnnë':

—Buli'yútsöca', birúajë' tu bönni' guz, söjësië' xisedo'. ⁴ Tsanni ni' söjësië', bal-la xisedo' na' gulasí ra' nöza, ate' bila'dxinba' biguinnido', en gulë'ajba' xisedo' na'. ⁵ Gulasí ia'zica'rö xisedo' na' luyú ga rö'ö guiöj, ga na' rö'ö láti'sö yu, ate' la' gula'lentë, tu' cabí rö'öda' yu ni'. ⁶ Ní'irö cate' budzá'a gubidza, lë na' bësië' la' gula'cuáditë, en gula'bidxi, tu' cabí dë ga ilún luí. ⁷ Gula'lén ia'zica'rö xisedo' na' ga bulu'lén lubá yötsi', ate' gula'zxön lubá yötsi' na', en bila'röli lë na' bësië', en gulún ditaj le. ⁸ Gulasí ia'zica'rö xisedo' na' ga naca luyú bëbu, ate' bulu'nödzej. Bal-la lë na' bësië' bulu'nödzej ia'tú gayuá'tërö ca'. Ia'zica'rö bulu'nödzej ia'tsónnalaj ca', ate' ia'zica'rö bulu'nödzej ia'chí uruá' ca'. ⁹ Nu zoa nagui, en riyóni, ral-la' uzë nagui.

Le t'ëni ilún le bucúdz'u'ë Jesús didza'

(Mr. 4:10-12; Lc. 8:9-10)

¹⁰ Ní'irö bila'dxinë' bönni' usëda queë' Jesús ga zoé', en gula'nábinë' Lë', ta'nnë':

—¿Bíx que ru'ílenu' bönnachi didza' yugu' le rucúdz'u' didza'?

¹¹ Bubi'ë didza' Jesús, en rë' légaquié':

—Dios ru'ë libí'ili' lataj tséajni'ili' le nagachi' ca rinná bë'ë Lë' yehua' yubá, pero bönnachi ni bití' t'ëni ila'yéajni'i. ¹² Nu sí' xtídzë'ë, Dios unödzejë' que ia'lati', ate' gáta'da'arö que, pero nu bití' sí' le, la's dui le dë que udúa. ¹³ Que lë ni na' ru'ílena' légaquié' didza' yugu' le rucúdz'u' didza', tu' tu'yúë' pero bití' ta'lé'enë'. Ta'yönnë' pero bití' tu'zë'nágagaquié', en bití' ta'yéajni'inë'. ¹⁴ Caní' raca quégaquié' para gaca ca na' gunné' Isaiás, bönni' bë'ë didza' uláz queë' Dios, gunné':

Le nácatë yónili' pero bití' tséajni'ili'.

Uyuli' iná'ali' pero bití' ilé'eli'.

¹⁵ Caní' raca tu' nazidi ládxi'do' gaca bönni' ni,

en bití' bi' riyaza icja'nágagaquié'.

Nadzudi' guiöj lógaquié',

para cabí ila'lé'enë' len guiöj lógaquié' na'.

Bití' ulu'zë'nágagaquié',

en bití' ulu'zéajni'i ládxi'gaquié',

en bití' ulu'huóaquié' quia' neda'

para gaca una' légaquié'.

¹⁶ Na'a, bica' ba libí'ili', tu' rilé'e guiöj loli', en riyóni'nágali'. ¹⁷ Le nácatë rea' libí'ili', zían bönni' gulu'ë didza' uláz queë' Dios en yugu' bönni' tsahui' gulë'ënnë' ila'lé'enë' le rilé'eli' libí'ili' pero bití' bila'lé'enë' le. Gulë'ënnë' ila'yönnë' le riyónili' libí'ili' pero bití' bila'yönnë' le.

Ríguíxjö'ë Jesús le bucúdz'u'ë didza'

(Mr. 4:13-20; Lc. 8:11-15)

¹⁸ Gunnë' ca' Jesús:

—Buli'zë'nágali' ca naca le bucúdz'u' didza' que bönni' guz. ¹⁹ Núti'tës nu riyóni didza' ca rinná bë'ë Dios yehua' yubá, en bití' réajni'i le, raca que didza' riyóni nu na' ca guca que xisedo' na' gulasí ra' nöza. La' za'të tu' xihui', en rugúa didza' na' guyu'u icja ládxi'da'ahué' bönni' na'. ²⁰ Xisedo' na' gulasí luyú ga rö'ö guiöj rulu'i ca raca queë' bönni' riyönnë' didza' na', en la' ruzetë'náguié' lu yöl-la' rudzeja queë', ²¹ pero ca na' bití' ridía' xisedo' na' tu' cabí dë ga gun luí, lësca' caní' raca queë' bönni' ni. Cate' idxin tu le usaca' zi' lë', ate' ila'bia'nágaca bönnachi lë' tu' nazí' lu në'ë didza' na', la' gácatë chopa ládxi'ë. ²² Xisedo' na' gulasí ga na' bulu'lén lubá yötsi' rulu'i ca raca queë' bönni' na' riyönnë' didza' na', pero ru'i ládxi'ë yugu' le dë yödzoili' ni, ate' nazí' yë'ë bönni' na', tu' ru'i ládxi'ë yugu' yöl-la' tsahui' que. Yugu' lë ni ta'röli didza' na', en tun ga bití' gun dxin lu icja ládxi'da'ahué'. ²³ Xisedo' na' gulasí luyú bëbu rulu'i ca raca queë' bönni' riyönnë' didza' na', en réajni'inë' le, ate' run dxin didza' na' lu icja ládxi'da'ahué'. Náca gaca bal-la bönnachi ca xisedo' na' bulu'nödzej ia'tú gayuá'tërö ca'.

Nácagaca ia'zica'rò bònachi ca xisedo' na' bulu'nòdzaj ia'tsónnalaj ca', ate' nácagaca ia'zica'rò bònachi ca xisedo' na' bulu'nòdzaj ia'chí uruá' ca'.

Tu guíxi'do' cané le nalá' ca rilá' yòla xzoa' xtila

²⁴ Ia'tù le bucúdzu'è didza' Jesús, ate' rè' légaquiè':

—Ca gaca cate idxín ni le rinná bē'è Dios yehua' yubá naca ca guca que xisedo' dxi'a le guzē' tu bōnni' ga naca lu xiyúē'. ²⁵ Tsanni na' tasiē' bōnni' nacu'è lidxē', bidxín tu nu biti' rilé'e xan yu'u na' dxi'a, ate' yōjōza lu xiyúē' xisedo' guíxi'do' cané le nalá' ca naca yòla xzoa' xtila, ate' bōaj xilataj. ²⁶ Cate' gulén xzoa' xtila na', en gurō'ò do que, ga na' dxía xui'i, ní'rō gulaca bē' guíxi'do' cané na'. ²⁷ Ní'rō bila'dxinē' bōnni' huen dxin ga zoē' bōnni' xan la' yēla na', en tē' lē': "Xan, channō' guzu' xisedo' dxi'a lu yu quíu', ¿nacxi guca gula'lén guíxi'do' cané na'?" ²⁸ Xan yu na' gudxē' légaquiē', rnnē': "Tu bōnni' biti' rilé'enē' neda' dxi'a benē' caní." Ní'rō gula'nabínē' huen dxin queē' lē', ta'nnē': "¿Ba rē'ēnu' tséajtu' tsōjōlajtu' guíxi'do' cané na'?" ²⁹ Xángaquíē' rē' légaquiē': "¿Biti' ca'! Nadx ca' cate' iládzu'li' guíxi'do' cané na', iládzu'lentēli' ca' yòla xzoa' xtila. ³⁰ Gácarō dxi'a guí'ili' lataj ila' zẏōngarō' tsōzẏōn cate' idxinrō dza' tsōjtúbiru' le, ate' ní'rō guía' nupa ulu'tubi le: Buli'tubi zí' alō guíxi'do' cané na', en gulí'guga' tsōjxili huéaj para uzéguí'ru' le, ate' ní'rō utúbili' xzoa' xtila lu yu'u quia'."

Rucúdzu'è didza' Jesús ca naca que xisé mostaza

(Mr. 4:30-32; Lc. 13:18-19)

³¹ Ia'tù le bucúdzu'è didza' Jesús, ate' rè' légaquiè':

—Ca gaca ga idxín le rinná bē'è Dios yehua' yubá, gaca ca raca que tu xisé mostaza, le guzē' tu bōnni' ga naca lu xiyúē'. ³² Le nácatē' xisé mostaza na' nácatērō cuidi' ca yúgu'tē xisedo' ia'zica'rò, pero cate' chinadúz, rizxōntērō ca yúgu'tē guixi' cuan, en rizxōn ca naca tu yaga, ate' ta'dxinba' biguínido', en tunba' xicá'agacaba' lu ni'a nē'e.

Rucúdzu'è didza' Jesús que cúa zi que yōta xtila

(Lc. 13:20-21)

³³ Ia'tù le bucúdzu'è didza' Jesús, ate' rè' légaquiè':

—Ca gaca ga idxín le rinná bē'è Dios yehua' yubá gaca ca le run cúa zi que yōta xtila, le buchíxinu tu nigula len tsonna libixi yōja xzoa' xtila, ate' guyazxa idútē cúa na'.

Le rē'ēni gun le rucúdzu'è didza' Jesús

(Mr. 4:33-34)

³⁴ Yúgu'tē lē ni bucúdzu'è didza' Jesús, le bē'lenē' bònachi nacua' ni' didza', en biti' bi didza' bē'lenē' légaquiē' le cabí bucúdzu'è didza'. ³⁵ Caní benē' para gaca lē na' buzúajē' lu guichi tu bōnni' bē'è didza' uláz queē' Dios, gunné':

Gu'a didza' yugu' le ucúdzu'a didza'.

Inniá' yugu' le nagachi' cate' ni' gusí lo si' guta' yōdzōlió.

Rigúxjō'è Jesús le bucúdzu'è didza' que guíxi'do' cané

³⁶ Ní'rō buzenē' Jesús bònachi nacua' ni' didza', en gusól-lē'è légaquiē', ate' guyu'ē yu'u. Ní'rō bila'dxinē' bōnni' usēda queē' ga zoē', en tē' Lē':

—Gudíxjō'i' netu' le rē'ēni inná lē na' bucúdzu'u didza' que guíxi'do' cané le nalá' ca naca yòla xzoa' xtila.

³⁷ Bubi'è didza' Jesús, ate' rè' légaquiē':

—Bōnni' razē' xisedo' dxi'a naca' neda', Bōnni' Guljē' Bōnachi. ³⁸ La' yēla na' naca yōdzōlió ni, ate' xisedo' dxi'a na' tu'lu'í ca nácagaca nupa nabábagaca ga rinná bē'è Dios. Guíxi'do' cané na' le nalá' ca naca yòla xzoa' xtila tu'lu'í ca nácagaca nupa néquigeequi que tu' xihui'.

³⁹ Nu na' biti' rilé'e dxi'a xan la' yēla na', en yōjōza guíxi'do' cané na' tu' xihui' caz naca. Dza ulu'tubē' na' rulu'í ca gaca dza údxi que yōdzōlió ni, ate' nupa na' tu'tubi nácagaca gubáz lá'ayi queē' Dios. ⁴⁰ Ca na' guca, bulu'tubē' guíxi'do' cané na', en bulu'zégui'è le lu guí', lē'sca' caní gaca cate' údxi que yōdzōlió ni. ⁴¹ Neda', Bōnni' Guljē' Bōnachi, isól-la'gaca-nē' gubáz lá'ayi quia', ate' ulu'béajē' ga rinná bē'è Dios yúgu'tē nupa tun ga tun dul-la' luzē'eguequi, enca' nupa tuá' dō'. ⁴² Yugu' gubáz lá'ayi na' ila'gu'è bōnni' tuá' dō' na' lu guí' gabila. Ní' ila'bōdxē', en ulu'tíl-la láyi'gaquiē'. ⁴³ Ní'rō ila'yēpi yōsa bení' bònachi tsahui', en ilácagaquiē' ca gubidza ga ni' rinná bē'è Dios yehua' yubá. Nu zoa nagui, en riyōni ral-la' uzé nagui.

Rucúdzu'è didza' Jesús que tu yōl-la' tsahui' nagachi'

⁴⁴ Lē'sca' caní bucúdzu'è didza' Jesús, rnnē':

—Le rinná bē'è Dios yehua' yubá naca ca tu yōl-la' tsahui' nagachi' tu la' yēla. Cate' bidzōlinē' tu bōnni' le, bucáchē'è le leyúbolō ga na' bigachi', ate' lu yōl-la' rudzeja queē' guyijē', yōjēti'è yúgu'tē le dē queē' ate' gú'uē' la' yēla na' para gata' yōl-la' tsahui' na' queē'.

Rucúdzu'è didza' Jesús que tu bugá le nazáca'da'

⁴⁵ Gunnē' ca' Jesús:

—Ca ral-la' sè ládxi'li' le rinná bē'ē Dios yehua' yubá naca ca benē' tu bōnni' rá'uē', en ruúti'ē, en riguiljē' bugá nazáca'gaca. ⁴⁶ Cate' bidzōlinē' tu bugá le nazáca'da', guyijē', yōjēti'ē yúgu'tē le dē queē', ate' gú'uē' bugá na'.

Rucúdzu'ē didza' Jesús que tu yōxaj bōla

⁴⁷ Lēscá' caní gunnē' Jesús:

—Ca gaca ga ridxín le rinná bē'ē Dios yehua' yubá, gaca ca run tu yōxaj bōla le ta'chiljē' bōnni' lu nísado', le rōjxi' zían bōla izá'a. ⁴⁸ Cate' chibidzá' yōxaj na', bulu'béajē' le luyú bidxi ra' nísado' na', ate' gula'bō'ē ní', en gula'gu'ē-ba' yugu' bōla dxi'a tu lu ga'bōra, pero gula'rú'unē'-ba' yugu' bōla cá'asō. ⁴⁹ Lēscá' caní gaca cate' údxi que yōdzōlió ni. Ila'rúajē' gubáz lá'ayi queē' Dios, ate' ulu'béajē' quez yugu' bōnachi tsahui', ate' ulu'cuitiē' légaquiē' ladaj bōnachi tuá' dō'.

⁵⁰ Ní'irō Ila'gu'ē bōnachi tuá' dō' na' lu guí' gabila. Ní' ila'bōdxē', en ulu'tíl-la láyē'ē.

Yōl-la' tsahui' le naca gula, en le naca cubi

⁵¹ Ní'irō Jesús gunábinē' yugu' bōnni' usēda queē', rnnē':

—¿Ba réajni'ili' yúgu'tē lē ní'?

Bulu'bi'ē didza', tē' Lē':

—Ōn, Xan.

⁵² Jesús gudxē' légaquiē':

—Cate' tu bōnni' yudo' usedi chinazí' lu nē'ē le rinná bē'ē Dios yehua' yubá, náquiē' ca tu bōnni' xan yu'u, rubéajē' ladaj yōl-la' tsahui' queē' le naca cubi, en le naca gula, le nácagaca tsahui' le ruzi'ē xibé.

Le benē' Jesús lu yōdzō Nazaret

(Mr. 6:1-6; Lc. 4:16-30)

⁵³ Cate' budxi bucúdzu'ē Jesús yugu' didza' ni, buzē'ē ní'. ⁵⁴ Cate' budxinē' ladzē', busédinē' bōnachi nacua' lu yu'u ga tu'dubē' bōnni' judío, en tu'sedē' queē' Dios, ate' bulu'bánniē', ta'nnē':

—¿Gazxi caz guzēdē' bōnni' ni yōl-la' réajni'ni? ¿Nacxi caz naca, runē' yugu' yōl-la' huáca ni?

⁵⁵ Náquiē' bōnni' ni xzi'inē' bōnni' gubēdxi yaga, ate' xinē'ē lēnu María. Náquiē' bōchi'gaquiē' Jacobo, en José, en Simón, en Judas. ⁵⁶ Lēscá' nígula zanē' nacua'lennu rē'u ni. ¿Gazxi caz guzēdē' yúgu'tē lē ní'?

⁵⁷ Que lē ni na' gulaca chopá ládxi'gaquiē', ate' bulu'cá'anē' Lē'. Ní'irō Jesús gudxē' légaquiē':

—Yúgu'tē bōnachi tun bal tu bōnni' ru'ē didza' uláz queē' Dios, pero bōnachi uládz queē', en bōnachi nacua' lidxē' bití' tun lē' bal.

⁵⁸ Que lē ni na' bití' benē' Jesús zían yōl-la' huáca ni', tu' cabí ta'yéajlē'ē Lē'.

14

Ca bētgaquiē' Juan, bōnni' buquilē' bōnachi nisa

(Mr. 6:14-29; Lc. 9:7-9)

¹ Lu dza ní', biyōmnē' Herodes, bōnni' rinná bē'ē luyú Galilea, ca nácagaca yugu' yōl-la' huáca runē' Jesús. ² Herodes na' gudxē' yugu' ni'a nē'ē, rnnē':

—Bōnni' na' Juan, bōnni' buquilē' bōnachi nisa. Chibubanē' lu yōl-la' guti. Que lē ni na' dē lu nē'ē yōl-la' huáca xzōn na'.

³ Caní gunnē' Herodes tu' gusól-lē'ē lē' cazē' bōnni' gula'zōnē' Juan, en gulúgui'ē lē' du guíē, ate' gula'gu'ē lē' lidxi guíē tu' gú'uninu Herodías ilunē' caní. Herodías na' gúcanu nígula queē' Felipe, bōché'ē Herodes na'. ⁴ Caní benē' Herodes, tu' gudxē' Juan na' lē': "Biti' ralla' sóalenu'-nu."

⁵ Que lē ni na' gú'unnē' Herodes gútiē' Juan, pero gúdxinē' ila'dá'baga' bōnachi lu yōdzō ní' lē', tu' téquigueti bōnachi náquiē' Juan na' tu bōnni' ru'ē didza' uláz queē' Dios. ⁶ Ní'irō cate' guca laní que dza guyé'enē' iz Herodes, birúajbi' bi'i nígula queēnu Herodías na', en buyá'abi' lógaca nupa nacua' laní na', ate' guyaza ládxi'ē Herodes le benbi'. ⁷ Guzxi' lu nē'ē Herodes, en benē' tsutsu xtídzē'ē unōdzjē' queēbi' bití'tés bi inábibi' lē'. ⁸ Tu' chibusédinu-bi' zí'aló xiná'abi', gúdxibi' lē':

—Benna quia' na' a icjē' Juan, bōnni' buquilē' bōnachi nisa. Gulú'u le tu lu xziga' xzōn.

⁹ Ní'irō buí'innē' Herodes, pero tu' chibenē' tsutsu xtídzē'ē, en tu' bila'yōni nupa te'aj tágulen lē', que lē ni na' gunná bé'enē' nu tsōjnōdzaj icjē' Juan na' queēbi'. ¹⁰ Caní guca, gusól-lē'ē nu tsōjrixeni yenē' Juan ga ní' yu'ē lidxi guíē. ¹¹ Bōnni' na' nasól-lē'ē bu'ē icjē' Juan na', xzoa lu xziga' xzōn, ate' bunōdzjē' le queēbi' bi'i nígula na', ate' lēbi' buá'abi' le queēnu xiná'abi'.

¹² Ní'irō bila'dxinē' bōnni' gula'dē'ē Juan na', ate' bulu'ú'ē lē', en bulu'cáché'ē lē'. Gudōdi ní', yōjtíxjōi'iguequinē' Jesús ca gulaca lē ni.

Jesús rugahuë' zíanrö ca chi-un gayuá' bönachi

(Mr. 6:30-44; Lc. 9:10-17; Jn. 6:1-14)

¹³ Cate' réquibe'enë' Jesús lë ni, buzë'ë ni', ate' gurenë' tu lë'e bárcodo', en sa'yéajë' la' queézë' tu lataj cá asö. Cate' bila'yöni bönachi zéajë' ni', bila'rúaj yugu' yödzö ni', en yójaca ga ni' idxinë' Jesús, ta' zë'e ní'aguequi. ¹⁴ Cate' burúajë' Jesús lë'e barco, bilé'enë' nacua' bönachi zían ni', ate' buéchi' ládxë'ë léguequi, en bunë' nupa te'e, nútsa'gaca ládjaguequi. ¹⁵ Cate' chiridzö' dza na', bila'dxinë' yugu' bönni' usëda queë' Jesús ga zoë', en të' Lë':

—Chiridzö' na'a, ate' cá asö naca lataj ni. Busöl-la' bönachi ni para tsöjaca gapa dë yödzödo' para gá'ugaca bi ilagu.

¹⁶ Ní'irö Jesús gudxë' légaquië':

—Biti' run bayudxi tsójáquië'. Buli'nödzej libí'ili' le ilahuë'.

¹⁷ Ní'irö të' Lë':

—Gáyu'sö yöta xtila dë, en chópasöba' böla dëba' queëtu' ni.

¹⁸ Jesús rë' légaquië':

—Buli'dödi le lu na'a.

¹⁹ Ní'irö Jesús gunná bé'enë' bönachi na' ila'bö' ga yu'u daca'. Gudödi na' gudélë'ë gayu' yöta xtila na', en chópaba' böla na', ate' guchisa lahuë', ruyúë' zaca' yehua' yubá. Gudxë' Dios: "Xclenu'." Ní'irö buzuxzjé' yöta xtila na', en budödë' le lu ná'agaquië' bönni' usëda queë', ate' légaquië' gula'guisië' le lógaca bönachi zían na'. ²⁰ Gulahuë' yúgu'tégaquië', en bulu'huöljanë'. Ní'irö bulu'tubë' yugu' bizxaj nagá'anagaca, en bulu'lié' chinnu ga'böra. ²¹ Bönni' ni' gulahuë' guláquië' idü chi-un gáyu'ë, pero cuntu nu bulaba yugu' nigula, en bí'ido'.

Jesús rizë'e ni'ë lu nísado'

(Mr. 6:45-52; Jn. 6:16-21)

²² Ní'irö la' bentë' Jesús ga gula'benë' bönni' usëda queë' lë'e bárcodo', en tsójáquië', ila'nöruë' lahuë' Lë', para ila'dödë' ia'tsölá'a nísado' ni', tsanni na' uzenë' Lë' bönachi nacua' ni' didza'. ²³ Cate' chibusöl-lë'ë Jesús bönachi na', gurenë' tu lu guí'ado' ga ni' yöjsóë' tuzë'. Ní' bulidzë' Dios. Cate' chigul-la, tuzë' zoë' ni'. ²⁴ Bárcodo' ga na' nacu'ë bönni' usëda queë' ridödi gatsaj láhuilö nísado' na', ate' riyasa bárcodo' na' tu' riyasa ridxía nísado' na', ate' ruzaga' bö' recja barco na'. ²⁵ Gudödi guluhuëla, gubígui'ë Jesús gala' ga na' nacu'ë, rizë'e ni'ë lu nísado'. ²⁶ Cate' yugu' bönni' usëda queë' bila'lë'enë' Lë', rizë'e ni'ë lu nísado', gula'bö'dë'ë böniga tu' tádxinë'. Gula'bödxí'ë, ta'nnë':

—Tu' ridasö na'.

²⁷ Ní'irö Jesús la' bulidztë' légaquië', rnnë':

—Buli'zxo'ni ládxí'li'. Neda' ni. Biti' gádxili'.

²⁸ Ní'irö bubí'ë didza' Pedro, rë' Jesús:

—Xan, channö nacu' Li', gunná be'e neda' guída' ga na' zu' lu nisa.

²⁹ Jesús gudxë' lë':

—Gudá.

Ní'irö bö'tjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús.

³⁰ Ní'irö cate' bilé'enë' Pedro ca bö' na' recja rutá nisa, gudxinë'. Ní'irö gusi lahuë' rötjë' lu nisa, ate' gurödxí'ë. Bulidzë' Jesús, rnnë':

—Xan, busölá neda'.

³¹ Jesús la' bulitë në'ë. Buguélë'ë lë', en rë' lë':

—Láti'sö réajlë'u neda'. ¿Bizx que guca chopa ládxu'u?

³² Cate' bulu'benë' lë'e bárcodo' na', gurö'ö dxi bö' na' recja. ³³ Ní'irö bönni' nacu'ë lë'e bárcodo' na' gula'yéaj ládxí'gaquië' Jesús, ta'nnë':

—Le nácatë, Zxí'inë' Dios nacu'.

Jesús ruinë' yugu' bönni' huë' nacu'ë yödzö Genesaret

(Mr. 6:53-56)

³⁴ Cate' chigula'dödë' ia'tsölá'a nísado' na', la' bila'dxintë' lu xiyú yödzö Genesaret. ³⁵ Cate' bulu'únbë'ë bönni' yödzö ni' Jesús, gula'söl-lë'ë didza' idútë luyú ni', ate' dujuá'gaquië' yúgu'të nupa te'e ga na' zoë' Jesús. ³⁶ Gulá'tayuë' lahuë' Jesús gu'ë légaquië' lataj ila'gansë' ruí'í lari' nácuë', ate' la' bulu'huóacaté yúgu'të nupa na' bila'gán lari' na'.

15

Le tun ga bití' nácaru' tsahui' lahuë' Dios

(Mr. 7:1-23)

¹ Ní'irö yugu' bönni' yudo' fariseo, en bönni' yudo' tu'sédinë', narúajgaquië' Jerusalén, bila'dxinë' ga zoë' Jesús, ate' të' Lë':

² —¿Bíx que tuné' bönni' usêda quiu' le ridödi bē' ca naca le nulaga loru' runru' ca gulunē' xuz xtó'oru'? Biti' ta' guíbi nē'ē ca naca que yudo' cate' si' ilahuē'.

³ Bubi'ē didza' Jesús, en gunábinē' légaquiē', rnnē':

—¿Bíx que libí'ili' ca' rucá'anali' cá'asó xibá queē' Dios para gunli' le nulaga loli' runli'?
⁴ Caní raca, tu' gunná bé'enē' Dios libí'ili', gunné': "Ben bal xuz xino'o", en gunné' ca': "Nu innē zí' que xuz xinē'e, tsaz gati nu na'." ⁵ Pero libí'ili' rnnali': "Channó nu guéē xuz xinē'e: Biti' bi gaca gunna' quiu' tu' chiguzxi' lu na'a gunna' yúgu'tē queē' Dios, ⁶ bíti'rō bi run bayudxi gun nu na' que xuz xinē'e." Caní runli', rucá'anali' cá'asó le gunná bē'ē Dios, para gunli' le nulaga loli' runli'. ⁷ Libí'ili', bönni' rulu'isó tsahui' cuinli', idú ca nácali' gudá'xjö'ē Isaias, bönni' bē'ē didza' uláz queē' Dios, gunné':

⁸ Bönni' ni, len rú'agacsē' tunē' neda' bal, en calēga idú ládxi'gaquiē'.

⁹ Nítisō naca le ta'yéaj ládxi'gaquiē' neda', tu' tu' sédinē' yugu' le gula'nná bē' bōnachi.

¹⁰ Ní'irō bulidzē' Jesús bōnachi nacua' ni, en rē' léguequi:

—Buli'zē nágalí' le guía' libí'ili', en guli'tséajni'i. ¹¹ Calēga le riyaza ru'ē nu bönni' run ga bití' náquiē' tsahui' lahuē' Dios, pero le rirúaj ru'ē, lē ni run ga bití' náquiē' tsahui' lahuē' Dios.

¹² Ní'irō yugu' bönni' usêda queē' Jesús gula'bígui'ē ga zoē', en tē' Lē':

—¿Naru' nōztsenu' gula'lenē' yugu' bönni' yudo' fariseo cate' bila'yōnnē' didza' ni bē'u?

¹³ Ní'irō bubí'ē didza' Jesús, en rē' légaquiē':

—Yúgu'tē le nadúz, le cabí'guzē' Xuza' zoē' yehua' yubá, huadúl'jagaca idú luí. ¹⁴ Buli' cá'ana légaquiē'. Chinachúl-la lógacaquiē', en ta'chē'ē nupa nachul-la lógaca. Channó tu bönni' lo chul-la ichē'ē ia'túē' bönni' lo chul-la, iropē' ila'bixē' tu lu yeru.

¹⁵ Ní'irō bubí'ē didza' Pedro, en rē' Jesús:

—Buzéajni'i netu' lē ni rucúdz'u didza'.

¹⁶ Jesús rē' légaquiē':

—¿Naru' cabí' réajni'itseli' ca' libí'ili'? ¹⁷ ¿Naru' cabí' réajni'itseli' riyaza lē'ēru' yúgu'tē le riyaza ruá'aru', atē' rurúaj lē'ēru'? ¹⁸ Na'a, le rirúaj rúa'alí', lu icja ládxi'do'olí' za', atē' lē ni run ga bití' nácali' tsahui' lahuē' Dios. ¹⁹ Caní raca, tu' ta'len lu icja ládxi'do'olí' yugu' le rizá' ládxi'li' le ruá' dō', le ilún ga gútili' bōnachi, en le ilún ga quítsjali' xibá que yól-la' nutsaga na', en le ruá' dō' runli', en yugu' le rizé ládxi'li' cuanli', en yugu' le rinnēli' que luzá'alí' le cabí'nacate, en yugu' le rinnē xíhuili'. ²⁰ Yugu' le caní tun ga bití' náquiē' tu bönni' tsahui' lahuē' Dios, pero channó cabí' nayari nē'ē ca naca que yudo' cate' bi gahuē', bití' gun ga bití' náquiē' tsahui' lahuē' Dios.

Tu nigula izá'a réajl'ēnu Jesús

(Mr. 7:24-30)

²¹ Ní'irō buzé'ē Jesús ni, en guyéajē' lu xiyú yōdzō Tiro, en yōdzō Sidón. ²² Tu nigula nabábanu luyú Canaán birúajnu yōdzō ni, atē' bē'ēnu zidzaj didza', rēnu Jesús:

—Xan, xzí'ini xisóē' David, buéchi' ladxí' neda'. Bi'i nigúlado' quia' riguí' rizáca'da'abi' tu' yu'u bō' xihui' lēbi'.

²³ Biti' bi didza' bubí'ē Jesús. Ní'irō gula'bígui'ē bönni' usêda queē' ga zoē', atē' gulē' Lē', ta'nnē':

—Busól-la'-nu, tu' zá'anu cúdz'u'ru' ribódxí'anu.

²⁴ Ní'irō bubí'ē didza' Jesús, atē' rē'ē-nu:

—Dios nasól-lē'ē neda' gácalena' bōnachi Israel, nupa nácacaca ca bō'cu' xzila'do' nanítigacaba'.

²⁵ Ní'irō gubíga'nu nigula na' ga zoē' Jesús, en guyéaj ládxi'nu Lē', atē' rēnu Lē':

—Xan, gúcalen neda'.

²⁶ Bubi'ē didza' Jesús, rnnē':

—Biti' naca dxi'a ugúaru' yōta quegacabi' bí'ido', en chú'unaru' le lógacaba' bō'cu'do'.

²⁷ Ní'irō nigula na' rēnu Jesús, rnnanu:

—Ön, Xan, pero táguba' bō'cu'do' na' le bizxaj tu'huóxaj ga tagu xángacaba'.

²⁸ Ní'irō bubí'ē didza' Jesús, rnnē':

—Nigúlado'. Idú naca ca réajl'ē'u neda'. Gaca quiu' ca rē'ēnnu'.

La' ní'isó bōacatēbi' bi'i nigúlado' queēnu.

Jesús ruínē' zían nupa te'e

²⁹ Ní'irō buzé'ē Jesús ni, en gudödē' ga naca ra' nísado' que Galilea. Gurenē' tu lu guí'ado', atē' gurō'ē ni'. ³⁰ Bōnachi zían dujuá'gaquiē' nupa bití' guca ila'zá', en nupa nachul-la guió'j lógaca, en nupa bití' guca ila'nnē', en nupa narugu ni'a nē'guequi, en ia'zica'rō zían nupa te'e, atē' gula'guíxaj léguequi xini'ē Jesús, atē' Lē' bunē' léguequi. ³¹ Bulu'bani bōnachi ni' ca naca le benē' Jesús, tu' bila'lē'e tu'nnē nupa bití' guca ila'nnē', atē' nuhuóacacaca nupa

gurugu ni'a në'eguequi, ate' tu'zá' nupa biti' guca ila'zá', ate' tu'l'é e nupa guchul-la lógaca. Que lè ni na' gula'gu'è yöl-la' ba Dios queégaca bönachi Israel.

Jesús rugahuë' zianrö ca choá' gayuá' bönachi
(Mr. 8:1-10)

³² Ní'irö Jesús bulidzë' yugu' bönni' usëda queë', en rë' légaquië':
—Ruhuechi' ládxa'a bönachi zian ni, tu' chiguca tsonna dza zá'lenguequi neda', en biti' bi dë le ilagu. Biti' rë'ënda' usöl-la'gaca'-në' tsöjhuöajgaquië' lédxigaquië' ta'dunsë' ca', nadxi ca' udú ládxi'gaquië' la' nöza.

³³ Ní'irö yugu' bönni' usëda queë' të' Lë', ta'nnë':

—¿Gazxi caz idzölitu' yöta xtila zian lu lataj cá'asö ni, le ugágotu' bönachi zian ni?

³⁴ Gunábinë' Jesús légaquië', rnnë':

—¿Bal-laxi yöta xtila dë queéli'?

Bulu'bi'ë didza', ta'nnë':

—Gadxi, ate' nabábasöba' böla cuidi' dëba' queëtu' ni.

³⁵ Ní'irö Jesús gunná bé'enë' bönachi zian na' ila'bö' lu yu. ³⁶ Gudélë'ë gadxi yöta xtila na', en yugu' böla na', ate' gudxë' Dios: "Xclenu'." Ní'irö buzzuxxjé' iroptë na', en bunödzejë' queégaquië' bönni' usëda queë', ate' légaquië' gula'guisië' le lógaca bönachi zian na'. ³⁷ Gulahuë' yúgu'të', en bulu'huöljanë'. Gudödi ni' bulu'tubë' le bizxaj nagá'anagaca, ate' bulu'lié' gadxi ga'böra. ³⁸ Yugu' bönni' na' gulahuë' nácagaquië' choá' gáyu'ë, pero cuntu nu bulaba yugu' nigula, en bí'ido'. ³⁹ Ní'irö busöl-lë'ë Jesús bönachi na' tsöjhuöajgaquië' lédxigaquië', ate' gurenë' lë'e bárcodo' ni', en sa'yéajë' lu xiyú yödzö Magdala.

16

Ta'nábinë' Jesús gunë' tu le gaca bë' nuzxi náquië'
(Mr. 8:11-13; Lc. 12:54-56)

¹ Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zi' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'.

² Bubi'ë didza' Jesús, en rë' légaquië':

—Cate' ridzö', rnnali' caní: "Gun dxi'a cuxö, tu' rö'ö böaj xiná lúzxiba." ³ Cate' naca zilado', rnnali' caní: "Biti' gun dxi'a na'a dza tu' rö'ö böaj xiná, en ruchul-la lúzxiba." Libí'ili', bönni' rulul'isö tsahui' cuinli'. Raca innë' ya'ali' naca gun lúzxiba, pero biti' gaca tséajni'ili' le tu'sedi le taca dza ni zóaru' na'a. ⁴ Yugu' bönachi tuá' dö' ni, en biti' zoa idú ládxi'gaca ta'nábini neda' guna' tu le gaca bë' Nu naca', pero biti' bi le gaca bë' ila'lé'enë'. Ila'lé'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irö Jesús bucá'anë' légaquië', söhuöjë'.

Le tu'sédinë' bönni' yudo' naca ca cúa zi que yöta xtila
(Mr. 8:14-21)

⁵ Cate' bila'dxinë' ia'tsöla'a nísado' ni', guléquiibe'enë' bönni' usëda queë' Jesús gulál-la ládxi'gaquië' ilu'ë le ilahuë'. ⁶ Ní'irö Jesús gudxë' légaquië':

—Buli'yútsöca'. Guli'gún chí'i cuinli' que le naca ca cúa zi que yöta xtila queégaquië' bönni' yudo' fariseo, en queégaquië' bönni' yudo' saduceo.

⁷ Ní'irö la' légasacë' gulún xtídza'gaquië' bönni' usëda queë', ta'nnë':

—Rnnë' caní tu' cabí nuá'aru' yöta xtila.

⁸ Réquiibe'enë' Jesús lë ni, ate' rë' légaquië':

—¿Bizx que run xtídza'li' la' libí'isili' tu' cabí nuá'ali' yöta xtila? Láti'do'os réajlë'ëli' neda'.

⁹ ¿Naru' cabí réajni'itseli', en biti' röjnétseli' ca guca queégaca gayu' yöta xtila ni', lë na' gulahuë' chí-un gáyu'ë bönni', ate' tsca xö ga'böra butúbili'? ¹⁰ ¿Naru' cabí röjnétseli' ca' ca guca queégaca gadxi yöta xtila ni', lë na' gulahuë' choá' gáyu'ë bönni', ate' tsca xö ga'böra butúbili'? ¹¹ ¿Naru' cabí réajni'ili'? Biti' bë'a didza' que yöta xtila cate' gudxa' libí'ili' gun chí'i cuinli' que le naca ca cúa zi que yöta xtila queégaquië' bönni' yudo' fariseo, en queégaquië' bönni' yudo' saduceo.

¹² Ní'irö gula'yéajni'inë' biti' gudxë' Jesús légaquië' ilún chí'i cuíngaquië' que cúa zi que yöta xtila, pero ral-la' ilún chí'i cuíngaquië' que le tu'sédinë' yugu' bönni' yudo' fariseo, en yugu' bönni' yudo' saduceo.

Pedro rnnë' Jesús náquië' Cristo
(Mr. 8:27-30; Lc. 9:18-21)

¹³ Cate' bidxinë' Jesús lu xiyú yödzö Cesarea, ga na' rinná bë'ë Filipo, gunábinë' yugu' bönni' usëda queë', rnnë':

—¿Bizxi ta'nná bönachi nu naca' neda', Bönni' Guljé' Bönachi?

¹⁴ Bulu'bi'ë didza', ta'nnë':

–Bal-lë' ta'nnë: “Juan nacu', bönni' nî' buquülë' bönachi nisa.” Ia'zica'rë' ta'nnë: “Elías nacu', bönni' nî' bë'ë didza' uláz queë' Dios dza ni'te.” Ia'zica'rë' ta'nnë: “Jeremías nacu', o ia'tué' bönni' bë'ë didza' uláz queë' Dios.”

¹⁵ Ní'irö Jesús gudxë' légaquië':

–Naru' libí'ili', çnuzxi rnnali' naca' neda'?

¹⁶ Bubi'ë didza' Simón Pedro, en rë' Lë':

–Lí' nacu' Cristo, Zxi'inë' Dios ban.

¹⁷ Bubi'ë didza' Jesús, rë' lë':

–Bica' xibó' lí', Simón, zxi'inë' Jonás, tu' cabí buluí'inë' nu bönni' lí' lë ni. Xuza' zoë' yehua' yubá buluí'inë' lí' lë ni. ¹⁸ Neda' rea' lí', lí' nacu' Pedro, ate' lu guiöj ni ucuá nupa ulu'dubi quia', ate' yöl-la' unná bë' que tu' xihui' biti' sequi' uzaga' xinözgaquië'. ¹⁹ Gunna' quiu' yugu' zxi'ini guié que lataj ga rinná bë' Nu zoa yehua' yubá. Le inná bë'u luyú ni, chigunná bë' ca' Nu na' zoa yehua' yubá, ate' le gu'u lataj gaca luyú ni, chibé' lataj gaca lë na' Nu na' zoa yehua' yubá ni.

²⁰ Ní'irö Jesús gunná bé'enë' yugu' bönni' usëda queë' cuntú nu ilë'ë náquië' Lë' Cristo.

Jesús rigúxjö'ë ca si' ilútië' Lë'

(Mr. 8:31-9:1; Lc. 9:22-27)

²¹ La' dza ní'isó gusí lahuë' Jesús rigúxjö'i'inë' yugu' bönni' usëda queë' run bayudxi tsejë' Jerusalén, ga ní' yugu' bixúz unná bë' en bönni' gula tu'zëajni'inë', en bönni' yudo' tu'sédinë' ulu'saca' zí'ë Lë', ate' ní'irö ilútië' Lë', pero cate' gaca tsonna dza ubané' lu yöl-la' guti.

²² Ní'irö Pedro guchë'ë Jesús quez, en gusi lahuë' ridil-lë' Lë' didza', rnnë':

–Xan, biti' gu'ë Dios lataj. Biti' ca' gaca quiu' ca rnno'.

²³ Ní'irö buécjë' Jesús, en rë' Pedro:

–Gucuita ga zoa'. Runu' ca run Satanás, tu' xihui'. Runu' ga gaca chopa ládxa'a tu' cabí naca le rizá' ládxa'u lí' ca rizá' ládxe'ë Dios, pero ca ta'za'só ládxi' gaca bönachi.

²⁴ Ní'irö Jesús gudxë' yugu' bönni' usëda queë', rnnë':

–Channö zoë' tu bönni' rë'ënë' të'ë neda', ral-la' uzóë' tsólá'aló yugu' le rë'ëni quézinë', en gáquië' ca tu bönni' sa'yéajë' zeajtë'ë lë'e yaga cruz, ate' ní'irö gaca të'ë neda'. ²⁵ Nu bönni' guë'ënnë' gun chí'ë yöl-la' na'bán queë', unitië' le, pero bönni' unitië' yöl-la' na'bán queë' tu' dë'ë neda', gata' yöl-la' na'bán idú queë'. ²⁶ ¿Naru' uzi'tsë' xibé tu bönni' channö utubë' yúgu'të le dë yödçolió ni pero unitië' yöl-la' na'bán idú queë'? Biti' bi gaca unödçjë' tu bönni' para gata' yöl-la' na'bán idú queë'. ²⁷ Caní rnniá', tu' huöda' neda', Bönni' Guljë' Bönachi, en idzaga yöl-la' unná bë' queë' Xuza' Dios neda', ate' idzágagaquië' gubáz lá'ayi quia' neda'. Ní'irö ubi'a que queë' bönachi tsca naca le núngaca. ²⁸ Le nácatë' rea' libí'ili': “Biti' ca' ilátigaca bal-la nupa nacué' ni cate' ila'lé'erö idinná bë'a neda', Bönni' Guljë' Bönachi.”

17

Ridzá' ca nalá' lahuë' Jesús

(Mr. 9:2-13; Lc. 9:28-36)

¹ Gudödi xopa dza, Jesús gudélë'ë Pedro len Jacobo, en Juan, böchë'ë Jacobo na', en guchë'ë légaquië', ate' yójáquië' quez tu lu guí'a sibi. ² Ní' bidzá' ca nalá' lahuë' Jesús lógaquië'. Guyëpi yösa bení' lahuë' Jesús ca ruzeni' gubidza, ate' lari' nácué' böáca chíguichido'os ca bení'. ³ Ní'irö bila'lé'enë' bönni' usëda queë' buluí'i lógaquië' Moisés, en Elías, ate' tuf'ilënë' Jesús didza'. ⁴ Ní'irö Pedro rë' Jesús:

–Xan, naca dxí'a zóaru' ni. Channö rë'ënu', guna' ni tsonna yu'u lága'do', tu quiu', ia'tú queë' Moisés, en ia'tú queë' Elías.

⁵ Tsanni ní' ru'ë Pedro didza' ni, la' guró'ötë tu böaj bení' le guzxoá légaquië', ate' lu böaj na' biyön chí'i nu rnna:

–Bönni' ni Zxi'ini caza'. Nadxí'ida'-në', en raza ládxa'a Lë'. Buli'zë nágali' didza' gu'ë.

⁶ Cate' bila'yönnë' bönni' usëda queë' chí'i na', gula'dzö'ë gusurú'aló, en guladxi bila'dzöbinë'. ⁷ Ní'irö gubigui'ë Jesús ga na' nacu'ë, ate' gudanë' légaquië', rnnë':

–Guli'chasa. Biti' gádxili'.

⁸ Cate' gula'chisa lógaquië', en bulu'yúë', cünturö nu bila'lé'enë', pero tuzë' Jesús.

⁹ Cate' ní' tu'dinnië' lu guí'a na', Jesús gunná bé'enë' légaquië', rnnë':

–Cuntu nu guiéli' ca guca lë ni bilé'eli' cate' ubanra' lu yöl-la' guti neda', Bönni' Guljë' Bönachi.

¹⁰ Ní'irö yugu' bönni' usëda queë' gula'nábinë' Lë', ta'nnë':

–¿Bixz que ta'nnë' bönni' yudo' usëdi run bayudxi uluí'i lahuë' Elías zí'aló ca uluí'i lahuë' Cristo?

¹¹ Bubi'ë didza' Jesús, rë' légaquië':

—Le nácaté ulufi lo cazé' zí'aló Elías, en ucá'ané' tsahui' yúgu'té. ¹² Neda' rea' libí'ili: “Chibulufi lahué' Elías na', pero biti' bulu'únbè'è lè', ate' yúgu'té ca rnasó quégaquié' guluné' queé'.” Lésca' caní iluné' quia' neda', Bónni' Guljé' Bónachi, ulu'saca' zí'è neda'.

¹³ Ní'iró gula'yéajni'iné' bönni' uséda queé', bé'lené' Jesús légaquié' didza' ca guca queé' Juan, bönni' na' buquilé' bönachi nisa.

Ruúné'-bi' Jesús tubi' bi'i bönni' ré'ebi' xjote'

(Mr: 9:14-29; Lc: 9:37-43)

¹⁴ Cate' bila'dxiné' ga na' nacua' bönachi zían, gubígui'è tu bönni' ga zoé' Jesús, ate' buzóa zxibé' lahué' Lè', ¹⁵ en rè' Lè':

—Xan, buéchi' ladxí'-bi' bi'i bönni'do' quia', tu' ré'ebi' xjote', en riguí'i rizáca'da'abi', ate' zían luzuí ridzö'öbi' lu guí' o lu nisa. ¹⁶ Chidiguá'a-bi' lógaquié' bönni' uséda quiu' pero biti' guca ulu'úné'-bi'.

¹⁷ Bubi'è didza' Jesús, rnné':

—Libí'ili', bönachi cabí réajlé'éli', en biti' nácali' tsahui'. ¿Gáca'xte caz ral-la' sóalena' libí'ili' para tséajlé'éli' neda'? ¿Gáca'xte caz ral-la' guá' ilena' queéli'? Guli'diguá'-bi' quia' ni.

¹⁸ Ní'iró Jesús buzené' le bach bö' xihui' na' yu'u lébi', ate' la' burúajté lébi', ate' la' ná'asó böácaté'bi' bi'i bönni'do' na'.

¹⁹ Ní'iró, yugu' bönni' uséda queé' Jesús gula'bigué'è quez ga zoé', ate' gula'nábiné' Lè', ta'nné':

—¿Bizx que na' biti' guca ubéajtu' netu' bö' xihui' na'?

²⁰ Jesús rè' légaquié':

—Biti' guzxéqui'li' tu' cabí réajlé'éli' Dios idú ladxí'li'. Le nácaté rea' libí'ili', sal-la' cuidi'só naca yól-la' réajlé' queéli' Dios, nácaté ca tu xisedo' mostaza, huáca guiéli' guí'ado' ni: “Gucuíta ni, en yójsos ní'ilo", ate' la' icuítaté guí'ado' na'. Biti' bi' zoa le cabí gaca gunli' channó réajlé'éli' Dios idú ladxí'li'. ²¹ Tu bö' xihui' caní gácasó ubéajli' channó ulídzali'-né' Dios, en gunli' gubasa.

Riguíxjö'è Jesús leyúbölö ca si' ilútié' Lè'

(Mr: 9:30-32; Lc: 9:43-45)

²² Tsanni' ni' ta'dé' luyú Galilea, Jesús gudxé' yugu' bönni' uséda queé', rnné':

—Zoa nu udödi neda', Bönni' Guljé' Bónachi, lu ná'agaca bönachi. ²³ Ilútié' neda', pero cate' gaca tsonna dza Dios usubané' neda'.

Ní'iró bulu'huí'inné' bönni' uséda queé'.

Jesús riguíxaj lazé' que yudo'

²⁴ Cate' bulu'dxiné' Jesús, en yugu' bönni' uséda queé' lu yödzo Capernaum, bila'dxiné' yugu' bönni' tu'quixjé' bönachi lázagaca que yudo' ga zoé' Pedro, ate' té' lè':

—¿Naru' cabí quixaj lazé' que yudo' bönni' rusédiné' libí'ili'?

²⁵ Bubi'è didza' Pedro, rnné':

—Ön, huaguixxjé'.

Cate' buázié' Pedro lu yu'u, Jesús la' bulidzté' lè', en rè' lè':

—¿Nacxi rusaca' quiu', Simón? Bönni' ta'nná bé'è luyú ni, ¿nupxi tu'quixxjé' le riguíxaj laz, en lazzaj que yu? ¿Naru' tu'quixxjé' bönachi uládz quégaquié' o bönachi izá'a?

²⁶ Bubi'è didza' Pedro, rè' Lè':

—Bönachi izá'a tu'quixxjé'.

Ní'iró Jesús rè' lè':

—Que lé ni na', biti' run bayudxi quixaj laza' que yudo' tu' naca' Zxí'iné' Dios ca na' biti' bi' ta'guixaj nupa nácgaca bönachi uládz queé' bönni' na' ruquixxjé'. ²⁷ Na'a, para cuntú nu gun leru', guyéaj ra' nísado', yójzalaj lu nisa le rizóninu'-ba' böla, ate' böla cueju'-ba' zí'aló, guzxí'i-ba'. Cate' isalju' ruá'aba', ní' idzölinu' tu dumí lásido'. Guzxí'i le, ate' gudixaj laza', en lazu'.

18

¿Núzxilö gaca lo?

(Mr: 9:33-37; Lc: 9:46-48)

¹ La' dza ní'isó bila'dxiné' bönni' uséda queé' Jesús ga zoé', ate' gula'nábiné' Lè', ta'nné':

—¿Núzxilé' bönni' ní' gáquié' lo ga rinná bé'è Dios yehua' yubá?

² Bulidzé'-bi' Jesús tubi' bi'i bönni'do', ate' buzóé'-bi' gatsaj láhui'lö ga na' nacué'. ³ Ní'iró rè' légaquié':

—Le nácaté rea' libí'ili', channó cabí huóacali' ca zeaj nácabí' bí'ido', biti' ca' tsú'uli' ga ní' rinná bé'è Dios yehua' yubá. ⁴ Que lé ni na', nútí'tés nu gaca nöxaj ladxí', en huóaca ca nácabí'

bí'ido' ni, nu ni gaca lo ga ni' rinná bē'ē Dios yehua' yubá. ⁵ Núi'tēs nu gun bal tubi' bí'ido' caní tu' néquibi' quia', neda' caz gun bal.

Le tun ga nu gun dul-la'
(Mr. 9:42-48; Lc. 17:1-2)

⁶ Gunnē' ca' Jesús:

—Nu gun ga gunbi' dul-la' tubi' bí'ido' caní réajlē'ēbi' quia', gácarō dxi'a queē' bōnni' na' la'tu' ugalē'ē guiōj riyētuni yaga yenē', ate' tsōjsuladzu' cuinē' lu nísado'. ⁷ Bica' bayechi' bōnachi yōdzōlió ni tun ga gun dul-la' luzē'eguequi. Nacuá'tica'só le tun ga nu gun dul-la', pero bica' bayechi' nu run ga nu gun dul-la'.

⁸ 'Que lé ni na', channō gun no'o o ni'u ga gunu' dul-la', guchugule, en gurú'una le. Gácarō dxi'a quiu' tsōjsáziu' ga su' ibanu' biti' rizo'o o narugu ni'a no'o, en calēga nacuá' chopá no'o, en chopá ni'u ate' tsōjsáziu' lu guí' gabila le catu caz ulu. ⁹ Channō gun guiōj lo' ga gunu' dul-la', guléaj le, en gurú'una le. Gácarō dxi'a quiu' tsōjsáziu' ga su' ibanu', zoa tuz guiōj lo', en calēga nacuá' chopá guiōj lo', ate' tsōjsáziu' lu guí' gabila.

Jesús rucúdzu'ē didza' que tu bō'cu' xzila' nanítiba'
(Lc. 15:3-7)

¹⁰ Gunnē' ca' Jesús:

—Gulí'gún chí'i cuinli' para cabí uzóali'-bi' tsólá'alō tubi' bí'ido' caní. Neda' rea' libí'ili', gubáz lá' ayi tapa chí'ē légacabi' nacuá'tica'sē' lahuē' Xuzá' zoē' yehua' yubá. ¹¹ Bida' ni neda', Bōnni' Guljē' Bōnachi, para usólá' nu ni naniti.

¹² '¿Nacxi rusáca'li' queé'li'? Tu bōnni', nacuá'aba' tu gayuá' bō'cu' xzila' queē', channō nítiba' tuba', ¿naru' cabí ucá'anē'-ba' tápalalaj yu' chénnaba' na', ate' tsejē' gapa naca lu guí'a, para tsōjtijlē'-ba' bō'cu' xzila'do' na' nanítiba'? ¹³ Channō udzōlinē'-ba', le nácatē rea' libí'ili', udzējarōnē' ni'a queē'ba' bō'cu' xzila'do' na' ca gunē' quégacaba' ia'tápalalaj yu' chénnaba' ni' biti' gula'nítiba'. ¹⁴ Lē'sca' caní, Xúziru' Dios, zoē' yehua' yubá, biti' rē'ēnē' nitibi' tubi' bí'ido' caní.

Ca ral-la' uniti loru' bōchi' luzá'aru'
(Lc. 17:3)

¹⁵ Gunnē' ca' Jesús:

—Channō bōchi' luzó'o guá' dō' quiu', guyéajtsōca', en yōjcá'analenē' tsahui' la' libí'isili'. Channō uzē náguie' li', chíbuguél'u bōchi' luzó'o. ¹⁶ Channō cabí uzē náguie' xtídz'u, guchē'ē ia'túē' o ia' chopē' bōnni' para urúaj li xtídz'u lógaquie' chopá tsonnē' bōnni', nupa gaca ilún ba nalí que xtídz'a'li'. ¹⁷ Channō cabí uzē náguie' xtídz'a'gaquie', gudxi ca' bōnachi tu' dūbi tu'sēdi queē' Dios, en channō cabí uzē náguie' xtídz'a'gaca bōnachi na', ní'irō bōnni' na' gáquie' quiu' ca tu bōnni' biti' réajlē'ē Dios, en ca tu bōnni' ruquixjē' uláz que yōdzō zì'tu'.

¹⁸ 'Le nácatē rea' libí'ili', yúgu'tē le inná bē'ēli' lu yōdzōlió ni, naca le chígunná bē'ē Dios yehua' yubá, ate' yúgu'tē le gū'ili' lataj lu yōdzōlió ni, naca le chíbē'ē lataj Dios yehua' yubá.

¹⁹ 'Lē'sca' caní rea' libí'ili', channō chópasili' gun tuz xtídz'a'li' lu yōdzōlió ni ca naca tu le inábili'-nē' Dios, gunē' Xuz caza' Dios, zoē' yehua' yubá, lē na' rinábili'-nē'. ²⁰ Ga nacuá' chopá tsonna nupa ni nudúbigaca quia' neda', zoa caza' neda' gatsaj láhuilō ga na' nacué'.

²¹ Ní'irō gubíguie' Pedro ga zoē' Jesús, en gunábinē' Lē', rnnē':

—Xan, ¿bál-laxité luzuí ral-la' uniti lahua' bōchi' luzá'a, nu na' ruá' dō' quia'? ¿Naru' gadxi luzuí?

²² Jesús rē' lē':

—Neda' rea' li', calēgasō gadxi luzuí, pero idú tsónmalalaj yu' chí cuía le naca gadxi luzuí.

Jesús rucúdzu'ē didza' que tu bōnni' huen dxin biti' buniti lahuē' luzē'ē

²³ Gunnē' ca' Jesús:

—Ia'stú, ca gun Nu na' rinná bē' yehua' yubá naca ca benē' tu bōnni' rinná bē'ē. Gú'unnē' ucá'analenē' tsahui' yugu' bōnni' huen dxin queē'. ²⁴ Cate' gusí lahuē' rucá'analenē' légaquie' tsahui', dujá'gaquie' ga zoē' tu bōnni' ral-lē'ē queē' zían gayuá' dumí. ²⁵ Tu' cabí guca quixjē', gunná bē'ē xanē' idó'ogaquie' lē', en nigula queē', en yugu' bí'i queē', en yúgu'tē le dē queē', ate' ní'irō gazxaj le ral-lē'ē queē' xanē' na'. ²⁶ Ní'irō bōnni' huen dxin na' buzóa zxi'bē' lahuē' xanē', en gunábinē' lē', rnnē': "Xan, ben zxon lādxi'u neda'. Huaguixxaj caza' li' iduté." ²⁷ Ní'irō xanē' na' buéchi' lādxi'ē bōnni' huen dxin queē' na', en buniti lahuē' lē' lē na' ral-lē'ē queē', ate' busanē' lē'. ²⁸ Cate' burúajē' bōnni' huen dxin na', la' yōjtságatē tu bōnni' rúnlenē' lē' tsōzxon dxin, ate' bōnni' na' ral-lē'ē queē' láti'do'os dumí. Ní'irō guzxonē' lē', en guzxinajē' yenē', ate' rē' lē': "Gudíxjatē lē na' ral-lu'u quia'." ²⁹ Ní'irō luzē'ē na' buzóa zxi'bē' lahuē', en gunaba yechē'ē lahuē', rnnē': "Ben zxon lādxi'u neda'. Huaguixxaj caza' li' iduté." ³⁰ Biti' gú'unnē' bōnni' huen dxin na', ate' yōjlu'ē lē' lidxi guíē dza quixjarē' lē na' ral-lē'ē queē'. ³¹ Cate' bila'lē'enē' lē ni ia'zica'rē' huen dxin, bulu'huf'inide'enē' ni'a queē', ate'

yöjtíxjö'iguequinë' xángaquie' yúgu'tè lè na' guca. ³² Ní'irò xángaquie' bulidzë' bönni' huen dxin na', ate' rë' lë': "Li', huen dxin catsahui'. Yúgu'tè dumí na' gúl-lu'u quia' buniti lahua' li'. Busúlua' lè na' gúl-lu'u quia' tu' gunaba yechu'u lahua'. ³³ ¿Naru' cabí ral-la' huéchi' ládxi'u ca' luzó'o ca na' bena' neda', buéchi' ládxa'a li'?" ³⁴ Ní'irò guléde'enë' xanë', en budödë' lë' lu ná'agaca nupa ulu'saca' zi' lë' dza quíxjarë' iduté le ral-lë'ë queë'.

³⁵ Ní'irò rnnë' Jesús:

—Lësca' caní gunë' Xuza' zoë' yehua' yubá queëli' channö cabí uniti loli' idú ládxi'li' yugu' böchi' luzá'ali'.

19

Nupa tu' lá'a yöl-la' nutsaga na'

(Mr. 10:1-12; Lc. 16:18)

¹ Cate' budxi bë'ë Jesús yugu' didza' ni, buzë'ë luyú Galilea, ate' bidxinë' luyú Judea le dë ia' tsólá'a yegu Jordán saca' ga rilén gubidza. ² Bönachi zían sójácálen Jesús, ate' bunë' léguequi ni'.

³ Ní'irò bila'dxinë' bal-lë' bönni' yudo' fariseo ga zoë' Jesús para ila'z'í' bë'ë Lë', ate' gula'nábinë' Lë', ta'nnë':

—¿Naru' dë' lataj bönni' nutsaga në'ë usanë' nigula queë' tu' nözí' bití'tës bi raza?

⁴ Bubi'ë didza' Jesús, rë' légaquië':

—¿Naru' cabí nulábanilí' le nazúaj lu guichi lá'ayi ca benë' Dios bönachi cate' si' benë' yödžölió? Bönni', en nigula benë' légaquië'. ⁵ Caní gunné' Dios: "Que lë' ni na', ral-la' usanë' tu bönni' xuz xin'ë', ate' tsaz tsójsóalenë'-nu nigula queë', ate' iropë' na' ulu'huóáquië' tuz bönachi." ⁶ Caní naca, bití'rö nácagaquië' chopë' pero tuz bönachi chinuhuóáquië'. Que lë' ni na', bití' ral-la' ulu'lë'ë bönni' nupa na' benë' Dios tuz.

⁷ Ní'irò bönni' yudo' na' gula'nábinë' Jesús, ta'nnë':

—¿Bixz que na' gunná bé'enë' Moisés légaquië' le rufí' lataj nu bönni' unödžjë' tu guichi queénu nigula queë' le rnna nulá'a yöl-la' nutsaga na', ate' usanë'-nu nigula queë' na'?

⁸ Jesús rë' légaquië':

—Caní benë' Moisés tu' nazidi icja ládxi'do'oli'. Bennë' libí'ili' lataj usanli'-nu nigula queëli', pero cate' gusi' lo guta' guró'ö yödžölió, bití' guca caní. ⁹ Neda' rea' libí'ili', channö tu bönni' usanë'-nu nigula queë', en bití' gudálennu bönni' yúbölö, ate' utsaga ná'alenë'-nu nigula yúbölö, gunë' dul-la' le riguitsaj xibá que yöl-la' nutsaga na'. Lësca' caní, channö nu bönni' utsaga ná'alenë'-nu nigula na', nusanë'-nu bönni' queénu, gunë' dul-la' le riguitsaj xibá que yöl-la' nutsaga na'.

¹⁰ Ní'irò yugu' bönni' usëda queë' Jesús gulë' Lë', ta'nnë':

—Channö caní naca queë' tu bönni' zóalenë'-nu nigula queë', gácarö dxi'a queë' la'tu' cabí utsaga caz në'ë, ugá anë' tuzë'.

¹¹ Bubi'ë didza' Jesús, rë' légaquië':

—Bití' gaca ila'z'í' lu ná'agaca yúgu'tè bönachi didza' ni, pero núpasö na' Dios ruzéajni'inë' léguequi. ¹² Nacu'ë bönni' bití' tu'tsaga ná'alengaquië' nigula tu' cabí nácagaquië' idú bönni' biguíú', tu' gualajë' ca, ate' ia'z'ica rë' bönni' bití' tu'tsaga ná'alengaquië' nigula tu' bulu'zaga' bönachi xinözgaquië', ate' ia'z'ica rë' bönni' bití' tu'tsaga ná'alengaquië' nigula para gaca ilunë' xichinë' Dios, Nu rinná bë' yehua' yubá. Nu sequi' si' lu në'e didza' ni ral-la' si' lu në'e le.

Jesús rulidza tsáhuë'ë-bi' yugu' bí'ido'

(Mr. 10:13-16; Lc. 18:15-17)

¹³ Ní'irò yugu' xuz xiná'agacabi' bí'ido' dujuá'agaquië'-bi' ga zoë' Jesús para ixóa në'ë légacabi', en ulidzë' Dios ní'a quégacabi', ate' bönni' usëda queë' bulu'zágui'ë xinözgaquië'.

¹⁴ Ní'irò Jesús rë' légaquië', rnnë':

—Gulí' gúi'í-bi' yugu' bí'ido' lataj ila'dxinbi' ga zoa', en bití' uzága'li' xinözgacabi', tu' ila'z'í' lataj nupa nácagaca ca yugu' bí'ido' caní ga ni' rinná bë'ë Dios yehua' yubá.

¹⁵ Jesús guxóa në'ë légacabi', ate' ní'irò buzë'ë ni'.

Tu bönni' unná bë' cuidi' dë'yöl-la' tsahui' queë'

(Mr. 10:17-31; Lc. 18:18-30)

¹⁶ Tu bönni' ni zoë' iz cuidi' queë' buduyúë' Jesús, en rë' Lë':

—Bönni' Usedi idú tsahui'. ¿Bixzi le naca tsahui' ral-la' guna' para gata' yöl-la' na'bán idú quia'?

¹⁷ Bubi'ë didza' Jesús, rë' lë':

—¿Naru' nöztsenu' lë' na' rnno' quia', rnno' naca' idú tsahui'? Cuntu nu bönni' náquië' idú tsahui'. Tuzë' Dios náquië' idú tsahui'. Channö rë'ënu' gata' yöl-la' na'bán idú quiu', ben ca rinná bë' xibá queë' Dios.

18 Ní'irö bönni' na' rë' Jesús, rnnë':

—¿Bízxilö xibá na'?

Jesús rë' lë':

—Xibá na' gunná bē'ë Moisés:

Biti' gütü' bönnachi.

Biti' gunu' dul-la' le riguitsaj xibá que yöl-la' nutsaga na'.

Biti' cuanu'.

Biti' innío' que böchi' luzó'o le cabí nácate.

19 Ben bal xuz xinó'o.

Bidxí'i böchi' luzó'o ca nadxí'i cuinu'.

20 Bönni' na' ni zoë' iz cuidi' queë' gudxë' Jesús, rnnë':

—Yúgu'të lë ni runa' ga gudela' naca' bí'ido'. ¿Naru' zoa ia'tú le ra-la' guna'?

21 Jesús rë' lë':

—Channö rë'ënu' gacu' tsahui', guyéaj, yöjëti' le dë quiu', ate' dumí na' si'u, bunödzej quegaca bönnachi yechi'. Caní gata' yöl-la' tsahui' quiu' ni' yehua' yubá. Ní'irö gudá, gudá neda'.

22 Cate' bönni' na' ni zoë' iz cuidi' queë' biyönnë' didza' ni, söhuöjë' ruhu'innë' tu' dëda' yöl-la' tsahui' queë'.

23 Ní'irö Jesús gudxë' yugu' bönni' usëda queë', rnnë':

—Le nácate' rea' libí'ili', bönniga naca tsázië' nu bönni' dë yöl-la' tsahui' queë' ga rinná bē'ë Dios yehua' yubá. 24 Ia'stú rea' libí'ili', nácáro bönniga tsázië' tu bönni' dë yöl-la' tsahui' queë' ga ni' rinná bē'ë Dios ca tödiba' böa' lu nagui yötsi'.

25 Cate' bila'yönnë' yugu' bönni' usëda queë' didza' ni, bulu'bánninë, ta'nnë':

—¿Nuzxi caz gaca ulá, channö?

26 Jesús buyüë' légaquië', en rë' légaquië':

—Biti' gaca ilün bönnachi lë ni, pero Dios huáca gunë' yúgu'të.

27 Ní'irö bubí'ë didza' Pedro, en rë' Jesús:

—Buyütsóca', netu' chibucá'anatu' yúgu'të, en zá'entu' Li'. ¿Bízxirö gata' queëtu'?

28 Jesús rë' légaquië':

—Le nácate' rea' libí'ili', dza ni' cate' ucubi yödzöliö, ate' cö'a inná bē'a neda', Bönni' Guljë Bönnachi, ga ni' gácaterá' lo, lësca' libí'ili' zá'lenli' neda' na'a, cö'öli' chinnu lataj ga inná bē'ëli', en uchi'a usö'öli' quegaca idxinnu cö'të yödzö quegaca zxi'ini xi'sóë' Israel. 29 Nu bönni' rucá'anë' lidxë', o yugu' böchë'ë, o yugu' zanë', o xuzë', o xinë'ë, o nigula queë', o yugu' zxi'inë', o yugu' xiyüë', para gunë' xichina', bönni' ni si'ë ia'tú gáyua'tërö ca' queë', en gata' ca' yöl-la' na'bán idü queë'. 30 Zían nupa nácagaca lo na'a, ulu'gá'ana cá'asö, ate' nupa nagá'anagaca cá'asö na'a, huálacagaca lo.

20

Rucúdzu'ë didza' Jesús ca tunë' bönni' huen dxin

1 Gunnë' ca' Jesús:

—Ca gun Bönni' na' rinná bē'ë yehua' yubá naca ca benë' tu bönni' xan yu'u. Birúajë' zílado', yöjdiljë' yugu' bönni' ilunë' dxin ga naca lu xiyüë' ga na' nadúzgaca lubá uva. 2 Cate' chibugá'analenë' tsahui' yugu' bönni' huen dxin na', quízxjë' légaquië' tu dumí lazxaj que tu dza, gusöl-lë'ë légaquië' ilunë' dxin ga naca lu xiyüë'. 3 Cate' burúajë' idü xsila, bilé'enë' ia'zica'rë' bönni' nacua'asë' ca' na' ate' rë' légaquië': "Guli'tséaj ca' libí'ili' ga naca lu xiyüa', ate' quízxja' libí'ili' le naca tsahui'." La' yöjácate' ca' légaquië'. 4 Burúajë' bönni' xan yu'u na' leyübölö idü huagubidza, enca' idü xihuö udzö', en la' tuz ca benë', gusöl-lë'ë yugu' bönni' yöjxáquië' lu xiyüë'. 5 Burúajë' ca' cate' ni' zoa ia'láti'do'os gubidza, en yöjxáquië' ia'zica'rë' bönni' nacua'asë' ca' ni', ate' rë' légaquië': "¿Bízx que zóatsali' ni cá'asö idü dza, bití' bi dxin runli'?" 6 Yugu' bönni' na' tē' lë', ta'nnë': "Cuntu nu benna xichintu'." Ní'irö rë' légaquië': "Guli'tséaj ca' libí'ili' ga naca lu xiyüa', ate' quízxja' libí'ili' le naca tsahui'." 7 Cate' chizóa gal-la, bönni' xan yu na' rë' bönni' yu'u lu nē'ë yugu' huen dxin na', rnnë': "Bulidza yugu' bönni' huen dxin na', ate' gu'u lázxjagaquië'. Quízxju' zí'alö yugu' bönni' na' bila'dxinë' yöjsetë. Udxí na' quízxju' yugu' bönni' na' bila'dxinë' zí'atëlö." 8 Ní'irö bila'dxinë' bönni' yöjéngaqüë' dxin cate' ni' zoa ia'láti'do'os gubidza, en gula'zi'ë tu tuhuéajë' dumí lazxaj que tu dza. 9 Cate' bila'dxinë' bönni' yöjéngaqüë' dxin zí'atëlö, guléquinë' huazí'gaquië' ia'láti', pero lësca' gula'zi'ë tu tuhuéajë' dumí lazxaj que tu dza. 10 Cate' gula'zi'ë le, gula'nnë'dë'ë queë' bönni' xan yu'u na', 11 ta'nnë': "Yugu' bönni' ni bila'dxinë' ga yöjsetë, tu chí'isö gulunë' dxin, en tuz ca gudízxjatsö' légaquië' ca netu', ate' netu' ni bentu' dxin idü dza, en gúguida'atu' gubidza." 12 Bubi'ë didza' xan yu na', en rë' tuë': "Böcha'a, bití' bi runa' quiu' le cabí naca tsahui'. ¿Naru' cabí bugá'ana tsáhu'ru' si'u tu dumí lazxaj que tu dza?" 13 Guxzí' lazxju', en

böaj lidxu'. Neda' rë'ënda' quixxa' bönni' ni yöjenë' dxin ga yöjsetë' la' leze ca na' riguixxa' li'.¹⁵ ¿Naru' cabí dë lu na'a guna' ca rë'ënda' len le nequi quia'? ¿Naru' ruzxé'etsenu'-në' luzó'o tu' rünnada'a queë'?"¹⁶ Caní naca, bal-lë' bönni', tu' cá'ana bönnachi légaquië' cá'asó, ilácaquië' lo, ate' ia' zíca'rë' bönni', nácaquië' lo na'a, ulu'gá'anë' cá'asó. Zían nupa nulidza', pero nabábasó nupa narógaca.

Ríguixjō'ë Jesús leyúbölö ca si' ilútië' Lë'
(Mr. 10:32-34; Lc. 18:31-34)

¹⁷ Cate' ni' yu'ë Jesús nöza, sa'yéajë' Jerusalén, guchë'ë quez idxínnutë' bönni' usëda queë', en rë' légaquië':

¹⁸ —Buli'yútsóca', ribenru' zéajru' Jerusalén, ate' ni' soa nu udódi neda', Bönni' Guljë' Bönnachi, lu ná'agaquië' bixúz unná bé', en lu ná'agaquië' bönni' yudo' usëdi, ate' ila'chúguië' quia' gátia'.¹⁹ Ulu'dódë' neda' lu ná'agaquië' bönni' zi'tu' para ulu'titjë' neda'. Ila'guinë' neda', en ulu'dë'ë neda' lë'e yaga cruz, pero cate' gaca tsonna dza, Díos usubanë' neda' lu yöl-la' guti.

Le gunábanu xiná'agaquië' Jacobo, en Juan
(Mr. 10:35-45)

²⁰ Ní'iró bidxinnu xiná'agaquië' Jacobo, en Juan, yugu' xzí'inë' Zebedeo, ga zoë' Jesús, dzágaquië'-nu chopë' ni, ate' buzóa zxíbinu lahuë' Jesús, en gunábinu Lë' tu le uzá' ládxë'ë queënu.²¹ Jesús gunábinë'-nu, rnnë':

—¿Bizxi rë'ënu'?

Rënu Lë':

—Gunná bé' cõ'öbi' tubi' xzí'ina' ni cuita lë'u ibëla, en ia'tubi' cõ'öbi' cuita lë'u yögöla ga ni' inná bé'u.

²² Bubi'ë didza' Jesús, rë' légaquië':

—Biti' nözili' le rinábali'. ¿Naru' huáca guá' ilenli' le qui'i saca' neda', en idílali' nisa ca idila' neda' nisa, gátia'?

Të' Lë':

—Huácatu'.

²³ Ní'iró Jesús rë' légaquië':

—Le nácatë' le ral-la' qui'i saca'a neda', gaca ca' queëli', en le ral-la' idila' neda' nisa, gátia', idílali' ca' nisa libi'ili', pero que cõ'öli' cuita lë'a ibëla o cuita lë'a yögöla, biti' dë lu na'a nu gu'a que, pero gata' quégaca nupa ni' chinupë'ë Xuza' quéguequi.

²⁴ Cate' ia'chië' bönni' usëda queë' Jesús bila'yönnë' lë ni, gula'lenë'.²⁵ Ní'iró Jesús bulidzë' légaquië', rnnë':

—Nözquézili' ca tunë' yugu' bönni' ta'nná bé'enë' bönnachi izá'a, ridóditë bé' ta'nná bé'enë' légaquië', ate' nupa ni' nácaagaró lo ta'nná be'e la' luzë'eguequisó.²⁶ Biti' gaca caní queëli'. Núti'tëslöli' libi'ili' nu rë'ëni gaca zxön ga zóali', nu ni ral-la' gun dxin que ia' zíca'röli'.²⁷ Lë'sca' caní, núti'tëslöli' libi'ili' nu guë'ëni gaca lo, ral-la' gaca ca tu bönni' nadó'o que ia' zíca'röli'.²⁸ Lë'sca' neda', Bönni' Guljë' Bönnachi, bida' ni, calëga para nu gun xichina', pero para guna' xichíngaca bönnachi, en udóda' yöl-la' na'bán quia', le quízxjada' ni'a quégaca bönnachi zían para ulu'lágaca.

Ruínë' Jesús chopë' bönni' nachul-la lógaquië'
(Mr. 10:46-52; Lc. 18:35-43)

²⁹ Cate' ni' tu'rúajë' yödzö Jericó, bönnachi zían sójácalen Jesús.³⁰ Nacu'ë chopë' bönni' nachul-la lógaquië' ni', rő'gaquië' ra' nöza. Cate' bila'yönnë' ridódë' Jesús ni', gulu'ë zidzaj didza', ta'nnë':

—Xan, xzí'ini xi'sóë' David, buéchi' ladxi' netu'.

³¹ Bönnachi zían nacua' ni' gulë' légaquië' ila'cu'ë dxisó, pero zidzajró gulu'ë didza', ta'nnë':

—Xan, xzí'ini xi'sóë' David, buéchi' ladxi' netu'.

³² Ní'iró guzë' ribözë' Jesús, en bulidzë' légaquië', ate' gunábinë' légaquië', rnnë':

—¿Bizxi rë'ënilí' guna' queëli'?

³³ Të' Jesús:

—Xan, rë'ënitú' gunu' ga huóálaj guió' lotu'.

³⁴ Ní'iró Jesús buéchi' ládxë'ë légaquië', ate' gudanë' guió' lógaquië'. La' böáljatëgaca guió' lógaquië', ate' yöjácalenë' Jesús.

21

Rídxinë' Jesús yödzö Jerusalén len yöl-la' ba zxön
(Mr. 11:1-11; Lc. 19:28-40; Jn. 12:12-19)

¹ Cate' bila'dxíngalé' yödzo Jerusalén, en ni' nacué' ga dè yödzo Betfagé ga na' zoa Guí'a Yaga Olivo, ní'irö gusöl-lé'è Jesús chopé' bönni' uséda queé', ² ate' rë' légaquié':

–Guli'tséajtsöca' yödzo'do' ni' ca dódilö ga ni zóaru', ate' la' tsójxáca'téli'-ba' tuba' burro guná' nága'ba', ate' dzaga léba' tuba' burro biguiú'do'. Guli'tsöjxedxi'-ba', en iché'éli'-ba' quia' ni. ³ Channö nu bi guié' libí'ili', guli'guié' nu na': "Xanru' riquinné'-ba'." Ní'irö isöl-lé'è léga'caba' quia'.

⁴ Caní guca para gaca lé na' buzúajé' lu guichi bönni' bē'è didza' uláz queé' Dios, gunné':

⁵ Guli'guié' nupa nacua' yödzo Sión,
Buli'yútsöca', zé'è Bönni' inná bē'ené' libí'ili'.

Lu yöl-la' nöxaj ladxí' queé' dxíé'-ba' tuba' burro.

Dxié' cúdzu'ba' búrrodo' nácaba' xzí'iniba' bōa' ruá'aba' yua'.

⁶ Ní'irö bönni' uséda queé' yójáquié' ni', ate' guluné' ca na' gunná bē'ené' Jesús légaquié'.

⁷ Gula'ché'è-ba' burro guná' na', en burro biguiú'do' na', ate' bulu'dxié' cúdzu'gacaba' yugu' lari' guitsa' quégaquié', ate' gudxié' Jesús lahui' lari' na'. ⁸ Nacua' ca' bönachi zían ni', ate' gula'chilaj yugu' lari' ta'xóa cúdzu'guequi la' nöza. Ia'zica'rè' bulu'chibé' zin le bulu'zxóé' ga naca la' nöza. ⁹ Guluí' zidzaj didza' bönachi na' nanörugaca, en nupa na' söjácálen Jesús, ta'nná:

–jYöl-la' ba Lē, xzí'ini xí'sóé' David! jBica' ba nu ni za' ni'a que Lē Xanru'! jYöl-la' ba Dios!

¹⁰ Cate' guyázié' Jesús yödzo Jerusalén, bulu'dzatsa yúgu'té bönachi lu yödzo na', ate' zían nupa gulé luzé'eguequi, ta'nná:

–¿Nuzxi caz bönni' ní?

¹¹ Ia'bal-la bönachi ní' ta'nná:

–Nu ni Jesús, bönni' ru'é didza' uláz queé' Dios, ate' naca ladzé' Nazaret luyú Galilea.

Jesús rulatjé' lö'a yudo'

(Mr. 11:15-19; Lc. 19:45-48; Jn. 2:13-22)

¹² Cate' guyázié' Jesús lö'a yudo' queé' Dios, bulágui'è ní' ilö yúgu'té nupa tuti' to'o ga naca lö'a yudo' na'. Burixé' ca' yugu' blaga quégaquié' bönni' tu'tsé'è dumí yödzo zí'tu', en yugu' le ta'bō'i nupa tuti' gu'dódo'. ¹³ Rē' légaquié':

–Nazúaj lu guichi lá'ayi le rna: "Lidxa' si'i le, yu'u ga nu ulidza Dios", pero libí'ili' chinunli' lataj ni ca naca yu'u lidxigaca gubán.

¹⁴ Cate' ni' zoé' Jesús chila yudo', bal-lé' bönni' nachul-la lógaquié', en bönni' biti' raca ila'zé'è bila'dxiné' ga na' zoé', ate' Lē' buné' légaquié'. ¹⁵ Gula'lené' yugu' bixúz unná bē', en bönni' yudo' tu'sédiné' cate' bila'lé'ené' yugu' yöl-la' huáca ni runé' Jesús, en bila'yönné' tu'íbi' bí'ido' zidzaj didza' ga naca chila yudo', ta'nnabi':

–jBica' ba Lē, xzí'ini xí'sóé' David!

¹⁶ Ní'irö tē' Jesús:

–¿Naru' cabí riyönnu' ca ta'nnabi' bi'i ni?

Bubi'è didza' Jesús, rnné':

–Ön, riyönda. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rna: "Li' benu' ga yugu' bi'i cuidi', en yugu' bí'ido' ní' tádxí'bi' gulúl-labi' yöl-la' ba le naca idú."

¹⁷ Ní'irö Jesús buca'ané' légaquié', ate' burúajé' Jerusalén. Guyijé' yödzo Betania ga ní' bugá'ané' idú yēla.

Jesús rulidza zì'è yaga higo

(Mr. 11:12-14, 20-26)

¹⁸ Cate' za' rení', ate' ní' söhuöjé' Jesús Jerusalén, riduné'. ¹⁹ Bilé'ené' tu yaga higo rō' gal-la' cuite nöza, ate' gubígui'è ga na' rō', pero biti' bi bidzólíné' lu yaga na'. Xilágui'só dxía. Ní'irö Jesús gudxé' le:

–Bíti'rö cuía le ribía quiu'.

La' gubídxité yaga higo na'. ²⁰ Cate' bila'lé'ené' bönni' uséda queé' lé ni, bulu'bánniné', ate' gula'nábiné' Jesús, ta'nné':

–¿Nacxi caz guca, gubídxité yaga ní?

²¹ Bubi'è didza' Jesús, rē' légaquié':

–Le nácaté rea' libí'ili', channö tséajlé'éli' Dios, en biti' gaca chopa ladxí'li', calégasö huáca gunli' ca na' bena' que yaga ni, pero channö guiéli' guí'a ni: Gucuíta, en yöjsóa lu nísado', gaca ca na' innali'. ²² Lésca' caní, yúgu'té le inábali' cate' ulídzali'-né' Dios, channö huayéjlé'éli' gunné' Dios queéli', huazí'ili' lé na' inábali'.

Yöl-la' unná bē' dē lu nē'è Jesús

(Mr. 11:27-33; Lc. 20:1-8)

²³ Ní'irö guyázië' Jesús chila yudo', ate' tsanni ni' rusédinë' bönachi nacua' ni', bila'dxinë' yugu' bixúz unná bë' len bönni' gula tu'zéajni'inë' ga zoë', ate' gula'nábinë' Jesús, ta'nnë':

—¿Bixzi yöl-la' unná bë' dë lu no'o, runtso' yugu' lë ni? ¿Nuzxi budödi lu no'o yöl-la' unná bë' ni?

²⁴ Bubi'ë didza' Jesús, rë' légaquië':

—Lësca' neda' inábatsöqui'da' libí'ili' tu didza'. Channö quixjöi'ili' neda' ca naca, neda' ca' guía' libí'ili' bixzi yöl-la' unná bë' dë lu na'a runa' caní. ²⁵ ¿Nuzxi caz gusöl-la' Juan para buquillë' bönachi nisa? ¿Naru' Dios gusöl-lë'ë lë', o gula'söl-lë'ë yugu' bönni' lë'?

Ní'irö gula'sí lógaquië' bönni' yudo' na' ta'nnë' la' légacasë':

—Channö innaru': Dios gusöl-lë'ë lë', la' guié'të' rë'u: "¿Bixz que bití' guyéajlë'ëli' lë'?"

²⁶ Na'a, channö innaru': Gula'söl-lë'ë yugu' bönni' lë', rádxiru' le ilún bönachi lu yödzo tu' ta'yéajlë'ë yúgu'të' Juan na' bë'ë didza' uláz queë' Dios.

²⁷ Que lë ni na' bulu'bi'ë didza', të' Jesús:

—Bití' nöztu'.

Jesús rë' légaquië':

—Neda' ca', bití' guía' libí'ili' bixzi yöl-la' unná bë' dë lu na'a runa' lë ni.

Rucúdzu'ë didza' Jesús ca gulunbi' chópabi' xzí'inë' tu bönni'

²⁸ Ní'irö Jesús gudxë' yugu' bönni' yudo' na':

—¿Nacxi rusáca'li' queé'li'? Guzóë' tu bönni' nacua'abi' chópabi' bi'i bönni' queë', ate' yöjödxe'-bi' tubi' bi'i queë' na', gunné': "Xzí'ina', guyéaj na'a tsöjenu' dxin ga naca luyú quia' ga rő'gaca lubá uva." ²⁹ Bubi'ibi' didza' bi'i na', güdxibi'-në': "Bití' rë'ënda' tseja'." Gudödi ni' bubí'í ládxi'bi', ate' yöjenbi' dxin. ³⁰ Ní'irö bönni' na' yöjödxe'-bi' ia'tubi' bi'i queë' na', en la' tuz ca gunné', ate' bubí'ibi' didza' bi'i ni, güdxibi'-në': "Huaca, Dad. Uyéaja'." Bití' guyéajbi' bi'i ni. ³¹ ¿Núzxilöbi' bi'i chopá ni benbi' le guyaza ládxe'ë xúzibi'?

Bulu'bi'ë didza', të' Jesús:

—Bi'í zí'aló na'.

Ní'irö Jesús rë' légaquië':

—Le nácaté rea' libí'ili', ila'nörüë' bönni' uquízaxj tuá' dō', en yugu' nigula udá dzaga ca libí'ili', ate' ila'yázië' ga ni' rinná bë'ë Dios. ³² Caní gaca, tu' bidë' Juan, bönni' buquillë' bönachi nisa, ga zóali', en busédinë' libí'ili' le naca tsahui' ca ral-la' gunli', ate' libí'ili' bití' guyéajlë'ëli' lë', pero yugu' bönni' uquízaxj, en yugu' nigula udá dzaga gula'yéajlë'ë lë'. Sal-la' bilé'ëli' lë ni, bití' bubí'í ládxi'li' para tséajlë'ëli' lë'.

Rucúdzu'ë didza' Jesús ca béngaquië' bönni' huen dxin bití' náccagaquië' tsahui'

(Mr. 12:1-12; Lc. 20:9-19)

³³ Gunnë' ca' Jesús:

—Buli'zë nágalí' ia'tú le ucúdzu'a didza'. Guzóë' tu bönni' xan yu'u, ate' bönni' ni budë'ë yugu' lubá uva luyú queë'. Guléquië' lë'aj que, en guchö'önë' tu lerui guiój ga isíë' xisi uva na'. Benë' ca' tu yu'u xitsá' ga gaca nu uyú idütë luyú queë'. Ní'irö budödë' luyú na' lu ná'agaquië' bönni' huen dxin, para ila'zi'ë quégaquië' gatsaj huéaj, ate' sa'yéajë' yödzo zí'tu'.

³⁴ 'Cate' chibidxin dza ulu'chibë' yugu' lubá uva na', gusöl-lë'ë bönni' xan luyú na' bal-lë' ni'a në'ë ga na' nacu'ë bönni' huen dxin ni' para ulu'zi'ë lu ná'agaquië' uláz queë'. ³⁵ Ní'irö gula'zönë' bönni' huen dxin na' yugu' ni'a në'ë na'. Gulunë' huë' tuë', en ia'túë' bétigaquië' lë', en ia'túë' bulu'ládxë' lë' guiój. ³⁶ Leyúbölö bönni' xan luyú na' gusöl-lë'ë ca' ia'zica'rë' ni'a në'ë, ate' guláquië' zíanterë' ca nupa na' gusöl-lë'ë zí'aló, ate' la' tuz ca gulunë' bönni' huen dxin ni' quégaquië'.

³⁷ 'Ga yöjsete, gusöl-lë'ë ca' xzí'inë' ga na' nacu'ë. Guzá' ládxe'ë, rnnë': Hualunë' bal bi'i quia'. ³⁸ 'Cate' yugu' bönni' huen dxin na' bila'lë'enë'-bi' xzí'inë', la' gula'nnatë' la' légacasë': "Bi'í ni guequi queë'bi' luyú ni. Gulí'dá, gútiru'-bi', ate' le ral-la' guequi queë'bi' guequi queëru'." ³⁹ Ní'irö gula'zönë'-bi', ate' bulu'béajë'-bi' ní'iló luyú ga na' rő'gaca lubá uva, ate' bétigaquië'-bi' ni'.

⁴⁰ Ní'irö Jesús gunábinë' légaquië', gunné':

—Cate' udxiné' bönni' xan luyú na', ¿nacxi gunë' quégaquië' bönni' huen dxin ni'?

⁴¹ Bulu'bi'ë didza' bönni' yudo' na', të' Jesús:

—Usunitié' bönni' tuá' dō' na', ate' luyú queë' na' udödë' lu ná'agaquië' ia'zica'rë' bönni' huen dxin, bönni' ilu'ë lë' uláz queë' cate' idxin dza ulu'chibë' le.

⁴² Ní'irö Jesús gudxë' légaquië':

—¿Naru' catu caz nulábanilí' lë na' nazúaj lu guichi lá'ayi ca naca lë ni? Caní rnna:

Guiój na' gula'ru'unë' bönni' tu'cu'ë zö'ö,

la' guiój ná'asó chinaca guiój len zö'ö.

Lë cazë' Xanru' benë' ga naca caní,

ate' naca tu le run ga rubániru'.

⁴³ 'Que lè ni na' rea' lib'i'li, xilátjali' ga na' rinná bē'ē Dios idúa queēli, en gata' quégaca bönachi ilún ca ral-la' gun nu nadelí' lataj ni'. ⁴⁴ Nu tsójchegu' lu guiój ni, la' cuinsi quitsaj, ate' channō guiój ni tseajbaga' bönni' na', uzuzxaj lē'.

⁴⁵ Cate' yugu' bixúz unná bē', en yugu' bönni' yudo' fariseo bila'yönnē' lē na' bucúdu'ē didza' Jesús, téquibe'enē' bē'ē Jesús didza' ca naca quégaquiē'. ⁴⁶ Gula'zóa gula'bō'ē ila'zönē' Jesús, pero guládxinē' bi ilún bönachi zían nacua' ni' tu' ta'yéajlē' náquiē' Jesús bönni' ru'ē didza' uláz queē' Dios.

22

Rucúdu'ē didza' Jesús ca naca que laní que yöl-la' rutsaga na'

¹ Jesús bē'lenē' légaquiē' didza' leyúbölö, ate' bucúdu'ē didza', rnnē':

² —Ca gaca quégaca nupa ila'yaza ga rinná bē'ē Dios yehua' yubá naca ca guca quégaca nupa bulidzē' tu bönni' rinná bē'ē cate' benē' laní que dza utsaga ná'abi' bi'i bönni' queē'. ³ Gusól-lē'ē ni'a nē'ē tsójxí'gaquiē' yugu' bönni' chinulidzē' para guidagaquiē' laní queēbi', pero biti' gulē'enē' guidagaquiē'.

⁴ Ní'irō gusól-lē'ē ia'zica'rē' ni'a nē'ē, en gudxē' légaquiē': "Gulí'tsójdxitsóca' nupa na' chinulidza', na' guiéli' légaquiē': Bulí'yútsóca', chinupá'a la' huagu. Chibétia'-ba' yugu' xpédxa', en yugu' bōa' bēdxi renni' quia'. Yúgu'tē chinupá'a. Gulí'dá, sóaru' laní queēbi' bi'i bönni' quia' utsaga ná'abi'." ⁵ Yugu' bönni' na' yójlidzagaquiē' biti' gulunē' légaquiē' bal, ate' yójáquiē' que queégaquiē'. Tuē' yōjenē' dxin, en ia'tuē' guyijē' tsójō'u tsójéti'ē. ⁶ Ia'zica'rē' gula'zönē' yugu' ni'a nē'ē na', ate' gulu'ē dō' quégaquiē', en bétgaquiē' légaquiē'.

⁷ Cate' bönni' na' rinná bē'ē biyönnē' lē ni, gulénē', en gusól-lē'ē yugu' bönni' queē' rójáquiē' gudil-la, ate' bétigaquiē' yugu' bönni' hueti bönachi na', en bulu'quélē'ē gu' ládzagaquiē'. ⁸ Ní'irō bönni' na' rinná bē'ē gudxē' yugu' ni'a nē'ē, gunnē': "Le nácatē chinupá'a que laní na', pero yugu' bönni' bulidza' biti' guláquiē' lesaca' guidagaquiē' laní quia'. ⁹ Gulí'tséajtsóca' gapa naca la' nōza, en bulí'lidza' yúgu'tē nupa tsójxáca'li' ni' para guidagaca laní queēbi' bi'i bönni' quia' utsaga ná'abi'." ¹⁰ Ní'irō bila'rúajē' ni'a nē'ē na', sójáquiē' gapa naca la' nōza, ate' bulu'tubē' yúgu'tē nupa yójxáca'gaquiē', yugu' bönni' dxi'a, en yugu' bönni' tuá' dō', ate' ga na' raca laní bilíró bönachi.

¹¹ 'Cate' guyáziē' bönni' na' rinná bē'ē para uyúē' nupa ni' nudúbigaca, bilé'enē' tu bönni' biti' nácuē' lari' tsahui' le bunödzejē' quégaquiē' bönni' nacu'ē laní na'. ¹² Ní'irō gudxē' bönni' na': "Bönni'do', zóatso' ni, en biti' nacu' lari' tsahui' bunödza' quégaca nupa nacua' laní?" Bönni' na' busayaj ru'ē. ¹³ Ní'irō bönni' na' rinná bē'ē gudxē' nupa na' tun xichinē', gunnē': "Gulí'guga' ni'a nē'ē bönni' ni. Gulí'tsójchú'un-nē' ní'ilo ga na' rō'ō chul-la. Ni' cōdxē', en utíl-la láyē'ē, lu yöl-la' ruhu'ini queē'."

¹⁴ Ní'irō Jesús gudxē' légaquiē':

—Zian nupa nulidza', pero nabábasō nupa ila'rógaca.

Jesús ru'ē didza' ca naca le riguíxaj lázaru'

(Mr. 12:13-17; Lc. 20:20-26)

¹⁵ Ní'irō yugu' bönni' yudo' fariseo na' bulu'zē'ē ni', ate' gulún xtídza'gaquiē' ilunē' ga bi innē' Jesús para gaca ulu'zéguiē' Lē' didza'. ¹⁶ Para ilunē' caní, gula'sól-lē'ē bal-lē' bönni' dá'gaquiē' légaquiē', len bönni' dá'gaquiē' Herodes, ga zoē' Jesús, nupa na' gulē' Jesús:

—Bönni' Usedi, nöztu' Li' ru'u didza' cátēze naca, en naca idútē li ca rusédinu' ca naca queē' Dios, en biti' ru'i ládxi'u le ta'nná quiu' bönachi, tu' cabí ruchi'a rusórōu' bönachi ca naca le ta'nnasō bönachi na'. ¹⁷ Gudíxjōi' netu'. ¿Nacxi runi li? ¿Naru' run bayudxi, o biti' run bayudxi quíxaj laztu' queē' César, bönni' yōdzō zi'tu' na' rinná bē'enē' rē'u?

¹⁸ Réquibe'enē' Jesús té'ennē' ulu'béajē' Lē' didza', ate' gudxē' légaquiē':

—Lib'i'li, bönni' rulu'isō tsahui' cuinli', ¿bizx que ru'i'li didza' le ruzóa neda' ra' guí'a?

¹⁹ Bulí'lu'i' neda' dumí le riguíxaj lázali'.

Ní'irō bulu'lu'i'ne' Lē' tu dumí que yōdzō Roma. ²⁰ Jesús gunábinē' légaquiē', rnnē':

—¿Nuzxi lahui da' ni, en nuzxi le nazúaj lē'e dumí ni?

²¹ Tē' Lē':

—Queē' César na'.

Ní'irō Jesús gudxē' légaquiē':

—Gulí'guíxjē' César le nequi queē' César, ate' Dios le nequi queē' Dios.

²² Cate' bila'yönnē' lē ni, bulu'bábinē' ca naca didza' tsahui' bubi'ē Jesús, ate' bulu'cá'anē' Lē', sōhuóajtégaquiē'.

Ta'nabi yúdxinē' Jesús ca ulu'bán nupa chinátigaca

(Mr. 12:18-27; Lc. 20:27-40)

²³ La' dza ná'asō yugu' bönni' yudo' saduceo, bönni' na' ta'nnē' biti' ulu'bán nupa chinátigaca, bila'dxinē' ga zoē' Jesús, ate' gula'nábinē' Lē', ²⁴ ta'nnē':

—Bönni' Usedi, Moisés gunné: “Channö gátië' tu bönni' zóanu nigula queë', en cuntu nu bi'i zóabi' queë', ní'irö bi'i böché'ë bönni' na' ral-la' utsaga ná'alenbi'-nu nigula uzëbi' queë', para cabi' iníti di'a dza queë' bönni' böchi'bi' na'.” ²⁵ Gula'cuá'abi' gadxi bi'i bönni' ga zóatu', naca böchi'gacabi'. Bi'i zí'aló na' butsa ná'alenbi'-nu nigula, ate' gútitëbi'. Tu' cuntu nu bi'i queëbi' zóabi', bi'i buropi na' butsa ná'alenbi'-nu nigula uzëbi' queëbi' bi'i böchi'bi' na'. ²⁶ Lësca' caní guca queëbi' bi'i buropi na', enca' queëbi' bi'i bunni, en la' tuz ca guca queégacabi' igádxitëbi', gulátibi' yúgu'tëbi'. ²⁷ Ga búdxitë gútinu ca' nigula na'. ²⁸ Cate' idxín dza ulu'bán nupa chinátigaca, ¿núzxilógacabi' bi'i gadxi ní' guéquinu nigula na' queëbi', tu' bulu'tsaga ná'alenbi'-nu yúgu'tëbi' nigula na'?

²⁹ Ní'irö bubí'ë didza' Jesús, ate' rë' légaquië':

—Nachíxili' libí'ili' tu' cabi' réajni'ili' le nazúaj lu guichi lá'ayi, en tu' cabi' núnbë'ëli' yöl-la' huáca queë' Dios. ³⁰ Cate' idxín dza ulu'bán nupa chinátigaca, bití'rö gaca yöl-la' rizóalen nigula, en bití' ulu'tsaga ná'agaquië', pero gácaquië' ca nácagaquië' gubáz lá'ayi queë' Dios nacu'ë yehua' yubá. ³¹ Ca na' ral-la' ulu'bán nupa chinátigaca, ¿haru' cabi' nulábanilí' lë na' gudxi cazë' Dios libí'ili'? ³² Caní gunné: “Neda' naca' Dios queë' Abraham, en Dios queë' Isaac, en Dios queë' Jacob.” Dios na' bití' náquië' Dios quegaca nupa nátigaca tsaz, pero náquië' Dios quegaquië' bönni' ni nabángaquië' sal-la' gulátie'.

³³ Cate' bila'yöni' bönachi' nacuá' ní' didza' ni, bulu'bani' ca naca lë na' rusédinë' Jesús légequi.

Xibá queë' Dios le naca lo

(Mr. 12:28-34)

³⁴ Cate' guléquibe' enë' bönni' yudo' fariseo ca benë' Jesús, busayjë' ruá'agaquië' bönni' yudo' saduceo, ní'irö bulu'dubë' yúgu'të'. ³⁵ Tuë' bönni' nútsë'ë ládjagaquië', en nazëdë' xibá queë' Moisés, gú'unnë' si' bë'ë Jesús. ³⁶ Que lë ni na' gunábinë' Jesús, rnnë':

—Bönni' Usedi, ¿bízxilö xibá queë' Dios naca lo?

³⁷ Jesús rë' lë':

—Idxí'inu' Xanu' Dios idú ládxi'u', en idú icja ládxi'do'o, enca' len idú yöl-la' réajni'iquiu'. ³⁸ Xibá ni naca lo, en nazáca'tërö. ³⁹ Xibá na' naca buropi, la' ca nácatë, en caní rna: “Idxí'inu' böchi' luzó'o ca nadxi'í cuinu'.” ⁴⁰ Chopa xibá ni nácagaca ga röjlöz yúgu'të le rinná bë' xibá queë' Dios, en yúgu'të le bulu'sédinë' bönni' gulu'ë didza' uláz queë' Dios.

¿Nuzxi' xí'ini náquië' Cristo?

(Mr. 12:35-37; Lc. 20:41-44)

⁴¹ Tsanni ní' nacu'ë tsözxön bönni' yudo' fariseo na', Jesús gunábinë' légaquië', ⁴² rnnë':

—¿Nacxi' rusáca'li' queëli' queë' Bönni' na' lë' Cristo? ¿Nuzxi' xí'ini náquië'?

Bulu'bi'ë didza', ta'nnë':

—Zxi'ini xí'sóë' David náquië'.

⁴³ Ní'irö Jesús rë' légaquië':

—¿Bizx que na' lë' cazë' David bulidzë' Lë', gunné: “Xana'”? Caní gunné' cate' ní' bë'ë didza' uláz queë' Dios Bö' Lá'ayi, gunné':

⁴⁴ Xanru' Dios gudxë' Xana':

“Gurö'ö cuita lë'a ibëla,

cate' gunra' ga ulu'zëchu xzíbigaca Lo' nupa tequi Li' zi'.”

⁴⁵ Channö David na' gunné' queë' náquië' Xanë', ¿nacxi' caz naca, rnnali' náquië' xzí'ini xí'sóë' David na'?

⁴⁶ Cuntu nu guca ubí'í didza', ate' ga gusí lo dza na', cúnturö nu burugui bi inábini Lë'.

23

Jesús ruzéqui'ë yugu' bönni' yudo' didza'

(Mr. 12:38-40; Lc. 11:37-54; 20:45-47)

¹ Ní'irö Jesús bé'lenë' bönachi' nacuá' ní' len yugu' bönni' usëdi queë' didza'. ² Rë' légaquië': —Yugu' bönni' yudo' fariseo, en yugu' bönni' yudo' usëdi nuhuóázagaquië' xilatjë' Moisés, en tu'sédinë' bönachi. ³ Que lë ni na', guli'gún yúgu'të le ilë' libí'ili', pero bití' gunlí' libí'ili' ca na' tunë' légaquië', tu' tu le ta'nnë', en ia'tú le tunë'. ⁴ Le ta'nná bé'enë' bönachi naca ca tu yua' zí'í le cabi' sequí' nu guá', ate' tu'gu'ë le ya'zXícjagaca bönachi, pero légaquië' bití' té'ënnë' ulu'tenë' le, caléga len tuze xibön ná'agaquië'. ⁵ Yúgu'të le tunë', tunë' para ila lé'e bönachi légaquië', tu' tunë' zxon le túgui'ë yen ná'agaquië', en ra' xigágaquië' ga na' nuzúajgaquië' tu le nazúaj lu guichi lá'ayi, en tu'tunnë' luzxi' lari' nácugaquië'. ⁶ Té'ënnë' ila'bö'ë ga naca lataj lo ga na' tu'dubë' tahuë', enca' ga na' naca lataj lo lu yu'u ga tu'dubë' tu'sédë' queë' Dios. ⁷ Lësca' caní, té'ënnë' ulu'gapa bönachi légaquië' didza' ba zxon gapa naca lógaca bönachi, en té'ënnë' ilë' bönachi légaquië': “Padiux, bönni' usëdi.”

⁸ 'Pero libí'ili', bití' ral-la' gunli' ga nu guié libí'ili': Bönni' Usedi, tu' zoa tuz Nu naca Bönni' Usedi queéli', neda', Cristo, ate' yúgu'téli' nácali' böchi'li' tuli' ia'tuli'. ⁹ Cuntu nu guiéli' luyú ni, bití' innali': Xuz, tu' zoa tuz Nu naca Xúzili', zoé' yehua' yubá. ¹⁰ Bití' gunli' ga nu guié libí'ili': Xan, tu' zoa tuz Nu naca Xanli', neda', Cristo. ¹¹ Nu nutsa' ládjali' nu run xichinli' ia'zica'róli', nu ni na' gácaró lo ga zócali'. ¹² Channó nu uzóa cuini lataj lo, cá'asó ugá'ana nu ná', pero nu naca nóxaj ládxi', gála lo.

¹³ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isó tsahui' cuinli'. Ruzága'li' nóza sójácalen bönachi para ila'dxin ga ni' rinná bē'ē Dios yehua' yubá. La' libí'isili' bití' sequi' tsú'uli', en bití' ruí'ili' lataj ila'yú'u nupa té'ēni ila'yú'u.

¹⁴ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isó tsahui' cuinli'. Rugúali' yugu' lidxigacanu nigula uzébidó', en para ulu'isó tsahui' cuinli', xidzé ruldzáli'-nē' Dios. Que lé ni na', zítērō irugu queéli' quí'í sáca'li'.

¹⁵ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isó tsahui' cuinli'. Ridódlí' idú lu nisado', en idú yódzólió ni' para gunli' ga tseaj ládxē'ē tu bönni' Dios tsózxón len libí'ili', en cate' chiguzxéqui'li'-nē', runli' ga nabága'rē' xíguia' ca libí'ili', ate' tsójsu'ē lu guí' gabila.

¹⁶ 'Bica' bayechi' libí'ili'. Nachul-la loli', ate' rē'ēnili' ulu'ili' nóza bönachi. Caní naca queéli' tu' rnnali': "Channó bi rizi' lu nē'ē tu bönni' ni'a que yudo', bití' run bayudxi, pero channó runē' le ni'a que oro dzó'ō yudo', bayudxi gun." ¹⁷ Libí'ili', bönni' lo chul-la, en tu' caréajni'i. ¿Bíxziló nácáro lo? ¿Naru' oro na', o yudo' le run lá'ayi oro na'? ¹⁸ Lē'sca' caní rnnali': "Channó nu bönni' gunē' le ni'a que bucugu lá'ayi, bití' gun bayudxi, pero channó gunē' le ni'a que gun zxoá lahui, bayudxi gun." ¹⁹ Libí'ili', nazídili', en nachul-la loli'. ¿Bíxziló nácáro lo? ¿Naru' gun zxoá láhuísó, o bucugu lá'ayi na' run lá'ayi gun na'? ²⁰ Que lé ni na', channó nu bönni' runē' le ni'a que bucugu lá'ayi, runē' le ni'a que le, enca' ni'a que yúgu'tē le zxóagaca láhuísó. ²¹ Lē'sca' caní, channó nu bönni' runē' le ni'a que yudo', runē' le ni'a que le, enca' ni'a queē' Dios, nun cazé' xilatjē' ni'. ²² Lē'sca' caní, channó nu bönni' runē' le ni'a que yehua' yubá, runē' le ni'a que lataj ga rō'ē rinná bē'ē Dios, enca' ni'a que Lē cazé' Dios rō'ē ni'.

²³ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isó tsahui' cuinli'. Caní naca queéli' tu' riguixzjali' que yudo' tu' cō' huéaj tu' chi cō' le rizí'ili' que xóhuéaj, en que guixi' anis, en que comino la' huagu, pero cucó' rucali' le nácáro lo le rinná bē' xibá queē' Dios, tu' cabí runli' le naca tsahui', en bití' ruhuéchi' ládxi'li' luzá'ali', en bití' réajlē'ēli'-nē' Dios. Yugu' lé ni run bayudxi gunli', en lēs bití' ucá'anali' ia'zica'ró lé na' runli', le riguixzjali' que yudo'. ²⁴ Libí'ili', nachul-la loli', en rē'ēnili' ulu'ili' nóza bönachi. Ca na' runli' naca ca rudódlí' bódzázado' le ré'jali', rubéajgacali'-ba' bō'iyudo', pero ré'jali'-ba' bōa' ta'bíé'-ba' bönni'.

²⁵ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isó tsahui' cuinli'. Nácali' ca zxíga'do' ré'jali', en yō'óna ráhuili'. Riguíbili' le nuá' cuita lē'e, pero lu icja ládxi'do'oli' nalí yugu' le ribanli', en yugu' le ruá' dō' rucali'. ²⁶ Libí'ili', bönni' yudo' fariseo lo chul-la. Zí'aló guli'quibi le nuá' lu zxíga'do', en lu yō'óna, lē na' sa'yéaj gácali' tsahui' lu icja ládxi'do'oli', para gácali' ca' tsahui' cuita lē'ēli'.

²⁷ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isó tsahui' cuinli'. Caní naca queéli' tu' nácali' ca yugu' yeru ba quegaca nupa chinátigaca, le nácagaca chiguíchido'os cuita lē'e, en le nácatē lachi nalá'gaca, pero nalígaca dxita quegaca nupa chinátigaca, enca' yúgu'tē le siguti'. ²⁸ Lē'sca' caní nácali' libí'ili'. Le nácatē láhuísó rulu'í' cuinli' tsahui' lógaca bönachi, pero lu icja ládxi'do'oli' nalili' yugu' le rulu'isó tsahui' cuini, en le ruá' dō' runli'.

²⁹ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isó tsahui' cuinli'. Ruchísali' biquitaj que ba gapa nagáchi'gaquiē' bönni' gulu'ē didza' uláz queē' Dios, en ruí'ili' biquitaj gapa nagáchi'gaca bönachi tsahui'. ³⁰ Lē'sca' caní rnnali': "La'tu' zóatu' dza ni'te cate' gulta'cu'ē xuz xtó'otu', bití' guntu' légaquiē' tsózxón cate' gulu'tiē' yugu' bönni' gulu'ē didza' uláz queē' Dios." ³¹ Tu' rnnali' caní, la' libí'isili' runli' ba nalí nácali' zxi'ini xi'sóagaca nupa ni' bétigaca yugu' bönni' gulu'ē didza' uláz queē' Dios. ³² Caní naca, rusubaga' cuinli' xíguia' na' gula'baguiē' xuz xtó'oli'.

³³ 'Libí'ili' na', nácali' ca yugu' bēla sínia', en di'a dza quegacaba' bēla sínia'. ¿Nacxi' caz uláli' lu le usaca' zí' libí'ili' lu guí' gabila? ³⁴ Que lé ni na', neda' isól-la'a queéli' yugu' bönni' ilu'ē didza' uláz queē' Dios, enca' yugu' bönni' ta'yéajni'inē', en yugu' bönni' usedi. Yugu' bönni' ni, bal-lē' gútili'-nē', en ia'zica'rē' udá'ali' lē'e yaga cruz, en ia'zica'rē' quinli' gapa naca lu yu'u ga rudúbili' rusédali' queē' Dios, ate' ulágali' légaquiē' tu ia'tú yódzó. ³⁵ Caní gaca, ibága'li' libí'ili' xíguia' que idútē rön quegaquiē' bönni' tsahui' le gulalaj luyú, ga gudela' nu bēti Abel, bönni' tsahui', ga ridxintē nupa bétigaca Zacarías, zxi'inē' Berequías, bönni' na' bétili'-nē' gatsaj láhuil'ó ga dē yudo', en ga dē bucugu lá'ayi ga na' tu'zégui'ē' bōa' bédxido' lahuē' Dios. ³⁶ Le nácatē rea' libí'ili', yúgu'tē lé ni ila'bagá' bönachi nacua' dza ni zóaru' na'a.

Jesús ribòdxé' ni'a que yòdzò Jerusalén
(Lc. 13:34-35)

³⁷ Lësca' caní gunné' Jesús:

—Jerusalén, Jerusalén, libí'ili' na' rútingacali'-nè' bõnni' tu'è didza' uláz queë' Dios, en ruládx'i'gacali' guiój nupa nasöl-lè'è Dios. Zían luzu'i' gú'unida' utuba' libí'ili' quia', ca runba' yòjede, rutúbiba' bórado' queë'ba' xzan xliba', pero biti' gú'unili'. ³⁸ Buli'yútsõca', cá'asò ugá'ana yu'u lídxili'. ³⁹ Caní gaca, tu' rea' libí'ili', na'a isí lo biti' ulé'eli' neda' cate' innárõli': "Lá'ayi náquië' Bõnni' na' zè'è uláz queë' Xanru'."

24

Rigúbjõ'ë Jesús ca si' ulu'quínajë' yudo'
(Mr. 13:1-2; Lc. 21:5-6)

¹ Birújáë' Jesús chila yudo', en tsanni ni' rizé'è ni', gula'bíguië' bõnni' usèda queë' ga na' zoë', ate' bulu'lu'inè' Lé' ca nácacaga zò'ò nagú'ugaca lè'a yudo'. ² Bubi'è didza' Jesús, ate' rë' légaquië':

—¿Rilé'etseli' yúgu'tè lè ni? Le nácatè rea' libí'ili', biti' ca' ugá'ana guiój nabaga' luzé'e ni, le cabí iguúnaj.

Le ilaca bë' chizóa idxín dza údxi que yòdzõlió
(Mr. 13:3-23; Lc. 21:7-24; 17:22-24)

³ Cate' ni' rø'è Jesús ga naca lu Gu'á Yaga Olivo, bila'dxinè' bõnni' usèda queë' ga na' zoë' queëzë', en tē' Lé':

—Gudíxjõ'i' netu', çbátaxi ilaca lè ni, en bizxi gaca bē' dza huõdu', en dza údxi que yòdzõlió ni?

⁴ Ní'rø' bubi'è didza' Jesús, ate' rë' légaquië':

—Buli'yú para cabí nu si' ye'e libí'ili', ⁵ tu' zá'gaquië' zían bõnni' légaquië' ca lea' neda'. Ila'nné' nácaçaquië' Cristo, en ila'z'í' yé'ené' bõnachi zían. ⁶ Huayõnili' raca gudil-la, en le ru'i' didza' que gudil-la, pero biti' cõ'õli' bõniga, tu' ral-la' ilaca yúgu'tè lè ni, pero cabí ridxini dza údxi cate' ilacarø lè ni. ⁷ Til-la tu yòdzò len ia'tú yòdzò, ate' tu ga nu rinná bē' len ia'tú ga nu rinná bē'. Ilatsaj yòdzõhué' zxõn, en gaca gubín, ate' zían lataj tõi budó' zxu'. ⁸ Yúgu'tè lè ni nácacaga le isí lógaca yugu' le ila'gu'i' ila'zaca' bõnachi.

⁹ Ní'rø' ulu'dõdi bõnachi libí'ili' lu na' nu usaca' z'í' libí'ili'. Yúgu'tè bõnachi ulu'df'i libí'ili' tu' dá'ali' neda', en ilúti'è bál-lal' libí'ili'. ¹⁰ Cate' gaca caní, gaca chopá lãdx'i'gaca zían bõnachi, en ulu'cá'ana neda', ate' udõdi tu ia'tú luzé'e, en tu ia'tú u'df'i luzé'e. ¹¹ Ní'rø' ulu'lu'f'i lógachië' zían bõnni' ta'z'í' yè'è. Ulu'lu'f'i cuíngaquië' ca yugu' bõnni' tu'è didza' uláz queë' Dios, en ila'z'í' yé'ené' bõnachi zían. ¹² Ilu'á'ada' dõ' bõnachi, ate' que lè ni na' bít'i'rø' ila'dxf'i bõchi' luzé'eguequi. ¹³ Nu guequi tsaz queë' Dios ga idxintè dza údxi, nu ni ulá. ¹⁴ Idú yòdzõlió gaca libán que didza' dxi'a ca rinná bē'è Dios para gaca ba nalí que lógaca yúgu'tè bõnachi izá'a, ate' ní'rø' idxín dza údxi.

¹⁵⁻¹⁶ Nu ulaba lè ni ral-la' uzéajni'í ladxi'. Gunné' Daniel, bõnni' bē'è didza' uláz queë' Dios, gunné': "Tsaza le rudf'inè' Dios lataj lá'ayi queë' Dios, lè na' rusuniti." Cate' ilé'eli' gaca caní, ní'rø' nuli' zóali' luyú Judea ral-la' tsøjzxúnajli' saca' gu'ado'. ¹⁷ Nu dxía ícjo'olò biti' gal-la' huõtãj tsøjzxi' bi dē que lu yu'u, pero ral-la' izxúnajtē. ¹⁸ Nu zoa la' guixi', biti' gal-la' huõtãj tsøjzxi' lari' que. ¹⁹ Bica' bayechi' yugu' nigula si' ulu'zõanu bífido' quégacanu, enca' nigula ni' tu'gádx'i'nu-bi' bífido' quégacanu cate' idxín dza ni'. ²⁰ Buli'lidzë' Dios inábili'-nè' cabí idxín dza ni' izxúnajli' cate' raca beo' ziaga o cate' naca dza lá'ayi, ²¹ tu' ila'gu'f'i ila'zaca'tërø bõnachi dza ni' ca gula'gu'f'i gula'zaca' bõnachi dza ni'te cate' si' guta' gurø'ø yòdzõlió, ga ridxintè na'a dza, en caléga dza zá'gaca biti' ila'gu'f'i ila'zaca' caní. ²² Cate' idxín dza ni', channò Dios biti' cuéqui lahué' quégaquië', cuntú nu ulá, pero cuéqui lahué' quégaquië' dza ni', en gácalenè' nupa gurø cazè' Lé'.

²³ Ní'rø' biti' tséajlë'èli' channò nu idxín queë'li', en guíë libí'ili': "Buli'yútsõca', ni zoë' Cristo", o inná: "Ni' zoë'." ²⁴ Ulu'lu'f'i lógachië' zían bõnni' ta'z'í' yè'è, en ila'nné' nácaçaquië' Cristo, o ila'nné' tu'è didza' uláz queë' Dios. Iluné' le ilaca bē', en le ilún ga ulu'bani bõnachi, ate' ila'z'í' yé'ené' nupa gurø cazè' Dios channò huala'zéqui'nè'. ²⁵ Buli'yútsõca', chigudxi caza' libí'ili' yúgu'tè lè ni zí'atèlò ca si' ilaca. ²⁶ Que lè ni na', biti' irúajli' channò ila'dxin queë'li' nupa ilé libí'ili': "Buli'yútsõca', ni' zoë' Cristo lu lataj cá'asó." Lësca' caní, biti' tséajlë'èli' channò ila'nná: "Buli'yútsõca', lu yu'u zoë'." ²⁷ Ca na' raca cate' rëpi yõsa ga rilén gubidza, en ruzení' ga ribía gubidza, lësca' caní gaca cate' huõda' neda', Bõnni' Guljë' Bõnachi.

²⁸ Ilacatè caní, ca na' ta'nná bõnachi: "Gátitès ga dē tu le nati, ni' ulu'dubi cázaba' bíchulab."

Ca gaca cate' huõdë' Bõnni' Guljë' Bõnachi
(Mr. 13:24-37; Lc. 21:25-33; 17:26-30, 34-36)

²⁹ Gunné' ca' Jesús:

—Tödi yugu' dza ni' cate' ila'gu'i' ila'zaca' bönachi caní, ichul-la gubidza, ate' beo' biti' gunna beni' que. Ila'gu'innajba' bölaj lúzxiba, ate' ila'xzízi le nalá'gaca naca tsutsu lúzxiba. ³⁰ Ní'iró ilá' lahui lúzxiba le gaca bē' huöda' neda', Bönni' Guljē' Bönachi, ate' ila'bödxí yechi' yúgu'tē bönachi yödzölió ni, cate' ila'lé'e neda', Bönni' Guljē' Bönachi, suzá'a lu böaj lúzxiba, dē lu na'a yöl-la' unná bē', en yöl-la' huáca xzön. ³¹ Ní'iró isöl-la'gaca-nē' gubáz lá'ayi quia'. Ulu'cödxē' zidzaj lúzxiba' böa' guixi', ate' ulu'tubē' nupa naböa' quia', nacua' idapa la'atē yödzölió, en yúgu'tē lataj xzan lúzxiba.

³² 'Buli'zéajni'i ládxi'li' le rusedi libí'ili' le raca que yaga higo. Cate' ta'lén ni'a nē'e yúludo', en chirubía xilagui' yúludo', inözili' chizóa idxín cusubá. ³³ Lēscá' caní, cate' ilé'eli' taca yúgu'tē lē ni, inözili' chizóa idxín dza údxí na', en chiridzaga lahui. ³⁴ Le nácatē rea' libí'ili', yúgu'tē lē ni ilaca zí'atēlō ca ilátigaca bönachi nacua' dza ni'. ³⁵ Huadödi quégaca lúzxiba, en luyú ni, pero yugu' xtídza'a biti' ila'dödi cá'asó.

³⁶ 'Cate' idxín dza ni' cantu nu nözi. Biti' nözguequinē' gubáz lá'ayi queē' Dios nacué' yehua' yubá, en biti' nözda' neda', Xzí'inē' Dios, pero tuzē' Dios Xuz nözinē'.

³⁷ 'Ca na' guca dza cate' ni' zoē' Noé, lēscá' caní gaca cate' huöda' neda', Bönni' Guljē' Bönachi. ³⁸ Yugu' dza ni' zí'atēlō ca si' idxín nisa guiōj le busuniti yödzölió, gulē'aj gulahuē', bulu'tsaga ná'agaquiē', en bulu'dödē' xzí'inigaquiē' lu yöl-la' rutsaga na' ga bidxintē dza guyáziē' Noé lē'e barco xzön ni' benē', ³⁹ en biti' guléquite'enē' cate' bidxintē nisa guiōj le busuniti yödzölió, ate' gula'nítiē' yúgu'tē'. Lēscá' caní gaca cate' si' huöda' neda', Bönni' Guljē' Bönachi, cantu nu guéquite'e. ⁴⁰ Dza huöda' ila'cu'ē chopē' bönni' la' guixi'. Tuē' uchē'a-nē' quia', ate' ia'túē' ucá'ana'-nē'. ⁴¹ Ila'cuá'anu chópanu nigula nacua'anu huētú. Tunu uchē'a-nu quia', ate' ia'tunu ucá'ana'-nu.

⁴² 'Buli'subán ládxi'li' tu' cabí nözili' bizxi dza huöda' neda', Xanli'. ⁴³ Na'a, guli'tséajni'i lē ni. La'tu' nözinē' xan yu'u bizxi dza guidē' gubán, huanē'ē yēla, en biti' gu'ē lataj nu quidaj zō'ō para cuan le dzō'ō lidxē'. ⁴⁴ Que lē ni na', buli'subán ládxi'li' ca' libí'ili', tu' huöda' neda', Bönni' Guljē' Bönachi, tu dza biti' nuzóa icjali'.

Bönni' huen dxin tsahui', en bönni' huen dxin biti' náquiē' tsahui'
(Lc. 12:41-48)

⁴⁵ Gunnē' ca' Jesús:

—¿Nuzxi caz bönni' huen dxin náquiē' tsahui', en réajni'inē', bönni' huen dxin na', xanē' cu'ē lu nē'ē bönachi nacua' lidxē' para gu'ē le ilágugaca cate' idxín dza? ⁴⁶ Bica' ba bönni' huen dxin na' náquiē' tsahui', bönni' na', cate' udxiné' xanē', uduxáquiē' lē' caní runē' le nudödē' xanē' lu nē'ē. ⁴⁷ Le nácatē rea' libí'ili', yúgu'tē le dē queē' xanē', udödē' lu nē'ē bönni' huen dxin na' runē' caní. ⁴⁸ Channó huóáquiē' bönni' huen dxin queē' huia' dö', en sa' ládxi'ē, innē': "Huadzenē' xana', en biti' huódatiē'", ⁴⁹ en channó isí lahuē' gundē' zí' bönni' tünlenē' lē' tsözön dxin, en isí lahuē' ca' gu'aj gágulenē' nupa ta'zudxi, ⁵⁰ ní'iró huödē' xanē' bönni' huen dxin na' tu dza cate' biti' zoē' ribözē', o tu yēla biti' réquienē'. ⁵¹ Ní'iró xanē' na' usaca' zí'dē'ē bönni' huen dxin na', en gunē' ga gaca queē' ca na' ral-la' gaca quégaca nupa tu'lu'isó tsahui' cuínquequi. Ní'iró cödxí yechē'ē, en gagu xzea láyē'ē.

25

Rucúdzu'ē didza' Jesús ca naca quégacabi' chibi' bi'i nigula ra'bando'

¹ Gunnē' ca' Jesús:

—Ca gaca quégaca nupa ila'yaza ga rinná bē'ē Dios yehua' yubá naca ca guca quégacabi' chibi' bi'i nigula ra'bando'. Gula'zí'ibi' le nuá'gaca guí' quégacabi', ate' bila'ruajbi' tsöjtságagacabi' bönni' utsaga nē'ē. ² Gáyu'bi' nácacacabi' bi'i biti' ta'yéajni'ibi' ate' ia'gáyu'bi' nasína'gacabi'. ³ Yugu' bi'i nigula biti' ta'yéajni'ibi' na' gula'zí'ibi' le nuá'gaca guí' quégacabi' pero biti' guluá'abi' ia'lati' za régui. ⁴ Yugu' bi'i sina' na' guluá'abi' za régui lu böga'do' quégacabi' len le nuá'gaca guí' quégacabi'. ⁵ Tu' gudzenē' bönni' utsaga nē'ē, gudödi yēla lógacabi', en gulásitēbi'. ⁶ Cate' bidxín idú guluhuēla, biyón chí'i nu rinnē zidzaj, rna: "¡Chizē'ē bönni' utsaga nē'ē! ¡Guli'ruáj tsöjtságali-nē'!" ⁷ Ní'iró gula'yásabi' yúgu'tēbi' bi'i nigula na', ate' bulu'pá'abi' le nuá'gaca guí' quégacabi'. ⁸ Gulu'ibi' didza' bi'i biti' ta'yéajni'ibi' na', en gulēbi' yugu' bi'i sina' na': "Guli'gunna queétu' láti'do' za régui queéli' tu' tu'úlu le nuá'gaca guí' queétu' ni." ⁹ Bulu'bí'ibi' didza' bi'i sina' na', gula'nabi': "Biti' gaca, tu' cabí bi ugá'ana queétu', en queéli'. Guli'tséajtsóca' ga ridó'o za régui, tsöj'ö'uli' queéli'." ¹⁰ Tsanni ni' sójácabi' söjxi'gacabi' le, bidxiné' bönni' utsaga nē'ē. Yugu' bi'i na' nacua'abi' sina', en ta'bözabi' lē' gula'yú'ulentēbi' lē' ga na' raca lamí que utsaga na', ate' la' guyáajtē yu'u. ¹¹ Gudödi ni' ia'zica'röbi' bi'i nigula ra'bando' na' bila'dxinbi' ni', ate' bulu'lídzabi'-nē', en gula'nabi': "Xan, Xan, gusalaj queétu'." ¹² Lē' bubi'ē didza', rnnē': "Le nácatē rea' libí'ili', biti' nözda' gazxi libí'ili'."

¹³ Ní'iró Jesús gudxē' légaquiē':

—Buli'subán ládx'i'li, tu' cabí nözili' bizxi dza o bizxi yëla huöda' neda', Bönni' Guljé' Bönachi.

Rucúdzu'ë didza' Jesús ca naca que dumí zaca'

¹⁴ Gunné' ca' Jesús:

—Ca gun Nu na' rinná bé' yehua' yubá naca ca bené' tu bönni', chizóa tsejë' zì'tu'. Bulidzë' yugu' bönni' huen dxin queë' en gulu'ë yugu' le dë queë' lu ná'agaquië'.

¹⁵ Tuë' bönni' huen dxin na', gulu'ë gayu' dumí nazaca' lu në'ë, ate' ia'tuë' gulu'ë chopa dumí nazaca' lu në'ë. Ia'tuë' gulu'ë tu dumí nazaca' lu në'ë. Tu tuë' gulu'ë lu në'ë tsca huéaj le ila'zëqui'në'. Ní'irö la' guzá'atë' ga naca zì'tu'. ¹⁶ Guyijé' bönni' huen dxin na' guzxi'ë gayu' dumí nazaca' na', en yöjtíjalenë' le ia'gayu' dumí nazaca'. ¹⁷ Lëscá' caní, bönni' na' guzxi'ë chopa dumí na', yöjtíjalenë' le ia'chopa ca'. ¹⁸ Bönni' na' guzxi'ë tu dumí guyijé', en yöjchö'önë' lu yu, ate' bucáché'ë dumí queë' xanë' lu yu ni'.

¹⁹ Cate' chigudzë', budxinë' xángaquië' bönni' huen dxin na', ate' bucá'analenë' légaquië' tsahui'. ²⁰ Ga gusi lo bidxintë' bönni' na' guzxi'ë gayu' dumí nazaca' na', en sunu'ë ia'gayu' dumí ca', ate' rë' xanë': "Xan, gayu' dumí gulú'u lu na'a. Ni dë ia'gayu' dumí ca' yöjtíjalena' le." ²¹ Xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a yénni'tërö cu'a lu no'o. Guyaza ga zoa', udzëjalenu' neda'." ²² Gudödi ni' bidxinë' ca' bönni' huen dxin na' guzxi'ë chopa dumí nazaca', ate' rnnë': "Xan, chopa dumí gulú'u lu na'a. Ni dë ia'chopa dumí ca' yöjtíjalena' le." ²³ Ní'irö xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a, yénni'tërö cu'a lu no'o. Guyaza ga zoa', udzëjalenu' neda'." ²⁴ Ní'irö cate' bidxinë' bönni' huen dxin na' guzxi'ë tu dumí nazaca' na', rnnë': "Xan, nözda' nacu' bönni' bizxaj, tu' rulapu' ga bití' guzu', en rutubu' ga bití' guchilju'. ²⁵ Que lë ni na' gúdxida' lí, ate' guyija', yöjchá'a dumí quiu' lu yu. Ni dë na'a le nequi quiu'." ²⁶ Ní'irö bubí'ë didza' xanë', en rë' lë': "Nacu' huen dxin bití' naca tsahui', en xöhuëdi. Nöz quézinu' rulapa' ga bití' guza', en rutuba' ga bití' guchilja'. ²⁷ Que lë ni na', gácarö dxi'a quiu' la'tu' bunödzu' dumí quia' lu ná'agaquië' bönni' ulu'gunë' le dxin, ila'guíjalenë' le ia'lati', para cate' huöda' neda', uzi'a le nequi quia' len icja ca'." ²⁸ Ní'irö xanë' na' gudxë' nupa nacuá' ni: "Guli'cúa dumí na' dë lu në'ë bönni' ni, en guli'cu'u le lu në'ë bönni' na' dë queë' chi dumí." ²⁹ Nüti'tës nu rugún tsahui' dxin le dë queë', zoa nu unödzej queë' ia'lati', ate' gáta'da' queë', pero nu na' bití' rugún tsahui' dxin le dë lu në'ë, la's dui le dë queë' idúa. ³⁰ Na'a, bönni' huen dxin bití' naca tsahui' ni, guli'tsöjchú'una-në' ní'ilo ga naca chul-la. Ni' cödxí yéché'ë, en gagu zxea láyë'ë.

Cristo uchi'a usöröë' quégaca bönachi

³¹ Gunné' ca' Jesús:

—Cate' ni' huöda' neda', Bönni' Guljé' Bönachi, idinná bé'a, ate' dzáagaquië' neda' yúgu'të gubáz lá'ayi quia', ní'irö cö'a lataj tsahui' quia', ga na' uchi'a usöröa' quégaca bönachi. ³² Ulu'dubi dërö lahua' neda' bönachi yödzölió ni, ate' ucu'a léguequi tsólá'a huéaj ca runë' bönni' uyú'bö'cu' zxila', rucu'ë-ba' tsólá'a huéajba' yugu' chivo, en yugu' bö'cu' zxila'. ³³ Yugu' bö'cu' zxila' na' ucu'ë-ba' cuita lë'ë ibëla, ate' yugu' chivo na' ucu'ë-ba' cuita lë'ë yögöla. ³⁴ Ní'irö, neda', bönni' unná bé', guía' nupa nacuá' cuita lë'a ibëla, inní'a: "Guli'dá ga zoa', libí'ili' bubéajé' Xuza' libí'ili' quez queë'. Nequi queëli' lataj ga na' rinná bé'ë, lë na' bupë'ë queëli' dza nít'e cate' ni' bené' yödzölió. ³⁵ Caní nequi queëli' tu' guduna', ate' bénnali' le gudahua'. Gubidxa' nisa, ate' bénnali' le gu'a. Guca' ca tu bönni' ridá zì'tu', ate' gulú'uli' neda' lídxili'. ³⁶ Biyadzaj le gácu'a, ate' bugáculi' neda' le ráculi'. Gú'ida', ate' buduyúli' neda'. Guyu'a lidxi guié, ate' buduyúli' neda'." ³⁷ Ní'irö ulu'bi'ë didza' bönni' tsahui' na', ilë' neda': "Xan, ¿bátaxi bilé'etu' Lí' gudunu', ate' bugágutu' Lí'? ¿Bátaxi gubidxu', ate' bénnatu' le gu'u? ¿Bátaxi bilé'etu' Lí' gudó' zì'tu', ate' gulú'utu' Lí' lídxitu'? ¿Bátaxi biyadzaj le gacu', ate' bugácutu' Lí' le rácutu'? ³⁹ ¿Bátaxi bilé'etu' Lí' gú'ínu', o guyú' lidxi guié, ate' buduyútu' Lí'?" ⁴⁰ Ubi'a didza' neda', bönni' unná bé', ate' guía' légaquië': "Le nácaté rea' libí'ili', tu' benli' caní queë' nu bönni' bócha'ado' ni, sal-la' náquië' bönni' cá'asö, quia' neda' caz benli' ca'."

⁴¹ Ní'irö guía' nupa nacuá' cuita lë'a yögöla, inní'a: "Guli'cuíta ga zoa', libí'ili' na' nabága'li xíguia', tsöjtsázali' lu guí' na' bití' ulu, lë na' bupë'ë Dios ni'a que tu' xihui', en quéguequi gubáz dá'gaca le. ⁴² Caní gaca queëli' tu' guduna', ate' bití' bénnali' le gahua'. Gubidxa' nisa, ate' bití' bénnali' le guí'ja'. ⁴³ Guca' ca bönni' ridé' zì'tu', ate' bití' gulú'uli' neda' lídxili'. Biyadzaj le gácu'a, ate' bití' bugáculi' neda' le ráculi'. Gú'ida', enca' guyu'a lidxi guié, ate' bití' buduyúli' neda'." ⁴⁴ Ní'irö ila'nná ca' nupa na', ilë' neda': "Xan, ¿bátaxi bilé'etu' Lí' gudunu', o gubidxu', o gucu' ca bönni' ridé' zì'tu', o biyadzaj le gacu', o gú'ínu', o guyú' lidxi guié, ate' bití' gúcalentu' Lí'?" ⁴⁵ Ní'irö ubi'a didza' neda', bönni' unná bé', guía' légaquië': "Le nácaté rea' libí'ili', tu' cabí bi' benli' que tu nu nutsa' ladaj nupa nacuá' ni, sal-la' naca cá'asö nu

na', biti' bi benli' quia' neda'." ⁴⁶ Ní'irō bōnachi tuá' dō' na' la' tsōjtsázagacatē ga ni' ila'guí'i ila'záca'tica'sō, pero bōnachi tsahui' ni' gata' yōl-la' na' bān idú quéguēqui.

26

Tun xtídza'gaquiē' bōnni' yudo' ila'zōnē' Jesús

(Mr. 14:1-2; Lc. 22:1-2; Jn. 11:45-53)

¹ Cate' budxi bē'ē Jesús yugu' didza' ni, gudxē' yugu' bōnni' usēda queē', ² rnnē':
—Nōz quézili' ia'chopa dza idxín Laní Pascua, ate' dza na' neda', Bōnni' Guljē' Bōnachi, ulu'dōdē' neda' lu ná'agaca nupa ulu'dá' neda' lē'e yaga cruz.

³ Ní'irō bila'dxinē' yugu' bixúz unná bē' len yugu' bōnni' yudo' usedi, en bōnni' gula tu'zējajni'inē' bōnachi judío, ate' bulu'dubē' ga naca lō'a lidxi bixúz lo, lē' Caifás. ⁴ Ní' gulún xtídza'gaquiē' ila'zōnē' Jesús, lu yōl-la' rizí' yē' quégaquiē', para ilútiē' Lē'. ⁵ Ta'nnē':

—Biti' gunru' lē ni dza laní, para cabí ila'dzatsa bōnachi.

Tu nigula rigú'unu le rilá' zxixi icjē' Jesús

(Mr. 14:3-9; Jn. 12:1-8)

⁶ Cate' ni' zoē' Jesús lu yōdzō Betania lu yu'u lidxē' Simón, bōnni' na' gū'inē' huē' nudzu' ruzōdi, ⁷ hidxinnu cūdzu'lē' Jesús tu nigula, nuá'anu tu bōga'do' néquini guíōj nazaca', en yudzu tu le rilá' zxixi le nazáca'da', ate' gulú'unu le icjē' Jesús cate' ni' rō'ē rahuē'. ⁸ Cate' bila'lē'enē' bōnni' usēda queē' Jesús lē ni, gula'lenē', ta'nnē':

—¿Bixz que réqui ditaj lē ni? ⁹ Guca nu gutí' lē ni, en si' dumí zían para gácalenru' yugu' bōnachi yechi'.

¹⁰ Cate' biyōnnē' Jesús lē ni, rē' légaquiē':

—¿Bixz que rnnēli' queēnu nigula ni? Tsahui' naca le bennu quia'. ¹¹ Yugu' bōnachi yechi' ila'cuá'lentica'sō libí'ili', pero neda' biti' ugá'analentica'sa' libí'ili'. ¹² Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha'a yeru ba. ¹³ Le nácatē rea' libí'ili', gátitēs luyú yōdzōliō ga gaca libán que didza' dxi'a ni, lēsca' ila'guixjō' bōnachi le bennu nigula ni quia' para nu tsōjné lēnu.

Rizí' lu nē'ē Judas udōdē' Jesús lu ná'agaquiē' bōnni' unná bē'

(Mr. 14:10-11; Lc. 22:3-6)

¹⁴ Ní'irō guyijē' Judas Iscariote ga na' nacu'ē bixúz unná bē'. Náquiē' bōnni' dzáguie' chínnuē' na' dá'gaquiē' Jesús, ¹⁵ ate' gudxē' légaquiē':

—¿Bixzi gūnnali' quia' channō neda' udōda'-nē' Jesús lu ná'ali'?

Bulu'gá'analenē' lē' tsahui' ilu'ē' lē' chi uruá' dumí plata. ¹⁶ Ní'irō gusí lahuē' Judas na' risí ribō'ē udōdē' Jesús lu ná'agaquiē'.

Le ráguru' le rusá' ládxi'ru' ca gútiē' Xanru'

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Cate' naca dza risí lo laní quégaquiē' bōnni' judío cate' tahuē' yōta xtila le cabí nazí'i cúa zi que, gula'bígui'ē bōnni' usēda queē' Jesús ga zoē', en tē' Lē':

—¿Gazxi ré'ēnu' tsōjpa'atu' queēru' para gáguru'-ba' bō'cu' xzila'do' dzō' Laní Pascua?

¹⁸ Jesús rē' légaquiē':

—Gulí'tséajtsōca' yōdzō ni' ga na' zoē' tu bōnni', en gulí'guíē': "Bōnni' rusédinē' netu' rnnē': Chizá' gala' dza quia'. Lu yu'u lidxu' gágulengaca'-nē' bōnni' usēda quia' bō'cu' xzila'do' dzō' Laní Pascua."

¹⁹ Ní'irō gulunē' bōnni' usēda queē' ca na' gunná bē'enē' Jesús légaquiē', ate' bulu'pē'ē le ilahuē' dzō' Laní Pascua.

²⁰ Cate' chigudzō' dza na', Jesús gurō'lenē' idxínnutē' bōnni' usēda queē' tahuē'. ²¹ Tsanni ni' tahuē', Jesús rē' légaquiē':

—Le nácatē rea' libí'ili', tu nu nutsa' ládjali' ni udōdi neda'.

²² Ní'irō bulu'huf'ini ládxi'gaquiē', en gula'nábinē' Jesús tu tuē', ta'nnē':

—Xan, ¿naru' neda'?

²³ Bubi'ē didza' Jesús, rnnē':

—Bōnni' ni runē' nē'ē tsōzōxn len na'a lu yō'ōna, bōnni' ni udōdē' neda'. ²⁴ Le nácatē neda', Bōnni' Guljē' Bōnachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udōdi neda' gátia'. Gácarō dxi'a queē' bōnni' na' la' cabí guljē'.

²⁵ Ní'irō bubi'ē didza' Judas, bōnni' na' udōdē' Jesús, rnnē':

—Bōnni' Usedi, ¿naru' neda'?

Jesús rē' lē':

—Ōn, lí' na'.

²⁶ Tsanni ni' tahuē', gudélé'ē Jesús yōta xtila, en gudxē' Dios: "Xclenu'." Ní'irō buzxuzxjē' le, en bunōdzjē' quégaquiē' bōnni' usēda queē', rnnē':

—Guli'sí, guli'gagu. Lè ni le naca caza'. Ca bena' que yöta xtila ni rulu'í ca gaca que le naca caza'.

²⁷ Gudélè'è ca' tu zxíga'do', en gudxè' Dios: "Xclenu'." Ní'irò bunödzejè' ca' quégaquiè', rnnè':

—Guli'gui'aj yúgu'tèli'. ²⁸ Lè ni rulu'í ca naca xichöna' le run tsutsu didza' cubi rucá'ana tsahui'. Xichöna' na' ilalaj ni'a quégaca bönachi zían para gaca uniti lahuè' Dios yugu' dul-la' nabága'gaquiè'. ²⁹ Rea' ca' libí'ili', bití'rö guí'ja' xisi le ribía lubá uva ni cate' idxinrö dza ni guí'jalena' libí'ili' tu le cubi ga ni' rinná bē'è Xuza'.

Jesús rnnè' innè' Pedro biti' núnbē'è Lè'

(Mr. 14:26-31; Lc. 22:31-34; Jn. 13:36-38)

³⁰ Cate' budxi gulúl-lè' yöl-la' ba queè' Dios, yójáquiè' lu Guí'a Yaga Olivo. ³¹ Ní'irò Jesús rē' légaquiè':

—Yúgu'tèli' gaca chopa ládxi'li', en ucá'anali' neda' na'a dzò' ni, tu' nazúaj lu guichi lá'ayi ca gaca quia', le rnná: "Guna' ga gátiè' Bönni' Uyú Bó'cu' Zxila', ate' ilásilasiba' bō'cu' zxila' na'." ³² Cate' ubana' lu yöl-la' guti, ní'irò tséaja' tsójnōrua' loli' saca' luyú Galilea.

³³ Ní'irò bubí'è didza' Pedro, en rē' Jesús:

—Sala' ilaca chopa ládxi'gaquiè', en ulu'cá'anè' yúgu'tè' Li', neda' biti' gaca chopa ládxa'a, biti' ucá'ana' Li'.

³⁴ Jesús gudxè' lè':

—Le nácatè' rea' li', na'a dzò' ni, cate' si' cōdxilōba' bōra, li' innó' tsonna luzuí biti' núnbē'u neda'.

³⁵ Ní'irò Pedro gudxè' Jesús:

—Sal-la' gátiletea' Li', biti' ca' innía' biti' núnbē'a Li'.

Lësca' caní gula'nnè' yúgu'tè' bönni' uséda queè'.

Jesús rulidzè' Dios la' yèla Getsemaní

(Mr. 14:32-42; Lc. 22:39-46)

³⁶ Ní'irò Jesús bidxínlenè' légaquiè' la' yèla Getsemaní, ate' gudxè' yugu' bönni' uséda queè' na', rnnè':

—Guli'cō'tsōca' ni tsanni tséaja' ia'lati' ní'ilō, tsójlidza'-nè' Dios.

³⁷ Jesús guchè'è Pedro len iropè' zxf'inè' Zebedeo, ate' gusi lahuè' ruhu'innè', en risèbi ládxe'è. ³⁸ Ní'irò Jesús gudxè' légaquiè':

—Ruhuí'ini ládxa'a, en huáti caza' lu yöl-la' risèbi ladxi'. Guli'gá'ana ni, en guli'ná' yèla tsōzxōn len neda'.

³⁹ Gudödè' Jesús ia'lati'do' ní'ilō, ate' ni' biyéchuè'. Busudxín lahuè' lu yu, en bulidzè' Dios, gunnè':

—Xuza', channō huáca, ben ga biti' gun bayudxi qui'i saca'a lè ni, caléga ca rē'ènda' neda', pero ca rē'ènu' Li' gunu'.

⁴⁰ Cate' budxinè' Jesús ga na' nacu'è bönni' uséda queè', yójáquiè' légaquiè' tasiè', ate' rē' Pedro:

—¿Naru' cabí gúcatsō iná'alenu' neda' tsōzxōn yèla tu chí'ido'? ⁴¹ Guli'ná' yèla, en buli'lidzè' Dios inábili'-nè' gácalenè' libí'ili', para cabí guí'ili' Satanás tu' xihui' lataj si' bē' libí'ili' le xihui'. Bō' naca cázali' nasína'tica'sō, pero lu yöl-la' bōnáchisō queè'li' nacuídi'li'.

⁴² Ní'irò guyjé' Jesús le buropi luzuí, en bulidzè' Dios, rnnè':

—Xuz, channō cabí gaca gunu' ga biti' qui'i saca'a lè ni, ben ca raza ládxi'u Li'.

⁴³ Cate' bōajé', leyúbölō buduxaquiè' légaquiè' tasiè' tu' nadódirō yèla guioj légaquiè'.

⁴⁴ Ní'irò bucá'anè' Jesús légaquiè', ate' guyjé' leyúbölō, en bulidzè' Dios le gunni luzuí, ate' tuz ca gunnè' zí'alō rnnè'. ⁴⁵ Leyúbölō bōajé' ga na' nacu'è bönni' uséda queè', en rē' légaquiè':

—¿Rásitsali' na'a, en ruzi'tsō ládxi'li'? Buli'yútsōca', chibudzaga lo. Neda', Bönni' Guljé' Bönachi, chinadóda' lu ná'agaquiè' bönni' dul-la'. ⁴⁶ ¡Guli'chasa, uyéajru! Buli'yútsōca', bönni' na' rudödè' neda' chibidxinè' ni.

Ta'chè'è Jesús nadzunè'

(Mr. 14:43-50; Lc. 22:47-53; Jn. 18:2-11)

⁴⁷ Tsanni ni' ru'è Jesús didza' ni, Judas, bönni' nabábalenè' idxinnutè' na', la' bidxintè' ni', ate' dzágagaquiè' bönni' zíanlè', nuá'agaquiè' guié' tuchi', en yugu' yágado'. Yugu' bixúz unná bē', en bönni' gula tu'zéajni'inè' bönachi judío nasól-la'gaquiè' légaquiè'. ⁴⁸ Judas, bönni' na' rudödè' Jesús, chibuluí'inè' légaquiè' tu le gunè' le gaca bē' nu naca Jesús, gunnè':

—Bönni' na' utsaga lahua'-nè', Lè' na' Jesús. Guli'sönè'.

⁴⁹ Ní'irò gubíguí'è Judas ga na' zoè' Jesús, rnnè':

—Padiux, Bönni' Usedi.

Ní'irò lá' busudxín lotè' Lè'. ⁵⁰ Jesús rē' lè':

—Böcha'a, ¿bizxi huen zo'o ni?

Ní'irö gula'bigüë'ë bönni' na', ate' gula'zönë' Jesús. ⁵¹ Tuë' bönni' dzáguie' Jesús gulecjë' guié tuchi' queë', en benë' huë', guchúguie' guídi náguie' bönni' huen dxin queë' bixúz lo. ⁵² Jesús gudxë' lë':

—Bugú' guié tuchi' quiu' lidxi. Yúgu'të nupa tu'dí'ini guié tuchi', lu guié tuchi' ilátigaca. ⁵³ ¿Naru' cabí'nözinu' huáca ulidza' Xuzá, ate' Lë' la' isól-la'të' ziantërö ca chinnu cö' gubáz lá'ayi le naca zían gáyu'ë tu cö' huéaj? ⁵⁴ Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

⁵⁵ Ní'irö Jesús gudxë' yugu' bönni' ni':

—¿Birúajtsali' nuá'ali' guié tuchi', en yágado' para sönlí' neda' ca runlí' rizönlí'-në' gubán? Yugu' dza gurö'a lolí' ga naca lu chila yudo', en busédigacada' bönachi, pero bití' guzxönlí' neda'. ⁵⁶ Raca caní yúgu'të lë' ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queë' Dios.

Ní'irö yúgu'të bönni' uséda queë' Jesús bulu'cá'anë' Lë', en bulu'zúnnejë' ni'.

Ridxinë' Jesús lógaquie' bönni' yudo'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ní'irö yugu' bönni' na' zóngaquie' Jesús gula'chë'ë Lë', ate' bila'dxinë' lahuë' Caifás, bixúz lo, ga ni' nudúbigaquië' ca' yugu' bönni' yudo' usedi len bönni' gula tu'zéajni'inë'. ⁵⁸ Pedro söjnáhuë' Jesús zi'tu' zí'tu'sö, en bidxinë' ga naca lö'a lidxi bixúz lo na', para ilé'enë' nacxi utságuie' Jesús.

⁵⁹ Yugu' bixúz unná bë' len bönni' gula tu'zéajni'inë', en bönni' yudo' tu'chi'a tu'söröë', bulu'guiljë' nu uzegui Jesús didza' sal-la' si' yë'ë bönni' na', para gaca ila'chúguie' queë' gátie'.

⁶⁰ Cuntu nu bila'dzölinë' sal-la' bila'dxinë' bönni' zían, en gula'nnë' queë' le cabí'nacaté. Ga búdxitë bila'dxinë' chopë' bönni', ate' lu yöl-la' rizi' yë' quégaquie' gula'nnë' queë', ⁶¹ ta'nnë':

—Bönni' ni gunné': "Huaca uquínna' yudo' queë' Dios, ate' uchisa' le ia'tsonna dzasö."

⁶² Ní'irö guzuínë' bixúz lo na', en rë' Jesús:

—¿Naru' cabí'rubí'tso' didza'? ¿Bizxi caz lë' ni ta'nnë' bönni' ni quiu'?

⁶³ Jesús bití' bi gunné'. Ní'irö bixúz lo gudxë' Lë':

—Ni'a queë' Xanru' Dios ban rinná bé'eda' Li' quíxjö'u le nacaté. Gudíxjö'i' netu' channö

nacu' Li' Cristo, Zxi'inë' Dios.

⁶⁴ Jesús rë' lë':

—Ca na' rnno' naca'. Le nacaté rea' libí'ili', ilé'eli' neda', Bönni' Guljë' Bönachi, rö'a cuita lë'ë ibëla Dios, ga ni' dë' lu na'a yöl-la' unná bë', ate' guída' lu böaj lúzxiba, en idxina' ga zóali'.

⁶⁵ Ní'irö lu yöl-la' rilé queë' guchözë' bixúz lo lari' nácuë', rnnë':

—¿Gunnë' zi'ë bönni' ni queë' Dios! ¿Núzxirö naquíniru' nu innë queë' bönni' ni? Chibiyön quezilí' didza' zi' bë'ë queë' Dios. ⁶⁶ ¿Nacxi rusáca'li' queéli'?

Bulu'bi'ë didza', gula'nnë':

—Nabáguë'ë xíguia' gátie'.

⁶⁷ Ní'irö bulu'chejë' zxöna' lahuë' Jesús, en gulu'ë dö' queë'. Gula'gápë'ë ru'ë Jesús ia'zica'rë', ⁶⁸ en të' Lë':

—¿Nacátsö' Li' Cristo? Gunnëya'atsöca' na'a, ¿nuzxi na' gudapa' Li'?

Pedro rnnë': "Bití' núnbë'a-në' Jesús"

(Mr. 14:66-72; Lc. 22:56-62; Jn. 18:15-18, 25-27)

⁶⁹ Tsanni ni' gulaca lë' na', rö'ë Pedro lö'alö, ate' bidxinnu tunu nigula huen dxin ga na' zoë', ate' rnnanu:

—Lësca' li' gudálenu' Jesús, bönni' Galilea na'.

⁷⁰ Gudá'baguë'ë Pedro lógaca bönachi nacua' ni', rnnë':

—Bití' nözda' nuzxi que na' ru'u didza'.

⁷¹ Cate' birúajë' Pedro ga nu riyaza lö'a, bilé'enu-në' ia'tunu nigula, ate' gúdxinu nupa nacua' ni':

—Bönni' ni gudálenë' ca' Jesús, bönni' Nazaret na'.

⁷² LeyúböLö gudá'baguë'ë Pedro, en buzöjtjë' Dios, rnnë':

—Bití' ca' núnbë'a-në' bönni' ni.

⁷³ Íá'láti'do'os gudzé, gula'biga' nupa nacua' ni' ga na' zoë' Pedro, en të' lë':

—Le nacaté li' nunu' ca' tsözxón légaquie' tu' naca bë'u yöl-la' ru'isö quiu' didza'.

⁷⁴ Ní'irö gusi lahuë' Pedro rudxia dö' cuinë', en ruzöjtjë' Dios, rnnë':

—Bití' ca' núnbë'a-në' bönni' ni.

La' ná'asö gurödxitëba' böra. ⁷⁵ Ní'irö yöjnenë' Pedro didza' gudxë' Jesús lë', gunné': Cate' si' cödxilöba' böra, tsonna luzuí chigunnö' bití' núnbë'u neda', ate' burúajë' Pedro ni', en gurödxí yéchi'dë'ë.

27

Tu'dödë' Jesús lu në'ë Pilato

(Mr. 15:1; Lc. 23:1-2; Jn. 18:28-32)

¹ Cate' za' reni' dza na', gulún xtídza'gaquië' yúgu'të bixúz unná bë' len bönni' gula tu'zéajni'inë' bönni' judío para ilútië' Jesús. ² Gula'chë'ë Jesús náguë'ë, ate' bulu'dödë' Lë' lu në'ë Poncio Pilato, bönni' rinná bë'ë uláz que yödzo Roma.

Ratië' Judas

³ Cate' chinözinë' Judas, bönni' na' budödë' Jesús lu ná'agaquië' bönni' yudo', narugu queë' Jesús gátië', buf'innë', ate' yöju'ë chi uruá' dumí plata na' lu ná'agaquië' bixúz unná bë', en yugu' bönni' gula na'. ⁴ Rë' légaquië':

—Bena' dul-la' tu' budöda'-në' bönni' tsahui' gátië'.

Ní'irö të' lë':

—Biti' gun lë ni ga cõ'ötu' böniga. Le ben cazu' li' na'.

⁵ Ní'irö gurú'unë' Judas yugu' dumí plata na' ga naca chila yudo', ate' buzë'ë ni', en yöjsi yenë'.

⁶ Bulu'zi'ë bixúz unná bë' yugu' dumí plata na', ta'nnë':

—Biti' sa'yéaj cú'uru' dumí ni ga rigú'uru' dumí que yudo', tu' naca lazzjë' tu' bönni' ratië' bönachi.

⁷ Ní'irö gulún xtídza'gaquië', ate' gulá'uninë' dumí na' tu' la' yëla queë' tu' bönni' huen rö'ö para gaca ga ila'gáchë'ë bönni' zi'tu'. ⁸ Que lë ni na', ga ridxintë na' a dza nazí' le lataj na', La' Yëla Rön. ⁹ Caní guca ca na' gunnë' Jeremías, bönni' bë'ë didza' uláz queë' Dios, gunnë': "Gula'guélé'ë chi uruá' dumí plata na', tsca le gula'zéqui'në' bönni' Israel Lë', ¹⁰ ate' dumí na' gulá'uninë' la' yëla queë' tu' bönni' huen rö'ö. Lë ni buluf'inë' Xana' neda'."

Ridxinë' Jesús lahuë' Pilato

(Mr. 15:2-5; Lc. 23:3-5; Jn. 18:33-38)

¹¹ Cate' bulu'sudxinë' Jesús lahuë' Pilato, bönni' na' rinná bë'ë uláz que yödzo Roma, bönni' ni gunábinë' Jesús, rë' Lë':

—¿Nacu' Li' Bönni' inná bé'enë' bönachi judío?

Jesús rë' lë':

—Ca nácasõ rño'.

¹² Cate' yugu' bixúz unná bë' len bönni' gula tu'zéajni'inë' bulu'zégui'ë Jesús didza', biti' bi didza' bubi'ë Jesús. ¹³ Ní'irö Pilato rë' Jesús:

—¿Naru' cabi riyõntsenu' cate' xõ le ta'nnë' quiu'?

¹⁴ Jesús biti' bi didza' bubi'ë. Caní guca, bubábinë' bönni' unná bë' na'.

Rirugu queë' Jesús gátië'

(Mr. 15:6-20; Lc. 23:13-25; Jn. 18:38-19:16)

¹⁵ Cate' naca dza Laní Pascua na', dë caz tu le runë' Pilato, bönni' unná bë' na', ca ta'naba bönachi rusanë' tuë' bönni' yu'ë lidxi guié, nútí'tës nu té'eni usané'. ¹⁶ Dza na' tu' bönni' nabáguë'ë xíguia', lë' Barrabás, yu'ë lidxi guié ni'. ¹⁷ Cate' bulu'dubi bönachi zían ni', Pilato gunábinë' légaquië', rnnë': —¿Nuzxi ré'ënilí' usana' queéli'? ¿Naru' Barrabás o Jesús, Bönni' na' lë' Cristo?

¹⁸ Caní gunnë' Pilato tu' réquibe'enë' bulu'dödë' bönni' yudo' Jesús lu në'ë tu' t'xzé'enë' Lë'.

¹⁹ Tsanni ni' rö'ë Pilato ga na' ruchi'a rusöröë', nigula queë' gusól-la'nu nu tsöjödxi lë', rna:

—Biti' bi gunu' queë' bönni' tsahui' ni, tu' gúdxide'eda' guduyëla lu yëla béchigal tu' nözinë' Lë'.

²⁰ Yugu' bixúz unná bë' len bönni' gula tu'zéajni'inë' gula'gú' u' yö'l-lë'ë bönachi zían na' para ila'nabi Pilato usané' Barrabás na', ate' gútië' Jesús. ²¹ Leyúbóló bë'ë didza' bönni' unná bë' na', rë' légaquië':

—¿Núzxilë' chopë' ni ré'ënilí' usana'-në' queéli'?

Gula'nnë':

—Barrabás.

²² Ní'irö Pilato gunábinë' légaquië', rnnë':

—¿Nacxi guna' queë' Jesús, bönni' na' lë' Cristo?

Yúgu'të' ta'nnë':

—¡Budë'ë lë'e yaga cruz!

²³ Ní'irö bönni' unná bë' na' rë' légaquië':

—¿Bizxi dö' benë'?

Zídzajrö gulu'ë didza', ta'nnë':

—jBudë'ë lë'e yaga cruz!

²⁴ Cate' réquibe'enë' Pilato biti' birúaj xtídzë'ë, pero gula'dzátsarö bönachi, ní'irö gudélë'ë nisa, en gudibi në'ë lógaquië', rnnë':

—Biti' bi xíguia' nabága'a neda' tu' nözi yöl-la' guti queë' bönni' tsahui' ni. Le gun cázali' libí'ili' lë ni.

²⁵ Bulu'bf'i didza' yúgu'të bönachi ni', ta'nná:

—jYöl-la' guti queë' bönni' ni ibága'tu' netu', en ila'baga' ca' xzí'initu'!

²⁶ Ca' guca, Pilato busanë' Barrabás na' lu ná'agaquië'. Ní'irö gunná bé'enë' bönni' rójáquië' gudil-la ila'guinë' Jesús, ate' gudödi ni' budödë' Lë' lu ná'agaquië' para ulu'dë'ë Lë' lë'e yaga cruz.

²⁷ Yugu' bönni' rójáquië' gudil-la nacu'ë lu në'ë bönni' unná bé' na' gula'chë'ë Jesús lu yu'u yúlahui' nazí'i le pretorio, ate' ni' bulu'tubë' yúgu'të bönni' rójáquië' gudil-la nacu'ë ni' ga na' zoë' Jesús. ²⁸ Ní'irö gula'lecjë' lari' nácuë' Jesús, en bulu'gácuë' Lë' tu lari' xiná chul-la, ca rácuaga nupa ta'nná bé'. ²⁹ Bulu'dxië' icjë' tu le néquini ni'a në'e yaga yötsi' le naca ca le dxia icjë' bönni' rinná bé'ë, en bulu'zóë' tu guído' lu në'ë ibëla le rulu'í ca tu yaga que bönni' yúlahui'. Ní'irö bulu'zóa zxibë' lahuë', en bulu'titjë' Lë', ta'nnë':

—jBica' ba Li', rinná bé'entu' bönachi judío!

³⁰ Ní'irö bulu'chejë' Lë' zxóna', ate' bulu'guélë'ë gui na', en gula'guinë' icjë'. ³¹ Gudödi bulu'titjë' Jesús, gula'lecjë' lari' na' nácuë', ate' bulu'gácuë' Lë' lari' que cazë'. Ní'irö gula'chë'ë Lë' para tsöjdá'agaquië' Lë' lë'e yaga cruz.

Tu'dë'ë Jesús lë'e yaga cruz

(Mr. 15:21-32; Lc. 23:26-43; Jn. 19:17-27)

³² Cate' ni' bila'rúajë' bönni' na', yójxáca'gaquië' Simón, tu bönni' Cirene, ate' gulunë' ga bi'ë yaga cruz queë' Jesús.

³³ Cate' bila'dxinë' lataj nazí'i le Gólgota, le rnna lu didza' xidza', Lataj Que Böga' Ícjaru', ³⁴ bulu'gui'jë' Jesús nupi zi nuts'i' zxícala'aba' böa' guixi'. Cate' buxí' ru'ë Jesús, biti' gú'unnë' guí'jë'.

³⁵ Cate' chinudá'agaquië' Lë' lë'e yaga cruz, gula'guísië' lari' nácuë', en bulu'quitjë' lahui le gaca bé' núzxilë' guequi queë'. Caní guca, budxín lë na' gunné' bönni' bé'ë didza' uláz queë' Dios, gunné': "Gula'guísië' lari' nácuë', en bulu'quitjë' lahui le gaca bé'." ³⁶ Ní'irö gula'bë'ë ni', tu'yüé' Jesús. ³⁷ Lë'sca' bulu'zóë' lë'e yaga cruz ícjälë' Jesús tu didza' le riguixj' le nabáguë'ë le rnna caní: "Bönni' ni Jesús, Bönni' rinná bé'enë' bönachi judío."

³⁸ Ga ni' dë'ë Jesús, bulu'dë'ë ca' lë'egaca yaga cruz chopë' bönni' gubán. Tuë' bulu'dë'ë cuita lë'ë ibëla, en ia'tüë' na' cuita lë'ë yögöla. ³⁹ Gula'dödë' ni' yugu' bönni' bulu'lidza zi'ë Jesús, en bulu'tá ícjagaquië', tu'titjë' Lë', ⁴⁰ ta'nnë':

—jÖn, Li' na' uquínnaju' yudo', ate' tsonna dzasö ca' uchísatso' le! jBusölá cuinu' na'a channö nacu' Li' Xzí'inë' Dios! jBötjatsöca' lë'e yaga cruz na'!

⁴¹ Lë'sca' caní bulu'titjë' Lë' yugu' bixúz unná bé' len yugu' bönni' yudo' usedi, en yugu' bönni' yudo' fariseo, len bönni' gula tu'zéajni'inë', ta'nnë':

⁴² —Yugu' nu yúbölo busölë' bönni' ni, pero biti' gaca usölá cuinë'. Channö náquië' Bönni' inná bé'enë' bönachi Israel, huðtjatsöquië' na'a lë'e yaga cruz, ate' tséajlë'ëru' Lë'. ⁴³ Lë' buzxöni ládxë'ë Dios. Dios usölá cazë' Lë' na'a channö raza ládxë'ë Lë', tu' gunné': "Xzí'inë' Dios naca'."

⁴⁴ Lë'sca' caní yugu' bönni' gubán na' dá'gaquië' lë'egaca yaga cruz ga ni' dë'ë Jesús bulu'lidza zi'ë Lë'.

Ratië' Jesús

(Mr. 15:33-41; Lc. 23:44-49; Jn. 19:28-30)

⁴⁵ Cate' bidxín huagubidza, guchul-la idütë yödzölió ga bidxintë idú ridödi xihuó. ⁴⁶ Idú ridödi xihuó na', bé'ë zidzaj didza' Jesús, rnnë':

—Elí, Elí, ¿lama sabactani?

Didza' ni rnna lu didza' xidza': "Dios quia', Dios quia', ¿bixz que nubéaj ládxu'u neda'?"

⁴⁷ Cate' nupa nacua' ni' bila'yöni didza' ni, ta'nná:

—Bönni' ni rulidzë' Elías, bönni' ni' bé'ë didza' uláz queë' Dios.

⁴⁸ La' guxít'i'të' tuë' bönni' nútsë'ë ládjagaquië', en gudélë'ë tu le bululu rizxupi nisa, ate' buxúpinë' le nupi zi, en buzöle' le tu lu gui, ate' butsåguië' le ru'ë Jesús para xupë'. ⁴⁹ Ní'irö ia'zica'rë' bönni' ni' ta'nnë':

—jGulözagarö! jUyútsöca'ru' channö huidë' Elías usölë' Lë'!

⁵⁰ Leyúbölo gurödxí'ë zidzaj Jesús, ate' burúajtë bö' naca cazë', gútitë'. ⁵¹ La' ná'asö biröza'të lari' nal-la' lu yudo', birúaj choplö, le gudela' icjlö ga bidxintë xiní'i. Ní'irö gudödi budó' xzu', en gula'lá'a guiöj. ⁵² Gula'yalaj yeru ba quégaca nupa chinátigaca, nupa ni'

gula'yéajlë' Dios, ate' bulu'bán bönachi na'. ⁵³ Gudödi bubanë' Jesús, bulu'rúajë' bönni' na' yeru ba quegaquië', en gula'yázië' yödzö lá'ayi Jerusalén, ga ni' bila'lé'e bönachi zían légaquië'.

⁵⁴ Ní'irö gúdxinë' bönni' na' rinná bé'enë' bönni' rójáquië' gudil-la, enca' yugu' bönni' rójáquië' gudil-la naca'u'lenë' lé' tu'yúé' Jesús, ate' gunné':

—Le nácatë bönni' ni gúquië' Zxi'inë' Dios.

⁵⁵ Zí'tu'sö gula'cuá'anu nigula zían tu'yunu Jesús, nigula na' gula'dálennu Jesús cate' ni' buzë'ë luyú Galilea, ate' gulunnu xichinë', gula'gú'unu le gulahuë'. ⁵⁶ Lësca' María Magdalena, en María, xiná'agaquië' Jacobo, en José, nüt'sa'gacanu ladjagacanu, ate' zóanu ca' ni' xiná'agaquië' yugu' zxi'inë' Zebedeo.

Ta'gu'ë Jesús yeru ba le nadaj lë'e gu'a guiöj

(Mr. 15:42-47; Lc. 23:50-56; Jn. 19:38-42)

⁵⁷ Cate' chiridzö' dza na', bidxinë' José, bönni' Arimatea, tu bönni' rilé'enë' yöl-la' tsahui' queë', en dë'ë ca' Jesús. ⁵⁸ Bönni' ni yöjyüé' Pilato, en gunabë' lataj u'ë Jesús. Ní'irö Pilato gunná bë'ë ulu'nódzjé' queë' Jesús. ⁵⁹ Guzxi'ë José Lë', en buchölinë' Lë' tu lari' nazaca'.

⁶⁰ Ní'irö gulu'ë Lë' lu yeru ba cubi queë' le naguidjé' lë'e gu'a guiöj. Budë'ë tu guiöj blaga zxon ga nu riyaza yeru ba na', ate' söhuöjé'. ⁶¹ Gula'cuá'anu María Magdalena, en ia'tunu María ni', rögacanu ra' yeru ba na'.

Yugu' bönni' rójáquië' gudil-la tapa chi'ë ba queë' Jesús

⁶² Cate' za' reni' lá'tú dza, gudödi bulu'pë'ë que dza lá'ayi quegaquië' bönni' judío, bulu'dubë' yugu' bixúz unná bë', en yugu' bönni' yudo' fariseo ga zoë' Pilato. ⁶³ Të' Pilato:

—Bönni', röjnetu' bi gunné' bönni' rizi' yë'ë na', cate' ni' zoë' nabanë', gunné': "Cate' gaca tsonna dza ubana' lu yöl-la' guti." ⁶⁴ Que lë' ni na' gunná be'e nupa ilún chi' i ba ni' ga idxintë' dza bunny, para cabi idigaquië' bönni' usëda queë' chi' i dzö'ölö, en ulu'béajë' Lë'. Ní'irö ilë' bönachi: "Bubanë' Jesús lu yöl-la' guti." Channö caní gaca, didza' cabi nácatë ni ilu'ë güntëro huiá' dö' ca ben didza' cabi nácatë na' gulu'ë zí'alö.

⁶⁵ Pilato gudxë' légaquië':

—Ni nacu'ë bönni' rójáquië' gudil-la. Guli'ché'ë queëli'. Guli'tséaj, guli'gún chi' i yeru ba na' tsca séqui'li' gunli'.

⁶⁶ Ní'irö yöjáquië' ni', en bulu'sayjé' dxi'a yeru ba na', en bulu'dë'ë lë'e guiöj na' tu le gaca bë' channö isalaj, ate' bulu'cá'anë' ni' bönni' rójáquië' gudil-la ilún chi'ë le.

28

Rubanë' Jesús lu yöl-la' guti

(Mr. 16:1-8; Lc. 24:1-12; Jn. 20:1-10)

¹ Cate' chigudödi dza lá'ayi quegaquië' bönni' judío, en chizá' reni' dza domingo, yöjyugacanu María Magdalena en ia'tunu María na' yeru ba queë' Jesús. ² Tsárido'os gudödi budó' zxu'. Cani' gaca, tu' böjtjé' tuë' gubáz lá'ayi queë' Xanru' narúajë' yehua' yubá. Bidxinë' ra' yeru ba na', ate' gudüé' guiöj blaga zxon na', en gurö'ë lu guiöj na'. ³ Nalá' lahuu' gubáz lá'ayi na' ca yösa bení', ate' zxíla'do'os naca lari' nácüé'. ⁴ Cate' yugu' bönni' na' rójáquië' gudil-la tapa chi'ë yeru ba na' bila'lé'enë' lé', guládxinë', en gula'zxi'zië'. Gula'dzö'ë lu yu, en guláquië' ca bönni' nati' caz. ⁵ Ní'irö gubáz lá'ayi na' gudxë' yugu' nigula na', rnnë':

—Biti' gádxili'. Nözda' ruguíjali'-në' Jesús, bönni' na' bulu'dë'ë lë'e yaga cruz. ⁶ Biti' zoë' ni' tu' chibubanë' ca na' chigunná cazë' Lë'. Guli'dá, uyuli' ga ni' gutë' Xanru'. ⁷ Guli'tséaj na'a, guli'tsöjödxi yugu' bönni' usëda queë' chibubanë' Jesús lu yöl-la' guti, ate' na' a Lë' cazë' inöruë' lolí' saca' luyú Galilea. Ní' ulé'eli'-në'. Chigudxa' libí'ili' le gulu'ë Dios lu na'a.

⁸ Ní'irö la' bulu'zá'tënu ra' yeru ba na', tádxinu, en tu'dzéjanu, ate' carelö söjácunu söjtíxjöi'igüequinu yugu' bönni' usëda queë'. ⁹ Tsanni ni' söjácunu, Jesús yöjtságuie' légacanu, ate' rë' légacanu:

—Padiux.

Ní'irö gula'bíga'nu ga zoë' Jesús, en bulu'nída'nu ni'ë. Gula'yéaj ládxi'gacanu Lë'. ¹⁰ Ní'irö Jesús rë' légacanu:

—Biti' gádxili'. Guli'tséaj, guli'tsöjtíxjöi' i yugu' böcha'a tsöjáquië' saca' luyú Galilea, ate' ni' ulu'lé'enë' neda'.

Le gula'guíxjö'ë yugu' bönni' rójáquië' gudil-la

¹¹ Tsanni ni' söjácunu nigula na', yugu' bönni' na' rójáquië' gudil-la gulún chi'ë yeru ba na' bulu'dxinë' lu yödzö ni', ate' gula'guíxjöi'inë' yugu' bixúz unná bë' yúgu'të lë' na' gulaca. ¹² Cate' chibulu'tubë' yugu' bönni' gula'tu'zéajni'inë', gulún xtídzagaquië'. Ní'irö bulu'nódzjé' dumí zían quegaquië' bönni' na' rójáquië' gudil-la. ¹³ Të' légaquië':

—Caní innali: “Bila'dxinë' bönni' usëda queë' chi'i dzõ'ölö, en bulu'béajë' Lë' tsanni ni' rásitu'.” ¹⁴ Channö huayönnë' bönni' rinná bë'ë lë ni, netu' uzéajni'itu' lë', en guntu' ga biti' bi gunë' queëli'.

¹⁵ Ní'irö yugu' bönni' röjáquië' gudil-la na' gula'zi'ë dumí na' ate' yójéngaquië' ca na' chinazédagaquië'. Caní guca, tu'zë' bönni' judío didza' ni ga ridxintë na'a dza.

Jesús risöl-lë'ë yugu' bönni' gubáz queë'

(Mr. 16:14-18; Lc. 24:36-49; Jn. 20:19-23)

¹⁶ Ní'irö idxinéajtë' bönni' usëda queë' Jesús yójáquië' luyú Galilea, ate' bila'dxinë' lu gu'ado' na' chibuluí'inë' Jesús légaquië'. ¹⁷ Cate' bulu'lé'enë' Jesús, gula'yéaj ládxi'gaquië' Lë', pero bal-lë' gulaca chopa ládxi'gaquië'. ¹⁸ Ní'irö gubígui'ë Jesús ga na' nacu'ë, en rë' légaquië':

—Dios chinudödë' lu na'a yúgu'të yöl-la' unná bë' yehua' yubá, en luyú ni. ¹⁹ Que lë ni na', guli'tséaj, guli'tsöjsëdi yúgu'të bönachi idútë yödzölió. Buli'quíla légaquië' nisa, ugunli' dxin Lë' Dios Xuz, en Lë' Dios Zxi'ini, en Lë' Dios Bö' Lá'ayi. ²⁰ Guli'sëdi légaquië' ilunë' yúgu'të lë na' gunná bé'eda' libí'ili'. Buli'yútsöca', neda' caz zóalena' libí'ili' yúgu'të dza ga idxinrö dza údxi que yödzölió. Ca' gaca.

DIDZA 'DXI'A BUZÚAJĚ' MARCOS

Libán beně' Juan, bōnni' buquilě' bōnachi nisa

(Mt. 3:1-12; Lc. 3:1-9, 15-17; Jn. 1:19-28)

¹ Caní gusi lo didza' dxi'a ca guca queě' Jesucristo, Zxi'ině' Dios.

² Budxín lě na' buzúajě' lu guichi Isaias, bōnni' bě'ě didza' uláz queě' Dios, le gunně' Dios: Buyútsōca', risól-la'a bōnni' gubáz quia', inōruě' Lo'. Lě' upě'ě nōza ga tōdu'.

³ Yōn chi'ě tu bōnni' ulidzě' zidzaj lu lataj cá'asó, inně':

"Buli'pá'a nōza para idxín Xanru' yichaj lázxdo'oli'.

Buli'béaj li yugu' nōza lasi ga tōdě'."

⁴ Caní budxín, tu' ruquilě' Juan bōnachi nisa lu lataj cá'asó, en runě' libán para ila'dila bōnachi nisa, bōnni' na' bulu'bí'i ládxi'gaquiě' para uniti lahuě' Dios dul-la' nabága'gaquiě'.

⁵ Bila'rúaj bōnachi zían yúgu'tě yōdzó luyú Judea, enca' yōdzó Jerusalén, en yójáquiě' ga na' zoě' Juan, ate' Juan na' buquilě' légaquiě' nisa lu yegu Jordán, bōnni' na' gula'xóalépě' dul-la' nabága'gaquiě'.

⁶ Nácuě' Juan lari' néquini lítsa'ba' bōa', en núguě'ě lě'ě tu guídi. Rahuě'-ba' bōchi'zu, en rej'ě' le zxixi que buzdo'. ⁷ Runě' Juan libán, rnně':

—Si' zě'ě bōnni' tōdi na'a, náparě' yól-la' unná bě' ca neda'. Biti' naca' neda' lesaca' yéchuá', para ilecja' xiráchuě' nudě'ě. ⁸ Neda' ruquila' lib'íli' nisa, pero Lě' guně' le ruluf'isó yól-la' ridila nisa ni, uchíziě' lib'íli' Dios Bō' Lá'ayi.

Ridilě' Jesús nisa

(Mt. 3:13-17; Lc. 3:21-22)

⁹ Tu dza ni' birúajě' Jesús yōdzó Nazaret luyú Galilea, ate' Juan na' buquilě' Lě' nisa lu yegu Jordán. ¹⁰ Cate' burúajě' Jesús lu nisa, la' ná'asó bilé'eně' guyalaj lúzxiba, en ruhuótjě' Dios Bō' Lá'ayi, ruluf'í cuině' ca tuba' gu'dōdo', en bidisóaleně' Lě'. ¹¹ Biyōn chi'i nu ru'í didza' yehua' yubá, rna:

—Li' nacu' Zxi'ina'. Nadxi'ida' Li', en raza ládxa'a Li'.

Rě'eni tu' xihui' gun ga ibáguě'ě Jesús dul-la'

(Mt. 4:1-11; Lc. 4:1-13)

¹² Ní'iró Dios Bō' Lá'ayi guchě'ě Jesús bayudxi lu lataj cá'asó. ¹³ Guzóě' Jesús lataj cá'asó na' idú choá' dza, ate' gu'uni Satanás tu' xihui' gun ga ibáguě'ě Jesús dul-la'. Guzóě' Jesús ga ni' ta'daba' bōa' guixi' dzó'ōba' gu'ado'. Yugu' gubáz lá'ayi queě' Dios gulácaleně' Jesús, en gula'gu'ě le gudahuě'.

Rusédině' Jesús bōnachi luyú Galilea

(Mt. 4:12-17; Lc. 4:14-15)

¹⁴ Gudōdi gula'gu'ě Juan na' lidxi guíe, sa'yéajě' Jesús luyú Galilea. Runě' libán ni' que didza' dxi'a ca rinná bě'ě Dios. ¹⁵ Caní rnně':

—Chibidxín dza. Chizóa idinná bě'ě Dios. Buli'bí'i ládxi'li', en guli'tséajlě' didza' dxi'a ni.

Rulidzě' Jesús tapě' bōnni' uxzōn bōla

(Mt. 4:18-22; Lc. 5:1-11)

¹⁶ Tsanni ni' ridě' Jesús ra' nísado' luyú Galilea, bilé'eně' Simón len Andrés, bōnni' bōchě'ě Simón na'. Nácagaquiě' uxzōn bōla, en ta'chiljě' yōxaj bōla quégaquiě' lu nisa na'. ¹⁷ Jesús gudxě' légaquiě', rnně':

—Guli'dutá' neda', ate' guna' ga ichě'ěli' bōnachi quia' neda', gunli' ca runli' rizōnli'-ba' bōla.

¹⁸ La' bulu'cá' anatě' yōxaj quégaquiě', en sōjácaleně' Jesús.

¹⁹ Gudōdě' Jesús ia'láti'do' ní'llo, ate' bilé'eně' Jacobo, en Juan, yugu' zxi'ině' Zebedeo, nacu'ě lě'e bárcodo' quégaquiě', tu'úně' yōxaj bōla quégaquiě'. ²⁰ Jesús la' bulidztě' légaquiě', ate' bulu'cá'aně' xúzgaquiě' Zebedeo, dzáguíe' yugu' huen dxin queě' lě'e bárcodo' na', ate' sōjácaleně' Jesús.

Tu bōnni' yu'u lě' bō' xihui'

(Lc. 4:31-37)

²¹ Bila'dxině' Jesús, en yugu' bōnni' dá'gaquiě' Lě' lu yōdzó Capernaum. Cate' ni' naca dza lá'ayi quégaquiě' bōnni' judío, guyáziě' Jesús yu'u ga tu'dubě' bōnni' judío, en tu'sédě' queě' Dios, ate' gusi lahuě' rusédině' nupa nudúbigaca ni'. ²² Bulu'bánnině' ca na' rusédině' Jesús, tu' rusédině' ca runě' tu bōnni' dē lu nē'ě, en caléga ca tuně' bōnni' yudo' usédi. ²³ Zóatě' ca' tu

bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' gurödx'i'ë bönni' na', rnnë':

²⁴—¿Bizxi rál-la'tu' quiu', Jesús, bönni' Nazaret? ¿Za'tsu' usunítu' netu'? Núnbë'a Li', nacu' Bönni' Lá'ayi queë' Dios.

²⁵Jesús buzenë' le bach, rnnë':

—Busayaj ru'u, en burúaj lu bönni' ni.

²⁶Ní'irö bö' xihui' na' buxízida' bönni' na' yu'u lë', ate' gurödx'i'a zidzaj, en la' burúajté.

²⁷Bulu'bánninë' yúgu'të bönni' nacu'ë ni', ate' gula'nabi luzë'egaquië', ta'nnë':

—¿Bizxi caz lë ni? ¿Naru' nácatsö xibá cubí? ¡Len yöl-la' unná bë' rinná bé'enë' yugu' bö' xihui', ate' tun ca rnnë'!

²⁸La' guzëtë didza' que yöl-la' huáca queë' Jesús, ate' bila'yöni bönachi idütë luyú Galilea na'.

Ruúnë' Jesús xiná'anú nigula queë' Pedro

(Mt. 8:14-15; Lc. 4:38-39)

²⁹Ní'irö burúajë' Jesús lu yu'u ga na' tu'dubë' tu'sëdë' queë' Dios, en la' guyéajlentë Jacobo, en Juan, ate' bila'dxinë' lídxigaquië' Simón, en Andrés. ³⁰Ní' dënu xiná'anú nigula queë' Pedro, yú'unu tu xilá. La' gula'guíxjöi'itenë' Jesús ca raca queënu. ³¹Ní'irö gubígu'ië Jesús, ate' gudélë'ë ná'anú, en guchisë'-nu. La' burúajté tu xilá na' yú'unu, ate' bupá'anú le gulahuë'.

Ruúnë' Jesús zían nupa te'e

(Mt. 8:16-17; Lc. 4:40-41)

³²Cate' chiridzö', ca gudxía gubidza, la' dujuá'gacaté' yúgu'të nupa te'e, en yugu' bönni' yu'u légaquië' bö' xihui' ga zoë' Jesús. ³³Yúgu'të bönachi lu yödzo bila'guirö ga nu riyaza yu'u ga na' zoë' Jesús. ³⁴Jesús bunë' zían nupa te'e, naca zían yödzo huë' té'enë'. Bubéajë' ca' zían bö' xihui' yú'ugaca bönachi na'. Biti' bë'ë lataj ila'nnë bö' xihui' na' tu' núnbë'gaca Lë' Nu náquië'.

Runë' libán Jesús luyú Galilea

(Lc. 4:42-44)

³⁵Zí'acado' guyasë' Jesús, ni' naca chul-la. Burúajë' yödzo na', en sa'yéajë' tu lataj cá'asö, ate' ni' bulidzë' Dios. ³⁶Simón, en nupa nacuá'len lë' söjdíljagaquië' Jesús. ³⁷Cate' yójxáca'gaquië' Lë', té' Lë':

—Yúgu'të bönachi tu'guílaj Li'.

³⁸Ní'irö Jesús gudxë' légaquië', rnnë':

—Uyéajru' yugu' dzaga yödzo, para guna' ca' libán ni'. Que lë ni na' birúaja'.

³⁹Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sëdine' queë' Dios, ate' rubéajë' bö' xihui' yú'ugaca bönachi.

Tu bönni' ré'enë' huë' nudzu' ruzödi

(Mt. 8:1-4; Lc. 5:12-16)

⁴⁰Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxibë', en gúta'yüë' lahuë', rnnë':

—Channö rë'ënu', huáca unu' neda'.

⁴¹Jesús buéchi' ládxë'ë lë'. Bulí në'ë, gudanë' lë', en gudxë' lë':

—Rë'ënda'. Chinuhuóácu'.

⁴²Ca gunnë' ca', la' bunítitë huë' ré'enë', en böáquië' dxí'ado'. ⁴³Ní'irö Jesús buzenë' bach bönni' na', en la' busól-la'të' lë'. ⁴⁴Caní gudxë' lë':

—Cuntu nu guío' ca bena' quiu', pero guyéaj, yójlu'i' cuinu' lahuë' bixúz, en yójnödzej para le böácanu' li' que yudo' ca na' gunná bë'ë Moisés, lë na' ulu'i' bönachi chinuhuóácu'.

⁴⁵Burúajë' bönni' ni, en gusi lahuë' rigúxjöi'inë' bönachi zían ca guca queë'. Tu' buzë' didza' ni, bití'rö guca tsázíë' Jesús yálajdo' tu lu yödzo, pero guzóasë' ní'ilö gapa naca lu lataj cá'asö. Bönachi yúgu'të yödzo bila'dxin ga na' zoë' Jesús.

2

Bönni' ré'enë' huë' nacú unië' bin

(Mt. 9:1-8; Lc. 5:17-26)

¹Cate' chigudödi chopá tsonna dza, buázië' Jesús yödzo Capernaum, ate' guzë' didza' zoë' yu'u. ²La' bulu'dúbitë bönachi zían ga na' zoë' Jesús, ga bidxintë bití'rö guzxequi' ila'cuá' ni', ni ra' yu'u, ate' Jesús benë' libán que xtídzë'ë lógaquië'. ³Ní'irö bila'dxinë' ga na' zoë' Jesús tapë' bönni', nuá'agaquië' tu bönni' huë' nacú unië' bin. ⁴Biti' guca ila'dxinë' lahuë' Jesús tu' nacuá' bönachi zían ni'. Que lë ni na' gula'saljë' ícjo'olö ca dödílo ga zoë' Jesús. Cate' budxi

bulu'dxië' yeru na', ni' bulu'zõtjë' le denë' bönni' huë' na'. ⁵ Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Zxi'ina', chibunít lahua' li' ca naca dul-la' nabágu'u.

⁶ Rõ'õgaquië' bal-lë' bönni' yudo' usedi ni'. Ta'zá' ládxi'gaquië', ta'nnë': ⁷ ¿Bizx que ru'ë caní didza' bönni' ni? Rucá'anë' cá'asõ Dios. Cuntu nu bönni' gaca uniti lahuë' dul-la'. Tuzë' Dios gaca gunë' lë ni'. ⁸ La' gúquibe'etenë' Jesús le ta'zá' ládxi'gaquië', ate' gudxë' légaquië':

—¿Bizx que rizá' ládxi'li' caní? ⁹ Biti' naca bõniga nu guiésõ bönni' huë' ni chibunít lo dul-la' nabáguë'ë, pero naca bõniga nu gun ga huõásë', en u'ë le denë', en uzë'e ni'ë. ¹⁰ Guna' le gaca bë' neda', Bönni' Guljë' Bõnachi, dë lu na'a luyú ni uniti lahua' dul-la' nabága'gaca bõnachi.

Ní'irõ Jesús gudxë' bönni' huë' na':

¹¹ —Li' rea': Guyasa. Buá' le denu', en bõaj lidxu'.

¹² La' guyásatë' bönni' huë' na', bu'ë le gúti'në', en burúajë' lógaca yúgu'të nupa nacua' ni'. Bulu'bánninë' yúgu'të, en gula'gu'ë Dios yõl-la' ba, ta'nnë':

—Catu caz rilë'etu' le caní.

Jesús ruldzë' Leví

(Mt. 9:9-13; Lc. 5:27-32)

¹³ Burúajë' Jesús yõdzõ Capernaum, na' gudõdë' leyübölõ ra' nísado'. Bulu'dubi bõnachi zían ga zoë' Jesús, ate' Lë' busédinë' légaquië'. ¹⁴ Cate' ridõdë' Jesús ni', bilé'enë' Leví, zxi'inë' Alfeo, rõ'ë ga ruquíxjë' uláz que yõdzõ zi'tu'. Jesús gudxë' lë':

—Gudá' neda'.

La' guyásatë' Leví na', sa'yéajlenë' Jesús.

¹⁵ Gudõdi guca lë ni, rõ'ë Jesús rahuë' lu yu'u lidxë' Leví na', ate' zían bönni' uquízaxj, en ia'bal-lë' bönni' cá'asõ rõ'õlengaqueië' tsõzõxn Jesús, en yugu' bönni' usëda queë'. Caní guca, tu' rójaca bõnachi zían len Jesús. ¹⁶ Cate' yugu' bönni' yudo' usedi, en yugu' bönni' yudo' fariseo, bila'le'enë' Lë' rõ'ë ráguenë' tsõzõxn yugu' bönni' uquízaxj, en ia'bal-lë' bönni' cá'asõ, gulë' yugu' bönni' usëda queë' Jesús, ta'nnë':

—¿Bizxi caz runtsë'? ;Rë'aj ráguentsë' yugu' bönni' uquízaxj, en ia'bal-lë' bönni' dul-la'!

¹⁷ Biyõnnë' Jesús didza' ni tu'ë, en gudxë' légaquië':

—Nupa nacua' dxi'a bití' naquíniguequi nu un bõnachi, pero nupa te'e naquíniguequi nu un bõnachi. Za'a neda', calëga dulídzagaca' bõnachi tshahui', pero ruldzagaca' bõnachi dul-la' para ulu'bí'i ládxi'gaca.

Ru'ë Jesús didza' que yõl-la' run gubasa

(Mt. 9:14-17; Lc. 5:33-39)

¹⁸ Tu dza ni' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nná:

—¿Bizx que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, pero bönni' dá'gaquië' Li' bití' tunë' gubasa?

¹⁹ Bubi'ë didza' Jesús, rë' légaquië':

—¿Naru' réquitseli' ilún gubasa nupa nacua' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', bití' gaca ilunë' gubasa. ²⁰ Idxín dza cate' udúë' bönni' na' rutsaga në'ë, en bití'rõ sóalenë' légaquië', ate' dza ní'irõ ilunë' gubasa.

²¹ 'Cuntu nu bönni' udë'ë tu lari' cúbido' lu lari' chinatëbi, tu' utsupí' lari' cubi na', en huachõza' lari' tëbi na', ate' huarõza'rõ lari' tëbi na'. ²² Lësca' caní cuntu nu bönni' queë'ë xisi uva cubi lu buzudi bídxí néquini guídi, tu' gal-la xisi uva cubi na', en ulá'a buzudi bídxí na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

Bõnni' dá'gaquië' Jesús ta'lecjë' do dza lá'ayi

(Mt. 12:1-8; Lc. 6:1-5)

²³ Tu dza lá'ayi quégaquië' bönni' judío, gudõdë' Jesús gapa dë yõla xzoa' xtila, ate' bönni' usëda queë' gula'sí lógaqueië' ta'lecjë' do ga dxía xzoa' xtila. ²⁴ Ní'irõ bönni' yudo' fariseo gulë' Jesús, ta'nnë':

—Buyútsõca'. ¿Bizx que tunë' bönni' dá'gaquië' Li' le cabí ral-la' gunru' dza lá'ayi?

²⁵ Jesús gudxë' légaquië':

—¿Naru' cabí nulábanilí' ca benë' David cate' gudunë'? Biyadzaj le ilahuë' lë', en nupa nacua'len lë' ²⁶ ate' guyázië' lu yu'u queë' Dios cate' ni' náquie' bixúz lo Abiatar, en gudahuë' yõta xtila tu'cu'ë lahuë' Dios, lë na' bití' dë lataj nu gagu, pero tuz bixúz dë lataj ilahuë' le. Bë'ë ca' le ilahuë' bönni' nacua'lenë' lë'.

²⁷ Ní'irõ Jesús gudxë' légaquië':

—Dios benë' dza lá'ayi le ulu'zì' xibé bönachi, calëga benë' bönachi para ilún chi'i dza lá'ayi.
 28 Que lê ni na', neda', Bönni' Guljê' Bönachi, naca' Xani dza lá'ayi.

3

Ruúnë' Jesús tu bönni' narequi' në'ë

(Mt. 12:9-14; Lc. 6:6-11)

¹ Leyúbölö guyu'ë Jesús tu lu yu'u ga tu'dubë' tu'sédë' bönni' judío queë' Dios, ate' zoë' ca' ni' tu bönni' narequi' në'ë. ² Bönni' yudo' nacu'ë ni' tu'yúë' Jesús channö ünë' bönni' na' dza lá'ayi, tu' tē'ënnë' ulu'zégui'ë Lë' didza'. ³ Ní'irö Jesús gudxë' bönni' na' narequi' në'ë, rnnë':

—Guyasa, en guzuí lógaca bönachi ni.

⁴ Jesús gunábinë' bönachi ni', rnnë':

—¿Naru' dë' lataj gunru' le naca dxi'a cate' naca dza lá'ayi o gunru' le ruá' dö'? ¿Naru' dë' lataj gunru' ga ila'deli' bönachi yöl-la' na' bän o usunitiru' le?

Gula'cuá' dxisö bönachi ni'. ⁵ Ní'irö len yöl-la' rilé queë', buyúë' Jesús bönachi na' nacuá' gásibi'ilë'. Ruhuf'innë' tu' nácagaquië' zidi ladxi'. Gudxë' bönni' na' narequi' në'ë, rnnë':

—Bulí no'o.

Ní'irö bulí në'ë bönni' na', ate' bōacatë dxi'ado' në'ë. ⁶ Ní'irö bulu'rúajë' bönni' yudo' fariseo, ate' la' guluntë' tsözxón didza' len bönni' dá'gaquië' Herodes bi ilunë' queë' Jesús, para ilútië' Lë'.

Tu' dubi bönachi zían ra' nísado'

⁷ Buzë'ë Jesús ni' tsözxón len bönni' dá'gaquië' Lë', en bidxinë' ra' nísado', ate' sōjácalen Lë' bönachi zían narúajgaca luyú Galilea, en luyú Judea. ⁸ Bönachi zían narúajgaca Jerusalén, en luyú Idumea, en ia'tsólá'a yegu Jordán, en yugu' yödzo nacuá' idú gásibi'ilö ga nacuá' yödzo Tiro, en yödzo Sidón bila'dxin ca' ga zoë' Jesús. Caní gulunë', tu' bila'yönnë' ca nácagaca yugu' le zxón runë' Jesús. ⁹ Que lê ni na' Jesús gunná bé'enë' bönni' dá'gaquië' Lë' ulu'cóztica së' tu bárcodo' ga gaca cuenë', para cabí ulu'quí bönachi zían na' Lë'. ¹⁰ Caní guca tu' chibunë' zían nupa te'e, ate' bila'guirö bönachi zían na' ga zoë' para ila'gán Lë'. ¹¹ Cate' bö' xihui' yú'ugaca bönachi bila'lé'e Jesús, bulu'dxiga' bönachi na' yú'ugaca xini'ë Jesús, ate' gula'bōdxi'a, ta'nná: —Nacu' Lí' Zxí'inë' Dios.

¹² Jesús buzenë' le bach bö' xihui' na', cabí ila'guixjō' nu náquië' Lë'.

Ribōë' Jesús chinnu bönni' ilácagaquië' gubáz queë'

(Mt. 10:1-4; Lc. 6:12-16)

¹³ Ní'irö gurenë' Jesús tu lu gu'ado', ga ni' bulidzë' nupa rë'ënnë'. Gula'biguë'ë bönni' ni gásibi'ilë'. ¹⁴ Jesús bucu'ë chinnuë' bönni' ni, para ila'cuá'lenë' Lë', en para isól-lë'ë légaquië' tsōjéngaquië' libán. ¹⁵ Budödë' lu ná'agaquië' yöl-la' huáca ulu'ünë' nupa te'e, en ulu'béajë' bö' xihui' yú'ugaca bönachi. ¹⁶ Caní nácagaca lágaquië':

Simón, (buzōë' Jesús ia'tú lë', Pedro),

¹⁷ Jacobo,

Juan, (bönni' böchë'ë Jacobo, ate' nácagaquië' zxi'inë' Zebedeo. Chopë' ni, Jesús buzōë' ia'tú lágaquië', Boanerges, le rna lu didza' xidza': Bönni' sinia' ca guziú'),

¹⁸ Andrés, Felipe, Bartolomé, Mateo, Tomás,

Jacobo, (zxi'inë' Alfeo),

Tadeo,

Simón, (bönni' ru'í lãdxë'ë yödzo queë'),

¹⁹ Judas Iscariote, (bönni' udödë' Jesús lu ná'agaquië' bönni' ilútië' Lë').

Yugu' bönni' yudo' ta'nnë': "Tu' xihui' dzaga Jesús"

(Mt. 12:22-32; Lc. 11:14-23; 12:10)

Gudōdi ni' Jesús len bönni' dá'gaquië' Lë' bulu'dxinë' tu lu yu'u. ²⁰ Leyúbölö bila'guirö bönachi zían ga zoë' Jesús, ate' bití'rö guta' lataj bi ilahuë' Jesús, en bönni' na' dá'gaquië' Lë'. ²¹ Cate' dí'a dza queë' Jesús bila'yönnë' ca raca queë', bila'dxinë' ni' para ulu'chë'ë Lë', ta'nnë': Richixi icjë'.

²² Lë'sca' caní bönni' yudo' usedi, narúajgaquië' Jerusalén gula'nnë' queë', ta'nnë':

—Dzaga Belzebú, xángaca bö' xihui' Lë', ate' len yöl-la' unná bë' que rubéajë' yugu' bö' xihui'.

²³ Ní'irö Jesús bulidzë' yugu' bönni' yudo' usedi na', en bucúdzu'ë didza', rnnë':

—¿Naru' ubéaj la' cuinsi Satanás tu' xihui'? ²⁴ Channö ila'rúaj choplō bönachi tu yödzo, en ila'díl-lalen luz'é'eguequi, bití' gaca idía' yödzo na'. ²⁵ Lë'sca' caní channö ila'rúaj choplō bönachi nacuá' tu yu'u, en ila'díl-lalen luz'é'eguequi, bití' gaca ila'día' bönachi nacuá' yu'u na'. ²⁶ Que lê ni na', channö Satanás tu' xihui' tá'baga' luz'é'e, narúajgaca choplō bö' xihui'. Bití' gaca idía' yöl-la' unná bë' que, pero chizóa údxi que.

²⁷ 'Cuntu nu gaca tsu'u lidxë' tu bönni' nál-la, en cuéaj yöl-la' tsahui' queë' channö cabí gaga' zí'alö bönni' nál-la na', ate' ní'irö sequi' cuéaj le dzö'ö lidxë'.

²⁸ 'Le nácatë rea' libí'ili': Dios gaca uniti lahuë' bönnachi ca naca yúgu'të dul-la' nabága'gaca, en ca naca yúgu'të didza' schanni' ta'nná, ²⁹ pero nútí'tës nu innë schanni' queë' Dios Bö' Lá'ayi, catu caz uniti lahuë' Dios nu na'. Tsaz nabaga' xígúia' nu na'.

³⁰ Caní gunnë' Jesús tu' ta'nnë' queë' bönni' yudo' usedi na', ta'nnë':
—Tu' xihui' dzaga Lë'.

Nu naca xinë'ë Jesús, en bönni' böchë'ë
(Mt. 12:46-50; Lc. 8:19-21)

³¹ Ní'irö bila'dxinë' yugu' bönni' böchë'ë Jesús, enca' xinë'ë ga zoë'. Gula'cu'ë lö'alö, en gula'söl-lë'ë nu tsöjlidza Jesús. ³² Bönnachi zían na' rö'gaca cuitë' Jesús gulë' Lë', ta'nná:

—Yugu' bönni' böchu'u, enca' xinó'o nacu'ë lö'alö, tu'lidzë' Lí'.

³³ Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' böcha'a'?

³⁴ Ní'irö buyúë' nupa na' rö'gaca gásibi'ilë', rnnë':

—Buli'yútsóca'. Nupa ni nácacaga ca xiná'a, en yugu' bönni' böcha'a'. ³⁵ Nu run ca rë'ënë' Dios, nu ni naca ca bi'i böcha'a, en bi'i zana' enca' xiná'a.

4

Rucúdzu'ë didza' Jesús ca naca queë' bönni' guz
(Mt. 13:1-9; Lc. 8:4-8)

¹ Leyúbölä gusi lahuë' Jesús rusédinë' bönnachi ga naca ra' nísado'. Bulu'dubi bönnachi zían ga zoë', ate' gurenë' Jesús tu lë'e bárcodo' zxoa lu nisa na', en gurö'ë ni', ate' yúgu'të bönnachi na' gula'cuá' luyú ra' nisa na'. ² Zían le busédinë' Jesús légaquië', bucúdzu'ë didza'. Tsanni ni' rusédinë' légaquië', rnnë':

³—Guli'zé nágali' didza' ni. Birujáë' tu bönni' guz, söjësië' xisedo'. ⁴ Tsanni ni' rúsië', gulasi bal-la xisedo' na' ra' nöza, ate' bila'dxinba' biguínmido', gulë'ajba' le. ⁵ Gulasi ia'bal-la xisedo' na' ga rö'ö guíoj ga biti' rö'ö yenni' yu. Bayón gula'lén xisedo' na' tu' cabí rö'ö yenni' yu. ⁶ Ní'irö cate' gulén gubidza, buquexu' le, ate' gubidxi, tu' cabí nun luí ga rë'. ⁷ Gulasi ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lë na' bësië' biti' bi bunödzej. ⁸ Gulasi ia'bal-la xisedo' na' ga naca luyú bëbu, ate' gula'zõn, en xitsá' ra' gula'bö'. Bulu'nödzej lë na' bësië'. Tu dxigu' xisedo' na' bësië' bunödzej ia'chí uruá' xisedo' ca'. Ia'tú bunödzej ia'tsónnalalaj ca', ate' ia'tú na' bunödzej ia'tú gayuá' ca'.

⁹ Ní'irö Jesús gudxë' légaquië', rnnë':

—Nu zoa nagui, en riyöni ral-la' uzé nagui.

Rígúxjö'ë Jesús bizx que rucúdzu'ë didza'
(Mt. 13:10-17; Lc. 8:9-10)

¹⁰ Cate' chibugá'anë' tuzë' Jesús, bila'dxín nupa dá'gaca Lë' ga zoë', núngaca tsözxõn idxínnutë' bönni' uséda queë', ate' gula'nábinë' Lë' bi sa'yéaj lë na' bucúdzu'ë didza'. ¹¹ Jesús gudxë' légaquië', rnnë':

—Libi'ili' nadéli'li' tséajni'ili' le nagachi' ca rinná bë'ë Dios, pero nupa na' biti' nácacaga tuz len rë'u, ruí'lena' légaquië' didza' yugu' le rucúdzu'a didza'. ¹² Caní runa' para gaca lë na' nazúaj lu guichi lá'ayi, rnna:

Ulu'yúë', en biti' ila'lé'enë'.

Ulu'zë nágagaquië', en biti' ila'yéajni'inë'.

Biti' ulu'bi'i ládxí'gaquië' para gaca uniti lahua' légaquië' ca naca dul-la' nabága'gaquië'.

Rígúxjö'ë Jesús le bucúdzu'ë didza'
(Mt. 13:18-23; Lc. 8:11-15)

¹³ Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lë na' bucúdzu'a didza'? ¿Nacxi caz gaca tséajni'ili' ia'zica'rö le ucúdzu'a didza'? ¹⁴ Bönni' guz na' náquië' nu ruzé xtídzë'ë Dios.

¹⁵ Nácacaga bal-la bönnachi ca xisedo' na' gulasi ra' nöza. Ta'yönnë' xtídzë'ë Dios, en ca ta'yónisinë' ca', la' za'të Satanás tu' xihui', en rigúa didza' na' bidxín lu icja ládxí'do'gaquië'.

¹⁶ Nácacaga ia'bal-la bönnachi ca xisedo' na' gulasi ga rö'ö guíoj. Ta'yönnë' didza' na', ate' len yöl-la' rudzeja quégaquië' ta'zi'ë le. ¹⁷ Biti' riyaza icja ládxí'do'gaquië', ate' tu chí'isö ta'dë'ë le. Cate' bi raca quégaquië', o zoa nu ribía ládxí' légaquië' tu' ta'dë'ë didza' na', la' tu'huóatë ládxí'gaquië'.

¹⁸ Nácacaga ia'bal-la bönnachi ca xisedo' na' gulasi ga na' tu'lén lubá yötsi'. Ta'yönnë' didza' na', ¹⁹ pero tuí' ládxí'gaquië' le nácacaga que yödzólió ni. Nazí' yé'eguequinë'

tu' nadxi'iguequinë' yugu' yöl-la' tsahui', en ta'zë lãdxi'gaquië' yugu' le dë. Ta'yaza icja lãdxi'do'gaquië' yúgu'të lë ni, en tu'suniti didza' na', para cabí gun dxin lu icja lãdxi'do'gaquië'.

²⁰ Nácagaca ia'bal-la bõnachi ca xisedo' na' gulasi ga naca luyú bëbu. Ta'yõnnë' didza' na', en ta'zì' lu ná'agaquië' le, ate' run dxin lu icja lãdxi'do'gaquië'. Nácagaca bal-la bõnachi caní ca xisedo' na' bulu'nõdzaj ia'chí uruá' huéaj. Nácagaca ia'bal-lë' ca xisedo' na' bulu'nõdzaj ia'tsónnalalaj ca', ate' nácagaca ia'bal-la bõnachi ca xisedo' na' bulu'nõdzaj ia'tú gayuá' ca'.

Rucúdzu'ë didza' Jesús que tu le rigú'u beni'

(Lc. 8:16-18)

²¹ Jesús gudxë' ca' bõnni' dá'gaquië' Lë', rnnë':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu'u beni'. ²² Yúgu'të le nagachi' ilá' lahui, ate' yúgu'të le raca balándo'os ila'rúaj ga liná'. ²³ Nu zoa nagui, en riyõni ral-la' uzë nagui.

²⁴ Gudxë' ca' légaquië':

—Gulí'gúí' lãdxi'li' le riyõnili'. Ca naca le ruríxili', la' leze urixë' Dios queéli', ate' gunnë' queéli' ia'lati'. ²⁵ Nu nazí'i le za' que, gu'ë que ia'lati', pero nu bití' nazí'i le, la's dui le dë que, udúa.

Rucúdzu'ë didza' Jesús ca rizxõn zxoa' xtila

²⁶ Gunnë' ca' Jesús:

—Ca raca ni le rinná' bë'ë Dios naca ca raca cate' ruchejë' tu bõnni' zxoa' xtila lu yu. ²⁷ Ch'i dzõ'ólõ rásie', en riyasë' cate' za' rení'. Ta'lén zxoa' xtila na', en ta'zxõn, pero bití' nõzinë' lë' nacxi raca ta'zxõn. ²⁸ La' cuinsi luyú na' ruxõn le nadúzgaca luyú na', zí'alõ xiyazi, ní'rõ za' do que, en tõdi na' cuía xui'i nál-la lu do que. ²⁹ Cate' chinal-la xui'i na', la' tséajtë' tsõjchibë' do na' tu' chibidxín dza uzi'ë xui'i.

Rucúdzu'ë didza' Jesús ca raca que xisé mostaza

(Mt. 13:31-32; Lc. 13:18-19)

³⁰ Gunnë' ca' Jesús:

—¿Bizxi caz innaru' ca raca ni le rinná' bë'ë Dios? ¿Bizxi ucúdzu'ru' didza' ca raca? ³¹ Raca ca raca que tu xisedo' mostaza. Cate' riyaza luyú naca tu xisedo' nácatë'rõ cuidí' ca yúgu'të xisedo' dzõ'õ luyú, ³² pero cate' chinadúz, rilén, en rizxõntë'rõ ca yúgu'të guixi' cuan rõ'gaca luyú. Tsa run yana' ní'a në'e, gaca ila'dxinba' biguinnido', en ulu'dxiaba' xicá'agacaba' lu zxul-la que.

Ca rugunë' dxin Jesús le rucúdzu'ë didza'

(Mt. 13:34-35)

³³ Caní guca, busedinë' Jesús légaquië', en zianró ca' le bucúdzu'ë didza' tsa guca ila'yéajni'inë'. ³⁴ Yúgu'të didza' bë'lenë' bõnachi bucúdzu'ë didza', ate' yúgu'të didza' ni buchila lá'anë', buzéajni'inë' légasë' bõnni' usëda queë'.

Jesús ribequi dxí'ë bö' budunu'

(Mt. 8:23-27; Lc. 8:22-25)

³⁵ La' dza ná'asõ, cate' ridzõ', Jesús gudxë' yugu' bõnni' dá'gaquië' Lë', rnnë':

—Tõditsõca'ru' ia'tsõlá'a nísado' ni.

³⁶ Ní'rõ bulu'lá'alënë' bõnachi zían nacuá' ni', ate' bulu'së'ë bãrcodo' ga na' chizõasë' Jesús. Gula'cuá' ca' ni' ia'zica'rõ bãrcodo' sõjácálen légaquië'. ³⁷ Gusí lo recja bö' budunu' lu nisa na', ate' gudá'a nisa lë'e bãrcodo' na'. Ca' guca, zeaj ridzá' nisa lë'e bãrcodo' na'. ³⁸ Dë' rásie' Jesús lu xicügüë' ga naca xitsá'alõ lë'e bãrcodo' na', ate' bulu'subanë' Lë'. Të' Lë':

—¿Bõnni' Usedi! ¿Naru' cabí ruí'i lãdxi'tso' netu'? ¡Huáti caztu' lu nisa ni!

³⁹ Ní'rõ guyasë' Jesús, en gunná' bé'enë' bö' na' recja, gunnë':

—Gurõ'õ dxi.

Gudxë' ca' nisa na', gunnë':

—Dxisõ guzóa.

Gurõ'õ dxi bö' na' guyecja, en guzóa dxi lu nísado' na'. ⁴⁰ Ní'rõ Jesús gudxë' yugu' bõnni' dá'gaquië' Lë', rnnë':

—¿Bizx que radxi ridzõbili' caní? ¿Naru' cabí réajlë'ëli' Dios?

⁴¹ Ní' tãdxinë' gulë' luzë'ë tuë' ia'túë':

—¿Nuzxi caz bõnni' ni? ¡Tun bö' recja, en nísado' ca rnna xtídzë'ë!

5

Bõnni' Gadara yu'u bö' xihui' lë'

(Mt. 8:28-34; Lc. 8:26-39)

¹ Ní'irö bila'dxinë' Jesús, en yugu'bönni' dá'gaquië' Lë' ia'tsölá'a nísado' ga naca lu xiyúgaca bönnachi Gadara. ² Cate' burúajë' Jesús lë'e bárcodo' na', tu bönni' rirúajë' zcan bulóaj ga nacua' yeru ba la' dutságatë' Lë'. Bönni' ni yu'u bö' xihui' lë', ³ ate' nun xilatjë' ga na' nacua' yeru ba. Cuntu nu guca guga' bönni' na', calëga len du guié'. ⁴ Zíán luzuí' bulu' zóë' bregui' guié' yen në'ë, en ni'ë, en gulúgui'ë lë' du guié'. Yugu' du guié' na' bul'ë'ë, ate' bregui' guié' na' guditsjë'. Biti' rizéqui'në' nu bönni' inná bé'enë' lë'. ⁵ Ridática'së' ribódx'i'ë rëla, en të dza ga na' nacua' yeru ba, en gapa naca lu guí'ado', run huë' cuinë' yugu' lu guió'j dzó'ö ni'. ⁶ Cate' bilé'enë' zë'ë zi'tu' Jesús, guxít'i'ë guyjje' ga na' zë'ë, ate' buzóa zxi'bë' lahuë' Lë'. ⁷ Bë'ë zidzaj didza', rë' Jesús:

—¿Bizxi ral-la'a quiu' Jesús, Zxí'inë' Dios nayëpisëtërë'? Ní'a queë' Xanru' Dios ráta'yua' lo', bit'i' usaca' zi'u neda'.

⁸ Caní' gunnë' bönni' na' tu' chigudxë' Jesús bö' xihui' na':

—Li', bö' xihui', burúaj lu bönni' ni.

⁹ Jesús gunábinë' le, rnnë':

—¿Bi leu'?

Bubí'i didza' le, gudxi Lë':

—Lea': Le Zíán, tu' ró'ö ziantu'.

¹⁰ Gula'nabi yechi' yugu' bö' xihui' na' Jesús para cabí isól-lë'ë léguequi zi'tu' luyú ni'.

¹¹ Nacuá'aba' cuchi zían lu guí'ado' ní'isó, ta'daba' táguba' ni'. ¹² Gula'nabi yechi' bö' xihui' na' Jesús, ta'nná:

—Gusól-la' netu' ga ni' dzó'öba' cuchi zían. Bë' netu' lataj tsójt'sú'ugacatu'-ba'.

¹³ La' bë'të' Jesús léguequi lataj, ate' bila'rúaj bö' xihui' na', en yójt'sú'ugaca cuchi zían na', ate' gula'xít'i'ba' cuchi zían na', yójbixigacaba' ga naca ra' guí'a, yójbixigacaba' nísado'. Lu nísado' na' gula'yëpiba' nisa, gulátiba', en nácagacaba' ca galaj gayuá'aba'.

¹⁴ Ní'irö bulu'zunnaj nupa ni' gulún chí'i cuchi zían na'. Yójt'ixjói'igüequinë' bönnachi lu yódzó ni', enca' bönnachi nacua' la' guixi' ni'. Bila'rúaj bönnachi lu yódzó, söjyúgaquië' bizxi na' guca ni'. ¹⁵ Cate' bila'dxinë' ga ni' zoë' Jesús, bila'lë'ë' bönni' na' zí'aló yú'ugaca bö' xihui' lë'. Bönni' ni ró'ë ni', nácuë' lari', en zoë' dxí'ado', ate' guladxi bönnachi na'. ¹⁶ Nupa na' bila'lë'ë le benë' Jesús gula'guixjói' bönnachi na' bila'rúaj lu yódzó ca na' guca queë' bönni' na' zí'aló yú'ugaca bö' xihui' lë', enca' ca guca quégacaba' cuchi na'. ¹⁷ Ní'irö gula'sí lógaca bönnachi zían na' ta'ta yu lahuë' Jesús urúajë' lu xiyúguequi.

¹⁸ Cate' bubenë' Jesús lë'e bárcodo', bönni' na' zí'aló yú'ugaca bö' xihui' zían lë', gúta'yue' lahuë' Jesús gu'ë lë' lataj tséajlenë' Lë'. ¹⁹ Jesús bit'i' bë'ë lë' lataj, pero gudxë' lë':

—Böaj lidxu'. Yójt'ixjói' di'a dza quiu' yugu' le zxon' bena' quiu' neda', naca' Xanu', en ca bena' buëchi' ládxa'a lí'.

²⁰ Sóhuöjë' bönni' na', en ruzë' didza' yugu' yódzó Decápolis ca nácagaca le zxon' benë' Jesús queë', ate' bulu'bani yúgu'të bönnachi nacua' yugu' yódzó ni'.

Bi'i nigula queë' Jairo, en nigula na' gudannu lari' nácuë' Jesús

(Mt. 9:18-26; Lc. 8:40-56)

²¹ Cate' budxinë' Jesús ia'tsölá'a nísado' na', ní'irö bulu'dubi bönnachi zían ga na' zoë' ra' nísado'. ²² Bönni' lë' Jairo, bönni' rinná bë'ë lu yu'u ga tu'dubë' bönni' judío, en nazëdë' queë' Dios, bidë' ga zoë' Jesús. Cate' bilé'enë' Jesús, buzóa zxi'bë' lahuë', ²³ en gúta'yue' lahuë', rnnë':

—Chiraqui gátibi' bi'i nigúlado' quia'. Gudá ixóa no'o lëbi' para huóácabi', en bit'i' gátibi'.

²⁴ Sa'yéajlenë' Jesús lë', ate' bönnachi zían söjácalen Jesús, tu'quiró Lë'. ²⁵ Tu nigula, chinaca chinnu iz ré'enu, zóanu ca' ni'. Biti' ruhuí' rón queënu que huë' quégaca cázanu nigula.

²⁶ Yenni' chigudí' guzxacánu lu ná'agaquië' zían bönni' tu'ünë' bönnachi. Nítisó chibutónu dëra le dë queënu, tu' cabí bi'gúcalen lënu, pero riyali' queënu. ²⁷ Cate' biyóninu tu'í didza' bönnachi ca naca queë' Jesús, gudódinu ládjaló bönnachi zían na', en bidxinnu zaca' cúdzu'lë' Jesús, en gudannu lari' nácuë'. ²⁸ Caní'bennu tu' rnnanu: "Channó cansa' le nácuë', huóáca'."

²⁹ La' buí'të rón queënu, ate' réquibe'enu chibóácanu que le guca queënu.

³⁰ La' gúquibe'etenë' Jesús ben dxin yól-la' huáca queë', ate' buécjë', ruyúë' bönnachi zían na'. Rnnë':

—¿Nuzxi na' gudán neda'?

³¹ Ní'irö bönni' dá'gaquië' Lë' të' Lë', ta'nnë':

—Rilé'e quézinu' bönnachi zían ni tu'quiró Li', en rnnatso': "¿Nuzxi na' gudán neda'?"

³² Ruyúë' Jesús gásibi'lë' para ilé'enë' nuzxi na' gudán Lë'. ³³ Ní'irö nigula na' gubíga'nu lahuë'. Rádxinu, en rizxízinu tu' chinózinu bi na' guca queënu, ate' buzóa zxi'binu lahuë' Jesús, en gúdxinu Lë' idútë le nácatë. ³⁴ Jesús rë'ë-nu:

—Nigúlado'. Chibóácu' tu' réajlé'u neda'. Böaj lidxu' idú ládXu'u. Tsaz nuhuóácu' que le guca quiu'.

³⁵ Tsanni ni' ru'è caní didza' Jesús, bönni' narúajgaquiè' lidxè' bönni' na' rinná bē'è lu yu'u ga tu'dubè' tu'sèdè' queè' Dios bila'dxnè' ni', en té' bönni' na':

—Chigútibi' bi'i nigúlado' quiu'. Bítirō upíxjanu' Bönni' Usedi.

³⁶ Bítirō bē' lādxè'è Jesús lē na' ta'nnè', ate' gudxè' bönni' unná bē' na', rnnè':

—Bítirō gádxinu'. Guyéajlè' èsè' Dios.

³⁷ Bítirō bē' è lataj Jesús tsójacalen Lē' ia'zica'rō bönachi, pero légasasè' Pedro, en Jacobo, en Juan, böchē'è Jacobo na'. ³⁸ Cate' bidxinè' lidxè' bönni' na' rinná bē'è ga tu'dubè' tu'sèdè' queè' Dios, bilé'enè' raca dzatsa, enca' nupa ni' ta'bödxí, en nupa ta'bödxí yechi'. ³⁹ Guyáziè' Jesús, en gudxè' légaquiè':

—¿Bizx que rutsátsali', en ribödxili' caní? Bítirō nátibi' bi'i nigúlado' ni. Rásisibi' na'.

⁴⁰ Ní'irō bulu'titjè' Jesús, pero Lē' bubéajè' yúgu'tè bönachi na' ní'ilo, ate' guchè'è xuz xiná'abi' bi'i nigúlado' na', enca' nupa nacua'len Lē', ate' guyáziè' ga na' dèbi'. ⁴¹ Gudélé'è ná'abi' bi'i nigúlado' na', en gudxè'-bi':

—Talita, cumi.

Didza' hebreo ni' rna lu didza' xidza': Bi'i nigúlado', guyasa. ⁴² La' guyásatèbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacua' ni'. ⁴³ Ní'irō Jesús gunná bē'enè' légaquiè' cuntu nu ulu'siyönnè' lē na' guca. Gudxè' légaquiè':

—Gulí'gúí' le gágubi' bi'i nigúlado' ni.

6

Ridxinè' Jesús Nazaret, le naca ladzè'

(Mt. 13:53-58; Lc. 4:16-30)

¹ Buzè'è Jesús ni', budxinè' ladzè', ate' yugu' bönni' dá'gaquiè' Lē' sójacalenè' Lē'. ² Cate' bidxín dza lá'ayi quégaquiè' bönni' judío, gusí lahuè' Jesús rusédinè' bönachi ga na' tu'dubè' tu'sèdè' queè' Dios. Gula'cuá' bönachi zían ni' ta'yöni Lē'. Bulu'bani, ta'nná:

—¿Gazxi caz bizédè' bönni' ni yugu' lē ni? ¿Bizxi caz yöl-la' réajni' ni nadéli'nè'? ¿Nacxi caz runè' le nácagaca bē' na' zá'gaca yehua' yubá? ³ Náquiè' bönni' ni gubèdxi yaga na', en xzí'ininu María. Náquiè' böchi'gaquiè' Jacobo, en José, en Judas, en Simón. Nigula zanè' nacua'lennu ca' rē'u.

Que lē ni na' bulu'cá'anè' Lē' cá'asö. ⁴ Ní'irō Jesús gudxè' légaquiè', rnnè':

—Gátitès tunè' bal nu bönni' ru'è didza' uláz queè' Dios, pero bönachi uláz queè', en bönachi di'a dza queè', en bönachi nacua' lidxè' bitirō tun lē' bal.

⁵ Que lē ni na' bitirō guca gunè' Jesús nitú yöl-la' huáca zxon ni'. Bunsè' nabábasö bönachi te'e cate' guxóa nē'è léguequi. ⁶ Bubáninè' Jesús tu' cabí ta'yéajlè' Lē'. Gudödi na' gudöde' yugu' yödzódo' nacua' gásibi'ilo, rusédinè' bönachi ni'.

Risöl-lè'è Jesús bönni' dá'gaquiè' Lē' tsójéngaquiè' libán

(Mt. 10:5-15; Lc. 9:1-6)

⁷ Ní'irō bulidzè' Jesús idxínnutè' bönni' dá'gaquiè' Lē', en gusí lahuè' risöl-lè'è légaquiè' chopa huéajgaquiè'. Budödè' lu ná'agaquiè' yöl-la' unná bē' ulu'béajè' yugu' bö' xihui' yú'ugaca bönachi. ⁸ Gunná bē'enè' légaquiè' bitirō bi' ilu'è la' nōza, caléga yōxaj, caléga yōta, en caléga dumí bitirō ila'gu'è lu buzudi quégaquiè', pero ilu'asè' xiyágado'. ⁹ Ral-la' ulu'dè'è xiráchugaquiè', pero caléga chopa larí' ulu'xóa yéngaquiè'. ¹⁰ Gudxè' ca' légaquiè':

—Gátitès ga tsú'uli' tu yu'u, guli'sóa yu'u na' cate' uzá'aróli' yödzo na'. ¹¹ Channö tsú'uli' tu yödzo ga bitirō ilún bönachi lu yödzo na' libí'ili' bal, en bitirō ulu'zè' nágagaquiè' xtídza'li', buli'rúaj ni', en buli'quinnaj bëchtö da' lē'e lálali'. Lē ni gaca bē' nabága'gaquiè' xigua'. Le nácate' rea' libí'ili', cate' idxín dza ichúgué' Dios quégaca bönachi, ila'gui' ila'záca'rō bönachi lu yödzo na' ca ila'gu'i ila'zaca' bönachi Sodoma, en Gomorra, yugu' yödzo na' busunité' Dios.

¹² Ní'irō bila'rúajè' bönni' dá'gaquiè' Lē', yójéngaquiè' libán ca ral-la' ulu'bí'í lādxí'gaca bönachi. ¹³ Bulu'béajè' zían bö' xihui' yú'ugaca bönachi. Gula'gu'è le za zían nupa te'e, ate' bulu'huóáquiè'.

Ca bétigaquiè' Juan, bönni' buquilè' bönachi nisa

(Mt. 14:1-12; Lc. 9:7-9)

¹⁴ Biyönnè' Herodes, bönni' unná bē', ca naca le runè' Jesús, tu' rizè' didza' gátitès que yöl-la' huáca queè'. Bal-la bönachi ta'nná:

—Chibubanè' Juan, bönni' ni' buquilè' bönachi nisa, lu yöl-la' guti. Que lē ni na' napè' yöl-la' huáca runè' yugu' lē ni.

¹⁵ Ia'bal-la bönachi ta'nná:

—Náquiè' Elías, bönni' bē'è didza' uláz queè' Dios dza ni'te.

Ia'bal-la bönachi ta'nná:

—Náquiè' bönni' ru'è didza' uláz queè' Dios ca guláquiè' bönni' gulu'è didza' uláz queè' dza ni'te.

¹⁶ Cate' biyönnë' Herodes yugu' lë ni, gunné':

—Naquië' Juan, bönni' na' burixa' yenë'. Chibubanë' lu yöl-la' guti.

¹⁷ Caní gunné' Herodes tu' gusöl-lë'ë lë cazë' bönni' yöjxongaquië' Juan na', ate' gulúguië' lë' du guié' lu yu'u lidxi guié. Caní benë' Herodes tu' rilenu Herodías Juan na'. Nácanu nigula na' gúcanu nigula queë' Felipe, böché'ë Herodes na'. Herodes gudüë'-nu Herodías na', en butsağa ná'alenë'-nu. ¹⁸ Juan na' gudxë' Herodes:

—Biti' ral-la' sóalenu'-nu nigula queë' böchu'u.

¹⁹ Que lë ni na' gusi gurö'önu Herodías. Gú'uninu bi gunnu queë' Juan, tu' gú'uninu gútinu lë', pero biti' bi guzxë'qui'nu ²⁰ tu' rádxinë' Herodes Juan. Nözinë' náquië' Juan na' tsahui', en lá'ayi. Que lë ni na' gudapa chi'ë lë', en buzë náguië' lë' idú ládxë'ë sal-la' lë na' rnnë' Juan ben ga gurö'ë böniga Herodes na'. ²¹ Ní'irö bidxin tu' dza guzxë'qui'nu Herodías na', le naca dza runë' Herodes laní que dza guyë'enë' iz. Bupë'ë le ilë' aj ilahuë' bönni' dë lu ná'agaquië' uláz queë', en bönni' ta'nná bé'enë' bönni' rójáquië' gudil-la, enca' bönni' nácağaquië' lo luyú Galilea. ²² Guyázabi' bi'í nigula queënu Herodías ga na' tē'aj tahuë', en buyá'abi' lógaquië'. Guyaza ládxë'ë Herodes ca runbi', en gula'yaza ládxí'gaca ca' nupa tē'aj tágulen lë'. Ní'irö Herodes gudxë'-bi' bi'í nigula na', gunné':

—Gunaba bi rē'ënu' gunna' quiu', ate' guna' ca'.

²³ Benë' tsutsu xtídzë'ë, gudxë'-bi':

—Ní'a queë' Xanru' Dios gunna' quiu' bití'tës bi inabu' ga idxintë gatsaj ga rinná bē'a.

²⁴ Burúajbi' lëbi', ate' gunábabi' xiná'abi':

—¿Bizxi inábatsa'?

Lënu gúdxinu-bi':

—Icjë' Juan, bönni' buquilë' bönnachi nisa, inabu'.

²⁵ La' buázatëbi' ga na' zoë' Herodes, en rëbi'-në':

—Rē'ënda' ixú' quia' na'a lu zxiga' zxon icjë' Juan, bönni' na' buquilë' bönnachi nisa.

²⁶ Ní'irö bu'innë' Herodes, pero tu' buzötjë' Dios, en tu' bila'yöni ca' nupa tágulen lë', biti' gú'unnë' iníti xtídzë'ë na' guzxi' lu nē'ë queëbi'. ²⁷ Herodes lá' gusöl-la'të tu' bönni' rejë' gudil-la zoë' rapa chi'ë, ate' gunná bé'enë' lë' tsöjxi'ë icjë' Juan. ²⁸ Bönni' na' rejë' gudil-la guyijë' lidxi guié, yöjrixë' yen Juan na', ate' bu'ë icjë', nuxóë' le tu lu zxiga' zxon. Budödë' le lu ná'abi' bi'í nigula na', ate' lëbi' bunódzjabi' le queënu xiná'abi'.

²⁹ Cate' bönni' dá'gaquië' Juan na' bila'yönnë' didza' chiguca lë na', bila'dxinë' ni', en bulu'ú'ë lë', ate' yöjçáchi'gaquië' lë' yeru ba.

Rugahuë' Jesús zíanró ca chi-un gayuá' bönnachi

(Mt. 14:13-21; Lc. 9:10-17; Jn. 6:1-14)

³⁰ Gudödi ni' bulu'dubë' bönni' gubáz queë' Jesús ga zoë', en gula'guixjöi'inë' Lë' yúgu'të le gulunë', en yugu' le bulu'sëdinë' bönnachi. ³¹ Nacuá' bönnachi zían ni', nupa zá'gaca, en nupa söjaca, ga bidxintë bití'rö dë lataj ilahuë' Jesús, en yugu' bönni' dá'gaquië' Lë'. Que lë ni na' Jesús gudxë' légaquië', rnnë':

—Gulí'dá. Uyëaj cazaru' ga naca lataj cá'asö, en uzí' ládxi'ru' tu chi'í.

³² La' légasasë' yöjáquië' ni', en núnbë'gaca Jesús. Que lë ni na' bönni' yúgu'të yödzö ni' carelö yöjáquië' ni'. Gula'zë'e n'agaquië', ate' bila'dxinë' ni' zí'atëlö ca Jesús, en yugu' bönni' dá'gaquië' Lë'. ³⁴ Cate' burúajë' Jesús lë'e bárcodö' na', bilé'enë' bönnachi zían na', ate' buéchi' ládxi'ë légaquië' tu' nácağaquië' ca bö'cu' zxíla'do' bití' zoa nu gapa chi'í légaçaba'. Gusi'lahuë' rusëdinë' légaquië' le zían. ³⁵ Cate' chiridzö' dza na', yugu' bönni' dá'gaquië' Jesús bila'dxinë' ga zoë', en tē' Lë':

—Chiridzö', ate' lataj cá'asö naca ni. ³⁶ Busöl-la' bönnachi zían ni para tsöjaca yugu' yú'udo', en yugu' yödzödo' nacuá' gási'bilö, tsöjög'ugaca yöta, tu' cabí bi dë ni le ilagu.

³⁷ Bubi'ë didza' Jesús, gudxë' légaquië':

—Gulí'gü'í libí'í cázali' le ilahuë'.

Gulé' Lë':

—¿Naru' tsöjö'utsatu' yöta xtila len lászjatu' que idú xunu' beo', ate' gü'ítu' le ilahuë'?

³⁸ Jesús gudxë' légaquië':

—¿Bal-laxi yöta xtila dë queëli? Gulí'tsöjyútsöca'.

Cate' chinöziguequinë', tē' Lë':

—Gáyu'sö yöta xtila dë, en chópasöba' böla dëba'.

³⁹ Ní'irö gunná bé'ë Jesús ilunë' ga ila'bö' bönnachi zían na', ila'cuá' tu cö' huéajguequi ga naca lachi' lu daca'. ⁴⁰ Gula'cu'ë tu cö' huéajgaquië', tu gayuá' huéajgaquië', en chi-un huéajgaquië'. ⁴¹ Ní'irö gudélë'ë Jesús igáyu'të yöta xtila na', en irópaba' böla na'. Buyüë' zaca' lúzxi'ba, en gudxë' Dios: "Xclenu'." Ní'irö buzuzxjë' yöta xtila na', en bé'ë quégaquië' bönni' uséda queë' para ila'guisië' quégaca bönnachi zían na'. Gudísië' ca' irópatëba' böla na' quégaca

yúgu'tè bönachi na'. ⁴² Gulahuë' yúgu'tè', en bulu'huöljanë'. ⁴³ Ní'irö bulu'tubë' le bizxaj que yöta xtila na', en quegacaba' böla, ate' chinnu ga'böra bulu'lié'. ⁴⁴ Guláquië' ca chi-un gáyu'ë bönni' na' gulahuë'.

Rizë'e ni'ë Jesús lu nísado'
(Mt. 14:22-27; Jn. 6:16-21)

⁴⁵ La' bentë' Jesús ga gula'benë' yugu' bönni' dá'gaquië' Lë' lë'e bárcodo', para ila'nöruë' lahuë', ila'dödë' lu nísado' na', para ila'dxinë' lu yödzo Betsaida, tsanni ni' Lë' rusöl-lë' bönachi zían na' lídxiguequi. ⁴⁶ Cate' chibudxi busöl-lë' légaquië', guvijë' tu lu guí'ado', ate' ni' ruí'ilenë' Dios didza'. ⁴⁷ Cate' chizá' ral-la, zeaj bárcodo' na' gatsaj láhui'ló nísado', ate' zoë' Jesús tuzë' luyú bidxi na'. ⁴⁸ Bilé'enë' Jesús légaquië', böniga tu'së'ë bárcodo' na' tu recja bö' za' ga na' ta'dödë'. Gudödi guluhuëla bidxinë' Jesús ga na' nacu'ë, rizë'e ni'ë lu nísado' na', ate' gu'unnë' tödisë' ga na' nacu'ë. ⁴⁹ Cate' bila'lé'enë' Lë' rizë'e ni'ë lu nísado', guléquinë' bixín na', ate' gula'bödxí'ë ⁵⁰ tu' bila'lé'enë' yúgu'tè' Lë', en guladxi gula'dzöbinë'. Ní'irö la' bulidztë' Jesús légaquië', rnnë':

—Buli'tipa ládxi'li'. Neda' caz. Biti' gádxili'.

⁵¹ Gurenë' Jesús lë'e bárcodo' ga na' nacu'ë, ate' gurö'ö dxi bö' na' recja, ate' légaquië' gula'niti gula'tíqui'sinë' bulu'báininë'. ⁵² Biti' ta'yéajni'ininë' le rulu'i'í lë na' benë' Jesús que yöta xtila na'. Ní' naca zidi icja ládxi'do'gaquië'.

Ruúnë' Jesús nupa te'e lu yödzo Genesaret
(Mt. 14:34-36)

⁵³ Gula'dödë' Jesús, en yugu' bönni' dá'gaquië' Lë' ia'tsolá'a nísado', ate' bila'dxinë' ga naca lu xiyúgaca bönachi Genesaret. Bulu'dxiguë'ë bárcodo' luyú bidxi ni'. ⁵⁴ Cate' bulu'ruajë' lë'e bárcodo' na', la' bulu'únbë'të bönachi ni' Jesús. ⁵⁵ Gula'xiti' bönachi na', yójaca yúgu'tè yödzo'do' idú gásibi'ló, en gula'sí légaquië' dujuá'agaquië' yúgu'tè nupa te'e ga zoë' Jesús, xzóagaca yugu' le déguequini, ate' bila'dxinë' gáti'tës ta'yönnë' zoë' Jesús. ⁵⁶ Gáti'tës ga ridödë' Jesús, yugu' lu yödzo'do', en yugu' yödzo' xzön, en yugu' yú'udo', tu'cu'ë nupa te'e quegaquië' gapa naca la' nöza, en gapa naca lu yë'ëyi, en ta'tá'yue' lahuë' Jesús gu'ë légaquië' lataj ila'gansë' luzxi lari' nácuë'. Yúgu'tè nupa na' bila'gán lari' nácuë' bulu'huóacaté dxí'ado'.

7

Le tun ga biti' náca gaca bönachi tsahui' lahuë' Dios
(Mt. 15:1-20)

¹ Ní'irö bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús. ² Bönni' yudo' ni bila'lé'enë' bönni' usëda queë' Jesús tahuë' yöta, biti' nuchí'agaquië' ná'agaquië', lë na' rna: Biti' nayárigaca ca nalëbiguequinë' tunë' bönni' yudo' na'. Que lë ni na' gula'nnë' quegaquië'. ³ Yugu' bönni' yudo' fariseo na', en ia'zica'rö bönachi judío tunë' ca gulëbiguequinë' gulunë' xuz xtó'ogaquië', ate' channö cabí ta'guíbi ná'agaquië' zían luzuí ca na' nalëbiguequinë' tunë', biti' ca' tahuë'. ⁴ Cate' tu'dxinë' röj'ó'ugaquië' lu yë'ëyi, channö cabí ta'guibë' lë na' ca nalëbiguequinë' tunë', biti' ca' tahuë'. Zíanrö ca' tunë', yugu' le nalëbiguequinë' tunë'. Caní ta'guibë' xziga' yó'öna, en yugu' xziga' guíë, en yugu' le táti'në'. ⁵ Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nnë':

—¿Naru' cabí tunë' yugu' bönni' usëda quiu' ca gulëbiguequinë' gulunë' xuz xtó'oru', pero tahuë' yöta biti' nuchí'agaquië' ná'agaquië'?

⁶ Bubi'ë didza' Jesús, rë' légaquië':

—Libi'ili', bönni' rulu'isö tsahui' cuinli'. Nácatë le gudíxjö'ë Isaías, bönni' ni' bë'ë didza' uláz queë' Dios, ca naca queë'li'. Buzúajë' lu guichi, gunné':

Yugu' bönni' ni, len rú'agacasë' tunë' neda' bal, calëga idú ládxi'gaquië'.

⁷ Níti'sö naca yöl-la' ba ta'gu'ë neda' tu' tu'sëdinë' le ta'nná bë' bönachi, calëga xibá quia'.

⁸ Caní naca, tu' rucá'anali' le gunná bë'ë Dios, ate' runli' yugu' le nazí' láhuili' lu ná'agaca bönachi.

⁹ Gudxë' ca' légaquië':

—Idú ládxi'li' rucá'anali' cá'asö le gunná bë'ë Dios para gunli' ca naca le nulaga loli' runli'. ¹⁰ Moisés gunné' caní: “Ben bal xuz xinó'o.” Gunnë' ca: “Nu ulidza zi' xuzi o xinë'e, guli'gútitë nu na'.” ¹¹⁻¹² Libí'ili' rnnali' caní: “Channö nu bönni' guíë' xuzë' o xinë'ë: Biti' gaca bi gunna' queë'li', tu' naca Corbán.” (Didza' ni rna lu didza' xidza': Tu' nuzóa' quez queë' Dios yúgu'të.) Ní'irö rnnali': “Biti' run bayudxi bi gunë' bönni' na' quegaquië' xuz

xinë'ë." ¹³ Caní naca, rucá'anali' cá'asö xtídzë'ë Dios para gunli' le nulaga loli' runli', yugu' le ruddótili' lu ná'agaca xzí'ini xí'sóali'. Ziánrö ca' le caní runli'.

¹⁴ Ní'irö Jesús bulidzë' bönni' zían na' nacu'ë ni', en rë' légaquië':

—Guli'zë nágalí' didza' gu'a, yúgu'téli', en guli'tséajni'. ¹⁵ Biti' bi dë le riyaza nu bönni' le gaca gun ga bití' náquië' tsahui' lahuë' Dios, pero le rirúaj lë', lë ni gaca gun ga bití' náquië' tsahui' lahuë' Dios. ¹⁶ Channö zoa nágalí', en riyónili', buli'zë nágalí'.

¹⁷ Cate' Jesús bulá'alenë' bönnachi zían na', guyu'ë tu yu'u, ate' yugu' bönni' usëda queë' gula'nábinë' Lë' ca naca lë na' bucúdzu'ë didza'. ¹⁸ Jesús gudxë' légaquië':

—¿Riyádzjatsö ca' queëli' yöl-la' réajni'i? ¿Naru' cabí réajni'ili', yúgu'të le riyaza nu bönni', bití' gaca gun ga bití' náquië' tsahui' lahuë' Dios? ¹⁹ Naca caní tu' cabí riyaza icja ládxi'da'ahuë', pero lë'ësë' riyaza, ate' rurúaj lë'ë.

Tu' gunnë' caní Jesús, buluí'inë' rë'u naca dxi'a yúgu'të le rë'aj ráguru'. ²⁰ Gunnë' ca' Jesús:

—Le rirúaj lu bönni' run ga bití' náquië' tsahui' lahuë' Dios. ²¹ Caní naca, tu' ta'rúaj icja ládxi'do'gaquië' bönni' yugu' le ta'zá' ládxi'gaquië' le naca xihui', yugu' le tun ga tunë' dul-la' ta'guitsjë' xibá que yöl-la' nutsaga na', en yugu' le ruá' dö'. Tun ga tútië' bönnachi, ²² en ta'banë', en ta'zë' ládxi'gaquië' le dë que luzá'agaquië', en tu'ë dö', en ta'zí' yë'ë, en tu'zxë'ë, en ta'nná zí'ë que luzá'agaquië', en tun ba zxon' cuíngaquië', en tunë' le canöz. ²³ Yúgu'të le xihui' caní ta'rúaj icja ládxi'da'ahuë' nu bönni', en tun ga bití' náquië' tsahui' lahuë' Dios.

Tu nigula izá'a réajlë'ënu Jesús

(Mt. 15:21-28)

²⁴ Buzë'ë Jesús ni', ate' bidxinë' gala' ga nacuá' yödzo Tiro, en yödzo Sidón. Guyázië' tu yu'u ni', en gú'unnë' cuntú nu inózi, pero bití' ca' guca ucachi' cuinë'. ²⁵ Tu nigula zóabi' bi'i nigúlado' queënu, yu'u bö' xihui' lëbi', biyönninu didza' rizë ca naca queë' Jesús, ate' la' bidatënu ga zoë' Jesús, en buzóa zxíbinu xini'ë. ²⁶ Nigula ni bití' nácanu judío, pero nabábanu bönnachi Sirofenicia. Gúta'yunu lahuë' Jesús ubéajë' bö' xihui' na' yu'u-bi' bi'i nigúlado' queënu. ²⁷ Ní'irö Jesús gudxë'-nu, rnnë':

—Bë' lataj ulu'huölaj zí'alö nupa nácacaga ca xzí'ini xan yu'u, tu' cabí naca dxi'a ugúaru' yóta'quegacabi' bi'i na', en chú'unaru' le lógacaba' bö'cu'do'.

²⁸ Bubi'inu didza' nigula na', gúdxinu Jesús:

—Ön, Xan, pero yugu' bö'cu'do' nacuá'aba' zxani ga tágubi', táguba' le bizxaj tu'huóxaj ga na' tágubi'.

²⁹ Ní'irö Jesús gudxë'-nu, rnnë':

—Tu' gunnó' caní, huáca huóaju'. Chiburúaj bö' xihui' na' guyú'u-bi' bi'i nigúlado' quiu'.

³⁰ Cate' budxinnu lídxinu, bilé'enu-bi' bi'i nigúlado' queënu na', dëbi' lu da'a, en chinurúaj bö' xihui' na' guyú'u lëbi'.

Jesús ruínë' tu bönni' nacödzuë', en bití' gaca innë'

³¹ Burúajë' Jesús lataj na' nababa yödzo Tiro, ate' gudödë' gapa dë yödzo Sidón, en yugu' yödzo Decápolis, ate' bidxinë' ra' nísado' lu xiyú Galilea. ³² Bönnachi ni' dujuá'gaca tuë' bönni' nacödzuë', en bití' raca innë' ga zoë' Jesús, ate' ta'ta'yu lahuë' Jesús ixóá në'ë lë'. ³³ Jesús bubéajë' lë' tsólá'alö ládjacaga bönnachi na', ate' bunë'ë xibön në'ë yeru náquië' bönni' na'. Gurú'unë' zxon' do', en gudanë' lúdxë'ë. ³⁴ Ní'irö buyúë' lúzxbíalö, en gunnë' ládxe'ë, rnnë':

—Efata.

Didza' hebreo ni rRNA lu didza' xidza': Gualaj.

³⁵ La' bóaljatë náquië', en la' buguítjatë lúdxë'ë, en gunnë'të' dxi'ado'. ³⁶ Jesús gunná bé'enë' légaquië' cuntú nu ilë' ca', pero tsca gunná bé'enë' légaquië', bulu'zëtërë' ca' didza' que lë na' benë'. ³⁷ Bulu'bánninë, ta'nnë':

—Tsáhu'i do' runë' yúgu'të. Runë' ga tu'yöni nupa gulaca cödzu, en ga tu'í didza' nupa bití' guca ila'nnë.

8

Rugahuë' Jesús ziánrö ca choá' gayuá' bönnachi

(Mt. 15:32-39)

¹ Yugu' dza na' bulu'dubi bönnachi zían ga zoë' Jesús. Tu' cabí dë le ilágugaca, Jesús bulidzë' bönni' usëda queë', ate' bé'lenë' légaquië' didza'. ² Gudxë' légaquië':

—Ruhuechi' ládxa'a bönnachi zían ni tu' chinaca tsonna dza nacuá'len neda' ni, en bití' dë le ilágugaca. ³ Channö usól-la' a léguëqui lídxigaca ta'dunsö ca', huala'cuídi' la' nöza, tu' zá'gaca zí'tu' bál-lagaca.

⁴ Bulu'bi'ë didza' bönni' usëda queë', të' Lë':

—¿Bizxi ugágutsaru' bönnachi guíxzi yu ni, ga ni naca lataj cá'asö?

⁵ Gunábinë' Jesús légaquië', rnnë':

—¿Bál-laxi yöta xtila dë queéli'?

Të' Lë':

—Gádxisö.

⁶Ní'irö Jesús gunná bé'enë' bönachi zían na' ila'bó' lu yu. Gudélë'ë gadxi yöta xtila na', ate' gudxë' Dios: "Xclenu." Ní'irö buzxuzxjé' léguequi, en bé'ë queégaquië' bönni' usëda queë' para ila'guisië' lógaca bönachi zían na'. ⁷Guta' ca' queégaquië' tu chópaba' böla cuidi'. Jesús gudxë' Dios: "Xclenu", ate' gunná bé'enë' légaquië' ila'guisië' ca' légacaba' lógaca bönachi. ⁸Gulagu yúgu'të bönachi na', en bulu'huöla. Ní'irö bulu'tubë' le bizxaj nagá'anagaca, ate' gula'lí idú gadxi ga'böra. ⁹Bönachi na' gulagu gulaca idú ca choá' gayuá'gaca. Jesús busöl-lë' léguequi lídxigaca, ¹⁰ate' gurenë' lë'e bárcodo' tsözxön len yugu' bönni' usëda queë', ate' bila'dxinë' lu xiyúgaca bönachi Dalmanuta.

Ta'nábinë' Jesús gunë' tu le gaca bé' nuzxi náquië'

(Mt. 16:1-4; Lc. 12:54-56)

¹¹Ní'irö bila'dxinë' bönni' yudo' fariseo ga zoë' Jesús, en gula'sí lógaquië' ta'díl-lalenë' Lë' didza'. Gulë'ënnë' ila'z'í' bé'ë Jesús. Que lë ni na' gula'nábinë' Lë' gunë' tu le naca bé' za' yehua' yubá. ¹²Gunnëda' ládxë'ë Jesús, rnnë':

—¿Bizx que ta'nábitsö bönachi ni neda' guna' tu le naca bé' za' yehua' yubá? Le nácatë rea' libí'ili', bití' ca' ilé'eli' tu le naca bé' za' yehua' yubá.

¹³Ní'irö bulá'alenë' légaquië'. Bubenë' lë'e bárcodo', en sa'yéajë' ia'tsólá'a nísado'.

Le tu'sëdinë' bönni' yudo' naca ca cúa zi que yöta xtila

(Mt. 16:5-12)

¹⁴Gulal-la ládx'igaquië' bönni' usëda queë' Jesús ilu'ë bi ilahuë', ate' tuz yöta xtila dë lë'e bárcodo' na'. ¹⁵Ní'irö Jesús buzéajni'inë' légaquië', rnnë':

—Buli'yútsöca' queéli'. Guli'gún chi'i cuinli' para cabí sí'ili' le naca ca cúa zi que yöta xtila queégaquië' bönni' yudo' fariseo, en queë' Herodes.

¹⁶Gula'sí lógaquië' tu'ë didza' bönni' usëda queë' la' légacasë', ta'nnë':

—Gunnë' caní tu' cabí dë yöta xtila gáguru'.

¹⁷Réquite'enë' Jesús le ta'nnë', ate' rë' légaquië':

—¿Bizx que ruf'ili' caní didza' tu' cabí dë yöta xtila gáguru'? ¿Naru' cabí réajni'itseli', en bití' réquite'itseli'? ¿Ni nácatsö zidi icja ládx'i do'oli'? ¹⁸¿Zóatsö guió'j loli', en bití' rilé'eli', en zóatsö guídi nágali', en bití' riyónili'? ¿Naru' cabí röjnëtseli'? ¹⁹Cate' ni' buzxuzxja' gayu' yöta xtila, ate' gulahuë' chi-un gáyu'ë bönni', ¿bál-laxi ga'böra bulili' le bizxaj butúbili'?

Gula'nnë':

—Chinnu.

²⁰Gunnë' ca' Jesús:

—Cate' ni' buzxuzxja' gadxi yöta xtila, ate' gulagu choá' gayuá' bönachi, ¿bál-laxi ga'böra bulili' le bizxaj butúbili'?

Gula'nnë':

—Gadxi.

²¹Ní'irö Jesús gudxë' légaquië':

—¿Naru' cabí réajni'itseli' na'a, bé'a didza' que le tu'sëdinë' bönni' na'?

Jesús ruúnë' bönni' Betsaida nachul-la lahuë'

²²Cate' Jesús, en bönni' dá'gaquië' Lë' bila'dxinë' yödzö Betsaida, bila'dxín ga zoë' Jesús nupa dujuá'gaquië' queë' tu bönni' nachul-la lahuë'. Ta'tá'yuë' lahuë' canë' bönni' na'.

²³Jesús gudélë'ë në'ë bönni' na' nachul-la lahuë', ate' guchë'ë lë' ní'ílo ra' yödzö. Ni' budxië' zxóna' guió'j lahuë', en guxó'a në'ë lë'. Ní'irö gunábinë' lë', rnnë':

—¿Ba rilé'enu' lati'?

²⁴Buyúë' bönni' na' nachul-la lahuë', rnnë':

—Rilé'egacada' bönachi, nalá'gaca ca yugu' yaga, pero ta'dá bönachi na'.

²⁵Leyúbólö guxó'a në'ë Jesús guió'j lahuë', ate' buyúde'ë bönni' na' nachul-la lahuë', ate' böacaté dxf'ado' guió'j lahuë'. Na'a rilé'enë' dxf'ado' yúgu'të. ²⁶Ní'irö Jesús gusól-lë'ë lë' lídxë', rnnë':

—Bití' tsöjdödu' lahui' yödzö, en cuntu nu guío' le bena' nu zoa lu yödzö ni.

Rnnë' Pedro: "Jesús náquië' Cristo"

(Mt. 16:13-20; Lc. 9:18-21)

²⁷Gudödi na', bulu'zë'ë Jesús, en yugu' bönni' usëda queë' ni', ate' gula'dödë' yugu' yödzödo' nabábagaca Cesarea, ga na' rinná bé'ë Filipo. Tsanni ni' yú'ugaquië' nóza, Jesús rinabi yudxë' yugu' bönni' usëda queë', rnnë':

—¿Nuzxi ta'nná bönachi naca'?

²⁸Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-la nacu' Elías, bönni' bē'ē didza' uláz queē' Dios dza ni'te. Ta'nná ia'bal-la nacu' bönni' yübölö bē'ē didza' uláz queē' Dios dza ni'te.

²⁹ Ní'irö Jesús gunábinë' légaquië', rnnë':

—Nazxi libí'ili, ¿nuzzi rnnali' naca'?

Bubi'ē didza' Pedro, rnnë':

—Li' nacu' Cristo.

³⁰ Ní'irö Jesús gunná bé'enë' légaquië' cuntu nu ulu'siyönnë' Nu náquië'.

Riguáxjö'ē Jesús ca si' ilútië' Lë'

(Mt. 16:21-28; Lc. 9:22-27)

³¹ Ní'irö gusi lahuë' Jesús rusédinë' bönni' dá'gaquië' Lë', rnnë':

—Run bayudxi qui'i saca'a neda', Bönni' Guljë' Bönachi. Bönni' gula tu'zéajni'inë', en yugu' bixúz unná bē', en bönni' yudo' tu'sédinë' ulu'zóë' neda' tsólá'alö. Ilútië' neda', pero cate' gaca tsonna dza ubana'.

³² Yálajsö bē'lenë' légaquië' didza' ni. Ní'irö Pedro guchë'ē Jesús tsólá'alö, en gusi lahuë' ridil-lë' lë' didza'. ³³ Buécjë' Jesús, en buyúë' ia'zica'rë' bönni' usëda queë', ate' buzenë' bach Pedro, rnnë':

—Gucuita ga zoa'. Nacu' ca Satanás, tu' xihui'. Le rizá' ládXu'u biti' za' lu nē'ē Dios, pero ca ta'zá' ládxi'gaca bönachi naca.

³⁴ Ní'irö Jesús bulidzë' yugu' bönni' usëda queë', enca' bönachi nacua' ni', en gudxë' légaquië':

—Channö rē'enë' nu bönni' tē'ē neda', ral-la' uzóë' tsólá'alö le rē'ēni quezinë', en gáquië' ca tu' bönni' sa'yéajë' sōjtë'ē lë'e yaga cruz, ate' ní'irö huáca tē'ē neda'. ³⁵ Nu bönni' ruí'ida' ládXë'ē yöl-la' na'bán queë', unítie' le, pero nu bönni' unítie' yöl-la' na'bán queë' tu' dē'ē neda', o tu' dē'ē didza' dxi'a quia', udelí'në' bönni' ni yöl-la' na'bán queë'. ³⁶ ¿Naru' uzi'tsë' xibë tu bönni' channö utubë' yúgu'të le dë yödzölió ni, pero uniti cuinë'? ³⁷ Biti' bi gaca unödzjë' tu bönni' le huó'ui cuinë'. ³⁸ Channö zoë' nu bönni' rutuf'inë' quia' neda', en que xtídz'a a lógaca bönachi ni nucá'anagaca Dios, en tun dul-la', lë'sca' caní neda', Bönni' Guljë' Bönachi, utuí'ida' queë' bönni' na' cate' guídalená' yöl-la' huáca zXön queë' Xuza', ate' dzágagaquië' gubáz lá'ayi neda'.

9

¹ Jesús gudxë' ca' légaquië', rnnë':

—Le nácatë rea' libí'ili', nacua' ni nupa biti' ilátigaca cate' ila'lé'erö idinná bē'ē Dios luyú ni, en ilá' lahui yöl-la' huáca zXön queë'.

Ridzá'a ca riná' lahuë' Jesús

(Mt. 17:1-13; Lc. 9:28-36)

² Cate' chigudödi xopa dza, Jesús guchë'ē Pedro, en Jacobo, en Juan, ate' légacasë' yöjáquië' tu lu gu'a sibi. Ní' bidzá'a ca riná' lahuë' Jesús lógaquië' yonnë' na'. ³ Guyëpi yösa bení' lari' nacué' Jesús, ate' guca chiguíchido'os. Zxíla'do'os guca, le cuntu nu ra' lari' yödzölió ni gaca gun chiguíchido'os ca guca lari' na'. ⁴ Bulu'lu'i lógaquië' Elías, en Moisés, tu'ílenë' Jesús didza'. ⁵ Ní'irö Pedro gudxë' Jesús:

—Bönni' Usedi, bica' ba rë'u zóaru' ni. Gúntsöca' tu' tsonna yu'u lága'do', tu quíu', ia'tú queë' Moisés, en ia'tú queë' Elías.

⁶ Caní gunné' Pedro tu' cabí nözinë' bi na' rnnë', tu' tádxinë' bönni' usëda queë' Jesús na'.

⁷ Ní'irö gurö'ö böaj le gulú'u zXul-la légaquië', ate' biyön chí'i nu ruí'ida' lu böaj na', rRNA:

—Bönni' ni Zxí'ina'. Nadxí'ida' Lë'. Buli'zë nágali' Lë'.

⁸ La' bulu'yuté' pero cünturú nu ta'lé'enë'. Tuzë' Jesús zóalenë' légaquië'.

⁹ Tsanni ni' yú'ugaquië' nöza, tu'dínnië' lu gu'a sibi na', Jesús gunná bé'enë' légaquië' cuntu nu ulu'siyönnë' ca', lë na' bila'lé'enë', cate' ubanrë' lu yöl-la' guti Lë', Bönni' Guljë' Bönachi. ¹⁰ Que lë ni na' gula'gú'usë' ícjagaquië' didza' ni bē'ē, ate' la' légacasë' ta'nabi yúdxinë' luzá'agaquië' bizxi sa'yéaj didza' na' bē'ē, gunnë' ubanë' lu yöl-la' guti. ¹¹ Gula'nábinë' Jesús, ta'nnë':

—¿Bizx que ta'nnë' bönni' yudo' usedi run bayudxi guídë' Elías zí'alö ca guídë' Cristo?

¹² Bubi'ē didza' Jesús, rnnë':

—Le nácatë guídë' Elías zí'alö, en ucu'ē yúgu'të ca ral-la' gaca. Na'a, ¿bizxi sa'yéaj le nazúaj lu guichi rRNA run bayudxi qui'i sáquë'ē Bönni' Guljë' Bönachi, ate' cá'asö ulu'cá'ana bönachi Lë'? ¹³ Rea' libí'ili': Chibidë' Elías, ate' gulunë' queë' tsca gulë'ennë', tsca nazúaj lu guichi lá'ayi ca ral-la' gaca queë'.

Jesús ruúnë'-bi' bi'i bönni' yu'u lëbi' bö' xihui'

(Mt. 17:14-21; Lc. 9:37-43)

¹⁴ Cate' ni' bulu'dxinë Jesús, en bönni' dzágagaquië' Lë' ga na' nacu'ë ia'zica'rë' bönni' usëda queë' Jesús, bila'lé'enë' nacuá' bönachi zían ni', ate' bönni' yudo' tu'sédinë' ta'díl-lalenë' yugu' bönni' usëda queë' na' didza'. ¹⁵ Cate' bönachi zían na' bila'lé'e Jesús, bulu'bani, en carelò zá'gaca ga na' zé'ë, dijödxi'gaca Lë': "Padiux."

¹⁶ Ní'irò Jesús gunábinë' yugu' bönni' usëda queë' na', rnnë':

—¿Bizxi didza' na' ridíl-lalenli' légaquië'?

¹⁷ Bubi'ë didza' tu bönni' nútsë'ë ladaj bönachi zían na', rnnë':

—Bönni' Usedi, nachë'a-bi' bi'i bönni'do' quia' ni quiu', yu'u lëbi' bö' xihui' le run ga biti' raca innëbi'. ¹⁸ Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidi' ruá'abi', en rutil-la láya'bi'. Que lë ni na' zeaj ridxítabi'. Gunábicacada'-në' bönni' usëda quiu' ulu'béajë' bö' xihui' na', pero biti' gula'zéqui'në'.

¹⁹ Bubi'ë didza' Jesús, rnnë':

—Libi'ili', bönni' cabi ta'yéajlë'ë. ¿Gáca'xte caz ral-la' sóalena' libi'ili'? ¿Gáca'xte caz ral-la' guá' ilena' queëli'? Guli'diguá'-bi' quia' ni.

²⁰ Dujú'ágaquië'-bi' ga na' zoë' Jesús. Cate' bö' xihui' na' bilé'e Lë', la' buxizité lëbi'. Gudzö'öbi' lu yu, ate' burixi butula lëbi', ate' bidxía bidxina' zidi' ruá'abi'. ²¹ Ní'irò Jesús gunábinë' xúzibi' bi'i na', rnnë':

—¿Gáca'xi chiguca raca caní queëbi'?

Rnnë' xúzibi' na':

—Ní' nácatebi' bí'ido' ré'ebi' caní. ²² Zían luzuí rirú'una lëbi' lu guí', en lu nisa para guti lëbi'. Que lë ni na', channò racu' lati', buéchi' ladxí' netu', gácalenu' netu'.

²³ Jesús gudxë' lë':

—Channò huáca tséajlë'u, yúgu'të huáca channò tséajlë'u Dios.

²⁴ La' bë'të' zidzaj didza' xúzibi' bi'i na', rnnë':

—¡Réajlë'a! ¡Gúcalen neda' para tséajlë'ëra' Lë'!

²⁵ Cate' bilé'enë' Jesús zá'gaca bönachi zían, tu'quí Lë', buzenë' bach bö' xihui' na', rë' le:

—Lí', bö' xihui' runu' ga biti' raca inná, en biti' raca yöni bönachi, rinná bé'eda' lí' uruju' lu bi'i ni, en biti'rò tsu'u lëbi'.

²⁶ Gurödxi'a bö' xihui' na', en burixi butúlada' bi'i na'. Ní'irò burúajtë, en buca'ana bi'i na' ca bi'i nati cázabi'. Ca' naca, gulu'i didza' bönachi zían ni', ta'nná:

—Chinátibi'.

²⁷ Ní'irò Jesús gudélë'ë ná'abi', en buchisë'-bi', ate' guzuíbi' bi'i na'.

²⁸ Ní'irò guyázië' Jesús tu yu'u, ate' la' légacasë' gula'nábinë' bönni' usëda queë' Lë', ta'nnë':

—¿Bizx que biti' guca ubéajtu' netu' bö' xihui' na'?

²⁹ Jesús gudxë' légaquië':

—Biti' gaca ubéajli' cá'asö bö' xihui' caní, pero tuz channò ulídzali'-në' Dios, en gunli' gubasa.

Jesús rigúxjō'ë leyúbölö ca si' ilútië' Lë'

(Mt. 17:22-23; Lc. 9:43-45)

³⁰ Cate' bulu'zë'ë Jesús, en yugu' bönni' dá'gaquië' Lë' ni', gula'dödë' luyú Galilea. Biti' rë'ënë' Jesús nu inözi ga na' zoë' ³¹ tu' rusédinë' yugu' bönni' usëda queë'. Rë' légaquië':

—Ulu'dödë' neda', Bönni' Guljë' Bönachi, lu ná'agaquië' bönni' ilútië' neda', pero tödi gátia', cate' gaca tsonna dza ubana'.

³² Biti' gula'yéajni'inë' didza' ni rë' légaquië', ate' tu' tádxinë', biti' bi gula'nábinë' Lë'.

Nu naca lo

(Mt. 18:1-5; Lc. 9:46-48)

³³ Ní'irò Jesús, en bönni' dá'gaquië' Lë' bila'dxinë' yödzo Capernaum, ate' tsanni ni' nacu'ë lu yu'u, Jesús gunábinë' légaquië', rnnë':

—¿Bizxi didza' na' gudíl-lalen luzá'ali' cate' ni' yú'uli' nöza?

³⁴ Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nöza ni' núzxilógaquië' gáquië' bönni' lo. ³⁵ Ní'irò gurö'ë Jesús, en bulidzë' idxinnutë' bönni' usëda queë'. Rë' légaquië':

—Nu rë'ëni gaca lo ral-la' gaca ca tu bönni' cuídí'sö, enca' ca ni'a ná'ali' yúgu'tëli'.

³⁶ Ní'irò Jesús gudélë'ë-bi' tubi' bí'ido', en buzöë'-bi' gatsaj láchui'lö ga na' nacu'ë. Ní' runidë'-bi', rë' légaquië':

³⁷ —Nu bönni' si' lu në'ë tu bí'ido' caní tu' néquibi' quia', si' lu në'ë ca' neda', ate' nu bönni' si' lu në'ë neda', calëga neda'sö si' lu në'ë, pero si' lu në'ë ca' Xuza', Bönni' na' nasöl-lë'ë neda'.

Nu biti' ridá'baga' rë'u, rácalen rë'u

(Mt. 10:42; Lc. 9:49-50)

³⁸ Ní'irò Juan gudxë' Jesús:

—Bönni' Usedi, bilé'etu'-në' tu bönni' rubéajë' yugu' bô' xihui', rugunë' dxin lo'. Gunná bé'etu' lë' bití'rô gunë' ca', tu' cabí dë'ë rë'u.

³⁹ Ní'irô Jesús gudxë' lë':

—Bití' inná bé'eli'-në', tu' channô zoë' nu bönni' runë' tu yöl-la' huáca le za' yehua' yubá, en rugunë' dxin La' neda', bití' ca' gaca bönni' na' innë' zí'ë quia'. ⁴⁰ Caní naca, nu bití' ridá' бага' rë'u, rácalen nu na' rë'u. ⁴¹ Núti'tës nu gunna queé'li' tu zxíga'do' nisa guí'jali' tu' dá'ali' neda', Cristo, si' i caz nu na' le ral-la' gata' que.

Zoa bônadxi queëru' gunru' ga nu gun dul-la'

(Mt. 18:6-9; Lc. 17:1-2)

⁴² Gunnë' ca' Jesús:

—Núti'tës nu gun ga gunbi' dul-la' tubi' bí'ido' caní réajlë'ëbi' neda', gácarô dxi'a ugal-la' nu na' guichi riyëtu yaga yeni, en tsöjchú'una cuini lu nísado'. ⁴³ Channô tu no'o gun ga gunu' dul-la', guchugu le. Dxi'arô gaca quiu' tsöjtsázíu' ga su' ibanu' zoa tuz no'o, caléga zoa chopa no'o, ate' tsöjtsázíu' lu guí' gabila, ga ní' bití' ulu guí' que. ⁴⁴ Lataj ní' bití' ilátiba' buzuga' yú'ugacaba' nupa tsöjcuá' ní', ate' guí' na' bití' ca' ulu. ⁴⁵ Lésca' caní, channô tu ní'u gun ga gunu' dul-la', guchugu le. Gácarô dxi'a quiu', tsöjtsázíu' ga su' ibanu' zoa tuz ní'u, caléga zoa chopa ní'u, ate' tsöjtsázíu' lu guí' gabila, ga ní' bití' ulu guí' que. ⁴⁶ Lataj ní' bití' ilátiba' buzuga' yú'ugacaba' nupa tsöjcuá' ní', ate' guí' na' bití' ca' ulu. ⁴⁷ Lésca' caní, channô tu guí'oj lo' gun ga gunu' dul-la', guléaj le. Gácarô dxi'a quiu' tsöjtsázíu' ga rinná bé'ë Dios zoa tuz guí'oj lo', caléga zoa chopa guí'oj lo', ate' tsöjtsázíu' lu guí' gabila. ⁴⁸ Lataj ní' bití' ilátiba' buzuga' yú'ugacaba' nupa tsöjcuá' ní', ate' guí' na' bití' ca' ulu.

⁴⁹ Ruxi'iru' béla' zôdi', en rugála'ru' le ra' guí', para cabí gaca ditaj. Lë ni rusedi rë'u ca ulu'huóaca dxi'a yúgu'të bônachi. Lésca' caní, ré'ënë' Dios izxí'i zôdi' yúgu'të bôa' bédxido' tu zéguí'gaquië'-ba' lu bucugulá'ayi queë'. ⁵⁰ Dxi'a naca zôdi', pero channô iníti yöl-la' síná'a que, ¿nacxi ú'niru' le síná'a? Guli'gaca la' libí'isili' ca zôdi' dxi'a, sóali' dxi'ado' tuli' len ia'tuli'.

10

Rusëdinë' Jesús que nu rulá' yöl-la' nutsaga na'

(Mt. 19:1-12; Lc. 16:18)

¹ Buzë'ë Jesús yödzo Capernaum, ate' guyijë' luyú Judea, en gudödë' ia'tsolá'a yegu Jordán saca' ga rilén gubidza. Bulu'dubi leyúbólô bônachi zían ga zoë', ate' leyúbólô busëdinë' légaquië' ca run cazë'. ² Ní'irô bila' dxinë' bönni' yudo' fariseo ga zoë' Jesús, ate' té'ënnë' ilunë' ga bí' innë' Jesús para gaca ulu'zéguië' Lë' didza'. Gula'nábinë' Lë', ta'nnë':

—¿Dë lataj bönni' nutsaga në'ë usané'-nu nigula queë'?

³ Bubi'ë didza' Jesús, rnnë':

—¿Bixzi gunná bé'enë' Moisés libí'ili'?

⁴ Gula'nnë':

—Moisés bé'ë lataj nu bönni' uzúajë' lu guichi le rnna rulá'alenë'-nu nigula queë' na', ate' ní'irô usané'-nu.

⁵ Bubi'ë didza' Jesús, rnnë':

—Gunná bé'enë' Moisés libí'ili' caní tu' naca zidi icja lácxi'do'oli', ⁶ pero cate' gusí lo rata' yödzólió, Dios benë' légaquië' bönni', en nigula. ⁷ Gunnë': "Que lë ni na' ucá'anë' bönni' xuz xinë'ë, en tsöjsóalenë'-nu nigula queë', ⁸ ate' chopë' ni ulu'huóáquië' ca tuz bônachi." Que lë ni na' bití'rô nácagaquië' chopë' pero tuz chinácagaquië'. ⁹ Que lë ni na' ca', nu naca bônachi bití' ral-la' ulá'a nupa na' chinutsáquië' Dios.

¹⁰ Cate' gula'yázië' yu'u, gula'nabi yúdxinë' bönni' usëda queë' Jesús ca naca didza' na' bé'ë. ¹¹ Jesús gudxë' légaquië':

—Núti'tës bönni' ulá'alenë'-nu nigula queë', en utsaga ná'alenë'-nu nigula yúbólô, runë' dul-la' le riguitsaj xibá que yöl-la' nutsaga na' tu' rsubágüë'ë-nu dul-la' nigula na' guzóalenë'-nu zí'aló. ¹² Lésca' caní channô tu nigula nutsaga ná'lennu bönni' usannu-në', en sí'inu-në' bönni' yúbólô, runnu ca' dul-la' le riguitsaj xibá que yöl-la' nutsaga na'.

Jesús rulidza tsáhuë'ë-bi' yugu' bí'ido'

(Mt. 19:13-15; Lc. 18:15-17)

¹³ Ní'irô bila'dxín bônachi ga zoë' Jesús dujú'gaquië' bí'ido' quéguequi. Té'ëni ixóa në'ë légacabi', ate' gula'sí lógaquië' bönni' usëda queë' Jesús ta'dil-la didza'gaquië' nupa na' dujú'agaca légacabi'. ¹⁴ Cate' bilé'enë' Jesús lë ni, gulénë' légaquië', en gunné':

—Guli'güí'-gácabi' bí'ido' lataj ila'dxinbi' quia'. Bití' uzága'gacali'-bi', tu' gata' quégaca nupa náca gaca ca bí'ido' ní', lataj ga rinná bé'ë Dios. ¹⁵ Le nácatë' rea' libí'ili': Nu cabí sí' lu në'ë le rinná bé'ë Dios ca runbi' tu bí'ido', bití' ca' tsaza ga ní' rinná bé'ë.

¹⁶ Ní'irô Jesús bunidë'-bi' yugu' bí'ido' na'. Guxóa në'ë légacabi', en bulidza tsáhuë'ë-bi'.

Bönni' cuidi' napë' yöl-la' tsahui'
(Mt. 19:16-30; Lc. 18:18-30)

¹⁷ Cate' bu'ë Jesús nöza, carelö bidë' tu bönni', en buzóa xzibë' lahuë' Jesús, en gunábinë' Lë', rnnë':

—Bönni' Usedi idú dxi'a, ζnacxi guna' para idéli'da' yöl-la' na bán idú?

¹⁸ Jesús gudxë' lë':

—ζBizx que ru'u neda' didza', rno: 'Idú dxi'a'? Cuntu nu bönni' náquië' idú dxi'a. Tuzë' Dios náquië' idú dxi'a. ¹⁹ Chinöz quézinu' yugu' le gunná bë'ë Dios, gunné':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innió' que luzó'o le cabí nácatë.

Biti' ucáchi'lanu'.

Ben bal xuz xinó'o.

²⁰ Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' nácatea' bí'ido'.

²¹ Len yöl-la' dxi'i ladxí' queë', Jesús buyúë' lë', rnnë':

—Tu le riyadzaj quiu'. Guyéaj, yójëti' yúgu'të le dë quiu', en bunödzej quégaca bönachi yechi' lë na' si'u, ate' gata' quiu' yöl-la' tsahui' yehua' yubá. Ní'irö huödu' quia', gacu' ca tu bönni' sa'yéajë' söjtë'ë lë'e yaga cruz, ate' to'o neda'.

²² Cate' biyönnë' didza' ni, bui'innë', ate' söhuöjë' risëbi lãdxë'ë tu' dëda' yöl-la' tsahui' queë'.

²³ Ní'irö buyúë' Jesús gásibi'ilë', en gudxë' yugu' bönni' usëda queë':

—Böniga naca ila' yaza nupa ta lé'e yöl-la' tsahui' ga rinná bë'ë Dios.

²⁴ Bulu'bábinë' bönni' usëda queë' ca naca xtídzë'ë, ate' leyübölö Jesús gudxë' légaquië':

—Libi'ili', xzí'ina'do', böniga naca ila'yázië' bönni' tu'xzöni lãdxí'gaquië' yöl-la' tsahui' quégaquië' ga rinná bë'ë Dios. ²⁵ Nácáro böniga tsázië' nu bönni' rilë'enë' yöl-la' tsahui' ga rinná bë'ë Dios, ca tödiba' böa' ta'bia-ba' bönachi lu nagui yötsi'.

²⁶ Cate' bila'yönnë' didza' ni, bulu'bánitëronë' ca'. Ta'nnë' la' légasacë':

—ζNuzxi caz gaca ulá, channó?

²⁷ Buyúë' Jesús légaquië', rnnë':

—Biti' gaca gun bönachi lë ni, pero huáquië' Dios, tu' rizéqui'në' Dios yúgu'të.

²⁸ Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

²⁹ Bubi'ë didza' Jesús, rnnë':

—Le nácatë rea' libí'ili', nu bönni' ucá'anë' lidxë', o böchë'ë, o zanë', o xuzë', o xinë'ë, o nigula queë', o yugu' xzí'inë', o xiyúë', tu' runë' xichina' o tu' runë' libán que didza' dxi'a quia', ³⁰ bönni' ni huazí' queë' ia'tú gayuá'tërö ca' dza ni zóaru' na'a, yugu' lidxë', en yugu' böchë'ë, en yugu' zanë', en yugu' xinë'ë, en yugu' xzí'inë', en yugu' xiyúë', enca' yugu' le ila'bia lãdxí'gaca bönachi lë', ate' lu yödzöliö si' za', gata' yöl-la' na bán idú queë'. ³¹ Zián nupa nácacaga lo na'a, ilaca cuídi'sö ni', ate' nupa nácacaga cuídi'sö na'a, ilaca lo ni'.

Leyübölö rigubxjö'ë Jesús ca si' ilútië' Lë'

(Mt. 20:17-19; Lc. 18:31-34)

³² Cate' ni' yú'gaquië' nöza, ta'benë' söjáquië' Jerusalén, nanöruë' Jesús lógaquië' bönni' usëda queë'. Nanítiguequinë', en lu yöl-la' rádxisö söjácalenë' Lë'. Leyübölö Jesús guchë'ë quez idxínnutë' na'. Gusí lahuë' ru'ílenë' légaquië' didza' ca naca le ral-la' gaca queë'. ³³ Rnnë':

—Rilé'e quézili' ribenru' zéajru' Jerusalén ga ni' zoa nu udódi neda', Bönni' Guljë' Bönachi, lu na'agaquië' bixúz unná bë', en lu na'agaquië' bönni' yudo' usedi, ate' chúgüë' quia' gátia', en ulu'dódë' neda' lu na'agaquië' bönni' zi'tu'. ³⁴ Bönni' na' ulu'titjë' neda', en ilúndë'ë neda' zi'. Ulu'chejë' neda' xzöna'. Ní'irö ilútië' neda', pero cate' gaca tsonna dza ubana' lu yöl-la' guti.

Jacobo en Juan ta'nábinë' Jesús bi gunë' quégaquië'

(Mt. 20:20-28)

³⁵ Ní'irö gula'biguë'ë Jacobo, en Juan, xzí'inë' Zebedeo, lahuë' Jesús, en të' Lë':

—Bönni' Usedi, rë'ënitú' gunu' queëtu' le inábatu'.

³⁶ Jesús gudxë' légaquië':

—ζBizxi rë'ënilí' guna' queëli'?

³⁷ Gulë' Lë':

—Cate' idxín dza cö'u ga inná bë'u, ben ga cö'ötu' tutu' cuitu' ibëla, en ia'tutu' cuitu' yögöla.

³⁸ Ní'irö Jesús gudxë' légaquië':

—Biti' nözili' bi rinábalí'. ζNaru' huáca sí'ili' le ral-la' si'a neda', le naca le qui'i saca'a? ζNaru' huáca idílalí' nisa ca idíla' neda' nisa, gátia'?

³⁹ Bulu'bi'è didza', ta'nnè':

—Huácatu'.

Jesús gudxè' légaquiè':

—Le nácatè, le qui'i saca'a neda', sí'ili' ca' libí'ili', en ca idila' neda' nisa, idílali' ca' nisa,
⁴⁰ pero bití' dè lu na'a cóa' nu cuía cuita' ibèla, en nu cuía cuita' yógóla. Dios unódzjè' quegaquiè' bõnni' chinupè' è quegaquiè' yugu' lataj na'.

⁴¹ Cate' bila'yõnnè' ia'chíè' bõnni' usèda queé' Jesús didza' ni, gula'lenè' Jacobo, en Juan na'. ⁴² Ní'irò Jesús bulidzè' légaquiè', rnnè':

—Nóz quezili' ca tun nupa ta'nná be'e yugu' yódzò, tu'zenè' bach bõnachi, ate' nupa nácacaga lo ládjagaquiè' ta'nná be'e luzé'eguequi. ⁴³ Biti' gaca caní queéli', pero nu gué'èni gaca xzõn ga zóali', ral-la' gun xichinli' ia'zica'rõli', ⁴⁴ ate' nútí'tèslõli' nu gué'èni gaca lo ral-la' gaca ca bõnni' huen dxin tsaz queéli' yúgu'tèli'. ⁴⁵ Caní ral-la' gunli' tu' bida' ni neda', Bõnni' Guljè' Bõnachi, caléga para nu gun xichina', pero para guna' xichíngaca bõnachi, en udóda' yõl-la' na'bán quia' le huóá'uida' bõnachi zían.

Jesús ruinè' Bartimeo, bõnni' lo chul-la

(Mt. 20:29-34; Lc. 18:35-43)

⁴⁶ Ní'irò bila'dxinè' Jesús, en yugu' bõnni' dá'gaquiè' Lè' yódzò Jericó. Cate' ni rurujè' Jesús yódzò ni, dzágagaquiè' Lè' yugu' bõnni' usèda queé', enca' bõnachi zían. Ra' nõza ni' rø'è tu bõnni' nachul-la lahuè', lè' Bartimeo, zxi'inè' Timeo. Rinabè' nu bi gúnna'sò queé'. ⁴⁷ Cate' biyõnnè' Bartimeo ridödè' Jesús, bõnni' Nazaret, ni', gusí lahuè' ru'è zidzaj didza', rnnè':

—Jesús, zxi'ini xi'sóè' David! ¡Buéchi' ladxi' neda'!

⁴⁸ Nupa ta'dödi ni' gula'dil-la lè' didza'. Tè lè':

—Busayaj ru'u.

Ní'irò zidzajrò bulidzè', rnnè':

—¡Zxi'ini xi'sóè' David! ¡Buéchi' ladxi' neda'!

⁴⁹ Ní'irò guzòé' dxisò Jesús, ribòzè', ate' rè' légaquiè':

—Buli'lidzè'.

Bulu'lidzè' bõnni' na' nachul-la lahuè'. Tè lè':

—¡Butípa ládxi'u! ¡Guyaschi! ¡Rulidzè' lí'!

⁵⁰ Ní'irò gurú'unè' tsólá'alò lari' naxóa yenè'. La' guyásatè', en bidè' ga na' zoè' Jesús.

⁵¹ Jesús gunábinè' lè', rnnè':

—¿Bizxi ré'ènu' guna' quiu'?

Bubi'è didza' bõnni' na' nachul-la lahuè', rnnè':

—Bõnni' Usedi, ré'ènda' gunu' ga huóálaj guiõj lahua'.

⁵² Jesús gudxè' lè':

—Bõaj lidxi'. Chinuhuóácu' tu' réajlè'u neda'.

La' bõáljatè guiõj lahuè', ate' sa'yéajlenè' Jesús.

11

Riyaziè' Jesús yódzò Jerusalén

(Mt. 21:1-11; Lc. 19:28-40; Jn. 12:12-19)

¹ Bila'dxinè' Jesús, en yugu' bõnni' dá'gaquiè' Lè' gala' ga dè Jerusalén, ga na' nacua' yódzò Betfagé, en yódzò Betania, en ga na' dè ca' Guí'a Yaga Olivo. Ní'irò Jesús gusól-lè'è chopè' bõnni' usèda queé', ² en rè' légaquiè':

—Guli'tséaj lu yódzòdo' dè loru' ni', en cate' tsú'uli' ni', tsøjxáca'li'-ba' tuba' búrrodo' nága'ba' ni', en cuntu nu ribíani lèba'. Guli'sedxi-ba', en guli'chè'-ba' quia' ni'. ³ Channò nu bi gué' libí'ili' tu' runli' lè ni, guli'gué' nu na': "Xanru' riquinnè'-ba', ate' la' usól-la'tè'-ba' quiu'."

⁴ Ní'irò yõjáquiè', en yõjxáca'gaquiè'-ba' búrrodo' na', nága'ba' ra' nõza ga nu riyaza ló'a, ate' gula'sedxè'-ba'. ⁵ Nupa nacua' ni' tè légaquiè':

—¿Bizxi ni' runli'? ¿Bizx que risédxili'-ba' búrrodo' na'?

⁶ Bulu'bi'è didza' bõnni' usèda queé' Jesús, gulè' légaquiè' ca na' chigudxi cazè' Jesús légaquiè', ate' gulu'è légaquiè' lataj. ⁷ Ní'irò gula'chè'-ba' búrrodo' na' ga na' zoè' Jesús. Gula'xóè' lari' quegaquiè' cúdu'ba', ate' Jesús gudxié'-ba'. ⁸ Zían bõnni' nacu'è ni' gula'chiljè' lari' quegaquiè' gapa naca la' nõza. Ia'bal-la bõnachi ni' gula'guítsaj zin le bulu'xzóa la' nõza.

⁹ Gula'sí lo nupa nanõrugaca lahuè' Jesús, en nupa na' zá'gaca cúdu'zè' tu'i zidzaj didza', ta'nnè':

—¡Yõl-la' ba! ¡Xanru' Dios gun lá'ayè' Bõnni' zè'è ni, nasól-lè'è Dios Lè'! ¹⁰ ¡Dios gun lá'ayè' Bõnni' ni sí' inná bè'è, ca na' gunná bè'è xuz xtó'oru' David! ¡Yõl-la' ba Dios!

¹¹ Caní guca, bidxinë' Jesús Jerusalén, ate' guyázië' lō'a yudo'. Cate' budxi buyúë' yúgu'tè le nacua' idú gásibi' ilō ni', burujájë' zaca' yōdzō Betania tu' chiridzō', ate' dzágagaquië' Lë' yugu' bōnni' usēda queë'.

Jesús rulidza zi'ë tu yaga higo
(Mt. 21:18-19)

¹² Cate' za' rení' ia'tú dza, ate' tu'ruájë' Jesús, en yugu' bōnni' dá'gaquië' Lë' yōdzō Betania, ridunë' Jesús. ¹³ Zi'tu' bilé'enë' tu yaga higo dxía xilagui'. Gubigui'ë ga na' zoa yaga na' channō utsōjxaquië' lati' le ribía. Cate' bidxinë' ni' biti' bi yōjxaquië' le ribía. Xilágui'sō dxía tu' cabí ridxini dza cuía. ¹⁴ Ní'irō Jesús bulidzë' yaga na', rnnë':

–Bíti'rō nu gagu le ribía quiu'.
Yugu' bōnni' usēda queë' bila'yōnnë' didza' ni.

Jesús rulatjë' lō'a yudo'
(Mt. 21:12-17; Lc. 19:45-48; Jn. 2:13-22)

¹⁵ Cate' bila'dxinë' Jesús, en yugu' bōnni' dá'gaquië' Lë', yōdzō Jerusalén, guyázië' Jesús lō'a yudo', en gusi lahuë' rubéajë' ní' ilō nupa tuti', en nupa to'o lu lō'a yudo'. Burixë' yugu' blaga quégaca nupa tu'tsá' dumí izá'a, enca' yugu' ga ta'bō' nupa tuti' yugu' gu'dōdo'. ¹⁶ Biti' ca' bē'ë lataj nu bi guá', uzóa nōza ga naca lō'a yudo'. ¹⁷ Busëdinë' nupa nacua' ni', rnnë':

–Nazúaj lu guichi lá' ayi, rRNA: “Lidxa' si'ile, yu' u ga bōnachi iduté yōdzōlió ulu' lidza Dios.” Libí'ili' chinunli' le ca naca lídxigaca gubán.

¹⁸ Cate' yugu' bixúz unná bē', en yugu' bōnni' yudo' usedi bila'yōnnë' didza' ni, gula'sí lógaquië' tu'guljë' naxxi ilútië' Jesús, pero tu' tádxinë' le ilún bōnachi, biti' bi gulunë' queë', tu' tu' bani yúgu'të bōnachi ca naca le rusëdinë' Jesús. ¹⁹ Cate' chiridzō' burujájë' Jesús lu yōdzō na'.

Ribidxi yaga higo bulidza zi'ë Jesús
(Mt. 21:20-22)

²⁰ Cate' za' rení' ia'tú dza, gula'dōdë' Jesús, en yugu' bōnni' dá'gaquië' Lë' ga zoa yaga higo na' bulidza zi'ë Jesús, en bila'lé'enë' le, chinabidxi idú luí. ²¹ Ní'irō yōjnenë' Pedro bi guca, ate' gudxë' Jesús:

–Bōnni' Usedi, buyútsōca'. Chinabidxi yaga higo ni bulidza zi'u néaje.

²² Bubi'ë didza' Jesús, rë' légaquië':

–Guli'tseajlë' Dios. ²³ Le nácatë rea' libí'ili', channō nu bōnni' guië' gu'ado' ni: “Gucuíta ni, yōjsóa lu nísado'”, en biti' gaca chopa ládxë'ë bōnni' na', pero idú ládxë'ë tseajlë'ë gunë' Dios ca na' rnnë', ca' gaca. ²⁴ Que lë ni na' rea' libí'ili': Yúgu'të le inábali' cate' ulídzali'-në' Dios, guli'tseajlë' chibennë' Dios queéli' lë na' rinábali', ate' gunné' queéli'. ²⁵ Cate' ni' rulídzali'-në' Dios, channō zoa nu rileli' nu bi ben queëli', buli'niti lo nu na', para uniti lahuë' ca' libí'ili' Xúzili' na' zoë' yehua' yubá ca naca dul-la' nabága'li'. ²⁶ Channō cabí uniti loli' bōnachi, biti' uniti lahuë' Xúzili' zoë' yehua' yubá libí'ili' dul-la' nabága'li'.

Yöl-la' unná bē' dë lu nē'ë Jesús
(Mt. 21:23-27; Lc. 20:1-8)

²⁷ Ní'irō Jesús, en yugu' bōnni' dá'gaquië' Lë' yōjhuōjgaquië' Jerusalén. Cate' ni' ridë' Jesús ga naca chila yudo', bila'dxinë' yugu' bixúz unná bē', en yugu' bōnni' yudo' usedi, en bōnni' gula tu'zējajni'inë', ga zoë'. ²⁸ Gula'nábinë' Jesús, ta'nnë':

–¿Bizxi yöl-la' unná bē' dë lu no'o runu' yugu' lë ni? ¿Nuzxi caz budōdi lu no'o yöl-la' unná bē' gunu' caní?

²⁹ Bubi'ë didza' Jesús, rë' légaquië':

–Neda' ca' inábida' libí'ili' tu didza'. Channō ubí'ili' quia' didza', ní'irō guía' libí'ili' bi yöl-la' unná bē' rúnida' yugu' lë ni. ³⁰ ¿Nuzxi budōdi lu nē'ë Juan uquílë' bōnachi nisa? ¿Naru' Dios o bōnachi? Guli'nnátsōca'.

³¹ Gula'sí lógaquië' tun xtídzá'gaquië' la' légasasë', ta'nnë':

–Channō innaru' Dios gusól-lë'ë lë', guië' rë'u: “¿Bizx que biti' guyéajlë'ëli' lë'?” ³² ¿Naru' guíetsaru'-në': Gula'sól-lë'ë bōnni' lë'?

Caní ta'zá' ládxig'gaquië' tu' tádxinë' le ilún bōnachi zían nacua' ni' tu' téquiguequi yúgu'të bōnachi na' bē'ë didza' Juan na' uláz queë' Dios. ³³ Que lë ni na' gulë' Jesús:

–Bíti' nōztu'.

Ní'irō Jesús gudxë' légaquië':

–Neda' ca' biti' quíxjōi'ida' libí'ili' bi yöl-la' unná bē' dë lu na'a rúnida' yugu' lë ni.

12

Rucúdu'ë didza' Jesús ca gaca quégaca huen dxin biti' nácgaca tsahui'
(Mt. 21:33-46; Lc. 20:9-19)

¹ Ní'irō gusí lahuë' Jesús ruí'ilenë' yugu' bönni' dá'gaquië' Lë' didza' yugu' le rucúdzu'ë didza', rnnë':

—Guzóë' tu bönni', budë'ë lubá uva zían ga naca lu xiyúë'. Guléquië' lë'a que, en guchö'önë' tu rōga' guiōj ga isíë' xisi uva na'. Budxië' tu yu'u gupa ga naca xitsá' ga nu uyú xiyúë' na'.

'Ní'irō budödë' xiyúë' na' lu ná'agaquië' huen dxin, ila'zi'ë gatsaj huéaj le unōdzaj, ate' guyijë' yōdzō zì'tu'. ² Cate' bidxin dza ulu'chibë' le ribíá, gusól-lë'ë-bi' bi'i huen dxin tsójxí'ibi' lu ná'agaquië' huen dxin na' le ral-la' si'ë xanbi' que le gula'bía lubá uva na'. ³ Ní'irō yugu' huen dxin na' gula'guélë'ë-bi' bi'i na', en gulundë'-bi' zì', ate' bulu'sól-lë'ë-bi' cá'asóbi'. ⁴ Ní'irō bönni' xan luyú na' gusól-lë'ë-bi' ia'tubi' bi'i huen dxin queë', ate' bi'i ni bulu'laxdë'-bi' guiōj. Bulu'lë'ë ícjabi'. Gulu'ë dō' queëbi'. ⁵ Ní'irō bönni' xan luyú na' gusól-lë'ë-bi' ca' ia'tubi' bi'i huen dxin queë', ate' bi'i ni gulútië'-bi'. Gusól-lë'ë-bi' ca' zíanrōbi', ate' bál-labi' gulúngacadë'-bi' zì', en ia'bál-labi' gulútigaquië'-bi'.

⁶ Cúnturō nu nagá'ana queë' xan luyú na'. Nagá'anasibi' xzí'inë', ate' nadxí'ide'enë'-bi'. Ga yōjetë', gusól-lë'ë-bi' xzí'inë', rnnë': "Ilunë' bal xzí'ina'". ⁷ Ní'irō yugu' bönni' huen dxin na' gula'nnë' la' légacasë', ta'nnë': "Bi'i ni ral-la' guequi queëbi' luyú ni. Guli'dá, gútiru'-bi', ate' guequi queëru' luyú ni." ⁸ Que lë ni na' gula'zōnë'-bi', en gulútië'-bi'. Gula'ru'unë'-bi' ní'lō ga dá'gaca lubá uva na'.

⁹ Ní'irō Jesús gunábinë' bönni' nacu'ë ni', rnnë':

—¿Nacxi gunë' bönni' xan luyú na', channō? Huidë', en gútigaquië' bönni' huen dxin na', ate' udödë' luyú na' lu ná'gaquië' bönni' yúbōlō.

¹⁰ ¿Naru' cabí nulábanili' lë na' nazúaj lu guichi lá'ayi? Caní rna:

Guiōj na' gula'ru'unë' bönni' tu'cu'ë zō'ō, na'a naca guiōj len, squin zō'ō.

¹¹ Xanru' Dios benë' ga naca caní ate' rubániru' ca naca lë ni rilë'eru'.

¹² Ní'irō ta'zóa ta'bō'ë ila'zōnë' Jesús tu' téquibe'enë' bucúdzu'ë didza' ca naca quégaquië', pero tádxinë' le ilún bōnachi zían nacuá' ni', en que lë ni na' bulu'cá'anë' Lë', söhuōjgaquië'.

Ca naca le ta'gútxaj lázagaça bōnachi

(Mt. 22:15-22; Lc. 20:20-26)

¹³ Gudōdi lë ni yugu' bönni' yudo' unná bë' na' gula'sól-lë'ë bal-lë' bönni' yudo' fariseo len bönni' dá'gaquië' Herodes ga zoë' Jesús para ilunë' ga bi innë' para gaca ulu'zéguië' Lë' didza'. ¹⁴ Bila'dxinë' bönni' ni ga na' zoë' Jesús, en tē' Lë':

—Bōnni' Usedi, nōzitu' ru'u didza' idútë li. Biti' ru'i lādxu'u bi ta'nna'sō bōnachi, tu' cabí ruyusu' le tu'luf'isō cūnguequi bōnachi, pero rusédinu' ca nácatë le rë'ënë' Dios ilún bōnachi. ¿Ru'i netu' lataj xibá queë' Moisés quizxaj lastu' le tu'quizxjé' uláz queë' César? ¿Naru' uguíxajtu' o bití' quíxajtu'?

¹⁵ Réquibe'enë' Jesús tu'ë didza' lu yōl-la' riguílaj ladxi' quégaquië', ate' rë' légaquië':

—¿Bizx que rubéajli' neda' didza'? Guli'diguá'tsōca' tu dumí ridá para ilé'eda' le.

¹⁶ Diguá'agaquië' le, ate' Jesús gunábinë' légaquië', rnnë':

—¿Nuzxi lahuí da' lë'e ni, en nuzxi lë ni?

Bulu'bi'ë didza', ta'nnë':

—Queë' César na'.

¹⁷ Ní'irō Jesús gudxë' légaquië', rnnë':

—Buli'nōdzaj queë' César le nequi queë' César, ate' queë' Dios le nequi queë' Dios.

Bulu'bánninë' ca naca didza' bubi'ë Jesús.

Ca naca que yōl-la' rubán lu yōl-la' guti

(Mt. 22:23-33; Lc. 20:27-40)

¹⁸ Ní'irō bila'dxinë' bal-lë' bönni' yudo' saduceo ga zoë' Jesús. Bönni' ni ta'nnë' bití' ulu'bán nupa chinátigaca. Que lë ni na' gulë' Jesús, ta'nnë':

¹⁹ —Bōnni' Usedi, Moisés nuzájé' queëru' lu guichi channō gátie' tu bönni' bití' zoa bi' queë', ate' ugá'ananu nigula queë', bi' böché'ë bönni' na' ral-la' utsaga ná'alēnbi'-nu, en uzóabi' bí'ido' gácabi' bi' queëbi' böchí'bi'. ²⁰ Gula'cuá'abi' gádxibi' bi' nácacacabi' böchí'gacabi'. Bi' huáca na' butsa'ga ná'alēnbi'-nu nigula, ate' gútibi', cuntu nu zoa bí'ido' queëbi'. ²¹ Bi' buropi na' butsa'ga ná'alēnbi'-nu nigula uzëbi' na', ate' gútibi' ca', cuntu nu zoa bí'ido' queëbi'. Lë'sca' caní guca queëbi' bi' bunní. ²² Caní gaca, bulu'tsaga ná'alēnbi'-nu yúgu'tëbi', cuntu nu zoa bí'ido' quégacabi'. Ga yōjsetë, gútinu ca' nigula na'. ²³ Na'a, cate' ulu'bán nupa chinátigaca, ¿nuzxí'lōbi' guéquinu nigula na' queëbi', tu' bulu'tsaga ná'alēnbi'-nu igádxitëbi'?

²⁴ Bubi'ë didza' Jesús, rë' légaquië':

—Richíxili' tu' cabí núnbë'ëli' le nazúaj lu guichi lá'ayi, en bití' nōzili' ca naca yōl-la' huáca queë' Dios. ²⁵ Cate' ulu'bán nupa chinátigaca, bití' ca' ulu'tsaga ná'agaquië', ate' yugu' bönni' bití' ila'cuá'lenë' nigula, pero ilácagaquië' ca ná'agaquië' gubáz lá'ayi queë' Dios, nacu'ë yehua' yubá. ²⁶ Na'a, ca naca quégaca nupa chinátigaca channō ulu'bán, ¿naru' cabí

nulábanili' le buzúajë' lu guichi Moisés? Ru'i didza' ca na' bulidzë' Dios lë' lu yaga yötsi'do' régui. Gudxë' lë': "Neda' naca' Dios queë' Abraham, en Dios queë' Isaac, en Dios queë' Jacob." Tu' gunnë' caní queégaquië', naca bë' nabángaquië' sal-la' gulátie' zí'aló. ²⁷ Dios náquië' Dios queéga nupa nabánga, calëga queéga nupa nátigaca tsaz. Richíxitéröli'.

Le naca lo le gunná bë'ë Dios

(Mt. 22:34-40)

²⁸ Bidë' ca' tu bönni' yudo' usedi ga zoë' Jesús. Biyönnë' ca na' guluí'ilenë' Jesús didza', en nözinë' dxí'ado' bubí'ë Jesús didza'. Que lë ni na' gunábinë' Jesús, rnnë':

—¿Bíxilö le gunná bë'ë Dios nácatërö lo ca yúgu'të le gunná bë'ë?

²⁹ Bubi'ë didza' Jesús, rë' lë':

—Le gunná bë'ë le nácatërö lo ca yúgu'të naca lë na' rna: "Gulí'yöni bönachi Israel. Xanru' Dios, tuzë' Lë' náquië' Xanru'. ³⁰ Ral-la' idxí'inu' Xanu' Dios idú ládxi'u, en lu idú icja ládxi'do'o, en lu idú yöl-la' réajni'iquiu', en lu idú yöl-la' huáca quíu'." Lë ni naca le gunná bë'ë le nácatërö lo. ³¹ Le gunná bë'ë le naca buropi, lébisö ca naca. Caní rna: "Ral-la' idxí'inu' luzó'o ca nadxí'icuinu'." Biti' ca' zoa ia'tú le gunná bë'ë le nácarö lo ca chopá ni gunná bë'ë.

³² Ní'irö bönni' yudo' usedi na' gudxë' Jesús, rnnë':

—Dxi'ado' gunnó', Bönni' Usedi. Le nácatë rno'. Tuzë' náquië' Dios, en cúnturö nu zoa naca Dios. ³³ Para idxí'iru'-në' Dios idú ládxi'ru', en lu idú yöl-la' réajni'iqueëru', en lu idú icja ládxi'do'oru', en lu idú yöl-la' huáca queëru', en para idxí'iru' luzá'aru' ca nadxí'icuinru', nácarö lesaca' ca yúgu'të böa' bëdxido' rútigacaru'-ba' lu bucugu lá'ayi queë' Dios, enca' ca yúgu'të böa' bëdxido' ruzégui'gacaru'-ba' lu bucugu na'.

³⁴ Cate' biyönnë' Jesús dxí'ado' rubí'ë didza' bönni' ni, ní'irö gudxë' lë', rnnë':

—Ia'látisö riyadzaj quíu' gúnbë'u le rinná bë'ë Dios.

Cúnturö nu burugui bi inábini Jesús.

¿Nuzxi zxi'ini náquië' Cristo?

(Mt. 22:41-46; Lc. 20:41-44)

³⁵ Cate' ni' rusëdinë' Jesús bönachi ga naca chila yudo', rnnë':

—¿Bíxq que ta'nnë' bönni' yudo' usedi náquië' Cristo zxi'ini xi'sóë' David? ³⁶ Lë cazë' David na' bë'ë didza', zóalenë' Dios Bö' Lá'ayi lë', gunné':

Xanru' Dios gudxë' Xana':

"Gurö'ö cuíta lë'a ibëla

cate' gunra' ga ulu'zóa zxi'bigaca lo'

nupa bití' ta'lë'e Li' dxí'a."

³⁷ ¿Naru' nácatsë' Cristo zxi'ini xi'sóë' David channö lë cazë' David na' rnnë' queë' náquië' Xané'?

Bönachi zían nacua' ni' tu'zë nágagaca Lë' gula'yaza ládxi'gaca didza' ni.

Jesús ruzégui'ë didza' bönni' yudo' tu'sëdinë'

(Mt. 23:1-36; Lc. 11:37-54; 20:45-47)

³⁸ Ní' rusëdinë' Jesús yugu' bönni' dá'gaquië' Lë', rë' légaquië':

—Gulí'gún chí'icuinli' queégaquië' bönni' yudo' tu'sëdinë'. Ta'yaza ládxi'gaquië' ta'dë' nilö na'lö, nácuagaquië' lari' tunna. Ta'yaza ládxi'gaquië' ca' tu'lidza tsahui' bönachi légaquië' gapa naca lu yé'ëyi. ³⁹ Ta'bö'ë yugu' lataj lo lu yu'u ga tu'dubë' tu'sëdë' queë' Dios, enca' gapa tu'dubë' të'aj tahuë'. ⁴⁰ Rugúagaquië' lídxigacanu nigula uzëbi, en para ulu'lu'isö tsahui' cuíngaquië', xidzë tu'lidzë' Dios. Bönni' ni, gúnda'rë' Dios légaquië' xigua'.

Le bunödžjanu tu nigula uzëbido' queë' Dios

(Lc. 21:1-4)

⁴¹ Tsanni ni' rö'ë Jesús chila yudo' ga zoa gu'ina ga ta'gú'u bönachi dumí que yudó', ruyúë' ca tun bönachi ta'gú'u dumí lu gu'ina. Dumí zían ta'gu'ë bönni' dë yöl-la' tsahui' queégaquië'. ⁴² Ní'irö bidxinnu tu nigula yechi' uzëbido' ni', ate' gulú'unu chopá dumí lásido', le nazá'gaca láti'do's. ⁴³ Ní'irö bulidzë' Jesús yugu' bönni' usëda queë', en rë' légaquië':

—Le nácatë rea' libí'ili', nigula yechi' uzëbido' ni gulú'urönu ca yúgu'të nupa bi ta'gú'u lu gu'ina que yudo'. ⁴⁴ Yúgu'të bönni' ni ta'gu'ë que le nagá'anasö queégaquië', pero nigula ni, lu yöl-la' yéchi'do' queënu gulú'unu idütë la's dui tsa le dësö queënu, le ral-la' gáhuinu.

13

Rígu'xjö'ë Jesús ca si' ulu'químajë' yudo'

(Mt. 24:1-2; Lc. 21:5-6)

¹ Cate' burúajë' Jesús chila yudo', tuë' bönni' usëda queë' gudxë' Lë', rnnë':

—Bönni' Usedi, buyútsöca' náctiga yugu' yu'u zxon ni, en náctiga yugu' guiöj lë'e zö'ö quéguëqui.

² Bubi'ë didza' Jesús, rë' lë':

—Rilë'enu' yugu' yu'u zxon ni, pero biti' ca' ugá'ana guiöj lahui luzé'e ni, tu' ulu'quinnaj bönachi léguequi.

Le ilaca bë' cate' si' údxi que yödzölió
(Mt. 24:3-28; Lc. 21:7-24; 17:22-24)

³ Ní'irö yöj'aqueië' Jesús, en yugu' bönni' dá'gaquië' Lë' lu Gu'fa Yaga Olivo, gu'fa na' dë ca dödilö ra' yudo'. Cate' chirö'ë Jesús ni', la' légacasë' Pedro, en Jacobo, en Juan, en Andrés, gulë' Lë', ta'nnë':

⁴ —Gudíxjö'i netu' bátaxi ilaca lë ni. ¿Bizxi gaca bë' chizóa ilaca yúgu'të lë ni?

⁵ Bubi'ë didza' Jesús, rusëdinë' légaquië', rnnë':

—Gulí'gún chi'i cuinli' para cabi nu si' ye'e libí'ili'. ⁶ Ila'lá' lahuë' zían bönni' si' lágaquië' ca lea' neda', ila'nnë' nácagaquië' Cristo. Caní ila' zí' yé'enë' bönachi zían.

⁷ Ní'irö cate' yónili' raca gudil-la nilö ná'alö, biti' gádxili'. Yúgu'të lë ni ral-la' ilaca, pero biti' ridxini dza údxi. ⁸ Tu yödzö tál-lalen ia' tú yödzö, en tu ga nu rinná bë' tsöjtí'l-lalen ia' tú ga nu rinná bë'. Zían lataj tödi budó' zxu', en tsu'u gubín. Ila'tsatsa bönachi. Yugu' lë ni ilaca le isí lo ila'gu'í ila'zaca' bönachi dza ni'.

⁹ Ní'irö gulí'gún chi'i cuinli', tu' ulu'dödë' libí'ili' lu ná'agaquië' bönni' yúlahui'. Ila'guinë' libí'ili' gapa tu'dubë' tu'sedë' queë' Dios bönni' judío. Idxinli' lógaquië' bönni' ta'nná bé'enë' libí'ili', en lógaquië' bönni' ta'nná bé'enë' yödzö zi'tu'. Ilunë' caní queë'li' tu' dá'ali' neda', pero gunli' ba nali' quia' neda' ni'. ¹⁰ Zí'aló ca idxín dza údxi, run bayudxi gaca libán que didza' dxi'a quia' lógaca bönachi idütë yödzölió. ¹¹ Cate' ni' ila'chë'ë libí'ili', en ulu'dödë' libí'ili' lu ná'agaquië' bönni' yúlahui', biti' gü'í ládxi'li' bizxi innali'. La' dza ní'isö Dios gunnë' queë'li' didza' gü'í'ili', ate' lë ni innali'. Cate' ni' gü'í'ili' didza', caléga libí'isili' na' innali', pero Dios Bó' Lá'ayi innë'. ¹² Ulu'dödi bönachi la' bóchi'gacasó lu ná'agaquië' bönni' ilütíë' légaquië'. Yugu' bönni' nacua'abi' bi' quégaquië' ulu'dödë' la' zxi'inigaca cazë' ca', ate' zxi'inigaqueië' na' ulu'dödi'bi' la' xuz xiná'agaca cázabi' lu ná'agaquië' bönni' ilütíë' légaquië'. ¹³ Yúgu'të bönachi ulu'zóa libí'ili' tsölá'aló tu' dá'ali' neda', pero nülö'li' guá' ilenli' lë na' ga idxinrö dza údxi, ulá'li'.

¹⁴ Nupa tu'laba didza' ni ral-la' ila'yéajni'i. Buzúajë' lu guichi Daniel, bönni' ni' bë'ë didza' uláz queë' Dios, le rnna caní: "Tsaz tu le xihui' le rucá'ana cané ga naca la'ayi." Dza ní'irö ral-la' ila'zxunnaj nupa nacua' luyú Judea, en tsójaca gapa naca lu gu'ado'. ¹⁵ Nu zoa icjo'olö dza ni' ral-la' izxúnnajtë, en biti' huötaj zcan yu'u para tsójzxi' bi dë que lu yu'u. ¹⁶ Nu zoa la' guixi' ral-la' izxúnnajtë, en biti' huötaj tsójzxi' lari' rixóa yeni. ¹⁷ Bica' bayechi' yugu' nigula dza ni' nuá'agacanu-bi' bí'ido', enca' nigula tu'gádxí'nu-bi' bí'ido'. ¹⁸ Buli'lidzë' Dios inábili-në' cabi gun bayudxi izxúnnajli' cate' raca beo' ziaga ca'. ¹⁹ Yugu' dza ni' ila'gu'í ila'zaca'rö bönachi ca le gaca zí'atëlö cate' si' guta' yödzölió le benë' Dios ga ridxintë na' dza, ate' dza zá'gaca biti' gaca caní. ²⁰ La'tu' cabi nunë' Dios ga ulu'huóaca nabábasö yugu' dza ni', cuntu nu ulá, pero tu' nadxí'inë' nupa chiguró cazë', chinunë' queë' gunë' ga ulu'huóaca nabábasö yugu' dza ni'.

²¹ Na'a, channö nu guíë libí'ili': "Buli'yútsöca", ni zoë' Cristo", o inná: "Buli'yútsöca", ni zoë'", biti' ca' tséajjë'ëli' nu na'. ²² Ila'lá' lahuë' zían bönni' ila'zí' yé'enë' bönachi. Ila'nnë' nácagaquië' Cristo, en ila'nnë' nácagaquië' bönni' tu'ë didza' uláz queë' Dios. Ulu'luf'inë' le ilaca bë', en ilunë' yugu' yöl-la' huáca zxon. Huala'zí' yé'enë' ca' nupa guró cazë' Dios channö ila'zéqui'në'. ²³ Ní'irö libí'ili', guí'sóa ban ladxí'. Yúgu'të chigudxa' libí'ili' zí'atëlö ca gaca.

Ca huödë' Bönni' Guljë' Bönachi
(Mt. 24:29-35, 42-44; Lc. 21:25-36)

²⁴ Gunnë' ca' Jesús:

—Yugu' dza ni', tödi gaca dza na' ila'gu'í ila'zaca' caní bönachi, ichul-la gubidza, en biti' cu'u bení' beo'. ²⁵ Ila'guinnaj böljaj lúzxiba, en ila'zxi' le nál-lagaca nalá'gaca lúzxiba na'. ²⁶ Ní'irö ila'lé'eni neda', Bönni' Guljë' Bönachi, za'a lu böaj lúzxiba, napa' yöl-la' huáca zxon, en yöl-la' bení' quia'. ²⁷ Tsöl-la'gaca-në' gubáz lá'ayi quia', ate' ulu'tubë' bönachi guró caza' quia' nacua' idapa la'a yödzölió, ga naguëla'të luyú bidxi, ga ridxintë ga naguëla' lúzxiba.

²⁸ Gulí'tséajjini' le rusedi yaga higo ni'. Cate' ta'lén ni'a në'e huë'énido', en rubia xilagui' yulu, nözilí' chizóa idxín beo' cusubá. ²⁹ Lësca' caní, cate' ilé'eli' taca lë ni, inözilí' chizóa idxín dza údxi na', en chiridzaga lo. ³⁰ Le nácaté rea' libí'ili', yúgu'të lë ni ilaca zí'atëlö ca ilátigaca nupa nacua' dza na'. ³¹ Huadödi que lúzxiba, en que luyú ni, pero xtí'dza'a catu caz tödi que.

³² Cate' idxín dza ni' o rëla ni', cuntu nu nözi. Biti' nözguequinë' gubáz lá'ayi nacu'ë yehua' yubá, en biti' nözda' neda', Zxi'inë' Dios. Tuzë' Dios Xuz nözinë'. ³³ Que lë ni na', buli'subán ládxi'li'. Gulí'sóa sina', en buli'lidzë' Dios tu' cabi nözilí' bizxi dza gaca lë ni. ³⁴ Gaca ca raca cate' sa'yéajjë' zi'tu' tu bönni'. Cate' chizóa uzë'ë lidxë', udödë' lu ná'agaquië' huen dxin queë'

yugu' le dë queë'. Que queëgaquië' gu'ë xichíngaquië', en inná bë'ë soa ban ladxí' nu zoa huen chí'i ga nu riyaza. ³⁵ Guli'sóa libí'ili' ban ladxí' tu' cabí nózili' bátaxi huödë' xan yu'u, cate' chiridzò', o gatsaj lahui' yëla, o cate' ribòdxiba' böra, o zílado'. ³⁶ Guli'gún caní, para cabí idixáquië' libí'ili' rásili' channò huödë' tsáldo'os. ³⁷ Lë ni rea' libí'ili', rea' ca' yúgu'të bönachi: Guli'sóa ban ladxí'.

14

Tun xtída'gaquië' bönni' yudo' ila'zönë' Jesús

(Mt. 26:1-5; Lc. 22:1-2; Jn. 11:45-53)

¹ Ia'chopa dza ca' gaca Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. Naca laní cate' tahuë' yóta xtila bití' nazi' cúa zi que. Ta'zóa ta'bó'ë yugu' bixúz unná bë', en bönni' yudo' tu'sédinë' ila'zönë' Jesús bagáchi'só para ilútië' Lë'. ² Ta'nnë':

–Bití' gaca sönru'-në' dza laní tu' ila'tsatsa bönachi.

Nigula rigú'unu le rilá' zxixi icjë' Jesús

(Mt. 26:6-13; Jn. 12:1-8)

³ Zoë' Jesús yödzo Betania, lu yu'u lidxë' Simón, bönni' güf'inë' huë' nudzu' ruzódi. Tsanni ni' rō'ë rahuë' Jesús, guyázanu tu nigula, nuá'anu tu böga'do' néquini guiöj zaca', yudzu le rilá' zxixi que yój susën lasi idú, le nazaca' yenni'. Gulá'anu böga'do' na', en gulú'unu le rilá' zxixi na' icjë' Jesús. ⁴ Gula'lélanë' bal-lë' bönni' nacu'ë ni'. Ta'nnë' la' légacasë':

–¿Bixz que guca ditaj le zxixi na'? ⁵ La'tu' nu guti' lë na', huazí' que ia'lati' ca lászjaru' que tu iz para nu quisi le quegaca bönachi yechi'.

Gula'nnë'dë'ë queënu.

⁶ Ní'irō Jesús bë'ë didza', rnnë':

–Guli'güf'i-nu lataj. ¿Bixz que rinnë' zí'ili' queënu? Naca dxi'a le bennu quia'.

⁷ Nacuá'lentica'só bönachi yechi' libí'ili', en bátati'tës guë'ënili', huáca gunli' dxi'a quegáquië', pero neda' bití' sóatica'sa' ga zóalí'. ⁸ Tsca le guzxéqui'nu bennu nigula ni. Cate' gulú'unu le rilá' zxixi ni neda', bupá'anu neda' zí'atëlō ca igácha'a yeru ba. ⁹ Le nácatë rea' libí'ili', gátí'tës ga gaca libán que didza' dxi'a quia' idú yödzólió, soa nu quixjō' ca' lë ni bennu nigula ni quia'. Caní gaca para nu tsöjnë' lënu.

Rizí' lu në'ë Judas udödë' Jesús

(Mt. 26:14-16; Lc. 22:3-6)

¹⁰ Ní'irō birúajë' Judas Iscariote, bönni' nabábalenë' chínnuë' na' dá'gaquië' Jesús. Guyijë' ga nacu'ë bixúz unná bë' para udödë' Jesús lu ná'agaquië'. ¹¹ Cate' bila'yönnë' xtídzë'ë Judas na', bulu'dzéjanë', ate' gula'z'í' lu ná'agaquië' ilu'ë lë' dumí. Ní'irō gusi lahuë' Judas rizóa ribō'ë udödë' Jesús lu ná'agaquië'.

Le rë'aj ráguru' rusubanru' ca gútië' Xanru'

(Mt. 26:17-29; Lc. 22:7-23; Jn. 13:21-30; 1Co. 11:23-26)

¹² Naca dza risí lo laní cate' tahuë' yóta xtila bití' nazí'i cúa zi que, dza na' tutië'-ba' bö'cu' zxlá'do' tahuë'-ba' dzō' Laní Pascua na', cate' tu'subanë' ca benë' Dios busölë' bönachi judío luyú Egipto. Ní'irō bönni' usëda queë' Jesús gula'nábinë' Lë', ta'nnë':

–¿Gaxi rë'ënu' tséajtu' tsöjpá'atu' le gáguru' xtsō' que Laní Pascua?

¹³ Ní'irō Jesús gusöl-lë'ë chopë' bönni' usëda queë', en rë' légaquië':

–Guli'tséaj lu yödzo. Ní' huadzágali' tu bönni' nu'ë tu rō'ō nisa. Guli'tséajlenë'. ¹⁴ Ga na' tsázië', guli'guifë' xan yu'u na': “Rnnë' Bönni' Usëdi: ¿Gaxi zoa yu'u ga na' gágulengaca'-në' bönni' usëda quia' xtsō' que Laní Pascua?” ¹⁵ Ní'irō uluf'inë' libí'ili' tu yu'u zxon ga naca buropi cúa ga chinabá'a. Buli'pá'a le gáguru' ni'.

¹⁶ Bila'rúajë' bönni' usëda queë' na', en bila'dxinë' lu yödzo, ate' yöjxáca'gaquië' yúgu'të ca na' chigudxë' légaquië' Jesús. Bulu'pë'ë le ilahuë' ni' que Laní Pascua.

¹⁷ Cate' chizá' ral-la, bidxinë' Jesús ni', dzágagaquië' idxinnutë' bönni' usëda queë' Lë'. ¹⁸ Tsanni ni' rō'ōgaquië' tahuë', bë'ë didza' Jesús, rnnë':

–Le nácatë rea' libí'ili', zoa nu dzaga libí'ili', nu rágulen neda' tsözxón, nu udödi neda' lu ná'agaca bönachi.

¹⁹ Ní'irō bulu'huí'innë', en gula'sí lógaquië' tu tuë' tē' Lë':

–¿Naru' neda'?

Ia'túë' ca' gunné':

–¿Naru' neda'?

²⁰ Bubi'ë didza' Jesús, rë' légaquië':

–Naca tu nu nutsa' ladaj chínnuli' ni, bönni' na' nunë'ë në'ë tsözxón len na'a lu yö'óna.

²¹ Tseja' ga gátia' neda', Bönni' Guljë' Bönachi, ca na' nazúaj lu guichi lá'ayi ca gaca quia',

pero bica' bayechi' bönni' na' udödë' neda' lu ná'agaquië' bönni' ilútië' neda'. Gácarö dxi'a queë' bönni' na' la'tu' cabí guljë'.

²² Tsanni ni' tahuë', gudélë'ë Jesús yöta xtila. Gudxë' Dios: "Xclenu'." Buzxuzxjë' le, en bë'ë quégaquië', rnnë':

—Guli'gagu. Lë ni naca bëla' rön quia'.

²³ Gudélë'ë ca' tu zxi'ga'do', en gudxë' Dios: "Xclenu'." Ní'irö bë'ë quégaquië', ate' yúgu'të' gulë'ajë' le. ²⁴ Jesús rë' légaquië':

—Lë ni xichóna' le run tsutsu didza' cubi rucá'ana tsahui', le núnlenë' Dios bönachi. Rön ni ilalaj ni'a quégaca bönachi zían. ²⁵ Le nácatë rea' libí'ili', bití'rö guí'ja' xisi uva ga idxinrö dza guí'ja' le cubi ga ni' rinná bë'ë Dios.

Jesús rnnë' innë' Pedro bití' núnbë'ë Lë'

(Mt. 26:30-35; Lc. 22:31-34; Jn. 13:36-38)

²⁶ Gudödi gulul-lë' yöl-la' ba, bila'rúajë' sójáquië' Guí'a Yaga Olivo. ²⁷ Ní'irö Jesús gudxë' légaquië', rnnë':

—Yúgu'tëli' gaca chopa ládxi'li', ucá'anali' neda' na'a dzö', tu' nazúaj lu guichi lá'ayi, rnna: "Gutia'-në' uyú bö'cu' zxila', ate' ilásilasiba' bö'cu' zxila' na'." ²⁸ Tödi ubana' lu yöl-la' guti, tseja' luyú Galilea zí'alö ca libí'ili'.

²⁹ Ní'irö Pedro gudxë' Jesús, rnnë':

—Sal-la' yúgu'të' ilaca chopa ládxi'gaquië', en ulu'cá'anë' Li', bití' ca' gaca chopa ládxa'a neda'.

³⁰ Jesús gudxë' lë', rnnë':

—Le nácatë rea' li', la' dzö' nisó, si' cödxilöba' böra le buropi luzuí, tsonna luzuí innó' bití' núnbë'u neda'.

³¹ Ní'irö Pedro buzötjë' Dios, rnnë':

—Sal-la' gátilentea' Li' tsözxón, bití' ca' innía' bití' núnbë'a Li'.

Lësca' caní gula'nnë' yúgu'të'.

Jesús rulidzë' Dios la' yëla Getsemaní

(Mt. 26:36-46; Lc. 22:39-46)

³² Ní'irö Jesús, en bönni' dá'gaquië' Lë' bila'dxinë' la' yëla Getsemaní, ate' Jesús gudxë' légaquië', rnnë':

—Guli'cö' ni, tsanni tseja' neda', tsöjlidza'-në' Dios.

³³ Jesús guchë'ë Pedro, en Jacobo, en Juan, ate' gusí lahuë' ridzöbinë', en risëbi ládxë'ë. ³⁴ Gudxë' légaquië', rnnë':

—Huati caza' lu yöl-la' risëbi ladxi'. Guli'cöz ni, en guli'ná' yëla.

³⁵ Ní'irö guzë'ë Jesús ia'láti'do', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i sáquë'ë dza na'. ³⁶ Ní' rulidzë' Dios, rnnë':

—Xúza'do', yúgu'të huáca gunu' Li'. Gucuíta lë na' ral-la' qui'i saca'a, pero caléga ca rë'ënda' neda', pero ca rë'ënu' Li', gunu'.

³⁷ Ní'irö böajë' Jesús ga na' nacu'ë bönni' usëda queë', ate' yöjxáquië' légaquië' tasië'. Gudxë' Pedro:

—Simón, ¿rásitso'? ¿Naru' cabí rubéajtso' yëla lo' tu chí'fido'? ³⁸ Guli'ná' yëla, en buli'lidzë' Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali' zoa caz sina', pero lu yöl-la' bönáchisö queëli' ricuúdi'li'.

³⁹ Ní'irö sa'yéajë' Jesús leyúbölö, rulidzë' Dios, en la' tuz ca gunnë'. ⁴⁰ Cate' böajë' leyúbölö ga na' nacu'ë, yöjxáquië' légaquië' tasië' tu' nadödité yëla lógaquië'. Bití' nözguequinë' bizxi didza' ulu'bi'ë, le ilë' Lë'. ⁴¹ Cate' böajë' le bunny luzuí ga na' nacu'ë, rë' légaquië':

—¿Rásitsali'? ¿Ruzi'tsa ládxi'li'? ¡Tsa'ti' gaz! ¡Chibidxín dza! ¡Buli'yútsöca, Neda', Bönni' Guljë' Bönachi, chinadóda' lu ná'agaca bönachi dul-la'! ⁴² ¡Guli'chasa, uyéajru! ¡Buli'yútsöca, chizë'ë bönni' na' udödë' neda' lu ná'agaca bönachi!

Ta'zönë' Jesús

(Mt. 26:47-56; Lc. 22:47-53; Jn. 18:2-11)

⁴³ Ní' ru'ë Jesús didza' ni, bidxinë' Judas, bönni' nabábalenë' chinnüë' na' dá'gaquië' Jesús, ate' zá'lengaquië' bönni' zían lë', nuá'agaquië' guié' tuchi', en yaga. Yugu' bixúz unná bë', en yugu' bönni' yudo' usedi, en bönni' gula tu'zéajni'inë' nasól-la'gaquië' légaquië'. ⁴⁴ Judas, bönni' na' rudödë' Jesús lu ná'agaquië' chinulu'ínë' légaquië' tu le gunë' le gaca bë' nu naca Jesús, gunnë':

—Bönni' na' utsaga lahua'-në', Lë' na' Jesús. ¡Guli'sönë', en guli'ché'ë! ¡Guli'yútsöquië'!

⁴⁵ Cate' bidxinë' Judas ni', la' gubíga'të' ga na' zoë' Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús. ⁴⁶ Ní'irö gula'zönë' Jesús, en gula'ché'ë Lë' nadzunë'.

⁴⁷ Ní'irò tuè' bõnni' ni' dè'è Jesús guléajè' guié tuchi', en benè'-bi' huè' bi'i huen dxin queè' bixúz lo. Guchúguiè' guídi nágabi'. ⁴⁸ Jesús gudxè' bõnachi na', rnnè':

—¿Narúajtsali' nuá'ali' guié tuchi', en yaga para sõnli' neda', runli' ca runli' cate' rizõnli'-nè' gubán? ⁴⁹ Yugu' dza guzóalena' libí'ili' rusédigacada' bõnachi ga naca chila yudo', ate' biti' guzxõnli' neda', pero raca caní para gaca le nazúaj lu guichi lá'ayi.

⁵⁰ Ní'irò yúgu'tè bõnni' usèda queè' Jesús bulu'cá'anè' Le', ta'zXúnnajè'.

Rixúnnajbi' tubi' bi'i ra'bán

⁵¹ Zóabi' ca' ni' tubi' bi'i ra'bán sõjnobi' Jesús, nuxóasõ cuinbi' tu lari' blaga'. Yugu' bõnni' na' nachè'gaquiè' Jesús gula'zõnè'-bi' ⁵² pero busanbi' lari' na', en xiguídisõbi' buzxúnnajbi'.

Rídxinè' Jesús lógaquiè' bõnni' yúlahui' lo

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Gula'chè'è Jesús lahuè' bixúz lo, ate' bulu'dubè' ni' yúgu'tè bixúz unná bè', en bõnni' gula tu'zéajni'inè', en yugu' bõnni' yudo' usedi. ⁵⁴ Pedro yõjnahué' Jesús zì'tu' zì'tu'sò, en guyaziè' ló'a lidxi bixúz lo na', en gurò'õlenè' tsòzxõn yugu' ni'a nè'è bixúz lo na', rutsè'e cuinè' ra' guí'.

⁵⁵ Yugu' bixúz unná bè' len yúgu'tè bõnni' yúlahui' lo bulu'guiljè' tu le ulu'subáguiè' Jesús para gaca ila'chúguiè' queè' gátie' pero biti' bi bulu'dzõlinè'. ⁵⁶ Bõnni' zían gula'nnè' queè' Jesús le cabi'nacatè, pero biti' yõjlõzagaca le gula'nnè' queè'. ⁵⁷ Ní'irò gula'zuinè' yugu' bõnni' gula'nnè' queè' Jesús le cabi'nacatè, ta'nnè':

⁵⁸ —Netu' biyõnitu' didza' bè'è bõnni' ni, gunnè': "Uquínna' yudo' ni, lè ni nequi lu ni'a lu na' bõnachi, ate' tsonna dzasõ uchisa' ia'tú le cabi nequi lu ni'a lu na' bõnachi."

⁵⁹ Lésca' lè ni, biti' yõjlõzagaca xtídza'gaquiè'.

⁶⁰ Ní'irò guyasè' bixúz lo na' gatsaj láchui'lõ bõnachi nacua' ni', en gunábinè' Jesús, rnnè':

—¿Naru' cabi'rubi'tso' didza'? ¿Bizxi na' ta'nnè' quiu' bõnni' ni?

⁶¹ Jesús, dxisõ zoè'. Biti' bi didza' rubi'è. Gunábinè' Lè' leyúbõlõ bixúz lo na', rnnè':

—¿Naru' nacu' Li' Cristo, Zxi'inè' Dios Lá'ayi?

⁶² Bubi'è didza' Jesús, rnnè':

—Naca'. Ilé'eli' neda', Bõnni' Guljè' Bõnachi, soa' cõ'a cuitè' ibèla Dios napa cazè' yõl-la' huáca cate' ni' huõda' lu bõaj lúxiba.

⁶³ Ní'irò bixúz lo na', lu yõl-la' rilé queè' guchõzè' lari' nácuè', rnnè':

—¿Núzxirò naquíniru' nu quixjõ'? ⁶⁴ ¡Riyõn quézili' rucá'anè' Dios cá'asõ len didza' ru'è! ¿Nacxi rusáca'li' queéli'?

Yúgu'tè' gula'chúguiè' queè' gátie'.

⁶⁵ Ní'irò gula'sí lógaquiè' bal-lè' tu'chejè' Jesús zXõna'. Bulu'sayjè' lahuè', en gulundé' Lè' zì, ta'nnè':

—Gunnè yá'atsõca' nuzxi na' bè' Li'.

Yugu' bõnni' ni'a nè'è bixúz lo gula'gápè'è ru'è Jesús.

Rnnè' Pedro biti' núnbè'è Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Cate' ni' zoè' Pedro ló'a zxan yu'u, bidxinbi' tubi' bi'i nigula huen dxin queè' bixúz lo na' ga na' zoè'. ⁶⁷ Cate' bilé'ebi' Pedro, rõ'è rutsè'e cuinè' ra' guí, buyubi' lè', rnnabi':

—Do'o ca' li' Jesús, bõnni' Nazaret na'.

⁶⁸ Gudá'baguiè' Pedro, rnnè':

—Biti' núnbè'a-nè', en biti' nõzda' bizxi na' rno'.

Burúajè' Pedro yõjsóè' ga nu riyaza ló'a. Ní'irò gurõdxiba' bõra. ⁶⁹ Buyubi' lè' leyúbõlõ bi'i nigula huen dxin na', en gusí lobí' rëbi' nupa nacua' ni':

—Bõnni' ni dzáguiè' légaquiè'.

⁷⁰ Leyúbõlõ gudá'baguiè' Pedro. Ia'lati' gudzé nupa nacua' ni' tè Pedro, ta'nná:

—Le nacatè dzagu' légaquiè', tu' nacu' bõnni' Galilea. Yõl-la' ru'isõ quiu' didza' naca bè'u, tu' tuz ca ru'ili' didza'.

⁷¹ Gusí lahuè' Pedro rudxía dõ' cuinè', en ruzõtjè' Dios, rnnè':

—Biti' ca' núnbè'a-nè' bõnni' na' ru'ili' didza' ca naca queè'.

⁷² La' gurõdxitèba' bõra le buropi luzuí. Ní'irò yõjnenè' Pedro didza' na' bè'è Jesús, gudxè' lè': "Zi'alõ cõdxiba' bõra le buropi luzuí, tsonna luzuí innó' biti' núnbè'u neda'." Cate' yõjnenè' didza' ni, gusí lahuè' ribõdxidè'è.

15

Rídxinè' Jesús lahuè' Pilato, bõnni' rinná bè'è

(Mt. 27:1-2, 11-14; Lc. 23:1-5; Jn. 18:28-38)

¹ Ni' naca zílado', yugu' bixúz unná bē' len bönni' gula tu'zėjni'inē', en yugu' bönni' yudo' usedi, en yúgu'tē bönni' yúlalui' lo gulún xtdza'gaquiē'. Ní'irō gula'chē'ē Jesús náguē'ē, en bulu'dödē' Lē' lu nē'ē Pilato, bönni' rinná bē'ē uláz que yödz Roma. ² Pilato gunábinē' Jesús, rnnē':

—¿Naru' nacu' Li' Bönni' inná bé'enē' bönachi judío?

Bubi'ē didza' Jesús, rnnē':

—Ca nácatē rno'.

³ Yugu' bixúz unná bē' bulu'zėjuiē' Jesús didza' le zían. ⁴ Ní'irō Pilato gunábinē' Lē' leyúbölō, rnnē':

—¿Naru' cabi rubi'itso' didza'? Buzétsöca' nagu' cate' xō zían le ta'nnē' quiu'.

⁵ Biti' bi didza' bubí'ē Jesús. Ca' guca, bubábinē' Pilato.

Ta'chúquiē' queē' Jesús gátíē'

(Mt. 27:15-31; Lc. 23:13-25; Jn. 18:38-19:16)

⁶ Dē tu le runē' Pilato cate' raca laní na', rusanē' lu ná'agaca bönachi tu bönni' nadzunē' lidxi guíē, núti'tēs nu ta'naba. ⁷ Nadzunē' tu bönni' lē' Barrabás lidxi guíē, ate' dzágagaquiē' lē' ia'bal-lē' luzē'ē, yugu' bönni' gulútiē' bönachi cate' gula'dá báguiē' yúlalui'. ⁸ Cate' bila'dxín bönachi zían ni', gula'sí lógaquiē' ta'nabē' lahuē' Pilato gunē' queégaquiē' ca run cazē'. ⁹ Bubi'ē didza' Pilato, rnnē':

—¿Rē'ēnili' usana'-nē' queēli' Bönni' Inná Bé'enē' Bönachi Judío?

¹⁰ Caní gunnē' Pilato tu' réquibe'enē' bulu'dödē' yugu' bixúz unná bē' Jesús lu nē'ē tu' tu'zék'enē' Lē'. ¹¹ Yugu' bixúz unná bē' na' gula'gu'ē xilá ládxi'gaca bönachi zían na', para ila'nabē' lahuē' Pilato usanē' lu ná'agaquiē' Barrabás. ¹² Ní'irō Pilato gunábinē' légaquiē' leyúbölō, rnnē':

—¿Bizxi rē'ēnili' guna' queē' bönni' na' ru'íli' lē', Bönni' Inná Bé'enē' Bönachi Judío?

¹³ Gulu'ē zidzaj didza', ta'nnē':

—¡Budē'ē lē'e yaga cruz!

¹⁴ Gunábinē' Pilato légaquiē', rnnē':

—¿Bizxi caz dö' nu'ē'?

Leyúbölō tu'ē zidzaj didza', ta'nnē':

—¡Budē'ē lē'e yaga cruz!

¹⁵ Tu' gú'unnē' Pilato gunē' ga ila'yaza ládxi'gaca bönachi zían na', busanē' Barrabás lu ná'agaquiē'. Ní'irō gunná bé'enē' nu quin Jesús, ate' budödē' Lē' lu ná'agaquiē' bönni' ulu'dē'ē Lē' lē'e yaga cruz.

¹⁶ Ní'irō yugu' bönni' rójáquiē' gudil-la gula'chē'ē Jesús lö'a yúlalui', ate' bulu'tubē' luzá'agaquiē' ni'. ¹⁷ Bulu'gácuē' Jesús tu lari' xiná gul-la, en gulunē' tu bregui' ni'a nē'e yötsi', le bulu'dxiē' icjē'. ¹⁸ Ní'irō gula'sí lógaquiē' tu'lidzē' Jesús, ta'nnē':

—¡Yöl-la' ba lí', rinná bé'enu' bönachi judío!

¹⁹ Gula'guiné' gui icjē', en bulu'chejē' Lē' zxōna'. Bulu'zóa xzibigaquiē' lahuē', en lu yöl-la' rutitaj gulunē' Lē' bal. ²⁰ Cate' budxi bulu'titjē' Lē', bulu'gúē' lari' xiná chul-la na' nácuē' ate' bulu'gácuē' Lē' lari' que cazē'. Ní'irō gula'chē'ē Lē' ní'ilo yúlalui' na' para tsójda'gaquiē' Lē' lē'e yaga cruz.

Tu'dē'ē Jesús lē'e yaga cruz

(Mt. 27:32-44; Lc. 23:26-43; Jn. 19:17-27)

²¹ Gulunē' ga bi'ē tu bönni' Cirene yaga cruz queē' Jesús, ridödisē' ni' suzē'ē la' guixi'. Lē' Simón, xúzgacabi' Alejandro, en Rufo.

²² Gula'chē'ē Jesús lataj na' nazí'i le Gólgota, tu didza' hebreo le rna lu didza' xidza', Lataj Que Böga' Íjaru'. ²³ Gulu'ē le guí'jē' Jesús xisi uva nutsi' nōri silá' que yaga mirra, pero Lē' bití' gu'ē le. ²⁴ Ní'irō bulu'dē'ē Jesús lē'e yaga cruz, ate' gula'guisíē' lari' nácuē', le gula'zí' que queégaquiē' bönni' na' rójáquiē' gudil-la. Bulu'bájē' le gaca bē' para ila'nōzinē' bizxilō idela' que queégaquiē'.

²⁵ Naca idú xsila cate' bulu'dē'ē Lē' lē'e yaga cruz. ²⁶ Didza' na' bulu'zōé' lē'e yaga cruz icjalē' Jesús ca naca le tu'quíē' Lē' rna caní: "Bönni' Rinná Bé'enē' Bönachi Judío." ²⁷ Bulu'dá'lenē' Jesús tsözxón lē'egaca yaga cruz chopē' gubán, tuē' cuíta lē'ē ibēla, en ia'tuē' cuíta lē'ē yögöla. ²⁸ Caní guca lē na' nazúaj lu guichi lá'ayi, rna: Gubábalenē' bönni' tuá' dö'.

²⁹ Yugu' bönni' ta'dödē' ni' tu'lidza zi'ē Jesús, en tu'tá ícjaqaquiē', ta'nnē':

—¡Ön! ¿Naru' uquinnajtsō' yudo' queē' Dios, ate' tsonna dzasō uchisatsu' le? ³⁰ ¡Busölá cuinu' na'a, en bötaj lē'e yaga cruz na'!

³¹ Lē'sca' caní yugu' bixúz unná bē', en yugu' bönni' yudo' usedi tu'titjē' Lē'. Tē' luzá'agaquiē' tuē' ia'tuē':

—Bönachi yúbölō busölē', pero bití' gaca usölá cuiné'.

³² Ta'nnē' ca':

—jŃn! ħNácatsu' Cristo, BŃnni' Inná Bé'enë BŃnachi Israel? jBŃtjatsŃca' na'a lë'e yaga cruz para ilë'etu', ate' tsëajlë'ëtu' Li'!

Yugu' bŃnni' na' dá'gaquië' tsŃzŃxn len Lë' lë'egaca yaga cruz bulu'lidza zi'ë ca' Lë'.

Le guca cate' gútië' Jesús

(Mt. 27:45-56; Lc. 23:44-49; Jn. 19:28-30)

³³ Cate' bidxín idú huagubidza, guchul-la idútë yŃdzŃliŃ. Guca caní ga bidxintë idú ridŃdi xihuŃ. ³⁴ Idú ridŃdi xihuŃ na' bë'ë Jesús zidzaj didza', rnnë':

—Eloi, Eloi, ħlama sabactani?

Didza' hebreo ni rnna lu didza' xidza': Dios quia', Dios quia', ħbizx que nubëaj lădxu' u neda'?

³⁵ Yugu' bŃnni' nacu'ë ni' bila'yŃnnë' didza' ni, ate' ta'nnë':

—Bulí'zëtsŃca' nágalí'. Elías rulidzë'.

³⁶ Ní'irŃ guxití'ë tu bŃnni' nŃtsë'ë lădjagaquië', en buxúpinë' nupi zi tu le bululu rë'aj nisa. Budë'ë le lahui gui, en bë'ë le xupë' Jesús, rnnë':

—CŃztsŃca' ru', uyuru' channŃ huidë' Elías uzŃtjë' Lë'.

³⁷ GurŃdxi'ë zidzaj Jesús, en la' gútitë'. ³⁸ BirŃza' lari' yŃdx nala' lu yudo'. Birúaj chŃplŃ, gudela' icjlŃ, en birúajtë zxánilŃ. ³⁹ BŃnni' na' rinná bë'enë' bŃnni' rŃjáquië' gudil-la zuinë' lahuë' Jesús, en bilé'enë' ca na' guca gurŃdxi'ë Jesús, en la' gútitë', ate' gunnë':

—Le nácatë bŃnni' ni gúquië' Zxi'inë' Dios.

⁴⁰ Nacuá'anu ca' ni' nigula, zí'tu'sŃ tu'yunu. NŃtsa'gacanu lădjagacanu María Magdalena, en Salomé, en María, xiná'agacabi' Jacobo cuidí', en José. ⁴¹ Nigula ni yŃjácálenmu Jesús cate' ni' gudë' luyú Galilea, en gulácalennu Lë', gula'gú'unu le gulahuë'. Nacuá'anu ca' ni' ia'bálanu nigula zían gula'zá'lennu Lë' lu yŃdzŃ Jerusalén.

Ta'gu'ë Jesús yeru ba

(Mt. 27:57-61; Lc. 23:50-56; Jn. 19:38-42)

⁴² Chizá' ral-la, en naca dza tu'pë'ë, dza si' idxín dza lá'ayi quëgaquië' bŃnni' judío. ⁴³ Que lë ni na' bidë' José, bŃnni' yŃdzŃ Arimatea, bŃnni' lo lădjagaquië' bŃnni' yúlalhui' lo. RibŃzë' ca' dza idinná bë'ë Dios. Idú lădxë'ë guyázië' ga na' zoë' Pilato, en gunábinë' lë' gu'ë lë' lataj u'ë Jesús. ⁴⁴ Bubáninë' Pilato tu' gunnë' chigútië' Jesús, ate' bulidzë' bŃnni' na' rinná bë'enë' bŃnni' rŃjáquië' gudil-la para inábinë' lë' channŃ chinátie' Jesús. ⁴⁵ Cate' biyŃnnë' ca na' gunnë' bŃnni' na' rinná bë'enë' bŃnni' rŃjáquië' gudil-la, bë'ë José lataj u'ë Jesús. ⁴⁶ Ní'irŃ José na' gú'uë' tu lari' xtila dxí'ado', ate' buzŃtjë' Jesús lë'e yaga cruz, en buchŃlinë' Lë' lari' na'. Ní'irŃ gulu'ë Lë' yeru ba nadaj lë'e gu'á guiŃj. Budë'ë tu guiŃj blaga zŃxn ga nu riyaza ba na'. ⁴⁷ María Magdalena, en María, xinë'ë José tu'yunu ga na' ta'gu'ë Jesús.

16

Rubanë' Jesús lu yŃl-la' guti

(Mt. 28:1-10; Lc. 24:1-12; Jn. 20:1-10)

¹ Cate' chinadŃdi dza lá'ayi quëgaca bŃnachi judío le naca dza gadxi, María Magdalena, en Salomé, en María, xinë'ë Jacobo, ta'zi'ínu yugu' le rilá' zxixi para tsŃjlú'ugacanu Jesús. ² Ní' naca zilado' dza risi lo, yŃjácánu ra' yeru ba queë'. Bila'dxinnu ni' cate' si' gulën gubidza.

³ Gula'nábinu luzá'agacanu:

—ħNuzxi cúatsŃ queëru' guiŃj na' da' ga nu riyaza ba queë'?

⁴ Cate' bila'dxinnu ni', bulu'yunu, en bila'lë'enu chinadŃza guiŃj na', ate' guiŃj zŃxn naca.

⁵ Gula'yú'unu yeru ba lë'e gu'á guiŃj na', ate' ni' bila'lë'enu-bí' tubi' bí'i bŃnni' ra'bán, nácabi' gubáz lá'ayi queë' Dios. RŃ'Ńbi' tsŃlá'a ibëla lu yeru ba na', nácubi' lari' tunna chigu'ichido'os. Guládxide'enu. ⁶ Ní'irŃ bí'i na' gúdxibi' lëgacanu, rnnabi':

—Bí'ti'rŃ gádxili'. Rugu'álajlí' Jesús, BŃnni' Nazaret, BŃnni' na' gudë'ë lë'e yaga cruz.

Chibubanë'. Biti' zoë' ni. Buli'yú ga ni gula'gu'ë Lë'. ⁷ Guli'tsëaj na'a, guli'tsŃjtixjŃi' ca' yugu' bŃnni' usëda queë', enca' Pedro. Guiëli' lëgaquië': "Tsejë' Jesús luyú Galilea zí'alŃ ca libí'ili'. Ní' ulé'eli'-në' ca na' chigudxi cazë' libí'ili'."

⁸ Ní'irŃ bulu'rúajnu ni', bulu'zŃúnajnu ra' yeru ba na' tu' ta'zŃzínu lu yŃl-la' radxi ridzŃbi quëgacanu. Cuntu nu gulënu ca' tu' tădxinu.

Rulu'í lahuë' Jesús lonu María Magdalena

(Jn. 20:11-18)

⁹ Cate' bubanë' Jesús zilado' dza na', buluí'í lahuë' zí'alŃ lonu María Magdalena, nigula na' bubëajë' gadxi bö' xihu' gula'yú'u lënu. ¹⁰ Guyëajnu yŃjtixjŃi'ínu nupa na' gula'dalen Jesús. Nupa ni ta'sëbi lădxí'gaca, en ta'bŃdxi yechi'. ¹¹ Cate' bila'yŃni didza' ru'ínu, zoë' nabanë' Jesús, ate' bilé'e quëzínu Lë', bití' gula'yëajlë' lënu.

Chopë' bönni' usëda queë' Jesús tu' lé'enë' Lë'
(Lc. 24:13-35)

¹² Gudödi na', nadzá'alö buluf'i lahuë' Jesús lógaquië' chopë' bönni' usëda queë' yú'ugaquië' nōza, sōjáquië' ga naca ladaj guixi'. ¹³ Ní'irö bulu'dxinë', dutíxjö'i'iguequinë' ia'zica'rë', ate' ni xtídza'gaquië' bití' gula'yéajlë'ë.

Le rigü'ë Jesús lu ná'agaquië' bönni' gubáz queë'
(Mt. 28:16-20; Lc. 24:36-49; Jn. 20:19-23)

¹⁴ Ga yöjsetë, buluf'i lahuë' Jesús lógaquië' idxinéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládxi'do'gaquië', tu' cabí gula'yéajlë'ë xtídza'gaca nupa na' bila'lé'e Lë' nubanë'. ¹⁵ Ní'irö gudxë' légaquië', rnnë':

—Guli'tséaj idútë yödzölió tsōjenli' libán que didza' dxi'a lógaca yúgu'të bōnachi. ¹⁶ Nu tséajlë' neda', en idila nisa, ulá nu na', pero nu bití' tséajlë', irugu que gati nu na'. ¹⁷ Le ilaca bē' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca bōnachi, en ilu'ë didza' izá'a. ¹⁸ Channō ila'zōnë'-ba' bēla sínia' lu ná'agaquië', o channō ile'jē' le nachë' yöl-la' guti, bití' bi gun quégaquië'. Ila'xóa nē'ë nupa te'e, ate' ulu'huōácátë.

Ruhuëpë' Jesús yehua' yubá
(Lc. 24:50-53; Hc. 1:6-11)

¹⁹ Cate' Xanru' budxi'bē'lenë' légaquië' didza' ni, buchisë' Dios Lë' yehua' yubá ga ni' gurō'ë cuitë' ibēla Lë'. ²⁰ Bila'rúajë' légaquië', yöjéngaquië' libán yúgu'të yödzö. Gúcalenë' Xanru' légaquië', en benë' ga gulunë' le nácgaca bē' naca idútë li didza' tu'ë. Ca' naca.

DIDZA' DXI'A BUZÚAJĚ' LUCAS

Didza' rigu'ë Lucas lu në'ë Teófilo

¹ Zían nupa chigulún bayudxi ulu'zúaj lu guichi idútë le nácatë, le guca ga zóaru', ² ca na' bila'lë'ë nupa ni' dza ni'te, ate' bulu'lu'í rë'u, en bulu'zë didza' que. ³ Teófilo, bönni' tsáhu'i'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguilaj bubéquia' ga ze lo dzö' ca naca yúgu'të lë na' guca dza ni'te. ⁴ Ruzúaja' quiu' lu guichi ni para inözínu' naca idútë li lë na' chinazëdu'.

Rulu'ínë' gubáz lá'ayi queë' Dios ca si' gálajbi' Juan, bönni' uquilë' bönachi nisa

⁵ Dza ni'te cate' gunná bë'ë Herodes luyú Judea, ni' zoë' tu bixúz lë' Zacarías. Nabábalenë' cö' bixúz, nazí' i le Cö' Queë' Abías. Elisabet, nigula queë' Zacarías na' nácanu ca' xzí'ini xi'sóë' Aarón, bönni' gúquië' bixúz lo dza ni'te. ⁶ Nácagaquië' Zacarías, en Elisabet tsahui' lahuë' Dios, ate' idú ládxi'gaquië' tunë' ca rna xtídzë'ë Dios, en le rinná bë' xibá queë'. Caní guca, cuntu nu guca bi innë' queégaquië', tu' nácanu Elisabet nigula huödx, ate' chinagúлагаquië' irópatë'.

⁸ Guca beo' gul-la' uláz que cö' na' nabábalenë' Zacarías ilunë' dxin lahuë' Dios, lu yöl-la' bixúz queégaquië'. ⁹ Ca naca le nulaga lógaquië' tunë' bixúz, gul-la' uláz queë' Zacarías guyózië' lu lataj lá'ayi ca' nalu' para uzéguië' yalaj lahuë' Xanru' Dios. ¹⁰ Tsanni ni' ruzéguië' Zacarías na' yalaj, gula'cuá' yúgu'të bönachi ní'ilö, tu'lidza Dios. ¹¹ La' ná'asö bulu'í lahuë' gubáz lá'ayi queë' Xanru' ga zoë' Zacarías na'. Zuínë' gubáz na' tsölá' a ibëla bucugu lá'ayi ga na' régui yalaj. ¹² Cate' bilé'enë' Zacarías gubáz lá'ayi na', gurö'ë böniga, en gudxi bidzöbinë'. ¹³ Ní'irö gubáz lá'ayi na' gudxë' lë', gunné':

—Zacarías, biti' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bi' tubi' bi'í bönni'do', ate' gu'u labi' Juan. ¹⁴ Gata' quiu' le uzi' u xibé, en udzëjanu', ate' zían nupa ulu'dzeja ládxi'gaca cate' gálajbi' bí'ido' na', ¹⁵ tu' gácatëbi' xzön lahuë' Dios. Biti' gu'ájbi' xisi uva, en calëga tu le rusudxi bönachi, ate' sóalenë'-bi' Dios Bö' Lá'ayi cate' isí lo si' gálajbi'. ¹⁶ Gunë' Juan ni' ga ulu'huóaca zían bönachi Israel queë' Xanru'. ¹⁷ Inöruë' lë' ca Xanru', ate' ila'cuá'alen lë' Bö' na', en yöl-la' huáca na' gula'cuá'alen Elías, bönni' bë'ë didza' uláz queë' Dios dza ni'te. Caní gunë' para únë' tuz nupa nácagaca xuz len xzí'inigaquië', en uzéajni'inë' nupa ta'dá'baga' para ilácagaca tsahui', en ucözë' bönachi para ila'zi' lu në'eguequi Xanru'.

¹⁸ Zacarías gunábinë' gubáz lá'ayi na', rnnë':

—¿Bixzi gaca bë' para inözda' ilaca lë ni? Chinagúla' neda', en chinagúlanu ca' nigula quia'.

¹⁹ Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lë cazë' gusöl-lë'ë neda' para gü'ílena' li' didza', en usiyönda' li' didza' dxi'a ni. ²⁰ Na'a, tu' cabi guyéajlë' u xtídz'a'a, icödz'u', en bití'rö gaca innö' cate' gácarö lë ni. Yúgu'të lë ni udxín cate' idxín dza que.

²¹ Tsanni ni' raca lë ni, nacuá' bönachi ní'ilö, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi. ²² Cate' burúajë' Zacarías, biti' guca gü'ílenë' légaquië' didza', ate' guléquibe'enë' bilé'enë' tu le bulu'ínë' Dios lë' lu lataj lá'ayi. Bulá'a bulu'isë' Zacarías, buzéajni'inë' légaquië', tu' cabi raca innë'.

²³ Cate' bizá'a yugu' dza na' ral-la' gunë' dxin Zacarías lahuë' Dios, ní'irö böajë' lidxë'. ²⁴ Gudödi yugu' dza na' Elisabet, nigula queë' Zacarías na', biá'anu-bi' lë'ënu bí'ido', ate' idú gayu' beo' bugá'anasinu ga zoa lódxigaquië'. Guzá' ládxi'nu, rnanu: ²⁵ "Caní runë' Xanru' quia'. Ruzá' ládxë'ë quia' bí'ido', en runë' ga bití'rö utu'ida' lógaca bönachi."

Rigúxjö'ë gubáz lá'ayi ca si' gálajbi' Jesús

²⁶ Cate' chiguca xopa beo', bulu'í'í lahuë' gubáz lá'ayi na', tu' gusöl-lë'ë Dios lë cazë' Gabriel, tsejë' Nazaret, tu yödzo luyú Galilea. ²⁷ Dios gusöl-lë'ë lë' ni' tsöjyüë'-bi' tubi' bi'í nigula ra'bando' lëbi' María. Chinazí' lu ná'abi' María utsaga ná'alenbi'-në' bönni' lë' José. Nababë' José di'a dza queë' David, bönni' gunná bë'enë' bönachi Israel dza ni'te. ²⁸ Cate' guyózië' Gabriel na' ga zóabi' María, gudxë'-bi':

—Padiux. Dios ruzá' ládxë'ë quiu'. Xanru' Dios zóalenë' li'. Lë cazë' benë' ga nácaru' li' bica' ba ca yúgu'të nigula.

²⁹ Cate' bilé'ebi' María gubáz lá'ayi na', gurö'öbi' böniga tu' nözi didza' na' bë'ë, en rubani ládxi'bi' naxci sa'yéaj didza' na' bulidzë'-bi' gubáz lá'ayi na'. ³⁰ Ní'irö gubáz lá'ayi na' gudxë'-bi', rnnë':

—María, biti' gádxinu', tu' chibidéli'nu' le ruzá' ládxë'ë Dios quiu'. ³¹ Na'a, tsú'ubi' tubi' bí'ido' lë'u, ate' uzú'-bi' tubi' bi'í bönni'do', ate' gu'u labi' Jesús. ³² Jesús ni tsëpisëtë'rë', en si' Lë' Xzí'inë' Dios, Nu nayëpisëtë'rë'. Xanru' Dios gunë' ga inná bë'ë ca na' gunná bë'ë David,

xuz gula gudödi queë'. ³³ Jesús na' inná bé'etica'sinë' bönachi Israel, ate' le inná bë'ë Lë' catu caz tödi que.

³⁴ Ní'irö María gunábibi' gubáz lá'ayi na', rnnabi':

—¿Nacxi caz gaca lë ni, tu' cabí zóalena' bönni'?

³⁵ Bubi'ë didza' gubáz lá'ayi na', rë'ë-bi':

—Guidë' Dios Bó' Lá'ayi ga zu', ate' yöl-la' huáca queë' Dios, Nu nayépisëtërö, sóalen li', le gaca ca tu zxul-la rigú'u bój ga zu'. Que lë ni na' bi'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxi'inë' Dios. ³⁶ Cá'anqueze Elisabet, nigula di'a dza quiu', chinuá'anubi' lë'ënu tubi' bi'i bönni'do' sal-la' chinagúlanu. Gula'nnë' queënu: "Nácanu nigula huödx", pero chizéaj xopa beo' nuá'anubi' lë'ënu bí'ido' na'. ³⁷ Biti' bi' zoa le cabí séqui'në' Dios.

³⁸ Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'.

Ní'irö la' buza'të' gubáz lá'ayi na' ga zóabi' María.

María sōjyubi'-nu Elisabet

³⁹ La' dza ní'sö guyú'ubi' nōza María, ate' carelō sa'yéajbi' ga naca gu'ado', en bidxinbi' tu yödzo luyú Judea. ⁴⁰ Ní' guyázabi' lidxë' Zacarias, en gúdxibi'-nu Elisabet:

—Padiux.

⁴¹ Cate' biyóninu Elisabet didza' na' bë'ëbi' María, la' butátë cuinbi' bi'i huë'enido' na' yú'ubi' lë'ënu, ate' bidisóalenë'-nu Dios Bó' Lá'ayi. ⁴² Ní'irö bë'ënu Elisabet zidzaj didza', rnnanu:

—¡Chinunë' Dios ga nácaru' li' bica' ba ca yúgu'të nigula, en chinunë' ca' ga nácabi' bica' ba bí'ido' na' yú'ubi' lë'u! ⁴³ ¿Núzxitë neda', zá'anu xinë'ë Xana' quia'? ⁴⁴ Cate' biyönda' didza' bë'u, bulidzu' neda', lu yöl-la' rudzeja queëbi' la' butátë cuinbi' bi'i huë'enido' ni yú'ubi' lë'a. ⁴⁵ ¡Bica' ba li' tu' guyéajlë'u xtídzë'ë gubáz lá'ayi, ate' udxin caz lë na' gudxë' li' uláz queë' Xanru'!

⁴⁶ Ní'irö gunabi' María:

¡Ídütë le naca' rigú'u Xanru' yöl-la' ba,

⁴⁷ en rudzeja lãdxi'lëna'-në' Dios, Nu rusölá neda'!

⁴⁸ ¡Dios caz buzá' lãdxë'ë quia' neda'!

Yu'a lu në'ë, en tsaz naca' huen dxin queë'.

Na'a isí lo, ca naca quia' ila'nná:

Bica' ba nigula na'.

⁴⁹ ¡Zxöntërö naca le benë' Dios unná bë' quia'!

¡Lá'ayi naca Lë'!

⁵⁰ Lë' ruhuéchi' lãdxi'tica'së' bönachi tadxi Lë' na'a dza, en dza zá'gaca.

⁵¹ Yugu' yöl-la' huáca zxon chibenë' Lë'.

Buzójtjë' nupa gulún zxon yöl-la' réajni' i' quéguequi.

⁵² Bugúë' yöl-la' unná bë' quégaca nupa gulaca lo, en benë' ga gulaca lo nupa gulaca nõxaj lãdxi'.

⁵³ Benë' ga bulu'huólaj bulu'dzë'e nupa gula'dún, en bucá'anë' cá'asó nupa bila'lë'e yöl-la' tsahui'.

⁵⁴ Gúcalenë' bönachi Israel, nupa na' tun xichinë', tu' yójnenë' légaquië', en buéchi' lãdxë'ë légaquië'.

⁵⁵ Benë' ca guzxi' lu në'ë gunë' quégaquië' xuz xtó'oru' enca' queë' Abraham, en quégaca di'a dza queë'.

⁵⁶ María bugá'analenbi'-nu Elisabet idú ca tsonna beo', ate' gudödi ni' bójabi' lídxibi'.

Le gaca cate' gúlajbe' Juan, bönni' uquilë' bönachi nisa

⁵⁷ Cate' bidxin dza ral-la' sóabi' bí'ido' queënu Elisabet, buzóanu-bi' tubi' bi'i bönni'do'. ⁵⁸ Bila'yöni dzaga yu'u queënu, en yugu' di'a dza queënu ca na' guca, buéchi' lãdxë'ë-nu Dios, ate' bulu'dzëjalënu. ⁵⁹ Cate' chiguca xunu' dza zóabi' bí'ido' na', bila'dxinë' di'a dza queënu para ila'chúguië' lu xipëla'bi' bi'i bönni'do' na' lë na' gaca bë' néquibi' queë' Dios, ate' t'ënnë' ilu'ë labi' Zacarias ca na' lë' xúzibi'. ⁶⁰ Ní'irö bubí'inu didza' Elisabet, xiná'abi', rnnanu:

—Calëga. Juan si' labi'.

⁶¹ Gula'nábinë'-nu, ta'nnë':

—¿Bizx que? Cuntu nu di'a dza quiu' lë' Juan.

⁶² Ní'irö bulu'lá' bulu'lufisinë', gula'nábinë' xúzibi' nacxi rë'ënë' gu'ë labi'. ⁶³ Zacarias na' gunabë' tu blágado', ate' buzúajë' lahui caní: Juan lëbi'. Bulu'bábinë' yúgu'të'. ⁶⁴ La' ní'sö böáljatë ru'ë Zacarias na', en bugúitjatë lúdxë'ë, ate' bë'ë didza' le gulu'ë Dios yöl-la' ba. ⁶⁵ Ní'irö gulãdxinë', en bulu'bábinë' yúgu'të dzaga yu'u quégaquië', ate' yúgu'të yödzódo'

nacuá' lu guí'ado' luyú Judea, guzè didza' ca guca lè ni. ⁶⁶ Gula'zá' ládxí'gaca yúgu'tè nupa bila'yòni ca na' guca, ta'nná: "¿Nacxi caz gácabi' bi'i bõnni'do' ni? Le nácate Xanru' zóalenë-bi'."

Didza' bē'ē Zacarías uláz queē' Dios

⁶⁷ Ní'irò Dios Bò' Lá'ayi bidisóalenë' Zacarías, xúzibi' Juan, ate' bē'ē didza' uláz queē' Dios, rnnē':

⁶⁸ jYól-la' ba Dios, Xángaca bõnachi Israel tu' buduyúè' rè'u, bõnachi queē', en bõá'uè' rè'u!

⁶⁹ jGusól-lè'è queèru' Bõnni' usólé' rè'u, len yól-la' huáca zxon queè'!

Bõnni' ni guljè' ládajgaca di'a dza queē' David, huen dxin queē' Dios.

⁷⁰ jDza ni'te guzxi' lu nē'è gunè' ga gaca caní! Raca ca na' gunnè' lu ruá'agaquiè' bõnni' gulu'è didza' uláz queē'.

⁷¹ Guzxi' lu nē'è usólé' rè'u lu ná'agaca nupa tequi rè'u zi,

enca' lu ná'agaca nupa biti' ta'lé'e rè'u dxi'a.

⁷² Guzxi' lu nē'è huéchi' ládxè'è xuz gudòdi queèru', en tsõjnenè' le guzxi' lu nē'è le naca lá'ayi.

⁷³ Lè ni benè' tsutsu xtídzè'è, en guzxi' lu nē'è, le gunè' queē' Abraham, xuz gudòdi queèru', le naca tu le ral-la' gunè' queèru' rè'u.

⁷⁴ Guzxi' lu nē'è usólé' rè'u

lu ná'agaca nupa biti' ta'lé'e rè'u dxi'a para cabirò gádxiru' gunru' xichinè' Lè',

⁷⁵ en para gácaru' ba'a ladxi', en idú dxi'a lahuè' Lè' yúgu'tè dza sóaru' ibanru'.

⁷⁶ Li', zxi'ina do', si' lo' bõnni' ru'è didza' uláz queē' Dios unná bē' tu' tsõjnõru' ca Xanru' caz, en upó'o nõza ga tódè'.

⁷⁷ Gunu' ga ila'nõzi bõnachi queē' ca gaca ulu'lágaca, en ca na' uniti lahuè' Dios dul-la' nabága'gaca.

⁷⁸ Caní gaca, tu' ruhuéchi'da' ládxè'è Dios rè'u, en runè' ga tseni' queèru' Bõnni' na' náquiè' bení idú.

⁷⁹ Lè' uzení'è quégaca nupa nacué' gapa naca chul-la, en gapa nacué' nupa chizóa ilátigaca para ugú'è rè'u nõza ga cõ'õ dxi ládxí'do'oru'.

⁸⁰ Guzxõnbi' bi'i bõnni'do' na', en bidipa ládxí'bi'. Guzóasibi' gapa naca lu lataj cá'asõ cate' bidxinrò dza buluí'i lobi' lógaca bõnachi Israel.

2

Le guca cate' gúlajbi' Jesús

(Mt. 1:18-25)

¹ Lu dza na' gunná bē'ē Augusto César, bõnni' Roma, ila'yaza lu guichi yúgu'tè bõnachi nacué' yõdzõlió. ² Cate' gusí lo ta'yaza lu guichi caní, rinná bē'è bõnni' lè' Cirenio luyú Siria. ³ Yúgu'tè bõnachi yõjaca yõdzõ que queèguequi ga na' zeaj nababa para ila'yaza lu guichi. ⁴ Guzè'è José yõdzõ Nazaret luyú Galilea, sa'yéajè' luyú Judea, en bidxinè' yõdzõ Belén, ga ni' guljè' David, tu' guljè' José ládajgaca di'a dza queē' David na'. ⁵ Guyijè' José ni' para tsaziè' lu guichi, ate' dzágabi'-nè' Maria, bi'i nigula nazí' lu ná'abi' utsaga ná'alenbi' lè', en chizóa sóabi' bí'ido' queèbi'. ⁶ Cate' ni' nacué' lu yõdzõ Belén, bidxín dza sóabi' bí'ido' queèbi'. ⁷ Buzóanu-bi' tubi' bi'i bõnni'do', bi'i huáca queènu. Buchólinu-bi' yugu' lári'do', ate' gudíxjanu-bi' tu lu yú'udo' ga tun chí'i le táguba' bõa' quégaca bõnachi yú'ugaca nõza. Caní guca, tu' cabí bidzõli lataj ila'cu'è lu yu'u' ga ni' ta'dxin bõnachi yú'ugaca nõza.

Tu'lu'i lahuè' gubáz lá'ayi queē' Dios ga nacué' bõnni' tu'yúè'-ba' bõ'cu' zxila'

⁸ Gala' ra' yõdzõ Belén nacué' bõnni' tu'yúgaquiè'-ba' bõ'cu' zxila' la' guixi', tapa chí'igaquiè'-ba' chí'i dzõ'óló. ⁹ La' buluí'itè lahuè' gubáz lá'ayi queē' Xanru' ga na' nacué'. Yól-la' bení' queē' Xanru' buzeni' ga na' nacué', ate' guládxinè'. ¹⁰ Ní'irò gubáz lá'ayi na' gudxè' légaquiè', rnnè':

—Biti' gádxili'. Na'a rusiyõnda' libí'ili' didza' le gun ga udzèjade'eli, le ulu'zí' ca' xibé yúgu'tè bõnachi. ¹¹ Na'a chigúlajbi' lu ladzè' David Nu usólá libí'ili'. Nu ni naca Cristo, Xanru'. ¹² Lè ni gaca bē'èbi'. Udzóli'bi' bí'ido' na', narólibi' yugu' lári'do', en dèbi' tu lu yú'udo' ga tun chí'i le táguba' bõa' quégaca bõnachi yú'ugaca nõza.

¹³ Ga na' zoë' gubáz lá'ayi na', tsárido'os bulu'lu'i lógaquië' zíanrö ca' gubáz lá'ayi queë' Dios, narúajgaquië' yehua' yubá, en ta'gu'ë Dios yöl-la' ba, ta'nnë':

¹⁴ ¡Yöl-la' ba Dios zoë' xitsá',
ate' luyú gaca le cuéqui dxi ládxi'do'gaquië'
bönni' raza ládxi'ë Dios légaquië'!

¹⁵ Cate' bulu'z'ë gubáz lá'ayi na' ga ni' nacu'ë, sòjhuöjgaquië' yehua' yubá, ní'irö gulë luz'ë tuë' ia'tuë' bönni' uyú bö'cu' zxila' na', ta'nnë':

—Uyëajtsöca'ru' Belén para ilé'eru' lë ni chiguca ca na' chibusiyönnë' Xanru' rë'u.

¹⁶ La' yójacatië', ate' yójxáca'gaquië' María len José, enca' bí'ido' na', dëbi' tu lu yú'udo' ga tun chi'i le táguba' böa' quégaca bönachi yú'ugaca nöza. ¹⁷ Cate' bila'lé'enë' lëbi', gula'guixj'ö'ë lë na' si' busiyönnë' gubáz lá'ayi na' légaquië' ca naca queëbi' bí'ido' na'. ¹⁸ Bulu'bani' yúgu'të nupa bila'yöni didza' gulu'ë bönni' tu'yüé' bö'cu' zxila' na'. ¹⁹ María gulu'usö icja náganu didza' ni, ate' guzá' ládxi'nu ca naca que. ²⁰ Sòjhuöjgaquië' bönni' na' tu'yüé'-ba' bö'cu' zxila', tunë' zxon' Dios, en ta'gu'ë Lë' yöl-la' ba ni'a que yúgu'të lë na' bila'yönnë', en bila'lé'enë', le guca ca na' busiyönnë' gubáz lá'ayi na' légaquië'.

Ta'gu'ë-bi' bí'ido' Jesús lu në'ë Dios

²¹ Cate' chiguca xunu' dza zóabi' bí'ido' na', gula'chúguie' lu xipëla'bi' lë na' naca bë' néquibi' queë' Dios, ate' gulu'ë labi' Jesús ca na' chibë' cazë' labi' gubáz lá'ayi na' z'í'älö cate' si' tsú'ubi' lë'ënu xiná'abi'.

²² Cate' chibizá'a dza que le tu'pá'a cuíngacanu nigula ca rinná bë' xibá queë' Moisés, gula'chë'ë-bi' bí'ido' Jesús yödzo Jerusalén para ila'gu'ë-bi' lu në'ë Xanru' Dios. ²³ Caní gulunë', tu' nazúaj lu guichi lu xibá queë' Xanru' le rnna: “Yúgu'tëbi' bi'i bönni'do' nácagacabi' bi'i z'í'älö queënu xiná'agacabi', ulu'bëajë'-bi' quez queë' Xanru' Dios.” ²⁴ Que lë ni na' yójáquië' ni' para ilütü'-ba', en ila'gú'ë-ba' lahuë' Dios chópaba' gúgudo' o chópaba' budödu' ca na' rinná bë' xibá queë' Xanru' Dios.

²⁵ Dza ní'sö zoë' tu bönni' lë' Simeón lu yödzo Jerusalén. Bönni' ni náquië' tsahui', en reaj ládxi'ë Dios. Ribözë' Bönni' na' isöl-lë'ë Dios, Bönni' na' gácalenë' bönachi Israel. Dios Bö' Lá'ayi zóalenë' Simeón na', ²⁶ en chibulul'inë' lë' biti' gátie' cate' ilé'erönë' Cristo, Bönni' na' isöl-lë'ë Xanru' Dios. ²⁷ Bidxinë' Simeón na' chila yudo' tu' guchë'ë Dios Bö' Lá'ayi lë' ni'. Cate' xuz xiná'abi' gula'chë'ë-bi' bí'ido' Jesús chila yudo' para ilunë' queëbi' ca rinná bë' xibá na', ²⁸ ní'irö bunidë'-bi' Simeón na', en guyéaj ládxi'ë Dios, rnnë':

²⁹ Xana', na' a huáca gunnu' neda' lataj gátia', soa dxi ládxa'a tu' chiguca le gudxu' neda', huen dxin quiu'.

³⁰ Chibilë'eda' Nu na' buzóa cazu', Nu usölá bönachi,

³¹ Nu na' ulú'u lahui lógaca yúgu'të bönachi.

³² Lëbi' nácabi' bení' le uzení' bönachi izá'a, en nácabi' ca' bení' quégaca bönachi Israel quiu'.

³³ Bulu'bánninë' José, en María, xiná'abi' bí'ido' Jesús, ca naca lë na' gunnë' Simeón ca naca queëbi' Jesús. ³⁴ Simeón na' gunábinë' Dios gunë' ga gaca dxi'a quégaquië', ate' gudxë'-nu María, xiná'abi' Jesús, rnnë':

—Buyútsöca'. Bi'i ni nuzözë'-bi' Dios para gunbi' ga ila'chixi bönachi zían, ate' ulu'huóása bönachi zían ladaj bönachi Israel. Gácabi' tu le naca bë', ate' ila'nnë' bönachi queëbi'. ³⁵ Gaca caní para ila'lá' lahui le ta'zá' ládxi'gaca bönachi zían. Yugu' lë ni ilaca quiu' ca tu guié' tuchi' le tsaza ládxi'do'.

³⁶ Ana, nigula ru'ínu didza' uláz queë' Dios, zóanu ca' ni'. Nácanu zxi'inë' Fanuel, bönni' nababë' di'a dza queë' Aser. Chinagúlada'anu Ana na', tu' guzóalennu bönni' queënu idú gadxi iz gudödi gúcanu ra'bandö', ³⁷ ate' bugá'ananu tuzi cate' bidxintë dza chiyú'unu idú ca tápalalay' yu' tapa iz. Biti' ca' rubi'í ruzá'anu ga naca chila yudo'. Rëla, en te dza reaj ládxi'nu-në' Dios, runnu gubasa, en rulídzanu-në' Dios. ³⁸ La' ná asö bidxintënu ni', rënu-në' Dios: “Xclenu'.” Gudíxjöi'ínu yúgu'të bönachi ca naca queëbi' bí'ido' Jesús, bönachi na' nacuá' Jerusalén, nupa ta'böza dza idxín Nu na' isöl-lë'ë Dios para gácalen bönachi.

Sòjhuöjgaquië' José, en María yödzo Nazaret

³⁹ Gudödi gulunë' José, en María yúgu'të le rinná bë' xibá queë' Xanru' Dios, yòjhuöjgaquië' ládzagaquië' Nazaret luyú Galilea. ⁴⁰ Guzxönbi' bí'ido' Jesús, en bidipa ládxi'bi'. Guta' queëbi' yöl-la' réajni', ate' zxon' naca le ruzá' ládxi'ë queëbi' Dios.

Rudxinbi' bí'ido' Jesús chila yudo'

⁴¹ Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto. ⁴² Cate' chiyú'ubi' chinnu iz bi'i Jesús, yójáquië' Jerusalén ca tun cazë' cate' raca laní na'. ⁴³ Cate' gudödi laní, sòjhuöjgaquië', ate' bugá'anabi' bí'ido' Jesús Jerusalén, pero biti' téquibe'enë' José, en María,

xiná'abi' Jesús. ⁴⁴ Tu' téquinë' nútsa'bi' ladaj bönachi zían yú'ulengaca légaquië' nöza, tu dza nayá' gula'zë'ë. Ní'irö cate' bulu'guiljé'-bi' gapa nacua' di'a dza quegaquië', en gapa nacua' nupa núnbë'gaquië' ⁴⁵ biti' bulu'dzölinë'-bi'. Que lë ni na' yöjhuöjgaquië' Jerusalén, söjdíljagaquië'-bi'.

⁴⁶ Cate' chiguca dza bunny, bulu'dzölinë'-bi' ga naca chila yudo', rö'öbi' gatsaj láhui'lë' bönni' yudo' tu'sédinë'. Ruzë nágabi' didza' tu'ë, en rinaba yúdxibi' légaquië'. ⁴⁷ Bulu'bani yúgu'të nupa bila'yöni didza' bë'ëbi' ca naca yöl-la' réajni'i queëbi', en ca nácagaca didza' bubí'ibi'. ⁴⁸ Cate' bila'lé'enë'-bi' xuz xiná'abi', bulu'bánninë', ate' gúdxinu-bi' xiná'abi', rnanu:

—Zxi'ina', ¿bizx que benu' caní queëtu'? Buyútsöca', len yöl-la' ruúbi ruguí'i neda', en xuzu' buguúljatu' lí'.

⁴⁹ Ní'irö gúdxibi' Jesús légaquië', rnnabi':

—¿Bizx que buguúljali' neda'? ¿Naru' cabí nözili' run bayudxi guna' xichinë' Xuza'?

⁵⁰ Biti' gula'yéajni'inë' xuz xiná'abi' didza' na' gúdxibi' légaquië'.

⁵¹ Jesús böajlenbi' légaquië', budxinbi' Nazaret, ate' benbi' ca rnna xtídza'gaquië' xuz xiná'abi'. María, xiná'abi' Jesús, gulú'usönu icja ládxi'do'onu yúgu'të lë ni. ⁵² Ráta'rö yöl-la' réajni'i queëbi' bi'i Jesús, en rizxönnbi'. Burúajbi' dxi'a lahuë' Dios, en lógaca bönachi.

3

Libán runë' Juan, bönni' ruquilë' bönachi nisa
(Mt. 3:1-12; Mr. 1:1-8; Jn. 1:19-28)

¹ Cate' chiguca chinu iz rinná bé'enë' Tiberio César idütë yödzölió, rinná bë'ë Poncio Pilato luyú Judea, ate' Herodes rinná bë'ë ca' luyú Galilea. Felipe, böchë'ë Herodes na', rinná bë'ë luyú Iturea, en luyú Traconite, ate' Lisanias rinná bë'ë luyú Abilinia. ² Yugu' dza na' nácagaquië' bixúz lo Anás, en Caifás, ate' la' ná'asö Dios bë'lenë' Juan, xzí'inë' Zacarias, didza' cate' ni' zoë' Juan lu lataj cá'asö. ³ Ridë' Juan ni yúgu'të lataj nacua' ra' yegu Jordán, runë' libán ca ral-la' ila'dila nisa nupa tu'bi'i ládxi'gaca para uniti lahuë' Dios dul-la' nabága'gaca. ⁴ Guca caní ca na' nazúaj lu guichi lá'ayi yugu' didza' bë'ë Isaías, bönni' bë'ë didza' uláz queë' Dios, rnna:

Riyön chí'ë bönni' rulidzë' lu lataj cá'asö, rnnë':

“Buli'pá'a nöza lu icja ládxido'oli' para idxín Xanru' queëli'.

Buli'béaj li yugu' nöza lasi ga tödë'.

⁵ Ral-la' ulígaca yúgu'të gapa naca röga', en ulu'huóaca lachi' yúgu'të guí'a sibi, en guí'ado'.

Ral-la' ulu'rúaj li nöza nayecja nabí'igaca, ate' ulu'huóaca dxi'a nöza guiój.

⁶ Ila'lé'eni yúgu'të bönachi Bönni' na' isöl-lë'ë Dios, Nu usólá bönachi.”

⁷ Cate' bila'rúaj bönachi zían para ila'dila nisa lu në'ë Juan, lë' gudxë' légaquië':

—Libí'ili', di'a dza quegacaba' bëla sínia'. ¿Zoa nu buluf'i libí'ili' ral-la' izxúnnajli' yöl-la' rusiúdxí si' gaca quegaca bönachi? ⁸ Na'a, guli'gún le ilaca bë'ë chibubí'i ládxi'li', en biti' sa' ládxi'li', biti' innali': “Nácatu' tsahui' tu' nácatu' di'a dza queë' Abraham”, tu' rea' libí'ili', huáca quelë'ë Dios yugu' guiój ni, en gunë' ga ulu'huóaca di'a dza queë' Abraham. ⁹ Nácali' ca yugu' yaga. Chizóa ribóza guié huága para ichugu yugu' yaga. Yúgu'të yaga biti' ta'bía le naca dxi'a, ila'chúguië' yaga na', en ila'gu'ë léguequi lu guí'.

¹⁰ Ní'irö bönachi nacua' ni' gula'nabi lë', ta'nná:

—¿Nacxi gúntsatu'?

¹¹ Bubi'ë didza' Juan, rë' légaquië':

—Nu dë chopa có' zxe ral-la' unödzej que nu biti' dë que, ate' nu dë le gagu, lësca' caní ral-la' quisi quegaca nupa biti' dë le ilágugaca.

¹² Bal-lë' bönni' tu'quizjé' lázagaca bönachi uláz que yödzö zì'tu' bila'dxinë' ca' ni' para ila'dilë' nisa, ate' gula'nábinë' lë', ta'nnë':

—Bönni' usëdi, ¿nacxi gúntsatu' netu'?

¹³ Juan gudxë' légaquië':

—Biti' uquízjaröli' tsa le chigunnë' bönni' yú'uli' lu në'ë.

¹⁴ Bal-lë' bönni' röjáquië' gudil-la gula'nábinë' ca' lë', ta'nnë':

—¿Nazxi netu', nacxi guntu'?

Juan gudxë' légaquië':

—Bíti'rö gun gádxili' bönachi para cúali' le dë queguequi. Bíti'rö innëli' quegaca bönachi le cabí nácatë para gunli' ga ila'guizxaj libí'ili', pero guli'tsaza ládxi'li' tsa rázxlali'.

¹⁵ Ta'zá' ládxi'gaca bönachi na' ta'böza Bönni' na' ral-la' isöl-lë'ë Dios, channö náquië' Juan na' Bönni' lë' Cristo. ¹⁶ Bubi'ë didza' Juan, gudxë' yúgu'të', rnnë':

—Le nácatë neda' ruquila' libí'ili' nisa, pero zë'ë Bönni' gunë' le rulu'isö' yöl-la' ridila nisa ni, ichizië' libí'ili' Dios Bö' Lá'ayi, en le naca guí' queë'. Bönni' ni náparë' yöl-la' unná bë' ca neda', ate' neda' biti' naca' lesaca' ilecja' le nudë'ë ni'e. ¹⁷ Zönë' lu në'ë böc'ó' queë', ate' ulubë' ga rilubi xoa' xtila queë', lë ni rulu'í le gaca ulé'gaca bönachi. Utubë' xzoa' xtila, en cu'ë le xilataj, pero bëbu que uzé'gui'ë lu guí' le catu caz ulu.

¹⁸ Ca nácgaca didza' ni, en ia'zica'rö zían didza' le guchizië' icja nácgaca bönachi, benë' libán Juan lógaquië' que didza' dxi'a. ¹⁹ Juan na' buzé'gui'ë didza' Herodes, bönni' rinná bë'ë, tu' zóalenë'-nu Herodías, nigula queë' Felipe, bönni' böc'hë'ë, enca' tu' runë' zían le ruá' dö'. ²⁰ Ní'irö benë' Herodes tu le nácarö huiá' dö', gulu'ë Juan na' lidxi guíë'.

Ridíle' Jesús nisa

(Mt. 3:13-17; Mr. 1:9-11)

²¹ Dza na' cate' cabi nadzunë' Juan lidxi guíë', cate' ni' ruquilë' bönachi nisa, bidilë' ca' Jesús nisa. Cate' ni' rulidzë' Dios, gualaj lúzxiba, ²² ate' bótjë' Dios Bö' Lá'ayi, bidxinë' ga na' zoë' Jesús. Buluf'i lahuë', rinë'ë ca riná' tuba' gu'dödo', ate' biyön chi'i Nu ruí'í didza' yehua' yubá, rnna:

—Li' nacu' Zxi'ina'. Nadxi'ida' Li', en raza ládxa'a Li'.

Yugu' xuz xinë'e gudödi queë' Jesús

(Mt. 1:1-17)

²³ Cate' gusi lahuë' runë' xichinë' Jesús, yu'ë ca chi uruá' iz. Téquiguequi bönachi náquië' zxi'inë' José. Jesús náquië' zxi'ini xi'sóë' Elí, nu na' náquië' xúzinu María, nigula queë' José na'.

²⁴ Elí na' gúquië' zxi'inë' Matat,

nu ni guca zxi'inë' Leví,

nu ni guca zxi'inë' Melqui,

nu ni guca zxi'inë' Jana,

nu ni guca zxi'inë' ia'tué' José.

²⁵ José ni gúquië' zxi'inë' Matatías,

nu ni guca zxi'inë' Amós,

nu ni guca zxi'inë' Nahum,

nu ni guca zxi'inë' Esli,

nu ni guca zxi'inë' Nagai.

²⁶ Nagai na' gúquië' zxi'inë' Mat,

nu ni guca zxi'inë' ia'tué' Matatías,

nu ni guca zxi'inë' Semei,

nu ni guca zxi'inë' ia'tué' José,

nu ni guca zxi'inë' Judá.

²⁷ Judá na' gúquië' zxi'inë' Joana,

nu ni guca zxi'inë' Resa,

nu ni guca zxi'inë' Zorobabel,

nu ni guca zxi'inë' Salatiel,

nu ni guca zxi'inë' Neri.

²⁸ Neri na' gúquië' zxi'inë' ia'tué' Melqui,

nu ni guca zxi'inë' Adi,

nu ni guca zxi'inë' Cosam,

nu ni guca zxi'inë' Elmodam,

nu ni guca zxi'inë' Er.

²⁹ Er na' gúquië' zxi'inë' Josué,

nu ni guca zxi'inë' Eliezer,

nu ni guca zxi'inë' Jorim,

nu ni guca zxi'inë' ia'tué' Matat.

³⁰ Matat na' gúquië' zxi'inë' Leví,

nu ni guca zxi'inë' Simeón,

nu ni guca zxi'inë' Judá,

nu ni guca zxi'inë' ia'tué' José,

nu ni guca zxi'inë' Jonán,

nu ni guca zxi'inë' Eliaquim.

³¹ Eliaquim na' gúquië' zxi'inë' Melea,

nu ni guca zxi'inë' Mainán,

nu ni guca zxi'inë' Matata,

nu ni guca xzí'inë' Natán.

³²Natán na' gúquië' xzí'inë' David,
nu ni guca xzí'inë' Isái,
nu ni guca xzí'inë' Obed,
nu ni guca xzí'inë' Booz,
nu ni guca xzí'inë' Salmón,
nu ni guca xzí'inë' Naasón.

³³Naasón na' gúquië' xzí'inë' Aminadab,
nu ni guca xzí'inë' Aram,
nu ni guca xzí'inë' Esrom,
nu ni guca xzí'inë' Fares,
nu ni guca xzí'inë' ia'túë' Judá.

³⁴Judá na' gúquië' xzí'inë' Jacob,
nu ni guca xzí'inë' Isaac,
nu ni guca xzí'inë' Abraham,
nu ni guca xzí'inë' Taré,
nu ni guca xzí'inë' Nacor.

³⁵Nacor na' gúquië' xzí'inë' Serug,
nu ni guca xzí'inë' Ragau,
nu ni guca xzí'inë' Peleg,
nu ni guca xzí'inë' Heber,
nu ni guca xzí'inë' Sala.

³⁶Sala na' gúquië' xzí'inë' Cainán,
nu ni guca xzí'inë' Arfaxad,
nu ni guca xzí'inë' Sem,
nu ni guca xzí'inë' Noé,
nu ni guca xzí'inë' Lamec.

³⁷Lamec na' gúquië' xzí'inë' Matusalén,
nu ni guca xzí'inë' Enoc,
nu ni guca xzí'inë' Jared,
nu ni guca xzí'inë' Mahalalel,
nu ni guca xzí'inë' ia'túë' Cainán.

³⁸Cainán na' gúquië' xzí'inë' Enós,
nu ni guca xzí'inë' Set,
nu ni guca xzí'inë' Adán,
nu ni guca ca xzí'iní cazë' Dios.

4

Satanás tu' xihui' rë'ëni usubaga' Jesús dul-la'

(Mt. 4:1-11; Mr. 1:12-13)

¹Buzë'ë Jesús ra' yegu Jordán, zóalenë' Dios Bö' Lá'ayi Lë', ate' Dios Bö' Lá'ayi na' guchë'ë Jesús lu lataj cá'asö. ²Guzóë' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuë' Jesús yugu' dza na', ate' gudödi ni' ridunë'. ³Ní'irö tu' xihui' na' gudxi Jesús, rnna:

—Channö naca cazu' Li' Xzí'inë' Dios, gunnátsöca' ulu'huóaca guiöj ni yöta xtila.

⁴Bubi'ë didza' Jesús, rë' le:

—Nazúaj lu guichi, rnna: “Calégasö yöta xtila nabánigaca bönachi, pero nabánigaca ca' yúgu'të xtídzë'ë Dios.”

⁵Ní'irö tu' xihui' na' Jesús ga naca tu lu guí'a sibi ate' tu chí'ido'osö buluí'i Lë' yúgu'të xilátjagaca nupa ta'nná bë' yödzölió. ⁶Tu' xihui' na' rë' Jesús, rnna:

—Gonna' quiu' yúgu'të xilátjagaca nupa ta'nná bë' ni, en yöl-la' tsahui' quéguequi, tu' nadödi lu na'a yúgu'të lë' ni, ate' nu rë'ënisida' ruá'a que. ⁷Channö Li' uzóa xzibu' lahua', en gunu' neda' xzön, yúgu'të lë' ni guequi quiu'.

⁸Bubi'ë didza' Jesús, rë' le:

—Gucuíta ga zoa', Satanás, tu' nazúaj lu guichi lá'ayi le rë' netu', rnna: “Xanu' Dios tseaj ládxu'u-në', en tuzë' Lë' gunu' xichinë'.”

⁹Ní'irö tu' xihui' na' guchë' Jesús Jerusalén, ate' budxía Lë' lu zö'ö icjo'olö yudo', en rë' Lë':
—Channö nacu' Xzí'inë' Dios, busuládu'tsöca' cuinu' ni ¹⁰tu' nazúaj lu guichi lá'ayi, rnna: Dios isöl-lë'ë gubáz lá'ayi queë', ilácalenë' Li'.

¹¹Lu ná'agaquië' ulu'chisé' Li' para cabí tsöjchégu'u guiöj, en bití' gunu' zí' ni'u.

¹² Bubi'ë didza' Jesús, rë' le:

—Nazúaj lu guichi lá'ayi le rë netu': "Biti' si' bē'u Xanu' Dios."

¹³ Cate' biti' budzöli tu' xihui' na' ia'tú le si' bē' Jesús, buzá' ga zoë' tu chí'ido'.

Risi lahuë' Jesús runë' xichinë' luyú Galilea

(Mt. 4:12-17; Mr. 1:14-15)

¹⁴ Bõajë' Jesús luyú Galilea, dë lu në'ë yöl-la' huáca queë' Dios Bõ' Lá'ayi. Guzë didza' ca naca queë', ate' bila'yöni bõnachi nacua' yúgu'të yödzö idú gásibi'lö. ¹⁵ Busédinë' Jesús bõnachi gapa naca lu yu'u ga tu'dubë' tu'sédë' bõnni' judío queë' Dios, ate' yúgu'të bõnachi gulún Lë' zxon.

Le benë' Jesús yödzö Nazaret, ga naca ladzë'

(Mt. 13:53-58; Mr. 6:1-6)

¹⁶ Ní'irö budxinë' Jesús yödzö Nazaret ga ni' guzxönë'. Cate' bidxin dza lá'ayi quégaquië' bõnni' judío, ca run cazë' Jesús, guyazië' lu yu'u ga tu'dubë' tu'sédë' bõnni' judío queë' Dios, ate' guzuinë' para ulabë' tu le nazúaj lu guichi lá'ayi. ¹⁷ Bulu'dödë' lu në'ë Jesús guichi ga na' nazúaj didza' bē'ë Isaiás, bõnni' bē'ë didza' uláz queë' Dios. Cate' gusaljë' guichi na', budzölinë' ga nazúaj lu guichi le rnna:

¹⁸ Zóalenë' Bõ' Lá'ayi queë' Xanru' neda'

tu' nubéajë' neda' quez queë'

para usiyönda' bõnachi yechi' didza' dxi'a.

Gusól-lë'ë neda' para una' nupa raca zi' lãdxi'do'guequi,

en usiyönda' nupa nadzúngaca, ca gaca ulu'lágaca,

en úna' bõnachi nachul-la lóguequi,

en usólá' bõnachi zoa nu run léguequi zi',

¹⁹ en guna' libán que dza ruzá' lãdxi'ë Xanru' Dios quégaca bõnachi.

²⁰ Ní'irö butubë' Jesús guichi na', en bugu'ë le lu në'ë bõnni' rapa chí'ë yugu' guichi lá'ayi, ate' gurö'ë. Ní'irö yúgu'të nupa nudúbígaca lu yu'u na' gula'ná' Jesús. ²¹ Gusí lahuë' Jesús rë' légaquië':

—Na' a dza ni zóali' libí'ili', rudxin caz le nazúaj lu guichi ni.

²² Yúgu'të' gula'nnë' dxi'a queë', en bulu'bánninë' ca naca didza' dxi'a ru'ë, ate' ta'nnë':

—¿Naru' calëga bõnni' ni xzi'inë' José?

²³ Jesús rë' légaquië', rnnë':

—Nadxi huëli' neda' lë ni ta'nná bõnachi, le rnna: "Li', bõnni' ruún bõnachi, bun cuinu'."

Lësca' caní huëli' neda': "Yugu' le biyönitu' benu' Capernaum, ben ca' ga ni naca ladzu'."

²⁴ Gunnë' ca' Jesús:

—Le nácatë rea' libí'ili', channö zoë' nu bõnni' ru'ë didza' uláz queë' Dios, biti' tun bõnachi uláz queë' lë' bal. ²⁵ Le nácatë rea' libí'ili', gula'cuá'anu zían nigula uzëbi luyú Israel yugu' dza ni' zoë' Eliás, bõnni' bē'ë didza' uláz queë' Dios, cate' ni' biti' gulaj guió' idú ca tsonna iz yu' xopa beo', ate' guca gubín luyú na', ²⁶ pero Dios biti' gusól-lë'ë lë' Eliás na' ga nacua' anu nigula uzëbi nababagacanu Israel, pero gusól-lë'ë lë' ga na' zóanu tu nigula uzëbi lu yödzö Sarepta, le nababa yödzö Sidón. ²⁷ Lësca' caní, gula'cuá' zían nupa te'e huë' nudzu' ruzödi luyú Israel dza ni' zoë' Eliseo, bõnni' bē'ë didza' uláz queë' Dios, pero biti' bõáquië' nu bõnni' nùtsë'ë ladaj bõnachi Israel na', pero bõáquië' tuzë' Naamán, bõnni' nababë' luyú Siria.

²⁸ Cate' bila'yönnë' didza' ni, gula'lenë' yúgu'të bõnni' nacu'ë lu yu'u ga na' tu'dubë' tu'sédë' queë' Dios. ²⁹ Ní'irö gula'yasë', en bulu'béajë' Jesús ní'ló ra' yödzö. Gula'ché'ë Lë' ga naca lë'e guí'a guió'j ga na' dë lãdzagaquië' para ulu'sulãdzuë' Lë' ga naca lë'e guí'a guió'j na'. ³⁰ Ní'irö gudödë' Jesús gatsaj lãhui'lö ga na' nacu'ë, söhuöajtë'.

Tu bõnni' yu'u lë' bõ' xihui'

(Mr. 1:21-28)

³¹ Ní'irö guyjijë' Jesús yödzö Capernaum luyú Galilea, ate' busédinë' bõnachi yugu' dza lá'ayi quégaquië' bõnni' judío. ³² Bulu'bánninë' ca naca le rusédinë' Jesús légaquië', tu' bē'ë didza' ca tu bõnni' dë lu në'ë yöl-la' unná bē'.

³³ Zóatë' ca' tu bõnni' yu'u lë' bõ' xihui' lu yu'u ga na' tu'dubë' tu'sédë' queë' Dios, ate' bē'ë zidzaj didza', ³⁴ rnnë':

—¡Busán netu'! ¡Bizxi rála'tu' quiu', Jesús, bõnni' Nazaret? ¿Naru' zo'o para usunítiiu' netu'? Núnbë'a Li' Nu nacu'. Bõnni' Lá'ayi queë' Dios nacu'.

³⁵ Jesús buzenë' le bach bõ' xihui' na', en rë' le:

—Busayaj ru'u, en burúaj lu bõnni' ni.

Ní'irö bõ' xihui' na' gurú'una bõnni' na' lu yu lógaca bõnachi nacua' ni'. Burúajtë lu bõnni' na', en bítirö bi ben queë'. ³⁶ Bulu'bánninë' yúgu'të', en gulu'ë didza' tuë' len ia'tuë', ta'nnë':

—¿Bizxi didza' ni ru'è? Len yöl-la' unná bè', en yöl-la' huáca zxön rinná bé'enè' yugu' bö' xihui', ate' tu'rúajtè bö' xihui' na'.

³⁷ Guzè didza' ca naca queè' Jesús, ate' bila'yöni bönachi yúgu'tè yödzo idú gásibi'ilö.

Ruínè' Jesús xiná'anu nigula queè' Pedro

(Mt. 8:14-15; Mr. 1:29-31)

³⁸ Ní'irö guyasè' Jesús, en burúajè' lu yu'u ga na' tu'dubè' tu'sèdè' queè' Dios, ate' guyaziè' lidxè' Simón. Xiná'anu nigula queè' Simón na' zóanu ni', en yú'unu xilá, ate' guláta'yué' lahuè' Jesús únè'-nu. ³⁹ Gubígui'è Jesús ga na' dènu, ate' bulidzè' huè' xilá na' yú'unu. La' birúajtè xilá na' yú'unu, ate' la' guyástènu, en bé'ènu le gulahuè'.

Ruínè' Jesús zían nupa te'e

(Mt. 8:16-17; Mr. 1:32-34)

⁴⁰ Cate' chiribía gubidza, yúgu'tè nupa nacua'len léguequi nupa na' te'e que queéguqui yödzhue' bila'dxin ni', ate' dujuá'gaca léguequi ga na' zoè' Jesús. Lè' guxóa nè'è nupa na' te'e, en bunè' léguequi. ⁴¹ Bulu'rúaj ca' zían bö' xihui' yú'ugaca bönachi te'e na'. Ta'bódx'a bö' xihui' na', ta'nná:

—Li' nacu' xzí'inè' Dios.

Ní'irö Jesús buzenè' le bach yugu' bö' xihui' na', en biti' bè'è lataj ila'nná, tu' nöziguequi náquiè' Cristo.

Runè' Jesús libán luyú Galilea

(Mr. 1:35-39)

⁴² Cate' za' rení' ia'tú dza, burúajè' Jesús Capernaum na', ate' guyijè' tu lataj cá'asö. Bila'dxin bönachi zían ni', tu'guilaj Jesús. Cate' bila'dxinè' ga na' zoè', gulè'éniguequinè' ulu'tsenè' Lè', para cabí uzè'è ga na' nacu'è. ⁴³ Ní'irö Jesús gudxè' légaquiè', rnnè':

—Run bayudxi tseja' gapa nacua' ia'zica'rö yödzo, tsöjena' ca' libán ni' que didza' dxi'a ca rinná bè'è Dios. Que lè' ni' na' gusöl-lè'è neda' ni.

⁴⁴ Caní guca, benè' libán yugu' yödzo luyú Galilea gapa naca lu yu'u ga tu'dubè' bönni' judío, en tu'sèdè' queè' Dios.

5

Ta'dzunba' böla zían

(Mt. 4:18-22; Mr. 1:16-20)

¹ Cate' ni' zoè' Jesús ra' nísado' nazí'i le Genesaret, lu xiyú Galilea, bulu'quída' bönachi zían Lè' para ila'yöni xtídzè'è Dios. ² Ní'irö bilè'enè' Jesús chopa bárcodo', zxoagaca lu nísado' ga na' naca ra' yu bidxi, ate' narúajgaquiè' bönni' uzxon böla lé'egaca bárcodo' na', en ta'guibè' yóxaj böla quégaquiè'. ³ Gurenè' Jesús tu' lè'e bárcodo' na', le nequi queè' Simón Pedro, ate' gunábinè' lè' udxíguiè' le ia'láti'do' zi'tu' ga naca ra' yu bidxi na'. Ní'irö gurö'è Jesús lè'e bárcodo' na', en rö'ösè' ca' ni' rusédinè' bönachi zían nacua' lu yu bidxi na'. ⁴ Cate' budxi bè'è didza' Jesús, ní'irö gudxè' Simón, rnnè':

—Busá' bárcodo' ni lu nísado' ga na' rö'ö zila, ate' ni' guli'zalaj yóxaj böla queéli' para sönlí'-ba' böla.

⁵ Bubi'è didza' Simón, rè' Jesús:

—Bönni' Usèdi, idú yèla chibentu' dxin, en biti' bi böla nazönitu'-ba', pero didza' quiu' izáljagara' yóxaj.

⁶ Cate' chigula'zaljè' le, gula'zönè' ziantèröba' böla, ate' réquitiqui' iröza' yóxaj böla na'. ⁷ Ní'irö bulu'lá'a bulu'lu'isinè', bulu'lidzè' luzá'agaquiè' nacu'è ia'tu' lè'e bárcodo' na' para zá'gaquiè' ilácalenè' légaquiè'. Cate' bila'dxinè' ni' bulu'dzè'è-ba' böla irópatè' bárcodo' na', ate' chirequi ulu'huótaj bárcodo' na' lu nisa. ⁸ Cate' bilè'enè' Simón Pedro lè ni, ní'irö buzóa zxibè' lahuè' Jesús, rnnè':

—Gucuíta ga zoa', Xan, tu' naca' bönni' dul-la'.

⁹ Caní gunnè' tu' radxi ridzöbinè' Pedro ni'a quégacaba' böla zían na' gula'zóngaqüiè'-ba', en lè'sca' caní guca quégaca nupa nacua'len lè'. ¹⁰ Guladxi gula'dzöbinè' ca' Jacobo, en Juan, yugu' xzí'inè' Zebedeo, nupa ni nácagaca luzè'è Simón Pedro na'. Ní'irö Jesús rè' Simón na', rnnè':

—Biti' gádxinu'. Na'a isí lo' ichè'u quia' bönachi ca runu' rizönu'-ba' böla.

¹¹ Cate' chibulu'sudxinè' yugu' bárcodo' na' ga naca ra' yu bidxi, ní'irö bulu'cá'anè' yúgu'tè ni', ate' söjácalenè' Jesús.

Ruínè' Jesús tu bönni' ré'enè' huè' nudzu' ruzödi

(Mt. 8:1-4; Mr. 1:40-45)

¹² Cate' zoè' Jesús tu lu yödzo ni', bidxinè' tu bönni' ré'ede'enè' huè' nudzu' ruzödi ga na' zoè'. Cate' bilè'enè' Jesús, busudxin lahuè' lu yu, en gúta'yué' lahuè', rnnè':

—Xan, channò rě'ënu', huáca unu' neda'.

¹³ Ní'irò bulí nē'ë Jesús, en gudanē' lē'. Rē' lē':

—Rē'ënda'. Gacu' dxi'a.

La' gubídxitē huē' nudzu' queē' bōnni' na'. ¹⁴ Ní'irò Jesús gunná bé'enē' lē' cuntu nu guié' ca'. Gudxē' lē':

—Guyéaj, yōjlu'i cuinu' lahuē' bixúz, ate' yōjnōdzaj que yudo' le ruluí'i nuhuóácu' dxi'a ca gunná bé'ë Moisés, lē na' uluf'i légaquiē' chibóácu'.

¹⁵ Guzētērō didza' que yōl-la' huáca queē' Jesús, ate' bulu'dubi bōnachi zían ga na' zoē' para ila'yōni xtídzē'ë, en para únē' léguequi, uǵúē' yōdzōhuē' té'eguequi. ¹⁶ Ní'irò buzé'ë Jesús ni', en guyijē' tu lataj cá asō, ate' ni' bulidzē' Dios.

Ruínē' Jesús tu bōnni' huē' nacú'uniē' bin

(Mt. 9:1-8; Mr. 2:1-12)

¹⁷ Ia'tú dza, cate' ni' rusédinē' Jesús bōnachi, rō'ōgaquiē' yugu' bōnni' yudo' fariseo len bōnni' yudo' tu'sédinē' xibá queē' Moisés ni', narúajgaquiē' yúgu'tē yōdzó luyú Galilea, en luyú Judea, en lu yōdzó Jerusalén. Naca bé' dē lu nē'ë Jesús yōl-la' huáca queē' Xanru' Dios tu ruínē' bōnachi te'e nacuá' ni'. ¹⁸ Ní'irò bōnni' nuá'agaquiē' le denē' tu bōnni' huē' nacú'uniē' bin bila'dxinē' ga ni', ate' bulu'guljē' nacxi ilunē' para ila'gu'ë lē' lu yu'u para ila'guixjē' lē' lahuē' Jesús. ¹⁹ Cate' bití' gula'dzōlinē' nacxi ilunē', tu' nacuá' bōnachi zían ni', gula'benē' ícjo'oló yu'u na', en gula'saljē' ícjo'ona'. Ní'irò bulu'zótjē' le denē' bōnni' huē' na', ate' gula'guixjē' lē' gatsaj láhui'lō bōnachi ni' lahuē' Jesús. ²⁰ Cate' gúqube'enē' Jesús ca na' ta'yéajlē'ë Lē', gudxē' bōnni' huē' na':

—Bōnni', yugu' dul-la' nabágu'u chibuníti lahua'.

²¹ Ní'irò gula'si lógaquiē' ta'zá' ládxi'gaquiē' bōnni' yudo' tu'sédinē' na', en yugu' bōnni' yudo' fariseo, ta'nnē': "¿Nuzxi caz bōnni' ni' rnnē' le rucá'ana Dios cá'asó? ¿Nuzxi caz gaca uniti lo dul-la'? Tuzē' Dios runiti lahuē' dul-la'."

²² Réquibe'enē' Jesús le ta'zá' ládxi'gaquiē', ate' rē' légaquiē':

—¿Bixz que rizá' ládxi'li' caní? ²³ Bití' naca bōniga nu guié'sō bōnni' ni: "Yugu' dul-la' nabágu'u chibuníti lahua'", pero naca bōniga nu gun ga chasē', en sē'e ni'ë. ²⁴ Guna' ga inōzilí' dē lu na'a neda', Bōnni' Guljē' Bōnachi, yōl-la' unná bé' uniti lahua' dul-la' luyú ni.

Ní'irò gudxē' bōnni' na' nacú'uniē' bin, rnnē':

—Li' rea', guyasa. Buá' le denu', en bōaj lidxu'.

²⁵ La' guyásatē' bōnni' huē' na' lógaquiē', ate' bu'ë lē na' gúti'nē', en sōhuójē' lidxē', rigu'ë Dios yōl-la' ba. ²⁶ Gula'nítitiqui'sinē' yúgu'tē', ate' gula'gu'ë Dios yōl-la' ba, en tádxisinē' ca', ta'nnē':

—Na'a bilé'eru' le run ga rubániru'.

Jesús rulidzē' Leví

(Mt. 9:9-13; Mr. 2:13-17)

²⁷ Gudódi gulaca yugu' lē ni burúajē' Jesús ni', ate' bilé'enē' tu bōnni' uquízxaj lázagaca bōnachi, lē' Leví, rō'ë ga na' ruquízxjē', ate' Jesús rē' lē':

—Gudá' neda'.

²⁸ La' guyásatē' Leví, ate' bucá'anē' yúgu'tē, en sa'yéajlenē' Jesús.

²⁹ Gudódi ni' benē' Leví na' tu gúf'i huagu queē' Jesús ga naca lu yu'u lidxē', ate' gula'cu'ë zían bōnni' uquízxaj ni' len ia'bal-lē' bōnni' ta'bōlenē' légaquiē' tahuē'. ³⁰ Ní'irò bōnni' yudo' tu'sédinē' len yugu' bōnni' yudo' fariseo gula'nnē' quégaquiē' bōnni' uséda queē' Jesús, ta'nnē':

—¿Bixz que rē'aj rágulenli' yugu' bōnni' uquízxaj, en ia'zica'rē' bōnni' dul-la'?

³¹ Bubi'ë didza' Jesús, rē' légaquiē':

—Yugu' bōnni' nacú'ë dxi'a bití' naquíniguequinē' nu un bōnachi, pero bōnni' té'enē' naquíniguequinē' nu un bōnachi. ³² Za'a, caléga ulidzagaca-nē' bōnni' tshahí, pero za'a ulidzagaca-nē' bōnni' dul-la' para ulu'bi'i ládxi'gaquiē'.

Ta'nábinē' Jesús ca naca que yōl-la' run gubasa

(Mt. 9:14-17; Mr. 2:18-22)

³³ Ní'irò bōnni' yudo' na' gula'nábinē' Jesús, ta'nnē':

—¿Bixz que tunē' gubasa zían luzuí bōnni' dá'gaquiē' Juan, en tu'lidzē' Dios, ate' tunē' ca' caní bōnni' dá'gaquiē' yugu' bōnni' yudo' fariseo, pero bōnni' dá'gaquiē' Li' té'aj tahuē'?

³⁴ Jesús rē' légaquiē':

—¿Naru' huácatsō gunli' ga ilunē' gubasa bōnni' nacú'ë laní que yōl-la' rutsaga na' tsanni ni' bōnni' rutsaga nē'ë zóalenē' légaquiē'? ³⁵ Huadxín dza cate' udúē' bōnni' rutsaga nē'ë ga nacú'ë. Dza ní'irò ilunē' gubasa.

³⁶ Ní'irò bucúdzu'ë didza' Jesús ca naca lē ni, ate' rē' légaquiē':

—Cuntu nu bönni' ichúguié' tu lari' cubi chinadía, en cuejë' tsötaca' le udë'ë lë'e lari' tēbi. Channō gunē' caní, calégasō gaca ditaj lari' cubi na', pero lári'do' na' birúaj lë'e lari' cubi na' bití' tsójlōza lari' tēbi na'. ³⁷ Lēsa' caní, cuntu nu bönni' riguë'ë xisi uva cubi lu buzudi guídi gula. Channō nu gun caní, xisi uva cubi na' uchōza' buzudi guídi gula, ate' ilalaj xisi uva na', ate' gaca ditaj buzudi guídi gula na'. ³⁸ Que lë ni na' ral-la' cá'aru' xisi uva cubi lu buzudi guídi cubi, ate' irōpatë ilaca chí'i. ³⁹ Channō zoa nu rë'aj xisi uva gula, bití' guë'ënitë guí'aj xisi uva cubi, tu' rna: "Nácarō sizxi' xisi uva gula na'."

6

Bönni' usēda queë' Jesús ta'lecjē' do xzoa' xtila dza lá'ayi

(Mt. 12:1-8; Mr. 2:23-28)

¹ Cate' naca tu dza lá'ayi quégaquië' bönni' judío, ridōdë' Jesús gapa dë yöla xzoa' xtila, ate' bönni' usēda queë' ta'lecjē' do ga dxía xzoa' xtila. Ta'zxi'ni ná'agaquië' le, en tahuë'.

² Ní'irō gula'nábinë' bönni' yudo' fariseo légaquië', ta'nnë':

—¿Bíx que runli' le cabí ral-la' gunru' dza lá'ayi?

³ Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacuá'len lë'?

⁴ Guyázië' lu yu'u queë' Dios, en guzxi'ë yöta xtila tu'cu'ë lahuë' Dios, lë na' bití' ral-la' gáguru', pero tuz bíxuz dë lataj ilahuë', ate' gudahuë' David le, en bë'ë ca' quéguequi nupa nacuá'len lë'.

⁵ Ní'irō Jesús gudxë' légaquië', rnnë':

—Neda', Bönni' Guljē' Bönachi, naca' xani dza lá'ayi.

Tu bönni' narequi' nē'ë

(Mt. 12:9-14; Mr. 3:1-6)

⁶ Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'sédë' queë' Dios, en busedinë' nupa nacuá' ni'. Zoë' ca' tu bönni' ni' narequi' nē'ë ibëla.

⁷ Yugu' bönni' yudo' tu'sédinë', en yugu' bönni' yudo' fariseo tu'yúë' Jesús para ila'lé'enë' channō únë' bönni' na' cate' naca dza lá'ayi quégaquië' para ulu'dzölinë' nacxi ulu'zéguië' Lë' didza'. ⁸ Réquibe'enë' Jesús le ta'zá' ládxi'gaquië', ate' gudxë' bönni' na' narequi' nē'ë, rnnë':

—Guyasa. Guzuí gatsaj lálhui'lō ni.

La' guyásatë' bönni' na', guzuínë'. ⁹ Ní'irō Jesús gudxë' yugu' bönni' yudo' na', rnnë':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dō? ¿Naru' dë lataj uguéla'ru' yöl-la' na' bán quégaca bönachi, o ugúaru' le?

¹⁰ Ní'irō buyüë' Jesús yúgu'të bönni' na' nacu'ë gásibi'ilë', ate' gudxë' bönni' huë' na':

—Bulí no'o.

Bulí nē'ë bönni' na', ate' la' böácatë nē'ë na'. ¹¹ Ní'irō gula'lenë' bönni' yudo' na', ate' gulún xtídza'gaquië' la' légacasë' nacxi bi ilunë' queë' Jesús.

Ribōë' Jesús chínnuë' bönni' ilácagaquië' gubáz queë'

(Mt. 10:1-4; Mr. 3:13-19)

¹² Dza ni' guyijë' Jesús ga naca tu lu guí'ado'. Bulidzë' Dios ni', ate' idú yöla bé'lenë' Dios didza'. ¹³ Cate' za' rení', bulidzë' yugu' bönni' dá'gaquië' Lë', ate' gurōë' chínnuë' para iláquië' gubáz queë'.

¹⁴ Bulidzë':

Simón, (lë' ca' Pedro),

Andrés, (böché'ë Pedro),

Jacobo, en Juan, en Felipe, en Bartolomé,

¹⁵ Mateo, en Tomás,

Jacobo, (zxi'inë' Alfeo),

Simón, (bönni' ruí'i ládxi'ë yödzö queë'),

¹⁶ Judas, (böché'ë Jacobo),

en Judas Iscariote, (bönni' udōdë' Jesús lu ná'agaquië' bönni' ilútië' Lë').

Ruúnë' Jesús bönachi zían

(Mt. 4:23-25)

¹⁷ Jesús bö'tjalenë' yugu' bönni' gubáz queë' na' lu guí'ado' na', ate' bila'dxinë' tu ga naca lachi', ga ni' nacu'ë zíanrō ca' bönni' usēda queë', ate' nacuá'len légaquië' bönachi zían narúajgaca yúgu'të yödzö luyú Judea, en yödzö Jerusalén, en yugu' yödzōdō' dégaca ra' nísado' ga na' nacuá' yödzö Tiro, en yödzö Sidón. Bila'dxín bönachi ni ga ni' para ulu'zë nágagaca xtídze'ë Jesús, en ulu'huóaca lu yödzöhuë' té'eguequi. ¹⁸ Bulu'huóáquië' ca' bönni' ni' ta'guí'i ta'záquië' lu ná'agaca bö' xihui'. ¹⁹ Yúgu'të bönachi zían na' tuí'i ládxi'gaca ila'gán Jesús tu' ruúnë' léguequi len yöl-la' huáca queë'.

Nupa nácagaca bica' ba, en nupa nácagaca bica' bayechi'

(Mt. 5:1-12)

²⁰ Ní'irò buyúé' Jesús yugu' bönni' usèda queé' nacu'è ni', en gudxè' légaquiè':

—Bica' ba libí'ili', réquibe'eli' riyadzjali' le naca queé' Dios, tu' gata' queéli' lataj ga rinná bē'è Dios.

²¹ 'Bica' ba libí'ili' ridunli' le gunnè' Dios queéli', tu' huóljali'.

'Bica' ba libí'ili' ribòdxili' tu' bi nadé'li' le naca tsahui', tu' huadxín dza uzxidxili'.

²² 'Bica' ba libí'ili', tu' za' dza cate' biti' ila'lé'e bönachi libí'ili' dxi'a, en ulu'béaj libí'ili' ga nacuá', en ila'nné' zì' queéli', en ulu'cá'ana cá'asò le nazí'i lali' ca tu le naca xihui' tu' dá'ali' neda', Bönni' Guljé' Bönachi. ²³ Buli'sí' xibé dza na', en buli'dzeja, tu' naca zxön le guequi queéli' yehua' yubá. Lësca' caní gulunè' xuz xtó'ogaca bönachi ní' quégaquiè' bönni' gulu'e didza' uláz queé' Dios.

²⁴ 'Bica' bayechi' libí'ili', dē yöl-la' tsahui' queéli', tu' chidé' le ruzí'ili' xibé.

²⁵ 'Bica' bayechi' libí'ili' nuhuólaj nudzé'eli' na'a, tu' huadunli'.

'Bica' bayechi' libí'ili' ruzxidxili' na'a, tu' huí'inili', en còdxi yéchi'li'.

²⁶ 'Bica' bayechi' libí'ili' ta'nné' yúgu'té bönachi dxi'a queéli'. Lësca' caní gulunè' xuz xtó'oli', gula'nné' dxi'a quégaquiè' bönni' gula'zì' yē'è, gula'nné' nácagaquiè' bönni' tu'è didza' uláz queé' Dios.

Ral-la' idxi'iru' nupa biti' ta'lé'e rē'u dxi'a

(Mt. 5:38-48; 7:12)

²⁷ Gunnè' ca' Jesús:

—Libí'ili' zóali' ni, en riyónili' xtídza'a, rea' libí'ili': Guli'dxi'i nupa biti' ta'lé'e libí'ili' dxi'a. Guli'gún le naca dxi'a quégaca nupa tu'dí'i libí'ili'. ²⁸ Guli'nabi Dios gaca dxi'a quégaca nupa tua' dó' queéli', en buli'lidzè' Dios inábili'-né' gácalenè' nupa ta'nné' zì' queéli'. ²⁹ Channò nu capa' tsóla'a xagu', buzè' ia' tsóla'a ca' xagu'. Channò nu cúa lari' naxóa cúdzu'u, bē' lataj cúa ca' xzo'. ³⁰ Nútí'tès nu bi inaba le dē quiu', bunòdzaj que, ate' nu cúa le nequi quiu', biti' unabu' le. ³¹ Ca rē'ènilí' ilún bönachi queéli', lësca' caní guli'gún quéguequi.

³² 'Channò nadxi'isili' nupa nadxi'igaca libí'ili', ¿bizxi yöl-la' ba idéli'li'? Lësca' caní tunè' bönni' dul-la', ta'dxi'inè' nupa nadxi'iguequi légaquiè'. ³³ Channò runli' le naca dxi'a quégacasò nupa tun dxi'a queéli', ¿bizxi yöl-la' ba idéli'li'? Lësca' caní tunè' bönni' dul-la'. ³⁴ Channò runòdzjali' quégaca nupa runli' löza ulu'bí'i queéli', ¿bizxi yöl-la' ba idéli'li'? Lësca' caní tunè' bönni' dul-la', tu' nòdzjè' quégaca nupa tun dul-la', tu' tunè' löza ulu'bí'i quégaquiè' lè na' bulu'nòdzjè'. ³⁵ Neda' rea' libí'ili': Guli'dxi'i nupa biti' ta'lé'e libí'ili' dxi'a, en guli'gún le naca dxi'a. Buli'nòdzaj quégaca bönachi sal-la' biti' runli' löza nu ubí'i queéli'. Channò caní gunli', zxön naca le gata' queéli', ate' gácali' zxi'ini cazé' Dios, Nu nácaterò lo, tu' runè' Lè' le naca dxi'a quégaca bönachi biti' ta'yaza ládxi'gaca, en quégaca bönachi tuá' dó'. ³⁶ Buli'huéchi' ládxi'li' bönachi ca na' runè' Xúzili' Dios, ruhuéchi' ládxi'è' yúgu'té bönachi.

Biti' ral-la' ichugu bē'èru' que luzá'aru'

(Mt. 7:1-5)

³⁷ Gunnè' ca' Jesús:

—Biti' ichugu bē'èli' que luzá'ali', ate' cuntu nu ichugu bē' queéli'. Biti' cuéaj bē'èli' que luzá'ali', ate' cuntu nu cuéaj bē' queéli'. Buli'niti lo luzá'ali', ate' Dios unti lahué' ca' libí'ili'. ³⁸ Buli'nòdzaj que luzá'ali', ate' Dios gunnè' queéli'. Ulu'nòdzjè' queéli' le ulu'rixè' len tu guí'ina ribixi le naca idú, le naguirò, en naguí gate ga rē', en zóatica' gubá. Ca naca le ruríxili', la' cá'asò urixè' Dios ca' queéli'.

³⁹ Bucúdzu'è didza' Jesús, rē' légaquiè':

—¿Naru' huácatsò nu bönni' lo chul-la' iché'è ia'túè' bönni' lo chul-la? Biti' ca' gaca, tu' ila'bixè' iropè' tu lu yeru. ⁴⁰ Biti' ca' gácaré' lo tu bönni' usèda ca nu rusèdi lè', pero cate' úxi izèdè' bönni' na', gáquiè' ca naca nu na' rusèdi lè'.

⁴¹ ¿Bizx que ruyú' bēbudo' yu' u guió'j lahué' böchi' luzó'o, en biti' rilé'enu' le zxön yu' u guió'j lo cazu'? ⁴² ¿Naru' huácatsò guío'-né' böchi' luzó'o: "Böcha'a, benna lataj cueja' bēbudo' yu' u guió'j lo", en biti' rilé'enu' le zxön yu' u guió'j lo cazu'? Li', bönni' rulu'isò tsahui' cuinu', guléaj zì' alò le zxön yu' u guió'j lo cazu', ate' ní' irò ilé'enu' dxi'a para cueju' bēbudo' yu' u guió'j lahué' böchi' luzó'o.

Le runru' naca bē' le nácaru'

(Mt. 7:17-20; 12:34-35)

⁴³ Gunnè' ca' Jesús:

—Tu yaga dxi'a biti' cuía le naca cá'asò. Lësca' caní, tu yaga gu'a' biti' gaca cuía le naca dxi'a. ⁴⁴ Caní naca, le ribía tu yaga naca bē' ca naca yaga na'. Biti' ruchíbiru' le ribía yaga higo lu yaga yótsi', en caléga lu bisequi' yótsi' biti' ruchíbiru' le ribía lubá uva. ⁴⁵ Tu bönni'

dxi'a ru'ë didza' dxi'a tu' yu'u le naca dxi'a icja lãdxi'da'ahuë', ate' didza' xihui' ru'ë bönni' xihui' tu' yu'u icja lãdxi'da'ahuë' le xihui'. Rinnë ruá'aru' ca naca le yu'u icja lãdxi'do'oru'.

Chopa ca gaca cuequiru' xilibi yu'u

(Mt. 7:24-27)

⁴⁶ Gunnë' ca' Jesús:

—¿Bixx que ruldzali' neda', rnnali': "Xantu', Xantu'", pero biti' runli' ca rinná bé'eda' libí'ili'? ⁴⁷ Ulu'ida' libí'ili' ca naca nu na' za' quia', en riyöni xtídza'a, en run ca rnna xtídza'a. ⁴⁸ Nu ni naca ca tu bönni', cate' benë' lidxë', guchó'önë' ga rë', en gulëquie' xilibi yu'u ga naca lu guiöj. Cate' bötaj yegu gubó'o, guchó'öna cuita yu'u na', pero biti' guca uquinnaj le, tu' nulibi ga naca lu guiöj. ⁴⁹ Na'a, nu riyöni xtídza'a, en biti' run ca rnna, nu ni naca ca tu bönni' benë' lidxë' ga naca lu yu cá'asö. Biti' benë' xilibi. Cate' guchó'öna yegu gubó'o cuita yu'u na', la' biguinnajtë, ate' gubixi dërö zó'o que.

7

Jesús ruinë'-bi' bi'i huen dxin queë' tu bönni' unná bë'

(Mt. 8:5-13)

¹ Cate' Jesús budxi bé'lenë' légaquie' didza' ni, guyázië' yödzo Capernaum. ² Lu yödzo ni' zoë' tu bönni' Roma rinná bé'enë' bönni' rójáquie' gudil-la. Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'. ³ Cate' biyönnë' bönni' ni didza' tu'ë bönachi ca naca queë' Jesús, la' gusól-la'të' bal-lë' bönni' gula tu'zéajni'inë' bönni' judío ga na' zoë' Jesús, tsójóta'yugaquie' lahuë' Lé' guidë' uduhuénë'-bi' bi'i huen dxin queë' na' ré'ebi'. ⁴ Bönni' gula tu'zéajni'inë' na' bila'dxinë' ga zoë' Jesús, ate' guláta'yuë' lahuë' idú lãdxi'gaquie', ta'nnë':

—Náquie' lesaca' bönni' na' gunu' queë' lë ni, ⁵ tu' runë' bal bönachi uláz queë'ru', en benë' tu yu'u queë'ru' ga rudúbiru' rusédaru' queë' Dios.

⁶ Ní'irö Jesús guyéajlenë' légaquie'. Cate' chizóa ila'dxinë' lidxë' bönni' na', lë' gusól-lë'ë bal-lë' böchi' luzë'ë ga zë'ë Jesús, ate' tē' Lë':

—Xan, rnnë' bönni' na': "Biti' ugu'inu', tu' cabí naca' lesaca' tsáziu' lidxa', ⁷ en biti' naca' lesaca' guida' ga zu'. Que lë ni na' biti' burúguida' guida' ga zu'. Bë'ësö didza', ate' huóacatébi' bi'i huen dxin quia'. ⁸ Neda' ca', zoa nu rinná be'e neda', ate' nacu'ë ca' bönni' rójáquie' gudil-la rinná bé'eda' légaquie'. Rea'-në' tuë': Guyéaj ni', ate' rejë'. Rea'-në' ia'túë': Gudá ni, ate' ridë'. Rea'-në' ca' huen dxin quia': Ben dxin ni, ate' runë' dxin na'."

⁹ Cate' biyönnë' Jesús didza' ni, bubáinë' queë' bönni' na', ate' buécjë', en gudxë' bönachi na' zá gaca cúdzu'lë', rnnë':

—Le nácatë' rea' libí'ili', cuntu nu bönni' Israel biti' rójxáqui'da'-në' réajlë'ë quia' ca réajlë'ë quia' bönni' ni.

¹⁰ Cate' bulu'dxinë' bönni' na' gusól-lë'ë bönni' rinná bé'enë' bönni' rójáquie' gudil-la, gula'yázië' ga naca lu yu'u lidxë', en bila'lë'enë' chibóacabi' bi'i huen dxin na'.

Jesús rusubanë'-bi' bi'i bönni' queënu tu nigula uzëbi

¹¹ Gudödi guca lë ni, sa'yéajë' Jesús yödzo Naín, ate' dzágagaquie' bönni' usëda queë' Lë', len bönachi zían. ¹² Cate' bidxinë' gala' ra' yödzo na', bilé'enë' yugu' bönni' nuá'agaquie'-bi' tubi' bi'i bönni' nati. Sójcáchi'gaquie'-bi'. Bi'i nati na' nácabi' la's dui bi'i queënu tu nigula uzëbido'. Zían bönachi uladza queënu nigula uzëbi na' sójacalen-nu. ¹³ Cate' Xanru' bilé'enë'-nu, buéchi' lãdxë'ë-nu, ate' gudxë'-nu:

—Bíti'rö cödxi'.

¹⁴ Ní'irö gubígui'ë Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquie'-bi', ate' Jesús gunnë':

—Bi'ido', lí' rea', guyasa.

¹⁵ Ní'irö bubanbi'. Guró'öbi' bi'i na' zí'alö nátibi', ate' gusí lobi' ru'íbi' didza'. Jesús budödë'-bi' lu ná'anu xiná'abi'. ¹⁶ Cate' bönni' ni' bila'lë'enë' lë ni, guládxinë' yúgu'të', ate' gula'gu'ë Dios yöl-la' ba, ta'nnë':

—Bidxín queë'ru' tu bönni' lo, ru'ë didza' uláz queë' Dios. Dios caz rácalenë' bönachi queë'.

¹⁷ Guzë' didza' ca naca yöl-la' huáca queë' Jesús, ate' bila'yöni bönachi yúgu'të' yödzo luyú Judea, en yúgu'të' yödzo idú gásibi'ílö.

Le rinabë' Juan, bönni' buquilë' bönachi nisa

(Mt. 11:2-19)

¹⁸ Bönni' dá'gaquie' Juan gula'guixjöi'inë' lë' yúgu'të' lë ni runë' Jesús. Ni' yu'ë Juan lidxi guie', bulidzë' chopë' bönni' na' dá'gaquie' lë, ¹⁹ ate' gusól-lë'ë légaquie' ga na' zoë' Jesús para ila'nábinë' Lë', ila'nnë': "¿Nacu' Lí' Cristo, bönni' ral-la' guidë', o naru' ral-la' cóztu'-në' bönni' yúbölä?" ²⁰ Cate' bila'dxinë' bönni' na' nasól-lë'ë Juan ga na' zoë' Jesús, tē' Lë':

—Juan, bönni' buquülë' bönachi nisa, nasöl-lë'ë netu' para inábitu' Li', innatu': "¿Nacu' Li' Cristo, bönni' na' ral-la' guídë', o naru' ral-la' cöztu'-në' bönni' yúbölö?"

²¹ La' ná'asö ruúnë' Jesús zían nupa te'e, yugu' bönni' huë', en bönni' yú'ugaca légaquië' bö' xihui', ate' zían bönni' lo chul-la busaljë' guiöj lógaquië'. ²² Bubi'ë didza' Jesús, rë' chopë' bönni' na' nasöl-lë'ë Juan, rnnë':

—Guli'tséaj, guli'tsöjtíxjöi'i-në' Juan ca naca le bilé'eli', en le biyónili'. Tu'lé'enë' bönni' guchul-la lógaquië'. Tu'zë'ë bönni' gulatsjë'. Nuhuóacagaquië' bönni' guí'iguequinë' huë' nudzu' ruzödi. Tu'yönnë' bönni' gula'códzuë'. Nubángaquië' bönni' gulatië'. Ta'yönnë' bönni' yechi' didza' dxi'a. ²³ Bica' ba nu biti' gaca chopa ladxí', ate' za'len neda' sal-la' biti' runa' ca rechi nu na' ral-la' guna'.

²⁴ Cate' bönni' na' gusöl-lë'ë Juan bulu'zë'ë ni', gusi' lahuë' Jesús rulu'ínë' bönachi ni' ca naca queë' Juan na', rnnë':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le? ²⁵ ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nacué' lari' nazáca'de'e? Nöz quezilí' nupa nácgaca lari' nazáca'de'e, en tu'zí' xibé yöl-la' tsahui', nacua' lídxigaquië' bönni' ta'nná bë'ë. ²⁶ ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' ru'ë didza' uláz queë' Dios? Ön, rea' libí'ili', ate' nayépisëtë're' ca nu ru'i didza' uláz queë' Dios. ²⁷ Náquië' Juan bönni' na' nazúaj lu guichi lá'ayi ca naca queë', rRNA:

Buyútsóca', risöl-la'-a-në' gubáz quia', inöruë' ca Li'.

Bönni' ni uchi'ë nöza ga tödu'.

²⁸ 'Neda' rea' libí'ili': Gapa nacua' bönachi, channö zoë' nu bönni' ru'ë didza' uláz queë' Dios, biti' nácarë' lo ca Juan, bönni' na' buquülë' bönachi nisa, pero nu nácatë-rö cuidí'sö ga rinná bë'ë Dios nayépisëtë-rö ca Juan na'.

²⁹ Cate' bönachi ni', en bönni' tu'quixjë' lázagaca bönachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilë' nisa lu në'ë Juan, ³⁰ pero yugu' bönni' yudo' fariseo, en bönni' yudo' tu'sédinë' xibá queë' Moisés biti' bila'dilë' nisa lu në'ë Juan, ate' caní guca, bulu'cá'anë' cá'asö le gú'unnë' Dios gunë' queégaquië'.

³¹ Gunnë' ca' Xanru':

—¿Nacxi uséqui'tseda' bönachi nacua' dza ni zóaru' na'a? ¿Nacxi caz nácgagaquië'?

³² Nácgagaquië' ca bí'ido' ta'guítjabi'. Ta'bö'öbi' lu yë'ëyi, en ta'bödxí'abi'. Ta'nnabi' tubi' ia'tubi': "Rucödxitu' queëli' gui, pero biti' ruyá'ali'. Rul-la yéchi'tu', pero biti' ribödxili'."

³³ Caní nácali' tu' bidë' Juan, bönni' buquülë' bönachi nisa, en biti' gudahuë' yöta xtila, en biti' gu'ë xisi uva, ate' rnnali' queë': "Tu' xihui' dzaga lë'." ³⁴ Cate' bida' neda', Bönni' Guljë' Bönachi, en rë'aj rahua', rnnali' quia': "Bönni' ni náquië' bönni' huágulë'ë, en bönni' re'jë'. Náquië' luzá'agaquië' bönni' tu'quixjë', en ia'zica'rë' bönni' dul-la'." ³⁵ Rea' libí'ili': Naca bë' nupa nápagaca yöl-la' réajni'i queë' Dios ni'a que le túngaca.

Le benë' Jesús lidxë' tu bönni' yudo' fariseo

³⁶ Tu bönni' yudo' fariseo bulidzë' Jesús gágulenë' lë' tsözxön, ate' guyázië' Jesús lidxë' bönni' na', en gurö'ë rahuë'. ³⁷ Zóanu lu yödzö na' tu nigula udá dzaga, en cate' nözinu rö'ë rahuë' Jesús lidxë' bönni' yudo' fariseo na', ní'irö bidxinnu ni' nuá'anu tu böga'do' néquini guiöj nazaca' le yudzu tu le rilá' zxixi. ³⁸ Cate' bidxinnu zaca' cúdzu'lë' Jesús, guró'önu xini'ë ribödxinu. Ní'irö gusi'lonu rigú'unu nisa ribödxinu ni'ë Jesús, en ruzzinu ni'ë len guitsa' ícjanu. Butsaga lonu ni'ë, en gulú'unu ni'ë lë na' rilá' zxixi. ³⁹ Cate' bönni' yudo' fariseo na' nullidzë' Jesús bilé'enë' lë ni, guzá' ládxë'ë, rnnë': "La'tu' náquië' bönni' ni bönni' ru'ë didza' uláz queë' Dios, huéquibe'enë' nuzxi na', en nacxi nácanu nigula ni rigannu Lë', tu' nácanu nigula udá dzaga." ⁴⁰ Ní'irö Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

⁴¹ Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazxjë' que chopa iz, ate' ia'tué' na' ral-lë'ë queë' lazxjë' que chopa beo'. ⁴² Tu' cabí dë queégaquië' dumí ulu'guíxjë' lë na' tál-lë'ë queë', que lë ni na' buniti lahuë' iropë' lë na' tál-lë'ë queë'. Gunnátsóca' na'a. ¿Núzxilë' bönni' chopë' ni idxí'irönë' bönni' na' buniti lahuë' légaquië'?

⁴³ Bubi'ë didza' Simón na', rnnë':

—Réquida' neda', bönni' na' rála'rë' queë' dumí, lë na' buniti lahuë'.

Jesús gudxë' lë':

—Le nácasö rno'.

⁴⁴ Ní'irö buécjë' Jesús, ate' ni' ruyüë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' biti' bennu' quia' nisa quíbidá' ni'a, pero nigula ni gulú'unu ni'a nisa ribódxinu, en buzxinu ni'a len guítsa' ícjanu. ⁴⁵ Biti' butsaga lo' neda', pero cate' bidxíntea' lidxu', biti' ruzóa dxinu nigula ni, rutsaga lonu ni'a. ⁴⁶ Biti' gulú'u ícja' le za, pero nigula ni gulú'unu ni'a lê na' rilá' zxixi. ⁴⁷ Que lê ni na' rea' li', dul-la' zían gubága' nu nigula ni, chiguyú'u yól-la' runiti lo quéguequi, ate' nadxí'ide'enu neda'. Nu na' Dios runiti lahué' le láti'do'os, láti'do'os nadxí'i Dios nu na'.

⁴⁸ Ní'iró Jesús gudxé'-nu nigula na', rnné':

—Dul-la' gubágu'u chiguyú'u yól-la' runiti lo que.

⁴⁹ Yugu' bõnni' na' ta'bõ'lené' Jesús tahué' gula' sí lógaquié' tē' luzá'agaquié', ta'nné':

—¿Nuzxi caz bõnni' ni, runiti lotsé' ca' dul-la'?

⁵⁰ Ní'iró Jesús gudxé'-nu nigula na', rnné':

—Tu' réajlè'u neda', chibuló' li'. Bõaj lidxu', zoa dxi ládxu'u.

8

Yugu' nigula tácalennu Jesús, ta'gú'unu le tahué'

¹ Gudõdi gulaca lê ni, gudé' Jesús gapa nacua' zían yõdzõ zxõn, en yugu' yõdzõdo', ate' bené' libán ni', en bē'è didza' que didza' dxi'a ca rinná bē'è Dios, ate' idxínnutē' bõnni' usēda queē' dzágagaquié' Lē'. ² Bál-lanu nigula buné' Jesús légacanu dzágagacanu ca' Lē'. Bubéajé' bõ' xihui' yú'ugaca légacanu, en bugúé' yugu' yõdzõhué' gúí'íguequinu. Nútsa'nu ladjagacanu María, lēnu ca' Magdalena, nigula na' bubéajé' gadxi bõ' xihui' yú'ugaca lēnu. ³ Juana, nigula queé' Chuzá, bõnni' yu'u lu nē'è le dē lidxé' Herodes, nútsa'nu ca' ladjagacanu, ate' cá'anqueze Susana nútsa'nu ca' légacanu. Ta'gú'unu nigula ni, en zíanrõnu ca', le tahué' Jesús, en yugu' bõnni' usēda queē'. Tu'nõdzjanu le dē quégacanu.

Rucúdzu'è didza' Jesús ca naca queé' bõnni' guz

(Mt. 13:1-9; Mr. 4:1-9)

⁴ Bila'rúaj bõnachi zían yugu' yõdzõ ni', en bilá'gaca ga na' zoé' Jesús. Cate' bulu'dubé' ga na' zoé', Lē' bucúdzu'è didza', rē' légaquié':

⁵ —Birúajé' bõnni' guz, sõjésié' xisedo'. Cate' ni' sõjésié', bulu'huõxaj bal-la xisedo' na' ga naca la' nõza, ate' bulu'libi bõnachi léguequi. Bila'dxinba' ca' biguinnidõ', en gulé'ajba' xisedo' na' dzõ'õ la' nõza. ⁶ Bulu'huõxaj ia'bal-la xisedo' na' lu yu ga rõ'õ guiõj. Cate' gula'lén xisedo' na', la' gula'bidxité' tu' cabi nalupa' yu na'. ⁷ Bulu'huõxaj ia'bal-la xisedo' na' ga bulu'lén lubá yõtsi'. Tsõzxõn gula'zxõn lubá yõtsi' na', en xisedo' na', ate' lubá yõtsi' na' bila'rõli xisedo' na' gula'lén, en gulún ditaj léguequi. ⁸ Bulu'huõxaj ia'bal-la xisedo' na' ga naca luyú bēbu. Cate' chigula'zxõn, bulu'nõdzaj. Tu dxigu' na' bunõdzaj ia'tú gayuá'tērõ xisedo' ca'.

Cate' budxi gunné' caní Jesús, bē'è zidzaj didza', rnné':

—¡Nu zoa nagui, en riyõni ral-la' uzé nagui!

Bizx que rucúdzu'è Jesús didza'

(Mt. 13:10-17; Mr. 4:10-12)

⁹ Ní'iró yugu' bõnni' usēda queé' Jesús gula'nábiné' Lē', ta'nné':

—¿Bizxi sa'yéaj lê na' bucúdzu'u didza'?

¹⁰ Jesús gudxé' légaquié':

—Dios ruzéajni'iné' libí'ili' le nagachi' ca rinná bē'è Lē', pero ia'zica'rõ bõnachi ni, ru'ílēna' léguequi didza' le rucúdzu'a didza' para cate' ulu'yúé', biti' ila'lé'ené', en cate' ila'yõnné', biti' ila'yéajni'iné'.

Rigúxjõ'è Jesús le rulu'i le bucúdzu'è didza'

(Mt. 13:18-23; Mr. 4:13-20)

¹¹ Gunné' ca' Jesús:

—Caní naca le rulu'i lê na' bucúdzu'a didza'. Xisedo' na' naca xtídzē'è Dios. ¹² Xisedo' na' bulu'huõxaj la' nõza tu'lufi' ca raca quégaca bõnni' ta'yõnné' didza' na', pero la' za'tē tu' xihui', en rigúa didza' na' bidxín lu ícja ládxi'do'gaquié', para cabi ila'yéajlè'è, en cabi ulu'lé'. ¹³ Xisedo' na' bulu'huõxaj lu yu ga rõ'õ guiõj tu'lufi' ca raca quégaquié' bõnni' ta'yõnné' didza' na', en tu'dzéjané' ta'zi'è le, pero nácagaquié' ca xisedo' na' biti' ben lui. Tu chí'isõ ta'yéajlè'è, tu' ridxín le rizi' bē' légaquié', ate' la' tu'huõatē ládxi'gaquié'. ¹⁴ Xisedo' na' bulu'huõxaj ga bulu'lén lubá yõtsi' tu'lufi' ca raca quégaquié' bõnni' ta'yõnné' didza' na', en cate' chibila'yõnné', yugu' le tu'fi' ládxi'gaquié' yõdzõliõ ni, en yugu' yól-la' tsahui' que, en yugu' le ta'yaza ládxi'gaquié' le taca ni, tun nigui légaquié', ate' biti' run dxin didza' na' lu ícja ládxi'do'gaquié'. ¹⁵ Xisedo' na' bulu'huõxaj ga naca luyú bēbu tu'lufi' ca raca quégaquié' bõnni', idú ládxi'gaquié' ta'yõnné' didza' na', en ta'gu'è tsutsu le lu ícja ládxi'do'gaquié', ate' lu yól-la' ribõza zxõn ladxí' tuné' ca rnna didza' na'.

Rucúdzu'è didza' Jesús que le rigú'u bent' lédxiru'

(Mt. 4:21-25)

¹⁶ Gunné' ca' Jesús:

—Cuntu nu bõnni' ruquélè'è guí', ate' la' rudúsi'té' le guí'ina, en biti' rigú'è le zxani le ráti'né', pero ruzóé' le xilataj ga naca liná' lu yu'u, ate' nupa iya yaza ni' ulu' zí' xibé' guí' na'.

¹⁷ Ilá' lahui yúgu'té' le nagachi', ate' gaca bē', ate' irúaj ga liná' yúgu'té' le raca balándo'os.
¹⁸ 'Que lé ni na', buli'zè nágali', tu' huadéli'né' ia'lati' bõnni' ruzóé' tsutsu icja lédxi'da'ahué' didza' riyónné', en huazi'rè' xtídzè'è Dios, pero bõnni' biti' ruzóé' tsutsu icja lédxi'da'ahué' didza' riyónné', huadúa didza' na' biyónné'.

Xin'é Jesús, en yugu' bõnni' bõch'é

(Mt. 12:46-50; Mr. 3:31-35)

¹⁹ Ní'iró bila'dxiné' xin'é Jesús, en yugu' bõnni' bõch'é ga na' zoé', pero biti' guca ila'bígué'è gala' ga zoé' tu' nacuá' bõnachi' zían ni'. ²⁰ Zoa ni' nu bulidza Jesús, rnna:

—Nacu'è xinó'o, en yugu' bõnni' bõchu' u lō'a. Tē'ènné' iluf'ilené' Li' didza'.

²¹ Bubi'è didza' Jesús, rē' légaquié':

—Nupa ni ta'yõni xtídzè'è Dios, en tun ca rnna, bõnni' ni nácaquié' ca xiná' caza', en yugu' bõnni' bõchi' caza'.

Jesús ribequi dxié' bõ' budunu'

(Mt. 8:23-27; Mr. 4:35-41)

²² Tu dza gurené' Jesús tu lè'e bárcodo', dzágagaquié' bõnni' uséda queé' Lè', ate' Jesús rē' légaquié':

—Udóiditsõca'ru' ia'tsólá'a nísado' ni.

Ní'iró sójacaté'. ²³ Tsanni ni' ta'dödè' lu nísado' na', rásié' Jesús. Ní'iró gusí lo recja bõ budunu' lu nísado' na', ate' chirequi huõtaj bárcodo' na' zcan nisa, en zoa bõnadxi quégaquié'.

²⁴ Ní'iró gula'bigué'è ga dē' Jesús, en bulu'subanè' Lè', ta'nné':

—¡Bõnni' Usedi! ¡Bõnni' Usedi! ¡Chirequi huõtjaru' lu nisa!

Cate' bubanè' Jesús, bulidzè' bõ' na' recja, en nisa na' riyasa ridxiáda', ate' guzóa dxi bõ na' recja, en guró'o dxi lu nísado' na'. ²⁵ Ní'iró Jesús gudxé' yugu' bõnni' uséda queé', rnné':

—¿Naru' cabí réajlé'èli' Dios?

Guládxinè' légaquié', en tu'bánné'. Gulé luzá'agaquié' tué' ia'tué':

—¿Nuzzi caz bõnni' ni? Rinná bé'ené' bõ' recja, en nísado', ate' tun ca rnna xtídzè'è.

Tu bõnni' yódzó Gadara yu'u lè' bõ' xihui'

(Mt. 8:28-34; Mr. 5:1-20)

²⁶ Ní'iró bila'dxiné' lu xiyúgaquié' bõnni' Gadara, le dē ia'tsólá'a nísado' ca dõdilõ ga dē luyú Galilea. ²⁷ Cate' birúajé' Jesús lè'e bárcodo' na' ga naca lu yu na', dutságuié' tu bõnni' yódzó na' Lè'. Chigudzé yu'u bõ' xihui' lè', ate' bití'ró rácué' lari', en bití'ró rizoé' lu yu'u, pero nun xilatjé' lu zcan bulóaj ga nádjagaca yeru ba. ²⁸ Cate' bõnni' na' yu'u bõ' xihui' lè' bilé'ené' Jesús, guródxí'è zidzaj, ate' buzóa zxi'é' lahué' Jesús, en bē'è zidzaj didza', rnné':

—¿Bixzi ral-la' a quiu', Jesús, Xzí'iné' Dios nayépisetèrè'? Ráta'yua' lo' cabí usaca' zí'u neda'.

²⁹ Caní gunné' tu' chigunná bé'ené' Jesús bõ' xihui' na' urúaj lu bõnni' na'. Zían luzuí zí'atèlõ burixi butúluda' bõ' xihui' na' bõnni' na', ate' yugu' bõnni' yódzó ni' gulúgué' lè' du guié', en bulu'xéjanè' bregui' guié' ni'a nē'è, pero blé'è yugu' du guié' na', ate' bõ' xihui' na' yu'u lè' guché' lè' lu lataj cá'asó. ³⁰ Ní'iró Jesús gunábiné' bõ' xihui' na', rnné':

—¿Bi leu'?

Bõ' xihui' na' gudxi Lè':

—Le Zían lea'.

Caní gunná tu' yú'ugaca bõ' xihui' zían bõnni' na'. ³¹ Ní'iró yugu' bõ' xihui' na' guláta'yugaca lahué' Jesús cabí isól-lé'è léguequi lataj chul-la quégaca nupa nátigaca.

³² Nacuá'aba' ca' tu có'õba' cuchí zían ta'daba' táguba' lu guí'ado' ni', ate' bõ' xihui' na' gula'naba yechí' Jesús gu'è léguequi lataj tsójtus'ugaca cuchí zían na'. Jesús bē'è léguequi lataj.

³³ Bulu'rúaj yugu' bõ' xihui' lu bõnni' na', en yójtus'ugaca cuchí zían na', ate' yójacaba' cuchí zían na' ga naca tu lè' e guíõj. Yójbixigacaba' lu nísado', ate' ni' gula'yé'piba' nisa, gulátiba'.

³⁴ Cate' bila'lé'ené' bõnni' tu'yúgaquié'-ba' cuchí zían na' ca na' guca quégacaba', guládxí gula'dzõbiné'. Bulu'zxúnnajé' ni', ate' yójhuõjgaquié' yójtixjõ'i'lguequiné' nupa nacuá' yódzó na', en nupa nacuá' la' guixi' ni'. ³⁵ Ní'iró bila'rúajé' bõnni' yódzó na', yójyúgaquié' lè' na' guca. Cate' bila'dxiné' ga na' zoé' Jesús, bila'lé'ené' bõnni' na' gula'yú'u bõ' xihui' lè', rō'è xini'è Jesús. Nácué' lari', en dxi'ado' chizóé', ate' guládxinè'. ³⁶ Nupa na' bila'lé'è lè' na' guca gula'guíxjõ'i' légaquié' ca guca, bõáquié' bõnni' na' gula'yú'u bõ' xihui' lè'. ³⁷ Ní'iró yúgu'té' bõnachi' zían na' quégaca yódzó nabábagaca Gadara na' guláta'yu lahué' Jesús urúajé' lu xiyúguequi, tu' tádxinè'. Bubené' Jesús lè'e bárcodo' na', en sõhuõjé'. ³⁸ Bõnni' na' bulu'rúajé'

bó' xihui' na' lè' gúta'yue' lahué' Jesús gu'è lè' lataj tséajlenè' Lè' tsòzxõn. Gunná bé'enè' Jesús lè' ugá'anè' ni', rnnè':

³⁹—Bõaj lidxu'. Yõtíxjõi'i bõnachi uládz quiu' yugu' le zxõn benè' Dios quiu'.

Bõajè' bõnni' na' lidxè', ate' buzè' didza' idú lu yòdzò ni' ca naca le zxõn benè' Jesús queè'.

Jesús ruúnè'-bi' bi'i nigula queè' Jairo enca' nigula na' gudannu lari' nácué'

(Mt. 9:18-26; Mr. 5:21-43)

⁴⁰ Cate' budxinè' Jesús ia' tsòlá'a nísado' na', bulu'dzeja bõnachi zían nacuá' ni' ni'a queè' Lè', tu' ta'bõza Lè'. ⁴¹ Ní'irò bidxinè' Jairo ga zoè' Jesús. Náquiè' bõnni' lo que yu' u ga tu' dubè' bõnni' judío, en tu' sèdè' queè' Dios. Biyéchuè' xini'è Jesús, en gúta'yue' lahué' tséjè' lidxè'. ⁴² Caní benè' tu' zóabi' tubi' bi'i nigula queè', chirequi gátibi'. Nácabi' bi'i la's dui queè', en yú'ubi' ca chinnu iz. Tsanni ni' sa'yéajè' Jesús, sònógaca tu' quirò bõnachi zían Lè'.

⁴³ Nútsa'nu tu' nigula ladaj bõnachi zían na', chiguca chinnu iz riguí' rizáca'nu. Biti' ruhuí' ròn queènu que huè' quegaca cázanu nigula, ate' chibutõnu dèra le dè queènu, riguízjxanu nupa tu' ún bõnachi, pero bití' guca nu bõnni' únè'-nu. ⁴⁴ Gubíga'nu zaca' cùdzu'lè' Jesús, en gudannu ruí' lari' nácué', ate' la' bu'itè huè' ròn queènu.

⁴⁵ Ní'irò Jesús gunábinè' nupa nacuá' ni', rnnè':

—¿Nuzxi na' gudán neda'?

Gula'dá'baguí'è yúgu'tè'. Ní'irò Pedro, en nupa nacuá'len lè' gulè' Lè', ta'nnè':

—Bõnni' Usedi, nacuá' bõnachi zían ni, tu'quirò Lí', en tu'dxiga' Lí', ate' ¿rnnatso: "¿Nuzxi na' gudán neda'?"

⁴⁶ Ní'irò Jesús gunnè':

—Zoa nu gudán neda', tu' gúquibe'eda' birúaj yõl-la' huáca neda' le ruún bõnachi.

⁴⁷ Cate' réquibe'enu nigula na' nõzinè' Jesús le bennu, ní'irò gudxízinu. Biyéchunu xini'è Jesús, en gudíxjõi'ínu Lè' lógaca bõnachi zían na' bizx que na' gudannu lari' nácué', en ca na' guca, la' bõacátènu. ⁴⁸ Ní'irò Jesús gudxè'-nu:

—Nigúlado', tu' réajlè'u neda' chibõácu'. Bõaj lidxu', zoa dxi ládzu'u.

⁴⁹ Cate' ni' ru'è Jesús didza' ni, bidxinè' tu' bõnni' ni', zè'è lidxè' bõnni' lo na' que yu' u ga tu' dubè' tu' sèdè' queè' Dios, ate' gudxè' bõnni' lo na':

—Chigútibi' bi'i nigúlado' quiu'. Biti'rò upíxjxanu'-nè' Bõnni' Usedi.

⁵⁰ Cate' biyõnnè' Jesús lè ni, bubi'è didza', rè' bõnni' lo na':

—Biti' gádxinu'. Guyéajlè'èsò Dios. Huóácabi' bi'i nigúlado' quiu'.

⁵¹ Cate' guyáziè' Jesús yu' u na', bití' bè'è lataj nu tsázalen Lè', pero légasasè' Pedro, en Jacobo, en Juan, enca' xuz xiná'abi' nigúlado' na'. ⁵² Ta'bõdxi nupa nacuá' ni'. Ta'bõdxi yeché'è ni'a queèbi' bi'i nigúlado' na', ate' Jesús rè' légaquiè', rnnè':

—Biti'rò cõdxili'. Biti' nátibi' nigúlado' ni. Rásisibi'.

⁵³ Bulu'titjè' Lè' tu' nõzguequinè' chinátibi'. ⁵⁴ Ní'irò gudélè'è Jesús ná'abi', en bè'è zidzaj didza', rnnè':

—Bi'i nigúlado', guyaschi.

⁵⁵ Ní'irò bu' u bõ' naca cázabi', bubanbi', ate' la' guyásatèbi'. Jesús gunná bé'enè' légaquiè' ilu'è le gágubi'. ⁵⁶ Bulu'bánnè' xuz xiná'abi', pero Jesús gunná bé'enè' légaquiè' cuntú nu ilè' ca na' guca.

9

Risõl-lè'è Jesús bõnni' usèda queè' tsójéngaquiè' libán

(Mt. 10:5-15; Mr. 6:7-13)

¹ Ní'irò butubè' Jesús idxínnutè' bõnni' usèda queè', ate' budòdè' lu ná'agaquiè' yõl-la' huáca, en yõl-la' unná bè' para ulu'béajè' bó' xihui' yú'ugaca bõnachi, en ulu'únè' nupa te'e. ² Gusõl-lè'è légaquiè' tsójéngaquiè' libán ca rinná bè'è Dios, en tsójjuéngaquiè' nupa te'e. ³ Jesús gudxè' légaquiè':

—Biti' bi' guá'alí' para la' nõza, calèga xiyágado', en calèga yõxaj, en calèga yõta, en calèga dumí, en bití' ixóa yenlí' chopa lari'. ⁴ Biti'tés yu' u ga tsú'uli', guli'sóa ni' cate' uzá'arõli' yòdzò na'. ⁵ Gátitès ga bití' ilun bõnachi libí'ili' bal, buli'ruáj yòdzò na', en guli'cuíbi' bëchtò da' lè'è lálali', le ulu'í légaquiè' nagá'ana xíguia' nabága'gaquiè'.

⁶ Ní'irò bila'ruájè' bõnni' usèda queè' na'. Gula'dòdè' yúgu'tè yòdzòdo', tunè' libán que didza' dxi'a, en tu'únè' nupa te'e yúgu'tè lu yòdzò na'.

Ca gútiè' Juan, bõnni' buquilè' bõnachi nisa

(Mt. 14:1-12; Mr. 6:14-29)

⁷ Biyõnnè' Herodes, bõnni' rinná bè'è, ca naca yúgu'tè le runè' Jesús, ate' guró'è bõniga, tu' ta'nná bõnachi:

—Juan na' chibubanè' lu yõl-la' guti.

⁸ Ia'bal-lè' ta'nnè':

—Chibulë'ë Elías, bönni' na' bē'ë didza' uláz queë' Dios.

Ia'bal-lë' ta'nnë':

—Chibubanë' tu bönni' bítsë'ë yugu' bönni' gulu'ë didza' uláz queë' Dios dza ni'te.

⁹ Herodes na' gunnë':

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ë Herodes ilë'enë' Jesús.

Rugahuë' Jesús chi-un gayuá' bönachi

(Mt. 14:13-21; Mr. 6:30-44; Jn. 6:1-14)

¹⁰ Cate' bulu'dxinë' bönni' gubáz nasól-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guchë'ë Jesús légaquië' quez. Yójáquië' tu lataj cá'asó lu xiyú yödzo Betsaida.

¹¹ Cate' chinóziguequi bönachi lë ni, yójnóguequi Lë', ate' Jesús benë' léguequi bal, en bē'lenë' léguequi didza' ca rinná bē'ë Dios, ate' bunë' nupa te'e.

¹² Cate' chizá' ral-la dza na', idxínnutë' bönni' gubáz queë' Jesús gula'bíguë'ë ga zoë', en tē' Lë':

—Busól-la' bönachi ni tsöjaca gapa dē yödzo'do, en gapa dē yú'udo' idú gásibi'ilö para tsöjtíjagaquië' gapa ulu'gá'anë', en bi ilahuë', tu' naca lataj cá'asó ga ni zóaru'.

¹³ Ní'irö Jesús rē' légaquië':

—Guli'gu'ë libí'ili' le ilahuë'.

Tē' Lë':

—Gáyu'sö yöta xtládo' dē, en chópasöba' böla dēba' queëtú, o ¿naru' huayéajtsatu' tsöjō'öutu' le ilágugaca bönachi zían ni?

¹⁴ Nacu'ë ca chi-un gayu'ë bönni' ga na'. Ní'irö Jesús gudxë' yugu' bönni' usëda queë', rnnë':

—Guli'gún ga ila'bö'ë tu cö' huéajgaquië', ilaca ca chi-un huéajgaquië'.

¹⁵ Caní gulunë', ate' gula'bö'ë yúgu'të'. ¹⁶ Ní'irö gudélë'ë Jesús gayu' yöta xtila na', en chópaba' böla na', ate' guchisa lahuë' ruyúé' lúzxiba, en rē' Dios: "Xclenu'." Ní'irö buzxuzxjë' léguequi, en bē'ë quégaquië' bönni' usëda queë' para ulu'cu'ë lógaca bönachi na'. ¹⁷ Gulahuë' yúgu'të', en bulu'huöljanë'. Gudödi na' bulu'tubë' yugu' bizxaj bugá'ana, ate' bulu'lié' idú chinnu ga'bóra.

Rnnë' Pedro Jesús náquië' Cristo

(Mt. 16:13-19; Mr. 8:27-29)

¹⁸ Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' légaquië', rnnë':

—¿Nuzxi ta'nná bönachi naca' neda'?

¹⁹ Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bítsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

²⁰ Ní'irö Jesús gunábinë' légaquië', rnnë':

—Náxzi libí'ili', ¿nuzxi rnnali' naca'?

Bubi'ë didza' Pedro, rnnë':

—Nacu' Cristo nasól-lë'ë Dios.

Riguúxjö'ë Jesús ca si' ilútië' Lë'

(Mt. 16:20-28; Mr. 8:30-9:1)

²¹ Ní'irö Jesús gúdxidë'ë légaquië', en gunná bé'enë' légaquië' cuntú nu ilë' Nu náquië' Lë'.

²² Ní'irö rē' légaquië':

—Run bayudxi qui'í saca'a neda', Bönni' Guljë' Bönachi, zían le gaca quia'. Ulu'cá'anë' neda' cá'asó yugu' bönni' gula tu'zëajni'inë', en yugu' bixúz unná bē', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

²³ Gudxë' ca' yúgu'të':

—Channö rē'ënë' nu bönni' tē'ë neda', ral-la' uzóé' tsólá'aló le dē queë', en gáquië' ca tu bönni' sa'yëajë' sötjé'ë lē'e yaga cruz, ate' ní'irö gaca tē'ë neda'. ²⁴ Núti'tës bönni' ruí'íládxë'ë gun chí'ë yöl-la' na'bán queë', unítie' le, pero channö unítie' yöl-la' na'bán queë' tu' dē'ë neda', bönni' ni gata' yöl-la' na'bán idú queë'. ²⁵ Biti' bi uzi'ë xibë tu bönni' channö utubë' queë' yúgu'të le dē yödzo'lió ni, pero unítie' tsaz yöl-la' na'bán queë'. ²⁶ Nu bönni' rutuí'inë' neda', en rutuí'inë' ca' xtídza'a, lësca' neda', Bönni' Guljë' Bönachi, utuí'ida' bönni' na' cate' huöda' idinná bē'a, dzágagaca neda' yöl-la' zxön queë' Xuza', en yöl-la' zxön quégaquië' gubáz lá'ayi queë' Dios. ²⁷ Le nácatë' rea' libí'ili', nacua' bal-lë' bönni' ni bití' ilátië' cate' ila'lé'erönë' dza idinná bē'ë Dios.

Ridzá' ca riná' lahuë' Jesús

(Mt. 17:1-8; Mr. 9:2-8)

²⁸ Cate' bizá'a xunu' gubidza gudödi bë'ë Jesús yugu' didza' ni, ní'irö guchë'ë Pedro, en Juan, en Jacobo, ate' gurenë' tu lu guí'ado', ga na' bulidzë' Dios. ²⁹ Tsanni ni' ruf'ilenë' Dios didza', bidzá' ca riná' lahuë', ate' bö'áca chiguí'chido'os lari' nácuë', en guyëpi yösa bení'. ³⁰ Ní'irö bulu'lu'í lógaquië' chopë' bönni' ga zoë' Lë' tu'í'ilenë' Lë' didza'. Nácagaquië' Moisés, en Elías. ³¹ Chopë' ni gula'yëpë' yösa bení', ate' tu'í'ilenë' Jesús didza' ca si' uzë'ë yödzólió ni, gátie' lu yödzó Jerusalén. ³² Sal-la' chirácada' ilásië' Pedro, en nupa nacua'len lë', bayudxi gula'ná'asë', ate' bila'lé'enë' yö'l-la' bení' queë' Jesús, en chopë' na' nacua'lenë' Lë'. ³³ Cate' bulu'zë'ë chopë' na' ga na' zoë' Jesús, ní'irö Pedro gudxë' Lë':

—Bönni' Usedi, dxi'a naca zóaru' ni. Güntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

Biti' réquibe'enë' Pedro bi na' rnnë'. ³⁴ Tsanni ni' ru'ë didza' ni, la' gurö'ötë böaj le bugacu légaquië', ate' guládxinë' tu' nacu'ë lu böaj na'. ³⁵ Ní'irö biyön chi'i Nu ruf'i didza' lu böaj na', rnna:

—Bönni' ni náquië' Zxí'ina'. Nadxf'ida' Lë'. Buli'zë nágali' didza' gu'ë.

³⁶ Cate' budxi bë' didza' chi'i na', tuzë' Jesús nagá'analenë' légaquië'. Ta'cuá' dxië' bönni' usëda queë', ate' dza na' cuntu nu gulë' ca naca le bila'lé'enë'.

Ruúnë' Jesús bi'i bönni' yu'u bö' xihui' lëbi'

(Mt. 17:14-21; Mr. 9:14-29)

³⁷ Cate' za' rení' ia'tú dza bulu'huötjë' Jesús, en bönni' na' dzágagaquië' Lë' lu guí'ado' na', ate' bila'rúaj bönachi zían dutságagaca Jesús. ³⁸ Ní'irö bë'ë zidzaj didza' tu bönni' nútsë'ë ladaj bönachi zían na'. Bulidzë' Jesús, rnnë':

—Bönni' Usedi, ráta'yua' lo' duyú'-bi' bi'i bönni' quia' tu' nácabi' bi'i la's dui quia'. ³⁹ Yu'u bö' xihui' lëbi' le run ga ribödxi'abi', en ruxízida' lëbi'. Run ga ribía bidxina' zxóna' ruá'abi', en rurixi rutúluda' lëbi', ate' catu caz rusán lëbi'. ⁴⁰ Gúta'yua' lógaquië' bönni' usëda quiu' ulu'béajë' le, pero bití' gula'zéquínë'.

⁴¹ Bubi'ë didza' Jesús, rnnë':

—Libi'ili', bití' réajlë'ëli', en nachixi ícjali'. ¿Gáca'xte ral-la' sóalena' libí'ili', en guá' ilena' queëli'? Dijuá'a-bi' bi'i bönni' quiu' ni.

⁴² Cate' ni' zá'abi' ribíga'bi' ga na' zoë' Jesús, burixi butúluda' bö' xihui' na' lëbi'. Jesús gudil-lë' bö' xihui' na', en bunë'-bi' bi'i bönni' na'. Ní'irö bugu'ë-bi' lu në'ë xúzibi'. ⁴³ Bulu'bani yúgu'të bönachi ni' ca naca yö'l-la' huáca zxön queë' Dios.

Jesús ru'ë didza' leyúbólö ca si' ila'zönë' Lë'

(Mt. 17:22-23; Mr. 9:30-32)

Tsanni ni' tu'bani yúgu'të bönachi ca naca le zxön runë' Jesús, Lë' gudxë' yugu' bönni' usëda queë', ⁴⁴ rnnë':

—Gulí'cú'u icja nágali' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

⁴⁵ Bití' gula'yéajni'inë' bönni' usëda queë' didza' ni, tu' cabí' ruf'inë' Dios légaquië' lataj ila'yéajni'inë', pero bití' bulu'rúguinë' ila'nábinë' Jesús ca naca didza' ni.

Nu naca lo

(Mt. 18:1-5; Mr. 9:33-37)

⁴⁶ Ní'irö gula'sí lógaquië' bönni' usëda queë' Jesús tu'ë didza'. Ta'nábini luzá'agaquië' tuë' ia'tué' núzxilë' gáquië' lo. ⁴⁷ Réquibe'enë' Jesús le ta'zá' ládxi'gaquië', ate' gudélé'ë-bi' tubi' bí'ido', en buzóë'-bi' cuitë'. ⁴⁸ Ní'irö rë' légaquië':

—Núti'tës bönni' gunë' bal tu bí'ido' caní' tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasól-lë'ë neda'. Que lé ni na' bönni' nútsë'ë ládjali' nácarë' nóxaj ladxí', bönni' ni náquië' lo.

Nu bití' ridá'baga' rë'u, rácalen rë'u

(Mr. 9:38-40)

⁴⁹ Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bé'etu'-në' tu' cabí' dë'ë rë'u.

⁵⁰ Jesús rë' lë':

—Bití' inná bé'eli'-në', tu' rácalen rë'u nu bití' ridá'baga' rë'u.

Jesús ridil-lë' Jacobo, en Juan

⁵¹ Cate' chizá' gal-la' dza ral-la' gátie' Jesús, en huëpë' yehua' yubá, benë' bayudxi tsejë' Jerusalén. ⁵² Gusól-lë'ë yugu' bönni' gubáz queë' ila'nóruë' ca Lë', ate' yöjáquië' tu yödzódo' quegaca bönachi Samaria para tsójpá'agaquië' ga ugá'anë' Jesús tu yëla. ⁵³ Yugu' bönni' yödzó na' bití' gulunë' Jesús bal tu' chinaca queë' sa'yéajë' Jerusalén. ⁵⁴ Cate' Jacobo, en Juan, bönni' usëda queë' Jesús, bila'lé'enë' lë ni, të' Lë':

—Xan, ¿naru' inábats'oca tu' huótaj guí' le za' yehua' yubá, en usuniti légaquié', guntu' ca na' bené' Elías?

⁵⁵ Bué'c'jē' Jesús, en gudil-lē' légaquié', rnnē':

—Biti' nózili' bizzi bō' dzágui libí'ili'. ⁵⁶ Bida' ni neda', Bōnni' Guljē' Bōnachi, calēga para usunitia' yōl-la' na' bān quégaca bōnachi, pero bida' dusólá' bōnachi.

Ní'irō yōjáquié' yōdzō yúbōlō.

Nupa tē'ēni tsójácalen Jesús

(Mt. 8:19-22)

⁵⁷ Tsanni ni' yú'ugaquié' nōza Jesús, en yugu' bōnni' dá'gaquié' Lē', bidxinē' tu bōnni' yōdzō Jerusalén, en rē' Jesús:

—Xan, rē'ēnda' sá'lēna' Li' gáti'tēs ga tseju'.

⁵⁸ Jesús rē' lē':

—Yúgu' bōza', nacua' zxan bulóaj quégacaba', ate' biguinnido', dxíagaca xcá'agacaba', pero neda', Bōnni' Guljē' Bōnachi, biti' dē' quia' ga gáta'a uzí' ládxa'a.

⁵⁹ Ní'irō Jesús gudxē' tu bōnni' yúbōlō, rnnē':

—Gudá' neda'.

Bōnni' ni gudxē' Lē':

—Xan, benna neda' lataj huója' lidxa' ga idxinrō dza chibucácha'a-nē' xuza'.

⁶⁰ Jesús gudxē' lē':

—Bē' lataj bōnni' chizóa ilátiē' ulu'cáché'ē nupa chinati quégauquié', pero li', guyéaj, yōjén libán ca inná bē'ē Dios.

⁶¹ Ní'irō bidxinē' ia'túé' ca', en rē' Jesús:

—Xan, rē'ēnda' sá'lēna' Li', pero benna neda' lataj tseja' tsójzégacada'-nē' didza' di'a dza quia'.

⁶² Jesús gudxē' lē':

—Núti'tēs bōnni' ru'i ládxe'ē le raca yōdzólió náquié' ca tu bōnni' rugá'anē'-ba' bēdxi, en ruyúé' zaca' cúdzulē'. Nu run caní biti' naca lesaca' tsaza ga rinná bē'ē Dios.

10

Risól-lē'ē Jesús tsónnalalaj yu' chiē' bōnni' tsójéngaquié' libán

¹ Gudōdi gulaca yugu' lē ni, gurōē' Xanru' ia'tsónnalalaj yu' chiē' bōnni' usēda queē', ate' gusól-lē'ē légaquié' chopa huéajgaquié' para ila'nóruē' ca Lē', en tsójáquié' yúgu'tē yōdzō, en yōdzōdo' gapa chizóa tōdē' Lē'. ² Gudxē' légaquié':

—Le nácatē, dēda' dxin quia', le naca ca tu la' yēla xzōn ga nu tsójlapa', pero nabábasō huen dxin quia' nacua'. Que lē ni na', guli'gáta'yu lahuē' Dios, náquié' Xan la' yēla na', isól-lē'ē yugu' huen dxin ga naca la' yēla queē'. ³ Guli'tséaj na'a. Buli'yútsóca, neda' risól-la'a libí'ili', nácali' ca yugu' bō'cu' xzila' sōjácaba' ladjagacaba' bō'cu' guí'a sinia'. ⁴ Biti' guá'ali' yōxaj dumí, en calēga buzudi yōta, en biti' guá'ali' ia'tú cō' xiráchuli', en biti' tseli' para guí'ilenlí' bōnachi didza' gapa naca la' nōza. ⁵ Gáti'tēs yu'u ga tsú'uli', innali': "Le ribequi dxi ladxi' gaca quégaca bōnachi nacua' yu'u ni." ⁶ Channō zoa ni' nu bōnni' si'ē yōl-la' ribequi dxi ladxi', ugá'analen lē' le ribequi dxi ladxi' na' inábali', pero channō cabí zoa ni' nu bōnni' caní, ugá'analen libí'ili' le ribequi dxi ladxi' na' inábali'. ⁷ Guli'gá'ana yu'u ga na' tsú'uli', en guli'guí'aj guli'gagu bi ilunnē' queéli', tu' udzóli quezínē' bōnni' huen dxin le gahuē'. Biti' tódili' yu'u yu'u. ⁸ Gáti'tēs yōdzō ga tsú'uli', ate' ilún libí'ili' bal, guli'gagu le ulu'cu'ē loli'. ⁹ Buli'ún nupa te'e nacua' yōdzō na', en guli'guíé' léguequi: "Chibidxín le rinná bē'ē Dios ga zóali'." ¹⁰ Gáti'tēs yōdzō ga tsú'uli', channō cabí ilún libí'ili' bal, guli'rúaj, tsójsóali' la' nōza que yōdzō na', en innali': "Bēchtō que ládzali' le da' lē' e lábatu' ruquinnajtu', le rulu'i' nabága'li' xígua', pero ral-la' inózili' lē ni, chibidxín le rinná bē'ē Dios ga zóali'." ¹² Neda' rea' libí'ili', cate' idxín dza ichúguie' Dios quégaca bōnachi, ila'guí'ila'zaca' rō bōnachi yōdzō ni' ca ila'guí'ila'zaca' bōnachi yōdzō Sodoma, nupa ni' busunitiē' Dios.

Le gaca quégaca nupa biti' ulu'bí' ládxi' gaca

(Mt. 11:20-24)

¹³ Gunnē' ca' Jesús:

—Bica' bayechi' libí'ili', bōnachi yōdzō Corazín. Bica' bayechi' libí'ili', bōnachi yōdzō Betsaida. La'tu' gulaca lu yōdzō Tiro, en lu yōdzō Sidón yugu' yōl-la' huáca rubani ca yugu' le bena' ga zóali', dza ni'te ulu'bí' ládxi'gaquié' bōnni' ni', ate' ilácuē' lari' cá'asō, en ila'gu'ē dō ícjagaquié', le ulu'igaca chibulu'bí' ládxi'gaquié'. ¹⁴ Que lē ni na', cate' idxín dza ichúguie' Dios quégaca bōnachi, quí'í sáca'róli' ca ila'guí'ila'záquié' bōnni' yōdz Tiro, en yōdz Sidón. ¹⁵ Libí'ili', bōnachi Capernaum. Réquili' tsázali' yehua' yubá. Huó'jali' tsójsázali' lataj chul-la quégaca nupa nátigaca.

¹⁶ Ní'irō Jesús gudxē' yugu' bōnni' usēda queē', rnnē':

—Nu ruzé nagui libí'ili, ruzé nagui ca' neda', ate' nu rucá'ana libí'ili cá'asó, rucá'ana ca' neda' cá'asó, en nu rucá'ana neda' cá'asó, rucá'ana ca' cá'asó Xuza', nasól-lë'è neda'.

Bönni' yójéngaquié' libán tu dxinë' ga zoë' Jesús

¹⁷ Cate' tsónnalalaj yu' chié' bönni' na' gusól-lë'è Jesús bulu'dxinë' ga zoë' Lë', bönni' na' yójéngaquié' libán, ta'nnë':

—Xan, tun bō' xihui' ca' rnnatu' cate' ruguntu' dxin Lo'.

¹⁸ Jesús gudxë' légaquié':

—Neda' bilé'eda' Satanás tu' xihui', gubixi zxan lúzxiba ca' run yōsa, le riyaza luyú.
¹⁹ Buli'yútsōca', neda' nudōda' lu ná'alí' yōl-la' unná bē' para gaca sōngacali'-ba' bēla sínía', en xōjnō', en bití' bī gaca queéli', ate' ucúl-lali' yōl-la' unná bē' que tu' xihui', nu bití' rilé'e rē'u dxi'a. ²⁰ Na'a, buli'dzeja, calégasō tu' tun bō' xihui' ca' rnnali', pero tu' nuzúajgaca lali' lu guichi ni' yehua' yubá.

Rudzéjanë' Jesús

(Mt. 11:25-27; 13:16-17)

²¹ La' ní'isō rudzéjanë' Jesús, dzáguie' Dios Bō' Lá'ayi Lë', rnnë':

—Rigu'a Li' yōl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquié' bönni' táquié' yenni', en bönni' ta'yéajni'inë', pero buluf'iguequinu'-bi' bí'ido' ca naca. ¡Ca' gaca, Xuza', tu' caní guyaza ládxi'u!

²² Ní'irō gunné':

—Yúgu'të budōé' Xuza' lu na'a. Cuntu nu bönni' nōzinë' Nu náquié' Zxí'inë' Dios, pero tuzé' Dios Xuz nōzinë', ate' cuntu nu nōzi Nu náquié' Dios Xuz, pero tuzé' Zxí'inë' nōzinë', ate' inōzīgaca ca' nupa na' Zxí'inë' rē'ënë' uluf'inë' léguequi Xuzë'.

²³ Ní'irō Jesús buyúé' yugu' bönni' usēda queé', en rē' légaquié':

—Bica' bágaca nupa ta'lé' e le rilé'eli' libí'ili', ²⁴ tu' rea' libí'ili': Zían bönni' gulu'è didza' uláz queé' Dios, enca' bönni' gula'nná bē'è, gul'é'ennë' ila'lé'enë' le rilé'eli', pero bití' bila'lé'enë' le. Gul'é'ennë' ila'yōnnë' le riyōnili', pero bití' bila'yōnnë' le.

Tu bönni' Samaria, bönni' tshui'

²⁵ Ní'irō guyasë' tu bönni' yudo' usedi, en para si' bē'è Jesús, gunábinë' Lë', rnnë':

—Bönni' Usedi, ¿bixxi ral-la' guna' para idéli'da' yōl-la' na'bán idú?

²⁶ Jesús rē' lë':

—¿Bixxi caz nazúaj lu guichi lu xibá queé' Moisés? ¿Nacxi rusaca' quiu' lë na' rulabu'?

²⁷ Bubi'è didza' bönni' na', rnnë':

—Caní rRNA: “Idxi'inu' Xanu' Dios idú ládxi'u, en len idú icja ládxi'do'o, en len idú yōl-la' run quiu', en len idú yōl-la' réajni' i quiu', ate' idxi'inu' bönni' luzó'o ca nadxi'i cuinu'.”

²⁸ Jesús rē' lë':

—Dxi'ado' bubí'u didza'. Ben caní, ate' gata' quiu' yōl-la' na'bán na'.

²⁹ Tu' gú'unnë' bönni' na' ubéaj dxi'a cuiné', rē' Jesús:

—¿Nuzxi na' bönni' luzá'a?

³⁰ Bubi'è didza' Jesús, rē' lë':

—Buzé'è tu bönni' Jerusalén, rudínnië', sa'yéajë' yōdzō Jericó. La' nōza ni' gula'zōnë' gubán lë'. Gula'güé' lari' nácuë', en gulunë' lë' huë'. Ní'irō bulu'zë'è ni', en nucá'anagaquié' lë', chirati cazë'. ³¹ Ní'irō gudōdë' tu bixúz la' nōza ni'. Cate' bilé'enë' bönni' huë' na', tsólá'alō gudōdë'. ³² Gudōdë' ca' ni' tu bönni' nababë' zxi'ini xi'sóé' Leví, yugu' bönni' na' tunë' dxin que yudo'. Cate' bilé'enë' lë', tsólá'alō ca' gudōdë'. ³³ Lësca' yu'è tu bönni' Samaria nōza na', ate' bidxinë' gala' ga dë' bönni' huë' na'. Cate' bilé'enë' lë', buéchi' ládxe'è lë'. ³⁴ Gubígui'è ga na' dë', ate' gulu'è le za, en xisi uva nál-la lu huë' queé', ate' buchólinë' le lari'. Ní'irō budxíé' lë' cúdu'ba' bōa' queé', en bu'è lë' yu'u ga ta'dxinë' bönni' yú'ugaquié' nōza, ate' ni' gudapa chí'è lë'. ³⁵ Cate' za' rení' ia'tú dza, en chízóa uzé'è bönni' Samaria na', guléajë' lászjaru' que chopa dza, le bucá'anë' lu nē'è bönni' xan yu'u na', en rē' lë': “Gudapa chí'è bönni' ni, en channó utó'u ia'lati' dumí, ubi'a neda' quiu' cate' huōda'.” ³⁶ Na'a, ¿nacxi runi li'? ¿Núzxilë' bönni' yonna ni' gulúqíé' bönni' luzé'è bönni' na' gulu'è dō' bönni' gubán queé'?

³⁷ Bubi'è didza' bönni' yudo' usedi na', rē' Jesús:

—Bönni' na' buéchi' ládxe'è lë'.

Ní'irō Jesús gudxë' lë':

—Guyéaj na'a, yōjén ca' li'.

Le benë' Jesús lídxigacanu Marta, en María

³⁸ Ní'irō bu'è nōza Jesús, ate' bidxinë' tu yōdzōdo' ga ni' tu nigula lënu Marta guchë'ënu Lë' lídxinu. ³⁹ Marta ni zōanu nigula zxlánu lënu María, ate' María na' guró'òtënu ga naca xini'è Jesús, en ruzé náganu xtídzë'è. ⁴⁰ Marta na' bubí buguí'inu, zían dxin runnu, ate' gubíga'nu ga na' zoë' Jesús, en rënu Lë':

—Xan, ¿naru' cabí ru'í ládxi'tso' neda' tu' núcá'anabi' bi'i xzila' ni neda', ate' tuza' runa' dxin? Gudxi-bi' gácalenbi' neda'.

⁴¹ Bubi'ë didza' Jesús, rë'ë-nu:

—Marta, Marta, ruúbi rugu'íde'enu', en zían le ru'í ládxi'u runu'. ⁴² Tuz le run bayudxi nu gun, ate' María ni guröbi' lë na' nácatëro dxi'a, ate' lë na' guröbi' biti' udúa queëbi'.

11

Ca ral-la' ulídzaru'-në' Dios

(Mt. 6:9-15; 7:7-11)

¹ Tu dza ni' Jesús rulidzë' Dios. Cate' budxi bé'lenë' Dios didza', tuë' bönni' usëda queë' rë' Lë', rnnë':

—Xan, busedi netu' ulídzatu'-në' Dios güf'ilentu'-në' didza', ca benë' Juan, busédinë' bönni' dá'gaquië' lë'.

² Ní'irö Jesús rë' légaquië':

—Cate' ulídzali'-në' Dios güf'ilenli'-në' didza', guli'ná: Xuztu', zu' yehua' yubá, gá'ana xzön Lo'.

Gudá inná bë'u.

Gaca ca raza ládxi'u Li' luyú ni, ca na' raza yehua' yubá.

³ Benna le gágutu' na'a dza.

⁴ Buniti lo netu' dul-la' nabága'tu'

ca netu' ca' runiti lotu' nupa tua' dö' queëtu'.

Biti' gu'u lataj si' bë' tu' xihui' netu',

pero busólá netu' lu na' nu ruá' dö'.

⁵ Jesús rë' ca' légaquië':

—Channö zoë' nu bönni' ládjali', en zoë' böchi' luzë'ë, en channö huidë' ga na' zoë' guluhuëla, ate' ulidzë' lë', innë': “Böcha'a, benna quia' tsonna yöta xtila ⁶ tu' si' bidxinë' quia' böchi' luzá'a, zë'ë zí'tu', pero biti' bi dë le gu'a-në' gahuë.” ⁷ ¿Naru' ubi'ë didza' caní bönni' na' zoë' yu'u, guíe' lë': “Biti' utsó'o neda' tu' chinayayaj yu'u, en chidélengacabi' bi'i quia' neda', ate' biti' gaca chasa' bi gunna' quiu'”? ⁸ Neda' rea' libí'ili': Sal-la' biti' chasë' bi unödzjë' queë' tu' náquië' böchi' luzë'ë, pero chasë', en unödzjë' queë' idutë le riquinnë' para cabiró upíxjanë' lë'. ⁹ Que lë ni na' rea' libí'ili': Guli'naba, ate' Dios gunnë' queëli'. Guli'quilaj, ate' idzöli queëli'. Buli'lidza ra' yu'u, ate' tsalaj queëli'. ¹⁰ Nu rinaba, rizi' que, ate' nu riguilaj, ridzöli que, ate' nu rulidza ra' yu'u, ralaj que.

¹¹ Channö zoë' nu bönni' ládjali', en náquië' xuz, ate' channö xzí'inë' inábibi' lë' yöta xtila, ¿naru' unödzjatsë' queëbi' guíöj? Channö inábibi' lë' tuba' böla, ¿naru' unödzjatsë' queëbi' bëla? ¹² Channö inábibi' lë' dxita que böra, ¿naru' unödzjatsë' queëbi' xöjnö? ¹³ Caní naca, nácali' libí'ili' huiá' dö', pero nözili' unödzjali' quégacabi' xzí'inili' le naca dxi'a. Nácatëro löza Xúzili' zoë' yehua' yubá gunnë' queëli' Dios Bö' Lá'ayi, núlöli' inábili' Lë'.

Ta'nnë' runë' dxin Jesús len yöl-la' huáca que tu' xihui'

(Mt. 12:22-30; Mr. 3:19-27)

¹⁴ Tu dza bubéajë' Jesús bö' xihui' yu'u tu bönni', le run ga biti' raza innë'. Cate' burúaj bö' xihui' na', bë'ë didza' bönni' na' biti' guca innë', ate' bulu'bani bönachi nacua' ni'. ¹⁵ Bal-la bönachi nacua' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajë' yugu' bö' xihui' na'.

¹⁶ Ia'bal-la bönachi na' gulë'ëni ila'z'í' bë' Jesús, ate' gula'nabi Lë' gunë' tu le gaca bë' le za' yehua' yubá. ¹⁷ Réquibe'enë' Jesús le ta'zá' ládxi'gaquië', ate' rë' légaquië':

—Gátitës ga ta'nná be'e bönachi luzë' eguequi, channö ila'rúaj choplö le léguequisö bönachi na', ila'niti. Channö ila'rúaj choplö bönachi nacua' tu yu'u, údxi quéguequi. ¹⁸ L'ësca' caní raza que Satanás, tu' xihui', nazí'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'? ¹⁹ Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna quégaca nupa dá'gaca libí'ili' yöl-la' huáca tu' bë'aj yugu' bö' xihui'? Que lë ni na', le tun nupa ni naca bë' nachíxili'. ²⁰ Channö neda', len yöl-la' huáca queë' Dios rubéajgaca' bö' xihui', le nácatë chibidxín le rinná bë'ë Dios ga zóali'.

²¹ Cate' tu bönni' nál-la dë lu në'ë le rudí'inë', en rapa chi'ë lidxë', naca chi'i dëro le dë queë'. ²² Na'a, channö zë'ë ia'tuë' bönni' nál-latërë' ca lë', en ucul-lë' lë', ní'irö cuë' yúgu'të le rudí'inë', lë na' ruzxóni ládxi'ë, ate' quisië' le dë queë' bönni' na'.

²³ Nu biti' rácalen neda', ridá'bagá' neda'. Nu biti' rutúbilen neda', rusilasi nu na'.

Ca naca que bö' xihui' rudxín xilataj

(Mt. 12:43-45)

²⁴ Gunnë' ca' Jesús:

—Cate' rirúaj bö' xihui' lu bönni', ridá gapa nabídx, riguila' ga uzí' ladxí'. Channö cabí idzöli que, inná: "Huöja' xilatja' ga ni' birúaja'." ²⁵ Cate' ruxín ni', röjxaca' bönni' na', náquië' ca tu yu'u chinulúa, en chinabá'a para nu tsójsóa ni'. ²⁶ Ní'irö reaj, en röjxí' ia'gadxi bö' xihui', nácacatêrö xihui' ca le, ate' ta'yú'u bönni' na'. Na'a, le raca queë' bönni' na' nayáli'têrö ca le guca queë' zí'alö.

Le naca bica' ba le naca idú

²⁷ Tsanni ni' ru'ë Jesús didza' ni, tu nigula nútsa'nu ladaj bönachi zían na' bé'ënu zidzaj didza', rnnanu:

—Bica' ba nigula na' biá'anu Li' lë'ënu, en bica' ba ca' luchú'unu ga na' gúdxu'u.

²⁸ Bubi'ë didza' Jesús, gunné':

—Nácacatêrö bica' ba nupa ta'yöni xtídzë'ë Dios, en tun ca rnna.

Ta'nábinë' Jesús gunë' le gaca bë' nuzxi náquië'

(Mt. 12:38-42; Mr. 8:12)

²⁹ Tsanni ni' ta'biga' bönachi zían ga zoë' Jesús, gusí lahuë' ru'ë didza', rnnë':

—Ta'nába bönachi tuá' dó' ni guna' le gaca bë' ga za' yöl-la' huáca quia', pero biti' bi le gaca bë' ila'lé'enë'. Tuz le gaca bë' ca na' guca queë' Jonás ila'lé'enë'. ³⁰ Ca na' guca queë' Jonás, gúquië' tu le naca bë' lógaca bönachi yödzo Nínive, lësca' caní gaca quia' neda', Bönni' Guljé' Bönachi, gaca' tu le gaca bë' lógaca bönachi dza ni zóaru' na'a. ³¹ Cate' idxín dza ichúguié' Dios quégaca bönachi ila'gu'i ila'zaca', en uchi'a usöröë' bönachi dza ni zóaru' na'a, Dios uchisë'-nu nigula gunná bé'ënu bönachi dza ni te luyú ni' dë tsólá'a ga ridódi gubidza beo' ziaga, ate' le bennu ulu'i nabága' gaca bönachi ni xíguia', tu' bídanu lënu, birúajnu ga naca zi'tu' para uduzë náganu didza' réajni' i bé'ë Salomón, bönni' gunná bé'ëné' bönachi Israel, pero na'a, zoa' neda' ni, en nayëpisëtëra' ca Salomón na'. ³² Lësca' caní, Dios uchisë' bönni' gula'cu'ë yödzo Nínive cate' idxín dza ichugu bë'ë quégaca bönachi, en uchi'a usöröë' bönachi dza ni zóaru' na'a, ate' le gulunë' ulu'i nabága' gaca bönachi ni xíguia', tu' bulu'bí' ládxi'gaquië' bönni' Nínive cate' bila'yönnë' libán benë' Jonás, ate' na'a zoa' neda' ni, en nayëpisëtëra' ca Jonás na'.

Le rigú'u bení' lu icja ládxi'do'oru'

(Mt. 5:15; 6:22-23)

³³ Gunnë' ca' Jesús:

—Cate' nu ruquela' guí', biti' rigú'u le ga nagachi', en biti' rudusi' le guí'ina, pero ruzóa le xitsá' ga liná', para uzení' quégaca nupa ta'yú'u yu'u na'. ³⁴ Guiöj loru' naca ca tu le rigú'u bení' lu icja ládxi'do'oru'. Channö guiöj lo' naca dxi'a, idúteo' yudzu le naca bení', pero channö naca xihui' guiöj lo', idúteo' yudzu le naca chul-la. ³⁵ Ben chi'i cuinu' na'a, para cabí huóaca chul-la lë na' rigú'u bení' lu icja ládxi'do'o. ³⁶ Caní naca, channö idúteo' nalísimu' le naca bení', en biti' bi zóalen li' le chul-la, yúgu'të ilé'enu' dxi'a ca raca cate' ruzeni' quiu' guí'.

Jesús ruzéqui'ë yugu' bönni' yudo' didza'

(Mt. 23:1-36; Mr. 12:38-40; Lc. 20:45-47)

³⁷ Cate' budxi bë'ë didza' ni Jesús, tu bönni' yudo' fariseo bulidzë' Lë' para tsöjtágulenë' lë'. Cate' guyázië' Jesús lidxë' bönni' yudo' na', gurö'ë rahuë'. ³⁸ Cate' bönni' yudo' fariseo na' bilé'enë' Lë', bubánninë' tu' cabí gudibi në'ë Jesús cate' si' gahuë'. ³⁹ Xanru' rë' lë':

—Libí'ili', bönni' yudo' fariseo, riguibi cuinli' ca riguibili' lálhuilógaca le rë'aji ráhuili', pero lu icja ládxi'do'oli' ruhuidi'lo', en rizá' ládxi'li' le ruá' dö'. ⁴⁰ Libí'ili', bönni' biti' réajni'ili'. ¿Naru' cabí nözilí', Nu ben le zoa lálhuísö ben ca' le yu'u lë'elö? ⁴¹ Na'a, guli'gún gun le dë queë'li', ate' ní'irö huóaca dxi'a yúgu'të le dë queë'li'.

⁴² 'Bica' bayechi' libí'ili', bönni' yudo' fariseo. Riguíz'xjali' que yudo' tu cö' huéaj tu' chi cö' le rizí'ili' que xöhuéaj, en que guixi' ruda, en quégaca guixi' cuando', pero rudódisili' le naca tsahui', en yöl-la' nadxi'i queë'li' Dios. Yugu' lë ni run bayudxi gunli', en biti' ucá'anali' ia'zica' lë na' runli'.

⁴³ 'Bica' bayechi' libí'ili', bönni' yudo' fariseo. Rë'ënili' cö'öli' gapa naca lo lu yu'u ga rudúbili' rusédali' queë' Dios, en rë'ënili' ulu'lidza bönachi libí'ili' ba xön gapa naca lálhuilóguequi bönachi.

⁴⁴ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli', tu' nácali' ca nácacaca yeru ba quégaca nupa nátigaca le cabí nalá'gaca, ate' ta'dá bönachi lálhuigaca yeru ba na', en biti' téquibe'e.

⁴⁵ Ní'irö bubí'ë didza' tu bönni' yudo' usedi raquië' xibá queë' Moisés. Rë' Jesús:

—Bönni' Usedi, cate' rnno' caní, netu' ca' runu' zi'.

⁴⁶ Jesús rë' lë':

—Bica' bayechi' ca' libí'ili, bönni' yudo' usedi rácali' xibá queé' Moisés, tu' rusubága'gacali' bönachi tu yua' zi'i le cabí gaca nu guá', pero libí'ili' caléga láti'do'os biti' ruláhu'i'li le len ná'ali'.

⁴⁷ 'Bica' bayechi' libí'ili', tu' richísali' biquitaj quégaca ba ga nagáchi'gaquié' bönni' gulu'é didza' uláz queé' Dios, ate' gulútié' xuz xtó'oli' légaquié'. ⁴⁸ Caní naca, runli' ba nali' runli' tuz le guluné' xuz xtó'oli' tu' gulútié' xuz xtó'oli' na' légaquié', ate' libí'ili' richísali' biquitaj quégaca ba ga nagáchi'gaquié'.

⁴⁹ 'Que lè ni na', lu yöl-la' réajni' i queé', Dios gunné' caní: "Isól-la' a queéli' bönni' ilu'é didza' uláz quia', en yugu' bönni' gubáz quia', ate' yugu' bönni' ni, bal-lè' gútili', en ia' bal-lè' cuia na'li' légaquié'." ⁵⁰ Caní guné' Dios tu' uchi'a usöröé' quégaca bönachi dza ni zóaru' na'a, ni'a que rön quégaca yúgu'tè bönni' gulu'é didza' uláz queé', bönni' ni' bétigaca bönachi légaquié' cate' gusi lo rata' yödzólió, ⁵¹ ga gusi lo nu bėti Abel, ga bidxintè gulútié' Zacarías, bönni' na' gulútié' gatsaj láchui'ló ga dè bucugu lá'ayi ga na' tu' zégui'gaquié'-ba' böa' bédxido' lahué' Dios, en ga dè lataj lá'ayi. Que lè ni na', rea' libí'ili', Dios uchúgué' quégaca bönachi dza ni zóaru' na'a, ni'a que rön quégaca yúgu'tè bönni' na' gulútié' xuz xtó'oli' légaquié'.

⁵² 'Bica' bayechi' libí'ili', bönni' yudo' usedi, rácali' xibá queé' Moisés. La' libí'sili' dè lu ná'ali' xzí'ini guié que lataj ga ta'dzóli bönachi yöl-la' réajni'. Libí'ili' biti' riyázali', ate' ruzága'li' xinózigaca nupa té'èni ila'yaza.

⁵³ Cate' Jesús budxi bē'lené' légaquié' didza' ni, bönni' yudo' tu' sédiné', en yugu' bönni' yudo' fariseo gula'léde'ené' Lè', ate' gula'sí lógaquié' ta'naba yúdxide'ené' Lè' ca naca zían le taca, ⁵⁴ en tu' béajé' Lè' didza' para gaca ulu'zéguié' Lè' didza' ni'a que didza' ubi'é.

12

Rusédiné' Jesús ca naca yöl-la' rulu'isó tsahui' cuini

¹ La' dza na' bulu'dubi zían gayuá' bönachi ga zoé' Jesús ga bidxintè ta'rölisó luzé'eguequi bönachi na'. Ní'irö sösi lahué' Jesús rē' yugu' bönni' uséda queé' cazé', rnné':

—Gulí' gún chí' i cuini' que le naca ca cúa zi que yóta xtila quégaquié' bönni' yudo' fariseo, le naca yöl-la' rulu'isó tsahui' cuini quégaquié'. ² Biti' bi dè le naca balándo'os le cabí ilá' lahui, en biti' bi dè le nagachi' le cabí gaca bē'. ³ Que lè ni na', yúgu'tè le chigunnáli' ga naca chul-la, ila'yöni bönachi ga naca lu beni', ate' didza' bē'èli' bagáchi'só ga guzóa lu yu'u nayayaj, gaca libán que ga naca lógaca bönachi.

Nu ral-la' gádxiru'
(Mt. 10:28-31)

⁴ Gunné' ca' Jesús:

—Bócha'ado', rea' libí'ili': Biti' gádxili' bönni' tútigaquié' bönachi, ate' tódi na' bití'rö bi gaca iluné' quéguequi. ⁵ Ulu'ida' libí'ili' nu ral-la' gádxili'. Gulí'gadxi Nu na' gaca ugúa yöl-la' na'bán queéli', en tódi na' dè lu në'é yöl-la' unná bē' chú'uné' libí'ili' lu guf' gabila. Ön, rea' libí'ili', guli'gadxi Nu na'.

⁶ 'Túti'gaquié'-ba' gáyu'ba' biguínido' len chopa dumí lásido'. Biti' ral-la' ládxe'è-ba' Dios tu biguínido' na'. ⁷ Lésca' caní, yúgu'tè guitsa' ícjali' nabábagaca lahué' Dios. Que lè ni na', biti' gádxili'. Nazáca'tèröli' libí'ili' ca zianba' biguínido'.

Nupa ta'nasó néquiguequi queé' Jesús
(Mt. 10:32-33; 12:32; 10:19-20)

⁸ Gunné' ca' Jesús:

—Rea' libí'ili': Yúgu'tè bönni' ta'nné' néquiguequiné' quia' neda' lógaca bönachi, lésca' neda', Bönni' Guljé' Bönachi, inniá' néquiguequiné' quia' lógaquié' gubáz lá'ayi queé' Dios, ⁹ ate' bönni' ta'dá'baguè'é néquiguequiné' quia' lógaca bönachi, lésca' neda' tá'baga'a néquiguequiné' quia' lógaquié' gubáz lá'ayi queé' Dios.

¹⁰ 'Yúgu'tè nupa bi ila'nné' quia' neda', Bönni' Guljé' Bönachi, gaca uniti lahué' Dios léguequi, pero nu inné' zi' queé' Dios Bö' Lá'ayi, biti' uniti lahué' Dios nu na'.

¹¹ 'Cate' ila'ché'è libí'ili' gapa naca lu yu'u ga tu'dubé' bönni' judío, en tu'sédè' queé' Dios, en lógaquié' bönni' ulu'chi'a ulu'söröé' libí'ili', en lógaquié' bönni' dè lu ná'agaquié', biti' ubi ugu'íli' naxxi gunli' o bizxi didza' ubí'ili', o bizxi innali'. ¹² La' dza ná'asó usédiné' Dios Bö' Lá'ayi libí'ili' le ral-la' innali'.

Huáca gun yöl-la' tsahui' queéru' ga gal-la ládxi'ru'-né' Dios

¹³ Tu bönni' nütse'é ladaj bönachi zían na' rē' Jesús, rnné':

—Bönni' Usedi, gudxé' bócha'a gunné' uláz quia' le guta' queé' xuztu'.

¹⁴ Jesús rē' lè':

—Bönni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dè queéli'?

¹⁵ Ní'irö Jesús gudxé' bönachi nacua' ni', rnné':

—Buli'yútsōca'. Guli'gún chí'i cuinli' para cabí uhuídi'li'. Le uzi'ë xibé nu bōnni' bití' nácasō le zían le dē queë'.

¹⁶ Ní'irō Jesús bē'lenē' légaquiē' didza', bucúdzu'ë didza', rnnē':

—Zoë' tu bōnni' rilé'enē' yōl-la' tsahui' queë', ate' runōdzjada' gulapa lu xiyüē'. ¹⁷ Ní'irō guzá' lādxxē'ë bōnni' na', rnnē': “¿Nacxi guntsa'? Bití' dē ga gapa chí'a le rulá' quia'.” ¹⁸ Ní'irō rnnē': “Caní' guna'. Uquínajgaca' yu'u ga rapa chí'a le rulá' quia', ate' guna' yugu' yu'u zxōntērō ca', ate' gapa chí'a le rulá' quia' ni', len yugu' le dē quia'.” ¹⁹ Ní'irō gaca guié' cuina': Chidēda' quia' zían le chinutuba', le gáhuida' zían iz. Uzi' lādxa'a. Gu'aj gahua', en udzējada'.” ²⁰ Ní'irō Dios rē' lē': “Lí', bōnni' bití' bi' nōzinē'. Na'a dzō' gátíu'. Na'a, ¿nuzxi caz guequi que, lē na' chinutubu'?” ²¹ Caní' raca queë' bōnni' rutubē' la' queēzē' yōl-la' tsahui', en bití' runē' le naca ca yōl-la' tsahui' lahuē' Dios.

Dios run chí'ë yugu' bōnachi queë'

(Mt. 6:25-34)

²² Gudōdi ní' Jesús gudxē' yugu' bōnni' usēda queë', rnnē':

—Que lē ni na' rea' libí'ili': Bití' ubi uguí'ili' ní'a que le gu'aj gáguli', lē na' nabánili', o ní'a que lari' gáculi'. ²³ Nácáro lesaca' yōl-la' na'bán queéli' ca le ráguli', ate' nácáro lesaca' idú le nácáli' ca lari' ráculi'. ²⁴ Buli'yutēz ca raca quégacaba' boíquiaj. Bití' tázaba', en bití' ta'lápaba', en bití' nacuá' quégacaba' ga ilún chí'iba' le rulá' quégacaba', pero Dios rugahuē' légacaba'. ¿Naru' cabí nazáca'tērōli' libí'ili' ca yugu' biguínido'? ²⁵ ¿Nuzxi caz bōnni' ládjali' gaca gunē' ga soē' ibanē' ia'tú chí'ido'os tu' ruúbi ruguí' ládxi'da'ahuē'? ²⁶ Que lē ni na', channō cabí gaca gunli' lē ni naca cuídi'sō, ¿bizx que ruúbi ruguí'ili' ní'a que le naca zxōntērō?

²⁷ Buli'yutēz ca ta'zxōn yōjdo'. Bití' tun du lari', en bití' taba lari', pero rea' libí'ili', bití' gúcarō lachi le gúcuē' Salomón ca nácagaca yōjdo' ni, sal-la' gúta'da' yōl-la' tsahui' queë'. ²⁸ Channō Dios runē' lachi yōj guíxi'do' rō'gaca na'a la' guixi', ate' cuxō huidezaj ila'gu'ë léguequi lu guí', ¿naru' cabí gunē' le nácáro dxi'a queéli', libí'ili' na' bití' réajlē'ëli' Dios idú ládxi'li'? ²⁹ Que lē ni na', bití' gúí' ládxi'li' le ral-la' gáguli', en le ral-la' guí'jali', en bití' ubi uguí' ládxi'do'oli'. ³⁰ Yúgu'tē lē ni ta'gulaj bōnachi yōdzóliō ni, pero chinōz quézinē' Xúzili' Dios le riquínili'. ³¹ Gulí'gúí' ládxi'li' tsuí'uli' ga rinná bē'ë Dios, ate' yúgu'tē lē ni cu'ë xinōza queéli'.

Yōl-la' tsahui' rigú'uru' yehua' yubá

(Mt. 6:19-21)

³² Gunnē' ca' Jesús:

—Bití' gádxili', libí'ili' na' nácáli' bō'cu' zxlá'do' quia'. Nabábasili' zóali', pero raza ládxxē' Xúzili' Dios gunnē' queéli' lataj tsuí'uli' ga ní' rinná bē'ë Lē'. ³³ Gulí'guti' le dē queéli', en buli'nōdzaj quégaca bōnachi yechi'. Caní' gaca, gunli' queéli' yōxaj dumí' le cabí gaca ditaj, en cú'uli' yōl-la' tsahui' na' yehua' yubá le bití' ubidxi udú, ga ní' bití' idxinē' bōnni' gubán, en bití' usunitiba' bōa'do' le. ³⁴ Ga ní' dē yōl-la' tsahui' queéli', ní' gúí' ládxi'li' idxinli'.

Ral-la' sóaru' ban ládxi'

³⁵ Gunnē' ca' Jesús:

—Gulí'sóa sina', en guli'quela' guí' le uzení' queéli'. ³⁶ Guli'gaca ca bōnni' huen dxin ta'bōzē' dza huōdē' xángaquiē', bōnni' sa'yéajē' lani que yōl-la' rutsaga na', para cate' udxinē', en ulidzē', la' ila'sáljatē' queë' tsu'ë. ³⁷ Bica' bágaca huen dxin na' ila'cu'ë ban ládxi' cate' huōdē' xángaquiē'. Le nácaté' rea' libí'ili', upá'a cuinē' xángaquiē' na', ate' gunē' ga ila'bō'ë ga ilahuē', ate' cu'ë le ilahuē'. ³⁸ Sal-la' huōdē' cate' chiral-la o idú guluhuē'la, channō idixáquiē' légaquiē' nacu'ë ban ládxi', bica' bágaca huen dxin na'. ³⁹ Lē ni ral-la' inōzili'. La'tu' nōzinē' xan yu'u bizxi dza huadxinē' bōnni' gubán, usubán ládxxē'ë, en bití' gu'ë lataj bōnni' na' udxí' yeru lidxxē', para cabí cuanē' le dzō'ó lidxxē'. ⁴⁰ Que lē ni na', guli'sóa ban ládxi' ca' libí'ili', tu' huōda' neda', Bōnni' Guljē' Bōnachi, tu dza bití' ribōzali' neda'.

Bōnni' huen dxin tsahui', en bōnni' huen dxin bití' náquiē' tsahui'

(Mt. 24:45-51)

⁴¹ Ní'irō Pedro gunábinē' Jesús, rnnē':

—Xan, ¿naru' reo' nétu'sō lē ni nucúdzu'u didza', o reo' ca' caní' yúgu'tē bōnachi?

⁴² Rē' Xanru' lē':

—¿Nuzxi na' bōnni' huen dxin tsahui', en réajni'inē', dē lu nē'ë uláz queë' xanē'? Bōnni' ní, xanē' udōdē' lu nē'ë lidxxē' para cate' gála'rō ilahuē' bōnni' nacu'ë lidxxē', gu'ë que queégaquiē' le ilahuē'. ⁴³ Bica' ba bōnni' huen dxin na' cate' huōdē' xanē', idixáquiē' lē runē' caní' dxin na' nudōdē' lu nē'ë. ⁴⁴ Le nácaté' rea' libí'ili', udōdē' xanē' lu nē'ë bōnni' huen dxin tsahui' na' idutē' le dē queë'. ⁴⁵ Channō guéquinē' bōnni' huen dxin na' huadzenē' huōdē' xanē', ate' isi lahuē' gu'ë dō' quégaquiē' ia'zica'rē' huen dxin, bōnni' en nigula, en isí lahuē' gu'aj gahuē', en súdxinē', ⁴⁶ ní'irō huōdē' xanē' bōnni' huen dxin na' cate' bití' ribōzē' lē', en

cate' biti' réquibe'enë, ate' usaca' zi'ë bönni' huen dxin biti' náquië' tsahui' na', en ichúguië' queë' qui'i sáquië' ca narugu queágaquië' bönni' biti' ta'yéajl'ë.

⁴⁷ Bönni' huen dxin na' nõzinë' le ré'ënë' xanë', en biti' zoë' sina', en biti' runë' ca rnnë' xanë', bönni' ni, quinitërë' xanë' lë'. ⁴⁸ Channö cabí nõzinë' tu bönni' huen dxin le ré'ënë' xanë', en gunë' le gun ga íbáguë'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' lu xanë' nuzxöni lãdxë'ë lë' le zxön, le zxöntërö ca' unabë' xanë' lu në'ë bönni' huen dxin na'.

Le náquië' Jesús gun ga ila' rúaj choplö bönachi

(Mt. 10:34-36)

⁴⁹ Gunnë' ca' Jesús:

—Bida' neda' dujéna' ga tsegui guí' yödzöliö ni, en caba lãdxa'a chinaguéla' guí' na'. ⁵⁰ Na'a, dë tu le ral-la' qui'i saca'a le naca ca tu le idflida' nisa, ate' rö'a böniga ga idxintë gaca caní quia'. ⁵¹ ¿Naru' réquili' bida' dulequi dxía' le raca yödzöliö ni? Rea' lib'íli': ¡Caléga! Bida' duléquia' le gun ga ila' rúaj choplö bönachi. ⁵² Na'a isí lo ulu'lá'alén luzé'eguequi gayu' bönachi nacua' tu yu'u. Tsonné' ila' dá'baguë'ë chopë' nazí'ígaquië' xtídzá'a, ate' chopë' na' ila' dá'baguë'ë tsonné' na'. ⁵³ Nu bönni' zóabi' bi'i bönni' queë' tá'baguë'ë zxf'inë' na', ate' bi'i bönni' na' tá'bagá'bi' xúzibi'. Nigula zóabi' bi'i nigula queënu tá'bagá'nu zxf'ininu na', ate' bi'i nigula na' tá'bagá'bi' xiná'abi'. Nigula zóanu nigula xzoa' lídxi nu tá'bagá'nu xzoa' lídxi nu na', ate' nigula xzoa' lídxi nu tá'bagá'nu xto' zxf'ininu.

Le nácacaca bë' le taca na'a dza

(Mt. 16:1-4; Mr. 8:11-13)

⁵⁴ Jesús gudxë' ca' bönachi zían nacua' ni', rnnë':

—Cate' rilé'eli' za' böaj saca' ga ribía gubidza, la' rnnátëli': “Hualaj guiöj”, ate' caní raca. ⁵⁵ Cate' reja bö' za' saca' ga ridödi gubidza beo' ziaga, rnnali': “Udzá'a na'a”, ate' caní raca. ⁵⁶ Lib'íli', bönni' rulu'í'sö tsahui' cuinli'. Nözili' le rulu'í le raca lúzxiaba, en le raca luyú ni, pero biti' réquibe'eli' le rulu'í le nácacaca bë' taca dza ni zóaru' na'a.

Ral-la' ugá' analenru' tsahui' nu rilé' rë'u

(Mt. 5:25-26)

⁵⁷ Gunnë' ca' Jesús:

—¿Bizx que biti' ruchi'a rusöröli' la' lib'í'sili' ca naca le naca tsahui'? ⁵⁸ Channö zoa nu bi unabí yudxi lí', ate' zéajli' idxinli' yúlahui', bë' ladxi' ugá' analenu' tsahui' nu na' tsanni ni' yú'uli' nõza, para cabí uzegui lí' lahuë' bönni' uchi'a usörörë' lib'íli', ate' bönni' uchi'a usörörë' na' udödë' lí' lu në'ë bönni' rusayjë' lidxi guië, ate' bönni' na' rusayjë' lidxi guië cu'ë lí' lidxi guië na'. ⁵⁹ Rea' lí', biti' uruju' ni' cate' údxirö quizxju' yúgu'të dumí lãsido' ral-lu'u que nu na'.

13

Run bayudxi ubí'i lãdxí'ru'

¹ La' dza ní'sö bila'dxinë' bönni' ta'guíxjöi'inë' Jesús ca benë' Pilato, bëtië' bal-lë' bönni' Galilea, en guzxi'ë rön queágaquië', le bugútsi'në' xichöngacaba' böa' bëdxi chigulútië' lécacaba' para ila'gu'ë xichöngacaba' na' lahuë' Dios. ² Bubi'ë didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca' zica'rë' bönni' Galilea, tu' gula'guí' gula'zaquië' caní? ³ Rea' lib'íli': ¡Caléga! Channö cabí ubí'i lãdxí'li', nítili' ca' yúgu'téli'. ⁴ Lëscá' caní guca queágaquië' chizxunë' bönni' ni', yöjbaga' yu'u sibi na' nazí'í le Siloé' lãgáquië', ate' gulatië'. ¿Naru' réquili' gula'bága'tërë' légaquië' xigua' ca ia'zica'rö bönni' nacua' Jerusalén? ⁵ Rea' lib'íli': ¡Caléga! Channö cabí ubí'i lãdxí'li', nítili' ca' yúgu'téli'.

Rucúdzu'ë didza' Jesús que yaga higo biti' bi ribía

⁶ Ní'irö bucúdzu'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyúë'. Røjtiljë' le ribía yaga na', pero biti' bi ridzölinë'. ⁷ Ní'irö gudxë' bönni' runë' dxin lu xiyúë' na', rnnë': “Chiguca tsonna iz rida' rududilja' le cuía yaga higo ni, en biti' bi ridzöllida'”. Guchugu le. ¿Bizx que run nigui luyú ni?” ⁸ Ní'irö bubi'ë didza' bönni' huen dxin na', rë' lë': “Xan, bucá'anagarö le ia'tú ízatëz, ate' uzatsa' yu zxani, en cu'a bëbu zxani. ⁹ Channö cuía yaga ni, gaca dxí'a, pero channö cabí bi cuía, ní'irö ichugu' le.”

Ruinë' Jesús tu nigula ré'enu cate' naca dza lá'ayi

¹⁰ Tu dza rusëdinë' Jesús bönachi nacua' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi queágaquië'. ¹¹ Zóanu tu nigula ni' chiguca chizxunu' iz ré'enu, tu' yu'u lënu bö' xihui' run ga te'e bönachi, ate' nayéchutica'sinu ridanu, en biti' ca' raca ulí cuinnu. ¹² Cate' bilé'enë'-nu Jesús, bulidzë'-nu, rnnë':

—Nigúlado', chiböácu' que yödzöhuë' quiu'.

¹³ Ní'irō Jesús guxóa në'ë lënu, ate' la' bulitë cuinnu, en gulú'unu-në' Dios yöl-la' ba. ¹⁴ Ní'irō gulénë' bönni' lo que yu'u ga na' tu'dubë' tu'sédë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacua' ni', rnnë':

—Xopa dza nacua' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

¹⁵ Ní'irō ubi'ë didza' Xanru', rnnë':

—Libi'ili', bönni' ruluf'isó tsahui' cuinli', ¿naru' cabí rusédxigacali'-ba' bóa' bëdxi que queëli' ga na' dá'gacaba' cate' naca dza lá'ayi, ate' tsójuá'agacali'-ba' para ilë'ajba' nisa? ¹⁶ Nácanu nigula ni xzí'ini xi'sóë' Abraham, ate' idú chixxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

¹⁷ Cate' bë'ë didza' ni Jesús, bulu'tuí'inë' yúgu'të bönni' nacu'ë ni' ta'lenë' Lë', pero bulu'dzeja ia'zica'rō bönachi, yúgu'të nupa nacua' ni', tu' ta'le'enë' yugu' le zxön runë' Jesús.

Rucúdzu'ë didza' Jesús que xisedo' mostaza

(Mt. 13:31-32; Mr. 4:30-32)

¹⁸ Ní'irō rnnë' Jesús:

—¿Nacxi caz raca rixzón le rinná bë'ë Dios, o bizxi uséqui'tseru' le? ¹⁹ Raca ca raca que xisedo' mostaza, le guzxi'ë tu bönni', ate' guzë' le ga naca lu xiyúë'. Guzxón yaga mostaza na', en guca ca tu yaga zxón, ate' bila'dxinba' biguinnido', gulunba' xcá'agacaba' lu ni'a në'e yaga mostaza na'.

Rucúdzu'ë didza' Jesús que cúa zi que yöta xtila

(Mt. 13:33)

²⁰ Lëasca' caní rnnë' Jesús:

—¿Bizxi caz uséqui'tseda' le rinná bë'ë Dios? ²¹ Naca ca cúa zi que yöta xtila, le guzxi'inu tu nigula, en bugútsi'nu tsonna cō' cúa yöta xtila, ate' guyazxaj idütë' cúa na'.

Tu ga tödiru' le naca guído

(Mt. 7:13-14, 21-23)

²² Tsanni ni' yu'ë nöza Jesús, sa'yéajë' Jerusalén, ridödë' yugu' yödzō zxön, en yugu' yödzōdo', ate' rusédinë' bönachi nacua' gapa na'. ²³ Tu bönni' zoë' ni' gunábinë' Jesús, rnnë':

—Xan, ¿naru' nabábasō nupa ulu'lágaca?

Jesús rë' nupa nacua' ni', rnnë':

²⁴ —Guli'gü'i ládxi'li' tsú'uli' saca' ga nu ridödi le naca guído', tu' rea' libí'ili': Zían nupa ilë'ëni ila'yaza ni', pero biti' ila'zéqui'në'. ²⁵ Tödi chasë' Xan yu'u, en usayjë' yu'u, isi loli' libí'ili' na' zóali' ní'ilō ulídzali'-në' ra' yu'u na', ate' guiëli'-në': “Xan, Xan, gusalaj queëtu'.” Ní'irō ubi'ë didza' Lë', en guië' libí'ili': “Biti' nözda' nuzxi libí'ili'.” ²⁶ Ní'irō isi loli' innali': “Gü'i gudágentu' Li', ate' busédinu' gapa naca lu yë'ëyi queëtu'.” ²⁷ Ní'irō guië' libí'ili': “Rea' libí'ili', biti' nözda' gazxi bönachi libí'ili'. Guli'cuita ga zoa', yúgu'tëli' ruá'ali' dö'.” ²⁸ Ní'irō cōdxi yéchi'li', en gagu zxea láya'li' cate' ilé'egacali'-në' Abraham, en Isaac, en Jacob, en yúgu'të bönni' gulu'ë didza' uláz queë' Dios, nacu'ë ga ni' rinná bë'ë Dios, pero libí'ili' sóali' ní'ilō. ²⁹ Ila'dxin bönachi ila'ru'aj saca' ga rilén gubidza, en saca' ga ribía gubidza, en saca' ga za' bō'ziaga, en saca' ga ridödi gubidza beo'ziaga, ate' ila'bō'ë ilahuë' ga ni' rinná bë'ë Dios. ³⁰ Ní'irō ilaca lo bal-la bönachi nácagaca cá'asō na'a, ate' ulu'gá'ana cá'asō bal-la nupa nácagaca lo na'a.

Ribödxi yechë'ë Jesús ni'a quegaca bönachi Jerusalén

(Mt. 23:37-39)

³¹ La' dza ní'isó bila'dxinë' bal-la bönni' yudo' fariseo ga zoë' Jesús en tē' Lë':

—¡Burúaj! ¡Buzxunnaj ni! ¡Rë'ënë' Herodes gütië' Li'!

³² Jesús rë' légaquië':

—Guli'tséaj, guli'tsöjdxë' bönni' na' náquië' ca tuba' bōza', innali': “Buyútsōca', rubéajgaca' bō' xihui', en ruúna' bönachi na'a, en cuxó, en cate' gaca lidzaj, údxi guna' dxin quia'.” ³³ Run bayudxi tséajlensa' ca' nöza na'a, en cuxó, en huidzaj, ate' idxina' Jerusalén, tu' tútigaquië' bönni' tu'ë didza' uláz queë' Dios ni'.

³⁴ Libí'ili', zóali' Jerusalén. Rútigacali'-në' bönni' tu'ë didza' uláz queë' Dios, en ruládxigacali'-në' guió'j bönni' gubáz risól-lë'ë Dios ga zóali'. Cate' xō zían luzuí gu'unida' utuba' libí'ili' quia' ca runba' yōjede, rutúbiba' bōrado' queëba' zxan xiliba', pero biti' gu'unili'. ³⁵ Buli'yútsōca', cá'asō ugá'ana lídxili', ate' rea' libí'ili', bití'rō ilé'eli' neda' cate' idxinrō dza innali': “Bica' ba Nu na' za' uláz queë' Xanru'.”

¹ Cate' naca dza lá'ayi quégaquié' bönni' judío, guyu'è Jesús lidxé' tu bönni' unná bē, bönni' yudo' fariseo. Rō'è Jesús rahué, ate' nacu'è bönni' yudo' fariseo ni' ta'nē'è Lē. ² Zoé' ca' tu bönni' ré'enē' hué' gui ga na' zoé' Jesús. ³ Ní'irō Jesús gunábinē' bönni' yudo' usedi táquié' xibá queé' Moisés, en yugu' bönni' yudo' fariseo, rnné':

—¿Naru' dē lataj unru' nu re'e cate' naca dza lá'ayi?

⁴ Légaquié' bulu'sayaj ruá'agaquié'. Ní'irō Jesús gudélē'è bönni' hué' na', en bunē' lē, ate' la' busól-la'tē' lē. ⁵ Ní'irō Jesús ré' yugu' bönni' yudo' na', rnné':

—Channō nu bönni' ládjali' nacuá'aba' queé' bōa' bēdxi, ate' íbixiba' tuba' lu yeru, ¿naru' cabí tsōjléajtē'-ba', sal-la' naca dza lá'ayi?

⁶ Biti' bi didza' guca ulu'bi'è ca naca lē ni.

Nu cō' lataj lo

⁷ Cate' bilé'enē' Jesús ca tunē' bönni' yudo' fariseo na', ta'bō'è lataj lo ga na' ta'bō'è tahué, ní'irō bucúdu'è didza', ate' ré' légaquié':

⁸ —Cate' nu bönni' ulidzē' li' guidu' ga raca laní que yōl-la' rutsaga na', biti' cō'u lataj lo. Nadxi ca' nulidzē' ca' tu bönni' nácatērē' lo ca li'. ⁹ Ní'irō bönni' na' bulidzē' li' huidé' ga zu', en guié' li': "Bē' lataj bönni' ni cō'è ga zu'", ate' ní'irō lu yōl-la' rutuí' quiu' tsōjchō'u zxánitēlo. ¹⁰ Que lē ni na', cate' nu bönni' ulidzē' li', guyéaj yōjchō' zxánitēlo, para cate' idxiné' bönni' na' bulidzē' li', hué' li': "Bōcha'a, gudōdi ia'lati' nilō." Ní'irō gácaru' li' lo lógaca nupa ta'bō'len li' tsōzxōn. ¹¹ Nu run ba zxōn cuini, ilunē' ga huōta' huōxaj, pero nu zoa nōxaj ladxi, ilunē' ga gácarō lo nu na'.

¹² Jesús ré' ca' bönni' na' bulidzē' Lē, rnné':

—Cati' gunu' tu gūf'i huagu o tu lanído', biti' ulídzagacu'-nē' yugu' bōchi' luzó'o, en yugu' bönni' bōchu'u, en yugu' di'a dza quiu', en dzaga yu'u quiu' ta'lé'enē' yōl-la' tsahui' quégaquié', tu' ulu'lidzē' ca' li', ate' caní'gaca, ubf'iquiu'. ¹³ Cate' gunu' tu gūf'i huagu, bulidza yugu' bōnachi yechi', en nupa nabixi ni' a ná'agaca, en nupa biti' raca sá'gaca, en yugu' bönni' lo chul-la. ¹⁴ Ní'irō gacu' bica' ba, tu' cabí'gaca bi ulu'bi'è bönni' caní' quiu', pero ubf'iquiu' cate' idxin dza ulu'bán nupa gulún le naca tsahui', en gulátigaca.

Rucúdu'è didza' Jesús que tu laní zxōn

¹⁵ Cate' tu bönni' rō'è rágulenē' Jesús biyōnnē' didza' ni, ré' Lē:

—Bica' ba nu gagu ga ni' rinná bē'è Dios.

¹⁶ Jesús ré' lē:

—Zoé' tu bönni' benē' laní zxōn, ate' zían nupa bulidzē'. ¹⁷ Cate' chinabá'a la' huagu, gusól-lē'è bönni' huen dxin queé' tsōjōdxé' nupa na' chinulidzē', gunné': "¡Guli'dá! ¡Yúgu'tē chinabá'a!" ¹⁸ Gula'sí lógacuíé' yúgu'tē' ta'nabē' lataj cabí tsōjajúié'. Bönni' zí'alō na' rnné': "Sí' guzxi'a tu luyú, en runda' bayudxi tsōjyúa' le. Ráta'yua' lo' gunnu' neda' lataj." ¹⁹ Ia'túé' rnné': "Sí' guzxi'a gayu' nōzaba' bēdxi, ate' tsōjzxi' bē'a légacaba' ugúngaca'-ba' dxin. Ráta'yua' lo' gunnu' neda' lataj." ²⁰ Ia'túé' rnné': "Sí' butsaga na'a, en que lē ni na' bití' gaca guida'." ²¹ Cate' bōajé' bönni' huen dxin na', yōjtíxjōi'inē' xané' yúgu'tē lē ni. Ní'irō guléné' bönni' xan yu'u na', ate' gudxé' bönni' huen dxin na', rnné': "Guyéajtē na'a gapa naca lu yé'eyi, en gapa naca la' nōza que yōdzō ni, ate' ichē'u yugu' bōnachi yechi' ni, en nupa nabixi ni' a ná'agaca, en nupa bití' raca sá'gaca, en yugu' bönni' lo chul-la." ²² Cate' chinunē' bönni' huen dxin na' caní, rnné': "Xan, chibena' ca na' gunná bé'enu' neda', ate' ni dē lataj." ²³ Ní'irō xané' gudxé' bönni' huen dxin na', rnné': "Guyéaj gapa naca la' nōza, en gapa naca nōza lasi, ate' ben bayudxi guidigaca nupa nacuá' ni' para ilí lidxa," ²⁴ tu' rea' libí'ili: Biti' gahué' que laní quia' nitúé' bönni' ni' bulidza' zí'alō."

Le sáca'ru' cate' zéajlenru'-nē' Cristo

²⁵ Yugu' dza ni' rōjácalen Jesús bōnachi zían, ate' buécjē' Jesús, en ré' légaquié':

²⁶ —Channō guidalenē' neda' tu bönni', en bití' idxi'irōnē' neda' ca nadxi'inē' xuz xinē'è, en nigula queé', en yugu' zxi'inē', en yugu' bi'í bōché'è, en yugu' bi'í zanē', en yōl-la' na'bán queé', bití' gaca gáquié' bönni' uséda quia'. ²⁷ Nu bönni' bití' gáquié' ca tu bönni' sa'yéajé' sōjtē'è lē'e yaga cruz, ate' tē'è neda', bití' gaca gáquié' bönni' uséda quia'. ²⁸ Channō zoé' nu bönni' ladaj libí'ili' gué'ennē' gunē' tu yu'u zían cuía, ¿naru' cabí cō'è zí'alō ulabē' gáca'xi dumí ralla' utōé' para inōzinē' channō dē queé' tsca le riquinnē' para údxi gunē' yu'u na'? ²⁹ Channō cabí gunē' caní, en isí lahué' cuéquié' xilibi yu'u na', ate' bití' gaca údxi gunē' yu'u na', ní'irō ila'sí lógaca yúgu'tē nupa ila'lé'e le ulu'titaj lē, ³⁰ ila'nná: "Bönni' ni gusí lahué' runē' yu'u, pero bití' guca údxi gunē' le." ³¹ Lēscá' caní, channō zoé' nu bönni' rinná bē'è, en ral-la' tsejé' gudil-la tsōjtí-lalenē' ia'túé' bönni' rinná bē'è, ¿naru' cabí cō'è zí'alō, en cuéqui icjē' channō séqui'nē' tsōjtí-lalenē' bönni' ni' naché'è galaj milē' bönni', ate' lē' chí milsē' bönni' naché'è? ³² Channō cabí séqui'nē', cate' ni' zoé' zí'tu' ia'túé' bönni' na' rinná bē'è, isól-lē'è bönni' gubáz

queé', ate' inábiné' lè' nacxi ral-la' guné' para ulu'dzáguié' dxi'a. ³³ Caní naca, channö zoé' nu bönni' ladaj libí'ili' biti' ucá'ané' yúgu'té le dè queé', biti' gaca gáquié' bönni' uséda quia'.

Zódi' le naniti yöl-la' siná'a que
(Mt. 5:13; Mr. 9:50)

³⁴ Gunné' ca' Jesús:

–Dxi'a naca zódi', pero channö initi yöl-la' siná'a que, çnacxi gaca úniru' le siná'a? ³⁵ Bítirö nazaca' zódi' na', caléga para luyú, en caléga para ga rírú'uniru' bëbu, pero chú'unaru' le ní'lò. Nu zoa nagui, en riyóni, ral-la' uzé nagui nu na'.

15

Rucúdzu'è didza' Jesús ca naca queéba' bõ'cu' xzila' gunítiba'
(Mt. 18:10-14)

¹ Bulu'dubé' yúgu'té bönni' tu' quízjxjé' lázagaca bönachi, en yugu' bönni' cá'asö ga zoé' Jesús para ulu'zè náguié' Lè'. ² Que lè ni na' yugu' bönni' yudo' fariseo, en yugu' bönni' yudo' usedi gula'nné' queé' Jesús, ta'nné':

–Bönni' ni runé' bal yugu' bönni' dul-la', en rágulené' légaquié'.

³ Ní'irö bucúdzu'è didza' Jesús, rë' légaquié':

⁴ –Channö zoé' tu bönni' ladaj libí'ili', nacua'aba' queé' tu gayuá'aba' bõ'cu' xzila', en channö nítiba' tuba', çnaru' cabí ucá'ané' ia'zica'röba' tápalalaj yu' chénnaba' na' ga naca lu lataj cá'asö, ate' tsejé' tsöjiljé'-ba' bõ'cu' xzila' na' nanítiba', cate' udzölröné'-ba'? ⁵ Cate' udzöliné'-ba', lu yöl-la' rudzeja queé' ixóé'-ba' ya' zxicjé', ⁶ en cate' udxiné' lidxé' utubé' yugu' böchi' luzé'é, en yugu' dzaga yu'u queé', ate' guié' légaquié': “Buli'dzéjalen neda', tu' chibudzöllda'-ba' bõ'cu' xzila' quia' gunítiba'.” ⁷ Rea' libí'ili': Lësca' caní gácatërö yöl-la' rudzeja yehua' yubá ni'a queé' tué' bönni' dul-la' ubí'i ládxé'è ca gaca queégaquié' tápalalaj yu' chénné' bönni' tsahui', bönni' téquiné' biti' naquinigequiné' ulu'bí'i ládxí'gaquié'.

Rucúdzu'è didza' Jesús que tu dumí guniti

⁸ Rnné' ca' Jesús:

–Channö zóanu tu nigula, dè queénu chi dumí plata, en channö initi tu dumí plata na', çnaru' cabí uquéla'nu guí, ate' ulúanu yu'u, uguillaj yúdxinu le cate' udzölrönu le? ⁹ Cate' udzölinu le, utúbinu yugu' nigula luzá'anu, en yugu' nigula dzaga yu'u queénu, ate' guiénu légacanú: “Buli'dzéjalen neda', tu' chibudzöllda' dumí plata na' guniti.” ¹⁰ Rea' libí'ili': Lësca' caní, ulu'dzéjade'eröné' gubáz lá'ayi queé' Dios ni'a queé' tué' bönni' dul-la' ubí'i ládxé'è.

Rucúdzu'è didza' Jesús queébi' tu bi'i gunítibi'

¹¹ Rnné' ca' Jesús:

–Zoé' tu bönni' nacua'abi' chópabi' bi'i bönni' queé'. ¹² Bi'i cuidi' na' rëbi'-né' xúzibi': “Dad, benna quia' le dè quiu' le ral-la' guequi quia'.” Ní'irö xúzibi' na' gudisié' quegacabi' le dè queé'. ¹³ Nabábasö dza gudzé, bi'i cuidi' na' butúbibi' yúgu'té, ate' guyéajbi' tu yödzo zi'tu', ate' ni' butóbi' dërö le dè queébi'. Le ruá' dö' benbi'. ¹⁴ Cate' chibutóbi' dërö le dè queébi', guca gubín lu yödzo ga na' zóabi', ate' biyadzaj queébi'. ¹⁵ Ní'irö guyéajbi' yöjsóabi' huen dxin queé' tu bönni' lu yödzo ni', ate' bönni' na' gusól-lé'è-bi' ga dè xiyúé' tsöjgáguabi'-ba' yugu' cuchi queé'. ¹⁶ Guca ládxí'bi' gágubi' guixi' cá'asö na' táguba' cuchi, pero cantu nu bi' bè' le gágubi'. ¹⁷ Ní'irö bubí'i ládxí'bi', rnnabi': “Cate' xö bönni' huen dxin nacu'è lidxé' xuzá', en dèda' le tahué', pero neda' ni' huáti caza' yöl-la' ridún. ¹⁸ Uzá'a ni, huöja' ga zoé' xuzá', en tsöjödxa'-né: Dad, bena' dul-la' lahué' Dios, zoé' yehua' yubá, en lo' li'. ¹⁹ Bítirö naca' neda' lesaca' gaca' xzí'ínu'. Ben neda' ca bönni' huen dxin quiu'.” ²⁰ Ní'irö guyú'ubi' nöza, söhuöajbi' ga zoé' xúzibi'.

'Cate' ni' zóabi' zi'tu' suzá'abi', bilé'ené'-bi' xúzibi', en buéchi' ládxé'è-bi'. Carelò yöjxí'galé'-bi' xúzibi', en yöjnidé' yenbi', gudahué'-bi' zixixi. ²¹ Ní'irö xzí'iné' na' rëbi'-né: “Dad, bena' dul-la' lahué' Dios, zoé' yehua' yubá, en lo' li'. Bítirö naca' neda' lesaca' gaca' xzí'ínu'.” ²² Ní'irö xúzibi' rë' yugu' bönni' huen dxin queé', rnné': “Guli'tsöjléajté lari' nazáca'tërö, en guli'gacu-bi'. Guli'cú'u le nazaca' xiböñ ná'abi', en buli'dá' huarache ní'abi'. ²³ Guli'tsöjxí'i-ba' bëdxi renni', ate' guli'guti-ba'. Gáguru'-ba', en gunru' laní, ²⁴ tu' guca' bi'i bönni' quia' ni ca tu bi'i chinátibi', ate' bubanbi'. Gunítibi', ate' chibulá'abi' na'a.” Ní'irö gula'sí lógaquié' tu'dzéjané'.

²⁵ Tsanni ni' raca lè ni, zóabi' bi'i bönni' zí'aló queé' bönni' na' la' guixi'. Cate' suzá'abi' rudxinbi' gala' ra' yu'u, riyónibi' raca huila, en raca huó'a lu yu'u na'. ²⁶ Ní'irö bulídzabi'-né' tué' bönni' huen dxin zoé' ni', en gunábibi' lè' bizxi na' raca. ²⁷ Bönni' huen dxin na' rë'è-bi': “Bi'i böchu' na' budxinbi', ate' gunná bë'è xuzu' gulútié'-ba' bëdxi renni', tu' budxinbi' lu nê'è dxi'a tsahui'do'.” ²⁸ Ní'irö gulébi' bi'i zí'aló na', en biti' gú'unibi' tsú'ubi' yu'u. Ní'irö birúajé' xúzibi', en gúta'yué' lobi' tsú'ubi'. ²⁹ Bubí'ibi' didza' bi'i zí'aló na', rëbi'-né' xúzibi':

“Nöz quézinu’ cate’ xö iz bena’ dxin lo’, en catu caz gudá’baga’a li’, pero catu caz bennu’ quia’ tuba’ bö’cu’ zxlá’do’ para guí’ilena’ xibé yugu’ luzá’a. ³⁰ Na’a, cate’ budxinbi’ bi’i quiu’ ni busunitibi’ yugu’ le guta’ quiu’, gudálenbi’-nu yugu’ nigula udá dzaga, benu’ ga gulútié’-ba’ bédxi renni’ ni’a queébi’.” ³¹ Ní’irö xúzibi’ rē’ē-bi’, rnnē’: “Zxl’ina’, li’ zóalen cazu’ neda’ ate’ yúgu’tē le dē quia’, quiu’ nequi. ³² Ben bayudxi gunru’ laní, en udzējaru’, tu’ gúcabi’ bi’i böchu’u ni ca tu bi’i chinati cázabi’, ate’ nubanbi’. Gunítibi’ ate’ chibulá’abi’.”

16

Rucúdzu’ē didza’ Jesús queē’ bönni’ huen dxin biti’ náquiē’ tsahui’

¹ Jesús rē’ ca’ yugu’ bönni’ dá’gaquiē’ Lē’, rnnē’:

–Zoē’ tu bönni’ dē yöl-la’ tsahui’ queē’, en zoē’ ca’ queē’ tuē’ bönni’ huen dxin dē lu nē’ē uláz queē’. Bila’ dxinē’ yugu’ bönni’ tu’ zéguiē’ bönni’ huen dxin na’ lahuē’ xanē’, ta’ nnē’ queē’ rutōsē’ le dē queē’ xanē’ na’. ² Ní’irö xan yu’u na’ bulidzē’ bönni’ huen dxin na’, en rē’ lē’: “¿Bizxi didza’ ni riyönda’ quiu’? Buluí’i neda’ le naca bē’ dxin nunu’, tu’ cabirö gata’ lu no’o uláz quia’.” ³ Ní’irö guzá’ ládxi’ē bönni’ huen dxin na’, rnnē’: ¿Nacxi guntsa’? Rubéajē’ xana’ neda’ lataj lo ga runa’ dxin. Biti’ séqui’da’ guna’ dxin gu’una, en utuí’ida’ inaba’ nu bi’i gúnasö quia’. ⁴ Na’a nözda’ naca guna’ para cate’ ubéajē’ neda’ lataj lo ni, ila’cuá’ nupa ulu’z’i’ neda’ lídxi’guequi. ⁵ Ní’irö bönni’ huen dxin na’ bulidzē’ yugu’ bönni’ bi’i tál-lē’ē queē’ xanē’, ate’ rē’ bönni’ z’aló: “¿Gáca’xi ral-lu’u queē’ xana’?” ⁶ Lē’ rnnē’: “Tu gayuá’ rō’ö chugu le za ral-la’a.” Bönni’ huen dxin lo na’ rē’ lē’, rnnē’: “Ni dē guichi ga nazúaj le ral-lu’u. Gurö’ötē ni, en buzúaj ia’tú lu guichi le inná chi-un rō’ö chugu ral-lu’u.” ⁷ Gudödi’ ni’ gunábinē’ ia’tuē’, rnnē’: “Nazxi li’, ¿gáca’xi ral-lu’u?” Lē’ rnnē’: “Tu gayuá’ da’a xzoa’ xtila.” Ní’irö bönni’ huen dxin lo na’ rē’ lē’, rnnē’: “Ni dē guichi ga nazúaj le ral-lu’u. Buzúaj ia’tú lu guichi le inná tápalalaj da’a ral-lu’u.” ⁸ Réquibe’ enē’ xanē’ na’ sína’tē benē’ bönni’ huen dxin biti’ náquiē’ tsahui’ na’. Caní naca, nácacarē’ sina’ bönni’ yödžölió ni lu le tunē’ la’ légacasē’, ca nácacaga bönachi ta’ dalen Dios lu beni’ queē’.

⁹ ‘Neda’ rea’ lib’íli’: Gulí’cözalen bönachi dxi’a, ugunli’ dxin yöl-la’ tsahui’ dē queéli’ yödžölió ni, para cate’ idxín dza ucá’anali’ yugu’ lē ni, ilunē’ lib’íli’ bal lataj ni’ zóatica’sö.

¹⁰ Nu rugún dxi’a dxin tu le cuíd’isö dē lu nē’e, lēasca’ ugún dxi’a dxin tu le zxon gata’ lu nē’e. Nu biti’ rugún dxi’a dxin tu le cuíd’isö dē lu nē’e, biti’ ugún dxi’a dxin tu le zxon gata’ lu nē’e. ¹¹ Que lē ni na’, channö cabí rugunli’ dxi’a dxin yöl-la’ tsahui’ dē queéli’ yödžölió ni, ¿nuzxi caz udödi lu ná’ali’ yöl-la’ tsahui’ le naca idú? ¹² Channö cabí rugunli’ dxi’a dxin le dē lu ná’ali’ le nequi que nu yúbölo, ¿nuzxi caz udödi lu ná’ali’ le ral-la’ guequi que quezili’?

¹³ ‘Biti’ gaca nitüē’ bönni’ huen dxin gunē’ xichíngaca chopa xanē’, tu’ udi’inē’ tuē’, en idxi’inē’ ia’tuē’, o gunē’ bal tuē’, en uzóē’ tsólá’alö ia’tuē’ na’. Biti’ gaca gunli’ xichinē’ Dios, en gunli’ ca’ dxin para uzí’ili’ xibé yöl-la’ tsahui’ que yödžölió.

¹⁴ Bila’yönnē’ bönni’ yudo’ fariseo didza’ ni, ate’ tu’ nadxí’iguequinē’ yöl-la’ tsahui’ queégaquiē’, que lē ni na’ bulu’titjē’ Jesús. ¹⁵ Ní’irö Jesús rē’ légaquiē’:

–Lib’íli’ rubéaj dxi’a cuinli’ lógaca bönachi, pero nözinē’ Dios le yu’u icja ládxi’do’oli’, tu’ naca lē na’ tun zxon bönachi tu le ruzóē’ Dios tsólá’alö.

Xibá queē’ Moisés, en le rinná bē’ē Dios

¹⁶ Gunnē’ ca’ Jesús:

–Ga bídixintē dza zoē’ Juan, ben dxin le rinná bē’ xibá queē’ Moisés, en le bulu’zúajē’ lu guichi yugu’ bönni’ gulu’ē didza’ uláz queē’ Dios. Ní’irö cate’ bídixinē’ Juan na’, gusí lo raca libán ca gaca na tsaza ga rinná bē’ē Dios, ate’ tun bayudxi yúgu’tē bönachi ila’yaza ni’.

¹⁷ ‘Sal-la’ raca caní, gácarö ila’dödi que lúzxiba, en que luyú ni ca initi tu dídza’sö nazúaj lu guichi lu xibá queē’ Dios.

Le rulá’a yöl-la’ nutsaga na’

(Mt. 19:1-12; Mr. 10:1-12)

¹⁸ Gunnē’ ca’ Jesús:

–Channö tu bönni’ ulá’alenē’ nigula queē’, ate’ utsaga ná’alenē’-nu nigula yúbölo, gunē’ dul-la’ le riguitsaj xibá que yöl-la’ nutsaga na’, ate’ nu utsaga ná’alen nigula na’ nusanē’-nu bönni’ queénu, gun ca’ dul-la’ le riguitsaj xibá que yöl-la’ nutsaga na’.

Bönni’ dē yöl-la’ tsahui’ queē’, en Lázaro

¹⁹ Ní’irö bucúdzu’ē didza’ Jesús, rnnē’:

–Zoē’ tu bönni’ rilé’ enē’ yöl-la’ tsahui’ queē’. Rácuē’ lari’ xiná, en lari’ nazáca’da’, ate’ yugu’ dza rúntica’sē’ laní, ate’ tē’aj tahuē’ le banéquiní. ²⁰ Zoē’ ca’ ni’ tu bönni’ yéchi’do’ lē’ Lázaro, bönni’ rinabē’ nu bi’i unödžaj queē’, ate’ huē’tézē’ rō’ē ra’ yu’u queē’ bönni’ na’ rilé’ enē’ yöl-la’ tsahui’. ²¹ Raca ládxi’ē bönni’ yéchi’do’ na’ gahuē’ le bizxaj tu’ huóxaj xzani ga rahuē’ bönni’ na’ rilé’ enē’ yöl-la’ tsahui’. Ta’ dxinba’ ca’ bö’cu’, en ta’ lē’ éba’ lu huē’ queē’ bönni’ yéchi’do’ na’.

²² Bidxín dza gútié' bönni' yéchi'do' na, ate' gubáz lá'ayi queé' Dios gula'ch'é'è'è' tsöjsóalené' Abraham ga naca lataj lachi queé' Dios. Gútié' ca' bönni' na' bilé'ené' yöl-la' tsahui', ate' bulu'cáché'è'è' lè' yeru ba. ²³ Cate' ni' rigufi rizáqué'è' bönni' na' bilé'ené' yöl-la' tsahui', zoé' lataj quegaca nupa nátigaca, guchisa lahué', en bilé'ené' Abraham zoé' zi'tu', en dzáguié' Lázaro na' lè'. ²⁴ Ní'irö' b'é'è' zidzaj didza', rnné': "Xuza', Abraham, buéchi' ladxi' neda'. Gusól-la' Lázaro quia' para usubisé' xibón' n'é'è', en udusuhoóalé' lúdx'a'a, tu' rigufi rizáca'a lu gu' ni'." ²⁵ Abraham r'é'è' lè', rnné': "Zxí'ina', busá' ládxa'u ca guca quiu', buzi'u xibé' yöl-la' tsahui' tsanni ni' zu' nabanu', pero Lázaro ni, guca queé' yöl-la' yechi', ate' na'a, ruz' zxoné' Lázaro ni, pero li' rigufi rizácu'u. ²⁶ Ia'stú, tu ra' gu' a sibi r'ö', le zoa gatsaj láchu' l'ö' ga ni' zóali' libí'ili', en ga ni' zóatu' netu'. Que lè' ni na' nupa nacua' ni, en ilé'eni ila'dódi ga zóali' libí'ili', biti' ca' gaca iluné' ca', en biti' gaca ilida ni nupa nacua' ni'." ²⁷ Ní'irö' bönni' na' bilé'ené' yöl-la' tsahui' r'é'è' lè', rnné': "Xuza' Abraham, ráta'yua' lo' isól-lu'u-né' Lázaro tsejé' lidxé' xuza', ²⁸ tu' nacué' gáyu'è' bönni' böcha'a ni'. Gusól-lé'è' tsöjené' liná' lo que le raca ni, para cabí guídagaquie' ca' lataj ga ni' rigufi rizáca'a." ²⁹ Ní'irö' Abraham r'é'è' lè', rnné': "Dé' quegaquie' le buzúajé' lu guichi Moisés, en le bulu'zúajé' lu guichi bönni' gulu'è' didza' uláz queé' Dios. Yugu' didza' quegaquie' na' ral-la' ulu'z'é' náguie'." ³⁰ Bubi'è' didza' bönni' na' bilé'ené' yöl-la' tsahui', rnné': "Xuza' Abraham, biti' gaca caní, pero channö ubané' tu bönni' lu yöl-la' guti, en tsejé' ga na' nacué', ulu'bí'i ládxi'gaquie'." ³¹ Abraham r'é'è' lè', rnné': "Channö cabí tu z'é' náguie' didza' b'é'è' Moisés, en le gula'nné' bönni' gulu'è' didza' uláz queé' Dios, biti' ila'yéajlé'è' sal-la' nu ubán lu yöl-la' guti."

17

Run bönadxi queëru' gunru' ga nu gun dul-la'
(Mt. 18:6-7, 21-22; Mr. 9:42)

¹ Jesús r'é' yugu' bönni' dá'gaquie' L'é', rnné':
–Nacua'tica'sö le tun ga ilün bönachi dul-la', pero bica' bayechi' bönni' na' runé' ga nu gun dul-la'. ² Dxi'arö' gaca queé' bönni' na' runé' caní, nu ugal-la' tu guiöj riyétu yaga yené', en tsöjchú'una lè' lu nísado', cáte'lö' guné' ga gun dul-la' nu bi'i néquibi' quia'. ³ Guli'gún chi'i cuinli'. Channö böchi' luzó'o gu'é' dö' quiu', buzéajni'i-né', en channö ubí'i ládxe'è', buniti lo lè'. ⁴ Sal-la' gadxi luzuí tu dza gu'é' dö' quiu', en gadxi luzuí ca' guidé' ga zu', en guie' li': "Rubí'i ládxa'a", ral-la' uniti lo' lè'.

Yöl-la' huáca que le réajlé'ëru' Cristo

⁵ Ní'irö' yugu' bönni' gubáz queé' Xanru' t'é' L'é', ta'nné':

–Ben ga tséajlé'ërötu'-né' Dios.

⁶ Xanru' r'é' légaquie', rnné':

–La'tu' naca cuidi'sö yöl-la' réajlé' queéli' Dios, nácasö ca tu xisedo' mostaza, huáca guie'li' yaga zxoné' ni: "Gucuíta ni, en yöjsóa lu nísado'", ate' gun yaga na' ca rnnali'.

Le ral-la' gun nu naca huen dxin

⁷ Gunné' ca' Jesús:

–Channö zoé' tué' bönni' ladaj libí'ili', en zoé' queé' tué' bönni' nadó'o rugá'ané'-ba' bédxi o rulapé', cate' údxi guné' xichiné' xané', çnaru' huétsé' xané' lè', inné': "Gudá, guró'ö' gagu'?" ⁸ çCaléga' Caní guie' lè': "Bupá'a le gahua'. Guzóa sina' cu'u le gu'aj gahua', ate' tódíro' na' huáca gu'aj gagu' li'." ⁹ çNaru' huétsé' bönni' nadó'o queé' na': "Xclenu'", tu' bené' ca gunná bé'ené' lè'? Runi neda', biti' guné' caní. ¹⁰ Lésca' caní gaca queéli'. Cate' chinunli' yúgu'té' le gunná bé'ené' Dios libí'ili', ral-la' innali': "Nácatu' huen dxin cabí nácatu' lesaca', tu' b'énsötu' le run bayudxi guntu'."

Chié' bönni' té'ené' hué' nudzu' ruzódi

¹¹ Tsanni ni' yu'è' Jesús nöza, sa'yéajé' Jerusalén, ridödé' gapa d'é' yödzódo' nabábaga luyú Samaria, en luyú Galilea. ¹² Cate' guyazié' tu yödzódo', bila'ruájé' dutságagaquie' L'é' chié' bönni' té'ené' hué' nudzu' ruzódi, ate' gula'cu'é' zítu'só, ¹³ en tu'è' zidzaj didza', ta'nné':

–Jesús, Bönni' Usedi! çBuéchi' ladxi' netu'!

¹⁴ Cate' bilé'ené' Jesús légaquie', r'é' légaquie':

–Guli'tséaj, guli'tsöjlu'i' cuinli' lógaca bixúz.

Tsanni ni' sójáquie', bulu'huóáquie' dxi'a. ¹⁵ Ní'irö' tué' bönni' nútsé'è' ládjaquie', cate' réquibe'ené' chinuhoóáquie' dxi'a, bójajé' ga na' zoé' Jesús, ru'ítica'sé' zidzaj didza', rigúé' Dios yöl-la' ba. ¹⁶ Biyéchué', en busudxín lahué' lu yu lahué' Jesús, en r'é' L'é': "çXclenu'!"

Bönni' ni nababé' Samaria. ¹⁷ Ní'irö' Jesús r'é' lè':

–çNaru' cabí bulu'huóáquie' dxi'a chié' bönni'? çGazxi nacua'tsé' ia'zica'ré' bönni' na'?

¹⁸ çNaru' cabí zoa nu huóda cu'u Dios yöl-la' ba, pero tuzé' bönni' zítu' ni?

¹⁹ Ní'irö' Jesús gudxé' bönni' na', rnné':

—¡Guyasa, en böaj lidxu'! ¡Chiböácu' dxi'a tu' réajlë'u neda'!

Ca idxín le rinná bē'ē Dios

(Mt. 24:23-28, 36-41)

²⁰ Cate' yugu' bönni' yudo' fariseo ta'nábinē' Jesús bátaxi ral-la' idxín le rinná bē'ē Dios, Lē' bubi'ē didza', rē' légaquiē':

—Ca idxín le rinná bē'ē Dios, biti' naca le ilé'eli'. ²¹ Cuntu nu gaca inná: “¡Ni bidxín!”, o inná: “¡Ni' bidxín!” ¡Buli'yútsöca'! ¡Rinná bē'ē Dios lu icja ládxi'do'gaca bönachi!

²² Ní'irö Jesús gudxē' yugu' bönni' usēda queē', rnnē':

—Huadxín dza cate' guē'ēnili' ilé'eli' dza huöda' neda', Bönni' Guljē' Bönachi, pero biti' ilé'eli' le. ²³ Ila'cuá' nupa ilé libí'ili': “¡Ni zoē'!” , o ila'nná: “¡Ni' zoē'!” Biti' tséajli' ni', en biti' tséajlenli' légaquiē'. ²⁴ Ca raca cate' rēpi yösa, ruzeni' idá'alö lúxhiba, lēasca' caní gaca cate' idxín dza huöda' neda', Bönni' Guljē' Bönachi. ²⁵ Zí'aló ca gaca lē ni, run bayudxi quí'í sáca'da', ate' bönachi dza ni zóaru' na'a ulu'cá'ana neda' cá'asö. ²⁶ Ca na' guca dza ni' zoē' Noé, lēasca' caní gaca cate' idxín dza huöda' neda', Bönni' Guljē' Bönachi. ²⁷ Dza ni'te na' gulē'aj gulahuē'. Bulu'tsaga ná'agaquiē', en bulu'dödē' xz'ínigaquiē' lu yöl-la' rutsaga na' ga bidxintē dza guyází'ē Noé lē'e barco zxón na' nazí'í le arca, ate' bidxintē nisa guiöj usuniti yödzölió le busuniti yúgu'tē'. ²⁸ Lēasca' caní guca dza ni' zoē' Lot. Gulē'aj gulahuē'. Gulá'uē', en gulú'ti'ē. Gulazē' xiyúgaquiē', en gulunē' yugu' yu'u quégaquiē'. ²⁹ Cate' bidxín dza na' burúajē' Lot lu yödzö Sodoma, böxaj guí' ca tu nisa guiöj, enca' le ruzéguida' nazí'í le azufre, ate' bulu'suniti yúgu'tē'. ³⁰ Lēasca' caní gaca cate' idxín dza uluf'í lahua' neda', Bönni' Guljē' Bönachi.

³¹ 'Cate' idxín dza na', channö zoē' tu bönni' ícjo'olö, en dzö'ö le dē queē' lu yu'u na', biti' ral-la' huötjē' tsöjxi'ē le dē queē', ate' nu zoa la' guixi', lēasca' caní, biti' ral-la' huöjē' lidxē'.

³² Gulí'sá' ládxi'li' ca guca queēnu nigula queē' Lot. ³³ Nu bönni' rē'ēnē' gun chí'ē yöl-la' na'bán queē', unítí'ē le, pero bönni' udödē' yöl-la' na'bán queē' ní'a quia', udé'ē le.

³⁴ Rea' libí'ili': Cate' idxín rēla na', ila'cu'ē chopē' bönni' tsözxón ga tasiē', ate' tuē' uduzxi'a-nē', en ia'túē' ucá'ana' lē'. ³⁵ Ila'cuá'anu huētu tsözxón chöpanu nigula, ate' tunu uduzxi'a-nu, en ia'tunu ucá'ana'-nu. ³⁶ Ila'cu'ē chopē' bönni' la' guixi', ate' tuē' uduzxi'a-nē', en ia'túē' ucá'ana' lē'.

³⁷ Cate' bila'yönnē' lē ni bönni' usēda queē' Jesús, gula'nábinē' Lē', ta'nnē':

—Xan, ¿gazxi gaca lē ni?

Jesús rē' légaquiē':

—Ga dē tu le nati, ni' ulu'dubi quéziba' bíchulab.

18

Tu nigula uzēbi, en bönni' ruchi'a rusöröē'

¹ Ní'irö bucdzu'ē didza' Jesús, rē' légaquiē' ca run bayudxi ulídztatica'siru'-nē' Dios, en biti' gaca chopa ládxi'ru'. ² Rnnē':

—Zoē' tu bönni' ruchi'a rusöröē' tu yödzö, bönni' biti' rádxinē' Dios, en biti' runē' nu bönni' bal. ³ La' yödzö ná'asö zóanu tu nigula uzēbi, ate' bidxinnu nigula ni ga zoē' bönni' ruchi'a rusöröē' na', rnnanu: “Buchí'a busörö le run quia' nu ruá' dö' quia'.” ⁴ Xidzé biti' gú'unnē' bi gunē' queēnu, pero gudödi ni' guzá' ládxi'ē, rnnē': “Biti' rádxida'-nē' Dios, en biti' runa' nu bönni' bal, ⁵ pero tu' rupízxjanu nigula uzēbi ni neda', que lē ni na' uchi'a usöröa'-nu, para cabí guídatica'sinu ni, en para cabí tódi bē' upízxjanu neda'.”

⁶ Ní'irö Xanru' rē' légaquiē', rnnē':

—Gulí'zē'nágali' ca na' gunnē' bönni' ruchi'a rusöröē' na', bönni' biti' náquiē' tsahuí'. ⁷ ¿Naru' cabí uchi'a usöröē' Dios bönachi gurö cazē' queē', nupa na' tu'lidza Lē' rēla te dza? ¿Naru' huadzétsenē' gácalenē' légaquiē'? ⁸ Rea' libí'ili': La' uchi'a usörötenē' légaquiē'. Cate' huöda' neda', Bönni' Guljē' Bönachi, ¿naru' idzö'lida' nupa ta'yéajlë' neda' luyú ni?

Tu bönni' yudo' fariseo, en tu bönni' uquízxaj

⁹ Bucdzu'ē didza' Jesús ca naca quégaquiē' bönni' tu'béaj tsahuí' cuíngaquiē', en tu'cá'anē' cá'asö ia'zica'rö bönachi. ¹⁰ Gunnē':

—Bila'dxinē' chopē' bönni' ga naca chila yudo' para ulu'lidzē' Dios. Tuē' bönni' na' náquiē' bönni' yudo' fariseo, ate' ia'túē' na' náquiē' bönni' ruquízxjē' lázagaca bönachi. ¹¹ Guzuínē' bönni' yudo' fariseo na', en caní bulidzē' Dios, rnnē': “Dios, rea' Li': Xclenu', tu' cabí naca' ca nácaquiē' ia'zica'rē' bönni', nácaquiē' gubán, en biti' nácaquiē' tsahuí'. Ta'guitsjē' xibá que yöl-la' nutsaga na'. Lēasca' biti' naca' ca bönni' uquízxaj ni. ¹² Neda' runa' gubasa chopa luzuí tu' xunu' dza huéaj, en runödztja' que yudo' tu cö' huéaj tu' chí cö' que yúgu'tē le rata' quia'.” ¹³ Guzóazē' zí'tu' bönni' uquízxaj na', en biti' böázxjanē' ichisa lahuē' uyúē' lúxhiba, pero gudapē' luchu'ē, rnnē': “Dios, buéchi' ladxi' neda', bönni' dul-la'.” ¹⁴ Neda' rea' libí'ili': Böajē' lidxē' bönni' uquízxaj na', nuhuöáquiē' tsahuí' lahuē' Dios, calēga ia'túē' bönni' ni'.

Núti'tës bönni' run ba zxön cuinë', gunë' Dios ga huöta' igulë', pero nu bönni' rizóë' nöxaj ladxi', gunë' Dios ga gácarë' lo.

Jesús rulidza tsáhuë'-ë-bi' yugu' bí'ido'
(Mt. 19:13-15; Mr. 10:13-16)

¹⁵ Ní'irö bila'dxinë' yugu' bönni', en nigula ga zoë' Jesús, nachë'gaquië'-bi' yugu' bí'ido' quégaquië' para ixóa në'ë Jesús légaçabi'. Cate' bila'lé'enë' yugu' bönni' usëda queë' Jesús lé ni, gula dil-lë' légaquië'. ¹⁶ Ní'irö Jesús bulidzë' yugu' bönni' dá'gaquië' Lë', rnnë':

—Guli'gü'i-bi' lataj ila'dxinbi' bí'ido' ni ga zoa'. Biti' uzága'li' xinözagacabi', tu' gata' quégaca nupa náçagaca ca bi'i caní lataj ga rinná bë'ë Dios. ¹⁷ Le nácatë rea' libí'ili': Nu cabí si' lu në'e le rinná bë'ë Dios, ca runbi' tubi' bí'ido', biti' ca' tsaza ga ni' rinná bë'ë Lë'.

Tu bönni' rilé'enë' yöl-la' tsahui'
(Mt. 19:16-30; Mr. 10:17-31)

¹⁸ Tu bönni' unná bë' gunábinë' Jesús, rnnë':

—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

¹⁹ Jesús rë' lë':

—¿Bizx que rë'u neda': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. ²⁰ Nöz quézinu' yugu' le gunná bë'ë Dios:

Biti' gunu' dul-la' le riguitsaj xibá que yöl-la' nutsaga na'.

Biti' gútigacu' bönachi.

Biti' cuanu'.

Biti' innío' que luzó'o le cabí nácatë.

Ben bal xuz xinó'o.

²¹ Bönni' na' rë' Jesús, rnnë':

—Yúgu'të lë ni runa' ga gudela' naca' bí'ido'.

²² Cate' biyönnë' Jesús didza' ni, rë' lë':

—Ia'tú le riyadzaj quiu' gunu'. Bëti' yúgu'të le dë quiu', ate' lë na' si'u bunödzej quégaca bönachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.

²³ Cate' bönni' na' biyönnë' didza' ni, ruhu'innë', tu' dëda' yöl-la' tsahui' queë'. ²⁴ Cate' bilé'enë' Jesús ca na' ruhu'innë' bönni' na', rnnë':

—¡Bica' böniga gaca, ila'yaza nupa ta'lé'e yöl-la' tsahui' ga rinná bë'ë Dios! ²⁵ Gácarö tódiba' böa' nagui yötsi', ca tsázië' tu bönni' rilé'enë' yöl-la' tsahui' ga rinná bë'ë Dios.

²⁶ Ní'irö nupa bila'yöni didza' ni gula'nná:

—¿Nuzxi caz gaca ulá, channó?

²⁷ Jesús gudxë' légaquië':

—Le biti' gaca ilunë' bönni', huáca gunë' Dios.

²⁸ Ní'irö Pedro rë' Jesús:

—Buyútsöca', netu' nucá'anatu' yúgu'të le dë queëtu', en dá'atu' Li'.

²⁹ Ní'irö Jesús rë' légaquië':

—Le nácatë rea' libí'ili', nu bönni' ucá'anë' lidxë', o xuz xinë'ë, o yugu' böchi' zanë', o nigula queë', o yugu' zxi'inë', tu' ru'í'ládxë'ë inná bë'ë Dios, ³⁰ bönni' ni huazí'irë' dza ni zóaru' na'a, ate' dza si' za' idéli'në' yöl-la' na'bán idú.

Jesús rigúxjö'ë leyübölö ca si' ilútië' Lë'
(Mt. 20:17-19; Mr. 10:32-34)

³¹ Jesús guchë'ë quez queë' idxínnutë' bönni' usëda queë', en rë' légaquië':

—Buli'yútsöca', ribenru' zéajru' Jerusalén, ga ni' ilaca yúgu'të le nazúajgaca lu guichi ca gula'nnë' bönni' gulu'ë didza' uláz queë' Dios ca ral-la' gaca quia' neda', Bönni' Guljë' Bönachi.

³² Yugu' bönni' Jerusalén ulu'dódë' neda' lu ná'agaquië' bönni' zi'tu', ate' ulu'titjé' neda', en ulu'lidza zi'ë neda', en ulu'chejë' neda' zxóna'. ³³ Ila'guinë' neda', ate' tódirö ni' ilútië' neda', pero cate' gaca tsonna dza ubana'.

³⁴ Biti' gula'yéajni'inë' bönni' usëda queë' didza' ni, en biti' guléquibe'enë' ca sa'yéaj le ru'í'ilenë' légaquië' didza' que, tu' naca le cabí sequi' ila'yéajni'inë'.

Jesús ruúnë' tu bönni' yödzö Jericó nachul-la lahuë'
(Mt. 20:29-34; Mr. 10:46-52)

³⁵ Cate' chizóa idxinë' Jesús yödzö Jericó, zoë' tu bönni' ni' nachul-la lahuë'. Rö'ë ra' nöza rinabë' nu bi gúnnasó queë'. ³⁶ Bönni' ni' biyönnë' ta'dódi bönachi zían ni', ate' gunabë' bizxi na' raca. ³⁷ Bönachi ni' të lë':

—Jesús, bönni' Nazaret, ridödë' ni.

³⁸ Ní'irö bönni' na' nachul-la lahuë' bë'ë zidzaj didza', rnnë':

—¡Jesús, zxi'ini xi'sóë' David, buéchi' ladxi' neda'!

³⁹ Yugu' bönni' nanórugaquié' lahué' Jesús gula'dil-lé' bönni' na' nachul-la lahué' para usayaj ru'è, pero lé' zídajrö bé'è didza', rnné':

—jzxi'ini xi'sóé' David, buéchi' ladxi' neda'!

⁴⁰ Ní'irö guz'é' dxiz Jesús ribözé', ate' gunná bé'ené' nu tsöjlidza lé' para idxiné' lahué'. Cate' bönni' na' nachul-la lahué' bidxiné' lahué' Jesús, gunábiné' Jesús lé', rnné':

⁴¹ —¿Bizxi ré'ènu' guna' quiu'?

Bönni' na' nachul-la lahué' rnné':

—Ré'énida' huóálaj guió'j lahua'.

⁴² Jesús ré' lé':

—Chibóálaj guió'j lo'. Chibóácu' tu' réajlé'u neda'.

⁴³ La' ní'isö bulé'etené', ate' sa'yéajlené' Jesús, rigu'è Dios yöl-la' ba. Lésca' yúgu'té' bönachi nacua' ni', en bila'lé'e lé' na' guca gula'gú'u Dios yöl-la' ba.

19

Jesús, en Zaqueo

¹ Ní'irö guyázié' Jesús yödzo Jericó, en ridödé' lu yödzo na'. ² Zoé' tu bönni' lé' Zaqueo ni', bönni' lo ládjagaquié' bönni' uquixzaj, ate' dè yöl-la' tsahui' queé'. ³ Ruí'í ládxe'è bönni' ni ilé'ené' Jesús, pero biti' guca queé' tu' nacua' bönachi zían ni', en náquié' bönni' ga ré'èdo'. ⁴ Ní'irö carelò yöjnórué' lógaca bönachi zían na', ate' yójchené' tu lu yaga para gaca ilé'ené' Jesús, tu' ral-la' tódé' ni'. ⁵ Cate' bidxiné' Jesús ni', guchisa lahué' ruyúé' ga na' dxixé' Zaqueo na', en ré' lé':

—Zaqueo, bótjaté' lu yaga na', tu' run bayudxi tsöjgá'ana' lidxu' na'a.

⁶ Ní'irö la' bótjaté' Zaqueo lu yaga, ate' lu yöl-la' rudzeja queé' guché'è Jesús lidxé'. ⁷ Cate' bila'lé'e bönachi nacua' ni' lé' ni, gula'si lógaquié' yúgu'té' ta'nné' queé', ta'nné':

—Guyázié' Jesús ugá'analéné' bönni' dul-la'.

⁸ Ní'irö guzuíné' Zaqueo, en ré' Xanru':

—Xan, buyútsóca'. Gatsaj le dé' quia' gu'a quégaca bönachi yechi', en channò bi gudódi bé' buquizxja' bönachi, ubi'a quégaca bönachi na' tapa có'télò ca'.

⁹ Jesús ré' lé':

—Na'a dza ni bidxín yöl-la' rusólá quégaca nupa nacua' yu'u ni, tu' nababé' bönni' ni dí'a dza queé' Abraham. ¹⁰ Bida' neda', Bönni' Guljé' Bönachi, ududilja', en udusólá' nupa nanítigaca.

Rucúdzu'è didza' Jesús que chi cò' dumí

¹¹ Tsanni ni' ta'yönné' didza' ni ru'è Jesús, ré' légaquié' le rucúdzu'è didza', tu' chizóa ila'idxiné' yödzo Jerusalén, ate' téquiné' chizóatè ilá' lahui le rinná bé'è Dios. ¹² Caní rnné' Jesús:

—Zoé' tu bönni' lo, sa'yéajé' tu yödzo zítu' para si' lu né'è yöl-la' unná bé', ate' ní'irö huödé'.

¹³ Cate' chizóa tsejé' ni' bulidzé' chié' bönni' huen dxin queé', en bé'è que queégaquié' tu có' huéaj dumí, ate' ré' légaquié': "Guli'guílajlen dumí ni tsanni huóda'." ¹⁴ Yugu' bönni' uládz queé' biti' ta'lé'ené' lé' dxí'a, ate' gula'sól-lé'è yugu' gubáz queégaquié' ga ni' tsejé', ila'nné': "Biti' ré'ènitú' inná bé'ené' bönni' ni netu'." ¹⁵ Ní'irö guzxi' lu né'è yöl-la' unná bé', ate' budxiné' ladzé'. Cate' bidxiné' ni' gunná bé'ené' nu tsöjlidza yugu' bönni' huen dxin na' budóde' lu ná'agaquié' dumí na', para inóziné' gáca'xi bulu'guílajlené' le tu tué'. ¹⁶ Cate' bönni' zí'aló na' bidxiné' lahué', rnné': "Xan, tu có' dumí quiu' na' chibén icja ia'chí có' ca'." ¹⁷ Xané' na' ré' lé': "Tshahi' benu'. Nacu' huen dxin tsahui'. Tu' dxí'ado' bugunu' dxin láti'do'os na' guta' lu no'ó, na'a, guna' ga inná bé'enu' chi yödzo." ¹⁸ Ní'irö bidxiné' ia'túé' bönni' huen dxin na' lahué' lé', rnné': "Xan, tu có' dumí quiu' na' chibén icja ia'gayu' có' ca'." ¹⁹ Xané' na' ré' ca' lé': "Inná bé'enu' gayu' yödzo." ²⁰ Ní'irö bidxiné' ia'túé' lahué' lé', rnné': "Xan, ni dè tu có' dumí quiu' na'. Ben chi'a le, butúlida' le lari'. ²¹ Caní bena' tu' rádxida' lí', tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rulapu' ga biti' guzu'." ²² Ní'irö xané' na' ré' lé': "Nacu' huen dxin biti' naca tsahui'. Ní'a que didza' bé'u uchi'a usóró'a lí'. ¿Réquibe'ènu' naca' bönni' bizxaj: Ruzi'a le cabí buzú', en rulapa' ga biti' guza'?" ²³ Na'a, ¿bizx que biti' yójlú'u dumí quia' na' ga gun icja, para cate' huóda', uzi'a le idú len icja na'?" ²⁴ Ní'irö ré' nupa nacua' ni': "Guli'cúa lu né'è dumí na', ate' guli'gú'í queé' bönni' na' dè queé' chi có' dumí." ²⁵ Légaquié' té' lé': "Xan, chidé' queé' chi có' dumí." ²⁶ Ní'irö bubí'è didza' xángaquié', rnné': "Rea' libí'ili': Nu rugún dxí'a dxin le do' dè lu né'e, ulu'xzóni ládxi'gaca lé' ia'late', pero nu biti' rugún dxí'a dxin le do' dè lu né'e, ulu'béaj lu né'e lé' na' guta' lu né'e. ²⁷ Ca naca quégagaquié' bönni' ni' biti' ta'lé'ené' neda' dxí'a, en biti' gulé'ènné' inná bé'eda' légaquié', guli'tsójzxi' légaquié' para ídigaquié' ni, ate' guli'guti légaquié'."

Len yöl-la' ba xzön razíé' Jesús yödzo Jerusalén
(Mt. 21:1-11; Mr. 11:1-11; Jn. 12:12-19)

²⁸ Cate' budxi gunnë' caní Jesús, buguélë'ë xinözë', sa'yéajë' zaca' yödzo Jerusalén. ²⁹ Cate' bila'dxinë' gala' ga nacua' yödzo Betfagé, en yödzo Betania, ga naca ra' gu'ado' nazí'ile Guí'a Yaga Olivo, gusöl-lë'ë Jesús chopë' bönni' usëda queë', ³⁰ ate' rë' légaquië':

—Guli'tséaj yödžodo' ni' ca dódilö ga zóaru', en cate' idxinli' ni', tsójxáca'li'-ba' tuba' búrrodo' nága'ba' ni', búrrodo' na' cuntu nu ribíani lëba'. Guli'sedxi-ba', en guli'duchë'-ba' quia' ni'. ³¹ Channö zoa nu rinábini libí'ili', inná: “¿Bizx que risédxili'-ba'?", ubí'ili' didza' caní innali': “Xanru' riquinnë'-ba'.”

³² Sójáquië' bönni' usëda queë' na' nasöl-lë'ë, ate' yójxáca'gaquië'-ba' ca na' chigudxë' Jesús légaquië'. ³³ Cate' gula'sedxë'-ba' búrrodo' na', yugu' bönni' xanba' tē' légaquië':

—¿Bizx que risédxili'-ba' búrrodo' na'?

³⁴ Bulu'bi'ë didza', ta'nnë':

—Xanru' riquinnë'-ba'.

³⁵ Gula'chë'ë-ba' ga na' zoë' Jesús. Cate' chigula'xóë' yugu' lari' tsölá'a quégaquië' cúdzu'ba' búrrodo' na', bulu'dxië' Jesús cúdzu'ba' lahuí lari' na'. ³⁶ Gapa ral-la' tödë' Jesús, gula'chiljé' lari' quégaquië' la' nöza. ³⁷ Cate' chibila'dxinë' gala' ga zoa lidinni que Guí'a Yaga Olivo, lu yöl-la' rudzeja quégaquië' gula'sí lógaquië' yúgu'të bönni' dá'gaquië' Jesús, tu'ë zidzaj didza', ta'gu'ë Dios yöl-la' ba, ni'a quégaca yugu' yöl-la' huáca zxon bila'lé'enë' benë' Jesús. ³⁸ Ta'nnë':

—¿Yöl-la' ba bönni' unná bē' ni zē'ë uláz queë' Xanru' Dios! ¿Yehua' yubá za' le ribequi dxi ládxi'ru'! ¿Yöl-la' ba Dios!

³⁹ Ní'irö yugu' bönni' yudo' fariseo nútsa'gaquië' ladaj bönachi zían ni' tē' Jesús, ta'nnë':

—¿Bönni' Usedi, gudil-la yugu' bönni' usëda quiu'!

⁴⁰ Bubi'ë didza' Jesús, rë' légaquië':

—Rea' libí'ili': Channö ila'cuá' dxië' bönni' ni, yugu' guiöj hualuí'í caz zidzaj didza'.

⁴¹ Cate' bidxinë' Jesús gala' ra' yödzo na', en rilé'enë' le, ní'irö ribödxë' que, ⁴² rnnë':

—Raca ládxa'a huanözili' na'a dza le gaca gun ga cuéqui dxi ládxi'li' lahuë' Dios, pero na'a chinagachi' queéli', para cabí ilé'eli' le. ⁴³ Huala'dxin queéli' dza cate' nupa biti' ta'lé'e libí'ili' dxi'a ila'bequi zö'ö idú gásibi'ilö ga zóali', en ila'gu'u libí'ili' lē'alö, ate' yúgu'të lataj idú gásibi'ilö ilúnlenë' libí'ili' gudil-la. ⁴⁴ Ulu'quinnajë' zö'ö run chí'i yödzo queéli', en ilútië' nupa nacua' lu yödzo ni. Biti' ugá'ana guiöj lahuí luzé'e. Yúgu'të lē ni gaca queéli' tu' cabí gúquibe'eli' dza bidë' Dios buduyúë' libí'ili'.

Rulatjë' Jesús lö'a yudo'

(Mt. 21:12-17; Mr. 11:15-19; Jn. 2:13-22)

⁴⁵ Ní'irö guyázië' Jesús lö'a yudo', en gusí lahuë' rubéajë' ní'ilö yúgu'të nupa tuti', en nupa to'o ga naca lö'a yudo'. ⁴⁶ Rë' rë' quélië':

—Nazúaj lu guichi lá'ayi, rñna: “Ládx'a naca yu'u ga ulu'lidza bönachi Dios”, pero libí'ili' chinunli' le ca tu lídxigaca bönni' gubán.

⁴⁷ Yugu' dza rusédinë' Jesús bönachi ga naca chila yudo', ate' gula'zóa gula'bö'ë bixúz unná bē', len bönni' yudo' tu'sédinë', en yugu' bönni' lo que lu yödzo ilútië' Lē'. ⁴⁸ Biti' bulu'dzölinë' naxci ilútië' Lē', tu' idú ládxi'gaca tu'zē nágagaca yúgu'të bönachi xtídzë'ë.

20

Yöl-la' unná bē' dē lu nē'ë Jesús

(Mt. 21:23-27; Mr. 11:27-33)

¹ Tu dza, cate' ni' rusédinë' Jesús bönachi ga naca chila yudo', en riguixjō'ë didza' dxi'a, bila'dxinë' yugu' bixúz unná bē', en bönni' yudo' tu'sédinë', len bönni' gula tu'zéajni'inë', ga na' zoë', ² ate' tē' Jesús:

—Gudixjō'i' netu'. ¿Bizxi yöl-la' unná bē' dē lu no'o runu' caní? ¿Nuzxi caz budödi lu no'o yöl-la' unná bē' ni'?

³ Bubi'ë didza' Jesús, rë' légaquië':

—Inábida' ca' libí'ili' tu didza', ate' ubí'ili' innali'. ⁴ ¿Nuzxi gusöl-la' Juan ruquilë' bönachi nisa? ¿Naru' Dios, o bönachi?

⁵ Gulún xtídz'gaquië' la' légacase' bönni' yudo' na', ta'nnë':

—Channö innaru': Gusöl-lë'ë Dios lē', guié' rē'u: “¿Bizx que biti' guyéajlë'eli'-nē'?”

⁶ Channö guiëru'-nē': Gula'söl-lë'ë yugu' bönni' lē', bönachi lu yödzo ni ulu'laxí' rē'u guiöj, tu' nöziguequi bē'ë didza' Juan na' uláz queë' Dios.

⁷ Ní'irö bulu'bi'ë didza', ta'nnë':

—Biti' nöztu' nuzxi na' gusöl-la' Juan.

⁸ Ní'irö Jesús rē' légaquië':

—Neda' ca' biti' guá' libí'ili' bi yöl-la' unná bē' rúnida' caní.

Yugu' bönni' huen dxin biti' nácaqaquië' tsahui'

(Mt. 21:33-44; Mr. 12:1-11)

⁹ Ní'irō la' gusí lotē' Jesús ru'ilenē' bōnachi nacua' ni' didza'. Rucúdzu'ē didza', rnnē':
 –Zoē' tu bōnni' budē'ē yugu' lubá uva lu xiyúē', ate' budōdē' luyú na' lu ná'agaquiē' bōnni'
 huen dxin para ilún gatsjē' len lē' le ulu'zi'ē, ate' guyijē' zi'tu' ga ni' bugá'anē' xidzé. ¹⁰ Cate'
 bidxín dza ulu'chibē' uva luyú na', gusól-lē' ē tuē' bōnni' gubáz queē' ga na' nacu'ē huen dxin
 na' para si'ē uláz queē' que le ulu'zi'ē, pero huen dxin na' gulúndē' ē lē' zi', en bulu'sól-lē' ē lē'
 cá'asó. ¹¹ Leyúbölō gusól-lē' ē ia'túē' gubáz queē', ate' légaquiē' gulúndē' ē lē' ca' zi', en gulu'ē
 dō' queē', ate' bulu'sól-lē' ē lē' cá'asó. ¹² Leyúbölō gusól-lē' ē quegaquiē' bōnni' bunni gubáz
 queē', ate' bulu'dxiē' ca' lē' huē', en bulu'béajē' lē' ní'ilō luyú na'.

¹³ Ní'irō guzá' ládxē'ē xani luyú na', gunnē': "¿Nacxi guntsa'? Isól-la'a xzí'ini caza'
 nadxí'ida'-bi' quegaquiē'. Cate' ila'lé'enē'-bi', nadxi ca' ilunē'-bi' bal." ¹⁴ Ní'irō, cate' yugu'
 bōnni' huen dxin na' bila'lé'enē'-bi', gulún xtídza'gaquiē' la' légasasē', ta'nnē': "Bi'i ni
 guequi queēbi' luyú ni. Guli'dá, gútiru'-bi', para guequi queēru' le ral-la' guequi queēbi'."
¹⁵ Bulu'béajē'-bi' ní'ilō luyú na', en gulútiē'-bi'.

'Na'a, ¿nacxi caz gunē' xani luyú na' quegaquiē'? ¹⁶ Guidē', en gútiē' yugu' huen dxin na',
 ate' udōdē' luyú queē' lu ná'agaca bōnachi yúbölō.

Cate' bōnachi nacua' ni' bila'yōni lē ni, gula'nnē':

–¡Inná Dios biti' gaca caní!

¹⁷ Ní'irō buyúē' Jesús légaquiē', rnnē':

–¿Bizxi sa'yéaj lē na' nazúaj lu guichi lá'ayi, rnna:

Guiōj na' gula'rú'unē' bōnni' huen zō'ō,

guiōj ni chinaca guiōjlen squin zō'ō?

¹⁸ Núti'tēs nu ibixi lahui guiōj ni, quítsaj nu na', ate' nu bōnni' tsōjbága' guiōj ni lē', uzuzxaj
 lē'.

Ca naca dumí ta' guixxaj lázagaca bōnachi
 (Mt. 21:45-46; 22:15-22; Mr. 12:12-17)

¹⁹ La' dza ní'isó, yugu' bixú unná bē' len bōnni' yudo' tu'sédinē' gula'zóa gula'bō'ē ila'zōnē'
 Jesús, tu' téquibe'enē' gunnē' quegaquiē' lē na' bucúdzu'ē didza', pero guládxinē' bi ilún
 bōnachi zían nacua' ni'. ²⁰ Ní'irō bulu'yúeniē' Jesús, en gula'sól-lē' ē yugu' bōnni' para
 ulu'béajē' Lē' didza', bōnni' ulu'lú'i cuíngaquiē' ca bōnni' tsahui', para ilunē' ga bi innē' Jesús,
 para gaca ulu'dōdē' Lē' lu nē'ē bōnni' rinná bé'enē' uláz queē' César. ²¹ Para ilunē' caní,
 gula'nábinē' Jesús, ta'nnē':

–Bōnni' Usedi, nōztu' rno' le nácatē, en rusédinu' le nácatē, en biti' ruchi'a rusōróu' ca
 naca le tu'lú'isó lahui bōnachi, pero idútē li naca ca rusédinu' xibá queē' Dios. ²² Gudíxjōi'
 netu'. ¿Naru' run bayudxi quixxaj laztu' queē' César, bōnni' Roma rinná bē'ē, o cabi?

²³ Réquibe'enē' Jesús le té'ēnnē' ilunē' queē', ate' rē' légaquiē':

–¿Bizx que rizí' bē'ēli' neda'? ²⁴ Buli'lú'itsōqui' neda' tu dumí ridá. ¿Nuzxi lahui da' lē'ē ni,
 en nuzxi le nazúaj ni?

Bulu'bi'ē didza', ta'nnē':

–Queē' César na'.

²⁵ Ní'irō Jesús rē' légaquiē':

–Buli'nódzaj queē' César le nequi queē' César, ate' queē' Dios le nequi queē' Dios.

²⁶ Biti' guca ilunē' ga bi innē' Jesús para gaca ulu'zéguiē' Lē' didza' lógaca bōnachi zían na',
 pero bulu'báninē' ca naca didza' bubí'ē, ate' bulu'sayaj ruá'agaquiē'.

Ca gaca quegaca nupa ulu'bán lu yól-la' guti
 (Mt. 22:23-33; Mr. 12:18-27)

²⁷ Ní'irō yugu' bōnni' yudo' saduceo, nupa na' ta'nná biti' ulu'bán nupa chinátigaca,
 bila'dxinē' ni', ate' gula'nábinē' Jesús, ta'nnē':

²⁸ –Bōnni' Usedi, Moisés buzúajē' queēru' lu guichi, le rnna: "Channō gátie' nu bōnni',
 ate' ugá'ananu nigula queē', en channō cantu nu zoa bi'i queē', ní'irō bi'i bōchi'bi' ral-la'
 sí'ibi'-nu nigula queē' na', para uzóabi' bi'i queēbi' bōchi'bi' na' gútibi'." ²⁹ Gula'cuá'abi'
 gadxi bi'i bōnni' nácacabi' bōchi'bi', ate' bi'í zí'aló na' butsaga ná'aleni' bi'í nigula, en
 gútibi', biti' zóabi' bi'í queēbi'. ³⁰ Ní'irō bi'í buropi na' butsaga ná'aleni'-nu nigula na', ate'
 gútibi' ca' bi'í ni, biti' zóabi' bi'í queēbi'. ³¹ Butsaga ná'aleni'-nu bi'í bunni na', ate' la' tuz ca
 gulunbi' igádxitēbi', ate' gulátibi', biti' zóabi' bi'í quegacabi'. ³² Ga búdxitē, gútinu ca' nigula na'.
³³ Na'a, cate' ulu'bán nupa chinátigaca, ¿núzxilōbi' guéquinu nigula na' queēbi', tu' bulu'tsaga
 ná'aleni'-nu igádxitēbi'?

³⁴ Ní'irō bubí'ē didza' Jesús, rē' légaquiē':

–Tu'tsága ná'agaca bōnachi dza ni zóaru' na'a, en tu'nódzjē'-bi' xzí'inigaquiē' para
 ulu'tsaga ná'agacabi'. ³⁵ Na'a, nupa nácacaca lesaca' ulu'bán lu yól-la' guti, en tsócuá'
 yódzolió si' gata', biti' ilún yól-la' rizóalen nigula, en biti' ulu'tsaga ná'agaca. ³⁶ Caní gaca, tu'
 cabirō ilati nupa na' ulu'bán lu yól-la' guti, pero ilácacaca ca nácacagaquiē' gubáz lá'ayi queē'

Dios, en iláčagaca zxi'ini cazë' Dios. ³⁷ Ca na' ral-la' ulu'bán nupa chinátigaca, ruluf'inë' rë'u Moisés caz ga na' nazúaj lu guichi ca naca que yaga yötsi' régui, ga ni' ru'ë didza' Xanru', rnnë' náquië' Dios queë' Abraham, en Dios queë' Isaac, en Dios queë' Jacob. ³⁸ Dios náquië' Dios, calëga quegaca nupa nátigaca tsaz, pero quegaca nupa nabángaca, tu' nabángaca lahuë' Lë' yúgu'të bônachi, sal-la' gulatí luyú ni.

³⁹ Ní'irö bulu'bi'ë didza' bal-lë' bönni' yudo' usedi, ta'nnë':

–Bönni' Usedi, dxí'ado' gunnó'.

⁴⁰ Bítirö bulu'rúguinë' ila'nábinë' Lë' didza'.

¿Nuzxi zxi'ini náquië' Cristo?

(Mt. 22:41-46; Mr. 12:35-37)

⁴¹ Ní'irö Jesús rë' légaquië':

–¿Nacxi caz na' ta'nnë': “Cristo náquië' zxi'inë' David?” ⁴² David caz bë'ë didza' le nazúaj lu guichi lá'ayi ga nazúajgaca salmo, le rnna:

Xanru' Dios gudxë' Xana':

“Gurö'i cuita lë'a ibëla

⁴³ cate' gunra' ga ulu'zechu zxi'igaca lo' nupa ta'dá'baga' Li'.”

⁴⁴ David caz na' gunnë' queë' náquië' Xanë'. ¿Nacxi caz naca, rnnali' libí'ili' náquië' zxi'inë'?

Jesús ruzéqui'ë diza' bönni' yudo' tu'sédinë'

(Mt. 23:1-36; Mr. 12:38-40; Lc. 11:37-54)

⁴⁵ Tsanni ni' yúgu'të bônachi nacua' ni' tu'zë náagaca Jesús, rë' yugu' bönni' usëda queë':

⁴⁶ –Gulí'gún chí'í cuinli' quegaquië' bönni' yudo' tu'sédinë', tu' ta'yaza ládxi'gaquië' ta'dë' nácugaquië' lari' tunna, en t'ë'ennë' ulu'lidza bônachi légaquië' zxon gapa naca lu yé'ëyi, en ta'yaza ládxi'gaquië' ca' ta'bö'ë lataj lo gapa tu'dubë' tu'sédë' queë' Dios, en gapa ta'bö'ë tahuë'. ⁴⁷ Ta'gúë' lidxigacanu nigula uzëbido', ate' para ulu'lu'í tsahui' cuíngaqië', xidzë tu'lidzë' Dios. Yugu' bönni' ni, yénni'tërö gunë' Dios ga ila'gui'í ila'záquië'.

21

Gun le gulú'unu tu nigula yechi' lahuë' Dios

(Mr. 12:41-44)

¹ Ga na' zoë' Jesús chila yudo', guchisa lahuë', en rilé'enë' yugu' bönni' dë yöl-la' tsahui' quegaquië', ta'gu'ë dumí lu guí'ina que dumí gun que yudo'. ² Bilé'enë' ca' tu nigula yechi' uzëbido', rigú'unu chopa dumí lásido', le nazáca'gaca láti'do'os. ³ Rnnë' Jesús:

–Le nácatë rea' libí'ili', tu' le zxon'tërö gulú'unu nigula yechi' uzëbido' ni ca ia'zica'rö bônachi na' ta'gu'ë dumí. ⁴ Yúgu'të, tsca le nadödi bë' dë quegaquië', gula'gu'ë dumí que yudo', pero nigula ni, lu yöl-la' yechi' queënu gulú'unu idútë le dë queënu, le ral-la' gáhuinu.

Rigú'xjö'ë Jesús ca ulu'sunitië' yudo'

(Mt. 24:1-2; Mr. 13:1-2)

⁵ Nacuá' ni' nupa tu'í didza' ca naca que yudo' na', ca na' nazí'i biquitaj que, yugu' guiöj nazácalë'egaca, en yugu' gundo' nácagaca lachi, ate' Jesús rë' légaquië', rnnë':

⁶ –Yúgu'të lë ni rilé'eli', huadxin dza cate' bítirö ugá'ana guiöj lahui luzé'e ni, tu' ulu'suniti bônachi yudo' ni.

Le ilaca bë' cate' si' idxin dza údxi

(Mt. 24:3-28; Mr. 13:2-23)

⁷ Ní'irö gula'nábinë' Jesús, ta'nnë':

–Bönni' Usedi, ¿bátaxi gaca lë ni? ¿Bizxi gaca bë' chizó'a gaca caní?

⁸ Bubi'ë didza' Jesús, rnnë':

–Gulí'gún chí'í cuinli', para cabí nu si' ye'e libí'ili', tu' ila'lá'gaquië' bönni' zían, en ila'z'í'í lágaquië' ca lea' neda', ila'nnë' nácagaquië' Cristo, en ila'nnë': “Chizá' gala' dza údxi.” Neda' rea' libí'ili': Biti' tséajlenli' légaquië'. ⁹ Cate' yónili' raca gudil-la, en ta'dá'baga' bônachi yúlalui', bití' gadxi idzöbiliti', tu' run bayudxi ilaca le caní, pero bití' zuitëni dza údxi.

¹⁰ Ní'irö rë' ca' légaquië':

–Til-la tu yödzo len ia'tú yödzo, ate' bônachi tu ga nu rinná bë' ila'díl-lalen bônachi ia'tú ga nu rinná bë'. ¹¹ Tödígaca budó' zxu', ate' zían lataj gaca gubín, en ilatsaj yödzo'huë' zxon. Ila'lá' lahui lúzxiba le ilún gadxi bônachi, en le ilaca bë'.

¹² Zí'atëlö cate' si' ilaca lë ni, ila'zön bônachi libí'ili', en ila'bía ládxi'gaca libí'ili'. Ila'chë'ë libí'ili' gapa tu'dubë' tu'sédë' queë' Dios para ilútië' libí'ili', en ila'gu'ë libí'ili' lidxi gué. Ila'chë'ë libí'ili' lógaquië' bönni' ta'nná bë'ë, en lógaquië' bönni' lo, tu' dá'ali' neda'. ¹³ Gaca caní queëli' para séqui'li' gunli' ba nalí quia' neda'. ¹⁴ Tsutsu gulí'gún ládxi'li', para cabí cuéqui ícjali' zí'alö nacxi innali' uláz queëli', ¹⁵ tu' gunna' queëli' didza' ubí'ili', en yöl-la' réajni'í, para cabí gaca ulu'cul-lë' libí'ili', en para cabí gaca bi ila'nnë' que xtídza'li' bönni' ni'

biti' ila'lé'ené' libí'ili' dxi'a. ¹⁶Ní'irö xuz quézili' ulu'dödë' libí'ili', en cá'anqueze yugu' bönni' böchi' quézili', en yugu' di'a dza que quézili', en yugu' böchi' luzé'e quézili', ate' ilútië' bál-lali'. ¹⁷Yúgu'të bönachí ulu'zóa libí'ili' tsölá'alö tu' dá'ali' neda', ¹⁸pero biti' iníti nitú guitsa' ícjalí'. ¹⁹Channö ugá'anali' tsutsu, idéli'li' yöl-la' na'bán idü.

²⁰'Cate' ilé'eli' bönni' rójáquië' gudil-la nagú'ugaquië' lë'a Jerusalén, inözili' chibidxín dza iníti yödzo ni. ²¹Ní'irö nupa nacua' luyú Judea ral-la' ila'z'unnaj ni, en tsöjaca gapa naca guí'ado', ate' nupa nacua' lu yödzo ni ral-la' ila'rúaj ni, ate' nupa nacua' la' guixi', biti' ral-la' ulu'dxín lu yödzo ni. ²²Yugu' dza ni' Dios guné' xigua' nupa nacua' yödzo ni para gaca yúgu'të le nazúaj lu guichi lá'ayi ca ral-la' gaca quégaquië'. ²³Cate' idxín dza ni', bica' bayechi' yugu' nigula nuá'gacanu-bi' bí'ido' sí' ilaljbi', en nigula tu'gádxí'nu-bi' bí'ido', tu' ila'gui'i ila'záca'da' bönachí nacua' ni', ate' Dios gúndë'ë bönachí ni' xigua'. ²⁴Ilátië' ziané' lu gudil-la na', ate' ila'chë'ë ia'bal-lë' nadzúngaquië' ga ila'dxinë' idütë yödzo'lió, ate' yödzo Jerusalén ni, ulu'léaj ulu'libë' le bönni' zi'tu', cate' izá'arö dza quégaquië'.

Le ilaca bë' si' huödë' Bönni' Guljë' Bönachi

(Mt. 24:29-35, 42-44; Mr. 13:24-37)

²⁵Gunnë' ca' Jesús:

—Ní'irö ila'cuá' le ilaca bë' lu gubidza, en lu beo', en yugu' lu böljaj lúzxiba, ate' luyú ni ulu'chixi bönachí, en iládxiguequi, tu' yón chí'i guziú' yu que nísado', en que le riyasa ridxía nisa na'. ²⁶Ulu'dú ládxi'gaca lu yöl-la' radxi quéguequi tu' ila'zá' ládxi'gaca quégaca le ral-la' ilaca lu yödzo'lió, en ila'z'ixizi le nalá'gaca lúzxiba. ²⁷Ní'irö ila'lé'ené' neda', Bönni' Guljë' Bönachi, guía' lu böaj lúzxiba, dë lu na'a yöl-la' unná bë', ate' ilá' lahui yöl-la' zxon quía'. ²⁸Cate' isí lo ilaca lë ni, buli'tipa ládxi'li', en guli'chisa lolí', tu' chizóa udxina' neda', para huó'ua' libí'ili'.

²⁹Jesús gudxë' ca' légaquië' tu le bucúdzü'ë didza', rnnë':

—Buli'yútsöca' ca' raca que yaga higo, en que bíti'tës yaga yúbölo'. ³⁰Cate' rilé'eli' ta'lén ni'a në'e hué'ëndo', nöz quézili' chizá' gala' cusu ba. ³¹Lësca' caní, cate' ilé'eli' chítaca yugu' lë ni, inözili' chizá' gala' dza idinná bë'ë Dios luyú ni.

³²'Le nácatë' rea' libí'ili', biti' ilátigaca bönachí ila'cuá' dza ni' cate' ilaca yúgu'të lë ni. ³³Ila'dödi que lúzxiba, en que luyú ni, pero xtídza'a, biti' tödi cá'asö, tu' idxín caz ca rna.

³⁴'Guli'gún chí'i cuinli' para cabí guí'ili' lataj tzaa ícja ládxi'do'oli' le gun ditaj libí'ili', lë na' naca yöl-la' rágulë'e, en yöl-la' rizudxi, en yöl-la' ruubi ruguí'i, para cate' idxín dza ni', cabí sóali' niti ladxí', ³⁵en para cabí gaca queëli' ca tu le rizón bönachí, ca naca le gaca quégaca yúgu'të bönachí nacua' idütë yödzo'lió. ³⁶Que lë ni na', guli'sóa ban ladxí', en buli'lídzatica'së' Dios, para gaca uláli' lu lë na' ral-la' ilaca, en para cabí utuí'ili' cate' idxinli' lahua' neda', Bönni' Guljë' Bönachi.

³⁷Lahui' dza rizóë' Jesús chila yudo', rusédinë' bönachí, ate' chí'i dzö'ölö rirúajë' ni', en rejë' lu guí'ado' nazí'i le Guí'a Yaga Olivo. ³⁸Yugu' zila bila'dxín yúgu'të bönachí ga zoë' Jesús chila yudo' para ulu'zë nágagaca xtídzë'ë.

22

Tun xtídza'gaquië' ilútië' Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹Cate' chizóa idxín laní cate' tahuë' yóta xtila cabí nazí'i cúa zi que, nazí'i le Pascua laní na', ²bulu'dubë' yugu' bixúz unná bë' len bönni' yudo' tu'sédinë'. Ta'zóa ta'bö'ë ilútië' Jesús, pero biti' gula'zéqui'në' tu' tádxinë' bi ilún bönachí.

³Ní'irö Satanás tu' xihui' yó'jtsaga Judas. Judas lë' ca' Iscariote, en nababë' idxínnutë' gubáz nasöl-lë'ë Cristo. ⁴Guyijë' Judas na', yojë'lenë' didza' yugu' bixúz unná bë', en bönni' dë lu ná'agaquië' que yudo', nacxi guné' para udödë' Jesús lu ná'agaquië'. ⁵Bulu'dzëjanë' bönni' yudo' na', en gula'zi' lu ná'agaquië' ulu'nödzejë' queë' dumí'. ⁶Raza ládxië' Judas lë ni, ate' rizoá ribö'ë udödë' Jesús lu ná'agaquië' bagáchi'sö.

Le ráguru' le rusá' ládxi'ru' ca gútië' Xanru'

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷Bidxín dza na' tahuë' yóta xtila cabí nazí'i cúa zi que, cate' ral-la' ilútië'-ba' bö'cu' zxila' le tahuë' dzö' Laní Pascua. ⁸Jesús gusöl-lë'ë Pedro, en Juan, rnnë':

—Guli'tséaj, guli'tsöjpa' a queëru' le ráguru' dzö' Laní Pascua.

⁹Të' Lë':

—¿Gazxi rë'ënu' tsöjpa'atu' queëru'?

¹⁰Jesús rë' légaquië', rnnë':

—Buli'yútsöca', cate' tsú'uli' lu yödzo ni, irúajë' tu bönni' dutságuië' libí'ili', söjnu'ë tu rö'ö nisa. Guli'tséajlenë' ga idxintëli' yu'u ga tsázië'. ¹¹Guli'guíë' xan yu'u na': "Bönni' Usedi rë' li':

¿Gazxi zoa yu'u laní ga gágulena' yugu' bönni' usëda quia' dzö' Laní Pascua?" ¹² Ní'irö uluf'inë' libí'ili' tu yu'u zxön xitsá' ga ní' chinabá'a. Bulí'pá'a ní' le gáguru'.

¹³ Ní'irö yöjáquië', en yöjácá'gaquië' ca na' chigudxë' Jesús légaquië', ate' bulu'pë'ë ní' le ilahuë' dzö' Laní Pascua.

¹⁴ Cate' bidxín dzö' na', gurö'ë Jesús ga ilahuë', ate' bönni' gubáz queë' na' gula'bó'lenë' Lë' tsözxön. ¹⁵ Ní'irö Jesús rë' légaquië':

—Gúcada' ládxa'a gágulena' libí'ili' tsözxön xtsö' ni zí'atëlö cate' sí' qui'i saca'a, en gátia'.

¹⁶ Rea' libí'ili': Bítirö' gahua' lë ni cate' idxinrö dza gaca le rulu'ísö' xtsö' ni ga ní' rinná bë'ë Dios.

¹⁷ Gudélë'ë Jesús tu xziga'do', en gudxë' Dios: "Xclenu'." Ní'irö rë' légaquië':

—Gulí'sí' lë ni, en gulí'guí'ajlati' huéaj, ¹⁸ tu' rea' libí'ili': Bítirö' guí'ja' xisi uva cate' idxinrö le rinná bë'ë Dios.

¹⁹ Ní'irö gudélë'ë yöta xtila, en gudxë' Dios: "Xclenu'." Gudödi ní' buzuzxjë' le, en bë'ë que' queégaquië', rnnë':

—Lë ni naca idütë' le naca' le rudöda' uláz queëli'. Gulí'gún caní para usá' ládxi'li' neda'.

²⁰ Cate' budxi gulahuë', lësca' caní bë'ë didza' que xziga'do' na', rnnë':

—Xziga'do' ni rulu'í' ca naca didza' cubi rucá'ana tsahui', ate' rön quia' run tsutsu le, rön na' ilalaj ní'a queëli'.

²¹ Na'a, bönni' na' udödë' neda' lu ná'agaca bönnachi rö'ë rágulenë' neda' tsözxön. ²² Le nácatë huayija' ga ilütie' neda', Bönni' Guljë' Bönnachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödë' neda'.

²³ Ní'irö gula'sí' lógaquië' ta'nábinë' Lë' tu tuë', ta'nnë':

—¿Núzxilötu' nu gun caní?

Tu'í xtidza'gaquië' núzxilögaquië' gáquië' lo

²⁴ Ní'irö gulu'ë didza' la' légacasë' núzxilögaquië' idéli'në' lataj lo. ²⁵ Jesús gudxë' légaquië':

—Yugu' bönni' unná bë' tu'gunë' dxin yöl-la' unná bë' queégaquië', ta'nná bé'enë' bönnachi, ate' nupa ni dë lu ná'agaca yöl-la' unná bë', légaquië' bönni' tácalen. ²⁶ Libí'ili' bití' ral-la' gunli' caní, pero nu naca lo ládjali' ral-la' gaca ca nu naca cuidi'tërö, ate' nu rinná bë' ral-la' gaca ca nu run dxin queégaqui' luzë'e. ²⁷ ¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calëga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

²⁸ Libí'ili' ni guzóaleni' neda' cate' ní' bi guca quia', yugu' le gula'zí' bë' neda'. ²⁹ Que lë ni na' udöda' lu ná'ali' tu ga inná bë'ëli', ca na' benë' Xuza', budödë' lu na'a ga inná bë'a neda'.

³⁰ Caní guna' para gaca cö'öli', en guí'aj gáguleni' neda' ga ní' inná bë'a, ate' cö'öli' xilataj cázali' ga uchi'a usöröli' idxinnu cö' xzí'ini xí'sóë' Israel.

Rnnë' Jesús innë' Pedro bití' núnbë'ë Lë'

(Mt. 26:31-35; Mr. 14:27-31; Jn. 13:36-38)

³¹ Gunnë' ca' caní Xanru':

—Simón, Simón. Buyútsöca'. Chigunaba Satanás tu' xihui' libí'ili', para urixi udödi libí'ili' ca nu rurixi rudödi zxoa' xtila, ³² pero chibulidza'-në' Dios, en gunábida' Lë' gácalenë' li', para cabí údxi udú yöl-la' réajlë' quiu' neda'. Na'a, cate' huóacu' quia', butipa ládxi'gaquië' böchi' luzó'o.

³³ Pedro rë' Lë':

—Xan, chizóa' sá'lena' Li', calégasö tseja' lidxi' guië', pero lësca' gátilena' Li'.

³⁴ Jesús rë' lë':

—Pedro, rea' li': Zí'alö cödxiba' böra na'a, chigudá'bagu'u tsonna luzuí, innó' cabí núnbë'u neda'.

Le benë' Jesús cate' chizóa' ilütie' Lë'

³⁵ Jesús gunábinë' légaquië', rnnë':

—Cati' gusól-la'a libí'ili' cabí nuá'ali' yöxaj yöta, en calëga buzudi dumí, en calëga chopá cö' xiráchuli', ¿naru' bi biyadzaj queëli'?

Légaquië' ta'nnë':

—Bíti' bi.

³⁶ Ní'irö rë' légaquië':

—Na'a, nu dë yöxaj yöta que ral-la' guá' le, ate' lësca' caní ral-la' gun nu dë que buzudi dumí, ate' nu bití' dë que guië' tuchi' ral-la' guti' lari' rixóa yeni, en sí' tu guië' tuchi'. ³⁷ Rea' libí'ili': Run bayudxi gaca quia' lë na' nazúaj lu guichi lá'ayi, rnna: "Gulunë' queë' ca tunë' quégaca nupa tua' dö'", ate' ilaca yúgu'të le nazúajgaca lu guichi ca ral-la' gaca quia'.

³⁸ Ní'irö légaquië' ta'nnë':

—Xan, ni dë chopá guië' tuchi'.

Lë' rë' légaquië':

—Chinaca.

Jesús rulidzè Dios la'yèla Getsemani
(Mt. 26:36-46; Mr. 14:32-42)

³⁹ Ní'irò birúajè Jesús, en ca run cazè' sa'yéajè' lu Guí'a Yaga Olivo, ate' yugu' bönni' usèda queè' sòjácálenè' Lè'. ⁴⁰ Cate' bila'dxinè' ní', Jesús rè' légaquiè', rnnè':

—Buli'lidzè' Dios, inábili'-nè' cabi gata' lataj si' bè' tu' xihui' libi'ili'.

⁴¹ Ní'irò Jesús guzè'è ga na' nacu'è, en gudödè' ia'lati' tsca ga ridxín tu guiój rirú'uniru', ate' ní' buzóa zxibè', en rulidzè' Dios. ⁴² Rnnè':

—Xúz, channò rè'ènu', bucuása ga zoa' lè na' ral-la' quí'i saca'a, pero calèga ca rè'ènda' neda', pero ca rè'ènu' Lí' gunu'.

⁴³ Ní'irò buluí' lahuè' gubáz lá'ayi queè' Dios, zè'è yehua' yubá, ate' butipè' ládxè'è Jesús.

⁴⁴ Lu yòl-la' risèbi ladxí' queè', idú ládxè'è Jesús bulidzè' Dios, ate' nisa yósa queè' guca ca rón raba' luyú.

⁴⁵ Cate' budxi bulidzè' Dios, guyasè', en bóajè' ga na' nacu'è bönni' usèda queè', ate' duxáquiè' légaquiè' tásie' tu' tu'hu'ínigaquiè'. ⁴⁶ Ní'irò Jesús rè' légaquiè':

—¿Rásitsali'? ¡Gulí'chasa, en buli'lidzè' Dios! Inábili'-nè' cabi gata' lataj si' bè' tu' xihui' libi'ili'.

Ta'zönè' Jesús

(Mt. 26:47-56; Mr. 14:43-50; Jn. 18:2-11)

⁴⁷ Tsanni ní' ru'è didza' Jesús, la' bila'dxintè' bönni' zían ní', ate' Judas, bönni' na' nababè' idxínnuè' bönni' usèda queè' Jesús dzáguiè' légaquiè', ate' nanóruè' légaquiè' bönni' zían na'. Gubígui'è ga zoè' Jesús para utsaga lahuè' Lè'. ⁴⁸ Ní'irò Jesús rè' lè':

—Judas, ¿naru' rudóditso' caní neda', Bönni' Guljè' Bönachi, rutsaga lo' neda'?

⁴⁹ Cate' yugu' bönni' na' nacuá'lenè' Jesús bila'lé'enè' ca na' raca queè' Lè', tè' Lè':

—Xan, ¿naru' guí'itu' légaquiè' guiè' tuchi'?

⁵⁰ Tuè' bönni' usèda queè' Jesús benè' huè' guídi náguiè' bönni' huen dxin queè' bixúz lo. Burixè' guídi náguiè' ibèla. ⁵¹ Jesús rnnè':

—Chinaca na'a. Tsca' gaz.

Gudanè' Jesús guídi náguiè' bönni' huen dxin na', en bunè' le. ⁵² Ní'irò rè' yugu' bixúz unná bè', en bönni' dè lu ná'agaquiè' que yudo', en bönni' gula tu'zéajni'inè', bönni' na' biti' ta'lé'enè' Lè' dxi'a, rnnè':

—¿Narúajtsali' nuá'ali' guiè' tuchi', en yaga para sönlí' neda' ca runlí' rizónli'-nè' gubán?

⁵³ Yugu' dza guzóalen caza' libi'ili' chila yudo', ate' biti' bi benlí' quia', pero na'a chibidxin dza queéli', le naca dza dè lu nè'e nu na' zoa lataj chul-la.

Rnnè' Pedro: "Biti' núnbè'a-nè' Jesús"

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

⁵⁴ Ní'irò gula'zönè' Jesús, en gula'chè'è Lè' ga na' bulu'sudxinè' Lè' lidxè' bixúz lo. Pedro yójnahuè' Jesús zí'tu' zí'tu'sò. ⁵⁵ Cate' ní'a nè'è bixúz lo chigula'béquiè' guí' ló'a lidxè' bixúz lo na', gula'bò'è idú gásibi'illó ra' guí' na', ate' Pedro guró'lenè' légaquiè' tsózxón. ⁵⁶ Cate' tubi' bi'i nigula huen dxin bilé'ebi'-nè' Pedro, ní' rō'osè' ra' guí', buyubi' lè', en rnnabi':

—Bönni' ní' dè'è ca' Jesús.

⁵⁷ Gudá'baguiè' Pedro, rnnè':

—Nígula, biti' ca' núnbè'a-nè' bönni' na'.

⁵⁸ Ia'lati' gudzé' ia'túè' bönni' bilé'enè' Pedro, ate' rnnè':

—Lí' do'o ca' légaquiè'.

Pedro gunné':

—Bönni', calèga neda'.

⁵⁹ Ia'lati'sò gudzé, gunné' ia'túè' bönni':

—Le nácatè bönni' ní' dè'è Jesús, tu' náquiè' bönni' Galilea.

⁶⁰ Ní'irò Pedro gunné':

—Bönni', biti' nózda' bizxi na' ru'u didza' que.

Tsanni ní' ru'è didza' ní', la' guródxitèba' böra. ⁶¹ Ní'irò buécjè' Xanru', en ruyúè' Pedro, ate' yójnenè' Pedro xtídzè'è Xanru', ca na' gudxè' lè': "Zí'aló códxiba' böra na'a, lí' chigudá'bagu'u tsonna luzuí, innó' biti' núnbè'u neda'." ⁶² Burúajè' Pedro ní'illó, ate' rón caz guródxè'.

Tu'titjè' Jesús

(Mt. 26:67-68; Mr. 14:65)

⁶³ Yugu' bönni' na' nazóngaqiè' Jesús bulu'titjè' Lè', ate' gula'guiné' Lè'. ⁶⁴ Ní'irò bulu'sayjè' lahuè' Jesús, ate' gula'gápè'è lahuè', en gula'nábinè' Lè', ta'nnè':

—¡Gunnéya'atsóca'! ¿Nuzxi na' gudapa' Lí'?

⁶⁵ Ziánrö ca' gula'nnë' queë' le gulu'ë dö' queë'.

Ridxinë' Jesús lógaquië' bönni' yudo' tu'chi'a tu'söröë'
(Mt. 26:59-66; Mr. 14:55-64; Jn. 18:19-24)

⁶⁶ Cate' chizá' rení' dza na', bulu'dubë' bönni' gula tu'zéajni'inë' bönachi judío len yugu' bixúz unná bë', en bönni' yudo' tu'sédinë', ate' gula'chë'ë Jesús lógaquië' bönni' yudo' tu'chi'a tu'söröë', ate' gula'nábinë' Lë', ⁶⁷ ta'nnë':

–Gudíxjöi' netu'. ¿Naru' nactso' Li' Cristo?

Jesús rë' légaquië':

–Channö guía' libí'ili' naca' Cristo, biti' tséajlë'ëli' neda', ⁶⁸ en channö inábida' libí'ili' tu didza', biti' ubí'ili' didza', en biti' usanli' neda'. ⁶⁹ Na'a isí lo, neda', Bönni' Guljé' Bönachi, có'a cuita lë'ë ibëla Dios, nápatërë' yöl-la' unná bë'.

⁷⁰ Gula'nábinë' Lë' yúgu'të', ta'nnë':

–¿Naru' nactso' Li' Zxf'inë' Dios?

Lë' gudxë' légaquië':

–Le nácasó rnnali'.

⁷¹ Ní'irö ta'nnë':

–¿Núxirö naquíniru' nu gun ba nalí queë'? La' rë'usö chibiyöniru' didza' ru'ë.

23

Ridxinë' Jesús lahuë' Pilato, bönni' rinná bë'ë uláz queë' César
(Mt. 27:1-2, 11-14; Mr. 15:1-5; Jn. 18:28-38)

¹ Ní'irö gulazuinë' yúgu'të bönni' zían ni', ate' gula'chë'ë Jesús lahuë' Pilato, ² ga ni' gula'sí lógaquië' tu'zéguie' Lë' didza', ta'nnë':

–Bönni' ni, budzólitu' ca runë'. Runë' ga ta'dá'baga' bönachi uládz queëtu' yúlahui', en ruzáguë'ë xinözigaca nupa ta'guíxaj laz ruquíxjë' César, en rnnë' lë cazë' náquië' Cristo, bönni' ral-la' inná bë'ë.

³ Ní'irö Pilato gunábinë' Jesús, rnnë':

–¿Naru' nacu' Li' nu inná be'e bönachi judío?

Bubí'ë didza' Jesús, rnnë':

–Le nácasó rnnó'.

⁴ Ní'irö Pilato gudxë' yugu' bixúz unná bë', en bönachi nacuá' ni', rnnë':

–Biti' bi rudzólida' le naca xíguia' nunë' bönni' ni.

⁵ Ní'irö gulunrë' tsutsu xtídza'gaquië', ta'nnë':

–Runë' ga tu'tsatsa bönachi, en rusédinë' caní bönachi idú luyú Judea. Gusí lahuë' benë' caní luyú Galilea ga ridxintë runë' ca' ni.

Ridxinë' Jesús lahuë' Herodes, bönni' rinná bë'ë luyú Galilea

⁶ Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea. ⁷ Cate' gunózinë' nababë' Jesús ga ni' rinná bë'ë Herodes, gusól-lë'ë Lë' lahuë' Herodes na', tu' zoë' ca' Herodes Jerusalén yugu' dza na'.

⁸ Cate' Herodes na' bilé'enë' Jesús, budzéjanë', tu' chiguca xidzé rë'enë' ilé'enë' Lë' tu' chibiyönnë' le zían ca naca queë' Jesús, en runë' löza ilé'enë' tu yöl-la' huáca gunë'. ⁹ Ní'irö Herodes gunábinë' Jesús le zían, pero Jesús biti' bi didza' bubí'ë. ¹⁰ Nacu'ë ca' ni' yugu' bixúz unná bë', len bönni' yudo' tu'sédinë', ate' bulu'zéguie'ë Jesús didza'. ¹¹ Ní'irö Herodes, en bönni' queë' röjáquië' gudil-la bulu'ca'anë' Jesús cá'asö, en para ulu'titjë' Lë', bulu'gácuë' Lë' tu lari' nazaca' ca rácuë' tu bönni' unná bë', ate' leyúbölö bulu'sudxinë' Lë' lahuë' Pilato. ¹² Dza na' bulu'dzáguie' dxi'a Pilato, en Herodes, tu' zí'alö gula'lé luzë'ë tuë' ia'tüë'.

Ta'chúquië' queë' Jesús gátië'

(Mt. 27:15-26; Mr. 15:6-15; Jn. 18:39-19:16)

¹³ Ní'irö butubë' Pilato yugu' bixúz unná bë', en bönni' dë lu ná'agaquië', en bönachi lu yödzo, ¹⁴ ate' rë' légaquië':

–Djujá'ali'-në' bönni' ni lahua' neda', rnnali' queë' runë' ga tu'tsatsa bönachi, pero cate' gunabi yúdxida'-në', ate' zóatëli' ca' ni, biti' bi budzólida' le naca xíguia' nabáguë'ë, yugu' lë na' ruzéguili'-në' didza'. ¹⁵ Cate' gusól-la'a libí'ili' lahuë' Herodes, biti' bi budzölinë' le benë' bönni' ni le naca xíguia' nabáguë'ë para nu ichugu queë' gátië'. ¹⁶ Na'a usaca' zí'a-në', ate' tödi na' usana'-në'.

¹⁷ Run bayudxi tu le gunë' Pilato, usanë' lu ná'agaca bönachi tuë' bönni' nadzunë' cate' raca laní na', ca na' run cazë'. ¹⁸ Ní'irö gulu'ë zidzaj didza' yúgu'të bönni' nacu'ë ni, ta'nnë':

–Bëtië' bönni' ni, en busanë' queëtu' Barrabás.

¹⁹ Nadzunë Barrabás na' lidxi guié tu' gudíl-lalenë' yúlahui' lu yödzö na', en tu' bëtië' bönachi. ²⁰ Bulidzë Pilato légaquië' leyúbölö, tu' rë'ënë' usané' Jesús. ²¹ Leyúbölö gulu'ë zidzaj didza', ta'nnë':

—¡Budë'ë lë'e yaga cruz! ¡Budë'ë lë'e yaga cruz!

²² Ní'irö Pilato gudxë' légaquië' le bunni luzuí, rnnë':

—¿Bixi caz le ruá' dó' benë' bönni' ni? Biti' bi budzörida' nunë' le run ga nabáguë'ë xíguia' gátië'. Usaca' z'i'a-në', ate' ní'irö usana'-në'.

²³ Zidzajrö gulu'ë didza', ta'nabë' tē'ë Jesús lë'e yaga cruz. Tu' gula'bödxí'ë yenni' yugu' bönni' na', en yugu' bixúz unná bē', gula'déli'nē' gaca ca na' tē'ënnē'. ²⁴ Ní'irö Pilato guchúguie' queë' Jesús, para gaca queë' ca na' ta'nabë'. ²⁵ Busané' quegaquië' bönni' na' nadzunë' lidxi guié tu' gudíl-lalenë' yúlahui', en bëtië' bönachi, bönni' na' chígula'nabë', ate' budödë' Jesús para gaca queë' ca na' tē'ënnē'.

Dë'ë Jesús lë'e yaga cruz

(Mt. 27:32-44; Mr. 15:21-32; Jn. 19:17-27)

²⁶ Cate' ni' ta'ché'ë Jesús tsöjdá'gaquië' Lë' lë'e yaga cruz, gula'zönë' Simón, bönni' yödzö Cirene, suzë'ë la' guixi', ate' gula'xóë' yen zxicjë' yaga cruz na' para gu'ë le, en tsejë' cüzzu'lë' Jesús.

²⁷ Bönachi zían, enca' yugu' nigula söjñógaca Jesús, ta'bödxinu nigula na', en ta'bödxí yéchi'nu queë' Lë'. ²⁸ Ní'irö buéjë' Jesús, en ruyüë' légacanu, ate' rë' légacanu:

—Lib'íli' nigula Jerusalén. Biti' cödxili' quia' neda', pero guli'cödxí que quézili', en quegacabi' zxi'inili' ²⁹ tu' huadxín dza ila'nná: "Bica' bágaca yugu' nigula huödx, en nigula bití' guluá' anu-bi' bí'ido', en bití' bulu'gádxí'nu-bi' bí'ido'." ³⁰ Ní'irö ila'sí lógaca ila'nná bönachi, ilë' yugu' guí'a sibi: "Guli'dubága' netu'", en ilë' ca' yugu' guí'ado': "Guli'cachí' netu'." ³¹ Channó caní tunë' quia' neda', naca' ca tu yaga ya'a, ¿naru' cabí ilúntërë' ca' queëli', nácali' ca yaga bidxi?

³² Gula'ché'ë ca' chopë' bönni' tuá' dó', para ilútië' légaquië' tsözxön len Jesús. ³³ Cate' bila'dxinë' lataj nazí'i le Calavera, le rnna len didza' xidza' Lataj Que Böga' Íjaru', bulu'dë'ë Jesús lë'e yaga cruz. Bulu'dë'ë ca' lë'egaca yaga cruz chopë' bönni' tuá' dó'. Tuë' bulu'dë'ë cuita lë'ë ibëla Jesús, en ia'tué' bulu'dë'ë cuita lë'ë yögöla. ³⁴ Ní'irö Jesús rnnë':

—Xuz, buniti lo légaquië', tu' cabí nözguequinë' bi tunë'.

Bönni' rójáquië' gudíl-la nacu'ë ni' bulu'lë'ë que queëgaquië' le nácuë' Jesús, en bulu'quitjë' le gaca bē' lahui. ³⁵ Bönachi nacuá' ni' tu'yú, en yugu' bönni' dë lu ná'agaquië' bulu'titjë' Jesús, ta'nnë':

—Yugu' nu yúbölö busölë' bönni' ni. Na'a ral-la' usölá cuinë' channö náquië' Cristo, bönni' guró cazë' Dios.

³⁶ Yugu' bönni' na' rójáquië' gudíl-la bulu'titjë' ca' Jesús. Gula'biguë'ë ga na' zoë', en bulu'gui'jë' Lë' nupi zi, ³⁷ ta'nnë':

—Channó nacu' Li' bönni' inná bé'enë' bönachi judío, busölá cuinu'.

³⁸ Da' ca' lë'e yaga cruz ícllë' Jesús tu le nazúaj lu guichi lu didza' griego, en lu didza' latín, en lu didza' hebreo, le rnna caní: "Bönni' Rinná Bé'enë' Bönachi Judío." ³⁹ Tuë' bönni' huiá' dö' na' dë'ë lë'e yaga cruz bulidza zi'ë Jesús, rnnë':

—Channó nacu' Li' Cristo, busölá cuinu', enca' netu'.

⁴⁰ Bubi'ë didza' ia'tüë' bönni' huiá' dö' na', en gudíl-lë' luzë'ë na', rnnë':

—¿Naru' cabí rádxinu'-në' Dios? Lësca' li' narugu quiu' gátiu'. ⁴¹ Le nácatë rë'u, le ral-la'sö gaca queëru' riguí' i rizáca'ru', ca na' sa'yéaj dö' biá'aru', pero Bönni' ni, bití' bi dö' nu'ë.

⁴² Ní'irö bönni' ni rë' Jesús:

—Yöjné neda' cate' idxinu' ga ni' inná bē'u.

⁴³ Jesús rë' lë':

—Le nácatë rea' li', na'a dza ni sóalenu' neda' lataj lachi quia'.

Ratië' Jesús

(Mt. 27:45-56; Mr. 15:33-41; Jn. 19:28-30)

⁴⁴ Cate' bidxín idú huagubidza, guchul-la idütë yödzölió ga bidxinrö idú ridódi xihuó. ⁴⁵ Guchul-la gubidza, ate' lari' nal-la' lu yudo' biröza' chopa dí'iló. ⁴⁶ Ní'irö bē'ë zidzaj didza' Jesús, rnnë':

—Xuz, rigú'a lu no'o bö' naca caza'.

Cate' budxi gunnë' caní, birúajtë bö' naca cazë', gútië'.

⁴⁷ Cate' bönni' rinná bé'enë' bönni' rójáquië' gudíl-la bilé'enë' ca na' guca, gulu'ë Dios yöl-la' ba, rnnë':

—Le nácatë bönni' ni gúquië' bönni' tshahí'.

⁴⁸ Cate' yúgu'tè bõnni' nacu'è ni' tu'yúé' bila'lé'ené' lè na' guca, yõjhuõjgaquié' yõdzõ, ta'gapa' luchú'ugaquié' tu' tu'bánniè'. ⁴⁹ Zí'tu'sõ bulu'gá'ana yúgu'tè nupa ni' núnbè'gaca Jesús, en yugu' nigula na' yõjácalennu Lè' cate' ni' gudé' luyú Galilea, ate' tu'yúé' lè ni raca.

Rigáchè'è Jesús yeru ba

(Mt. 27:57-61; Mr. 15:42-47; Jn. 19:38-42)

⁵⁰ Zoè' ca' ni' tu' bõnni' yõdzõ Arimatea que luyú Judea, lè' José. Bõnni' ni náquié' dxi'a, en tsahu'i, en nabábalenè' yugu' bõnni' yudo' tu'chi'a tu'sórõé'. ⁵¹ Biti' bené' tuz nupa na' gula'chugu queé' Jesús gátié', tu' ribõzè' ca' José ni le rinná bè'è Dios. ⁵² Ní'irõ guyjìè' José na' lahué' Pilato, en gunabè' lataj u'è Jesús. ⁵³ Cate' chinuzõtjè' Lè', buchõlinè' Lè' lari', ate' gulu'è Jesús yeru ba, le nadaj lè'e guí'a guiõj, ate' lu ba na', cuntun nu nagú'iguequinè'. ⁵⁴ Dza na' naca dza tu'p'è'è que dza lá'ayi quégaquié' bõnni' judío, tu' si' idxín dza na'.

⁵⁵ Yõjácanu ca' ni' nigula na' gula'zá'lennu Jesús, cate' ni' gudé' luyú Galilea, ate' bila'lé'enu yeru ba na', en ca na guca, gula'gu'è Lè' ni'. ⁵⁶ Cate' yõjhuõjgacanu yu'u, bulu'pá'anu nõri rilá' zxixi, en yugu' le za rilá' zxixi. Ní'irõ bulu'zì' ládxi'gacanu dza lá'ayi na' quégaquié' bõnni' judío ca na' rinná bè' xibá queé' Dios.

24

Rubanè' Jesús lu yõl-la' guti

(Mt. 28:1-10; Mr. 16:1-8; Jn. 20:1-10)

¹ Cate' bidxín dza risí lo ia'gadxi dza na', cate' ni' naca zílado', bila'dxinnu nigula na' ra' yeru ba queé' Jesús. Nuá'gacanu yugu' le rilá' zxixi, lè na' chinupá'agacanu, ate' dzágagacanu légacanu ia'bál-lanu nigula. ² Cate' bila'dxinnu ni', bila'lé'enu chinadúa guiõj na' gudá' ga nu riyaza yeru ba queé'. ³ Cate' gula'yázanu yeru ba na', biti' bulu'dzõlinu zoa Xanru' Jesús ni'. ⁴ Cate' ni' ta'bõ'õnu bõniga ni'a que lè ni, chopè' bõnni' nácugaquié' lari' rëpi yõsa bení' la' bila'dxintè' ni', en gula'zuiné' ga na' nacua'anu. ⁵ Ní'irõ guládxinu, en bulu'zõtaj ícagacanu, tu'yunu lu yu, ate' chopè' gubáz lá'ayi na' tè' légacanu, ta'nnè'.

—¿Bizx que ruguílajli' nu zoa nabán xilataj nu nati? ⁶ Biti' zoè' ni, tu' chibubanè'. Guli'tsõjnè lè na' chigudxi cazè' libí'ili' cate' ni' zoè' luyú Galilea. ⁷ Gunnè': "Run bayudxi nu udõdi neda', Bõnni' Guljè' Bõnachi, lu ná'agaquié' bõnni' dul-la', ate' ulu'dé'è neda' lè'e yaga cruz, ate' ubana' cate' gaca tsonna dza."

⁸ Ní'irõ yõjnégacanu didza' na' bè'è Jesús, ⁹ ate' bulu'zá'anu ra' yeru ba na', yõjtixjõ'iguequinu iõxinéajtè' bõnni' gubáz queé' Cristo, en ia'zica'rè' ca', ca naca lè na' guca. ¹⁰ Nigula na' yõjtixjõ'iguequinu bõnni' gubáz na' yugu' lè ni, nácagacanu María Magdalena, en Juana, en María, xinè'è Jacobo, en ia'bál-lanu nigula na' dzágagacanu légacanu. ¹¹ Guléquinè' bõnni' gubáz na' tu'ínu didza' chixi, en biti' gula'yéajlè'è légacanu.

¹² Ní'irõ guyasè' Pedro, en carelõ sa'yéajè' ra' yeru ba na'. Cate' buyúé' lu ba na', bilé'ené' yugu' lári'sõ nacua' ni', ate' ní'irõ bõajè' lidxè', rubánniè' ca naca lè na' guca.

Le guca la' nõza ridxintè Emaús

(Mr. 16:12-13)

¹³ La' dza na' asõ sõjáquié' chopè', yú'ugaquié' nõza le ridxintè Emaús, le rø'õ ca chopa hora rizá'aru' Jerusalén. ¹⁴ Yú'ugacasè' ca' nõza, tu'è didza' ca naca yúgu'tè lè na' guca. ¹⁵ Tsanni ni' yú'ugaquié' nõza, tu'è didza' la' légacasè', gubígui'è gala' Lè' cazè' Jesús, ate' gudálenè' légaquié' tsõzxõn. ¹⁶ Biti' bulu'únbè'è Lè' tu' naca ca tu le nabaga' guiõj lógaquié'. ¹⁷ Ní'irõ Jesús gunábinè' légaquié', rnnè':

—¿Bizxi didza' na' ru'íli' la' libí'isili' yú'uli' nõza? ¿Bizx que na' ruhu'ínili'?

¹⁸ Bubi'è didza' bõnni' na' lè' Cleofas, rè' Lè':

—¿Nácatsõ' bõnni' zì'tu' lu yõdzõ Jerusalén, en tuzu' lí' biti' nõzinu' lè na' guca néaje nasi ni'?

¹⁹ Ní'irõ Jesús rè' légaquié':

—¿Bizxi na' guca?

Tè' Lè':

—Lè na' guca queé' Jesús, bõnni' Nazaret. Gúquié' bõnni' bè'è didza' uláz queé' Dios, ate' len yõl-la' huáca zxõn bené' dxin, en bè'è didza' lahué' Dios, en lógaca yúgu'tè bõnachi. ²⁰ Yugu' bixúz unná bè', len bõnni' ta'nná bé'ené' netu' bulu'dõdè' Lè', en gulunè' ga nu guchugu queé' gátié', ate' bulu'dé'è Lè' lè'e yaga cruz. ²¹ Netu' bentu' lõza gúquié' Lè' bõnni' na' ral-la' huóá'uè' bõnachi Israel, pero na'a chiguca tsonna dza cate' gulaca lè ni. ²² Ia'stú, bál-lanu nigula núsagacanu netu' gulunnu ga gurõ'õtu' bõniga. Yõjácanu ra' yeru ba queé' cate' si' gulén gubidza na' a dza, ²³ en cate' biti' bulu'dzõlinu Lè', buduhuõjgacanu, en gulènu netu' bila'lé'enu yugu' gubáz lá'ayi queé' Dios, nupa ni' gulé' légacanu zoè' nabané' Jesús. ²⁴ Ní'irõ bal-lè' bõnni' luzá'atu' yõjáquié' ra' yeru ba na', en bila'lé'ené' naca ca na' gula'nnanu nigula na', pero biti' bila'lé'ené' Jesús.

²⁵ Ní'irò Jesús gudxè' légaquiè':

—Libi'ili', bõnni' biti' réajni'ininè'. Nazidi icja lãdxi'do'oli' para cabí tséajlè'èli' yúgu'tè le gula'nnè' bõnni' gulu'è didza' uláz queè' Dios. ²⁶ ¿Naru' cabí ben bayudxi qui'i sáquè'è Cristo yugu' lè ni, en tsáziè' ga ni' tsèpisètèrè'?

²⁷ Ní'irò gusí lahuè' Jesús riguixjõi'inè' légaquiè' yúgu'tè le ru'i didza' ca naca queè' le nazúajaca lu guichi lá'ayi, ca na' gusí lo bè'è didza' Moisés ga bidxintè' yugu' le gula'nnè' yúgu'tè bõnni' gulu'è didza' uláz queè' Dios.

²⁸ Cate' bila'dxinè' yòdzòdo' ga na' sòjãquiè', benè' Jesús ca tu bõnni' zéajtèrè' zì'tu'. ²⁹ Gulunè' bayudxi ugá'analènè' légaquiè', ta'nnè':

—Bugá'analènè' netu', tu' chiridzò' na'a, en chizóa gal-la.

Ní'irò guyáziè' Jesús yu'u, en bugá'analènè' légaquiè'. ³⁰ Cate' ni' Jesús rø'è rágulenè' légaquiè', gudélè'è yòta xtila, en gudxè' Dios: "Xclenu'." Ní'irò buzzuxzjè' le, en bè'è quéegaquiè'. ³¹ La' ní'sò bidúa lè na' gubaga' guió'jogaquiè', atè' bulu'únbè'è Jesús, atè' Lè' buniti cuinè' lógaquiè'. ³² Ní'irò gulè' luzè'è tuè' ia'tué':

—¿Naru' cabí bõála'tica' lãdxi'do'oru' tsanni ni' ru'ilènè' rø'u didza' la' nõza, en cate' ni' ruchila lá'aniè' le nazúaj lu guichi lá'ayi?

³³ La' ní'sò gula'zuinè' yõjhuó'jogaquiè' Jerusalén, atè' yõjxáca'gaquiè' nudúbigaquiè' idx-inéajtè' bõnni' gubáz queè' Jesús, en nupa nacuá'len légaquiè'. ³⁴ Ní'irò yugu' bõnni' na' nacu'è ni' gulè' chopè' na':

—Chibubán cazè' Xanru', en buluf'i lahuè', atè' bilé'enè' Simón Lè'.

³⁵ Ní'irò chopè' na' gula'guixjò'è ca na' guca quéegaquiè' la' nõza, en ca na' bulu'únbè'è Jesús cate' ni' buzzuxzjè' yòta xtila na'.

Bõnni' usèda queè' Jesús tu'lé'enè' Lè'

(Mt. 28:16-20; Mr. 16:14-18; Jn. 20:19-23)

³⁶ Tsanni ni' tu'è didza' ca nácagaca lè ni, la' yõjsóatè' Jesús gatsaj lãhui'lò ga na' nacu'è, atè' rø' légaquiè':

—Gulí'sóa dxi lãdxi'li'.

³⁷ Ní'irò guladxi gula'dzõbinè' tu' téquinè' bixín ta'lé'enè'. ³⁸ Jesús rø' légaquiè':

—¿Bixz que rø'oli' bõniga? ¿Bixz que rizá' lãdxi'li' yugu' lè ni? ³⁹ Buli'yútsõca' na'a, en ni'a. Neda' caz ni. Gulí'cán neda', en buli'yú neda', tu' cabí da' bixín bèla', en biti' yu'u dxita ca ni rilé'eli' naca quia' neda'.

⁴⁰ Ni' ru'isè' ca' didza' ni, bulu'inè' légaquiè' nè'è, en ni'è. ⁴¹ Tu' tu'dzéjaguequinè' biti' gula'yéajlè'è, en gula'bõ'è baniga. Que lè ni na' Jesús gudxè' légaquiè':

—¿Dè queèli' ni le gahua'?

⁴² Ní'irò bulu'nòdzjè' queè' láti'do'oba' bõla chinégui'ba', en tu quízxi'ba' buz. ⁴³ Guzxi'è Jesús le, en gudahuè' lógaquiè'. ⁴⁴ Ní'irò rø' légaquiè':

—Yúgu' lè na' gulaca quia' gulaca ca na' gudxi caza' lib'i'li' cate' ni' zóalena' lib'i'li', gunnía': Run bayudxi gaca yúgu'tè le nazúaj lu guichi lu xibá queè' Moisés, en le gula'nnè' bõnni' gulu'è didza' uláz queè' Dios, en le nazúaj lu guichi nazí'le le Yugu' Salmo, ca ral-la' gaca quia' neda'.

⁴⁵ Ní'irò buzéajni'inè' légaquiè' lè na' nazúajgaca lu guichi lá'ayi. ⁴⁶ Rø' légaquiè':

—Caní nazúaj lu guichi ca run bayudxi gaca queè' Cristo, qui'i sáquè'è, en ubanè' lu yøl-la' guti cate' gaca tsonna dza, ⁴⁷ atè' idútè yòdzõlió ral-la' gaca libán ca naca quia' neda' para ulu'b'i' lãdxi'gaca bõnachi para uniti lahuè' Dios dul-la' nabága'gaquiè'. Lu yòdzò Jerusalén isí lo gaca libán na' ⁴⁸ atè' lib'i' cázali' na' bilé'eli' yugu' lè ni ral-la' gunli' ba nalí que. ⁴⁹ Buli'yútsõca', isól-la'a queèli' le guzxi' lu nè'è Xuza' gunnè' queèli', pero buli'gá'anasò Jerusalén cate' idxinrò queèli' yøl-la' huáca na' za' yehua' yubá.

Ruhuèpè' Jesús yehua' yubá

(Mr. 16:19-20)

⁵⁰ Ní'irò Jesús guchè'è yugu' bõnni' dá'gaquiè' Lè', sòjãquiè' yòdzò Betania, atè' ni' guchisa nè'è, en bulidza tsáhuè'è légaquiè'. ⁵¹ Tsanni ni' rulidza tsáhu'i'sè' ca' légaquiè', buzá'atè' ga na' nacu'è, buèpè' yehua' yubá. ⁵² Gudòdi gula'yéaj lãdxi'gaquiè' Lè', lu yøl-la' rudzeja quéegaquiè' yõjhuó'jogaquiè' Jerusalén. ⁵³ Gula'cuá'tica'sè' chila yudo', ta'gu'è Dios yøl-la' ba, en tun zxõnè' Lè'. ¡Ca' naca!

DIDZA' DXI'A BUZÚAJË' JUAN

Bönni' na' nazí' i lë' Didza' gúlajë' bönachi

¹ Cate' gusi lo, zí'atëlö cate' si' gata' yödžöliö, ni' zoa cazë' Bönni' lë' Didza', ate' Bönni' na' náquië' Didza' zóalenë' Dios, ate' Didza' na' naca caz Dios. ² Bönni' na' náquië' Didza' zóalenë' Dios cate' ni' gusi lo si' rata' yödžöliö. ³ Lu në'ë Bönni' ni, Dios benë' yúgu'të le dë, en bití' bi dë le nunë' Dios le cabí benë' lu në'ë Bönni' na'. ⁴ Dë caz queë' yöl-la' na'bán, ate' yöl-la' na'bán na' naca ca tu bení' le ruzeni' lu icja lãdxi'do'gaca bönachi. ⁵ Ruzeni' bení' na' ga naca chul-la que dul-la', pero bití' ca' sequí' le chul-la na' usulu bení' na'.

⁶ Dios gusöl-lë'ë ni tu bönni' lë' Juan. ⁷ Bidë' bönni' ni para gáquië' nu gun ba nali. Bidë' para gunë' ba nali queë' Bönni' na' náquië' bení', para tséjlë'gaca yúgu'të bönachi Dios ni'a que lë na' runë' ba nali. ⁸ Bití' náquië' Juan bení' na', pero bidë' para gunë' ba nali queë' Bönni' na' náquië' bení'. ⁹ Bönni' na' náquië' bení' le naca idú ni' razíë' yödžöliö ni, ate' ruzeni'ë lu icja lãdxi'do'gaca yúgu'të bönachi.

¹⁰ Bönni' na' náquië' bení' bidxinë' yödžöliö ni, ate' lu në'ë Lë' Dios benë' yödžöliö ni, pero bönachi yödžöliö bití' bulu'ünbë'ë Lë'. ¹¹ Bidxinë' ga nequi queë', pero bití' ca' gula'zí' lu ná'agaquië' Lë' bönni' nabábalenë'. ¹² Yúgu'të bönni' gula'zí' lu ná'agaquië' Lë', bönni' ni' gula'yéajlë'ë Jesús, Lë' benë' ga dë lu ná'agaquië' ilácagaquië' zxi'inë' Dios. ¹³ Bönni' ni ná'agaquië' zxi'inë' Dios, calëga tu' ná'agaquië' zxi'inë' nu bönni', en calëga tu' ná'lajgaquië' ni'a que le rizë lãdxi'ë nu bönni', o ni'a que tu le rë'ënë' nu bönni', pero ná'agaquië' caní tu' naca le rë'ëni quézinë' Dios.

¹⁴ Bönni' na' náquië' Didza' guljë' bönachi, en tu chí'isö guzóalenë' rë'u, idú dzágagaca Lë' le ruzá' lãdxi'ë Dios queëru', en le naca idútë li. Bilé'etu' yöl-la' zxon queë', ate' yöl-la' zxon queë' na' naca le ruí' queëbi' bi' i la's dui que, Nu na' naca Xúzibi'. ¹⁵ Juan na' benë' ba nali queë' Bönni' na', en bë'ë zidzaj didza', rnnë':

—Bönni' ni náquië' Nu na' gudíxjö'a que, gunniá': Bönni' si' zá'tëlë' ca neda' nayëpisëtërë' ca neda', tu' zoa cazë' Lë' zí'alö ca neda'.

¹⁶ Le naca idú queë' buzí'iru' xibë yúgu'tëru', lë na' buzá' lãdxi'ë queëru' Dios, en zíanrö ca' le ruzá' lãdxi'ë queëru'. ¹⁷ Bidxin queëru' xibá queë' Dios lu në'ë Moisés, pero le ruzá' lãdxi'ë queëru' Dios, en le naca idútë li bila'dxin queëru' lu në'ë Jesucristo. ¹⁸ Catu caz nu bilé'ë Dios, pero Lë', la's dui Zxi'inë' Dios, Bönni' na' nadxi'ide'enë' Dios Xuz, Bönni' ni na' benë' ga núnbë'ëru'-në' Dios.

Le benë' ba nali Juan, bönni' buquilé' bönachi nisa, ca náquië' Jesús

(Mt. 3:1-12; Mr. 1:7-8; Lc. 3:1-17)

¹⁹ Lë ni naca le benë' ba nali Juan, cate' ni' bönni' judío unná bë' nacu'ë Jerusalén gula'söl-lë'ë yugu' bixúz, en bönni' nabábagaquië' Leví, nupa ni ná'agaca ni'a ná'agaquië' bixúz, para ila'nábinë' Juan na', ila'nnë':

—¿Nuzxi bönni' li'?

²⁰ Yálajdo' bë'ë didza' Juan, en bití' gudá'baguië', pero gudíxjö'ë catëz naca, rnnë':

—Bití' naca' Cristo, Bönni' na' guzxi' lu në'ë Dios isöl-lë'ë queëru'.

²¹ Ní'irö gula'nábinë' lë' leyúbólö, të' lë':

—¿Nuzxi caz li'? ¿Naru' nacu' li' Elías, bönni' bë'ë didza' uláz queë' Dios dza ni'të?

Gunnë' Juan:

—Bití' naca'.

Ní'irö të' lë':

—¿Naru' nacu' li' bönni' na' ral-la' guidë' gu'ë didza' uláz queë' Dios?

Bubi'ë didza' Juan, rnnë':

—Calëga neda'.

²² Ní'irö të' lë':

—¿Nuzxi caz nacu'? Gudíxjö'i netu' para gaca usiyöntu' nupa gula'söl-la' netu'. ¿Bizxi rnnö' li' nuzxi nacu'?

²³ Bubi'ë didza' Juan, rë' légaquië':

—Neda' naca' bönni' na', nazúaj lu guichi lá'ayi ca naca queë', ranna: Riyón chí' i nu rulidza lu lataj cá'asó, ranna: Bulí'béaj li nōza para idxin Xanru' queëli'. Caní gunnë' Isaías, bönni' na' bë'ë didza' uláz queë' Dios.

²⁴ Yugu' bönni' ni ná'agaquië' bönni' yudo' fariseo nasöl-la'gaquië' bönni' judío unná bë'.

²⁵ Gula'nábinë' Juan, të' lë':

—¿Bizx que ruquilu' bönachi nisa channö cabí nacu' li' Cristo, en bití' nacu' Elías, en calëga bönni' na' ral-la' guidë' gu'ë didza' uláz queë' Dios?

²⁶ Bubi'ë didza' Juan na, rë' légaquië':

—Neda' ruquila' bönachi nisa lu nisa, pero gatsaj láhuil'lo ga zóali' zoë' tu bönni' biti' núnbë'ëli-në'. ²⁷ Bönni' ni náquië' Bönni' na' si' zá'télë' ca neda', en nayëpisëtëré' ca neda', ate' biti' naca' neda' lesaca' ulejca' xiráchuë' nudë'ë.

²⁸ Yúgu'të lë ni guca lu xiyú yódzö Betábara, ga naca ia'tsólá'a yegu Jordán, zaca' ga rilén gubidza, ga ni' buquilë' Juan bönachi nisa.

Jesús náquië' ca bö'cu' xzila'do' tutië'-ba' lahuë' Dios tu' nözi dul-la'

²⁹ Dza buropi ni' Juan bilé'enë' Jesús, zë'ë ga zoë', ate' rnnë':

—Buli'yútsöca'. Bönni' ni náquië' bö'cu' xzila'do' queë' Dios, gatië' para ugúë' dul-la' nabága'gaca bönachi yódzölió. ³⁰ Lë' náquië' bönni' na' gunniá' queë': "Si' zá'télë' ca neda' tu bönni', nayëpisëtëré' ca neda', tu' zoa cazë' zí'aló ca neda'." ³¹ Neda' biti' bënbe'a-në' zí'aló, pero bida', ruquila' bönachi nisa para ilúnbë'e bönachi Israel Lë'.

³² Benë' ba nalí Juan ca naca queë' Jesús, rnnë':

—Bilé'eda'-në' Dios Bó' Lá'ayi, bôtjé' birúajé' yehua' yubá, gunë'ë ca riná'aba' gu'dódo', ate' bidxinë' ga zoë' Jesús, en bugá'analenë' Lë'. ³³ Biti' bënbe'eda' Lë' zí'aló. Gudxi neda' Nu na' gusól-la' neda' para uquila' bönachi nisa, gunnë': "Cate' ilé'enu-në' huôtjé' Dios Bó' Lá'ayi, tsösóalenë' Bönni' na', en ugá'analenë' Lë', Bönni' ni gunë' le rulu'isö yól-la' ridila nisa ni, uchízíë' bönachi Dios Bó' Lá'ayi." ³⁴ Na'a, chibilé'eda' lë na', en runa' ba nalí queë' Bönni' ni, náquië' Zxí'inë' Dios.

Yugu' bönni' uséda zí'aló queë' Jesús

³⁵ Ia'tú dza ca', leyúbölö zoë' Juan ni', ate' nacua'lenë' lë' chopë' bönni' dá'gaquië' lë'. ³⁶ Cate' Juan na' bilé'enë' Jesús, ridödë' ni', ní'irö gudxë' bönni' na' dá'gaquië' lë', rnnë':

—Buli'yútsöca'. Ni' zoë' bönni' na' náquië' bö'cu' xzila'do' queë' Dios, gatië' uláz quegaca bönachi dul-la'.

³⁷ Chopë' bönni' na' dá'gaquië' Juan bila'yönnë' didza' ni bë'ë lë', ate' yöjnéhoquië' Jesús.

³⁸ Ní'irö buécjé' Jesús, en buyúë' chopë' ni sójnéhoquië' Lë', ate' rë' légaquië':

—¿Bizxi riguñjali'?

Të' Lë':

—Bönni' Usedi, ¿gazxi zu'?

³⁹ Bubi'ë didza' Jesús, rë' légaquië':

—Gulí'dá, uyulí'.

Ní'irö yójacalenë' Lë', en bila'lé'enë' ga na' zoë', ate' bulu'gá'analenë' Lë' dza na', tu' chizá' ral-la.

⁴⁰ Andrés, bóchë'ë Simón Pedro, náquië' tuë' bönni' chopë' ni' bila'yönnë' didza' bë'ë Juan, en yöjnéhoquië' Jesús. ⁴¹ Andrés na', zí'aló yöjdiljé' bönni' bóchë'ë, lë' Simón, ate' rë' lë':

—Chibidzölitu'-në' Mesias.

Mesías naca tu didza' hebreo le rnna lu didza' griego: Cristo, ate' lu didza' xidza': Bönni' nasól-lë'ë Dios.

⁴² Ní'irö Andrés na' la' guchë'të' Simón ga na' zoë' Jesús. Cate' Jesús bilé'enë' lë', rë' lë':

—Lí' nacu' Simón, zxi'inë' Jonás. Na'a, si' lo' Cefas.

Cefas naca ca' tu didza' hebreo le rnna: Pedro, lu didza' xtíla, ate' lu didza' xidza': Guiöj.

Jesús rulidzë' Felipe, en Natanael

⁴³ Cate' za' rení' ia'tú dza, gu'unnë' Jesús tsejé' luyú Galilea, ate' yöjxáquië' Felipe, en rë' lë':

—Gudá' neda'.

⁴⁴ Náquië' Felipe bönni' yódzö Betsaida, le naca lázagaquië' Andrés, en Pedro. ⁴⁵ Felipe budzölinë' Natanael, en rë' lë':

—Chibidzölitu'-në' bönni' na' buzúajé' Moisés ca naca queë' lu guichi lu xibá queë' Dios, ate' bulu'zúajé' ca' ca naca queë' bönni' gulu'ë didza' uláz queë' Dios. Bönni' ni Jesús, zxi'inë' José, bönni' yódzö Nazaret.

⁴⁶ Natanael rë' lë':

—¿Naru' huala'tsö Nazaret tu le naca dxi'a'?

Felipe rë' lë':

—Gudá uyú'.

⁴⁷ Cate' bilé'enë' Jesús zë'ë Natanael na' ga zoë', rnnë':

—Buli'yú ni tu bönni' náquië' idú bönni' Israel, en biti' rnnasë' ca' bönni' ni.

⁴⁸ Ní'irö Natanael gunábinë' Jesús, rë' Lë':

—¿Naru' núnbë'tso' neda'?

Bubi'ë didza' Jesús, rë' lë':

—Cate' si' ulidzatë'é' Felipe lí', cate' ni' zu' zxan yaga higo, bilé'eda' lí'.

⁴⁹ Ní'irò bubí'è didza' Natanael, rë' Lë':

—Bönni' Usedi, Li' nacu' Zxi'inë' Dios. Li' nacu' Nu inná be'e bönachi Israel.

⁵⁰ Bubi'è didza' Jesús, rë' lë':

—¿Réajlë'tso' tu' gudxa' li': Bilé'eda' li' zxan yaga higo? Yugu' le zxöntë'rö ca lë ni hualé'enu'.

⁵¹ Lësca' caní rë' Jesús légaquië', rnnë':

—Le nácatë rea' libí'ili', ilé'eli' nayalaj lúzxiba, en ta'benë', en tu'huötjë' gubáz lá'ayi queë' Dios ga zoa' neda', Bönni' Guljë' Bönachi.

2

Laní que yöl-la' rutsaga na' le guca lu yödzö Caná

¹ Cate' chiguca tsonna dza, guca laní que yöl-la' rutsaga na' lu yödzö Caná luyú Galilea, ate' zóanu xinë'ë Jesús ni'. ² Lësca' zoa nu bulidza Jesús, en yugu' bönni' usëda queë' dijáquië' laní na'. ³ Cate' biyadzaj xisi uva ilé'ajë', ní'irö xinë'ë Jesús gúdxinu Lë', rnnanu:

—Biti'rö dë xisi uva ilé'ajë'.

⁴ Bubi'è didza' Jesús, rë'ë-nu:

—Nígúlado'. ¿Bizx que rulidzu' neda'? Biti' ca' ridxini dza ulu'a lahui yöl-la' huáca quia'.

⁵ Ní'irö xinë'ë Jesús gúdxinu bönni' huen dxin ta'gu'ë le tahuë', rnnanu:

—Guli'gún yúgu'të le guíë' libí'ili'.

⁶ Nacu' ní' xopa yusu' guiöj tu'gunë' dxin bönni' judío cate' tu'pá'a cúngaquië' ca nalébiguequinë' tunë', en rúdzugaca chopa tsonna rö'ö nisa tu tu yusu' na'. ⁷ Jesús gudxë' yugu' bönni' huen dxin na', rnnë':

—Buli'li' yugu' yusu' ni nisa.

Bulu'lë' yugu' yusu' na' nisa. ⁸ Ní'irö Jesús rë' légaquië':

—Guli'gachi' na'a, en guli'tsöjuá' lahuë' bönni' zoë' ra' yusu'.

Yöjuá'gaquië' na'. ⁹ Buyüë' bönni' na' zoë' ra' yusu' channö nazxí'i nisa na' nuhuóaca xisi uva, pero bití' réquibe'enë' gazzi za'. Nöziguequinë' bönni' huen dxin na' guláchë'ë nisa na'. Ní'irö bönni' na' zoë' ra' yusu' bulidzë' bönni' rutsaga në'ë, ¹⁰ en rë' lë':

—Zí'alö tu'nödzejë' yúgu'të bönni' xisi uva nácarö sizxí'i, en cate' chigulé'ajë' yenni', ní'irö tu'nödzejë' le cabí nazxí'i. Li', ga bidxintë na'a ben chi'u xisi uva nácarö sizxí'i.

¹¹ Yöl-la' huáca naca bë' ni benë' Jesús lu yödzö Caná luyú Galilea naca le risí lo yugu' yöl-la' huáca gunë'. Caní guca, bulu'e lahui yöl-la' zxon queë', ate' gula'yéajlë'ë Lë' bönni' usëda queë'.

¹² Gudödi na' guyijë' Jesús yödzö Capernaum, ate' dzágagaquië' xinë'ë, en yugu' bönni' böchë'ë, en yugu' bönni' usëda queë' Lë', ate' zían dza gula'cu'ë Capernaum na'.

Rulatjë' Jesús lö'a yudo', rubéajë' nupa tun le cabí ral-la' ilún ni'

(Mt. 21:12-13; Mr. 11:15-18; Lc. 19:45-46)

¹³ Cate' chizóa idxín Laní Pascua cate' tu'subanë' bönni' judío ca benë' Dios, ca na' bubéajë' xuz xtó'ogaquië' luyú Egipto, guyijë' Jesús yödzö Jerusalén. ¹⁴ Lu yödzö na' yöjxáquië' Jesús nacu'ë bönni' lö'a yudo' ga na' túti'ë-ba' yugu' bédxi, en yugu' bö'cu' zxila', en yugu' gu'dódo', böa' bédxi na' tútigaquië'-ba' lahuë' Dios. Rö'ögaquië' ca' ni' bönni' tu'tsë'ë dumí za' iduté yödzölió. ¹⁵ Cate' bilé'enë' Jesús lë ni, buzalë' yugu' du lasi le quindë' bönachi na', ate' bulágui'ë yúgu'të' ní'ilö lö'a yudo', en bulágui'ë-ba' ca' ní'ilö yugu' bö'cu' zxila', en yugu' bédxi. Bësië' dumí quégaquië' bönni' na' tu'tsë'ë dumí lu yu, en burixë' yugu' blaga quégaquië'. ¹⁶ Ní'irö Jesús gudxë' bönni' na' túti'ë-ba' yugu' gu'dódo', rnnë':

—Guli'cúa yugu' lë ni. Biti' únili' lidxë' Xuza' tu yé'ëyi.

¹⁷ Ní'irö yöjnéguequinë' bönni' usëda queë' Jesús le nazúaj lu guichi lá'ayi, rnna: Tu' ruí'ida' ládxa'a lidxu', régui rilá ládxi'da' ahua'.

¹⁸ Ní'irö bulu'bi'ë didza' bönni' judío unná bë' nacu'ë ni', të' Jesús:

—¿Bizxi yöl-la' huáca ulu'ínu' netu' le gaca bë' dë lu no'o runu' yugu' lë ni?

¹⁹ Bubi'è didza' Jesús, rë' légaquië':

—Guli'quínaj yudo' ni, ate' tsonna dzasö uchisa' le.

²⁰ Ní'irö të' Lë' bönni' judío, ta'nnë':

—Idú xopa-un iz guya' yudo' ni, ate' Li', ¿tsonna dzasö uchísatso' le?

²¹ Yudo' na' bë'ë didza' que Jesús naca lá' cuin cazë'. ²² Que lë ni na', cate' bubanë' Jesús lu yöl-la' guti, yöjnéguequinë' bönni' usëda queë' Jesús ca na' gunnë', ate' gula'yéajlë'ë le nazúaj lu guichi lá'ayi, enca' yugu' didza' bë'ë Jesús.

Jesús núnbë'ë yúgu'të bönachi

²³ Cate' ni' zoë' Jesús Jerusalén, cate' raca Laní Pascua na', gula'yéajlë' bönachi zían Lë', tu' bila'lé'enë' yugu' yöl-la' huáca runë'. ²⁴ Biti' buzzöni ládxi'ë Jesús légaquië', tu' núnbë' cazë'

yúgu'te bönachi. ²⁵ Biti' naquinné' Jesús nu quíxjõ'i Lè' ca nácagaca bönachi, tu' nõz quéziné' Lè' le yu'u icja ládx'i'do'gaca bönachi.

3

Jesús, en Nicodemo

¹ Nicodemo, tu bönni' yudo' fariseo, nabábalené' yugu' bönni' judío unná bē'. ² Bidē' bönni' ni ga zoē' Jesús chí'i dzõ'ölö, en rē' Lè':

—Bönni' Usedi. Réquibe'etu' nasöl-lē'ē Dios Li' para usédinu' netu'. Biti' séqui'nē' tu bönni' gunē' yugu' yöl-la' huáca nácagaca bē' ca nácagaca le caní runu' Li' channõ cabí zóalenē' Dios lé'.

³ Bubi'ē didza' Jesús, rē' lē':

—Le nácatē rea' li', nu cabí galaj leyúbölö, biti' ca' ilé'e lataj ga ni' rinná bē'ē Dios.

⁴ Nicodemo gunábinē' Lè', rnnē':

—¿Nacxi caz séqui'nē' tu bönni' galjē' leyúbölö cate' chináquiē' bönni' gula? ¿Naru' huácatsõ tsu'ē leyúbölö lē'ēnu xinē'ē, ate' galjē' ia tú?

⁵ Bubi'ē didza' Jesús, rē' lē':

—Le nácatē rea' li'. Nu bönni' cabí galjē' ni'a que nisa, en ni'a queē' Dios Bõ' Lá'ayi, biti' gaca tsáziē' ga rinná bē'ē Dios. ⁶ Nu na' nalaj lu ni'a lu na' bönachi, bönáchisõ naca, pero nu nalaj ni'a queē' Dios Bõ' Lá'ayi, Bõ' Lá'ayi nabani nu na'. ⁷ Biti' ubánu' tu' rea' li', run bayudxi galju' leyúbölö. ⁸ Gátí'tēs recja bõ', ate' riyõnmu' rnnē' bõ' na', pero biti' nõzinu' gazxi za', o gazxi zeaj. Lē'sca' caní raca quégaca nupa náljagaca ni'a queē' Dios Bõ' Lá'ayi.

⁹ Ní'irõ Nicodemo gunábinē' Jesús, rnnē':

—¿Nacxi caz gaca lé ni'?

¹⁰ Bubi'ē didza' Jesús, rē' lē':

—¿Ruséditsenu' li' bönachi Israel, en biti' nõzinu' yugu' lē ni'? ¹¹ Le nácatē rea' li', le nõztu' ru'itu' didza' que, en le bilé'etu' runtu' ba nalí que, pero biti' rizi' lu ná'ali' lē na' runtu' ba nalí. ¹² Channõ cabí réajilē'ēli' neda' cate' ru'ílēna' libí'ili' didza' ca naca le raca yõdzõlió ni, ¿nacxi caz gaca tséajlē'ēli' channõ guía' libí'ili' le raca yehua' yubá?

¹³ 'Catu caz gurenē' nu bönni' yehua' yubá, pero tuza' neda', Bönni' Guljē' Bönachi, bõtja' birúaja' yehua' yubá, ate' zoa caza' ni' yehua' yubá. ¹⁴ Ca na' benē' Moisés lu lataj cá'asõ, buchisē'-ba' bēla néquiniba' guíē, budē'ē-ba' lē'e yaga, lē'sca' caní run bayudxi gaca quia' neda', Bönni' Guljē' Bönachi, ulu'chisē' neda' xitsá'. ¹⁵ Caní gaca quia', para cabí ila'niti yúgu'te nupa ila'yéajlē' neda', pero gata' quéguequi yöl-la' na'bán idú.

Dios nadxi'ide'enē' bönachi yõdzõlió

¹⁶ Tu' bidxi'ide'enē' Dios bönachi yõdzõlió, buzá' ládxē'ē quéguequi Xzi'inē' la' buduinē', para cabí ila'niti yúgu'te nupa ila'yéajlē' Lè', pero gata' yöl-la' na'bán idú quéguequi. ¹⁷ Dios gusöl-lē'ē Xzi'inē' yõdzõlió ni, calēga para ichúguiē' quégaca bönachi yõdzõlió ni gátigaca, pero para ulu'lágaca bönachi yõdzõlió ni ni'a queē' Lè'.

¹⁸ Nu bönni' réajlē'ē Xzi'inē' Dios, biti' ca' narugu queē' inítiē', pero bönni' na' biti' réajlē'ē Lè', chinarugu queē' gatiē', tu' cabí réajlē'ē Xzi'inē' Dios la' buduinē'. ¹⁹ Que lē ni na' chinarugu quégaca bönachi gátigaca, tu' bidxinē' Bönni' na' náquiē' bení' yõdzõlió ni, pero gulunrõ zxõn bönachi ni le naca chul-la que dul-la' ca gulunē' zxõn Bönni' na' náquiē' bení', tu' nácagaca xihui' le tunē'. ²⁰ Yúgu'te bönni' tu'ē dõ' biti' raza ládx'i'gaquiē' bení', en biti' ridigaquiē' lu bení', para cabí ilá' lahui le tunē'. ²¹ Nu run le naca idútē li ridxín lu bení' para gaca bē' núngaca ni'a queē' Dios le run nu na'.

Juan, bönni' ruquilē' bönachi nisa, ru'ē didza' ca naca queē' Jesús

²² Gudõdi na', Jesús guyéajlenē' bönni' dá'gaquiē' Lè', ate' bila'dxinē' luyú Judea, en guzóalenē' légaquiē' ni', ga na' tu'quilē' bönachi nisa. ²³ Lē'sca' ruquilē' Juan bönachi nisa ga nazí' le Enón, gala' ga dē yõdzõ Salim, tu' dē nisa zila lataj na', ate' ta'dxín bönachi ni', en ta'dila nisa. ²⁴ Raca caní zí'atēlõ cate' biti' idzunē' Juan na' lidxi guíē.

²⁵ Ní'irõ gula'silógaquiē' bal-lē' bönni' dá'gaquiē' Juan ta'díl-lalenē' yugu' bönni' judío didza' ca naca que yöl-la' ruchi'a cuini que yudo'. ²⁶ Bila'dxinē' ga zoē' Juan, en tē' lē':

—Bönni' usedi. Buyútsõca'. Bönni' na' guzóalenē' li' ia'tsólá'a yegu Jordán, bönni' na' benu' ba nalí queē', ruquilē' bönachi nisa, ate' ta'dxín yúgu'te bönachi ga zoē'.

²⁷ Ní'irõ bubí'ē didza' Juan, rē' légaquiē':

—Biti' bi dē lu nē'ē nu bönni', channõ cabí nudödē' Dios le lu nē'ē. ²⁸ Biyõn quézili' lē na' bena' ba nalí, gunniá': "Biti' naca' neda' Cristo", pero Dios nasöl-lē'ē neda' para guía' bönachi si' zē'ē Lè'. ²⁹ Bönni' na' rizi'ē-bi' bi'i nigula rutsaga ná'abi' náquiē' bönni' rutsaga nē'ē, pero bõchi' luzē'ē bönni' rutsaga nē'ē, en dzáguiē' lē', ruzē' náguiē' didza' ru'ē, en rudzéjanē' tu' riyõnnē' didza' ru'ē bönni' rutsaga nē'ē. Lē'sca' caní, rudzéjade'eda' neda' tu' raca lē ni caní. ³⁰ Run bayudxi gácarē' zxõn Cristo, pero neda', run bayudxi gácara' cuidí' sõ.

Nu za' zaca' yehua' yubálö

³¹ Gunnë' ca' Juan:

—Bönni' na' zë'ë zaca' xitsá' alö nayëpisëtërë' ca yúgu'të bönachi. Nu bönni' náquië' bönachi yödžölió ni, que yödžölió ni náquië', en ru'ë didza' que le raca yödžölió ni, pero Bönni' na' zë'ë zaca' yehua' yubálö nácaterë' lo ca yúgu'të bönachi. ³² Bönni' na' runë' ba nali que le bilë'enë', en le biyönnë', pero cuntú nu rizí' lu në'e le runë' ba nali. ³³ Núti'tës bönni' rizí' lu në'ë le na' runë' ba nali, bönni' ni rulu'ë lahui réajlë'ë naca idútë li didza' ru'ë Dios. ³⁴ Bönni' na' nasól-lë'ë Dios, didza' queë' Dios ru'ë, tu' nuzóadërë' Dios Bó' Lá'ayi queë' lu Bönni' na'. ³⁵ Dios Xuz nadxi'inë' Zxí'inë', ate' yúgu'të le dë chinudödë' lu në'ë Zxí'inë' na'. ³⁶ Nu bönni' réajlë'ë Dios Zxí'ini, dë yöl-la' na'bán idú queë', pero bönni' na' biti' réajlë'ë Dios Zxí'ini, biti' idéli'në' yöl-la' na'bán na', pero nabáguë'ë xíguia' lahuë' Dios.

4

Jesús ru'ilenë'-nu didza' tu nigula Samaria

¹ Bila'yönnë' bönni' yudo' fariseo ca na' dá'gaca Juan, ate' ruquilë' ca' nisa zianró bönachi ca ruquilë' nisa Juan. ² Calëga Jesús caz ruquilë' bönachi nisa, pero bönni' usëda queë' tu'quilë' bönachi nisa. ³ Cate' gúquibe'enë' Jesús lë ni, buzë'ë luyú Judea, ate' sa'yéajë' leyúbölö luyú Galilea.

⁴ Ga ni' sa'yéajë', run bayudxi tödë' luyú Samaria. ⁵ Caní guca, bidxinë' Jesús tu yödžödo' luyú Samaria, nazí'i le Sicar, gala' ga dë yu na' bunödžjë' Jacob queë'bi' José, zxi'inë' Jacob na', dza ni'te. ⁶ Lataj na' zoa tu yeru nisa nachó'onë' Jacobo na' ga rë'. Cate' bidxinë' Jesús ni', guró'ë ra' yeru nisa na' tu' yöjéqui'në' yu'ë nöza. Guca idú huagubidza. ⁷ Ní'irö bidxinnu tu nigula Samaria ni' para sí'inu nisa. Jesús rë'ë-nu:

—Benna le gu'ja'.

⁸ Tuzë' zoë' Jesús tu' chisójáquië' bönni' usëda queë' lu yödžö söjxi'gaquië' le ilahuë'. ⁹ Ní'irö nigula Samaria na' rënu Jesús, rnanu:

—¿Rinábítsenu' neda' le gu'ju', en nacu' bönni' judío? Neda' ni naca' nigula Samaria.

Caní gunnánu tu' cabí ta'dzaga dxi'a bönachi Samaria len bönachi judío.

¹⁰ Bubi'ë didza' Jesús, rë'ë-nu:

—La'tu' núnbë'u le runödžjë' Dios, en Nuzxi na' rë li': "Benna le gu'ja'", li' inabu', ate' Lë' gunnë' quiu' nisa runna yöl-la' na'bán.

¹¹ Ní'irö nigula na' rënu Lë', rnanu:

—Bönni', biti' nu'u le cuéaju' nisa, ate' yeru nisa ni, dxi'tërö rö. ¿Gazxi dë nisa na' runna yöl-la' na'bán? ¹² ¿Naru' nácaterötso' Li' zxon ca xúziru' gudödi Jacob, bönni' ni' bennë' queë'tu' yeru nisa ni, ga ni guzxi'ë nisa gu'ë, en gulë'ajbi' ca' zxi'inë', en gulë'ajba' ca' böa' bëdxi queë'?

¹³ Bubi'ë didza' Jesús, rë'ë-nu:

—Núti'tës nu gu'aj nisa ni, leyúbölö ubidxi nisa, ¹⁴ pero nu gu'aj nisa na' unödžja' neda', biti'rö ubidxi icja ládxi'da'ahuë', tu' unödžja' queë' nisa na' gaca lu icja ládxi'da'ahuë' ca tu ga ralaj nisa, le gü'i yöl-la' na'bán idú queë'.

¹⁵ Ní'irö nigula na' rënu Lë', rnanu:

—Bönni', benna quia' nisa na', para cabirö ubidxa', en cabirö uduzxi'a nisa ni.

¹⁶ Jesús rë'ë-nu:

—Guyéaj, yöjlidzë' bönni' quiu', ate' huödu' ni.

¹⁷ Bubi'inu didza' nigula na', rënu Lë':

—Cuntu nu zoa bönni' quia'.

Ní'irö Jesús rë'ë-nu:

—Ca nácaterë' rno': "Cuntu nu zoa bönni' quia'", ¹⁸ tu' chiguzóalenu' gayu' bönni', ate' bönni' na' zóalenu'-në' na'a, biti' náquië' bönni' quiu'. Didza' ni ru'u, ca nácaterë' rno'.

¹⁹ Ní'irö nigula na' rënu Lë', rnanu:

—Bönni', runi neda' nacu' bönni' ru'ë didza' uláz queë' Dios. ²⁰ Xuz xtó'oru' guléquinë' Dios le bach lu gu'a ni, pero rnnali' libí'ili' Jerusalén naca ga ral-la' ilequi bönachi Dios le bach.

²¹ Jesús rë'ë-nu:

—Nigula, guyéajlë' neda'. Za' dza cate' tseaj ládxi'li'-në' Dios Xuz sal-la' biti' idisóali' gu'ado' ni, en biti' tsójsóali' Jerusalén. ²² Libí'ili' reaj ládxi'li' Nu biti' núnbë'ëli', pero netu' núnbë'ëtu' Nu na' reaj ládxi'tu', tu' benë' queë' Dios ilá' lahui yöl-la' rusólá ni'a quegaquië' bönni' judío. ²³ Na'a, za' dza, en chiridxin dza na', cate' nupa le nácaterë' ta'yéaj ládxi'gaca Dios, ila'yéaj ládxi'gaca Lë', zóalenë' Dios Bó' Lá'ayi léguequi, en le naca idútë li, tu' rë'enë' Dios Xuz ilácaagaquië' queë' bönni' ila'yéaj ládxi'gaquië' Lë' caní. ²⁴ Dios náquië' Bó', ate' nupa ta'yéaj ládxi'gaca Lë', run bayudxi ila'yéaj ládxi'gaca Lë', zóalenë' Dios Bó' Lá'ayi léguequi, en le naca idútë li.

²⁵ Ní'irò nigula na' rënu Lë', rnnanu:

—Nözda' ral-la' guidë' Mesías, Bönni' na' lë' Cristo. Cate' guidirë' Lë' quíxjöi'inë' rë'u yúgu'të.

²⁶ Jesús rë'ë-nu:

—Lë' cazë' ru'ilenë' li' didza'.

²⁷ La' ná asò bulu'dxinë' bönni' usëda queë' Jesús, ate' bulu'bábinë' tu' ru'ilenë'-nu nigula didza', pero biti' burúguinë' nitúë' inábinë' Lë', cabí innë': "¿Bizxi rinábinu' lënu?" o: "¿Bizxi didza' ru'ilenü'-nu?" ²⁸ Ní'irò nigula na' bucá'ananu xichó'önu ni', ate' bójaju la' yödzö, söjödxi nu nupa nacuá' ni', rnnanu:

²⁹ —¿Gulí'dá, ilé'eli'-në' tu bönni' gudxë' neda' yúgu'të le chinuna! ¿Naru' cabí nácatsë' Lë' Cristo?

³⁰ Ní'irò bila'rúaj bönachi yödzö na', en bila'dxin ga zoë' Jesús.

³¹ Tsanni ni' söhuóaju nígula na', bönni' usëda queë' Jesús gulunë' bayudxi, të' Lë':

—Bönni' Usedi, gudagu.

³² Jesús rë' légaquië':

—Dë tu le rahua', le cabí réquibe'eli'.

³³ Ní'irò gula'nabi luzá'agaquië' bönni' usëda queë' tuë' ia'túë', ta'nnë':

—¿Zoa nu chidiguá'tsö le gudahuë'?

³⁴ Ní'irò Jesús rë' légaquië':

—Le nabánida' naca guna' ca rë'ënë' Xuza' nasól-lë'ë neda', en údxu guna' xichinë'. ³⁵ Caní rnnali' libí'ili': "Ia'tapa beo' huadxín dza uláparu'." Neda' rea' libí'ili': Gulí'chisa loli' uyuli' bönachi nácgaca ca gapa nadúzgaca, le chinabídxigaca para tsójláparu'. ³⁶ Bönni' na' rulapë' rizi'ë laxjë', ate' lë na' rulapë' bönni' na', naca para gata' yöl-la' na' bán idú quégaca bönachi, para gaca ulu'dzeja tsöxón nu raza, en nu rulapa. ³⁷ Naca idútë li lë na' rna caní: Tu nu raza, ate' ia'tú nu rulapa. ³⁸ Neda' gusól-la' a libí'ili' tsójlápalí' ga biti' gúzali'. Gulún bönachi yúbööl dxin guláz, ate' libí'ili' ruzí'ili' xibé dxin na' núnqaquië'.

³⁹ Zían bönachi Samaria nacuá' yödzö Sicar na' gula'yéajlë'ë Jesús ni' a que xtídza' nu nigula na' bennu ba nalí' quë', gunnúnu: "Gudxë' neda' yúgu'të le chinuna." ⁴⁰ Cate' bila'dxinë' bönni' Samaria ga ni' zoë' Jesús, guláta'yuë' lahuë' ugá analenë' légaquië'. Jesús bugá'anë' ni' ia'chopa dza. ⁴¹ Caní guca, zióntërë' ca' bönni' ni' gula'yéajlë'ë Jesús ni' a que didza' bë'ë. ⁴² Ní'irò bönni' ni' gulë'-nu nigula na', ta'nnë':

—Na'a réajlë'ëtu' Lë', calégasö ni' a que didza' bë'u li', pero lësca' tu' biyöñitu' netu' Lë', en nöztu' le nácatë bönni' ni' náquië' Cristo, Nu rusólá bönachi yödzöliö.

Ruünë' Jesús xzi'inë' tuë' bönni' dë lu në'ë

⁴³ Ia'chopa dza ca', buzë'ë Jesús luyú Samaria, en sa'yéajë' luyú Galilea. ⁴⁴ Caní benë', tu' gudíxjö'ë Lë' cazë' Jesús, gunné': "Bönachi uládz queë' nu bönni' ru'ë didza' uláz queë' Dios biti' tun lë' bal." ⁴⁵ Cate' bidxinë' Jesús luyú Galilea, gulunë' bönni' Galilea na' Lë' bal tu' yöjáquië' ca' Jerusalén cate' guca Laní Pascua, en bila'lë'enë' le benë' Jesús ni'.

⁴⁶ Ní'irò bójajë' Jesús yödzö Caná luyú Galilea, ga ni' benë' ga bójaca nisa xisi uva. Lu yödzö Capernaum na' zoë' tu bönni' dë lu në'ë uláz queë' bönni' rinná bë'ë, ate' ré'ebi' bi'i bönni' queë' bönni' na' dë lu në'ë. ⁴⁷ Cate' biyönnë' bönni' ni' chibuzë'ë Jesús luyú Judea, en budxinë' luyú Galilea na', ní'irò guyijë' ga na' zoë' Jesús, en gúta'yuë' lahuë' guidë' lidxë', para uduhuénë'-bi' bi'i bönni' queë' na', tu' chirequi gátibi'. ⁴⁸ Ní'irò Jesús rë' lë':

—Biti' ca' tséajlë'ëli' channö cabí ilé'eli' le nácgaca bë', en yugu' yöl-la' huáca guna'.

⁴⁹ Ní'irò bönni' na' dë lu në'ë uláz queë' bönni' rinná bë'ë gudxë' Jesús, rnnë':

—Bönni', gudía'të para cabí gátibi' bi'i quia'.

⁵⁰ Ní'irò Jesús rë' lë':

—Bój lidxu'. Nabanbi' bi'i quiu'.

Bönni' ni' guyéajlë'ë didza' bë'ë Jesús, ate' söhuójë'. ⁵¹ Tsanni ni' yu'ë nöza söhuójë', duzxi'gala'gaquië' lë' bönni' huen dxin queë' ate' gula'gúxjöi'inë' lë', ta'nnë':

—Nabanbi' bi'i quiu'.

⁵² Gunábinë' légaquië' bátaxi gusí lo ruhuóaca ládxi'bi'. Të' lë':

—Ba'ayi, idú huagubidza, burúaj xilá yú'ubi'.

⁵³ Ní'irò gúquibe'enë' xúzibi' bi'i na', bójacabi' cate' ni' bë'lenë' Jesús lë' didza', en gudxë' lë': "Nabanbi' bi'i quiu'." Que lë ni na' guyéajlë'ë Jesús, ate' gula'yéajlë' ca' Lë' bönachi nacuá' lidxë'.

⁵⁴ Yöl-la' huáca ni naca le buropi benë' Jesús cate' ni' zoë' luyú Galilea, gudödi buzë'ë luyú Judea.

5

Ruünë' Jesús tu bönni' nacú'unië' bin ga nazí'i le Betesda

¹ Gudödi guca lë ni, guca laní quégaquië' bönni' judío, ate' guyijë' Jesús Jerusalén. ² Lu yödzo na', gala' ga tu'ú'uba' bö'cu' zxila', dë tu le zxón yudzu nisa, nazí' le Betesda lu didza' hebreo, en nacuá' gayu' chila don que. ³ Yugu' lu chila na' dëgaquië' zían bönni' té'enë', bönni' nachul-la lógaquië', en bönni' bití' gaca sá'gaquië', en bönni' nacú'unigaquië' bin. Ta' bözë' bata utá' cuini nisa na'. ⁴ Caní' raca, tu' ruhuötjë' tu gubáz' lá'ayi queë' Dios tu chí'i huéaj, en rötjsu'ë lu nisa na', en rutë' nisa na'. Huöacaté' nu bönni' tsöjtsú'utië' lu nisa na' cate' rutá' cuini ca naca bití'tës yödzo hué' raca queë'. ⁵ Zoë' tu bönni' ni', chiguca chizzunu' uruá' iz ré'enë'. ⁶ Cate' bilé'enë' Jesús dë' bönni' hué' na' ni', réquibe'enë' chiguca zían iz ré'enë', ate' gunábinë' lë', rnnë':

—¿Ba ré'ënu' huöácu'?

⁷ Bubi'ë didza' bönni' hué' na', rë' Jesús:

—Bönni', cuntun nu zoa cu'u neda' lu nisa na' cate' rutá' cuini. Tsanni sa'yéaja' neda', rötjsu'ë bönni' yúbölö zí'aló ca neda'.

⁸ Jesús rë' lë':

—Guyaschi. Buá' le denu', en guzë'e.

⁹ La' böacaté' bönni' na', ate' bu'ë le gúti'në', en guzë'e. Dza na' raca caní' naca dza lá'ayi quégaquië' bönni' judío. ¹⁰ Ní'irö bönni' judío unná' bë' gulë' bönni' na' nuhuöáquië', ta'nnë':

—Dza lá'ayi naca na'a. Bití' ral-la' u'u le ráti'nu'.

¹¹ Bubi'ë didza' bönni' na', rë' légaquië':

—Bönni' na' bunë' neda' gudxi cazë' neda', gunnë': "Buá' le denu', en guzë'e." Bönni' na' bunë' neda'.

¹² Ní'irö gula'nábinë' lë', ta'nnë':

—¿Nuzxi na' gudxi caní' li': "Buá' le denu', en guzë'e"?

¹³ Bití' nözínë' bönni' na' nuhuöáquië' nuzxi na', tu' chibuzë'ë Jesús lataj ni' tu' nacuá' bönachi zían ni'. ¹⁴ Gudödi guca lë ni, Jesús yöjxáquië' bönni' na' ga naca chila yudo', ate' rë' lë':

—Buyútsöca'. Chiböácu'. Bití'rö gunu' dul-la', para cabí' gaca quiu' tu le nácarö zí' ca lë na' guca quiu'.

¹⁵ Guyijë' bönni' na', yöjtíxjöi'inë' yugu' bönni' judío unná' bë' Jesús na' bunë' lë'. ¹⁶ Que lë ni na' bönni' judío unná' bë' gula'bía ládxi'gaquië' Jesús, en gulë'ënnë' ilútië' Lë', tu' runë' yugu' lë ni cate' naca dza lá'ayi quégaquië'. ¹⁷ Bubi'ë didza' Jesús, rë' légaquië':

—Xuza' ná'atë runë' dxin, ate' neda' ca' runa' dxin.

¹⁸ Que lë ni na' gulë'ënrönë' bönni' judío unná' bë' ilútië' Jesús, calégasö tu' guditsjë' xibá que dza lá'ayi quégaquië', pero lësca' tu' gunnë' Dios caz náquië' Xuzë', ate' caní' naca nun cuinë' ca náquië' Dios.

Yöl-la' unná' bë' dë lu në'ë Zxi'inë' Dios

¹⁹ Ní'irö bubi'ë didza' Jesús, rë' légaquië':

—Le nácatë rea' libí'ili'. Bití' bi gaca guna' neda', Zxi'inë' Dios, rácasö quia', pero tuz lë na' rilë'eda' runë' Dios Xuz. Yúgu'të le runë' Dios Xuz, lësca' caní' runa' neda', Zxi'inë'. ²⁰ Dios Xuz nadxi'inë' neda', Zxi'inë', en ruluí'inë' neda' yúgu'të le runë', ate' yugu' le zxöntëro ca lë ni uluí'inë' neda', le ilún ga ubánili' libí'ili'. ²¹ Ca na' runë' Dios Xuz, rusubanë' nupa nátigaca, en rugú'ë légaquië' yöl-la' na'bán, lësca' caní' runa' neda', Zxi'inë', runödza' quégaca bönachi yöl-la' na'bán ca ré'ëni quézida'. ²² Cuntu nu ruchi'a rusöröë' Dios Xuz, pero chinudödë' lu na'a neda', Zxi'inë', yúgu'të yöl-la' unná' bë' para uchi'a usöröa' bönachi. ²³ Caní' naca para ilún bal yúgu'të bönachi neda', Zxi'inë', ca na' tun bal Dios Xuz. Nu bití' run bal neda', Zxi'inë', bití' run bal Dios Xuz, nasöl-lë'ë neda', Zxi'inë' na'.

²⁴ Le nácatë rea' libí'ili'. Bönni' na' riyönnë' didza' ruá'a, en réajlë'ë Dios Xuz na' nasöl-lë'ë neda' dë yöl-la' na'bán idú queë', ate' bití' irugu queë'. Náquië' ca nu chinubán lu yöl-la' guti tu' chidé yöl-la' na'bán idú queë'. ²⁵ Le nácatë rea' libí'ili', za' dza, en chiridxin dza na', cate' ila'yöni nupa chinátigaca chí'a neda', Zxi'inë' Dios, ate' nupa ila'yöni xtídza'a, en ilún ca rnna, huóata' yöl-la' na'bán quéguequi. ²⁶ Ca na' dë lu në'ë Dios Xuz unödzejë' yöl-la' na'bán quégaca bönachi, lësca' caní' benë' ga dë lu na'a neda', Zxi'inë', unödza' yöl-la' na'bán quégaca bönachi. ²⁷ Lësca' caní' budödë' lu na'a yöl-la' unná' bë' uchi'a usöröa' bönachi, tu' naca' Bönni' Guljë' Bönachi. ²⁸ Bití' ubánili' ca naca lë ni, tu' huadxin dza cate' yúgu'të nupa chinátigaca ila'yöni chí'a, ²⁹ en ulu'rúaj yeru ba. Ulu'bán nupa na' gulún le naca tsahui', en huóata' yöl-la' na'bán quéguequi, pero nupa na' gulún le bití' naca tsahui', ulu'bán, ate' irugu quéguequi ilátigaca tsaz.

Le naca bë' le náquië' Jesús

³⁰ Gunnë' ca' Jesús:

—Bití' bi gaca guna' la' néda'sö. Ca naca le riyönda' rë' Xuza' neda', caní' ruchi'a rusöröa', ate' ca na' ruchi'a rusöröa' naca tsahui', tu' cabí' runa' ca ré'ënisida' neda', pero ca ré'ëni

quezinë' Xuza' nasöl-lë'ë neda', runa'. ³¹ Channö neda' runa' ba nali que la' cuin caza', biti' naca lesaca' lê na' runa' ba nali. ³² Zoa Nu yúbölö Nu run ba nali quia' neda', Lê' Xuza', ate' nõzda' naca lesaca' le runë' ba nali quia'. ³³ Libí'ili' gusöl-la'li' bönni' yõjnábiguequinë' Juan, ate' lê na' benë' ba nali quia' naca idútë' li. ³⁴ Neda' biti' naquinda' nu bönni' gunë' ba nali quia', pero ruá'a didza' caní para uláli'. ³⁵ Didza' bë'ë Juan na' gulaca ca tu guí' yõri, le guyegui, en buzení, ate' libí'ili', tu chí'isó guyaza lãdxi'li' uzí'ili' xibë' bení' queë'. ³⁶ Na'a, zoa le run ba nali quia' neda' le nãcarö idú li ladxe' ca lê na' benë' ba nali quia' Juan. Yugu' le budödë' Dios Xuz lu na'a guna', la' leze na' runa', ate' yugu' lê na' runa', tun ba nali quia', en nãcagaca bë' gusöl-lë'ë Dios Xuz neda'. ³⁷ Lë'sca' Dios Xuz nasöl-lë'ë neda' runë' ba nali quia'. Catu caz biyónili' chí'ë, en catu caz bilé'eli' lahuë', ³⁸ en cabí nazí' lu ná'ali' xtídzë'ë, tu' cabí réajlë'ë'li' neda', Nu na' gusöl-lë'ë. ³⁹ Rusëdali' le nazúaj lu guichi lá'ayi, tu' réquili' huáta' yõ-la' na'bán idú queë'li' ni'a que lê na' nazúaj lu guichi lá'ayi, ate' lê na' nazúaj lu guichi run ba nali quia' neda'. ⁴⁰ Biti' rë'ënilí' guidali' quia' neda' para gata' yõ-la' na'bán queë'li'.

⁴¹ Biti' riguilja' yõ-la' ba le ila'gú'u bõnachi neda'. ⁴² Neda' núnbë'a libí'ili', en nõzda' biti' nadxí'ili'-në' Dios. ⁴³ Bidxina' ni uláz queë' Dios Xuz, ate' libí'ili' biti' rizí' lu ná'ali' neda', pero channö huadxin nu yúbölö nu guídi rácasö que, si' lu ná'ali' nu na'. ⁴⁴ ¿Nacxi caz gaca tséajlë'ë'li' Dios channö rizí'ili' yõ-la' run zxõn que luzá'ali' tuli' ia'tuli', en biti' riguiljali' yõ-la' run zxõn na' za' lu në'ë la's dui Dios? ⁴⁵ Biti' uzóa ícjali' uzéguia' libí'ili' didza' lahuë' Xuza'. Nu na' uzegui libí'ili' didza' naca lê cazë' Moisés, bönni' na' ruzxõni lãdxi'li'-në', sal-la' gútië' dza ni'te. ⁴⁶ La'tu' réajlë'ë'li'-në' Moisés, tséajlë'ë'li' ca' neda', tu' buzúajë' Moisés lu guichi ca naca quia' neda'. ⁴⁷ Na'a, ¿nacxi caz gaca tséajlë'ë'li' didza' ruá'a neda' channö cabí réajlë'ë'li' yugu' le buzúajë' Moisés lu guichi?

6

Rugahuë' Jesús zianrö ca chi-un gayuá' bõnachi
(Mt. 14:13-21; Mr. 6:30-44; Lc. 9:10-17)

¹ Gudödi guca lê ni, guyjijë' Jesús ia'tsólá'a Nísado' Que Galilea, nazí' le ca' Nísado' Queë' Tiberias. ² Bõnachi zian yõjnógaca Jesús tu' bila'lé'e yugu' yõ-la' huáca benë', cate' bunë' bönni' té'enë'. ³ Ní'irö gurenë' Jesús, guyjijë' ga naca tu lu guí'ado', ga ni' gurö'õlenë' yugu' bönni' usëda queë'. ⁴ Chizóa idxn Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. ⁵ Cate' guchisa lahuë' Jesús, en bilé'enë' bõnachi zian zá'gaca ga zoë', ní'irö rë' Felipe:

—¿Gazxi tsójó'uru' yõta xtila le ilágugaca bõnachi zian ni?

⁶ Caní gunné' Jesús para si' bë'ë Felipe na', tu' chinõzinë' Lê' naca gunë'. ⁷ Bubi'ë didza' Felipe, rnnë':

—La'tu' sí'iru' yõta xtila len lãzxjaru' que idú xunu' beo', biti' guequi láti'do' huéaj le ilágugaca bõnachi zian ni.

⁸ Ní'irö tu bönni' usëda queë' Jesús, lê' Andrés, böchë'ë Simón Pedro, rë' Lê', rnnë':

⁹ —Ni zóabi' tubi' bí'i bönni', nuá'abi' gayu' yõta xtila néquiguequini zxoá' cebada, en chópaba' böla cuídi'do'. ¿Naru' huéqui'tse ugagu le do' ni cate' xõ bõnachi?

¹⁰ Ní'irö Jesús rë' légaquië':

—Guli'gún ga ila'bõ' bõnachi zian ni lu yu.

Lataj na', rõ'õda' daca', ate' gula'bõ'ë idú ca chi-un gáyü'ë bönni' ni'. ¹¹ Ní'irö gudélë'ë Jesús yugu' yõta xtila na'. Cate' chigudxë' Dios: “Xclenu”, gudísië' le quegaquië' bönni' usëda queë', ate' légaquië' gula'guisië' le quegaca yúgu'të nupa na' rõ'gaca lu daca' ni'. Lë'sca' caní gulunë' quegacaba' böla cuídi'do' na', ate' gulahuë' tsa gulë'ënnë' ilahuë'. ¹² Cate' chibulu' huõljanë', Jesús gudxë' yugu' bönni' usëda queë', gunné':

—Buli'túbi le bizxaj nagá'anagaca, para cabí ilaca ditaj.

¹³ Bulu'tubë' ca', ate' bulu'líë' chinnu ga'bõrado' yugu' le bizxaj quegaca gayu' yõta xtila néquiguequini zxoá' cebada na', le bulu'gá'ana quegaquië' bönni' na' gulahuë'. ¹⁴ Cate' bila'lé'enë' bönni' ni' yõ-la' huáca na' benë' Jesús, ta'nnë':

—Le nãcatë bönni' ni náquië' bönni' na' ru'ë didza' uláz queë' Dios, bönni' na' ral-la' guidë' yõdzólió ni.

¹⁵ Tu' réquibe'enë' Jesús té'ënnë' ila'chë'ë Lê' bayudxi para ilunë' ga inná bé'enë' légaquië', que lê ni na' buzë'ë ni', sa'yéajë' tuzë' tu lu guí'a.

Rizë'e ni'ë Jesús lu nísado'

(Mt. 14:22-27; Mr. 6:45-52)

¹⁶ Cate' chizá' ral-la, yõjáquië' bönni' usëda queë' Jesús, ate' bila'dxinë' ra' nísado'. ¹⁷ Gula'benë' tu lê'e bãrcodo' ni', en sõjáquië' ta'dödë' lu nísado' na', para ulu'dxinë' Capernaum. Chinaca chul-la ate' Jesús biti' ridxíninë' ga na' nacu'ë. ¹⁸ Gusí'lo recja bö' budunu' lu nísado' na', ate' riyasa ridxía nisa na'. ¹⁹ Cate' chibulu'së'ë bãrcodo' na', le guzá' le naca tsa

rizá'aru' tu hórasò, ní'irò bila'lé'ené' Jesús rizé'e ni'è lu nísado' na', en zè'è ribíguè'è ga na' zeaj barco na', ate' guladxi gula'dzòbiné'. ²⁰ Ní'irò Jesús rè' légaquié':

—Neda' caz ni. Biti' gádxili'.

²¹ Ní'irò len yòl-la' rudzeja quégaquié' bulu'guélè'è Lè' lè'e bárcodo' na', ate' la' bidxinté bárcodo' na' lu yu bidxi ga ni' sòjaquié'.

Bònachi zían tu' guilaj Jesús

²² Dza buropi ni', guléquite'e bònachi zían na' nagá'anagaca ia'tsólá'a nísado' bidxín tuz bárcodo' ni', ate' Jesús biti' gurénlené' yugu' bònni' uséda queé' lè'e bárcodo' na', pero légacase' na' yójáquié'. ²³ Ní'irò bila'rúaj ia' bal-la bárcodo' lu yòdzò Tiberias, ate' bila'dxín tu lataj le dè gála'sò ga ni' gulahué' yòta xtila cate' ni' Xanru' Jesús gudxé' Dios: "Xclenu'" que. ²⁴ Tu' bila'lé'ené' bíti'rò zoé' Jesús ni', en biti' nacu'è bònni' uséda queé' ni', que lè ni na' gula'bené' lé'egaca bárcodo' na', ate' yójáquié' Capernaum, tu' guiljé' Jesús.

Náquié' Jesús yòta xtila nabánigaca tsaz bònachi

²⁵ Cate' bila'dxín bònachi zían na' ia'tsólá'a nísado' na', yójxaca'gaquié' Jesús, en tè' Lè':

—Bònni' Usedi, ¿bátaxi bidxinu' ni'?

²⁶ Bubi'è didza' Jesús, rè' légaquié':

—Le nácatè rea' libí'ili': Ruguíajli' neda', caléga tu' bilé'eli' yugu' yòl-la' huáca bena', pero tu' gudáguli' yòta xtila ni', en bòljali'. ²⁷ Guli'gún dxin, caléga para sí'ili' la' huagu ridòdi que, pero para sí'ili' la' huagu na' ugá'anatica'sò, en runna yòl-la' na'bán idú. Lè ni naca la' huagu neda', Bònni' Guljé' Bònachi, gunna' queéli', tu' bulu'è lahui Xuza' Dios naca' Zxí'iné'.

²⁸ Ní'irò gula'nábiné' Lè', ta'nné':

—¿Bizxi run bayudxi guntu' para guntu' le raza ládxé'è Dios?

²⁹ Bubi'è didza' Jesús, rè' légaquié':

—Lè ni le raza ládxé'è Dios, tséajlè'èli' neda', naca' nu gusòl-lè'è Lè'.

³⁰ Ní'irò gula'nábiné' Lè', ta'nné':

—¿Bizxi le naca bè' runu', le ilé'etu' para tséajlè'ètu' Li'? ¿Bizxi yòl-la' huáca runu'?

³¹ Gulahué' xuz gudòdi queèru' yòta xtila nazí'i le maná lu lataj cá'asò, ca nazúaj lu guichi lá'ayi, rnna: "Yòta xtila que yehua' yubá Moisés bè'è quégaquié', gulahué'."

³² Bubi'è didza' Jesús, rè' légaquié':

—Le nácatè rea' libí'ili': Caléga Moisés na' benné' queéli' yòta xtila que yehua' yubá, pero Xuza' Dios runné' queéli' yòta xtila le naca idú que yehua' yubá. ³³ Yòta xtila na' runné' Dios quégaca bònachi naca neda', lè na' birúaj yehua' yubá, en runòdzaj yòl-la' na'bán quégaca bònachi yòdzòlió ni.

³⁴ Ní'irò tè' Lè':

—Xan, bénnatica'sò queètu' yòta xtila na'.

³⁵ Jesús rè' légaquié':

—Neda' caz naca' yòta xtila nabánigaca tsaz bònachi. Nu za'len neda', huòlaj udzé'e tsaz nu na' le naca queé' Dios, ate' nu tséajlè' neda', chiné'aj tsaz le naca queé' Dios. ³⁶ Naca ca na' chigudxi caza' libí'ili': "Sal-la' rilé'eli' neda', biti' ca' réajlè'èli' neda'." ³⁷ Yúgu'tè nupa na' runné' Xuza' quia', ídigaca quia', ate' nupa na' zaca quia', biti' usá'gaca'-né'. ³⁸ Caní naca, tu' bótja' birúaja' yehua' yubá, caléga para guna' ca ré'ènda' neda' ca ré'ènda' neda' ca ré'èné' Dios Xuz, nasòl-lè'è neda'. ³⁹ Lè ni le ré'èné' Xuza' nasòl-lè'è neda', ré'èné' cabí unítia' nitú nupa na' benné' quia', pero usubana' léguequi dza údxi. ⁴⁰ Lè ni le ré'èné' Dios Xuz nasòl-lè'è neda', ré'èné' gata' yòl-la' na'bán quéguequi, yúgu'tè nupa na' ila'lé'e neda', Zxí'iné', en ila'yéajlè' neda', ate' neda' usubana' léguequi dza údxi na'.

⁴¹ Ní'irò gula'nné' queé' Jesús bònni' judío unná bè' tu' gunné': "Neda' caz naca' yòta xtila na' bótaj, birúaj yehua' yubá." ⁴² Que lè ni na' ta'nné':

—¿Naru' cabí bònni' ni Jesús, zxí'iné' José? Nunbè' cazaru' xuz xiné'è. ¿Nacxi caz naca na', runné' bònni' ni: "Bótja' birúaja' yehua' yubá"?

⁴³ Ní'irò bubi'è didza' Jesús, rè' légaquié':

—Biti' innèli' quia' la' libí'isili'. ⁴⁴ Biti' séqui'né' nitúè' bònni' guidè' quia' channò cabí idigu'è quia' Xuza' nasòl-lè'è neda' nu na', ate' neda' usubana' nu na' dza údxi. ⁴⁵ Nazúaj lu guichi lá'ayi ca gula'nné' bònni' gulu'è didza' uláz queé' Dios, le rnna caní: Dios usédiné' yúgu'tè bònachi. Que lè ni na', yúgu'tè bònni' ta'yönné' chi'è Xuza', en nazèdagaquié' lu nè'è Lè' zá'gaquié' quia'.

⁴⁶ Cuntu nu bònni' bilé'ené' Dios Xuz, pero tuzè' Bònni' na' birúajé' ga zoé' Dios. Bònni' ni rilé'e quezíné' Dios Xuz. ⁴⁷ Le nácatè rea' libí'ili': Núti'tès bònni' réajlè'è neda' dè yòl-la' na'bán idú queé'. ⁴⁸ Neda' caz naca' yòta xtila nabánigaca tsaz bònachi. ⁴⁹ Gulahué' xuz xtó'oli' yòta xtila na' nazí'i le maná lu lataj cá'asò, en cate' bizá'a dza quégaquié' gulatié'. ⁵⁰ Neda' naca' yòta xtila ruhuòtaj rirúaj yehua' yubá, ate' nùti'tès bònni' gahué' le, biti' ca' gatié' bònni' na'. ⁵¹ Neda' caz naca' yòta xtila na' nabánigaca bònachi, le bótaj birúaj yehua' yubá, ate' channò

núti'tës bönni' gahuë' yöta xtila na', gaca bántica'së' bönni' na'. Yöta xtila na' runödza' neda' naca xipéla'a, le runödza' para gata' yöl-la' na'bán quegaca bönnachi yödzoiliö.

⁵² Ní'irö bönni' judío unná bë' gula'chixi luzá'agaquië', ta'nnë':

—¿Naru' huácatsö bönni' ni gunnë' queëru' xipélë'ë le gáguru'?

⁵³ Que lë ni na' Jesús rë' légaquië':

—Le nácatë rea' libí'ili': Channö cabí gáguli' xipéla'a neda', Bönni' Guljë' Bönachi, en channö cabí guí'jali' xichöna', biti' ca' zóalen libí'ili' yöl-la' na'bán na'. ⁵⁴ Núti'tës nu gagu xipéla'a, en guí'aj xichöna', dë que yöl-la' na'bán idú, ate' neda' usubana' nu na' dza údxi. ⁵⁵ Caní gaca, tu' naca xipéla'a la' huagu idú, ate' xichöna' naca tu le naca idú para nu guí'aj le. ⁵⁶ Núti'tës bönni' gahuë' xipéla'a, en guí'jë' xichöna', sóalenticas'ë' bönni' na' neda', ate' neda' sóalenticas' sa' lë'. ⁵⁷ Ca na' zoë' nabanë' Dios Xuz nasól-lë'ë neda', ate' neda' nabánida' Lë', lëasca' caní íbaninë' neda' núti'tës bönni' gahuë' neda'. ⁵⁸ Lë ni yöta xtila bötaj birúaj yehua' yubá, en biti' naca ca yöta xtila na' nazí'i le maná, lë na' gulahuë' xuz xtó'oli', en cate' bizá'a dza quegaquië', gulátie'. Núti'tës bönni' gahuë' yöta xtila ni sóatica'së' íbanë'.

⁵⁹ Yugu' didza' ni bë'ë Jesús ga naca tu lu yu'u ga tu'dubë' bönni' judío, en tu'sëdë' queë' Dios, ate' guca lë ni tsanni ni' rusédinë' bönachi Capernaum.

Didza' rúnmagaca queëru' yöl-la' na'bán idú

⁶⁰ Cate' bila'yönnë' didza' ni, zían bönni' usëda queë' Jesús gula'nnë' que, ta'nnë':

—Banígatë didza' ni. ¿Nuzxi caz gaca si' lu në'e le?

⁶¹ Réquibe'enë' Jesús ta'nnë' bönni' usëda queë' que xtdzë'ë, ate' gunábinë' légaquië', rnnë':

—¿Naru' run didza' ni libí'ili' zi'? ⁶² ¿Nacxi caz gaca channö hualé'eli' neda', Bönni' Guljë' Bönachi, huëpa' huöja' ga ni' zoa' zí'aló? ⁶³ Le naca queë' Dios Bö' Lá'ayi naca le runna yöl-la' na'bán queéli'. Le naca béla'sö cuntú nu uzí' xibé. Didza' na' bé'lëna' libí'ili' nácaçaga queë' Dios Bö' Lá'ayi, en rúnmagaca yöl-la' na'bán quegaca bönnachi. ⁶⁴ Na'a, bál-lali' biti' réajlë'ëli'.

Gunnë' caní Jesús tu' nözinë' dza ni'te nupa na' biti' ta'yéajlë', enca' nu na' udödi Lë' lu ná'agaquië' bönni' ilútië' Lë'. ⁶⁵ Que lë ni na' gunnë':

—Que lë ni na' chigudxi caza' libí'ili': Biti' séqui'në' nitüë' bönni' të'ë neda' channö Dios Xuz cabí gu'ë lë' lataj.

⁶⁶ Dza na' gulaca chopá láchixi'agaquië' zían bönni' usëda queë', en bití'rö gula'dálenë' Lë'.

⁶⁷ Ní'irö Jesús gunábinë' ídxínnutë' bönni' usëda queë' na', rë' légaquië':

—¿Naru' ubíga'tsali' ca' libí'ili'?

⁶⁸ Bubi'ë didza' Pedro, rë' Lë':

—Xan, ¿nuzxi que tséajtu'? Li' napu' didza' rúnmagaca queëtu' yöl-la' na'bán idú. ⁶⁹ Netu' réajlë'ëtu' Li', en núnbë'ëtu' Li', nacu' Cristo na' nasól-lë'ë Dios, en nacu' ca' Zxf'inë' Dios ban.

⁷⁰ Bubi'ë didza' Jesús, rë' légaquië':

—Guró caza' libí'ili' chínmulí' ni, pero tuë' bönni' ládajli' libí'ili' dzaga tu' xihui' lë'.

⁷¹ Didza' ni bë'ë Jesús ca naca queë' Judas Iscariote, zxf'inë' tu bönni' lë' Simón, tu' náquië' Judas bönni' na' udödë' Jesús lu ná'agaquië' bönni' ilútië' Lë', en nabábalenë' ia'chinéajë' bönni' usëda queë' Jesús.

7

Bönni' böchi' cazë' Jesús biti' ta'yéajlë'ë Lë'

¹ Gudödi guca lë ni ridë' Jesús luyú Galilea. Biti' gú'unnë' tsejë' luyú Judea tu' të'ënnë' bönni' judío unná bë' nacu'ë ni' ilútië' Lë'. ² Dza ni' chizóa ídxín laní quegaquië' bönni' judío cate' tu'subanë' ca gula'cu'ë xuz xtó'ogaquië' zcan libín lága'do'. ³ Que lë ni na' yugu' bönni' böchë'ë Jesús gulé' Lë', ta'nnë':

—Birúaj ni, en guyéaj luyú Judea para ila'lé'enë' ca' bönni' usëda quiu' nacu'ë ni' yugu' yöl-la' huáca runu'. ⁴ Channö ré'ënë' nu bönni' ilúnbë'e bönachi lë', biti' runë' bagáchi'sö le runë'. Tu' runu' yugu' yöl-la' huáca caní, buluí' cuinu' lógaca yúgu'të bönachi.

⁵ Caní gula'nnë', tu' cabi ta'yéajlë'ë bönni' böchë'ë Jesús Lë'. ⁶ Ní'irö Jesús rë' légaquië':

—Biti' ridxini dza quia' para uluí'i lahua' lógaca bönachi, pero dza queéli' tséajli' ni' chizóa caz. ⁷ Bönachi yödzoiliö ni biti' tu'zóa libí'ili' tsólá'aló, pero tu'zóa neda' tsólá'aló tu' runa' ba nalí quegaquië', rnnía' naca xihui' le tunë'. ⁸ Guli'tséaj libí'ili' laní na'. Biti' tseja' laní na' na' tu' biti' ridxini dza quia'.

⁹ Cate' chigudxë' légaquië' lë ni, bugá'anë' luyú Galilea.

Sa'yéajë' Jesús laní quegaca bönachi judío

¹⁰ Gudödi sójáquië' bönni' böchë'ë Jesús laní na', ní'irö sa'yéajë' ca' Lë', caléga yálajdo', pero bagáchi'sö sa'yéajë'. ¹¹ Ga na' raca laní na', bulu'guiljë' bönni' judío unná bë' Jesús, ta'nnë':

—¿Gazxi zoë' bönni' na'?

¹² Bönachi zían ni' guluí'ida' didza' ca naca queë' Jesús. Bal-lë' ta'nnë':

—Náquië' dxí'a.

Ia'bal-lè' ta'nnè':

—Biti' náquiè' dxi'a tu' rizi' yé'enè' bönachi.

¹³ Biti' bë'è nitüè' bönni' didza' yálajdo' ca naca queè' Jesús, tu' tadxi bönachi zían na' le ilunè' yugu' bönni' judío unná bë'.

¹⁴ Cate' chibidxi'n gatsaj laní na', blè'è Jesús ra' yudo', en busédinè' bönachi nacuá' ni'.
¹⁵ Bulu'bánnè' bönni' judío, ta'nnè':

—¿Nacxi caz naca, rácadè'è bönni' ni, en biti' ca' nazèdè' que yudo'?

¹⁶ Bubi'è didza' Jesús, rë' légaquiè':

—Le ruséda' neda', caléga quia' naca, pero queè' Dios Xuz na' nasól-lè'è neda'. ¹⁷ Channò rë'è'nè' nu bönni' gunè' ca rë'è'nè' Dios, huéquite'enè' bönni' na' channò nequi queè' Dios le ruséda' bönachi o channò rácasò quia' ru'á didza'. ¹⁸ Nu bönni' ru'è didza' rácasò queè', runè' caní para ilún bal bönachi lè', pero Bönni' na' rë'è'nè' ilún bönachi bal Nu nasól-la' lè', Bönni' ni ru'è didza' idütè li, en biti' ca' rizi' yé'è.

¹⁹ 'Moisés bennè' queéli' xibá queè' Dios, pero biti' runli' ca rinná bë' xibá na'. ¿Bizx que rizó'a ribò'óli' gütüli' neda'?

²⁰ Bulu'bí' i didza' bönachi zían na', tē Lè':

—Tu' xihui' dzaga li'. ¿Nuzxi caz rizó'a ribò'ó guti li'?

²¹ Bubi'è didza' Jesús, rë' légaquiè':

—Tu' yöl-la' huáca bena', atè' rubánli' yúgu'téli'. ²² Le nácatè Moisés bennè' queéli' lè na' narugu lu xipéla'li' le naca bë', pero caléga Moisés caz bennè' queéli' lè na', pero guzxi'è le lu ná'agaquiè' xuz xtá'ahuè'. Na'a, sal-la' naca dza lá'ayi, richúguli' lu xipéla'gacabi' bí'i bönni'do' lè na' naca bë' néquiqueuibi' queè' Dios. ²³ Channò ta'z'í'ibi' lu xipéla'gacabi' lè na' naca bë' cate' naca dza lá'ayi, para cabí quítsjali' xibá queè' Moisés, ¿naru' rilétseli' neda' tu' buna'-nè' tu bönni', atè' bóáquiè' dxi'ado' cate' naca dza lá'ayi? ²⁴ Biti' ral-la' uchi'a usörò lízili' ca', pero buli' chí'a buli' sörò ca naca le naca idütè li.

Rigúxjò'è Jesús ga narúajè'

²⁵ Ní'irò' gulu'è didza' bal-lè' bönni' nacu'è Jerusalén, ta'nnè':

—¿Naru' caléga bönni' ni Nu na' tu'guiljè' bönni' judío unná bë' para ilütüè' Lè'?
²⁶ Buli'yútsöca', yálajdo' ru'è didza', en biti' bi' tē Lè'. ¿Naru' téquibe'enè' bönni' ta'nná bé'enè' rë'u, le nácatè bönni' ni náquiè' Cristo, Nu na' ral-la' inná be'e rë'u? ²⁷ Bönni' ni, nöz quéziru' gazxi bönni' Lè'. Cate' guidè' Cristo, cuntú nu inözi gazxi bönni' Lè'.

²⁸ Ní' ronnè' Jesús rusédinè' bönachi chila yudo', en cate' biyönnè' didza' ni, ní'irò' bë'è zidzaj didza', ronnè':

—¿Naru' núnbe'etseli' neda', en nözitseli' gazxi bönni' neda'? Bida' ni, caléga rácasò quia', pero Dios caz nasól-lè'è neda', atè' Lè', biti' núnbe'éli'-nè' libí'ili'. ²⁹ Neda' núnbe'eda'-nè', tu' za'a queè' Lè', atè' Lè' cazè' nasól-lè'è neda'.

³⁰ Ní'irò' gulunè' bayudxi'ila' zönè' Lè', pero cuntú nu guzxon Lè', tu' cabí ridxini dza queè' tsu'è lu ná'agaquiè'. ³¹ Gula'yéajlè' zían bönachi ni' Lè', ta'nná:

—Cate' guidè' Cristo, ¿naru' gunè' zíanró yöl-la' huáca ca le runè' bönni' ni?

Bönni' yudo' ta'sól-lè'è nupa'ila'zön Jesús

³² Bila'yönnè' bönni' yudo' fariseo yugu' didza' ni tu'í' bönachi ca naca queè' Jesús, atè' yugu' bixúz unná bë', en yugu' bönni' yudo' fariseo na' gula'sól-lè'è ni'a ná'agaquiè' para tsójxóngaquiè' Lè'. ³³ Ní'irò' Jesús gunnè':

—Ia'tú chí'isó soálena' libí'ili', atè' ní'irò' huója' ga zoè' Xuza' nasól-lè'è neda'. ³⁴ Uguiljali' neda', pero biti' udzólili' neda'. Ga ni' tsöjsó'a neda' biti' gaca guídali' libí'ili'.

³⁵ Ní'irò' tē' luzá'agaquiè' bönni' judío, ta'nnè':

—¿Gazxi tséajtsè' bönni' ni, ga ni' biti' udzóliru'-nè'? ¿Naru' huayéajtsè' ga nacu'è bönni' judío násilasigaquiè' idütè yödžólió, en usédinè' yugu' bönni' zi'tu' ni'? ³⁶ ¿Bizxi rë'è'ni inná didza' na' bë'è: "Uguiljali' neda', pero biti' udzólili' neda'", enca': "Ga ni' tsöjsó'a neda' biti' gaca guídali' libí'ili'?"

Nisa yegu le runna yöl-la' na'bán queèru'

³⁷ Cate' ni' naca dza údxi que laní na', dza na' naca lo, guzuínè' Jesús, en bë'è zidzaj didza', ronnè':

—Channò zoè' nu bönni' ribidxi icja ládxi'da'ahuè', ral-la' guidè' bönni' na' ga zoa', en guí'jè'. ³⁸ Nu bönni' réajlè'è neda', gaca queè' ca na' nazúaj lu guichi lá'ayi, rnna: Lu icja ládxi'da'ahuè' bönni' na' ilén le naca ca nisa yegu, lè na' ulu'z'í' xibé bönachi, gata' yöl-la' na'bán quéqueui.

³⁹ Didza' ni bë'è Jesús ca naca queè' Dios Bò' Lá'ayi, Nu ral-la' idisóalen bönni' na' ila'yéajlè'è Jesús. Caní gunnè' Jesús tu' cabí ridxíninè' Dios Bò' Lá'ayi, tu' cabí ruhuépinè' Jesús ga tsépisètèrè'.

Ta' rúaj choplò bônachi

⁴⁰ Cate' bila'yóni didza' ni, gula'nná bal-la bônachi zían na', ta'nná:
—Le nácaté Bónni' ni náquié' Bónni' na' ru'è didza' uláz queé' Dios, Bónni' na' guzxi' lu në'è
Dios isól-lè'è queéru'.

⁴¹ Ta'nné' ia'bal-lè':

—Bónni' ni náquié' Cristo.

Ta'nná bal-la bônachi:

—¿Naru' irúajtsé' Cristo luyú Galilea? ⁴² Nazúaj lu guichi lá'ayi le rna: "Cristo galjé' lada
di'a dza queé' David, en gáquié' ca' bônni' Belén le guca ladzé' David na'."

⁴³ Caní guca, bila'rúaj bônachi na' choplò tu' nözíné' Jesús. ⁴⁴ Tè'enné' bal-lè' ila'zöné' Jesús,
pero cuntú nu bi ben queé'.

Biti' ta'yéajlé' è Jesús bônni' unná bé'

⁴⁵ Ní'irò bulu'dxiné' ni'a ná'agaquié' yugu' bixúz unná bé', en yugu' bônni' yudo' fariseo
ga na' nacu'è bônni' yudo' na', ate' légaquié' gulé' ni'a ná'agaquié' na', ta'nné':

—¿Bizx que biti' diché'èli'-nè'?

⁴⁶ Bulu'bi'è didza' ni'a ná'agaquié', ta'nné':

—Cuntu nu bônni' ru'è didza' ca ru'è didza' Bónni' ni.

⁴⁷ Ní'irò bulu'bi'è didza' bônni' yudo' fariseo na', ta'nné':

—¿Naru' bé'tsali' lataj guzxi' yé'ené' ca' libí'ili'? ⁴⁸ ¿Naru' guyéajlé' tsé' Lè' nu bônni' unná bé'
o nu bônni' yudo' fariseo? ⁴⁹ Libí'ili' dxíali' dö' tu' cabí rácali' xibá queé' Dios.

⁵⁰ Zoé' ca' Nicodemo ni', bônni' na' bidxiné' ga zoé' Jesús chí'i dzó'óló, tu' náquié' ca' bônni'
yudo' fariseo, ate' ré' légaquié':

⁵¹ —¿Naru' richúguru' queé' tu bônni' gátie' lu xibá queéru' channó cabí yóniru' lè' zí'aló
para inöziru' bi bené'?

⁵² Ní'irò bulu'bi'è didza' ia'zica'rè' na', tè' lè':

—¿Nácatso' ca' lí' bônni' Galilea? Bulaba le nazúaj lu guichi lá'ayi, ate' uyú' catu caz birúaj
nitúé' bônni' ru'è didza' uláz queé' Dios luyú Galilea.

⁵³ Ní'irò yöjhuójaquié' lidxi que queégaquié'.

8

¹ Guyijé' Jesús ga naca lu Guí'a Yaga Olivo.

Nígula nagútsjanu xibá que yöl-la' nutsaga na'

² Cate' za' rení' budxiné' Jesús ra' yudo', ate' bila'dxín yúgu'té bônachi ga zoé'. Gurö'è
Jesús, rusédiné' légaquié'. ³ Ní'irò yugu' bônni' yudo' usedi, en yugu' bônni' yudo' fariseo
duché'égaquié'-nu tu nigula ga zoé' Jesús, tu' gula'dzöliné'-nu ni' rigútsjanu xibá que yöl-la'
nutsaga na'. Bulu'sudxiné'-nu lógaca bônachi na' tu'zè nágagaca Jesús, ⁴ ate' tè' Lè':

—Bónni' Usedi, nigula ni guzxo'ntu'-nu ni' runnu dul-la' rigútsjanu xibá que yöl-la' nutsaga
na'. ⁵ Lu xibá queé' Moisés, gunná bé'ené' netu' uládxí'tu'-nu guió'j nu nigula runnu caní,
para gátinu. ¿Názxiga Lí', naxxi rno'?

⁶ Caní gula'nné' para ila'zí' bé'è Jesús para ila'zéqui'né' ulu'zéguié' Lè' didza'. Ní'irò
biyéchué' Jesús, ruyúé' lu yu, en ruzúajé' lu yu na' len xibón në'è. ⁷ Cate' gula'nábide'ené'
Lè', ní'irò buzuíné' Jesús, en ré' légaquié':

—Núli' cabí nunlí' dul-la' isí loli' uládxí'li'-nu guió'j.

⁸ Leyúböló biyéchué' Jesús, ruyúé' lu yu, en bugué'è'è ruzúajé' leyúböló lu yu na'. ⁹ Cate'
bila'yónné' didza' ni, bulu'xösa ládxí'do'gaquié' légaquié', ate' bila'rúajé' tu tué'. Gula'sí
lógaguié' bônni' gularó ga bidxinté bônni' cuidí'. Nagá'ané' Jesús ní', dzáganu nigula na' Lè'
gatsaj láhui'ló nupa na' tu'zè nágagaca Lè'. ¹⁰ Ní'irò buzuíné' Jesús leyúböló, en cuntú nu
bilé'ené' nu ruzegui lènu didza', pero túzínu nigula na', ate' ré'è-nu:

—Nígula, ¿gazxi nacua' nupa na' bulu'zegui lí' didza'? ¿Naru' cabí zoa nu bônni' richúgúie'
quiu'?

¹¹ Lènu rnnanu:

—Cuntu nu caz, Xan.

Ní'irò Jesús ré'è-nu:

—Lézca' neda', biti' richuga' quiu'. Bóaj lidxu', en bití'rö gunu' dul-la'.

Náquié' Jesús bení' quégaca bônachi yódzólió

¹² Leyúböló Jesús bé'lené' bônachi didza', rnné':

—Neda' naca' bení' quégaca bônachi yódzólió. Nu bônni' zá'lené' neda', biti' tè' ga naca chul-
la que dul-la', pero tu bení' sóalen bônni' na' le uluí'i lé' naca gata' yöl-la' na'bán idú queé'.

¹³ Ní'irò tè' Lè' bônni' yudo' fariseo, ta'nné':

—Lí' runu' ba nalí que la' cuinsu'. Biti' naca lesaca' le runu' ba nalí. Nítisö naca.

¹⁴ Bubi'è didza' Jesús, ré' légaquié':

—Sal-la' runa' ba nali que la' cuinsa', idútë li naca le runa' ba nali, tu' nözda' ga birúaja', en ga tseja', pero libí'ili' bití' nózili' gazxi za'a, en caléga gazxi tseja'. ¹⁵ Libí'ili' ruchi'a rusó'óli' ca náacagaca le taca yódzólió ni, pero neda', rácasó quia' cuntu nu bönni' ruchi'a rusó'ó'a queë'. ¹⁶ La'tu' uchi'a usó'ó'a, ca nácatë uchi'a usó'ó'a, tu' caléga néda'só uchi'a usó'ó'a, pero Xuza' nasól-lë'ë neda' gunë' neda' tsózxón. ¹⁷ Lësca' caní lu xibá queë' Moisés nazúaj lu guichi le rna: Le tunë' ba nali chopë' bönni', idútë li naca. ¹⁸ Neda' runa' ba nali que la' cuinsa', ate' Xuza' nasól-lë'ë neda', runë' ca' ba nali quia'.

¹⁹ Ní'iró bönni' yudo' fariseo na' gula'nábinë' Lë', ta'nnë':

—¿Gazxi zóatsë' Xuzu'?

Bubi'ë didza' Jesús, rë' légaquië':

—Bití' núnbë'ëli' neda', en bití' núnbë'ëli'-në' Xuza'. La'tu' núnbë'ëli' neda', lësca' Xuza' gúnbë'ëli'-në'.

²⁰ Yugu' didza' ni bë'ë Jesús cate' ni' zoë' rusédinë' bönachi lu chila yudo', ga na' nacua' guí'ina gapa ta'gu'ë gun que yudo', pero cuntu nu guzxón Lë', tu' cabí ridxini dza queë' tsu'ë lu ná'agaquië'.

Rnnë' Jesús: "Ga tseja' neda', bití' gaca guídali'"

²¹ Leyúböló Jesús rë' légaquië', rnnë':

—Uzá'a yódzólió ni, ate' ugujljalí' nu usólá libí'ili', pero ugá'ana dul-la' nabága'li', en gátili'. Ga tseja' neda', bití' gaca guídali'.

²² Ní'iró gulu'ë didza' bönni' judío unná bë', ta'nnë':

—¿Naru' guti cuinë'? Rnnë': "Ga tseja' neda', libí'ili' bití' gaca guídali'."

²³ Jesús rë' légaquië':

—Libí'ili' nácali' que luyú dë cadxí'íló ni, pero neda' za'a yehua' yubá xitsá'. Libí'ili' nácali' bönachi yódzólió ni, pero neda' bití' naca' bönni' yódzólió ni. ²⁴ Que lë ni na' gudxa' libí'ili': Ugá'ana dul-la' nabága'li', en gátili'. Channó cabí tséajlë'ëli' naca caza' Nu usólá, ugá'ana dul-la' nabága'li', en gátili'.

²⁵ Ní'iró gula'nábinë' Lë', ta'nnë':

—¿Nuzxi caz nacu'?

Jesús rë' légaquië':

—Naca' la' leze ca na' chigudxa' libí'ili' dza ni'te. ²⁶ Zían le ral-la' guía' libí'ili', en uchi'a usó'ó'a le naca queëli'. Didza' idútë li ru'ë Xuza' nasól-lë'ë neda', ate' didza' riyónda' ru'ë Lë', ruí'ilena' bönachi yódzólió ni.

²⁷ Bití' gula'yéajni'inë' ruí'ilenë' légaquië' didza' ca naca queë' Dios Xuz. ²⁸ Que lë ni na' Jesús rë' légaquië' dza:

—Cate' idxín dza uchísali' neda', Bönni' Guljë' Bönachi, gútili' neda', ní'iró guéquibe'eli' naca caza' Nu rusólá, en bití' bi runa' rácasó quia', pero ca na' ruluí'inë' Xuza' neda', ca' ruá'a didza'. ²⁹ Xuza' nasól-lë'ë neda' zóalenë' neda'. Bití' nucá'anë' Xuza' neda' tuza', tu' rúntica'sa' le raza ládxë'ë Lë'.

³⁰ Cate' bë'ë Jesús didza' ni, bönni' zían gula'yéajlë'ë Lë'.

Nupa náacagaca xxi'inë' Dios, en nupa nadzúngaca lu na' dul-la'

³¹ Ní'iró Jesús gudxë' yugu' bönni' judío na' ta'yéajlë'ë Lë', rnnë':

—Channó gúntica'sili' ca rna xtídza'a, gácali' idú bönni' uséda quia'. ³² Gúnbë'ëli' le naca idútë li, ate' le naca idútë li na' usólá libí'ili'.

³³ Bulu'bi'ë didza', të' Lë':

—Abraham naquië' xuz gudódi queëtu', en cuntu nu ben netu' bönni' nadó'ogaca. ¿Rnnat-so': "Usólá libí'ili'?"

³⁴ Jesús rë' légaquië':

—Le nácatë rea' libí'ili': Yúgu'të nupa tun dul-la', nadzúngaca lu na' dul-la'. ³⁵ Nu naca bönni' nadó'o bití' ugá'anatica'só lidxë' xan yu'u, pero nu naca xxi'inë' xan yu'u na' rugá'anatica'só lidxi nu na' naca xan yu'u. ³⁶ Caní naca, channó Nu na' naca Xxi'inë' Dios usólá libí'ili', le nácatë uláli'. ³⁷ Nözda' naquië' Abraham xuz gudódi queëli', pero rizó'a ribó'óli' gútili' neda', tu' cabí nazí' lu ná'ali' xtídza'a. ³⁸ Neda' ruá'a didza' ca naca le bilé'eda' ga na' zoë' Xuza', pero libí'ili' runli' le biyónili' ga zoa xuz quézili'.

³⁹ Bulu'bi'ë didza', të' Lë':

—Abraham náquië' xuztu'.

Ní'iró Jesús rë' légaquië':

—La'tu' nácali' idú xxi'ini xi'sóë' Abraham, gunli' ca na' benë' Abraham. ⁴⁰ Na'a, rizó'a ribó'óli' gútili' neda', sal-la' ruí'ilena' libí'ili' didza' idútë li, didza' na' biyónda' bë'ë Dios. Bití' benë' Abraham caní. ⁴¹ Libí'ili' runli' ca run xuz quézili'.

Ní'iró të' Lë':

—Netu' bití' ca' nácatu' bi'i lando'. Tuzë' Dios náquië' Xuztu'.

⁴² Ní'irò Jesús rē' légaquiē':

—La'tu' náquiē' Dios idú Xúzili', huadxí'ili' neda', tu' birúaja' neda' ga zoē' Dios, en bida' luyú ni, ate' calēga rácasō quia' bida', pero Dios caz gusōl-lē'ē neda'. ⁴³ ¿Bizx que biti' gaca tséajni'ili' didza' ruá'a? Naca tu' cabí rē'ēnili' uzē nágali' xtídza'a. ⁴⁴ Xuz quezili' naca tu' xihui'. Néquili' que tu' xihui', en rē'ēnili' gunli' le rizē ladxí' xúzili' na'. Dza ni'te naca tu' xihui' nu guti bōnachi, en cabí nazí' lu nē'e le naca idútē li, tu' cabí ruí' didza' idútē li. Cate' rizi' yē' tu' xihui', ca naca caz ruí' didza', tu' naca nu rizi' yē', en naca ca xúzgaca caz nupa ta'z'í yē'. ⁴⁵ Tu' ruá'a neda' didza' idútē li biti' réajlē'ēli' neda'. ⁴⁶ ¿Núzxilōli' gaca usubága'li' neda' dul-la'? Channō ruá'a didza' idútē li, ¿bizx que biti' réajlē'ēli' neda'? ⁴⁷ Nu naca queē' Dios, ruzē ngui xtídžē'ē Dios, pero libí'ili', tu' cabí nácali' queē' Dios, biti' ruzē nágali' xtídžē'ē.

Cristo zoa cazē' z'í'atēlō ca Abraham

⁴⁸ Ní'irò bulu'bi'ē didza' yugu' bōnni' judío, tē' Jesús:

—Catēz gunnatu' cate' gunnatu' nacu' bōnni' Samaria, ate' dzaga tu' xihui' Li'.

⁴⁹ Bubi'ē didza' Jesús, rē' légaquiē':

—Biti' dzaga tu' xihui' neda'. Neda' runa' Xuza' bal, ate' libí'ili' ruzóali' neda' tsólá'alō.

⁵⁰ Biti' runa' xzōn cuína'. Zoa Nu run xzōn neda', ate' Lē' ruchi'a rusōrōē' rē'u. ⁵¹ Le nácatē rea' libí'ili': Nu bōnni' si' lu nē'ē xtídza'a, biti' ca' gatiē' bōnni' na'.

⁵² Ní'irò yugu' bōnni' judío na' tē' Lē', ta'nnē':

—Na'a réquibe'etu' dzaga tu' xihui' Li'. Abraham gútiē', ate' gulátiē' ca' bōnni' gulu'ē didza' uláz queē' Dios, pero Li' rno': "Nu bōnni' si' lu nē'ē xtídza'a, biti' ca' gatiē' bōnni' na'."

⁵³ ¿Naru' nácatērōtso' Li' xzōn ca xúziru' Abraham? Gútiē' lē', ate' gulátiē' ca' bōnni' gulu'ē didza' uláz queē' Dios. ¿Nuzxi' caz run cuinu'?

⁵⁴ Bubi'ē didza' Jesús, rē' légaquiē':

—Channō neda' guna' xzōn cuína', yōl-la' xzōn na' biti' bi' gaca. Xuza' runē' neda' xzōn, ate' libí'ili' rnnali' náquiē' Dios queē'li'. ⁵⁵ Libí'ili' biti' núnbē'ēli'-nē' Dios Xuz, pero neda' núnbē'a-nē'. La'tu' innia': Biti' núnbē'a-nē', gaca' nu rizi' yē' ca na' nácali' libí'ili', rizi' yē'ēli'. Na'a, le nácatē núnbē'a-nē', en nazí' lu na'a xtídžē'ē. ⁵⁶ Xúzili' Abraham budžéjanē' tu' ral-la' ilé'enē' dza soa' yōdzōlió ni, en sal-la' gútiē' dza ni'te, bilé'enē' le, en budžéjade'enē'.

⁵⁷ Ní'irò yugu' bōnni' judío na' tē' Jesús, ta'nnē':

—Biti' yui'inu' chi-un iz. ¿Naru' bilé'etsenu' Abraham?

⁵⁸ Jesús rē' légaquiē':

—Le nácatē rea' libí'ili': Z'í'atēlō ca soē' Abraham, neda' zoa caza'.

⁵⁹ Ní'irò gula'gué'ē guioj para ulu'ladxē' Jesús, pero Lē' bunítitē cuinē', en burúajē' lō'a yudo' na'. Gudōdē' gatsaj láhuil'ō ga na' nacu'ē, ate' sōhuojē'.

9

Ruínē' Jesús tu bōnni' guljē' nachúl-latē lahuē'

¹ Cate' gudōdē' Jesús tu lataj, bilé'enē' tu bōnni' ni' guljē' nachúl-latē lahuē'. ² Gula'nábinē' Jesús bōnni' usēda queē', ta'nnē':

—Bōnni' Usedi, ¿nuzxi' ben dul-la'? ¿Naru' bōnni' ni o xuz xinē'ē tu' guljē' nachúl-latē lahuē'?

³ Bubi'ē didza' Jesús, rē' légaquiē':

—Biti' naca tu' benē' dul-la' bōnni' ni, en calēga tu' gulunē' dul-la' xuz xinē'ē, pero naca para ilá' lahui' yōl-la' huáca queē' Dios ni'a queē' bōnni' ni. ⁴ Run bayudxi' gunru' xichinē' Xuza' nasōl-lē'ē neda', tsanni ni naca ca lahui' dza. Huadxín dza gaca chul-la' que yōl-la' guti, cate' cantu nu gaca gun dxin. ⁵ Tsanni ni zoa' yōdzōlió ni, naca' bení' quégaca bōnachi yōdzōlió.

⁶ Cate' Jesús budxi' bē'ē didza' ni, gurú'unē' xzōna' lu yu, en benē' gúna'do' len xzōna' na', ate' bugu'ē guna' na' guioj lahuē' bōnni' na' nachul-la lahuē'. ⁷ Ní'irò rē' lē':

—Guyéaj yōjtibi lo' lu beaj nisa nazí' le Siloé.

Siloé naca tu didza' hebreo le rna: Nasōl-la'.

Ní'irò bōnni' na' nachul-la lahuē' guyijē' ni', yōjtibi lahuē'. Cate' buzē'ē ni' chirilé'enē'. ⁸ Ní'irò bulu'bani bōnachi dzaga yu'u queē', en nupa ni' bila'lé'e lē' z'í'atēlō cate' ni' nachul-la lahuē', ta'nná:

—¿Naru' calēga bōnni' ni bōnni' na' ribō'ē rinabē' nu bi unōdzaj queē'?

⁹ Bal-lē' ta'nnē':

—Lē' na'.

Ia'bal-lē' ta'nnē':

—Calēga lē', pero ca rna' lahuē' bōnni' na', rna' lahuē' ca' bōnni' ni.

Lē' rnnē':

—Neda' na'.

¹⁰ Ní'irò gula'nábinē' lē', ta'nnē':

—¿Nacxi caz guca, guyalaj guiøj lo'?

¹¹ Bubi'ë didza', rë' légaquië':

—Bönni' na' lë' Jesús benë' gúna'do', ate' gudëbë' gúna'do' na' guiøj lahua', en gudxë' neda': "Guyéaj ra' beaj nisa nazí' le Siloé, yøjtibi lo'." Guyija' ni', yøjtibi lahua', ate' guyalajtë' guiøj lahua'.

¹² Ní'irö gula'nábinë' lë', ta'nnë':

—¿Gazxi zoë' bönni' na'?

Lë' rë' légaquië':

—Biti' nözda'.

Yugu' bönni' yudo' ta'náb yúdxinë' bönni' na' guyalaj guiøj lahuë'

¹³ Ní'irö gula'ché'ë bönni' na' zí'alö nachul-la lahuë', en bulu'sudxinë' lë' lógaquië' bönni' yudo' fariseo. ¹⁴ Tu' naca dza lá'ayi quégaquië' cate' benë' Jesús gúna'do' na', en gusaljë' guiøj lahuë' bönni' na' zí'alö nachul-la lahuë', ¹⁵ que lë' ni na' yugu' bönni' yudo' fariseo na' gula'nábinë' lë' leyúbölö nacxi guca guyalaj guiøj lahuë'. Lë' gudxë' légaquië':

—Budxië' gúna'do' guiøj lahua', ate' yøjtiba' le, en rilé'eda'.

¹⁶ Ní'irö gulu'ë didza' bal-lë' bönni' yudo' fariseo na', ta'nnë':

—Biti' nasöl-lë' Dios bönni' na', tu' cabi rapa chí'ë dza lá'ayi.

Ia'bal-lë' ta'nnë':

—¿Naru' huácatsö tu bönni' dul-la' gunë' yugu' yöl-la' huáca runë' bönni' na'?

Caní guca, bila'ruájë' choplö. ¹⁷ Leyúbölö gula'nábinë' bönni' na' zí'alö nachul-la lahuë', ta'nnë':

—¿Bizxi rruno' li' queë' bönni' na', gusaljë' guiøj lo'?

Lë' rnnë':

—Náquië' bönni' ru'ë didza' uláz queë' Dios.

¹⁸ Biti' gula'yéajlë'ë bönni' judío unná bë' na' guljë' nachúl-latë lahuë' bönni' na', en guyalaj guiøj lahuë', cate' bulu'lídzarë' xuz xinë'ë bönni' na' guyalaj guiøj lahuë', ¹⁹ ate' gula'nábinë' légaquië', ta'nnë':

—¿Naru' náquië' bönni' ni xzí'inili', rnnali' guljë' nachúl-latë lahuë'? ¿Nacxi caz naca rilé'enë' na'a?

²⁰ Bulu'bi'ë didza' xuz xinë'ë na', të' légaquië':

—Nözitu' bönni' ni náquië' xzí'initu', en guljë' nachúl-latë lahuë', ²¹ pero nacxi guca, rilé'enë' na'a, biti' nöztu', en nuzxi na' gusalaj guiøj lahuë', biti' nöztu'. Guli'nabi-në' lë', tu' chináquië' bönni' chinaca. Lë' cazë' quíxjö'ë.

²² Caní gula'nnë' xuz xinë'ë bönni' na' zí'alö nachul-la lahuë', tu' tádxinë' yugu' bönni' judío unná bë', tu' chigulún xtídza'gaquië' bönni' judío na' channö nu bönni' si' lu në'ë Jesús náquië' Cristo, tsaz ulu'béajë' bönni' na' lu yu'u ga tu'dubë' bönni' judio, en tu'sëdë' queë' Dios. ²³ Que lë' ni na' gula'nnë' xuz xinë'ë: "Guli'nabi-në' lë', tu' chináquië' bönni' chinaca."

²⁴ Ní'irö yugu' bönni' judío unná bë' bulu'lídzë' leyúbölö bönni' na' zí'alö nachul-la lahuë', ate' të' lë':

—Ní'a queë' Xanru' Dios gudixjö' le nácatë. Netu' réquibe'etu' bönni' na' náquië' bönni' dul-la'.

²⁵ Ní'irö bubi'ë didza', rnnë':

—Channö náquië' bönni' dul-la' biti' nözda'. Tu le nözda'. Zí'alö nachul-la lahua', ate' na'a rilé'eda'.

²⁶ Gula'nábinë' lë' leyúbölö, ta'nnë':

—¿Bizxi benë' quiu'/? ¿Nacxi benë' gusaljë' guiøj lo'?

²⁷ Bubi'ë didza', rë' légaquië':

—Chigúdxí caza' libí'ili', pero biti' gú'unili' si' lu ná'ali' xtídza'a. ¿Bizx que na' rë'ënili' yónili' leyúbölö? ¿Naru' rë'ënili' tá'alí' ca' Lë'?

²⁸ Ní'irö bulu'lidza' zí'ë lë', ta'nnë':

—Lí' do'o Lë', pero netu' dá'atu' Moisés. ²⁹ Netu' nöztu' Dios bé'lenë' Moisés didza', pero ca naca queë' bönni' ni, biti' nöztu' nuzxi caz gusöl-la' Lë'.

³⁰ Ní'irö bubi'ë didza' bönni' na', rë' légaquië':

—Lë' ni run ga rubánida'. Libí'ili' biti' nözili' nuzxi gusöl-la' bönni' ni, ate' Lë' gusaljë' guiøj lahua'. ³¹ Nöziru' biti' riyönnë' Dios yugu' bönni' dul-la', pero channö reaj ládxë'ë tu bönni' Dios, en runë' ca rë'ënë' Lë', Dios riyönnë' bönni' ni. ³² Dza ni'te biti' riyön nu gunná channö nu bönni' gusaljë' guiøj lahuë' tu bönni' guljë' nachúl-latë lahuë'. ³³ La'tu' cabi náquië' bönni' ni queë' Dios, biti' bi gaca gunë'.

³⁴ Ní'irö bulu'bi'ë didza', të' lë':

—Ca gulju' naca bë' nabágu'u dul-la'. ¿Naru' li' ruséditsenu' netu'? Ní'irö bulu'béajë' lë' ní'ilö.

Nupa nácagaca chul-la niti

³⁵ Biyönnë' Jesús ca gulunë' bönni' judío unná bē, bulu'béajë' bönni' na' zí'alö nachul-la lahuë'. Cate' budzáguë' lë', gudxë' lë':

—¿Ba réajlë' u Zxí'inë' Dios?

³⁶ Bubi'ë didza' lë', rë' Jesús:

—¿Nuzxi na', Xan, para tséajlë'a Lë'?

³⁷ Jesús rë' lë':

—Chibilé'enu' Lë', ate' neda' ni ru'ílena' li' didza', naca' Zxí'inë' Dios.

³⁸ Ní'irö bönni' na', guyalaj guiöj lahuë', guyéaj ládxë'ë Jesús, en rë' Lë':

—Xan, réajlë'a Li'.

³⁹ Jesús rnnë':

—Para uchi'a usöröa' bönachi bida' yödzólió ni, para ulu'lé'e nupa nachul-la nanítigaca, en ilaca ca nu nachul-la lahu nupa téquiguequi ta'lé'e.

⁴⁰ Cate' yugu' bönni' yudo' fariseo na' nacua'lenë' Jesús bila'yönnë' didza' ni, ní'irö tē' Lë':

—¿Naru' nachul-la nanítitsatu'?

⁴¹ Bubi'ë didza' Jesús, rë' légaquië':

—La'náru' nachúl-lasö guiöj loli', biti' íbága'li' dul-la'. Na'a rnnali': "Ril'é'tu'." Que lë ni na' nabága'li' dul-la'.

10*Rucúdzu'ë didza' Jesús que lë'a quégacaba' bö'cu' zxila'*

¹ Gunnë' ca' Jesús:

—Le nácatë rea' libí'ili': Nu bönni' biti' razië' saca' ga nu riyaza lë'a quégacaba' bö'cu' zxila', pero tsázië' saca' ga yúbölö, bönni' ni náquië' gubán, en ribán cazë'. ² Nu bönni' razië' saca' ga nu riyaza náquië' bönni' run chí'i cazë' bö'cu' zxila' na'. ³ Para tsázië' bönni' ni, risalaj nu zoa run chí'i ga nu riyaza, ate' ta'yóniba' bö'cu' zxila' na' chí'ë, en tu'únbë'ëba'-në'. Lë' rulidzë'-ba' que queëba' ca légacaba', en rubéajë' yugu' bö'cu' zxila' na'. ⁴ Cate' chinubéajë'-ba' yúgu'tëba' bö'cu' zxila' néquigacaba' queë', röjnóruë' lógacaba', ate' bö'cu' zxila' na' röjnógacaba' lë', tu' tu'únbë'ëba' chí'ë. ⁵ Bönni' yúbölö biti' tsójnógacaba' lë', pero ulu'zxúnnajba' queë', tu' cabí núnbë'gacaba' chí'ígaquië' bönni' yúbölö.

⁶ Le rucudzu' didza' ni gudxë' Jesús légaquië', pero biti' gula'yéajni'inë' lë na' rë' légaquië'.

Náquië' Jesús ca bönni' rapa chí'ë-ba' bö'cu' zxila'

⁷ Ní'irö Jesús rë' légaquië' leyúbölö, rnnë':

—Le nácatë rea' libí'ili': Neda' naca' ca tu ga ta'yázaba' bö'cu' zxila'. ⁸ Chigula'lë'ë zían bönni' gula'nnë' nácagaquië' Cristo, pero yúgu'të bönni' na' bila'dxinë' zí'alö ca neda', nácagaquië' gubán, en ta'bán cazë', ate' biti' bulu'zë nágaba' bö'cu' zxila' na' légaquië'. ⁹ Neda' naca' ca tu ga nu riyaza. Núti'tës bönni' tsázalenë' neda', ulë' bönni' na', en gáquië' ca tuba' bö'cu' zxila' rázaba', en rurúajba', en ridzóliba' le ráguba'.

¹⁰ 'Za'zë' bönni' gubán para cuanë'-ba', en gútië'-ba', en usunítie'-ba'. Neda' bida' para gata' yöl-la' na'bán idú quégaca bönachi nácagaca ca bö'cu' zxila' quia'. Le nácatë gata' quégaquië' yöl-la' na'bán idú na'. ¹¹ Neda' run chí'igaca' bönachi quia' ca runë' bönni' na', lu yöl-la' dxi'i ladxi' queë' rapa chí'ë yugu' bö'cu' zxila'. Bönni' na' rapa chí'ë-ba' bö'cu' zxila' caní zoa cazë' udödë' yöl-la' na'bán queë' ni'a quégacaba' bö'cu' zxila' queë'. ¹² Tu bönni' nazxjé' rapa chí'ë-ba' bö'cu' zxila', cate' rilé'enë' zá'aba' bö'cu' guí'a sinía', rucá'anë'-ba' bö'cu' zxila' na', en ruzxúnnajë', ate' bö'cu' guí'a sinía' na' ráguya'aba' yugu' bö'cu' zxila' na', en rusilásiba' légacaba'. Caní runë' bönni' na' rapa chí'ë-ba' bö'cu' zxila' tu' cabí náquië' idú nu run chí'i-ba' bö'cu' zxila', ate' biti' néquigacaba' que cazë' bö'cu' zxila' na'. ¹³ Ruzxúnnajë' bönni' nazxjé' na' tu' rapa chí'ë-ba' bö'cu' zxila' na' para sí'së' dumí, en biti' ru'í' ládxë'-ë-ba' bö'cu' zxila' na'.

¹⁴⁻¹⁵ 'Neda' naca' bönni', lu yöl-la' dxi'i ladxi' quia' run chí'igaca'-ba' bö'cu' zxila'. Ca na' núnbë'ë Xuza' neda', ate' neda' núnbë'a-në' Xuza', lësca' caní núnbe'egacada' bönachi quia' nácagaca ca bö'cu' zxila' quia', en rudóda' yöl-la' na'bán quia' ni'a quégacaba' bö'cu' zxila' na', ate' bö'cu' zxila' na' néquiguequiba' quia' núnbë'gacaba' neda'. ¹⁶ Lësca' nacua'aba' ia'zica'röba' bö'cu' zxila' quia' biti' nabábagacaba' ni. Lësca' légacaba' ral-la' tsójxí'gaca'-ba'. Léga'aba' ulu'zë nágaba' chí'a, en ilácaba' tuz len ia'zica'röba' bö'cu' zxila' quia', ate' neda' caz gun chí'igaca'-ba'.

¹⁷ 'Que lë ni na' nadxí'inë' Xuza' neda', tu' rudóda' yöl-la' na'bán quia', gu'a lataj nu guti neda', ate' uzi'a le leyúbölö, ubana' lu yöl-la' guti. ¹⁸ Cuntu nu bönni' séqui'në' gútië' neda', pero neda' rudódi caza' yöl-la' na'bán quia', gátia'. Dë lu na'a udóda' le, en dë lu na'a uzi'a le leyúbölö. Caní naca le gunná bé'enë' Xuza' neda'.

¹⁹ Cate' yugu' bönni' judío bila'yönnë' didza' ni, leyúbölö bila'rúajë' choplö ca téquinë' queë'. ²⁰ Zíanë' ta'nnë':

—Yu'u bö' xihui' Lë', en nachixi icjë'. ¿Bizx que ruzë nágalí' Lë'?

²¹ Ia'bal-lë' ta'nnë':

—Biti' ca' ru'ë caní didza' bönni' yu'u bö' xihui' lë'. ¿Naru' huácatsö bö' xihui' usalaj guiöj lógaquië' bönni' nachul-la lógaquië'?

Yugu' bönni' judío unná bë' tu'zóë' Jesús tsölá'alö

²² Raca beo' ziaga, en naca dza na' tunë' laní yödzö Jerusalén, tu'subanë' ca gula'gu'ë yudo' quégaquië' lu në'ë Dios. ²³ Ridë' Jesús ra' yudo' ga naca chila que, nazí' i le Chila Queë' Salomón. ²⁴ Yugu' bönni' judío unná bë' gula'gu'ë Jesús lë'alö, en të' Lë':

—¿Bátaxi caz usanu' runu' ga rö'ötu' böniga? Channö nacu' li' Cristo, ca nácatë gudíxjöi' netu'.

²⁵ Jesús rë' légaquië':

—Chigudxi caza' libí'ili', pero bití' réajlë'ëli' neda'. Yugu' dxin runa' tu' dë lu na'a uláz queë' Xuza' nácacaga bë' Nu naca'. ²⁶ Libí'ili' bití' réajlë'ëli' neda', tu' cabí nabábalenli' nupa nácacaga bö'cu' xzila' quia', ca na' chigudxi caza' libí'ili'. ²⁷ Ta'yóniba' bö'cu' xzila' quia' chí'a, en tu'ünbe'eba' neda', ate' neda' nünbe'egacada'-ba', ate' ridíjácalenba' neda'. ²⁸ Neda' runödza' yöl-la' na'bán idú quégacaba', ate' bití' ca' ila'nítiba', ate' cuntú nu sequí' ubéaj légacaba' lu na'a neda'. ²⁹ Xuza' Dios bennë' quia' légacaba', ate' Lë' nápatërë' yöl-la' huáca ca yúgu' té bönachi, ate' cuntú nu sequí' ubéaj légacaba' lu në'ë Xuza'. ³⁰ Neda', en Dios Xuz, tuz nácatu'.

³¹ Leyúbölö yugu' bönni' judío unná bë' na' bulu'guélé'ë guiöj ulu'ladxë' Jesús. ³² Jesús rë' légaquië':

—Zian le naca dxi'a bena' loli' tu' dë lu na'a uláz queë' Xuza'. ¿Ni'a que bízxilö dxin dxi'a ni uládxí'li' neda' guiöj?

³³ Bulu'bi'ë didza' bönni' judío unná bë' na', të' Lë':

—Ni'a que dxin dxi'a bití' uládxí'tu' li' guiöj, pero tu' cabí rnníó' dxi'a queë' Dios, tu' nacu' li' bönáchisó, en run cuinu' Dios.

³⁴ Bubi'ë didza' Jesús, rë' légaquië':

—¿Naru' cabí nazúaj lu guichi lu xibá queéli' ca gunné' Dios, rna: "Neda' rnníá: Nácalí' yugu' díos"? ³⁵ Nöz quéziru' le nazúaj lu guichi lá'ayi nazúaj tsaz. Lu guichi lá'ayi na' rufí' légaquië' díos, bönni' ni' Dios bë'lenë' légaquië' didza'. ³⁶ Dios bubéajë' neda' quez queë', en gusöl-lë'ë neda' yödzölíö ni. ¿Naru' rnnátsali' quia': "Li' bití' rnníó' dxi'a queë' Dios", tu' gunníá: Zxí'inë' Dios naca"? ³⁷ Channö cabí runa' dxin budödë' Xuza' Dios lu na'a, bití' ralla' tséajlë'ëli' neda'. ³⁸ Channö runa' dxin budödë' Dios lu na'a, sal-la' bití' réajlë'ëli' neda' caz, guli' tséajlë' le nácacaga bë' dxin na' runa', para guéquibe'eli' náquië' Dios Xuz tuz len neda', ate' neda' ca' naca' tuz len Xuza'.

³⁹ Leyúbölö gula'zóa gula'bö'ë ila'zönë' Jesús, pero Lë' bulë' lu ná'agaquië'.

⁴⁰ Ní'irö' guyjíë' Jesús leyúbölö ia'tsölá'a yegu Jordán, ga ni' buquilë' Juan bönachi nisa zí'atélö, ate' bugá'anë' Jesús ní'. ⁴¹ Bila'dxin bönachi zían ga zoë' Jesús, ta'nná:

—Le nácatë bití' benë' Juan nitú yöl-la' huáca zxön, pero yúgu'të le gunné' Juan na' ca ral-la' gaca queë' bönni' ni, idütë li zeaj naca.

⁴² Que lë ni na' gula'yéajlë'ë bönni' zían Jesús ga na' zoë'.

11

Le guca cate' gütíë' Lázaro

¹ Dza ní' ré'enë' Lázaro, bönni' Betania, le naca lázagacanu María, en Marta. Nácanu Marta na' xzilanu María na'. ² Nácanu María na' nigula zanë' Lázaro, bönni' na' ré'enë', en nácanu ca' nigula na' gulá'unu le rilá' zxi xi ní'ë Xanru', en buzxinu ní'ë len guitsa' ícjanu. ³ Gula'söl-la'nu nigula zanë' Lázaro na' nu yöjödxi Jesús, gunná:

—Xan, buyútsóca', ré'enë' Lázaro, bönni' na' nadxí'inu'-në'.

⁴ Cate' biyönnë' Jesús didza' ni, gudxë' nupa nacué' ní', rnnë':

—Yödzöhuë' ni bití' naca le guti lë' tsaz, pero naca para ilá' lahui yöl-la' zxön queë' Dios, ate' ni'a que yödzöhuë' ni ilá' lahui ca' yöl-la' zxön quia' neda', Zxí'inë' Dios.

⁵ Jesús nadxí'inë' Marta, en nigula xzilanu Marta na', en Lázaro na'. ⁶ Sal-la' nadxí'inë' Jesús légaquië', cate' biyönnë' ré'enë' Lázaro, bugá'anë' ga na' zoë' ia'chopa dza ca'. ⁷ Cate' bizá'a chopa dza na', Jesús gudxë' yugu' bönni' uséda queë', rnnë':

—Uyéajru' leyúbölö luyú Judea.

⁸ Ní'irö' yugu' bönni' uséda queë' të' Lë', ta'nnë':

—Bönni' Usedi, si' gula'zóa gula'bö'ë bönni' judío unná bë' ni' ulu'ladxë' Li' guiöj. ¿Naru' uyéajtso' leyúbölö ni'?

⁹ Bubi'ë didza' Jesús, rë' légaquië':

—Nacua' caz chinnu hora lahui' dza. Nu bönni' ridë' lahui' dza, biti' tsøjchégu'ë, tu' rilé'enë', tu' zóalen lë' bení' zoa yödzölió ni. ¹⁰ Channó ridë' bönni' na' chi' dzö'öló, röjchégu'ë, tu' cabí zóalen bení' lë'.

¹¹ Cate' budxi bë'ë Jesús didza' ni, ní'iró gudxë' légaquië':

—Rásië' Lázaro, böchi' luzá'aru', ate' tseja' neda', en usubana'-në'.

¹² Ní'iró yugu' bönni' usëda queë' të' Lë', ta'nnë':

—Xan, channó rásië', huóáquië'.

¹³ Gunnë' caní Jesús tu' chigútië' Lázaro, pero légaquië' téquinë' gunnë': Rásië' Lázaro.

¹⁴ Ní'iró Jesús gudxë' légaquië' yálajdo', gunnë':

—Chigútië' Lázaro. ¹⁵ Rudzëjada' tu' cabí zoa' ni', tu' gaca na'a tu le uzí'ili' xibë, le gun ga tséajlë'ëli' neda'. Uyëajru' na'a ga na' dë' Lázaro.

¹⁶ Ní'iró Tomás, bönni' na' tu'ë lë', Bönni' Bilidi' gudxë' ia'zica'rë' bönni' usëda queë' Jesús, rnnë':

—Uyëajru' ca' rë'u, en gátillenru'-në'.

Náquië' Jesús Nu rusubán nupa chinátigaca, enca' Nu nabániru'

¹⁷⁻¹⁹ Dë yödzö Betania gála'só ga dë Jerusalén na', le naca ca rizá'aru' tu hóratëz. Que lë ni na' chibila'dxinë' zían bönni' judío ga na' nacua'anu Marta, en María, en tu'huë tsáhuë'ë légacanu tu' gútië' bönni' zángacanu. Cate' Jesús bidxinë' ni', biyönnë' chiguca tapa dza yu'ë Lázaro na' yeru ba. ²⁰ Cate' biyönninu Marta didza' zë'ë Jesús, ní'iró birúajnu yu'u, yöjtságanu Lë', pero María bugá'ananu yu'u na'. ²¹ Marta na' rënu Jesús:

—Xan, la'tu' zu' ni, biti' gátie' bönni' zana'. ²² Lësca' na'a, nõzda' yúgu'të le inábinu' Dios, Lë' gunnë' quiu'.

²³ Jesús rë'ë-nu:

—Ubanë' bönni' zanu'.

²⁴ Marta rënu Lë':

—Nõzda' ubanë' cate' idxín dza údxi cate' ulu'bán nupa chinátigaca.

²⁵ Ní'iró Jesús rë'ë-nu:

—Naca zaza' neda' Nu rusubán nupa chinátigaca, enca' Nu nabánigaca bönachi. Nu tséajlë' neda', sal-la' gati nu na', ubán caz, ²⁶ ate' yúgu'të bönni' nabánigaciquë', en ta'yéajlë'ë neda', biti' ca' ilatië' tsaz. ¿Réajlë'u lë ni?

²⁷ Marta rënu Lë':

—Ön, Xan. Réajlë'a nacu' Li' Cristo, Zxi'inë' Dios, Bönni' na' guzxi' lu në'ë Dios isöl-lë'ë yödzölió ni.

Ribödxë' Jesús tu' ru'i lãdxë'ë nigula zanë' Lázaro

²⁸ Cate' budxi bë'ënu Marta na' didza' ni, böajnu yu'u, yöjlídzanu María, zxilánu, ate' bagáchi'só rënu lënu:

—Bönni' Usedi zoë' ni, rulidzë' li'.

²⁹ Cate' biyönninu María didza' ni, la' guyástënu, zéajnu ga na' zoë' Jesús. ³⁰ Biti' rázinë' Jesús la' yödzódo' na', pero zóasë' ga na' yöjtságanu Marta Lë'. ³¹ Cate' yugu' bönni' judío na' nacua'lenë' María na', en tu'huë tsáhuë'ë-nu bila'lé'enë'-nu guyásanu, en birúajnu carelô ga naca lu yu'u, ní'iró yöjnógaciquë'-nu, ta'nnë':

—Uyëajnu ra' yeru ba tsøjchödxinu ni'.

³² Ní'iró bidxinnu María ga na' zoë' Jesús. Cate' bilé'enu Lë', biyéchunu xini'ë, en rënu Lë':

—Xan, la'tu' zu' ni, biti' gátie' bönni' zana'.

³³ Cate' bilé'enë' Jesús ribödxinu, en ta'bödxë' ca' bönni' judío na' dzágagaciquë'-nu, ní'iró bui'innë', en gunnëda' lãdxë'ë. ³⁴ Rnnë':

—¿Gazxi bucáchi'li'-në'?

Të' Lë':

—Gudá uyú'.

³⁵ Gurödxë' Jesús. ³⁶ Ní'iró gula'nnë' bönni' judío na', ta'nnë':

—Buli'yútsöca' ca nadxi'ide'enë' lë'.

³⁷ Bal-lë' ta'nnë':

—Bönni' ni benë' ga rilé'enë' bönni' na' zí'alô nachul-la lahuë'. ¿Naru' cabí gúcatsö gunë' ga biti' gátie' Lázaro?

Rubanë' Lázaro lu yöl-la' guti

³⁸ Leyúbölö gunnëda' lãdxë'ë Jesús, ate' bidxinë' ra' yeru ba na'. Ba na' naca tu yeru nadaj lë'ë guí'a guíoj, ate' da' tu guíojta'a le nusayaj ga nu riyaza le. ³⁹ Jesús gudxë' nupa nacua' ni', rnnë':

—Gulí'cúa guíoj ni.

Ní'irö Marta, nigula zanë' bönni' nati na', rënu Lë':

—Xan, chirilë'ë siguti tu' chiguca tapa dza nátië'.

⁴⁰ Jesús rë'ë-nu:

—¿Naru' cabí chigudxi caza' li' channö réajlë'u, hualé'enu' yöl-la' xzön queë' Dios?

⁴¹ Ní'irö gula'gúë' guiójt'a na' nusayaj ga nu riyaza yeru ba ga na' yu'ë bönni' nati na'. Buyüë' Jesús zaca' lúzxibalö, rnnë':

—Xuza', rea' Li', xclenu' tu' riyönnu' neda'. ⁴² Neda' nözda' riyöntiqui'sinu' neda', pero ruá'a didza' ni para ulu'z'í xibé bönachi zían ni, en ila'yéajlë' Li' na' nasöl-lu'u neda'.

⁴³ Cate' budxi bë'ë Jesús didza' ni, zidzaj bulidzë', rnnë':

—Lázaro, burúaj nilö.

⁴⁴ Burúajë' bönni' na' gúquië' bönni' nati lu yeru ba, naröligacarö ni'a në'ë yugu' lári'do', en nagachi' ca' lahuë' ia'tu lári'do'. Ní'irö Jesús rë' légaquië':

—Buli'li lari' na' naröli ni'a në'ë, en guli'gu'ë lataj së'ë.

Tun xtídzë'ë yugu' bönni' judío unná bë' ilútië' Jesús

(Mt. 26:1-5; Mr. 14:1-2; Lc. 22:1-2)

⁴⁵ Ní'irö zían bönni' judío na' gula'yéajlë'ë Jesús, bönni' na' yójacalenë' tsözxön María, en bila'lé'enë' lë na' benë' Lë'. ⁴⁶ Bal-lë' yójáquië' ga nacu'ë bönni' yudo' fariseo, en bulu'siyönnë' légaquië' ca na' benë' Jesús. ⁴⁷ Ní'irö bönni' yudo' fariseo na' bulu'dúbilenë' tsözxön bönni' yudo' tu'chi'a tu'söröë', en yugu' bixúz unná bë', ta'nnë':

—¿Nacxi caz gunru'? Runë' bönni' ni zían yöl-la' huáca xzön. ⁴⁸ Channö güf'isiru'-në' lataj gunë' ca ni run cazë', ila'yéajlë' yúgu'të bönachi Lë', ate' idijáquië' bönni' Roma ni, duquinnajgaquië' yudo' lá'ayi queëru', en yödzo queëru'.

⁴⁹ Ní'irö bë'ë didza' Caifás, bixúz lo iz na', en dzágüië' légaquië', rë' légaquië':

—Lib'ili' biti' bi nözili', ⁵⁰ en biti' réquibe'eli' run bayudxi gátië' tuë' bönni' ni'a quégaca bönachi, para cabí initi idú yödzo.

⁵¹ Calëga ríacasö queë' bë'ë didza' ni, pero tu' náquië' bixúz lo iz na', que lë ni na' bë'ë didza' uláz queë' Dios ca ral-la' gátië' Jesús ni'a quégaca bönachi yödzo na'. ⁵² Gátië' Jesús, calëgasö ni'a que yödzo na', pero gátië' ca' para utubë' yugu' xzi'inë' Dios násilasigaquië', para ilácaçaquië' tuz. ⁵³ Caní guca, la' dza ná'asö gulún xtídz'a'gaquië' ilútië' Jesús. ⁵⁴ Que lë ni na' bití'rö gudë' Jesús yálajdo' gapa nacua' bönachi judío, pero buzë'ë ni, sa'yéajë' tu lataj gala' ga naca lataj cá'asö, ate' bidxinë' yödzo Efraín, ga ni' bugá'anë', ate' dzágagaquië' bönni' usëda queë' Lë'.

⁵⁵ Dza na' chizá' gala' Laní Pascua quégaquië' bönni' judío cate' tu'subanë' ca benë' Dios, bubéajë' bönachi queë' luyú Egipto. Bila'rúaj bönachi zían yugu' yödzo ni', ate' gula'benë', sójajúië' Jerusalén cate' si' idxín laní na' para tsöjpa'a cuíngaquië' ca naca que yudo'. ⁵⁶ Yugu' bönni' na' nacu'ë Jerusalén tu'guiljë' Jesús, en cate' ni' nacu'ë chila yudo', gula'nabi luzá'agaquië' tuë' ia'túë', ta'nnë':

—¿Bixxi rusáca'li'? ¿Huídatsë' laní, o biti' guídë'?

⁵⁷ Chigula'nná bë'ë yugu' bixúz unná bë', en yugu' bönni' yudo' fariseo channö nu nözi ga zoë' Jesús, ral-la' ududíxjöi'i légaquië' para gaca tsöjxóngagaquië' Lë'.

12

María rigú'unu le rilá' zixixi ni'ë Jesús

(Mt. 26:6-13; Mr. 14:3-9)

¹ Cate' ni' nagá'anagaca ia'xopa dza cate' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto, ní'irö bidxinë' Jesús lu yödzo Betania, ga na' zoë' Lázaro, bönni' na' gútië', en bubanë' lu yöl-la' guti. ² Gula'gu'ë tu gú'i huagu ni' le gahuë' Jesús. Gulú'unu María le ilahuë', ate' nútsë'ë Lázaro ladaj bönni' rö'öngaqüië' Jesús ga na' tahuë'. ³ Ní'irö gudéla'nu María ca tu guié le rilá' zixixi que yöj susén lasi idú, le nazáca'da', en gulú'unu le ni'ë Jesús. Buzxinu ni'ë len guitsa' ícjanu. Idútë lu yu'u na' guzë bö' zixixi. ⁴ Ní'irö bë'ë didza' tu bönni' usëda queë' Jesús, lë' Judas Iscariote, xzi'inë' tu bönni' lë' Simón, en náquië' bönni' na' udödë' Jesús lu ná'agaquië' yugu' bönni' yudo', rnnë':

⁵ —¿Bixx que biti' gudó'o le rilá' zixixi na', le nazaca' lázxjaru' que tu iz, ate' huáca nu quisi dumí na' quégaca bönachi yechi'?

⁶ Gunnë' caní, calëga tu' ru'i'ládxë'ë bönachi yechi', pero tu' náquië' gubán, en lë cazë' nu'ë buzudi dumí quégaquië', en rubéajlanë' dumí na' tu'chejë' lu buzudi na'. ⁷ Ní'irö Jesús rë' lë':

—Bë'ë-nu lataj, tu' naca lë ni bennu tu le nabá'a para dza igácha'a. ⁸ Yugu' bönachi yechi' ila'cuá'lentica'sö lib'ili', pero neda' biti' ugá'anatica'sa' ga zoáli'.

Tun xtídz'a'gaquië' bönni' judío unná bë' ilútië' Lázaro

⁹ Cate' bila'yönnë' bönni' judío zoë' Jesús yödz Betania, bila'dxinë' zíanë' ni', calëgasö tu' zoë' Jesús ni', pero lësca' tu' t'ë'ennë' ila'lé'enë' Lázaro, bönni' na' busubanë' Jesús lu yöl-la'

guti. ¹⁰ Ní'irò gulún xtídza'gaquiè' yugu' bixúz unná bè', ilútiè' ca' Lázaro, ¹¹ tu' ta'yéajlè'è zían bönni' judío Jesús ni'a queè' Lázaro na', en chinulá'alengaquiè' yugu' bixúz unná bè' na'.

*Len yöl-la' ba zxön raziè' Jesús Jerusalén
(Mt. 21:1-11; Mr. 11:1-11; Lc. 19:28-40)*

¹² Bönachi zían bila'dxín Jerusalén dza Laní Pascua, ate' dza buropi na' ta'yöni zè'è Jesús ni'. ¹³ Ní'irò gula'guitsjè' zin, en bila'rúajè' sòjxi'gala'gaquiè' Jesús, ate' gulu'è zidzaj didza', ta'nnè':

—jYöl-la' ba Dios! jYöl-la' ba Bönni' ni zè'è uláz queè' Xanru', para inná bé'enè' bönachi Israel!

¹⁴ Budzölinè' Jesús tuba' búrrodo', ate' gudxié'-ba' ca na' nazúaj lu guichi lá'ayi, rnna:

¹⁵ jBiti' gádxili', libí'ili', zóali' yödzo Sión!
jBuli'yútsóca, zè'è Bönni' inná bé'enè' libí'ili'!
jDxié'-ba' tuba' búrrodo'!

¹⁶ Cate' ni' si' guca lè ni, biti' gula'yéajni'inè' bönni' usèda queè' Jesús, pero gudödi ni', cate' hupanè' Jesús lu yöl-la' guti, en buèpè' yehua' yubá queè', ní'irò yójnéguequinè' lè ni nazúaj lu guichi lá'ayi ca ral-la' gaca queè', ate' guca queè' caní.

¹⁷ Lè'sca' yugu' bönni' na' gula'cuá'lenè' Jesús cate' ni' bulidzè' Lázaro, bönni' na' yu'è yeru ba, en busubanè' lè' lu yöl-la' guti, gulunè' ba nalf queè'. ¹⁸ Que lè ni na' ca' bila'rúajè' bönni' yójxi'gala'gaquiè' Jesús, tu' bila'yönnè' ca naca yöl-la' huáca ni benè' Lè'. ¹⁹ Ní'irò gula'nnè' la' légcasè' bönni' judo' fariseo, ta'nnè':

—Chinaca bé' biti' bi séqui'ru' gunru'. Buli'yú ca dá'gaca yúgu'tè bönachi Lè'.

Yugu' bönni' zi'tu' tu'guiljè' Jesús

²⁰ Bal-lè' bönni' zi'tu' dzágaqaquiè' nupa na' bila'dxín Jerusalén dza Laní Pascua na' para ila'yéaj ládxi'gaquiè' Dios. ²¹ Yugu' bönni' zi'tu' na' bila'dxinè' ga zoè' Felipe, bönni' Betsaida que luyú Galilea, ate' guláta'yue' lahuè', ta'nnè':

—Bönni', rè'ènit'u' ilé'etu'-nè' Jesús.

²² Guyijè' Felipe na', en yójdxè' ca' Andrés. Ní'irò Andrés, en Felipe na' gulè' ca' Jesús. ²³ Bubi'è didza' Jesús, rè' légaquiè':

—Chizóa idxín dza gátia' neda', Bönni' Guljè' Bönachi, huöja' xilatja' yehua' yubá. ²⁴ Le nácatè' rea' libí'ili': Ugá'ana cá'asò tu xisedo' channò cabí igachi' luyú, en údxi que. Channò údxi que xisedo' na', ate' ilén, yènni'tèrò unódzaj. ²⁵ Nu bönni' ru'í ládxi'dè'è yöl-la' na'bán queè', unítiè' le, tu' gátie' tsaz bönni' na'. Nu bönni' biti' ru'í ládxi'è yöl-la' na'bán dè' queè' yödzólió ni gun chí'è le ga idxinrò dza gata' yöl-la' na'bán idú queè'. ²⁶ Channò rè'èné' nu bönni' gunè' xichina', ral-la' tè'è neda' bönni' na', ate' ga ni' tsòjsóa' neda', ni' tsòjsóé' ca' bönni' na' runè' xichina'. Channò runè' xichina' nu bönni', Xuza' Dios gunè' bal bönni' na'.

Rigútxjò'è Jesús ca si' ilútiè' Lè'

²⁷ Gunnè' ca' Jesús:

—Na'a rò'a böniga neda'. ¿Nacxi innatsa'? ¿Naru' innía': Xuza', busölá neda' lu le gaca quia' na'a? Que lè ni na' bida', para guá' ilena' le ral-la' gaca quia' na'a. ²⁸ Xuza', ben ga ilá' lahui yöl-la' zxön quiu'.

Ní'irò biyón chí'i Nu ru'í didza' yehua' yubá, rnna:

—Chibéna' ga nalá' lahui yöl-la' zxön quia', ate' leyúbölö guna' ga ilá' lahui yöl-la' zxön quia' na'.

²⁹ Bila'yöni bönachi zían nacuá' ni' chí'i ni, ate' ta'nná:

—Guziú' na' gunné.

Ia'bal-la bönachi na' ta'nná:

—Tu gubáz lá'ayi queè' Dios bé'lenè' Lè' didza'.

³⁰ Ní'irò bubi'è didza' Jesús, rè' légaquiè':

—Biyón chí'i ni, calèga para uzi'a xibé neda', pero para uzí'ili' xibé libí'ili'. ³¹ Chibidxín dza uchi'a usöröè' Dios bönachi yödzólió ni. Na'a chú'unè' Dios tu' xihui' ní'ilo, nu na' rinná be'e bönachi yödzólió ni. ³² Na'a, channò ilútiè' bönni' neda', en ulu'chisé' neda' xitsá', guna' ga ulu'dubi yúgu'tè bönachi ga zoa'.

³³ Didza' ni bé'è Jesús naca bé' ca gátie'. ³⁴ Bönachi zían na' tè Jesús, ta'nná:

—Netu' biyónitu' nupa bulu'laba le rnna xibá queè' Dios, lè na' rnna: Sóatica'sé' Cristo. ¿Nacxi caz naca, rnno' Lí: "Run bayudxi Bönni' Guljè' Bönachi, ulu'chisé' Lè' xitsá'"? ¿Nuzxi na' Bönni' Guljè' Bönachi?

³⁵ Ní'irò Jesús rè' légaquiè':

—Ia'tú chí'ido'osó soálena' neda' libí'ili', en naca' bení' queéli'. Guli'tá tsanni ni zóalena' libí'ili', en zóalen bení' libí'ili', para cabí ichul-la inítiti'. Nu bönni' ridè' ga chul-la niti biti'

nózinë' gazzi sa'yéajë'. ³⁶ Tsanni ni zóalena' libí'ili', naca' bení' queéli'. Guli'tséajlë' neda' naca' bení' queéli' para ilé'eli' bení' na' naca idú.

Cate' Jesús budxi bē'ë didza' ni, yōjhuōjē' yōjchachi' lahuē' lógaquiē'.

Le run nigui bōnachi judío, para cabí ila'yéajlë' Jesús

³⁷ Sal-la' benē' Jesús zían yōl-la' huáca lógaquiē', bití' gula'yéajlë'ë Lë'. ³⁸ Caní guca lë na' buzúajë' Isaías lu guichi, bōnni' na' bē'ë didza' uláz queē' Dios, gunnë':

Xan, ¿nuzxi caz guyéajlë' didza' bē'ëtu'?

¿Nuzxi caz buluí'inē' Xanru' yōl-la' huáca queē'?

³⁹ Caní guca, bití' guca ila'yéajlë'ë Jesús. Guca ca na' gunnë' ca' Isaías:

⁴⁰ Dios benē' ga gula'chul-la gula'nitiē',

ate' guca zidi ládxi'do'gaquiē'

para cabí ila'lé'enē' len guiōj lógaquiē',

en cabí ila'yéajni'inē' lu icja ládxi'do'gaquiē'.

Bití' ulu'huóaqiē' quia' para úngaca'-nē'.

⁴¹ Bē'ë Isaías didza' ni tu' bilé'enē' yōl-la' xōn queē' Cristo, en bē'ë didza' ca naca queē' Lë'. ⁴² Sal-la' raca caní, gula'yéajlë' bōnachi zían Jesús, ga bidxintë' gula'yéajlë'ë bal-lë' bōnni' unná bē' Lë', pero tu' tádxinē' yugu' bōnni' yudo' fariseo, bití' gulunē' ba nalí queē' yálajdo', para cabí ulu'béajlë' légaquiē' tsaz ga na' tu'dubē' tu'sedē' queē' Dios. ⁴³ Caní gulunē' tu' tunrē' xōn le tun bōnachi légaquiē' bal ca le runē' Dios légaquiē' bal.

Ilún didza' bē'ë Jesús ga irugu quégaca bōnachi ilátigaca

⁴⁴ Bē'ë zidzaj didza' Jesús, rnnē':

—Nu bōnni' réajlë'ë neda', calëga neda'sō réajlë'ë, pero réajlë'ë ca' Xuza' nasól-lë'ë neda'.

⁴⁵ Lësa' caní, nu bōnni' rilé'enē' neda', rilé'enē' ca' Xuza' nasól-lë'ë neda'. ⁴⁶ Neda' naca' bení', en bida' yōdzóliō ni, para cabí ulu'gá'anē' ga chul-la yúgu'të bōnni' ila'yéajlë'ë neda'.

⁴⁷ Channō riyōnnē' nu bōnni' xtídza'a, en bití' runē' le bal, calëga neda' ichuga' queē' bōnni' na' gátie', tu' bida' ni, calëga para ichuga' quégaca bōnachi yōdzóliō ni, pero para usólá' bōnachi yōdzóliō ni. ⁴⁸ Nu bōnni' ruzóë' neda' tsólá'alō, en bití' rizi' lu nē'ë xtídza'a, chizóa le ichugu queē' bōnni' na'. Didza' na' chibē'lēna' libí'ili' naca tu le ichugu queē' bōnni' na' dza údxi.

⁴⁹ Caní naca, ruá'a didza', calëga rácasō quia', pero Xuza' nasól-lë'ë neda' gudxë' neda' le ral-la' innía', enca' ca ral-la' gu'a didza'. ⁵⁰ Nōzda' gunná bē'ë Dios caní para gata' yōl-la' na'bán idú quégaca bōnachi. Caní naca, didza' na' ruá'a, ruá'a didza' ca na' Xuza' chigudxi cazē' neda'.

13

Jesús riguibē' ní'agaquiē' bōnni' usëda queē'

¹ Ní' naca dza si' idxín Laní Pascua cate' tu'subanē' bōnni' judío ca benē' Dios, bubéajë' bōnachi queē' luyú Egipto. Nōzinë' Jesús chibidxín dza queē' gátie', cate' ral-la' uzé'ë yōdzóliō ni, en huōjē' ga zoē' Xuzē'. Ca na' nadxí'inē' bōnachi queē' nacua' yōdzóliō ni, na'a nadxí'inē' légaquiē' ga idxintë' gátie' uláz quégaquiē'.

² Satanás tu' xihui' chinagú'u yōl-la' Judas Iscariote, zxí'inē' tu' bōnni' lë' Simón, para udodē' Jesús lu ná'agaca nupa iluti Lë'. ³ Nōzinë' Jesús ca naca, birúajë' ga zoē' Dios, en huōjē' ca' ga na' zoē' Dios, ate' Dios Xuzē' chinudodē' lu nē'ë Lë' iduté' yōl-la' unná bē' queē'.

⁴ Que lë ni na', cate' ní' tahuē', guzuinē' Jesús, en gudúé' lari' rixóa yenē'. Gudé'lë'ë tu' lari' ruzzini ná'aru' le budé'ë lë'ë. ⁵ Ní'irō gudé'ë nisa tu lu xziga' guié', ate' gusi lahuē' riguibē' ní'agaquiē' bōnni' usëda queē', en ruzzinē' ní'agaquiē' len lari' na' da' lë'ë.

⁶ Cate' bidxinē' ga rō'ë Simón Pedro, Pedro na' rē' Lë':

—Xan, ¿naru' Lí' quibitso' ní'a?

⁷ Bubi'ë didza' Jesús, rē' lë':

—Lë ni runa', bití' réajni'ininu' na'a, pero huadzé tséajni'inu'.

⁸ Ní'irō Pedro rē' Lë':

—Bití' ca' quibi cazu' Lí' ní'a.

Jesús rē' lë':

—Channō neda' bití' quiba' lí', bití' ca' séqui'nu' gunu' neda' tsōzxōn.

⁹ Ní'irō Simón Pedro rē' Lë':

—Xan, calëgasō ní'a quibu', pero quibu' ca' na'a, en icja'.

¹⁰ Jesús rē' lë':

—Nu nayari, ní'asō run bayudxi tsari, tu' naca cazē' dxi'a iduté', ate' libí'ili' nácali' dxi'a, pero calëga yúgu'téli'.

¹¹ Gunnë' caní Jesús: “Calëga yúgu'téli' nácali' dxi'a”, tu' nōzinë' núlógaquiē' na' udōdi Lë'.

¹² Gudōdi gudibē' Jesús ní'agaquiē', buguelé'ë lari' na' buxóa yenē'. Bubō'ë ga tahuē', ate' rē' légaquiē':

—¿Réajni'ili' lè na' si' bena' queéli'? ¹³ Libí'ili' ruí'ili' La': Bönni' Usedi enca': Xan. Dxi'a naca ca rnnali', tu' caní naca'. ¹⁴ Na'a, channò neda' naca' Xanli', en Bönni' Usedi queéli', ate' gudiba' ní'ali', lësca' caní ral-la' gunli' libí'ili', quíbili' ni'a luzá'ali' tuli' ia'tuli'. ¹⁵ Tu le buluf'ida' libí'ili' para gunli' libí'ili' ca na' bena' neda'. ¹⁶ Le nácatè rea' libí'ili': Biti' nayëpisëtërè' tu bönni' huen dxin ca xanè', ate' bönni' gubáz bití' nayëpisëtërè' ca nu nasöl-la' lè'. ¹⁷ Channò réajni'ili' yúgu'tè lè ni, bica' ba libí'ili' channò gunli' caní. ¹⁸ Didza' ni ruá'a bití' rea' yúgu'téli'. Nöz quézida' nupa guró caza' neda', pero run bayudxi gaca lè na' nazúaj lu guichi lá'ayi, le rnna: "Nu rágulen neda' tsözxón, nu ni tá'baga' neda'." ¹⁹ Na'a riguixjöi'ida' libí'ili' zí'alò ca gaca, para cate' gaca caní, tséajlè'èli' zoa caza' neda'. ²⁰ Le nácatè rea' libí'ili': Nu bönni' gunè' bal gubáz isöl-la'a neda', neda' ca' gunè' bal, ate' nu bönni' gunè' neda' bal, gunè' ca' bal Xuza', nasöl-lè'è neda'.

Ríguixjö'ë Jesús ca gunè' Judas, udödè' Lè'
(Mt. 26:20-25; Mr. 14:17-21; Lc. 22:21-23)

²¹ Cate' Jesús budxi bè'è didza' ni, buí'innè', ate' yálajdo' gunnè':

—Le nácatè rea' libí'ili': Tu bönni' nùtsè'è ládjali' udödè' neda'.

²² Ní'irò bulu'yú lo luzá'agaquiè' tuè' ia'tué' bönni' usèda queè', en gula'cu'è böniga, ate' ta'naba ládxi'gaquiè' nuzxi que na' gunnè' Jesús caní. ²³ Tuè' bönni' usèda queè' Jesús, bönni' na' Jesús nadxi'inè' lè', zoè' cuita lè'è. ²⁴ Simón Pedro bulá'a buluf'isè' bönni' ni para inábinè' Jesús nuzxi que na' gunnè' caní. ²⁵ Ní'irò bönni' na' zoè' cuita lè'è Jesús rè' Lè':

—Xan, ¿nuzxi na' ru'u didza' que?

²⁶ Bubi'è didza' Jesús, rè' lè':

—Náquiè' bönni' na' gu'a-nè' yóta xtila nabisa.

Ní'irò busubisiè' yóta xtila na', en bè'è queè' Judas Iscariote, zxf'inè' tu bönni' lè' Simón.

²⁷ Gudödi gudahuè' Judas yóta xtila na', guyaza Satanás tu' xihui' icja ládxi'da'ahuè'. Ní'irò Jesús rè' lè':

—Lè na' gunu', yöjentè na'a.

²⁸ Biti' ta'yéajni'inè' ia'zica'rè' bönni' usèda queè' rő'ögaquiè' tahuè' bizx que na' Jesús gudxè' lè' caní. ²⁹ Tu' nu'è Judas buzudi dumí' quégaquiè', téquinè' bal-lè' Jesús gudxè' lè': Yöxi' le gáguru' laní, o gunnè': Bè' lati' quégaca bönachi yechi'. ³⁰ Cate' budxi gudahuè' Judas yóta xtila na', en ní' naca chi' dzö'ölö, la' birúajté'.

Tu xibá cubi

³¹ Cate' chibirúajè' Judas na', ní'irò gunnè' Jesús:

—Na'a chizóa ilá' lahui yöl-la' zxon quia' neda', Bönni' Guljè' Bönachi, en ilá' lahui ca' yöl-la' zxon queè' Dios. ³² Channò ilá' lahui yöl-la' zxon queè' Dios ni'a quia' neda', Zxf'inè', lësca' Lè cazè' Dios gunè' ga ilá' lahui yöl-la' zxon quia' neda', Zxf'inè', en la' guntè' caní. ³³ Libí'ili', zxi'ina'do', ia'tú chí'isö zóalena' libí'ili'. Uguíjaji' neda', ate' ca na' chigúdxigaca-nè' bönni' judío, lësca' rea' libí'ili' na'a: Ga na' tseja' neda', bití' gaca gúidali' rásaco queéli'. ³⁴ Rea' libí'ili' tu xibá cubi le rnna caní: Guli'dxi'í luzá'ali' tuli' ia'tuli'. Ca na' neda' nadxf'ida' libí'ili', lësca' caní ral-la' idxf'ili' luzá'ali' tuli' ia'tuli'. ³⁵ Channò huadxí'í luzá'ali' tuli' ia'tuli', iléquite'ca yúgu'tè bönachi dá'ali' neda'.

Rnnè' Jesús innè' Pedro bití' núnbè'è Lè'

(Mt. 26:31-35; Mr. 14:27-31; Lc. 22:31-34)

³⁶ Ní'irò Simón Pedro gunábinè' Jesús, rnnè':

—Xan, ¿gazxi caz tseju'?

Bubi'è didza' Jesús, rnnè':

—Ga na' tseja' neda', bití' gaca sá'lenu' neda' na'a, pero huadzé guídu' ga tseja' neda'.

³⁷ Pedro rè' Lè':

—Xan, ¿bizx que bití' gaca sá'lenu' Li' na'a? Chizóa' udöda' yöl-la' na'bán quia', gátia' tu' nadxf'ida' Li'.

³⁸ Bubi'è didza' Jesús, rè' lè':

—¿Naru' udödu' yöl-la' na'bán quiu' tu' nadxf'inu' neda'? Le nácatè rea' li', zí'alò ca cödxiba' böra, li' tá'bágu'u tsonna luzuí, innó' bití' núnbè'u neda'.

14

Náquiè' Jesús nöza tséajlennru' ga zoè' Dios Xuz

¹ Rnnè' Jesús:

—Bití' cö'li' baniga lu icja ládxi'do'oli'. Guli'tséajlè' Dios, en guli'tséajlè' ca' neda'. ² Lu yú'u lidxè' Xuza' lataj zían nacua'. La'tu' cabí naca caní, neda' chigudxi caza' libí'ili'. Tseja' na'a, tsöjpa'a lataj queéli' ga tsöjsóali'. ³ Channò huayéaja', en tsöjpa'a lataj queéli' ga tsöjsóali',

huóda leyúbölö, ate' uchë'a libí'ili' lataj quia', para ga na' tsöjsó'a' neda', tsöjsóali' ca' libí'ili'.
 4 Nöz quezíli' ga ni' tseja', en núnbë'ëli' ca' nôza.

⁵ Tomás rë' Lë':

—Xan, bití' nõztu' gazxi na' tseju'. ¿Nacxi caz gaca gúnbë'ëtu' nôza?

⁶ Bubi'ë didza' Jesús, rë' lë':

—Neda' naca caza' nôza, en naca' ca' le naca idútë li, en naca' ca' Nu nabánigaca bônachi. Ni'a quia' neda'sö gaca nu idxín ga zoë' Dios Xuz. ⁷ La'tu' núnbë'ëli' neda', Xuza' ca' núnbë'ëli'-në'. Na'a, núnbë'ëli'-në', en chibilë'ëli'-në'.

⁸ Ní'irö Felipe rë' Lë':

—Xan, buluí'i netu' Xuzu', ate' nácatë queëtu'.

⁹ Bubi'ë didza' Jesús, rë' lë':

—Felipe, xidzé chiguca zóalena' libí'ili'. ¿Naru' cabí núnbë'ëtso' neda'? Nu bönni' rilé'enë' neda', rilé'enë' ca' Xuza'. ¿Rnmatso: “Buluí'i netu' Xuzu'”? ¹⁰ ¿Naru' cabí réajlë'u zóalen caza'-në' Xuza', ate' Xuza' zóalen cazë' neda'? Yugu' didza' ni ruí'lena' libí'ili', calëga rácasö quia' ruá'a didza' ni, pero Xuza' zóalen cazë' neda', Lë cazë' runë' dxin ni. ¹¹ Guli'tséajlë' neda', zóalen caza'-në' Xuza', ate' Xuza' zóalen cazë' neda'. Channö cabí gaca gunli' caní, guli'tséajlë' neda' ni'a quegaca dxin ni runa'. ¹² Le nácatë rea' libí'ili': Yugu' dxin ni runa' neda', lë'sca' gunë' bönni' na' réajlë'ë neda', ate' le zxöntërö ca' gunë' bönni' na' tu' huója' ga zoë' Dios Xuz. ¹³ Yúgu'të le inábali' Dios Xuz, en ugunli' dxin La' neda', neda' guna' lë na' inábali', para ulu'a lahuí neda', Xzí'inë', yöl-la' zxon queë' Dios Xuz. ¹⁴ Bítí'tës bi inábali', en ugunli' dxin La' neda', neda' guna' le.

Jesús isöl-lë'ë Dios Bô' Lá'ayi, para idisóalene' bônachi queë'

¹⁵ Rnnë' ca' Jesús:

—Channö nadxí'ili' neda', guli'gún le rea' libí'ili', ¹⁶ ate' neda' gáta'yua' lahuë' Dios Xuz, ate' Lë' isöl-lë'ë queëli' Nu yúbölö Nu gácalen libí'ili', Nu utipa ládxi'li', en sóalenta'sö libí'ili'. Nu ni naca Dios Bô' Lá'ayi, Nu ruí' didza' idútë li. ¹⁷ Bití' gaca ulu'z' bônachi yödzoéliö ni xibë' Lë', tu' cabí gaca ila'lé'e Lë', en bití' gaca ilúnbe'e Lë'. Zóalen cazë' libí'ili', ate' soë' lu icja ládxi'do'oli'. ¹⁸ Bití' ucá'ana' libí'ili' ca' yugu' bi'i uzëbido'. Huóda' udusóalena' libí'ili'. ¹⁹ Ia'tú chí'ido'osö bití'rö ila'lé'e bônachi yödzoéliö ni neda', pero libí'ili' ulé'eli' neda'. Tu' zoa caza' nabana' neda', libí'ili' ca', tsaz sóali' ibanli'. ²⁰ Dza ní'irö cate' Dios Bô' Lá'ayi na' idisóalene' libí'ili', inöz quezíli' zóalen caza'-në' Xuza' Dios, ate' libí'ili' zóaleni' neda', ate' neda' ca' zóalen caza' libí'ili'. ²¹ Nu bönni' riza' lu në'ë xtídza'a, en runë' ca' rnna, naca bë' nadxí'inë' neda'. Xuza' Dios idxí'inë' bönni' na' nadxí'inë' neda', ate' neda' idxí'ida'-në' bönni' na', en uluí' lahua' lahuë'.

²² Judas rë' lë', pero calëga Judas Iscariote, rnnë':

—Xan, ¿nacxi caz gaca uluí' lo' lotu' netu', en bití' uluí' lo' lógaca bônachi yödzoéliö?

²³ Bubi'ë didza' Jesús, rë' lë':

—Nu bönni' nadxí'inë' neda' gunë' ca' rnna xtídza'a, ate' Xuza' Dios idxí'inë' bönni' na', ate' guídatu' idisóalentu'-në' bönni' na' lu icja ládxi'da'ahuë'. ²⁴ Bönni' na' bití' nadxí'inë' neda' bití' runë' ca' rnna xtídza'a. Didza' na' biyónili' bë'a neda', calëgasö quia' na', pero naca queë' Dios Xuz nasöl-lë'ë neda'.

²⁵ Rë' caza' libí'ili' yugu' lë ni tsanni ni zóalena' libí'ili', ²⁶ pero Dios Bô' Lá'ayi gácalenë' libí'ili', en utipë' ládxi'li'. Xuza' Dios isöl-lë'ë Lë' queëli' tu' ugunli' dxin La' neda'. Usédinë' libí'ili' yúgu'të, en usë'ë ládxi'li' ca' naca yúgu'të didza' na' chigudxa' libí'ili'.

²⁷ Rucá'ana' queëli' le cuéqui dxi ládxi'li'. Runna' queëli' yöl-la' rë'ö dxi ladxi' quia'. Yöl-la' rë'ö dxi ladxi' na' runna' queëli' bití' naca ca le tunna queëli' bônachi yödzoéliö ni. Bití' ichixi icja ládxi'do'oli', en bití' gadxi idzöbili'. ²⁸ Chibiyónili' ca' na' chigudxa' libí'ili': Huója', ate' huóda' udusóalena' libí'ili'. La'tu' nadxí'ili' neda', udzéjali' cate' ni' gudxa' libí'ili' huója' ga zoë' Dios Xuz, tu' nayépisëtëre' Dios Xuz ca neda'. ²⁹ Na'a, chigudxa' libí'ili' zí'alö ca si' gaca, para cate' gaca caní, tséajlë'ëli' neda'.

³⁰⁻³¹ Bítí'rö gü'ílëna' libí'ili' didza' zían, tu' za' tu' xihuí, nu rinná be'e bônachi yödzoéliö ni. Sal-la' bití' bi dë lu në'e bi gun quia' neda', ral-la' gaca caní para iléquibe'e bônachi yödzoéliö ni nadxí'ida'-në' Dios Xuz, en runa' ca' na' chigudxë' neda' guna'. Guli'chasa, uzá'aru' ni.

15

Ca naca que lubá uva, en ni'a në'e lubá na'

¹ Lë'sca' caní Jesús gudxë' légaquie':

—Naca' neda' ca tu lubá uva le naca idú dxi'a, ate' Xuza' náquie' ca bönni' guz gú'una rapa chí'ë lubá na'. ² Ugüë' yúgu'të ni'a në'e lubá na' naca' neda', le cabí bi ta'bía, ate' uchí'ë yúgu'të ni'a në'e na' ta'bía, para ila'bía ia'lati'. ³ Libí'ili' chinácali' dxi'a ni'a que didza' na' chibë'lëna' libí'ili'. ⁴ Guli'dá'tica'sö neda', ca' na' neda' dá'tica'sa' ca' libí'ili'. Ca naca que ni'a

në'e lubá na', bití' gaca bi cuía rácasö que, channö cabí dá'tica'sö lubá na', lësca' caní naca queéli', bití' bi gaca gunlí' channö cabí tá'tica'sili' neda'.

⁵ 'Naca' neda' ca lubá na', ate' libí'ili' nácali' ca ni'a në'e. Nu bönni' dá'tica'së' neda', ca na' neda' dá'tica'sa' lë', bönni' ni náquië' ca ni'a në'e lubá na' ribía yenni', tu' channö nulá'alenlí' neda', bití' bi gaca gunlí'. ⁶ Nu bönni' bití' dá'tica'së' neda', gaca queë' ca raca quegaca ni'a në'e lubá na' bití' nacagaca dxi'a, ta'ru'unë' ni'a në'e na', ate' ila'bidxi. Cate' chinabídxigaca ni'a në'e na', ulu'tubë' léguequi, en ila'gu'ë léguequi lu guí', ate' tséguigaca.

⁷ 'Channö tá'tica'sili' neda', en gunlí' ca rnna xtídza'a, huáca inábali' bi guë'ënili', ate' neda' guna' lë na' inábali'. ⁸ Gunlí' bal Xuza' Dios cate' gunlí' xichinë', ate' gácali' ca ni'a në'e lubá na' ta'bia, en caní gaca bë' nácali' luzë'ë tu' nadxí'inë' ta'dë'ë neda'. ⁹ Ca na' nadxí'inë' Dios Xuz neda', lësca' caní nadxí'ida' libí'ili'. Guli'gúntica'sö ca ral-la' gunë' bönni' nadxí'ida'-në'. ¹⁰ Channö gunlí' ca rea' libí'ili', gunlí' ca ral-la' gunë' bönni' nadxí'ida'-në', ca na' neda' ca' runa' ca chigudxë' Xuza' Dios neda' guna', en rúntica'sa' le raza ládxi'ë Lë', Bönni' na' nadxí'inë' neda'.

¹¹ 'Yugu' didza' ni rea' libí'ili' para udzëjaleni' tsözxön neda', en gaca idú ca na' udzëjali'. ¹² Lë ni naca le rea' libí'ili' gunlí': Guli'dxi'i luzá'ali' tuli' ia'tuli', ca na' neda' ca' nadxí'ida' libí'ili'. ¹³ Bití' gaca idxí'irönë' nu bönni' luzë'ë ca nu bönni' udodë' yöl-la' na'bán queë', gátíë' para gácalenë' yugu' böchi' luzë'ë tu' nadxí'inë' légaquië'. ¹⁴ Libí'ili' nácali' böchi' luzá'a channö gunlí' ca na' chigudxa' libí'ili' gunlí'. ¹⁵ Bití'rö innía' queéli' nácali' huen dxin quia', tu' cabí nözínë' bönni' huen dxin naca gunë' xanë'. Neda' chigunnía' queéli' nácali' böchi' luzá'a, tu' chibena' ga nözili' yúgu'të le chigudxë' Xuza' neda' guna'. ¹⁶ Calëga libí'ili' guröli' neda', pero neda' gurö caza' libí'ili', en buzóa' libí'ili' para tséajli' bi tsöjenli', ca na' tu' ni'a në'e lubá na' ta'bia yenni', ate' ugá'anatica'sö lë na' gunlí'. Caní gaca, Xuza' Dios gunné' queéli' yúgu'të le inábali' Lë', en ugunlí' dxin La' neda'. ¹⁷ Lë ni naca le rea' libí'ili' gunlí': Guli'dxi'i luzá'ali' tuli' ia'tuli'.

Bönachi yödzülió tu' zóa tsölá' aló Jesús, en nupa dá'gaca Lë'

¹⁸ Gunnë' ca' Jesús:

—Channö bönachi yödzülió ni tu' zóa libí'ili' tsölá'aló, nözili' chibulu'zöë' neda' tsölá'aló zí'aló ca tu'zöë' libí'ili' tsölá'aló na'a. ¹⁹ La'tu' nácali' tuz len bönachi yödzülió ni, huala'dxi'i bönachi yödzülió ni libí'ili' ca na' ta'dxi'i luzë'eguequi, pero tu' zóa bönachi yödzülió ni libí'ili' tsölá'aló tu' cabí nácali' tuz len léguequi, tu' gurö caza' neda' libí'ili', en gulëaja' libí'ili' ladaj bönachi yödzülió ni. ²⁰ Guli'tsöjnë' didza' na' chigudxa' libí'ili', gunnía': Bití' nayëpisëtërë' nu bönni' huen dxin ca xanë'. Channö gula'bia ládxi'gaca bönachi neda', ila'bia ládxi'gaca ca' libí'ili'. Channö nacua' nupa tun ca rnna xtídza'a, ilún ca' ca rnna xtídza'li' libí'ili'. ²¹ Yúgu'të lë ni ilún bönachi queéli' tu' dá'ali' neda', tu' cabí núnbë'gaca Dios Xuz nasöl-lë'ë neda'.

²² 'La'tu' cabí bida', en la'tu' cabí bë'lëna' légaquië' didza', bití' ila'báguë'ë dul-la', pero na'a tu' bida' ni, bití' bi gaca ila'nnë' que dul-la' nabága'gaquië' le ubéaj légaquië' dxi'a. ²³ Nu bönni' ruzöë' neda' tsölá'aló, ruzöë' ca' Xuza' Dios tsölá'aló. ²⁴ La'tu' cabí bena' yugu' yöl-la' huáca ga nacu'ë, yugu' le cuntú nu ben ca gulaca, bití' ila'báguë'ë dul-la'. Na'a, bila'lë'enë' yugu' lë na' bena', ate' tu'zöë' neda' tsölá'aló, en tu'zöë' ca' Xuza' tsölá'aló. ²⁵ Caní raca, para gaca ca rnna xtídze'ë Dios, le nazí' lu ná'agaquië', le rnna: Tu'zöë' neda' tsölá'aló, en bití' zóa bizx que.

²⁶ 'Cate' idxinë' Dios Bö' Lá'ayi, Bönni' ru'ë didza' idútë li, en gácalenë' libí'ili', utipë' ládxi'li'. Isöl-la'a Bönni' na' queéli' uláz queë' Dios Xuz, ate' gunë' ba nalí quia' neda'. ²⁷ Libí'ili' ca' gunlí' ba nalí quia', tu' zóalen cázali' neda' tsözxön dza ni'te.

16

¹ Gunnë' ca' Jesús:

—Yugu' didza' ni chigudxa' libí'ili', para cabí gaca chopá ládxi'li'. ² Yugu' bönni' judío ulu'héajë' libí'ili' tsaz ga tu'dubë' tu'sëdë' queë' Dios, ate' idxín dza cate' nu bönni' gútië' libí'ili' guëquinë' dxin queë' Dios runë'. ³ Caní ilunë', tu' cabí núnbë'gaquië' Dios Xuz, en cabí núnbë'gaquië' neda'. ⁴ Rea' libí'ili' yugu' didza' ni, para cate' idxín dza na', tsöjnëli' didza' ni chigudxi caza' libí'ili'.

Le gunë' Dios Bö' Lá'ayi

Gunnë' ca' Jesús:

—Yugu' didza' ni bití' gudxa' libí'ili' dza ni'te, tu' ni' zóalen caza' libí'ili'. ⁵ Na'a huöja', tsöjsóalena'-në' Dios Xuz, nasöl-lë'ë neda'. Bití' inábali' neda' nituli' libí'ili', bití' innali': ¿Gazxi tseju? ⁶ Na'a, tu' rea' libí'ili' yugu' didza' ni, risëbi ládxi'li'. ⁷ Neda' rea' libí'ili' le naca idútë li. Gácarö dxi'a queéli' huöja', tu' channö cabí huöja', bití' idisóalenë' Dios Bö' Lá'ayi libí'ili', Bönni' na' gácalenë' libí'ili', en utipë' ládxi'li', pero channö huöja', isöl-la'a-në', na' idisóalenë' libí'ili'. ⁸ Cate' guidë' Lë', gunë' ga iléquibe'ë bönachi yödzülió ni nabága'gaca dul-la', en bití'

núnbë'gaca le naca tsahui', ate' ichúguie' Dios queéquequi ilátigaca. ⁹Nabága'gaquie' dul-la' tu' cabí ta'yéajlë'è neda'. ¹⁰Biti' núnbë'gaquie' le naca tsahui' tu' ilútië' neda', ate' huója' ga zoë' Dios Xuz, Bönni' na' náquie' tsahui', ate' bítirö' ila'lé'enë' neda'. ¹¹Ichúguie' Dios queégaquie' ilátië' tu' chiguchúguie' que tu' xihui' nu rinná be'e bönachi yödzölió ni.

¹²'Ia'zica' zían didza' rë'ènda' güf'ílena' libí'ili', pero bití' gaca tséajni'ili' na'a. ¹³Cate' guidë' Dios Bö' Lá'ayi, Bönni' na' ru'è didza' idútë' li, Lë' usedinë' libí'ili' yúgu'të le naca idúja' li na', tu' cabí gu'è didza' rácasó queë', pero gu'è yúgu'të didza' na' yönnë' ru'è Zuza', en gunë' ga inözili' yúgu'të le ral-la' gaca. ¹⁴Lë' gunë' neda' bal, tu' si'è le nequi quia', en gunë' ga inözili' le. ¹⁵Yúgu'të le nequi queë' Dios Xuz nequi quia'. Que lë ni na' gunnía' si'è le nequi quia', en gunë' ga inözili' le.

Yöl-la' risëbi ladxí' queëli' huóaca yöl-la' rudzeja

¹⁶Gunnë' ca' Jesús:

—Yetú chí'ido'osó, en bítirö' ilé'eli' neda', ate' ia'tú chí'ido'osó ca' ulé'eli' neda', tu' huója' ga zoë' Dios Xuz.

¹⁷Ní'irö bönni' usëda queë' gulë' luzá'agaquie' tuë' ia'túé', ta'nnë':

—¿Bizxi rna didza' ni rë' rë'u? Rnnë': "Ia'tú chí'ido'osó, en bítirö' ilé'eli' neda', ate' ia'tú chí'ido'osó ca' ulé'eli' neda', en naca tu' huója' ga zoë' Dios Xuz."

¹⁸Ní'irö gula'nnë':

—¿Bizxi caz rë'èni inná didza' ni, gunnë': "Ia'tú chí'ido'osó"? Biti' réajni'itu' didza' ni ru'è.

¹⁹Réquibe'enë' Jesús të'ènnë' ila'nábinë' Lë', ate' rë' légaquie':

—¿Naru' rinábítsö luzá'ali' ca naca que didza' na' bë'a, gunnía': Ia'tú chí'ido'osó, en bítirö' ilé'eli' neda', ate' ia'tú chí'ido'osó ca' ulé'eli' neda'? ²⁰Le nácatë rea' libí'ili': Códxili', en isëbi ládxi'li', pero bönachi yödzölió ni ulu'dzeja cate' iluti neda'. Ní'irö sal-la' isëbi ládxi'li', yöl-la' risëbi ladxí' queëli' huóaca yöl-la' rudzeja cate' ulé'eli' neda'. ²¹Tu nigula cate' chizóa'bi gáljabi' b'íido' queënu, rigu'í rizáca'nu, tu' chibidxín dza queënu, pero cate' chizóabi' tubi' bi'í bönni'do' queënu, bítirö' rójenu lë na' butsåganu, tu' rudzéjanu tu' chigúlajbi' tubi' bi'í bönni'do' yödzölió ni. ²²Lë'sca' caní raca queëli', risëbi ládxi'li' na'a, pero huóda' uduyúa' libí'ili', ate' ní'irö udzeja ládxi'li', ate' bití' séqui'në' nu bönni' ugúë' yöl-la' rudzeja queëli' na'.

²³Dza ní'irö bití' bi inábili' neda'. Le nácatë rea' libí'ili': Yúgu'të le inábili' Dios Xuz, en ugunlí' dxin La' neda', Lë' gunnë' queëli'. ²⁴Ga ridxintë na'a dza bití' rugunlí' dxin La' neda' cate' bi rinábili'-në' Dios Xuz. Guli'naba caní, ate' idéli'li' lë na' inábali', para gaca idú yöl-la' rudzeja queëli'.

Ridéli'në' Jesucristo lu le raca yödzölió ni

²⁵Gunnë' ca' Jesús:

—Yugu' lë na' chibë'lena' libí'ili' didza' bucúdu'a didza'. Huadxín dza cate' bítirö' güf'ílena' libí'ili' didza' le rucúdu'a didza', pero yálajdo' güf'ílena' libí'ili' didza' ca naca queë' Dios Xuz. ²⁶⁻²⁷Dza na' inábili'-në' Dios, en ugunlí' dxin La' neda', ate' rea' libí'ili', bití' gun bayudxi gáta'yua' lahuë' Dios Xuz uláz queëli', tu' nadxí'inë' Lë' cazë' Dios Xuz libí'ili'. Nadxí'inë' libí'ili' tu' nadxí'ili' neda', en réajlë'èli' birúaja' ga zoë' Dios. ²⁸Birúaja' ga zoë' Dios Xuz, en bidxina' yödzölió ni. Ia'tú ca', ucá'ana' yödzölió ni, ate' huója' ga zoë' Dios Xuz.

²⁹Ní'irö yugu' bönni' usëda queë' gulë' Lë', ta'nnë':

—Na' a ru' u didza' yálajdo', en bítirö' rucúdu'u didza'. ³⁰Na'a réquibe'etu' nöz quézinu' Li' yúgu'të, en bití' run bayudxi nu bi inabi yudxi Li', tu' riguixjoi'inu' netu' le si' inábatu'. Que lë ni na' réajlë'ètu' birúaju' ga zoë' Dios.

³¹Bubi'è didza' Jesús, rë' légaquie':

—¿Naru' réajlë' tsali' neda' na'a? ³²Buli'yú, huadxín dza, en chiridxín dza na', cate' gásilasili' que queëli', en ucá'anali' neda' tuza', pero bití' soa' tuza', tu' zóalen cazë' Dios Xuz neda'. ³³Yugu' didza' ni chigudxa' libí'ili' para cuéqui dxi ládxi'li', tu' nácali' quia' neda'. Lu yödzölió ni gaca queëli' le usaca' zí' libí'ili', pero buli'típa ládxi'li'. Neda' chibidéli'da' lu le raca yödzölió ni.

17

Jesús rinábinë' Dios gácalenë' nupa dá'gaca Lë'

¹Cate' budxi bë'è Jesús yugu' didza' ni, guchisa lahuë', ruyüë' yehua' yubáló, ate' rnnë':

—Dios Xuz, chibidxín dza. Ben ga ilá' lahui yöl-la' zxon quia' neda', Zxi'ínu', para gaca guna' ga ilá' lahui yöl-la' zxon quiu' Li'. ²Ben caní tu' chinudódu' lu na'a yöl-la' unná bé' para inná bé'eda' yúgu'të bönachi, en gu'a yöl-la' na'bán idú quégaca yúgu'të nupa na' chibennu' quia'. ³Lë ni naca yöl-la' na'bán idú na', tu' núnbë'gaquie' Li', nacu' la's dui Dios idú, en tu' núnbë'gaquie' ca' neda', Jesucristo, ate' Li' nasól-lu u neda'.

⁴ 'Neda' chibena' ga nalá' lahui yöl-la' zxon quiu' yödzölió ni, en chibudxi bena' dxin na' budödu' lu na'a. ⁵ Na'a, Xuz, ben ga ilá' lahui yöl-la' zxon napa' tsözxön len Li', para gaca quia' yöl-la' zxon guta' quia' tsözxön len Li' dza ni'te quez cate' si' gata' yödzölió.

⁶ 'Chibulu'a lahui le nacu' Li' lógaquië' bönni' ni bennu' quia', nupa na' guró' casu' Li' ladaj bönachi yödzölió. Guléquinë' bönni' ni quiu', ate' bénnagacu'-në' quia', ate' tunë' ca rna xtídu'u. ⁷ Na'a nözguequinë' yúgu'të lë na' bennu' quia' zá'gaca lu no'o Li', ⁸ tu' chibudöda' lu ná'agaquië' didza' na' budödu' Li' lu na'a neda', ate' légaquië' nazí' lu ná'agaquië' le, en téquibe enë' birúaja' ga zu' Li', ate' ta'yéajlë'ë Li' nasól-lu'u neda'.

⁹ 'Neda' ráta'yua' Lo' gácalenu' légaquië'. Ráta'yua' Lo', calëga gácalenu' yúgu'të bönachi yödzölió, pero gácalengacu'-në' bönni' ni chibénnagacu'-në' quia', tu' néquiguequinë' quiu'. ¹⁰ Yúgu'të nupa néquiguequi quia' néquiguequi ca' quiu', ate' nupa na' néquiguequi quiu' néquiguequi ca' quia', ate' ca náacagaca nupa na' rulu'í lahui yöl-la' zxon quia'.

¹¹ 'Na'a, bití'rö ugá'ana' yödzölió ni, pero yugu' bönni' ni ulu'gá'anë' yödzölió, ate' neda' udusóalena' Li'. Xuz Lá'ayi, len yöl-la' huáca quiu' ben chí'i nupa ni chibennu' quia', para ilácagaca tuz, ca na' nácaru' rë'u tuz. ¹² Cate' ni' guzóalena' légaquië' yödzölió ni, ben chí'igaca'-në', buguna' dxin yöl-la' huáca na' bennu' quia'. Nupa na' bennu' quia', ben chí'igaca'-në', ate' nitúë' bití' bunítia'-në', pero tuzë' bönni' na' náquië' ca xzí'ini tu' xihui', en narugu queë' gátíë' tsaz. Caní' raca ca nazúaj lu guichi lá'ayi.

¹³ 'Na'a udusóalena' Li', ate' tsanni ni zoa' yödzölió ni, ruá'a yugu' didza' ni para gaca idú yöl-la' rudzeja quégaquië' ca na' raca quia' neda' yöl-la' rudzeja. ¹⁴ Neda' chibudöda' lu ná'agaquië' xtídu'u, ate' bönachi yödzölió ni tu' zóa légaquië' tsólá'aló tu' cabí náacagaquië' tuz len léguequi, ca na' naca quia' neda', bití' naca' tuz len bönachi yödzölió ni. ¹⁵ Ráta'yua' Lo', calëga cúagacu'-në' yödzölió ni, pero gun chí'igacu'-në', para cabí ila'dzunë' lu na' tu' xihui'. ¹⁶ Bití' náacagaquië' tuz len bönachi yödzölió ni ca na' naca quia' neda', bití' naca' tuz len bönachi yödzölió. ¹⁷ Guléaj quez quiu' légaquië', ugunu' dxin le naca idútë li. Le naca idútë li na' naca xtídu'u. ¹⁸ Ca na' benu' Li', gusól-lu'u neda' ladaj bönachi yödzölió ni, lësca' caní' runa' neda', risól-la'gaca'-në' ladaj bönachi yödzölió. ¹⁹ Tu' nadxí'igacada'-në' rudödi cuina' quiu', para ulu'rúajë' ca' légaquië' quez quiu' tu' nazí' lu ná'agaquië' le naca idútë li.

²⁰ 'Ráta'yua' Lo', calëga quégacasë' bönni' ni, pero lësca' quégaquië' bönni' ni' ila'yéajlë'ë neda' ni'a que didza' ilu'ë bönni' ni. ²¹ Ráta'yua' Lo' gunu' ga ilácagaquië' tuz yúgu'të, en ilácagaquië' ca' tuz len rë'u, ca na' nacu' Li', Xuza', nacu' tuz len neda', ate' neda' ca, naca' tuz len Li'. Caní' ral-la' ilácagaquië' para ila'yéajlë' ia' zíca'rö bönachi yödzölió ni, Li' caz gusól-lu'u neda'. ²² Yöl-la' zxon na' bennu' quia', neda' bë'a ca' quégaquië', para ilácagaquië' tuz, ca na' nácaru' tuz rë'u. ²³ Li' nacu' tuz len neda', ate' neda' naca' tuz len légaquië', para gaca idú ca náacagaquië' tuz, en caní' iléquibe'e ia' zíca'rö bönachi yödzölió ni, Li' caz gusól-lu'u neda', ate' nadxí'igacanu'-në' ca na' nadxí'inu' neda'.

²⁴ 'Xúza'do', rë'ënda' ila'cuá'lenë' neda' bönni' ni bénnagacu'-në' quia' ga na' tsöjsó'a, para ila'lé'enë' yöl-la' zxon na' bennu' quia' dza ni'te cate' si' gunu' yödzölió tu' nadxí'inu' neda'. ²⁵ Xuza' tsahui', bönachi yödzölió ni bití' núnbë'gaca Li', pero neda' nunbë' caza' Li', ate' yugu' bönni' ni chinöziguequinë' Li' caz gusól-lu'u neda'. ²⁶ Bena' ga nöziguequinë' le nacu' Li', en gunra' ca' ga ila'nózinë' lë ni para ca na' nadxí'inu' Li' neda', lësca' caní' ila'dxí'í luzá'agaquië', ate' gaca caza' tuz len légaquië'.

18

Ta'zönë' Jesús

(Mt. 26:47-56; Mr. 14:43-50; Lc. 22:47-53)

¹ Cate' budxi bë'ë Jesús yugu' didza' ni, birúajë' ni', ate' sa'yéajlenë' yugu' bönni' usëda queë'. Gudödë' ia' tsólá'a yegu Cedrón, en bidxinë' ga ni' nacua' yaga olivo ca', ate' lataj ni guyázalënë' yugu' bönni' usëda queë'. ² Lësca' Judas, bönni' na' udödë' Jesús, núnbë'ë la' yëla na', tu' butubë' Jesús yugu' bönni' usëda queë' ni' zían luzuí. ³ Ní'irö guchë'ë Judas tu cö' bönni' rójáquië' gudil-la, en yugu' bönni' ni'a ná'agaquië' bixúz unná bë', en ni'a ná'agaquië' yugu' bönni' yudo' fariseo, ate' yójáquië' ga ni' zoë' Jesús, nuá'agaquië' yugu' gu' yöri, en yugu' le tu'dí'inë'. ⁴ Ní'irö, tu' nözinë' Jesús yúgu'të le ral-la' gaca queë', birúajë' ga ni' zoë', en rë' légaquië':

—¿Nuzxi riguíljali'?

⁵ Bulu'bi'ë didza', të' Lë':

—Jesús, bönni' Nazaret, riguíljatu'-në'.

Jesús rë' légaquië':

—Neda' caz.

Judas, bönni na' rudödë' Jesús lu ná'agaquië', zóalenë' légaquië'. ⁶ Cate' Jesús gudxë' légaquië': "Neda' caz", ní'rö bulu'bíguë'ë cusí zxanlö, en gula'dzö'ë lu yu. ⁷ Jesús gunábinë' légaquië' leyúbölö, rnnë':

—¿Nuzxi riguíljali'?

Të' Lë':

—Jesús, bönni' Nazaret, riguíljatu'-në'.

⁸ Ní'rö bubi'ë didza' Jesús, rnnë':

—Chigúdxá' libí'ili': Neda' caz. Channö riguíljali' neda', guli'gúü'-gáquië' lataj tsöjhuójgaquië' bönni' ni.

⁹ Caní gunné' Jesús para idxín didza' na' bē'ë, gunné': "Nupa ni bennu' quia', nitüë' biti' bunítia'-në'." ¹⁰ Ní'rö, tu' nu'ë Simón Pedro tu guíë tuchi', gulecjë' le, en bentë' huë' Malco, tu bönni' huen dxin queë' bixúz lo, guchúguie' guídi náguie' ibëla bönni' na'. ¹¹ Ní'rö Jesús rë' Pedro na':

—Bugú'u guíë tuchi' quiu' lidxi. ¿Naru' cabí ral-la' quí'i saca'a lë na' chinunë' Xuza' ca gaca quia'?

Rídxinë' Jesús lahuë' bixúz lo

(Mt. 26:57-58; Mr. 14:53-54; Lc. 22:54)

¹² Yugu' bönni' na' rójáquië' gudil-la, en bönni' na' nacu'ë lu nē'ë, enca' yugu' bönni' ni'a ná'agaquië' bönni' judío unná bē' gula'zönë' Jesús, en gulúguie' Lë'. ¹³ Ní'rö gula'chë'ë Lë' zí'alo lahuë' Anás, tu' náquië' xto' zxi'inë' Caifás, bönni' náquië' bixúz lo iz na'. ¹⁴ Náquië' Caifás bönni' na' buzéajni'inë' yugu' bönni' judío unná bē', buluí'inë' légaquië' dxí'arö gaca gátie' tuzë' bönni', en calëga iníti idütë yödzo quégaquië'.

Rnnë' Pedro: "Biti' núnbë'a-në' Jesús"

(Mt. 26:69-70; Mr. 14:66-68; Lc. 22:55-57)

¹⁵ Simón Pedro, en ia'tüë' bönni' usëda queë' Jesús yöjáquië' cúde'ülë' Lë', söjnéhoquië' Lë'. Bönni' usëda ni guyázalenë' Jesús lö'a que lidxi bixúz lo, tu' núnbë'ë bixúz lo na' lë'. ¹⁶ Bugá'anë' Pedro ní'ilo ga nu riyaza lö'a na'. Que lë ni na' burúajë' bönni' usëda na' núnbë'ë bixúz lo lë', ate' bē'lenë'-nu didza' nigula na' run chí'ínu ga nu riyaza lö'a na', ate' benë' ga guyázie' Pedro lö'a. ¹⁷ Ní'rö nigula na' run chí'ínu ga nu riyaza lö'a rënu Pedro, rnnanu:

—¿Naru' cabí do'o ca' li' bönni' ni'?

Bubi'ë didza' Pedro, rnnë':

—Calëga neda'.

¹⁸ Tu' run ziaga, yugu' bönni' huen dxin, en yugu' bönni' ni'a ná'agaca bönachi yudo' nabéguigaquië' guí, ate' zuíguequinë' ra' guí na', en tu'tsë'e cuíngaquië'. Lë'sca' Pedro zuílenë' légaquië', rutsë'e cuinë'.

Bixúz lo rinabi yúdxinë' Jesús

(Mt. 26:59-66; Mr. 14:55-64; Lc. 22:66-71)

¹⁹ Ní'rö gunabi yúdxinë' bixúz lo Jesús para inözinë' nupxi dá'gaca Lë', en naxi naca le rusedinë' Jesús bönachi. ²⁰ Bubi'ë didza' Jesús, rë' lë':

—Lahuí' lo bē'lëna' yúgu'të bönachi didza'. Buseditiqui'sida' légaquië' gapa naca lu yu'u ga tu'dubë' tu'sëdë' queë' Dios, enca' chila yudo', ga ni' tu'dubë' yúgu'të bönni' judío, en biti' bi didza' bē'a bagáchi'só. ²¹ ¿Bízx que rinabi yúdxinu' neda'? Gunabi yudxi nupa ni' bila'yöni didza' bē'lëna' léguequi. Nözguequi quézine' bönni' na' didza' na' bē'lëna' légaquië'.

²² Cate' budxi bē'ë Jesús didza' ni, tu bönni' ni'a ná'agaca bönachi yudo' gudápë'ë ru'ë Jesús, rnnë':

—¿Naru' caní rubí'tso' didza' lahuë' bixúz lo?

²³ Bubi'ë didza' Jesús, rë' lë':

—Channö biti' gunniá' dxi'a, gudixjö' bízxilö didza' bē'a biti' naca dxi'a, en channö guca dxi'a didza' bē'a, ¿bízx que na' gudápu'u neda'?

²⁴ Ní'rö Anás na' gusöl-lë'ë Jesús náguë'ë, ate' bulu'sudxinë' Lë' lahuë' Caifás, bönni' náquië' idú bixúz lo.

Leyúbölö rnnë' Pedro: "Biti' núnbë'a-në' Jesús"

(Mt. 26:71-75; Mr. 14:69-72; Lc. 22:58-62)

²⁵ Cate' ni' zuínenë' Pedro ra' guí rutsë'e cuinë', yugu' bönni' nacu'ë ni' gulë' lë', ta'nnë':

—¿Naru' cabí do'o ca' li' Jesús na'?

Gudá'baguie' Pedro, rnnë':

—Calëga neda'.

²⁶ Zoë' ni' tu bönni' huen dxin queë' bixúz lo, náquië' di' a dza queë' bönni' na' Pedro guchúguie' guídi náguie', ate' bönni' huen dxin na' rë' Pedro:

—¿Naru' cabí bilé'ë quézida' li' la' yëla ni', dzagu'-në' Jesús?

27 Leyúbölö gudá'baguië' Pedro, ate' la' guródxitëba' böra.

Rídxinë' Jesús lahuë' Pilato

(Mt. 27:1-2, 11-14; Mr. 15:1-5; Lc. 23:1-5)

28 Ní'irö gula'chë'ë Jesús, en bulu'zë'ë lidxë' Caifás na', ate' bila'dxinë' yúlahui' queë' bönni' yu'u lu në'ë uláz que yódz Roma, le nazí'i le Pretorio. Chizá' rení' dza na', ate' bití' gula'yázië' yugu' bönni' judío yúlahui' na', tu' téquinë' ila'báguë'ë xíguia' channö' ila'yázië' ní', le gun ga bití' gaca ilahuë' xtsó' Laní Pascua, laní na' tu'subanë' ca benë' Dios, bubéajë' bönachi Israel luyú Egipto. 29 Ní'irö birúajë' Pilato, bönni' na' yu'u lu në'ë, en bidxinë' ga na' nacu'ë, ate' rë' légaquië':

—¿Bizxi ruzégui'li'-në' bönni' ni didza'?

30 Bulu'bi'ë didza', të' lë':

—La'tu' cabí nu'ë bönni' ni dö', bití' udóditu'-në' lo'.

31 Ní'irö Pilato rë' légaquië', rnnë':

—Libí'í cázali' guli'chë'ë, en buli'chí'a buli'sörö Lë' ca rinná bë' xibá queëli'.

Yugu' bönni' judío të' lë', ta'nnë':

—Bití' dë lu na'tu' nu gútitu'.

32 Caní guca para idxín xtídzë'ë Jesús, le bë'ë naca ra-la' gátíë'. 33 Ní'irö buázië' Pilato yúlahui' na', ate' bulidzë' Jesús, en rë' Lë':

—¿Nacu' Lí' Bönni' Rinná Bé'enë' Bönachi Judío?

34 Bubi'ë didza' Jesús, rë' lë':

—¿Naru' rácasó quiu' rño' caní, o gulë bönachi lí' caní ca naca quia'?

35 Pilato rë' Lë':

—¿Naru' réquitsenu' naca' judío? Yugu' bönni' uládz quiu', en yugu' bixúz unná bë' bulu'dódë' Lí' lu na'a. ¿Bizxi caz benu'?

36 Ní'irö bubi'ë didza' Jesús, rë' lë':

—Rinná bë'a neda', pero calëga ca ta'nná bë' bönachi yódzóliö ni. La'tu' rinná bë'a ca ta'nná bë' bönachi yódzóliö, ila'dil-lë' bönni' dá'gaquië' neda', para cabí ilu'ë lataj nu udódi neda' lu ná'agaquië' bönni' judío. Ca rinná bë'a neda' bití' naca ca ta'nná bë' bönachi yódzóliö ni.

37 Ní'irö Pilato rë' Lë':

—¿Nácatso' bönni' rinná bë'ë'?

Bubi'ë didza' Jesús, rë' lë':

—Naca' ca na' rño'. Que lë ni na' bida' ga gulja' yódzóliö ni, para guna' ba nalí que le naca idütë li. Yúgu'të nupa ni tun le naca idütë li tu'zë nágagaca didza' ruá'a.

38 Pilato rë' Lë':

—¿Bizxi na' le naca idütë lí'?

Ta'chúquië' queë' Jesús gátíë'

(Mt. 27:15-31; Mr. 15:6-20; Lc. 23:13-25)

Cate' budxi gunné' Pilato caní, burúajë' leyúbölö ga na' nacu'ë bönni' judío unná bë' na', en rë' légaquië':

—Bití' bí dö' ridzóliida' nu'ë bönni' ni. 39 Libí'ili' dë tu le nulaga loli' runli' cate' raca Laní Pascua ni, rinábili' neda' usana'-në' queëli' tuë' bönni' nadzunë'. ¿Rë'ënilí' usana'-në' queëli' Bönni' Rinná Bé'enë' Bönachi Judío?

40 Ní'irö yúgu'të' gulu'ë zidzaj didza' leyúbölö, ta'nnë':

—¿Calëga bönni' ni, pero Barrabás usanu'-në' queëtu'!

Barrabás na' náquië' gubán.

19

1 Ní'irö Pilato guchë'ë Jesús, en benë' ga gula'guinë' yugu' bönni' rójáquië' gudil-la Lë'.

2 Bönni' rójáquië' gudil-la na' gulunë' tu bregui' ní'a në'e yótsi', ate' bulu'dxië' le icjé' Jesús, en bulu'gácue' Lë' tu lari' tunna xiná chul-la ca naca le tácuë' bönni' ta'nná bë'ë. 3 Ní'irö gula'biguë'ë lahuë' Jesús, en të' Lë':

—¿Bica' bo' Lí', Bönni' Rinná Bé'enë' Bönachi Judío!

Ní'irö gula'gápë'ë lahuë'.

4 Ní'irö burúajë' Pilato, en rë' yugu' bönni' judío unná bë', rnnë':

—Bulí' yú, rubéaja'-në' lolí' ni para inózili' bití' bí rudzóliida' le naca dö' nu'ë bönni' ni.

5 Ní'irö birúajë' Jesús, dxía icjé' bregui' ní'a në'e yótsi' na', en nácuë' lari' tunna xiná chul-la na'. Pilato rë' légaquië':

—Ni zoë' bönni' ni.

6 Cate' yugu' bixúz unná bë', en yugu' bönni' ní'a ná'agaquië' bila'lé'enë' Jesús, zidzaj gula'ë didza', ta'nnë':

—¿Budë'ë lë'e yaga cruz! ¿Budë'ë lë'e yaga cruz!

Pilato rē' légaquiē':

—Libí'í cázali' guli'chē'ē, en guli'tsōjdē'ē lē'e yaga cruz. Neda' biti' bi dō' budzōlida' nu'ē bōnni' ni.

⁷ Ní'irō bōnni' judío na' tē' lē':

—Dē queétu' tu xibá, ate' rinná bē' xibá queétu' na' ral-la' gátie' bōnni' ni tu' gunné' náquiē' Zxí'inē' Dios.

⁸ Cate' biyōnnē' Pilato didza' ni, gúdxirōnē'. ⁹ Leyúbölō buázie' yúlaihu' na', en rē' Jesús:

—¿Gázxitē bōnni' Li'?

Biti' bi didza' bubi'ē Jesús.

¹⁰ Ní'irō Pilato rē' Lē':

—¿Naru' cabí ubí'tso' didza', quí'xōi'inu' neda'? ¿Naru' cabí nōzinu' dē lu na'a udá'a Li' lē'e yaga cruz, en dē lu na'a usana' Li'?

¹¹ Bubi'ē didza' Jesús, rē' lē':

—Biti' bi dē lu no'o gunu' quia' la'tu' cabí nudōdē' Dios yōl-la' unná bē' na' lu no'o. Que lē ni na', bōnni' na' budōdē' neda' lu no'o nabága'rē' xí'guia' ca lí'.

¹² La' ní'sō rizóa ribō'ē Pilato usanē' Jesús, pero gulu'ē zidzaj didza' bōnni' judío unná bē', ta'nnē':

—Channō usanu'-nē' bōnni' ni, biti' ridzagu'-nē' dxi'a César, bōnni' rinná bé'enē' idútē yōdzōlió. Nu bōnni' run cuinē' bōnni' rinná bē'ē, ridá'báguē'ē César na'.

¹³ Cate' biyōnnē' Pilato didza' ni, gunná bé'enē' nupa diguá'gaca Jesús, ate' gurō'ē xilatjē' ga ruch'a rusōrōē', lataj na' nazí'i le Lō'a Ga Zxōagaca Guiójt'a'a, en ca naca didza' hebreo nazí'i le Gabata. ¹⁴ La' dza ná'asō naca dza si' idxín Laní Pascua, en naca idú hua gubidza. Ní'irō Pilato gudxē' yugu' bōnni' judío unná bē' na', rnnē':

—Ni zoē' bōnni' rinná bé'enē' libí'ili'.

¹⁵ Gulu'ē zidzaj didza', ta'nnē':

—¡Bētiē'! ¡Bētiē'! ¡Budē'ē lē'e yaga cruz!

Pilato rē' légaquiē':

—¿Rinábítseli' neda' udá'a-nē' lē'e yaga cruz bōnni' rinná bé'enē' libí'ili'?

Bulu'bi'ē didza' bixúz unná bē', ta'nnē':

—Cúnturō nu zoa rinná be'e netu'. Tuzē' César rinná bé'enē' netu'.

¹⁶ Que lē ni na' Pilato budōdē' Jesús lu ná'agaquiē', para tsōjdá'agaquiē' Lē' lē'e yaga cruz. Ní'irō gula'guélé'ē Jesús, en gula'chē'ē Lē' ní'ilo.

Tu' dē'ē Jesús lē'e yaga cruz

(Mt. 27:32-44; Mr. 15:21-32; Lc. 23:26-43)

¹⁷ Birúajē' Jesús ni', nu'ē yaga cruz queē', sa'yéajē' lataj na' nazí'i le Lataj Que Böga' Ícjaru', en ca naca didza' hebreo nazí'i le Gólgota. ¹⁸ Bulu'dē'ē Jesús lē'e yaga cruz ni', ate' bulu'dá'lenē' Lē' tsōzxōn lē'egaca yaga cruz ia' chopē' bōnni'. Tsólá'a huéaj ta' dē'ē, ate' Jesús dē'ē gatsaj lálhui'lō chopē' bōnni' na'. ¹⁹ Gusól-lē'ē Pilato tu bōnni' nu'ē le buzúajē' lu guichi le buzōē' lē'e yaga cruz icjlē' Jesús, le rnna caní: "Jesús, Bōnni' Nazaret, Bōnni' Rinná Bé'enē' Bōnni' Judío." ²⁰ Bulu'labē' zían bōnni' judío didza' ni, tu' zoa ga na' bulu'dē'ē Jesús lē'e yaga cruz gála'sō ra' yōdzō, ate' didza' na' nuzúajē' len didza' hebreo, en len didza' griego, en len didza' latín. ²¹ Yugu' bixúz unná bē' queégaquiē' bōnni' judío tē' Pilato, ta'nnē':

—Biti' uzúaju', "Bōnni' Rinná Bé'enē' Bōnni' Judío." Buzúaj caní: "Bōnni' ni gunné': Inná bé'eda' bōnni' judío."

²² Bubi'ē didza' Pilato, rē' légaquiē':

—Le chinuzúaja', tsaz chinuzúaja'.

²³ Cate' yugu' bōnni' na' rōjáquiē' gudil-la budxi bulu'dē'ē Jesús lē'e yaga cruz, gula'guélé'ē lari' gúcuē'. Gula'béajē' tápalō, tu có' huéaj guta' que queégaquiē'. Gula'guélé'ē ca' lari' guxóa yenē' Jesús, ate' lari' na' biti' nadia, pero naduba tuz ca naduba. ²⁴ Ní'irō yugu' bōnni' na' rōjáquiē' gudil-la gulē luzá'agaquiē' tuē' ia'tué', ta'nnē':

—Biti' ichúguru' le, pero dxí'arō gaca uyuru' le gaca bē' para inōziru' nuzxi guequi que.

Caní guca, budxín ca nazúaj lu guichi lá'ayi, le rnna:

Gula'guisiē' que queégaquiē' lari' nacua',

en que lari' quia' bulu'yúē' le naca bē'.

Caní gulunē' bōnni' na' rōjáquiē' gudil-la.

²⁵ Xinē'ē Jesús, en nigula zxilánu xinē'ē, en María, nigula queē' Cleofas, en María Magdalena gula'cuá'anu gala' ga na' dē'ē Jesús lē'e yaga cruz. ²⁶ Cate' Jesús bilé'enē'-nu xinē'ē, en bilé'enē' ca' zoē' ni' bōnni' usēda queē' na' nadxí'inē', gudxē'-nu xinē'ē:

—Na'a, na' zoē' zxí'inu'.

²⁷ Ní'irō gudxē' bōnni' usēda queē' na':

—Na' zóanu xinó'o.

Bönni' usëda na' benë' ga yöjsóanu lidxë' la' dza ní'sö.

Le guca cate' gutië' Jesús

(Mt. 27:45-56; Mr. 15:33-41; Lc. 23:44-49)

²⁸ Gudödi ni, tu' nözinë' Jesús yúgu'të chiböa budzaga lahui, en para udxín le nazúaj lu guichi lá'ayi, gunné':

—Ribidxa' nisa.

²⁹ Dë ni' tu zxiga' yudzu nupi zi. Ní'irö yugu' bönni' na' röjáquië' gudil-la bulu'gui'jë' nupi zi na' tu le bululu rixxupi nisa, ate' bulu'zöë' le tu lahui gui, en bulu'dë'e le ru'e Jesús para xupë'. ³⁰ Budxi gu'ë Jesús nupi zi na', gunné':

—Chinácatë.

Ní'irö buzötaj icjë'. Burúajtë bö' naca cazë', gútië'.

Tu bönni' reajë' gudil-la runë'ë yaga tuchi' cuita lë'ë Jesús

³¹ Ní'irö, tu' naca dza si' idxín Laní Pascua na', en tu' cabí ral-la' ulu'gá'ana nupa nátigaca lë'egaca yaga cruz cate' naca dza lá'ayi quégaquië', le naca tu dza lá'ayi zxöntë, que lë ni na' yugu' bönni' judío gulá'ta'yue' lahuë' Pilato guië' bönni' röjáquië' gudil-la tsójtisjagaquië' xiguichjagaquië' bönni' dá'gaquië' lë'egaca yaga cruz, en ulu'zötjé' légaquië' lë'egaca yaga cruz na'. ³² Que lë ni na' gula'biguë'ë bönni' röjáquië' gudil-la, ate' gula'guitsjë' xiguichjë' bönni' zí'aló, en lësca' caní gulunë' queë' ia'tué' bönni' na' dá'lenë' Jesús lë'e yaga cruz. ³³ Cate' bila'dxinë' ga na' dë'ë Jesús, en bila'lé'enë' chinátië', biti' gula'guitsjë' xiguichjë'.

³⁴ Ní'irö tuë' bönni' na' reajë' gudil-la bunë'ë yaga tuchi' cuita lë'ë Jesús, ate' la' birúajtë rön, en nisa. ³⁵ Neda', Juan, bilé'eda' lë ni, en runa' ba nalí que, ate' le runa' ba nalí naca idütë li. Nöz quézida' ruá'a didza' idütë li, para tséajlë'ëli' ca' libí'ili' ca naca queë' Jesús. ³⁶ Gulaca yugu' lë ni para budxin le nazúaj lu guichi lá'ayi, le rna: "Biti' gatsaj nitú dxita yu'ë." ³⁷ Ia'tú le nazúaj ca' lu guichi rna caní: "Ulu'yúë' bönni' na' bulu'në'ë lë' yaga tuchi'."

Tu'cächë'ë Jesús

(Mt. 27:57-61; Mr. 15:42-47; Lc. 23:50-56)

³⁸ Gudödi guca yúgu'të lë ni, guyijë' José, bönni' yödzö Arimatea, bönni' dë'ë Jesús, pero bagáchi'só tu' rádxinë' yugu' bönni' judío unná bë', ate' gunábinë' Pilato gu'ë lë' lataj u'ë Jesús. Pilato bë'ë lë' lataj. Ní'irö bidxinë' José ga na' dë'ë Jesús lë'e yaga cruz, ate' bu'ë Lë'. ³⁹ Lësca' bidxinë' Nicodemo ní', bönni' na' guyijë' zí'aló yöjyüë' Jesús chí'i dzö'öló, nu'ë tu le nutsí'i nöri silá' que mirra, en tu le rilá' zxixi, le naca ca tu gayuá' guië'. ⁴⁰ Ní'irö José, en Nicodemo na' gula'guélë'ë Jesús, en bulu'chólinë' Lë' yugu' lári'do', ate' gula'gu'ë láhuiló lë na' nutsí'i nöri silá' que mirra, en le rilá' zxixi. Gulunë' ca nalëbiguequinë' tunë' bönni' judío cate' tu'cächë'ë tu bönni' nati. ⁴¹ Gala' ga na' bulu'dë'ë Jesús lë'e yaga cruz dë tu luyú ga zeaj da' yaga olivo, ate' gatsaj láhuiló lataj na' zoa tu yeru ba cubi le nadaj lë'e gu'a guiöj, yeru ba na' cuntú nu ta'güi'inë'. ⁴² Lu yeru ba na' gula'gu'ë Jesús tu' dë gála'só yeru ba na', en tu' naca dza tu'pë'ë bönni' judío que Laní Pascua.

20

Rubanë' Jesús lu yöl-la' guti

(Mt. 28:1-10; Mr. 16:1-8; Lc. 24:1-12)

¹ Cate' chinaca ziládo' dza domingo, en ní' naca chul-la, guyéajnu María Magdalena ra' yeru ba na', ate' bilé'enu chinadúa guiöjta'a na' busayaj ga nu riyaza yeru ba na'. ² Ní'irö böajnu carelò ga zoë' Simón Pedro, dzáguië' lë' ia'tué' bönni' usëda, bönni' na' Jesús nadxí'inë' lë, ate' rënu légaquië':

—Bulu'béajë' Xanru' yeru ba ni', en biti' nöztu' gazxi gula'gu'ë Lë'.

³ Ní'irö bila'ruajë' Pedro, en ia'tué' bönni' usëda na', sójajúë' ra' yeru ba na'. ⁴ Tsözxön ta'xiti'ë iropë', pero ia'tué' bönni' usëda na' guxíti'rë' carelò ca Pedro, ate' zí'aló lë' bidxinë' ra' yeru ba na'. ⁵ Biyéchuë', en buyúë' lu yeru ba na', ate' bilé'enë' yugu' lári'do' na' bila'rölinë' Jesús, nacua' ní', pero biti' guyázië' yeru ba na'. ⁶ Ní'irö bidxinë' Simón Pedro cüzulë' ia'tué' bönni' usëda na', ate' guyázië' lë' yeru ba na', en bilé'enë' lári'do' na' nacua' ní'. ⁷ Lësca' bilé'enë' lári'do' na' gula'xóë' icjë' Jesús, biti' dëlen ia'zica'rö lári'do' na', pero tsólá'aló nudubi quez. ⁸ Ní'irö guyázië' ca' ia'tué' bönni' usëda na' bidxinë' zí'aló ra' yeru ba na', en bilé'enë' ca na' naca, ate' guyéajlë'ë didza' bë'ë Jesús. ⁹ Caní guca, tu' cabí ta'yéajni'ininë' le nazúaj lu guichi lá'ayi ca run bayudxi gaca queë' Jesús, ate' ubanë' lu yöl-la' guti. ¹⁰ Ní'irö iropë' bönni' usëda na' yöjhuöjgaquië' lídxigaquië'.

Rulu'i lahuë' Jesús lonu María Magdalena

(Mr. 16:9-11)

¹¹ Bugá'ananu María ní'iló ra' yeru ba na', ribödxinu. Tsanni ní' ribödxinu, biyéchunu, buyunu lu yeru ba na'. ¹² Bilé'enu chopë' gubáz lá'ayi queë' Dios ní', nácugaquië' lari'

chiguichi. Ró'ōgaquië' ni', tuë' ícjalö ba na', en ia'túë' xini'alö ba na' ga ni' gula'gu'ë Jesús.
 13 Yugu' gubáz lá'ayi na' tē' lēnu, ta'nnē':

—Nigúlado', ¿bizx que ribödxu'?

Rēnu légaquië':

—Tu' bulu'ú'ë Xana', en biti' nözda' gazxi gula'gu'ë Lē'.

14 Cate' budxi gunnānu caní, buécjanu, en bilé'enu-nē' Jesús, zoë' ni', pero biti' réquibe'enu Jesús na'. 15 Ní'irö Jesús gudxé'-nu:

—Nigúlado', ¿bizx que ribödxu' ? ¿Nuzxi ruguilju'?

Tu' réquinu náquië' Lē' bönni' rapa chi'ë latja na', rēnu Lē':

—Bönni', channö li' bu'u-nē', gudíxjö'i neda' gazxi gulú'u-nē', ate' neda' u'a-nē'.

16 Ní'irö Jesús gudxé'-nu:

—María.

Ní'irö buécjanu, en lu didza' hebreo rēnu Lē':

—Raboni.

Didza' ni rnna: Bönni' Usedi quia'.

17 Jesús rē'ë-nu:

—Biti' canu' neda', tu' cabí ruhuëpinida' ga zoë' Xuza'. Na'a, guyéaj ga nacu'ë böchi' luzá'a, ate' yöjdxí-gáquië': "Caní rnnē' Jesús: Huépa' ga zoë' Xuza', náquië' ca' Xúzili'. Náquië' Dios quia', en Dios queéli'."

18 Ní'irö guyéajnu María Magdalena na', yöjtíxjö'iru yugu' bönni' usēda queë' Jesús chibilé'enu-nē' Xanru', en ca naca didza' na' gudxé'-nu.

Rulu'i lahuë' Jesús lógaquië' bönni' usēda queë'

(Mt. 28:16-20; Mr. 16:14-18; Lc. 24:36-49)

19 Cate' chigul-la la' dza ná'asö, le naca dza risí lo gadxi dza, nudúbigaquië' bönni' usēda queë' Jesús, ate' nayayaj yu'u ga na' nacu'ë tu' tádxiné' bönni' judío unná bē'. Ní'irö bulu'i lahuë' Jesús gatsaj láhulö ga na' nacu'ë, en rē' légaquië':

—Gulí'zóa dxi ládxí'li'.

20 Cate' budxi gudxé' légaquië' didza' ni, bulu'iné' légaquië' nē'ë, en cuita lē'ë. Ní'irö tu'dzéjanē' yugu' bönni' usēda na' tu' tu'lé'enē' Xanru'. 21 Ní'irö Jesús rē' légaquië' leyúbölö, rnnē':

—Gulí'zóa dxi ládxí'li'. Ca benē' Xuza', gusöl-lē'ë neda', lēasca' caní risöl-la' a libí'ili' tsöjenli' xichina'.

22 Cate' budxi gunnē' caní, bulubē' légaquië', en rē' légaquië':

—Gulí'sí Dios Bö' Lá'ayi. 23 Núti'tēs nu uniti loli', nu na' ben dul-la', chiyú'u yöl-la' runiti lo que, ate' núti'tēs nu biti' uniti loli' le, ugá'ana dul-la' que nu na' nun dul-la'.

Biti' réajlë' Tomás

24 Tomás biti' zóalenē' légaquië' cate' Jesús buduyüë' légaquië'. Náquië' Tomás tuë' bönni' chínnuë' ni', en tu'ë ca' lé' Bönni' Bilidí'. 25 Gudödi ni' ia'zica'rē' bönni' usēda na' gulé' Tomás, ta'nnē':

—Chibilé'etu'-nē' Xanru'.

Tomás rē' légaquië':

—Channö cabí ilé'eda' nē'ë ga gunné' bididaj, en unē'a xibön na'a ga na' guné'gaca bididaj na', en unē'a na'a cuita lē'ë ga na' gunné' yaga tuchi', biti' ca' tséajlë'a.

26 Cate' chigudödi ia'xunu' dza, nudúbigaquië' bönni' usēda na' leyúbölö lu yu'u, ate' Tomás na' zóalenē' légaquië'. Sal-la' nayayaj yu'u ga na' nacu'ë, bulu'i lahuë' Jesús gatsaj láhulö ga na' nacu'ë, en rē' légaquië':

—Gulí'zóa dxi ládxí'li'.

27 Ní'irö Jesús rē' Tomás na':

—Bunē' xibön no'o ni, en buyú na'a ni. Bunē' no'o cuita lē'a ni, en bítirö gaca chopá ládxu'u, pero guyéajlë' neda'.

28 Ní'irö bubi'ë didza' Tomás, rē' Lē':

—Xána'do', en Dios quia'.

29 Jesús rē' lē':

—Tomás, tu' bulé'enu' neda', réajlë'u. Bica' ba nupa ni' ila'yéajlë' neda' sal-la' biti' ila'lé'eni neda'.

Le rē'ëni gun didza' nazúaj lu guichi ni

30 Benē' Jesús zianrö ca' yöl-la' huáca lógaquië' bönni' usēda queë', le cabí nazúajgaca lu guichi ni. 31 Yugu' lē' ni nuzúaja' lu guichi para tséajlë'ëli' náquië' Jesús Bönni' na' ru'ë Dios lē' Cristo, Zxi'inē' Dios, en cate' tséajlë'ëli', gata' queéli' yöl-la' na'bán idú tu' réajlë'ëli'-nē'.

21

Rulu'i lahuë Jesús lógaquië' gadxë' bõnni' usëda queë'

¹ Gudödi guca lë ni, leyúbölö bulu'i lahuë' Jesús lógaquië' bõnni' usëda queë' ga naca ra' nísado' que Tiberias, ate' caní guca ca na' bulu'i lahuë' lógaquië'. ² Nudúbigaquië' Simón Pedro, en Tomás, bõnni' na' tu' è ca' lë' Bõnni' Bilidi', en Natanael, bõnni' yödzo Caná que luyú Galilea, en chopë' bõnni' zxi'inë' Zebedeo, en ia' chopë' ca' bõnni' usëda queë' Jesús. ³ Simón Pedro rë' légaquië':

—Tseaja' tsöjxõna'-ba' böla.

Të' lë' ia' zica' rë', ta'nnë':

—Guntu' li' tsözxõn.

Ní'irö yójáquië', en gula'benë' tu' lë'e bárcodo', ate' rëla ni' nituba' böla biti' gula'zõnë'-ba'.

⁴ Cate' chizá' rení, yójsóë' Jesús luyú ra' nisa na', pero biti' téquibe'enë' bõnni' usëda queë' Jesús Lë' na'. ⁵ Ní'irö Jesús rë' légaquië':

—Zxi'ina'do', ¿naru' cabi' deba' lati' böla queë'li'?

Bulu'bi'ë didza', të' Lë':

—Nítuba'.

⁶ Ní'irö Jesús rë' légaquië':

—Guli'chilaj yõxaj böla queë'li' tsölá'a ibëla barco, ate' sõngacali'-ba'.

Ní'irö gula'chiljé' le, ate' bítirö guca ulu'béajé' le, tu' naguiraba' böla lë'e yõxaj böla na'.

⁷ Ní'irö bõnni' usëda na' nadxi'inë' Jesús lë' rë' Pedro, rnnë':

—jXanru' na'!

Cate' biyõnnë' Simón Pedro, “Xanru' na'”, böácüë' lari' gücüë', tu' nagüë' le zí'alö, ate' guyázië' lu nisa. ⁸ Bila'dxinë' ia'zica'rë' bõnni' usëda na', tu' s'é'ë barco na', suná'ayõjgaquië' yõxaj ga na' dzó'õba' böla, tu' cabi' naca zí' tu' ga dë luyú bidxi. Nácatë ca tu gayuá' lóga' ní'aru'. ⁹ Cate' bila'dxinë' luyú bidxi na', bila'lé'enë' röö' tu gu' bo' yalaj ni', en zxóaba' tuba' böla láhuilö, en dë ca' yõta ni'. ¹⁰ Jesús rë' légaquië':

—Guli'diguá'a-ba' ni böla na' si' guzxõngacali'-ba'.

¹¹ Gurenë' Pedro lë'e barco na', ate' gü'uyõjé' yõxaj na' zaca' luyú bidxi, nalí'ró-ba' böla zxõn, idú tu gayuá' yu' chí'inu-unba'. Sal-la' nácagacaba' böla zían, biti' birõza' yõxaj na'.

¹² Ní'irö Jesús rë' légaquië':

—Guli'dá gáguli'.

Biti' burúguinë' nitüë' bõnni' usëda queë' na' inábinë' Lë', innë': “¿Nuzxi Li'?” Nõzguequi quëzinë' náquië' Xanru'. ¹³ Ní'irö gubígu'i'ë Jesús, en gudélé'ë yõta na', enca' böla na', ate' b'ë'ë quëgaquië'.

¹⁴ Lë' ni naca le bunny luzuí bulu'i lahuë' Jesús lógaquië' bõnni' usëda queë' gudödi bubanë' lu yöl-la' guti.

Jesús ru'ilenë' Simón Pedro didza'

¹⁵ Cate' budxi gulahuë', Jesús rë' Simón Pedro:

—Simón, zxi'inë' Jonás, ¿naru' nadxi'irõnu' neda' ca nadxi'iguequinë' bõnni' ni neda'?

Bubi'ë didza' Pedro, rë' Lë':

—Õn, Xan. Li' nõz quëzinu' raza ládxa'a Li'.

Jesús rë' lë':

—Bugagu yugu' bö'cu' zxila'do' quia'.

¹⁶ Jesús rë' lë' le buropi luzuí, rnnë':

—Simón, zxi'inë' Jonás, ¿naru' nadxi'inu' neda'?

Bubi'ë didza' Pedro, rë' Lë':

—Õn, Xan. Li' nõz quëzinu' raza ládxa'a Li'.

Jesús rë' lë':

—Bugagu yugu' bö'cu' zxila' quia'.

¹⁷ Jesús rë' lë' le bunny luzuí:

—Simón, zxi'inë' Jonás, ¿raza ládxa'u neda'?

Bu'innë' Pedro tu' le chibunny luzuí rinabi yúdxinë' lë', gunnë': “¿Raza ládxa'u neda'?”

Bubi'ë didza' Pedro, rë' Lë':

—Xan, yúgu'të nõz quëzinu' Li'. Nõzinu' raza ládxa'a Li'.

Jesús rë' lë':

—Bugagu yugu' bö'cu' zxila' quia'. ¹⁸ Le nácate' rea' li', cate' ni' nacu' ra'bando', rácasö quiu' bugacu cuinu', en ca gunnásö quiu' gudó'. Cate' igulu', uli' no'ö, ate' nu yúbölö ugacu li' lari', en ichë' li' ga ni' biti' guë'ennu' tseaju'.

¹⁹ Yugu' didza' ni b'ë'ë Jesús naca b'ë' naca gátie' Pedro, tsõtjé'ë lë'e yaga cruz, para gaca yöl-la' ba queë' Dios. Cate' budxi gunnë' caní Jesús, gunnë' ca' ia'tú:

—Gudá' neda'.

Ru'ë didza' Jesús ca gaca queë' bönni' usëda na' nadxí'inë'

²⁰ Buécjë' Pedro, en bilé'enë' sōjnáhuë' légaquië' bönni' usëda na' Jesús nadxí'inë' lë'. Náquië' bönni' usëda na' gurö'ë cuita lë'ë Jesús cate' ni' gulahuë', en gudxë' Jesús: "Xan, ¿nuzxí na' udödi Li?" ²¹ Cate' Pedro bilé'enë' lë', rë' Jesús:

—Xan, ¿bizxi gunë' bönni' ni?

²² Jesús rë' lë':

—Channö rë'ënda' ugá'anë' bönni' ni ga idxinrö dza huöda', biti' ral-la' cö'u böniga. Gudá'a neda' li'.

²³ Guzë didza' ni ga nacu'ë böchi'ru' ta'yéajlë'ë Cristo. Téquinë' biti' gátië' bönni' usëda na'. Jesús biti' gudxë' lë' biti' gátië', pero caní gunné': "Channö rë'ënda' ugá'anë' bönni' ni ga idxinrö dza huöda', biti' ral-la' cö'u böniga."

²⁴ Bönni' usëda ni naca' neda', Juan. Runa' ba nalí quéguequi lë ni, en nuzúaja' yugu' lë ni lu guichi, ate' nözili' naca idútë li le runa' ba nalí.

²⁵ Ziánrö ca' le benë' Jesús. Channö nu uzúaj léguequi lu guichi tu tu, rusaca' quia' biti' quëqui yödzölió ni ila'cuá' guichi na' ral-la' nu uzúaj. Ca' caz.

LE GULUNĒ' BÖNNI' GUBÁZ NASÖL-LĒ'Ē CRISTO Los Hechos

Le guzxi' lu në'ë Dios, isöl-lë'ë Dios Bö' Lá'ayi

¹ Cate' buzúaja' lu guichi zí'aló, quiu' li', Teófilo, neda', Lucas, buzúaja' yúgu'të le gusí lahuë' runë' Jesús, en rusédinë' ² ga bidxintë dza buëpë' yehua' yubá. Cate' si' huëpë' Jesús yehua' yubá, dzáguie' Dios Bö' Lá'ayi Lë', gunná bë'ë ca ral-la' ilunë' gubáz queë', yugu' bönni' na' gurö cazë'. ³ Gudödi gudí'i guzáquë'ë Jesús, gútië'. Ní'irö bubanë', en buluí'i lahuë' lógaquie' gubáz queë' na'. Buluí'inë' légaquie' zían le gulaca bë' zoë' nabanë', le cabí gaca nu tá'baga'. Zían luzuí buluí'i lahuë' lógaquie' idú ca choá' dza, en bë'lenë' légaquie' didza' ca rinná bë'ë Dios.

⁴ Cate' ni' nacu'ë tsözxón, gunná bé'enë' légaquie' cabí ulu'zë'ë Jerusalén. Jesús gudxë' légaquie', rnnë':

—Gulí'cöz ni' le guzxi' lu në'ë Xuza' isöl-lë'ë queëli' ca na' chibusiyón quezida' libí'ili'.

⁵ Gunnë' ca':

—Le nácatë Juan buquilë' bönachi nisa lu nisa. Na'a bití' tse xidzé gaca queëli' le ruluí'i yöl-la' ridila nisa ni, idisóalenë' Dios Bö' Lá'ayi libí'ili'.

Ruhuëpë' Jesús yehua' yubá

⁶ Ní'irö yugu' bönni' ta'yéajlë'ë Jesús, nudúbigaquie' ni', gula'nábinë' Lë', ta'nnë':

—Xan, ¿naru' gunu' ga ila'nná bë' bönachi Israel leyúbölö dza ni zóaru' na'a?

⁷ Jesús gudxë' légaquie':

—Bití' nequi' queëli' inözili' bizxi dza o bizxi dzö' gunë' Dios Xuz le nuzöë' lu na' cazë'.

⁸ Sí'ili' yöl-la' huáca cate' guidë' Dios Bö' Lá'ayi idisóalenë' libí'ili'. Ní'irö gunli' ba nalí quia' neda' lu yödzo Jerusalén, en idú luyú Judea, en luyú Samaria, en ga idxintëli' idütë yödzoilió.

⁹ Cate' budxi bë'lenë' légaquie' didza' ni, tsanni ni' tu'yusë' ca' Lë', la' buëpitë' xitsá' ga rö'ö tu'bój le bucache' Lë', atë' bití' rö'ö bila'lé'enë' Lë'. ¹⁰ Tsanni ni' tu'yüë' lúxibaló cate' ni' buëpë' Jesús, bulu'luí'i lógaquie' chopë' gubáz lá'ayi ga na' nacu'ë, nácuagaquie' lari' chiguichido'os. ¹¹ Chopë' ni' gulë' légaquie', ta'nnë':

—Bönni' Galilea, ¿bizx que ruyulí lúxibaló? Lë' cazë' Jesús ni si' guzë'ë ga zóali', buëpë' yehua' yubá, lë'sca' caní huödë' leyúbölö ca na' chibilé'eli'-në' söhuöjë' yehua' yubá.

Ta'böë' Matías para tsazië' xilatjë' Judas

¹² Ní'irö gula'zë'ë ga na' rö'ö guí'ado' na' nazí'i le Gu'fa Yaga Olivo, atë' yójhuöjgaquie' Jerusalén. Guí'ado' ni' dë' gála'sö ga dë' Jerusalén, tsca nazí'gaquie' lataj ta'zë'ë dza lá'ayi quégaquie'. ¹³ Cate' bulu'dxinë' yödzo ni', gula'benë' ga naca burópi' cuía lu yu'u, ga ni' ta'cu'ë Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, zxi'inë' Alfeo, en Simón, bönni' na' ruí'i ládxë'ë ladzë', en Judas, böché'ë Jacobo. ¹⁴ Yúgu'të bönni' ni' tu'lidzë' Dios tsözxón, atë' yugu' böché'ë Jesús, en María, xinë'ë Jesús, en ia'zica'rönu nigula' ca' núngaquie' légaquie' tsözxón.

¹⁵ La' dza ná'asö guzuinë' Pedro gatsaj láchui'lö ga nacu'ë böchi' luzá'aru' na' ta'yéajlë'ë Cristo. Gulaca idú ca xópalalaj bönachi nupa nudúbigaca ni'. ¹⁶ Pedro gudxë' légaquie', rnnë':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunné' Dios Bö' Lá'ayi dza ni'të, le buzúajë' David lu guichi, ca guca queë' Judas, bönni' na' guchë'ë nupa ni' gula'zón Jesús. ¹⁷ Judas na' gubábalenë' rë'u, en bënlenë' rë'u tsözxón dxin ni'. ¹⁸ Gula'zínë' tu la' yëla lazxaq que dö' na' bi'ë bönni' ni. Judas ni' gubixë', en biröza' lë'ë, atë' bila'rúaj yúgu'të le dzö'ö lë'ë. ¹⁹ Cate' bila'yöni bönachi nacua' Jerusalén lë ni, gulu'ë le la' yëla na' Acéldama, tu didza' hebreo le rnna lu didza' xidza': La' Yëla Rön. ²⁰ Caní guca queë' Judas, ca na' nazúaj lu guichi lá'ayi nazí'i le Salmos, le rnna:

Ugá'ana cá'asö lidxë',

en bití' idzöli nu soa yu'u na'.

Rnna ca':

Nu yúbölö tsaza xilatjë'.

²¹⁻²² Run bayudxi na'a cöru'-në' tu bönni' gunë' rë'u tsözxón para gunë' ba nalí queë' Jesús, ca guca, bubanë' lu yöl-la' guti. Ral-la' gáquie' bönni' nabábalenë' bönni' ni' gula'cuá'lenë' rë'u dza ni'te cate' ni' Xanru' Jesús gudálenë' rë'u. Gula'sí lógaquie' nacua'lenë' rë'u cate' ni' buquilë' Juan bönachi nisa, ga bidxintë dza buëpë' Jesús yehua' yubá, cate' buzë'ë ga zóaru'.

²³ Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo. ²⁴ Ní'irö bulu'lidzë' Dios, ta'nnë':

—Xantu' Dios, nunbë' cazu' icja lãdxi'do'gaca yúgu'të bönachi. Bulufi netu' nulë' chopë' ni chiguró' cazu' Li' ²⁵ para tsázië' lu dxin ni para gáquië' gubáz quíu'. Tsázië' xilatjé' Judas, bönni' ni' bunítië' xilatjé' tu' benë' dul-la', ate' guyijé' xilataj cazë' lataj chul-la.

²⁶ Ní'iró bulu'zúajé' yugu' lu guichi lãgaquië', tu queë' José, en ia'tú queë' Matías. Bulu'gútsi'në' luzë'eguequí, en bulu'bëajé' tu, ate' birúaj le nazúaj lë' Matías. Caní guca, Matías na' gubábalenë' ia'chinëajé' gubáz queë' Cristo.

2

Dios Bö' Lá'ayi ridisóalenë' légaquië'

¹ Cate' chibidxin dza Pentecostés, nudúbigaquië' tsözxön yúgu'të bönni' ta'yéajlë'ë Cristo. ² Tsáldio'os biyön bö le birúaj lúxiba, le biyön ca riyön cate' recja bö' budunu', ate' biyön iduté lu yu'u ga na' rő'ógaquië'. ³ Bulu'lufi lahui yugu' bululu guí'do' lu bö'ös lógaquië', ate' gula'guísi que queëgaquië'. Bidisóalengaca tu tuë'. ⁴ Caní guca, Dios Bö' Lá'ayi bidisóalenë' yúgu'të', ate' gula'si lógaquië' tu'ë didza' yúbölö, tsca naca le bë'ë Dios Bö' Lá'ayi que queë' yú'ë didza' yúbölö na'.

⁵ Nacu'ë zían bönni' judío yödzo Jerusalén dza na', nácaqaquië' bönni' ta'yéaj lãdxi'gaquië' Dios, en zá'gaquië' narúajgaquië' yúgu'të yödzo iduté yödzölió ni. ⁶ Cate' bila'yönnë' bö na', bulu'dubë' bönni' zían, ate' gula'bö'ë böniga, tu' bila'yönnë', ca naca xtídza'gaquië' que queëgaquië', tu'ë didza' bönni' na' ta'yéajlë'ë Cristo. ⁷ Gula'ná' badxë' yúgu'të', en bulu'bánninë, ta'nnë':

—Buli'yútsöca'. ¿Naru' calëga bönni' Galilea yúgu'të bönni' ni tu'ë didza'? ⁸ ¿Nacxi caz naca riyóniru' tu'ë xtídza'ru' ca naca didza' ru'iru' tu turu'? ⁹ Rë'u ni nácaru' bönni' zían yödzo, bönni' narúajgaquië'

luyú Partia, en luyú Media, en luyú Elam,
en luyú Mesopotamia, en luyú Judea, en luyú Capadocia,
en luyú Ponto, en luyú Asia,

¹⁰ en luyú Frigia, en luyú Panfilia, en luyú Egipto,
en luyú Africa, ga nácaró zi'tu' ga dë luyú Cirene.

Lësca' nacu'ë bönni' yödzo Roma ni. Bal-lë' nácaqaquië' bönni' judío, en ia'bal-lë' nazí' lu ná'agaquië' le ta'yéajlë'ë bönni' judío Dios. ¹¹ Lësca' nacu'ë ni yugu' bönni' narúajgaquië' Creta, en luyú Arabia. Riyóniru' tu'ë didza' ru'iru' que queëru', ate' ta'guíxjö'ë yugu' le zxön benë' Dios, le tun ga rubániru'.

¹² Caní guca, bulu'bánninë yúgu'të', en gula'bö'ë böniga. Gulë luzá'agaquië' tuë' ia'tué', ta'nnë':

—¿Bizxi caz lë ni?

¹³ Bulu'titjé' bal-lë', ta'nnë':

—¡Ta'zúdxinë'!

Libán benë' Pedro lógaca bönachi zían

¹⁴ Ní'iró Pedro guzuílenë' ia'chinëajé' gubáz na' nasöl-lë'ë Cristo, ate' gusi lahuë' ru'ë zidzaj didza', rë' légaquië':

—¡Libí'ili', bönni' Judea, en yúgu'tëli' nacua'ali' yödzo Jerusalén! ¡Lë ni ral-la' inözili' ¡Buli'zë nágali' le guía' libí'ili'! ¹⁵ Netu' ni bití' rizúdxitu' ca na' réquili' libí'ili', tu' ni zóaru' si' gala' xsila, ate' cuntu nu ruzudxi hora caní. ¹⁶ Lë ni naca le gunné' Joel, bönni' bë'ë didza' uláz queë' Dios, gunné':

¹⁷ Caní rnnë' Dios: Lë ni le gaca dza tsöjsëtëgaca.

Isöl-la'a Bö' Lá'ayi quia', tsöjsóalenë' yúgu'të bönachi.

Zxí'mili', bönni', en nigula, ilufí'ibi' didza' uláz quia' neda'.

Yugu' bi'i ra'bán ila'lé'ebi' le ulu'a lahui,

ate' yugu' bönni' gula ila'nenë' yëla.

¹⁸ Cate' idxín dza ni' quísi'a' Bö' Lá'ayi quia',

tsöjsóalenë' huen dxín quia', bönni', en nigula,

ate' ilu'ë didza' uláz quia' neda'.

¹⁹ Ulu'a lahui lúxiba xítsá' le ilún ga ulu'bani bönachi,

ate' yödzölió ulu'a lahui le ilaca bë',

rön, en guí', en dzön ca böaj.

²⁰ Ichul-la gubidza, ate' gaca beo' xiná ca naca rön.

Caní gaca cate' idxín dza ni' chibulu'ë Dios.

Gaca dza ni' le catu caz rilë'eru'.

²¹ Ulu'lágaca yúgu'të nupa ni' ulu'lidza Lë' Xanru',

lu yöl-la' réajlé' quegüequi Lë'.

²² 'Buli'zé nágali' lè ni guá' libí'ili', bônachi Israel. Dios caz benë' bal Jesús, bönni' Nazaret ga zóali'. Dios bë'è Lè' lataj benë' le tun ga rubániru', yugu' yöl-la' huáca, en le taca bë'. Yúgu'tè lè na' benë' Dios lu në'è Jesús, ca na' chinöz quézili'. ²³ Lësca' caní, Dios bë'è lataj nu budödi Jesús lu ná'ali'. Caní guca, ca na' chigunná ládxë'è Dios gunë', en ca naca le chibucözë' dza ni'te. Libí'i cázali' guzxónli'-në' Jesús, en bétili'-në' lu ná'agaquië' yugu' bönni' tuá' dö', bönni' gulútië' Lè' cate' ni' bulu'dá'gaquië' Lè' lè'e yaga cruz. ²⁴ Ní'irö Dios caz busubané' Jesús na'. Bubéajë' Lè' lu yöl-la' guti, tu' cabí guca ugá'anë' tsaz lu yöl-la' guti na'. ²⁵ Ca naca lè ni, bë'è didza' David uláz queë' Dios ca naca queë' Jesús, gunnë':

Bilé'etiqui'sida'-në' Xanru', zoë' lahua'.

Lè' zoë' cuita lè'a ibëla, rizónë' neda', para cabí gaca nu bi gun quia'.

²⁶ Que lè ni na' budzeja ládx'a'a, ate' lu yöl-la' rudzeja quia' bil-la'.

Que lè ni na' guna' löza Lè' cate' idxín dza gátia'.

²⁷ Xantu' Dios, nözda' biti' ucá'anu' neda' lataj chul-la ga nacua' nupa nátigaca.

Biti' gu'u lataj initi idútë le naca'.

Naca' bönni' nadxí'i quézinu' Lí'.

²⁸ Buzéajni'inu' neda' ca ral-la' guna' para idéli'da' yöl-la' na'bán idú.

Gunu' ga udzëjada' tu' zóalen cazu' neda'.

²⁹ 'Na'a, libí'ili', bôcha'a. Naca bë' gútië' xuz xtó'oru' David, en bigáchë'è yeru ba, ate' ba queë' na' dë ga zóaru' ga ridxintë na'a dza. ³⁰ David na' bë'è didza' uláz queë' Dios, en gunözinë' benë' tsutsu Dios didza' le guzxi' lu në'è queë', gunë' ga galjë' Cristo ladaj di'a dza queë' si' zá'gaca, ate' Cristo na' inná bë'è xilatjë' David na'. ³¹ Tu' bilé'enë' David lè ni zí'aló, bë'è didza' ca guca, hubané' Cristo, en ca guca, biti' bugá'anë' lataj chul-la ga nacua' nupa nátigaca, en biti' guniti le naca cazë'. ³² Dios busubané' Jesús lu yöl-la' guti, ate' ca guca lè ni yúgu'tétu' runtú' ba nalí que. ³³ Caní guca, len yöl-la' huáca queë', Dios buchisé' Lè' xitsá' ga ni' nácatërë' zxón. Na'a, Cristo chigusól-lë'è Dios Bó' Lá'ayi ni, ate' raca ca na' guzxi' lu në'è Dios gunë' lu në'è Cristo, ate' Dios Bó' Lá'ayi na' runë' yugu' lè ni rilé'eli', en riyónili'. ³⁴ Biti' buëpë' David na' yehua' yubá, pero lè cazë' David na' gunnë':

Xanru' Dios gudxë' Xana':

Gurö'i cuita lè'a ibëla ga naca lo

³⁵ cate' gunra' ga ulu'zechu zxi'bigaca nupa ta'dá'bag'a Li' lo' Li'.

³⁶ 'Na'a, bônachi Israel, ral-la' inözili' le nácatë. Dios benë' ga náquië' Lè cazë' Jesús ni Xanru', en Bönni' Rusölá, bönni' na' budá'ali'-në' lè'e yaga cruz.

³⁷ Cate' yugu' bönni' ni' bila'yönnë' lè ni, gula'bö'è böniga, ate' gulë' Pedro, en ia'zica're' bönni' gubáz queë' Cristo, ta'nnë':

—Bôchi'ru', ¿nacxi gúntsatu'?

³⁸ Ní'irö Pedro gudxë' légaquië':

—Buli'bí'i ládx'i'li', en guli'dila nisa tu' tuli' lu Lè' Jesucristo para uniti lahuë' Dios dul-la' nabága'li', ate' Dios Bó' Lá'ayi idisóalenë' libí'ili', Nu na' isól-lë'è Dios. ³⁹ Queéli' nequi le guzxi' lu në'è Dios, en quégaca xzí'inili', enca' quégaca yúgu'të bônachi izá'a, yúgu'të bönni' ni' ulidzë' Xanru' Dios légaquië'.

⁴⁰ Yugu' didza' ni, en ia'bal-la zían didza' benë' ba nalí Pedro, le guchizië' icja nágagaquië', gunnë':

—Guli'gún ga uláli', irúajli' ladjagaca bônachi tuá' dö' nacua' dza ni zóaru' na'a.

⁴¹ Caní guca, gula'dila nisa nupa ni' gula'zí' lu në'eguequi didza' na' bë'è Pedro. Dza na' ca chi uruá' gayuá' bônachi gulún légaquië' tuz. ⁴² Gulunë' yúgu'të idútë le bulu'sédinë' gubáz nasól-lë'è Cristo légaquië'. Guláquië' tuz tuë' len ia'tuë', en gulahuë' tsözxón le rusá' ládx'i'ru' ca gútië' Jesús, ate' gulunë' tsözxón, bulu'lidzë' Dios.

Ca tun bônachi queë' Cristo

⁴³ Gulunë' gubáz queë' Cristo zían le run ga rubániru', en zían le taca bë', pero guladxi gula'dzöbi ia'zica'rö bônachi. ⁴⁴ Yúgu'të nupa na' ta'yéajlë' Cristo gulaca tuz, ate' bulu'un tuz yúgu'të le dë queguequi. ⁴⁵ Cate' bila'lé'enë' ta'yadzaj nupa nútsa gaca ladjagaquië', ní'irö yugu' bönni' bi dë quégaquië' gulúti'è le, ate' gula'guisíë' dumí na' que queégaca nupa ni' bi ta'yadzaj. ⁴⁶ Bulu'dubë' tsözxón chila yudo' yugu' dza, ate' gulahuë' le rusá' ládx'i'ru' ca gútië' Xanru'. Caní gulunë' gapa naca lu yu' u' lidxigaquië'. Gulahuë' tsözxón, ate' bulu'dzëjanë', en gulaca idú ládx'i'gaquië'. ⁴⁷ Gula'gu'è Dios yöl-la' ba, ate' yúgu'të bônachi gulún légaquië' bal. Buzané' Xanru' nupa tu'dubi queë', nupa na' tu'lá tu tu dza.

3

Ruhuóaqüë' tu bönni' biti' raca së'ë

¹Tu dza ni' gula'benë' Pedro, en Juan, sôjáquië' tsôzxôn lu chila yudo', cate' tu'dubi bônachi tu'lidza Dios ni', le naca idú ridôdi xihuó. ²Ga ni' ta'dödë' zoë' tu bönni' biti' raca së'ë dza ni'te ni' náquië' b'í'ido'. Yugu' dza rôjuá'gaquië' lë' ni', en ta'bëquië' lë' ra' yudo' ga nazí'i le Ra' Yu'u Lachi, para inábinë' nu bi unódzjasô queë' ladaj nupa ni' ta'yaza lô'a yudo'. ³Bönni' ni, cate' bilé'enë' Pedro, en Juan, sôjáquië' ta'yázië' lô'a yudo', gúta'yué' lôgaquië' bi ulu'nódzjasë' queë'. ⁴Ní'irô bulu'yué' Pedro, en Juan lë', ate' Pedro gudxë' lë':

–Buyú netu'.

⁵Ní'irô bönni' na' buzëda' náquië' légaquië' tu' runë' lôza bi ulu'nódzjasë' queë'. ⁶Pedro gudxë' lë':

–Biti' dë dumí plata, dumí oro quia', pero le dësö quia' gunna' quiu'. Ni'a que yöl-la' huáca que Lë' Jesucristo, bönni' Nazaret, guyasa, en guzë'e.

⁷Ní'irô gudëlë'ë Pedro në'ë ibëla bönni' huë' na', en buchisë' lë', ate' la' böacatë ni'ë, en buguitaj bëchaj ni'ë bönni' na'. ⁸Ní'irô guzuinë' bönni' na', ate' guxiti'ë, en guzë'ë. Guyázalenë' tsôzxôn Pedro, en Juan, lô'a yudo', rizë'e ni'ë, en rixítí'ë, en rigu'ë Dios yöl-la' ba. ⁹Yúgu'të bônachi nacua' ni' ta'lë'e lë' rizë'e ni'ë, en rigu'ë Dios yöl-la' ba. ¹⁰Caní guca, guládxinë', en bulu'bábinë' ca naca lë' na' guca, tu' bulu'únbë'ë lë', náquië' bönni' na' ribö'ë ra' yudo' ga nazí'i le Ra' Yu'u Lachi, rinabë' nu bi unódzjasô queë'.

Didza' bë'ë Pedro chila yudo'

¹¹Tsanni ni' bönni' na' biti' guca së'ë, ate' böáquië', zönë' ná'agaquië' Pedro, en Juan, bulu'dubi yúgu'të bônachi ga na' nacu'ë chila yudo' nazí'i le: Chila Queë' Salomón, ate' gula'ná' badxë'. ¹²Cate' bilé'enë' Pedro lë' ni, gudxë' bônachi na':

–Libí'ili', bönni' Israel, ¿bizq que rubánili' ca naca lë' ni? ¿Bizq que ruyuli' netu', en réquitsili' netu'so buntu'-'në' bönni' ni, en bentu' ga rizë'e ni'ë len yöl-la' huáca queëztu', o ni'a que le reaj ládxi'tu'-'në' Dios? ¹³Naca lë' ni le benë' Dios. Náquië' Dios quégaquië' xuz gudódi queëru' Abraham, en Isaac, en Jacob. Lë' cazë' bënterë' bal Jesús, Zxí'inë'. Jesús ni, libí'i cázali' bëtili'-'në' lu ná'agaquië' bönni' ta'nná bé'enë' libí'ili'. Cate' gú'unnë' Pilato usanë' Jesús, gudá'baga'li'-'në'. ¹⁴Buzóali' tsólá'aló Bönni' Tsahui', en Lá'ayi, ate' gunábili'-'në' Pilato usanë' queëli' tu bönni' rútië' bônachi. ¹⁵Caní guca, bëtili'-'në' Bönni' runna cazë' yöl-la' na'bán idú queëru'. Ní'irô Dios busubanë' Lë' lu yöl-la' guti, ate' ca naca lë' ni runtu' ba nalí que. ¹⁶Tu' guyéajlë'ë bönni' ni Jesús, böaca ni'ë. Rilé'eli'-'në', en núnbë'ëli'-'në'. Tu' réajlë'ë Jesús, Lë' bunë' dxi'ádo' bönni' ni, ate' rilé'eli' yúgu'tëli' le nácatë na'.

¹⁷Na'a, böcha'a, nôzda' benli' caní, bëtili'-'në' Jesús tu' cabí guyéajni'ili', en biti' gula'yéajni'inë' bönni' ta'nná bé'enë' libí'ili'. ¹⁸Caní busudxinë' Dios didza' na' bë'ë zí'aló, le gula'nnë' bönni' gulu'ë didza' uláz queë' ca ral-la' qui'í sáque'ë Cristo. ¹⁹Que lë' ni na', buli'bí'i ládxi'li', en buli'huóaca queë' Dios, para ugtüë' dul-la' nabága'li', en gunë' ga huóaca ládxi'li'. ²⁰Ní'irô isól-lë'ë leyúbóló Jesús, Bönni' na' buzóë' dza ni'te para gáquië' Cristo, Bönni' Rö queë', Bönni' na' inná bé'enë' libí'ili'. ²¹Na'a, run bayudxi ugá'anë' yehua' yubá ni' cate' idxinró dza uduhuénë' tsahui' yúgu'të le raca, en gaca ca na' chigunná cazë' Dios, lë' na' gula'nnë' bönni' gulu'ë didza' uláz queë', bönni' ni' gula'cu'ë dza ni'te. ²²Lësca' caní Moisés gudxë' xuz xtó'oru', gunnë': "Xanru' Dios isól-lë'ë queëli' tu bönni' galjé' ládjagaca di'a dza queëli'. Gáquië' bönni' gu'ë didza' uláz queë' Dios. Isól-lë'ë Lë' queëli' ca na' gusól-lë'ë neda'. Run bayudxi uzë' nágali'-'në' ca naca yúgu'të le guíë' libí'ili'. ²³Yúgu'të nupa biti' ulu'zë' nágagaca bönni' ni' gu'ë didza' uláz queë' Dios ila'niti, en ulu'lá'alén bônachi queë' Dios."

²⁴Ca naca dza ni zóaru' na'a, gula'guixjô'ë yúgu'të bönni' gulu'ë didza' uláz queë' Dios ga gudéla'të zoë' Samuel, en gudódi ni'. ²⁵Libí'ili' nácali' zxi'ini xi'sógaquië' bönni' gulu'ë didza' uláz queë' Dios, ate' nequi queëli' didza' rucá'ana tsahui, le bënlenë' Dios xuz xtó'oru', cate' ni' gudxë' Abraham: "Ni'a que le gunë' zxi'ini xi'sú' ilaca bica' ba yúgu'të bônachi yödzólió." ²⁶Cate' Dios busubanë' Zxi'inë' lu yöl-la' guti, gusól-lë'ë Lë' zí'aló queëli' para gunë' ga gácali' bica' ba, en ucá'anali' le cabí naca dxi'a runli'.

4

Ta'dxinë' Pedro, en Juan lôgaquië' bönni' yudo' tu'chi'a tu'söröë'

¹Tsanni ni' bônachi na' tu'ilenë' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bé'enë' ni'a ná'agaquië' bönni' yudo', bila'dxinë' tsárido'os ga na' nacu'ë. ²Gula'lenë' bönni' ni tu' tsédinë' Pedro, en Juan, bônachi, en té' léguequi ulu'bán nupa chinátigaca tu' bubanë' Jesús. ³Ní'irô gula'zönë' Pedro, en Juan, ate' gula'gu'ë légaquië' lidxi guíë' ga idxinró dza yúbóló tu' chiridzô' dza na'. ⁴Zián nupa ni' bila'yóni didza' gulu'ë Pedro, en Juan, gula'yéajlë' Cristo. Na'a, yugu' bönni' biguiú'só ta'yéajlë'ë Cristo nácagaquië' idú chi-un gáyú'ë.

⁵ Dza buropi ni, yugu' bönni' unná bē', en bönni' gula tu' zéajni' inē' bönachi judío, en yugu' bönni' yudo' usēdi, bulu'dubē' lu yödzo Jerusalén. ⁶ Lēscá' Anás, bixúz lo, en Caifás, en Juan, en Alejandro, enca' yúgu'tē bönni' di'a dza quégaquiē' bixúz lo bulu'dubē' ni'. ⁷ Ní'irō duchē'gaquiē' Pedro, en Juan, ate' bulu'sudxinē' légaquiē' gatsaj láchui'lō ga na' nacu'ē, en gula'nábinē' légaquiē', ta'nnē':

—¿Bizxi yōl-la' unná bē' dē lu ná'ali' runli' lē ni? ¿Nuzxi budōdi lu ná'ali' yōl-la' unná bē' ni?

⁸ Ní'irō Pedro gudxē' légaquiē', zóalenē' Dios Bō' Lá'ayi lē', rnnē':

—Libí'ili', núlōli' rinná bē'eli' netu', bönachi Israel, en libí'ili', bönni' gula. ⁹ Na'a, ¿rinábitseli' netu' ca naca dxin dxi'a bentu' queē' bönni' huē' ni, en nacxi guca, böáquiē' bönni' ni? ¹⁰ Riguíjōi'itu' libí'ili' para ila'nōzi yúgu'tē bönachi Israel. Zoē' bönni' ni lolí, nuhuóáquiē' tu' ben dxin yōl-la' huáca queē' Jesucristo, bönni' Nazaret, Bönni' ni' budá'ali'-nē' lē'e yaga cruz, pero Dios busubanē' Lē' lu yōl-la' guti. ¹¹ Dios bē'ē didza' ca naca queē' Jesús ni, cate' ni' gunné': "Libí'ili', bönni' rucua'ali' zō'ō, gurú'unali' guiōj na', pero guró caza' neda' guiōj na' para gaca guiōjlen zō'ō." ¹² Cúnturō nu zoa nu gaca usólá bönachi, tu' cabí zoa yōdzólíō ni ia'tué' bönni' nuzóē' Dios, nu gaca usólá rē'u.

¹³ Cate' bila'lē'enē' nácagaquiē' rugu ladxí' Pedro, en Juan, en guléquite'enē' bití' nazēdagaquiē' que yudo', en nácagaquiē' bönni' cá'asō, bulu'bábinē', ate' yōjnéguequinē' Pedro, en Juan na', gula'cuá'lenē' Jesús. ¹⁴ Lēscá' bila'lē'enē' bönni' na' böáquiē', zuinē' lógaquiē', ate' bití' guca bi ila'nnē' quégaquiē'. ¹⁵ Ní'irō gula'nná bē'enē' nupa ulu'béaj légaquiē' lō'alō yu'u ga na' nudúbigaquiē', ate' gulún xtidzē'ē la' légacasē'. ¹⁶ Gula'nnē':

—¿Nacxi gúntsaru' quégaquiē' bönni' ni? Le nácátē gulunē' tu le run ga tu'bani bönachi, ate' nōzīgaca yúgu'tē bönachi nacuá' Jerusalén lē ni. Bití' gaca tá'baga'ru' le. ¹⁷ Na'a, para cabí sērō didza', en ila'yōni zíanrō ca' bönachi, uzeru' bach légaquiē' para cabí ilu'ilenrē' bönachi didza' ca naca queē' Jesús na'.

¹⁸ Ní'irō bulu'lidzē' Pedro, en Juan, ate' bulu'zenē' bach légaquiē' para cabí ilu'ilenrē' bönachi didza', en para cabí ulu'sédinē' légaquiē' ca naca queē' Jesús. ¹⁹ Ní'irō bulu'bi'ē didza' Pedro, en Juan. Gulé' légaquiē':

—Bulí'chi'a bulí'sörō libí'ili' channō naca tsahui' lahuē' Dios uzērō nágatu' xtidza'li' libí'ili' ca xtidzē'ē Dios. ²⁰ ¡Bití' gaca soa dxitu'! ¡Run bayudxi gúf'itu' didza' que le bilé'etu', en le biyónitu'!

²¹ Ní'irō yugu' bönni' yudo' tu'chi'a tu'sörōē' bulu'zenē' bach légaquiē', pero bulu'sané' légaquiē' tu' cabí gula'dzólínē' nacxi ilunē' légaquiē' xígua'. Caní gulunē' tu' guládxinē' le ilún bönachi lu yödzo ni', tu' ta'gú'u Dios yōl-la' ba ni'a que lē na' guca. ²² Bönni' na' böáquiē', en guca queē' lē na' run ga rubániru', chiyú'urē' ca choá' iz.

Ta'nábinē' Dios gunē' ga ilácagaquiē' rugu ladxí'

²³ Cate' bönni' yudo' bulu'sané' Pedro, en Juan, böajgaquiē' ga na' nacu'ē luzá'agaquiē', ate' bulu'siyōnnē' légaquiē' yúgu'tē lē na' gula'nnē' yugu' bixúz unná bē', en bönni' gula tu' zéajni' inē' bönachi judío. ²⁴ Cate' bila'yōnnē' lē ni, bulu'lidzē' Dios tsózxōn, gula'nnē':

—Xantu' Dios, ¡zxoñtērō nacu' Li'! ¡Li' nacu' Dios! ¡Benu' lúzxibal! ¡Benu' luyú! ¡Benu' nísado'! ¡Benu' yúgu'tē le nacuá' tu' lu lataj na'! ²⁵ Uláz quiu' Li' bē'ē didza' David, bönni' huen dxin quiu', ni' zóalenē' Dios Bō' Lá'ayi lē', gunné':

¿Bizx que tun dzatsa bönachi,

en ta'zá' ladxí'gaca le ruá' dō'?

²⁶ Yugu' bönni' ta'nná bē'ē yōdzólíō ni gulún dzatsē',

ate' guláquiē' tuz bönni' unná bē'.

Gula'dá'báguē'ē Xanru' Dios,

enca' Cristo, bönni' guró cazē' Lē'.

²⁷ Le nácátē guláquiē' tuz Herodes, en Poncio Pilato, en yugu' bönni' izá'a, en yugu' bönni' Israel lu yödzo ni. Gula'dá'báguē'ē Jesús, Zxí'inu' lá'ayi, Bönni' na' buzú' queétu'. ²⁸ Gulunē' yúgu'tē le bucōzu' zí'atēlō, en guzxi' lu no'o, ate' guca ca na' benu' tsutsu xtidzu' u ca ral-la' gaca. ²⁹ Na'a, Xantu', buyú le tu' zenē' bach netu', en ben ga gácatu' rugu ladxí', para gúf'itu' xtidzu' u, netu' bönni' huen dxin quiu'. ³⁰ Ben ga gaca úngacatu' nupa tē'e, tu' sóalen yōl-la' huáca quiu' netu', en ben ga gaca gúngacatu' le ilún ga ubánitu', en le ilaca bē'. Gaca caní tu' zóalenē' Jesús, Zxí'inu' lá'ayi, netu'. ¡Ca' gaca!

³¹ Cate' budxi bulu'lidzē' Dios, guzxi'zi lataj ga na' nacu'ē, ate' Dios Bō' Lá'ayi guzóalenē' yúgu'tē, ate' len yōl-la' rugu ladxí' quégaquiē' gulu'ē xtidzē'ē Dios.

Tu'únē' tuz le dē quégaquiē'

³² Bönachi zían na' ta'yéajlē' Cristo, tuz ca ta'zá' ladxí'guequi, en tuz ca gulúngaca. Bití' gunné' nu bönni' nútsē'ē ládjagaquiē' nequi queézē' le dē queē', pero bulu'únē' tuz le dē quégaquiē'. ³³ Len yōl-la' huáca zxon gula'gúxjō'ē gubáz na' nasól-lē'ē Xanru' Jesús ca bubané' Lē', ate' le buzá' ladxē'ē Dios quégaquiē' gúcalen yúgu'tē'. ³⁴ Cuntu nu bi biyadzaj nu

nutsa' ladjagaquië'. Caní guca tu' yúgu'të bönni' zoa bi dë quegaquië', xiyúgaquië', o lídxigaquië', gulúti'ë le, ate' dumí que na' yöjuá'gaquië',³⁵ en bulu'dödë' le lu ná'agaquië' gubáz na' nasól-lë'ë Cristo, ate' légaquië' gula'guísië' le que queégaca nupa bi biyadzaj queguequi.³⁶ Zoë' José ní', bönni' bulu'zóë' gubáz na' nasól-lë'ë Cristo ia'tú lë' Bernabé, le rnna lu didza' xidza', Bönni' Ruhué Tsáhuë'ë. Nabábalenë' zxi'ini xi'sóë' Leví, en gulgjé' luyú Chipre.³⁷ Bëti'ë bönni' ní tu cö' xiyüë', ate' yöju'ë dumí que na', en budödë' le lu ná'agaquië' gubáz na' nasól-lë'ë Cristo.

5

Dul-la' gulunë' Ananías, en Safira

¹ Tu bönni' yúbölö lë' Ananías, bëti'ë tu cö' xiyüë'. Safira, nigula queë', bennu tsözxön lë'. ² Ananías na' bucachi' lanë' late' dumí que yu na', ate' nözinu ca' nigula queë'. Le bugá'anasö yöju'ë, en gulu'ë le lu ná'agaquië' gubáz nasól-lë'ë Cristo. Rnnë':

—Tsa nisö guzxi'a.

³ Pedro gudxë' lë':

—Ananías, ¿naru' guyázatsö Satanás tu' xihui' lu icja ladxí'do'o, en ben ga rizí' yé'enu' Dios Bö' Lá'ayi, ate' bucachi' lanu' late' dumí que xiyú' na'? ⁴ Tsanni ní' nagá'ana yu na' lu no'o, ¿naru' cabí nequi quez quiu'? Gudödi bëti'u le, ¿naru' cabí dë' caz lu no'o dumí que na'? ¿Bizx que guró'ö icju' gunu' caní? Dios caz guzxi' yé'enu', calégasö bönachi.

⁵⁻⁶ Cate' biyönnë' Ananías didza' ní, gudzö'ë, en gütité'. Ní'irö gula'bíga'tëbi' bi'i ra'bán, ate' bulu'chólibi' lë' lari', en guluá'abi' lë', en yöjcáchi'gacabi' lë'. Guladxi gula'dzöbi yúgu'të nupa ní' bila'yöni ca guca lë ni.

⁷ Ca tsonna hora gudödi ní', bidxinnu nigula queë' Ananías na' ní', en biti' nözinu lë na' guca queë' bönni' queënu. ⁸ Ní'irö Pedro gudxë'-nu:

—Gudíxjö'i neda'. ¿Naru' guzxi'ili' tsa nisö xiyuli' na'?

Gunnánu:

—Ön, tsa nisö guzxi'itu'.

⁹ Ní'irö Pedro gudxë'-nu:

—¿Bizx que ben tuz xtídzalí' guzxi' bë' xihui'li' Dios Bö' Lá'ayi? Buyútsöca'. Chizóa ulu'dxinbi' yugu' bi'i bulu'cáchi'bi'-në' bönni' quiu', ate' ulu'béajbi' ca' lí'.

¹⁰ Ní'irö lá' gudzö'tënu xini'ë Pedro, en gütiténu. Cate' gula'yázabi' bi'i ra'bán na', gula'lé'ebi'-nu chinátinu. Ní'irö bulu'béajbi'-nu, en yöjcáchi'gacabi'-nu cuita lë'ë bönni' queënu. ¹¹ Que lë ni na' guladxi gula'dzöbi yúgu'të bönachi queë' Dios, ate' guladxi ca' yúgu'të nupa bila'yöni ca guca lë ni.

Tunë' bönni' gubáz nasól-lë'ë Cristo le taca bë'

¹² Gulunë' bönni' gubáz na' nasól-lë'ë Cristo zían le taca bë', en zían yöl-la' huáca zxön lógaca bönachi lu yödzö. Yúgu'të' bulu'dubë' tsözxön ga naca chila yudo' nazí' le Chila Queë' Salomón. ¹³ Ladaj nupa ní' biti' ta'yéajlé' Cristo, cuntú nu burugui tsöjtá' légaquië', ate' bönachi lu yödzö ní' gulún légaquië' bal. ¹⁴ Ní'irö ia'bal-la bönachi zían ca' gula'yéajlé' Cristo, bönni', en nigula. ¹⁵ Cate' bila'lé'ë bönachi yugu' le tunë' bönni' ní' ta'yéajlé'ë Cristo, yöjuá'agaca nupa te'e gapa naca la' nöza, ate' gula'xóë' léguequi lu da'a yaga, en ia'bal-la lu dá'asö, para cate' tódë' ní' Pedro, tsa zxúl-lasö queë' cu'u zxul-la bal-la bönachi huë' na', para ulu'huóaca. ¹⁶ Lësca' bila'rúaj bönachi yugu' dzaga yödzö, en bila'dxin Jerusalén, nuá'agaca nupa te'e, en nupa ta'guí'i ta'zaca' tu' yú'ugaca bö' xihui' léguequi, ate' nupa'huóaca yúgu'téguequi.

Bönni' yudo' ta'bia ladxí'gaquië' bönni' gubáz nasól-lë'ë Cristo

¹⁷ Que lë ni na' bixúz lo, en bönni' yudo' saduceo na' dá'gaquië' bixúz lo, bulu'zxé'enë' Pedro. ¹⁸ Ní'irö bixúz lo na', en bönni' na' dá'gaquië' lë' gula'zönë' gubáz na' nasól-lë'ë Cristo, ate' gula'gu'ë légaquië' lidxi guíë'. ¹⁹ Ní'irö bidxinë' gubáz lá'ayi queë' Xanru' chi'i dzö'ölö, ate' gusaljé' lidxi guíë' na', en bubéajé' légaquië'. ²⁰ Gubáz lá'ayi na' gudxë' légaquië', rnnë':

—Guli'tséaj, guli'tsöjsóa chila yudo', en guli'tsöjé'len bönachi ní' didza', quíxjö'i'ili' légaquië' ca naca yöl-la' na'bán idú ni, en ca gaca ila'déli'në' le.

²¹ Cate' bila'yönnë' didza' ní ru'ë gubáz lá'ayi na', gula'yázië' chila yudo' cate' za' rení' zílado', en bulu'sédinë' bönachi.

La' ní'sö bulu'dubë' bixúz lo, en nupa nacué'len lë' tsözxön, len bönni' yudo' tu'chi'a tu'söröë', en bönni' gula tu'zéajni'inë' bönachi Israel, ate' gula'sól-lë'ë nupa tsöjaca lidxi guíë' para tsöjxí'gaquië' yugu' gubáz na' nasól-lë'ë Cristo, tu' téquinë' ní' nacué' lidxi guíë' na'. ²² Cate' ní' a ná'agaquië' bönni' yudo' na' bila'dxinë' ní', biti' yöjxáca'gaquië' légaquië' lu yu'u lidxi guíë' na', ate' ní'irö bulu'huóajé' tsöjtíxjö'gaquië' ca'. ²³ Gulé' bönni' yudo' tu'chi'a tu'söröë' na', ta'nnë':

—Le nácatë yöjxáca'tu' nayáyajtë lidxi guíë, ate' nacué' nupa tun chi'i ra' lidxi guíë na', pero cate' gusalajtu', cuntú nu yöjxáca'tu' lu yu'u na'.

²⁴ Cate' bixúz lo, en yugu' bixúz unná bē', en bōnni' nacua' lu nē'ē ni'a ná'agaca bōnachi yudo', bila'yōnnē' didza' ni, gula'bō'dē'ē bōniga tu' cabi nōzigueuinē' bizxi guntē lē na' raca. ²⁵ Ní'irō bidxinē' tu bōnni' ni', en gudí'xjōi'inē' légaquiē', rnnē':

—Buli'yútsōca. Yugu' bōnni' na' gulú'ugacali'-nē' lidxi guiē' nacu'ē chila yudo' tu'sēdinē' bōnachi.

²⁶ Ní'irō guyijē' bōnni' na' rinná bē'enē' ni'a ná'agaca bōnachi yudo', dzágagaquiē' lē ni'a ná'agaquiē' na', ate' gula'chē'ē yugu' gubáz na' nasól-lē'ē Cristo, pero bití' bi gulunē' quégaquiē', tu' guládxinē' ulu'ladxi' bōnachi nacua' ni' légaquiē' guiōj. ²⁷ Cate' chinachē'gaquiē' yugu' gubáz na', bulu'sudxinē' légaquiē' lōgaquiē' bōnni' yudo' tu'chí'a tu'sōrōē' na', ate' bixúz lo gunábinē' légaquiē', rnnē':

²⁸ —¿Naru' cabí gudáxida'atu' libí'ili' bití' usédili' bōnachi ca naca queē' bōnni' na'? Na'a, chigudísili' xibá ni idutē yōdzō Jerusalén, en rē'ēnili' usubága'li' netu' xíguia' tu' nōzi yōl-la' guti queē' bōnni' na'.

²⁹ Ní'irō bulu'bi'ē didza' Pedro, en ia'zica'rē' gubáz na' nasól-lē'ē Cristo, ta'nnē':

—Run bayudxi uzērō nágatu' xtídzē'ē Dios ca xtídzá'gaca bōnachi. ³⁰ Libí'ili' bétili'-nē' Jesús cate' ni' budá'ali'-nē' lē'e yaga cruz, pero Dios quégaquiē' xuz tó'oru' busubanē' Lē'. ³¹ Jesús ni, Dios buzóa cazē' Lē' ga nayēpisētērē' cuita lē'ē ibēla, para gáquiē' Bōnni' Lo, en Bōnni' Rusólá, en gunē' ga ulu'bi'í lādxi'gaca bōnachi Israel, para gaca uniti lahuē' dul-la' nabága'gaquiē'. ³² Ca naca lē ni, runtu' netu' ba nalí que, ate' lē'sca' runē' Dios Bō' Lá'ayi ba nalí que, Bō' na' risól-lē'ē Dios quéga nupa tun ca rna xtídzē'ē.

³³ Cate' bila'yōnnē' bōnni' yudo' tu'chí'a tu'sōrōē' na' lē ni, gula'lenē', en gulē'ēnnē' ilútiē' légaquiē'. ³⁴ Ní'irō guzuínē' tu bōnni' yudo' ruchí'a rusōrōē' lōgaquiē', lē' Gamaliel, tu bōnni' yudo' fariseo. Rácadē'ē bōnni' ni xibá queē' Moisés, ate' yúgu'tē bōnachi tun lē' bal. Gudxē' nupa na' ulu'béaj yugu' gubáz na' nasól-lē'ē Cristo lō'aló tu chí'ido'. ³⁵ Ní'irō gudxē' bōnni' yudo' tu'chí'a tu'sōrōē' na', gunnē':

—Libí'ili', bōnni' Israel, buli'yutēz queē'li' ca naca le rē'ēnili' gunli' quégaquiē' bōnni' ni. ³⁶ Ral-la' tsōjnēli' ca tu' gaca zí'atēlō cate' si' idxín dza ni zóaru' na'a. Birúajē' Teudas, ate' ben cuinē' ca tu bōnni' nayēpisētērē'. Guláquiē' bōnni' yōjtá'gaquiē' lē' xidú tapa gáyu'tē bōnni'. Yugu' bōnni' rōjáquiē' gudil-la' gulútiē' lē', ate' gulásilasi yúgu'tē nupa ni' yōjtá'gaca lē', ate' guntísō ca' yúgu'tē le benē' bōnni' na'. ³⁷ Gudōdi guca lē ni, birúajē' ca' Judas, tu bōnni' Galilea. Benē' caní cate' ni' gula'yú'u lu guichi bōnachi ta'guízaxj lázagaquiē', ate' yōjtá'gaca bōnachi zían lē'. Lē'sca' gulútiē' bōnni' ni, ate' gulásilasi yúgu'tē nupa ni' yōjtá'gaca lē'. ³⁸ Que lē ni na' rea' libí'ili': Guli'sán-gaquiē' bōnni' ni, en bití' bi gunli' quégaquiē'. Channō naca quégacasō bōnachi lē ni ta'nnē' o lē ni tunē', initi caz, ³⁹ pero channō naca queē' Dios, bití' gaca usunítili' le. ¡Buli'yú cuinli' cabí tál-lalenli'-nē' Dios!

⁴⁰ Ní'irō gulunē' tuz didza' len lē'. Bulu'lidzē' yugu' gubáz na' nasól-lē'ē Cristo, ate' gula'guinē' légaquiē', en bulu'zenē' légaquiē' bach para cabirō iluf'ilenē' bōnachi didza' ca naca queē' Jesús. Ní'irō bulu'sanē' légaquiē'. ⁴¹ Bila'rúajē' gubáz na' nasól-lē'ē Cristo lōgaquiē' bōnni' yudo' tu'chí'a tu'sōrōē' na'. Tu'dzējanē' tu' bē'ē Dios légaquiē' lataj gula'gu'i gula'záquē'ē tu' dá'gailuē' Jesús. ⁴² Yugu' dza bulu'séditiqui'sinē' bōnachi, en gulunē' libán queē' Jesucristo lu chila yudo', en gapa naca lu yu'u lídxigaca bōnachi.

6

Ta'bōē' gadxi bōnni' para ilácalenē' bōnachi queē' Cristo

¹ Dza ni', tu' gula'yán bōnachi ta'yéajlē' Cristo, yugu' bōnni' judío tu'ē didza' griego gula'nnē' quégaquiē' bōnni' judío tu'ē didza' hebreo tu' nōzi le raca cate' ta'guisiē' le ilágunu nigula uzēbi, tu' cuntu nu ruf'í le ilágunu nigula uzēbi quégaquiē' bōnni' ni' tu'ē didza' griego. ² Ní'irō idxínnutē' bōnni' gubáz na' nasól-lē'ē Cristo bulu'tubē' yúgu'tē bōnachi ni' ta'yéajlē' Cristo, ate' tē' légaquiē':

—Bití' naca dxi'a soa dxitu', en cabí guntu' libán que xtídzē'ē Dios, para guntu' dxin cú'utu' le ilágugaca bōnachi. ³ Que lē ni na', bōchi' luzá'atu', guli'cō gadxē' bōnni' ládjali', para ugú'uru' lu ná'agaquiē' dxin ni. Yugu' bōnni' na' run bayudxi ilácalaquiē' bōnni' tun yúgu'tē bōnachi légaquiē' bal, en nácagaquiē' bōnni' ta'yéajni'i, en naca bē' Dios Bō' Lá'ayi zóalenē' légaquiē'. ⁴ Netu' ni ulídzatica'stu'-nē' Dios, en uséditu' bōnachi xtídzē'ē Dios.

⁵ Yúgu'tē' gula'yaza lādxi'gaquiē' didza' ni, ate' gula'bōē' Esteban, tu bōnni' réajlē'ē Cristo idú lādxi'ē, en zóalenē' Dios Bō' Lá'ayi lē'. Lē'sca' gula'bōē' Felipe, en Prócoro, en Nicanor, en Timón, en Parmenas, en Nicolás, bōnni' yōdzō Antioquia, bōnni' zí'aló butsé'ē ca runē' para tseaj lādxi'ē Dios ca tunē' yugu' bōnni' judío. ⁶ Ní'irō bulu'sudxinē' bōnni' na' gula'bōē' lōgaquiē' gubáz na' nasól-lē'ē Cristo. Yugu' bōnni' gubáz na' gula'xóa ná'agaquiē' légaquiē', ni' tu'lidzē' Dios.

⁷ Guzërö xtídzë'è Xanru', ate' gula'yanda' bönachi ta'yéajlë' Cristo nacua' Jerusalén. Lësca' zían bixúz judío gula'zí' lu ná'agaquië' le réajlë'ëru' Cristo.

Ta'zönë' Esteban

⁸ Esteban na' benë' le tun ga rubániru', en yugu' le taca bë' lógaca bönachi lu yödzo, zóalen yöl-la' huáca queë' Dios lë' le buzá' ládxë'ë queë'. ⁹ Ní'irö gula'yasë' bal-lë' bönni' nabábagaquië' yu'u ga tu'dubë' bönni' judío, en tu'sedë' queë' Dios, nazí' le Yu'u Quégaquië' Bönni' Nadzángaquië'. Bönni' narúajgaquië' yödzo Cirene, en yödzo Alejandría, en luyú Cilícia, en luyú Asia, gulunë' légaquië' tsózxón. Bönni' ni gula'dil-lalenë' Esteban didza'. ¹⁰ Biti' guca tá'baga'gaquië' didza' ru'ë Esteban na', tu' bë'ë didza' len yöl-la' réajni'i, tu' zóalenë' Dios Bô' Lá'ayi lë'. ¹¹ Ní'irö gula'guizxjë' bönni' ila'zí' yë'ë, ila'nnë': "Netu' biyönitu' didza' ru'ë Esteban ni, rnnë' zì'ë queë' Moisés, en queë' Dios." ¹² Cani' guca, bönni' ni gula'gu'ë xilá ládxí'gaca bönachi, tsózxón len bönni' gula tu'zéajni'inë', en yugu' bönni' yudo' usëdi. Yúgu'të bönni' ni gula'bia di'ë Esteban na'. Gula'zönë' lë', en gula'chë'ë lë' lógaquië' bönni' yudo' tu'chi'a tu'söröë'. ¹³ Lësca' bulu'cu'ë légaquië' nupa gula'guixjô' le cabi nácatë, bönni' na' gula'nnë':

–Biti' zoë' dxisë bönni' ni rnnë' zì'ë que yudo' lá'ayi ni, en que xibá queë' Dios. ¹⁴ Biyönitu' didza' bë'ë bönni' ni ca gunë' Jesús, bönni' Nazaret, rnnë' usunítië' yudo' ni, en utsë'ë yugu' le nalëbiru' runru', yugu' lë na' gunná bé'enë' Moisés rë'u.

¹⁵ Ní'irö bönni' yudo' tu'chi'a tu'söröë', en yúgu'të nupa rō'gaca ni' bulu'yúë' Esteban, ate' bila'lë'ë' lahuë', rna' ca rna' lahuë' tu gubáz lá'ayi queë' Dios.

7

Didza' bë'ë Esteban, le gunnë' uláz queë'

¹ Ní'irö bixúz lo gunábinë' Esteban na', rnnë':

–¿Naru' nácatë caní?

² Bubi'ë didza' Esteban, rnnë':

–Libi'ili', bönni' gula, en libi'ili', böcha'a. Buli'zé nágali' le guá' libi'ili'. Dios, Bönni' nayépisë'tërë', bulu'í lahuë' ga zoë' Abraham, xúziru' gudódi, cate' ni' zoë' luyú Mesopotamia, cate' si' tsójsóë' yödzo Harán. ³ Dios gudxë' lë': "Birúaj ladzu', en bulá'alen di'a dza quiu', ate' guyéaj luyú ni' ulu'í'ida' li'." ⁴ Ní'irö birúajë' Abraham luyú Mesopotamia le naca xiyúgaca bönachi Caldea, ate' yöjsóë' yödzo Harán. Lu yödzo ni' gútië' xuzë' Abraham na', ate' lë' buzë'ë ni', ate' Dios guchë'ë lë' luyú ga ni' zóaru' na'a. ⁵ Dios biti' bë'ë lë' lataj guequi queë' luyú ni. Calëga láti'sö bunödzejë' queë' ga soë' luyú ni, pero guzxf' lu në'ë Dios unödzejë' queë' luyú ni, ate' tódi gátie' Abraham guequi luyú ni quegaca zxf'ini xi'sóë', sal-la' biti' nacu'ínibi' bi'i queë'. ⁶ Lësca' caní Dios gudxë' Abraham: "Tsójáquië' zxf'ini xi'sú' lu xiyúgaca bönachi izá'a, ate' ni' ilácagaquië' ca bönachi zi'tu'. Ilunë' bönni' luyú ni' ga ilácagaquië' zxf'ini xi'sú' bönni' nadó'ogaquië'. Ulu'saca' zi'ë légaquië' idú ca tapa gayu'í iz." ⁷ Lësca' Dios gudxë' lë': "Neda' uzótja' bönachi luyú ni', ga ni' ilácagaquië' zxf'ini xi'sú' bönni' nadó'ogaquië', ate' tódi ni' ulu'ruajë' ni', ate' ilunë' xichina' luyú ni." ⁸ Dios benlenë' Abraham tu didza' rucá'ana tsahui', en gunná bé'enë' lë' ichúguië' lu xipëla'gaquië' bönni' bigu'í nacu'ë lidxë' tu le gaca bë' nazí' lu ná'agaquië' didza' na' rucá'ana tsahui'. Gudódi ni' gúquië' Abraham xúzibi' bi'i Isaac, en cate' chigúquibi' xunu' gubidza, guchúguië' lu xipëla'bi' lë na' naca bë'. Isaac na', lësca' caní benë' queëbi' bi'i Jacob, zxf'inë', en caní benë' ca' Jacob quegaca idxinnutëbi' bi'i bönni' queë', nupa ni' gulaca xuz xtó'ogaca idxinnu cō' bönachi Israel.

⁹ Yugu' xuz xtó'oru' na', lu yöl-la' ruzxë'e quegaquië', gulúti'ë-bi' bi'i José, böchi'gaquië', lu ná'agaquië' bönni' ni' gulúti'gaquië'-bi' luyú Egipto. Dios guzóalenë'-bi' bi'i José na' ¹⁰ en busölë'-bi' lu le gulaca queëbi'. Dios bë'ë-bi' yöl-la' réajni'i, le ben ga guyaza ládxë'ë-bi' Faraón, bönni' rinná bé'enë' bönachi Egipto, ate' Faraón na' budödë' lu ná'abi' bi'i José yöl-la' unná bë' para gunná bé'ebi' bönachi luyú Egipto, en yúgu'të bönachi nacua' lidxë' Faraón na'.

¹¹ Ní'irö gúcada' gubín idú luyú Egipto, en luyú Canaán ni, ate' gula'gu'í gula'zaca' yúgu'të bönachi dza ni'. Biti' bidzöli le ilahuë' xuz xtó'oru'. ¹² Cate' biyönnë' Jacob dë' xzoa' xtila luyú Egipto, gusöl-lë'ë yugu' zxf'inë', bönni' ni' nácagaquië' xuz xtó'oru', luyú ni'. Cani' guca le zí'alö luzuí yójáquië' ni'. ¹³ Cate' le buropi luzuí yójáquië' luyú Egipto, benë' José ga bulu'úmbë'ë böchë'ë lë'. Cani' guca, gunözinë' Faraón nupa nácagaca di'a dza queë' José. ¹⁴ Ní'irö gusöl-lë'ë José didza', en benë' ga bidxinë' Jacob, xuzë', luyú Egipto, ate' dzágagaca di'a dza queë' lë'. Gulaca idú tsónnalalaj yu' chinu bönachi. ¹⁵ Cani' guca, bidxinë' Jacob luyú Egipto, ga ni' gútië' lë', ate' gulátie' ca' xuz xtó'oru' luyú ni' cate' bizá'a dza que queëgaquië'. ¹⁶ Cate' gulátie' tu tu xuz xtó'oru', zxf'ini xi'sóagaquië' yójua'agaquië' légaquië' luyú Siquem, ate' ni' bulu'cáché'ë légaquië' yeru ba lu xzan bulóaj na' gu'uë' Abraham lu ná'agaca zxf'inë' Hemor, bönni' Siquem na'.

¹⁷ 'Gudödi zían iz, cate' bidxín dza ral-la' gaca le guzxi' lu në'ë Dios, lë na' benë' tsutsu xtídzë'ë gunë' queë' Abraham, gula yán bönachi yugu' cö' Israel, ate' gulaca bönachi zían cate' ni' gula' cuá' luyú Egipto. ¹⁸ Ní'irö guryázië' bönni' yúbölö gunná bë'ë luyú Egipto na', en catu caz biyönnë' ca naca le benë' José, gúcalenë' bönachi Egipto. ¹⁹ Bönni' unná bë' na' bi'ë dö' queégaca bönachi uládz queëru'. Busaca' zi'ë yugu' xuz xtó'oru' na', en benë' ga bulu'sanë'-bi' bi'i bönni' huë'ënidö' que queégaquië', para ilátibi'. ²⁰ La' dza nísisó' gúljabí' ca' bí'ido' Moisés, ate' Dios guyaza ládxe'ë-bi'. Xuz xiná'abi' bulu'sculë'-bi' lídxigaquië' idú ca tsonna beo'. ²¹ Cate' bidxín dza ulu'sanë'-bi' xuz xiná'abi' para gátibi' bí'ido' Moisés na', bidxinnu nigula zxi'inë' Faraón ga ni' bulu'cá'anë'-bi', ate' yöjzxi'ínu-bi', en buscúluu-bi' ca bi'i que cázanu. ²² Caní guca, bizédabi' bi'i Moisés yúgu'të le táquië' bönni' Egipto, en gúcatë'röbi' zxon ca naca didza' bë'ëbi', en ca nácagaca le benbi'.

²³ 'Cate' Moisés na' chiyú'ubi' choá' iz, gunná ládxi'bi' tsöjyubi' bönachi uládz queëbi', bönachi Israel. ²⁴ Cate' bidxinbi' ga na' nacu'ë, bilé'ebi'-në' tu bönni' Egipto, rusaca' zi'ë tu bönni' uládz queëbi'. Ní'irö gúcalenbi'-në' bönni' uládz queëbi' na', en bétibi'-në' bönni' Egipto na'. Caní guca, buzí' labi' bi'i Moisés bönni' na' uláz queë' bönni' uládz queëbi'. ²⁵ Gúquibi' Moisés huala'yéajni'inë' bönni' böchi'bi' gunë' Dios ga usölábi' lë cázabi' légaquië', pero légaquië' biti' gula'yéajni'inë'. ²⁶ Ia'tú dza ca' yójxáca'bi' ia' chopë' bönni' Israel, ta dil-lë', ate' gu'unibi' cuéqui dza'bi' légaquië', en gúdxibi' légaquië': "Libí'ili', böchi'li' naca. ¿Bizx que ruá'ali' luzá'ali' dö'?" ²⁷ Ní'irö bönni' na' ru'ë dö' que luzé'ë budxíguë'ë-bi' bi'i Moisés, gunné': "¿Núzxité buzóa li' para inná bé'enu' netu', en uchi'a usöröu' le runtu'?" ²⁸ ¿Naru' rë'ënitse'u' gútiu' gu' neda' ca benu' néajé, bétiu'-në' bönni' Egipto na'?" ²⁹ Cate' Moisés biyónibi' didza' ni', buzúnajbi' ni', en yöjsóabi' luyú Madián ga ni' guzóabi' ca tu bönni' zi'tu'. Luyú Madián na' butsaga ná'aleni'-nu nigula lu yödzo ni', ate' gúl'agacabi' chópabi' bi'i bönni' queë'.

³⁰ 'Cate' chigudödi choá' iz zoë' ni', buluf'i lahuë' tu gubáz lá'ayi queë' Dios ga zoë' lu guf' que yaga yótsi'do' régui, ga ni' naca lu lataj cá'asö, le rö'ö ra' guf'a nazí'i le Sinaí. ³¹ Cate' Moisés bilé' enë' guf' na', bubáninë', ate' gubígu'i'ë gala' para lé'enë' dxi'a, ate' biyönnë' chí'ë Xanru'. ³² Caní gudxë' Xanru' lë': "Neda' naca' Dios queégaquië' xuz xtó'o. Naca' Dios queë' Abraham, en Dios queë' Isaac, en Dios queë' Jacob." Ní'irö lu yöl-la' radxi queë', guzxi'ídë'ë Moisés, en bítirö burúguinë' uyué'. ³³ Xanru' gudxë' lë': "Guléaj xirachu' nudó'o, tu' naca lá'ayi ga ni' zu' tu' zoa caza' neda', Dios, ni. ³⁴ Le nácaté' chibilé'eda' le ta'gu'f'i ta'zaca' bönachi quia' nacuá' luyú Egipto, en chibiyónnda' ta'bödxi yeche'. Bötja', zoa' ni para usólá' légaquië'. Gudá' na'la, isól-la' lá' luyú Egipto."

³⁵ 'Sa-la' bönni' uládz queë' Moisés, bulu'cá'anë' lë' cá'asö, gula'nnë': "¿Núzxité buzóa li' para inná bé'enu' netu', en uchi'a usöröu' le runtu'?" Dios gusól-lë'ë lë' para gáquië' bönni' unná bë', en bönni' rusólá, ca na' gubáz lá'ayi na' queë' Dios gudxë' Moisés, cate' buluf'i lahuë' lu yaga yótsi'do' régui ga na' zoë'. ³⁶ Moisés ni bubéajë' bönni' uládz queëru' luyú Egipto. Guca caní gudödi benë' le gulún ga bulu'bani bönachi ni', en le taca bë' benë' luyú ni'. Lësca' caní benë' lu nísado' nazí'i le Nísado' Xiná. Caní benë' lógaquië' idú ca choá' iz lu lataj cá'asö. ³⁷ Lë cazë' Moisés na' gudxë' bönachi Israel ni', gunné': "Xanru' Dios isól-lë'ë queéli' tu bönni' galjé' ladaj di'a dza queéli', ate' gáquië' bönni' gu'ë didza' uláz queë' Dios. Isól-lë'ë lë' queéli' ca na' gusól-lë'ë neda'. Lë cazë' run bayudxi uzë' nágali'-në'." ³⁸ Lësca' lë' cazë' Moisés na' guzóalenë' bönachi nudúbigaca queë' Dios lu lataj cá'asö, ate' gudzáguie' gubáz lá'ayi queë' Dios lë', Nu na' bé'len lë' didza' lu guf'a Sinaí na'. Moisés na' guzóalenë' xuz xtó'oru', ate' Dios budödë' lu në'ë xibá lá'ayi queë', le ru'f'i didza' ca gaca ila'deli' bönachi yöl-la' na' bán, ate' budödë' Moisés xibá ni lu ná'agaca zxi'ini xi'sóagaquië' ga ridxintë queëru' rë'u.

³⁹ 'Biti' gulé'ënnë' xuz xtó'oru' ilunë' ca rnna xtídzë'ë Moisés, pero bulu'zóë' lë' tsólá'alö, en gulé'ënnë' tsöjhuó'gaquië' luyú Egipto. ⁴⁰ Cate' ni' zoë' Moisés na' lu guf'a Sinaí na', légaquië' gulé' Aaron, böché'ë Moisés na', gula'nnë': "Rë'ënitse'u' gunu' yugu' dios queëtu', tu budó' guié', para tsöjnrugaca lottu'. Biti' nöttu' bi' guca queë' Moisés, bönni' na' nubéajë' netu' luyú Egipto." ⁴¹ Ní'irö gulunë' tu budó' oro le naca ca tu bédxido', ate' gulútië'-ba' bö'cu' zxíla'do', en gulú'ugaquië'-ba' lo budó' oro na', ate' gulunë' laní lo budó' na' núnagaquië'. ⁴² Que lë ni na' Dios bucá'anë' légaquië', en guléaj ládxe'ë légaquië'. Ní'irö gula'yéaj ládxi'gaquië' yugu' le ta'yëpi lúzxiba. Ca naca lë ni nazúaj lu guichi le gula'nnë' bönni' gulu'ë didza' uláz queë' Dios, le rnna:

Libí'ili', bönachi Israel,

¿naru' gulú'ugacatsali'-ba' quia' neda' böa' bédxi ni' bétigacali'-ba', en buzégu'i' gacali'-ba',

lë na' benli' lu lataj cá'asö idú ca choá' iz?

⁴³ Biti' gulú'ugacali'-ba' quia' neda',

pero biá'ali' le nequi que Moloc, budó' guió'j queéli'.

Biá'ali' ca' tu le naca ca bólaj lúzxiba nazí'i le Refán,

lë na' buzóali' ca dios queëli'.
 Yugu' budó' guió' budó' yaga ni,
 la' libí'isili' benli' para guyéaj ládxi'li' léguequi.
 Que lë ni na', ubéaja' libí'ili' lu xiyuli',
 en ichë'a libí'ili' zí'tu'ró ga dë luyú Babilonia.

⁴⁴ 'Cate' ni' gula'cu'ë xuz xtó'oru' lu lataj cá'asö, guta' quegaquië' yu'u lari' na' ga gulún chi'ë xibá queë' Dios, lë na' naca bë' Dios caz zóalenë' légaquië'. Gulunë' tu yu'u lari' na' ca na' Dios gunná bé'enë' Moisés, cate' ni' gudxë' lë' gunë' le ca naca lë na' bilé'enë', le bulu' inë' Dios lë' lu guí'a ni'. ⁴⁵ Lësca' bulu'dödë' yu'u lari' na' lu ná'agaquië' xzi'inigaquië' ga bidxintë dza ni' gula'ë xuz xtó'oru' le luyú ni, cate' ni' dzáguië' Josué légaquië', ate' gula'guë' xiyúgaca bönachi izá'a, nupa ni' bulágui'ë Dios lógaquië' xuz xtó'oru'. Caní gulunë' zían iz ga bidxintë dza zoë' David. ⁴⁶ Dios guyaza ládxi'ë David na', ate' lë' gunábinë' Dios gu'ë lë' lataj gunë' tu yu'u ga soë' Dios queë' Jacob. ⁴⁷ Biti' bë'ë Dios lë' lataj, ate' Salomón, xzi'inë' David na' benë' yu'u queë' Dios. ⁴⁸ Caní benë' sal-la' biti' zoë' Dios, Nu nácatërö lo, tu lu yudo' núngaca bönachi. Ca naca lë ni gunné' tu bönni' bë'ë didza' uláz queë' Dios, gunné':

⁴⁹ Yehua' yubá naca ga rö'a rinná bë'a,
 ate' yödölió naca xilibi ni'a.

Rnnë' Xanru': "¿Naru' gúntsalí' tu yu'u ga soa'?"

¿Naru' zóatsö tu lataj ga ral-la' uzí ládxa'a?

⁵⁰ ¿Naru' cabí len na'a caza' bena' yúgu'të lë ni'?"

⁵¹ Ní'irö Esteban na' gudxë' yugu' bönni' yudo' tu'chi'a tu'söröë' na', gunné':

—Libí'ili', bönni' zidi, biti' bi raza icja nágalí'. Nazidi icja ládxi'do'oli' ca raza quégaca bönachi biti' núnbë'gaquië' Dios. Ridá'baga'tica'sili'-në' Dios Bö' Lá'ayi. Ca na' gulunë' xuz xtó'oli', runlí' ca' libí'ili'. ⁵² Gula'bía ládxi'gaquië' xuz xtó'oli' na' yúgu'të bönni' ni' gulu'ë didza' uláz queë' Dios. Lësca' gulútië' bönni' ni' gula'guíxjö'ë zí'aló ca ral-la' guidë' Cristo, Bönni' Tsahuí', ate' na'a, cate' ni' bidxinë' Bönni' Tsahuí' na', libí'i cázali' bétili'-në' lu ná'agaquië' bönni' gulútië' Lë'. ⁵³ Libí'i cázali' dë lu ná'ali' xibá queë' Dios, lë na' gubáz lá'ayi queë' Dios bulu'dödë' lu ná'agaquië' xuz xtó'oli', pero biti' runlí' ca rnna.

Tútië' Esteban

⁵⁴ Cate' bönni' yudo' tu'chi'a tu'söröë' na' bila'yönnë' didza' ni, gula'léde'enë' Esteban, ate' lu yö-la' rilé quégacá' lë' gulagu zxéatica' láyë'ë. ⁵⁵ Ní'irö buyúé' Esteban na' lúxibalö, ate' zóalenë' Dios Bö' Lá'ayi lë', bilé'enë' lataj bení' ga zoë' Dios, enca' Jesús, zuínë' cuita lë'ë ibëla Dios ga nayépisëtërë'. ⁵⁶ Ní'irö gunné':

—Bulí'yútsöca'. Rilé'eda' nayaalaj lúxixiba, ate' zuínë' Bönni' Guljë' Bönachi cuita lë'ë ibëla Dios.

⁵⁷ Ní'irö bönni' yudo' tu'chi'a tu'söröë' na' bulu'sayaj nágagaquië'. Gula'bödxí'ë zidzaj, en tsözxön gula'bía di'ë Esteban na'. ⁵⁸ Bulu'béajjë' lë' ní'iló ra' yödzo na', ga ni' bulu'ladxë' lë' guió'. Yugu' bönni' ni' tunë' ba nalí' le tu'zéguië' Esteban didza' bulu'cu'ë lari' ta'xóa yéngacá' xini'ë tu bönni' lë' Saulo cate' ni' bulu'ladxë' Esteban guió'. ⁵⁹ Cate' ni' tu'ladxë' Esteban guió', lë' bulidzë' Dios, gunné':

—Xána' Jesús. Buzí' bö' naca caza'.

⁶⁰ Ní'irö biyéchuë', buzóa zxibë', en bë'ë zidzaj didza', gunné':

—¡Xan! ¡Biti' usubágu'u légaquië' dul-la' ni!

Cate' budxi bë'ë didza' ni, gútité'.

8

Saulo ribía ládxi'ë bönachi queë' Cristo

¹⁻³ Saulo benë' tsözxön yugu' bönni' ni' gulútië' Esteban.

La' ní'isö yugu' bönni' ta'yéaj ládxi'gaquië' Dios guluá'agaquië' Esteban, ate' yöj'cáchi'gaquië' lë'. Gula'bödxidë'ë ní'a queë'.

Dza na' yugu' bönni' judío cabí ta'yéajlë'ë Cristo gula'bía ládxi'da'gaquië' bönachi queë' Cristo nacua' Jerusalén. Lësca' Saulo gudxia ládxi'ë bönachi queë' Cristo. Guyázië' gapa naca lu yu'u quégacá' ate' guzxönë' yugu' bönni', en nigula, ate' gulu'ë légaquië' lidxi guíë.

Ní'irö gulásilasi ia'láti'sö cabí bidáchigaca yúgu'të bönachi queë' Cristo idú luyú Judea, en luyú Samaria, ate' légacasë' gubáz na' nasól-lë'ë Cristo bulu'gá'anë' Jerusalén.

Raca libán que didza' dxi'a luyú Samaria

⁴ Yugu' bönni' na' gulásilasië' yöjáquië' yúgu'të lataj, ate' gulunë' libán que didza' dxi'a. ⁵ Ní'irö Felipe, tu bönni' dzáguië' nupa na' gulásilasi, guyijë' luyú Samaria, ate' benë' libán ni' ca naca queë' Cristo. ⁶ Bulu'dubë' yugu' bönni' ni', ate' idú ládxi'gaquië' bulu'zë nágagaquië' didza' ru'ë Felipe na', tu' bila'yönnë' xtídzë'ë, en bila'lé'enë' yugu' le taca bë' runë'. ⁷ Caní guca, tu' benë' ga bulu'rúaj zían bö' xihui' yú'ugaca bönachi, ta'bödxí'a zidzaj,

ate' bulu'huóaca zían nupa te'e hué' nacú'uni bin, en nupa biti' guca sá'gaca. ⁸ Caní guca, bulu'dzeja bönachi yödzo ní'.

⁹ Zoë Simón, tu bönni' zí'aló gúquië' bönni' udzá' uné ya'a lu yödzo na', bönni' guxzí' yé'ené' bönachi Samaria na', gunné' lë cazë' náquië' bönni' nayépisëtërë'. ¹⁰ Yúgu'të bönachi bulu'zëda' nágagaca bönni' ni, ga riguela' yugu' bönni' cá'asó ga ridxintë yugu' bönni' lo, gula'nnë': "Bönni' ni dë lu në'ë yöl-la' huáca zxon queë' Dios." ¹¹ Caní guca, gulunë' lë' bal, tu' xidzé nazí' yé'ené' légaquië' len yöl-la' gudzá' uné ya'a queë'.

¹² Cate' gula'yéajlë'ë libán runë' Felipe que didza' dxi'a ca rinná bë'ë Dios, en ca naca queë' Jesucristo, ní'irö gula'dilë' nisa, bönni', en nigula. ¹³ Ní'irö guyéajlë'ë ca' Simón na', en bidilë' nisa, ate' gudá'entica'sé' tsözxön Felipe na'. Cate' bilé'ené' yugu' yöl-la' huáca zxon, en yugu' le taca bë' runë' Felipe, bubá'nnë' Simón na'.

¹⁴ Cate' yugu' gubáz na' nasöl-lë'ë Cristo nacué' Jerusalén bila'yönnë' ca guca lë ni, chinazí' lu ná'agaca bönachi luyú Samaria xtídzë'ë Dios, ní'irö gula'söl-lë'ë Pedro, en Juan ni'. ¹⁵ Cate' Pedro, en Juan na' bila'dxinë' ni', bulu'lidzë' Dios uláz quegaca bönachi ni' ta'yéajlë' Cristo para idisóalenë' Dios Bó' Lá'ayi léguequi. ¹⁶ Ga bidxintë dza na', biti' ridxínnë' Dios Bó' Lá'ayi quegaquië'. Nadilagacásë' nisa para ilácagaquië' tuz len Xanru' Jesús. ¹⁷ Ní'irö Pedro, en Juan na', gula'xóa ná'agaquië' bönachi Samaria na'. Bulu'lidzë' Dios, ate' bidisóalenë' Dios Bó' Lá'ayi légaquië'.

¹⁸ Cate' bilé'ené' Simón, bönni' udzá' na', le guca cate' gubáz na' nasöl-lë'ë Cristo gula'xóa ná'agaquië' bönachi ni', bidisóalenë' Dios Bó' Lá'ayi légaquië', gú'unnë' quizzjë' légaquië' dumí, ¹⁹ ate' rë' légaquië':

—Benna ca' yöl-la' huáca ni quia', para cate' ixó'a na'a nítí'tës bönachi, idisóalenë' Dios Bó' Lá'ayi nu na'.

²⁰ Ní'irö Pedro gudxë' lë', rnnë':

—Initi dumí quiu' tsözxön len lí', tu' réquinu' len dumí idéli'nu' yöl-la' huáca queë' Dios.

²¹ Biti' nacú' bachi gütü'u lë ni, tu' dxi'a le naca ruá' dö' icja ládxi'do'o lahuë' Dios. ²² Bubí'i ládxi' ca naca huiá' dö' ni runu', en gúta'yu lahuë' Dios, nadxi ca' uniti lahuë' lí' ca naca lë ni rizá' ládxi'u. ²³ Réquibe'eda' nabágu'u xíguia', en nadzunu' lu yalaj que tu' xihui'.

²⁴ Ní'irö bubí'ë didza' Simón na', rë' légaquië':

—Bulí'lidzë' Dios, gáta'yuli' lahuë' Xanru' ni'a quia' neda' para cabí' gaca quia' nitú' lë na' chigunná'li'.

²⁵ Cate' Pedro, en Juan na' budxi gulunë' ba nalí' queë' Cristo lu yödzo ní', en bulu'siyönnë' légaquië' xtídzë'ë Dios, gulunë' ca' libán que didza' dxi'a yugu' lu ládzagagaquië' bönni' Samaria, ate' gudödi ni' yójhuó'gaquië' Jerusalén.

Felipe, en tu bönni' Etiopía

²⁶ Ní'irö tu gubáz lá'ayi queë' Xanru' bë'lenë' Felipe didza', en gudxë' lë':

—Guyasa, en guyéaj saca' ga ridödi gubidza beo' ziaga. Idxinu' ga ni' nalá' nöza zeaj Jerusalén zéajtë yödzo Gaza, nöza na' ridödi lu lataj cá'asó.

²⁷ Ní'irö guyu'ë nöza Felipe na', sa'yéajë'. La' nöza ni' yójtá'gúie' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queënu Candace, nigula na' rinná bé'enu bönachi Etiopía na', en yu'u lu në'ë yúgu'të yöl-la' tsahui' queënu dzö'ó lidxinu. Guyijë' Jerusalén bönni' ni para guyéaj ládxië'ë Dios. ²⁸ Na'a, söhuó'jë' ladzë', rö'ë lu carreta queë', en rulabë' le nazúaj lu guichi ca gunné' Isaías, bönni' bë'ë didza' uláz queë' Dios. ²⁹ Ní'irö Dios Bó' Lá'ayi gudxë' Felipe na':

—Gubíga' ga zeaj carreta na', en guyéajlen le.

³⁰ Cate' chigubígu'ë Felipe ni', biyönnë' ru'ë didza' bönni' huödx na', rulabë' le nazúaj lu guichi ca gunné' Isaías, ate' gudxë' lë':

—¿Naru' réajni'inu' lë na' rulabu'?

³¹ Bubi'ë didza' bönni' Etiopía na', gunné':

—¿Nacxi gaca tséajni'ida' channö cuntú nu zoa uzéajni'i neda'?

Ní'irö gúta'yuë' lahuë' Felipe cuenë', en có'lenë' lë' tsözxön lu carreta na'.

³² Lë na' nazúaj lu guichi rulabë', rna caní:

Ca bö'cu' zxíla'do',

gula'chë'ë Lë' para ilútië' Lë',

en ca bö'cu' zxíla'do',

biti' rnnëba' cate' nu richugu lítsa'ba',

ca' benë' Lë', biti' gusalaj ru'ë bi innë'.

³³ Bulu'cá'anë' Lë' cá'asó,

en biti' gulu'ë lataj nu uchi'a usörö Lë'.

¿Nuzxi caz gaca inözi xíguia' nabága'gaca bönachi uládz queë'?

La' légacásë' gulútië' Lë'.

³⁴ Bõnni' huõdx na' gunábinë Felipe, rë' lë':

—Ráta'yua' lo' guíxjöi'ínu' neda'. ¿Nuzxi que gunnë' caní bõnni' na' bē'ē didza' uláz queë' Dios? ¿Naru' queë' cazë', o que nu yúbölö?

³⁵ Ní'irõ la' didza' nisõ buguelë'ë Felipe, en busiyõnnë' lë' didza' dxi'a ca naca queë' Jesús.

³⁶ Cate' ni' yú'ugaquië' nõza sõjáquië', bila'dxinë' ga dë nisa, ate' bõnni' huõdx na' rë' Felipe, rnnë':

—Buyútsõca'. Ni dë nisa. ¿Naru' huácatsõ idila' nisa?

³⁷ Felipe gudxë' lë':

—Channõ réajlë' u idú ládXu'u, huáca idilu' nisa.

Lë' bubi'ë didza', rnnë':

—Réajlë' a Jesucristo, náquië' Zxí'inë' Dios.

³⁸ Ní'irõ benë' ga guzóa dxisõ carreta queë' na', ate' bulu'huõtjë' irõpatë', yõjtsázagaquië' lu nisa. Ní'irõ Felipe buquülë' bõnni' huõdx na' nisa. ³⁹ Cate' bulu'rúajë' lu nisa, Dios Bõ' Lá'ayi buchë'ë Felipe, ate' bõnni' huõdx na' bití'rõ bilé'enë' lë'. Ní'irõ buguelë'ë xinözë', sõhuõjë' rudzéjanë'. ⁴⁰ Cate' chiréquiibe'enë' Felipe, zoë' lu yõdzõ Azoto. Gudödë' yúgu'të yõdzõ ni', ate' benë' libán que didza' dxi'a, ga bidxintë' yõdzõ Cesarea.

9

Saulo ruhuõáquië' queë' Cristo

¹ Ní' ruzenë' bach Saulo nupa ta'yéajlë' Xanru', gú'unnë' gútië' légaquië'. Para gunë' caní bidxinë' lahuë' bixúz lo, ² en gunábinë' lë' tu guichi unná bë', le tsõju'ë lógaquië' bõnni' unná bë' quégaca yu'u gapa tu'dubë' bõnni' judío, en tu'sedë' queë' Dios lu yõdzõ Damasco, ate' channõ utsõjáquië' yugu' bõnni', en nigula ta'yéajlë'ë Jesús ni', gaca ichë'ë légaquië' nadzúngaquië' lu yõdzõ Jerusalén. ³ Tsanni ni' yú'ugaquië' nõza Saulo, en nupa nacuá'len lë', sõjáquië', en cate' chizóa ila'dxinë' Damasco, tsáldo'os buzeni'da' tu bení' za' lúzxiba, le buzeni' ga ni' sõjáquië'. ⁴ Ní'irõ gudzõ'ë Saulo lu yu, en biyõnnë' chi'i Nu rë lë':

—Saulo, Saulo, ¿bizx que ribía ládXu'u neda'?

⁵ Saulo gunábinë' Lë', gunnë':

—¿Nuzxi lí, Xan?

Lë' gunnë':

—Neda' Jesús, Nu ribía ládXu'u. Run zi' cuinu', ridá'bagu'u neda'. Raca quiu' ca na' raca queë'ba' bëdxi, run zi' cuinba' richégu'ba' yaga tuchi' tündë'ë-ba' zi'.

⁶ Ní'irõ Saulo guzxízidë'ë, gúdxinë', en gunnë':

—Xan, ¿bizxi rë'ënu' guna'?

Xanru' gudxë' lë':

—Guyasa, en guyáz lu yõdzõ, ate' ni' isól-la'a quiu' nu guíë' lí' le ral-la' gunu'.

⁷ Guládxinë' yugu' bõnni' na' sõjácalenë' Saulo, tu' bila'yõnnë' chi'i na', sal-la' cantu nu bila'lé'enë'. ⁸ Ní'irõ bõasë' Saulo luyú, en cate' guxá' guiõj lahuë', bití' ca' rilé'enë'. Que lë' ni na' gula'guélë'ë nē'ë, en gula'ché'ë lë' Damasco. ⁹ Guzóë' ni' tsonna dza nachul-la lahuë', en bití' bi'gúf'i gudahuë'.

¹⁰ Zoë' ca' Ananías, bõnni' réajlë'ë Cristo, yõdzõ Damasco, ate' Xanru' buluf'i lahuë' ga zoë' ca tu lu yëla bëchigal, en gudxë' lë':

—Ananías.

Lë' bubi'ë didza', gunnë':

—Ni zoa', Xan.

¹¹ Xanru' gudxë' lë':

—Guyasa, en guyéaj ga naca la' nõza na' nazí'i le Nõza Lí, ate' lu yu'u lidxë' Judas gunaba didza' queë' Saulo, bõnni' Tarso. Lu yu'u na' rulidzë' Dios. ¹² Chibilé'enë' tu bõnni' ca tu lu yëla bëchigal zë'ë tsázíë' ga zoë', lë' Ananías, en ixóa nē'ë lë' para huõálaj guiõj lahuë'.

¹³ Ní'irõ bubi'ë didza' Ananías, rë' Lë':

—Xan, zían nupa chibulu'siyõnnë' neda' ca runë' bõnni' ni, zían le naca dõ' nu'ë le benë' quégaca bõnachi ta'yéajlë' Lí', nacuá' Jerusalén. ¹⁴ Zë'ë ca' ni, dë lu nē'ë uláz quégaguië' bixúz unná bë' sönë' yúgu'të nupa tu'lidza Dios len Lo' Lí'.

¹⁵ Ní'irõ Xanru' rë' Ananías na', rnnë':

—Guyéaj, tu' guró caza' neda' bõnni' ni para gunë' libán ca naca quia' lógaca bõnachi izá'a, en lógaquië' bõnni' ta'nná bē'enë' légaquië', enca' lógaca bõnachi Israel. ¹⁶ Ulu'í'ida' lë' le zían le qui' i sáquë'ë uláz quia' neda', gunë' xichina'.

¹⁷ Ní'irõ guyijë' Ananías ni', ate' guyázië' yu'u, en guzóa nē'ë Saulo, ate' rë' lë':

—Bõcha'a Saulo, Xanru' Jesús, Nu na' buluf'i lahui la' nõza ga ni' zo'o, gusöl-lë'ë neda' para huõálaj guiõj lo', en idisóalenë' Dios Bõ' Lá'ayi lí'.

¹⁸ La' ní'sö gula'guinnaj le naca ca xilácuba' böla lu guiöj lahué', ate' la' böäljaté guiöj lahué'. Ní'irö guyasé' Saulo, en bidilé' nisa. ¹⁹ Gudödi ní' gudahué', en böaca ládxé'ë. Ca chopa tsonna dza guzóalené' yugu' bönni' ta'yéajlé'ë Cristo nacu'ë Damasco.

Runé' libán Saulo lu yödzo Damasco

²⁰ La' gusi loté' Saulo runé' libán queé' Cristo gapa naca lu yu'u ga tu'dubé' bönni' judío, en tu'sédé' queé' Dios, rnné':

—Jesús náquié' Xzí'ini cazé' Dios.

²¹ Bulu'bánniné' yúgu'té bönni' ní' ta'yönné' lé', ta'nné':

—¿Naru' caléga bönni' ni bönni' na' busunítie' nupa nacua' Jerusalén, en tu'lidza Dios lu Lé' Jesús? Para guné' caní bidé' ca' ni para iché'ë légaquié' nadzúngaquié' lógaquié' bixúz unná bé'.

²² Bidíparö ládxé'ë Saulo, en bené' ga gula'bö'ë bönniga bönni' judío nacu'ë Damasco, tu' bulu'íné' légaquié' Jesús naca cazé' Cristo, bönni' na' tuné' löza idinná bé'ené' légaquié'.

Rulé' Saulo lu ná'agaquié' bönni' judío

²³ Cate' chigudödi zían dza, gulún xtídza'gaquié' bönni' judío nacu'ë ní' ilútié' Saulo. ²⁴ Réla, en té dza gula'bö' nisé' yugu' bönni' judío ga nu ridödi lu zö'ö run chí'i yödzo na' para ilútié' lé', pero gúquibe'ené' Saulo le té'enné' iluné' queé'. ²⁵ Ní'irö yugu' bönni' ta'yéajlé'ë Cristo gula'gué'ë Saulo chí'i dzö'ölo, ate' gula'gu'ë lé' tu lu ga'böra zxon naga' du, en bulu'zö'tjé' lé' ní' ilö lu zö'ö run chí'i yödzo na'.

Rudxiné' Saulo Jerusalén

²⁶ Cate' budxiné' Saulo Jerusalén, gú'unné' tsöjené' tsözxön bönni' ní' ta'yéajlé'ë Cristo, pero yúgu'té' guládxiné' lé', tu' cabí téquiné' réajlé'ë Saulo na' Cristo. ²⁷ Ní'irö bönni' na' lé' Bernabé' gudélé'ë Saulo, en guché'ë lé' ga na' nacu'ë bönni' gubáz nasól-lé'ë Cristo. Busiyönné' légaquié' ca na' guca queé' Saulo, bilé'ené' Xanru' la' nöza, ate' Xanru' caz bé'lené' lé' didza', en ca na' bené' Saulo lu yödzo Damasco, len yöl-la' rugu ladxi' bené' libán ca naca queé' Jesús. ²⁸ Ní'irö Saulo guzóalené' légaquié' lu yödzo Jerusalén, ate' gudálené' légaquié' tsözxön. ²⁹ Lu yöl-la' rugu ladxi' bené' libán Saulo ca naca queé' Xanru', en gudí-lalené' didza' bönni' judío tu'ë didza' griego, ate' légaquié' gula'zóa gula'bö'ë ilútié' lé'. ³⁰ Cate' guléquibe'ené' böchí'ru' ta'yéajlé'ë Cristo lé' ni, gula'ché'ë Saulo lu yödzo Cesarea, ate' gula'sól-lé'ë lé' yödzo Tarso, le naca ladzé' Saulo.

³¹ Ní'irö guca tsahui' quégaca yúgu'té cö' bönachi queé' Cristo, nacua' idú luyú Judea, en luyú Galilea, en luyú Samaria, ate' bila'dipa ládxi'gaquié'. Gula'cu'ë lu yöl-la' radxi quégaquié' Xanru', ate' gula'yané' tu' gúcalené' Dios Bö' Lá'ayi légaquié'.

Pedro ruúné' tu bönni' lé' Eneas

³² Ia'tú le guca, cate' Pedro yöjyúé' yugu' böchí'ru', bidxiné' ga nacu'ë bönni' ta'yéajlé'ë Jesús lu yödzo Lida. ³³ Yöjxáquié' tu bönni' ní' lé' Eneas, chiguca xunu' iz dé' ré'ené', nacú'unié' bin. ³⁴ Pedro gudxé' lé':

—Eneas, Jesucristo ruúné' li'. Guyasa, en butubi xto'o.

La' guyásaté' Eneas na'. ³⁵ Yúgu'té nupa nacua' yödzo Lida, en yödzo Sarón bila'lé'e lé', ate' bulu'huóaca queé' Xanru', tu' chita'yéajlé' Lé'.

Rátinu Dorcas, en rubannu

³⁶ Ia'stú le guca, lu yödzo Jope zóanu tu nigula réajlé'ënu Cristo, lènu Tabita, en ca naca didza' griego lènu Dorcas. Benu nigula ní' zían le náca'gaca dxí'a le tácalen bönachi yechí'. ³⁷ Le guca dza ní', gü'ínu Dorcas na', en gútinu. Gudödi gula'guíbinu lènu, gula'guíxjé'-nu tu lu yu'u ga naca buropi cuía. ³⁸ Tu' dé yödzo Lida gála'só ga na' dé yödzo Jope, ga na' zoé' Pedro, bila'yönné' bönni' Jope na' ta'yéajlé'ë Cristo zoé' Pedro ní', ate' que lé' ni na' gula'sól-lé'ë chopé' bönni' ga na' zoé', ate' guláta'yue' lahué', té' lé':

—Biti' tsenu' guídu' queétu'.

³⁹ Ní'irö la' guyásaté' Pedro, sa'yéajlené' légaquié'. Cate' bidxiné' ní', la' gula'ché'té' lé' ga naca lu yu'u ga dènu nigula nati na'. Ní'irö yugu' nigula uzébi bulu'dúbinu gásibi'ilé', ta'bödxinu, en tu'lufínu lé' lari' quégaquié' bönni', en nigula, yugu' le benu Dorcas cate' ní' zóalennu légacan. ⁴⁰ Ní'irö Pedro bubéajé' ní' ilö yúgu'té nupa nacua' ní', ate' buzóa zxibé', rulidzé' Dios. Ní'irö buécjé' ga dènu Dorcas na', gunné':

—Tabita, guyasa.

La' buxa'té guiöj lonu Dorcas. Cate' bilé'enu-né' Pedro, la' guyástènu, gurö'önu. ⁴¹ Gudélé'ë Pedro ná'anu, en buchisè'-nu. Ní'irö bulidzé' bönni' na' ta'yéajlé'ë Jesús, len yugu' nigula uzébi na', ate' busudxiné' Dorcas na' lógaquié', nabannu. ⁴² Ca guca lé' ni guzé' didza' idú lu yödzo Jope, ate' gula'yéajlé' bönnachi zían Xanru' Jesús. ⁴³ Bugá'ané' Pedro yödzo Jope na' zían dza lu yu'u lidxé' Simón, bönni' runé' tsahui' guídi zxa bédxi.

10

Le benë Pedro lidxë Cornelio

¹ Zoë yödzo Cesarea tu bönni' lë' Cornelio, bönni' rinná bé'enë' tu gáyu'ë bönni' röjáquië' gudil-la, nazí' lágáquië' Bönni' Italia Rójáquië' Gudil-la. ² Cornelio na' reaj ládxe'ë Dios, en rádxinë' Lë', atë' yúgu'të bönachi nacua' lidxë' núngaca lë' tsözxön. Runödzejë' Cornelio dumí zían le rácalen bönachi yechi', en rulidzatica'së' Dios. ³ Tu dza idú ridödi xihuö bilé'enë' Cornelio ca tu lu yëla béchigal, razië' tu gubáz lá'ayi queë' Dios ga na' zoë', en rë' lë':

—Cornelio.

⁴ Gúdxinë' Cornelio. Buyüë' gubáz lá'ayi na', en gudxë' lë':

—¿Bizxi rnno', Xan?

Gubáz lá'ayi na' gudxë' lë', rnnë':

—Dios riyönnë' le rulidzu'-në', en nözinë' ca runu', rácalenu' bönachi yechi'. ⁵ Na'a, gusöl-la' yugu' bönni' tsójáquië' yödzo Jope tsójlidzagaquië' bönni' na' lë' Simón, zoa ia'tú lë' Pedro. ⁶ Bönni' ni zoë' lidxë' tu bönni' runë' tsahui' guidi zxa bédxi. Bönni' ni, lësca' lë' Simón, atë' zoa lidxë' ra' nísado'. Pedro na' guié' li' le ral-la' gunu'.

⁷ Cate' chibuzë'ë gubáz lá'ayi na' bé'lenë' lë' didza', bulidzë' Cornelio chópabi' bi'i huen dxin queë', en tuë' bönni' rejë' gudil-la reaj ládxe'ë Dios, en dzáguië' bönachi nacua' lidxë' Cornelio. ⁸ Cate' budxi busiyönnë' légaquië' yúgu'të le guca, gusöl-lë'ë légaquië' yödzo Jope.

⁹ Dza buropi, tsanni ni' yú'ugaquië' nöza, en ta'dxinë' gala' ga dë Jope na', la' ní'sö gurenë' Pedro ícjo'oló yu'u para ulidzë' Dios, ni' naca idú huagubidza. ¹⁰ La' ná'asö ridunë' Pedro, en gú'unnë' gahuë', atë' tsanni ni' tu'pë'ë queë', bilé'enë' le naca ca tu lu yëla béchigal. ¹¹ Bilé'enë' nayalaj lúzxiba, en ruhuötaj tu le naca ca tu lari' guitsa' zxön ga zoë', le naga' idapa la'a. ¹² Lahui lari' na' dxiagacaba' yugu' böa' guixi' izá'a nacua' tapa ni'a ná'agacaba', en yugu' böa' tá'ayöj lë'egacaba' lu yu, en yugu' böa' zoa xiligacaba'. ¹³ Ní'irö biyönnë' chí' nu rë' lë':

—Pedro, guyasa. Béti-gacaba', en gudagu.

¹⁴ Bubi'ë didza' Pedro, rnnë':

—¡Calëga, Xan! Catu caz gudahua' le cabí ral-la' gágutu', o le cabí naca dxi'a.

¹⁵ Le buropi luzuí biyönnë' chí' i nu na' gudxi lë':

—Le nunë' Dios dxi'a, biti' innó' que: "Biti' naca dxi'a."

¹⁶ Tsonna luzuí guca caní, atë' ní'irö la' buëpitë lari' zxön na' lúzxiba. ¹⁷ Tsanni ni' rö'ë böniga Pedro, rizá' ládxe'ë bizxi sa'yéaj lë na' bilé'enë' ca tu lu yëla béchigal, bila'dxinë' bönni' na' nasöl-lë'ë Cornelio légaquië' ra' yu'u, ta'nabë gazxi zoa lidxë' Simón na'. ¹⁸ Cate' bila'dxinë' ni', bulu'lidzë' nupa nacua' yu'u na', en gula'nábinë' légaquië' channö zoë' tu bönni' lë' Simón ni', zoa ia'tú lë' Pedro. ¹⁹ Tsanni ni' rizá' ládxe'ë Pedro ca naca lë na' bilé'enë', Dios Bö' Lá'ayi gudxë' lë', rnnë':

—Buyútsöca. Chibila'dxinë' tsonnë' bönni' ni, tu'guiljë' li'. ²⁰ Guyaschi na'a, en bötaj zcan yu'u. Biti' gaca chopa ládxi'u tséajlenu' légaquië', tu' nasöl-la'a neda' yugu' bönni' ni.

²¹ Ní'irö bö'tjë' Pedro zcan yu'u ga na' nacu'ë bönni' na' nasöl-lë'ë Cornelio, en gudxë' légaquië':

—Neda' bönni' ruguíajli'. ¿Bizxi huen zá'ali' ni?

²² Bulu'bi'ë didza', të' lë':

—Cornelio, tu bönni' rinná bé'enë' bönni' röjáquië' gudil-la, nasöl-lë'ë netu'. Náquië' bönni' tsahui', en rádxinë' Dios. Yúgu'të bönni' judío tunë' bal bönni' ni, en nadxí'iguequinë' lë'. Ia'tú le guca, tu gubáz lá'ayi queë' Dios bé'lenë' lë' didza', en gudxë' lë' isöl-lë'ë nu udulidza li' guídu' lidxë' para yönnë' didza' gu'u.

²³ Ní'irö Pedro gulu'ë légaquië' lu yu'u, en bë'ë ga ila'cu'ë. Cate' za' rení' ia'tú dza, guyasë' Pedro, en guyéajlenë' légaquië'. Bal-lë' böchi'ru' nacu'ë Jope na' gulunë' lë' tsözxön.

²⁴ Dza bunní ni', bila'dxinë' Cesarea. Chizóë' Cornelio ribözë' légaquië', atë' chinutubë' yugu' dí'a dza queë', en yugu' böchi' luzë'ë nadxí'irönë' lidxë'. ²⁵ Cate' guyazië' Pedro lö'a, birúajë' Cornelio yu'u, yöjtsáquië' lë'. Biyéchuë' xini'ë Pedro, en guyéaj ládxe'ë lë' ca runru' queë' Dios caz. ²⁶ Pedro buchisë' lë', en gudxë' lë':

—Guyasa. Lësca' bönachi yödzülió naca' ca nacu' li'.

²⁷ Ní' tu'isë' ca' didza', guyázatë' Pedro yu'u, en yöjxáquië' nudúbigaca bönachi zían ni'. ²⁸ Ní'irö Pedro gudxë' légaquië', rnnë':

—Libi'ili' nöz quezili' ca rinná bë' xibá queë' Moisés, rnna biti' ral-la' gunë' tu bönni' judío tsözxön o tsázalenë' nu bönni' izá'a. Na'a, Dios buluí'inë' neda' biti' ral-la' inniá' queë' nitúë' bönni' náquië' cá'asö o biti' náquië' dxi'a. ²⁹ Que lë' ni na' cate' bulidzali' neda', la' bídatea, en biti' guca chopa ládxa'a. Rinaba' na'a, ¿bizx que na' bulidzali' neda'?

³⁰ Ní'irö bubi'ë didza' Cornelio, gunnë':

—Chiguca tapa dza ca zóaru' na'a, idú ridódi xihuó, cate' ni' runa' gubasa, en rulidza'-nè' Dios lu yu'u lidxa' ni, bilé'eda'-bi' tubi' bönni' ra'bán nácubi' lari' rēpi yōsa bení, dulul'i lobi' neda'. ³¹ Caní gúdxibi' neda': "Cornelio. Dios riyönnè' le rulidzu'-nè', en nözinè' ca runu', rácalenu' yugu' bönachi yechi'. ³² Na'a, isól-lu' u nu bönni' lu yödzo Jope para tsöjlidzè' tu bönni' lè' Simón, zoa ia'tú lè' Pedro. Bönni' ni zoè' lidxè' tu bönni' runè' tsahuí' guídi zxa bédxi, en lè' ca' Simón. Zoa lidxè' bönni' ni ra' nisado'. Cate' idxinè' Pedro na' ga zu', usiyönnè' li' didza' dxi'a." ³³ Caní guca, la' gusól-la'tea' nu tsöjlidza' li', ate' tsahuí'do' benu' bidu' ga zóatu' ni. Que lè' ni na' zóatu' ni yúgu'tètu', nudúbitu' lahuè' Dios para uzè' nágatu' le inná bé'enè' Dios li' innó'.

Didza' bē'ē Pedro lidxè' Cornelio

³⁴ Ní'iró gusí lahuè' Pedro ru'è didza', rnnè':

—Le nácatè réajni'ida' na'a, biti' ruyusè' Dios yöl-la' rinnèsó quégaca bönachi, pero tuz ca rilé'enè' rē'u. ³⁵ Dios raza ládxè'è bönachi iduté yödzoilió, nupa na' tadxi Lè', en tun le naca dxi'a. ³⁶ Gusól-lè'è Dios xtídzè'è ga nacuá' bönachi Israel, en gusól-lè' u nu ben libán que didza' dxi'a, le run ga raza dxi'a quégaca bönachi, lè na' bidxin queèru' lu nē'è Jesucristo. Lè cazè' náquiè' Xanru' yúgu'tèru'. ³⁷ Libí'ili' nöz quézili' lè na' guca luyú Judea, le gusí lo guca luyú Galilea gudódi benè' libán Juan para ila'dila bönachi nisa. ³⁸ Nözili' ca benè' Dios le guca queè' Jesús, bönni' Nazaret. Gusól-lè'è Dios Bó' Lá'ayi, en yöl-la' huáca queè' para sóalengaca Lè'. Nözili' ca na' guldè' Jesús, runè' le naca tsahuí', en ruúnè' yúgu'tè nupa gula'guí' gula'zaca' lu na' tu' xihui'. Caní benè', tu' guzóalenè' Dios Lè'. ³⁹ Na'a, netu' runtu' ba nalí que yúgu'tè lè na' benè' Jesús luyú Judea, en lu yödzo Jerusalén, en ca na' guca, gulútiè' Jesús, cate' bulu'dé'è Lè' lè'e yaga cruz. ⁴⁰ Ní'iró Dios busubanè' Lè' cate' guca tsonna dza nátiè', en benè' ga buluí' lahuè' ga zóatu' netu'. ⁴¹ Biti' buluí' lahuè' lógaca yógu'tè bönachi, pero lotu' netu' buluí' lahuè'. Dios guróè' netu' dza ni'te para guntu' ba nalí queè' Jesús, ate' güí' gudágulentu' Lè' tsözxón gudódi busubanè' lu yöl-la' guti. ⁴² Gunná bé'enè' Dios netu' guntu' libán lógaca bönachi, ate' runtu' ba nalí queè' Cristo, náquiè' Nu buzóca cazè' Dios para uchi'a usöróè' nupa nabángaca, en nupa chinátigaca. ⁴³ Lésca' yúgu'tè bönni' gulu' didza' uláz queè' Dios gulunè' ba nalí queè' Jesús, gula'nnè': "Yúgu'tè nupa ila'yéajlè' Lè', Dios uniti lahuè' dul-la' nabága'gaquiè' ni'a que le benè' Lè'."

Dios Bó' Lá'ayi ridisóalenè' bönachi izá'a

⁴⁴ Ní' ru'isè' caní didza' Pedro, la' bidxintè' Dios Bó' Lá'ayi, bidisóalenè' légaquiè', yúgu'tè nupa ni' ta'yóni libán runè' lè'. ⁴⁵ Gula'ná' badxè' bönni' judío ta'yéajlè'è Cristo, nupa na' bila'dxín ni' tsözxón len Pedro, tu' bidè' Dios Bó' Lá'ayi, Nu na' nasól-lè'è Dios Xuz. Bidisóalenè' bönachi ni' biti' nácagaca judío. ⁴⁶ Caní gulunè' tu' bila'yönnè' tu'è bönni' zi'tu' na' didza' yúbóló, en tunè' Dios xzón. ⁴⁷ Ní'iró bē'ē didza' Pedro, gunnè':

—¿Naru' huácatsó nu inná be'e bönachi ni para cabí ila'dila nisa? Naca bé' Dios Bó' Lá'ayi bidisóalenè' légaquiè', ca na' bidisóalenè' netu'.

⁴⁸ Gunná bē'ē Pedro ila'dilè' nisa tu' nazí' lu ná'agaquiè' Lè' Xanru' Jesús. Ní'iró yugu' bönni' ni' guláta'yuè' lahuè' Pedro ugá analenè' légaquiè' ca chopatsonna dza.

11

Didza' bē'ē Pedro lógaca bönachi queè' Cristo nacua' Jerusalén

¹ Bila'yönnè' gubáz nasól-lè'è Cristo, en bóchi'ru' nacu'è luyú Judea ca na' bönni' biti' nácagaquiè' judío gula'zi' lu ná'agaquiè' xtídzè'è Dios. ² Cate' budxinè' Pedro Jerusalén, bóchi'ru' judío gula'díl-lalenè' lè' didza'. ³ Gulé' Pedro:

—¿Bixz que yójt'sú'ulenu' bönni' biti' nácagaquiè' judío, en gudágulenu' légaquiè' tsözxón?

⁴ Ní'iró gusí lahuè' Pedro rusiyönnè' légaquiè' iduté lè na' guca, rnnè':

⁵ —Guzó'a' lu yödzo Jope, en cate' ni' rulidza'-nè' Dios, bilé'eda' ca tu lu yèla béchigal tu le buluí'inè' Dios neda'. Bilé'eda' bötaj birúaj lúzxiba tu le naca ca tu lari' guitsa' xzón, naga' idapa la'a, ate' bidxín ga na' zoa'. ⁶ Cate' ni' ruyú'a' le para ilé'eda' le dxía láhuiló, bilé'egacada'-ba' bóa' guixi' nacuá' tapa n'agacaba', yugu' bóa' guixi' sínia', en bóa' tá'ayó'j lé'egacaba' lu yu, en bóa' zoa xiligacaba'. ⁷ Biyónda' chi'i nu gudxi neda': "Pedro, guyasa. Bèti-ba', en gudagu." ⁸ Ní'iró gudxa'-nè': "Biti' ca', Xan. Catu caz gudahua' tu le cabí ral-la' gágutu', o tu le cabí naca dxi'a." ⁹ Ní'iró le buropi luzuí bulidza chi'i lúzxiba na' neda', en gudxi neda': "Le nunè' Dios dxi'a, biti' innó' biti' naca dxi'a." ¹⁰ Tsonna luzuí guca caní, ate' ní'iró iduté lè na' bilé'eda' la' buépité lúzxiba. ¹¹ La' ní'isó bila'dxintè' tsonné' bönni' ra' yu'u ga na' zoa', narúajgaquiè' yödzo Cesarea, nasól-lè'è légaquiè' tu bönni' lè' Cornelio. Sududíl'jagaquiè' neda'. ¹² Dios Bó' Lá'ayi gudxè' neda': "Guyéajlen légaquiè', en cabí gaca chopatsonna lúdxu'u." Lésca' izxópatè' bóchi'ru' ni gula'zá'lenè' neda' tsözxón. Guyéajtu' Cesarea, ate' guyaztu' lidxè' tu bönni' zoè' ni'. ¹³ Bönni' ni' gudá'xjoi'inè' netu' ca na' bilé'enè', bidxinè' tu gubáz lá'ayi queè' Dios lu yu'u lidxè'. Guzuínè' lahuè', en gudxè' lè': "Na'a isól-la' gacu'-nè'

bönni' tsöj'áquië' yödzo Jope, tsöjlídzagaquië' Simón, zoa ia'tú'lë' Pedro. ¹⁴Bönni' na' usiyönnë' li' naca gaca uló' li', en ulu'lágaca ca' yúgu'të' bönachi nacua' lidxu'." ¹⁵Cate' ni' gusí lahua' ru'ílena' légaquië' didza', bidisóalenë' Dios Bó' Lá'ayi légaquië' ca na' bidisóalenë' rë'u z'atëlö. ¹⁶Ní'irö yöjneda' didza' na' bë'ë Xanru', gunné': "Le nacatë Juan buquílë' bönachi nisa lu nisa, pero lib'íli', gaca queëli' le rulu'isó yöl-la' ridila nisa na', idisóalenë' Dios Bó' Lá'ayi lib'íli'." ¹⁷Que lë ni na', channö Dios gusól-lë'ë Dios Bó' Lá'ayi quegaquië', la' tuz ca benë' queëru' rë'u réajlë'ëru' Xanru' Jesucristo, çnúzxitë' neda' inná bé'eda'-në' Dios?

¹⁸Ní'irö, cate' bila'yönnë' lë ni, gula'cuá' dxíë', en gula'gu'ë Dios yöl-la' ba, ta'nnë':

—Caní naca, Dios ru'ë lataj bönni' bití' nácaqaquië' judío, tu'bfí' ládxi'gaquië' para ila'déli'në' yöl-la' na'bán idú.

Yugu' bönni' nacu'ë Antioquia ta'yéajlë'ë Cristo

¹⁹Cate' ni' yugu' bönni' judío bití' ta'yéajlë'ë gulútië' Esteban, en gula'bía ládxi'gaquië' ia'zica'rö bönachi ta'yéajlë' Cristo, bulu'zxunnaj bönachi ni, en gulásilasi zían yödzo luyú Fenicia, en luyú Chipre, en lu yödzo Antioquia. Gulunë' libán ni' que xtídzë'ë Dios, pero lógacasö bönachi judío. ²⁰Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzo Antioquia, guluf'ílenë' ca' didza' yugu' bönni' izá'a. Gulunë' libán lógaquië' que didza' dxi'a ca naca queë' Xanru' Jesús. ²¹Yöl-la' huáca queë' Xanru' guzóalen légaquië', ate' bönachi zían gula'yéajlë' Xanru', en bulu'huóaca queë'.

²²Cate' bidxnë' didza' ca guca lë ni, ate' bila'yönnë' bönni' queë' Cristo nacu'ë Jerusalén, gula'sól-lë'ë Bernabé tséajë' Antioquia na'. ²³Cate' Bernabé na' bidxinë' Antioquia, bilé'enë' le ruzá' ládxe'ë Dios quegaquië', en budzéjanë'. Guchízië' icja nágaqaquië' para ila'día'tica'së' queë' Xanru' idú ládxi'gaquië'. ²⁴Náquië' Bernabé na' tsahuí', en idú zóalenë' Dios Bó' Lá'ayi lë', en idú ládxe'ë réajlë'ë Cristo. Ni'a que libán benë' Bernabé na', bönachi zían lu yödzo na' gula'yéajlë' Xanru'.

²⁵Gudödi ni', guyijë' Bernabé na' yödzo Tarso, yöjdiljë' Saulo. Cate' budzölinë' lë', buchë'ë lë' Antioquia. ²⁶Idú ca tu iz gula'cu'ë ni', tunë' tsözxön bönachi queë' Cristo, en tu'sédinë' bönachi zían. Lu yödzo Antioquia na', gusí lo gula'z'í lágaaquië' cristiano le rna len didza' xidza': Bönachi Queë' Cristo, nupa ni' ta'yéajlë' Lë'.

²⁷Dza ni' bila'rúajë' Jerusalén, en yöj'áquië' Antioquia bal-lë' bönni' tu'ë didza' uláz queë' Dios. ²⁸Guzuínë' Agabo, bönni' dzáquië' yugu' bönni' na', en uláz queë' Dios Bó' Lá'ayi buzéajni'inë' légaquië', gunné':

—Sí' gaca gubín idútë' yödzo'lió.

Guca gubín na' cate' ni' rinná bë'ë Claudio, lu yödzo Roma. ²⁹Ní'irö gula'z'í lu ná'agaquië' bönni' ta'yéajlë'ë Cristo nacu'ë Antioquia, ila'sól-lë'ë tsca le desö que queëgaquië', le gácalen böchi'ru' nacu'ë luyú Judea. ³⁰Caní gulunë', ate' lë na' bulu'nödzejë', gula'gu'ë lu ná'agaquië' Bernabé, en Saulo para ilu'ë le lógaquië' bönni' gula tapa chi'ë bönachi queë' Cristo nacu'ë Judea.

12

Tútië' Jacobo, en ta'gu'ë Pedro lidxi guíë

¹Dza na' Herodes, bönni' unná bë', benë' ga gula'zönë' bal-lë' bönni' queë' Cristo para ulu'saca' z'í'ë légaquië'. ²Gunná bë'enë' bönni' gulútië' Jacobo, böchë'ë Juan. Gulu'ë lë' guíë tuchi'. ³Cate' gúquibe'enë' Herodes gula'yaza ládxi'gaquië' bönni' judío lë ni, benë' ga gula'zönë' ca' Pedro. Gulaca lë ni dza ni' raca laní cate' tahuë' yöta xtila bití' nazí'í' cúa zí que. ⁴Gudödi gula'zönë' Pedro, gula'gu'ë lë' lidxi guíë, en bulu'dódë' lë' lu ná'agaquië' tapa có' bönni' rójáquië' gudil-la, nacu'ë tapë' tu huéaj có' na', para uyugaquië' lë'. Yu'u ládxe'ë Herodes ubéajë' Pedro lógaca bönachi tódi Laní Pascua, laní na' tu'subanë' ca benë' Dios, bubéajë' bönachi judío luyú Egipto. ⁵Caní guca, nun chí'igacrë' Pedro lu yu'u lidxi guíë na', pero bönachi queë' Cristo bulu'lídzatica'sö Dios, ta'nábini Dios gácalenë' Pedro.

Dios rubéajë' Pedro lidxi guíë

⁶Cate' si' idxn dza yu'u ládxe'ë Herodes ubéajë' Pedro lidxi guíë na', la' dzö' ní'isö dë' rásië' Pedro, ate' nacu'ë chopë' bönni' rójáquië' gudil-la cuita lë'ë Pedro na', en núga'gaquië' lë' chopa du guíë. Gula'cu'ë ia'bal-lë' bönni' rójáquië' gudil-la tapa chi'ë ga nu riyaza lidxi guíë na'. ⁷Tsárido'os buluf'ílahuë' tu gubáz lá'ayi queë' Xanru' ni', ate' buzení'da' bení' lidxi guíë. Gudanë' gubáz lá'ayi na' cuita lë'ë Pedro, ate' busubanë' lë', en gudxë' lë':

—Guyaschi.

Ní'irö bulu'huédxi du guíë na' naga' ni'a në'ë Pedro. ⁸Gubáz lá'ayi na' gudxë' lë', gunné':

—Béga' lë'u, en gudá' xirachu'.

La' bentë' Pedro caní. Ní'irö gubáz lá'ayi na' gudxë' lë', rnnë':

—Guxóa lari' cúdz'u, en gudá len neda'.

⁹ Burúajë' Pedro, sa'yéajlenë' gubáz lá'ayi na', pero biti' réquibe'enë' nácatë le runë' gubáz lá'ayi na'. Gúqinë' yélasó rinenë'. ¹⁰ Cate' chigula'dödë' ga nacu'ë bönni' zí'aló, en bönni' buropi cö, bönni' na' rójáquië' gudil-la tapa chi'ë, bila'dxinë' ga zoa le néquini guíë le nusayaj ga nu riyaza lidxi guíë na', ga nu rurúaj la' nóza que yödzo. Ga nu riyaza na', rácasó que gualaj. Cate' bila'ruájë' ni', gula'zë'ë ga ridzaga ia'turó nóza, ate' ni' gubáz lá'ayi na' la' bulá'alentë' Pedro. ¹¹ Ní'iró réquibe'enë' Pedro, ate' lu icja ládxi'da'azë' gunnë':

—Na'a chinözda' le nácatë gusól-lë'ë Xanru' gubáz lá'ayi queë', en busólë' neda' lu në'ë Herodes, en lu yúgu'të le gulë'ënnë' bönni' judío ilunë' quia'.

¹² Tsanni ni' yu'ë nóza Pedro, rizá' ládxë'ë ca naca lë na' guca, ate' bidxinë' lídxinu María, xiná'abi' Juan, bi'i na' zoa ia'tú labi' Marcos. Lu yu'u na' nudúbigaca bönachi zían ta'yéajlë' Cristo, en tu'lidza Dios. ¹³ Cate' bulidzë' Pedro ra' yu'u lö'a, biruajbi' bi'i nigula lébi' Rode para inózihi' nuzxi na'. ¹⁴ Cate' búnbë'ëbi' bi'i nigula ni chi'ë Pedro, lu yöl-la' rudzeja queëbi' biti' gusaljbi' yu'u, pero carelò bõajbi' lu yu'u, yójtíxjöi'ibi' nupa nacua' ni', rnnabi':

—Zöë' Pedro ra' yu'u.

¹⁵ Ní'iró gulë' lébi':

—Nachixi icju'.

Lébi' tsútsuró ben xtídza'bi' naca caní. Ní'iró gula'nnë':

—Calëga lë'. Bixín queë' na'.

¹⁶ Tsanni na' biti' zoa dxíë' Pedro rulidzë' nupa nacua' lu yu'u. Cate' gula'saljë' yu'u, gula'nítisinë' cate' bila'lé'enë' lë'. ¹⁷ Ní'iró guchisa në'ë Pedro para ila'cu'ë dxisó, ate' busiyönnë' légaquië' ca benë' Xanru', bubéajë' lë' lidxi guíë. Ní'iró gudxë' légaquië':

—Guli'siyönnë' ca' Jacobo, en yugu' bõchi'ru' ca na' guca.

Ní'iró burúajë' Pedro, sa'yéajë' ga yúböló.

¹⁸ Cate' za' rení' dza na', bönni' rójáquië' gudil-la gula'bõ'ë böniga nacxi guca, biti'ró yu'ë Pedro lidxi guíë. ¹⁹ Ní'iró gusól-lë'ë Herodes nupa tsójxi'gaca Pedro. Cate' biti' bulu'dzölinë' lë', Herodes gunabi yúdxinë' yugu' bönni' na' rójáquië' gudil-la, bönni' gulún chi'ë Pedro. Gudödi ni' gunná bé'enë' nupa bëtigaca yugu' bönni' na' rójáquië' gudil-la. Ní'iró buzë'ë Herodes luyú Judea, sa'yéajë' Cesarea, ate' bugá'anë' ni'.

Ca gútië' Herodes

²⁰ Dza ní'só rilenë' Herodes bönachi yödzo Tiro, en yödzo Sidón. Zí'aló bönachi lu xiyúë' Herodes na' gula'sól-la' le biyadzaj quegaca bönachi lu xiyúgaca yödzo Tiro, en Sidón na', pero tu' rilenë' Herodes légaquië', bítiró bi ta'sól-lë'ë quegaquië'. Ní'iró gulunë' tuz bönni' Tiro, en Sidón na', ate' gulunë' ga soë' Blasto unë' quegaquië' lahuë' Herodes na'. Náquië' Blasto na' huen dxin nadéli'në' lataj lo lahuë' Herodes. Gulë'ënnë' bönni' Tiro, en Sidón na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quegaquië'. ²¹ Ní'iró budxíë' bë' Herodes dza yönnë' légaquië', ate' dza na' guró'ë xilatjë' ga ruchi'a rusóroë' bi raca, nácuë' lari' nazaca', en benë' libán légaquië'. ²² Ní'iró bulu'lidzë' zidzaj bönni' na', ta'nnë':

—¡Calëga bönni'só ni! ¡Dios caz ni ru'ë didza'!

²³ La' ná'asó la' bë'të' gubáz lá'ayi queë' Xanru' lë' tu' buzi'ë lë' cazë' yöl-la' ba ral-la' gaca queë' Dios. Ní'iró guró'ë Herodes na' buzuga', ate' gútië' tu' táguba' lë'.

²⁴ Ní'iró guca libán que xtídzë'ë Xanru', ate' gula'yán nupa nazí' lu ná'agaca le.

Le zí'aló luzuí rójéngaquië' Bernabé, en Saulo libán

²⁵ Cate' Bernabé, en Saulo chibulu'dödë' dumí na' lu ná'agaquië' bönni' gula tapa chi'ë bönachi queë' Cristo nacu'ë Jerusalén, bulu'zë'ë ni', yójhuójgaquië' yödzo Antioquia. Gula'ché'ë-bi' ca' bi'i Juan, zoa ia'tú labi' Marcos.

13

¹ Dza ná'asó gula'cu'ë bönni' tu'ë didza' uláz queë' Dios, en bönni' tu'sédinë' bönachi lu yödzo Antioquia, tunë' tu' zxón bönachi queë' Cristo lu yödzo na'. Caní légaquië':

Bernabé,

Simón, (lë' ca' Bönni' Gasja),

Lucio, (bönni' Cirene),

Saulo,

Manaén, (bönni' na' guzxónlenë' tsözxón Herodes, bönni' rinná bë'ë luyú Galilea).

² Tsanni ni' nudúbigaquië' bönni' ni queë' Xanru', en tunë' gubasa, Dios Bö' Lá'ayi gudxë' légaquië', rnnë':

—Guli'béaj-gáquië' quez quia' Bernabé, en Saulo para tsójéngaquië' dxin na' bulidza' légaquië' ilunë'.

³ Budxi gulunë' gubasa, en gulu'ilenë' Dios didza', ní'iró gula'xóa ná'agaquië' chopë' ni, en gula'sól-lë'ë légaquië'.

Yugu' gubáz nasól-lë'ë Cristo tunë' libán luyú Chipre

⁴ Ní'irò yójáquië' Bernabé, en Saulo yödzo Seleucia, tu' gusöl-lë'ë Dios Bö' Lá'ayi légaquië' ni', ate' ni' gula'benë' tu' lë'e barco le guchë' légaquië' ga naca tu luyú bidxi lu nísado', nazí'i le Chipre. ⁵ Cate' bila'dxinë' lu yödzo Salamina luyú na', gulu'ë xtídzë'ë Dios gapa naca lu yu'u ga tu'dubë' bönni' judío luyú na', en tu'sedë' queë' Dios. Nachë'gaquië'-bi' bi'i Juan para gunbi' légaquië' tu' xzön. ⁶ Budxi gula'dödë' idú gapa dë' yödözodo' luyú bidxi na' lu nisa xzön, ni'irò bila'dxinë' yödzo Pafos. Yójáca'gaquië' Barjesús, tu' bönni' judío ni'. Náquië' bönni' udzá' rinnë'yë'ë, en rnnë' ru'ë didza' uláz queë' Dios. ⁷ Bönni' ni dzágüië' Sergio Paulo, bönni' réajni' rinná bë'ë. Bönni' unná bë' na' bulidzë' Bernabé, en Saulo, tu' ré'ënë' yönnë' xtídzë'ë Dios. ⁸ Ní'irò bönni' udzá' na' gudá'baguië' Bernabé, en Saulo, tu' gú'unnë' gunë' ga biti' tséajlë'ë Dios bönni' rinná bë'ë. Bönni' udzá' na' lë' ca' Elimas tsca naca xtídzá'gaca bönni' izá'a ga na'. ⁹ Ní'irò Saulo, lë' ca' Pablo, buzóa tsutsu lahuë', zóalenë' Dios Bö' Lá'ayi lë'. Ruyüë' Elimas na' ¹⁰ en rë' lë':

—Li', bönni' rizí'yë', en bönni' huiá' dö', nacu' ca xzí'ini caz tu' xihui', en bönni' biti' rilé'enë' dxi'a yúgu'të le naca tsahui'. ¿Naru' cabí soa dxitsó' ca runu', ridá'bagu'u didza' tsahui' queë' Xanru', en ruzágu'u xinóza nu' rë'ëni tséajlë' Lë'? ¹¹ Na'a, Xanru' usaca' zi'ë li', ate' ichul-la lo', en biti' ilé'enu' gubidza nababa dza.

La' guchúl-latë lahuë' Elimas na', ate' gudë' niló ná'aló, riguiljë' nuzxi sön në'ë para ichë' lë'. ¹² Cate' bilé'enë' bönni' unná bë' na' lë' na' guca, bubánnë' ca naca xtídzë'ë Xanru', ate' guyéajlë'ë Cristo.

Le gulunë' Pablo, en Bernabé lu yödzo Antioquia luyú Pisidia

¹³ Ní'irò buzë'ë Pablo lu yödzo Pafos na' len yugu' bönni' dzágagaquië' lë', nacu'ë tu' lë'e barco, ate' bila'dxinë' yödzo Perge luyú Panfilia. Lu yödzo na' bi'i Juan bulá'aleni' légaquië', en bóajbi' Jerusalén. ¹⁴ Gudödi ni' bulu'zë'ë Perge na', en yójáquië' yödzo Antioquia luyú Pisidia. Lu yödzo na', cate' ni' naca dza lá'ayi quégaquië' bönni' judío, gula'yázië' lu yu'u ga tu'dubë' tu'sedë' queë' Dios, ate' lu yu'u na' gula'bö'ë. ¹⁵ Ní'irò tu' bönni' zoë' ni' bulabë' guichi ga nazúaj xibá queë' Dios, enca' le nazúaj lu guichi ca gula'nnë' bönni' gulu'ë didza' uláz queë' Dios. Gudödi ni' yugu' bönni' unná bë' que yu'u na' gula'söl-lë'ë nu' yöjödix Saulo, en Bernabé, gunnë':

—Libí'ili', böchi'tu'. Channó nuá'ali' bi innali' le uzéajni' netu', guli'nnë'.

¹⁶ Ní'irò guzuinë' Pablo, en guchisa në'ë para ila'cu'ë dxisó, gunnë':

—Bulí'zë' nágalí' le guía' libí'ili', bönni' Israel, en libí'ili', núlóli' rádxili'-në' Dios. ¹⁷ Xanru' Dios, Nu ta'yéaj ládxí'gaca bönni' Israel, guró cazë' xuz xtó'oru', en benë' ga gula'yándë'ë cate' ni' náca'gaquië' bönni' zi'tu' luyú Egipto. Len yöl-la' huáca xzön queë' bubeajë' légaquië' luyú ni'. ¹⁸ Idú choá' iz Dios biá' gulénë' quégaquië' cate' ni' gula'dé' idú luyú bidxi lu lataj cá'asó. ¹⁹ Cate' budxi busunítie' gadxi có' yödzo gula'cuá' luyú Canaán, bunódzjë' xiyúgaca bönni' ni' quégaquië' xuz xtó'oru'. ²⁰ Gudödi ni', le guca idú ca tapa gayuá' yu' chi-un iz, Dios bucu'ë yugu' bönni' bulu'chi'a bulu'söröë' légaquië' ga bidxintë zoë' Samuel, bönni' bë'ë didza' uláz queë' Dios. ²¹ Ní'irò gula'nábinë' Dios uzóë' tu' bönni' unná bë' quégaquië'. Dios guröë' Saúl, xzí'inë' Cis, bönni' nababë' di'a dza queë' Benjamín. Idú ca choá' iz gunná bé'enë' Saúl na' légaquië'. ²² Gudödi ni' Dios gudúë' Saúl na', ate' buzóë' David quégaquië' para inná bë'ë. Dios benë' ba nali' queë' David ni, gunnë': "Nözda' runë' David, xzí'inë' Isai, le raza ládxa'a, en gunë' yúgu'të le ré'ënda' neda'." ²³ Ladaj xzí'ini xi'sóë' David na' benë' Dios ga guljë' Jesús para gáquië' bönni' usölë' bönni' Israel, ca na' guzxi' lu në'ë Dios zi'atëló gunë'. ²⁴ Zí'aló cate' si' ilá' lahuë' Jesús, benë' Juan libán lógaca yúgu'të bönni' Israel para ulu'bi'ládxí'gaca, en ila' dila nisa. ²⁵ Cate' ni' chizóá údxi gunë' libán Juan na', gunnë': "¿Nuzxi réquili' naca' neda'? Biti' naca' Cristo, bönni' na' ral-la' guidë'. ¡Na'a, bulí'yútsóca! Chizóë' idxinë' bönni' na' ga zoa' ni, ate' neda' biti' naca' lesaca' ilecja' xiráchuë' nudë'ë."

²⁶ Libí'ili', böcha'a, yugu' xzí'ini xi'sóë' Abraham, en núlóli' zóali' ni, en rádxili'-në' Dios. Dios caz gusöl-lë'ë queë'li' didza' ni para uláli'. ²⁷ Nupa nacuá' Jerusalén, en bönni' ta'nná bé'enë' légaquië' biti' bulu'únbë'ë Jesús, en biti' gula'yéajni'inë' le nazúaj lu guichi le gula'nnë' yugu' bönni' gulu'ë didza' uláz queë' Dios, sal-la' tu'laba cazë' yugu' didza' ni yugu' dza lá'ayi. Lu yöl-la' cabí réajni' i quégaquië' gulunë' ga budxín ca rnna didza' ni cate' ni' gula'chúgië' queë' Jesús gátie'. ²⁸ Sal-la' biti' budzöli le nabáguë'ë Jesús gátie', gula'nábinë' Pilato inná bé'enë' bönni' ilütie' Lë'. ²⁹ Cate' budxi gulunë' queë' yúgu'të le nazúaj lu guichi ca ral-la' gaca queë', bulu'zótjë' Lë' lë'e yaga cruz, en bulu'cáché'ë Lë' yeru ba. ³⁰ Ní'irò Dios busubanë' Lë' lu yöl-la' guti! ³¹ Zían dza bulu'lahuë' Jesús lógaca nupa yójácalen Lë' tsözön cate' ni' buzë'ë luyú Galilea, en bidxinë' Jerusalén. Na'a, yugu' bönni' na' tunë' ba nali' queë' lógaca bönni'.

³² Caní naca, lësca' netu' ni rusiyöntu' libí'ili' didza' dxi'a ca naca lë' na' guzxi' lu në'ë Dios gunë' quégaquië' xuz xtó'oru'. ³³ Lë' na' guzxi' lu në'ë Dios quégaquië', Lë' cazë' benë' ga budxín queë'ru', nácaru' xzí'ini xi'sóagaquië'. Caní benë' cate' busubanë' Jesús. Guca ca na' nazúaj lu guichi ga zoa salmo buropi, le rnna caní: "Li' nacu' Xzí'ina'. Neda' buzóa caza'

Li'." ³⁴ Ca naca na', Dios busubanë' Lë' lu yöl-la' guti para cabi initi le naca cazë', Lë cazë' Dios gunnë' caní: "Gonna' quiu' le nácgaca bica' ba guzxi' lu na'a lahuë' David." ³⁵ Que lë ni na' nazúaj ca' lu guichi, ga zoa ia'tú salmo, le rnna caní: "Biti' gu'u lataj ugá anë' bönni' lá'ayi quiu' ga initi le naca cazë'." ³⁶ Le guca queë' David naca bë'. Gudödi benë' dxin lógaca bönachi uládz queë', ca na' gunná bé'enë' Dios lë', ní'irö gútië', ate' gula'gu'ë lë' yeru ba ga nacu'ë xuz xtá'ahuë', ate' guniti le naca cazë'. ³⁷ Na'a, ca naca queë' Jesús na', Dios busubanë' Lë', ate' biti' guniti le naca cazë' lu yeru ba. ³⁸ Libí'ili', böcha'a, ral-la' inözili' lë' ni rusiyöntu' libí'ili'. Dios runiti lahuë' libí'ili' ca naca dul-la' nabága'li' ni'a que le benë' Jesús ni. ³⁹ Na'a, Dios ruünë' tsahui' yúgu'të nupa ta'yéajlë' Jesús, rugúë' yugu' dul-la' na' le cabi guca ugúa xibá queë' Dios, le bë'ë Moisés. ⁴⁰ Gulí'gún chí'i cuinli' na'a para cabi gaca queëli' le nazúaj lu guichi le gula'nnë' bönni' gulu'ë didza' uláz queë' Dios, le rnna caní:

⁴¹ Buli'yútsöca', libí'ili', bönni' cabi tunë' neda' bal.

Ubánili', pero lu yöl-la' cabi réajlë' queëli' gátili'.

Neda' guna' tu dxin dza ni zóali',

en sal-la' nu uluf'i libí'ili' le rulu'í dxin na', biti' ca' tséajlë' ëli'.

⁴² Cate' bulu'rúajë' Pablo, en yugu' bönni' na' dzágagaquië' lë' lu yu'u ga na' tu'dubë' bönni' judío, en tu'sedë' queë' Dios, ní'irö bönachi ni' guláta'yu lógaquië' ulu'sédinë' légaquië' ca naca lë ni cate' idxín ia'tú dza lá'ayi quégaquië'. ⁴³ Cate' ni' bulu'rúajë' lu yu'u na' bönni' nudúbigaquië' ni', zían bönni' judío, en bönni' nuhuóacagaquië' judío, yugu' bönni' ta'yéaj ládxi'gaquië' Dios, gulunë' tsözxön Pablo, en Bernabé. Chopë' ni' gulu'ílenë' légaquië' didza', en bulu'së'ë ládxi'gaquië' para ilácatica'së' tsutsu, ilunë' lóza le ruzá' ládxi'ë Dios quégaquië'.

⁴⁴ Ia'xunu' gubidza ca' cate' bidxín ia'tú dza lá'ayi quégaquië', bulu'dubë' látu'biqúi' yúguté bönachi lu yödzo na' para ila'yönnë' xtídzë'ë Dios. ⁴⁵ Ní'irö bulu'zxé'enë' bönni' judío biti' ta'yéajlë'ë, cate' bila'lé'enë' bönachi zían na', ate' gula'nnë' que didza' ru'ë Pablo, en gula'dá'báguë'ë le. ⁴⁶ Ní'irö lu yöl-la' rugu ládxi' quégaquië' Pablo, en Bernabé, gulë' yugu' bönni' judío na', ta'nnë':

—Ben bayudxi usiyöntu' libí'ili' zí'alö xtídzë'ë Dios, pero tu' rucá'anali' cá'asö didza' ni, en rusáca'li' queëli' biti' nácali' lesaca' sí'ili' yöl-la' na'bán idú ni, que lë ni na', na'a uyéajtu' ga nacuá' bönachi izá'a. ⁴⁷ Lësca' caní gunná bé'enë' Xanru' Dios netu' guntu' libán queë' Cristo lógaca bönachi izá'a, en naca ca rnna didza' na' bë'ë Dios ca naca queë' Cristo, gunnë':

Nuzóa' Li' para gacu' bení' quégaca bönachi izá'a,

en gacu' Nu usólá bönachi iduté yödzólió.

⁴⁸ Cate' bila'yöni bönachi izá'a nacuá' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgu'të nupa ni' chinunë' Dios quéguequi gata' quéguequi yöl-la' na'bán idú. ⁴⁹ Caní guca, guzë xtídzë'ë Xanru', ate' bila'yöni bönachi yúgu'të yödzo nacuá' luyú ni'.

⁵⁰ Ní'irö bönni' judío biti' ta'yéajlë'ë na' gula'gú'u yöl-lë'ë yugu' bönni' lo que yödzo ni' para cabi ila'lé'enë' dxi'a Pablo, en Bernabé. Lësca' caní gula'gú'u yöl-lë'ë nigula lo ta'yéaj ládxi'nu Dios. Caní guca, gulunë' ga gula'bia ládxi'gaquië' Pablo, en Bernabé, ate' bulu'láguë' chopë' ni ní'ilo lu xiyúgaquië'. ⁵¹ Ní'irö Pablo, en Bernabé bulu'quinnajë' yu bëchtö da' la' lábagaquië' le rulu'í nagá'ana xígua' nabága'gaca bönachi lu yödzo na', ate' yójáquië' lu yödzo Iconio.

⁵² Bulu'dzéjanë' bönni' yödzo Antioquia na', bönni' ta'yéajlë'ë Xanru', ate' guzóalenë' Dios Bö' Lá'ayi légaquië'.

14

Le gulunë' Pablo, en Bernabé lu yödzo Iconio

¹ Cate' bila'dxinë' Pablo, en Bernabé yödzo Iconio, gula'yu'ë tsözxön lu yu'u ga tu'dubë' bönni' judío, en tu'sedë' queë' Dios, ate' gulu'ë didza' ni'. Caní guca, zían bönachi judío, enca' zían bönachi izá'a gula'yéajlë' Cristo. ² Ní'irö bönni' judío biti' ta'yéajlë'ë gula'gú'u yöl-lë'ë bal-lë' bönni' izá'a, para cabi ila'lé'enë' dxi'a böchi'ru' ta'yéajlë'ë Cristo. ³ Tu' gula'yéajlë' bönachi zían na' Cristo, gula'cu'ë Pablo, en Bernabé ni' zían dza, ate' lu yöl-la' rugu ládxi' gulu'ë xtídzë'ë Dios, tu' tu'xöni ládxi'gaquië' Xanru'. Lë cazë' Xanru' bulu'e naca iduté li didza' tu'ë ca naca le ruzá' ládxi'ë Dios quégaca bönachi, tu' bë'ë légaquië' lataj gulunë' yugu' le taca bë', en le tun ga tu'bani bönachi. ⁴ Ní'irö bönachi lu yödzo na' bila'rúaj choplö. Bal-lë' gula'dë'ë bönni' judío biti' ta'yéajlë'ë, ate' ia'bal-lë' gula'dë'ë Bernabé, en Pablo, gubáz na' nasól-lë'ë Cristo. ⁵ Ní'irö bönni' judío biti' ta'yéajlë'ë na', en yugu' bönni' izá'a ni' gulunë' tuz bönni' ta'nná bé'enë' légaquië', ate' bulu'dubë' para ilu'ë dö' quégaquië' gubáz na' nasól-lë'ë Cristo, en ulu'ladxë' légaquië' guiöj. ⁶ Cate' téquibe'enë' Pablo, en Bernabé lë ni, bulu'zxünnajë' ni', yójáquië' yödzo Lистра, en Derbe luyú Licaonia, ate' gula'dödë' yúgu'të yödzódo' idú gásibi'ilo ni', ⁷ gapa ni' gulunë' libán que didza' dxi'a ca naca queë' Cristo.

Tu'ladxë' Pablo guiöj lu yödzo Lистра

⁸ Zoë tu bönni' lu yödzo Lистра bití' raca sê'ë. Ró'ösë' ni' tu' cabí rizé'ë cate' ni' guljé', en catu caz guzê'e ni'ë. ⁹ Bönni' ni ruzé náguie' didza' ru'ë Pablo. Pablo buyúé' lè', en gúquibe'ené' réajlè'ë Cristo para huóáquié'. ¹⁰ Ní'iró Pablo bē'ë zidzaj didza', en rē' lē':

—Guzuí.

La' guxiti'tē' bönni' na', en guzē'e ni'ë. ¹¹ Cate' yugu' bönni' Lистра bila'lé'enē' lē na' bené' Pablo, gula'si lógaquié' lu' zidzaj didza' tu'ë bönni' Licaonia na', ta'nné':

—¡Yugu' dios bönni' ni! ¡Nuhuó'tjagaquié' ga zóaru', en tu'lu'í cuíngaquié' ca nácaquié' bönni'!

¹² Gula'nné' Bernabé na' náquié' Júpiter, ca lē' dios lo quégaquié', ate' gula'nné' náquié' Pablo Mercurio, ia'tú dios quégaquié'. Caní gula'nné' tu' ru'ë didza' Pablo ca na' ta'nné' runé' Mercurio na'. ¹³ Zoa yudo' que Júpiter ga ni' nacu'ë, cuita nōza ga ni' ta'yaza bōnachi lu yödzo na'. La' bidxinté' bixúz que Júpiter na', naché'ë-ba' yugu' bēdxi, en nu'ë ca' yugu' bregui' yōj, ate' dzágagaca bōnachi zían lē'. Gulé'ennē' ilútié'-ba' bēdxi na' lógaquié' Pablo, en Bernabé para ila'yéaj lādxi'gaquié' légaquié' ca tunē' quégaca dios quégaquié'. ¹⁴ Cate' Bernabé, en Pablo, gubáz na' nasól-lē'ë Cristo, guléquibe'ené' lē ni, gula'chözē' lari' nácaquié'. Tu'hu'iminē' tu' tunē' bönni' ni le cabí ral-la' ilunē', ate' gula'xiti'ë, en yōjcu'ë gatsaj lāhuil'ō bōnachi zían na', en gulu'ë zidzaj didza', tē' légaquié':

¹⁵ —¡Libí'ili' bōnachi! ¿Bizx que runli' caní? Lēscá' bönni' ca libí'ili' nácatu', en rigu'xjōi'itu' libí'ili' lē ni caz ral-la' ucá'anali', le cabí nácatē, para quéquili' queé' Dios ban. Dios ni bené' lúzxi'ba, en yōdzóliō, en nísado', en yúgu'tē le nacua' tu tu lataj na'. ¹⁶ Yugu' iz chigula'dōdi, gulún yúgu'tē bōnachi ca rnasō que queēguequi, ate' Dios bití' buzágue'ë xinózguequi, ¹⁷ pero bené' ga gulaca le tun ba nalí queé', yugu' le nácaagaca dxi'a bené' quégaquié'. Risól-lē'ë queéru' nisa guiōj, en runé' ga ta'yán le rázaru'. Ruzólaj rudzé'enē' rē'u, en runé' ga rudzeja lādxi'ru'.

¹⁸ Sal-la' Bernabé, en Pablo gulé' légaquié' caní, cánnisō bila'déli'nē' bulu'zágué'ë xinózguequi bōnachi zían na', para cabí ilútié'-ba' bēdxi na' lógaquié'.

¹⁹ Ní'iró bal-lē' bönni' judio bití' ta'yéajlē'ë, narúajgaquié' Antioquia, en Iconio, bila'dxinē' ni', ate' gula'gú'u yól-lē'ë bōnachi zían na'. Ní'iró yúgu'tē' bulu'ladxē' Pablo guiōj, en gulá'ayōjē' lē' ní'ilō ra' yōdzō na', tu' téquinē' chinatié'. ²⁰ Ní'iró bulu'dubē' yugu' bönni' ta'yéajlē'ë Cristo idú gásibi'ilō ga dē' Pablo. Guyasé' lē', en buazié' lu yōdzō na'. Cate' za' rení' ia'tú dza, burúajlenē' Bernabé, yōjgaquié' yōdzō Derbe.

²¹ Lu yōdzō ni' gulunē' libán que didza' dxi'a ca naca queé' Jesucristo, ate' bōnachi zían ni' gula'yéajlē' Cristo. Gudōdi ni' yōjhuójgaquié' Lистра, en Iconio, en Antioquia. ²² Cate' gula'dodē' Bernabé, en Pablo yugu' yōdzō na', bulu'tipē' lādxi'gaquié' bönni' ni' ta'yéajlē'ë Cristo, en bulu'sé'ë lādxi'gaquié' ulu'gá'anē' tsutsu ca na' ta'yéajlē'ë Lē'. Gulé' légaquié':

—Rē'u tsaza cázaru' ga rinná bē'ë Dios, run bayudxi quí'í sáca'ru' zían le gaca queéru'.

²³ Bulu'cu'ë yugu' bönni' gula ilún chi'ë bōnachi queé' Cristo tu có' huéaj bōnachi ni' queé' Cristo. Cate' chigulufílenē' Dios didza', en gulunē' gubasa, ní'iró gula'gu'ë légaquié' lu nē'ë Xanru', Nu na' ta'yéajlē'ë.

Pablo, en Bernabé tu'dxinē' Antioquia luyú Siria

²⁴ Ní'iró Pablo, en Bernabé gula'dodē' luyú Pisidia, ate' bila'dxinē' luyú Panfilia. ²⁵ Budxi gulunē' libán que xtídzē'ë Cristo lu yōdzō Perge, yójgaquié' yōdzō Atalia. ²⁶ Bulu'zē'ë ni', ate' gula'bené' tu lē'e barco, en bulu'dxinē' yōdzō Antioquia, ga na' nacu'ë bönni' queé' Cristo, bönni' na' gula'sól-lē'ë légaquié' tsójéngaquié' libán, cate' ni' gula'gu'ë légaquié' lu nē'ë Dios, Nu na' ruzá' ladxí' quégaquié' ilunē' xichinē', dxin na' chibudxi gulunē'. ²⁷ Cate' ni' bulu'dxinē' Antioquia, bulu'dubi bōnachi queé' Cristo nacua' ni'. Ní'iró Pablo, en Bernabé bulu'siyōnnē' légaquié' ca nácaagaca le zōxn bené' Dios lu ná'agaquié', enca' ca bené' Dios, bē'ë yugu' bōnachi izá'a lataj ta'yéajlē' ca' Lē'. ²⁸ Pablo, en Bernabé bulu'gá'analenē' bōnachi ni' ta'yéajlē' Cristo zían dza.

15

Tu'dubē' huen dxin queé' Cristo lu yōdzō Jerusalén

¹ Ní'iró bal-lē' bönni' narúajgaquié' luyú Judea bila'dxinē' yōdzō Antioquia, ate' bulu'sédiné' bōchi'ru', bönni' izá'a ni', ta'nné':

—Channó cabí irugu lu xipéla'li' ca nalébitu' runtu' ca na' gunná bē'ë Moisés, bití' gaca uláli'.

² Ní'iró Pablo, en Bernabé gula'dil-lalenē' légaquié' didza', ate' gúcada' dzatsa. Gudōdi ni', gula'bōē' Pablo, en Bernabé len ia'bal-lē' bönni' bōchi'ru' ni', para tsójgaquié' Jerusalén, en ila'dxinē' lógaquié' gubáz ni' queé' Cristo, enca' lógaquié' bönni' gula'tapa chi'ë bōnachi queé' Cristo ni', para ilu'ílenē' légaquié' didza' ca naca lē ni raca, tu'sédiné' bönni' na' bōnachi le nachixi.

³ Ní'irō yugu' bōnni' queē' Cristo nacu'ē Antioquía bulu'gu'ē légaquiē' nōza, ate' gula'dōdē' lu xiyú yōdzō Fenicia, en luyú Samaria, ate' bulu'siyōnnē' bōchi' luzá'aru' yugu' lataj ni' ca guca, bulu'huóáquiē' bōnni' izá'a queē' Cristo. Lē ni ben ga bulu'dzējanē' yúgu'tē bōchi' luzá'aru' ni'.

⁴ Cate' bila'dxinē' Pablo, en Bernabé lu yōdzō Jerusalén, yugu' bōnni' queē' Cristo nacu'ē ni', enca' yugu' gubáz nasól-lē'ē Lē', en yugu' bōnni' gula tapa chi'ē gulunē' légaquiē' bal. Pablo, en Bernabé bulu'siyōnnē' légaquiē' yúgu'tē le benē' Dios lu ná'agaquiē'. ⁵ Ní'irō gula'zuinē' bal-lē' bōnni' yudo' fariseo, bōnni' ta'yéajlē'ē Cristo, en ta'nnē':

—Run bayudxi irugu lu xipēla'gaquiē' bōnni' izá'a na' ta'yéajlē'ē Cristo, en inná bé'eru' légaquiē' ilunē' ca rnna bē' xibá queē' Moisés.

⁶ Ní'irō bulu'dubē' gubáz nasól-lē'ē Cristo len bōnni' gula tapa chi'ē bōnachi queē', para ulu'chi'a ulu'sōrōē' lē ni raca. ⁷ Gudōdi gulu'ē zían didza', guzuinē' Pedro, en gudxē' légaquiē':

—Libi'ili', bōcha'a. Nōz quézili' ca guca dza ni'te, Dios gurō cazē' neda' para guna' libán lógaca bōnachi izá'a para ila'yōni didza' dxi'a, en ila'yéajlē' Cristo. ⁸ Dios, Nu nunbē' caz le yu'u icja ládxi'do'gaca bōnachi, buzóē' le naca bē' runē' légaquiē' bal, gusól-lē'ē Dios Bō' Lá'ayi quégaquiē', ca na' gusól-lē'ē Lē' queēru'. ⁹ Biti' butsé'ē ca benē' quégaquiē', en queēru', en lēsc'a' bunē' dxi'a icja ládxi'do'gaquiē' tu' ta'yéajlē'ē Cristo. ¹⁰ Na'a, zibixz que run leli'-nē' Dios, rusubága'li' yua' xiyéngaca bōchi' luzá'aru'? Yua' ni, le naca le ta'nná bē' xibá queē' Moisés, biti' guca guá'aru' rē'u, en biti' guca ilu'ē xuz xtó'oru' le. ¹¹ Rē'u ni, réajlē'ēru' nuláru' ni'a que le buzá' ládxi'ē Xanru' Jesús queēru', en ca na' nuláru' rē'u, ulu'lē' ca' légaquiē'.

¹² Cate' budxi bē'ē Pedro didza' ni, yúgu'tē' gula'cu'ē dxisō, ate' bulu'zē' nágaquiē' didza' gulu'ē Bernabé, en Pablo. Bulu'siyōnnē' légaquiē' yugu' le taca bē', en le tun ga tu'bani bōnachi, yugu' le benē' Dios lu ná'agaquiē' ga nacua' bōnachi izá'a. ¹³ Cate' Bernabé, en Pablo budxi gulu'ē didza' ni, bubí'ē didza' Jacobo, gunné':

—Libi'ili', bōcha'a. Buli'zē' nágalí' le guá' libi'ili'. ¹⁴ Simón Pedro chigudixjō'i' quézinē' rē'u ca benē' Dios, bulu'e lahui yōl-la' huáca queē' le zí'aló luzuí lógaca yugu' bōnachi izá'a para bubéajē' quez queē' bōnachi nūtsa'gaca ládjagaquiē'. ¹⁵ Ca naca lē ni rōljōz gaca xtída'gaquiē' bōnni' gulu'ē didza' uláz queē' Dios, ca na' nazúaj lu guichi lá'ayi, rnna:

¹⁶ Dza tōdi lē ni huóda', en uchisa' Nu inná bē', bōnni' na' tsáziē' xilatjē' David.

Guna' ca run nu ruchisa tu yu'u naguinnaj.

Uchisa' ca' bōnachi ila'cuá' lidxē', nupa nagá'anagaca.

Guna' ca run nu ruchisa tu zō'ō yexu'.

Caní uchisa' le gunná bē'ē David

¹⁷ para ulu'guillaj ia zíca'rō bōnachi Xanru'.

Ulu'guillaj bōnachi izá'a Lē',

ate' si' láguequi: Bōnachi Queē' Dios.

¹⁸ Caní rnnē' Xanru',

Nu na' dza ni'te ben ga naca bē' yúgu'tē lē ni.

¹⁹ Que lē ni na' runi neda' biti' ral-la' gun níguiru' bōnachi izá'a, nupa tu'huóáca queē' Dios. ²⁰ Ral-la' uzúajru' lu guichi quégaquiē' ulu'cá'anē' yugu' le biti' ral-la' ilahuē', le nadōdi lógaca budó' guiōj budó' yaga, en cabí ilunē' le ruá' dō', en cabí ilahuē' xipēla'gacaba' bōa' guixi' biti' narúaj-gacaba' rōn, en cabí ilahuē' xichōnba' biti'tēs bōa' guixi'. ²¹ Dza ni'te nacua' yúgu'tē yōdzō nupa tun libán lu yu'u gapa tu'dubē' bōnni' judío, en tu'sedē' queē' Dios. Tunē' libán ni' que le buzúajē' lu guichi Moisés. Tu'laba cazē' le yugu' dza lá'ayi.

²² Ní'irō gula'yaza ládxi'gaquiē' gubáz nasól-lē'ē Cristo, en bōnni' gula tapa chi'ē, en yúgu'tē bōnachi queē' Cristo, ila'bōē' bal-lē' bōnni' ládjagaquiē', en ila'sól-lē'ē légaquiē' Antioquía. Tsójacalenē' Pablo, en Bernabé. Chopē' na' gula'bōē', légaquiē' Judas, zoa ia'tu' lē' Barsabás, enca' Silas. Nácaquiē' bōnni' lo ládjagaquiē' bōchi'ru' ni'. ²³ Bulu'zúajē' lu guichi le bulu'dōdē' lu ná'agaquiē' ilu'ē, le rnna caní:

“Netu', gubáz nasól-lē'ē Cristo, en bōnni' gula tun chi'ē, en yugu' bōchi'ru', rugápatu' libi'ili' Dios, bōchi'tu', nácali' bōnachi izá'a zóali' Antioquía, en yugu' yōdzō luyú Siria, en Cilicia.

²⁴ Biyōnitu' ca tun bal-la' bōnachi bila'rúaj ga zóatu', nupa na' biti' nasól-la'tu'. Dutsá'agaquiē' libi'ili' len le ta'nnē', en tu'bequi bōniga icja ládxi'do'oli', tu' ta'nná bē'ē irugu lu xipēla'li', en gunli' ca rinná bē' xibá queē' Moisés. ²⁵ Que lē ni na' guyaza ládxi'tu' cate' chibén tuz xtída'tu', gurōtu' chopē' bōnni', nupa isól-la'tu' para uduyugaquiē' libi'ili'.

Guídlengaquiē' Bernabé, en Pablo, nupa na' nadxí'iru'. ²⁶ Chiyōjáquiē' Bernabé, en Pablo gapa guzóa bōnadxi'ilatiē' tu' nadxí'iguequinē' Xanru' Jesucristo. ²⁷ Caní naca, risól-la'tu' Judas, en Silas ga zóali'. Chopē' ni ulu'siyōnnē' libi'ili' lē ni ruzúajtu' lu guichi ni. ²⁸ Dios Bō' Lá'ayi bulu'inē' netu' le raza ládxi'ē, en lēsc'a' caní raza ládxi'tu' netu', biti' usubága'rōtu' libi'ili' yua', le naca le rinná bē' xibá queē' Moisés, pero yugu' lē nisō run bayudxi gunli':

29 Biti' gáguli' le nadödi lógaca budó' guiöj budó' yaga.

Biti' gáguli' rön.

Biti' gáguli' xipéla'gacaba' böa' guixi' biti' narúaj-gácaba' rön.

Biti' gunli' le ruá' dö'.

Channö gun chi'i cuinli' para gunli' ca rna yugu' lè ni, gunli' dxi'a."

³⁰ Caní guca, yugu' bönni' na' nasöl-la'gaquié' bila'dxiné' Antioquia. Bulu'tubé' bönachi queé' Cristo nacua' ni', ate' gula'gu'è guichi na' lu ná'agaquié'. ³¹ Cate' chibudxi bulu'labé' le, bulu'dzéjané' ca naca le nazúaj lu guichi na', le ruhué tsahui' légaquié'. ³² Tu' nacagaquié' Judas, en Silas bönni' tu'é didza' uláz queé' Dios bulu'hué tsáhué'è légaquié', en bulu'tipé' ládxi'gaquié' böchi'ru' ni', bulu'guné' dxin didza' zían le gulu'ilené' légaquié'. ³³ Gudödi bulu'dzéné' Judas, en Silas ni' nababa dza, ní'irö böchi'ru' ni' bulu'zené' légaquié' dxi'a didza' para tsöjhuöajgaquié' Jerusalén ga nacu'è bönni' gula'söl-lé'è légaquié'. ³⁴ Guyaza ládxé'è Silas bugá'ané' Antioquia. ³⁵ Bulu'gá'ané' ca' Pablo, en Bernabé Antioquia na', ate' bulu'sédiné' bönachi, en guluné' libán que xtídzé'è Xanru'. Lésca' caní gulún zíanrö ca' bönachi.

Risí lahué' Pablo röjené' libán le buropi luzuí

³⁶ Gudödi nababa dza Pablo gudxé' Bernabé:

–Uyéajru' leyúbölö tsöjyúgaru'–né' böchi'ru' nacu'è yúgu'té yödzo gapa chiyöjenru' libán que xtídzé'è Xanru', para ilé' eru' nacxi raca queégaquié'.

³⁷ Gú'unné' Bernabé ila'ché'è-bi' bi' Juan Marcos, tséajlenbi' légaquié', ³⁸ pero biti' guyaza ládxé'è Pablo ila'ché'è-bi' tséajlenbi' légaquié' tu' bulá'alenbi' légaquié' luyú Panfilia, en bití'rö yöjénlenbi' légaquié' dxin queé' Xanru'. ³⁹ Biti' guca tuz xtídzá'gaquié' Bernabé, en Pablo ga bidxinté bulu'lá'alené' tué' ia'túé'. Bernabé guché'è-bi' bi' Marcos, ate' gula'bené' tu lè'e barco, yöjáquié' luyú Chipre. ⁴⁰ Pablo guröé' Silas para tséajlené' lè'. Ní'irö yugu' böchi'ru' gula'gu'è légaquié' lu né'è Xanru', en gula'nábiné' Lè' uzá' ládxé'è queégaquié', ate' bulu'zè'è Pablo, en Silas ni'. ⁴¹ Gula'dödé' yugu' yödzo luyú Siria, en Cilicia, ate' bulu'tipé' ládxi'gaca bönachi queé' Cristo nacua' ni'.

16

Bi'i Timoteo runbi' tsözxön Pablo, en Silas

¹ Gudödi ni' bila'dxiné' Pablo, en Silas yödzo Derbe, en yödzo Listra. Zóabi' tu bi'i bönni' ni', réajlé'èbi' Cristo, lébi' Timoteo. Nácabi' zxi'ininu tu nigula judío réajlé'ènu Cristo, pero xúzibi' bití' náquié' judío. ² Yugu' böchi'ru' nacu'è Listra, en Iconio tuné' ba nalí queébi', ta'nné' runbi' le naca dxi'a. ³ Gú'unné' Pablo tséajlenbi' bi' ni lè', ate' gudélé'è-bi', en guchúguié' lu xipéla'bi' ca tun bönachi judío. Caní bené' para cabí ila'nné' queébi' bönni' judío nacu'è yugu' yödzo ni', tu' nöziguequiné' yúgu'té' xúzibi' bití' náquié' judío. ⁴ Cate' Pablo, en nupa dzágagacalé' gula'dödé' gapa nacua' yödzo ni', tu tu yödzo na' bulu'dödé' lu ná'agaquié' yugu' böchi'ru' nacu'è gapa ni' yugu' xibá na' guluné' gubáz nasöl-lé'è Cristo, en bönni' gula tapa chi'è bönachi queé', nacu'è Jerusalén. Bulu'dödé' yugu' xibá ni lu ná'agaquié' para iluné' ca rinná bè' xibá na'. ⁵ Caní guca, bönachi yúgu'té cö' bönachi queé' Cristo bila'dipa ládxi'gaca ca naca le réajlé'èru' Cristo, ate' gula'yán tu dza.

Tu bönni' Macedonia ruliázé' Pablo lu yéla béchigal

⁶ Pablo, en bönni' dzágagaquié' lè' gula'dödé' luyú Frigia, en luyú Galacia, tu' buzágué'è Dios Bö' Lá'ayi xinözgaquié', para cabí iluné' libán que xtídzé'è Xanru' luyú Asia. ⁷ Cate' bila'dxiné' luyú Misia, gulé'ènné' tsöjáquié' luyú Bitinia, pero Dios Bö' Lá'ayi, Nu risöl-lé'è Jesús queéru', bití' bè'è légaquié' lataj. ⁸ Ní'irö gula'dödé' gala' ga dè Misia, ate' yöjáquié' lu yödzo Troas. Neda' Lucas, ruzúaja' lu guichi lè ni, guzóa' Troas na', ate' yöjóalena'–né' Pablo. ⁹ Lu yödzo ni' Dios buluí'iné' Pablo tu le bilé'ené' lu yéla béchigal. Tu bönni' Macedonia buluí'lahué' lè', zuñé', en ráta'yué' lahué' Pablo, rnné': "Gudödi ladztu', lu xiyú Macedonia, en gúcalen netu'." ¹⁰ Cate' bilé'ené' Pablo lè ni, lè na' buluí' lahui lè', la' bè' ládxi'tétu' tséajtu' luyú Macedonia, tu' gúquibe'etu' Dios chibulidzé' netu' tsöjentu' libán que didza' dxi'a lógaca bönachi luyú ni'.

Le guluné' Pablo, en Silas lu yödzo Filipos

¹¹ Ní'irö gurentu' lè'e barco, en buzá'atu' Troas. Gudöditu' lirá ga bidxintu' yödzo Samotracia, ate' gudödi ia'tú dza bidxintu' yödzo Neápolis. ¹² Buzá'atu' ni', ate' bidxintu' Filipos, yödzo na' nácaro lo ca yúgu'té yödzo nabábagaca tsólá'a ni' luyú Macedonia. Lu yödzo ni' yugu' bönni' Roma nucuá'agaquié' bönachi uláz queégaquié'. Lu yödzo nisö guzóatu' nababa dza. ¹³ Cate' bidxin tu dza lá'ayi, birúajtu' lu yödzo, en guyéajtu' ra' yegu ga na' tu'dubi caz bönachi yödzo na', en tu lidza Dios. Guró'otu' ni', en busiyöntu' yugu' nigula nudúbagacanu ni' ca naca xtídzé'è Xanru'. ¹⁴ Nútsa'nu ládjagacanu Lidia, tu nigula Tiatira.

Nácanu nigula rúti'nu lari' xiná chul-la le nazáca'da'. Reaj ládxi'nu Dios, ate' buzé náganu didza' ru'è Pablo, ate' Xanru' gúcalenè-nu para guzxf' lu ná'anu didza' na' bè'è. ¹⁵ Ní'irò bidílanu lènu nisa, ate' gula'dila ca' nisa bònachi nacua' lídxi'nu. Gudödi ni' gúta'yunu lotu', gunnánu:

—Channö réquibe'eli' réajlè'a Xanru', guli'tsaza lidxa', en guli'sóa ni'.

Bennu bayudxi ugá'anatu' ni'.

¹⁶ Ia'tú le guca tu dza tsanni ni' zéajtu' ga na' rulidztu'-nè Dios, birúajbi' dutságabi' tu bi'i nigula netu' yu'u lébi' bō le run ga rinnè yá'abi'. Len yöl-la' rinnè ya'a queébi' runbi' ga ta'zídè'è dumí yugu' bōnni' xanbi'. ¹⁷ Bi'i nigula ni sudunóbi'-nè Pablo, en netu', ru'íbi' zidzaj didza', rnnabi':

—jYugu' bōnni' ni tunè' xichinè' Dios nayépisètèrè'! jTu'siyönnè lib'íli' naca gaca uláli'!

¹⁸ Caní benbi' zían dza. Cate' bítirō guyaza ládxi'è Pablo, buécjè', en bulidzè' bō na' yu'u lébi', rnnè':

—Lu Lè' Xanru' Jesucristo, rinná bé'eda' li'. jBurúaj icja ládxi'do'obi' bi'i nigula ni!

La' n'ísö burúajtè bō na'.

¹⁹ Cate' bila'lé'enè' xanbi' chiburúaj bō na' run ga rinnè yá'abi', en bítirō naca lōza ila'zi'è dumí ni'a queébi', que lé ni na' gula'zōnè Pablo, en Silas, ate' gula'ch'è légaquiè' lógaquiè' bōnni' yúlahui', nudúbigaquiè' ga naca lu yé'èyi. ²⁰ Bulu'cu'è légaquiè' lógaquiè' bōnni' yúlahui' na', ta'nnè':

—Yugu' bōnni' ni nácaquiè' judío, en tunè' ga tu'tsatsa bònachi yōdzō ni. ²¹ Tu'sédinè' le cabí ral-la' si' lu ná'aru', en bítirō ral-la' gunru', tu' nabábaru' Roma.

²² Ní'irò bònachi zían ni' gula'dá'bagá' Pablo, en Silas, ate' yugu' bōnni' yúlahui' gula'nná bé'enè' nupa gula'leca' lari' nácaquiè' Pablo, en Silas, ate' gula'guínè' légaquiè' gubá'ayi.

²³ Gudödi gula'guíndè'è légaquiè', gula'gu'è légaquiè' lidxi guíè. Gula'nná bé'enè' bōnni' rusayjè' lidxi guíè na' gun chí'idè'è légaquiè'. ²⁴ Bōnni' ni, cate' chigula'nná bé'enè' lè' caní, gulu'è légaquiè' lu yu'u lè'e dxi' lidxi guíè na', en gulu'è ní'agaquiè' yeru yaga ta'zōn ní'agaquiè'.

²⁵ Idú guluhuèla Pablo, en Silas tu'lidzè' Dios, en tul-lè' yöl-la' ba queé' Dios, ate' ta'yōnnè' yugu' bōnni' nadzúngaquiè' lidxi guíè na'. ²⁶ Ní'irò tsárido'os gudödi budó' zxu' bach. Caní guca ga bidxintè guzxi'zi xilibi zō'ò lidxi guíè na', ate' la' gula'yá'ljatè yúgu'tè gapa nu riyaza, ate' bulu'huédxi ca' yugu' du guíè nága'gaca bōnni' nadzúngaquiè' ni'. ²⁷ Bubanè' bōnni' na' rusayjè' lidxi guíè. Cate' bilé'enè' nayá'ljagaca gapa nu riyaza lidxi guíè na', gulec'jè' guíè tuchi' queé' para guti cuinè', tu' réquinè' chibulu'zxúnajè' bōnni' nadzúngaquiè' lidxi guíè na'. ²⁸ Ní'irò Pablo zidzaj bulidzè' lè', gunnè':

—jBíti' bi' gúni' cuinu', tu' zóatu' ni yúgu'tètu'!

²⁹ Ní'irò bōnni' na' gunabè' guí', ate' gudá'atè' lu yu'u lidxi guíè na'. Guzxfídzidè' lu yöl-la' radxi, ate' biyéchuè' xini'agaquiè' Pablo, en Silas. ³⁰ Cate' chinubéajè' légaquiè' lidxi guíè na', gudxè' légaquiè':

—Libi'íli', bōnni', ¿bizxi ral-la' guna' para ulá'?

³¹ Légaquiè' tē' lè':

—Guyéajlè'è Xanru' Jesucristo, ate' uló' li', en lésca' caní ulu'lágaca bònachi nacua' lidxu'.

³² Gululí'ilenè' lè' didza' ca naca xtídzè'è Xanru', dzágagaca lè' yúgu'tè bònachi nacua' lídxiè'.

³³ La' ná'asö, ni' naca chí'i dzö'ölö la' guchè'tè' légaquiè', ate' yójtibè' légaquiè' ga dxíagaquiè' huè'. Gudödi ni', la' bidílatè' nisa, ate' gula'dila ca' nisa yúgu'tè bònachi nacua' lídxiè'. ³⁴ Ní'irò guchè'è légaquiè' lídxiè', en bè'è le gulahuè'. Rudzéjanè' lè', en tu'dzeja ca' yúgu'tè bònachi nacua' lídxiè' tu' ta'yéajlè'è Dios.

³⁵ Cate' za' rení' dza na', yugu' bōnni' yúlahui' gula'söl-lè'è ni'a ná'agaquiè', ate' gulè' bōnni' na' rusayjè' lidxi guíè:

—Busán-gáquiè' bōnni' na'.

³⁶ Ní'irò bōnni' na' rusayjè' lidxi guíè gudíxjöi'inè' Pablo didza' ni, gunnè':

—Gula'söl-lè'è bōnni' yúlahui' didza' usana' lib'íli'. Na'a, guli'rúaj, en buli'huóaj dxí'ado' ga rizóali'.

³⁷ Ní'irò birúajè' Pablo, en gudxè' yugu' ni'a ná'agaquiè' bōnni' yúlahui' na', gunnè':

—Chigula'guínè' netu' lógaca bònachi sal-la' bítirō narúguini queé'tu' ca rinná bē' xibá, en gula'gu'è netu' lidxi guíè, ate' netu' ni nabábatu' Roma. ¿Naru' tu'santsè' netu' bagáchi'só? jBíti' ca' gaca! jIldígarè' légaquiè' udusángaqiè' netu'!

³⁸ Yöjhuójgaquiè' ni'a ná'agaquiè' bōnni' yúlahui' na', en bulu'siyönnè' yugu' bōnni' yúlahui' didza' ni, ate' légaquiè' guládxinè' cate' bila'yōnnè' nabábagaquiè' Pablo, en Silas Roma. ³⁹ Cate' bila'dxinè' lidxi guíè ni', guláta'yue' lógaquiè' Pablo, en Silas cabí ulu'subáguè'è légaquiè' xíguia'. Ní'irò gula'béajè' légaquiè' lidxi guíè na', en guláta'yue' lógaquiè' ulu'rúajè' yódzō na'. ⁴⁰ Ní'irò bila'rúajè' Pablo, en Silas lidxi guíè na', ate' gula'yáziè' lídxi'nu Lidia. Cate' chibila'lé'enè' bōchi'ru' nacu'è ni', bulu'chíziè' didza' icja nágaagaquiè', en la' bulu'zá'atè' ni'.

17

Yugu' bönachi Tesalónica tunë' dzatsa

¹ Gula'dödë' Pablo, en Silas lu yödzo Apolonia, ate' bila'dxinë' lu yödzo Tesalónica, ga ni' zoa tu yu'u ga tu'dubë' bönni' judío, en tu'sédë' queë' Dios. ² Bugá'anë' Pablo ni' idú galaj dza, ate' ca run cazë', guyijë' ga zoa yu'u na' cate' naca dza lá'ayi quégaquië' bönni' judío, ate' bé'lenë' légaquië' didza'. ³ Buchila lá'anë', en bulu'inë' légaquië' rusëdi le nazúaj lu guichi lá'ayi run bayudxi qui'í sáquë'ë Cristo, Bönni' na' tunë' löza bönni' judío udusólë' légaquië', ate' tódi gátirë' ubané' lu yöl-la' guti. Ní'irö Pablo gudxë' légaquië':

—¿Caní guca queë' bönni' na' lë' Jesús, runa' libán queë' ga ni' zóali'! ¡Bönni' ni náquië' Cristo!

⁴ Ní'irö bal-lë' gula'yéajlë'ë Cristo, ate' gulunë' tsözxón Pablo, en Silas. Lësca' caní zían bönni' izá'a, bönni' ta'yéaj ládxi'gaquië' Dios, gula'yéajlë'ë Cristo. Lësca' zían nigula lo gula'yéajlë'ënu Cristo. ⁵ Ní'irö yugu' bönni' judío biti' ta'yéajlë'ë, lu yöl-la' ruzxë'e quégaquië' Pablo, bulu'tubë' yugu' bönni' biti' nácaquië' tsahui', bönni' ta'dasë' ca'. Cate' chibulu'tubë' bönachi zían, gulunë' ga gulún dzatsa idú lu yödzo na', ate' bayudxi gula'yázië' lidxë' Jasón para ulu'béajë' Pablo, en Silas lógaca bönachi na' tun dzatsa. ⁶ Cate' biti' bulu'dzölinë' Pablo, en Silas, gula'béajë' Jasón, en ia'zica'rë' böchi'ru' nacu'ë ni', ate' gula'ché'ë légaquië' lógaquië' bönni' yúlahui'. Gulu'ë zidzaj didza', ta'nnë':

—Yugu' bönni' na' nutsá'gaquië' bönachi idütë' yödzo'lió chibila'dxinë' ca' ni'. ⁷ Jasón ni gulu'ë légaquië' lidxë'. Yúgu'të bönni' ni ta'dá'baguë'ë xibá queë' César, bönni' rinná bé'enë' rë'u, ta'nnë': “Zoë' ia'tuë' bönni' rinná bé'ë, lë' Jesús.”

⁸ Cate' bila'yönnë' yugu' bönni' lu yödzo, en yugu' bönni' yúlahui' na' lë ni, gula'bö'ë böniga. ⁹ Ní'irö, gudödi gula'zi'ë bönni' yúlahui' dumí le bulu'cá'anagarë' Jasón, en ia'zica'rë' bönni' na', bulu'sané' légaquië'.

Le gulunë' Pablo, en Silas lu yödzo Berea

¹⁰ Ní'irö yugu' böchi'ru' ni' la' gula'sól-la'të' Pablo, en Silas, ni' naca chí' dzö'ölö, ate' söjáquië' yödzo Berea. Cate' bila'dxinë' ni', gula'yázië' lu yu'u ga tu'dubë' bönni' judío nacu'ë ni', en tu'sédë' queë' Dios. ¹¹ Gulácarë' tsahui' bönni' ni ca bönni' nacu'ë Tesalónica, tu' gula'zi' lu ná'agaquië' xtídzë'ë Xanru' idú ládxi'gaquië'. Yugu' dza bulu'labë' dxi'a le nazúaj lu guichi lá'ayi, para iléquite'enë' channö nácatë lë na' rnnë' Pablo. ¹² Caní guca, zían bönni' judío gula'yéajlë'ë Cristo. Lësca' caní, zían bönni' izá'a, yugu' nigula lo, en yugu' bönni' gula'yéajlë'ë Cristo. ¹³ Ní'irö cate' guléquite'enë' bönni' judío nacu'ë Tesalónica, lësca' riguixjö'ë Pablo xtídzë'ë Dios lu yödzo Berea, yöj'áquië' ni', en gulunë' ca' ni' ga gulún dzatsa bönachi zían. ¹⁴ Ní'irö yugu' böchi'ru' ni' la' gula'sól-la'të' Pablo, para tsejë' ga naca ra' nisado', pero bulu'gá'anasë' Silas, en bi'í Timoteo lu yödzo Berea. ¹⁵ Yugu' bönni' Berea na' gula'ché'ë Pablo lu yödzo Atenas. Ní'irö la' yöjhuöjgacatë' lu yödzo Berea, tu'ú'ë xtídzë'ë Pablo, para ilë' Silas, en bi'í Timoteo, tsöj'acatë' ga ni' zoë' Pablo.

Le benë' Pablo lu yödzo Atenas

¹⁶ Tsanni ni' zoë' Pablo ribözë' Silas, en bi'í Timoteo, lu yödzo Atenas, ruhu'ini ládxë'ë tu' rilë'enë' ta'yéaj ládxi'gaca yúgu'të bönachi yödzo na' yugu' budó' guiöj budó' yaga. ¹⁷ Que lë ni na' bé'lenë' bönni' judío, en bönni' ta'yéaj ládxi'gaquië' Dios didza' ga naca lu yu'u ga tu'dubë' tu'sédë' queë' Dios. Yugu' dza bé'lenë' nupa ta'dá lu yé'eyi didza' ca naca xtídzë'ë Cristo. ¹⁸ Bal-lë' bönni' dá'gaquië' le tu'sëdinë' bönni' epicüreo, en le tu'sëdinë' bönni' estoico gulu'ílenë' Pablo didza'. Bal-lë' gula'nnë':

—¿Bizxi rë'ënitse'në' innë' bönni' huë' didza' ni?

Ia'bal-lë' gula'nnë':

—Réquitu' náquië' nu run libán quégaca dios zi'tu'.

Caní gula'nnë' tu' runë' libán Pablo lógaquië' que didza' dxi'a queë' Jesús, en que yöl-la' rubán. ¹⁹ Ní'irö gula'guélë'ë në'ë Pablo, en gula'ché'ë lë' lu gu'a ga tu'dubë' tu'ë didza', nazí'í le Areópago, ta'nnë':

—¿Naru' huácatsö yönitü' didza' cubi ni rusiyönnu' netu'? ²⁰ Rusiyönnu' netu' le tun ga rubánitu'. Ré'ënitü' inözitu' bizxi rna didza' ni ru'u.

²¹ Biti'rö ta'yaza ládxi'gaquië' ilunë' bönni' Atenas na', en bönni' izá'a nacu'ë ni', pero ila'yónisinë', en ilu'isë' didza' tu le cubi.

²² Ní'irö guzuinë' Pablo gatsaj láhu'í'lö lö'a Areópago na', gunné':

—Bönni' Atenas, yúgu'të le rilë'eda' naca bé' reaj ládxi'da'ali' yugu' dios queë'li'. ²³ Cate' gudöda' lu yödzo, en buyúgaca' yugu' le reaj ládxi'li', yöjxáca' ca' tu nichu ga ni' nazúaj le rna caní: “Tu Dios, Cuntu Nu Nunbë' Lë'.” Dios na' reaj ládxi'li'-në' sal-la' biti' núnbë'ëli'-në', Dios ni runa' libán queë' lolí'.

²⁴ ¡Dios ni benë' yödzo'lió, en yúgu'të le nacuá' yödzo'lió ni! ¡Náquië' Xani yehua' yubá, en Xani luyú ni, en biti' ca' zoë' tu yudo' núngaca bönachi! ²⁵ Biti' bi riyadzaj queë' le gaca

ulu'nödzej bönachi, tu' runödzej' Lë cazë' quégaca yúgu'të bönachi yöl-la' na'bán, en yúgu'të le riqúniru'.

²⁶ Lë benë' tuzë' bönni' ga zá'gaca yúgu'të bönachi izá'a para ila'cuá' idú yödžölió, en bulu'e dza ila'cuá', en gapa ral-la' ila'cuá'. ²⁷ Dios bucu'ë légaquië' para ulu'guiljë' Lë', channö nácati'tës ila'džölinë' Lë' sal-la' ila'gán ila'zönsë'. Cani raca sal-la' biti' zoë' zi'tu' ga zóaru' tu turu'. ²⁸ Lë cazë' runë' ga zóaru' nabanru', en bi gaca gunru', en le nácaru'. Naca ca na' gula'nnë' bal-lë' bönni' nútsa'gaquië' libí'ili', nupa bulu'zúaj le do' rúl-lali', le ta'nná: "Dí'a dza queë' Dios nácaru'." ²⁹ Na'a, channö nácaru' dí'a dza queë' Dios, biti' ral-la' innaru' náquië' Dios ca tu budó' guió' budó' yaga, o tu le néquini oro, o plata, o guió', le núngaca bönachi ca naca tu le ta'guinnajsó ícjaquequi. ³⁰ Dios budóë' cá'asó yugu' le gulunë' lu yöl-la' biti' réajni'i quégaquië' yugu' iz chígula'dódi, pero na'a rinná bé'enë' yúgu'të bönachi idútë yödžölió ulu'bí'i ládxi'gaca. ³¹ Dios chinulu'ë tu dza cate' uchi'a usöröë' yúgu'të bönachi. Idú tsahui' naca ca uchi'a usöröë' légaquië' lu në'ë Jesús, bönni' na' buzóa cazë' Lë', ate' lógaca yúgu'të bönachi benë' tsutsu gaca caní tu' busubanë' Lë' lu yöl-la' guti.

³² Cate' bila'yönnë' didza' bë'ë Pablo ca guca, zoa nu bubán lu yöl-la' guti, bulu'titjë' bal-lë', ate' ia'bal-lë' gula'nnë':

—Yönguëtu' ia'tú lë ni ru'u didza' que.

³³ Ní'iró burúajë' Pablo gatsaj láhuilö ga na' nacu'ë, söhuó'ë. ³⁴ Bal-lë' gula'yéajlë'ë Cristo, en gulunë' tsözxón Pablo. Nútsë'ë Dionisio, bönni' areópago, ládjagaquië', ate' nútsa'nu ca' ládjagaquië' nigula na' lënu Dámaris. Ia'bal-lë' na' gula'yéajlë'ë ca' Cristo.

18

Le benë' Pablo lu yödžö Corinto

¹ Gudódi guca lë ni, buzë'ë Pablo yödžö Atenas na', ate' guyijë' yödžö Corinto. ² Yöjxáquië' Aquilo, tu bönni' judío ni'. Guljë' bönni' ni luyú Ponto, en si' bidxíngazë' yödžö Corinto na'. Buzë'ë luyú Italia len nigula queë', lënu Priscila, tu' gunná bë'ë Claudio, bönni' unná bë', ulu'rúajë' yúgu'të bönni' judío yödžö Roma. Guyijë' Pablo ga nacu'ë Aquilo, en Priscila na' ³ tu' naca tuz dxin tunë' Aquilo, en Pablo. Bugá'analenë' légaquië', ate' tsözxón gulunë' dxin, tunë' yugu' yu'u guídido'. ⁴ Cate' nácagaca dza lá'ayi quégaquië' bönni' judío, razie' Pablo lu yu'u ga tu'dubë' tu'sëdë' queë' Dios, ga ni' bë'lenë' légaquië' didza'. Gú'unnë' uluf'inë' yugu' bönni' judío, en yugu' bönni' izá'a nacu'ë ni', naca idútë li le rigúixjó'ë ca naca queë' Jesucristo.

⁵ Cate' bila'dxinë' Silas, en bi'i Timoteo ni', nuzá'agaquië' luyú Macedonia, nugu'ide'enë' Pablo, runë' libán que xtídzë'ë Dios, en runë' ba nali lógachië' bönni' judío, rnnë':

—Jesús náquië' Cristo, Nu na' tunë' löza yugu' bönni' judío udusölë' légaquië'.

⁶ Cate' bönni' judío nacu'ë ni' gula'dá'báguë'ë xtídzë'ë, en gula'nnë' zi'ë que, ní'iró Pablo gudxibë' lari' nácuë' para uluf'inë' légaquië' bíti'rö nabáguë'ë lë' ni'a quégaquië', ate' gudxë' légaquië':

—La' cuínsili' nabága'li' xíguia' que yöl-la' guti queë'li', calëga neda' nabága'a le. Na'a, uyija' ga nacua' bönachi izá'a.

⁷ Ní'iró burúajë' Pablo ni', en guyijë' lidxë' Justo, bönni' reaj ládxië'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sëdë' queë' Dios. ⁸ Crispo, bönni' lo que yu'u ga na' tu'dubë' tu'sëdë' queë' Dios guyéajlë'ë Xanru' Jesús, ate' dzágagaca lë' yúgu'të bönachi nacua' lidxë'. Cate' bila'yönnë' xtídzë'ë Dios, zían bönni' Corinto gula'yéajlë'ë Cristo, ate' gula'dilë' nisa. ⁹ Ní'iró Lë cazë' Xanru' gudxë' Pablo lu yëla bëchigal, gunné':

—Biti' gádxinu', en biti' su' dxisó, quíxjó'u xtídz'a'a, ¹⁰ tu' zóalen caza' neda' li', ate' cuntú nu uzapa' në'e lí' para guá' dó' quiu', tu' néquiguequi quia' bönachi zían lu yödžö ni.

¹¹ Bugá'anë' Pablo ni' idú ca tu iz yu' gatsaj, ate' busëdinë' légaquië' xtídzë'ë Dios.

¹² Cate' bidxín dza rinná bë'ë Galión luyú Acaya, guláquië' tuz bönni' judío biti' ta'yéajlë', ate' gula'dá'báguë'ë Pablo, en gula'ché'ë lë' ga rö'ë ruchi' a usöröë' Galión na'. ¹³ Gulë' Galión na':

—Bönni' ni rigú'u yöl-lë'ë bönachi para ilunë' bal Dios, ca ridá'baga' xibá queëtu'.

¹⁴ Cate' chizóa gu'ë didza' Pablo, Galión na' gudxë' yugu' bönni' judío, rnnë':

—Libí'ili', bönni' judío, la'tu' guca tu le riguitsaj xibá queë' César, o tu le ruá' dö', guá' ilena' uzë naga' xtídz'a'li' ca ral-la' guna', ¹⁵ pero channö naca didza' bizxaj que dídz'a'só, o que lágaca bönachi, en ca naca xibá queëzili', guli'cá'ana tsahui' libí'isili', tu' cabí rë'ënda' neda' gaca' nu uchi'a usörö yugu' le caní.

¹⁶ Ní'iró Galión bulágui'ë légaquië' lu yu'u yúlahui'. ¹⁷ Ní'iró yúgu'të bönni' uládz na' gula'guélë'ë Sóstenes, bönni' lo que yu'u ga tu'dubë' bönni' judío, en tu'sëdë' queë' Dios, ate' gula'guiné' lë' lö'a yúlahui', pero biti' bë' ládxië'ë Galión lë na' raca.

¹⁸ Pablo bugá ané' lu yödzo na' zían dza, ate' gudödi busiyönné' böchi'ru' nacu'ë ni' didza', guyijé' yödzo Cencrea, ga ni' bené' yütusö icjé', tu' dë tu le nazí' lu në'ë lahué' Dios guné'. Ní'irö gurené' tu lë'e barco, para tsejé' luyú Siria, dzágagaquié' lë' Priscila, en Aquilo. ¹⁹ Cate' bila'dxiné' yödzo Éfeso, Pablo bulá'alené' légaquié' ni'. Guyázié' lu yu'u ga tu'dubé' bönni' judío, en tu'sédé' queé' Dios, ate' bé'lené' nupa nacua' ni' didza'. ²⁰ Yugu' bönni' ni' gulá'ta'yué' lahué' Pablo ugá'analené' légaquié' ia'lati' xidzé, pero lë' bití' gú'unné'. ²¹ Bé'lené' légaquié' didza', gunné':

—Run bayudxi soa' gapa' laní si' gaca Jerusalén, ate' leyübölö huöda' ga ni zoáli', channö gué'ënné' Dios.

Ní'irö gurené' Pablo tu lë'e barco, en buzé'ë Éfeso na'.

Ridxiné' Pablo Antioquia, ate' risí lahué' röjené' libán le bunny luzuí

²² Gudödi bidxiné' Pablo yödzo Cesarea, gurené' guyijé' Jerusalén, ga ni' yöjyüé' bönachi queé' Cristo, ate' ní'irö buzé'ë ni', en guyijé' Antioquia. ²³ Gudödi zoé' ni' nababa dza, buzé'ë ni', sa'yéajé' tu tu yödzo luyú Galacia, en Frigia. Bené' tsutsu böchi'ru' nacu'ë ni' ca naca le ta'yéajlé'ë Cristo.

Runé' libán Apolos lu yödzo Éfeso

²⁴ Tu dza ni' bidxiné' Apolos, tu bönni' judío lu yödzo Éfeso. Guljé' bönni' ni lu yödzo Alejandria, en nabé'ede'ené' ru'ë didza', en nazédadé'ë le nazúaj lu guichi lá'ayi. ²⁵ Chinazédé' bönni' ni ca naca le réajlé'ëru' Xanru'. Idú ládxé'ë bë'ë didza', en ca nacatë busédiné' bönachi ca naca queé' Jesús, sal-la' núnbë'ë tuz le ruquíla bönachi nisa ca bené' Juan. ²⁶ Gusí lahué' Apolos ru'ë didza' idú ládxé'ë ga naca lu yu'u ga tu'dubé' bönni' judío, en tu'sédé' queé' Dios. Cate' Priscila, en Aquilo bila'yönné' didza' ru'ë Apolos na', gulu'chë'ë lë' quez, en bulu'zéajni'iröné' lë' xibá queé' Dios. ²⁷ Cate' gú'unné' Apolos tödé' luyú Acaya, bulu'tipé' ládxé'ë, ate' bulu'zúajé' tu lu guichi le tsójuá'gaquié' quegaquié' bönni' teaj ládxé'ë Cristo luyú Acaya na', para iluné' Apolos na' bal. Cate' bidxiné' Apolos luyú na', yugu' bönni' ni' teaj ládxé'ë Cristo bulu'zídé'ë xibé' didza' ru'ë Apolos na', tu' ruzá' ládxé'ë Dios quegaquié'. ²⁸ Caní guca, tu' bucul-lé' Apolos na' yugu' bönni' judío ni' lógaca yúgu'té bönachi, tu' buguné' dxin le nazúaj lu guichi lá'ayi, en bulu'e bönni' na' Jesús naca cazé' Cristo.

19

Le bené' Pablo lu yödzo Éfeso

¹ Tsanni ni' zoé' Apolos lu yödzo Corinto, gudödé' Pablo gapa nacua' yödzo ia'lati' ra'lö, ate' bidxiné' Éfeso. Yöjxáquié' bal-lé' bönni' ta'yéajlé'ë Cristo ni'. ² Pablo gunábiné' légaquié', rnné':

—¿Naru' bidisóalené' Dios Bö' Lá'ayi libí'ili' cate' ni' guyéajlé'ëli' Cristo?

Gulé' lë':

—Bití' nayönitú' channö zoé' Dios Bö' Lá'ayi.

³ Ní'irö Pablo gunábiné' légaquié', rnné':

—¿Nacxi guca le bidílali' nisa?

Ta'nné':

—Ca buquílé' Juan bönachi nisa.

⁴ Pablo gunné':

—Buquílé' Juan bönachi nisa, nupa ni' bulu'bí'i ládxí'guequi, ate' Juan caz gudxé' léguequi ral-la' ila'yéajlé' Bönni' na' si' zá'télé' ca lë', ate' Bönni' ni naquié' Jesús, Lë' Cristo.

⁵ Cate' yugu' bönni' na' bila'yönné' didza' ni ru'ë Pablo, bila'dilé' nisa tu' chita'yéajlé'ë Xanru' Jesús. ⁶ Cate' guxóá në'ë Pablo légaquié', en ni' rulidzé' Dios, bidisóalené' Dios Bö' Lá'ayi légaquié', ate' gulu'ë didza' yúbölö, en gulu'ë didza' uláz queé' Dios. ⁷ Guláquié' bönni' ni idú chínnué'.

⁸ Guzóé' Pablo idú ca tsonna beo' ni', ate' guyázié' lu yu'u ga tu'dubé' bönni' judío, en tu'sédé' queé' Dios, ate' lu yöl-la' rugu ladxí' bené' libán lógachié'. Bé'lené' légaquié' didza', en gú'unné' ulufíné' légaquié' nacatë le rigúxjö'ë ca rinná bë'ë Dios. ⁹ Ní'irö bizidi' icja ládxí'do'gaquié' bal-lé', en bití' gula'yéajlé'ë Cristo, ate' gula'nné' zi'ë que xtidzé'ë Xanru' ga nacua' bönachi zían na'. Ní'irö Pablo bulá'alené' légaquié', ate' bubéajé' quez nupa ta'yéajlé' Cristo. Bé'lené' bönachi ni ta'yéajlé' Cristo didza' yugu' dza ga na' tu'dubé' lu yu'u ga rusédiné' Tiranno bönachi. ¹⁰ Caní béntica'sé' Pablo idú ca chopa iz, ate' caní guca, bila'yöni' yúgu'té bönachi didza' ca naca queé' Xanru' Jesús, bönachi nacu'ë yugu' yödzo luyú Asia, bönachi judío, en bönachi izá'a. ¹¹ Dios bené' yugu' yöl-la' huáca zxón lu në'ë Pablo. ¹² Caní guca, bal-lé' bönni' gula'zi'ë yugu' lári'do' bégué'ë icjé' Pablo, en yugu' lari' tsólá'a bugalé' lë'ë, ate' yöjuá'gaquié' léguequi gapa nacua' nupa te'e, ate' bulu'huóáquié' ca naca yödzo hué' que queégaquié', en bulu'rúaj bö' xihui' yú'ugaca bönachi na'.

¹³ Ní'irö bal-lë' bönni' judío udá dzaga tu'béajë' bö' xihui' gulë'ënnë' ulu'gunë' dxin Lë' Xanru' Jesús para ulu'béajë' yugu' bö' xihui' yú'ugaca bö'nachi, ta'nnë':

—Ní'a que Lë' Jesús, Nu na' runë' libán que Pablo, rinná bé'etu libí'ili' urúajli'.

¹⁴ Caní gulunë' gadxi bönni' zxi'inë' Esceva, tu bönni' judío náquië' bönni' lo ládjagaquië' bixúz unná bë'. ¹⁵ Bubi' didza' bö' xihui' na', gunná:

—Nünbë'a-në' Jesús, en nünbe'eda' bönni' lë' Pablo, pero libí'ili', çnúzxité libí'ili'?

¹⁶ Ní'irö guxiti'ë bönni' na' yu'u lë' bö' xihui', yöjenë' légaquië' zí', en bucul-lë' yúgu'të', tu' guzxéqui'rönë' ca légaquië'. Caní guca, xiguídigacasë', en huë' gacatzë' bulu'zxúnnajë' gadxë' bönni' na' lu yu'u ni'. ¹⁷ Guzë' didza' ca guca lë' ni, atë' bila'yöni yúgu'të' nupa nacua' lu yödzo Éfeso, bö'nachi judío, en bö'nachi izá'a, atë' yúgu'të' guládxinë' Dios. Que lë' ni na' gulunë' zxon Lë' Xanru' Jesús.

¹⁸ Lësca' bila'dxinë' zían bönni' ta'yéajlë'ë Cristo, en gula'xóalëpë' dul-la' nabága'gaquië', en gula'guixjö'ë le chigulunë'. ¹⁹ Lësca' caní gulunë' zían bönni', zí'alö gulunë' yöl-la' udzá'. Dujuá'agaquië' yugu' guichi udzá' quégaquië', atë' bulu'zegui'ë léguequi lógaca yúgu'të' bö'nachi. Bulu'labë' tscá nazáca'gaca guichi na', le guca idú chi un mil dumí plata. ²⁰ Caní guca, guzëda' xtídzë'ë Xanru', en bidéli'da' bö'nachi zían. Idú ládxi'gaquië' gula'yéajlë'ë Cristo.

²¹ Gudödi gulaca lë' ni, benë' queë' Pablo tsejë' Jerusalén, pero zí'alö ral-la' tödë' yugu' yödzo luyú Macedonia, en luyú Acaya, atë' gunné':

—Tödi tseja' Jerusalén, run bayudxi tseja' ca' Roma.

²² Ní'irö gusöl-lë'ë-bi' chópabi' bi'i bönni' tácalenbi' lë', légacabi' Timoteo, en Erasto, luyú Macedonia, pero bugá'anë' lë' nababa dza luyú Asia na'.

Tu'tsatsa bö'nachi lu yödzo Éfeso

²³ Bulu'tsatsa bö'nachi Éfeso dza ni', atë' gula'dá'baguë'ë xtídzë'ë Xanru'. ²⁴ Benë' Demetrio, bönni' gubëdxi guié plata ga bulu'tsatsë'. Run cazë' yugu' lidxi budó' guiój budó' yaga néquiequini plata que dios quégaquië', lënu Diana. Gula'zi'ë bönni' tunë' dxin ni dumí bach. ²⁵ Butuhë' Demetrio na' ia'zica'rë' bönni' tunë' la' dxin nisó, atë' gudxë' légaquië':

—Böcha'a, nöz quézili' ca naca dxin runru', runna dumí queëru'. ²⁶ Rilë'eli', en riyönili' ca runë' Pablo na'. Calégasö Éfeso ni, pero idú luyú Asia chibidéli'në' bö'nachi zían, atë' chibutsë'ë ca tunë', tu' rë' légaquië': "Yúgu le núngaca bö'nachi biti' nácacaga dios." ²⁷ Calégasö zoa bö'nadxi ugá'ana cá'asó dxin ni runru', pero lësca' zoa bö'nadxi ugá'ana cá'asó judo' que dios zxon lënu Diana. Caní gaca, ugá'ana cá'asó yöl-la' zxon queënu, dios ni ta'yéaj ládxi'gaca-nu bö'nachi idütë luyú Asia, enca' idütë yödzo lóli.

²⁸ Cate' yugu' bönni' na' bila'yönnë' didza' ni, gula'léde'enë', atë' gulu'ë zidzaj didza', ta'nnë':

—Nácatërönu zxon Diana, dios queëru' rë'u, bö'nachi Éfeso.

²⁹ Caní guca, bulu'tsatsa bö'nachi idütë lu yödzo na', atë' guláquië' tuz, en carelò yöjáquië' lö'a yúlahui'. Gulá'ayöjë' Gayo, en Aristarco, bönni' Macedonia túngaqüë' Pablo tsózxön, ga ni'. ³⁰ Cate' gú'unnë' Pablo tsazië' ga nacua' bö'nachi zían na', biti' ca' gulu'ë lë' lataj bönni' ta'yéajlë'ë Cristo. ³¹ Lësca' caní gulunë' bal-lë' bönni' yúlahui' que luyú Asia, bönni' ta'lë'enë' Pablo dxi'a. Gula'söl-lë'ë queë' nupa gulá'ta'yu lahuë' biti' tsazië' lö'a yúlahui' na'. ³² Ga ni' tu'tsatsë', en ta'bódxie', tu le ta'nnë' bal-lë', en ia'tu le ta'nnë' ia'zica'rë', tu' rő'ógacasë' baröli bönni' zían na' tu'tsatsë', en lá'tu'biqúi' yúgu'tëgaquië' biti' nözguequinë' bizx que na' nudúbigaquië' ni'. ³³ Ní'irö yugu' bönni' judío gula'béajë' Alejandro ladaj bö'nachi zían na', atë' bulu'dxiguë'ë lë' lógaca bö'nachi zían na'. Bulu'e Alejandro na' len në'ë para ila'bö' dxisó, tu' gú'unnë' gu'ë didza' le gácalen yugu' bönni' judío na' lógaca yúgu'tëguequi. ³⁴ Cate' guléquite'enë' náquië' judío, yúgu'të' gulu'ë tsózxön zidzaj didza' idú ca chopá hora, ta'nnë':

—¡Nácatërönu zxon Diana, dios queëru' rë'u bö'nachi Éfeso!

³⁵ Ní'irö bönni' uzúaj que yúlahui' benë' ga gula'bö' dxisó bö'nachi zían na', gunné':

—Bönni' Éfeso, nözígaca yúgu'të bö'nachi zoa judo' queënu Diana, dios zxon, ni. Rë'u ni, bö'nachi Éfeso, run chí'iru' judo' na', enca' budó' na' böxaj ga zóaru', le birúaj lúzxiba. ³⁶ Cuntu nu gaca tá'baga' lë' ni. Que lë' ni na' run bayudxi sóali' dxisó, en biti' bi' gúntëzili'. ³⁷ Nachë'gacali'-në' bönni' ni, en biti' ta'banë' le dzó'ö judo', en biti' ta'nnë' xihue'ë queënu dios queëli'. ³⁸ Que lë' ni na', channó zoa didza' bizxaj quégaquië' Demetrio, en yugu' bönni' gubëdxi guié plata nacua'lenë' lë', len nútí'tës bönni', dë' lataj ga nu uzé' naui légaquië', en zoa nu uchi'a usörö légaquië'. Ni' huáca ulu'zegui luzá'agaquië' didza' tegü' ia'tuë'. ³⁹ Na'a, channó dë' ia'tú le inábali', huáca ucá'anaru' tsahuí' le cate' ulu'dubi bönni' yúlahui' ca na' rinná bë' yúlahui'. ⁴⁰ Zoa bö'nadxi nu uzegui rë'u didza' ni'a que dzatsa ni guca na'a, inná ridá'baga'ru' yúlahui'. Biti' bi' gaca innaru' bizx que guca dzatsa ni.

⁴¹ Cate' budxi bë'ë didza' ni, busöl-lë'ë bö'nachi zían na' nudúbigaca ni' tsóhuóigaca lúdxiguequi.

20

Sa'yéajé' Pablo luyú Macedonia, en luyú Grecia

¹ Cate' guró'o dxi dzatsa na' guca lu yödzo Éfeso, bulidzè' Pablo yugu' bönni' ta'yéajlé'è Cristo, atè' guchiziè' icja nágaquaié' didza'. Gudódi ni' bunidè' légaquie', en la' bulá'alenté' légaquie'. Birúajé' ni', atè' sa'yéajé' luyú Macedonia. ² Gudödè' yugu' yödzo luyú ni', ruzéajni'ide'ené' böchi'ru' nacu'è ni', atè' gudódi ni' bidxinè' luyú Acaya. ³ Guzóé' Pablo ni' idú ca tsonna beo'. Cate' chizóa cuenè' tu lè'e barco para tsejè' luyú Siria, gúquibe'ené' ta'bó' nisiè' bönni' judío lè' para ila' zónè' lè'. Que lè ni na' buguelé'è nõza söhuóje' luyú Macedonia, atè' bidxinè' yödzo Filipos. ⁴ Sópater, xzi'inè' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca' bi'i Timoteo, en Tíquico, en Trófito, yugu' bönni' Asia, söjácalenè' tsózxón lè'. ⁵ Ní'iró yugu' bönni' ni yójnórugaquie' lahuè' Pablo, yójaquie' yödzo Troas, ga ni' gula'bözè' lè'. ⁶ Lu yödzo Filipos na', neda', Lucas, yójsaga'-né' Pablo. Cate' chigudódi laní cate' tahuè' bönni' judío yöta xtila biti' nazí'i cúa zi que, gurentu' tu lè'e barco, en buzá'atu' Filipos na'. Gudódi gayu' dza budzágatu' bönni' ni' yójnórugaquie' lahuè' Pablo, yójaquie' Troas, atè' ni' bugá'anatu' gadxi dza.

Le benè' Pablo lu yödzo Troas

⁷ Dza risí lo le gadxi dza bulu'dubè' bönni' ta'yéajlé'è Cristo para ilahuè' yöta xtila le rusá' ládxi'ru' ca gútiè' Jesucristo. Ni' rusédinè' Pablo légaquie', en tu' ral-la' uzé'è ni' cate' za' rení' dza na', xidzé' bè'è didza', ga bidxintè' gudódi guluhuèla. ⁸ Ga ni' nudúbigaquie' naca lu yu'u xitsá', atè' nacua' zían le ta'gú'u bení' ga na'. ⁹ Zóabi' bi'i Eutico ni', ró'óbi' ga ra'a lení' que yu'u na', atè' nadódiró yéla lóbi' tu' ritunna libán runè' Pablo. Ga ni' ró'óbi' rásibi' bi'i na' naca ga bunni' cuía lu yu'u, atè' rásisibi' ca' gubíxitébi', böxjabi' ga bidxintèbi' zxan yu'u. Nátitèbi' bulu'lisè'-bi'. ¹⁰ Bójtjè' Pablo zxan yu'u na', atè' yóyxóé' lébi', en bunidè'-bi'. Ní'iró gudxè' nupa nacua' ni':

—Biti' gadxi idzóbili'. Nabanbi'.

¹¹ Cate' chibubenè' Pablo xitsá', gudélè'è yöta xtila, gudahuè'. Ní'iró Pablo bé'lenè' légaquie' didza' ga bidxintè' zila baló. Gudódi ni' burúajé' ni'. ¹² Bi'i bönni' ra'bán na' gubíxibi', bulu'ché'è-bi' nabanbi', en bulu'zi' zxóndè'è.

Ca guca bidxintu' Mileto

¹³ Gunórutu' lahuè' Pablo, en yójcentu' tu lè'e barco, atè' gudóditu' ga bidxintu' yödzo Asón para tsójsáagatu'-né' Pablo ni', para gaca ca na' chibén xtídzatu', tu' gú'unnè' Pablo tsejè' ni' sé'seni'è. ¹⁴ Cate' chibudzágatu'-né' lu yödzo Asón na', gurénlenè' netu' lè'e barco, atè' guyéajtu' yödzo Mitilene. ¹⁵ Buzá' barco ni', atè' dza buropi bidxintu' tódi li ga zoa luyú bidxi nazí'i le Quío, atè' ia'tú dza ca' gudóditu' tódi li ga dè yödzo Samos, en bidxintu' yödzo Trogilio ga ni' guzóatu' tu chí'i. Ia'tú dza ca' bidxintu' yödzo Mileto. ¹⁶ Caní bentu' tu' chibenè' queè' Pablo tódisè' yödzo Éfeso, para cabí tsenè' luyú Asia, tu' run bayudxi soè' Jerusalén cate' naca dza Pentecostés channó séqui'nè'.

Didza' bè'è Pablo lu yödzo Mileto

¹⁷ Cate' ni' zoè' Pablo lu yödzo Mileto, gusól-lè'è nu yójlidza bönni' gula tapa chí'è bönachi queè' Cristo nacu'è Éfeso. ¹⁸ Cate' bila'dxinè' ga zoè' Pablo, lè' gudxè' légaquie':

—Libí'ili' chinóz quézili' ca béntica'sa' ga zóali' ga gudela' bidxina' luyú Asia. ¹⁹ Yugu' dza bena' xichinè' Xanru' lu yól-la' nõxaj ladxí', ga bidxintè' guródx'a' ni'a queéli', atè' zían le guca quia' le guzxi' bè' neda' ni'a que le ruá' dō' gulunè' quia' bönachi judío biti' ta'yéajlé'è Cristo. ²⁰ Béntica'sa' libán ga zóali' que yúgu'tè le ruzí'ili' xibé, en buséida' libí'ili' yálaido' ga nudúbili', en gapa naca lu yu'u lídxili'. ²¹ Bena' ba nalí lógaca bönachi judío, en lógaca bönachi izá'a para ulu'bí'i ládxi'gaca, en ulu'huóaca queè' Dios, en ila'yéajlé' Xanru' Jesucristo. ²² Na'a, Dios Bó' Lá'ayi chinunè' quia' tseja' Jerusalén, en biti' nõzda' bizxi gaca quia' ni'. ²³ Yúgu'tè yödzo ga ridá', rigufxjói'inè' Dios Bó' Lá'ayi neda', ré' neda' ila'gu'è neda' lidxi gufé' bönni' judío biti' ta'yéajlé', en ulu'saca' zi'è neda'. ²⁴ Biti' bi' runi neda' que lè na' gaca, sal-la' gátia' o cabí gátia', pero ruí' ládxi'sida' údxi guna' le chigudéla' runa', para guna' dxin na' budödè' Xanru' Jesús lu na'a, le naca guna' libán que didza' dxi'a ca naca le ruzá' ládxi'è Dios queéru'. Caní guna' len yól-la' rudzeja.

²⁵ Na'a, yúgu'téli' na' chibena' libán lolí' ca rinná' bè'è Dios, nõzda' bí'ti'ró ulé'eli' neda'. ²⁶ Que lè ni na', le nácatè' rea' libí'ili' na'a dza. Biti' nabága'a neda' queéli' nitulí' libí'ili'. ²⁷ Biti' bi' bucáchi'da' libí'ili', pero gudíxjói'da' libí'ili' yúgu'tè le rnnè' Dios. ²⁸ Que lè ni na', guli'gún chí'i cuinlí', en guli'gún chí'i yúgu'tè bönachi queè' Cristo, tu' nuzóé' Dios Bó' Lá'ayi libí'ili' para gácalenli' légaquie', en gun chí'ili' bönachi queè' Xanru', Bönni' na' gútiè' uláz quégaquie', bulaljè' xichónè' le bóá'uinë' légaquie'. ²⁹ Chinózda', tódi uzá'a ga zóali', ila'yaza nupa ilè'èni ulu'suniti bönachi queè' Cristo ga zóali', ilunè' ca tunba' bö'cu' guí'a sinía', tu'sunítiba' yugu' bö'cu' zxila'. ³⁰ Ila'ruájé' bönni' nús'ta'gaquie' ládjali', atè' ilu'è didza'

biti' nácatè para ulu'béajè' quegacàsè' nupa ta'yéajlè' Cristo nútsa'gaca ládjali'. ³¹ Que lè ni na', guli'sóa ban ladxì', en guli'tsojné ca bena' neda' idú ca tsonna iz, rèla, en tè dza buchízia' icja nágalì' tu tuli' ga bidxintè guródxa' queèli'.

³² Na'a, bóchi' luzá'ado', rigu'a libí'ili' lu nè'è Dios. Rinábida' Lè' uzá' ladxè'è queèli', en gunè' ca rnna xtídzè'è. Dios gunè' libí'ili' tsutsu, en gunè' ga idéli'li' gunli' tsòzxón yugu' bõnni' rò queè'. ³³ Catu caz guzè ládxa'a le nequi quegaquiè' bóchi' luzá'a. Biti' guzè ládxa'a dumí, o lari' quegaquiè'. ³⁴ Nöz quezili' dxi'a, len na'a caza' bena' dxin para gaca gá'ua' le biyadzaj quia', en quegaca nupa gula'cuá'len neda'. ³⁵ Ca naca yúgu'tè le bena', buluí'ida' libí'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsójneru' didza' bè'è Xanru' Jesús, gunnè': "Uz'irò xibè nu bi runódzaj ca nu bi rizí'."

³⁶ Cate' budxi bè'è Pablo didza' ni, buzóa zxibè', ate' benè' tsòzxón yúgu'tè', bulu'lidzè' Dios. ³⁷ Ní'irò gula'bòdxè' yúgu'tè'. Bulu'nidè' yenè' Pablo, en bulu'tsaga lahuè' lè'. ³⁸ Caní gulunè' tu' bulu'hufinnè' ni'a que didza' na' bè'è Pablo, gunnè': "Bíti'rò ulé'eli' neda'." Yójacalenè' tsòzxón lè' ga na' gurenè' lu barco.

21

Sa'yéajè' Pablo Jerusalén

¹ Gudödi bulá'alentu' légaquiè', guyú'utè nōza barco na', ate' lirá guyéajtu' ga zoa luyú bidxi nazí'i le Cos. Dza buropi na', gudóditu' ia'tú lataj nazí'i le Rodas, ate' buzá'atu' ni', en bidxintu' yödzo Pátara. ² Yójxáca'tu' tu barco yúbölö ni' le zeaj luyú Fenicia. Gurentu' lè'e barco na', ate' guyú'utè nōza. ³ Gudóditu' ga nalá' Chipre, le guta' tsólá'a yögöla, ate' guyéajtu' luyú Siria, ga ni' guyaza barco na' lu yödzo Tiro, tu' ral-la' tsójcá'ana yua' ni' le dzö'ö lè'e barco na'. ⁴ Lu yödzo Tiro na' yójxáca'tu' tu bõnni' réajlè'è Cristo, ate' bugá'analentu' lè', en yugu' bóchi'ru' ni' idú gadxi dza. Tu' chibulú'inè' Dios Bõ' Lá'ayi légaquiè' le ral-la' gaca queè' Pablo, gulè' lè' bití' tsejè' Jerusalén. ⁵ Cate' chibizá'a dza na', burúajtu' ni', ate' gula'zá'lenè' netu' tsòzxón yúgu'tè' len nigula que queégaquiè', en yugu' bi'i quegaquiè', ga bidxintètu' ní'llo ra' yödzo ni'. Ra' nísado' ni' buzóa zxibitu', en bulidztu'-nè' Dios. ⁶ Budxi bunida' luzá'atu' tutu' ia'tutu', bubentu' lè'e barco, ate' légaquiè' yøjhuójgaquiè' lídxigaquiè'.

⁷ Buzá'atè barco na' lu yödzo Tiro, ate' ga yöjsè bidxín lu yödzo Tolemaida. Burúajtu' lè'e barco na' ni'. Bugápatu' Dios bóchi'ru' nacu'è ni', ate' bugá'analentu' légaquiè' tu dza. ⁸ Cate' za' rení' ia'tú dza, burúajè' Pablo ni', ate' dzágotu'-nè' netu' guyéajtu' yödzo Cesarea. Ní' guyú'utu' lu yu'u lidxè' Felipe, ate' bugá'analentu' lè'. Runè' Felipe na' libán que didza' dxi'a. Bitsè'è gadxè' bõnni' ni' bulu'cu'è dza ni'te para ilácalenè' bõnachi queè' Cristo. ⁹ Nacuá'abi' tapa bi'i nigula ra'bán queè' Felipe na', tu'íbi' didza' uláz queè' Dios. ¹⁰ Gudödi gudzetu' chopa tsonna dza ni', ní'irò bidxinè' Agabo ni', bõnni' ru'è didza' uláz queè' Dios, narúajè' luyú Judea. ¹¹ Bõnni' ni' buduyúè' netu', ate' gudèlè'è pan le néquini' guídí queè' Pablo. Béguè'è ni'a na' cuinè', en gunnè':

—Caní rnnè' Dios Bõ' Lá'ayi: "Caní ilunè' bõnni' judío nacu'è Jerusalén. Ilúguiè' bõnni' ni nequi queè' pan guídí ni, ate' ulu'dödè' lè' lu ná'agaca bõnachi izá'a."

¹² Cate' biyónitu' didza' ni, gúta'yutu' lahuè' Pablo, netu', en nupa nacuá' ni', para cabí tsejè' Jerusalén. ¹³ Bubi'è didza' Pablo, gunnè':

—¿Bixxi ni runli', ribòdxili', en rusuhu'ínili' neda'? Neda' chizóa caza' sina', calégasö ilúguiè' neda', pero gátia' ca' lu yödzo Jerusalén ni'a queè' Xanru' Jesús.

¹⁴ Tu' cabí guzxequi'tu'-nè' didza', bití'rò bi gúdxitu'-nè', ate' gunnatu':

—Gaca ca raza ladxè'è Xanru'.

¹⁵ Cate' chigula'dödi dza na', bupa'atu' queètu', ate' guyéajtu' Jerusalén. ¹⁶ Gula'zá'lenè' netu' bal-lè' bõnni' ta'yéajlè'è Cristo, nacu'è Cesarea, ate' dzáguie' Mnasón, tu bõnni' Chipre, légaquiè'. Réajlè'è Cristo dza ni'te, ate' ral-la' tsójgá'anatu' lidxè' bõnni' ni.

Pablo röjyúè' Jacobo

¹⁷ Cate' bidxintu' Jerusalén, len yöl-la' rudzeja quegaquiè' bóchi'ru' ni' ta'yéajlè'è Cristo gulunè' netu' bal. ¹⁸ Dza buropi na' Pablo guyázalenè' netu' lu yu'u, yøjyutu'-nè' Jacobo, ate' nudúbigaquiè' ni' yúgu'tè bõnni' gula tapa chi'è bõnachi queè' Cristo nacu'è Jerusalén. ¹⁹ Cate' Pablo chibugapé' légaquiè' Dios, busiyönnè' légaquiè' yúgu'tè le benè' Dios lu nè'è lè' ga nacuá' bõnachi izá'a. ²⁰ Cate' bila'yönnè' lè ni, gula'gu'è Dios yöl-la' ba. Ní'irò gulè' Pablo:

—Nöz quezinu', bóchi'tu', cate' xö zían gáyu'è bõnni' judío ta'yéajlè'è Cristo, ate' yúgu'tè' túndè'è bal xibá queè' Moisés. ²¹ Chibila'yönnè' yugu' le tu'í didza' bõnachi le ta'nnè quíu', ta'nná rigú'u yöl-lu'u yúgu'tè bõnni' judío nútsa'gaquiè' ladaj bõnachi izá'a, para ulu'cá'anè' le gunná bè'è Moisés, en rinná bé'enu' légaquiè' bití' ila'chúguiè' lu xpèla'gacabi' bi'i bõnni'do' quegaquiè', en bití' ilunè' bal yugu' le nalèbiru' runru' rè'u, bõnachi judío. ²² ¿Nacxi caz gunru' na'a? Ulu'rúaj bõnachi zían cate' ila'yöni chibidxínu' ni. ²³ Na'a, ben lè ni rètu' lí'. Nacuá'lenè' netu' ni tapè' bõnni', chinazí' lu ná'agaquiè' lahuè' Dios tu le ilunè'.

24 Guché'ë yugu' bönni' ni, en ben légaquié' tsözxön gun dxi'a cuinli' ca naca que yudo', en gudizxaj li' le ral-la' ila'guizxjé' para ilún yütusö ícjagaquié'. Ní'irö ila'nöziné' yúgu'té bönni' judío biti' nácaté' lè na' ta'nné' quiu', pero lësca' li' runu' le naca dxi'a, en runu' ca rinná bē' xibá queé' Moisés. 25 Ca naca queégaca bönachi izá'a, nupa ni' chita'yéajlè' Cristo, chibén xtídza'tu', en buzúajtu' lu guichi ca ral-la' iluné'. Biti' run bayudxi ilún chi'ë yugu' lè ni tuné' bönni' judío, pero tuz:

Biti' ilahué' le ta'gú'u bönachi lógaca budó' guiój budó' yaga.

Biti' ilahué' rön.

Biti' ilahué' xipéla'gacaba' böa' guixi' biti' narúaj-gácaba' rön.

Biti' iluné' le ruá' dó'.

Ta'zöné' Pablo lö'a yudo'

26 Ní'irö Pablo guché'ë queé' tapé' bönni' na', ate' dza buropi ni' ben dxi'a cuiné' tsözxön len légaquié' ca naca que yudo'. Ní'irö guyázié' lö'a yudo', para gaca bē' bizxi dza údxi iluné' le tu'ún dxi'a cúngaquié', dza ni' ral-la' tsójuá'agaquié' le ila'gu'ë lahué' Dios que queégaquié'. 27 Cate' chizóa izá'a gadxi dza na', bal-lé' judío narúajgaquié' luyú Asia bila'lé'ené' Pablo, zoé' lö'a yudo'. Guluné' ga gulún dzatsa bönachi zían, ate' gula'zöné' Pablo. 28 Gulu'ë zidzaj didza, ta'nné':

—¡Guli'gácalen netu', bönni' Israel! Bönni' ni rusédiné' yúgu'té bönachi yúgu'té lataj ulu'cá'ana cá'asó yödzo queéru', en xibá queé' Moisés, en yudo' queéru' ni. Na'a, chigulu'ë yugu' bönni' izá'a lu yudo' ni. Caní runé', run díttjané' lataj lá'ayi ni.

29 Caní gula'nné' tu' bila'lé'ené' Pablo zí'aló lu yödzo dzáguié' Trófimo, bönni' Éfeso, en téquiné' gulu'ë bönni' ni lu yudo'.

30 Caní guca, bulu'dubi yúgu'té bönachi yödzo, ate' bila'guiré' ni'. Ní'irö gula'zöné' Pablo, en gulá'ayóje' lè', bulu'béajé' lè' lö'a yudo', ate' la' bulu'sáyjaté' ga nu riyaza lö'a yudo' na'. 31 Cate' chitequi quezíné' ilútié' Pablo, bidxín didza' lahué' bönni' lo rinná bé'ené' bönni' rójáquié' gudil-la. Biyönné' tun dzatsa yúgu'té bönachi Jerusalén. 32 Bönni' lo ni la' butúbité' bönni' rójáquié' gudil-la, len bönni' ta'nná bé'ené' légaquié', ate' carelò guyéajlené' légaquié' ga na' tun dzatsa bönachi na'. Cate' bila'lé'ë bönachi ni' bönni' lo na' rinná bé'ené' bönni' rójáquié' gudil-la, en bönni' na' rójáquié' gudil-la, bulu'sané' ta'guiné' Pablo. 33 Ní'irö gubíguié' bönni' lo na', en guzxöné' Pablo, ate' gunná bé'ené' bönni' rójáquié' gudil-la ilúguié' lè' len chopá du guié. Gudödi ni' gunábiné' bönachi zían ni', rnné':

—¿Nuzxi caz bönni' ni, en bizxi bené'?

34 Ta'bödxi'a bönachi zían na', que queégaca ca ta'nná. Caní guca, biti' bi guca tséajni'iné' bönni' lo na', tu' tu'tsatsa bönachi na', ate' gunná bé'ené' bönni' rójáquié' gudil-la ila'ché'ë Pablo lu yu'u zxon ga nagá'anagaquié' bönni' na' rójáquié' gudil-la. 35 Cate' bila'dxiné' ga naca ni'yépi' que yu'u zxon na', bönni' na' rójáquié' gudil-la gulu'íné' Pablo, tu' dxiadi'igaca bönachi zían légaquié', 36 en zá'gaca cúdzu'lógaquié', ta'bödxi'a, ta'nná:

—Guli'gútié'.

Didza' bē'ë Pablo uláz queé' lógaca bönachi

37 Cate' ni' gula'sí lógaquié' ila'gu'ë Pablo lu yu'u zxon ni', lè' gudxé' bönni' lo na' rinná bé'ené' bönni' rójáquié' gudil-la, gunné':

—¿Naru' gunnu' neda' lataj guía' li' tu didza'?

Bönni' lo na' gudxé' Pablo:

—¿Rácatso' didza' griego? 38 ¿Naru' caléga li' bönni' Egipto na' dza lahui nisö butubé' yugu' bönni' gula'dá'bagué'ë yúlahui', ate' guché'ë idú choá' gáyú'ë bönni' huéti bönachi lu lataj cá'asó?

39 Ní'irö Pablo gudxé' lè', gunné':

—Le nácaté' naca' neda' bönni' judío. Gulja' Tarso, tu yödzo lo luyú Cilicia. Ráta'yua' lo' gunnu' neda' lataj gu'a didza' lógaca bönachi ni.

40 Bönni' lo na' bē'ë lè' lataj, ate' guzuíné' Pablo ga naca ni'yépi', en guchisa nē'ë para ila'cuá' dxisö bönachi zían ni'. Cate' chigula'cu'ë dxisö, Pablo bē'lené' légaquié' didza' lu didza' hebreo.

22

1 Caní gunné' Pablo:

—Libi'ili', bönni' gula, en libí'ili' bócha'a. Buli'zé' nágali' le guía' libí'ili' ca naca le runa'.

2 Cate' bila'yönné' ru'ë didza' hebreo, gula'cuá'aré' dxisö. Pablo gudxé' légaquié', rnné':

3 —Naca caza' neda' bönni' judío. Gulja' lu yödzo Tarso luyú Cilicia, pero guzxóna' lu yödzo ni, ate' busédiné' Gamaliel neda' idú ca naca xibá queégaquié' xuz xtó'oru'. Bē'tica'sö ládxa'a guyéaj ládxa'a Dios ca runli' libí'ili' na'a. 4 Zí'aló gudxia ládxi'gaca'-né' bönni' nazí' lu

ná'agaquié' xtídzë'ë Cristo, en guchë'gaca'-në' ga ilátië'. Guzxóngaca'-në', en gulú'ugaca'-në' lidxi guié, yugu' bönni', en nigula. ⁵ Lësca' huáca ilunë' ba nali yugu' bixúz unná bë', en yugu' bönni' gula tu'zéajni'inë' que le gulunë'. Gulunë' guichi unná bë' le yöju'a ga nacu'ë böchi'ru' judío lu yödzö Damasco. Guyija' ni' para tsójxóngaca' nupa ni' ta'yéajlé' Cristo, para idichë'gaca'-në' nága'gaquié' Jerusalén ni, para ilácagaquié' xígua'.

Rígujxjö'ë Pablo ca böáquié' queë' Cristo

⁶ Ní'irö gunné' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagubidza, tsárido'os guyépi yösa bení' le za' lúzxiba, le buzení' ga na' sa'yéaja'. ⁷ La' yöjóta'tea' lu yu, en biyönda' chí'i Nu gudxi neda': "Saulo, Saulo, ¿bizx que ribía ládXu'u neda'?" ⁸ Ní'irö gunábida' lë', gunná': "¿Nuzxi li, Xan?" Lë' gudxë' neda': "Neda' ni Jesús, bönni' Nazaret. Neda' caz ribía ládXu'u." ⁹ Nupa ni' gula'cuá'len neda' bila'lé'e caz bení' na', en guladxi, pero bití' bila'yöni chí'i Nu na' bulidza neda'. ¹⁰ Ní'irö gudxa'-në': "¿Nacxi guna, Xan?" Xanru' gudxë' neda': "Guyasa, en guyéaj Damasco. Zoë' ni' tu bönni' guié' li' ca naca yúgu'të le ral-la' gunu'." ¹¹ Tu' cabirö rilé'eda' tu' budí'i yösa bení' na' guyépidá' lahua', que lë ni na' yugu' bönni' dzágagaquié' neda' gula'guélë'ë na'a, ate' gula'chë'ë neda' ga bidxíntea' Damasco.

¹² Zoë' Ananías ni', tu bönni' runë' iduté' ca rinná bë' xibá queë' Dios, ate' yugu' bönni' judío nacu'ë Damasco tunë' lë' bal. ¹³ Bidxinë' Ananías na' ga zoa', en gudxë' neda': "Saulo, böcha'a, huóálaj guió'j lo'." La' ní'isö böálaj guió'j lahua', ate' bilé'eda' lë'. ¹⁴ Lë' gudxë' neda': "Dios quégaquié' xuz xtó'oru', dza ni'te gurö cazë' li' para inözinu' le rë'ëni quézinë' Lë', en ilé'enu'-në' Bönni' Tshui', Lë' cazë' Xzi'inë', en yönnu' le guié' Lë' cazë' li'. ¹⁵ Caní gaca, tu' ral-la' gunu' ba nali queë' Lë' lógaca yúgu'të bönnachi, usiyönnu' légaquié' ca naca le chibilé'enu', en le chibiyönnu'. ¹⁶ Na'a, ¿bizx que ridzenu'? ¡Guyasa, en bidila nisa! Bulidzë' Xanru' para únë' li' dxi'a, en ugié' dul-la' nabágu'u."

Cristo gusöl-lë'ë Pablo para gunë' libán lógaca bönnachi izá'a

¹⁷ Gunné' ca' Pablo:

—Gudödi ni', cate' budxina' Jerusalén, en tsanni ni' rulidza'-në' Dios lu chila yudo', bilé'eda' tu le naca ca tu lu yëla bëchigal. ¹⁸ Bilé'eda'-në' Xanru', ate' gudxë' neda': "¡Guyéaj carelo! ¡Burúajtë Jerusalén ni, tu' cabí ilunë' bal bönni' ni le gunu' ba nali quia'!" ¹⁹ Neda' gudxa'-në': "Xan, nözgaca quézinë' ca bena' neda'. Guyázia' gapa naca lu yu'u ga tu'dubë' tu'sédë' bönni' judío queë' Dios. Gudina' nupa ni' ta'yéajlé' Li', en gulú'ugaca'-në' lidxi guié. ²⁰ Cate' ni' gulútië' Esteban, bönni' ni' benë' ba nali quiu', lësca' zoa' neda' ni', en bena' tuz yugu' bönni' gulútië' lë' tu' ben chí'a lari' nácugaquié' bönni' na' bulu'laxdë' lë' guió'j." ²¹ Ní'irö Xanru' gudxë' neda': "Guyéaj, tu' risöl-la'a li' lógaca bönnachi izá'a."

Pablo ru'ilenë' bönni' lo didza', bönni' rinná bë'enë' bönni' röjáquié' gudil-la

²² Nisö ze lo yugu' bönni' judío bulu'zé nágagaquié' didza' bë'ë Pablo, ate' ní'irö gula'bödx'ië. Gulu'ë zidzaj didza', ta'nnë':

—¡Gulí'gútië' bönni' ni! ¡Bíti'rö ral-la' soë' ibanë'!

²³ Ní'irö tu' ta'bödx'ië, en ta'chözë' le nácugaquié' lu yöl-la' rilé' quégaquié', en tu'chejë' bëchtö yu lu bö'ös, ²⁴ bönni' lo na' rinná bë'enë' bönni' röjáquié' gudil-la gunná bë'ë ulu'gu'ë Pablo lu yu'u xzön na'. Lësca' gunná bë'enë' légaquié' ila'guinë' Pablo para quíxjö'ë le nácate, para ila'nözinë' bizx que na' ta'bödx'ië bönni' judío caní queë' Pablo. ²⁵ Cate' gulúguië'lë' du guidi para ila'guinë' lë', Pablo gudxë' tu bönni' nacu'ë lu në'ë bönni' röjáquié' gudil-la zoë' ni', rnnë':

—¿Naru' dë lataj quínili' neda'? Nababa' Roma, ate' cuntu nu buchi'a busörö neda' channö nabága'a xígua'.

²⁶ Cate' bönni' na' biyönnë' lë ni, guyijë' yöjtíxjö'i'inë' bönni' lo na' rinná bë'enë' bönni' röjáquié' gudil-la. Rë' lë':

—¿Bizxi caz ni runru'? ¡Bönni' ni nababë' Roma!

²⁷ Ní'irö bidë' bönni' lo na' ga zoë' Pablo, en gudxë' lë':

—¡Gudixjö'! ¿Naru' nababu' li' Roma?

Pablo gudxë' lë':

—Ön, nababa'.

²⁸ Bubi'ë didza' bönni' lo na', gunné':

—Neda' ni, dumí zían gudizxja' para ibaba' Roma.

Ní'irö Pablo gudxë' lë':

—Neda' gubaba' Roma cate' ni' gulja' tu' nabábagaquié' xuz xiná'a Roma.

²⁹ Cate' bönni' na' chízóa' ila'guinë' lë' bila'yönnë' lë ni, la' bulu'bíga'të' ga zoë' Pablo. Lësca' gúdxinë' bönni' lo na' cate' gunözinë' nababë' Pablo Roma, tu' chigunná bë'ë ilúguië' lë'.

Rídxinë' Pablo lógaquië' bönni' yudo' tu'chí'a tu'söröë'

³⁰ Dza buropi ni', gú'unnë' bönni' lo na' inözinë' gazxi ga rë' bizzi na' yugu' bönni' judío tu'zéguië' Pablo didza'. Gunná bë'ë bulu'sedxë' du guié na' náguë'ë Pablo, ate' gunná bë'ë ulu'dubë' bixúz unná bë' judío, en yúgu'të bönni' yudo' tu'chi'a tu'söröë'. Ní'irö bubéajë' Pablo ga na' nagú'ugaquië' lë', ate' buzóë' lë' lógaquië'.

23

¹ Ní'irö buyúde'ë Pablo lógaquië' bönni' yudo' tu'chi'a tu'söröë' na', en gunné':
—Libí'ili', böcha'a. Ga ridxintë na'a riböza' dxí'ado'. Caní naca, biti' zoa le ruxösa ládxi'da'ahua' neda' lahuë' Dios.

² Ní'irö Ananías, bixúz lo, gunná bé'enë' nupa nacua' cuita lë'ë Pablo ila'gápë'ë ru'ë.
³ Pablo gudxë' lë':

—Lëzca' caní Dios ubi'ë quiu', li', rulu'isó tsahui' cuinu'. ¿Naru' rö'ö cazu' ruchi'a rusöröu' neda' ca rinná bë' xibá, pero ridódi bë'tso' ca rinná bë' xibá na', na' rinná bé'enu' ila'gápë'ë neda'?

⁴ Nupa nacua' ni' të Pablo:

—¿Naru' rulidza zi'tso'-në' bixúz lo queë' Dios?

⁵ Pablo gudxë' légaquië':

—Libí'ili', böcha'a. Nazúaj lu guichi, rnna: “Biti' ulidza zi'u nu rinná be'e bönachi uládz quiu”, pero neda' biti' gúquibe'eda' náquië' bixúz lo.

⁶ Ní'irö gúquibe'enë' Pablo bal-lë' nácagaquië' bönni' yudo' saduceo, ate' ia'bal-lë' bönni' yudo' fariseo. Ní'irö bë'ë zidzaj didza' lógaquië' bönni' yudo' tu'chi'a tu'söröë' na', gunné':

—¿Libí'ili', böcha'a! ¿Naca' bönni' fariseo, en naca' zxi'inë' tu bönni' fariseo! ¿Na'a ruchi'a rusöröli' neda' tu' runa' löza ulu'bán nupa chinátigaca!

⁷ Cate' bë'ë Pablo didza' ni, bila'ruájë' choplö yugu' bönni' yudo' fariseo, en yugu' bönni' yudo' saduceo, ate' gula'dil-la dídzë'ë la' légacasë'. ⁸ Caní gulunë' tu' ta'nnë' bönni' saduceo na' biti' ulu'bán nupa chinátigaca, en biti' nacu'ë gubáz lá'ayi, en biti' nacua' bö' náca'gaca caz bönachi, pero ta'yéajlë'ë bönni' yudo' fariseo náca'gaca yúgu'të lë ni. ⁹ Que lë ni na' gula'bódxí'ë. Ní'irö gula'yasë' bönni' nazédagaquië' xibá queë' Dios, yugu' bönni' yudo' fariseo, en gula'dil-la dídzë'ë, ta'nnë':

—Rusáca'tu' queëtu' biti' bi dö' nu'ë bönni' ni. Channö tu bö' naca caz bönachi bë'len lë' didza', o channö tu gubáz lá'ayi queë' Dios bë'lenë' lë' didza', biti' ral-la' tá'baga'ru'-në' Dios.

¹⁰ Cate' chita'dil-lada' dídzë'ë bönni' judío na', gúdxinë' bönni' lo na' rinná bé'enë' bönni' rójáquië' gudil-la, tu' réquinë' ulu'zxuzxaj ulu'quinnajë' Pablo. Ní'irö gunná bé'enë' bönni' rójáquië' gudil-la tsójléajgaquië' Pablo ladaj bönni' judío na', en ulu'chë'ë lë' lu yu'u' zxön ga na' nagá'anagaquië' bönni' na' rójáquië' gudil-la.

¹¹ Cate' china' chi'i dzó'ölö la' dza ná'asó, bulu'i lahuë' Xanru' ga zoë' Pablo, en gudxë' lë':

—Butipa ládxi'u, Pablo. Ca na' chibenu' ba nalí quia' Jerusalén ni, lë'sca' run bayudxi gunu' ba nalí quia' lu yödzö Roma.

Tun xtídza'gaquië' ilútië' Pablo

¹² Cate' za' rení' ia'tú dza, gulún xtídza'gaquië' bal-lë' bönni' judío, en gulún tsutsu xtídza'gaquië', ta'nnë' gunë' Dios légaquië' xigua' channö cabí ilunë' lë na' gulún xtídza'gaquië', gula'nnë' biti' ca' ilë'aj ilahuë' ga idxinrö chigulútië' Pablo. ¹³ Nayanrö ca choá'gaquië' bönni' na' gulún tsutsu xtídza'gaquië' caní. ¹⁴ Yójáquië' bönni' ni ga nacu'ë yugu' bixúz unná bë', en bönni' gula tu'zéajni'inë' bönachi judío, ate' gula'nnë':

—Chiben tsutsu xtídza'tu', gunnatu' gunë' Dios netu' xigua' channö cabí guntu' caní. Biti' guí'aj gágutu' ga gútirötu'-në' Pablo. ¹⁵ Na'a, libí'ili', en bönni' yudo' tu'chi'a tu'söröë', guli'guié' bönni' lo rinná bé'enë' bönni' rójáquië' gudil-la idichë'ë Pablo cuxó para idxinë' ga nudúbili', innali' ré'ënilí' inábili'-në' Pablo tu didza' gate ga rë'. Netu' có'ö nistu'-në' la' nöza, ate' gútitu'-në' zí'aló ca idxinë' ni.

¹⁶ Biyónibi' bi'i bönni' queënu nigula zanë' Pablo ca na' ila'bó' nísie' Pablo, ate' guyéajbi', en guyú'ubi' yu'u' zxön na', ate' yójtixjoi'ibi'-në' Pablo. ¹⁷ Pablo bulídzë' tuë' bönni' nacu'ë lu në'ë bönni' rójáquië' gudil-la en gudxë' lë':

—Guchë'ë-bi' bi'i ni lahuë' bönni' lo, tu' nuá'abi' didza' guiëbi'-në'.

¹⁸ Ní'irö bönni' na' gudélé'ë-bi', en guchë'ë-bi' ga na' zoë' bönni' lo na', ate' gudxë' lë':

—Bulídzë' Pablo, bönni' na' yu'ë lidxi guié, neda', en gúta'yue' lahua' idigu'a-bi' bi'i ni lo', tu' ré'ëni'bi' guí'ilenbi' li' didza'.

¹⁹ Bönni' lo na' gudélé'ë ná'abi', en guchë'ë-bi' quez, ate' gunábinë'-bi', rnnë':

—¿Bizxi na' ral-la' guío' neda'?

²⁰ Lëbi' gúdxibi'-në':

—Chinúngaquié' didza' bönni' judío iláta'yue' lo' ichë'u-në' Pablo cuxó, para idxinë' lógaquié' bönni' yudo' tu'chi'a tu'söröë'. Ilë' li' t'ënnë' ila'nábinë' lë' tu didza' gate ga rë',²¹ pero bití' tséajlë'u le ila'nnë' tu' nadödi choá'gaquié' ila'bó' nísie' Pablo. Chigulún tsutsu xtúdzë'ë gula'nnë' gunë' Dios légaquié' xíguia' channó cabí ilútië' lë'. Bití' bi ilë'aj ilahuë' ga idxinró ilútië' lë'. Chizóagaquié' ta'bözë' si' lu no'o gunu' le ila'nábinë' li'.

²² Ní'irö bönni' lo na' rinná bé'enë' bönni' rójáquié' gudil-la gunná bé'enë'-bi' cuntú nu guíebi' lë na' chigúdixibi' lë', ate' ní'irö busól-lë'ë-bi' bi'i ni.

Ridxinë' Pablo lahuë' Félix, bönni' rinná bé'ë luyú na'

²³ Ní'irö bönni' lo na' bulidzë' chopë' bönni' nacué' tu gáyu'ë bönni' rójáquié' gudil-la lu ná'agaquié' tu tuë', ate' gunná bé'enë' légaquié' ulu'cözë' chopa gáyu'ë bönni' rójáquié' gudil-la ta'zë'e ná'agaquié', en tsónnalalay yu' chië' bönni' rójáquié' gudil-la dxíagaquié' böa', en chopa gáyu'ë bönni' rójáquié' gudil-la ilu'ë yaga tuchi' para tsójáquié' yödzo Cesarea idú ridödi xtsó.²⁴ Lësca' gunná bé'enë' légaquié' ulu'cözë'-ba' tu böa' cuie'-ba' Pablo, ate' ila'chë'ë lë' dxí'ado', cabí bi gaca queë', para idxinë' lahuë' Félix, bönni' lo rinná bé'ë uláz que Roma.

²⁵ Gusól-lë'ë ca' tu guichi le rnna caní:

²⁶ "Neda', Claudio Lissias, ruzúaja' quiu' lu guichi, bönni' lo unná bé', Félix. Rugapa' Dios li'.

²⁷ Bönni' ni risól-la'a-në' quiu', gula'zönë' bönni' judío lë', en gulë'ënnë' ilútië' lë'. Cate' gúquibe'eda' nababë' Roma, guchë'gaca-në' bönni' rójáquié' gudil-la, en busólá-në' lu ná'agaquié' judío na'.²⁸ Gú'unida' inözda' bizzi benë', lë na' tu'zéguié' lë' didza' bönni' judío, ate' guchë'a-në' rójáquié' bönni' yudo' tu'chi'a tu'söröë' légaquié'.²⁹ Cate' buéxdi didza', gunözda' tu'zéguié' lë' didza' ca naca le rinná bé' xibá quégaquié', en bití' bi nabáguë'ë bönni' ni para nu guti lë', o nu cu'u lë' lidxi guíë'.³⁰ Ní'irö cate' bidxín nu gudixjói' neda' ta'bó' nísie' yugu' bönni' judío lë', la' gusól-la'tea' lë' ga zu', ate' gunná bé'egacada-në' bönni' ni tu'zéguié' lë' didza' ila'dxinë' lo' li', para ila'guixjói'inë' li' bi didza' nápaagaquié' lë'.³¹ Dios gun tsáhuë'ë li'!"

³¹ Ní'irö bönni' na' rójáquié' gudil-la gula'guélé'ë Pablo, en gulunë' ca na' chigunná bé'enë' légaquié', ate' gula'chë'ë lë' yödzo Antípatris, ni' naca chi' dzö'ölö.³² Cate' za' rení' ia'tú dza bönni' rójáquié' gudil-la ta'zë'e ná'agaquié' yójhuójgaquié' Jerusalén, ate' bönni' rójáquié' gudil-la dxíagaquié' böa' bulu'ú'ë nōza, dzágagaquié' Pablo.³³ Cate' bönni' na' rójáquié' gudil-la nachë'gaquié' Pablo bila'dxinë' Cesarea, bulu'nödzië' guichi na' lu në'ë bönni' rinná bé'ë uláz que Roma, en bulu'sudxinë' Pablo lahuë'.³⁴ Gudödi bulabë' bönni' unná bé' guichi na', gunábinë' Pablo gazzi bönni' lë'. Cate' gúquibe'enë' nababë' luyú Cilicia,³⁵ gudxë' lë':

—Yónida' le innó' cate' ila'dxín ni nupa tu'zegui' li' didza'.

Ní'irö gunná bé'enë' ilún chi'ë lë' lu yu'u yúlahui' ga ribö'ë Herodes, bönni' rinná bé'ë, para uchi'a usöröë' bönachi.

24

Pablo ru'ë didza' uláz queë' lahuë' Félix

¹ Cate' chibizá'a gayu' dza, bidxinë' Ananías, bixúz lo, ni', ate' dzágagaquié' lë' bal-lë' bönni' gula tu'zëajni'inë', en Tértulo, tu bönni' nazë'ede'enë' didza'. Bila'dxinë' lahuë' bönni' unná bé', ate' gula'nnë' queë' Pablo.² Cate' chibulu'lidzë' Pablo, ate' bidxinë' ni', gusí lahuë' Tértulo ruzégui'ë lë' didza', rnnë':

—Bönni' lo unná bé', Félix. Ní'a quiu' li' ruzi'tu' xibé le run tsahui' netu', ate' lu yól-la' réajni'i quiu' rinná bé'enu' dxí'a bönachi uládz queëtu'.³ Yúgu'të lë ni ruzí'tica'stu' xibé gátí'tës, ate' idú ládxi'tu' rétu' li': "Xclenu'." ⁴ Na'a, para cabí upíxjarötu' li', ráta'yua' lo' gun xzón ládxi'u, yönnu' tu le dö' guíétu' li'.⁵ Gúquibe'etu' bönni' ni rigú'u yól-lë'ë bönachi, en runë' ga ta'dá'baguë'ë yúlahui' yugu' bönni' judío nacué' idútë' yödžolió, en náquié' bönni' lo quégaquié' bönni' dá'gaquié' bönni' Nazaret na'.⁶ Lësca' gú'unnë' gun dí'tjanë' yudo' queëtu'. Que lë ni na' guzxöntu'-në', en gú'unitu' uchi'a usörötu' lë' ca naca xibá queëtu'.⁷ Ní'irö Lissias, bönni' lo rinná bé'enë' bönni' rójáquié' gudil-la bidxinë' ga zóatu', en lu yól-la' sinia' xzón bugüë' bönni' ni lu na'tu'.⁸ Ní'irö gunná bé'enë' Lissias na' idigaca nupa tu'zegui' lë' didza' lo' li'. Na'a, li' caz, cate' rinabi yúdxinu'-në' Pablo ni, huáca inözínu' gate ga rë' yúgu'të lë ni ruzéguitu' lë' didza'.

⁹ Lësca' caní gula'nnë' yugu' bönni' judío ni', gula'nnë' naca caz caní.¹⁰ Ní'irö butásö në'ë bönni' rinná bé'ë uláz que Roma na' para gu'ë didza' Pablo, ate' lë' bubí'ë didza', gunné':

—Idú ládxa'a quixjó'a ca naca le runa', tu' chinaca zían iz ruchi'a rusöröu' le raca quégaca bönachi ladztu'.¹¹ Le bena' huáca inabu'. Bití' réquini chinnu dza bidxina' Jerusalén para tseaj ládxa'a-në' Dios.¹² Bití' yójxáca'gaquié' neda' nu ridil-lalena' didza', en bití' bena' ga ulu'tsatsa bönachi ga naca chila yudo', en cabí lu yu'u ga tu'dubë' tu'sedë' queë' Dios, en cabí lu yödzo.¹³ Bití' ca' gaca ulu'béaj lië' yugu' lë ni tu'zéguié' neda' didza'.¹⁴ Lë ni rixóalëpa' lo'. Ca runa' xichinë' Dios quégaquié' xuz xtó'otu' nalëbi ca le tu'sedinë' légaquié', pero bönni' judío ni tu'ë le: Le ridá'bagá' Dios, tu' réajlë'a yúgu'të le rinná bé' xibá queë' Dios,

enca' yúgu'tè le bulu'zúajè' bõnni' gulu'è didza' uláz queè' Dios. ¹⁵ Ca na' légaquiè' tunè' lõza Dios, lësca' neda' runa' lõza Dios, usubanè' nupa chinátigaca, bõnachi tsahui', en bõnachi biti' nácacaga tsahui'. ¹⁶ Que lè ni na' ruí'í ládxi'tica'sa' cabí íbága'a le gun ga uxõs ládxi'da'ahua' neda' lahuè' Dios o lógaca bõnachi.

¹⁷ Gudõdí zoa' ga yúbölö idú chopa tsonna iz, budxina' ga nacua' bõnachi uláz quia' para unõdja' dumí le gácalen bõnachi yechí', en unõdzja' le rígu'a lahuè' Dios. ¹⁸ Tsanni ni' runa' caní, bal-lè' bõnni' judío narúajgaquiè' luyú Asia bidixáca'gaquiè' neda'. Ni' zoa' ló'a yudo', nubéaj dxi'a cuina' ca naca que yudo', en cabí nutuba' bõnachi zían, en cabí nuna' ga ulu'tsatsa bõnachi. ¹⁹ Yugu' bõnni' judío ni' ral-la' ila'dxinè' lo' li', en ulu'zéguiè' neda' didza' channõ nápaagaquiè' neda' didza'. ²⁰ Ila'nnátsõquiè' bõnni' judío ni channõ bulu'dzõlinè' bi le cabí naca dxi'a bena' cate' ni' bidxina' lógagaquiè' bõnni' yudo' tu' chi' a tu' sörörè' légaquiè'. ²¹ Tuz cate' ni' zoa' lógagaquiè', bè'a zidzaj didza', gunniá': "Ruchi'a rusörõli' neda' na' a tu' runa' lõza ulu'bán nupa chinátigaca."

²² Cate' biyõnnè' Félix didza' ni, en dxi'ado' chinõzinè' ca naca que lè na' rusédiné' Pablo, buzè' lahuí'sè' ca' didza' bizxaj ni, gunnè':

—Cati' idxinè' Lisias, bõnni' lo rinná bé'enè' bõnni' rójajquiè' gudil-la, údxi yõnida' ca naca didza' bizxaj queéli'.

²³ Ní'irõ Félix gunná bé'enè' tu bõnni' nacua' lu në'è bõnni' rójajquiè' gudil-la zoè' ni', gun chi'è Pablo, pero gu'è lè' lataj tè' ló'a, en biti' uzáguè'è xinõzgaquiè' bõchi' luzè'è duyúgaquiè' lè' bi dxin ilunè' queè'.

²⁴ Chopa tsonna dza gudzé, bidè' leyúbölö Félix na'. Drusila, nigula queè' dzáganu lè'. Nácanu nigula judío. Félix bulidzè' Pablo, ate' buzè' náguiè' xtídzè'è ca naca le réajlè'èru' Jesucristo. ²⁵ Cate' bè'è didza' Pablo ca ral-la' gácaru' tsahui', en inná be'e cuinru', ate' idxinru' ga uchi' a usörörè' Dios rè'u dza si' za', ní'irõ gudxi bidzõbinè' Félix, en gudxè' Pablo: —Guyéaj na'a. Cate' gapa' lataj ulidza' li'.

²⁶ Lësca' gú'unnè' Félix si'è dumí le unõdzjè' Pablo lè' para usanè' lè', ate' que lè ni na', zían luzui' bulidzè' Pablo, en bè'lenè' lè' didza'. ²⁷ Cate' bizá'a chopa iz guyázíè' Porcio Festo xilatjè' Félix, ate' tu' gú'unnè' Félix gunè' le tsaza ládxi'gaquiè' bõnni' judío, bucá'anè' Pablo nadzunè' lidxi guíè.

25

Ridxinè' Pablo lahuè' Festo, bõnni' unná bè'

¹ Bidxinè' Festo yõdzõ Cesarea para tsáziè' xilatjè', gáquiè' bõnni' unná bè' ulaz que Roma. Cate' bizá'a tsonna dza buzè'è yõdzõ na', sa'yéajè' Jerusalén. ² Cate' bidxinè' Festo ni' yugu' bixúz unná bè', en yugu' bõnni' lo quégaca bõnachi judío bila'dxinè' lahuè' para ila'nnè' queè' Pablo, ate' guláa'yuè' lahuè' Festo ³ bi uzá' ládxi'è quégagaquiè', isól-lè'è nupa tsõjxí'gaca Pablo, para udxinè' Jerusalén. Gul'ènnè' ila'bõ' nísíè' lè' la' nõza para ilútiè' lè'. ⁴ Bubi'è didza' Festo, gudxè' légaquiè':

—Lu yõdzõ Cesarea nadzunè' Pablo, ate' ral-la' tseja' ni' cuxó huidzaj nisó. ⁵ Que lè ni na', nútí'tèslõli' dè lu ná'ali', ral-la' sá'lenli' neda', en channõ nabáguè'è bõnni' ni' xíguia', huáca uzéguili'-nè' didza' ni'.

⁶ Gudzenè' Festo Jerusalén idú ca xunu' gubidza, ate' ní'irõ bõajè' Cesarea. Cate' guzá' rení' ia'tú dza gurõ'è ga ruchi'a rusörörè', en gunná bé'enè' nupa tsõjxí'gaca Pablo. ⁷ Cate' chibidxinè' Pablo ni', yugu' bõnni' judío narúajgaquiè' Jerusalén gula'gu'è lè' lè'aló, en zían le gula'nnè' queè'. Bulu'zéguiè' lè' le tu'subáguè'è lè' xíguia', pero biti' guca ulu'béaj liè' yugu' lè na' gula'nnè' queè'. ⁸ Ní'irõ bè'è didza' Pablo uláz queè', gunnè':

—Biti' bi le ruá' dõ' bena' que xibá quégagaquiè' bõnni' judío, en cabí que yudo' quégagaquiè', en cabí queè' César, bõnni' Roma, rinná bé'enè' rè'u.

⁹ Gú'unnè' Festo gunè' le ila'yaza ládxi'gaquiè' bõnni' judío, ate' bubi'è didza', gudxè' Pablo:

—¿Rè'ènu' so'o Jerusalén, ga na' soa nu uchi' a usörõ li' ca nácacaga lè ni ta'nnè' quiu'?

¹⁰ Bubi'è didza' Pablo, gudxè' lè':

—Zoa caza' ga rø'õ nu ruchi'a rusörõ uláz queè' César, ga na' ral-la' uchi' a usörõu' neda'. Biti' bi huiá' dõ' nuna' quégagaquiè' bõnni' judío, ate' chinõz quézinu' lè ni. ¹¹ La'tu' nuna' tu le ruá' dõ', o bítí'tès le run ga íbága'a xíguia' gátia', biti' tá'baga' a gátia'. Na'a, channõ cabí nuna' ca ta'nnè' quia' bõnni' ni, cunttu caz nu dè lu në'è udõdi neda' lu ná'agaquiè'. Rinaba' tseja' lahuè' César ga udxí' a uró quia'.

¹² Cate' Festo chibè'lenè' yugu' bõnni' yúlahui' didza', bubi'è didza', gudxè' Pablo:

—Chigunábu' tseju' lahuè' César. Lahuè' César uyiju'.

Ru'è didza' Pablo lahuè' Agripa, bõnni' unná bè'

¹³ Gudödi chopa tsonna dza, bidxinë' Agripa, bönni' rinná bè'è lu yödzo Cesarea, dzáganu Berenice lë', duyúgaquië' Festo. ¹⁴ Cate' chigula'cu'ë ni' zían dza, Festo bulu'ínë' Agripa, bönni' rinná bè'è, ca naca queë' Pablo. Gudxë' lë':

—Zoë' tu bönni' ni buca'anë' Félix lë' lidxi guië'. ¹⁵ Cate' guzóa' Jerusalén, yugu' bixúz unná bè', en bönni' gula tu zéajni'inë', bila dxinë' lahua', ate' gula nnë' queë' bönni' ni. Gula'nábinë' neda' ichuga' queë' gátië'. ¹⁶ Neda' bubi'a didza', gudxa' légaquië' biti' nalébiguequinë' bönni' Roma ila'chúguië' queë' tu bönni' gátië' channö cabí ila'dxini lahuë' nupa tu zegui lë' didza', para gaca ubi'è didza' ca naca lë' na' ta'nnë' queë'. ¹⁷ Que lë' ni na', cate' bila'dxinë' légaquië' ni, biti' ca' gudzedá', pero cate' guzá' guyeani' ia'tú dza guró'a ga ruchi'a rusöró'a, ate' gunná bé'eda' nupa yóixí'gaca bönni' ni. ¹⁸ Cate' gula'cu'ë ni bönni' na' tu'zéguië' lë' didza', biti' bi'gula'nnë' queë' ca busaca' quia' ila'nnë'. ¹⁹ Gula'nnë' queë' bal-la didza' bizxaj ca naca le ta'yéajlë'è Dios, en ca naca queë' tu bönni' lë' Jesús, nu na' guti, pero Pablo runë' tsutsu xtídzë'è rnnë' ni zoë' nabanë' leyúbölö. ²⁰ Tu' buchixida' ca nácgaca lë' ni, gunábida'në' Pablo channö ré'ënë' tsejé' Jerusalén, ga ni' soa nu uchi'a usörö lë' ca nácgaca lë' ni. ²¹ Ní'irö cate' gunabë' Pablo tsejé' lahuë' Augusto César para uchi'a usörö'è lë' ni', gunná bé'eda' bönni' röjáquië' gudil-la ilún chí'igarë' lë' cate' gála'rö dza isöl-la'a-në' lahuë' César.

²² Ní'irö Agripa gudxë' Festo na':

—Lëzca' neda' ré'ënda' yónida' le innë' bönni' na'.

Festo gudxë' lë':

—Cuxó yönnu' le innë'.

²³ Cate' za' reni' ia'tú dza, len ba zxon bila'dxinë' Agripa, en Berenice ni'. Gula'yázië' ga ral-la' ilu'è didza', dzágagaquië' légaquië' bönni' unná bè', ate' gula'sól-lë'è nupa tsóixí'gaca Pablo. ²⁴ Ní'irö Festo gudxë' Agripa, bönni' unná bè':

—Bönni' unná bè', Agripa, en yúgu'téli' zóali' ni tsözxon len netu'. Ni zoë' rilé'eli'-në' bönni' na', ta'nnë' queë' yúgu'të bönni' judío nacu'è Jerusalén, enca' nupa nacua' ni, tē' neda' ral-la' gátië'. ²⁵ Runi neda' biti' bi'benë' le nabáguë'è xíguia' gátië', pero tu' gunabë' lë' cazé' tsejé' ga uchi'a usörö'è Augusto César lë', que lë' ni na' chinuna' quia' isöl-la'a-në' lahuë' Augusto. ²⁶ Tu' cabí nózda' bi'ral-la' uzúaja' lu guichi le uzegui bönni' ni didza' para isöl-la'a lu nē'è César, xana', que lë' ni na' nachë'a-në' loli', en le nácarö lo, nachë'a-në' lo' li', Agripa, bönni' unná bè', para cate' údxi rinábini yudxu'-në', ní'irö inózda' bi'ral-la' uzúaja' lu guichi ca naca queë' bönni' ni. ²⁷ Réquida' biti' naca dxi'a isöl-la'a-në' nu bönni' náguë'è ni' channö cabí gaca ulu'a le nabáguë'è.

26

Didza' bè'è Pablo uláz queë' lahuë' Agripa, bönni' unná bè'

¹ Ní'irö Agripa gudxë' Pablo:

—Dë' lataj gu'u didza' uláz quiu'.

Buchila nē'è Pablo lahuë' Agripa, ate' gusí lahuë' ru'è didza', rnnë':

² —Bönni' unná bè', Agripa. Raza ládxa'a tu' dë' lataj na'a gu'a didza' uláz quia' lo' li' ca naca yúgu'të le tu'zéguië' bönni' judío neda' didza'. ³ Raza ládxi'ra' tu' núnbë'u yúgu'të le nalébiguequinë' tunë' bönni' judío, enca' yugu' lë' ni ridil-latu' didza'.

Yugu' le benë' Pablo z'atëlö

⁴ Gunnë' ca' Pablo:

—Nözguequi quézinë' yúgu'të bönni' judío ca na' bena' ga gudéla'të cuídia' ga nacua' bönachi uládz quia', enca' lu yödzo Jerusalén. ⁵ Nözguequi quézinë' ca', en huáca ila'guíxjö'è ca na' bena' dza ni'te. Guca' bönni' fariseo. Yugu' bönni' fariseo tu'i ládxi'gacaré' ila'yéaj ládxi'gaquië' Dios ca tunë' ia'zica'rë' bönni' judío. ⁶ Na'a, zoa' ni loli' para nu uchi'a usörö neda' tu' runa' löza Dios, usubanë' bönni' nati, en gunë' ca na' guzxi' lu nē'è légaquië' xuz xtó'otu'. ⁷ Tunë' löza yugu' bönni' idxinnu cö' di'a dza queëtu' ila'déli'në' lë' na' guzxi' lu nē'è Dios. Que lë' ni na' ta'yéaj ládxi'gaquië' Dios, en tunë' xichinë' rëla, en tē' dza. Tu' runa' löza lë' ni, nuzéguigaquië' bönni' judío neda'. Caní naca, bönni' unná bè', Agripa. ⁸ Na'a, çnaru' réquitseli' libí'ili' biti' naca le tséajlë'ëru', usubanë' Dios bönni' nati?

Pablo gudxía ládxe'è bönachi queë' Cristo

⁹ Gunnë' ca' Pablo:

—Lëzca' neda', z'atëlö gúquida' le zían ral-la' guna', tá'baga'a-në' Jesús, bönni' Nazaret. ¹⁰ Caní bena' lu yödzo Jerusalén. Gulu'a zían bönachi ta'yéajlë' Jesús lidxi guië', tu' bulu'dödë' yugu' bixúz unná bè' lu na'a yöl-la' unná bè'. Cate' gulútië' bönachi ni', bënlena' légaquië' tuz didza'. ¹¹ Zían luzuí busaca' z'ia' yugu' bönni' ni' para ulu'sán ládxi'gaquië' ca ta'yéajlë'è Cristo. Caní bena' gapa naca lu yu'u ga tu'dubë' bönni' judío, en tu'sédë' queë' Dios. Guléde'eda' légaquië', ate' gudxía ládxa'a légaquië' ga bidxintë' guyija' gapa nacua' yödzo z'itu' para tsóixöngaca'-në'.

Rigúxjö'ë Pablo ca böáquië' queë' Cristo

¹² Gunnë' ca' Pablo:

—Para guna' caní guyija' yödzö Damasco, ate' bixúz unná bë' nasöl-la'gaquië' neda' nudödigaquië' lu na'a yöl-la' unná bë'. ¹³ Caní guca, bönni' unná bë', Agripa. Cate' ni' sa'yija' la' nöza, ni' naca idú huagubidza, bilé'eda' tu bení' lúxiba le buzení'ró ca gubidza. Buzení' ga na' zoa', en ga nacua' nupa sôjácalen neda'. ¹⁴ Ní'irö yúgu'tëtu' gudzó'ötu' lu yu, ate' biyönda' chi'i nu bulidza neda'. Bë'ë didza' hebreo, gunné': "Saulo, Saulo, ¿bixz que ribía ládXu'u neda'? Run zi' cuinu', ridá'bagu'u neda'. Raca quiu' ca raca queëba' bëdxi, run zi' cuimba', richégu'ba' yaga tuchi' le tündë'ë-ba' zi'." ¹⁵ Ní'irö gudxa'-në': "¿Nuzxi li', Xan?" Xanru' gudxë' neda': "Neda' ni' Jesú, Nu na' ribía ládXu'u. ¹⁶ Na'a, guyasa, en guzuí, tu' buluí' lahua' li' na'a, para uzó'a' li' gunu' xichina', en gunu' ba nali' que lë ni chibilé'enu', enca' quégaca le uluí'ida' li', uluí' lahua' ga zu'. ¹⁷ Usólá' li' lu ná'agaquië' bönni' uládz quiu', en lu ná'agaquië' bönni' izá'a, lógaca nupa ni' risöl-la' a li' na'a. ¹⁸ Risöl-la' a li' ga na' nacu'ë para gunu' ga ulu'huóáaj guíöj lógaquië', en ulu'huóáaj quéë' Dios, en ulu'cá'anë' le naca chul-la' que dul-la', en ila'dxinë' lu bení'. Ulu'rúajë' lu na' Satanás tu' xihui', en ila'yazië' lu në'ë Dios. Channö' ila'yéajlë'ë neda', Dios uniti lahuë' légaquië', en ugüë' dul-la' nabága'gaquië', ate' ila'déli'në' ila'bábalenë' bönnachi chinubéajë' Dios quez queë'."

Benë' Pablo ca naca le buluí'inë' Xanru' lë'

¹⁹ Gunnë' ca' Pablo:

—Qui lë ni na', bönni' unná bë', Agripa, bití' gudá'baga'a guna' le buluí'inë' Dios, zoë' yehua' yubá, neda'. ²⁰ Buzéajni'ida' nupa nacua' yödzö Damasco, en gudödi ni' nupa nacua' Jerusalén, en nupa nacua' luyú Judea, en bönnachi yugu' yödzö zi'tu' para ulu'bf'i ládxi'gaca, en ulu'huóáca queë' Dios, en ilún le ilaca bë' chibulu'bf'i ládxi'gaca. ²¹ Tu' bena' caní, yugu' bönni' judío gula'zönë' neda' cate' ni' zoa' lö'a yudo', en gulë'ënnë' ilútië' neda'. ²² Ní'irö gúcalenë' Dios neda', ate' ga ridxintë' na'a dza zoa' idú ládxa'a, runa' ba nali' lógaquië' bönni' cá'asö, en lógaquië' bönni' lo. Bití' ruá'a didza' yúbölö, pero ca gula'nnašë' zí'alö bönni' gulu'ë didza' uláz queë' Dios, enca' ca gunné' Moisés ca ral-la' gaca. ²³ Gula'nnë': "Qui' sáquë'ë Cristo, en tödi gátië', gáquië' nu isí lo ubán tsaz lu yöl-la' guti, para ulu'ë lahui naca löza ila'dxin bönnachi lataj bení', en gaca libán que lë ni lógaca bönnachi uládz queëtu', enca' lógaca bönnachi izá'a."

Pablo ruzéajni'inë' Agripa para tséajlë'ë Cristo

²⁴ Cate' chibë'ë Pablo yugu' didza' ni, le bë'ë uláz queë', ní'irö bë'ë zidzaj didza' Festo, gunné':

—¡Nachixi icju', Pablo! ¡Tu' nazédadö'ö, chiguchixi icju'!

²⁵ Ní'irö Pablo gudxë' lë':

—Bití' nachixi icja', rea' li', Festo, ate' didza' ni ruá'a naca idútë li, en naca lesaca'. ²⁶ Lë cazë' Agripa, bönni' ni rinná bë'ë, nözinë' yugu' lë ni, en que lë ni na', idú ládxa'a ruá'a didza' lahuë' lë'. Nözinë' yugu' lë ni, tu' cabí guca bagáchi'sö lë na' guca. ²⁷ Bönni' unná bë', Agripa. ¿Naru' réajlë'u le gula'nnë' bönni' gulu'ë didza' uláz queë' Dios? Nözda' réajlë'u lë ni.

²⁸ Ní'irö Agripa gudxë' Pablo:

—Ia'láti'sö la' réquinu' idéli'nu' neda' para gaca' queë' Cristo.

²⁹ Pablo gudxë' lë':

—Ni'a queë' Xanru' Dios rë'ënda', sal-la' ia'láti'sö o yenni', calégasö li', pero lësca' yúgu'të nupa ni ta'yöni neda', gácali' idú ca naca' neda', néquida' queë' Cristo, pero caléga gága'li' du guié ca ni nága'a neda'.

³⁰ Cate' budxi bë'ë Pablo didza' ni, guzuínë' bönni' lo unná bë' na', ate' gulazuínë' ca' bönni' rinná bë'ë, en Berenice, en nupa rölengaca légaquië'. ³¹ Cate' bila'rúajë' quez, gulu'fi xtídza'gaquië', ta'nnë':

—Bití' bi nunë' bönni' ni le nabáguë'ë xíguia' gátië', en caléga tsázië' lidxi guié.

³² Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchi'a usöröë' lë'.

27

Ta'söl-lë'ë Pablo yödzö Roma

¹ Cate' chigulunë' quégaquië' ila'söl-lë'ë netu' lë'ë barco para tséajtu' yödzö Roma, luyú Italia, gula'guelë'ë Pablo, en ia'bal-lë' nupa nadzúngaca, ate' bulu'dödë' légaquië' lu në'ë Julio, tu bönni' rinná bë'enë' tu cö' bönni' rójáquië' gudil-la nazí'ile: Bönni' Queë' Augusto Rójáquië' Gudil-la. ² Gurentu' tu lë'ë barco que luyú Adramitio, le ral-la' tödi yugu' yödzö gapa ta'dxin barco ga naca luyú Asia, ate' yú'usötu' ca' lë'ë barco na', buzá'atu' yödzö Cesarea. Aristarco, tu bönni' yödz Tesalónica, le nababa luyú Macedonia dzáquië' netu'. ³ Cate' za' rení' ia'tú dza, bidxintu' yödzö Sidón, ate' ni' Julio, bönni' na' rinná bë'enë' bönni' rójáquië' gudil-la, lu yöl-la'

dxi'i ladx'i queé', bé'ë Pablo lataj tsej' ga nacu'ë böchi' luzé'ë para ilácalenë' lë' bi riyadzaj queé'. ⁴ Gudödi ni', bubentu' lë'e barco, ate' buzá'atu' ni'. Gudöditu' tsölä'a ga dë luyú bidxi Chipre ga rö'ö dxi bö' na' recja, tu' za' saca' lotu' bö' recja lu nísado' na'. ⁵ Ní'irö gudöditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yödzo nababa luyú Licia.

⁶ Bönni' na' rinná bé'enë' bönni' rójáquië' gudil-la, en naché'ë netu', yójáquië' tu barco ni' narúaj yödzo Alejandría que luyú Egipto, barco na' zeaj luyú Italia ga rö' yödzo Roma. Gulu'ë netu' lë'e barco na'. ⁷ Guzá' barco na' tsahui' ládx'i do' zían dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudöditu' tsölä'a luyú bidxi nazí'i le Creta ga rö'ö dxi bö' na' recja, en bidxintu' ga nalá' yödzo Salmón luyú Creta na'. ⁸ Lu yöl-la' rizáca'sö gudöditu' tsölä'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na' dë yödzo Lasea.

⁹ Tu' chigudzéda'atu', chigula' zoa bönadxi gaca ditaj bití'tës barco rizá' lu nísado' na', tu' chigudödi yugu' dza tunë' gubasa cate' si' idxín beo' ziaga cate' récjada' bö'. Que lë ni na' Pablo buzéajini'inë' légaquië', ¹⁰ rnnë':

—Libi'ili', bönni', réquibe'eda' ga tseaj barco ni, huazóa bönadxi gaca ditaj barco ni, en yua' dzö'ö lë'e, en lësca' soa bönadxi queéru' gátiru'.

¹¹ Bönni' na', rinná bé'enë' bönni' rójáquië' gudil-la, guyéajlë'erë' le gula'nnë' bönni' na' dë lu në'ë barco, en bönni' xan caz, ca le gunné' Pablo. ¹² Tu' cabí naca dxi'a lataj ni' ga ta'dxín barco, nazí'i le Buenos Puertos, para ulu'gá'anë' ni' yugu' beo' ziaga, que lë ni na' la'tu'biqui' yúgu'të bönni' nacu'ë lë'e barco na' gulún tuz xtídza'gaquië' ulu'z'é'ë ni', channö huáca ila'dxinë' ga ta'dxín barco lu yödzo Fenice, lësca' dë luyú bidxi na' nazí'i le Creta, le dë tsölä'a ga ribía gubidza, ate' gulé'ënnë' ulu'gá'anë' ni' yugu' beo' ziaga.

Recja bö' budunu' lu nísado'

¹³ Tu' recja tu bö'do' le za' saca' tsölä'a ga ridödi gubidza beo' ziaga, téquinë' chiraca ilunë' ca t'é'ënnë', ate' bulu'lisë' guié zi'i naga' du guié le ruzóa dxisö barco, ate' gudödi barco na' gala' ra' luyú bidxi na' nazí'i le Creta. ¹⁴ Ia'tu' chí'isö ca', guyecja tu bö' budunu' za' lotu', nazí'i le Euroclidón. ¹⁵ Tu' ruzéaj bö' na' recja barco na' tsölä'aló, ate' tu' cabí guca tseaj barco ga za' bö', ní'irö bé'ëtu' lataj bö' na' buzéaj barco na' ga ré'ëni. ¹⁶ Cate' gudödi barco na' ga bidxintu' tsölä'a tu luyú bidxido' nazí'i le Cauda, tsölä'a ni' ga bití' récjada' bö', lu yöl-la' rizáca'sö buchísatu' bárcodo' ná'yöjbarco zxon' na' yú'utu'. ¹⁷ Gudödi burentu' le lahui barco zxon' na', ní'irö béga'ratu' barco zxon' na'. Zxante barco na' buchólitu' du, para cabí ilá'a lu le ridxía nisa na'. Tu' gúdxitu' tódi barco na', en inídx'i lu yuzxi lu nísado' na', buzötjatu' lari' que, le rutubi bö' rusá' barco na'. Canisö bé'ëtu' lataj bö' na' recja buzéaj barco. ¹⁸ Cate' za' rení' ia'tú dza, en ni' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lë'e barco na'. ¹⁹ Dza bunny, len na' cuintu' gurú'unatu' le tun dxin que barco na' lu nísado'. ²⁰ Cate' chiguca zían dza bití' rilé'etu' gubidza, en nitú bôlaj, en tu' récjada' bö' na' ruzéaj barco na' yú'utu', bití'rö runtu' löza ulatu'.

²¹ Tu' chiguca zían dza bití' nágutü', guzunië' Pablo gatsaj láhui'lö légaquië', en gudxë' légaquië':

—Libi'ili', bönni', dxí'arö guca la'tu' uzé nágali' neda', en cabí uzá'aru' luyú Creta, en cabí udutságaru' lë ni riguí'i rizáca'ru', en yugu' lë ni raca ditaj que barco ni. ²² Na'a, rea' libí'ili': Tsutsu guli'gún ládx'i'li', tu' cabí gátíli' nituli' libí'ili' tscali' zóali' ni, sal-la' gaca ditaj barco ni. ²³ Caní gaca tu' budulu'í lahuë' neda' gudiyéla tu gubáz lá'ayi queé' Dios. Dios ni néquida' queé', en runa' xichinë'. ²⁴ Gubáz lá'ayi na' gudxë' neda', gunné': "Pablo, bití' gádxinu'. Run bayudxi idxinu' lahuë' César. Tu' nadxí'inë' Dios lí', usólé' yúgu'të bönachi nacua'len lí' lë'e barco ni." ²⁵ Que lë ni na', tsutsu guli'gún ládx'i'li', tu' ruzxoní ládxa'a-në' Dios, gaca ca na' chigudxë' gubáz lá'ayi queé' neda'. ²⁶ Caní gaca sal-la' run bayudxi gaca ditaj barco ni tu luyú bídxido', ga ni' tsójcá'ana rë'u.

²⁷ Cate' ni' chigudödi chidá' dza, ate' bö' na' recja ruzéaj barco na' lu nísado' nazí'i le Adriático, idú ladx'i' yéla guléquinë' bönni' tunë' dxin lu barco na' chízóa idxín barco gala' tu luyú bidxi. ²⁸ Gula'rú'unë' du lu nísado' na', ate' gula'nózinë' galaj ösa naca ga bidxintë ga ré' lu nisa. Cate' gudödi barco na' ia'láti'do', gula'rú'unë' du na' leyúbölo, en gula'nózinë' chinaca chinu ösa. ²⁹ Tu' guládxinë' tsójdm barco na' lu guioj, que lë ni na', tsölä'a láhuiö que barco gula'rú'unë' lu nísado' tapa guié zi'i nága'gaca du guié le tu'zóa dxisö barco lu nisa. Lu yöl-la' ruúbi ruguf'isö ládx'i'do'gaquië' gula'bözë' tsení'. ³⁰ Ní'irö gulé'ënnë' bönni' tunë' dxin lu barco ulu'zxúnajë' lë'e barco na'. Bulu'zötjé' bárcodo' na' dë lahui barco zxon' na' lu nísado'. Gulunë' ca t'é'ënnë' ilu'ë ia'láti' zítu' guié zi'i na' naga' du guié le ruzóa dxisö barco na', le zoa saca' tsölä'a láhuiö. ³¹ Ní'irö Pablo gudxë' bönni' na' rinná bé'enë' bönni' rójáquië' gudil-la, tsözxón len bönni' na' rójáquië' gudil-la, gunné':

—Channö cabí ulu'gá'anë' bönni' ni lë'e barco ni, biti' gaca uláli'.

³² Ní'irö bönni' na' röjáquië' gudil-la gula'chúguië' du naga' bárcodo' na', ate' gulu'ë lataj gubixi lu nísado'.

³³ Cate' chizá' rení, Pablo gúta'yuë' lógaquië' bi ilahuë' yúgu'të'. Gudxë' légaquië':

—Na'a chiguca chidá' dza rubéaj yëla lolí, en runlí' gubasa, biti' bi náguli'. ³⁴ Que lë ni na', ráta'yua' lolí' gáguli' para huóaca ládxi'lí, tu' cabí gátíli' nituli' libí'ili'.

³⁵ Cate' Pablo budxi bë'ë didza' ni, gudélë'ë yöta xtila, en gudxë' Dios: "Xclenu'." Caní benë' lógaquië' yúgu'të'. Ní'irö buzxuzxjë' yöta xtila na', en gusi lahuë' rahuë'. ³⁶ Ní'irö bila'dipa ládxi'gaquië' yúgu'të', en gulahuë'. ³⁷ Tscatu' zóatu' lë'e barco na', gúcatu' idú chopa gayuá' yu' tsónnalalaj yu' chizxópatu'. ³⁸ Gudödi gulahuë', en bulu'huóljanë', ní'irö gula'ru'unë' xzoa' xtila dë lë'e barco na' lu nisa, para ulu'lahuë' yua' dzö'ö lë'e barco na'.

Raca ditaj barco lu nísado'

³⁹ Cate' chiguca lahuí' dza, yugu' bönni' tunë' dxin lu barco na' biti' bulu'únbë'ë luyú na'. Bila'lë'enë' ga röjrö' nisa xzón na' gatsaj láchui'lö luyú bidxi na', en dë lataj ni' ga naca lachi' ra' nísado'. Gulë'ënnë' ilunë' ga tsaza barco na' ga ni'. ⁴⁰ Ní'irö bulu'sedxë' yugu' du guië' nága'gaca yugu' guië' zí'í tu'zóa dxisö barco na', en bulu'sanë' léguequi, ate' gula'bixi lu nísado'. Bulu'sedxë' ca' du naga' në'e yaga le ruzecaj ruxdi' barco. Ní'irö bulu'chisë' lari' que le rutubi bö', le zoa tsölä'a láchuilö barco na', ate' ní'irö gusi lo ridödi barco saca' ga röjrö' nísado' gatsaj láchui'lö luyú bidxi na'. ⁴¹ Cate' bidxín barco na' tu lataj ga ridzaga chopa nisa, ni' binidxi' tsölä'a láchuilö barco na' lu yuzxi lu nísado' na', ate' bugá'anasö barco na' ga ni'. Bítí'rö guca bi utá le, ate' tsölä'a cúdezi'lö barco na', gusi lo riguitsaj nísado' na' le, len yöl-la' rizá' que. ⁴² Ní'irö bönni' röjáquië' gudil-la gulë'ënnë' ilútië' bönni' nadzúngaquië', para cabí ila'zxúnnajë', ila'zxóë' lu nisa na'. ⁴³ Bönni' na' rinná bé'enë' bönni' na' röjáquië' gudil-la gú'unnë' usölë' Pablo, ate' gunná bé'enë' bönni' na' röjáquië' gudil-la cabí ilunë' ca na' té'ënnë'. Ní'irö gunná bé'enë' bönni' taca ila'zxóë' lu nisa, zí'aló légaquië' ila'yázië' lu nisa para ila'dxinë' luyú bidxi. ⁴⁴ Gunná bé'enë' ca' yugu' bönni' nagá'anagaquië' ila'zxóë' lu yaga dzö'ö láchuilö barco, en ia'bal-lë' láchuigaca yágado' que barco na'. Caní guca, bulu'lë' yúgu'të'. Canísö bila'dxinë' luyú bidxi na'.

28

Le benë' Pablo luyú bidxi nazí'i le Malta

¹ Cate' chibulatu' yúgu'tëtu', gunöztu' luyú bidxi ga na' zóatu' nazí'i le Malta. ² Bönni' xidza' nacu'ë luyú bidxi na' lu yöl-la' dxi'i ladxí' quégaquië' gulunë' netu' bal. Gula'béquië' guí, ate' bulu'lidzë' netu' yúgu'tëtu' iditsë'e cuintu', tu' ralaj guiöj, en runda' ziaga. ³ Ní'irö Pablo gúchë'ë tu' tsölën huága zxisi bídxi'ido', en cate' gulu'ë le lu guí, birúajba' tuba' bëla sínia' lë'e huágado', rizzúnnajba' böchila que guí na', ate' yójtí'iniba' yen në'ë Pablo. ⁴ Cate' bönni' xidza' na' bila'lë'enë' bëla na', nála'ba' yen në'ë Pablo, gulë' tuë' ia'túë':

—Le nácatë bönni' ni náquië' nu ruti bönachi. Sal-la' bulë' lu nísado', dios queëru' lë' Tshui' biti' ru'ë lë' lataj soë' ibanë'.

⁵ Gudxibi në'ë Pablo, en busládzu'ë-ba' bëla sínia' na'. Yöjxóatëba' lu guí, ate' lë' biti' bi guca queë'. ⁶ Bönni' xidza' nacu'ë ní' tu'yúë' Pablo, bátacaló cö'ë guí, o tsö'ötë' gátíë'. Ní'irö cate' chigudzé ta'bözë', en bila'lë'enë' biti' bi raca queë', ia'tú le gulëquinë', ate' gula'nnë' naca cazë' tu' dios.

⁷ Lataj ní'isö dë xiyüë' Publio, bönni' lo que luyú bidxi na', ate' bönni' ni benë' netu' bal. Lu yöl-la' dxi'i ladxí' queë' gulu'ë netu' lidxë' idú tsonna dza. ⁸ Dza na' dë' ré'enë' xuzë' Publio na', yu'ë xilá, en ré'enë' huë' rön. Guyázië' Pablo söjyúë' lë', en gudödi bulidzë' Dios, ní'irö guxó'a në'ë bönni' huë' na', en bunë' lë'. ⁹ Tu' benë' Pablo lë ni, lësca' bila'dxin nupa te'e ga zoë', nacua' luyú bidxi ni, en bulu'huóáquië'. ¹⁰ Yugu' bönni' ni gulunë' netu' bal, en zían le gulunë' queëtu'. Cate' chizó'a zuzá'atu' luyú ni', bulu'nódzjë' yugu' le naquinitu' queëtu'.

Ridxinë' Pablo lu yödzo Roma

¹¹ Cate' chiguca tsonna beo' zóatu' ni', ní'irö gurentu' tu lë'e barco que yödzo Alejandria, le bugá'ana luyú bidxi na' yugu' beo' ziaga. Barco ni dá'gaca tsölä'a láchuilö budó' yaga léguequi Cástor, en Pólux, dios bilidi' quégaca bönachi Alejandria na'. ¹² Buzá'a barco na' ga ni', ate' bidxín yödzo Siracusa, ga ni' bugá'anatu' tsonna dza. ¹³ Buzá'atu' ni', ate' gudödítu' tsölä'aló luyú ni', en bidxintu' yödzo Regio. Cate' za' rení ia'tú dza, tu' recja bö' za' saca' ga ridödi gubidza beo' ziaga, buzá'atu' ni', ate' dza buropi na' bidxíntëtu' yödzo Puteoli luyú Italia. ¹⁴ Lu yödzo na' yöjxáca'tu' yugu' böchi'ru' ta'yéajlë'ë Cristo, ate' guláta'yuë' lotu' ugá'analentu' légaquië' idú xunu' dza. Cate' bizá'a dza na' buzá'atu' ni' para tséajtu' yödzo Roma, rizë'e ní'atu'. ¹⁵ Chibila'yönnë' böchi'ru' nacu'ë Roma chizó'a idxintu' ni', ate'

bila'rúajë' idixí'gala'gaquië' netu'. Bila'dxinë' tu yödzo'do' nazí'i le Yë'ëyi Que Apio. Ia'bal-lë' bila'dxinë' tu lataj nazí'i le Tsonna Yu'u Quégaquië' Bönni' Yú'ugaquië' Nöza. Cate' Pablo bilé'enë' légaquië', bidipa ládxë'ë, en gudxë' Dios: "Xclenu'."

¹⁶ Cate' bidxintu' Roma, bönni' na' rinná bé'enë' bönni' rójáquië' gudil-la, guchë'ë bönni' na' nadzúngaquië', ate' budödë' légaquië' lu në'ë tu bönni' lo rinná bé'enë' bönni' rójáquië' gudil-la, ate' bë'ë Pablo lataj soë' guchëzë', zóalenë' lë' tu bönni' rejë' gudil-la ruyüë' lë'.

Runë' Pablo libán lu yödzo Roma

¹⁷ Cate' chigudödi tsonna dza, bulidzë' Pablo yugu' bönni' lo quégaquië' bönni' judío nacu'ë Roma. Cate' chibulu'dubë' ga na' zoë' Pablo, lë' gudxë' légaquië':

—Libí'ili', böcha'a, sal-la' bití' bi bena' quégaca bönachi ládzaru', en calëga que le nalëbiru' runru' ca na' gulunë' xuz xtó'oru', yugu' bönni' judío nacu'ë Jerusalén bulu'dödë' neda' lu ná'agaquië' bönni' Roma nacu'ë Jerusalén, ate' bulu'sayjë' neda' lidxi guië. ¹⁸ Ní'irö cate' chigula'nabi yúdxinë' neda' bönni' Roma, gulë'ënnë' ulu'sanë' neda', tu' gulë'quibe'enë' bití' nabága'a xíguia' gátia'. ¹⁹ Yugu' bönni' judío ni' gula'dá'báguë'ë nupa na' gulë'ëni ulu'sán neda', ate' ben bayudxi gunaba' tseja' lahuë' César ga uchi'a usöröë' neda', en calëga para uzéguia' bönachi uládz queëru' didza'. ²⁰ Que lë ni na' bulidza' libí'ili' para ilé'eda' libí'ili', en güi'ílena' libí'ili' didza', tu' nága'a du guië ni tu' runa' löza le runru' löza rë'u, bönachi Israel, gacaté lë na' guzxi' lu në'ë Dios gata' queëru'.

²¹ Ní'irö légaquië' gulë' Pablo:

—Bití' ridxini queëtu' guichi le za' luyú Judea ca naca lë na' raca quiu', en cuntu nu ridxini nu naca böchi'ru' judío, nu usiyöni netu' channö nu bi rnnë' quiu' le ruá' dö'. ²² Na'a, rë'ënitü' yönitu' xtídzü'u, lë na' riguinnaj icju', tu' chinözitu' ta'nnë bönachi yúgu'të lataj quégaca nupa nazí' lu në'eguequi xibá cubi ni.

²³ Caní guca, bulu'dxië' bë' tu dza, ate' dza na' bila'dxinë' zíanë' ga na' zoë' Pablo. Gusí lahuë' Pablo zilado', ate' ni' gúl-li'ni buzéajni'inë' légaquië', en buchila lá'anë' le rinná bë'ë Dios. Gú'unnë' ulu'inë' légaquië' naca idütë li libán runë' queë Jesús. Para gunë' caní bugunë' dxin le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios. ²⁴ Bal-lë' gula'zí' lu ná'agaquië' didza' bë'ë Pablo, pero ia'bal-lë' bití' ca' gula'yéajlë'ë. ²⁵ Tu' bila'rúajë' chopló, gula'sí lógaquië' tu'zë'ë ni', ate' Pablo gudxë' légaquië', rnnë':

—Didza' nácatë bë'ë Dios Bö' Lá'ayi, lë na' gunnë' Isaías, bönni' bë'ë didza' uláz queë' Dios, ca na' buzéajni'inë' xuz xtó'oru', gunnë':

²⁶ Guyéaj lógaca bönachi ni', yödödxí légaquië':

Yöni nágali', pero bití' tséajni'ili'.

Uyuli' iná'ali', pero bití' ilé'eli'.

²⁷ Yugu' bönni' ni chinazidi icja ládxí'do'gaquië', en bití' bi riyaza icja nágagaquië'.

Gulunë' ca tun nupa nachul-la guiöj lóguequi

para cabí ila'lé'e len guiöj lóguequi,

en cabí ila'yöni nágaguequi

para cabí ulu'zéajni'í ládxí'guequi,

en cabí ilé'ëni ulu'huóaca queë' Dios

para gaca una' lóguequi.

²⁸ Na'a, ral-la' inözili' lë ni. Dios risöl-lë'ë netu' lógaca bönachi izá'a para ulu'lágaca, ate' légaquië' ila'yönnë'.

²⁹ Cate' Pablo budxi bë'ë didza' ni, bila'rúajë' bönni' judío, ta'díl-lada' dídzë'ë la' légacasë'.

³⁰ Idú chopa iz bugá'anë' Pablo ni', zoë' tu lu yu'u ga na' riguizxjë', ate' benë' bal yúgu'të nupa buduyúgaca Lë'. ³¹ Lu yöl-la' rugu ladxi' benë' libán ca rinná bë'ë Dios. Busédinë' bönachi ca naca queë' Xanru' Jesucristo, ate' cuntu nu buzaga' xinözë'. ¡Ca' naca!

DIDZA' GUSÖL-LĒ'Ē PABLO YÖDZÖ ROMA

Pablo rugapë' Dios bönachi queë' Cristo nacu'ë Roma

¹ Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en guró cazë' neda' para guna' libán que didza' dxi'a queë'.

² Dza ni'te guzxi' lu në'ë Dios isöl-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios. ³ Bulu'zúajë' lu guichi yúgu'të le ral-la' gunë' Zxí'inë' Dios, Nu na' naca Xanru' Jesucristo. Lu yöl-la' bönachi queë' náquië' zxi'ini xi'sóë' David, ⁴ pero ca naca bõ' naca cazë', le naca lá'ayi, naca bë' náquië' Zxí'inë' Dios, en nápapé'ë yöl-la' huáca. Naca bë' náquië' caní tu' bubané' lu yöl-la' guti. ⁵ Ni'a que le benë' Jesucristo ruzí'iru' xibé le ruzá' ládxë'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönachi iduté yödzölió Lë', en ilún ca rna xtídzë'ë. ⁶ Bitsa'li' libí'ili' ládjagaca bönachi yödzölió na', pero na'a nulidzë' Dios libí'ili' para guéquilí' queë' Jesucristo.

⁷ Rugapa' Dios libí'ili', yúgu'tëli' zóali' Roma. Dios nadxi'inë' libí'ili', en bulidzë' libí'ili' para gácali' quez queë'. Rinábida'-në' Xúziru' Dios, enca' Xanru' Jesucristo, gunnë' queéli' le ruzá' ládxë'ë queëru', en le ribequi dxi ládxí'ru'.

Rë'ënë' Pablo tsöjyüë' bönachi queë' Cristo nacu'ë Roma

⁸ Lë ni risí lahua' ruzúaja' lu guichi: Tu' néquiru' queë' Jesucristo rea'-në' Dios: "Xclenu'" ca naca queëli' yúgu'tëli', ate' ta'guixjõ' bönachi iduté yödzölió ca réajlë'ëli' Jesucristo. ⁹ Idú ládxa'a runa' xichinë' Dios, runa' libán que didza' dxi'a ca naca queë' Zxí'inë'. Nözinë' Dios rulídzatica'sa'-në', en rinábida'-në' gaca tsahui' queëli'. ¹⁰ Rinábítica'sida' Dios, channó naca le rë'ënë' Lë', gunnë' neda' lataj uduyúa' libí'ili'. ¹¹ Caní rinábida'-në' tu' raca ládxa'a ilé'eda' libí'ili' para gaca guna' ga gata' queëli' tu le unödzjë' Dios Bõ' Lá'ayi queëli', le gun ga gácali' tsutsu. ¹² Lë na' rë'ënda' naca utipa ládxí'ru' turu' ia'turu', tu' réajlë'ëru' Jesucristo yúgu'tëru'.

¹³ Böchi' luzá'ado', rë'ënda' inözili' lë ni. Zián luzuí bë' ládxa'a guída' ga zóali', pero ga ridxintë na'a bití' runni quia'. Rë'ënda' guída' ga zóali' para guna' ga uzí'ili' xibé libán na' runa', ca na' tu'zì' xibé ia'bal-la bönachi yödzölió ni. ¹⁴ Dë le ral-la' guna' quégaca yúgu'të bönachi, quégaca bönachi nazëdagaca, en quégaca bönachi cabí nazëdagaca, quégaca bönachi ta'yéajni', en quégaca bönachi cabí ta'yéajni'. ¹⁵ Que lë ni na', tsca gaca guna', zoa' ribõza' guna' ca' libán que didza' dxi'a ga ni' zóali' libí'ili', zóali' Roma.

Yöl-la' huáca zxön que didza' dxi'a

¹⁶ Bití' ca' rutuí'ida' runa' libán que didza' dxi'a, tu' napa yöl-la' huáca queë' Dios para gun ga ululágaca yúgu'të nupa ta'yéajlë' le. Ga risí lo, rë'ënë' Dios ila'yönnë' bönni' judío le, ate' tódi na' ila'yöni ca' bönachi izá'a. ¹⁷ Didza' dxi'a ni rulu'i rë'u gunë' Dios ga huóácaru' tsahui', channó uyéajlë'ëru' Lë', en bití' gaca chopla ládxí'ru'. Ca naca lë ni nazúaj ca' lu guichi lá'ayi, rna: "Nu naca tsahui' tu' ríjälë' Dios, gata' yöl-la' na' bán que nu na'."

Xíguia' nabága' gaca bönachi

¹⁸ Dios, Nu zoa yehua' yubá, bulu'e lahui bití' rilë'ënë' dxi'a yúgu'të le ruá' dö', en le cabí naca tsahui' tun bönachi. Gunë' xíguia' yugu' bönni' na', lu yöl-la' bití' naca tsahui' quégaquië' ta'dá'baguë'ë le naca iduté li. ¹⁹ Caní gaca quégaquië' tu' nalá' lahui lógaca yúgu'të bönachi le naca bë' zoa cazë' Dios, tu' buluí' quëzinë' Dios lë ni ga na' nacué'. ²⁰ Dza ni'te cate' si' guta' yödzölió, ga ridxintë na'a dza, yugu' le nunë' Dios nácagaca bë' le cabí gaca ilé'ëru' queë' Dios, ca naca yöl-la' huáca idú queë', en le naca cazë' Dios. Que lë ni na', bití' gaca ila'nnë' bití' nabága'gaquië' xíguia'. ²¹ Cate' ni' gulúnbë'ë Dios, bití' gula'yéaj ládxí'gaquië' Lë' ca ral-la' tseaj ládxí'ru'-në' Dios, en bití' gulë' Lë': "Xclenu'." Que lë ni na', cá'asó' böaca le gula'zá' ládxí'gaquië', ate' gula'chul-la gula'nítie' tu' nazidi icja ládxí'do'gaquië'. ²² Sal-la' guléquinë' ta'yéajni'inë' yenni', bulu'huóáquië' bönni' bití' bi nözguequinë' ²³ tu' bulu' cá'anë' yöl-la' bení' queë' Dios Nu zóatica'só, ate' gula'yéaj ládxí'gaquië' budó' guiój budó' yaga, budó' na' nácagaca ca yugu' bönni' tati cazë', en ca yugu' bóa'dó' zoa xiligacaba', en ca yugu' bóa' guixi' ta'daba' lu yu, en ca yugu' bóa' béla tá'ayöj lë'ëba' lu yu ni.

²⁴ Que lë ni na' Dios guléaj ládxë'ë légaquië' para ilunë' yugu' le ta'zë' ládxí'gaquië' le ruá' dö', ate' caní guca, bulu'cá'ana cuíngaquië' lu yöl-la' stu' tuë' len ia'tuë'. ²⁵ Guca caní tu' bulu'cá'anë' xtídzë'ë Dios, le naca iduté li, ate' gula'zì' lu ná'agaquië' tu le cabí nácatë. Gulunë' bal, en gula'yéaj ládxí'gaquië' yugu' le benë' Dios, en calëga Lë' cazë' Dios, Nu na' ral-la' gácatica'só queë' yöl-la' ba. ¡Ca' gaca!

²⁶ Que lë ni na' Dios guléaj ládxë'ë légaquië' para ilunë' yugu' le ta'zë' ládxí'gaquië' le ruá' dö'. Yugu' nigula bulu'cá'ananu yöl-la' rizóalen bönni', para ilunnu le ruá' dö'. ²⁷ Lësca' caní

gulunë yugu' bönni' biguiú', bulu'cá'anë' yöl-la' rizóalen nigula, ate' gula'zë ládxi'gaquië' le ruá' dö' túnlenë' tuë' ia'tué', en gulunë' le tun ga nu rutuí'i, tu' gula'cuá'lenë' la' luzá'a bönni'gacasë'. Que lë ni na' gula'guí'i gula'záquië' lu xipëla'gaquië' yugu' bönni' gulunë' caní tu' bubí'ë Dios quégauquië' ca sa'yéaj dul-la' na' gulunë' tu' nucá'anagaquië' Dios.

²⁸ Tu' cabí gulë'ënnë' ilunë' Dios bal, que lë ni na' guléaj ládxi'ë Dios légaquië' para ila'zá' ládxi'gaquië' le bití' naca dxi'a, en ilunë' le cabí nazaca'.

²⁹ Túntica'së' yúgu'të le cabí naca tsahui', en yugu' le naca stu'.

Tunë' le ruá' dö', en tu'huídi'në'.

Bití' ta'lé'enë' dxi'a luzá'agaquië', en tu'zxë'enë' luzá'agaquië'.

Tutië' luzá'agaquië', en ta'díl-lalenë' luzá'agaquië'.

Ta'zi' yé'enë' bönnachi, en zi'të náccagaquië' xihui'.

Ta'nnë' que luzá'agaquië'.

³⁰ Ta'nnë' le cabí nácatë que luzá'agaquië'.

Bití' ta'lé'enë' Dios dxi'a, en náccagaquië' bönni' bizxaj.

Tun cuíngaquië' lo, en tun ba zxön cuíngaquië'.

Ta'guiljë' le ruá' dö' ilunë', en ta'dá'baguë'ë xuz xiná'agaquië'.

³¹ Náccagaquië' bönni' bití' ta'yéajni'inë', en tun dítxajagaquië' xtídza'gaquië'.

Bití' náccagaquië' dxi'i ladxí' ca ral-la' iláccagaquië'.

Bití' tu'niti lahuë' luzá'agaquië'.

Bití' tu'huechi' ládxi'gaquië' luzá'agaquië'.

³² Nözguequi quézinë' le nuzóë' tsaz Dios ca ral-la' gaca quégaca nupa tun yugu' le caní, ilátigaca tsaz. Sal-la' nöziguequinë' lë ni, calégasö caní tunë', pero ta'yaza ládxi'gaquië' nupa tun ca' caní.

2

Naca tsahui' ichúguië' Dios quégaca bönnachi gátigaca

¹ Que lë ni na', bití' gaca ubéaj tsahui' cuinu', nütí'tës nu nacu', richugu bë'u luzó'o. Cate' richugu bë'u luzó'o, rusubaga' cuinu' xíguia', tu' richugu bë'u luzó'o, en lësca' runu' lí'. ² Nöz quéziru' ca ruchi'a rusöröë' Dios. Naca idütë li ca ruchi'a rusöröë' nupa tun le ruá' dö'. ³ Lí' richugu bë'u nupa tun le ruá' dö', en tuz ca runu' lí'. ¿Naru' réquitsenu' uló' lí' cate' uchi'a usöröë' Dios? ⁴ ¿Naru' rucá'angatso' cá'asö yöl-la' dxi'i ladxí' idú queë' Dios, en yöl-la' riböza zxön ladxí' queë', en ca runë', ridzenë' para lenë' lí'? ¿Naru' cabí nöz quézinu' ruzá' ládxi'ë Dios quiu' yöl-la' dxi'i ladxí' queë' para gunë' ga ubí'i ládxi'u? ⁵ Lu yöl-la' ládxi'do' zidi quiu' bití' rubí'i ládxi'u. Que lë ni na' rusubaga' cuinu' xíguia' gunë' Dios lí' cate' uchi'a usöröë' bönnachi, ate' gaca bë' naca ca ral-la' gunë' Dios cate' ichúguië' quégaca bönnachi ilátigaca. ⁶ La' dza ní'isö ubí'i cazë' Dios que queë' bönni' tsca naca le gulunë' tu tuë'. ⁷ Unödziejë' yöl-la' na'bán idú quégaca nupa túntica'sö le naca dxi'a, tu' tuí'i ládxi'gaquië' ulu'zi'ë xibë' Dios, en ulu'rúajë' dxi'a lahuë' Lë', en ila'cuá'tica'së'. ⁸ Lu yöl-la' rilé queë', Dios gunë' xíguia' nupa ta'dá'baguë', en bití' té'ëni ilün ca rnna le naca idütë lí, pero tun ca rnna le cabí naca tsahui'. ⁹ Ila'guí'i ila'záquië', en huí'nida' ládxi'ë yúgu'të bönni' tunë' le ruá' dö'. Ga risí lo gaca caní quégaca bönnachi judío, en gaca ca' caní quégaca bönnachi izá'a. ¹⁰ Dios gunë' ga iláccagaquië' bica' ba, en gunë' légaquië' bal, en gu'ë le cuéqui dxi ládxi'gaquië' yúgu'të bönni' tunë' le naca tsahui'. Ga risí lo gunë' caní quégaca bönnachi judío, en gunë' ca' caní quégaca bönnachi izá'a.

¹¹ Caní uchi'a usöröë' Dios bönnachi, ate' Lë' bití' runë' bal le ta'nnasö bönnachi. ¹² Yúgu'të bönni' na' bití' bila'yönnë' le rinná bë' xibá queë' Dios, en gulunë' dul-la', lësca' ilátië', sal-la' bití' téquibe'enë' gula'dá'baguë'ë le rinná bë' xibá na', ate' yúgu'të bönni' bila'yönnë' le rinná bë' xibá queë' Dios, en gulunë' dul-la', Lë' uchi'a usöröë' légaquië' ca naca le rinná bë' xibá na'. ¹³ Caní gaca, tu' cabí náccagaquië' tsahui' lahuë' Dios yugu' bönni' ta'yónisë' xibá queë', pero ulu'huóaca tsahui' lahuë' Lë' yugu' bönni' tunë' ca rnna xibá queë'. ¹⁴ Bönni' na' bití' náccagaquië' judío, en bití' bila'yönnë' le rinná bë' xibá queë' Dios, pero tun cazë' ca rinná bë' xibá queë' na', bönni' ni, sal-la' bití' bila'yönnë' le rinná bë' xibá queë' Dios, zóalen légaquië' tu xibá le nuzóë' Dios icja ládxi'do'gaquië'. ¹⁵ Nupa ni tu'lui' lahu le run xibá na' nazúaj lu icja ládxi'do'gaquië'. Le yu'u icja ládxi'do'gaquië' naca bë' naca caní. Ca ta'zá' ládxi'gaquië', tu' zéguie' luzá'agaquië' didza', o tu'béaj tsahui' luzá'agaquië' tuë' ia'tué'. ¹⁶ Caní ubí'ë Dios quégauquië' dza ní' uchi'a usöröë' lu na' Jesucristo yugu' le núnagaquië', en le gula'zá' ládxi'gaquië' yúgu'të. Caní rusëdi didza' dxi'a na' runa' libán que.

Yugu' bönni' judío, en xibá queë' Dios

¹⁷ Núlöli' rnnali' nácali' judío, en ruzxöni ládxi'li' xibá queë' Dios, en run ba zxön cuinli' tu' núnbë'ëli'-në' Dios, ¹⁸ nöz quézili' le ré'ënë' Dios gunli', en le rusëdi libí'ili' xibá queë', en réquibe'eli' le nácatëro dxi'a. ¹⁹ Réquili' gaca uluí'ili' nöza dxi'a nupa ta'dá ga yúbölö ca nu nachul-la lahuí, en gaca uzéajni'ili' nupa nachul-la nanítigaca. ²⁰ Réquili' gaca usédili' nupa

biti' ta'yéajni'i, en nupa ta'yéajni'i láti'do'os, tu' dë lu ná'ali' xibá queë' Dios le rusëdi bönachi ca naca yöl-la' réajni'i idú, en le naca idútë li. ²¹ Na'a, libí'ili' rusëdili' ia'zica'rö bönachi. ¿Naru' cabí ral-la' usëdi cuinli'? Libí'ili' rnnali': "Biti' cuanu'." ¿Naru' ribántsali' libí'ili'? ²² Rnnali' ca': "Biti' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' biti' rilé'eli' dxi'a yugu' budó' guió' budó' yaga. ¿Naru' ribántsali' le dzó'ö lu yudo' gué'gué'qui? ²³ Run ba xzön cuinli' tu' dë lu ná'ali' xibá queë' Dios. ¿Naru' rucá'anatsali' Dios cá'asó, en riguitsjali' xibá le gunná bë'ë Lë'? ²⁴ Nazúaj lu guichi lá'ayi ca runli', rnna: Ni'a que le runli' libí'ili' nupa biti' ná'agaca judío ta'nnë zi' queë' Dios.

²⁵ Le nácatë ruzi' u xibé lë na' narugu lu xipëlu'u le naca bë' nazí' lu ná'ali' xibá queë' Dios channö runu' ca rinná bë' xibá na' queë' Dios, pero channö riguitsju' xibá le gunná bë'ë Lë', nuhuöácu' ca tu bönni' biti' néquinë' queë' Dios. ²⁶ Que lë ni na', channö zoë' tu bönni' biti' narugu lu xipëlë'ë lë na' naca bë' nu nazí' i xibá queë' Dios, pero runë' idútë ca rinná bë' xibá queë' Lë', bönni' ni náquië' lahuë' Dios ca tu bönni' narugu caz lu xipëlë'ë lë na' naca bë' sal-la' biti' narugu lu xipëla' cazë'. ²⁷ Bönni' na' biti' narugu lu xipëlë'ë lë na' naca bë' nu nazí' i xibá queë' Dios, pero runë' idú ca rinná bë' xibá na' queë' Dios, ca runë' bönni' ni rulu'i nabága'li' libí'ili' xíguia', sal-la' dë lu ná'ali' xibá na' queë' Dios, en narugu lu xipëla'li' lë na' naca bë' nazí' lu ná'ali' xibá na' queë' Dios, pero biti' runli' ca rinná bë' xibá queë' na'. ²⁸ Biti' náquië' idú bönni' judío tu bönni' nácasë' caní lu yöl-la' bönáchisö queë', ate' biti' naca idú lë na' naca bë' le narúgusö lu xipëlë'ë nu bönni'. ²⁹ Náquië' idú bönni' judío bönni' na' náquië' caní lu icja ládxi'da'ahuë', en le naca idú le narugu lu xipëlë'ë nu bönni' le naca bë' nu nazí' i xibá queë' Dios, naca tu le yu'u icja ládxi'do'gaca bönachi. Naca que bô' naca cázaru', en calëga que yöl-la' bönáchisö queë'ru'. Nu bönni' náquië' caní, biti' tun bönachi lë' bal, pero Dios caz gunë' lë' bal.

3

¹ Channö caní naca, ¿bizxi ruzi'tsë' xibé tu bönni' tu' náquië' judío? ¿Bizxi ruzi'ë xibé tu bönni' judío tu' narugu lu xipëlë'ë? ² Yenni' ruzi'ë xibé, en zían ca ruzi'ë xibé. Le nácatë'ro lo, Dios gulu'ë lu ná'agaquië' yugu' bönni' judío didza' lá'ayi queë'. ³ Bal-lë' biti' ta'yéajlë'ë Dios. ¿Naru' réquitsenu' biti' gunë' Dios ca rnna xtídzë'ë tu' cabí ta'yéajlë'ë Lë'? ⁴ ¿Biti' ca' gaca! Ral-la' gué'quibe'eru' rúntica'së' Dios ca rnna didza' bë'ë, sal-la' ta'z'í' yë' yúgu'të bönachi. Ca naca queë' nazúaj lu guichi lá'ayi le rnna: Gaca bë' nacu' tsahui' ni'a que didza' ru'u, en uruju' tsahui' channö nu uchi'a usörö Lí'.

⁵ Cate' runru' le ruá' dö', Dios rnnë' biti' naca tsahui' le runru'. Lë ni naca bë' tsahui' náquië' Dios. Nacuá' nupa ta'nná: "Le cabí naca tsahui' le runru' naca bë' náquië' Dios tsahui', ate' que lë ni na' biti' ral-la' gunë' rë'u xíguia'." ⁶ ¿Biti' ca' naca caní! La'tu' ruzi'ë xibé Dios le ruá' dö' runru', ¿nacxi caz gaca uchi'a usöröë' bönachi yödölíö ni'?

⁷ Cate' nu rizi' yë', Dios rnnë' biti' ru'i' didza' nu na' ca runë' Lë'. Lë ni naca bë' naca idútë li didza' ru'ë Dios. Ta'nnë' bönni' le ta'z'í' yë'ë légaquië' run ga gaca queë' Dios yöl-la' ba, ate' biti' ral-la' ichúguië' quégaquië', cabí innë' ná'cagaquië' bönni' dul-la'. ⁸ ¿Naru' huannátsaru': "Guá'aru' dö' para gaca le naca dxi'a'?" Nupa na' ta'nnë' zi' queë'ru' ta'nná rusëdiru' caní, ate' tsahui' naca ichúguië' Dios qué'gué'qui.

Yúgu'tëru' nabága'ru' dul-la'

⁹ ¿Bizxi caz innaru' na'a? Ca naca queëtu' netu', bönni' judío, ¿nácarötu' tsahui' ca ia'zica'rö bönachi? ¿Biti' ca' nácatu'! Chibulu'a ni, nabága'gaca dul-la' bönachi judío, ate' nabága'gaca ca' dul-la' bönachi izá'a. ¡Yúgu'të' nabága'gaquië' dul-la'! ¹⁰ Nazúaj lu guichi lá'ayi le rnna: Cuntu nu zoa naca tsahui', cuntu nu caz.

¹¹ Cuntu nu réajni'i.

Cuntu nu riguilaj Dios.

¹² Yúgu'të' ta'dë' ga yübölö.

Yúgu'të' nanítigaquië'.

Cuntu nu run le naca dxi'a, cuntu nu caz.

¹³ Lubá'agaquië' ná'cagaca ca yeru ba nayáljagaca.

Len yöl-la' rinnësö quégaquië' ta'z'í' yé'enë' luzá'agaquië'.

Didza' rirúaj ruá'agaquië' naca ca le yudzu láya'ba' bëla sínia'.

¹⁴ Len yugu' didza' tu'ë, tu'didza' yúdxinë' bönachi,

en ta'nnë' zi'ë qué'gaca bönachi na'.

¹⁵ Nacu'ë sina' tütigaquië' bönachi.

¹⁶ Gáti'tës ga ta'dödë' tu'sunítie', en tu'saca' zi'ë luzá'agaquië'.

¹⁷ Biti' ta'z'équi'në' ila'bözë' dxi'ado'.

18 Biti' ca' tádxinē' Dios.

¹⁹Nóziru' yúgu'tē didza' ni bē'ē Dios, rē' yugu' bōnni' na' dē lu ná'agaquiē' xibá queē'. Que lē ni na' cuntu nu gaca inná bití' nabaga' dul-la', ate' yúgu'tē bōnachi idútē yōdzólió, uchi'a usórōē' Dios quéguequi. ²⁰Tu'í ládxi'gaquiē' yugu' bōnni' judío ilunē' yugu' le rinná bē' xibá queē' Dios para ulu'huóáquiē' tsahui', pero cuntu nu huóáca tsahui' caní, tu' nuzóē' Dios xibá queē' para guéquite' eru' nabága'ru' dul-la'.

Uláru' tu' réajlě'ēru' Jesucristo

²¹Na'a, chibulu'í lahui ca gaca huóácaru' tsahui' lahuē' Dios. Biti' gaca huóácaru' tsahui' tu' runru' ca rinná bē' xibá queē' Dios, sal-la' lu xibá queē' na', en lu guichi lá'ayi ga nazúajgaca le gula'nnē' bōnni' gulu'ē didza' uláz queē' Dios, ru'í didza' ca gaca huóácaru' tsahui'. ²²Dios caz runē' ga huóácaru' tsahui' tu' réajlě'ēru' Jesucristo, ate' gunē' ga ulu'huóáca tsahui' yúgu'tē nupa ila'yéajlě' Lē'. Tuz ca nácgaca yúgu'tē bōnachi ²³tu' núnagaquiē' yúgu'tē dul-la', en bití' ca' nácgacaquiē' tsahui' ca na' náquiē' Dios idú tsahui'. ²⁴Dios ruzá' ládxi'ē queēru', en nunsē' rē' u tsahui' tu' bōá'uē' Jesucristo rē' u. ²⁵Dios budóē' Jesucristo uláz queēru'. Lē' bulaljē' xichōnē', le rigúa dul-la', lē na' uzí'iru' xibé channó uyéajlě'ēru' Lē'. Caní benē' Dios para gaca bē' náquiē' tsahui' Lē' sal-la' lu yól-la' ribóza zxōn ladxí' queē' budódisē' cá'asó yugu' dul-la' benru' dza ni'te. ²⁶Caní benē' Dios, bulu'í cuinē' tsahui' dza ni zóaru' na'a, ate' rugá'anē' tsahui' sal-la' rugúē' dul-la' nabága'gaca bōnachi, runē' ga tu'huóáca tsahui' nupa ta'yéajlě' Cristo.

²⁷¿Naru' huácatsó gun ba zxōn cuinru' ca naca queēru'? ¡Biti' ca' gácaru'! ¿Bizx que na'? Naca tu' nuláru', calēga tu' runru' ca rinná bē' xibá queē' Dios, pero tu' réajlě'ēsiru' Jesucristo. ²⁸Na'a, rusáca'ru' queēru' nuhuóáquiē' tsahui' tu' bōnni' tu' réajlě'ē Jesucristo, en calēga tu' runē' ca rinná bē' xibá queē' Dios.

²⁹Ca naca Dios, ¿náquiē' Dios quégacasó bōnachi judío? ¿Naru' cabí náquiē' ca' Dios quégaca bōnachi izá'a? Ōn, náquiē' ca' Dios quégaca bōnachi izá'a na' ³⁰tu' zoa Tuz Nu naca Dios. Dios ni gunē' ga ulu'huóáquiē' tsahui' yugu' bōnni' judío tu' ta'yéajlě'ē Jesucristo, yugu' bōnni' na' narugu lu xipéla'gaquiē' lē na' naca bē' nu nequi queē' Dios, en lēscá' caní gunē' ga ulu'huóáquiē' tsahui' yugu' bōnni' zí'tu' tu' ta'yéajlě'ē Jesucristo, en bití' narugu lu xipéla'gaquiē' lē na' naca bē'. ³¹Na'a, channó nuláru' tu' réajlě'ēsiru' Jesucristo, ¿ba nagá'ana cá'asó xibá queē' Dios? ¡Biti' ca' naca ca', pero nagá'anaró tsutsu xibá queē' na'!

4

Le benē' Abraham rusedi rē'u

¹¿Bizxi caz innaru' na'a? ¿Bizxi bidéli'nē' Abraham, xuz xtó'otu' netu', nácatu' judío? ²La tu' bōáquiē' tsahui' Abraham tu' zoa le ben cazē' lē', gunna gun ba zxōn cuinē', pero calēga lahuē' Dios. ³Ca naca lē ni nazúaj lu guichi lá'ayi, le rnna: "Abraham guyéajlě'ē Dios, ate' que lē ni na' Dios benē' ga bōáquiē' tsahui' lahuē' Lē'." ⁴Channó zoa nu bōnni' runē' xichinru', le riguízjaru'-nē' bití' naca tu le ruzá' ládxi'ru' queē', pero naca tu le ral-la'ru' queē' bōnni' na'. ⁵Lēscá' caní channó tu bōnni' réajlě'ē Dios, sal-la' bití' bi dxin benē' bōnni' na', Dios, Nu run ga ulu'huóáca tsahui' bōnachi bití' nácgaca tsahui', rnnē' náquiē' tsahui' lahuē' Lē' bōnni' na', tu' réajlě'ē Lē'. ⁶Lēscá' caní bē'ē didza' David ca náquiē' bica' ba bōnni', Dios rnnē' náquiē' tsahui' sal-la' bití' bi dxin nunē' bōnni' na'. ⁷Caní gunné' David: ¡Bica' ba bōnni' na' Dios runiti lahuē' le bití' naca tsahui' nunē', en rugúē' yugu' dul-la' nabáguē'!

⁸¡Bica' ba bōnni' na', Dios bití' rusubáguē'ē lē' xíguia' tu' nōzi dul-la' benē' bōnni' na'!

⁹¿Naru' nácgacsē' bica' ba bōnni' narugu lu xipéla'gaquiē' lē na' naca bē', o nácgaca ca' caní nupa na' cabí narugu lē na' lu xipéla'gaquiē'? Chigunná cázaru' bōáquiē' Abraham tsahui' lahuē' Dios tu' guyéajlě'ē Lē'. ¹⁰¿Bátaxi bōáquiē' tsahui' caní Abraham? ¿Naru' guca cate' ni' chinarugu lu xipélē'ē lē na' naca bē', o guca zí'aló? Biti' guca cate' chinarugu lu xipélē'ē, pero zí'aló guca. ¹¹Abraham guyéajlě'ē Dios cate' ni' bití' narúguni lu xipélē'ē lē na' naca bē'. Gudódi na' gurugu lu xipélē'ē lē na' naca bē', le rulu'ísó chinuhuóáquiē' tsahui' lahuē' Dios. Guca caní para gáquiē' Abraham ca xúzgaquiē' yugu' bōnni' ila'yéajlě'ē Dios sal-la' bití' narugu lu xipéla'gaquiē' lē na' naca bē'. Tu' ta'yéajlě'ē Dios, huáca innē' Dios nácgacaquiē' tsahui' lahuē' Lē'. ¹²Náquiē' Abraham xuz xtó'ogaquiē' yugu' bōnni' judío ta'yéajlě'ē Dios. Calégasó náquiē' xúzgaquiē' bōnni' na' narugu lu xipéla'gaquiē' lē na' naca bē', pero lēscá' náquiē' xúzgaquiē' bōnni' na' tunē' ca benē' Abraham, ta'yéajlě'ē Dios ca na' benē' Abraham cate' ni' bití' narúguni lu xipélē'ē lē na'.

Le guzxi' lu nē'ē Dios gata' queēru' tu' réajlě'ēru' Lē'

¹³Guzxi' lu nē'ē Dios bi unōdzjē' queē' Abraham, en quégaca zxi'ini xi'sóē', gata' quégaquiē' la' yōdzólió nisó. Gaca caní, calēga tu' tunē' ca rinná bē' xibá queē' Dios, pero tu'

nuhuóacaguié' tsahui' lahué' Lè' tu' ta'yéajlè' è Lè'. ¹⁴ La' tu' gata' yödzülió ni queégasó nupa tun ca rinná bè' xibá queé' Dios, biti' gun bayudxi nu tséajlè' Lè', ate' nítisó gaca le guxzí' lu nè' è Dios. ¹⁵ Rulu'í xibá queé' Dios rè' u nabága' ru' xíguia', le run ga ichúguié' Dios queéru' gáti'ru'. Ga ni' biti' ridxini xibá queé' na', biti' gaca ila' dá' b'aga' bônachi le rinná bè' xibá na'.

¹⁶ Que lê ni na' uzí'iru' xibé le guxzí' lu nè' è Dios tu' réajlè' èru' Lè', para gaca bè' naca tu le ruzá' ládxè' è queéru'. Caní naca, para gaca bè' da' gata' quéguequi yúgu'tè xzí'ini xí'sóé' Abraham lê na' guxzí' lu nè' è Dios, calégasó queégaquié' bônni' na' dè lu ná'agaquié' xibá queé' Dios, pero lè'sca' quégaca nupa ta'yéajlè' Dios ca na' guyéajlè' è Abraham Dios. Abraham na' náquié' ca xuz xtó' oru' yúgu'tèru' rè' u, réajlè' èru' -nè' Dios. ¹⁷ Caní náquié' ca na' nazúaj lu guichi lá' ayi, le rnna: "Nuzó'a li' ca xúzgaca bônachi idútè yödzülió."

Caní naca, lahué' Dios, Nu na' guyéajlè' è Abraham, náquié' xuz gudödi queéru' yúgu'tèru'. Dios ni rusubanè' nupa chinátigaca, en ru' è didza' que nu biti' zuíni tscá chizó'a caz nu na' biti' zuíni.

¹⁸ Caní naca tu' gudxè' Dios Abraham na': "Ziántèrö ila'cuá' xzí'ini xí'sú'." Abraham guyéajlè' è Dios, en benè' löza lê na' guxzí' lu nè' è Dios, sal-la' biti' guca ilé'enè' lê na' runè' löza, ate' caní guca, bidéli'nè' náquié' xúzgaca bônachi idútè yödzülió. ¹⁹ Biti' guca Abraham chopá ládxè' è ca na' réajlè' è Dios, sal-la' chiyu' è ca tu gayuá' iz, en yöjnenè' ca naca que le naca cazè', chinati caz tu' chinagúládè' è, enca' ca naca queénu Sara queé', nácanu nigula huódx. ²⁰ Biti' guca chopá ládxè' è, en biti' gúquié' tu' caréajlè' ca naca le guxzí' lu nè' è Dios gunè' queé', pero bidipa ládxè' è tu' guyéajlè' è Dios, ate' gulu' è Dios yöl-la' ba. ²¹ Idú ládxè' è benè' löza Dios, napè' yöl-la' huáca gunè' idútè lê na' guxzí' lu nè' è. ²² Que lê ni na', tu' guyéajlè' è Abraham Dios, Dios buzóé' queé' náquié' tsahui'.

²³ Nazúaj lu guichi lá' ayi le rnna: "Dios buzóé' queé' náquié' tsahui'." Nazúaj lu guichi caní, calégasó para uzi' è xibé Abraham, ²⁴ pero para uzí'iru' xibé ca' rè' u. Ré' u ni, Dios gunè' ga huóácaru' tsahui' lahué' Lè' channó uyéajlè' èru' Lè', busubanè' Xanru' Jesús lu yöl-la' guti. ²⁵ Jesús na', Dios budóè' Lè' para gátié' tu' nözi dul-la' nabága' ru', ate' busubanè' Lè' lu yöl-la' guti, para gaca gunè' ga huóácaru' tsahui' lahué' Lè'.

5

Le rata' queéru' tu' rnnè' Dios nuhuóácaru' tsahui'

¹ Na' a, rnnè' Dios nuhuóácaru' tsahui' lahué' Lè' ni' a que le benè' Xanru' Jesucristo, channó réajlè' èru' Lè', ate' que lê ni na' nuhuóácaru' tuz len Lè'. ² Tu' réajlè' èru' Jesucristo, ruzí'iru' xibé le ruzá' ládxè' è Dios queéru', le rutipa ládxí'ru'. Rudzéjaru' tu' runru' löza uzí'iru' ca' xibé yöl-la' xzón queé' Dios. ³ Calégasó caní rudzéjaru', pero rudzéjaru' ca' cate' riguí' rizáca' ru', tu' chinóziru' le riguí' rizáca' ru' rusedi rè' u cózaru' xzón ládxí'. ⁴ Cate' ribózaru' xzón ládxí' rurúajru' tsahui' lahué' Dios, en cate' chinurúajru' tsahui' runru' löza Lè' gácalen cazè' rè' u. ⁵ Cate' runru' löza Lè', biti' ca' raca chopá ládxí'ru'. Caní naca, tu' nuhuóaj nuldzè' e icja ládxí' do' oru' yöl-la' nadxí' queé' Dios rè' u. Runè' Dios Bó' Lá' ayi, Bónni' gusól-lè' è Dios queéru' ga raca caní.

⁶ Cate' ni' biti' ca' guca uláru' rácasó queéru', cate' gúla'rö dza queé', Cristo gútié' uláz queéru', ni' nácaru' bônachi dul-la'. ⁷ Cuntu nu gué' èni gati uláz queé' tu' bônni' tsahui'. Nadxi ca' nu urugui gati uláz queé' tu' bônni' náquié' idú dxí' a. ⁸ Dios rulu' inè' rè' u ca nadxí' ide' enè' rè' u, tu' gútié' Cristo uláz queéru' cate' ni' nácaru' bônni' dul-la'. ⁹ Chinuhuóácaru' tsahui' lahué' Dios tu' bulaljè' Cristo xichönè', gútié' uláz queéru'. Que lê ni na' chinácada' löza usölè' Lè' rè' u lu dza ichúguié' Dios quégaca bônachi dul-la' gátigaca. ¹⁰ Cate' ni' biti' rilé' èru' -nè' Dios dxí' a, gútié' Xzí' inè' Dios uláz queéru' para huóácaru' tuz len Lè'. Na' a, tu' zoè' nabanè', en chinuhuóácaru' tuz len Lè', chinácada' löza uláru'. ¹¹ Rudzéjaru' lahué' Dios ni' a que le benè' Xanru' Jesucristo, tu' nuhuóácaru' tuz len Dios ni' a que lê na' benè' Lè'.

Le benè' Adán, en le benè' Cristo

¹² Guyú' u dul-la' yödzülió ni tu' nözi le benè' tuzè' bônni', ate' tu' benè' dul-la', guyú' u ca' yöl-la' guti. Que lê ni na' ilátigaca yúgu'tè bônachi tu' nabága' gaca yúgu'tè bônachi dul-la'. ¹³ Zí' atélö ga bidxinté xibá queé' Dios, gulún bônachi yödzülió ni dul-la', pero biti' busubágué' è Dios bônachi na' xíguia' ca nupa ta' dá' b'aga' xibá queé' tu' nözi dul-la' na', tu' biti' ridxini xibá queé' quégaquié'. ¹⁴ Ga gudela' zoè' Adán ga bidxinté zoè' Moisés gulati yúgu'tè bônachi tu' gula' b'aga' dul-la', sal-la' biti' gula' dá' b'aga' tu' le gunná bè' è Dios ca benè' Adán. Nácacaga yúgu'tè bônachi tuz len Adán tu' nácacaga xzí'ini xí'sóé'. Lê ni rulu'í' èru' u ca ilaca tuz len Cristo yúgu'tè nupa ila' yéajlè' Lè'.

¹⁵ Le rúnнасè' queéru' Dios biti' naca ca le guca queéru' tu' nözi dul-la' benè' Adán. Tu' nözi dul-la' benè' tuzè' bônni', ilátigaca yúgu'tè bônachi. Dxí' atèrö naca le ruzá' ládxè' è queéru' Dios, en le rúnнасè' queéru'. Ruzá' ládxè' è queéru' lê ni ni' a que le benè' yetuzè' Bónni', Jesucristo. ¹⁶ Le rúnнасè' Dios queéru' biti' naca ca le guca queéru' tu' nözi dul-la' na' benè'

tuzë' bönni' na'. Le guchúguie' Dios queë' Adán gátië' tu' nözi dul-la' na' benë', guchúguie' ca' Dios quegaca yúgu'të bönachi gátigaca. Le rúnasë' Dios queëru' naca para huóácaru' tsahui' lahuë' Lé' sal-la' nabága'ru' dul-la' zían. ¹⁷ Guyú'u yöl-la' guti tu' nözi dul-la' benë' tuzë' bönni'. Nácaterò löza ila'deli' yöl-la' na'bán nupa ulu'huóáca tsahui' lahuë' Dios tu' zoa le ruzá' ládxë'ë queëru' Dios ni'a que le benë' yetuzë' Bönni', Jesucristo.

¹⁸ Dios guchúguie' quegaca yúgu'të bönachi ilátigaca tu' nözi dul-la' benë' tuzë' bönni' na'. Lësca' caní gaca ulu'huóáca tsahui' yúgu'të bönachi ni'a que le naca tsahui' benë' yetuzë' Bönni' na', gata' yöl-la' na'bán idú quegaquie'. ¹⁹ Bulu'huóáca huen dul-la' bönachi zían tu' cabí benë' tuzë' bönni' ca rnna xtídzë'ë Dios. Lësca' caní ulu'huóáca tsahui' bönachi tu' benë' yetuzë' Bönni' na' ca rnna xtídzë'ë Dios.

²⁰ Guyú'u xibá queë' Dios yödzölió ni para gaca bè'da' nabága'gaca bönachi dul-la'. Tu' guca bè'rò nabága'gaca dul-la', guca bè'rò ca' zköntërò naca le buzá' ládxë'ë Dios quegaca bönachi. ²¹ Guta' yöl-la' huáca unná bè' que dul-la' guti rë'u. Lësca' caní le ruzá' ládxë'ë Dios queëru' napa yöl-la' huáca gun ga huóácaru' tsahui' lahuë' Lé', ate' gata' yöl-la' na'bán idú queëru' ni'a que le benë' Xanru' Jesucristo.

6

Naca tsca chinátiru' para cabirò gunru' dul-la' tu' nabániru'-në' Jesucristo

¹ Bizxi caz innaru' na'a? ¿Naru' gúntaru' dul-la' para gata'rò queëru' le ruzá' ládxë'ë Dios queëru'? ² Biti' gun cázaru' ca'! Naca queëru' ca tsaz chinati cázaru' para cabirò gunru' dul-la'. ¿Naru' gúntica'siru' dul-la'? ³ ¿Naru' cabí nözili' ca na' naca queëru'? Channò bidílaru' nisa para huóácaru' tuz len Cristo, lë na' bidílaru' nisa rulu'f'i rë'u chigudódiru' lu yöl-la' guti tsözxón len Lé'. ⁴ Ca na' guca, gútilenru'-në' Cristo tsözxón, lësca' caní bigáchi'lenru'-në' tsözxón niu' yeru ba cate' ni' bidílaru' nisa. Ca na' busubanë' Dios Cristo lu yöl-la' guti len yöl-la' huáca xón queë', lës caní ca' rë'u nubánlenru'-në' Jesús tsözxón para gácaru' bönachi idütë cubi queë'.

⁵ Channò nunru' Cristo tsözxón, gútiru' ca na' gútië' Lé', lësca' caní gunru'-në' tsözxón, ubanru' lu yöl-la' guti ca na' bubanë' Lé'. ⁶ Chinóz queziru' lë ni, yöl-la' bönachi queëru' le guzóa zí'alò gudá'len Lé' tsözxón lë'e yaga cruz, para initi yöl-la' bönachi queëru' na' bënlenru' le dul-la', para cabirò inná be'e le naca dul-la' rë'u. ⁷ Channò nácaru' tuz len Nu na' guti tu' nözi dul-la', nuhuóácaru' tsahui' lahuë' Dios tu' cabirò nabága'ru' dul-la' na', ate' bití'rò yú'uru' lu na' dul-la'. ⁸ Na'a, channò nátilenru'-në' Cristo tsözxón, réajlë'ëru' ubánlenru'-në' ca' tsözxón, ⁹ tu' chinóziru' bubanë' Cristo lu yöl-la' guti, en bití'rò gátië'. Que lë ni na' bití'rò bí gaca gun yöl-la' guti na' queë' Lé'. ¹⁰ Ca na' guca, gútië' Lé', tu luzuisó gútië' tu' nözi dul-la' quegaca yúgu'të bönachi, pero ca na' naca, zoë' nabanë', nabánlenë' Dios. ¹¹ Lësca' caní ral-la' usáca'li' queëli' naca queëli' ca chinati cázali' para cabirò gunli' dul-la', pero zoáli' nabanli' para gunli' ca rnna xtídzë'ë Dios tu' nácali' tuz len Xanru' Jesucristo.

¹² Que lë ni na', bití' gú'ili' lataj le naca dul-la', para cabí gun ga gunli' dul-la' lu le naca cázali' le gati caz. Biti' gunli' ca naca le rizë ládx'i'li' le ruá' dō', lu le naca cázali'. ¹³ Biti' udödi cuinli' lu dul-la', bití' gunli' le ruá' dō', pero guli'dödi cuinli' lu në'ë Dios tu' nubanli' lu yöl-la' guti, en guli'dödi lu në'ë idütë le naca cázali' para ugúnlenë' le le naca dxi'a. ¹⁴ Biti' gú'ili' lataj le naca dul-la', para cabí gun ga gunli' dul-la', tu' nuzóë' Dios libi'ili', calëga para inná be'e libi'ili' xibá queë', pero para inná be'e libi'ili' le ruzá' ládxë'ë queëru'.

Le rucudzu' didza' ca naca que nu bönni' nadó'o

¹⁵ Bizxi caz innaru' na'a? ¿Naru' gúntaru' dul-la' tu' cabirò rinná be'e xibá queë' Dios rë'u, pero rinná be'e le ruzá' ládxë'ë Dios rë'u? Biti' ca' gunru' caní! ¹⁶ Chinóz quezili' dxi'a channò udödi cuinli' lu në'ë nu bönni' para gácali' bönni' nadó'ogaca queë', en gunli' ca rnna xtídzë'ë, tsaz nácali' bönni' nadó'ogaca queë' bönni' na' runli' ca rnna xtídzë'ë. Lësca' caní gaca channò udödi cuinli' para gunli' dul-la' le gun ga gátili', o channò udödi cuinli' para gunli' ca rnna xtídzë'ë Dios, Nu gun ga huóácali' tsahui'. ¹⁷ Na'a, ¡Xclenë' Dios! Sal-la' zí'alò gúcali' bönni' nadó'ogaca lu na' dul-la', na'a idú ládx'i'li' runli' ca rinná bè' xibá na' budödi cuinli' lu në'e. ¹⁸ Tu' chinulali' lu na' dul-la', nuhuóácali' ca yugu' bönni' nadó'ogaca lu na' le naca dxi'a. ¹⁹ (Ruf'ílena' libi'ili' didza' ca tu'f'i didza' bönachi, tu' cabí réajini'ili' idütë lu yöl-la' bönachi queëli'.) Zí'alò budödi cuinli' len idütë le naca cázali' lu na' le ruá' dō', en lu na' le cabí naca tsahui', ate' gúcali' ca yugu' bönni' nadó'ogaca lu në'eguequi, en benli' xichini le ruá' dō' na'. Na'a, guli'dödi idütë le naca cázali' lu na' le naca tsahui', para gácali' ca yugu' bönni' nadó'ogaca lu në'e, en gunli' xichini lë na' naca tsahui' para gácali' bönachi narúajgaca quez queë' Dios.

²⁰ Cate' ni' nácali' ca yugu' bönni' nadó'ogaca lu na' dul-la', bití' benli' xichini le naca tsahui'. ²¹ Na'a, ¿naru' buzí'itsali' xibé lë na' benli' zí'aló? Na'a lë na' benli' run ga rutuí'ili', en run ga nu gati tsaz. ²² Na'a chinulali' lu na' dul-la', en nácali' ca yugu' bönni' nadó'ogaca

queë' Dios, en ruzí'ili' xibé le run ga nácali' bönachi narúajaga quez queë' Dios, en le run ga dé queëli' yöl-la' na'bán idú. ²³ Lazzaj nu run dul-la' naca yöl-la' guti, pero le rúmasé' Dios queëru' naca yöl-la' na'bán idú, le rata' queëru' tu' nácaru' tuz len Xanru' Jesucristo.

7

Le rucudzu' didza' yöl-la' nutsaga na'

¹ Böcha'ado', núlöli' núnbë'ëli' xibá queë' Dios. Nöz quezili' rinná be'e xibá na' nu bönni' tsanni ni zoë' nabanë' ² Naca queëli' ca naca que tu nigula nutsaga ná'lennu-në' bönni', yú unu lu në'ë bönni' queënu tsanni ni zoë' nabanë' ca rinná be' xibá que yöl-la' nutsaga na', pero channö chinátië', nurúajnu lu na' xibá na'. ³ Caní naca, tsanni ni zoë' nabanë' bönni' queënu, channö utsaga ná'lennu-në' ia'túë' bönni', gunnu dul-la' le riguitsaj xibá que yöl-la' nutsaga na', pero channö chinátië' bönni' queënu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, biti' gunnu dul-la' le riguitsaj xibá que yöl-la' nutsaga na'.

⁴ Lësca' caní raca queëli', böcha'a. Tu' dzágali'-në' Cristo chinati cázali' libí'ili' para cabirö inná be'e libí'ili' le rinná be' xibá na', para guéquili' que Nu yúbölö. Na'a chinéquili' queë' Cristo, Nu na' bubán lu yöl-la' guti. Caní naca, para gaca gunru' le raza ládxe'ë Dios. ⁵ Tsanni ni' guyú'uru' lu na' yöl-la' bönáchisö queëru', le rinná be' xibá na' ben ga gulaca bë' le guzë ládxi'ru' le ruá' dö', le gulún dxin lu idútë le naca cázaru' para ilún ga gátiru'. ⁶ Na'a nuláru' lu na' xibá na' tu' nati cázaru' tsca naca le rinná be' xibá na' gunná be'e rë'u zí'alö. Caní naca para gaca gunru' xichinë' Dios lu yöl-la' na'bán cubi le runné' queëru' Dios Bö' Lá'ayi, en calëga gunru' xichinë' lu lë na' chinaca gula, le naca xibá na'.

Le dzaga neda' le naca dul-la'

⁷ ¿Bizxi caz innaru' na'a? ¿Naru' runtsö xibá queë' Dios ga runa' dul-la'? ¿Biti' ca' run caní! La'tu' cabí buzéajni'i le rinná be' xibá na' neda', biti' gunözda' naca dul-la' le runa'. La'tu' cabí zoa lu xibá na' le rna: "Biti' së ládxi'u le dë que luzó'o", biti' gunözda' naca dul-la' yöl-la' rizé ladxi' le dë que luzá'a. ⁸ Cate' bidxín quia' xibá na', guca bë' le naca dul-la' na' run dxin lu idútë le naca', ate' ben ga gúquibe'eda' rizé ládxa'a yúgu'të le ruá' dö'. Ga biti' ridxini xibá na', biti' naca bë' le naca dul-la'. ⁹ Dza ni'te, zí'atélö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'. ¹⁰ Dios gunná bë'ë xibá na' para gun ga gata' queëru' yöl-la' na'bán, pero ben ga gúquibe'eda' chinati caza'. ¹¹ Guca bë' nazi' yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

¹² Que lë ni na', lá'ayi naca xibá queë' Dios, ate' lá'ayi, en tsahui', en dxi'a naca le gunná bë'ë. ¹³ ¿Naru' bentsö lë na' naca dxi'a ga bidxín quia' yöl-la' guti? ¿Biti' ca' naca ca! Le naca dul-la' bugún dxin lë na' naca dxi'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatërö xihui' yúgu'të le naca dul-la'.

¹⁴ Nöziru' Dios Bö' Lá'ayi bennë' queëru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que. ¹⁵ Na'a, biti' réajni'ida' le runa'. Ré'ënda' guna' ca rinná bë' xibá na', pero biti' runa' lë na' ré'ënda' guna'. Le naca dul-la' le cabí rilé'eda' dxi'a, lë na' runa'. ¹⁶ Runa' dul-la' sal-la' biti' ré'ënda' guna' dul-la' na'. Xibá na' rusëdi neda' naca dul-la' le cabí naca dxi'a. Que lë ni na' naca bë'da' naca dxi'a le rinná bë' xibá na'. ¹⁷ Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'. ¹⁸ Nözda' biti' zóalen neda' le naca dxi'a, o huáca inná, lë na' naca dxi'a biti' zóalen le naca yöl-la' bönáchisö quia'. Ré'ënda' guna' le naca dxi'a, pero la' néda'sö biti' gaca guna' lë na' naca dxi'a. ¹⁹ Biti' runa' le naca dxi'a le ré'ënda' guna', pero rúntica'sa' le biti' naca dxi'a le cabí ré'ënda' guna'. ²⁰ Que lë ni na', channö runa' dul-la' na' biti' ré'ënda' guna', calëga neda' caz runa' le, pero dul-la' na' dzaga neda' run ga runa' dul-la' na'.

²¹ Caní naca le raca queëru' yúgu'tëru'. Cate' ré'ëni'ru' gunru' le naca dxi'a, dzaga rë'u le run ga runru' le ruá' dö'. ²² Lu icja ládxi'da'ahua' raza ládxa'a xibá queë' Dios ²³ pero réquibe'eda' dzaga idútë le naca' le rinná be'e neda', ate' lë ni ridá'bagá' xibá queë' Dios yu'u icja ládxi'da'ahua'. Lë na' dzaga idútë le naca' run ga runa' dul-la'.

²⁴ ¿Bica' bayechi' neda'! ¿Nuzxi caz gaca usólá neda' lu yöl-la' bönáchisö quia' le run ga runa' dul-la'? ²⁵ ¿Xclenë' Dios, chinularu' na' a ni'a que le benë' Xanru' Jesucristo! Que lë ni na', tsca naca le yu'u icja ládxi'da'ahua' runa' ca rinná bë' xibá queë' Dios, sal-la' yöl-la' bönáchisö quia' run ga ré'ënda' guna' dul-la'.

8

Le runru' tu' zóalenë' Dios Bö' Lá'ayi rë'u

¹ Que lë ni na', bití'rō bi xíguia' nabága'gaquië' yugu' bōnni' néquiguequinë' queë' Jesucristo, bōnni' na' bití'rō tunë' ca rë'ëni yōl-la' bōnáchisō quégaquië', pero ca rë'ënë' Dios Bō' Lá'ayi tunë'. ² Tu' naca' tuz len Jesucristo, Dios Bō' Lá'ayi, Nu na' nabániru', rácalenë' neda'. Que lë ni na', nulá' lu lë na' ben ga bena' dul-la', enca' lu yōl-la' guti. ³ Chinunë' Dios le cabí' guca gun xibá na', tu' cabí' bi guzëxi' gun tu' nácaru' bōnáchisō. Dios gusōl-lë'ë Xz'ini cazë', ate' guljé' bōnachi ca nácaru' rë'u, nácaru' bōnachi dul-la', pero bití' bi dul-la' benë' Lë'. Busubaga' cuinë' dul-la' nabága'ru' rë'u, ate' caní' guca, guchúguië' que dul-la' runru' lu yōl-la' bōnáchisō queëru'. ⁴ Caní' benë' para gaca gunru' idútë le naca tshahui' le rinná' bë' xibá queë', núlōru' na' bití'rō runru' ca rë'ëni yōl-la' bōnáchisō queëru', pero ca rë'ënë' Dios Bō' Lá'ayi runru'.

⁵ Bōnni' tunë' ca rë'ëni yōl-la' bōnáchisō quégaquië', tu'í' lādxi'gaquië' le naca que yōl-la' bōnáchisō quégaquië', pero bōnni' tunë' ca rë'ënë' Dios Bō' Lá'ayi, tu'í' lādxi'gaquië' le naca queë' Dios Bō' Lá'ayi. ⁶ Channō ru'í' lādxi'siru' le naca que yōl-la' bōnáchisō queëru', tsaz gátiru', pero channō ru'í' lādxi'ru' le naca queë' Dios Bō' Lá'ayi, chidë' yōl-la' na'bán idú queëru', en ribōzaru' dxi lādxi'. ⁷ Nútí'tës nu ru'í' lādxi'sō le naca que yōl-la' bōnáchisō que, bití' rilé' e Dios dxi'a, tu' cabí' run nu na' ca rinná' bë' xibá queë' Dios, en bití' ca' gaca gun caní'. ⁸ Que lë ni na', bōnni' na' tunë' ca rë'ëni yōl-la' bōnáchisō quégaquië' bití' gaca ilunë' le raza lādxi'ë' Dios.

⁹ Na'a, bití'rō runli' ca rë'ëni yōl-la' bōnáchisō queëli', pero runli' ca rë'ënë' Dios Bō' Lá'ayi tu' zóalen cazë' Lë' libí'ili'. Tu bōnni' bití' zóalenë' Dios Bō' Lá'ayi lë', Nu na' risōl-lë'ë Cristo queëru', bití' néquinë' queë' Cristo. ¹⁰ Tu' zóalenë' Cristo libí'ili', chinati caz idútë le guca cázali' tu' nōzi dul-la', ate' na' a nabánili'-në' Dios Bō' Lá'ayi tu' tunë' Dios libí'ili' tshahui'. ¹¹ Bō' Lá'ayi queë' Dios, Nu na' busubán Jesús lu yōl-la' guti, zóalenë' libí'ili'. Lë' cazë' Dios, Nu busubán Jesucristo lu yōl-la' guti, runë' ga nubanli' lu idútë le gúcali' le rati cazë'. Caní' nunë' tu' zóalenë' Dios Bō' Lá'ayi libí'ili'.

¹² Que lë ni na', libí'ili' bōcha'a, dë tu le ral-la'ru', pero calëga que yōl-la' bōnáchisō queëru', para cabirō gunru' ca rë'ëni yōl-la' bōnáchisō queëru' na'. ¹³ Channō runli' ca rë'ëni yōl-la' bōnáchisō queëli', gátili' tsaz, pero channō len yōl-la' huáca queë' Dios Bō' Lá'ayi runli' ga ila'niti le runli' lu yōl-la' bōnáchisō queëli', gata' yōl-la' na'bán idú queëli'.

¹⁴ Yúgu'të nupa tun ca rë'ënë' Dios Bō' Lá'ayi nácacaca xz'inë' Dios. ¹⁵ Dios Bō' Lá'ayi na' zóalenë' libí'ili' bití' nuzóë' libí'ili' leyúbólō ca bōnni' nadó'ogaca para gadxi idzōbili', pero chinunë' ga nácali' xz'inë' Dios caz, en runë' ca' ga rulidzaru'-në' Dios, rnrna: "Abba", le rnna: Dad. ¹⁶ Lë' cazë' Dios Bō' Lá'ayi ruzéajni'inë' bō' naca cázaru', en runë' ga nōziru' nácaru' xz'inë' Dios. ¹⁷ Channō chinácaru' xz'inë' Dios, gata' ca' queëru' tsōzxon len Cristo le nequi queë' Xúziru' Dios. Caní' gaca queëru' channō riguí' rizáca' lenru'-në' tsōzxon Cristo para uzí'iru' xibé tsōzxon len Cristo yōl-la' xzōn queë' Dios.

¹⁸ Runi neda', yugu' lë ni riguí' rizáca'ru' na' a naca tu le cuídí' do'os tscá naca yōl-la' xzōn na' gata' queëru' dza si' za'. ¹⁹ Ta'bōza yúgu'të le nunë' Dios, en ta'zë lādxi'gaca idxintë dza na' ulu'ë lahui Dios yugu' bōnni' nácacagaquië' xz'ini cazë'. ²⁰ Yúgu'të lë na' nunë' Dios gula'dōdi lu na' le run ga ila'niti, calëga tu' gulë'ëni caz gaca caní, pero tu' benë' Dios ga naca caní. Benë' ca' ga naca lōza que idútë lë na' nunë', ²¹ ate' ulu'lágaca yúgu'të le nunë' Dios lu lë na' run ga ila'niti. Caní' gaca, yúgu'të lë na' ulu'z'í' ca' xibé yōl-la' rusólá le nazáca'da' na' ulu'z'í'ë xibé yugu' xz'inë' Dios. ²² Nōziru' ta'gu'í' ta'zaca' yúgu'të le nunë' Dios ga ridxintë na' a dza, ca na' riguí' rizáca'nu tu nígula chízōa sóabi' bí'ido' queënu'. ²³ Riguí' rizáca'a, calëgasō yōdzōlió ni, pero riguí' rizáca'ru' ca' rë'u, sal-la' zóalenë' Dios Bō' Lá'ayi rë'u, Nu na' naca queëru' le rulu'í' rë'u ca ral-la' gaca cázaru'. Riguí' rizáca'ru' tsanni ni ribōzaru' dza ni' ulu'ë lahui Dios nácaru' idú xz'inë', dza ni' únë' ca' idútë le naca cázaru'. ²⁴ Tu' runru' lōza lë ni, nuláru' rë'u, pero channō gaca ilé'eru' lë na' runru' lōza, bití' naca tu le ribōzaru'. Bití' ribōzaru' le chirilé'eru'. ²⁵ Na'a, channō runru' lōza tu le cabí' gaca ilé'eru', lu yōl-la' ribōza xzōn lādxi' ribōzaru' le.

²⁶ Lësca' caní' rácalenë' Dios Bō' Lá'ayi rë'u cate' rudú lādxi'ru', tu' cabí' nōziru' bi ral-la' inábiru'-në' Dios, pero Lë' cazë' Dios Bō' Lá'ayi rudōdë' xtídza'ru' lahuë' Dios, ate' lu yōl-la' rinaba yudxi queë' rinnëda' lādxi'ë', tscá cabí' gaca nu inná. ²⁷ Dios ruyúé' le yu'u icja lādxi' do' gaca bōnachi, en nōzinë' le rë'ënë' innë' Dios Bō' Lá'ayi na', ate' Lë', ca rë'ëni queézinë' Dios, rudōdë' xtídza' gaca nupa néquiguequi quez queë' Cristo lahuë' Dios.

Nadéli'tërōru' tu' zóalenë' Cristo rë'u

²⁸ Nōziru' tu'z'í'ë xibé bōnni' yúgu'të le raca quégaquië', bōnni' na' nadxí'iguequinë' Dios, ate' bulidzë' Dios légaquië' ca nuzōa cazë' gunë'. ²⁹ Yugu' bōnni' na' gurō cazë' queë' Dios z'í'atëlō, buzōë' ca' quégaquië' z'í'atëlō ilácagaquië' ca naca cazë' Xz'inë', para gáquië' Xz'inë' lo ladaj zían bōché'ë. ³⁰ Nupa na' buzōë' Dios quégaquië' z'í'atëlō ca ral-la' ilácagaquië', bulidzë' ca' légaquië', ate' yugu' bōnni' na' bulidzë', benë' légaquië' tshahui', ate' yugu' bōnni' na' benë' légaquië' tshahui', benë' ga tu'z'í'ë ca' xibé yōl-la' xzōn queë'.

³¹ ¿Bizxi caz innaru' na'a ca nácagaca lè ni? Channö rácalenë' Dios rë'u, bití' ral-la' gádxiru' sal-la' bi ilún bönachi queëru'. ³² Dios, idú ládxe'ë bennë' queëru' Zxí'ini cazë'. Budödë' lë' para gútië' uláz queëru'. Channö caní benë' Dios, ¿naru' cabí gúnnadë'ë queëru' tsözxón len Zxí'inë' yúgu'të le dë? ³³ ¿Nuzxi caz gaca bi usubaga' nupa na' gurö cazë' queë' Dios? ¿Cuntu nu gaca, tu' run cazë' Dios ga nuhuóácaru' tsahui! ³⁴ ¿Nuzxi caz gaca ichugu queëru' gátiru'? ¿Cuntu nu gaca, tu' guti cazë' Cristo uláz queëru', en le nácáro lo, hubanë' lu yöl-la' guti, atë' na'a zoë' nu caita lë'ë ibëla Dios ga nácaterë' zxon, atë' rnnë' dxi'a uláz queëru' lahuë' Dios! ³⁵ Sal-la' bi raca queëru', nöz queziru' nadxí'inë' Cristo rë'u. Nöziru' nadxí'inë' rë'u: sal-la' riguí' rizáca'ru', o sal-la' risëbi ládxi'ru', o sal-la' ta' bía ládxi'gaca bönachi rë'u, o sal-la' ridunru', o sal-la' riyadzaj le gácuru', o sal-la' zoa bönadxi queëru', o sal-la' ilútië' bönni' rë'u.

³⁶ Ca nácagaca lë ni nazúaj lu guichi lá'ayi, rnna: Tu' néquitu' quiu' Li', túntica'sö bönachi ga gátitu'. Nácatu' ca yugu' bö'cu' zxila', nadödígacaba' lu na' nu guti légacaba'.

³⁷ Na'a, tu' zóalen rë'u Nu na' nadxí'i rë'u, nácaterö löza idéli'ru' lu le raca queëru'. ³⁸⁻³⁹ Que lë ni na' runi neda': Bití' bi sequi' gun ga bití'rö idxí'inë' Dios rë'u. Nadxí'inë' rë'u tu' néquiru' queë' Xanru' Jesucristo. Bití' sequi' gun caní yöl-la' guti o yöl-la' na' bán, o yugu' gubáz lá'ayi o nupa ta'nná bë', o yugu' yöl-la' huáca que tu' xihui', o bití'tës bi zoa o bití'tës bi si' za', o tu le dë xitsá'alö o tu le dë cadxí'ilö, o bití'tës bi nunë' Dios.

9

Dios gurö cazë' queë' bönachi Israel

¹ Ruá'a didza' idútë li tu' néquida' queë' Cristo, atë' röjlöz didza' ni le naca queë' Dios Bô' Lá'ayi le yu'u icja ládxi'da'ahua'. ¿Bití' rizi' yë'a! ² Ruhuí'inide'eda', en risëbitica'sö ládxa'a ³ tu' raca ládxa'a guna' ga ulu'lë' böchi' luzá'a, bönni' uládz quia'. La'tu' huácalen légaquië', guë'ëni quézida' ubéaj ládxe'ë Dios neda', en ulá'alena' Cristo. ⁴ Yugu' bönni' uládz quia' na' nácagaquië' zxí'ini xi'sóë' Israel, atë' Dios bë'ë légaquië' lataj ilácagaquië' zxí'ini cazë'. Yöl-la' zxon queë' Dios guzóalen légaquië', atë' Dios budödë' lu ná'agaquië' didza' rucá'ana tsahui', enca' xibá queë'. Bulidzë' légaquië' para tseaj ládxi'gaquië' Lë', atë' budödë' lu ná'agaquië' yugu' le guzxi' lu në'ë gunë' le ilún tsahui' bönachi. ⁵ Nácagaquië' zxí'ini xi'sóagaquië' xuz xtó'otu' Abraham, en Isaac, en Jacob, atë' ladaj dí'a dza quegaquië', ca naca yöl-la' bönachi queë', guljé' Cristo, Nu naca caz Dios, en rinná bé'enë' yúgu'të. ¿Rácatica'sö queë' yöl-la' ba! ¿Ca' gaca!

⁶ Sal-la' yúgu'të bönni' uládz quia' bití' nazí' lu ná'agaquië' Cristo, bití' ral-la' innaru': Nítis böaca xtídzë'ë Dios. Caléga yúgu'të zxí'ini xi'sóë' Israel nácagaquië' idú bönachi Israel, nupa néquiguequi queë' Dios. ⁷ Sal-la' gúljagaquië' zían zxí'ini xi'sóë' Abraham, bití' guláquië' yúgu'të idú zxí'ini xi'sóë' Abraham, pero guca ca na' nazúaj lu guichi lá'ayi, le rnna: "Yugu' zxí'ini xi'sóë' Isaac ilaca idú zxí'ini xi'sú'." ⁸ Caní naca, nupa nácagaca zxí'inë' tu bönni' néquinë' queë' Dios, caléga yúgu'të nácagaquië' zxí'inë' Dios. Lësca' caní, nácagaca idú zxí'ini xi'sóë' Abraham núpasó na' náljagaca ni'a que lë na' guzxi' lu në'ë Dios. ⁹ Lë na' guzxi' lu në'ë Dios unödzejë' queë' Abraham rnna caní: "Ia'tú iz na'a dza huóda', atë' Sara quiu' uzóanu-bi' tubi' bi'i bönni'do'."

¹⁰ Calégasó lë ni guca caní, pero lësca' cate' Rebeca ni' nuá'anu-bi' yugu' bi'i bönni'do' queë' Isaac, xuz xtó'otu', ¹¹⁻¹³ cate' ni' si' iláljabi', en bití' bi núnigacabi' le naca dxi'a o le ruá'dó', Dios gudxë'-nu Rebeca na', gunné': "Bi'i bönni' zí'aló quiu' gumbi' xichinbi' bi'i buropi." Didza' ni röjlöz lë na' nazúaj lu guichi ca gunné' Dios, le rnna: "Bidxí'ida'-në' Jacob, en caléga Esau." Caní guca, bugá'ana tsutsu le buzöjé' tsaz Dios ca naca lë na' chigurö cazë'. Que lë ni na' bití' raca caní ni'a que tu le gaca ilún bönachi, pero naca caní tu' ribö cazë' Dios nu rulidzë'.

¹⁴ ¿Bizxi caz innaru' na'a? ¿Naru' runtsë' Dios le cabí naca tsahui'? ¿Bití' ca' runë' caní! ¹⁵ Dios gudxë' Moisés, gunné': "Huéchi' ládxa'a nu ré'ënda' huéchi' ládxa'a, en gü'i ládxa'a nu ré'ënda' gü'i ládxa'a." ¹⁶ Que lë ni na', bití' raca caní ni'a que le té'ëni caz bönachi, o tu' runë' bayudxi nu bönni', pero naca tu' ré'ëni quézinë' Dios, ruhuéchi' ládxe'ë bönachi. ¹⁷ Ca naca lë ni nazúaj lu guichi lá'ayi ca na' Dios gudxë' Faraón, gunné': "Que lë ni na' buzóa' li' ga rinná bë'u para ulu'a lahui yöl-la' huáca quia' ga zu', en guna' ga ilunbë' bönachi idútë yödzólió

le naca' neda'." ¹⁸ Caní naca, Dios ruhuéchi' ládxë'ë nu rë'ëni quézinë', en lësca' caní runë' zidzaj icja ládxi'da'ahuë' nu bönni' rë'ënë' gunë' zidzaj icja ládxi'da'ahuë' bönni' na', ca na' benë' queë' Faraón na'.

¹⁹ Na'a guiëli' neda': "Channö caní naca, ¿bizx que rusubáguë'ë Dios bönachi xíguia'? ¿Nuzxi caz gaca tá'baga' le rë'ëni quézinë' Dios gunë'?" ²⁰ ¡Biti' ca' naca caní! ¿Nuzxi caz lí' rnnio' que Dios? ¿Naru' huácatsö tu yusu' néquini yu gufë bönni' huen rö'ö, inná: "¿Bizx que benu' neda' caní?" ²¹ ¿Naru' cabí dë lu në'ë bönni' huen rö'ö gunë' que guna' na' tu yusu' nu ugún le dxin ga liná', en que la' guna' ná'asö gunë' ia'tú yusu' nu ugún le dxin ga bití' naca liná'?

²² Rë'ëni quézinë' Dios ulu'ë lahui ca gunë' xíguia' nu ruá' dö' en gunë' ga gaca bë' yöl-la' huáca queë', pero lu yöl-la' riböza zxon ladxí' queë' biá' gulënë' yugu' bönni' ni' ral-la' ichúguië' quégaquië', yugu' bönni' na' nabága'gaquië' xíguia', en run bayudxi usunitië' légaquië'. ²³ Caní runë' Dios para gaca bë' nácatërö lesaca' yöl-la' ruzá' ladxí' queë', lë na' rulu'ë lahui lógaca nupa na' ruhuéchi' ládxë'ë, bönni' na' buzóë' quégaquië' zí'atëlö ulu'zi'ë xibë yöl-la' zxon queë'. ²⁴ Yugu' bönni' caní bulidzë' Dios. Calëgasö bulidzë' netu', bönachi judío, pero lësca' bulidzë' bönachi izá'a. ²⁵ Ca naca lë ni nazúaj lu guichi lá'ayi ca na' bë'ë didza' Oseas uláz queë' Dios, gunnë':

Nupa bití' nácgaca bönachi quia',

gu'a láguequi: Bönachi quia',

ate' nupa na' bití' bidxí'ida',

gu'a láguequi: Nupa nadxí'ida'.

²⁶ La' ná'asö ga gunniá' quéguequi:

"Bití' nácali' bönachi quia'",

si' láguequi: "Yugu' zxi'inë' Dios ban."

²⁷ Na'a, ca naca quégaca zxi'ini xi'sóë' Israel, Isaías gunnë':

Sal-la' ila'yanë' zxi'ini xi'sóë' Israel,

en iláquië' tsa naca yuzxi tu ra' yegu zxon,

ulu'lë' nabábasë'.

²⁸ Xanru' Dios la' guntë' ga gaca idütë

lë na' ichúguië' quégaca bönachi yödzölió ni.

²⁹ Lësca' caní Isaías bë'ë didza' zí'atëlö, gunnë':

Dios, Xanru' unná bë' idú,

la'tu' cabí bucá'anë' queëru' yugu' zxi'ini xi'sóaru',

ugá'anaru' ca yödzö Sodoma, en yödzö Gomorra,

yugu' yödzö na' busunitië' Dios.

Bönachi Israel, en didza' dxi'a

³⁰ ¿Bizxi caz innaru' na'a? Yugu' bönni' bití' nabábagachië' Israel chibila'déli'në' nuhuóacagaquië' tsahui' lahuë' Dios, en bití' gulunë' bayudxi ulu'huóachië' tsahui' lahuë' Dios, pero nuhuóacagaquië' tsahui' tu' ta'yéajlë'ë Dios. ³¹ Na'a, sal-la' gulunë' bayudxi yugu' bönni' Israel ilunë' ca rinná bë' xibá queë' Dios, le ral-la' gun ga ilácgachië' tsahui', bití' bila'déli'në' le ral-la' gata' quégaquië' tu' tunë' ca rinná bë' xibá na'. ³² ¿Bizx que na' guca caní? Caní guca, tu' cabí gulunë' caní lu yöl-la' réajlë' quégaquië' Dios, pero rácasö quégaquië' gulë'ënnë' ilunë' ca rinná bë' xibá na', ate' que lë ni na' gula'chíxinë', o huáca innaru': Yöjchëgu'gaquië' lu lë na' nazí'i le: Guiöj Ga Nu Rójchegu'. ³³ Ca naca lë ni nazúaj lu guichi lá'ayi, rnna:

¡Buli'yú! Uzóa'-në' yödzö Sión bönni' na'

gáquië' ca tu guiöj ga nu tsöjchegu',

guiöj na' gun ga nu ichixi inigui.

Nu tséajlë' Lë', bití' ca' utufi' nu na'.

10

¹ Libí'ili', böcha'ado', le rizë ládxa'a, en le rinábida'-në' Dios gunë' quégaca bönachi Israel naca gunë' ga ulu'lë'. ² Runa' ba nalí quégaquië', idú ládxi'gaquië' tu'i ládxi'gaquië' Dios, pero calëga len yöl-la' réajni'i idú. ³ Bití' nözguequinë' ca runë' Dios, runsë' ga nácaru' tsahui', pero té'ënnë' ilún cuíngachië' tsahui' rácasö quégaquië', en bití' ta'cu'ë nöxaj ladxí' lahuë' Dios para gaca gunë' légaquië' tsahui'. ⁴ Budxi benë' Cristo le rë'ëni gun xibá queë' Moisés, benë' ga gaca ulu'huóaca tsahui' yúgu'të nupa ila'yéajlë' Lë'.

⁵ Ca naca que nu huóaca tsahui' tu' run ca rinná bë' xibá queë' Dios, buzúajë' Moisés lu guichi le rnna caní: "Bönni' na' gunë' idütë ca rinná bë' xibá na', soë' ibanë' tu' gunë' caní." ⁶ Na'a, ca naca que nu huóaca tsahui' tu' réajlë' Dios, rnna caní: "Bití' innó' lu icja ládxi'do', bití' innó': ¿Nuzxi caz cuen ni' yehua' yubá?" Lë ni naca, para gun nu na' ga huötjë' Cristo, ⁷ en bití' innó': "¿Nuzxi caz huötaj ga dë lataj que nupa chinátigaca?" Lë ni

naca, para gun nu na' ga cuenë Cristo, urúajë' lu yöl-la' guti. ⁸ Na'a, ¿bizxi caz rnna? Caní rnna: "Gala' ga zu' zoa caz xtídzë'ë Dios. Lu ru'u, en lu icja ládxi'do'o zoa xtídzë'ë na'." Lë ni naca didza' que le réajlë'ëru' Dios runtú' libán que, rnnatu': ⁹ "Channö didza' gu'u gaca bë' Jesús náquië' Xanu', en uyéaj lë'u idú ládxi'u Dios busubanë' Lë' lu yöl-la' guti, uló' li'." ¹⁰ Lu icja ládxi'do'oru' réajlë'ëru' Jesús para gácaru' tsahui', ate' len didza' ru'íru', rulu'íru' lahui le náquië' Jesucristo para uláru'.

¹¹ Nazúaj lu guichi lá'ayi le rnna: "Biti' ca' ulu'tuí'i yúgu'të nupa ta'yéajlë' Lë'." ¹² Dios, la' tuz ca ru'í ládxië'ë yugu' bönni' judío, enca' yugu' bönni' iduté yödzölió, tu' Lë cazë' Xanru' náquië' Xángaqüië' yúgu'të, en nápadë'ë bi unödzejë' quégaca yúgu'të nupa tu'lidza Lë'. ¹³ Ca naca lë ni nazúaj lu guichi lá'ayi, rnna: "Ulu'lá yúgu'të nupa ulu'lidza Lë' Xanru'." ¹⁴ ¿Nacxi gaca ulu'lidzë' Lë' channö cabí ta'yéajlë'ë Lë'? ¿Nacxi gaca ila'yéajlë'ë Lë' channö catu caz bila'yönnë' ca naca queë'? ¿Nacxi gaca ila'yönnë' channö cuntú nu zoa nu gun libán lógaquië'? ¹⁵ ¿Nacxi caz gaca ilunë' libán channö cuntú nu isöl-la' légaquië'? Ca naca lë ni nazúaj lu guichi, rnna: "Bica' bágaca nupa na' ila'dxinë' ga nacua' bönni' rójéngaqüië' libán que le ribequi dxi ládxi'ru', en tunë' libán que didza' dxi'a."

¹⁶ Na'a, calëga yúgu'të' gula'z'í lu ná'agaquië' didza' dxi'a. Ca naca lë ni, Isaías gunné': "Xan, ¿nuzxi caz guyéajlë' le bentu' libán que?" ¹⁷ Caní naca, ila'yéajlë' Lë' nupa ila'yöni, ate' lë na' ral-la' ila'yöni naca didza' ru'ë' Cristo.

¹⁸ Na'a rnniá': ¿Naru' cabí bila'yönnë'? Le nácatë bila'yönnë', ca na' nazúaj lu guichi lá'ayi, le rnna:

Iduté yödzölió bila'yöni chí'igüequi.

Yúgu'të lataj bila'dxín xtídza'guequi.

¹⁹ Lë'sca' rnniá': ¿Naru' cabí guléquibe'enë' bönni' Israel lë ni? Le nácatë guléquibe'enë' le. Ga risí lo, bë'ë didza' Moisés uláz queë' Dios, gunné':

Gun caza' ga uzxé'eli',

tu' idxí'ida' bönachi bití' nabábagaca libí'ili'.

Ni'a quégaca bönachi cabí ta'yéajni'i guna' ga leli'.

²⁰ Gudödi ni' gúcadë'ë rugu ladxí' Isaías na', en bë'ë didza' uláz queë' Dios, gunné':

Bila'dzöli neda' nupa bití' gula'guilaj neda'.

Bulu'í lahua' lógaquië' bönni' bití' bi gula'nábinë' neda'.

²¹ Na'a, ca naca quégaquië' bönni' Israel, Isaías na' bë'ë didza' uláz queë' Dios, gunné': "Idú dza bulí na'a, bulidza' bönachi bití' túngaca ca rnna xtídza'a, en ta'dá'baga' neda'."

11

Nupa nulágaca ladaj bönachi Israel

¹ Na'a rnniá': ¿Naru' nusán në'ë Dios bönachi Israel? ¡Biti' ca' naca caní! Neda' caz naca' bönni' Israel. Naca' xzí'ini xi'sóë' Abraham, en nababa' di'a dza queë' Benjamín, xzí'ini cazë' Israel na'. ² Dios bití' nusán në'ë bönachi queë', nupa na' gurö cazë' queë' dza ni'te. ¿Naru' cabí núnbë'ëli' lë na' nazúaj lu guichi lá'ayi ca na' benë' Elías? Bulidzë' Dios, en buzégüië' bönachi Israel didza', gunné': ³ "Xan, chigulútië' bönni' gulu'ë didza' uláz quiu', en bulu'quinnajë' yugu' bucugu lá'ayi quiu' ga buzéguigacatu'-ba' bôa' bédxido' lo' Li'. Tuza' neda' nagá'ana' quiu', ate' té'ënnë' ilútië' ca' neda'." ⁴ Na'a, ¿bizxi didza' bubi'ë Dios? Caní gunné': "Nun chí'igaca caza'-në' quia' tsónnalalaj yu' chí gáyu'ë bönni' bití' tu'zechu xzibigaquië' lo budó' guiöj na' nazí'í le Baal." ⁵ Lë'sca' caní naca dza ni zóaru' na'a, nagá'anagaca bal-la bönachi Israel, nupa na' gurö cazë' queë' Dios tu' ruzá' ládxië' caní quégaquië'. ⁶ Channö naca le ruzá' ládxië'ë caní quégaquië', bití' naca ni'a que tu le gaca ilunë'. La'tu' guca ni'a que tu le gaca gunru', lë na' ruzá' ládxië'ë queëru' Dios bíti'rö gaca tu le ruzá' ládxië'ë queëru'.

⁷ ¿Bizxi caz innaru' na'a? Lë na' gula'guiljë' bönni' Israel, bití' bila'déli'në', pero chibila'déli' le nupa ni' gurö cazë' queë' Dios, ate' ia'zica'rë' na', Dios benë' zidi icja ládxi'do'gaquië'. ⁸ Ca naca lë ni nazúaj lu guichi lá'ayi, rnna: "Dios benë' ga nácaquië' chul-la niti'." Caní benë', en sal-la' gaca ila'lé'enë' le runë', en ila'yönnë' xtídzë'ë, bití' ca' ta'yéajni'inë'. Caní naca quégaquië' ga ridxintë dza ni zóaru' na'a. ⁹ Ca naca lë ni bë'ë ca' David didza', gunné': Yugu' laní quégaquië' ulu'huó'aca le ila'zön légaquië',

en ca tu yalaj ga ila'rölinë'.

Ilaca ca' le ilún ga ila'chíxinë',

en ca tu le uzí' lëbi légaquië'.

¹⁰ Ila'chul-la guiöj lógaquië', para cabí ila'lé'enë'.

Ila'yechu tsaz cúdzu'gaquië' tu' ilu'ë yua'.

Ca gaca ulu'lagaca bönachi bití' náca gaca judío

¹¹ Na'a rnníá: ¿Naru' gula'chixiné' yugu' bönni' judío ga bidxinté gula'nítié' tsaz? ¡Biti' ca' guca ca'! Gula'dá'bagué'è xtídzè'è Dios, ate' na'a Dios ru'è lataj ulu'lágaca nupa biti' náacagaca judío para guné' ga ulu'zxé'ené' yugu' bönni' judío léguequi. ¹² Le guluné' bönni' judío, gula'chixiné', ben ga bidxín quégaca bönachi yódzólió ni le naca ca tu yöl-la' tsahui'. Channó caní guca, guta' yöl-la' tsahui' quégaca nupa biti' náacagaca judío tu' gula'nítié' yugu' bönni' judío, zxóntèrö gaca le gata' quéguequi cate' yugu' bönni' judío na' ulu'huóáquié' queé' Dios.

¹³ Na'a rea' libí'ili' biti' nácali' judío, rnníá: Tu' naca' gubáz nasól-lè'è Dios lógaca nupa biti' náacagaca judío, runa' zxón lè na' dè lu na'a ¹⁴ para nadxi ca' huáca guna' ga ulu'zxé'ené' bönni' uládz quia' libí'ili', en caní guna' ga ulu'lè' bal-lè'. ¹⁵ Channó bulu'huóáca bönachi nacuá' idú yódzólió queé' Dios tu' bulu'nítié' yugu' bönni' judío xilátjagaquié', zxóntèrö gaca le gata' quéguequi cate' ulu'huóázié' xilátjagaca cazé' na'. Gaca ca raca cate' tu' bángaca nupa chinátigaca. ¹⁶ Channó rigú'uru' quez queé' Dios cúa nílado' rubéajru' zí'aló, lèsca' cúa na' nage'ana naca quez queé', en channó uzóaru' quez queé' Dios luí yaga, lèsca' ilaca quez queé' ni'a nè'e yaga na'.

¹⁷ Náacagacié' bal-lè' bönni' judío ca ni'a nè'e tu yaga olivo narúgugaca, ate' libí'ili', ca ni'a nè'e tu yaga olivo gu'á, yójtá'ali' yaga olivo dxi'a na', en buázili' xilátjagaca nupa na' gurúgugaca, en ruzí'ili' xibé luí, en xichóni yaga olivo dxi'a na'. ¹⁸ Que lè ni na', biti' gun ba zxón cuinli', biti' uzóali' tsólá'aló nupa náacagaca ca ni'a nè'e na' narúgugaca. Channó run ba zxón cuinli', ral-la' inózili' caléga libí'ili' rugáguli' luí yaga na', pero luí yaga na' rugagu libí'ili'.

¹⁹ Nadxi ca' innó: "Gula'rugu ni'a nè'e yaga na' para gaca tsázia' neda' xilátjagaca."
²⁰ Nácaté didza' ru'u, pero gula'rúgié' tu' cabí gula'yéajlè'è, ate' yójtó'o li' yaga na' tu' réajlè'u Dios. Que lè ni na', biti' ral-la' gun ba zxón cuinu', pero ral-la' gádxinu' Dios. ²¹ Channó bené' Dios léguequi xíguia', nupa na' náacagaca caz ni'a nè'e yaga dxi'a na', ¿naru' cabí guné' xíguia' ca' li'? ²² Buyútsóca' na' ca náquié' dxi'i ladxi' Dios, en ca rúndè'è ca' xíguia'. Le nácaté rúndè'è xíguia' nupa na' gula'chixi, pero náquié' dxi'i ladxi' len li'. Que lè ni na', ral-la' gúntica'su' ca sa'yéaj yöl-la' dxi'i ladxi' queé' na', para cabí ichúgié' ca' li' lu yaga queé' na'. ²³ Lèsca' caní gaca quégaquié' channó cabí ulu'gá'ané' lu yöl-la' cabí réajlè' quégaquié', tsójtá'gaquié' leyúbólö lu yaga na', tu' napé' Dios yöl-la' huáca guné' ga tsójtá'gaquié' le leyúbólö. ²⁴ Nacu' li' ca tu ni'a nè'e gurugu lu yaga olivo gu'á, en yójtó'o yaga olivo dxi'a ga cuntú nu udá' tu ni'a nè'e yaga gu'á. Yénni'tèrö huáca quégaquié', náacagaca cazé' ni'a nè'e yaga dxi'a na', huáca tsójtá'gaquié' leyúbólö lu yaga quéguequi cazé' na'.

Ca gaca ulu'lágaca bönachi Israel

²⁵ Bócha'ado', ré'ènda' inózili' lè ni bigachi', para cabí gun ba zxón cuinli' ca naca yöl-la' réajni' queé'li'. Bulu'huóáca bal-la bönachi Israel zidi ladxi', ate' caní lláquié' ga idxinrö dza chinayázgaca yúgu'té bönachi biti' náacagaca judío ga rinná bè'è Dios, nupa na' ral-la' ulu'lágaca. ²⁶ Tódi na' gata' lataj ulu'lè' ca' yúgu'té bönni' Israel, ca' na' nazdaj lu guichi lá'ayi, rna:

Irúaj yódzö Sión Nu rusólá,
en ugúa le ruá' dō' nabága'gaca zxi'ini xi'sóé' Jacob.

²⁷ Lè ni naca didza' dzaga gúnlena' légaquié' cate' ugúa' dul-la' nabága'gaquié'.

²⁸ Caní naca, gula'dá'bagué'è didza' dxi'a, ate' Dios guléaj ládxé'è légaquié' para gaca uláli' libí'ili', pero nadxi'iné' ca' légaquié', tu' guró cazé' queé' xuz xtó'ogaquié'. ²⁹ Tsaz runódzjé' Dios le runódzjé', en tsaz rulidzé' bönachi. ³⁰ Ca na' naca queé'li', zí'atélö biti' benli' ca rna xtídzè'è Dios, ate' na'a ruhuéchi' ládxé'è Dios libí'ili' tu' cabí guluné' yugu' bönni' judío ca rnné'. ³¹ Lèsca' caní naca quégaquié' na'a, biti' tuné' ca rnné' Dios, pero caní gácasó ga idxinrö dza huéchi' ládxé'è Dios légaquié', ca ruhuéchi' ládxé'è libí'ili' na'a. ³² Dios guléaj ládxé'è yúgu'té bönachi para ila'dá'bagué'è xtídzè'è, para gaca huéchi' ládxé'è yúgu'té'.

³³ Zxóntèrö naca yöl-la' tsahui' queé' Dios, lè na' naca yöl-la' huáca zxón, en yöl-la' réajni' queé'. Cuntu nu gaca tséajni' i le nuzóé' Dios guné', en biti' gaca nu inózi yugu' le runé' Dios. ³⁴ ¿Nuzxi caz guyéajni' i le guzá' ládxé'è Xanru'? ¿Nuzxi caz buzéajni' i Lè'? ³⁵ ¿Nuzxi caz bi bunódzaj queé' Dios para gun bayudxi bi ubi'è Dios que? ³⁶ Yúgu'té le dè narúajgaca lu nè'è Dios, en taca lu nè'è, en náacagaca para uzi'è xibéquequi. ¡Gácatíca'só queé' Dios yöl-la' ba! ¡Ca' gaca!

12

Ral-la' udödi cuinru' quez queé' Dios

¹ ¡Bóchi' luzá'ado'! ¡Ruhuéchi' ládxé'è Dios rè'u! Que lè ni na' ráta'yua' loli' udödi cuinli' lu nè'è Dios, gácali' ca tu le naca ban rigú'uru' lahué' Dios, para gácali' quez queé', le gaca tu

le tsaza ládxë'ë Dios. Lë ni ral-la' gunli', ca sa'yéaj le reaj ládxiru'-në' Dios. ² Biti'rö gunli' la' lëbisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja ládxido'oli'. Guli'gún caní para gaca inózili' le naca dxi'a rë'enë' Dios gunli', lë na' raza ládxë'ë, en le naca idú.

³ Na'a, tu' zoa le buzá' ládxë'ë quia' Dios, rea' yúgu'tëli': Biti' gun ba zxon cuinli', le cabí ral-la' gunli', pero ral-la' gácali' nòxaj ladxi' ca ribequi'icjali', tsca bönachi yöl-la' réajlë' queéli' Dios le bennë' que queéli'. ⁴ Ca na' naca tuz idútë le naca cázaru', sal-la' zían le nagudi' dzágalenru', en calëga tuz dxin tun yúgu'të le zían na' nagudi' dzágalenru', ⁵ lësca' caní naca queëru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que lë ni na' yúgu'tëru' nácaru' tuz turu' len ia'turu'.

⁶ Tu turu' dë lu ná'aru' tu le bennë' queëru' Dios, ate' nadzá'gaca tu tu tsca naca le buzá' ládxë'ë que queëru'.

Bönni' na' Dios bunödzejë' queë' gu'ë didza' uláz queë', tsca réajlë'ë Lë', ral-la' gu'ë didza' bönni' na'.

⁷ Bönni' na' Dios bunödzejë' queë' gunë' xichinë', dxí'ado' ral-la' gunë' dxin na'.

Bönni' na' Dios bunödzejë' queë' usédinë' bönachi, dxí'ado' ral-la' usédinë' bönachi.

⁸ Bönni' na' Dios bunödzejë' queë' uzéajni'inë' bönachi, dxí'ado' ral-la' uzéajni'inë' légaquië'.

Bönni' bi unödzejë' que nu yúbölo, idú ládxë'ë ral-la' unödzejë'.

Bönni' rinná bé'enë' bönachi, idú ládxë'ë ral-la' gunë' caní.

Bönni' rácalenë' luzé'ë, len yöl-la' rudzeja ral-la' gunë' caní.

Yugu' le ral-la' gun nu nequi queë' Cristo

⁹ Ral-la' idxi'ili' luzá'ali' idú ládxili'.

Buli'cá'ana le ruá' dö'.

Guli'gúf' ládxili' gunli' le naca dxi'a.

¹⁰ Guli'dxi'i-guéquinë' luzá'ali'

ca nadxi'iguecli'-në' böchi' cázali'.

Ca runli'-në' bal luzá'ali'

ral-la' gunli' ga gácarë' lo ca nácali' la' cuínsili'.

¹¹ Buli'típatica'sö ládxili', en biti' gácali' xöhuëdi.

Guli'gún xichinë' Xanru' idú ládxili'.

¹² Buli'dzeja tu' zoa le runli' löza.

Guli'cöz zxon ladxi' cate' bi riguí' rizáca'li'.

Buli'lídatica'së' Dios.

¹³ Buli'nödzej' quégaca bönachi queë' Cristo tsca nayádzjaguequinë'.

Guli'gúf' lataj ga ila'cuá' nupa ta'dxin queéli'.

¹⁴ Guli'nábinë' Dios gunë' dxi'a

quégaca nupa ta'bia ládxigaca libí'ili'.

Guli'naba gaca dxi'a quégaquië',

en biti' udxíali' légaquië' dö'.

¹⁵ Buli'dzéjalen nupa tu' dzeja.

Guli'cödxilen nupa ta'bödxí.

¹⁶ Guli'gaca tuz len luzá'ali'.

Biti' gun ba zxon cuinli',

pero guli'gún tsözxon yugu' bönni' nòxaj ladxi'.

Biti' guéquili' chinadéli'li' idútë yöl-la' réajni'i.

¹⁷ Cuntu nu ubí'ili' que,

biti' guá'ali' dö' que nu ruá' dö' queéli'.

Guli'gún dxi'a quégaca yúgu'të bönachi.

¹⁸ Channö huáca, tsca séqui'li', guli'cöz dxi'a

len yúgu'të bönachi.

¹⁹ Böchi' luzá'ado', biti' uzí' lëbili' bönachi la' libí'isili', pero guli'gúf' lataj ubi'ë Dios quégaca bönachi na', tu' nazúaj lu guichi' lá'ayi le rnna:

Neda' caza' uzí' lëba'.

Neda' ubi'a quégaca bönachi.

Caní gunné' Xanru' Dios. ²⁰ Lësca' caní rnna:
 Channö zoë' nu bönni' biti' ridzáguié' li' dxi'a,
 en ridunë, bë'ë le gahuë'.
 Channö ribidxë' nisa, bë'ë le guí'jë'.
 Cate' gunu' caní, gunu' ga utuí'inë' bönni' na'.
²¹ Biti' gu'u lataj inná be'e le ruá' dö' li',
 pero gunná be'e le ruá' dö' na',
 ugunu' dxin le naca dxi'a.

13

¹ Yúgu'téli' ral-la' gunli' ca ta'nne' bönni' yúlahui'. Dios caz budödë' lu ná'agaquië' yöl-la' unná bë' ná'pagaquië', en nucu'ë xilátjagaquië' bönni' ni dë lu ná'agaquië' yöl-la' unná bë'.
² Que lë ni na', nu ridá'baga' yúlahui' ridá'baga' le nuzóa cazë' Dios, ate' nupa ta'dá'baga' caní, nabá'aga'ca xigua'. ³ Nacu'ë bönni' yúlahui', calëga para ulu'zenë' bach nu run le naca dxi'a, pero para ulu'zenë' bach nu ruá' dö'. Channö ré'ënu' gunu' ga biti' ulu'zenë' li' bach, ben le naca dxi'a, ate' uruju' dxi'a lógaquië'. ⁴ Náquië' bönni' yúlahui' ni'a në'ë Dios para gácalenë' li', pero channö runu' le ruá' dö', ral-la' gádxinu', tu' cabí nu'ë nítisó xiyaga yúlahui'. Náquië' ni'a në'ë Dios para uzí' lëbë', gunë' xigua' nu ruá' dö'. ⁵ Que lë ni na' run bayudxi gunli' ca rnnë' bönni' na' dë lu në'ë, calëgasó tu' budödë' Dios lu në'ë gunë' libí'ili' xigua', pero lësca' para soa dxi ládxi'do'oli' lahuë' Dios. ⁶ Que lë ni na' ca' riguíxaj lázali' que yúlahui', tu' ná'cagaquië' bönni' yúlahui' ni'a në'ë Dios, en tunë' le nudódi cazë' lu ná'agaquië'.
⁷ Gulí'guíxaj yúgu'të bönachi le rál-la'li' quëgaquië'. Gulí'guíxaj lázali' lu na' nu ral-la' quíxaj lázali'. Gulí'guíxaj dumí nu ral-la' quíxajjalí'. Gulí'gaxi nu ral-la' gádxili', en gubí'gún bal nu ral-la' gunli' bal. ⁸ Cuntu nu bi ral-la' gál-la'li' que, pero tuz ral-la' idxi'ili' luzá'ali', tu' chibén idú ca rinná bë' xibá queë' Dios nu nadxí'í luzë'e. ⁹ Caní ta'nná bë' xibá na':
 Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.
 Biti' cuanu'.
 Biti' innió' que luzó'o le cabí nácatë.
 Biti' së ládxi'u le dë que luzó'o.
 Yugu' xibá ni, en yúgu'të xibá ia'zica'rö, údxi gun nu run ca rnna didza' rnna caní:
 Bidxí'í luzó'o ca nadxí'í cuinu'.

¹⁰ Nu na' nadxí'í luzë'e biti' bi run que luzë'e le ruá' dö'. Caní naca, nu na' nadxí'í luzë'e run idú ca rinná bë' xibá queë' Dios.

¹¹ Gulí'gún caní tu' nözili' ca raca dza ni zóaru' na'a, en nözili' ca' chibidxín dza usubán ládxi'li' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusí loru' réajlë'ëru' Cristo. ¹² Ga zóaru' na'a naca ca chi'í dzö'ölö, ate' chizóa tödi rëla na', pero ga na' zoë' Cristo naca ca lahui' dza, ate' chizóa tsöjsóaru' ni'. Que lë ni na' ral-la' ucá'anaru' le tun bönachi ga naca chul-la que dul-la'. Ca na' rugacu cuinë' tu bönni' rejë' gudil-la le run chi'í lë' lu gudil-la, ral-la' taru' lu bení' queë' Dios, le gun chi'í rë'u lu na' tu' xihui'. ¹³ Para gunru' caní ral-la' gunru' dxi'a ca ral-la' gun nu ridá lahui' dza.

Biti' ral-la' súdxiru', en cabí gágulë'ëru'.
 Biti' ral-la' gunru' le ruá' dö', en calëga le gun ditaj rë'u.
 Biti' ral-la' tál-lalenru' luzá'aru', en cabí uzxë'ëru' luzá'aru'.

¹⁴ Na'a, ral-la' un cuinli' lu icja ládxi'do'oli' ca náquië' Xanru' Jesucristo, en biti' güi'í ládxi'li' gunli' le rizë ládxi'li' lu yöl-la' bönáchisö queë'li'.

14

Biti' ral-la' si' quídza'ru' böchi' luzá'aru'

¹ Gulí'gü' lataj nu réajlë' Cristo gun libí'ili' tsözxön sal-la' biti' naca idú ca réajlë' nu na' Lë'. Biti' tál-lalenli' nu na' ca ná'caga le runi nu na' huáca nu gun. ² Ca naca lë ni, nacu'ë bönni' runi légaquië' huáca ilahuë' yúgu'të le tagu bönachi, pero ia'bal-lë' bönni', tu' cabí naca idú ca ta'yéajlë'ë Cristo, tágusë' le raza ruzóaru'. ³ Na'a, bönni' na' rahuë' yúgu'të biti' ral-la' uzóë' tsólá'alö nu bönni' biti' rahuë' yúgu'të, en lësca' caní, bönni' na' biti' rahuë' yúgu'të biti' ral-la' si' quídzë'ë bönni' na' rahuë' yúgu'të, tu' nazí' lu në'ë Dios iropë' bönni' na' ta'yéajlë'ë Cristo. ⁴ ¿Nuzxi caz li', rizi' quídzu'u bönni' huen dxin que nu yúbölö? Bönni' na' náquië' huen dxin queë' Dios, lahuë' Xan cazë' urúajë' tsahuí' o biti' urúajë' tsahuí'. Channö urúajë' tsahuí' lahuë' Dios, naca tu' gun cazë' Xanru' Dios ga urúajë' tsahuí'.

⁵ Nadxi ca' zoë' nu bönni' runrë' bal tu dza ca runë' bal ia'zica'rö dza, ate' bönni' yúbölö, tuz ca runë' bal yúgu'të dza. Tu turu' ral-la' usédada'aru' channö naca dxi'a le runru'. ⁶ Bönni' na' runë' bal tu dza, runë' le bal para tseaj ládxi'ë Xanru', ate' bönni' na' biti' runë' bal dza

na', para tseaj ládxë'ë Xanru' bití' runë' bal dza na'. Lësca' caní, bönni' na' rahuë' yúgu'të, rahuë' caní para tseaj ládxë'ë Xanru', en rë'ë Dios: "Xclenu'", ate' bönni' na' bití' rahuë' yúgu'të, bití' rahuë' le para tseaj ládxë'ë Xanru', en rë'ë ca' Dios: "Xclenu'."

⁷ Bití' zoë' nabanë' queëzë' nitüë' bönni' nabábalenë' rë'u, en bití' ratië' queëzë' nitüë' bönni'. ⁸ Channö zóaru' nabanru', para tseaj ládxí'ru'-në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequi queëziru' queë' Xanru'. ⁹ Que lë ni na' ca' gútië' Cristo, en bubanë', para gáquië' Xángaca nupa chinátigaca, en nupa nabángaca.

¹⁰ Na' a lí, ¿bizx que richugu bë'u böchi' luzó'o? ¿Bizx que ruzú' tsölá'alö böchi' luzó'o? Yúgu'tëru' idxinru' lahuë' Cristo ga uchi' a usöröë' rë'u. ¹¹ Ca naca lë ni nazúaj lu guichi lá'ayi, rnna:

Rnnë' Xanru': "Ni' a quia' neda' caz, ulu'zechu zxibigaca yúgu'të bönachi lahua' neda'. Ila'guixjò' yálajdo' naca' Dios."

¹² Caní naca, uchi' a usöröë' Dios yúgu'tëru'.

Bití' ral-la' gunru' ga ichixi iníguinë' böchi' luzá'aru'

¹³ Que lë ni na', bití'rö ral-la' ichugu bé'eru' luzá'aru', pero ral-la' gun yúdxiru' cabí gunru' ga ichixi iníguinë' böchi' luzá'aru', en para cabí gunru' ga gunë' dul-la'. ¹⁴ Nöz queëzida' bití' bi dë le ráguru' le gaca gun ga bití'rö nácaru' tsahui' lahuë' Dios, ate' röjlöz lë ni didza' bë'ë Xanru' Jesús. Channö réquinë' tu bönni' zoa bi gaca gun ga bití'rö náquië' tsahui' lahuë' Dios, queë' bönni' ni, caní naca. ¹⁵ Channö rusuhú'innu' böchi' luzó'o, tu' ragu' le runi lë' bití' ral-la' gáguru', bití' runu' ca ral-la' gun nu nadxí'i böchi' luzé'e. Bití' bi ral-la' gagu' le gun ga gaca chopa ládxë'ë bönni' na', gútië' Cristo uláz queë'. ¹⁶ Que lë ni na', bití' bi gunli' le gun ga ila'nnë xihui' bönachi que le rusáca'li' queë'li' naca tsahui'. ¹⁷ Cate' rinná bë'enë' Dios rë'u, bití' ruí'li ládxí'ru' le guí'aj gáguru', pero ruí'li ládxí'ru' gácaru' tsahui', en sóaru' dxi ladxí', en udzëjaru', yugu' le gaca gunru' tu' zóalenë' Dios Bö' Lá'ayi rë'u. ¹⁸ Núti'tës nu run xichinë' Cristo ca nácagaca lë ni, run le raza ládxë'ë Dios, ate' urúaj dxi'a lógaca bönachi.

¹⁹ Que lë ni na' ral-la' gunru' le ilún ga gata' le ribequi dxi ládxí'ru' len yúgu'të bönachi, en le ilún tsutsu turu' ia'turu' ca réajlë'ëru' Cristo. ²⁰ Bití' bi ral-la' gagu' le gun ga gaca chopa ladxí' nu na' nuzóë' Dios. Nacatë lë na' ta'nná bönachi: "Yúgu'të dë lataj gáguru'", pero gunru' le ruá' dör' channö gunru' ga ichixi iníguinë' luzá'aru' tu' nözi lë na' ráguru'. ²¹ Gácarö dxi'a cabí gagu' bë'la', en cabí guí'ju' xisi uva nal-la, en bití' bi gunu' le gun ga ichixi iníguinë' böchi' luzó'o, o le gun ga gaca chopa ládxë'ë, o le gun ga huóaj ládxë'ë ca réajlë'ë Cristo. ²² Channö réajlë'u dë lataj bi gunu', ral-la' gunu' le lahuë' Dios ga zu' tuzu'. Bica' ba bönni' na' bití' ruxösa ládxí'da'ahuë' lë' tu' nözi lë na' runi lë' dë lataj gunë', ²³ pero bönni' na' raca chopa ládxë'ë tu' nözi le rahuë', nabáguë'ë xíguia', tu' runë' le cabí runi lë' dë lataj gunë'. Naca dul-la' yúgu'të le runru', le cabí runi rë'u dë lataj gunru'.

15

Ral-la' gunru' le raza ládxë'ë böchi' luzá'aru'

¹ Que lë ni na', channö nácaru' tsutsu ca réajlë'ëru' Cristo, ral-la' guá' ilenru' nupa na' nagul-la ládxí'gaca ca ta'yéajlë' Cristo. Bití' ral-la' gunru' le raza ládxí'ru' la' cuínsiru'. ² Yúgu'tëru' ral-la' gunru' le raza ládxë'ë böchi' luzá'aru' para gaca dxi'a queë', en idipa ládxë'ë ca réajlë'ë Cristo. ³ Caní ral-la' gunru', tu' cabí benë' Cristo le guyaza ládxë'ë la' cuínsë', pero guca queë' ca na' nazúaj lu guichi lá'ayi, le rnna: "Budubága'gaca neda' yugu' didza' xihui' guluí' nupa gula'nnë xihui' quíu' Lí, Dios." ⁴ Yúgu'të le bulu'zúajë' lu guichi lá'ayi dza ni'te, bulu'zúajë' lu guichi para usëdi rë'u. Lë na' nazúaj lu guichi lá'ayi run ga ribózaru' zxön ladxí', en ruhuë' tsahui' rë'u. Que lë ni na' zoa le runru' löza. ⁵ Rinábida'-në' Dios, Nu run ga ribózaru' zxön ladxí', en Nu ruhuë' tsahui' rë'u, gunë' ga gunli' tuz ca rusáca'li' queë'li', para gácali' ca na' rë'ënë' Jesucristo. ⁶ Caní ral-la' gunli' para gácali' tuz, cú'uli'-në' tsózxön yöl-la' ba Dios, Xuzë' Xanru' Jesucristo. ⁷ Que lë ni na', para gaca yöl-la' ba queë' Dios, guli'sí' lu ná'ali' tulí' ia'tulí' ca na' Cristo guzxi' lu në'ë ca' rë'u. ⁸ Caní ral-la' gunli', tu' rea' libí'ili': Bidë' Jesucristo, en gúcalenë' bönachi judío, ate' caní bulu'e lahui naca idütë li didza' ru'ë Dios, ate' benë' ga bulu'dxin le guzxi' lu në'ë Dios onödzejë' queé'gáquië' xuz xtó'otu'.

Yugu' bönachi izá'a ila'yöni didza' dxi'a

⁹ Bidë' ca' Cristo para benë' ga ila'gú'u nupa bití' nácagaca judío tu' ruhuéchi' ládxë'ë Dios légaquië'. Ca naca lë ni nazúaj lu guichi lá'ayi le rnna: Que lë ni na', ulu'a lahui le nacu' Lí' lógaca bönachi idütë yödçöliö, en gul-la' quíu' yöl-la' ba.

¹⁰ Ga yúbölö nazúaj lu guichi lá'ayi le rnna:
Libí'ili', bönachi idútë yödzölió,
buli'dzéjalen bönachi queë' Dios.

¹¹ Ga yúbölö nazúaj ca' lu guichi lá'ayi le rnna:
Guli'cu'ë Xanru' yöl-la' ba,
yúgu'téli' biti' nácali' judío.
Guli'tséaj ladxí' Lë',
yúgu'téli' zóali' idútë yödzölió.

¹² Lësca' caní buzúajë' Isaias lu guichi le rnna:
Ilá' lahui Nu nababa dí'a dza queë' Isai.
Gaca lo Nu na' para inná be'e nupa biti' náca gaca judío.
Nupa ni ilún löza Lë'.

¹³ Rinábida'-në' Dios, Nu run ga runru' löza, gunë' ga udzëjádë'eli', en ga soa dxi ladxí'li' tu' réajlë'ëli' Lë', en gunë' ga gaca idú ca runlí' löza, tu' zóalen yöl-la' huáca queë' Dios Bö' Lá'ayi libí'ili'.

¹⁴ Böchi' luzá'ado'. Chinöz quézida' rúntica'sili' le naca dxi'a, en dëda' yöl-la' réajni' queëli' para gaca uzéajni'ili' luzá'ali'. ¹⁵ Na'a naca' rugu ladxí', ruzúaja' queëli' lu guichi ni, böcha'a, en rusá'a ladxí'li' tu' zoa le buzá' ladxë'ë Dios quia' neda'. ¹⁶ Que lë ni na' runa' xichinë' Jesucristo lógaca bönachi biti' náca gaca judío, en runa' libán que didza' dxi'a queë' Dios, para gaca ugu'a bönachi biti' náca gaca judío lu në'ë Dios, nupa na' guró cazë' Dios Bö' Lá'ayi queë' Lë'. Iláca gacüë' ca tu le rigú'uru' lu në'ë Dios, le raza ladxë'ë Lë'.

¹⁷ Na'a, tu' rúnlena' tsözxön Jesucristo dxin, dë lu na' a tsaza ladxá'a ca naca le nuna' lu xichinë' Dios. ¹⁸ Lësca' rurúguida' innia' ca naca lë na' benë' Cristo lu na' neda', benë' ga tun bönachi biti' náca gaca judío ca rnna xtídzë'ë Dios. Lë ni benë' Lë', bugunë' dxin didza' bë'a neda', en yugu' dxin bena' neda'. ¹⁹ Lu na' a neda' bugunë' dxin ca' le náca gaca bë' bulu'e lahui Lë', en yugu' yöl-la' huáca zxön benë', en yöl-la' huáca na' queë' Dios Bö' Lá'ayi le guzóalen neda'. Caní guca, gusí lahua' runa' libán lu yödzö Jerusalén, ate' idú gásibi'ílo ga ridxintë luyú Ilírico, chinuna' libán que didza' dxi'a ca naca queë' Cristo. ²⁰ Bë' ladxá'a bena' libán que didza' dxi'a ga biti' bila'yöni bönachi ca naca queë' Cristo. La'tu' guna' libán ga chibila'yöni bönachi, guna' neda' ca runë' tu bönni' ruguélië' lahui dxin zxön chinunë' bönni' yúbölö. ²¹ Ca bena' neda' naca ca na' nazúaj lu guichi lá'ayi le rnna:
Ila'lë'e nupa nacué' ga cuntú nu ben libán queë' Lë',
en ila'yéajni' nupa catu caz bila'yöni ca naca queë'.

Rë'ënë' Pablo tsejë' yödzö Roma

²² Que lë ni na', sal-la' zían luzuí gú'unida' guída' ga zóali', biti' guca guída'. ²³ Na'a, chibudxi bena' dxin quia' yugu' lataj ni, en chiré'ënda' zían iz guída' ga zóali'. ²⁴ Que lë ni na', cate' tseja' luyú España, tóda' ga zóali' libí'ili', tu' runa' löza uduyúa' libí'ili', en udzëjalenda' libí'ili'. Tódi ni' huáca ugú'ulí' neda' nöza. ²⁵ Na'a ral-la' tseja' Jerusalén, tsöju' a tu le gácalen nupa ni' néquiequei queë' Cristo. ²⁶ Caní guna', le gula'yaza ladxí'gacüë' bönni' nacué' luyú Macedonia, en luyú Acaya, bulu'tubé' bi tu'nödzjé' quéguequi bönachi yechi' dzágagaca bönachi queë' Cristo, nacué' Jerusalén. ²⁷ Gula'yaza ladxí'gacüë' bönni' biti' náca gacüë' judío gulunë' lë ni. Le nácatë naca tu le rál-la'gacüë' quégaca bönachi judío ni'. Channó bönni' biti' náca gacüë' judío tu'zi'ë xibé le náca gaca queë' Dios ni'a que le núngaca bönachi judío, lësca' ral-la' ilácalenë' bönachi judío na', ulu'gunë' dxin le dë quégacüë'. ²⁸ Que lë ni na', cate' údxi udóda' lu ná'agaca bönachi judío lë na' bulu'nödzjé' bönni' ni, ní'irö tóda' ga zóali' libí'ili' cate' tseja' luyú España. ²⁹ Cate' guída' ga zóali', runa' löza idxínlena' yúgu'të le ruzí'iru' xibé ni'a que didza' dxi'a queë' Cristo.

³⁰ Ni'a queë' Xanru' Jesucristo, en ni'a que yöl-la' nadxí'í ruchízië' Dios Bö' Lá'ayi icja ladxí'do'oru', ráta'yua' loli', böcha'ado', ulídzali'-në' Dios tsözxön len neda', inábili'-në' gácalenë' neda'. ³¹ Guli'nabi-në' Dios gunë' ga ulá' neda' lu ná'agacüë' bönni' biti' ta'yéajlë' nacué' luyú Judea, en gunë' ga ila'yaza ladxí'gacüë' ila'zi'ë lë na' tsöju' a lu ná'agacüë' bönni' náca gacüë' queë' Cristo, nacué' Jerusalén. ³² Guli'nabi-në' ca', channó naca ca rë'ënë' Dios, gunnë' neda' lataj idxina' queëli' len yöl-la' rudzeja quia', para uzí' ladxí'lëna' libí'ili'. ³³ Na'a rinábida'-në' Dios, Nu run ga zoa dxi ladxí'ru', sóalenë' yúgu'téli'. ¡Ca' gaca!

16

Tu' gapa Dios luzë' eguequi bönachi queë' Cristo

¹ Rigú'a-nu lu ná'ali' Febe, nigula zanru' dá'anú Xanru'. Nácanu nigula huen dxin queë' Dios dzáganu bönachi queë' Cristo nacué' yödzö Cencrea. ² Uláz queë' Xanru' guli'sí' lu ná'ali'-nu nigula na', ca ral-la' ilún bönachi queë' Cristo. Guli'gácalen lënu, unödzjali' queënu biti'tës bi ríquínnu. Lë cázanu gücalennu bönachi zían, en gücalennu ca' neda'.

³ Guli'gapa Dios Priscila, en Aquilo, nupa na' gulunlen neda' tsözxön dxin queë' Jesucristo. ⁴ Chopë' ni gula'dödë' ga guzóa bönadxi ilátië' para gulunë' ga cabí gátia' neda', ate' rea' légaquië': "Xclenli'", en calégasö neda', pero lësca' yúgu'të böchi' luzá'aru' nabábagaquië' gapa nacuá' bönachi queë' Cristo biti' nácagaca judío, të'ë légaquië': "Xclenli'." ⁵ Guli'gapa Dios bönachi queë' Cristo tu'dubë' lu yu'u lidxigaquië' Priscila, en Aquilo na'. Guli'gapa Dios Epeneto, bönni' na' nadxí'ida'. Bönni' ni guyéajlë'ë Cristo zí'atëlö ca yúgu'të bönachi luyú Acaya. ⁶ Guli'gapa Dios María, nigula na' bennu dxin zxön queë' Cristo ga ni' rudúbili' libí'ili'. ⁷ Guli'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsözxön lidxi guíë', en nadéli'gaquië' lataj lo ladaj bönni' gubáz nasól-lë'ë Cristo. Lësca' gula'yéajlë'ë Cristo zí'alö ca neda'.

⁸ Guli'gapa Dios Amplias, bönni' na' nadxí'ida', en néquinë' queë' Xanru'. ⁹ Guli'gapa Dios Urbano, bönni' na' bënlenë' netu' tsözxön dxin queë' Jesucristo. Guli'gapa Dios Estaquis, bönni' na' nadxí'ida'. ¹⁰ Guli'gapa Dios Apeles, bönni' na' naca bë' réajlë'ë Cristo. Guli'gapa Dios nupa nacuá' lidxë' Aristóbulo. ¹¹ Guli'gapa Dios Herodión, bönni' uládz quia'. Guli'gapa Dios nupa nacuá' lidxë' Narciso, en ta'yéajlë'ë Xanru'. ¹² Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxön queë' Xanru', ate' nadxí'iru'-nu. ¹³ Guli'gapa Dios Rufo, bönni' rô queë' Xanru'. Guli'gapa Dios xinë'ë Rufo na', nácanu ca' ca xiná' caza'. ¹⁴ Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacuá'lenë' légaquië'. ¹⁵ Guli'gapa Dios Filólogo, en Julia, en Nereo, en nigula zanë' Nereo na', enca' Olimpas, en yúgu'të böchi' luzá'aru' ta'yéajlë'ë Cristo, nacuá'lenë' légaquië'.

¹⁶ Guli'gapa Dios luzá'ali', unída'li' luzá'ali' lu yöl-la' nadxí' queéli'. Tu'gapë' Dios libí'ili' yúgu'të böchi' luzá'aru' nabábagaquië' gapa nacuá' bönachi queë' Cristo luyú ni.

¹⁷ Na'a, ráta'yua' loli', böcha'ado', guli'gún ga ilaca bë' nupa tun ga irúajli' choplö, en tun ga ichixi iniguili', tu' tsédinë' le cabí röjlöz le nazédali'. Guli'cuíta ga nacuá' bönachi caní ¹⁸ tu' cabí tun xichinë' Jesucristo. Tunë' dxin para bi gata' quégacasë', en ta'zí' yé'enë' yugu' bönni' nōxaj ladxi', tu'gunë' dxin didza' nōxaj ladxi', en didza' tséajlë'ëru' le cabí nácatë. ¹⁹ Rizé didza' ca na' runli' ca rnna xtídzë'ë Xanru', ate' ta'yöni yúgu'të bönachi. Que lë ni na' rudzédada' ni'a que le runli' libí'ili'. Na'a, rë'ënda' gácali' sina' gunli' le naca dxi'a, en caléga gunli' le ruá' dö'. ²⁰ Dios, Nu run ga zóaru' dxi ladxi', si' gunë' ga ucúl-lali' Satanás, tu' xihui'. Rinábida'-në' Xanru' Jesucristo uzá' ládxë'ë queéli' le gácalen libí'ili'.

²¹ Bi'i Timoteo, bi'i na' rúnlenbí' neda' tsözxön dxin, rugápabi' Dios libí'ili'. Lucio, en Jasón, en Sosípater, yugu' bönni' uládz quia', tu'gapë' Dios libí'ili'.

²² Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguie' Xanru' neda'.

²³ Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bönachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yödzo ni, rugapë' Dios libí'ili'. Böchi'ru'do' Cuarto rugapë' Dios libí'ili'.

²⁴ Rinábida'-në' Xanru' Jesucristo uzá' ládxë'ë queéli' yúgu'tëli' le gácalen libí'ili'. ¡Ca' gaca!

Yöl-la' ba Dios

²⁵ Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáchë'ë Lë' dza ni'te ga bidxintë na'a dza. ²⁶ Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uládz queë' Dios ca na' gunná cazë' Dios, Nu zóatica'sö. Na'a raca libán que lógaca yúgu'të bönachi para gaca ila'yéajlë'ë Cristo, en ilún ca rnna xtídzë'ë.

²⁷ ¡Ni'a que le benë' Jesucristo, gácativa'sö yöl-la' ba queë' la's dui Dios, Nu rácatërö caz! ¡Ca' gaca!

DIDZA' ZÍ'ALÖ GUSÖL-LË'Ë PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

¹ Ca rë'ëni queëzinë' Dios bulidzë' neda', Pablo, para gaca' gubáz queë' Jesucristo. Böchi'ru' Sóstenes runë' neda' tsözxön. ² Rugapa' Dios libí'ili', böchi' luzá'ado', rudúbili' queë' Dios lu yödzo Corinto, en nácali' quez queë' Dios tu' nácali' tuz len Jesucristo. Dios caz bulidzë' libí'ili' para guéquili' quez queë' tsözxön len yúgu'të nupa nacua' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xángaquië', enca' Xanru'. ³ Ráta'yua' lahuë' Xúziru' Dios, en lahuë' Xanru' Jesucristo uza' ládxë'ë queë'li, en gunë' ga soa dxi icja ládxí'do'oli'.

Yugu' le ruzí'iru' xibë' tu' néquiru' queë' Cristo

⁴ Rética'sa'-në' Dios: "Xclenu'" ca naca queë'li, tu' zoa le buzá' ládxë'ë Dios queë'li tu' nácali' tuz len Jesucristo. ⁵ Tu' nácali' tuz len Cristo, Dios chinagú'udë'ë xinözili' yúgu'të le nequi queë'. Rácalenë' libí'ili' ca naca yúgu'të didza' ru'ili', en runë' ga réajni'ili' yúgu'të. ⁶ Caní naca, tu' guzxi' lu ná'ali' idú ládxí'li' le runtu' liná' lo ca naca queë' Cristo. ⁷ Que lë ni na', bití' bi riyadzaj queë'li' que le runnë' Dios Bö' Lá'ayi queë'ru', tsanni ni ribózáli' dza na' ilá' lahuë' Xanru' Jesucristo. ⁸ Lë cazë' utipë' ládxí'li' para gaca guá' ilenli' yúgu'të ga idxintë dza údxi, para cabí gaca nu bi innë queë'li' dza ni' huodë' Xanru' Jesucristo. ⁹ Dios runë' ca rnnë', en Lë cazë' bulidzë' libí'ili' para gácali' tuz len Zxi'në', Xanru' Jesucristo.

Narúajgaca choplö bönachi queë' Cristo nacu'ë Corinto

¹⁰ Ni'a queë' Xanru' Jesucristo ráta'yua' loli', böchi' luzá'ado', guli'gún tuz xtída'li' yúgu'tëli'. Bití' irúajli' choplö, pero guli' gaca tuz ca rizá' ládxí'li', en ca runi libí'ili'. ¹¹ Caní rea' libí'ili', böchi' luzá'ado', tu' gula' guixjoi'inë' neda' bönni' nacu'ë lídxinu Cloé ca runli', ta'nnë' ridil-la didza'li'. ¹² Lë ni rnnia': Nadzá'lö didza' ru'ili' tu tuli'. Bál-lali' rnnali' dá'ali' Pablo. Ia'bál-lali' rnnali' dá'ali' Apolos. Ia'bál-lali' rnnali' dá'ali' Cefas, ate' ia'bál-lali' rnnali' dá'ali' Cristo. ¹³ ¿Naru' birúajtsë' choplö Cristo? ¿Naru' gudá'atsa' neda', Pablo, lë'e yaga cruz uláz queë'li? ¿Naru' bidí'atsali' nisa para gácali' tuz len neda'? ¹⁴ Rea'-në' Dios: "Xclenu'", tu' cabí buquila' nisa niturö libí'ili', pero chópasë' Crispo, en Gayo. ¹⁵ Que lë ni na' bití' gaca innali' bidí'ali' nisa para gácali' tuz len neda'. ¹⁶ Lësca' buquila' nisa Estéfanas, en nupa nacua' lidxë'. Bití' rójneda' channö buquila' nisa nu yúbölö. ¹⁷ Gusöl-lë'ë Cristo neda', calëga para uquila' bönachi nisa, pero para guna' libán que didza' dxi'a. Ru'a didza', calëga lu yöl-la' rácada' que caza', para cabí ucácha'a yöl-la' huáca que le benë' Cristo lë'e yaga cruz.

Cristo napa cazë' yöl-la' huáca, en yöl-la' réajni'i queë' Dios

¹⁸ Nupa náca gaca chul-la niti téquiquequi cá'asö naca libán runru' ca naca queë' Jesús, ca na' gútië' lë'e yaga cruz, pero rë'u na' nuláru', réquibe'eru' dzaga le yöl-la' huáca queë' Dios le rusólá rë'u. ¹⁹ Caní naca, tu' nazúzaj lu guichi lá'ayi le rRNA:

Guna' ga huóaca nítisö yöl-la' rácada'

qué gaca nupa taca yenni'.

Tsólá'alö ucá'ana' yöl-la' réajni'i

qué gaca nupa ta'yéajni'i yenni'.

²⁰ ¿Bizxi caz uzi'tsë' xibë bönni' réajni'inë' yenni'? ¿Bizxi caz uzi'tsë' xibë bönni' nazëdadë'ë? ¿Bizxi caz uzi'tsë' xibë bönni' nabë'ede'enë' ru'ë didza'? Dios chibenë' ga böaca cá'asö yöl-la' réajni'i qué gaca bönachi yödzóliö ni. ²¹ Dios, lu yöl-la' réajni'i queë', bití' bë'ë lataj ilúnbe'e bönachi yödzóliö ni Lë' ni'a que yöl-la' rácada' quégaquië'. Dios guyaza ládxë'ë busóilë' nupa ta'yéajlë' Lë' ni'a que libán na' runru', sal-la' téquiquequi bönachi cá'asö naca.

²² Té'ënnë' yugu' bönni' judío ila'lë'enë' yöl-la' huáca náca gaca bë', ate' bönni' zì'tu' ta'guiljë' yöl-la' réajni'i. ²³ Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga ta'chixi ta'nigui bönachi judío, ate' ia'zica'rö bönachi téquiquequi cá'asö naca. ²⁴ Bönni' na' bulidzë' Dios légaquië', sal-la' náca gacaquië' bönni' judío o bönni' zì'tu', téquibe'enë' napa cazë' Cristo yöl-la' huáca queë' Dios, en yöl-la' réajni'i queë' Dios. ²⁵ Téquiquequi bönachi yödzóliö ni le benë' Dios naca bë' bití' bi nözinë', pero lë na' benë' náparö yöl-la' réajni'i ca yöl-la' réajni'i qué gaca bönachi. Téquiquequi le benë' Dios naca bë' nacuídi'në', pero lë na' benë' náparö yöl-la' huáca ca yöl-la' huáca qué gaca bönachi. ²⁶ Na'a, böchi' luzá'ado', guli'tsójnë' cate' bulidzë' Dios libí'ili'. Bití' gula'cu'ë ládjali' zían bönni' ta'yéajni'inë' lu yöl-la' bönáchisö quégaquië', en bití' gula'cu'ë ládjali' zían bönni' unná bë', en calëga zían bönni' náca gacaquië' lo. ²⁷ Téquiquequi bönachi yödzóliö ni yugu' bönni' na' guröë' Dios bití' bi nözguequinë'. Caní benë' Dios para gunë' ga ulu'tuí'i nupa ta'yéajni'i. Lësca' caní guröë' Dios nupa nacuídi' gaca yödzóliö ni para gunë' ga ulu'tuí'i nupa nál-lagaca.

²⁸Lësca' caní, téquiquequi bönachi yödžölió ni nupa na' guröë' Dios nácacaca cá'asò, en bití' bi nácacaca, en nacuidí'gaca. Caní benë' Dios para gunë' ga ulu'gá'ana cá'asò lë na' tun zxon bönachi yödžölió ni. ²⁹Que lë ni na', cuntu nu gaca gun ba zxon cuini lahuë' Dios. ³⁰Dios caz benë' ga nácaru' tuz len Jesucristo, en benë' ga náparu' yöl-la' réajni' queë' Cristo. Tu' náquie' Cristo tuz len rë'u, nuhuóácaru' tsahui', en néquiru' quez queë' Dios, en nuláru'. ³¹Naca ca na' nazúaj lu guichi lá'ayi, le rnna: "Channó zoa nu bi rë'ëni gun zxon, ral-la' gun zxon Xanru'."

2

Libán runru' queë' Cristo, ca gudë'ë lë'e yaga cruz

¹Caní guca, böchi' luzá'ado', cate' bidxina' queëli'. Bena' libán loli' que xtídzë'ë Dios, calëga len yöl-la' réajni' quia', en bití' bë'a didza' lu yöl-la' rácada' quia'. ²Cate' ni' guzóalena' libí'ili', bë' ládxa'a cabí gu'a didza' que le yübölö, pero ca nácatë queë' Jesucristo bë'a didza', ca na' gudë'ë lë'e yaga cruz. ³Guzóalena' libí'ili' lu yöl-la' ricuidí' quia', ate' lu yöl-la' radxi quia' guxzízida'a. ⁴Bë'lëna' libí'ili' didza', en bena' libán que xtídzë'ë Dios, calëga ca tu'í didza' bönachi lu yöl-la' rácada' queéqueisö, pero guzóalenë' Dios Bö' Lá'ayi neda', ate' guzóalen yöl-la' huáca queë' Dios neda', le guca bë' naca idútë li didza' bë'a. ⁵Caní bena' para gaca tséajlë'ëli' Dios, calëga tu' biyönili' yöl-la' rácada' queégaca bönachi, pero tu' bilé'eli' yöl-la' huáca queë' cazë' Dios.

Dios Bö' Lá'ayi runë' ga núnbë'ëru'-në' Dios

⁶Ruf'itu' didza' lu yöl-la' rácada' lógaca nupa chinácarö idú ca ta'yéajlë' Dios. Yöl-la' rácada' ni bití' naca ca le nápagaca bönachi yödžölió ni, en bití' naca ca le nápagaquie' bönni' ta'nná bë'ë dza ni zóaru' na'a, nupa na' ta'niti caz. ⁷Ruf'itu' didza' que yöl-la' rácada' nagachi', lë na' runödzjë' Dios, tu' bigachi' yöl-la' rácada' na' buzöë' Dios dza ni'te para uzí'iru' xibë. ⁸Yugu' bönni' ta'nná bë'ë dza ni zóaru' na'a bití' gulúnbë'ë yöl-la' rácada' na'. La'tu' gulúnbë'ë le, bití' ulu'dë'ë Xanru' nayëpisëtëre' lë'e yaga cruz. ⁹Naca ca na' nazúaj lu guichi lá'ayi le rnna: Chinupë'ë Dios le ulu'z'í' xibë nupa nadxí'igüequi Lë', yugu' le cuntu nu ble'e, en bití' biyöni,

en bití' gula'zá' ládxi'gaca bönachi ca naca que.

¹⁰Na'a, Dios nuzéajni'inë' rë'u yugu' lë ni lu në'ë Dios Bö' Lá'ayi, tu' ruyú cazë' Dios Bö' Lá'ayi yúgu'të, enca' le yu'u icja ládxi'da'ahuë' Dios caz.

¹¹¿Naru' gaca inözinë' nu bönni' le yu'u icja ládxi'da'ahuë' ia'túë' bönni'? Tuz bö' naca cazë' bönni' na' nözi lë na'. Lësca' caní, cuntu nu nözi le yu'u icja ládxi'da'ahuë' Dios. Tuzë' Dios Bö' Lá'ayi nözinë' lë ni. ¹²Rë'u ni, bití' nazí' lu ná'aru' tu bö' ridasö yödžölió ni, pero nazí' lu ná'aru' Dios Bö' Lá'ayi, Nu na' ruchízíë' Dios rë'u para gaca gúnbë'ëru' yugu' le buzá' ládxi'ë Dios queëru'. ¹³Yugu' lë na' buzá' ládxi'ë Dios queëru' ru'iru' didza' que, calëga len didza' tu'sédinë' bönachi rë'u len yöl-la' rácada' queéquequi, pero len yugu' didza' rusédinë' Dios Bö' Lá'ayi rë'u. Caní naca, ruzéajni'iru' bönachi zóalenë' Dios Bö' Lá'ayi légaquie' ca naca le rusédinë' Dios Bö' Lá'ayi rë'u.

¹⁴Tu bönni' bití' zóalenë' Dios Bö' Lá'ayi lë' bití' rizí' lu në'ë le rusédinë' Dios Bö' Lá'ayi rë'u, tu' réquinë' cá'asò naca. Bití' gaca tséajni'inë' bönni' na' lë ni, tu' gaca guéquibe'enë' tuzë' bönni' zóalenë' Dios Bö' Lá'ayi lë' le nazaca' lë ni. ¹⁵Tu bönni' zóalenë' Dios Bö' Lá'ayi lë' gaca guéquibe'enë' le nazaca' yúgu'të, pero cuntu nu gaca guéquibe'e le nazaca' cazë' bönni' na'. ¹⁶Nazúaj lu guichi lá'ayi le rnna:

¿Nuzxi' caz nözi le rizá' ládxi'ë Xanru'?

¿Nuzxi' caz gaca uzéajni'í Lë'?

Le rizá' ládxi'ë Cristo yu'u icja ládxi'do'oru' rë'u.

3

Nácaru' huen dxin tsözxön len Dios

¹Que lë ni na', böchi' luzá'ado', bití' guca gü'ílëna' libí'ili' didza' ca ru'ílëna'-në' didza' tu bönni' nudödi cuinë' lu në'ë Dios Bö' Lá'ayi, pero bë'lëna' libí'ili' didza' ca ru'ílëna' nu naca bönáchisö didza', bití' zóalenë' Dios Bö' Lá'ayi nu na'. Nácali' ca yugu' bi'í huë'ëni. Bití' nácali' tsutsu ca réajlë'ëli'-në' Cristo. ²Busédida' libí'ili' le cabí naca böniga, lë na' guca ca nidxi' gü'íli'. Bití' busédida' libí'ili' le naca böniga ca bëla' gáguli'. Bití' guca tséajni'ili' le naca ca bëla' gáguli', en bití' rácali' na'a. ³Caní naca, tu' nácali' ca nu naca bönáchisö ga ridxintë na'a dza. Tsanni' ni ruzxé'eli' luzá'ali', en ridil-la dídza'li', en rirúajli' choplö, nácali' ca nu naca bönáchisö, en runli' tuz ca tun bönachi yödžölió ni. ⁴Cate' zóalen libí'ili' nu rnna da' Pablo nu na', en ia'tú nu rnna da' Apolos, nácali' ca nu naca bönáchisö.

⁵¿Nuzxi' caz naca' neda', Pablo? ¿Nuzxi' caz na' Apolos? Nácatu' huen dxin queë' Dios, ate' ni'a que le bentu' guyéajlë'ëli' Cristo. Tu tutu' runtu' dxin na' bennë' Xanru' que queëtu'. ⁶Dxin bentu' lu icja ládxi'do'oli' naca ca dxin run nu raza ruzóa. Neda' guza'

xisedo', ate' Apolos gulu'ë nisa, pero Dios benë' ga gulén, en guzxón xisedo' na' nadúz icja ládxi'do'oli'. ⁷ Caní naca, láti'do'os nazáquië' bönni' guz, en láti'do'os ca' bönni' rigu'ë nisa, pero nazáca'dë'ë Dios Nu run ga rilén, en rizxón xisedo' na'. ⁸ Tuz ca nácaqaquië' bönni' razë', en bönni' rigu'ë nisa. Dios ubi'ë que queégaquië' tsca naca dxin runë' tu tuë'. ⁹ Nácatu' huen dxin tsözxón len Dios, ate' libí'ili' nácali' ca la' yëla queë' Dios ga runtu' dxin.

Lësca' caní nácali' ca tu libí' runë' Dios. ¹⁰ Ca naca le buzá' ládxe'ë Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yúbölö richisa zö'ö na'. Tu turu' ral-la' uyuru' ca richísaru' zö'ö lahui xilibi zö'ö na'. ¹¹ Dios chigulu'ë tu xilibi zö'ö le naca Lë cazë' Jesucristo, ate' cunttu nu gaca cu'u ia'tú xilibi zö'ö caní. ¹² Dxin runru' queë' Cristo naca ca richísaru' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guiöj nazáca'da' gaca, o gaca nu gun dxin le naca ca richisa zö'ö le néquini yaga, o guixzi, o guixi' cá'asö. ¹³ Gaca bë' ca naca dxin núngaca tu tu bönni. Cate' idxín dza ichúguië' Dios queéga bönni, ilá' lahui dxin runru', tu' tödi dxin na' lu guí', ate' guí' na' si' bë' dxin núngaca tu tu bönni. ¹⁴ Channö dxin nunë' tu bönni' urúaj dxi'a lu guí' na', le naca ca tu zö'ö guchisë', Dios ubi'ë queë' ca sa'yéaj dxin nunë'. ¹⁵ Channö tsegu dxin nunë' tu bönni' le naca ca tu zö'ö guchisë', unítie' le ré'ënë' ubi'ë Dios queë', pero ulá cazë' lë', ate' gaca queë' ca raca que nu rulá tu lu guí'.

¹⁶ ¿Naru' cabí nözili' naca cázali' yudo' queë' Dios, ate' zö'ë Dios Bó' Lá'ayi icja ládxi'do'oli'? ¹⁷ Channö nu usuniti yudo' queë' Dios, Dios usunitié' nu na', tu' naca lá'ayi yudo' queë' Dios, ate' libí'ili' naca cázali' yudo' na'.

¹⁸ Biti' si' ye'e cuinli'. Channö réqui nu nutsa' ladjali' rácada' ca tácada' bönni yödzölió ni, ral-la' huóaca nu na' ca tu bönni' biti' bi nözinë', para gata' que yöl-la' rácada' le naca idú. ¹⁹ Nu bönni' napzë' yöl-la' rácada' que yödzölió ni náquië' tu bönni' biti' bi nözinë' lahuë' Dios. Nazúaj lu guichi lá'ayi le rna: "Dios runë' ga ila'chixi ila'nigui nupa tácada', rugunë' dxin yöl-la' rácada' queéguëqui." ²⁰ Lësca' caní rna: "Xanru' nözinë' nítisö naca le ta'bequi ícjagaca bönni tácada'." ²¹ Que lë ni na', biti' ral-la' gunli' zxon le gaca gunë' tu bönni'. Nequi queëli' yúgu'të. ²² Néquiequi queëli':

Pablo, en Apolos, en Cefas,
en yödzölió ni,

en yöl-la' na' bán, en yöl-la' guti,
en dza ni zóaru' na'a, en dza si' za'.

Yúgu'të nequi queëli',

²³ ate' libí'ili' néquili' queë' Cristo,
ate' Cristo néquinë' queë' Dios.

4

Dxin tunë' bönni' gubáz nasöl-lë'ë Cristo

¹ Que lë ni na', ral-la' guéquili' nácatu' netu' huen dxin queë' Cristo, en nazí' lu na'tu' le nagachi' queë' Dios. ² Yugu' bönni', Dios nudödë' lu ná'agaquië' ulu'gunë' dxin le nequi queë', run bayudxi ilunë' idú dxi'a le tunë'. ³ Biti' bi ruí' ládxa' channö uchi'a usöröli' neda', o channö ulu'chi'a ulu'sörö bönni yödzölió ni neda'. Biti' ca' ruchi'a rusörö cuina'. ⁴ Biti' ruxös ládxi'da' ahua' neda'. Lë ni biti' naca bë' biti' nabága' xíguia'. Xanru' náquië' Nu ruchi'a rusörö' neda'. ⁵ Que lë ni na', biti' ral-la' uchi'a usöröli' nu bönni' zí'aló ca idxín dza que. Guli'cöz dza ni huödë' Xanru', ate' Lë' ubéajë' ga liná' le nagachi' ga chul-la, en ulu'ë lahui le yu'u icja ládxi'do' gaca yúgu'të bönni. Ní'irö Dios ubi'ë que queéga bönni le gun bal léguëqui ca ral-la' gaca queéguëqui.

⁶ Na'a, böchi' luzá'ado', ca naca lë ni, bë'a didza' que le runtu' netu', Apolos, en neda'. Huáca usédali' ca runtu' netu' para gunli' le nazúajsó lu guichi lá'ayi, en biti' gunli' zxon tuë' bönni', en biti' uzóali' tsólá'aló ia'tuë'. ⁷ ¿Nuzxi bentsö ga nacu' li' lo? ¿Bizxi caz bidéli'nu' li' le cabí bennë' Dios quiu'? Channö Lë' bénnasë' quiu' lë na' dë lu no'o, ¿bizx que run ba zxon cuinu', réquinu' rácasö quiu' bidéli'nu' lë na'?

⁸ ¿Naru' réquitseli' nadéli'tëröli'? ¿Naru' réquitseli' rilé'eli' yöl-la' tsahui' queëli'? ¿Naru' réquitseli' rinná bë'ëli', sal-la' biti' rinná bë'ëtu' netu'? Ní'a queë' Xanru' Dios ré'ënda' inná bë'ëli' para gaca inná bë'lentu' libí'ili' tsözxón. ⁹ Runi neda' naca queëtu', bönni' gubáz queë' Dios, ca nuzöë' netu' zéajtu' xibánitë ca na' raca queégaquië' bönni' chinarrugu queégaquië' ilátie' lahui' lógaca bönni. Nácatu' ca tu le tu'yuda' bönni yödzölió ni, enca' ca tu le tu'yudë'ë gubáz lá'ayi queë' Dios. ¹⁰ Tu' ré'ënitu' guntu' xichinë' Cristo, ruí'tu' bönni lataj téquiequi nácatu' bönni' biti' bi nözquequinë', pero libí'ili' réquili' rácada'alí' tu' nácali' queë' Cristo. Libí'ili' réquili' chinál-lali',

pero téquiequi bönni nacuídi'tu' netu'.

Tu'zóa bönni netu' tsólá'aló,

pero tun libí'ili' bal.

¹¹ Ga ridxintè na'a dza, riduntu', en ribídxitu' nisa. Biti' dè lari' gácutu'.

Tun bônachi netu' zi', en biti' zoa lídxitu'.

¹² Rusaca' zi' cuintu', la' nētu'só runtu' dxin.

Tu'lidza bônachi netu' zi',

pero netu' rinábatu' le gácalen léguequi.

Ta' bía ládxi'gaca bônachi netu',

pero ruá' rilentu' le.

¹³ Ta'nnè' queètu',

pero lu yöl-la' nòxaj ladxi' ru'írentu' légaquiè' didza'.

Ga ridxintè na'a dza nácatu' ca bèbu que yödžölió ni,

en ca tu le ta'ru'una yúgu'tè bônachi.

¹⁴ Ruzúaja' queéli' caní lu guichi, caléga tu' rē'ēnda' guna' ga utu'íli', pero rē'ēnda' uzéajni'ida' libí'ili', runa' ca runè' tu' bōnni' ruzéajni'inè' yugu' zxi'ini cazè' tu' nadxi'inè' légacabi'. ¹⁵ Sal-la' gaca zían gáyu'è bōnni' ila'cuá'alen libí'ili', en ulu'sédinè' libí'ili' ca naca queè' Cristo, tuz nu zoa naca ca xúzili', nu na' ben ga néquili' queè' Cristo. Lu yöl-la' na'bán cubi le nápalí' tu' dzágali' Cristo, neda' caz naca' ca xúzili' tu' busiyōnda' libí'ili' didza' dxi'a.

¹⁶ Que lè ni na', ráta'yua' loli' güi'í ládxi'li' gunli' ca runa' neda'.

¹⁷ Que lè ni na' ca' risöl-la'a-bi' bi' Timoteo ga zóali'. Tu' rúnlenbi' neda' dxin queè' Xanru' nácabí' ca zxi'ini caza', en nácabí' idú ladxi', ate' nadxi'ida'-bi'. Gunbi' Timoteo ga tsöjnéli' yugu' xibá rusédida' tu' néquida' queè' Cristo, yugu' le rusédida' yúgu'tè lataj lógaca yúgu'tè cō' bônachi queè' Cristo. ¹⁸ Bál-lali' run ba zxōn cuinli' tu' réquili' bití' rō udxina' ga zóali'. ¹⁹ Na'a, la' udxíntea' ga zóali' channō Xanru' gunnè' neda' lataj. Ní'rō guéquibe'eda', calégasō didza' tu' è bōnni' tun ba zxōn cuíngaquiè', pero guéquibe'eda' channō zóalen yöl-la' huáca queè' Dios légaquiè'. ²⁰ Channō nazí' lu ná'alí' rinná bé'enè' Dios libí'ili', bití' naca bè' naca caní tu' rnnásili' ca'. Naca bè' naca caní channō zóalen libí'ili' yöl-la' huáca queè' Dios. ²¹ ¿Bízxiló rē'ēnili'? ¿Naru' rē'ēnili' udxina' ga zóali' len gubá'ayi, para guna' libí'ili' zi', o len yöl-la' nadxi', en lu yöl-la' nòxaj ladxi'?

5

Pablo ruchi'a usöröè' tuè' bōnni' runè' le ruá' dö'

¹ Rizé didza' zóalenè' libí'ili' tuè' bōnni' runè' le ruá' dö', tu' zóalenè' nigula queè' xuzè'. Le ruá' dö' caní bití' ca' tun bônachi bití' núnbè'gaca Dios. ² Libí'ili' run ba zxōn cuinli', pero ral-la' huí'inili', en ubéajli' nu na' run dul-la' na' ga zóali'. ³ Sal-la' bití' zóalena' libí'ili' lu idútè le naca', le nácatè zóalena' libí'ili' lu bō' naca caza'. Ca chizóalen caza' libí'ili' chibuchf'a busöröa' nu na' run dul-la' na'. ⁴ Cate' udúbili' queè' Xanru' Jesucristo guna' libí'ili' tsözxōn lu bō' naca caza'. Ní'rō, len yöl-la' huáca queè' Xanru' Jesús ⁵ buli'dödè' bōnni' na' lu na' Satanás tu' xihui' para initi idútè le naca cazè', pero ulá bō' naca cazè' dza ni' huödè' Xanru'.

⁶ Bití' naca dxi'a gun ba zxōn cuinli' ca naca le runli'. ¿Naru' cabí nōzili' didza' na' rnna: "Cua zído'os que yōta xtila gun ga chazxaj idútè cúa nazí'í le"? ⁷ Na'a, guli'cúa ga zóali' dul-la' na' le naca ca tu' cúa zi' gulás, para gácali' dxi'a. Ní'rō gácali' ca tu' cúa cubi le cabí nazí'í cúa zi' que, ca na' le nácatè chinácali'. Naca queèru' ca chizōaru' Laní Pascua cate' tahuè' yōta xtila bití' nazí' cúa zi' que, en chigulútiè'-ba' uláz queèru' bō'cu' xzila' que Laní Pascua na', bō'cu' xzila' na' náquiè' Lè cazè' Cristo. ⁸ Que lè ni na' ral-la' gunru' laní na', caléga zóalen rē'u cúa zi' gulás na' le rulu'í' le ruá' dö', en le cabí nazaca', pero ral-la' ugunru' dxin yōta xtila na' bití' nazí'í cúa zi' que, yōta xtila na' rulu'í' le naca idú dxi'a, en le naca idútè li.

⁹ Cate' buzúaja' queéli' lu guichi zí'alō. gudxi caza' libí'ili' bití' gunli' tsözxōn bōnni' tunè' le ruá' dö'. ¹⁰ Gudxa' libí'ili' caní, caléga para ucuítali' tsaz ga nacua' bônachi yödžölió ni, nupa tun le ruá' dö', en ga nacua' bônachi ta'zè ládxi'gaca le dè que luzé'guequi, en ga nacu'è yugu' bōnni' gubán, en bônachi ta'yéaj ládxi'gaca budó' guió'j budó' yaga. Para gunli' caní gun bayudxi irúajli' yödžölió ni. ¹¹ Le rē'ēni inná didza' na' buzúaja' queéli' zí'alō naca para cabí gunli' tu' zxōn tuè' bōnni' rnnè' néquinè' queè' Cristo, pero runè' dul-la' le lè'e, o rizé ládxi'è le dè que luzé'è, o reaj ládxi'è tu' budó' néquini, o rinnè' xihuè'è, o rizúdxinè', o ribanè'. Bití' ca' gágulenli' tsözxōn tuè' bōnni' caní. ¹²⁻¹³ Bití' nequi quia' neda' uchi'a usöröa' nupa bití' nabábagaca rē'u. Dios uchi'a usöröè' léguequi. Libí'í cázali' ral-la' uchi'a usöröli' nupa nabábagaca libí'ili'. Que lè ni na', guli'cúè' ga zóali' bōnni' xihui' na'.

6

Bití' ral-la' ichè'èru' bōchi' luzá' aru' lógaca bônachi yúlahui'

¹ Cate' ridil-la dídza'li' tuli' len ia'tuli', ¿nacxi caz rurúguili' tséajli' yúlahui' ga ulu'chi'a ulu'sörö nupa biti' ta'yéajlë' Cristo libí'ili'? Dxi'arö tséajli' lógaca bönachi queë' Cristo para ulu'chi'a ulu'sörö libí'ili'. ² ¿Naru' cabí nözili' nupa néquiquequi queë' Cristo ral-la' ulu'chi'a ulu'sörö yúgu'të bönachi yödzülió? Channö libí'í cázali' uchi'a usöröli' bönachi yödzülió, ¿naru' cabí nápalí' yöl-la' réajni'í uchi'a usöröli' didza' bizxaj caní? ³ ¿Naru' cabí nözili' ral-la' uchi'a usöröru' yugu' gubáz lá'ayi? Rúntëro bayudxi uchi'a usöröru' le taca yödzülió ga ni zóaru' na'a. ⁴ Na'a, channö raca tu le run bayudxi nu uchi'a usörö, lë na' raca yödzülió ni, ¿bizx que rucuá'ali' nupa ulu'chi'a ulu'sörö le, nupa na' biti' bi dë lu në'eguequi ladjagaca bönachi queë' Cristo? ⁵ Rnní'a caní para guna' ga utuf'ili'. ¿Naru' cabí zóalen libí'ili' nu raca lati' nu gaca uchi'a usörö le raca queégaquië' böchi' luzá'ali'? ⁶ ¿Nacxi caz gaca tu bönni' réajlë'ë Cristo ichë'ë böchi' luzë'ë yúlahui' ga ulu'chi'a ulu'sörö bönachi biti' ta'yéajlë' Cristo légaquië'?

⁷ Le nácatë richixi riníguili' tu' ridil-la dídza'li'. ¿Bizx que biti' guá' ilenli' nu ruá' dö' queé'li'? ¿Bizx que biti' guá' ilenli' nu rucáchi'lan le dë queé'li'? ⁸ Libí'ili' ruá'ali' dö', en rucáchi' lanli', ate' runli' caní queégaquië' böchi' luzá'ali' ta'yéajlë'ë Cristo.

⁹⁻¹⁰ ¿Naru' cabí nözili' biti' ila'yaza bönachi biti' nácatë tsahui' ga rinná bë'ë Dios? ¿Biti' si' ye'e cuinli'!

Biti' ca' tsaz ga rinná bë'ë Dios nu run le ruá' dö':
Cuntu nu reaj ladxí' budó' guió'j budó' yaga,
en cuntu nu riguítasaj xibá que yöl-la' nutsaga na',
en cuntu nu bönni' run cuinë' ca nigula,
en cuntu nu bönni' zóalenë' la' luzë'ë bönni'së',
en cuntu nu bönni' gubán, en cuntu nu ruhuidí',
en cuntu nu rizudxi, en cuntu nu rinnë xihui',
en cuntu nu rucáchi'lan.

Biti' ca' tsaz nu run caní ga rinná bë'ë Dios.

¹¹ Caní gúcali' bál-lalí' libí'ili', pero na'a chinuhuóacali' dxi'a que dul-la' gubága'li', en chinéguilí' quez queë' Dios, en chinuhuóacali' tsahui' ni'a que le benë' Xanru' Jesús. Bö' Lá'ayi queë' Dios runë' ga raca caní.

Idütë le naca cázaru' nequi quez queë' Dios

¹² Ta'nná bönachi: "Yúgu'të dë lataj gunru'." Sal-la' nácatë didza' ni, biti' ral-la' gunru' yúgu'të. Sal-la' dë lataj guna' yúgu'të, biti' gu'a lataj bi inná be'e neda'. ¹³ Ta'nná ca' bönachi: "La' huagu naca le tsaz lé'ëru', ate' lé'ëru' naca ga tsudzu la' huagu." Nácatë didza' ni, pero idxín dza usunítie' Dios la' huagu, enca' lé'ëru'. Dios benë' idütë le naca cázaru', calëga para ugunru' le dxin gunru' le ruá' dö'. Naca para uzí'ë xibë Xanru', ate' Xanru' náquië' para uzí' xibë' idütë le naca cázaru'. ¹⁴ Dios busubanë' Xanru' Cristo lu yöl-la' guti. Lëscá' caní, len yöl-la' huáca queë' usubanë' ré'u.

¹⁵ ¿Naru' cabí nözili', idütë le nácali' naca tuz len le naca cazë' Cristo? ¿Nacxi caz gaca cúali' tu le da' Cristo, en gunli' ga ta' tu nigula udá dzaga? ¿biti' ca' ral-la' gunli' caní! ¹⁶ ¿Naru' cabí nözili' channö tu bönni' zóalenë'-nu nigula udá dzaga, náquië' tuz len lënu? Ca naca lë ni nazúaj lu guichi lá'ayi le rna: "Ílácagaquië' ca tuz bönachi iropë' na'." ¹⁷ Na'a, nu bönni' náquië' tuz len Xanru', náquië' tuz len Lë' lu bö' naca cazë'.

¹⁸ Que lë ni na', biti' ca' gunli' le ruá' dö'. Biti'tës dul-la' yúbölö runë' tu bönni', ní'ílö lu le naca cazë' runë' dul-la' na'. Nu bönni' runë' dul-la' le lé'ë, runë' dul-la' le dzaga lë cazë'. ¹⁹ ¿Naru' cabí nözili' idütë le naca cázali' naca yudo' queë' Dios Bö' Lá'ayi? Dios caz nuchizë' Dios Bö' Lá'ayi na' libí'ili', ate' Lë' zoë' icja ladxí'do'oli'. Que lë ni na' biti' nequi queézili' idütë le naca cázali'. Na'a, nequi queë' Dios. ²⁰ Dios gú'uë' libí'ili' len tu le zxon le gudizxjë'. Gulí'gún dxin idütë le nácali', enca' bö' naca cázali' para gaca queë' Dios yöl-la' ba, tu' néquiquequi queë' Dios idütë le naca cázali', enca' bö' naca cázali'.

7

Rusëdinë' Pablo ca naca que yöl-la' nutsaga na'

¹ Na'a, ubi'a didza' yugu' le rinábili' neda', le buzúajli' quia' lu guichi. Gácarö dxi'a queë' nu bönni' channö cabí sóalenë'-nu nigula. ² Tu' tunda' bönachi le ruá' dö' ga ní' zóali', yúgu'të bönni' nabábagaquië' libí'ili' ral-la' ila'cuá'lenë'-nu nigula que queégaquië', ate' yúgu'të nigula ral-la' ila'cuá'lennu-në' bönni' que queégacanú. ³ Bönni' na' zóanu nigula queë' ral-la' gunë' queënu nigula queë' ca naca yöl-la' run que yöl-la' nutsaga na', en la' lébisö ral-la' gunnu nigula len bönni' queënu. ⁴ Biti' dë lu ná'asónu nigula le naca cázanu, pero bönni' queënu dë lu në'ë ca' le. Lëscá' caní, biti' dë lu ná'asë' bönni' le naca cazë', pero nigula queë' dë lu ná'anú ca' le. ⁵ Biti' ral-la' ila'dá'baguë'ë luzá'agaquië' bönni', en nigula na', nutsaga ná'agaquië'. Huácasö ca' channö ilunë' tuz didza' biti' ila'dzáguie' tu chí'isö para gaca ulu'lidzë' Dios idú ladxí'gaquië'. Tödi na', bönni' na' ral-la' sóalenë'-nu nigula queë'

leyúbölö, para cabí sequi' Satanás tu' xihui' gun ga tsázagaquië' nöza dul-la' tu' cabí gaca ıla'nná be'e cuíngaquië'.

⁶ Lë ni rea' libí'ili' naca tu le runnë' Xanru' libí'ili' lataj. Biti' naca le gunná bë'ë. ⁷ Runi neda' gácarö dxi'a ulu'gá'anë' tuz yúgu'të bönni', ca na' zoa' tuza' neda'. Tu tuë' bönni' rizi'ë tsca le runödzjë' Dios queë' gunë'. Tuë' rizi'ë tu le runödzjë', ate' ia'túë' rizi'ë ia'tú le runödzjë'.

⁸ Na'a, rea' nupa zóagaca tuz, enca' yugu' nigula uzëbi, gácarö dxi'a quéguequi ulu'gá'ana tuz ca na' zoa' tuz neda'. ⁹ Channö cabí gaca ıla'nná be'e cuíngaquië', huáca ulu'tsaga ná'agaquië', tu' gácarö dxi'a ulu'tsaga ná'agaquië', en cabí ıla'zë ládxi'gaquië' le ruá' dö'.

¹⁰ Rinná bé'eda' nupa chinutsaga në'eguequi, en calëga néda'sö runa' xibá ni, pero Lë cazë' Xanru' runë' le, rnnë': "Biti' ulá'alennu tu nigula bönni' queënu." ¹¹ Channö nu nigula ulá'alennu-në' bönni' queënu, ral-la' ugá'ananu túzinu, o huóacanu tuz len bönni' queënu na'. Lësca' caní tu bönni' bití' ral-la' ucá'anë'-nu nigula queë'.

¹² Na'a, néda'sö rea' ia'zica'rö bönnachi, en calëga rnnë' Xanru' caní, rnná': Channö zoë' nu böchi' luzá'aru' réajlë'ë Cristo, ate' nigula queë' bití' réajlë'ënu Xanru', en channö ré'ënnu ugá'analennu lë', bití' ral-la' ulá'alennë'-nu. ¹³ Lësca' caní rnná': Channö zóanu nu nigula zanru' réajlë'ënu Cristo, ate' bönni' queënu bití' réajlë'ë Xanru', en channö ré'ënnë' ugá'analennë'-nu, bití' ral-la' ulá'alennu lë'. ¹⁴ ¡Caní ral-la' ilunë'! Bönni' cabí réajlë'ë na', Dios rilé'enë' lë' ca tu bönni' néquinë' quez queë' tu' náquië' tuz len nigula queë' réajlë'ënu Cristo, ate' nigula caní, bití' réajlë'ënu, Dios rilé'enë'-nu ca tu nigula néquinu quez queë' tu' nácanu tuz len bönni' queënu náquië' böchi' luzá'aru' réajlë'ë Cristo. La' tu' cabí naca caní, ilácabi' zxf'inigaquië' ca yugu' bi'i lan lahuë' Dios. Na'a, nácacacabi' quez queë' Dios. ¹⁵ Nu bönni' o nigula nu cabí réajlë' Cristo, channö ré'ëni ulá'alenu nu na' nutsaga ná'alenu, huáca ca'. Biti' run bayudxi ugá'analenu nu na' böchi' luzá'aru' o zanru' nu réajlë' Cristo, tu' bulidzë' Dios rë'u para cózaru' tsáhu'i'do'. ¹⁶ ¡Caní ral-la' gaca! Nadxi ca' li', nigula, huáca gunu' ga ulë' bönni' quiu', ate' nadxi ca' li', bönni', huáca gunu' ga ulanu nigula quiu'.

¹⁷ Ral-la' gunru' tu turu' tsca le bennë' queëru' Xanru', enca' tsca guca queëru' cate' bulidzë' Dios rë'u para guëquiru' queë'. Rusëdida' yúgu'të cö' bönnachi queë' Cristo xibá ni. ¹⁸ Channö Dios bulidzë' nu bönni' narugu lu xipëlë'ë le naca bë' néquinë' queë' Dios, ral-la' ugá'anë' caní, zoa lu xipëlë'ë lë na' naca bë'. Lësca' caní, channö Dios bulidzë' nu bönni' bití' narugu lu xipëlë'ë lë na' naca bë', bití' ral-la' ichúguië' lë na' lu xipëlë'ë. ¹⁹ Biti' bi nazaca' lë na' narugu lu xipëlë'ë tu bönni', en channö bití' narugu lu xipëlë'ë bönni' lë na' naca bë', bití' bi nazaca'. Le nácada' lesaca' naca gunru' ca rinná bë' xibá queë' Dios. ²⁰ Ral-la' ugá'anë' tu tuë' bönni' ca na' gúquië' cate' ni' bulidzë' Dios lë'. ²¹ Channö bulidzë' li' cate' ni' nacu' bönni' nadó'o, bití' cö'u bönniga tu' nacu' caní, pero channö gata' quiu' lataj iruju' lu na' xanu', buzí' xibë' lataj na' gata' quiu' iruju'. ²² Channö bulidzë' Xanru' nu bönni' cate' ni' nadó'ë, lahuë' Xanru' náquië' ca nu bönni' narúajë' lu në'ë xanë' na', para gunë' xichinë' Xanru'. Lësca' caní, channö bulidzë' Xanru' nu bönni' cate' ni' narúajë' lu në'ë xanë' na', bönni' ni náquië' ca tu bönni' nadó'o queë' Cristo. ²³ Zxöntërö le gudizxjë' Dios, gú'uë' libí'ili'. Que lë ni na' bití' ral-la' guti' cuiñli' lu ná'agaca bönnachi. ²⁴ Que lë ni na' ca', böchi' luzá'ado', ral-la' sóali' lahuë' Dios tsca guca queë'li' tu tuli' cate' ni' bulidzë' Dios libí'ili'.

²⁵ Ca naca quégaca nupa bití' nutsaga ná'agaca, bití' bi gunná bé'enë' Xanru' neda'. Caní runi neda', ate' huáca uzxöni ládxi'li' neda' tu' ruhuéchi' ládxë'ë Xanru' neda'. ²⁶ Tu' taca zían le raca queëru' dza ni zóaru' na'a, runi neda' gácarö dxi'a channö ulu'gá'anë' yúgu'të bönni' ca nácaquië' na'a. ²⁷ Channö nutsaga ná'lenu'-nu nigula, bití' ulá'alenu'-nu. Lësca' caní, channö zu' tuzu', bití' quilju' tu nigula para utsaga ná'lenu'-nu. ²⁸ Na'a, channö utsaga ná'lenu'-nu nigula, bití' gunu' dul-la', en channö tu bi'i nigula utsaga ná'alennë'-në' bönni', bití' gunbi' dul-la', pero ıla'guf'i ıla'zaca' nupa nutsaga ná'agaca yödzóliö ni, ate' ré'ënda' guna' ga uláli' lu yöl-la' rigui' i zizaca' na'.

²⁹ Na'a, rea' libí'ili' lë ni, böchi' luzá'ado'. ¡Chizóa idxín dza údxi! Que lë ni na', yugu' bönni' nutsaga ná'lengaquië'-nu nigula ral-la' ilu'f' ládxi'gaquië' Dios, ca runë' nu bönni' bití' nutsaga ná'alennë' nigula. ³⁰ Lësca' caní, nupa ta' bödxí yechi' ral-la' ulu' dzeja lahuë' Dios ca run nu bití' ribödxí, ate' nupa tu' dzeja ral-la' ıla'cuá' nöxaj lahuë' Dios ca run nu bití' rudzeja, ate' nupa to'o ral-la' ilaca ca nu bití' bi dë que. ³¹ Nupa tu'gun dxin le dë yödzóliö ni ral-la' ilaca ca nu bití' ru'f' laddxi' le dë yödzóliö ni, tu' udödi quégaca le rilé'ëru' yödzóliö ni.

³² Ré'ënda' bití' ubi ugu'f'ili'. Tu bönni' bití' zóanu nigula queë' ru'f' ládxë'ë le nequi queë' Xanru', naca gunë' le raza ládxë'ë Xanru'. ³³ Tu bönni' nutsaga ná'lennë'-nu tu nigula ru'f' ládxë'ë le raca yödzóliö, naca gunë' le raza ládxi'nu nigula queë'. ³⁴ Lësca' caní raca queënu tu nigula nutsaga ná'lennu-në' bönni', en queënu nigula na' zóanu túzinu. Nigula na' zóanu túzinu ru'f' ládxi'nu le nequi queë' Xanru', naca sóanu quez queë' Dios lu le naca cázanu, en lu bö' naca cázanu. Nigula na' nutsaga ná'lennu-në' tu bönni' ru'f' ládxi'nu le raca yödzóliö ni, naca gunnu le raza ládxë'ë bönni' queënu.

³⁵ Yugu' lè ni rea' libí'ili' para uzí'ili' xibé lè ni, en calèga para uzá'ga'a xinözili'. Rê'ènda' gunli' le ral-la' gunli', para gunli' xichinè' Xanru' idú ládxi'li'.

³⁶ Channò zoè' tu bõnni' réquinè' biti' naca dxi'a ugá'anabi' túzibi' bi'i nigula ra'bando' queé', en chizóa iz queé'bi', en rê'ènde'ebi' utsaga ná'aleni'bi'-nè' bõnni', huáca utsaga ná'aleni'bi'-nè'. ¡Biti' gunbi' dul-la'! ³⁷ Channò chinún tsutsu xtídzè'è bõnni' na', en biti' run bayudxi gunè' caní, en dè lu nè'è naca gunè', en chinún tsutsu xtídzè'è ugá'anabi' túzibi', gunè' le naca dxi'a bõnni' na'. ³⁸ Caní naca, nu ruí'i lataj bi'i que utsaga ná'aleni'bi'-nè' bõnni', run le naca dxi'a, pero nu run ga ugá'anabi' túzibi' run le nácáro dxi'a.

³⁹ Nigula na' nutsaga ná'lennu-nè' bõnni', rinná be'e xibá que yól-la' nutsaga na' lènu tsanni ni zoè' nabanè' bõnni' queénu. Channò gátiè' bõnni' queénu, gata' lu ná'anu utsaga ná'lennu-nè' nu bõnni' rê'èninu, channò réajlè'è Xanru' bõnni' na'. ⁴⁰ Runi neda' gácarõnu bica' ba channò ugá'anau túzinu, en réquida' Bõ' Lá'ayi queé' Dios runè' neda' tzaxzõn.

8

Le ta'gú'u bõnachi lógaca budó' guiøj budó' yaga

¹ Na'a, gu'a didza' ca naca que le rê'aj ráguru', lè na' gula'gú'u bõnachi lógaca budó' guiøj budó' yaga. Ta'nná bõnachi: "Yúgu'tèru' náparu' yól-la' réajni'i." ¡Nácatè didza' ni! Yól-la' réajni'i caní run ga run ba zxõn cuinru', pero yól-la' nadxi'i queéru' luzá'aru' run ga rácalenru' luzá'aru'. ² Channò zoè' nu bõnni' réquinè' chiréajni'inè', biti' bi réajni'ininè' ca ral-la' tséajni'inè', ³ pero nu bõnni' nadxi'inè' Dios, Dios caz zóalenè' bõnni' na'.

⁴ Na'a, ca naca que le rê'aj ráguru', lè na' gula'gú'u bõnachi lógaca budó' guiøj budó' yaga, nõziru' biti' bi nazáca gaca budó' guiøj budó' yaga na' yódzõlió ni, en cünturó nu zoa naca Dios. ⁵ Sal-la' nacua' le téquiquequi bõnachi nácacaga dios, le nacua' lúzixiba, en le nacua' luyú, ate' zían le tu lidza bõnachi, en tuí' lágaca: dios, enca': xan, ⁶ pero queéru' rê'u: Tuzè' náquiè' Dios, Lè' Xuz.

Lè' benè' yúgu'tè le rilé'èru',

ate' zóaru' nabanru' para tseaj ládxi'ru' Lè'.

Tuzè' náquiè' Xanru', Lè' Jesucristo.

Lu nè'è Lè', Dios benè' yúgu'tè le dè,

ate' nabániru' Lè'.

⁷ Calèga yúgu'tè bõchi' luzá'aru' ta'yéajni'inè' lè ni. Bal-lè', nupa ni' zí'aló gula'yéaj ládxi' gaca budó' guiøj budó' yaga, ga ridxintè na'a dza tè'aj tahuè' le gula'gú'u bõnachi lógaca budó' guiøj budó' yaga, ate' téquinè' napa yól-la' huáca que budó' na'. Tu' cabí naca idú ládxi' gaquiè', que lè ni na' téquinè' nabága'gaquiè' xíguia' channò tahuè' lè na'. ⁸ Biti' gun le guí'aj gáguru' ga gúnè' Dios rê'u bal. Channò gáguru' le, biti' gácarõru' dxi'a, en channò cabí gáguru' le, biti' gácarõru' cá'asó. ⁹ Dè lu ná'alli' guí'aj gáguli' biti'tès. Guli' gún chi'i cuinli' para cabí gunli' ga ila'chixi ila'nigui nupa biti' naca idú ca ta'yéajlè' Cristo. ¹⁰ Nadxi ca' li' réquinu' napu' yól-la' réajni'i ca naca lè ni, en huáca gagu' biti'tès. Channò cõ'u xilataj budó' guiøj budó' yaga, en guí'aj gagu' le gula'gú'u bõnachi lo budó' guiøj budó' yaga na', ate' channò nu bõchi' luzó'o biti' naca idú ládxi'è ilé'enè' li', rò'u ragu' ni', nadxi ca' gunu' ga gahuè' lè na' gula'gú'u bõnachi lo budó' guiøj budó' yaga na'. ¹¹ Caní gaca, tu' réquinu' napu' yól-la' réajni'i, gunu' ga ichixi iníguinè' bõchi' luzó'o biti' naca idú ládxi'è. ¿Naru' guntso' caní queé' bõchi' luzó'o, ni'a que nu na' gútiè' Cristo? ¹² Channò caní gunu', gunu' dul-la' tu' usabágu'u bõchi' luzó'o xíguia', en gunu' ga ichixi iníguinè' tu' cabí naca idú ládxi'è, en gunu' ca' dul-la' le ruzóa Cristo tsólá'aló. ¹³ Que lè ni na', channò le guí'aj gahua' gun ga ichixi iníguinè' bõchi' luzá'a, biti'rò gahua' bèla' na', para cabí guna' ga gunè' bõchi' luzá'a dul-la'.

9

Le dè lu nè'è nu bõnni' gubáz nasõl-lè'è Cristo

¹ ¿Naru' cabí naca' gubáz nasõl-lè'è Cristo? ¿Naru' cabí nadéli'da' yól-la' rusólá? ¿Naru' cabí bilé'eda-nè' Xanru' Jesús? ¿Naru' cabí nácali' queé' Cristo ni'a que dxin bena' neda' uláz queé' Xanru'? ² Nadxi ca' téquiquequi ia'zica'rò bõnachi biti' naca' gubáz nasõl-lè'è Cristo. Libí'ili' run bayudxi guéquili' naca' gubáz queé' Cristo. Tu' nácali' queé' Xanru', le naca cázali' naca bè' naca' gubáz nasõl-lè'è Xanru'.

³⁻⁴ Nacua' nupa ta'z'í quidza' neda'. Caní rubi'a didza', rea' légaquiè': Dè lu na' inaba' le guí'aj gahua' tu' runa' dxin ni. ⁵ Lè'sca' caní dè lu na' a utsaga ná'alena'-bi' tubi' bi'i nigula zanru' réajlè'èbi' Cristo para gunbi' neda' tsõzxõn ga ridá, ca na' tunè' ia'zica'rè' gubáz nasõl-lè'è Cristo, en yugu' bõnni' bõché'è Xanru', enca' Pedro. ⁶ ¿Naru' réquili' tuza' neda', en Bernabé ral-la' guntu' dxin lahuí' dza, para idzõlitu' le gágutu'? ⁷ ¿Nuzxi caz bõnni' rejè' gudil-la, ate' riguizxjè' la' cuinsé'? ¿Nuzxi caz bõnni' rudè'è tu la' yèla que lubá uva, en biti' rahuè' le ribía lubá na'? ¿Nuzxi caz bõnni' rapa chi'è-ba' bõ'cu' zxila', en biti' rejè' nidxi'

quegacaba? ⁸Biti' queúquili' la' neda'sò ruá'a caní didza'. Lésca' caní rna le nazúaj lu guichi lu xibá queé' Moisés. ⁹Lu xibá queé' Moisés nazúaj lu guichi le rna: Biti' cu' u' du rúa'aba' bédxi cate' rulíbiba' xzoa' xtila. Bè'è Dios didza' ni, calégasò tu' ru'í ládxe'è-ba' bédxi, ¹⁰ pero para uzí'iru' ca' xibé rè'u. Que lè ni na' nazúaj lu guichi didza' na', ate' bònmi' na' rugá'ané'-ba' bédxi, enca' bònmi' na' runé' ga tu' líbiba' bédxi xzoa' xtila, iropé' na' ral-la' iluné' lóza ila'zi'è que le rula' luyú na'. ¹¹Na'a, channò bentu' dxin ga zóali', le naca ca dxin guz gú'una, lè na' naca queé' Dios Bò' Lá'ayi, ¿naru' réquitseli' bití' ral-la' uzí'itu' xibé tu le do' dè queéli' ca na' ruzi'è xibé bònmi' guz gú'una le rulapè'? ¹²Ia'zica'rò bònachi tu' zéajni'iné' libí'ili' tu'zi'è xibé le dè queéli'. ¿Naru' cabí rála'tèrò uzí'itu' xibé netu' le dè queéli'?

Catu caz buzi'tu' xibé lè ni dè lu na'tu', pero biá' gulentu' yúgu'tè para gaca guntu' libán que didza' dxi'a ca naca queé' Cristo. ¹³Nóz quezili' ca raza quegaca nupa tun dxin que yudo', tu'zi' xibé gun que yudo'. Lésca' caní nupa ta'gú'u ròn quegacaba' bõa' bédxi lu bucugu lá'ayi queé' Dios, tahué' bèla' quegacaba' bõa' bédxi na'. ¹⁴Lésca' caní nuzóé' Xanru' ca ral-la' gaca quegaquié' bònmi' tuné' libán que didza' dxi'a. Nupa tu'zi' xibé libán na' tuné' ral-la' ulu'gagu légaquié'. ¹⁵Neda' catu caz buzi'a xibé lè ni dè lu na'a, ate' lè ni ruzúaja' lu guichi ni bití' naca le rinábini nu bí gunna quia'. Run ba xzõn cuina' tu' cabí nazxja' cate' runa' libán que didza' dxi'a. Gué'ènitèra' gátia' ca gu'a lataj nu inné runa' libán na' tu' nazxja'.

¹⁶Biti' dè lu na' a gun ba xzõn cuina' tu' runa' libán que didza' dxi'a, tu' run bayudxi guna' libán que. Bica' bayechi' neda' channò cabí guna' libán que didza' dxi'a. ¹⁷La'tu' runa' libán tu' rë'èni quezida', huáca inaba' lazxja', pero run bayudxi guna' libán, tu' naca tu le busubágué'è Dios neda' guna'. ¹⁸¿Bizzi' lazxja' uzi'tsa' xibé channò? Ruzi'a xibé le raza ládxa'a tu' cabí nazxja' cate' runa' libán que didza' dxi'a. Biti' ca' ruzi'a xibé lè na' dè lu na'a tu' runa' libán que didza' dxi'a.

¹⁹Na'a, sal-la' cuntu nu yu'a lu nè'e, chibén cuina' ca tu bònmi' nadó'o quegaca yúgu'tè bònachi para gaca guna' ga ulu'lágaca ziánrò ca' bònachi. ²⁰Cate' runa' libán lógaca bònachi judío, run cuina' ga tu bònmi' judío para gaca guna' ga ulu'lágaca bònachi judío na'. Bònachi judío na' tun ca rinná bè' xibá queé' Moisés. Que lè ni na' run cuina' ca tu bònmi' runé' ca rinná bè' xibá na' sal-la' bití' yu'a lu na' xibá na'. Caní runa' para gaca guna' ga ulu'lágaca nupa tun ca rinná bè' xibá na'. ²¹Cate' runa' libán lógaca bònachi izá'a, nupa bití' rinná be'e xibá queé' Moisés léguequi, run cuina' ca tu bònmi' zi'tu' na', para gaca guna' ga ulu'lé'. Bití' rucá'ana' cá'asò xibá queé' Dios. Neda' runa' ca rinná bè' xibá queé' Cristo. ²²Run cuina' ca tu bònmi' bití' naca idú ca réajlè'è Cristo para gaca guna' ga ulu'lágaca nupa na' bití' naca idú ca ta'yéajlè' Lè'. Run cuina' ca nácagaca yúgu'tè bònachi para gaca guna' ga ulu'lágaca bal-la bònachi na'. ²³Lu yúgu'tè lè ni runa', runa' ga ta'yõni bònachi didza' dxi'a, para gaca uzi'a xibé tsözõn len libí'ili' didza' dxi'a na'.

²⁴Chinöz quezili' ca tuné' bònmi' nùtsa'gaquié' lu huitaj. Ta'xiti'è yúgu'tè', pero tuzé' bònmi' idéli'nè' uzí'è xibé lataj lo. Lésca' caní ral-la' gunli' xichiné' Dios, gácali' ca bònmi' nùtsa'gaquié' lu huitaj, para idéli'li' uzí'ili' xibé le ubi'è Dios queéli'. ²⁵Yúgu'tè bònmi', cate' tu'pá'a cuíngaqié' para gaca ila'yázié' lu huitaj, ta'nná be'e cuíngaqié' lu yúgu'tè le tuné'. Tuné' caní para ila'déli'nè' tu bregui' zin le inítitè, pero idéli'ru' rë'u tu le uzí'tica'siru' xibé. ²⁶Que lè ni na', naca' neda' ca tu bònmi' idú ládxe'è rixiti'è. Naca' ca' ca tu bònmi', idú ládxe'è ridil-lé'. Bití' rucudxa' lu bõ'õs. ²⁷Ca runé' bònmi' na' ruidizé' bònachi para tsójsásagaca lu huitaj, runa' ca' neda', runa' libán para ulu'lágaca bònachi. Bònmi' na' nùtsé'è lu huitaj runé' ga gaca tsutsu idútè le naca cazé', en rinná bè'ené' le. Lésca' caní runa' neda', para cabí unitia' xilatja' lu dxin queé' Dios.

10

Bití' ral-la' tseaj ládxi'ru' budó' guiój budó' yaga

¹Ré'ènda' uzéajni'ida' libí'ili', bõchi' luzá'ado', ca guca quegaquié' xuz xtó'otu'. Dios bené' ga gulú'u zxul-la tu bõaj yúgu'tè'. Lésca' caní, gula'dòdè' yúgu'tè' gatsaj láchui'lò nísado'. ²Lu bõaj ni', en lu nísado' ni', guca quegaquié' ca raza que nu ridila nisa. Lè na' guca quegaquié' guca bè' guláquié' tuz len Moisés. ³Lésca' caní, gulahué' yúgu'tè' yõta xtildo' na' bunòdzjé' Dios Bò' Lá'ayi quegaquié'. ⁴Gulé'ajé' yúgu'tè' nisa na' bunòdzjé' Dios Bò' Lá'ayi quegaquié', tu' gulé'ajé' nisa birúaj lè'e guiój na' bulu'e lahui Dios Bò' Lá'ayi, guiój na' gula'báninè' légaquié'. Ca guca guiój na' naca cazé' Cristo, nabániru' Lè'. ⁵Sal-la' guca caní, bití' guyaza ládxe'è Dios yúgu'tè'. Que lè ni na' galútié' lu lataj cá'asò.

⁶Yúgu'tè lè ni naca tu le ruzéajni'i rë'u, para cabí sè ládxi'ru' le ruá' dõ', ca na' gula'zè ládxi'gaquié' légaquié'. ⁷Bití' ral-la' tseaj ládxi'ru' budó' guiój budó' yaga, ca na' guluné' bal-lé' légaquié'. Nazúaj lu guichi lá'ayi le rna: "Gula'bõ'è bònmi' ni', en gulé'aj gulahué', ate' gula'yasé', en guluné' laní que budó' na'." ⁸Bití' ral-la' gunru' le ruá' dõ', ca na' guluné' bal-lé' légaquié' le ruá' dõ', ate' tu dzasó galútié' idú ca tsonna-urua' milé'. ⁹Bití' ral-la' si'

bé'ëru' Xanru', ca na' gula'zì' bè'è Lè' bal-lè' légaquiè', ate' gulátiè' tu' guláguya'aba' bèla sínia' légaquiè'. ¹⁰ Lësca' caní, bití' ral-la' innèru' queè' Dios ca na' gula'nnè' queè' bal-lè' légaquiè', ate' tuè' gubáz lá'ayi queè' Dios busunitiè' légaquiè'.

¹¹ Yúgu'tè lè ni le gulaca quégaquiè' xuz xtó'otu', tu'zéajni'i rë'u, en nazúaj lu guichi lá'ayi para gun gadxi rë'u, tu' chízóaru' dza chízóa údxi que yódzólió ni. ¹² Que lè ni na', nu réqui chinal-la, ral-la' gun chí'i cuini, para cabí ichixi inigui. ¹³ Ca naca le ta'zì' bè' libí'ili' raca ca' quéguequi yúgu'tè bönachi. Dios runè' ca rnnè', en bití' gu'è lataj bi si' bè' libí'ili' le cabí gaca guá' ilenli', pero cate' bi si' bè' libí'ili', uluf'inè' libí'ili' naca gaca irúajli' lu na' tu' xihui', para gaca guá' ilenli'.

¹⁴ Que lè ni na', böchi' luzá'ado', bití' tseaj ládxi'li' budó' guió'j budó' yaga. ¹⁵ Ru'ílena' libí'ili' didza' ca ru'ílena' didza' nupa ta'yéajni'i. Bulí'chi'a bulí'sörö didza' ni gu'a. ¹⁶ Cate' inábiru'-nè' Dios gun lá'ayè' le rë'ajru' cate' rusubanru' ca gútiè' Cristo, lè na' rë'ajru' rulu'í nácaru' tuz len Cristo, en ruzí'iru' xibé le benè' Cristo cate' bulaljè' xichönè' cate' gútiè' lè'e yaga cruz. Lësca' caní, yóta xtila na' ruzxúxjaru', en rágruru', rulu'í dzágaru'-nè' Cristo, en ruzí'iru' xibé le benè' Cristo cate' budödè' idütè le naca cazè' uláz queèru'. ¹⁷ Sal-la' zianru' nácaru', yúgu'tèru' rágruru' tuz yóta xtila na', en que lè ni na' nácaru' ca tuz bönachi.

¹⁸ Bulí'yútsöca' ca tunè' bönni' Israel. Bönni' ní' tahuè' lahuè' Dios le ta'gu'è lu bucugu lá'ayi queè', lè na' tahuè' rulu'í dzágaquiè' Dios. ¹⁹ ¿Bizxi rna didza' ni ruá'a? Bití' rnnia' napa budó' guió'j budó' yaga yöl-la' huáca, en le ta'gu' u bönachi lógaca budó' guió'j budó' yaga na' bití' napa yöl-la' huáca. ²⁰ Caní rnnia': Lè na' ta'gu' u bönachi bití' núnbè'gaquiè' Dios lógaca budó' guió'j budó' yaga, ta'gu' u lógaca bö' xihui', en caléga lahuè' Dios. Rë'ènda' bití' idzágalí' yugu' bö' xihui'. ²¹ Bití' gaca guí'jali' le rulu'í nácaru' tuz len Xanru', enca' lè na' uluf'í nácalí' tuz len yugu' bö' xihui'. Bití' gaca gáguli' le rulu'í dzágaru'-nè' Xanru', enca' le uluf'í dzágalí' yugu' bö' xihui'. ²² ¿Naru' gúntsaru' ga uzxé'enè' Xanru'? ¿Naru' réquitseli' nápatèröli' yöl-la' huáca ca napè' Lè'?

Le dè lu ná'aru' gunru', en ca ral-la' idxi'igacru'-nè' böchi' luzá'aru'

²³ Naca idütè li didza' na' rna: "Yúgu'tè dè lu ná'aru' gunru'." Na'a, neda' rnnia': Caléga yúgu'tè ral-la' gunru'. Yúgu'tè dè lu ná'aru' gunru', pero caléga yúgu'tè gun ga gácarö idú ca réajlè'ëru' Cristo. ²⁴ Ral-la' guí'jali' ládxi'ru' gunru' le gun ga gaca dxi'a quégaquiè' böchi' luzá'aru', en calégasö le gun ga gaca dxi'a que la' cuinsiru'.

²⁵ Bití'tès bi tutí' bönachi lu yé'ëyi, huáca gáguli', en bití' bi ral-la' inábali' que, para cabí cuéqui böniga ládxi'do'oli'. ²⁶ Nazúaj lu guichi le rna: "Queé' Xanru' nequi yódzólió ni, enca' yúgu'tè le dè yódzólió ni."

²⁷ Channö ulidzè' tu bönni' bití' réajlè'è Dios libí'ili' para guídali' lidxè', ate' guè'ënili' tséajli', guli'gagu yúgu'tè le cu'è loli', en bití' bi inábali' que, para cabí cuéqui böniga ládxi'do'oli'. ²⁸ Channö nútí'tès nu gué libí'ili': "Lè ni gula'gu'è lo budó' guió'j budó' yaga", bití' gáguli' lè na' para gaca dxi'a que nu na' gudí'xjö'i' caní libí'ili', en para cabí cuéqui böniga ládxi'da'ahuè'. ²⁹ Rnnia': Para cabí cuéqui böniga ládxi'da'ahuè' bönni' na' gudí'xjö'i' inè' caní libí'ili', en caléga para cabí cuéqui böniga ládxi'do'oli' libí'í cázali'.

Nadxi ca' nu inábali neda', inná: "¿Bizx que ral-la' uzó'a tsóla'aló le dè lu na'a guna' tu' ribequi böniga ládxi'da'ahuè' bönni' yúbölö?" ³⁰ Huáca inná ca' nu na': "Channö guía'-nè' Dios: Xclenu', ní'a que lè na' rahua', ¿bizx que nu uzegui neda' didza' ní'a que lè na' rahua'?" ³¹ Channö bi gáguli' o bi guí'jali', o bití'tès bi gunli', guli'gún yúgu'tè para gaca queè' Dios yöl-la' ba. ³² Bití' bi gunli' le gun ga ila'chixi ila'nigui bönachi judío, en bití' gunli' le gun ga ila'chixi ila'nigui bönachi bití' nácacaca judío, en bití' gunli' le gun ga ila'chixi ila'nigui bönachi queè' Dios. ³³ Guli'gún ca runa' neda'. Ru'í ládxa'a guna' le ila'yaza ládxi'gaca yúgu'tè bönachi, en bití' ru'í ládxa'a guna' le uzi'a xibé la' néda'sö, pero le ulu'zì' xibé ia'zica'rö bönachi para ulu'lágaca.

11

¹ Guli'gún ca runa' neda', ca na' neda' ca' runa' ca benè' Cristo.

Le tunnu nigula lógaca bönachi queè' Cristo

² Runa' libí'ili' zxön, böchi' luzá'ado', tu' röjnética'sili' neda', en nazi' lu ná'ali' xibá budóda' lu ná'ali'. ³ Na'a, rë'ènda' tséajni'ili' rinná bé'enè' Cristo yúgu'tè bönni', ate' bönni' rinná bé'enè'-nu nigula, ate' Dios rinná bé'enè' Zxí'inè', Bönni' na' náquiè' Cristo. ⁴ Channö tu bönni' rulidzè' Dios, o ru'è didza' uláz queè' Dios, en dxía icjè' xilu'è, rucá'anè' Cristo cá'asö. ⁵ Na'a, channö tu nigula rulídzanu Dios, o ru'ínu didza' uláz queè' Dios, en bití' bi zxoa ícjanu, rucá'ananu bönni' queènu cá'asö, en naca queènu ca naca queènu tu nigula narugu guitsa' ícjanu. ⁶ Channö tu nigula cabí bi zxoa ícjanu, ral-la' irugu ca' guitsa' ícjanu. Channö gun ga utu'ínu nigula na' channö nu chugu guitsa' ícjanu, ral-la' bi ixóa ícjanu. ⁷ Tu bönni' bití' bi ral-la' udxía icjè' cate' ridxinè' lahuè' Dios, tu' náquiè' ca naca cazè' Dios, ate' lè na' náquiè'

bönni' rulu'í lahui yöl-la' zxön queé' Dios, pero le nácanu nigula na' rulu'í lahui yöl-la' zxön queé' bönni' queénu. ⁸ Cate' bené' Dios bönachi, biti' bubéajé' bönni' na' lu nigula. Nigula na', lu bönni' na' bubéajé'-nu. ⁹ Lësca' caní, biti' bené' Dios bönni' para uzí'ínu xibé' nigula, pero bené' nigula para uzi'è xibánu bönni'. ¹⁰ Que lê ni na', nigula na' ral-la' ixóa ícanu le rulu'í zoa nu rinná be'e lênu tu' tu'yúé' gubáz lá'ayi queé' Dios ré'u. ¹¹ Na'a, lahué' Xanru', tu bönni' riquinné'-nu nigula queé', ate' nigula na' riquíninu-né' bönni' queénu. ¹² Ca na' bené' Dios, bubéajé'-nu nigula lu bönni', lësca' caní na'a, yúgu'té bönni' náljlengaquié'-nu nigula, ate' yúgu'té rirúaj lu në'è Dios.

¹³ Buli'chi'a buli'sörö la' libí'isili'. ¿Naru' ral-la' ulídzanu-né' Dios tu nigula biti' bi xzoa ícanu? ¹⁴ ¿Naru' cabí rusédi libí'ili' yöl-la' nácaté quegaca bönachi, ral-la' utuf'iné' bönni' na' ru'è lataj itunna guitsa' icjé'? ¹⁵ Na'a, channö natúnna guitsa' ícanu tu nigula, naca yöl-la' lachi queénu, tu' b'é'è Dios queénu guitsa' ícanu para usubín ícanu. ¹⁶ Channö zoa nu gué'èni tá'baga' didza' ni, canísö nazí' lu na' tu' runtu', en lëbisö tun yugu' cö' bönachi queé' Dios.

Bönachi Corinto tu' cá'ana cá'asö le ré'aj rágurú' para usubanru' ca gútié' Xanru'

¹⁷ Biti' runa' libí'ili' bal ca naca le uzéajni'ida' libí'ili' na'a. Le runli' biti' run ga raza dxi'a queéli' cate' rudúbili' queé' Cristo, pero run ga raza queéli' le cabí naca dxi'a. ¹⁸ Risí lahua' ruzéajni'ida' libí'ili' lê ni ta' guíxjói' i bönachi neda', ta'nná: "Cate' rudúbili' queé' Cristo, narúajili' choplö", ate' réajlé'a nadxi ca' naca caní. ¹⁹ Run bayudxi ila'cuá'alen libí'ili' nupa tu' sedí le cabí nácaté para ilaca bé' nupa nácgaca idú bönachi queé' Cristo. ²⁰ Que lê ni na', cate' rudúbili', lê na' ráguli' tsözxön biti' naca le ré'aj rágurú' para usubanru' ca gútié' Xanru'. ²¹ Caní naca, tu' runli' bayudxi tu' tuli' ráguli' le nuá'ali' que queéli' cate' ráguli' tsözxön, ate' que lê ni na' ridunli' bál-lali', ate' la'bál-lali' ré'aj ráguli' ga ridxinté rízdúxili'. ²² ¿Naru' cabí zoa lídxili' ga huáca gu'aj gáguli'? Ca na' runli', rucá'anali' bönachi queé' Dios cá'asö, en runli' ga tu' tui' nupa biti' bi dé' queéguqui. ¿Biziz caz guía' libí'ili'? ¿Naru' guntsa' libí'ili' bal? Biti' ca' runa' libí'ili' bal ca naca lê ni runli'.

Le ré'aj rágurú' para usubanru' ca gútié' Xanru'

²³ Xanru' caz budödé' lu na'a lê na' busédida' libí'ili', ca na' bené' Xanru' Jesús yëla ni cate' nu budödi Lë' lu ná'agaquié' bönni' gulútié' Lë'. Gudélé'è yöta xtila, ²⁴ en cate' budxi gudxé' Dios: "Xclenu", buzuzxjé' le, en gunné': "Guli'gagu. Lê ni naca xipéla' a le nayuzxaj uláz queéli'. Guli'gún caní, para usubanli' ca gaca quia' neda'." ²⁵ Lësca' caní, gudödi gulahué', gudélé'è tu zxíga'do', en gunné': "Le yudzu zxíga'do' ni naca xichóna', le run tsutsu didza' cubi rucá'ana tsahui'. Guli'gún caní yúgu'té luzuí gu'jali' lé, para usubanli' ca gaca quia' neda'." ²⁶ Caní gaca ga idinxinté dza huödé' Xanru'. Yúgu'té luzuí gáguli' yöta xtila caní, en gu'jali' que le yudzu zxíga'do' caní, ulu'í'ili' lahui ca gútié' Xanru'.

Ca ral-la' gunru' cate' gu'aj gáguru' para usubanru' ca gútié' Xanru'

²⁷ Que lê ni na', nútí'tés nu gagu yöta xtila ni o gu'aj que le yudzu zxíga'do' ni queé' Xanru', en biti' run le bal, nabaga' xíguia' nu na', en run dul-la', tu' rucá'ana xipélé'è Xanru', enca' xichóné' cá'asö. ²⁸ Que lê ni na', ral-la' uchi'a usöröru' la' cuínsiru' tu turu', ate' ní'irö huáca gáguru' yöta xtila ni, en gu'ajru' que le yudzu zxíga'do' ni. ²⁹ Nútí'tés nu ré'aj ragu' lê ni, en biti' run le bal tu' cabí réquibe'e rulu'í le guca queé' Xanru', rusubaga' cuini dul-la' ní'a que lê na' ré'aj ragu. ³⁰ Que lê ni na' te'e zian nupa dzágagaca libí'ili', en ta'cuídí, ate' zianguequi chinátigaca. ³¹ La'tu' uchi'a usöröru' la' cuínsiru', biti' uchi'a usöröé' Xanru' ré'u, ³² Channö gun bayudxi uchi'a usöröé' Xanru' ré'u, usaca' zí'é' ré'u, para cabí irugu queéru' cate' ichúguié' queéguqui bönachi yödölió ilátigaca.

³³ Que lê ni na', böchi' luzá'ado', cate' udúbili' para gu'aj gáguli' para usubanli' ca gútié' Xanru', guli'cöza luzá'ali'. ³⁴ Channö zoa nu ridún, ral-la' gagu nu na' ga naca lu yu'u lídxi, para cabí gun bayudxi uchi'a usöröé' Dios libí'ili' cate' udúbili'. Nacuá' ia'bal-la le runli', pero ucá'ana' tsahui' yugu' lê na' cate' uduyúa' libí'ili'.

12

Yugu'yöl-la' huáca runné' queéru' Dios Bö' Lá'ayi

¹ Na'a, böchi' luzá'ado', ré'ènda' tséajni'ili' ca zeaj naca yöl-la' huáca runné' queéru' Dios Bö' Lá'ayi.

² Nöz quézili' ca guca cate' ni' biti' réajlé'ènilí' Cristo, bé'èli' lataj gula'ché' bönachi libí'ili' ga yübölo. Guyéaj ládxi'li' budó' guió' budó' yaga, le cabí ta'nné. ³ Que lê ni na', ruzéajni'ida' libí'ili' caní, rnniá': Ladaj yúgu'té nupa tu'í didza' uláz queé' Bö' Lá'ayi queé' Dios, cuntú nu gaca inné' xihui' queé' Jesús, en nitúé' gaca inné': "Jesús náquié' Xanru'", channö cabí zóalené' Dios Bö' Lá'ayi nu na'.

⁴ Na'a, nadzá'gaca tu tu le runné' Dios Bö' Lá'ayi queéru', pero tuzé' náquié' Bö' Lá'ayi na'. ⁵ Lësca' caní, nadzá'gaca tu tu dxin rigu'è Xanru' lu ná'aru', pero tuzé' náquié' Xanru' na'.

⁶ Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu na' runna yöl-la' huáca na' queëru' para gunru' xichinë'. ⁷ Dios runnë' que queëru' tu le naca bë' náparu' yöl-la' huáca queë' Dios Bô' Lá'ayi, lë na' ruzi'iru' xibé yúgu'tëru'. ⁸ Dios Bô' Lá'ayi runödzejë' queë' tu bönni' yöl-la' huáca ru'ë didza' len yöl-la' rácada', atë' ia'tüë' bönni', Lë cazë' Bô' Lá'ayi runödzejë' queë' yöl-la' huáca ru'ë didza' lu yöl-la' réajini'. ⁹ Lësca' caní, Lë cazë' Dios Bô' Lá'ayi na' runödzejë' queë' ia'tüë' bönni' yöl-la' réajlë' Cristo bi gunë', atë' ia'tüë' bönni' runödzejë' queë' yöl-la' huáca ruünë' nupa te'e. ¹⁰ Ia'tüë' bönni' runödzejë' queë' yöl-la' huáca runë' yugu' yöl-la' huáca que yehua' yubá, atë' ia'tüë' bönni' ru'ë lë' lataj ru'ë didza' uláz queë' Dios, atë' ia'tüë' bönni' runödzejë' queë' yöl-la' huáca réquibe'enë' channö bö' dzaga nu bönni' nequi queë' Dios, o nequi que tu' xihui'. Runödzejë' queë' ia'tüë' bönni' yöl-la' huáca ru'ë didza' yübölö le cabí nazëdë', atë' queë' ia'tüë' bönni' yöl-la' huáca rudödë' didza' yübölö na' bití' nazëdë'. ¹¹ Yúgu'të lë ni runë' Lë cazë' Dios Bô' Lá'ayi, tu' runödzejë' que tu tu bönachi tsca ré'ëni quëzinë'.

Yúgu'tëru' nácaru' ca tuz bönachi

¹² Ca na' naca tuz idütë le naca cázaru', sal-la' zían le nagudi' dzágalenru', atë' le zían na' nagudi' dzágalenru' nácacaga tuz idütë le naca cázaru', lësca' caní naca queë' Cristo. ¹³ Tu' zóalenë' Lë cazë' Dios Bô' Lá'ayi rë'u, lë ni naca queëru' ca tu le nadílaru' nisa, le naca bë' nácaru' ca tuz bönachi, sal-la' nácaru' yugu' bönni' judío, en yugu' bönni' zi'tu', enca' yugu' bönni' nadó'ogaquië', en yugu' bönni' bití' nadó'ogaquië'. Yúgu'tëru', Dios bë'ë rë'u lataj sí'iru' le runödzejë' Bô' Lá'ayi.

¹⁴ Na'a, lu idütë le naca cázaru', zían le nagudi' dzágalenru', en calëga tuz. ¹⁵ La'tu' huáca gü'i didza' ní'aru', huanná: "Tu' cabí naca' në'ë bönni', bití' néquida' queë'", didza' ni bití' gun ga bití' nequi queë' bönni' na'. ¹⁶ La'tu' huáca gü'i didza' nágaru', huanná: "Tu' cabí naca' guiój lahuë', bití' néquida' queë' bönni' ni", didza' ni bití' gun ga bití' nequi queë' bönni' na'. ¹⁷ La'tu' naca guiój loru' idütë le naca cázaru', ¿nacxi gaca yöniru'? La'tu' naca nágaru' idütë, ¿nacxi gaca ilé'e zxína'ru'? ¹⁸ Na'a, Dios nucu'ë yúgu'të le nagudi' dzágalenru' ca gu'uni quëzinë' Lë'. ¹⁹ La'tu' naca tuz le nagudi' dzágalenru', bití'rö soa idú ca naca cázaru'. ²⁰ Na'a, ca nácaru', zían le nagudi' dzágalenru', pero tuz le nácaru'.

²¹ Que lë ni na', guiój loru' bití' gaca guië ná'aru', inná: "Bití' riquinda' lí'." Lësca' caní, Íjaru' bití' gaca guië ní'aru', inná: "Bití' riquinda' libí'ili'." ²² Na'a, yugu' le nagudi' dzágalenru', lë na' réquiru' nácacagarö cuídí'sö, lë ni naquíniröru'. ²³ Lësca' caní, yugu' le nagudi' dzágalenru', le réquiru' nácacagarö cá'asö, lë ni rugácuröru' dxi'a, en yugu' le réquiru' bití' ral-la' ilá' lahui, rugácuröru' ca' dxi'a. ²⁴ Bití' run bayudxi gunru' caní que le nácarö lachi que le néquiniru'. Dios benë' idütë le naca cázaru', en benë' ga nácarö lesaca' lë na' réquiru' rë'u nácarö cá'asö. ²⁵ Caní benë', atë' bití' narúajgaca choplö le nagudi' dzágalenru', tu' tun chí'i luzë'eguequi tu ia'tü. ²⁶ Channö gaca zi' tu le néquiniru', ilaca zi' tsözön len le yúgu'të le néquiniru' na', en channö tu le néquiniru' zoa bi ruzi' xibé, yúgu'të le nagudi' dzágalenru' tu'zi xibé tsözön le.

²⁷ Na'a, libí'i cázali' dzágali' idütë le naca cazë' Cristo, atë' tu tuli' nácali' ca yugu' le nagudi' dzágalenë'. ²⁸ Lësca' caní, ladaj bönachi queë' Cristo, Dios nucu'ë nupa tun xichinë'.

Ga naca lo nucu'ë yugu' bönni' gubáz queë' Cristo.

Ga naca buropi nucu'ë yugu' bönni' tu'ë didza' uláz queë'.

Ga bunny nucu'ë yugu' bönni' tu'sédinë' luzá'aru'.

Ní'irö nucu'ë nupa tun yugu' yöl-la' huáca que yehua' yubá.

Ní'irö nucu'ë nupa tu'ün nupa te'e.

Ní'irö nucu'ë nupa tácalen böchi' luzá'aru'.

Ní'irö nucu'ë yugu' bönni' tu'lu'ínë' rë'u dxin gunru'.

Ní'irö nucu'ë yugu' bönni' tu'ë didza' yübölö bití' nazëdagaquië'.

²⁹ Calëga yúgu'të' nácacagaquië' gubáz queë' Cristo.

Calëga yúgu'të' tu'ë didza' uláz queë' Dios.

Calëga yúgu'të' tu'sédinë' luzá'aru'.

Calëga yúgu'të' tunë' yugu' yöl-la' huáca que yehua' yubá.

³⁰ Calëga yúgu'të' dë lu ná'agaquië' ulu'ünë' nupa te'e.

Calëga yúgu'të' tu'ë didza' yübölö bití' nazëdagaquië'.

Calëga yúgu'të' tu'dödë' didza' yübölö bití' nazëdagaquië'.

³¹ Gulí'gúí' ládxi'li' cu'ë Dios lu ná'ali' yugu' yöl-la' huáca na' nácacagarö lesaca'. Na'a, ulu'ida' libí'ili' tu le nácarö lesaca' ca yúgu'të lë ni.

¹ Sal-la' gaca gu'a xtída'gaca bönachi le cabí nazëda', enca' xtída'gaquië' gubáz lá'ayi queë' Dios, pero channö cabí nadxí'ida' luzá'a, didza' gu'a bití' gácarö lesaca' ca bö le run gui rucödxiru' o guíë rutíl-laru' luzë'e. ² Sal-la' nazí' lu na'a gu'a didza' uláz queë' Dios en tséajni'ida' yúgu'të le nagachi', en yúgu'të didza' réajni', en sal-la' naca idú ca réajlë'a Dios ga ridxintë huáca cúa' yugu' gu'a, pero channö cabí nadxí'ida' luzá'a, bití' bi nazáca'a. ³ Sal-la' quísa' idütë le dë quía' para ughua' yugu' bönachi yechí', en sal-la' udöda' idütë le naca' ga ulu'zegui bönachi le tu' réajlë'a Cristo, pero channö cabí nadxí'ida' luzá'a, bití' ca' uzi'a xibë lë na' runa'.

⁴ Nu bönni' nadxí'inë' luzë'ë, ribözë' zxon ladxí'.

Náquië' dxi'i ladxí', en bití' ruzxé'enë' luzë'ë.

Nadxí'inë' luzë'ë idú ladxë'ë.

Bití' run ba zxon cuinë', en bití' run cuinë' lo.

⁵ Bití' runë' le ruá' dö'.

Bití' rudúli'në' le dë queë'.

Bití' rilëtenë', en bití' rönjenë' dö' gulufí' bönachi queë'.

⁶ Bití' ca' rudzéjanë' cate' nu run le ruá' dö'.

Rudzéjanë' cate' nu run le naca idütë li.

⁷ Ruá' rilenë' bíti'tës bi gun luzë'ë queë'.

Réajlë'tica'së' luzë'ë.

Rúntica'së' löza gun luzë'ë le naca dxi'a.

Ribózatíca'së' zxon ladxí'.

⁸ Bíti'rö tödi que yöl-la' nadxí'i. Huadödi que le dë lu ná'agaca bönachi ilufí' didza' uláz queë' Dios. Huadxín dza cate' bíti'rö gata' lu ná'agaca bönachi ilufí' didza' yúbölö le cabí nazëdagaca, ate' huadödi que yöl-la' réajni' queéquei bönachi. ⁹ Láti'do'os réajni'iru' na'a, en láti'do'os ca' ruí'iru' didza' uláz queë' Dios. ¹⁰ Cate' idxín le naca idú, ní'irö údxi que lë na' naca láti'do'os.

¹¹ Cate' ni' naca' bí'ido', bë'a didza' ca bí'ido', en gulequi icja' ca bí'ido', en guzá' ladxá'a ca bí'ido'. Cate' bigula' bucá'ana' le nequi que bí'ida'ahua'. ¹² Na'a le rilë'eru' naca ca le rilë'eru' cate' ruyú cuinru' tu lu guíë dxilido'. Bití' rilë'eru' idú ca naca. Dza ní'irö ilë'eru' idú ca naca yúgu'të. Na'a núnbë'a láti'do'os. Dza ní'irö gúnbë'a yúgu'të ca na' Dios caz núnbë'e neda'. ¹³ Na'a, nacaú'tica'sö yöl-la' réajlë' queëru' Dios, en yöl-la' run löza queëru' Dios, en yöl-la' nadxí' queëru' luzá'aru'. Nacaú' yonna ni, pero le naca lo naca yöl-la' nadxí'i.

14

Yugu'yöl-la' huáca runnë' queëru' Dios Bö' Lá'ayi

¹ Gulí'gún bayudxi idxí'ili' luzá'ali', en guli'güí' ladxí'li' sí'ili' ca' yugu' yöl-la' huáca runnë' queëru' Dios Bö' Lá'ayi, en le naca lo, yöl-la' huáca güí'ili' didza' uláz queë' Dios. ² Nu ruí' didza' yúbölö le cabí nazëda, calëga bönachi ruí'ilen didza' nu na'. Dios caz ruí'ilen didza' nu na', tu' cuntú nu zoa réajni' didza' ruí' nu na'. Dios Bö' Lá'ayi ru'ë nu na' lataj ruí' didza' ca náacagaca le nagachi' queë' Dios. ³ Nu na' ruí' didza' uláz queë' Dios, ruí'ilen bönachi didza' para gácarö idú ca ta'yéajlë' Cristo. Rutípa ladxí'guequi, en ruhuë' tshahui' léguequi. ⁴ Nu na' ruí' didza' yúbölö le cabí nazëda run tsutsu la' cuinsi, pero nu ruí' didza' uláz queë' Dios run tsutsu yúgu'të bönachi queë' Cristo.

⁵ Raca ladxá'a güí'ili' didza' yúbölö le cabí nazëdali' yúgu'tëli', pero le naca lo, rë'ënda' güí'ili' didza' uláz queë' Dios. Ruzí'iröru' xibë nu ruí' didza' uláz queë' Dios ca ruzí'iru' xibë nu ruí' didza' yúbölö le cabí nazëda, channö cabí zoa nu udödi didza' yúbölö na' le cabí nazëda, para ilaca tsutsu bönachi queë' Cristo. ⁶ Que lë ni na', böchi' luzá'ado', cate' guída' ga zóali', channö güí'ilena' libí'ili' didza' yúbölö le cabí nazëda', bití' bi uzí'ili' xibë. Uzí'isili' xibë didza' na' güí'ilena' libí'ili' le nulufinë' Dios neda', o didza' uzéajni' rë'u, o didza' gu'a uláz queë' Dios, o le naca xibá queë'.

⁷ Lësa' caní' raca que le ta'gú'u bö, yugu' le cabí nabángaca, ca naca gui rucödxiru', o ca naca guitarra. Channö cabí tul-la ca ral-la' ilún, çnacxi caz gúnbë'eru' dízxilö le tul-la na', lë na' rul-la gui na', o guitarra na'? ⁸ Channö cabí cödxí ca ral-la' gun lúzuba' bóa' na' ulidza rë'u lu gudil-la, çnuzxi caz upá' cuini para tseaj lu gudil-la na'? ⁹ Lësa' caní' raca queéli'. Channö len lúdxí'li' güí'ili' didza' le cabí taca bönachi, bití' ca' ila'yéajni' didza' güí'ili'. Caní' gaca, nítisö güí'ili' didza'. ¹⁰ Le nácatë nacua' zían didza' yúbölö tuí' zían cö' bönachi izá'a lu yödzóliö ni, ate' nacua' bönachi ta'yéajni' tu tu didza' na'. ¹¹ Na'a, channö cabí réajni'ida' didza' ru'ë tu bönni', gaca' ca tu bönni' zítu' lahuë' bönni' na' ru'ë didza', ate' bönni' na' ru'ë didza' gáquië' ca' lahua' neda' ca tu bönni' zítu'. ¹² Lësa' caní' naca queéli'. Ruí'ida' ladxí'li' sí'ili' yugu' le runnë' queëru' Dios Bö' Lá'ayi. Que lë ni na', guli'güí' ladxí'li' sí'ili' le ilún ga ilácarö tsutsu bönachi queë' Cristo.

¹³ Que lè ni na' ca', nu ru'í didza' yúbölö le cabí nazèda ral-la' ulidza Dios, en inabi Lè' gunnè' que yòl-la' huáca quixjò' le rë'èni inná didza' na' ru'í nu na'. ¹⁴ Cate' rulidza'-nè' Dios, channò ruá'a didza' yúbölö le cabí nazèda', lu bö' naca caza' rulidza'-nè' Dios, pero tu' cabí réajni'ida' didza' ruá'a, lu yòl-la' réajni' quia' bití' ruzi'a xibé didza' na' ruá'a. ¹⁵ ¿Nacxi caz ral-la' guna' channò? Ulidza'-nè' Dios lu bö' naca caza', enca' lu yòl-la' réajni' quia' ulidza'-nè' Dios. Gul-la' yòl-la' ba lu bö' naca caza', enca' lu yòl-la' réajni' quia' gul-la' yòl-la' ba. ¹⁶ Channò lu bö' naca cazu' rulidza lá'ayu'-nè' Dios, ate' zoa ni' nu riyónsò, channò cabí réajni' didza' ru'u, ¿nacxi caz gaca inná: "Ca' gaca", ni'a que didza' ru'u, rë'u-nè' Dios: "Xclenu"?" ¹⁷ Nadxi ca' dxí'ado' ru'u didza', rë'u-nè' Dios: "Xclenu." Channò cabí réajni' didza' ru'u, bití' bi uzí' xibé nu na' riyóni. ¹⁸ Rea'-nè' Dios: "Xclenu", tu' ru'í'ra didza' yúbölö le cabí nazèda' ca yúgu'tèli'. ¹⁹ Lógaca bònachi queè' Dios gué'ènitèròda' gu'a gáyu'sò didza' le gaca ila'yéajni'i bònachi ca zían gayuá' didza' yúbölö le cabí nazèda', ate' cuntu nu gaca tséajni'i. Gaca usédida' ia'zica'rò bònachi tuzi channò ila'yéajni'i didza' gu'a.

²⁰ Böchi' luzá'ado', bití' gácali' ca bí'ido' ca naca le rizá' ládxi'li'. Gul'gaca ca bí'ido' para cabí gunli' le ruá' dõ', pero guli'gaca bònchi' chinácagaca ca naca le rizá' ládxi'li'. ²¹ Nazúaj lu guichi lá'ayi le rnna: "Len didza' yúbölö, en lu ruá'agaca bònachi izá'a gü'í'lena' bònachi ni didza'. Sal-la' guna' caní, bití' ulu'zè nágagaca xtídza'a." ¡Caní rnnè' Xanru! ²² Caní naca, Dios ru'è rë'u lataj ru'í'ru' didza' yúbölö le cabí nazèdaru' para gaca tu le naca bè' lógaca bònachi bití' ta'yéajlè', en calèga lógaca nupa ta'yéajlè' Cristo. Ru'è rë'u lataj ru'í'ru' didza' uláz queè' Lè' le ulu'z'í' xibé nupa ta'yéajlè' Cristo, en calèga bònachi na' bití' ta'yéajlè'. ²³ Que lè ni na', cate' udúbili' tsòzxo'n, yúgu'tèli' na' néquili' queè' Cristo, channò gü'í'ili' didza' yúbölö le cabí nazèdali' yúgu'tèli', ate' tsázagaca nupa nazèdagaca láti'do'os, o nupa bití' ta'yéajlè' Cristo, ¿naru' cabí ila'nná: "Nachixi ícjali"?" ²⁴ Na'a, channò yúgu'tèli' gü'í'ili' didza' uláz queè' Dios, ate' tsaz nu cabí réajlè' Cristo o nu nazèda láti'do'os, gué'quibe'e nu na' nabaga' xígua', ate' Dios uchi'a usóròè' lè'. Caní gué'quibe'e nu na', tu' tseajni' didza' gü'í'ili' yúgu'tèli'. ²⁵ Gué'quibe'e ca naca le rizá' ládxi' nu na', lè na' bigachi', ate' uzóa zxibi nu na', en tseaj ládxi' Dios, ate' inná: "Le nácatè Dios zóalenè' libí'ili'."

Caral-la' gunru' ga rudúbiru' queè' Cristo

²⁶ Que lè ni na', böchi' luzá'ado', cate' rudúbili' queè' Cristo, rul-lè' tuè' bònchi' dzáguie' libí'ili' tu salmo, ate' rusédinè' ia'tué' tu xibá, ate' ia'tué' riguixjò'inè' libí'ili' tu le bulu'ínè' Dios lè', ate' ia'tué' ru'è didza' yúbölö le cabí nazèdè', ate' ia'tué' rudòdè' didza' yúbölö na' le cabí nazèdè'. Yúgu'tè' le gunli' ral-la' gaca le ulu'z'í' xibé nupa tu'dubi queè' Cristo. ²⁷ Cate' nacua' ni' nupa tu'í' didza' yúbölö le cabí nazèdagaca, bití' ral-la' gü'í'ili' didza' caní zianrò ca chopa tsónnasili'. Huáca gu'è didza' tuzè' bònchi' na', ate' tódi na' huáca gu'è didza' ia'tué', pero run bayudxi soa nu udódi didza' yúbölö na' le bití' nazèdali'. ²⁸ Channò cuntu nu zoa nu gaca udódi didza' yúbölö na' le cabí nazèdali', nu na' ru'í' didza' yúbölö le cabí nazèda ral-la' soa dxisò ga na' nudúbili', ate' huáca gü'í'ilen Dios didza' na' lu icja ládxi'da'ahui. ²⁹ Lè'sca' caní, yugu' bònchi' tu'è didza' uláz queè' Dios ral-la' ilu'è didza' chopa tsónnasè', ate' ia'zica'rè' bònchi' na' tu'è didza' uláz queè' Dios ral-la' ulu'chi'a ulu'sóròè' didza' ru'è bònchi' na'. ³⁰ Channò Dios uluf'inè' tu bònchi' rò'è ni' le rë'èni inná xtídzè'è, ral-la' soa dxisò nu na' ru'í' didza'. ³¹ Yúgu'tèli' huáca gü'í'ili' didza' uláz queè' Dios tu tuli' para izédali' yúgu'tèli', en idipa ládxi'li' ca' yúgu'tèli'. ³² Yugu' bònchi' tu'è didza' uláz queè' Dios huáca ila'nná be'e cuíngaquie', en ila'cu'è dxisò. ³³ Calèga Dios nu run ga rutsásaru', tu' rë'ènè' Lè' gácaru' ba'a ládxi', ca na' runè' ga nacua' yúgu'tè cò' bònachi queè' Cristo.

³⁴ Ral-la' ila'cuá'anu dxisò nigula queéli' ga na' rudúbili'. Bití' dè lu ná'agacanu ilu'ínu didza' ni'. Ral-la' ila'cuá'anu nòxaj ca na' rinná bè' xibá queè' Dios. ³⁵ Channò tè'èninu ila'yéajni'ínu ia'lati', ral-la' ila'nábinu bònchi' que queégacanu cate' ni' nacu'è lédxigaquie'. Bití' ral-la' ilu'ínu didza' yugu' nigula ga na' rudúbiru' queè' Dios.

³⁶ ¿Naru' réquitseli' bunòdzjè' Dios xtídzè'è lu ruá'ali' libí'isili'? ¿Naru' réquitseli' bidxín xtídzè'è Dios queézili' libí'ili'? ³⁷ Channò nu bònchi' nútsè'è ládjali' réquinè' ru'è didza' uláz queè' Dios, o réquinè' zóalenè' Dios Bò' Lá'ayi lè', bònchi' ni ral-la' si' lu nè'è naca xibá queè' Xanru' le ruzúaja' queéli' lu guichi ni. ³⁸ Na'a, channò cabí ru'í' ládxi'è didza' ni, bití' gü'í' ládxi'li'-nè' bònchi' na'.

³⁹ Que lè ni na', böchi' luzá'ado', guli' gü'í' ládxi'li' gü'í'ili' didza' uláz queè' Dios, en bití' inná bé'eli' nu ru'í' didza' yúbölö le cabí nazèda. ⁴⁰ Ral-la' gunru' yúgu'tè ca sa'yéaj, en lu yòl-la' ba'a ládxi'.

15

Bubanè' Cristo lu yòl-la' guti

¹ Na'a, böchi' luzá'ado', riguixjò'ida' libí'ili' ca naca didza' dxi'a na' bena' libán que ga zóali', lè na' guzxi' lu ná'ali', ate' run ga nácarò idú ca réajlè'èli' Cristo. ² Ni'a que didza'

ni uláli', channö gunli' ca rnna didza' dxi'a na' bena' libán que ga zóali', channö le nácatë guyéajlë'ëli'-në' Cristo.

³ Ga gusí lo budöda' lu ná'ali' le budödë' Dios lu na'a neda'. Caní rnna: "Gútië' Cristo uláz queëru' tu' nabága'ru' dul-la'." Ca naca lë ni nazúaj lu guichi lá'ayi le rnna ben bayudxi benë'. ⁴ Rnna ca: "Bigachë'ë yeru ba, en cate' bizá'a tsonna dza, bubanë' lu yöl-la' guti", ca na' nazúaj ca' lu guichi lá'ayi le rnna ben bayudxi guca queë'. ⁵ Gudödi ni' bulufi lahuë' Cristo, ate' bilé'enë' Pedro Lë', en gudödi ni' idxínnutë' gubáz queë' bila'lé'enë' Lë'. ⁶ Ní'irö bulufi lahuë' lógaquië' ziánrö ca gayu' gáyu'ë böchi' luzá'aru' ta'yéajlë'ë Cristo, cate' ni' nudúbigaquië' tsözxón. La'tu'biqúi' yúgu'të' böchi'ru' ni nacu'ë nabángaquië' na'a, sal-la' bal-lë' chinátigaquië'. ⁷ Ní'irö Jacobo bilé'enë' Lë', en gudödi ni' bulufi lahuë' lógaquië' yúgu'të bönni' gubáz queë'.

⁸ Ga yöjsetë bulufi lahuë' ca' lahua' neda'. Ca guca lë ni, naca' ca tu bí'ido' gúljabi' cate' chigudödi dza ral-la' gáljabi'. ⁹ Caní naca, tu' nácara' neda' cá'asö ca yúgu'të bönni' gubáz queë', en biti' naca' neda' lesaca' si' la' gubáz queë', tu' gudxia ládxa'a bönni' queë' Dios. ¹⁰ Na'a, tu' buzá' ládxë'ë quia' Dios naca' le naca' na'a, en calëga nítisö buzá' ládxë'ë quia'. Béntëra' neda' xichinë' ca ia'zica'rë' gubáz queë', sal-la' calëga rácasö quia' bena' dxin na'. Dios caz, lu yöl-la' ruzá' ladxi' queë', bugunë' neda' dxin. ¹¹ Na'a, channö bena' libán neda' o channö gulanë' libán ia'zica'rë' bönni', lë ni le runtu' libán que, en le guyéajlë'ëli' libí'ili'.

Ubanru' lu yöl-la' guti

¹² Runtu' libán queë' Cristo ca na' bubanë' lu yöl-la' guti. Channö caní naca, ¿nacxi caz naca, rnnali' bál-lali': "Biti' ulu'bán nupa chinátigaca"?? ¹³ La'tu' cabí ulu'bán nupa chinátigaca, biti' bubanë' Cristo, ¹⁴ en la'tu' cabí bubanë' Cristo, nítisö naca le bentu' libán que, en nítisö naca yöl-la' réajlë' queëli' Lë'. ¹⁵ Ia'stú, la'tu' cabí bubanë' Cristo, rizí' yë'ëtu' cate' runtu' ba nalí queë' Dios, rnnatu' busubanë' Cristo, ate' la'tu' cabí usubanë' nupa chinátigaca, Dios biti' busubanë' Cristo. ¹⁶ La'tu' cabí ulu'bán nupa chinátigaca, biti' bubanë' Cristo, ¹⁷ en la'tu' cabí bubanë' Cristo, nítisö naca yöl-la' réajlë' queëli' Lë', ate' nagá'anagaca dul-la' nabága'li'. ¹⁸ Lësca' caní, nupa na' chinátigaca, en gula'yéajlë' Cristo, tsaz gulati channö cabí bubanë' Lë'. ¹⁹ Channö tsánnisö ni zóaru' nabanru' huáca uzí'iru' xibë' Cristo, nácaröru' bayechi' ca yúgu'të bönachi.

²⁰ Na'a, le nácatë bubanë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti. ²¹ Ca na' guyú'u yöl-la' guti ni'a que le benë' tuë' bönni', lësca' caní, ni'a que le benë' ia'tuë' bönni' guyú'u yöl-la' rubán quégaca nupa chinátigaca. ²² Ca na' tati yúgu'të bönachi tu' náljlengaca Adán, lësca' caní ulu'bán yúgu'të nupa na' náljlengaca Cristo. ²³ Tu tuë' ubanë' ca ral-la' gaca. Zí'alö bubanë' Cristo, ate' tódi ni ulu'bán nupa néquiguequi queë' Cristo cate' huödë'. ²⁴ Ní'irö idxín dza údxi cate' ugüë' Cristo idütë le dë lu në'e, en idütë yöl-la' unná bë', en idütë yöl-la' huáca que tu' xihui', ate' udödë' yöl-la' unná bë' queë' lu në'ë Dios Xuz. ²⁵ Run bayudxi inná bë'ë Cristo ga idxinrö dza chibenë' Dios ga ulu'zechu zxabigaca lahuë' Lë' yúgu'të nupa ta'dá'baga' Lë'. ²⁶ Le ridá'baga' Lë' le usunítie' ga údxi naca yöl-la' guti. ²⁷ Dios chinudödë' yúgu'të lu në'ë Zxi'inë', para inná bë'enë' le. Nazúaj lu guichi lá'ayi, rnna: "Budödë' yúgu'të lu në'ë para inná bë'enë' le." Na'a, naca bë' biti' budödi cuinë' lu në'ë Zxi'inë', tu' naca cazë' Lë' Nu rudödi yúgu'të lu në'ë Zxi'inë'. ²⁸ Cate' idxín dza ni' chinudödë' Dios lu në'ë Cristo yúgu'të para inná bë'enë' le, ní'irö Lë' cazë' Zxi'inë' udödi cuinë' lu në'ë Dios, Nu na' budödi lu në'ë Zxi'inë' yúgu'të, ate' ga údxi, Dios inná bë'enë' tsaz yúgu'të.

²⁹ Bál-lali' ridíalali' nisa uláz quégaca nupa chinátigaca. Channö réquili' biti' ulu'bán nupa na' chinátigaca, ¿bizx que ridíalali' nisa uláz quégaca nupa chinátigaca?

³⁰ Zoa bönadxi queëtu' gátitu' yúgu'të dza. ¿Bizx que ruí'tu' lataj gaca caní channö cabí ubanru' lu yöl-la' guti? ³¹ Yúgu'të dza zoa bönadxi gátia'. Ríguixjói'ida' libí'ili' lë ni, böchi' luzá'ado', tu' raza ládxa'a le bena'. Caní naca tu' bena' ga réajlë'ëli' Xanru' Jesucristo. ³² Channö tu' gú'unisida' gudíl-lalena' böa' guixi' sínia' lu yödzo' Éfeso, ¿bizxi caz uzi'a xibë? Channö cabí ulu'bán nupa chinátigaca, ral-la' gunru' ca ta'nná bönachi: "Gui'aj gáguru' tu' huátiru' cuxó huidzaj."

³³ Biti' gü'ili' lataj nu si' ye'e libí'ili'. Channö si' lu ná'ali' láti'do'os le cabí nácatë, idütëli' huóacali' chul-la' niti. ³⁴ Bulí'bí' ládxí'li', en biti' gunli' dul-la' tu' cabí núnbë'ëli'-në' Dios bál-lali' libí'ili'. Rnní'a caní para guna' ga utuí'ili'.

Ca ilaca nupa ulu'bán lu yöl-la' guti

³⁵ Nadxi ca' zoa nu inná: "¿Nacxi ulu'bán nupa chinátigaca? ¿Nacxi gaca idú ca nácacaca cazë' cate' ulu'dxinë'?" ³⁶ Li', bönni' biti' bi' nözinë'. Lë na' rázu' luyú biti' ilén channö cabí initi. ³⁷ Lë na' rázu' luyú naca tu' xisédo'os, nadxi ca' que zxo'a' xtila o que ia'tú guixi' cuando'. Lë na' rázu' biti' naca guixi' cuando' na' ral-la' ilén. ³⁸ Dios runë' ga gaca guixi' cuando' ca nun cazë' que. Ca naca tu' tu' xisédo' na' runë' ga gaca guixi' cuando' que. ³⁹ Lësca' caní,

biti' naca lëbisö bëla' que queégacaba' yúgu'tëba' böa' guixi'. Zoa tu bëla' queégaca bönachi, en ia'tú ca naca bëla' queégacaba' böa' guixi'. Ia'tú ca naca bëla' queégacaba' biguinni, en ia'tú ca naca bëla' queégacaba' böla. ⁴⁰ Lësca' caní nadzá' idú ca nácagaca caz nupa nacua' yehua' yubá ca naca idú ca nácagaca caz nupa nacua' luyú ni. Zoa tu yöl-la' lachi queégaca nupa nacua' yehua' yubá, en ia'tú ca naca yöl-la' lachi queégaca nupa nacua' luyú ni. ⁴¹ Zoa tu yöl-la' lachi que gubidza, en ia'tú que beo', en ia'tú queégacaba' böla' lúzxiba. Yöl-la' lachi que tu böla' lúzxiba nadzá' ca naca yöl-la' lachi que ia'tú böla' lúzxiba. ⁴² Lësca' caní gaca cate' ulu'bán nupa chinátigaca. Cate' rigachi' lu yeru ba naca tu bëla' initi. Cate' ubán, ní'irö gaca tu le soa tsaz. ⁴³ Cate' rigachi' lu yeru ba naca tu bëla' cá'asö, en le nacuidi'. Cate' ubán, ní'irö gaca tu le lachi, en le nál-la. ⁴⁴ Cate' rigachi' lu yeru ba naca tu bëla' que yödzölió ni. Cate' ubán, ní'irö gaca tu le soa tsaz yehua' yubá. Zoa tu bëla' que yödzölió ni, en ia'tú ca gaca le idzaga bö' naca cázaru'.

⁴⁵ Nazúaj lu guichi lá'ayi le rnna: "Bönni' na' gusí lahuë' zoë' luyú ni, lë' Adán, Dios benë' lë' bönni' ban", pero Bönni' na' guyázië' xilatjë' Adán. Lë' Cristo, Dios benë' ga náquië' Bö' nabániru'. ⁴⁶ Biti' blë'ë' zí'alö Bönni' na' náquië' Bö'. Bla' zí'alö nu na' naca bönáchisö, ate' ní'irö blë'ë' Bönni' na' náquië' Bö'. ⁴⁷ Bönni' ni' blë'ë' zí'alö, gúquinë' yu. Bönni' na' blë'ë' burópilö, Nu na' naca Xanru', birúajë' yehua' yubá. ⁴⁸ Nupa nacua' luyú ni nácagaca ca gúquië' bönni' na' gúquinë' yu, ate' nupa ral-la' tsöjcuá' yehua' yubá ilaca ca naca Nu na' birúaj yehua' yubá. ⁴⁹ Ca na' na'a dë queëru' tu bëla' le naca ca guca bëla' queë' bönni' na' gúquinë' yu, lësca' ral-la' huóëquiru' ca néquinë' Nu na' birúaj yehua' yubá.

⁵⁰ Caní rë'ëni inná lë ni rea' libí'ili', böchi' luzá'ado', rnna: Le néquini bëla', en rön biti' gaca tsaz ga ni' rinná bë'ë Dios, en lësca' caní, lë na' initi biti' gaca ideli' lë na' soa tsaz. ⁵¹ Buli'yútsöca', rea' libí'ili' tu le bigachi': Biti' gátiru' yúgu'tëru', pero Dios utsë'ë ca nácaru' yúgu'tëru'. ⁵² Tsáldo'os gaca, tsca naca tu le rutásö guiöj loru', cate' cödxí lúzuba' böa' le röjsetë. Cödxí lúzuba' na', ate' ulu'bán nupa chinátigaca, en ilëquini tu le soa tsaz, ate' Dios utsë'ë le néquini' yúgu'tëru'. ⁵³ Lë na' nácaru' le riniti ral-la' huóáca le soa tsaz, ate' le néquini' lë na' ral-la' gati, huóáca tu le catu caz gati. ⁵⁴ Cate' lë na' riniti chinuhuóáca le soa tsaz, enca' lë na' ral-la' gati chinuhuóáca le catu caz gati, ní'irö idxín lë na' nazúaj lu guichi lá'ayi, le rnna:

Nadúa tsaz yöl-la' guti.

Chibidéli'në' Cristo.

⁵⁵ Biti'rö inná be'e yöl-la' guti rë'u.

Biti'rö gaca yöl-la' guti bi gun queëru'.

⁵⁶ Huáca bi gun yöl-la' guti queëru' tu' nabága'ru' dul-la', ate' nabága'ru' dul-la' tu' ridá'baga'ru' xibá queë' Dios. ⁵⁷ ¡Xclenë' Dios! ¡Lë cazë' runë' ga nuláru' lu yöl-la' guti ni'a que le benë' Xanru' Jesucristo!

⁵⁸ Que lë ni na', böchi' luzá'ado', guli'sóa tsutsu. Guli'gaca idú ládxi'li', gúntica'sili' xichinë' Xanru' tu' nöz quezili' biti' runli' nitisö xichinë' Xanru'.

16

Yugu' bönachi Corinto tu' nödzaj queégaquië' böchi'gaca ta'yádzjanë'

¹ Na'a, ca naca que dumí na' unödzejali', le gácalen böchi'ru' ta'yéajlë'ë Cristo nacu'ë Jerusalén, guli'gún na'a ca na' gunná bé'eda' yugu' cö' bönachi queë' Cristo, nacua' luyú Galacia. ² Yugu' dza domingo, tu tuli' ral-la' cú'uli' quez lati' dumí, tsca na' Dios runné' queéli'. Guli'gún chi'i le, para cabí gun bayudxi bi utúbili' cate' idxina' ga zóali'. ³ Cate' ni' idxina' ga zóali', isöl-la'a Jerusalén bönni' na' cöli' libí'ili'. Uzúaja' tu lu guichi le gun ga ilaca bë'gaquië', ate' ilu'ë dumí na' unödzejali'. ⁴ Channö ral-la' tseja' ca' neda', tsöjácalenë' neda'.

Le rë'ënë' gunë' Pablo

⁵ Guída' ga zóali' cate' údxi töda' yugu' yödzö luyú Macedonia, tu' run bayudxi töda' yugu' yödzö na'. ⁶ Réquida' ugá'analena' libí'ili' tu chi'i, o nadxi ca' ugá'ana' ni' yugu' beo' ziaga. Ní'irö huáca gácaleni' neda', ugú'uli' neda' nöza gáti'tës ga ral-la' tseja'. ⁷ Cate' guída' uduyúa' libí'ili' biti' rë'ënda' tódisa' ni'. Runa' löza sóalena' libí'ili' xidzé, channö gunné' Xanru' neda' lataj. ⁸ Ugá'ana' ni lu yödzö Éfeso ga idxinrö dza Pentecostés ⁹ tu' dë lataj ni guna' tu dxin zöxön queë' Xanru', sal-la' zían nupa ta'dá'baga' neda'.

¹⁰ Channö idxinbi' bi'i Timoteo ga na' zóali', guli'gü'i ládxi'li'-bi', para cabí ubi uguí'ibi' tsanni ni' sóaleni' libí'ili', tu' runbi' xichinë' Xanru' ca na' runa' neda' xichinë'. ¹¹ Que lë ni na', cuntú nu ral-la' uzóa lëbi' tsólá'alö. Guli'gácalen-bi', ugú'uli'-bi' nöza idú tsáhui'do', para udxinbi' ga ni zoa' neda', tu' ribóza'-bi' lëbi', enca' yugu' böchi'ru' túnlenë'-bi' tsözxön dxin.

¹² Ca naca queë' böchi'ru' Apolos, gúta'yua' lahuë' tsejë' tsöjyúë' libí'ili' tsözxön len yugu' böchi'ru', pero biti' rë'ënë' tsejë' na'a. Guidé' cate' séqui'në'.

Didza' ru'ë Pablo ga ruúdx

¹³ Buli'subán ládxi'li', en guli'gaca tsutsu ca réajlë'ëli'-në' Cristo. Guli'gaca rugu ladxi', en buli'tipa ládxi'li'. ¹⁴ Len yöl-la' nadxí'i guli'gún bíti'tës bi gunli'.

¹⁵ Na'a, böchi' luzá'ado', chinóz quézili' ca naca queë' Estéfanos, enca' quégaca di'a dza queë'. Nácagaca nupa gula'sí lógaca ta'yéajlë' Cristo ladaj bönachi nacua' luyú Acaya. Bulu'dödi cuíngaqüië' para ilunë' xichíngaca bönachi queë' Dios. ¹⁶ Ráta'yua' loli', böchi' luzá'ado', gunli' bal nupa nácagaca ca böchi'ru' na', enca' ca nácagaca nupa tunlen légaquië' tsözxón dxin, en tácalen légaquië'. ¹⁷ Rudzėjada' tu' bila'dxinë' Estéfanos, en Fortunato, en Acaico ga zoa', tu' gúcalengaqüië' neda' uláz queëli'. ¹⁸ Bulu'huë tsáhuë'ë neda' ca na' bulu'huë tsáhuë'ë ca' libí'ili'. Guli'gún bal bönachi caní.

¹⁹ Yugu' cö' bönachi queë' Dios luyú Asia ni tu'gapa Dios libí'ili'. Aquilo, en Priscila, enca' nupa tu'dubi queë' Dios ga naca lu yu'u lídxigaqüië' tu'gapë' Dios libí'ili'. ²⁰ Yúgu'të böchi'ru' ni tu'gapë' Dios libí'ili'. Guli'gapa Dios tuli' ia'tuli', en unída'li' luzá'ali'.

²¹ Neda', Pablo, len na' cuin caza' ruzúaja' lu guichi lë ni, rnnía': Rugapa' Dios libí'ili'.

²² Nu bití' nadxí'i Xanru' Jesucristo, chinabía dö' nu na'.

Gudá Xanru'.

²³ Rinábida'-në' Xanru' Jesucristo uzá' ládxe'ë queëli'. ²⁴ Nadxí'ida' yúgu'tëli' tu' nácaru' tuz len Xanru' Jesucristo. ¡Ca' gaca!

DIDZA' BUROPI GUSÖL-LË'Ë PABLO YÖDZÖ CORINTO

Pablo rugapë Dios bönachi queë' Cristo nacu'ë Corinto

¹ Neda', Pablo, naca' gubáz queë' Jesucristo tu' rë'ënë' caní Dios. Bi'i böchi'ru' Timoteo runbi' neda' tsözxón. Rugapa' Dios libí'ili', rudúbili' queë' Dios lu yödzo Corinto, enca' yúgu'tëli' néquili' quez queë' Dios luyú Acaya ga na' nababa Corinto. ² Rinábida-në' Xúziru' Dios, en Xanru' Jesucristo uzá' ládxë'ë queë'li', en gunë' ga soa dxi icja ládxi'do'oli'.

Yugu' le gudí'i guzxaqué'ë Pablo

³ ¡Yöl-la' ba Dios, Xuzë' Xanru' Jesucristo, tu' náquië' Xúziru', en ruhuéchi' ládxë'ë rë'u, en náquië' ca' Dios, Nu ruhuë tsáhu'i'tica'so rë'u! ⁴ Dios ruhuë tsáhuë'ë rë'u cate' raca bití'tës bi raca queëru', para gaca huë tsáhu'i'ru' ca' nupa bi raca queéqueui. Ruhue tsáhu'i'ru' légaquië' ca na' Dios ruhuë tsáhuë'ë rë'u.

⁵ Tsca ta'yán le riguí'i rizáca'ru', ca na' gudí'i guzxaqué'ë Cristo, lësca' caní ta'yán le tu'huë tsáhu'i' rë'u, tu' nácaru' tuz len Cristo. ⁶ Que lë ni na', channö bi riguí'i rizáca'tu', raca caní queëtu' para gaca huë tsáhu'i'tu' libí'ili', en guntu' ga uláli'. Channö Dios ruhuë tsáhuë'ë netu', raca caní para gaca huë tsáhu'i'tu' libí'ili', ate' lu yöl-la' riböza zxon ladxí' queë'li', gaca guá' ilenli' yugu' le quí'i sáca'li', ca na' raca ca' queëtu'. ⁷ Ruzxöni ládxi'tu'-në' Dios gúntica'së' ga gaca dxi'a queë'li', tu' chinözitu' ca na' riguí'i rizáca'li' tsözxón len netu', lësca' caní ruzí'ili' xibë tsözxón len netu' le ruhuë tsáhuë'ë Dios rë'u.

⁸ Rë'ënitú' inözili', böchi' luzá'ado', ca naca le zían le gulaca queëtu' luyú Asia. Gudödité bë' lë na' guca queëtu', ate' guca zítërö ca le guca guá' ilentu'. Ca' guca, bití'rö bentu' löza sóatu' ibantu'. ⁹ Gúquitu' guca queëtu' ca raca queégaquië' bönni' chinarrugu queégaquië' ilatië'. Guca caní queëtu' para cabí uzxóni ládxi'tu' la' cuínsitu', pero uzxóni ládxi'tu'-në' Dios, Nu rusbán nupa chinátigaca. ¹⁰ Dios busólë' netu' lu lë na' ben ga guzóa bönadxi gátitu', ate' rusólë' netu' yúgu'të dza. Runtu' löza usólë' Lë' netu' caní leyúbölö ¹¹ channö gácalenli' netu', ulídzali'-në' Dios, en inábili'-në' gácalenë' netu'. Dios gunë' ca na' inábili'-në' tsözxón len bönachi zían, uzá' ládxë'ë queëtu', ate' ila'nná: "Xclenë' Dios" ni'a queëtu'.

Rigúxjö'ë Pablo bizx que ridzenë' idxinë' Corinto

¹² Lë ni le run ga rudzéjatu'. Bó' naca caztu' rulu'í netu', len yöl-la' ba'a ladxí' queëtu', en idú ládxi'tu' runtu' bi runtu' yödzóliö ni, ate' caní bentu' ca' ga ni' zóali'. Caní bentu', tu' gúcalen netu' le buzá' ládxë'ë Dios queëtu', en calëga len yöl-la' réajni'i queëztu' bentu' caní. ¹³ Ruzúajso'tu' queë'li' lu guichi le gaca ulábali', en le gaca tséajni'ili'. Raca ládxa'a tséajni'ili' idú ¹⁴ lë na' réajni'ili' lati'. Ni'irö cate' idxin dza huödë' Xanru' Jesucristo, gaca gunli' netu' zxon ca na' netu' guntu' libí'ili' zxon.

¹⁵⁻¹⁶ Tu' bena' löza lë ni, guzá' ládxa'a guída' ga zóali' zí'alö cate' gudöda' luyú Macedonia, ate' guída' ga zóali' leyúbölö cate' uzá'a ni para uzí'ili' xibá' chopa luzú. Tödi ni' huáca gácalenli' neda' ugu'uli' neda' nöza tseja' luyú Judea. Caní gu'unida' guna'. ¹⁷ ¿Naru' réquitseli' guzxf' yë'a tu' butsa'a ca guna'? ¿Naru' réquitseli' lu yöl-la' bönáchisö quia' rina' le rizá'asö icja', en bé'ësa' ca' didza' cate' gunniá': "Caní guna'?" ¹⁸ Ni'a queë' Xanru' Dios, Nu run iduté ca rna xtídzë'ë, bití' bé'ësa' ca' didza' cate' bé'lëna' libí'ili' xtídzë'ë Dios. ¹⁹ Jesucristo, Zxi'inë' Dios, Nu na' bentu' libán que ga zóali', neda' len Silvano, en Timoteo, bití' ru'isë' ca' didza'. Lë' ru'ë didza' iduté li. ²⁰ Cristo caz runë' gaca iduté löza yúgu'të le guzxf' lu në'ë Dios, ate' ni'a queë' Lë' gaca innaru': "Ca' gaca", para gaca queë' Dios yöl-la' ba. ²¹ Dios caz runë' ga runtu' löza tsözxón len libí'ili' néquiru' queë' Cristo, en budödë' lu na'tu' dxin queë' runtu'. ²² Bennë' queëru' le naca bé' néquiru' queë', tu' guchízíë' icja' ládxi'do'oru' Dios Bó' Lá'ayi, Nu naca queëru' le run ga naca löza yúgu'të le gunné' Dios queëru'.

²³ Ni'a queë' Xanru' Dios, Nu nözi le rizá' ládxa'a, ruá'a didza' iduté li. Nözinë' Lë' bití' bida' ga zóali' lu yödzo Corinto, para cabí gun bayudxi guna' ga huí'inili'. ²⁴ Bití' rë'ënitú' inná bé'etu' libí'ili' ca réajlë'ëli' Cristo, tu' chinácali' tsutsu ca réajlë'ëli' Lë'. Rë'ënitú' guntu' le gun ga udzeja ládxi'li'.

2

¹ Que lë ni na' bé' ládxa'a cabí guídatea' queë'li' zí'alö, para cabí guna' ga huí'inili'. ² Channö guna' neda' ga huí'inili', ¿nuzxi caz gun ga udzëjada' neda'? ¿Naru' guntsa' ga huí'ini nu ral-la' gun ga udzëjada' neda'? ³ Que lë ni na' buzúaja' queë'li' lu guichi zí'alö. Bití' gu'unida' guída' ga zóali', para cabí gunli' libí'ili' ga huí'inida' neda', tu' ral-la' gácali' libí'i cázali' le gun ga udzëjada' neda'. Tu' ruzxöni ládxa'a libí'ili', nözda' udzëjali' yúgu'tëli' channö udzëjada' neda'. ⁴ Cate' ni' buzúaja' queë'li' lu guichi lë na', gusëbide'e ládxa'a, en buí'inide'e ládxa'a ga

bidxintê gurôdxa'. Buzúaja' caní lu guichi, calêga para guna' ga huí'inili', pero para inôzili' ca naxí'ide'eda' libí'ili'.

Ral-la' uniti loru' nu ruá' dô' cate' rubí'i ladxí'

⁵ Channô zoê' tu bônni' ni', bônni' na' busuhuí'ininé' rê'u, calêga neda'sô busuhuí'ininé', pero huáca innaru' busuhuí'ininé' yúgu'têli' libí'ili'. Rnní'a: "Huaca innaru'", para cabí tódi bē' ichugu bē'a queē' bônni' na'. ⁶ Tscati' gaz xíguia' chibenli' látu'biqui' yúgu'têli' queē' bônni' na'. ⁷ Na'a, ral-la' uniti loli' bônni' na', en utí'pali' lădxê'ê, para cabí tódi bē' huí'ininé', en para cabí gaca tsaz chopa lădxê'ê. ⁸ Que lê ni na' ráta'yua' loli' gunli' le gaca bē' naxí'ili'-nē' idú lădxí'li'. ⁹ Que lê ni na' ca' buzúaja' queêli' lu guichi lê na'. Gú'unida' si' bē'a libí'ili' para inôzda' channô rúntica'sili' ca rna xtídza'a. ¹⁰ Cate' nu runiti loli' libí'ili', neda' ca' runiti lahua' nu na'. Cate' nu runiti lahua', channô bi ben nu na' runiti lahua', runa' caní uláz queē' Cristo para gaca bi uzí'ili' xibé. ¹¹ Caní runa', para cabí sequi' Satanás tu' xihui' ucúlla rê'u, tu' chinôziru' yugu' le rē'eni gun queêru'.

Gurô'ê bôniga Pablo lu yôdzô Troas

¹² Cate' bidxina' lu yôdzô Troas para guna' libán que didza' dxi'a queē' Cristo, bénnadē'ê Xanru' neda' lataj guna' libán ni'. ¹³ Sal-la' guca caní, gurô'a bôniga tu' cabí yôjxáca'a-bi' bi' bôchi'ru' Tito ni'. Que lê ni na' buzá'alena' bônachi ni', ate' guyi'ja' luyú Macedonia.

Idéli'ru' tu' zóalenē' Cristo rê'u

¹⁴ ¡xclenē' Dios! Riché'tica'sē' rê'u ca tu le naca bē' bidéli'nē' Cristo yôl-la' rusólá queêru'. Dios rugunē' dxin rê'u para rulu'ê lahui ca gaca ilúnbē'e bônachi Cristo. Le nácaru' naca ca tu le rilá' zxxixi, le riguisi gátitēs. ¹⁵ Nácaru' ca tu nôri rilá' zxxixi, le ruzégui'ê Cristo lahuē' Dios, en le riguisiē' lógaca nupa nulágaca, en nupa nanítigaca. ¹⁶ Lógaca nupa na' nanítigaca nácaru' ca tu le rilá' siguti le naca bē' ilátiē'. Lógaca nupa na' nulágaca nácaru' ca tu le rilá' zxxixi le naca bē' ibántica'siru'. ¿Nuzxi caz naca lesaca' gaca que caní? ¹⁷ Biti' runtu' ca tun zían bônachi, nupa tu' gún dxin xtídze'ê Dios ca tu le tuti', en to'o. Tu' nasól-lē'ê Dios netu', idú lădxí'tu' ruí'itu' didza' lahuē' Lê' tu' nácatu' tuz len Cristo.

3

Ca naca didza' le ruín rê'u tuz len Dios

¹ ¿Naru' réquitseli' run ba zxon cuintu' cate' ruí'itu' caní didza'? ¿Naru' runtsô bayudxi uluí'itu' libí'ili' tu guichi le rulu'i le nácatu'? ¿Naru' ral-la' inábitu' libí'ili' gúnnali' queêtu' tu guichi caní, ca na' tun bal-la bônachi? ² Libí'i cázali' nácali' ca tu guichi le rulu'i le nácatu', le nazúaj lu icja lădxí'do'otu', ate' yúgu'tê bônachi gaca ulu'laba le, en tséajni'iguequi le. ³ Le nácali' nalá' lahui ca tu guichi nuzúajē' Cristo, le gusól-lē'ê lu na' tu'. Biti' nazúaj tu lu guichi, pero Bô' Lá'ayi queē' Dios ban nuzúajē' le, calêga tu lu guiôjta'a, pero lu icja lădxí'do'olí' nuzúajē'.

⁴ Ruí'itu' caní didza' tu' ruzxoní lădxí'tu'-nē' Dios tu' zóalenē' Cristo rê'u. ⁵ Biti' réquitu' bi gaca guntu' rásas queêtu', pero Dios runnē' queêtu' yôl-la' huáca bi guntu'. ⁶ Dios caz bennē' queêtu' yôl-la' huáca guntu' xichiné' lu didza' cubi na', le ruín rê'u tuz len Dios. Didza' ni bití' naca tu xibá nazúaj lu guichi, pero naca tu le nusédinē' Dios Bô' Lá'ayi rê'u. Xibá na' nazúaj lu guichisô richugu queêru' gátiru', pero Dios Bô' Lá'ayi nabániru'.

⁷ Yugu' xibá queē' nazúajgaca lu guichi, Dios buzúajē' yugu' lu guiôjta'a, ate' bulu'e lahui yôl-la' bení' queē' cate' budôlē' le lu nē'ê Moisés. Sal-la' gudôdi que, gupépitêrô yôsa bení' lahuē' Moisés. Caní guca, bití' guca ulu'yú bônachi Israel lahuē' Moisés. Channô yôl-la' bení' caní yôjtsaga xibá na', ate' xibá na' richugu quégaca bônachi ilátigaca, ⁸ zxonterô naca yôl-la' bení' na' dzaga yugu' le runē' Dios Bô' Lá'ayi. ⁹ Yôjtsaga yôl-la' bení' lê na' ben ga narugu quégaca bônachi ilátigaca. Zxonterô naca yôl-la' bení' que lê na' run ga rnnē' Dios nácgaca tsahuí' bônachi. ¹⁰ Tu' nácatêrô lesaca' yôl-la' bení' na' nalá' lahui na'a, cuídi'sô nagá'ana yôl-la' bení' na' bilá' lahui cate' Dios bunôdzjē' xibá queē' quégaca bônachi. ¹¹ Channô guzóa yôl-la' bení' que lê na' guzóa tu chí'ido'osô, zxonterô naca yôl-la' bení' que lê ni sóatica'sô.

¹² Tu' zoa lê ni runru' lôza, ruí'itu' didza' lu yôl-la' rugu lădxí'. ¹³ Biti' runtu' ca benē' Moisés, bucache' lahuē' len tu lári'do', para cabí ulu'yú bônachi Israel yôl-la' bení' na' zeaj riniti. ¹⁴ Gula'chul-la gula'nítiē' yugu' bônni' ni'. Ga ridxintē' na'a dza cate' tu'labē' guichi que didza' gula na' le ruín bônachi tuz len Dios, naca tsca nagá'ana la' leze lári'do' na' lógaquiē', lê na' gaca ugúē' tuzē' Cristo. ¹⁵ Ga ridxintē' na'a dza, cate' tu'labē' guichi ga na' nazúaj didza' queē' Moisés, zxoaca tu lári'do' guiôj lógaquiē' le run ga nachul-la nanítigaquiē'. ¹⁶ Cate' nu ruhuôaca queē' Xanru', rigúa lê na' run ga nachul-la naniti nu na'. ¹⁷ Cate' ni rnnatu': "Xanru'", ruí'itu' didza' queē' Dios Bô' Lá'ayi. Ga zoē' Bô' Lá'ayi queē' Xanru', ni' zoa caz yôl-la' nadzán. ¹⁸ Yúgu'têru' rê'u bití' bi nusayaj loru'. Nácaru' ca tu guíé dxili ga nalá'

yöl-la' bení' que lahuë' Xanru', ate' yöl-la' bení' na' queë' Xanru', Nu naca Bö' Lá'ayi, rutsá' rë'u, en run ga zēj rācarōru' ca náquië' Cristo caz, en ráta'rō queëru' yöl-la' bení' queë'.

4

¹ Dios buéchi' ládxë'ë netu', en budödë' lu na'tu' dxin ni runtu'. Que lë ni na' bití' raca chopá ládxí'tu'. ² Chibucá'anatu' le tun bönachi bagáchi'sö, en le tun ga rutuf'iru'. Cuntu nu rizí' yé'etu', en bití' rutsá'atu' xtídzë'ë Dios. Tu' ruí'tu' didza' que le naca idütë li, ruí' ládxí'tu' guntu' le iléquite'e yúgu'të bönachi naca dxi'a lahuë' Dios. ³ Channö zoa nu bití' réajni'ini didza' dxi'a runtu' ba nalí que, nácagacasö nupa nachul-la nanítigaca bití' ta'yéajni'i le. ⁴ Bití' ta'yéajlë' bönachi na'. Ben tu' xihui' ga naca caní, nu na' nun cuini ca dios, en rinná be'e bönachi dza ni zóaru' na'a. Ben ga nachul-la nanítigaca, para cabí ila' lé'e bení' que didza' dxi'a ca naca yöl-la' bení' queë' Cristo, Nu na' naca idú ca náquië' Dios caz. ⁵ Bití' runtu' libán que la' cuínsitu', pero runtu' libán queë' Jesucristo, en rigúxjö'ötu' náquië' Xanru', ate' netu' ni nácatu' huen dxin queéli' tu' nadxí'tu'-në' Jesús. ⁶ Dios, Nu ben ga buzuní' bení' ga ni guca chul-la, náquië' Nu rigú'u bení' icja ládxí'do'oru', le ruzéajni'i rë'u para gúnbë'ëru' yöl-la' bení' queë' Dios, lë na' ruzení' lahuë' Jesucristo.

Tu' réajlë'ëru' Dios runru' ca rë'ënë' Lë'

⁷ Yöl-la' tsahui' ni yu'u icja ládxí'do'oru' rë'u. Nácaru' ca yugu' yusu' yu, para gaca bë' nequi queë' Dios yöl-la' huáca zxön na', en caléga que cázaru'.

⁸ Tu'saca' zí' bönachi netu', pero bití' rudú ládxí'tu'.

Rö'ötu' böniga, pero bití' raca chopá ládxí'tu'.

⁹ Ta'bia' ladxi' bönachi netu', pero bití' rubéaj ládxë'ë Dios netu'.

Ta'zé'ede'e netu' yu, pero bití' tu'suniti netu'.

¹⁰ Lu idú le naca caztu' ráttitica'stu' tsözxön len Jesús, na' naca bë' lu le naca caztu' nabánitu' Lë'.

¹¹ Tsanni ni zóatu' nabantu', zóatica'sö bönadxi gátitu' tu' néquitu' queë' Jesús para gaca bë' nabánitu' Lë' lu le naca caztu' le riniti. ¹² Caní naca, zoa bönadxi queëtu' gátitu', pero ni'a que lë ni rata' yöl-la' na'bán queéli'.

¹³ Nazúaj lu guichi lá'ayi le rnna: "Guyéajlë'a Dios, ate' que lë ni na' bë'a didza'." Lësca' caní raca queëtu', réajlë'ëtu' Dios, en que lë ni na' ruí'tu' didza'. ¹⁴ Nöztu' ca gunë' Dios, Nu busubán Xanru' Jesús, usubanë' ca' netu' tsözxön len Jesús, en usudxinë' netu' tsözxön len libí'ili' lahuë' Lë'. ¹⁵ Raca caní yúgu'të lë ni para gaca bi uzí'ili' xibé. Channö ila' deli' zianró ca' bönachi le ruzá' ládxë'ë Dios queëru', ila'mné': "Xclenë' Dios", ate' gaca yöl-la' ba queë' Dios.

¹⁶ Que lë ni na', bití' raca chopá ládxí'tu'. Sal-la' riniti idú le naca caztu', yúgu'të dza rucubë' Dios le nácatu' lu icja ládxí'do'otu'. ¹⁷ Le cuídí'sö rigú'í rizáca'ru' ni tu chí'do'osö run ga gata' queëru' le uzí'da'aru' xibé le sóatica'sö, en le nácatë'rö lesaca' ca gaca gúnbë'ëru'. ¹⁸ Bití' ruí'ládxí'ru' le rilé'ëru' luyú ni, pero le bití' gaca ilé'ëru' ruí'ládxí'ru'. Lë na' rilé'ëru', tu chí'do'osö zoa, pero le cabí gaca ilé'ëru' sóatica'sö.

5

¹ Nöziru' cate' initi idütë le naca cázaru', le naca ca tu' yu'u lári'do' yödzöliö ni, Dios chinupë'ë tu le cubi queëru', le naca ca tu' yu'u le zoa tsaz ni' yehua' yubá, lë na' nun cazë' Lë'. ² Que lë ni na' rinnë ládxí'ru' tu' rë'ëni'ru' tsü'-në' le cubi ni', lë na' naca ca tu' lídxiru' ni' yehua' yubá. ³ Tsú'uru' le cubi ni' ca na' rácuru' tu lari', para cabí sóaru' ga bití' zoa idütë le naca cázaru'. ⁴ Tsanni ni zóaru' lu idütë le naca cázaru', le naca ca tu' yu'u lári'do', rinnë ládxí'ru' lu yöl-la' risëbi ladxi' queëru'. Bití' runru' caní tu' rë'ëni'ru' ucá'anaru' idütë le naca cázaru', pero rë'ëni'ru' tsü'uru' tsaz le cubi ni'. Caní gaca, ucá'anaru' idütë le naca cázaru' le riniti, ate' tsü'uru' lu yöl-la' na'bán idú. ⁵ Dios chinupë'ë yúgu'të lë ni queëru', ate' guchízië' rë'u Dios Bö' Lá'ayi, Nu naca queëru' le naca bë' naca löza sí'iru' lë na' nupë'ë queëru'.

⁶ Que lë ni na' nadipa ládxí'ru'. Tsanni ni yú'uru' lu le naca cázaru', nözi'ru' zóaru' zí'tu' ga zoa lídxë' Xanru'. ⁷ Runru' ca runru' tu' réajlë'ëru'-në' Dios, en caléga tu' zoa bi rilé'ëru'. ⁸ Tu' runru' löza lë ni, rë'ëni'ru' ucá'anaru' le naca cázaru' ni para tsójsóalenru'-në' Xanru'. ⁹ Que lë ni na' ruí'ládxí'ru' gunru' le raza ládxë'ë Xanru', channö ugá'anaru' lu idütë le naca cázaru' ni, o channö tsójsóalenru'-në' Xanru' ni'. ¹⁰ Caní runru' tu' run bayudxi idxinru' yúgu'tëru' lahuë' Cristo ga ni' rō'ë ruchi'a rusōrōë'. Ní'irō ubi'ë que queëru' tsca naca le benru' tsanni ni yú'uru' lu le naca cázaru', channö benru' le naca dxi'a o le cabí naca dxi'a.

Le ruín rë'u tuz len Dios

¹¹ Que lë ni na', tu' rádxitu'-në' Dios, ruí'ládxí'tu' uzéajni'itu' bönachi. Nözinë' Dios ca naca le yu'u icja ládxí'do'otu', ate' ruzxöni ládx'a nözili' dxi'a ca' libí'ili' lë na' yu'u icja ládxí'do'otu'. ¹² Bití' rubéaj cuintu' dxi'a lolí. Rë'ëni'tu' gata' lataj queéli' gunli' netu' bal,

para gaca ubf'ili' didza', bi guiëli' yugu' bönni' tun ba zxön cuíngaquië' ca na' tu' lu'f'isö lahui cuíngaquië', en calëga ca nácaagaquië' lu icja ládxi' do'gaquië'. ¹³ Channö nachixi ícjatú', naca para gaca yöl-la' ba queë' Dios, en channö cabí nachixi ícjatú', naca para gaca bi uzí'ili' xibé. ¹⁴ Run bayudxi bi guntu' tu' nadxí'inë' Cristo rë'u, tu' chinöziru' tuz Nu guti uláz quégaca yúgu'të bönachi, en que lë ni na' naca quégaca yúgu'të bönachi tsca nátilengaca Lë' tsözxön. ¹⁵ Lë' Gutiérrez uláz quégaca yúgu'të bönachi para cabirö ilunë' bönni' nabángaquië' le nequi quégacasë', pero le nequi que Nu na' guti uláz quégaquië', en bubán lu yöl-la' guti. ¹⁶ Que lë ni na', bití'rö gúnbë'ëtu' bönachi tsca naca le nalá'gaca lálhui'lö, en sal-la' canisö bënëb'ëtu'-në' Cristo, bití' núnbë'ëtu'-në' caní na'a. ¹⁷ Channö nuhuóaca nútí'tës bönachi tuz len Cristo, chinaca bönachi cubi nu na'. Chigudödi que le gulaca zí'alö, ate' chinucúbigaca yúgu'të.

¹⁸ Yúgu'të lë ni nunë' Dios, Nu bun rë'u tuz len Lë' lu në'ë Cristo, en budödë' lu na'tu' guntu' libán ca gaca ulu'huóaca yúgu'të bönachi tuz len Lë'. ¹⁹ Libán runtu' rnna caní: "Dios guzóalenë' Cristo, en benë' ga gaca ulu'huóaca bönachi yödzóliö ni tuz len Lë', en bití' röjnenë' dul-la' gula'baga'." Budödë' lu na'tu' didza' dxi'a ni, ca gaca ulu'huóaca bönachi tuz len Dios. ²⁰ Na'a, nácatu' gubáz queë' Cristo, en raca na'a ca Dios caz ráta'yue' loli' lu rú'atu' netu'. Que lë ni na' ráta'yutu' loli' uláz queë' Cristo, guli'huóaca tuz len Dios. ²¹ Cristo bití' bi dul-la' benë', pero Dios budödë' Lë' ca tu bönni' dul-la' uláz queëru', para gata' queëru' lataj gácaru' tsahui' ca náquië' Dios caz tu' nácaru' tuz len Cristo.

6

¹ Tu' runtu' dxin tsözxön len Dios, ráta'yutu' loli', rnnatu': Bití' udödili' cá'asö le ruzá' ládxe'ë Dios queéli'. ² Nazúaj lu guichi lá'ayi ca gunné' Dios le rnna: Tu dza buzá' ládxa'a quiu', biyönda' li', ate' dza bena' ga gaca uló', gúcalena' li'.

¡Buli'yútsöca! ¡Na'a naca dza ruzá' ládxe'ë queëru'! ¡Na'a naca dza gaca uláru'!
³ Bití' rë'ënitú' bi guntu' le gun ga nu ichixi inigui, para cabí soa nu ucá'ana cá'asö dxin ni runtu'. ⁴ Ni'a que bití'tës bi runtu', ruí'i ládxi'tu' gaca bë' nácatu' huen dxin queë' Dios. Que lë ni na', len yöl-la' riböza zxön ládxi' ruá' rilentu' yugu' le riguí'i rizáca'tu', en yugu' le riyadzaj queëtu', en yugu' le tun ga rö'ötu' böniga. ⁵ Caní bentu' sal-la' gula'zé'ede'e bönachi netu' yu, en gula'gu'ë netu' lidxi gufé, en gula'bía dí'i netu'. Gudödi bë' bentu' dxin, en bití' guta' lataj queëtu' gásitu' o bi gágutu'. ⁶ Bë' ládxi'tu' gaca bë' nácatu' huen dxin queë' Dios. Guca bë' lë ni:

Tu' nácatu' ba'a ládxi', en tu' nápatu' yöl-la' réajni'i, en tu' riböztu' zxön ládxi', en tu' nácatu' dxi'i ládxi', en tu' zóalenë' Dios Bö' Lá'ayi netu', en tu' naca idú ca nadxí'itu' luzá'atu'.

⁷ Ruí'itu' didza' iduté li, ate' zóalen netu' yöl-la' huáca queë' Dios. Le naca tsahui' naca ca tu le rudí'initu' lu gudil-la, enca' le run chí'i netu' lu gudil-la na'.

⁸ Nacua' nupa tun netu' bal, enca' nupa tu' zóala netu' tsölá'alö. Nacua' nupa tu' lidza ditaj netu', enca' nupa tu' lidza tsahui' netu'.

Sal-la' ta'nná bönachi rizí' yë'ëtu', ruí'itu' didza' iduté li.

⁹ Sal-la' nacua' bönachi bití' núnbë'gaquië' netu', nacua' ca' nupa núnbë'gaca netu'.

Ridatu' ga zoa bönadxi gátitu', pero ni zóatu' nabantu'. Tunë' netu' xíguia', pero bití' tutië' netu'.

¹⁰ Tu'suhuí'ini netu', pero rudzéjatica'stu'.

Nácatu' bönni' yechí', pero runtu' ga rata' yöl-la' tsahui' idú quégaca bönachi zían. Sal-la' bití' bi dë queëtu', nequi queëtu' yúgu'të le dë.

¹¹ Idú ládxi'tu' ruí'ilentu' libí'ili' didza', böchi' luzá'ado', zóali' Corinto. Buluí'itu' libí'ili' ca ruí'i ládxi'da'tu' libí'ili'. ¹² Channö cabí nácaru' tuz bití' naca tu' cabí ruí'i ládxi'tu' libí'ili', pero libí'i cázali' bití' ruí'i ládxi'li' netu'. ¹³ Na'a, ruí'ilena' libí'ili' didza' ca runë' tu bönni' ruí'ilenë'-bi' xzí'inë' didza', rnná': Bulí'bí'i queëtu' ca rúnlentu' libí'ili'. Guli'güü' ládxi' netu'.

Nácaru' ca tu yudo' ga yu'ë Dios ban

¹⁴ Bití' gácali' tuz len bönachi bití' ta'yéajlë'.

¿Nacxi gácatsö ilaca tuz le naca tsahui', en le cabí naca tsahui'?

¿Nacxi gácatsö ilaca tuz le naca chul-la, en le naca bení'?

¹⁵ ¿Nacxi gácatsö ilácagaquië' tuz Cristo, en Satanás, tu' xihui'?

¿Nacxi gácatsö ilácagaquië' tuz tu bönni' réajlë'ë Cristo, en tu bönni' bití' réajlë'ë?

¹⁶ ¿Nacxi gácatsö ilaca tuz yudo' queë' Dios, en budó' guió'j budó' yaga?

Libí'i cázali' nácali' ca tu yudo' ga yu'ë Dios ban. Ca naca lë ni, Dios caz gunné': Sóalena' légaquië', en tálena' légaquië'.

Gaca' Dios quegaquië', ate' légaquië' iláquië' bönachi quia'.

¹⁷ Que lê ni na', gunnë' ca' caní:

Guli' rúaj ládjagaquië', en buli' lá' alen légaquië'.

Rnnë' Xanru': "Biti' gútsa' lí' le ruá' dō', ate' si' lu na' a libí' ilí'.

¹⁸ Neda' gaca' xuz cázali', ate' libí' ilí' gácali' xzí' ina', bönni', en nigula."

Caní rnnë' Xanru', Nu napa caz idútë yöl-la' huáca.

7

¹ Böchi' luzá' ado', néquiequi queëru' yugu' lê ni guzxi' lu në' è Dios. Que lê ni na' ral-la' un cunru' dxi'a, en ubëaju' yúgu' tē le rucá' ana cá' asō idútē le naca cázaru', en bō' naca cázaru'. Lu yöl-la' radxi queëru' Dios ral-la' guéquiru' quez queë' Lē'.

Ca bulu' bí' i ládxi' gaca nupa ta' yéajlë' Cristo

² Guli' sí' lu ná' ali' netu'.

Cuntu nu biá' atu' dō' que, nu dzaga libí' ilí'.

Cuntu nu bentu' ga ichixi inigui.

Cuntu nu guzxi' yé' etu'.

³ Ruá' a caní didza', calëga para usubága' a libí' ilí' xíguia', pero naca ca na' chigunnía' zí' alō, rnnía': Zoa' sina' ibánlena' libí' ilí' o gátilena' libí' ilí' tu' ruí' i ládxa' a libí' ilí'. ⁴ Ruzxónida' ládxa' a libí' ilí', en rúnda' a libí' ilí' zxön. Sal-la' zían le riguí' i rizáca' tu', nadípada' ládxa' a, en rudzëjade' e ládxa' a.

⁵ Cate' bidxintu' luyú Macedonia, ga ridxintë na' a dza, biti' rata' queëtu' lataj uzí' ládxi' tu', pero zían le taca queëtu'. Ta' dil-lalen bönachi netu', ate' lu icja ládxi' do' otu' yú' ugaca le tun ga rádxitu'. ⁶ Ní' rō Dios, Nu rutipa ladxí' nu chizóa gaca chopa ladxí', butipë' ládxi' tu' cate' budxinbí' bi' i Tito ga guzōatu'. ⁷ Biti' gúcasō tu' budxinbí' queëtu', pero tu' gudíxjō' ibi' ca' netu' ca na' libí' ilí' butípali' ládxi' bi'. Gudíxjō' ibi' netu' ca na' rē' enide' eli' ulé' eli' neda', en ca na' ruhuí' inili' ní' a que lê na' guca ní', enca' ca ruí' i ládxi' lí' neda'. Yúgu' tē lê ni ben ga rudzeja ládxa' a.

⁸ Sal-la' le buzúaja' queëli' lu guichi zí' alō ben ga buí' inili', biti' ruhuí' inda' na' a. Zí' alō buí' inida' cate' gúquibe' eda' ben ga buí' inili' libí' ilí' tu' chí' ido', ⁹ pero na' a rudzëjada', calëga tu' buí' inili', pero tu' ben yöl-la' ruhuí' iní queëli' na' ga bubí' i ládxi' lí'. Dios bugunë' dxin yöl-la' ruhuí' iní queëli', para cabí ichixi iníguli' ní' a que le bentu' netu'. ¹⁰ Yöl-la' ruhuí' iní na' rugunë' dxin Dios run ga nu ubí' i ladxí' para ulá nu na', ate' que lê ni na' biti' ral-la' huí' iniru' que. Yöl-la' ruhuí' iní le naca que yödzólió ni run ga ilátigaca bönachi. ¹¹ Buli' yútsōca' ca bugunë' Dios dxin yöl-la' ruhuí' iní queëli' na'.

Ben ga ruí' i ládxi' lí' -në' Dios.

Ben ga gú' unili' urúajli' dxi' a.

Ben ga guléli' nu na' ben dul-la'.

Ben ga rádxili' -në' Dios.

Ben ga bē' ládxi' lí' gunli' ca rnna xtídzë' è Dios.

Ben ga nadxí' ilí' -në' Dios idú ládxi' lí'.

Ben ga gú' unili' gunli' xíguia' nu na' ben dul-la'.

Benli' le naca bē' biti' bi' dul-la' nabága' lí' ní' a que lê na' guca.

¹² Que lê ni na', sal-la' buzúaja' caní lu guichi na', biti' guca ní' a que nu na' ben dul-la', en calëga ní' a que nu na' gudí' i guzaca', pero para gaca bē' lahuë' Dios le nácátë ruí' i ládxi' lí' netu'. ¹³ ¡Lē ni butipa ládxi' tu'! Calëgasō bidipa ládxi' tu', pero rudzëjade' e ládxi' tu' tu' rudzëjabi' bi' i Tito ní' a que le benli' libí' ilí', tu' butípali' ládxi' bi'.

¹⁴ Bena' libí' ilí' zxön lobi' Tito, ate' biti' benli' ga utuí' ida'. Bē' lentica' stu' libí' ilí' didza' idútë li, ate' lësca' caní naca idútë li didza' bē' lentu' -bi' Tito cate' bentu' libí' ilí' bal. ¹⁵ Zeaj rácarō idú ca nadxí' ibi' bi' i Tito libí' ilí' cate' rōjnebi' ca na' benli' ca rnna xtídzá' tu', en ca na' benli' -bi' bal lu yöl-la' radxi Dios queëli' en lu yöl-la' nōxaj ladxí' queëli'. ¹⁶ Rudzëjade' eda' tu' gaca uzxóni ládxa' a libí' ilí' idú ládxa' a.

8

Ca ral-la' unödzej nu réajlë' Cristo le dë que

¹ Na' a, böchi' luzá' ado', rē' enitu' quíxjō' itu' libí' ilí' ca naca le buzá' ládxi' è Dios quegaca yugu' cō' bönachi queë' Cristo luyú Macedonia. ² Sal-la' yenni' gula' guí' i gula' záquië' lu yugu' le guzxi' bē' légaquië', bulu' dzëjade' enë', en idú ládxi' gaquië' bulu' nōdzjadë' e sal-la' nácagaquië' bönachi yechi'. ³ Neda' runa' ba nalí quegaquië', idú ládxi' gaquië' bulu' nōdzjadë' e tsca gula' zéqui' nē', en bulu' nōdzjarë' tsca gula' zéqui' nē'. ⁴ Gula' nábide' enë' netu', en guláta' yudë' e lotu' gú' itu' légaquië' lataj tsōzxön len netu' ilácalenë' böchi' ru' ta' yéajlë' è Cristo. ⁵ Gulunrë' ca guquí ícjatu' ilunë'. Bulu' dōdi cuíngaquië' zí' alō lu në' è Xanru', enca'

lu na'tu' netu', le naca le raza ládxë'ë Dios. ⁶ Que lë ni na' gunábitu'-bi' bi'i Tito údxi gunbi' xichinbi' ga ni' zóali', en utúbibi' dumí runódzjali' lu yöl-la' dxi'i ladxi' queéli', ca na' gusi lobi' benbi' zí'alö. ⁷ Nácali' lo ca naca yúgu'të le runli', ca réajlë'ëli' Cristo, en ca réajni'ili', en ca ruzéajni'ili' bönachi, en ca ruí'i ládxi'li' luzá'ali', enca' ca nadxí'ili' netu'. Lësca' caní ral-la' gácali' lo ca gácalenli' luzá'ali', lu yöl-la' dxi'i ladxi' queéli' bi unódzjali' quégaquië'.

⁸ Biti' rinná bé'eda' libí'ili' gunli' caní. Ruá'a didza' ca tun ia'zica'rö bönachi, tu'nódzaj idú ládxi'gaca, para guna' ga gunli' le gaca bé' naca idú ca nadxí'ili' luzá'ali'. ⁹ Nöz quezili' le buzá' ládxë'ë Xanru' Jesucristo queéru'.

Bilé'enë' yöl-la' tsahui' pero para gácalenë' libí'ili' böaquië' yechi' para gata' queéli' yöl-la' tsahui', tu' gúquië' Lë' yechi'.

¹⁰ Caní runi neda': Dxi'arö gaca queéli' údxi gunli' lë na' gusi loli' runli' chiguca tu iz. Gúcali' lo, calégasö ca bunódzjali', pero lësca' ca gú'unili' unódzjali'. ¹¹ Na'a, idú ládxi'li' buli'siyudxi gunli' lë na' gusi loli' runli', idú ládxi'li' bunódzjali'. Buli'nódzaj na'a tsca séqui'li'. ¹² Channö ré'ënilí' bi unódzjali', Dios runë' bal le runódzjali' tsca naca le dësö queéli'. Biti' rinabë' unódzjaröli' tsca le dësö queéli'.

¹³ Biti' ré'ënda' guna' ga unódzjali' le gácalen ia'zica'rö bönachi ga idxintë yadzaj queéli'. ¹⁴ Ré'ënda' gaca tuz ca dë queéli', en quégaquië'. Na'a dëda' queéli' le gaca unódzjali' para bi gata' quégaca nupa ni' riyadzaj quéguequi. Ní'irö cate' bi yadzaj queéli', légaquië' huáca bi ulu'nódzjë' queéli' para caní gaca tuz ca dë queéli', en quégaquië' yúgu'tëli'. ¹⁵ Lësca' caní nazúaj lu guichi lá'ayi le rnna: "Nu na' butúbida', bití' bugá'ana que, ate' nu na' butubi láti'do'os, bití' biyadzaj que."

Ca runbi' bi'i Tito, enca' nupa dzáagaca lëbi'

¹⁶ ¡xclenë' Dios, tu' benë' Lë' ga ruí'i ládxi'bi' bi'i Tito libí'ili', ca na' ruí'i ládxa'a neda' libí'ili'!

¹⁷ Calégasö runbi' ca rnna xtídza'a bi rinábida'-bi', pero tu' ruí'i ladxi' cázabi' libí'ili', rásasö queëbi' gú'unibi' tsöyubi' libí'ili'.

¹⁸ Risól-la'tu'-në' tsözxön len lëbi' böchi'ru' na' tun lë' bal yúgu'të cö' bönachi queë' Cristo, tu' runë' dxi'a dxin que didza' dxi'a. ¹⁹ Ia'stú, gula'bö yugu' cö' bönachi queë' Cristo bönni' ni, para tséajlenë' tsözxön netu' guá'atu' lë na' runódzjali', para gaca yöl-la' ba queë' Xanru', en gaca bé' ca' ruí'i ládxi'ru' luzá'aru' ta'yéajlë'ë Cristo. ²⁰ Caní gaca, gunë' netu' tsözxön para cuntu nu bi gaca innë queëtu', ca rúnlentu' dumí na' runódzjada'ali', le gácalen bönachi yechi'. ²¹ Ruí'i ládxi'tu' guntu' le naca dxi'a, calégasö lahuë' Xanru', pero lësca' lógaca bönachi.

²² Risól-la'tu'-në' ca' ia'tüë' böchi'ru' tsözxön len légaquië', para gaca yöl-la' ba queë' Xanru', ate' naca bé' ré'ënë' gácalenë' rë'u idú ládxë'ë. Ia'stú, tu' ruzxöni ládxë'ë libí'ili', ré'ënitëronë' ca' gácalenë' rë'u lu dxin ni. ²³ Channö nu bi inaba ca nácabi' bi'i Tito, nácabi' luzá'a, rúnlenbi' neda' tsözxön dxin para gácalentu' libí'ili'. Channö nu bi inaba ca nácagaquië' ia'zica'rë' böchi'ru' na', nasól-la'gaca yugu' cö' bönachi queë' Cristo légaquië', ate' tunë' ga gaca yöl-la' ba queë' Cristo. ²⁴ Guli'gún ga gaca bé' nadxí'ili' légaquië' para iléquibe'e yugu' cö' bönachi queë' Cristo runli' caní, en ila'nözi naca idütë li didza' dxi'a ruí'itu' ca naca queéli'.

9

Ca naca dumí rutúbiru' le gácalen yugu' böchi'ru'

¹ Ca naca le runódzjali' quégaquië' böchi'ru' ta'yéajlë'ë Cristo, bití' run bayudxi uzúaja' queéli' lu guichi ni. ² Chinózda' ca ré'ënilí' gunli' lë ni, ate' ruá'a didza' lógaca bönachi ta'yéajlë' Cristo luyú Macedonia ni ca naca le dxi'a runli'. Rigúixjöi'ida' légaquië' ca naca queéli', zóali' luyú Acaya, chiguca tu iz chizóa gunli' lë ni, ate' tu' ruí'i ládxi'li' gunli' lë ni, bidipa ládxi'gaca lá'tu'biqúi' yúgu'të bönachi ni ta'yéajlë' Cristo. ³ Na'a, risól-la'a yugu' böchi'ru' ni queéli' para gaca bé' naca idütë li didza' ruí'itu' ca naca queéli', ate' naca ca na' chigunní'a queéli', chizóa gunli' lë na' gácalen yugu' luzá'aru'. ⁴ Channö ila'zá'alen bal-la bönachi Macedonia ta'yéajlë' Cristo neda' tsözxön, ate' gaca bé' bití' zúmi gunli' lë na', ní'irö utuí'itu' tu' buzxöni ládxi'tu' libí'ili', ate' libí'i cázali' ca' ral-la' utuí'ili'. ⁵ Que lë ni na' gúquida' ral-la' isól-la'a yugu' böchi'ru' ni para ila'dxinë' ga zóali' zí'alö ca neda', ate' ilácalenë' libí'ili' para udxí utúbili' lë na' guzxi' lu ná'ali' unódzjali'. Caní gaca, údxi utúbili' dumí na' zí'alö ca idxina', ate' gaca bé' runódzjali' tu' ré'ëni cázali', en caléga tu' rinná bé'etu' libí'ili' bi unódzjali'.

⁶ Guli'tsöjné lë na' rnna:

Nu raza ruzóa láti'do'os, láti'do'os ca' uzí'.

Nu raza ruzóa sizxöni, sizxöni ca' uzí'.

⁷ Tu tuli' ral-la' unödzejali' tsca na' chinuzóali' icja ládxi'do'oli', en calëga lu yöl-la' ruhu'ini queéli' o tu' run bayudxi, tu' nadxí'inë' Dios nu runödzej idú ladxí'. ⁸ Dios gaca gúnnadë'ë queéli' ca riquínili' para gata' queéli' yúgu'të lë na' riquínili', ate' ugá'ana queéli' para gaca gácalenli' nu bi riyadzaj que. ⁹ Lësca' caní nazúaj lu guichi lá'ayi le rnna:

Idú ládxë'ë bunödzejé' quégaca bönachi yechi'.

Naca bé'tica sò yöl-la' dxi'i ladxí' queé'.

¹⁰ Dios, Nu runna queéru' bi gaz uzóaru', enca' bi gu'aj gáguru', gunné' ca' queéli' bi unödzejali', le naca ca lë na' nu raza ruzóa, en guné' ca' ga ila' yán le ilápali' le nácagaca yugu' le dxi'a runli'. ¹¹ Dios guné' ga gáta'da' queéli' yöl-la' tsahui' para gaca unödzejada'ali'. Caní gaca, yugu' le unödzejali', lë na' quisitu' uláz queéli', gun ga ila'nná bönachi zían: "Xclenë' Dios." ¹² Lë na' runödzejali' le gácalen yugu' bóchi'ru', calégasö güi'i quégaquié' le ta'yádzjané', pero gun ga ila'nné': "Xclenë' Dios." ¹³ Cate' gunli' caní, ila'gu'ë Dios yöl-la' ba tu' gaca bé' runli' ca rnna didza' dxi'a queé' Cristo ca na' rnnali' runli'. Ila'gu'ë Lë' yöl-la' ba ca', tu' nácali' dxi'i ladxí', runödzejali' quégaquié', enca' quégaca ia'zica'rò bönachi. ¹⁴ Ulu'lidzë' Dios, en ila'nábinë' Lë' gácalenë' libí'ili' tu' nadxí'iguequinë' libí'ili' ni'a que le buzá' ladxí'dë'ë Dios queéli'. ¹⁵ ¡Xclenë' Dios, bennë' tu le nácada' lesaca' queéli'!

10

Yöl-la' unná bé' dë lu në'ë Pablo

¹ Ta'nná bönachi naca' nòxaj ladxí' cate' zóalena' libí'ili', pero cate' zoa' zi'tu' ga zóali' naca' rugu ladxí' ca ruzúaja' lu guichi. Tu' náquié' nòxaj ladxí', en dxi'i ladxí' Cristo, neda', Pablo, ráta'yua' loli' ² cabí gunli' ga gun bayudxi gaca' rugu ladxí' len libí'ili' cate' idxina' ga zóali'. Chizóa gaca' rugu ladxí' len nupa ni' ta'nná runtu' dxin ni lu yöl-la' bónáchisö queétu'. ³ Le nácatë nácatu' bönachi, pero calëga ríacasö queétu' runtu' xichinë' Dios. ⁴ Yugu' le rudí'initu' lu gudil-la, bití' nácagaca ca le tu'dí'ini bönachi yödzóliö ni lu gudil-la, pero yugu' le rudí'initu' lu gudil-la nápagaca yöl-la' huáca queé' Dios, le ruguntu' dxin para usunítitu' le nál-lagaca que tu' xihui'.

⁵ Rusunítitu' yugu' didza' bití' nácatë le tu'zxöni ladxí' gaca bönachi, en yúgu'të le tun ga tun ba zxön cuínguequi, en le tun ga cabí ilunbé' Dios. Runtu' ga gaca ila'nná bé'enë' yúgu'të le ta'zá' ladxí'gaquié', lë na' tun ga ta'dá'baguë'ë Dios, ate' runtu' ca' ga tuné' ca rnnë' Cristo. ⁶ Tödi gunli' le gaca bé' naca idú ca runli' ca rnna xtídzë'ë Cristo, sóatu' sina' guntu' xíguia' yúgu'të nupa ni' ta'dá'baga' xtídzë'ë.

⁷ Ruyuli' le nalá' láhuisö. Channö réquinë' nu bönni' dzáguié' libí'ili' néquinë' queé' Cristo, ral-la' guéquibe'enë' ca' lë ni: Ca na' lë' néquinë' queé' Cristo, lësca' caní netu' néquitu' queé' Cristo. ⁸ Bití' ca' rutu'ida' sal-la' gudödi bé' ben ba zxön cuina' ca naca yöl-la' unná bé' budödë' Xanru' lu na'tu'. Lë na' dë lu na'tu' naca para guntu' ga gácarö idú ca réajlë'ëli' Cristo, en calëga para usunítitu' libí'ili'. ⁹ Bití' ré'ënda' guéquili' ré'ënda' gun gádxida' libí'ili' ni'a que le ruzúaja' queéli' lu guichi ni. ¹⁰ Nacua' ni' nupa ila'nná: "Yugu' le ruzúajë' Pablo queéru' lu guichi, rulidza zi'ë ré'u, en ralë' didza', pero cate' zóalenë' ré'u runé' nòxaj ladxí', en didza' gúlado' ru'ë." ¹¹ Nu na' ruí'i caní didza' ral-la' guéquibe'ë lë ni: Ca na' nácatu' cate' bi ruzúajtu' queéli' lu guichi tsanni ni zóatu' zi'tu' ga zóali', gácatu' ca' lu le guntu' cate' ni' sóalentu' libí'ili'.

¹² Le nácatë bití' nácatu' rugu ladxí' para innatu' nácatu' lëbi ca nácagaca nupa ni' tun ba zxön cuínguequi. Nácagaca nupa ni' yugu' bönni' bití' bi nòzguequinë'. Lu le ta'za'sö ladxí'gaquié' tu'zöé' ca ral-la' ilaca bönachi, en tu'chi'a tu'sörörë' la' légacasë' tsca naca lë na' ta'za'sö ladxí'gaquié'. ¹³ Netu' bití' gunrö ba zxön cuintu' ca ral-la' guntu', pero ca nácatë dxin budödë' Dios lu na'tu', ate' lu dxin ni, ral-la' guntu' le ga ni' zóali' libí'ili'. ¹⁴ Channö budödë' Dios lu na'tu' dxin guntu' ga zóali', bití' ca' gudödi bé'ëtu' ca bentu' cate' bidxintu' ga zóali', en bentu' libán que didza' dxi'a ga na' zóali'. ¹⁵ Bití' run ba zxön cuintu' ca naca dxin nungaca ia'zica'rò bönachi, pero ca nacasö dxin na' budödë' Dios lu na'tu'. Runtu' löza gácarö idú ca réajlë'ëli' Cristo para gaca guntu' dxin ga zóali' le nácáro lesaca', tsca naca le budödë' Dios lu na'tu' guntu'. ¹⁶ Ní'irö gaca guntu' libán que didza' dxi'a ga nacua' yödzo dzö'ö zi'tu'rö ga zóali'. Caní gaca, bití' gun bayudxi gun ba zxön cuintu' ni'a que dxin nungaca ia'zica'rò bönachi, lë na' budödë' Dios lu në'ëguequi.

¹⁷ Nazúaj lu guichi lá'ayi le rnna:

Nu ré'ëni bi gun zxön,

le ben cazë' Xanru' ral-la' gun zxön.

¹⁸ Nurúajë' dxi'a tu bönni' cate' rnnë' Xanru' nurúajë' dxi'a, en calëga cate' ru'ë caní didza' bönni' na' que la' cuinsë'.

11

Ca nácagaquië' Pablo, en bönni' tun cuíngaquië' gubáz queë' Cristo

¹ Ré'ënda' guá' ilenli' neda' tsanni ni gu'a didza' lu yöl-la' biti' bi nözi quia'. Buli'sá' ládxi'li' quia'. ² Ruí'í ládxa'a libí'ili' ca na' Dios caz ruí'í ládxe'ë libí'ili', tu' nácali' ca nácabi' tubi' bi'í nigula ra'bando', naca idú ládxi'bi', rusudxina'-bi' lahuë' Cristo para utsaga ná'alenbi' Lé cazë'. ³ Rádxida' idxin queéli' nu si' ye'e libí'ili', en gun ga usanli' ca nadxi'ili'-në' Cristo idú ládxi'li', ca na' guca queënu Eva, nigula queë' Adán, cate' guzxi' ye'e Satanás tu' xihui' lënu lu yöl-la' sina' que. ⁴ Caní rnniá' tu' idú ládxi'li' ruí'ili' nu za' queéli' lataj, en run libán que xibá queë' Jesús, le nadzá' ca naca xibá na' bentu' netu' libán que, ate' rizí' lu ná'ali' tu bö', en tu didza' dxi'a le nadzá'gaca ca nácagaca Bö' Lá'ayi na', en didza' dxi'a na' guzxi' lu ná'ali' lu na' tu' netu'. ⁵ Réquida' biti' nácara' cuídí'sö ca nácagaquië' bönni' ni' nácaterögaquië' lo, ate' réquili' nácagaquië' gubáz queë' Cristo. ⁶ Nadxi ca' naca' cuídí'sö ca ruá'a didza', pero biti' naca' cuídí'sö ca naca yöl-la' réajni' napa'. Zián luzuí, en zián ca buluí'itu' libí'ili' ca naca yöl-la' réajni' nápatu'.

⁷ Nadxi ca' biti' naca dxi'a tu le bena, biti' bi buquízxa' libí'ili' cate' bena' libán ga zóali' que didza' dxi'a. Ben cuina' cá'asö, ate' bena' ga gúcali' libí'ili' zxön. ⁸ Buguna' dxin le nequi quéguequi ia' zica rö cö' bönachi queë' Cristo, tu' guzxi'a dumí bulu' nódzjé' légaquië' quia' para guca bena' dxin ga zóali' libí'ili'. ⁹ Cate' guzóalena' libí'ili', en biyadzaj quia', biti' busaca' zi'a nituli' libí'ili', pero lë na' biyadzaj quia', gulunnë' quia' böchi'ru' bila' rúajé' luyú Macedonia, en bila' dxinë' ga zoa'. Catu caz busaca' zi'a libí'ili', ate' la' lëbisö ca guna'. ¹⁰ Ni'a que le naca idütë li queë' Cristo le zóalen neda', biti' soa' dxisö, gun ba zxon cuina' ca naca lë ni idú luyú Acaya. ¹¹ ¿Naru' réquitseli' rnniá' caní tu' cabí nadxi'ida' libí'ili'? Nözinë' Dios nadxi'ida' libí'ili'.

¹² Gúntica'sa' ca runa' na'a, para cabí gata' quégaquië' lataj ilún ba zxon cuíngaquië' bönni' ni' ta'nnasë' nácagaquië' gubáz queë' Cristo, en ta'nnë' tunë' xichinë' Lé' ca runtu' netu'. ¹³ Biti' ca' nácagaquië' gubáz nasöl-lë'ë Cristo. Ta'zi' yë'ë ca naca dxin tunë', en tun cuíngacasë' gubáz queë' Cristo. ¹⁴ Biti' ral-la' ubániru' ca tunë' bönni' na'. Lësca' Satanás caz, tu' xihui', ruluí' i' cuini ca tu gubáz lá'ayi queë' Dios, ridë' lu bení'. ¹⁵ Que lë ni na' biti' ral-la' ubániru' channö yugu' huen dxin que tu' xihui' na' tu' lufi' cuíngaquië' ca nupa tun xichini Nu na' naca tsahui'. Udxí quégaquië' ca sa'yéaj le tunë'.

Yugu' le gudí' i' guzáquë' ë Pablo

¹⁶ Leyúbölo' rea' libí'ili': Cuntu nu ral-la' guequi nachixi icja'. Channö réquili' nachixi icja', guli' güí' neda' lataj gu'a didza' ca tu bönni' nachixi icjé', para gun ba zxon cuina' tu chí'ido'. ¹⁷ Didza' ni ruá'a biti' naca le rinná bë'ë Xanru', pero ruá'a didza' ca tu bönni' nachixi icjé', run ba zxon cuina'. ¹⁸ Nacu'ë zián bönni' tun ba zxon cuíngaquië' ca nácagaca le tunë' lu yöl-la' bönáchisö quégaquië'. Que lë ni na', neda' ca' gun ba zxon cuina'. ¹⁹ Tu' réquili' rácada'ali', idú ládxi'li' ruí'ili' lataj ilu'ë didza' yugu' bönni' nachixi icja'gaquië'. ²⁰ Ruí'ili' ca' lataj nu gun libí'ili' bönni' nadó'ogaca, o nu cúa le dë queéli', o nu inná be'e libí'ili', o nu ucá'ana libí'ili' cá'asö, o nu capa' rú'ali'. ²¹ Rutuí'ida' rnniá' lë ni: Biti' bentu' caní queéli' tu' gudödi bë' gúcatu' nōxaj ladxi'.

Channö zoa nu naca rugu ladxi' para gun ba zxon cuini, neda' ca' gaca' rugu ladxi', en gu'a didza' ca tu bönni' nachixi icjé'.

²² ¿Naru' nácagaquië' bönni' hebreo?

Lësca' naca' neda'.

¿Naru' nácagaquië' bönni' Israel?

Lësca' naca' neda'.

¿Naru' nácagaquië' zxi'ini xi'sóë' Abraham?

Lësca' naca' neda'.

²³ ¿Naru' nácagaquië' huen dxin queë' Cristo?

Lësca' nácatera' neda'.

(Na' a ruá'a didza' ca tu bönni' nachixi icjé' cate' rnniá' caní.)

Béntëra' dxin ca gulunë' légaquië'.

Guyu' a lidxi guié zíanrö luzuí ca gula'yu'ë légaquië'.

Gula'zé'eda' neda' yu bönachi zíanrö luzuí ca guca quégaquië'.

Guzóa bönadxi gátia' zíanrö luzuí ca guzóa quégaquië'.

²⁴ Gayu' luzuí yugu' bönni' judío gula'guiné' neda' guídi.

Tu tu luzuí na' gula'guiné' neda' chënna uruá' luzuí.

²⁵ Tsonna luzuí gula'guiné' neda' gubá'ayi.

Tu luzuí bulu'ladxë' neda' guíöj.

Tsonna luzuí guzóa' tu lë'e barco le guca ditaj, en bötaj lu nísado'.

Tu luzuí guzóa' idú tu yëla, en tu dza lu nisa que nísado'.

26 Zián luzuí cate' ni' yu'a nöza,
 gudóda' gapa guzóa bönadxi quia' yugu' lu yegu,
 en gapa guzóa bönadxi quia' lu ná'agaquié' gubán,
 en gapa guzóa bönadxi quia' lu ná'agaquié' bönni' uládz quia',
 en gapa guzóa bönadxi quia' lu ná'agaquié' bönni' zi'tu',
 en gapa guzóa bönadxi quia' lu yödzö,
 en gapa guzóa bönadxi quia' lu lataj cá'asö,
 en gapa guzóa bönadxi quia' lu násado',
 en gapa guzóa bönadxi quia' lu ná'agaquié' bönni' ta'zi' yëë, ta'nné' náacagaquié' böchi'ru'
 ta'yéajlë'ë Cristo.

27 Bena' dxin zi'i, en gudú ládxa'a.

Zián luzuí biti' guta' quia' lataj gásia'.

Guduna', en gubídx'a nisa.

Zián luzuí biti' guta' quia' bi' gahua', o ga utsë'e cuina', o lari' gácua'.

²⁸ Ia'stú, yúgu'të dza ruúbí ruguí'ida' tu' ru'f'ida' ládxa'a yúgu'të cö' bönachi queé' Cristo.

²⁹ Cate' nu ricuidi', neda' ca' ricuidi'da'. Cate' nu run ga ichixi iníguinë' tu böchi'ru', rileda' nu run caní. ³⁰ Channö run bayudxi gun ba zxón cuina', gun ba zxón cuina' ca naca le náacagaca bë' ricuidi'da'. ³¹ ¡Dios, Xuzë' Xanru' Jesucristo, gácatica'sö queé' yöl-la' ba! ¡Lë' nözinë' ruá'a didza' idütë li! ³² Cate' ni' guzóa' lu yödzö Damasco, bönni' ni' guta' lu nëë uláz queé' bönni' rinná bë'ë, lë' Aretas, bucu'ë yugu' bönni' gula'bö' nísie' para ila'zönë' neda', ³³ pero yugu' böchi'ru' ni' bulu'dödë' neda' tu ga ra'a bení' que yu'u, yu'a tu ga bóra zxón, en bulu'zötjé' neda' ni'ilö lu zö'ö run chi'i yödzö na'. Caní guca, bulá' lu ná'agaquié' bönni' ni' gula'bö' nísie' neda'.

12

Yugu' le buluí'inë' Dios Pablo

¹ Le nácatë biti' ral-la' gun ba zxón cuina'. Sal-la' caní naca, na'a gu'a didza' ca náacagaca le buluí'inë' Xanru' neda', en le buzéajni'inë' neda'. ² Nünbë'a-në' tu bönni' réajlë'ë Cristo, chíguca chidá' iz zoa nu guchë' lë' yehua' yubá. Biti' nözda' channö guyijë' ni' lu idütë le naca cazë', o lu bö' naca cazë'. Tuzë' Dios nözinë'. ³ Nözda' guyázië' lataj lachi queé' Dios, nazí'i le paraíso. Biti' nözda' channö guyijë' ni' lu idütë le naca cazë', o cabí. Tuzë' Dios nözinë'. ⁴ Tsanni ni' zoë' ga na', biyönnë' le tun ga nu rubani, yugu' le biti' dë' lataj nu gü'i' didza' que. ⁵ Bönni' ni huáca guna' lë' zxón, pero biti' gun ba zxón cuina'. Tuz gun ba zxón cuina' tu' ricuidi'da'. ⁶ La'tu' guë'ënida' gun ba zxón cuina', biti' gaca' bönni' biti' bi nözinë', channö innía' le naca idütë li. Na'a, biti' gun ba zxón cuina' tu' cabí ré'ënda' nu gunrö neda' bal tsca le bilé'e bena' neda', o tsca naca didza' biyöni bë'a neda'.

⁷ Ní'irö, para cabí tödi bë' gun ba zxón cuina' tu' bilé'eda' lë' na' tun ga nu rubani, Dios buzöë' tu huë' lu xipéla'a le riláda' ca rilá ga rinë' tu yötsi'. Huë' na' guca ca tu le bugún dxin tu' xihui', para busaca' zi' neda'. Caní guca quia' para cabí tödi bë' gun ba zxón cuina'. ⁸ Tsonna luzuí gata'yua' lahuë' Xanru', en gunábida' Lë' ugúë' xihue'a na'. ⁹ Xanru' gudxë' neda': "Nácatë quiu' le ruzá' ládxa'a quiu'. Uzí'tëru' xibé le ruzá' ládxa'a quiu' cate' ricuidi'nu'." Que lë' ni na', rudzëjade'eda' tu' ricuidi'da'. Tu' raca caní quia', rácalentë'rö yöl-la' huáca queé' Cristo neda'. ¹⁰ Que lë' ni na', tu' nadxí'ida'-në' Cristo, rudzëjada' cate' ricuidi'da', en cate' nu rulidza neda' zi', en cate' bi riyadzaj quia', en cate' nu ribía ladxi' neda', en cate' bi raca quia'. Cate' nacuídi'da', nápatë'rö caza' yöl-la' huáca queé' Lë'.

Pablo ru'i ládxe'ë bönachi queé' Cristo nacuí' Corinto

¹¹ Naca' tu bönni' biti' bi nözinë' tu' bë'a didza' ca naca le dxí'a bena' neda'. Libí'i cázali' benli' bayudxi bena' caní. Libí'ili' ral-la' gunli' neda' bal, atë' sal-la' biti' bi naca' neda', biti' ca' nácara' cuidí' ca náacagaquié' bönni' ni' nácada'gaquié' lo, ta'nnë' náacagaquié' gubáz queé' Cristo. ¹² Yugu' le bena' lu yöl-la' riböza zxón ladxi' quia' ga ni' zóali' náacagaca bë' naca' gubáz queé' Cristo. Bilé'eli' yugu' le bena', le náacagaca bë', en le tun ga nu rubani, en yugu' yöl-la' huáca zxón que yehua' yubá. ¹³ Tuz le cabí bena' ga zóali' le bena' ga nacuí' ia'zica'rö cö' bönachi queé' Cristo. Biti' busaca' zi' a libí'ili' bi gúnnali' le gu'aj gahua'. Bulí'niti lo neda' tu' cabí bena' caní queéli'.

¹⁴ Chizóa' guída' ga zóali' le bunní luzuí. Biti' bi inaba' gúnnali' quia'. Ré'ënda' gunna cuin cázali' quia', en caléga bi dë' queéli'. Yugu' bi'i huë'ënidö', biti' run bayudxi ulu'gágubi' xuz xiná'agacabi'. Xuz xiná'agacabi' na' ral-la' ulu'gahuë' xí'inigaquié'. ¹⁵ Idú ládxa'a utóa' yúgu'të le dë' quia', en udödi cuina' ni'a queéli' para gaca bi uzí'ili' xibé, sal-la' réquida' cate' nadxí'iröda' libí'ili', zeaj ruhuéchi' yöl-la' nadxí'i queéli' neda'.

¹⁶ Nöz quézili' biti' busaca' zi' a libí'ili'. Na'a, bál-lali' innali' guca' sina', atë' len didza' biti' nácatë' buzi'a xibali'. ¹⁷ ¿Naru' réquitseli' guzxi' yé'eda' libí'ili' cate' gusól-la'a yugu' gubáz

quia' ga zóali'? ¹⁸ Gúta'yua' lobi' bi'i Tito tséajbi' ga zóali', ate' gusöl-la'a-në' böchi'ru' na' tsözxón len lëbi'. ¿Naru' réquitseli' buzí'ibi' xibali' bi'i Tito? ¿Naru' cabí bentu' la' lëbisö ca runtu' bi'i Tito, en neda', enca' la' lëbisö didza' bë'ëtu'?

¹⁹ ¿Naru' réquitseli' rubéaj cuintu' dxi'a loli' libí'ili'? Lahuë' Dios ruí'tu' didza' uláz queë' Cristo, böchi' luzá'ado', ate' yúgu'tè le runtu' nácacaga para gácarö idú yöl-la' réajlë' queëli' Cristo. ²⁰ Rádxida' biti' gácali' ca rë'ënda' gácali' cate' guída' ga zóali', ate' neda' biti' gaca' ca rë'ëni' libí'ili' gaca'. Rádxida' ridil-la dídza'li', en ruzxé'eli' luzá'ali', en rileli' luzá'ali', en rulidza díjtali' luzá'ali', en rnnëli' que luzá'ali', en run ba zxon cuinli', en rutsátsali'. ²¹ Cate' guída' ga zóali', channö caní raca queëli', rádxida' gunë' Dios ga utuí'ida' ca naca queëli', ate' gun bayudxi cödxá' ni'a quegaca zían nupa ni' gulún dul-la', en biti' bulu'bí'i ládxi'gaca ca nácacaga le cabí naca tsahui' gulúngaca, en yugu' le gula'zé ládxi'guequi le cabí naca dxi'a.

13

Pablo ruzéajni'inë' bönachi Corinto, en rugapë' Dios légaquië'

¹ Le bunní luzuí ni guída' ga zóali'. Nazúaj lu guichi lá'ayi le rnna: "Run bayudxi ila'cuá' chopá tsonna nupa ilún ba nalí channö nu bi uzegui luzé'e didza'." ² Chibuzéajni'ida' nupa gulún dul-la' cate' ni' guzóalena' libí'ili' le buropi luzuí, ate' na'a ruzéajni'ida' légaquië' leyúbölö, enca' yúgu'tè nupa tun dul-la', sal-la' ni zoa' zi'tu', rnnia': Channö guída' ga zóali' leyúbölö biti' gaca' nöxaj ládxi' para til-la' légaquië'. ³ Rinábali' tu le gaca bë' ruá'a didza' uláz queë' Cristo. Lë na' guna' gaca bë' ruá'a caní didza'. Biti' ca' ricuídi'në' Cristo cate' bi runë' queëli', pero lu yöl-la' huáca zxon queë' runë' bi runë' queëli'. ⁴ Le nácatë gudë'ë lë'e yaga cruz ca nu ricuídi', pero zoë' nabanë' tu' zóalen yöl-la' huáca queë' Dios Lë'. Netu' ca' ricuídi' tu' tsözxón len Lë', pero tu' nácatu' tuz len Lë' nabantu', ate' zóalen netu' yöl-la' huáca queë' Dios bi guntu' ga ni' zóali'.

⁵ Buli'yú cuinli' channö réajlë'ëli' Cristo o cabí. Guli'sí' bë' la' cuínsili'. ¿Naru' cabí nózili' zóalenë' Jesucristo libí'ili' channö le nácatë réajlë'ëli' Lë'? ⁶ Runtu' löza chinöz quézili' le nácatë netu' réajlë'ëtu' Cristo. ⁷ Rulídzatu'-në' Dios rinábitu'-në' gácalenë' libí'ili', para cabí guá'ali' dö', caléga para urúajtu' dxi'a netu', pero para gunli' libí'ili' le naca tsahui' sal-la' guéquili' richixi riníguitu' netu'. ⁸ Biti' ca' gaca tá'baga'tu' le naca idütë li, pero gácasö guntu' ca sa'yéaj le naca idütë li. ⁹ Que lë ni na' rudzéjatu' cate' ricuídi'tu', ate' libí'ili' ridipa ládxi'li'. Rulídzatica'stu'-në' Dios, rinábitu'-në' gunë' ga gaca idú ca réajlë'ëli' Cristo. ¹⁰ Que lë ni na' ruzúaja' queëli' lu guichi lë ni tsanni ni zoa' zi'tu' ga zóali'. Ní'irö cate' guída' ga zóali' biti' gun bayudxi usaca' zí'a libí'ili', pero uguna' dxin yöl-la' unná bë' nudödë' Xanru' lu na'a, le naca para utipa' ládxi'li', en caléga para usunítia' libí'ili'.

¹¹ Na'a, böchi' luzá'ado', dipa ládxi'li'.
Guli'gú' ládxi'li' gaca idú ca réajlë'ëli' Cristo.
Guli'gú' ládxi'li' ca' lë ni rea' libí'ili'.
Guli'gaca tuz len luzá'ali', en guli'cöza dxí'ado'.
Rinábida'-në' Dios sóalenë' libí'ili'.
Lë' nadxí'inë' rë'u, en runë' ga ribözaru' dxí'ado'.

¹² Guli'gapa Dios luzá'ali', tuli' ia'tuli', en unida'li' luzá'ali'. ¹³ Yúgu'tè böchi' luzá'aru' ni tu'gapë' Dios libí'ili'.

¹⁴ Rinábida'-në' Dios gunë' ga gata' queëli' yúgu'tëli' le ruzá' ládxi'ë Xanru' Jesucristo queëru', en idxí'inë' ca' libí'ili', en gunë' ga gácali' tuz len Dios Bö' Lá'ayi. ¡Ca' gaca!

DIDZA' GUSÖL-LĒ'Ē PABLO LUYÚ GALACIA

Ruzúajĕ' Pablo quegaca bönachi luyú Galacia

¹ Neda', Pablo, naca' gubáz queĕ' Cristo. Biti' gula'söl-la' bönachi neda'. Jesucristo caz gusöl-lĕ'ĕ neda', en nunĕ' Xúziru' Dios tu zxon Lĕ'. Lĕ' busubanĕ' Jesús lu yöl-la' guti. ² Ruzúaja' queĕli' lu guichi ni, libí'ili', yugu' cò' bönachi tu'dubi queĕ' Cristo luyú Galacia. Núnqaquie' yugu' bóchi'ru' ni tu zxon neda'. ³ Rinábida' Xúziru' Dios, enca' Xanru' Jesucristo uzá' ládxĕ'ĕ queĕli', en gunĕ' ga soa dxi icja ládxĕ' do'oli'. ⁴ Jesucristo caz budödi cuinĕ' lu yöl-la' guti tu' nözi dul-la' nabága'ru' para busölĕ' rĕ'u lu le naxihui' raca dza ni zóaru' na'a. Benĕ' caní tu' naca ca rĕ'ĕni quezinĕ' Xúziru' Dios. ⁵ ¡Gácatica'sò queĕ' Dios yöl-la' ba! ¡Ca' caz!

Tuz naca le rinnĕ dxi'a queĕ' Jesucristo

⁶ Rubánide'eda' ca runli', rucá'anatĕli' Dios. Lĕ' bulidzĕ' libí'ili' para guéquili' queĕ' tu' nözi le ruzá' ládxĕ'ĕ Jesucristo queĕru', atĕ' na' a rĕ'ĕni' si' ladxi' ná'ali' tu le rinnĕ dxi'a izá'a. ⁷ Le nácatĕ bití' ca' zoa ia' tú le rinnĕ dxi'a pero ruá' a caní didza' tu' nacu'ĕ bönni' tu'tsĕ'ĕ libí'ili', en tĕ'ĕnĕ' ulu'tsĕ'ĕ le rinnĕ dxi'a queĕ' Cristo. ⁸ Channò zoa nu gun ba nalí que tu le rinnĕ dxi'a le cabí naca tuz ca naca lĕ na' bentu' ba nalí que loli' libí'ili', rinábida'-nĕ' Dios udxíĕ' dö' nu na' run caní. Ral-la' udxíĕ' neda' dö' channò guna' caní, en channò gunĕ' caní tu gubáz queĕ' Dios zĕ'ĕ yehua' yubá, Dios caz udxíĕ' ca' lĕ' dö'. ⁹ Chigunnà caza' caní zí'alò, atĕ' na' a rnníá' caní leyübölö: Channò zoa nu gun ba nalí que tu le rinnĕ dxi'a le cabí naca tuz ca naca lĕ na' chiguzxi' ladxi' ná'ali', rinábida'-nĕ' Dios udxíĕ' dö' nu na'.

¹⁰ ¿Réquitseli' rĕ'ĕnda' cù'uli' neda' yöl-la' zxon cate' ru' a caní didza'? ¡Biti' ca! Ré'ĕnda' urúaja' tshahui' lahuĕ' Dios. ¿Réquili' rĕ'ĕnda' uzaca' baládxĕ'lengaca bönachi neda'? La'tu' rĕ'ĕnda' uzaca' baládxĕ'lengaca bönachi neda', bití' gaca' huen dxin queĕ' Cristo.

Naca böáquie' Pablo bönni' gubáz queĕ' Cristo

¹¹ Ral-la' inözili' lĕ ni, bóchi' zána'do'. Le rinnĕ dxi'a na' runa' ba nalí que bití' gulĕn icja lo ládxĕ'da'ahuiguequi bönachi. ¹² Cuntu nu bönni' budödĕ' lu na'a le rinnĕ dxi'a na', en calĕga nu bönni' busĕdinĕ' neda' le. Jesucristo caz buzĕajni'inĕ' neda' ca naca le rinnĕ dxi'a queĕ'. ¹³ Chibiyón quezili' ca na' ben caza' neda' zí'atĕlò cate' ni' nazí' lu na'a ca tequi le bach Dios bönni' judío. Nözili' ca bena', yenni' gudxia nahua' bönachi queĕ' Dios ta'yija ladxi' Cristo, en gú'unda' usulu usunítia' lĕguequi. ¹⁴ Lu le tequi le bach Dios bönni' judío, guyĕpisĕtĕra' neda' ca lá'tu'biqui' yúgu'tĕ luzá' a bönni' judío yú'ugaquie' iz ca yu'a neda', tu' guzxi'rò ladxi' na' a ca lĕguequi le bulu'dödĕ' xuz xtó'oru' loru' ca tun cazĕ'. ¹⁵ Caní bena' neda', pero tu' náquie' dxi'i'ladxi' Dios, gurò cazĕ' neda' zí'atĕlò ca gulja', atĕ' bulidzĕ' neda' para guna' xichinĕ'. ¹⁶ Ní'irò, cate' gú'uni quezinĕ' Dios, benĕ' ga núnbĕ'a-nĕ' zxi'inĕ', en gusöl-lĕ'ĕ neda' tsójena' libán que le rinnĕ dxi'a ca naca queĕ' Lĕ' lógaca bönachi izá'a. Cate' benĕ' caní, bití' yödilja' nu naca bönachi nu usedi neda'. ¹⁷ Cabí guyija' yödzo Jerusalén para tsóyúa' nupa ni' nácacaga bönni' gubáz queĕ' Cristo zí'alò ca neda', pero guyija' luyú Arabia, atĕ' gudödi ni' böja' yödzo Damasco.

¹⁸ Caní guca, chigudödi tsonna iz cate' ni' guyija' yödzo Jerusalén, yöyúa'-nĕ' Pedro, atĕ' bugá'analena' lĕ' idú ca chidá' gubidza. ¹⁹ Tsanni ni' zoa' ni' bití' ca' bilé'eda' ia'turĕ' bönni' gubáz queĕ' Cristo, pero tuzĕ' Jacobo, bönni' böchĕ'ĕ Xanru' bilé'eda'. ²⁰ Didza' ni ruzúaja' queĕli' lu guichi nácatĕ. Ni'a queĕ' Dios bití' ca' rizí' yĕ'a.

²¹ Gudödi ni' guyija', gudöda' yugu' yödzo luyú Siria, en luyú Cilicia. ²² Yugu' dza ni' bití' núnbĕ'gaquie' neda' bóchi'ru' tu'dubĕ' queĕ' Cristo gapa naca luyú Judea. ²³ Gula'nözisinĕ' lĕ na' gula'guixjò quia' ia'zica'rò bönachi, gula'nná: "Bönni' na' gudxia nahuĕ' rĕ'u zí'alò, runĕ' libán na'a que le reja ládxĕ'ru', lĕ na' gú'unĕ' usulu usunítie'." ²⁴ Caní guca, gula'gu'ĕ yöl-la' ba Dios tu' nözda' neda'.

2

Bönni' gubáz queĕ' Cristo guzxi' lu ná'agaquie' Pablo

¹ Cate' chigudödi chidá' iz, guyĕajlena' Bernabĕ, en budxina' yödzo Jerusalén. Guchĕ'a-bi' Tito, dzágabi' neda'. ² Guyija' ni', en bĕ'lĕna' didza' tsólá'alò bönni' ni' yu'u lu ná'agaquie' dxin queĕ' Cristo, atĕ' gudíxjö'ida' lĕgaquie' ca naca libán runa' que le rinnĕ dxi'a lógaca bönachi izá'a. Caní bena' tu' gú'unda' cabí ugá'ana nítisò dxin na' chibena', enca' dxin ni runa' na'a. ³ Sal-la' nácabí' Tito, bi'i luzá'a, bi'i griego, bití' gulunĕ' bönni' ni ga irugu lu xpĕla'bi' lĕ na' naca bĕ' bönachi queĕ' Dios ca tun cazĕ' bönni' judío. ⁴ Le nácatĕ gula'cuá' bal-la bönachi ni', nupa ni' ta'zĕ' yĕ', ta'ná nácacaga bóchi'ru', atĕ' gulĕ'ĕni ilún ga irugu lu xpĕla'bi' Tito lĕ na' naca bĕ'. Yugu' bönni' ni núnqaquie' tu zxon rĕ'u pero tu'yusĕ' ca runru'

para iléquibe'ené' ca nuláru' lu yöl-la' unná bé' que le rinná bé' xibá queé' Moisés tu' nácaru' tuz naca cubi, pero biti' rufí' ládxa'a ga huóácaru' leyúbölö huen dxin tsaz lu xibá na'. ⁵ Biti' ca' bé' tu' légaquié' lataj. Caní bentu' para gun chí'itu' le nácaté que le rinné dxi'a para gaca uzí'ili' xibé le rinné dxi'a na'.

⁶ Yugu' bönni' ni' réquiru' yu' u lu ná'agaquié' dxin queé' Cristo biti' bi gula'nná be'e neda' le naca cubi, pero biti' rufí' ládxa'a ca ná'agaquié'. Dios biti' ruchi'a rusöröé' rë'u ca tu'chi'a tu'sörö bönnachi rë'u. ⁷ Biti' bi gula'nná be'e neda' tu' guléquibe'ené' Dios nudödë' lu na'a dxin queé', para tsöjena' libán que le rinné dxi'a lógaca bönnachi izá'a, ca na' nudödë' lu në'ë Pedro dxin queé', para gunë' libán que le rinné dxi'a lógaca bönnachi judío. ⁸ Len yöl-la' huáca queé', Dios bené' neda' bönni' gubáz queé' para usédida' bönnachi izá'a, ca na' bené' Pedro bönni' gubáz queé' para usédinë' bönnachi judío.

⁹ Jacobo, en Pedro, en Juan, bönni' ni' réquiru' yu' u lu ná'agaquié' dxin queé' Cristo, guléquibe'ené' Dios nudödë' lu na'a dxin ni. Que lé ni na' guzxi' ladxi' ná'agaquié' neda', enca' Bernabé, ate' bentu' tuz didza' tsöjentu' xichinë' Dios lógaca bönnachi izá'a neda', en Bernabé, ate' légaquié' ilunë' xichinë' Dios lógaca bönnachi judío. ¹⁰ Gulá'ta'yusé' lotu' tsönetu' gácalentu' bönnachi yechi', ate' lé ni naca tu le rufí'tica'sö ládxa'a runa'.

Ca guca cate' Pablo gudíl-lalenë' Pedro lu yödzo Antiqua

¹¹ Cate' bidxinë' Pedro lu yödzo Antioquia, gudíl-lalena' lë' didza' tu' lë cazë' guchixinë' ca benë'. ¹² Caní guca tu' zí'atëlö gudágulenë' tsözxön yugu' bönnachi izá'a ni'. Benë' caní ga bila'dxinrë' bal-la bönni' dá'gaquié' Jacobo. Ní'irö gusi lahuë' rubí'guië', en bítirö gudágulenë' tsözxön bönnachi izá'a na' tu' gúdxinë' bi ilunë' bönni' na' nazí' lu ná'agaquié' ilunë' ga irugu lu xpéla'gaca bönnachi izá'a ca rinná bé' xibá queé' Moisés. ¹³ Ní'irö ia zí'ca rë' bönni' judío ni' ta'yija ládxe'ë Cristo gulunë' tu' zxön Pedro ca runë' lu yöl-la' radxi queé', ate' caní guca ga bidxintë' gulunë' ga gúdxinë' ca' Bernabé, ate' lë' benë' tu' zxön légaquié'. ¹⁴ Cate' bilé'eda' biti' tunë' ca naca le nácaté le rusedi rë'u le rinné dxi'a, gudxa'-në' Pedro lógaca yúgu'të nupa ni' nudúbigaca queé' Cristo, gunniá: "Li' nacu' bönni' judío, pero runu' li' ca túngaca bönnachi izá'a, en caléga ca tunë' bönni' judío. ¿Bizx queé' rë'ënu' gunu' ga ilúngaca bönnachi izá'a ca tunë' bönni' judío?"

Nulágaca bönnachi judío ca na' nulágaca ca' bönnachi izá'a

¹⁵ Gudxa' ca' Pedro: "Rë'u ni nácaru' bönni' judío tu' ná'agaquié' xuz xiná'aru' judío, en caléga bönnachi izá'a, nupa cabí núnbë'gaca Dios. ¹⁶ Nöz queziru' cuntu nu huóaca tsahui' lahuë' Dios tu' run nu na' tsca rinná bé' xibá queé' Moisés, pero huóaca tsahui' tuzi nu na' reja ladxi' Jesucristo. Lës caní ca' rë'u reja ládxi'ru' Jesucristo para huóácaru' tsahui' lahuë' Dios, en caléga tu' runru' tsca rinná bé' xibá queé' Moisés. Cuntu caz nu huóaca tsahui' lahuë' Dios tu' run tsca rinná bé' xibá queé' Moisés.

¹⁷ Na'a, réquiru' nahuóácaru' tsahui' tu' reja ládxi'ru' Cristo, pero channö naca bé' nácaru' bönni' dul-la' ca ná'agaca bönnachi izá'a, ¿innátsaru' runë' Cristo ga runru' dul-la'? ¿Biti' caz! ¹⁸ Channö rufí' ládxa'a uchisa' le chibuquinja', lë ni naca bé' riguitsja' xibá le gunná bé'ë Dios. ¹⁹ Tu' cabí guca uzó'a didza' xibá na' gunná bé'ë Moisés, guca quia' tsca chinátia'. Tu' caní naca, nulá' na' lu xibá na' para soa' ibana', en guna' ca rë'ënë' Dios. ²⁰ Naca quia' ca chigútilena' tsözxön Cristo lë'e yaga cruz ga na' gútië' Lë'. Que lé ni na' caléga neda' ni zoa' nabana', pero Cristo zoë' nabanë' lu icja ládxi'da'ahua'. Tsca naca zoa' nabana' na'a, naca tu' reja ládxa'a Lë' xzí'inë' Dios, Bönni' na' bidxí'inë' neda', en budödi cuinë' lu yöl-la' guti uláz quia' neda'. ²¹ Biti' rë'ënda' uzó'a tsólá'alö le ruzá' ládxe'ë queé'ru' Dios. Channö huáca huóáquié' tsahui' tu' bönni' lahuë' Dios tu' runë' tsca rinná bé' xibá queé' Moisés, ní'irö nítisö gútië' Cristo."

3

Le rinná bé' xibá queé' Moisés, en le reja ládxi'ru' Cristo

¹ Libí'ili', tu' canöz, libí'ili', bönni' Galacia. ¿Nuzxi' gulú'utsö libí'ili' nëbi para cabirö uzóali' didza' le nácaté? Gate ga rë' bulul'itu' libí'ili' le sa'yéaj ca gútië' Jesucristo lë'e yaga cruz. ² Gudí'xjöri' neda' lë ni. ¿Bidisóalënë' libí'ili' Dios Bö' lá'ayi tu' benli' ca rinná bé' xibá queé' Moisés o tu' guyija ládxi'li' le rinné dxi'a biyönili'? ³ ¿Nacxi' guca nácali' tu' canöz caní? Gusi loli' nácali' bönnachi queé' Dios tu' zóalënë' libí'ili' Dios Bö' lá'ayi. ¿Réquitseli' huáca udxi'gunli' ga gué'quili' queé' Dios rácasö queéli'? ⁴ ¿Guca nítisö guca queéli' yúgu'të lë na' guzxacá' gudí'ili'? ¿Biti' ca' guca caní! ⁵ Cate' Dios risöl-lë'ë queéli' Dios Bö' lá'ayi, en ru'ë libí'ili' lataj gunli' yugu' yöl-la' huáca que yehua' yubá, ¿runë' caní tu' runli' ca rinná bé' xibá queé' Moisés o tu' reja ládxi'li' le rinné dxi'a na' biyönili'?

⁶ Lu guichi lá'ayi rna: Abraham guyija ládxe'ë Dios, ate' Dios gunné' náquië' bönni' tsahui' tu' guyija ládxe'ë Lë'. ⁷ Que lé ni na' ral-la' inözili', nupa na' ta'yija ladxi' Dios ná'agaca idú xzí'ini xi'sóë' Abraham. ⁸ Lu guichi lá'ayi rufí' didza' zí'atëlö ca gunë' Dios, innë'

nácagaquië' tsahui' bönni' izá'a ila'yija ládxi'ë Lë'. Que lë ni na' Dios gudíxjoi'inë' Abraham zí'atëlö ca naca le rinnë dxi'a, gunnë: "Lu në'ë Zxi'ini xi'sú' guna' ga gaca dxi'a quegaca bönnachi idutë yödžöliö." ⁹ Caní naca, Abraham guiyija ládxi'ë Dios, atë' Dios benë' ga guca dxi'a queë'. Lës caní ca' na'a, Dios runë' ga raca dxi'a quegaca yúgu'të nupa ta'yija ladxí' Lë'.

¹⁰ Nupa na' tu'zxöni ladxí' ulu'huóaca tsahui' tu' túngaca ca rinná bë' xibá queë' Moisés, nabága'gaca xíguia'. Caní naca tu' nazúaj lu guichi lá'ayi, le rnna: "Yúgu'të nupa na' cabí túngaca idutë ca rinná bë' xibá na' nabága'gaca xíguia'." ¹¹ Na'a, naca bë' cuntú nu huóaca tsahui' lahuë' Dios tu' run nu na' le rinná bë' xibá na', tu' zoa lu guichi lá'ayi le rnna: "Nu na' nuhuóaca tsahui' lahuë' Dios soa ibán tu' reja ladxí' Lë'." ¹² Ca na' nuhuóaca tsahui' lahuë' Dios nu na' reja ladxí' Cristo nadzá' ca naca que nu na' ruzxöni ladxí' nuhuóaca tsahui' tu' run ca rinná bë' xibá queë' Moisés. Zoa lu guichi lá'ayi le rnna: "Nu na' run idutë ca rinná bë' xibá na' soa ibán tu' run caní."

¹³ Cristo busölë' rë'u lu le richugu queëru' le rinná bë' xibá na' tu' bë'ë latja nu guchugu queë' uláz queëru'. Caní naca tu' zoa lu guichi lá'ayi le rnna: "Narugu quegaca yúgu'të nupa na' dá'gaca lë'e yaga." ¹⁴ Caní guca queë' Cristo para gaca gunë' Dios ca na' guzxi' lu në'ë queë' Abraham, gunë' ga gaca dxi'a quegaca bönnachi izá'a lu në'ë Jesucristo, en para gaca gunë' ga idisóalenë' Dios Bõ' lá'ayi rë'u channö uyija ládxi'ru' Lë', ca na' guzxi' lu në'ë Dios gunë'.

Le rinná bë' xibá queë' Moisés, en le guzxi' lu në'ë Dios gunë' queëru'

¹⁵ Na'a, böchi' zána'do', uzúaja' queéli' tu le rucudzu' didza', tu le raca queëru'. Cate' chopá bönni' chigulunë' tuz xtídza'gaquië', en chigulunë' tsutsu didza' na', cuntú nu gaca utsá' didza' na', en cabí gaca nu bi udá' lë'e didza' na'. ¹⁶ Dios guzxi' lu në'ë bi gunë' queë' Abraham, en que zxi'ini xi'sóé'. Ga zoa lu guichi lë ni, bití' rnna: "Quegaca zxi'ini xi'sú'", le ruí' didza' que zían bönnachi, pero rnna: "Que zxi'ini xi'sú'." Lë ni ruí' didza' que tuz bönni', Lë' Cristo. ¹⁷ Lë ni na' le rë'ënda' innía': Dios benë' tuz didza' len Abraham, en guzxi' lu në'ë gunë' ca na' gunnë'. Le nazúaj lu xibá queë' Dios, le benë' Dios tapa gayuá' yu' chi-uruá' iz gudödi ni' cate' gudxë' caní Abraham, bití' gaca ugúa lë na' guzxi' lu në'ë Dios gunë', en cabí gaca usulu le. ¹⁸ Na'a, channö ral-la' gunru' ca rinná bë' xibá na' para sí'iru' le guzxi' lu në'ë Dios gunsë', bití'rö naca tu le guzxi' lu ná'asë' gunë'. Dios runsë' caní tu' caní guzxi' lu në'ë bi gunë' queë' Abraham.

¹⁹ Channö caní naca, ¿bixx queë' gunná bë'ë Dios xibá na' nazúajgaca lu didza' queë'? Dios gunná bë'ë caní para gaca bë' xíguia' nabága'ru', pero gúcasö caní ga bidxintë dza na' bilá' lahuë' zxi'ini xi'sóé' Abraham na', Bönni' na' guzxi' lu në'ë Dios gunë' queë' lë na'. Yugu' le gunná bë'ë Dios lu xibá queë', gusól-lë'ë yödžöliö ni lu ná'agaquië' gubáz lá'ayi queë', atë' Moisés budödë' didza' ca nácagaca xibá na'. ²⁰ Bití' naquín nu udödi didza' cate' naca tuz nu run tuz didza', atë' Dios, tuz náquië'.

Bixx queë' gunná bë'ë Dios le zóagaca lu xibá queë'

²¹ Le nazúajgaca lu xibá queë' Dios, ¿ta'dá'gaca lë na' guzxi' lu në'ë Dios gunë'? ¿Bití' ca'! La'tu' gunná bë'ë Dios tu xibá le gaca gun ga sóaru' ibanru' tsaz, ní'rö huáca huóacaru' tsahui' lahuë' Dios channö gunru' ca na' rinná bë' xibá na'. ²² Tsca naca lë na' nazúaj lu guichi lá'ayi, yúgu'tëru' nabága'ru' dul-la'. Caní naca para gaca sí'iru' lë na' guzxi' lu në'ë Dios gata' queëru' cate' tseja ládxi'ru' Jesucristo.

²³ Zí'atëlö ga bidxín dza gaca tseja ládxi'ru' Cristo, le rnna xibá na' gunná be'e rë'u, ca na' zoa le rinná be'e tu bönni' yu'ë lidxi guíë. Caní guca ga bidxintë dza bilá' lahuí gaca huóacaru' tsahui' channö uyija ládxi'ru' Lë'. ²⁴ Caní naca, le nazúaj lu xibá queë' Dios gunná be'e rë'u, lë na' busedi rë'u ca tu bönni' usedi ga bidxintë dza bilá' lahuë' Jesucristo, para gaca huóacaru' tsahui' lahuë' Dios channö uyija ládxi'ru' Lë'. ²⁵ Na'a, tu' bidxín dza gaca huóacaru' tsahui' channö uyija ládxi'ru' Cristo, bití'rö inná be'e rë'u lë na' busedi rë'u.

²⁶ Yúgu'tëli' nácali' bi'í queë' cazë' Dios tu reja ládxi'li'-në' Jesucristo, en chinácali' tuz len Lë'. ²⁷ Yúgu'të nupa nadílagaca nisa para huóacagaca tuz len Jesucristo, nuhuóacagaca ca náquië' Lë' cazë'. ²⁸ Bití'rö narúaj choplö bönni' judío, en bönni' izá'a, en cabí narúaj choplö bönni' náquië' tsaz huen dxin, en bönni' nazán, en cabí narúaj choplö bönni', en nigula, tu' cate' böácali' tuz len Jesucristo, yúgu'tëli' böácali' ca' tuz len luzá'ali' tuli' ia'tuli'. ²⁹ Na'a, channö néquili' queë' Cristo, nácali' ca' zxi'ini xi'sóé' Abraham, atë' nazí'ili' lë na' guzxi' lu në'ë Dios gunnë' queë' Abraham.

4

¹ Lë ni le rë'ënda' innía': Tsanni ni ribözabi' tu bi'í bönni'do' sí'ibi' bi ral-la' gunnë' xúzibi' queëbi', ni' nácabí' bí'ido', en bití' nayëpisëtërobí' ca raca que tu nu naca tsaz huen dxin, sal-la' le nácatë nequi queëbi' yúgu'të. ² Tsanni ni' nácabí' bí'ido', nacua' nupa tun chí' lëbi', en tu'gún dxin le nequi queëbi' ga idxintë dza chinuzóë' xúzibi' queëbi'. ³ Lës caní raca

ca' queëru'. Tsanni ni' gúcaru' ca bí'ido, gunná be'e xibá na' rë'u ca raca quegaca bönachi yödžolió ni. ⁴ Cate' bizá'a dza, Dios gusól-lë'ë xzí'ini cazë' ni. Gúquië' xzí'ininu tu nigula ca nácaru' rë'u, en gunná be'e le zoa lu xibá quegaca bönni' judío Lë'. ⁵ Caní guca queë' para guca busólë' nupa na' rinná be'e le zoa lu xibá léguequi, para gaca huóácaru' bi'i queë' Dios.

⁶ Para gaca bë' chinácali' bi'i queë' cazë', Dios guchizë' Dios Bö' lá'ayi ládxí'do'oli', ate' Lë' cazë' rulidžë' Dios uláz queëli', rnnë': "Xuza'." ⁷ Caní naca, chinácali' bi'i queë' Dios, en bití'rö nácali' ca yugu' bönni' tsaz nácaqaquië' huen dxin. Na'a, tu' nácali' bi'i queë' cazë' Dios, Lë' cazë' nazí' ladxi' në'ë guequi queëli' le nequi queë' tu' nácali' tuz len Cristo.

Pablo ru'í ládxë'ë bönni' Galacia ta'yija ládxë'ë Cristo

⁸ Cate' ni' bití' núnbë'ëli'-në' Dios, gúcali' ca yugu' bönni', tsaz nácaqaquië' huen dxin, en benli' dxin quegaca budó' néquini. Bití' ca' nácaqaca budó' na' Dios. ⁹ Na'a, tu' núnbë'ëli'-në' Dios, o huáca innaru': Tu' núnbë'ë Dios libí'ili', ¿bizx queë' rë'ëni' ubí'ili' yugu' lu xibá cané na' cabí nu uzí' xibé? ¿Rë'ëni' huóácali' huen dxin tsaz, en gunli' ca rinná bë' xibá na'? ¹⁰ Rápali' tu ia'tú dza, enca' tu ia'tú beo', enca' tu ia'tú cusu na, en tu ia'tú iz. ¹¹ Rádxida' bi' gaca queëli'. ¿Naru' nuhuóaca nítisö dxin bena' para gúnbë'ëli' le nácatë? ¹² Ráta'yuá' loli', böchi' zána'do', gácali' ca naca' neda', nulá' na'a lu na' xibá benë' Moisés. Caní ral-la' gácali' tu' böáca' neda' ca gúcali' libí'ili'. Bití' bi' le cabí naca dxi'a benli' quia' neda'.

¹³ Chinöz quezili' bizx queë' na' gusí lahua' runa' libán loli' que le rinnë' dxi'a. Bena' libán ni' tu' gú'ida'. ¹⁴ Bití' bucá'anali' neda' cané, en cabí buzóali' neda' tsólá'aló sal-la' bigútili' ca guca yödžohuë' quia' na'. Benli' neda' bal, tuz ca gunli' bal tu gubáz lá'ayi queë' Dios, o ca runli' bal Jesucristo caz. ¹⁵ Budžéjalë'ëli' dza ni'. ¿Bizxi guca queëli' tu' cabirö raca caní? Lë' ni gaca inniá' ca guca queëli': La'tu' huáca gunli', bubéajli' guiöj lo quezili', le gúnnali' quia'. ¹⁶ Na'a, ¿rëquili' nuhuóáca' tu nu riléde'e libí'ili' tu' gudxa' libí'ili' le nácatë?

¹⁷ Bönni' ni' tu'tsë'ë bí'ili' tu'í ládxë'ë libí'ili', pero calëga para gaca dxi'a queëli'. Të'ënë' ilunë' ga ucá'anali' netu' para gú'í ládxí'li' légaquië'. ¹⁸ Na'a, naca dxi'a zoa nu ru'í'ladxi' libí'ili', pero tuz channö naca para gaca dxi'a queëli'. Caní ru'ítica'só ládxa'a libí'ili', en calëgasö cate' ni' zóalena' libí'ili'. ¹⁹ Libí'ili', xzí'ina'do'. Ca na' raca queënu nigula chizóa sóabi' bí'ido' queënu, riguí' rizáca' nu, lës caní riguí' rizáca' neda' ni'a queëli' leyúbölö ga idxinrö dza gácali' idú ca náquië' Cristo. ²⁰ Nácaru' la' zóalena' libí'ili' na'a para gaca gú'í'lena' libí'ili' didza' nadzá'aló, tu' ruúbi' ruguí'ilé'da' ni'a queëli'.

Le rucudzu' didza' ca guca quegacanu Agar en Sara

²¹ Na'a, libí'ili', nuli' rë'ëni' uzóa cuinli' lu xibá queë' Moisés, guli'ná'tsóca' didza' ni gu'a. ¿Catu caz buzë' nágali' le rnna xibá na'? ²² Rnna xibá na' caní: gula'cuá'abi' chópabi' bi'i bönni'do' queë' Abraham. Tubi' gúcabí' xzí'ininu tu nigula tsaz nácanu huen dxin, ate' ia'tubi' gúcabí' xzí'ininu nigula nazannu. ²³ Xzí'ininu nigula huen dxin na' gúlajbi' lu ni'a lu na' tu bönni' tsa táaljbi' yúgu'të bí'ido', pero xzí'ininu nigula nazannu na' gúlajbi' tu' guzxi' lu në'ë Dios gunë' ga gálajbi'. ²⁴ Lë' ni naca ca tu le rucudzu' didza'. Ca guca quegacanu chópanu nigula ni sa'yéaj ca naca chopa didza' Dios benlenë' bönachi. Tu didza' na' naca le buzóë' Dios lu gu'a Sinaí, le sa'yéaj lë na' guca queënu Agar. Nupa na' rinná be'e xibá na' léguequi, nácaqaca ca xzí'ininu Agar, en nácaqaca ca huen dxin tsaz lu xibá na'. ²⁵ Le gúcanu Agar na' sa'yéaj ca' ca naca gu'a Sinaí na' le zoa luyú Arabia, en sa'yéaj ca' ca naca yödžö Jerusalén na'a dza, tu' naca yödžö na' ca tu bönni' tsaz náquië' huen dxin tsözxön len nupa nacua' lu yödžö na'. ²⁶ Jerusalén na' zoa yehua' yubá nazán, ate' rë'u ni nácaru' bönachi uládz que yödžö ni'. ²⁷ Nazúaj lu guichi lá'ayi le rnna:

Budzeja, nigula huódx, cabí nacua' xzí'inu'.

Lu yöl-la' rudzeja quiu' guródxí'a,

sal-la' catu caz guca quiu' le riguí' rizáca'nu nigula chizóa sóabi' bí'ido' queënu.

Budzeja tu' sal-la' nusán në'eguequi bönachi li',

gunë' Dios ga ila'yántërö xzí'inu'

ca bi'i queënu nigula zóalennu bönni' queënu.

²⁸ Libí'ili', böchi' zána'do', rë'u ni nácaru' ca gúcabí' Isaac, xzí'inë' Abraham. Nácaru' ca yugu' xzí'ini xi'sóë' Abraham, guzxi' lu në'ë Dios gata' queë'. ²⁹ Dza ni', bi'i na' gúlajbi' ca táaljbi' yúgu'të bí'ido', gudxia ná'abi' bi'i na' gúlajbi' tu' nōzi yöl-la' huáca queë' Dios Bö' lá'ayi. Lës caní raca ca' queëru' na'a, ta' bía no bönachi yödžolió ni rë'u. ³⁰ ¿Bizxi rnna le zoa lu guichi lá'ayi? Caní rnna: "Gurú una-nu nigula na' tsaz nácanu huen dxin tsözxön len xzí'ininu, tu' bití' gaca xzí'ininu nigula na' sí'ibi' tsözxön xzí'ininu nigula nazannu le guzxi' lu në'ë Dios guequi queëbi' xzí'ininu nigula nazannu na'." ³¹ Caní naca, böchi' zána'do'. Bití' nácaru' ca nácabí' xzí'ininu nigula na', tsaz gúcanu huen dxin, pero nácaru' ca xzí'ininu nigula nazannu na'.

5

Gulí'gún chí'i cuinli', ugá'anali' lu yöl-la' nazán

¹ Chinazanru' tu' busanë' Cristo rë'u. Gulí'sóa tsutsu channö, ugá'anali' lu yöl-la' nazán na'. Biti' uzóa cuinli' leyübölö lu xibá queë' Moisés para cabí gácali' ca tu bönni', tsaz náquië' huen dxin.

² Bulí'zë nágalí' neda'. Neda', Pablo, rea' libí'ili', channö ruí'ili' lataj nu ichugu lu xpéla'li' ca rinná bë' xibá na', bití' ca' uzí'ili' xibé le benë' Cristo. ³ Leyübölö rë'ënda' guía' nútí'tës bönni' ru'ë lataj nu ichugu lu xpélë'ë caní, run bayudxi gunë' idutë ca le rinná bë' xibá queë' Moisés. ⁴ Nulí' réquili' huóacali' tsahui' lahuë' Dios tu' runli' ca rinná bë' xibá na', chibulá'alenli'-në' Cristo. Chibusán ná'ali' le ruzá' ládxë'ë Dios queëru'. ⁵ Rë'u ni ruzxöni ládxí'ru' huóacaru' tsahui' lahuë' Dios ni'a que yöl-la' huáca queë' Dios Bö' lá'ayi tu' reja ládxí'ru' Cristo. ⁶ Channö nácaru' tuz len Jesucristo, bití' bi run channö narugu lu xpéla'ru' ca rinná bë' xibá na' o channö cabí narugu caní lu xpéla'ru'. Le run bayudxi naca tseja ládxí'ru' Cristo, le run ga idxí'iru' luzá'aru'.

⁷ Dxi'ado' guca ca gusí loli' runli' dza ni'. ⁸ Nuzxi ben ga bucá'anali' le nácatë? ⁸ Biti' benë' Dios, Bönni' rulidzë' libí'ili', ga benli' caní. ⁹ Biti' gal-la' ládxí'li' lë na' rnna: "Látí'sö cúa zi que yöta xtila ruhuóázx idutë cúa ga nayú'u cúa zi na'." ¹⁰ Tu' nácaru' tuz len Xanru', runa'löza ca naca queëli', sa' ládxí'li' tuz ca rizá' ládxa' neda', ate' Dios gun zi'ë bönni' na' rutsë'ë libí'ili', nútí'tës nu naca bönni' na'.

¹¹ Ca naca quia' neda', böchi' zána'do', nacuá' nupa ta'nná rusédida' bönachi ral-la' irugu lu xpéla'guequi ca rinná bë' xibá queë' Moisés. Channö runa' caní, ¹² bizx queë ta'bía nahuë' bönni' judío neda'? La'tu' rusédida' caní, cuntú nu ilé neda' tu' runa' libán ca gútië' Cristo lë'e yaga cruz. ¹² Ca naca que nupa ni' tu'tsá' libí'ili', té'ëni irugu lu xpéla'li' lë na', nácoru la' ila'chugu tsaz cúnguequi.

¹³ Ca naca queëli', böchi' zána'do', Dios bulidzë' libí'ili' para gácali' bönachi nazángaca. Biti' ugunli' dxin yöl-la' nazán na' para gunli' ca rizësö ládxí'li', pero para gunli' dxin que luzá'ali', tuli' ia'tuli', tu' nadxí'ili' luzá'ali'. ¹⁴ Yúgu'të le rinná bë' xibá queë' Dios rusudxín nu na' run ca rinná bë' xibá na' rnna: "Ral-la' idxí'inu' luzó'o ca nadxí'i cuinu'." ¹⁵ Channö rizi' quídza'li' luzá'ali' tuli' ia'tuli', runli' ca tunba' böa' guí'a sínia', táguya'aba', en táguba' luzá'aba'. Bulí'yú tsate' usulu usunitíli' luzá'ali' tuli' ia'tuli'.

Le runru' lu yöl-la' bönáchisö queëru', en le runru' len yöl-la' huáca queë' Dios Bö' lá'ayi

¹⁶ Lë ni na' rea' libí'ili': Gulí'gúí' latja inná bé'enë' libí'ili' Dios Bö' lá'ayi, ate' ní'irö bití'rö gunli' ca rizësö ládxí'li' lu yöl-la' bönáchisö queëli'. ¹⁷ Yugu' le rizë ládxí'ru gunru' lu yöl-la' bönáchisö queëru' bití' röjlöz le rë'ënë' Dios Bö' lá'ayi gunru', ate' lë na' rë'ënë' Dios Bö' lá'ayi bití' röjlöz le rë'ëniru' gunru' lu yöl-la' bönáchisö queëru'. Chopa ni, bití' röjlözgaca, en que lë ni na' bití' gaca gunli' ca rë'ëni quezili'. ¹⁸ Channö ruí'ili' lataj inná bé'enë' Dios Bö' lá'ayi libí'ili', bití'rö inná be'e xibá queë' Moisés libí'ili'.

¹⁹ Naca bë' le tun bönachi lu yöl-la' bönáchisö queëguequi.

Tun dul-la' le riguitsaj xibá que yöl-la' nutsaga na', enca' dul-la' le lë'e.

Tun yugu' le naxihui', en yugu' le catsahui'.

²⁰ Téquiguequi le bach budó' néquiniguequi.

Tun yöl-la' gudzá'.

Tu'dí'i luzë'eguequi, en ta'díl-lalen léguequi.

Tu'zxë'e luzë'eguequi, en ta'lé nupa na', en tu'huídi'.

Ta'ruaj choplö, en tu'béaj tsölá'alö nupa dá'gaca léguequi.

²¹ Ta'zë ladxí' le dë que luzë'eguequi, en ta'guilaj xíguia'.

Ta'zudxi, en tagu lë'e.

Tu'dödi bë' ca túnguequi.

Le zían le caní túnguequi. Neda' ruxósa' ládxí'li' na'a para cabí gunli' caní ca na' buxósa' ládxí'li' zí'alö, rnnía': Nupa túngaca caní bití' ca' ila'deli' ila'yú'u ga na' rinná bë'ë Dios.

²² Channö zóalen Dios Bö' lá'ayi rë'u runru' caní:

Nadxí'iru' luzá'aru'.

Rudzeja ládxí'ru'.

Zoa dxi ládxí'do'oru'.

Ribózaru' zxön ladxí'.

Ruí'í ladxí'ru' luzá'aru'.

Nácaru' dxi'í ladxí'.

Rusudxinru' xtídza'ru'.

²³ Nácaru' nöxaj ladxí'.

Rinná be'e cuinru'.

Biti' ca' gunná bë'ë Moisés rë'u para cabí gunru' yugu' le caní. ²⁴Nupa néquiquequi queë' Cristo bití'rô tun ca tē'ëni quez, en cabí tun le ta'zësô ladxí' lu yôl-la' bônáchisô quéguequi. ²⁵Dios Bô' lá'ayi runnë' yôl-la' na'bán queëru'. Lë' cazë' ral-la' inná bé'enë' rë'u ca naca yúgu'të le runru'.

²⁶Biti' ral-la' gun ba zxon cuinru', en cabí utsá'aru' luzá'aru', en cabí uzzé'ëru' luzá'aru' turu' ia'turu'.

6

Ral-la' gácalenru' luzá'aru' turu' ia'turu'

¹Na'a, böchi' zána'do', channö ilé'eli' runë' dul-la' tu bönni' böchi'li', nuli' zóalenë' Dios Bô' lá'ayi libí'ili', ral-la' gunli' ga ubí'i lădxë'ë bönni' na', pero run bayudxi gunli' caní lu yôl-la' nôxaj ladxí' queëli', en uyú cuinli' tsate' cu'u tu' xihui' libí'ili' nôza dul-la'. ²Gulí'gácalen luzá'ali' tuli' ia'tuli' tsca naca yuá' nabága'li'. Channö gunli' caní uzóali' didza' le gunná bé'enë' Cristo rë'u.

³Channö zoa nu réqui chinadeli' yôl-la' nayëpisë, en bití' bi nadelí' nu na', nu ni na' rizí' ye'e la' cuinsi'. ⁴Tuhuéaj tuhuéajë' bönni' ral-la' uchi'a usöröë' que le runë'. Ní'irö channö urúajë' dxi'a, huáca gun ba zxon cuinë' ni'a que le chinunë', en bití' gun bayudxi uyúë' ca núngaca ia'zica'rô bönachi channö ba benrë' dxi'a o cabí. ⁵Tuhuéaj tuhuéajë' bönni' ral-la' gu'ë le nusubáguë'ë Dios lë'.

⁶Channö zoa nu rusedi libí'ili' ca naca le rinnë dxi'a, ral-la' unödzejali' nu na' rusedi libí'ili' lati' que yúgu'të le do' dë queëli'.

⁷Biti' si' ye'e cuinli' tu' cuntú nu gaca si' ye'e Dios. Ulápali' tsca naca le rázali'. ⁸Channö le rázali' naca yugu' le runli' ca rizësô lădxí'li' lu yôl-la' bônáchisô queëli', le ulápali' gaca yôl-la' guti'. Channö le rázali' naca yugu' le runli' ca raza lădxë'ë Dios Bô' Lá'ayi, ulápali' le gunnë' Dios Bô' lá'ayi queëli', le naca yôl-la' na'bán idú. ⁹Caní naca, bití' ral-la' huôa lădxí'ru' gunru' le naca dxi'a, tu' channö cabí huôa lădxí'ru', idxín dza uláparu'. ¹⁰Que lë ni na', bátati'tës gata' queëru' lataj, ral-la' gunru' le naca dxi'a quégaca yúgu'të bönachi, en le naca lo, ral-la' gunru' caní quégaca böchi' zanru' ta'yija lădxí' Cristo.

Le buzúajë' Pablo lu guichi ga ruúdx

¹¹Buli'yú cate' bach didza' ni ruzúaja' lu guichi len na' cuina'. ¹²Nupa na' tē'ëni ilún ga irugu lu xpéla'li' ca rinná bë' xibá queë' Moisés, túngaca caní para ulu'rúaj dxi'a lógaca bönachi, en cabí bi ilún quéguequi tu' túngaca libán ca gutië' Cristo lë'e yaga cruz. ¹³Yugu' bönni' na' ta'zi' lu ná'agaquië' le narugu lu xpéla'gaquië' ca rinná bë' xibá queë' Moisés, bití' tu'zôë' didza' idutë ca rnna xibá na'. Tē'ënë' ilunë' ga irugu lu xpéla'li' para gaca ilún ba zxon cúngaquië' tu' ta'nná bé'enë' libí'ili' para irugu lu xpéla'li' caní. ¹⁴Ca naca quia' neda', cú'usa' yôl-la' ba le benë' Xanru' Jesucristo cate' gutië' lë'e yaga cruz. Tu' nôzi le benë' Cristo lë'e yaga cruz, yugu' le dë yödžölió ni naca quia' ca tu le chinati, bití' ruí'i lădxá'a le, ate' neda' naca' quégaca bönachi yödžölió ni ca tu bönni' nati, bití' tuí'i lădxí' neda'. ¹⁵Channö nácaru' tuz len Jesucristo, bití' bi run channö narugu lu xpéla'ru' ca rinná bë' xibá na' o channö cabí narugu lu xpéla'ru' caní. Le run bayudxi naca gácaru' bönachi cubi niu' lë'e lădxí'do'oru'. ¹⁶Yúgu'të bönni' na' tunë' ca rinná bë' xibá runa' ni, en yúgu'të bönni' na' néquiquequinë' queë' Dios, rinábida-në' Dios gunë' ga soa dxi lădxí'do'gaquië', en huéchi' lădxë'ë légaquië'.

¹⁷Na'a zë lo, cuntú nu bönni' ral-la' utsë'ë neda', tu' náca gaca bë' butsóa zóagaca lu xpéla'a naca' huen dxin queë' Xanru' Jesús.

¹⁸Na'a, böchi' zána'do', rinábida-në' Xanru' Jesucristo uzá' lădxë'ë queëli' yúgu'tëli'. Ca' caz.

DIDZA ' GUSÖL-LĒ'Ē PABLO YÖDZÖ ÉFESO

Pablo rugapë' Dios bönachi queë' Cristo nacua' Éfeso

¹ Neda', Pablo, naca' gubáz nasöl-lë'ë Jesucristo tu' gú'uni quezinë' Dios gaca' caní. Rugapa' Dios libí'ili', zóali' Éfeso. Néquili' quez queë' Dios, en réajlë'ëli' Jesucristo. ² Rinábida-në' Xúziru' Dios, enca' Xanru' Jesucristo uzá' ládxë'ë queéli', en gunë' ga soa dxi icja ládxí'do'oli'.

Le naca queë' Dios Bō' Lá'ayi rata' queëru'

³ ¡Ral-la' cú'uru'-në' yöl-la' ba Dios, Xuzë' Xanru' Jesucristo! Tu' nácaru' tuz len Cristo, Dios chibuzá' ládxë'ë queëru' yúgu'të le naca dxi'a que yehua' yubá, le runë' Dios Bō' Lá'ayi ga rata' queëru'. ⁴ Zí'atëlō ca benë' Dios yōdzōliō ni, gurō cazë' rë'u para guequiru' quez queë' tsōzxōn len Cristo, en gácaru' bönachi lá'ayi queë', en gácaru' idú dxi'a lahuë' Lë'. ⁵ Dios bucözë' zí'atëlō si' lu në'ë rë'u ca zxi'ini cazë' tsōzxōn len Jesucristo, tu' guyaza ládxë'ë gaca caní, en tu' naca le gú'uni quezinë' gunë'. ⁶ ¡Ral-la' cú'utica'siru'-në' Dios yöl-la' ba ni'a que le buzá' ládxë'ë queëru', yugu' le bénnasë' queëru' tu' nácaru' tuz len Xzí'inë', Nu na' nadxí'inë'! ⁷ ¡Cristo böá'uë' rë'u cate' ni' gú'tië' uláz queëru' para gaca uniti lahuë' Dios rë'u ca naca dul-la' nabága'ru'! ¡Zxōntërō naca le buzá' ládxë'ë Dios queëru', ⁸ lë na' rúnnaðë'ë Lë' queëru'! ¡Lu yöl-la' rácada' queë', en lu yöl-la' réajni' queë' ⁹ benë' Dios le bucözë' queëru', ate' buluf'inë' rë'u lë na' bigachi', le buzóa cazë' zí'atëlō usudxinë' lu në'ë Cristo! ¹⁰ Lë na' buzóa cazë' Dios usudxinë' cate' izá'a dza, naca gunë' ga ilaca tuz, en ila'cuá' lu në'ë Cristo yúgu'të le dë, le nacua' yehua' yubá, en le nacua' yōdzōliō ni.

¹¹ Tu' nácaru' tuz len Cristo, Dios gurō cazë' rë'u zí'atëlō para guequi queëru' le nequi queë' Xúziru' Dios, lë na' bucözë' queëru' ca naca le gú'uni quezinë' Dios, Nu run yúgu'të ca rë'ëni quezinë' Lë'. ¹² Caní benë' Dios para cú'uru'-në' yöl-la' ba ca naca yöl-la' zxōn queë', rë'u ni ruzxōni ládxí'ru'-në' Cristo zí'atëlō ca ia'zica'rō bönachi. ¹³ Lësca' caní guca queéli'. Cate' biyōnili' didza' idútë li, didza' dxi'a ca gaca uláru', guyéajlë'ëli' Cristo, ate' Dios buzóë' queéli' le naca bë' nácali' queë', tu' guchízië' icja ládxí'do'oli' para gaca inözili' ca naca le runru' lu në'ë Dios isöl-lë'ë queëru'. ¹⁴ Tu' zóalenë' Dios Bō' Lá'ayi rë'u, naca löza guequi queëru' le nequi queë' Xúziru' Dios cate' údxi huóá'uë' rë'u, rë'u na' chinéquiru' queë'. Caní naca para gaca yöl-la' ba que yöl-la' zxōn queë'.

Pablo rinábinë' Dios gunnë' queëru' yöl-la' réajni'

¹⁵ Que lë ni na', cate' biyōnda' ca réajlë'ëli'-në' Xanru' Jesús, en ca nadxí'ili' yúgu'të bönachi queë' Dios, ga ridxintë na' a dza ¹⁶ bití' ca' rusana' rea'-në' Dios: "Xclenu'", ca naca queéli'. Rōjneda' libí'ili' cate' rulidza'-në' Dios. ¹⁷ Rinábida'-në' Dios queë' Xanru' Jesucristo, Dios na' náquië' Xúziru' nayépisëtërë', rinábida'-në' isöl-lë'ë Dios Bō' Lá'ayi queéli', Bō' na' runna yöl-la' réajni' queëru', en rulu'í' rë'u ca naca cazë' Dios, para gaca idú ca núbñë'ru'-në'. ¹⁸ Rinábida'-në' Dios uzéajni'inë' libí'ili' lu icja ládxí'do'oli' para gaca inözili' ca naca le runru' löza, lë na' bulidzë' libí'ili' para uzí'ili' xibë, en para inözili' ca naca yöl-la' tsahui' que yehua' yubá, le guequi quegaca nupa néquiguequi queë' Dios, ¹⁹ enca' para inözili' cate' zxōn naca yöl-la' huáca queë', le rácalen rë'u ni réajlë'ëru' Lë'. Yöl-la' huáca zxōn ni naca la' lébisō na' bulu'e lahui Dios ²⁰ cate' ni' busubanë' Cristo lu yöl-la' guti, en benë' ga gurō'ë cuita lë'ë Lë cazë' ga nayépisëtërë' ni' yehua' yubá. ²¹ Rinná bé'enë' nupa ni' ta'nná bë', en nupa ni' dë lu në'eguequi, en nupa ni' nadéli'gaca yöl-la' huáca, en nupa ni' nácacaca xan. Cristo nayépisëtërë' ca yúgu'të nupa nadéli'gaca yöl-la' unná bë' yōdzōliō ni, en lu yōdzōliō si' za'. ²² Dios budödë' lu në'ë Cristo yúgu'të le dë para inná bé'enë' le, en buzóë' Lë' quegaca bönachi queë' para gáquië' Xanru' lu yúgu'të le nequi queëru'. ²³ Yugu' bönachi queë' Cristo nácacaca ca idútë le naca cazë', ate' raquië' Lë' idú lu le naca cazë' na'. Run cazë' Lë' ga raca idú yúgu'të le dë.

2

Nuláru' tu' nadxí'inë' Dios rë'u

¹ Dios chibennë' yöl-la' na'bán idú queéli', sal-la' gúcali' zí'atëlō ca bönni' nátigaca tu' nōzi dul-la' nabága'li', en ni'a que dō' biá'ali'. ² Dza ni' benli' lébisō ca tun bönachi bití' nácacaca tsahui' nacua' yōdzōliō ni, en benli' ca gú'uni tu' xihui', nu rinná bë' lu bö'ös, en rugún dxin nupa bití' túngaca ca rnna xtídzë'ë Dios. ³ Lësca' caní gúcaru' yúgu'tëru' rë'u. Benru' ca guzësō ládxí'ru', en ca guyaza ládxí'ru' lu yöl-la' bönáchisō queëru'. Que lë ni na' gubága'ru' dul-la' lahuë' Dios le nun ga gunë' rë'u xíguia' ca gunë' queguequi ia'zica'rō bönachi. ⁴⁻⁵ Ní'irō cate' ni' nácaru' ca bönni' nátigaca tu' nōzi dul-la' gubága'ru', Dios busubanë' rë'u lu yöl-la' guti tsōzxōn

len Cristo tu' buéchi' ládxë'ë rë'u, en bidxí'ide'enë' rë'u. Nuláli' tu' zoa le buzá' ládxë'ë Dios queéli'. ⁶ Dios busubanë' rë'u tsòzxön len Cristo para gunë' ga có'oru' tsòzxön len Lë' ga ni' rinná' bë'ë yehua' yubá'. ⁷ Caní' benë' Dios, en buluí'inë' bönachi si' zá'gaca ca naca yöl-la' tsahui' que le buzá' ládxë'ë queéru', tu' budödë' Jesucristo ni'a queéru', le naca bë' ca nadxí'ide'enë' rë'u. ⁸ Nuláli' tu' zoa le buzá' ládxë'ë Dios queéli' tu' réajlë'ëli' Cristo. Busölë' libí'ili', calëga tu' nacua' le naca dxi'a benli' libí'ili', pero tu' naca le runsë' Dios. ⁹ Cuntu nu gaca gun ba zxon cuini tu' nulá, tu' cabí' nulá nu na' tu' nacua' le naca dxi'a nun nu na'. ¹⁰ Le nácaru' naca le nun cazë' Dios. Tu' nácaru' tuz len Jesucristo, bucu'ë rë'u para gunru' le nácgaca dxi'a, le bucözë' zí'atëlö gunru'.

Rö'ö dxi'icja ládxí'do'oru' lahuë' Dios ni'a que le benë' Cristo

¹¹ Guli'tsójné ca gúcali' zí'atëlö. Gúcali' bönachi izá'a, en que lë ni na' yugu' bönni' judío, bönni' na' ta'chúguië' lu xipëla'gaquië' le naca bë' dá'gaquië' Dios, en nazí' lágaquië' bönni' narugu lu xipëla'gaquië', ta'nnë' nácali' libí'ili' bönni' biti' narugu lu xipëla'gaquië'. ¹² Dza ni' nubíga'li' ga zoë' Cristo. Gúcali' bönni' zí'tu' lógaca bönachi Israel, en biti' buzí'ili' xibé didza' benë' tsutsu Dios, en guzxi' lu në'ë bi gata' quégaca bönachi queë'. Guzóali' yödzóliö ni, biti' zoa le runli' löza, en biti' núnbë'ënilí-në' Dios. ¹³ ¡Na'a, nácali' tuz len Jesucristo! ¡zí'atëlö nubíga'li' libí'ili' zí'tu' ga zoë' Dios, pero na'a nudxíguë'ë Dios libí'ili' gála'sò tu' gútië' Cristo uláz queéru'! ¹⁴ Lë cazë' Cristo runë' ga rö'ö dxi'icja ládxí'do'oru' lahuë' Dios. Lë' benë' ga yugu' bönni' judío, en yugu' bönni' zí'tu' bulu'huóáquië' tuz bönachi, en busulüë' yöl-la' rilé le guléaj légaquië' choplö ca tu zö'ö zxon. ¹⁵ Lë ni benë' Cristo cate' gútië' uláz queéru', en gudúë' yugu' xibá, en yugu' le rinná' bë' nazúajgaca lu xibá quégaca bönachi judío, ate' chopá có' bönachi na', bunë' tuz bönachi cubi, nupa nácgaca tuz len Lë cazë'. Caní' benë', en gulequi dxié' yöl-la' rilé na'. ¹⁶ Cate' gútië' Cristo lë'e yaga cruz, busulüë' yöl-la' rilé na', ate' chopá có' bönachi na', bunë' légaquië' ca tuz bönachi, en gulequi dxié' icja ládxí'do'gaquië' lahuë' Dios.

¹⁷ Caní' guca, buluí' lahuë' Cristo, en benë' libán que didza' dxi'a ca ribequi dxié' yúgu'të bönachi, libí'ili' na' nácali' bönachi izá'a, en zóali' zí'tu' ga zoë' Dios, enca' bönachi judío nacua' gála'sò. ¹⁸ Na'a, ni'a que le benë' Cristo, gaca ibíga'ru' lahuë' Xúziru' Dios, tu' zóalenë' Lë cazë' Dios Bö' Lá'ayi rë'u, sal-la' nácaru' bönachi judío o bönachi izá'a. ¹⁹ Que lë ni na', libí'ili', bönachi izá'a, biti'rö nácali' ca bönachi zí'tu' zóali' tu luyú'biti' nequi queéli', pero nabábalenli' bönachi queë' Dios. ¡Chínácali' ca bi'i queë' cazë' Dios! ²⁰ Libí'ili' nácali' ca tu yu'u zoa tsaz. Nácali' ca yugu' guiöj zóógaca lahui xilibi zö'ö, le bulu'cu'ë yugu' bönni' gubáz queë' Cristo, en yugu' bönni' gulu'ë didza' uláz queë' Dios, ate' Lë cazë' Jesucristo náquië' ca guiöj lo que xilibi zö'ö na'. ²¹ Iduté' yu'u na' le nácali' libí'í cázali' riyasa lahui xilibi zö'ö na' naca cazë' Cristo, en nacua' tu'lapa yugu' guiöj que, para gaca tu yudo' lá'ayi le naca tuz len Xanru'. ²² Libí'í cázali' nácali' tuz len Cristo Nu buzóa libí'ili' para gácali' ca tu yu'u ga na' yu'ë Dios, tu' dzáguë' Dios Bö' Lá'ayi libí'ili'.

3

Náquië' Pablo huen libán que didza' dxi'a lógaca bönachi izá'a

¹ Que lë ni na', neda', Pablo, yu'a lidxi' guié tu' runa' libán queë' Jesucristo para uzí'ili' xibë', libí'ili', bönachi izá'a. ² Réquida' chinöz' quézili' ca benë' Dios, budödë' lu na'a dxin runa' para uzí'ili' xibë' le ruzá' ládxë'ë queéru'. ³ Dios bulu'e lahui le bigachi' queë', en buzéajni'inë' neda' ca naca. Ca naca lë ni chibuzúaja' láti'do' queéli' lu guichi. ⁴ Cate' ulábali' lë ni, gúnbë'ëli' le réajni'ida' ca naca le bigachi' ca naca queë' Cristo. ⁵ Dza ni'te cuntu nu buzéajni'inë' Dios ca naca le bigachi' na', pero na'a, lu në'ë Dios Bö' Lá'ayi, chibulu'ë lahui Dios ca naca, tu' buluí'inë' yugu' bönni' gubáz lá'ayi queë', en yugu' bönni' tu'ë didza' uláz queë'. ⁶ Caní' rna lë na' bigachi': "Ni'a que didza' dxi'a ila'deli' bönachi izá'a tsòzxön len bönachi judío le nequi queë' Dios, ate' ulu'huóáquië' ca tuz bönachi, en ulu'zi'ë xibë' tsòzxön len légaquië' le guzxi' lu në'ë Dios unödzej' quégaquië' tu' dá'gaquië' Jesucristo." ⁷ Dios buzá' ládxë'ë quia' le bennë' quia'. Lu yöl-la' huáca zxon queë' benë' neda' huen libán que didza' dxi'a queë'. ⁸ Nacra' cá'asó ca yúgu'të bönachi queë' Dios, pero Lë' buzá' ládxë'ë quia' gaca' huen libán lógaca bönachi izá'a que didza' dxi'a ca naca yöl-la' tsahui' queë' Cristo, le nazáca'da'. ⁹ Dios budödë' lu na'a guna' ga iléquibe'e yúgu'të bönachi ca naca le buzóa cazë' Dios dza ni'te, lë na' naca tu le bigachi' queë' Dios, Nu ben yúgu'të le rilé'ëru'. ¹⁰ Caní' guca, para iléquibe'e yúgu'të nupa ta'nná' bë', en nupa dë lu në'ëguequi ni' yehua' yubá, idú ca naca yöl-la' réajni'í queë' Dios cate' ila'lé'e ca nácgaca bönachi queë' Cristo. ¹¹ Dios benë' lë ni, busudxinë' lë na' buzóa cazë' dza ni'te, le benë' lu në'ë Xanru' Jesucristo. ¹² Tu' nácaru' tuz len Cristo, nazí'iru' lataj ibíga'ru' idú ladxi'ru' lahuë' Dios, tu' réajlë'ëru' Lë'. ¹³ Que lë ni na' ráta'yua' lolí' biti' gaca chopá ládxí'li' tu' nözi le riguí'í rizáca'a neda' para gácalena' libí'ili', le naca tu le uzí'ili' xibë'.

Ca naca yöl-la' nadxí'í queë' Cristo

¹⁴ ¡Que lè ni na', ruzechu xziba' lahuë' Xuzë' Xanru' Jesucristo! ¹⁵ Ca lè', nazí'i ca' lágaca yúgu'tè bônachi queë', nupa nacua' yehua' yubá, en nupa nacua' yôdzólíó ni. ¹⁶ Rinábida-nè' Xúziru' Dios, lu yôl-la' xzôn queë', le nazáca'da', gunnë' queë'li' yôl-la' huáca queë' Dios Bô' Lá'ayi, en gunë' ga gálali' lu icja ládxi'do'oli'. ¹⁷ Rinábida-nè' Cristo soë' icja ládxi'do'oli' tu' réajlë'ëli' Lë'. Rinábida-nè' gunë' ga sóali' tsaz lu yôl-la' nadxí'i queë', en bití' tséaj bô' icja ládxi'do'oli' ca nadxí'ili-në', ¹⁸ para gaca tséajni'ili' tsôzxôn len yúgu'tè bônachi queë' Cristo ca naca yôl-la' nadxí'i queë', tsca ga ridxín ní'ílo, en ná'aló, en cadxí'ílo, en xitsá'aló. ¹⁹ Rinábida-nè' Dios gunë' ga gúnbë'ëli' yôl-la' nadxí'i na', le cabí gaca gúnbë'ëru' idú ca naca, para sóalen libí'ili' idú le naca cazë' Dios.

²⁰ ¡Na'a, yôl-la' ba Dios, Nu gaca gúntërô ca gaca inábaru' o ca gaca sa' ládxi'ru', ugunë' dxin yôl-la' huáca queë' lu icja ládxi'do'oru'! ²¹ ¡Gácatíca'sô queë' Dios yôl-la' ba lógaca bônachi queë' Cristo, en lahuë' Lë' cazë' Jesucristo, na'a dza, en yúgu'tè dza zá'gaca! ¡Ca' gaca!

4

Dios Bô' Lá'ayi nunë' rë'u tuz

¹ Na'a, neda' ráta'yua' loli', yu'a lidxi guë' ni tu' runa' libán queë' Cristo, rinábida' libí'ili' gunli' idú ca ral-la' ilún nupa bulidzë' Dios para ilequi queë', ca na' bulidzë' ca' libí'ili'. ² Guli'gaca nôxaj ladxí', en dxi'i ladxí'. Guli'cöz xzôn ladxí'. Guli'güí ladxí' luzá'ali' tuli' ia'tuli' lu yôl-la' nadxí'i queë'li'. ³ Guli'güí ladxí' gácatíca'sili' tuz ca na' chinunë' Dios Bô' Lá'ayi libí'ili', gunli' caní lu yôl-la' riböza tsáhui'do' queë'li' le rutsaga libí'ili'.

⁴ Tuz naca iduté le naca cazë' Cristo le nadzágaru' rë'u.

Tuzë' náquië' Dios Bô' Lá'ayi dzáguie' rë'u.

Tuz naca le runru' löza, lë na' bulidzë' rë'u Dios para uzí'iru' xibë.

⁵ Tuzë' náquië' Xanru'.

Tuz le réajlë'ëru'.

Tuz le bidílaru' nisa.

⁶ Tuzë' náquië' Dios Nu naca Xúziru' yúgu'tëru'.

Lë' rinná bé'enë' yúgu'tëru'.

Rugunë' dxin yúgu'tëru'.

Riböza cazë' Lë' lu icja ládxi'do'oru' yúgu'tëru'.

⁷ Tu turu' nazí'iru' tu yôl-la' huáca queë' Dios tsca naca le bennë' Cristo que queëru'. ⁸ Naca caní ca na' nazúaj lu guichi lá'ayi le rnna:

Buëpë' yehua' yubá, guchë'ë zían bônachi gula'dzúngaca.

Gudisíë' quegaca bônachi le runódzjasë' quegaquië'.

⁹ ¿Bizxi ré'ëni inná lë na' rnna: buëpë'? Rusëdi rë'u bôtjé? zí'aló, en bidxinë' yôdzólíó cadxí'ílo ni. ¹⁰ Nu na' bôtaj naca Bónni' na' buëpë' xitsá'tërô ní' yehua' yubá para budzë'ë yúgu'tè len le naca cazë' Lë'. ¹¹ Cristo caz bennë' que queëru' yugu' yôl-la' huáca queë':

Bë' lataj bal-lë' bônni' iláquië' gubáz queë'.

Benë' ga tu'ë didza' uláz queë' Dios ia'bal-lë' bônni'.

Gusól-lë'ë ia'bal-lë' tsójéngaquië' libán que didza' dxi'a.

Bucu'ë ia'bal-lë' para ilún chí'ë bônachi queë'.

Bucu'ë ia'bal-lë' para ulu'sédinë' bônachi queë'.

¹² Cristo caz bupë'ë bônachi queë' caní para gaca ilún xichinë', para ilún ga ilaca idú nupa nácacaga ca iduté le naca cazë' Lë'. ¹³ Caní gaca ga idxintë dza huóácaru' tuz yúgu'tëru' ca réajlë'ëru' Cristo, en ca núnbë'ëru'-në' Zxí'inë' Dios. Gácaru' nál-la, en huóácaru' idú ca náquië' Lë' cazë' Cristo. ¹⁴ Bití'rô gácaru' ca yugu' bí'ido', ca nácacaga nupa na' tu'tsa'të ca túngaca, en nácacaga ca tu le nachë' lu yegu, o ca tu le rójchë' bití'tës bô' recja, tu' ta'z'í lu né'eguequi bití'tës didza' nu rusëdi léguequi, nu na' rizí' ye'e léguequi len yôl-la' sina' que, en run ga ta'chixi ta'nigui. ¹⁵ Na'a, rë'u ni, tu' nadxí'iru' luzá'aru', ral-la' güí'iru' didza' le naca iduté li para gaca huóácaru' idú ca náquië' Cristo, en gácaru' tuz len Lë', Nu naca Xani idú le naca cazë', le nácaru' rë'u. ¹⁶ Cristo caz runë' ga rutsaga dxi'a iduté le naca cazë', le nácaru' rë'u, ate' iduté le naca cazë' na' nague'la' tsôzxôn ní'a que lë na' run tuz iduté le naca cazë'. Cate' tu turu' runru' xichinru', rë'u na' dzágaru' le naca cazë', iduté rizxôn, en raca idú, ca na' zeaj rácarô idú ca nadxí'iru' luzá'aru'.

Yôl-la' na'bán cubi náparu' tu' nácaru' tuz len Cristo

¹⁷ Uláz queë' Xanru' rea' libí'ili' lë ni, en rigu'a le lu ná'ali', rnní'a: Bití'rô gunli' ca tun nupa bití' núnbë'gaquië' Dios, nupa na' tun ca ta'za'sô ládxi'guequi, ¹⁸ en nachul-la nanítigaca icja ládxi'do'guequi. Tu' cabí nôzguequinë' le nácatë, en nazídigaquië', bití' nazí'gaquië' yôl-la' na'bán na' runnë' Dios queëru'. ¹⁹ Bití' ca' tu'tuf'inë'. Nudôdi cuíngaquië' lu le ruá' dô'. Idú ládxi'gaquië' tunë' yúgu'tè le cabí naca tsahui'. ²⁰ Nupa ní' bulu'sedi libí'ili' ca naca queë' Cristo, bití' ca' bulu'sedi libí'ili' gunli' ca tun bônachi caní. ²¹ Le naca iduté li biyónili' ca naca

queë' Cristo, en le nácali' queë' tu'sedinë libí'ili' le naca idütë li na' zóalen Jesús. ²² Guli'nná be'e yöl-la' bônáchisö queëli' le gúcali' zí'aló, lë na' riniti ni'a que yöl-la' rizë ladxí' queëli' le ruá' dö' le guzxi' ye'e libí'ili'. ²³ Ral-la' huóacali' cubi lu icja ládxí'do'oli', en lu bö' naca cázali'. ²⁴ Ral-la' sí'ili' yöl-la' bônachi cubi le nunë' Dios ca naca cazë' Lë', le rulu'í' cuini ni'a que le naca dxi'a, en le naca tsahui' runli', en run ga gaca gunli' caní.

²⁵ Que lë ni na', bití'rö si' yë'ëli'. Yúgu'tëru' ral-la' gü'ilenru' luzá'aru' didza' le nácatë, tu' dzágaru' yúgu'tëru' idütë le naca cazë' Cristo.

²⁶ Channö hualéli', bití' ral-la' gunli' dul-la'. Bití' ileli' xidzé. ²⁷ Bití' bi gunli' le gü'í' lataj tu' xihui' ucúl-la libí'ili'.

²⁸ Nu bönni' ribanë' ral-la' usanë' yöl-la' gubán queë', en tsázië' huen dxin para gata' queë' bi unödzejë' queégaca nupa ta'yadzaj.

²⁹ Bití' gü'í'ili' didza' xihui', pero guli'güí' didza' dxi'a, yugu' le ilácalen nu yöni, en ilún ga gaca dxi'a que nu na'. ³⁰ Bití' usuhu'í'nili' Dios Bö' Lá'ayi, tu' naca bë' néquili' queë' Dios tu' zóalenë' Dios Bö' Lá'ayi libí'ili', ate' idxín dza údxi usólë' libí'ili' lu dul-la'.

³¹ Guli'cúa ladaj libí'ili' yöl-la' ruzxë'e, en yöl-la' ridzá'a, en yöl-la' rilë, en yöl-la' ridil-la didza', en yöl-la' rutsaga yudxi, en yúgu'të yöl-la' bití' rilë'e luzá'ali' dxi'a.

³² Ral-la' gácali' dxi'i ladxí', en huéchi' ládxí'li' luzá'ali' tuli' ia'tuli', en uniti loli' luzá'ali' tuli' ia'tuli', ca na' benë' Dios, buniti lahuë' libí'ili' tu' nácali' tuz len Cristo.

5

Ca ral-la' ilaca nupa náca gaca ca bi'i queë' cazë' Dios

¹ Tu' nácali' ca bi'i queë' cazë' Dios, ate' nadxí'inë' libí'ili', guli'güí' ladxí' gácali' ca náquië' Lë'. ² Ca naca yúgu'të le runli':

Ral-la' idxí'ili' luzá'ali' ca na' benë' Cristo.

Bidxí'inë' rë'u, en budódi cuinë' lu yöl-la' guti uláz queëru'.

Ben cuinë' ca böa' bëdxido' rútiru'-ba' lahuë' Dios tu' nözi dul-la' nabága'ru'.

Gúquië' ca' ca tu le rilá' xzixi le raza ládxë'ë Dios le rigú'uru' lu bucugu lá'ayi queë'.

³ Tu' nácali' queë' Dios, bití' ca' gunli' le ruá' dö', en bití' gunli' le cabí ral-la' gunli', en bití' uhuídi'li'. Ní'irö cuntun nu gaca bi innë queëli'.

⁴ Bití' gü'í'ili' didza' xihui', o didza' canöz, o didza' cá'asö, yugu' le cabí ral-la' gunli',

pero nácarö dxi'a guiéli'-në' Dios: "Xclenu'."

⁵ Chinöz quézili' nitúë' bönni' runë' le ruá' dö' bití' ca' tsázië' ga rinná bë'ë Cristo tsözxón len Dios, o nu bönni' runë' le cabí ral-la' gunë', o nu bönni' ruhuídi'në'. Nu na' ruhuídi' naca ca nu reaj ladxí' budó' guiöj budó' yaga. ⁶ Bití' gü'í'ili' lataj nu si' ye'e libí'ili' len didza' bití' nácatë. Tu' nözi dul-la' caní Dios gunë' xíguia' nupa bití' túngaca ca rnna xtídzë'ë. ⁷ Bití' ca' gunli' tuz bônachi caní.

⁸ Zí'atëlö guzóali' ga naca chul-la que dul-la', pero na'a zóali' lu bení', tu' nácali' tuz len Xanru'. Guli'gaca ca bônachi ta'dá lu bení', ⁹ tu' run bení' na' ga gácaru' dxi'i ladxí', en ga gü'í'iru' didza' le naca idütë li, en ga gácaru' tsahui'. ¹⁰ Guli'güí' ladxí' inózili' le raza ládxë'ë Xanru'. ¹¹ Bití' gütsa'li' nupa tun le ruá' dö', lë na' tunë' ga naca chul-la que dul-la', pero buli'béaj ga liná' yugu' lë na' tunë'. ¹² Utuí'iru' gü'í'iru' didza' ca naca le tun bônachi na' bagáchi'sö. ¹³ Cate' bi ubéajru' ga liná', gaca bë' yúgu'të tsa náca gaca, tu' gun le naca bení' ga gaca bë' yúgu'të. ¹⁴ Que lë ni na' nazúaj lu guichi lë na' rnna:

Bubán, li' na' rasiu'.

Guyasa ladaj nupa nátagaca.

Cristo uzení'ë quiu'.

¹⁵ Buli'yú cuinli' ca runli'. Bití' gácali' nupa bití' ta'yéajni'ini, pero guli'gaca bônachi ta'yéajni'i. ¹⁶ Guli'sí' xibé lataj dë queëli' tu' chizóaru' dza bití' raca dxi'a queëru'. ¹⁷ Bití' gácali' bönni' bití' bi nözguequinë'. Guli'güí' ladxí' tséajni'ili' le rë'ënë' Xanru' gunli'.

¹⁸ Bití' súdxili', tu' gun yöl-la' rizudxi ga nítili' tsaz.

Guli'güí'ida' lataj inná bé'enë' Dios Bö' Lá'ayi libí'ili'.

¹⁹ Guli'gúl'ilen luzá'ali' didza' tuli' ia'tuli',
 ugunli' dxin yugu' le rul-la lëgaca salmo,
 en yugu' le rul-la yöl-la' ba Dios,
 en yugu' le rul-la nagu'ë Dios Bô' Lá'ayi icja ládxi'do'oru'.
 Idú ládxi'ru' ral-la' gúl-laru' queë',
 le cú'uru'-në' Dios yöl-la' ba.

²⁰ Guli'gún dxin Lë' Xanru' Jesucristo,
 en guli'guéfica'së' Xúziru' Dios: "Xclenu'" ca naca yúgu'të.

Ca ral-la' gunru' quegaca di'a dza queëru'

²¹ Guli'gún ca rnna xtídza' luzá'ali' tuli' ia'tuli' para caní gunli'-në' Dios zxön.

²² Libí'ili', yugu' nigula, guli'gún ca rnna xtídza'gaquië' bönni' que queëli', ca na' ral-la' gunli' ca rnna xtídze'ë Xanru'. ²³ Caní ral-la' gunli', tu' rinná bé'enë' bönni' nigula queë' ca na' runë' Cristo, rinná bé'enë' bönnachi queë'. Cristo náquië' ca' Nu rusólá bönnachi queë', nupa na' dzágagaca le naca cazë' Lë'. ²⁴ Ca na' tun bönnachi queë' Cristo ca rnna xtídze'ë, lëasca' caní ral-la' ilunnu nigula ca rnna xtídza'gaquië' bönni' que queëgacanú' le naca yúgu'të le raca.

²⁵ Libí'ili', yugu' bönni', ral-la' idxí'ili'-nu nigula que queëli' ca na' Cristo nadxí'inë' bönnachi queë', en budödi cuinë', gútië' uláz quegaquië'. ²⁶ Gútië' Cristo para bubéajë' quez queë' Dios bönnachi queë' na', ate' nayárigaca tu lu nisa le naca xtídze'ë. ²⁷ Gútië' uláz quegaquië' para gaca usudxinë' légaquië' lahuë' Dios, nácagaquië' ca tu lari' lachi, biti' nuá' bösaj le në'aj, en biti' naxú'una, en biti' zoa nitú' le pero runë' ga ilácagaquië' idú dxi'a, cuntu nu gaca bi innë' quegaquië'. ²⁸ Ral-la' idxí'ili'-nu nigula que queëli' ca na' nadxí'i cuinli'. Nu bönni' nadxí'inë'-nu nigula queë', nadxí'i cuinë'. ²⁹ Cuntu nu bönni' runi zí' cuinë', pero rugahuë', en run chi' cuinë', ca runë' ca' Cristo, ca rúnlenë' bönnachi queë', ³⁰ nupa dzágagaca iduté le naca cazë'.

¡Rë'u ni dzágaru' le naca cazë' Lë'!

¡Nëquiniru' xipélë'ë, en dxita queë'!

³¹ Lëasca' caní nazúaj lu guichi lá'ayi le rnna: "Que lë ni na' tu bönni' ral-la' ucá'anë' xuz xinë'ë para tsöjsóalenë'-nu nigula queë', ate' irópatë' ulu'huóáquië' tuz." ³² Lë na' nazúaj lu guichi ni ruluf' lahui tu le naca iduté li, ate' neda' réquida' ruí' didza' ca' ca naca queë' Cristo, en quegaca bönnachi queë' na'. ³³ Lëasca' ruí' didza' ca naca queëli'. Yúgu'tëli' libí'ili', bönni', ral-la' idxí'ili'-nu nigula que queëli' ca na' nadxí'i cuinli', ate' yugu' nigula ral-la' ilunnu bal bönni' que queëgacanú'.

6

¹ Libí'ili', yugu' bí'ido', ral-la' gunli' ca rnna xtídza'gaquië' xuz xiná'ali' para caní gunli' ca rnna xtídze'ë Xanru'. Ral-la' gunli' le naca tsahui'. ² Xibá zí'aló na' benë' Dios le nachë' tu le guzxi' lu në'ë gunë', naca lë na' rnna: "Ben bal xuz xinó'o, ³ ate' gaca dxi'a quiu', ate' xidzé su' ibanú' yödzólió ni."

⁴ Libí'ili', yugu' xuz, biti' gun leli' xzí'inili', pero buli'xón légacabi', en guli'sína' légacabi', en buli'sëdi légacabi' ca raza ládxe'ë Xanru'.

⁵ Libí'ili', núlöli' nácali' bönni' nadó'ogaca, guli'gún ca rnna xtídza'gaquië' xanli' luyú ni idú ládxi'li', gunli' légaquië' bal lu yöl-la' radxi queëli', en gunli' xichíngaquië' ca ral-la' gunli' xichinë' Cristo. ⁶ Guli'gún xichíngaquië', calégasó cate' ni' tu'yúë' libí'ili' para urúajli' dxi'a légaquië', pero idú ládxi'li' guli'gún xichíngaquië' ca raza ládxe'ë Dios, ca na' ral-la' gunli' xichinë' Cristo. ⁷ Idú ládxi'li' guli'gún xichíngaquië', ate' caní gaca, gunli' xichinë' Xanru', en calégasó xichíngaca bönnachi. ⁸ Nöz quezili' ca gunë' Xanru'. Ubi'ë' que queëru' tsca naca le dxi'a runru' sal-la' nadzanru', o sal-la' nácaru' bönni' nadó'ogacá'.

⁹ Libí'ili', nacua' queëli' bönni' nadó'ogaca, guli'gún dxi'a caní quegaca huen dxin queëli' na', en biti' uzéli' ba nadx légaquië'. Guli'tsöjnë' ca naca queëli', yú'uli' lu në'ë Xanru' zoë' yehua' yubá la' ca nácatë quegaquië', ate' Lë' biti' rutsë'ë ca runë' que que bönnachi.

Dios runnë' queëru' le tun chi'i rë'u

¹⁰ Na'a, böchi' luzá'ado', guli'gaca tsutsu tu' nácali' tuz len Xanru', en zóalen libí'ili' yöl-la' huáca zxön queë'. ¹¹ Guli'gún chi'i cuinli', ugunli' dxin yugu' le runnë' Dios queëru', le tun chi'i rë'u, para gaca sóali' tsutsu cate' guë'ëni si' bë' tu' xihui' libí'ili'. ¹² Biti' ridí-lalenru' bönnachi néquiguequini béla', en dxita, pero ridí-lalenru' yöl-la' unná bë' quegaca bö' xihui' ta'dá lu bö'ös, en dzágagaca nupa ta'nná bë', en nupa nadéli'gaca yöl-la' unná bë', en nupa dé lu ná'agaca, nupa nacua' yödzólió ni ga naca chul-la que dul-la'. ¹³ Que lë ni na':

Guli'sí' yúgu'të le runnë' queëru' Dios le tun chi'i rë'u,
 para cate' idxín queëru' dza ni' ilaca le nácagaca xihui',
 gaca guá' ilenli',
 en cate' údxi gunli' caní, ugá'anali' tsutsu.

14 Guli'sóa tsutsu.

Guli'sí' le naca idútè li,
le gaca queéli' ca tu guídi guga' lè'èli'.
Guli'gaca tsahui' tu' gun chí'i libí'ili' le naca tsahui'
ca run tu lari' yödx run chí'i luchu'ë bönni' rejè' gudil-la.

15 Guli'sóa sina' para gunli' libán que didza' dxi'a
le ribequi dxi icja ládxi'do'oru' lahuë' Dios,
ca na' ruzóa cuiné' sina',

en ridè'ë xiráchuë' tu bönni' rejè' gudil-la.

16 Le naca lo, yöl-la' réajlè' queéli' Cristo
gaca queéli' ca tu le naca tsutsu uzéli' loli',
para cabí gál-la' yugu' le usán tu' xihui' libí'ili',
le nácagaca ca yaga túchi'do' zoa guí' láhuilöguequi.

17 Yöl-la' rusöla' gaca queéli' ca tu lu'u guíè' le gun chí'i ícjali'.

Xtídzè'ë Dios gaca queéli' ca tu guíè' tuchi'

le runnè' Dios Bô' Lá'ayi queéru',

para utíl-lalenru' le naca xihui'.

18 Guli'gún yúgu'tè lè ni,

en buli'lidzè' Dios inábili'-nè' gácalenè' libí'ili'.

Buli'lidzatica'sè' Dios zóalenè' Dios Bô' Lá'ayi libí'ili'.

Para gunli' caní ral-la' usubán ládxi'li' en cabí huóaj ládxi'li',

inábili'-nè' Dios gácalenè' nupa néquiguequi queè'.

19 Buli'lidzè' Dios, inábili'-nè' gácalenè' ca neda', en gunnè' quia' didza' cate' ral-la' gu'a
didza', en gunè' ga gaca' rugu ladxí' cate' guna' libán para uzéajni'ida' bönachi ca naca le
bigachi' que didza' dxi'a. 20 Dios budödè' lu na'a didza' dxi'a na' para guna' libán que, ate'
tu' bena' caní yu'a lidxi guíè' ni. Buli'lidzè' Dios channò, inábili'-nè' gunè' ga gaca' rugu ladxí'
para guna' libán que didza' dxi'a ca ral-la' guna'.

Ruúdx didza' bë'ë Pablo

21 Tíquico, böchi'ru' na' nadxí'iru'-nè', en runè' xichiné' Xanru' idú ládxe'ë, quíxjöi'inè'
libí'ili' idú ca raca quia', en ca runa' neda' ni. 22 Que lè ni na', isöl-la'a-nè' queéli', ate'
uluí'inè' libí'ili' ca raca queétu', ate' caní utipè' ládxi'li'.

23 Rinábida'-nè' Xúziru' Dios, enca' Xanru' Jesucristo gunè' ga soa dxi icja ládxi'do'oli', en
gata' queéli' yöl-la' nadxí'i le dzaga yöl-la' réajlè' queéli' Cristo, yúgu'tèli' na' néquili' queè'.

24 Le ruzá' ládxe'ë Dios queéru' gaca queéli', yúgu'tèli' na' nadxí'ili'-nè' Xanru' Jesucristo,
naca idú yöl-la' nadxí'i queéli' Lè'. ¡Ca' gaca!

DIDZA' GUSÖL-LĒ'Ē PABLO YÖDZÖ FILIPOS

Pablo rugapë' Dios bönachi queë' Cristo nacua' Filipos

¹ Neda', Pablo, enca' bi'i Timoteo, nactu' huen dxin queë' Jesucristo. Rugapa' Dios libi'ili', réajlë'ëli' Cristo, en libi'ili', dë lu ná'ali' xichinë' Cristo, en libi'ili', run chí'ili' bönachi queë' Cristo. Zóali' Filipos, en néquili' queë' Dios, en nácali' tuz len Jesucristo. ² Rinábida'-në' Xúziru' Dios, enca' Xanru' Jesucristo gunnë' queéli' le ruzá' ládxë'ë queëru', en gunë' ga soa dxi icja ládxí'do'oli'.

Pablo rinábimë' Dios bi gunë' quegaca bönachi ta'yéajlë' Cristo

³ Rea'-në' Dios: "Xclenu'", cate' rizá' ládx'a'a queéli'. ⁴ Cate' rulidza'-në' Dios, en rinábida'-në' gácalenë' libi'ili', rudzeja ládx'a'a ⁵ tu' rójneda' ca bënlenli' neda' tsözxön dxin que didza' dxi'a. Gusí loli' runli' dxin na' dza ni' si' biyónili', en runli' le ga ridxintë na' a dza. ⁶ Dios gusí lahuë' runë' tu le naca dxi'a lu icja ládxí'do'oli'. Ruzxóni ládx'a'a Lë' gúntica'së' caní ga idxintë dza huödë' Jesucristo. ⁷ Ca na' rizá' ládx'a'a queéli' naca ca ral-la' guna' tu' nadxí'ide'eda' libi'ili'. Yúgu'tëli' ruzí'ili' xibë tsözxön len neda' le ruzá' ládxë'ë Dios queëru', tsanni ni yu'a lidxi guié, en lësca' caní benli' cate' ni' bë'a didza', cate' na' bena' libán que didza' dxi'a le bena' ga bidxín queéli' tsaz. ⁸ Nözinë' Dios ca nadxí'ide'eda' libi'ili'. Naca ca na' nadxí'ide'enë' Lë cazë' Jesucristo rë'u. ⁹ Rinábida'-në' Dios gunë' ga idxf'iröli' luzá'ali', en gáta'da' queéli' yöl-la' rácada', en yöl-la' réajini' idú ¹⁰ para gaca cöli' le nácatë'rö dxi'a. Channö gaca caní queéli', gácali' idú dxi'a, ate' cuntú nu gaca bi innë queéli' dza ni' huödë' Cristo. ¹¹ Le nácali' naca bë' le naca dxi'a runë' Cristo lu icja ládxí'do'oli' para ilá' lahui yöl-la' xzön queë' Dios, en gaca queë' yöl-la' ba.

Zóaru' nabanru' para gácaru' ca náquië' Cristo

¹² Böchi' luzá'ado', ré'ënda' inözili' lë ni: Yúgu'të le guca quia' gulácalen neda' para guzxéqui'röda' bena' libán que didza' dxi'a. ¹³ Caní guca, yúgu'të ni'a ná'agaquië' bönni' yúlahui', en ia'zica'rë' bönni' ni nözguequinë' yu'a lidxi guié ni tu' runa' xichinë' Cristo. ¹⁴ Tu' yu'a neda' lidxi guié ni ben ga látu'biqiu' yúgu'të böchi'ru' nácacagarë' rugu ladxí', ate' tu' xzóni ládxí'gaquië' Xanru', en bití'rö tádxinë' tunë' libán que xtídzë'ë Dios.

¹⁵ Le nácatë bal-lë' tunë' libán queë' Cristo tu' tu'zxé'enë' neda', en ta'dil-lë', pero ia'bal-lë' tunë' libán queë' idú ládxí'gaquië'. ¹⁶ Yugu' bönni' tu'zxé'enë' na' tunë' libán queë' Cristo lu yöl-la' run ba xzön cuíngaqië', en calëga idú ládxí'gaquië'. Té'ënnë' ulu'saca' zí'ë neda' tsanni ni yu'a lidxi guié. ¹⁷ Yugu' bönni' idú ládxí'gaquië' na', lu yöl-la' nadxí'ide'eda' quegacië' tunë' libán queë', tu' nözguequinë' Dios caz budödë' lu na'a dxin runa', runa' libán que didza' dxi'a. ¹⁸ Biti' run lë na' ga rö'a böniga. Rudzéjada' tu' raca libán queë' Cristo nácati'tës, sal-la' tunë' libán idú ládxí'gaquië' o bití' tunë' le caní.

Na'a, rudzéjaröda' ¹⁹ tu' chinözida' ulá' lu le raca quia', yu'a lidxi guié ni, tu' rulídzali'-në' Dios, en tu' rácalenë' Dios Bō' Lá'ayi neda'. Náquië' Bō' risöl-lë'ë Jesucristo queëru'. ²⁰ Caní ré'ënda', en ruzxóni ládx'a'a-në' Dios, gunë' ga bití' utuí'ida', en gunë' ga gaca gu'a didza' lu yöl-la' rugu ladxí', ate' lu na'a neda' gácatica'sö yöl-la' ba queë' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'. ²¹ Ca runi neda', channö zoa' nabana', naca para gaca' ca náquië' Cristo, en channö gátia', naca tu le uzí'ira' xibë. ²² Channö huáca guna' dxin le gácalen didza' dxi'a queë' Cristo channö sóasa' ibana', bití' nözda' bízxilö ralla' cöa'. ²³ Naca böniga cöa'. Ré'ënda' gátitea' para tsójsóalentea'-në' Cristo, tu' gácatë'rö dxi'a quia', ²⁴ pero runrö bayudxi sóasa' ibana' para séqui'da' gácalena' libi'ili'. ²⁵ Tu' chinözida' naca caní, nözda' ca' ugá'analena' libi'ili' para gácalena' libi'ili' para gácarö idú ca réajlë'ëli' Cristo, ate' udzéjaröli' tu' réajlë'ëli' Lë'. ²⁶ Caní naca, udusóalena' libi'ili' leyúbölö, le gun ga tsaz ládxí'li'-në' Jesucristo ni'a que le gunë', gácalenë' neda'.

²⁷ Gulí'güi'sö ladxí' gácali' ca sa'yéaj didza' dxi'a queë' Cristo. Caní gaca, channö uduyúa' libi'ili' o channö soa' zí' tu', huayónida' nácali' tsutsu, en nácali' tuz, runli' tsözxön dxin que le réajlë'ëru' le za' queëru' ni'a que didza' dxi'a. ²⁸ Biti' güi'ili' nupa bití' ta'lé'ë libi'ili' dxi'a lataj ilún gadxi libi'ili'. Lë ni ulufi' légaquië' ila'nítie', pero uláli' libi'ili', le gaca bë' rácalenë' Dios caz libi'ili'. ²⁹ Dios ru'ë libi'ili' lataj gunli' xichinë' Cristo, calégasö ca réajlë'ëli' Lë', pero lësca' ca riguí' rizáca'li' cate' runli' xichinë'. ³⁰ Na'a, gaca gunli' neda' tsözxön güi' ládxí'ru' gunru' libán que didza' dxi'a. Bilé'ë quézili' ca gudí' guzxáca'a cate' bena' caní zí'alö, ate' riyónili' ca riguí' rizáca'a ca' na'a.

2

Gúquië' Cristo nöxaj ladxí', ate' bidéli'në' yöl-la' xzön

¹ Cristo runë' ga rutipa ládxi'li',
en lu yöl-la' nadxí'i queë' ruhuéchi' ládxe'ë libí'ili',
en runë' ga nácali' tuz len Dios Bō' Lá'ayi,
en ga nadxí'ili' luzá'ali',
en ga ruhuéchi' ládxi'li' luzá'ali' tuli' ia'tuli'.

² Na'a guli'gún ga udzëjarō ládxa'a. Para gunli' caní, ral-la' gácali' tuz len luzá'ali', en gaca lëbisō ca nadxí'ili' luzá'ali' tuli' ia'tuli'. Lësca' caní ral-la' gácali' tuz lu bō' naca cázali', en ca rizá' ládxi'li'. ³ Ca naca le runli', biti' bi ral-la' gunli' lu yöl-la' rudul-li' queëli', o para gun ba zxon cuinli', pero dxi'ado' ral-la' gunli' yúgu'të, en cabí guéquil' nadéli'rōli' libí'ili' ca luzá'ali'. ⁴ Guli'gúf ladxí' gaca dxi'a ca' que luzá'ali', en calëga queëzili'.

⁵ Ral-la' gácali' nōxaj ladxí' ca na' gúquië' Jesucristo nōxaj ladxí'. ⁶ Lë' naca cazë' lëbisō ca náquië' Dios caz, pero biti' gúquinë' ral-la' gunë' bayudxi ugá'anë' lëbisō ca na' náquië' Dios. ⁷ Bucá'ana cazë' yúgu'të le napë', en ben cuinë' ca tu bönni' nadō'o. Guljë' ca talaj bōnachi, en gúquië' idú bōnachi. ⁸ Cate' ni' náquië' bönni', gúquië' nōxaj ladxí', en benë' ca rnna xtídzë' Dios, en gútië'. Gudë'ë lë'e yaga cruz ca na' raca queë' nu bönni' nabáguë'ë dul-la'. ⁹ Que lë ni na' Dios buchisë' Lë', en benë' ga náquië' lo ni' yehua' yubá, en benë' ga lë' tu le nácaterō lo ca yúgu'të lágaca bōnachi. ¹⁰ Caní benë' Dios para cate' ila'yōni ca na' lë' Jesús, ulu'zechu zxi'bigaca yúgu'të nupa nacua' yehua' yubá, en lu yōdzōliō, en lu lataj chul-la. ¹¹ Yúgu'të' ila'guixjō'ë yáladjo' Jesucristo náquië' Xanru' para gaca yöl-la' ba queë' Xúziru' Dios.

Ral-la' gácaru' ca tu le ta'gú'u bení' yōdzōliō ni

¹² Que lë ni na', böchi' luzá'ado', ca na' benli' ca rnna xtídzá'a cate' ni' zóalena' libí'ili', runrō bayudxi gunli' ca rnna xtídzá'a na'a, tsanni ni zoa' zi'tu' ga zóali'. Guli'gún xichinë' Xanru' ga idxintë dza údxi usölë' libí'ili'. Guli'gún caní lu yöl-la' radxi queëli' Lë', en lu yöl-la' rixxizi. ¹³ Lë' cazë' Dios runë' dxin lu icja ládxi'do'oli'. Runë' ga rë'ënni' gunli' le raza ládxe'ë Lë', en runë' ca' ga séqui'li' gunli' lë na'.

¹⁴ Guli'gún yúgu'të le ral-la' gunli', en biti' bi innëli' que, en biti' til-la dídzá'li'. ¹⁵ Caní ral-la' gunli', para cabí gaca nu bi innë queëli', pero caní gácali' ca zxi'ini cazë' Dios, nácali' idú dxi'a yōdzōliō ga ni zóali' ladaj bōnachi biti' nácagaca tsahui', en nucá'anagaca Dios. Libí'ili' rigú'uli' bení' ladjagaquië' ca na' ta'gú'u bení' bōlaj lúzxi'ba cate' ni naca chul-la, ¹⁶ cate' ruí'ili' lógaquië' didza' ibániguequinë'. Channō caní gunli', huáca udzëjadë'eda' ni'a que le naca cázali' dza huödë' Cristo, tu' inözda' biti' guca nítisō guzóa bōnadxi gátia', en calëga nítisō bena' dxin. ¹⁷ Yöl-la' réajlë' queëli' Cristo naca tu le raza ládxe'ë Dios. Sal-la' gun bayudxi gátia' para gaca idú yöl-la' réajlë' queëli' Lë', udzëjada', en uzí'lena' xibë tsōzxōn yúgu'tëli'. ¹⁸ Lësca' caní ral-la' udzëjali' libí'ili', en uzí'lenli' tsōzxōn neda' xibë.

Ca tunbi' bi'i Timoteo, en bi'i Epafrodito

¹⁹ Channō caní rë'ënë' Xanru' Jesús, runa' löza isöl-la'tea'-bi' bi'i Timoteo ga zóali', ate' ni'irō udzëjada' cate' huödabi' ududíxjō'ibi' neda' cätëze raca queëli'. ²⁰ Túzibi' lëbi' rizá' ládxi'bi' ca na' rizá' ládxa'a neda', en ruí'ida' ládxi'bi' libí'ili'. ²¹ Yúgu'të bönni' ia'zica'rō, le naca quegacasë' tuí' ládxi'gaquië'. Biti' tuí' ládxi'gaquië' xichinë' Cristo. ²² Nōz quezili' ca benbi' bi'i Timoteo, ca na' burúajbi' dxi'a. Bénlenbi' neda' tsōzxōn dxin que didza' dxi'a, ate' nácabi' quia' ca tubi' bi'i bönni' rúnlenbi'-në' tsōzxōn xúzibi' dxin. ²³ Isöl-la'a-bi' bi'i Timoteo ga zóali' cate' inözda' nacxi gaca quia' ni' ²⁴ sal-la' ruzxōni ládxa'a-në' Xanru' gunë' ga uduyútea' libí'ili'.

²⁵ Lësca' réquida' run bayudxi isöl-la'a-bi' bí'i böchi'ru' Epafrodito ga zóali'. Bi'i ni bénlenbi' neda' tsōzxōn dxin queë' Cristo, ate' gudí-lalentu' tu' xihui'. Libí'í cázali' gusöl-la'li'-bi' ga zoa' para gácalenbi' neda'. ²⁶ Lë' cázabi' rë'ënni' uduyúbi' libí'ili', en ruí'ida' ládxi'bi' libí'ili' tu' biyōnili' ben bayá' queëbi'. ²⁷ Le nácátë güf'ibi', en guqui gátibi', pero buéchi' ládxe'ë-bi' Dios, en calëgasō lëbi', pero buéchi' ládxe'ë ca' neda', para cabí isëbirō ládxa'a ca na' risëbi ládxa'a na'a. ²⁸ Que lë ni na', gú'unirōda' isöl-la'a-bi' queëli' para gaca udzëjali' leyübölō cate' ulé'eli'-bi', en biti'rō isëbi ládxa'a neda'. ²⁹ Guli'sí' lu ná'ali' lëbi' lu yöl-la' rudzeja queëli', tu' nácabi' bi'í böchi'ru' réajlë'ëbi' Cristo. Guli'gún bal yúgu'të bōnachi nácagaca ca nácabi' lëbi', ³⁰ tu' guzóa bōnadxi queëbi' gátibi' tu' benbi' xichinë' Cristo, en tu' gúcalenbi' neda' uláz queëli'.

3

Le naca idú tsahui'

¹ Na'a, böchi' luzá'ado', buli'dzeja tu' nácali' tuz len Xanru'! Biti' rupixxaj neda' uzúaja' queëli' leyübölō lë na' buzúaja' queëli' zí'alō, tu' gácalen lë ni libí'ili'. ² Guli'gún chi'i cuinli' lógaca nupa ni' tuá' dō'. Nácagaca ca yugu' bō'cu' sínia', nupa na' tun bayudxi irugu lu xipëla'gaquië' bönni' le naca bë' nazí' lu ná'gaquië' xtídzë'ë Dios. ³ Rë'u nadéli'ru' lë na' naca idütë li, le naca bë' nazí' lu ná'aru' le runnë' queëru' Dios. Tu' réajlë'ëru' Dios, zóalene'

Dios Bö' Lá'ayi rë'u, ate' rudzëjaru' tu' nàcaru' tuz len Jesucristo. Biti' ca' ruzxöni lãdxi'ru' tu' le runru' rãcasö queëru'. ⁴ La'tu' ruzxöni lãdxi'ru' lë ni, lësca' neda' chinadëli'da' bi uzxöni lãdxa'a. Channö zoë' nu bönni' réquinë' ulë' tu' nacua' le nunë', neda' nadëli'röda' ca bönni' na':

⁵ Gurugu lu xipëla'a lë na' naca bë' cate' ni' gúquida' xunu' dza.

Gulja' ladaj di'a dza quegaca bönachi Israel.

Nababa' xzi'ini xi'sóë' Benjamín.

Xuz xiná'a nãcagaquië' idú bönachi hebreo.

Guca' bönni' yudo' fariseo ca na' bena' ca rinná bë' xibá queë' Dios.

⁶ Bë'da' lãdxa'a xibá na' ga bidxintë gudxia lãdxa'a bönachi queë' Cristo.

Tsca gaca gáquië' tsahui' tu bönni' tu' runë' ca rinná bë' xibá na', cuntu nu bi guca innë quia'.

⁷ Na'a, yúgu'të lë na' bena' xön zí'alö, nuzóa' tsölá'alö tu' néquida' queë' Cristo. ⁸ Calëgasö yugu' lë na', pero nuzóa' ca' tsölá'alö yúgu'të le dë, para gaca gurbe'eda-në' Xanru' Jesucristo, le nãcatëro lesaca' ca yúgu'të lë na'. Para gúnbe'eda' Lë' gurú'una' n'íllö yúgu'të, en réquida' naca ca bëbu, para uzi' a xibë' Cristo, ⁹ en para gaca' tuz len Lë'. Nuhuöaca' tsahui', calëga tu' runa' ca rinná bë' xibá na', pero Dios caz bunë' neda' tsahui' tu' réajlë'a Cristo, ca na' ruünë' tsahui' yúgu'të nupa ta'yéajlë' Lë'. ¹⁰ Rë'ënisida' gúnbë'a-në' Cristo, en sóalen yöl-la' huáca queë' Dios neda', lë na' busubán Cristo lu yöl-la' guti, ate' guna' Lë' tsözxön, qui' i saca' a ca na' gudfi' guzxaquë'ë Lë', en soa' sina' gátia' ca gútië' Lë', ¹¹ tu' runa' löza Dios, usubanë' ca' neda' lu yöl-la' guti.

Le runru' para idxinru' xilãtjaru'

¹² Biti' rnniá' chinadëli'da' yúgu'të lë ni gunnë' quia', en bití' réquida' chinaca' idú tsahui'. Na'a, runa' bayudxi idëli'da' yúgu'të lë na', tu' chibidëli'në' Jesucristo neda'. ¹³ Böchi' luzá'ado', bití' ca' nadëli'da' yugu' lë ni, pero tuz le runa' bayudxi. Ruzál-la lãdxa'a le chibidëli'da', ate' runa' bayudxi idëli'da' le za'. ¹⁴ Runa' ca runë' tu bönni' rixiti'dë'ë para idxinë' xilatjë' para idëli'në' tu le uzi'ë' xibé. Caní runa' para idëli'da' lë na' bulidzë' Dios rë'u para gata' queëru' ni' yehua' yubá tu' nàcaru' tuz len Jesucristo.

¹⁵ Caní ral-la' gunru' yúgu'tëru' rë'u, naca idú ca réajlë'ëru' Cristo. Channö réquili' bál-lali' ral-la' gunli' tu le yúbölö, rinábida-në' Dios uzëajni'inë' libí'ili'. ¹⁶ Na'a, ca naca lë na' bidëli'ru', ral-la' gúntica'siru' caní.

¹⁷ Böchi' luzá'ado', guli'gún ca na' runa' neda'. Chibululu'itu' libí'ili' ca ral-la' gunli'. Buli'yú ca tun nupa na' tun ca na' bentu' netu'. ¹⁸ Chigudxi caza' libí'ili' zían luzuí, ate' rea' libí'ili' leyúbölö len yöl-la' ribödxí quia', rnniá': Le tunë' zían bönni' run ga nãcagaquië' ca nupa bití' ta'lé e Cristo dxi'a, tu' tu'zöë' tsölá'alö le ben cazë' Lë' lë'e yaga cruz. ¹⁹ Yugu' bönni' tunë' caní, tsójgaquië' lu gué' gabila, tu' naca le ta'zësö lãdxi'gaquië' dios quegaquië', ate' tun ba zxön cuíngaquië' ni'a que lë na' ral-la' gun ga ulu'tuí'inë'. Tufi' lãdxi'së le dë yödzüliö ni, ²⁰ pero rë'u ni ruí' lãdxi'ru' le dë yehua' yubá ga nabábaru', en ribözaru' dza huödë' Xanru' Jesucristo, Nu rusölá rë'u, urúajë' yehua' yubá na'. ²¹ Lë' utsë'ë idütë le naca cázaru', le riniti caz, en gunë' ga huóaca ca naca idütë le naca cazë' Lë', le sóatica'sö. Caní gunë' len yöl-la' huáca zxön queë' le ugunë' dxin para inná bé'enë' yúgu'të.

4

Ral-la' udzëjalentica'siru'-në' Xanru'

¹ Que lë ni na', böchi' luzá'ado', guli'gaca tsutsu ca réajlë'ëli'-në' Xanru'. Nadxi'ide'eda' libí'ili', en rë'ënda' uduyú'a' libí'ili'. Runli' ga rudzëjada', en nácali' ca tu le ruzi'a xibé.

² Libí'ili', Evodia, en Sintique, ráta'yua' loli' gácali' tuz ca ral-la' ilaca nupa néquiguequi queë' Xanru'. ³ Na'a, böcha'a idú, rë'ënda' gácalenu' irópanu ni, tu' gulúnlennu neda' dxin, cate' bentu' libán que didza' dxi'a. Lësca' bulu'dzãguié' Clemente, en ia'zica'rë' luzá'a na' netu'. Chinazúajgaca lágaquië' yehua' yubá ga na' nazúajgaca lágaca nupa chinadëli'gaca yöl-la' na'bán idú.

⁴ Buli'dzëjalentica'sö-në' Xanru'!

Leyúbölö, rnniá': ¡Buli'dzeja!

⁵ ¡Guli'gaca dxi'i lãdxi' len yúgu'të bönachi!

¡Chizóa huödë' Xanru'!

⁶ Bití' ubi ugu'ili', pero guli'nabi-në' Dios le riquinili', en guli'guié': "Xclenu" ca naca yúgu'të lë na' rinábali'. ⁷ Dios gunë' ga gaca queé'li' le cuéqui dxi' icja lãdxi'do'oli', lë na' nadódirö bë' ca le gaca ila'yéajni'i bönachi. Lë na' ribequi dxi' icja lãdxi'do'oru' gun chi'i icja lãdxi'do'oli', en le rizá' lãdxi'li' tu' nácali' tuz len Jesucristo.

Ral-la' sa' lãdxi'ru' le nãcagaca dxi'a

⁸ Ga ruúdxitë, böchi' luzá'ado', guli'sá' lãdxi'li':

Yúgu'të le naca dxi'a, en le naca bica' ba,

en le naca idútë li, en le naca idú,
 en le naca tsahui, en le naca ba'a,
 en le naca lachi, en le ral-la' gunru' bal.

⁹Gulí'gún ca na' busédida' libí'ili', lë na' guzxi' lu ná'ali' tsca na' bē'lēna' libí'ili' didza', en tsca na' bēna' ga ni' zóali'. Dios, Nu runna queēru' le ribequi dxi icja lādxi'do'oru' sóalēnē' libí'ili'.

Le tsahui' gulunē' yugu' bönni' Filipos queē' Pablo

¹⁰Rudzéjalēnda'-nē' Xanru' tu' ruí'i lādxi'li' nēda' leyúbölö. Biti' rnniá' gul-la lādxi'li' nēda', pero biti' guta' queēli' lataj gácalēni' nēda' zí'aló. ¹¹Lēšca' caní, biti' rnniá' caní tu' zoa bi riyadzaj quia', tu' nazēda' tsaza lādxa'a le dēsö quia'. ¹²Chigudöda' lu yöl-la' yechi', en lu yöl-la' tsahui'. Nazēda' soa' nácati'tēs, sal-la' nöljada' o nabila riduna', en sal-la' dēda' quia' o zoa bi riyadzaj quia'. ¹³Yúgu'tē huazéqui'da' tu' rutipē' Cristo lādxa'a. ¹⁴Benli' dxi'a cate' ni' gúcalēni' nēda', en butípali' lādxa'a cate' gudí'i guzjáca'a.

¹⁵Libí'ili', bönni' Filipos, nöz quézili' ca guca quia' dza ni' cate' buzá'a luyú Macedonia, para yōjena' libán que didza' dxi'a. Tsca nacua' bönachi queē' Cristo, cúnturö nu gúcalēnēda', pero libí'isili' gúcalēni' nēda'. Gusöl-la'li' quia' bi bunödzejali', tu' guzxi' lu ná'ali' libán bēna' nēda'. ¹⁶Tsanni ni' guzóa' yödzö Tesalónica, tu chopa luzuí gusöl-la'li' quia' le bunödzejali' cate' ni' biyadzaj quia'. ¹⁷Biti' ruí'i lādxa'a bi si'a, pero rē'ēnda' gáta'rö queēli' le uzí'ili' xibé yehua' yubá. ¹⁸Rea' libí'ili': Chiguzxi'a yúgu'tē lē na' gusöl-la'li' quia', atē gudödité bē' tsca le biyádzjada'. Ben ga naca caní lē na' gusöl-la'li' lu ná'abi' bi' Epafrodito. Lē na' bunödzejali' naca ca tu le rilá' zixi le ridxintē lahuē' Dios, en ca tu le rigú'uru' lahuē' Dios le raza lādxi'ē. ¹⁹Dios gunnē' queēli' yúgu'tē le riyadzaj queēli', tsca naca yöl-la' tsahui' rō'ö yehua' yubá, tu' nácali' tuz len Jesucristo. ²⁰¡Gácatica'sö queē' Xúziru' Dios yöl-la' ba! ¡Ca' gaca!

Yugu' bönachi queē' Cristo tu' gapa Dios luzē'eguequi

²¹Uláz quia' nēda', guli'gapa Dios nupa ni' néquiguequi queē' Dios tu' nácgaca tuz len Jesucristo. Tu' gapē' Dios libí'ili' böchi' luzá'aru' núnagaquē' nēda' tsözxön ni. ²²Lēšca' yúgu'tē nupa ni' néquiguequi queē' Dios, tu' gapa Dios libí'ili', en lēšca' caní, yugu' bönni' huen dxin nacu' ē lidxi' bönni' rinná bē'ē idú luyú Roma tu' gapē' Dios libí'ili'.

²³Rinábida'-nē' Xanru' Jesucristo uzá' lādxi'ē queēli' yúgu'tēli'. ¡Ca' gaca!

DIDZA ' GUSÖL-LĒ'Ē PABLO YÖDZÖ COLOSAS

Pablo rugapë' Dios bönachi queë' Cristo nacu'ë Colosas

¹ Neda', Pablo, naca' gubáz queë' Jesucristo tu' rë'ënë' Dios caní, ate' dzágabi' bi'i böchi'ru' Timoteo neda'. ² Rugapa' Dios libí'ili', zóali' Colosas. Nácali' böchi'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxë'ë queëli', en gunë' ga soa dxi icja ládxí'do'oli'.

Pablo rulidzë' Dios, en rë' Lë': "Xclenu"

³ Rética'stu'-në' Dios, Xuzë' Xanru' Jesucristo: "Xclenu" cate' rulidztu'-në' Dios, en rinábitu'-në' bi gunë' queëli' ⁴ tu' biyönitu' didza' ca réajlë'ëli' Jesucristo, en ca nadxf'ili' yúgu'të nupa néquiquequi quez queë' Dios. ⁵ Caní runli' tu' runli' löza le nuzóë' Xanru' queëli' ni' yehua' yubá, lë na' biyönili' que cate' bë'lentu' libí'ili' didza', le naca löza sí'ili' ni'a que didza' dxi'a. ⁶ Didza' dxi'a na' bidxín queëli' ca ridxín ca' iduté yödzülió. Run dxin, en raca libán que, iduté yödzülió, la' tuz ca raca ga zóali', dza ni'te ga ridxintë na'a dza, cate' ni' biyönili', en bénbë'ëli' iduté le ruzá' ládxë'ë queëru' Dios. ⁷ Epafras, bönni' nadxf'iru'-në', busëdinë' libí'ili' lë ni. Lë' rúnlenë' netu' tsözxön dxin, en rácalenë' libí'ili'. Náquië' huen dxin idú queë' Cristo. ⁸ Bönni' ni gudíxjö'i'inë' netu' ca nadxf'ili' luzá'ali', ate' runë' Dios Bö' Lá'ayi ga gaca gunli' caní.

⁹ Que lë ni na' netu' ca', dza ni'te ga ridxintë na'a dza, tu' réquibe'tu' lë ni, biti' ca' rizóa dxitu' rulidztu'-në' Dios, en rinábitu'-në' gácalenë' libí'ili', en gunë' ga gúnbë'ëli' idú le rë'ëni quezinë' Lë', en gunnë' queëli' yúgu'të yöl-la' rácada', en yöl-la' réajni' le rigü'ë Dios Bö' Lá'ayi rë'u. ¹⁰ Caní rinábitu'-në' para gaca gunli' ca ral-la' ilún nupa néquiquequi queë' Xanru', gunli' yúgu'të le raza ládxë'ë Lë', en séqui'li' gunli' yúgu'të le naca dxi'a, en gácaró idú ca núnbë'ëli'-në' Dios. ¹¹ Rinábitu'-në' utipë' ládxí'li', en gunnë' queëli' yöl-la' huáca idú queë', para gaca guá' ilenli' yúgu'të, en cózali' zxön ladxí', en udzeja ládxí'li'. ¹² Lu yöl-la' rudzeja queëli' guli'gué' Dios Xuz: "Xclenu", tu' budödë' lu ná'aru' gata' queëru' lataj lu bení' queë', en gunru' tsözxön nupa néquiquequi quez queë'. ¹³ Dios Xuz na' busölë' rë'u lu na' nu rinná bë' lataj chul-la, en budödë' rë'u ga na' rinná bë'ë Zxí'ini cazë', Nu nadxf'inë'. ¹⁴ Zxí'inë' na' böá'uë' rë'u, tu' gútië' uláz queëru', ate' buniti lahuë' rë'u ca naca dul-la' gubágaru'.

Nuhuóácaru' tuz len Dios tu' gútië' Cristo uláz queëru'

¹⁵ Cristo náquië' tuz ca náquië' Dios caz, Nu biti' gaca ilé'eru'. Zoa cazë' Lë' zí'atëló ca yúgu'të le benë' Dios. ¹⁶ Lu në'ë' Cristo benë' Dios yúgu'të le dë, le nacua' lúzxiba, en le nacua' luyú, yugu' le rilé'eru', en yugu' le cabí gaca ilé'eru', lë na' náca gaca lataj lo, en yugu' yöl-la' unná bë', en le nápagaca yöl-la' zxön, en yugu' yöl-la' huáca que yehua' yubá, en que luyú ni. Yúgu'të benë' Dios lu në'ë' Cristo para uzi'ë xibë Lë'. ¹⁷ Cristo zoa cazë' zí'aló ca yúgu'të le dë, ate' yúgu'të nacua'tica'só ni'a queë' Lë'. ¹⁸ Cristo náquië' Xángaca bönachi queë', en runödzejë' quegaquië' yöl-la' na'bán. Náquië' ca' Nu gusi lo bubán tsaz lu yöl-la' guti. Zí'aló Lë' bubanë' tsaz lu yöl-la' guti para tsépísëtërë' ca yúgu'të le dë. ¹⁹ Caní guca, tu' guyaza ládxë'ë Dios Xuz sóalen Cristo iduté le naca cazë' Lë'. ²⁰ Ni'a que le benë' Cristo, Dios benë' ga gaca ulu' huóáca tuz len Lë' yúgu'të le dë, le nacua' luyú, en le nacua' lúzxiba. Bunë' léguequi tuz len Lë' tu' bulaljë' Cristo xichönë' cate' gútië' lë'e yaga cruz.

²¹ Libí'ili', zí'atëló nulá'alenli'-në' Dios, en gúcali' ca yugu' bönni' biti' ta'lë'enë' Dios dxi'a lu icja ládxí'do'oli' ni'a que dö' biá'ali', pero na'a chibunë' libí'ili' tuz len Lë'. ²² Caní guca, tu' budödë' cuinë' Cristo, en gútië' uláz queëli' para gaca usudxinë' libí'ili' lahuë' Dios, nácali' quez queë', en idú dxi'a, ate' cantu nu bi gaca innë' queëli'. ²³ Caní gaca channó ugá'anali' tsutsu ca réajlë'ëli' Cristo. Gácali' ca tu yu'u zxoá ga rë' xilibi zö'ó que, en biti' tseaj bö' ládxí'do'oli' ca runli' löza didza' dxi'a biyönili', lë na' raca libán que iduté yödzülió le benë' Dios zxan lúzxiba. Dios buzóë' neda', Pablo, para gaca' huen dxin que didza' dxi'a na'.

Dxin budödë' Dios lu në'ë' Pablo

²⁴ Rudzëjada' na'a ca naca le riguí' rizáca'a para gácalena' libí'ili', en ruódxi rizá'a lu iduté le naca' le riguí' rizáca'lena' tsözxön Cristo uláz que idú le naca cazë' Lë', le naca bönachi queë'. ²⁵ Dios benë' ga naca' huen dxin quegaca bönachi queë' Cristo, ate' runa' xichinë' Dios, le budödë' lu na'a guna' para gácalena' libí'ili', quíxjö'a idú ca naca xtídzë'ë Dios. ²⁶ Ruzéajni'ida' bönachi le nagachi', lë na' bigachi' dza ni'te, ate' cantu nu benbë' le, pero na'a Dios chibulú'inë' bönachi néquiquequi quez queë' ca naca que. ²⁷ Dios gú'uni quezinë' gunë' ga ilúnbë'e yugu' yöl-la' tsahui' idú que le nagachi' ni, lë na' ta'yóni bönachi izá'a. Caní rruna lë na' bigachi': "Cristo náquië' tuz len libí'ili', en náquië' le naca löza idéli'li' tsazli' lu bení' queë'."

²⁸ Runtu' libán queë' Cristo, en rusá'atu' láchxi'gaca yúgu'tè bönachi, ate' ruséditu' léguequi idütè yöl-la' réajni'i, para gaca usudxintu' yúgu'tè bönachi lahuë' Dios, naca idü láchxi'gaca tu' náacagaca tuz len Jesucristo. ²⁹ Para gaca caní runa' dxin, en ru'i láchxa' a údxi guna' lè ni, rugúna' dxin yöl-la' huáca idü na' runnè' Cristo quia'.

2

¹ Ré'enda' inözili' ru'ida' láchxa' runa' le gácalen libí'ili', enca' le gácalen bönachi yödzo Laodicea, en le gácalen ca' yúgu'tè nupa bití' ila'lé'eni neda'. ² Runa' caní para ila'dipa láchxi'gaquië', en iláquië' tuz lu yöl-la' nadxí'i, en ulu'zi'ë xibé yúgu'tè yöl-la' tsahui' que yöl-la' run löza idü le runna yöl-la' réajni'i queëru'. Caní raca para ilúmbë'è le bigachi' queë' Dios Xuz, lè na' naca cazë' Cristo. ³ Lu në'è Cristo ruzí'iru' xibé yúgu'tè yöl-la' tsahui' que yöl-la' rácadá', en yöl-la' réajni'i. ⁴ Lè ni rea' libí'ili', para cabí gaca nu si' ye'e libí'ili', nu gú'i didza' tséajlè'ëru' le cabí nácatë. ⁵ Sal-la' zoa' zi'tu' ga zóali' lu idütè le naca', lu bö' naca caza' zóalena' libí'ili', en rudzējada' tu' rilé'eda' rō'ō xibá queëli', en nácali' tsutsu ca réajlè'ëli' Cristo.

⁶ Que lè ni na', ca na' guzxi' lu ná'ali' Xanru' Jesucristo, lësca' caní ral-la' gunli' yúgu'tè le gunli', dzáquië' Lè' libí'ili'. ⁷ Ca na' nun ga ré' luí yaga, enca' ca na' nayás zō'ō lu xilibi zō'ō, guli'sóalen Cristo. Guli'sóa tsutsu ca réajlè'ëli' Lè', ca na' chinazédali'. Guli'guítica'së' Dios: "Xclenu'."

Le cubi nácaru' tu' dzágaru'-në' Cristo

⁸ Guli'gún chi'i cuinli' para cabí gú'ili' lataj nu si' ye'e libí'ili', nu ugún dxin yöl-la' réajni'i quégaca bönachi, en yugu' didza' ta'nasë' náacagaca idütè li, ca naca le ta'lébi tun bönachi, en ca naca le tu'sedi bönachi le naca que yödzoili ni, en caléga le naca xtádzë'è Cristo.

⁹ Idütè le naca cazë' Dios zóalen Cristo sal-la' böáquië' bönachi, ¹⁰ ate' libí'ili' nápalí' idütè le náquië' Dios tu' dzágali'-në' Cristo, Nu rinná be'e yúgu'tè nupa ta'nná bë', en yugu' bönni' dè lu ná'agaquië'. ¹¹ Narugu lu xipéla'gaquië' bönni' judío le rulu'fí dá'gaquië' Dios, pero libí'ili', tu' dzágali' Cristo, zóalen libí'ili' le rulu'fí néquili' queë' Dios, le cabí néquini lu ni'a lu ná'agaca bönachi. Yugu' bönni' judío tu'gúë' tu guídido', pero libí'ili', nadúa idütè yöl-la' bönachi queëli' le bënlenli' dul-la'. Caní naca queëli' tu' benli' tsözxön Cristo cate' gútië' lè'e yaga cruz. ¹² Cate' bidí'ali' nisa guca ca bigáchi'lenli'-në' Cristo tsözxön yeru ba, en bubánlenli'-në' tsözxön tu' guyéajlè'ëli' Dios, len yöl-la' huáca queë' busubanë' Cristo lu yöl-la' guti. ¹³ Zí'atélō gúcali' ca nupa chinátigaca tu' nözi dul-la' gubága'li', en bití' guzóalen libí'ili' le rulu'fí néquili' queë' Dios, pero na'a Dios nunë' ga nabánlenli'-në' tsözxön Cristo, en buniti lahuë' libí'ili' ca naca yúgu'tè dul-la' gubága'li'. ¹⁴ Dios busúluë' yugu' le nabága'ru' le nazúajgaca lu xibá queë', lè na' tu'zegui rë'u didza'. Bugúë' lè na' nabága'ru', en budë'è le lè'e yaga cruz ca tu le nabáguë'è Cristo. ¹⁵ Cate' gútië' Cristo lè'e yaga cruz, bugúë' yöl-la' huáca unná bë' quégaca bö' xihui' unná bë', en quégaca bö' xihui' dè lu në'éguequi yöl-la' huáca, tu' bulu'e lahui le náacagaca bö' xihui' na', en bugúë' idütè le guta' lu në'éguequi.

Ral-la' gú'i láchxi'ru' le naca que yehua' yubá

¹⁶ Que lè ni na', bití' gú'ili' lataj nu uzegui libí'ili' didza' ca naca le ré'aj ráguli', o tu' cabí runli' zxön yugu' dza lani, o tu' cabí runli' zxön beo' si' ruzë, o tu' cabí runli' zxön yugu' dza lá'ayi quégaca bönachi. ¹⁷ Yúgu'tè lè ni naca ca tu bixín que le ral-la' gaca, ate' le rulu'fí yúgu'tè lè ni náquië' Cristo caz. ¹⁸ Bití' gú'ili' lataj nu gun ga unítili' le ral-la' sí'ili', nu runda' bayudxi ga ilaca nöxaj láchxi'gaca bönachi, en ilún zxön yugu' gubáz lá'ayi. Tu'gutsa' cuíngaquië' le cabí bila'lé'enë', en tun ba zxön cuíngaquië' ca naca le dzō'ōsō íc'jagaquië' lu yöl-la' bónáchisō quégacaquië'. ¹⁹ Nu run caní bití' da' Cristo. Náquië' Xanru', en ruzóë' tsutsu idütè le naca cazë', le nácaru' rë'u. Rugahuë' le, en runë' ga naca tuz ni'a que le zeaj lu dxita lu bin, ate' rizxön idütè le naca cazë' ca ré'ënë' Dios uxönë' le.

²⁰ Libí'ili' chinátilenli'-në' Cristo para cabirō ila'nná be'e xibá que yödzoili libí'ili'. ¿Bixz que runli' tsca ni nácali' que yödzoili, en runli' ca ta'nná bë' xibá que? ²¹ Caní ta'nná yugu' xibá que yödzoili ni:

Bití' quítjanu' lè ni.

Bití' gagu' lè na'.

Bití' canu' ia'tú le dë.

²² Yúgu'tè lè ni ila'niti cate' chibugunru' léguequi dxin. Caní náacagaca le ta'nná bë' bönachi, en yugu' xibá nazí' lu në'éguequi. ²³ Le nácatë, yugu' xibá ni, téqui bönachi nápagaca yöl-la' réajni'i. Tun ga tu'lu'fí cuínguequi ca bönachi yudo', en ga tu'lu'fí cuínguequi nöxaj láchxi', en ga tu'saca' zí'gaca idütè le zeaj naca caz, pero xibá ni bití' ca' tácalen rë'u para gaca inná bé'ëru' yugu' le rizé láchxi'ru' lu yöl-la' bónáchisō queëru'.

3

¹ Na'a, channö nubánlenli-në' Cristo, guli'güi' ladxi' le nácagaca que yehua' yubá ga ni' rō'ë Cristo cuita lë'ë ibëla Dios, ga náquië' lo. ² Guli'sá' ladxi' le taca xitsá'alō, en calëga le taca luyú ni. ³ Naca queëli' tsa chinátili', ate' yól-la' na'bán queëli' rapa chi'ë Cristo ga ni' zoa cazë' Dios. ⁴ Cristo nabánili' libí'ili'. Cate' uluf'i lahuë' Lë', n'irō uluf'i loli' ca' libí'ili' tsōzxön len Lë' lu bení' queë'.

Yól-la' na'bán gula, en yól-la' na'bán cubi

⁵ Que lë ni na', guli'gún ga ila'niti le nacua' len libí'ili' que yōdzóliō ni: Yugu' le ruá' dō', en le nácagaca xihui', en yugu' le rizë lādxi'li' le ruá' dō', en yugu' le rizë lādxi'li' le naca xihui', en yól-la' ruhuidi'.

Yól-la' ruhuidi' naca lëbi ca nu reaj ladxi' budó' guiōj budó' yaga, tu' cabí reaj ladxi' Dios nu ruhuidi'. ⁶ Tun bōnachi yugu' le caní, ate' gunë' Dios xíguia' yúgu'të nupa bití' túngaca ca rnaa xtídžë'. ⁷ Yugu' dul-la' caní benli' ca' libí'ili' cate' ni' nadó'dilí' lu në'eguequi. ⁸ Na'a, bití'rō gunli' yugu' lë ni:

Bití'rō idzá'ali', en bití'rō leli'.

Bití'rō nu gunli' zí', en bití'rō innë xihui'li'.

Bití'rō innali' le ruá' dō'.

⁹ Bití' si' yé'eli' luzá'ali' tuli' ia'tuli' tu' chinucá'anali' le gúcali' zí'alō, en yugu' le benli' zí'alō. ¹⁰ Chinácali' bōnachi cubi, ate' tu tu dza ricúbili', ruhuóacarōli' ca naca Nu na' bun libí'ili', para gūnbë'ëli' Lë' idú ca náquië' Lë'. ¹¹ Tu' chidžágaru-në' Cristo:

Bití'rō nácaru' bōnni' narugu lu xipéla'gaquië' le naca bë' nu da' Dios, en bōnni' bití' narugu lu xipéla'gaquië' lë na' naca bë'.

Bití'rō nácaru' bōnni' ta'yéajni'inë', en bōnni' bití' ta'yéajni'inë'.

Bití'rō nácaru' bōnni' nadó'ogaquië', en bōnni' bití' nadó'ogaquië'.

Na'a, Cristo náquië' yúgu'të le nácagaca lesaca', en dzáguië' yúgu'tëru'.

¹² Dios nadxí'inë' libí'ili', en gurōë' libí'ili' para guéquili' quez queë'. Que lë ni na', ral-la': Gúf'i lādxi'li' luzá'ali', en gácali' dxi'i ladxi', en nōxaj ladxi', en cuidi' ladxi', en cōzali' zxön ladxi'.

¹³ Channö raca didza' bizxaj tuli' len ia'tuli', guli'guá' ilén luzá'ali' tuli' ia'tuli', en buli'niti lo luzá'ali' tuli' ia'tuli' ca na' benë' Cristo, buniti lahuë' libí'ili'. ¹⁴ Le nazaca'tërō ca yúgu'të lë ni, ral-la' idxi'ili' yúgu'të bōnachi, tu' naca yól-la' nadxí'i le run ga nácaru' tuz, en ga nácaru' idú. ¹⁵ Guli'gúr' lataj le ribequi dxi icja lādxi'do'oru' inná bë' lu icja lādxi'do'oli', lë na' runnë' Dios queëru'. Que lë ni na' bulidžë' libí'ili', para gácali' tuz lu idútë le naca cazë' Cristo. Guli'guië' Dios: "Xclenu".

¹⁶ Guli'sí' lu ná'ali' xtídžë'ë Cristo le gaca queëli' tu yól-la' tsahui' zxön. Tu' zóalen libí'ili' yól-la' réajni'i queë' Dios, buli'sedi, en buli'zëjni'i luzá'ali' tuli' ia'tuli'. Idú lādxi'li' guli'gula yugu' salmo queë' Dios, en yugu' le rul-la yól-la' ba, en yugu' le rul-la lá'ayi, ate' guiéli'-në' Dios: "Xclenu". ¹⁷ Yúgu'të le runli', le naca didza' ruí'ili' o le naca dxin runli', guli'gún yúgu'të lu Lë' Xanru' Jesús, en guiéli'-në' Dios Xuz: "Xclenu", dzáguië' Cristo libí'ili'.

Le ral-la' gunru' que luzá'aru' tu' néquiru' queë' Cristo

¹⁸ Libí'ili', nigula nutsaga ná'alenli' bōnni' queëli', guli'gún ca rnaa xtídza'gaquië' bōnni' que queëli' ca ral-la' gunli', tu' néquili' queë' Xanru'.

¹⁹ Libí'ili', bōnni' nutsaga ná'alenli' nigula queëli', guli'dxi'i nigula que queëli', en bití' uzéli' bach légacanu.

²⁰ Libí'ili', bi' ra'bán,

guli'gún ca rnaa yúgu'të xtídza'gaquië' xuz xiná'ali'. Lë ni raza lādxi'ë' Xanru'.

²¹ Libí'ili', núlōli' nácali' xúzgaca bí'ido', bití' tōdi bë' usína'li' zxf'inili', para cabí huōaj lādxi'gacabi'.

²² Libí'ili', núlōli' nácali' bōnni' nadó'ogaquië', guli'gún ca rnaa yúgu'të xtídza'gaquië' xanli' luyú ni. Calégasō gunli' caní cate' tu'yúé' libí'ili' ca na' tun nupa té'eni ilún ga ila'yaza lādxi'gaca bōnachi, pero idú lādxi'li' guli'gún xichíngaquië'

ca ral-la' ilún nupa tadxi Dios.

²³ Ca naca yúgu'tè le runli', guli'gún idú ládxi'li', gaca ca runli' xichiné' Xanru', en calégasò ca runli' xichíngaca bônachi.

²⁴ Chinóz quézili' ubi'è Xanru' queéli', gunnè' queéli' le chinupè'è Dios queégaca nupa náacagaca zxf'ini cazè'. Caní gaca, tu' runli' xichiné' Xanru' Jesucristo.

²⁵ Nu ruá' dō, ubi'è Xanru' que nu na' ca naca dō' ruá' nu na', tu' cabí utsè'è Dios ca ral-la' ubi'è que queégaca bônachi.

4

¹ Libí'ili', núlōli' nácali' xángaca bônachi, guli'gún le naca tsahui', en le naca dxi'a ca rugunli' dxin yugu' bōnni' huen dxin queéli'. Guli'tsōjné zoa ca' Xanli' yehua' yubá.

² Libí'ili', yúgu'téli', buli'lídatica'sé' Dios. Buli'subán ládxi'li' ulídzali'-nè' Dios, en guli'guíè: "Xclenu'."

³ La' ná'asò cate' rulídzali'-nè' Dios, guli'nabi-nè' ca' gácalenè' netu', en gunnè' netu' lataj quíxjō'otu' xtídzè'è Xanru', para gaca uzéajni'itu' bônachi le bigachi' ca naca queè' Cristo. Tu' runa' caní nadzuna' lidxi guíè ni. ⁴ Guli'nabi-nè' ca' Dios, gunnè' neda' lataj usalaj lá'ana' le bigachi' na' ca ral-la' guna'.

⁵ Lu yōl-la' réajni' queéli', guli'gún le runli' lógaca nupa biti' ta'yéajlè' Cristo. Guli'gunda' dxin yugu' dza uzá' ládxe'è Dios queéli', gunli' xichiné'. ⁶ Ral-la' guí'ili' didza' ca raza ládxe'è Dios, en ca ral-la' gun nupa néquiquequi queè'. Ral-la' inózili' ca' naca ral-la' ubi'ili' didza', bi guíèli' tu tu bônachi.

Yugu' bônachi queè' Cristo tu'gapa Dios luzè'eguequi

⁷ Tíquico quíxjōi'inè' libí'ili' le raca quia' ni. Náquiè' bōchi'ru' nadxi'iru'-nè'. Náquiè' ca' huen dxin idú queè' Xanru', en rúnlenè' neda' tsōzxón dxin queè' Xanru'. ⁸ Que lè ni na' risól-la'a-nè' ga zóali', para uzéajni'inè' libí'ili' le raca quia', en utipè' ládxi'li'. ⁹ Onésimo, bōchi'ru' na' nabábalenè' libí'ili' sa'yéajlenè' lè' tsōzxón. Náquiè' ca' bōchi'ru' nadxi'iru'-nè', en réajlè'è Xanru'. Chopè' ni ulu'siyōnnè' libí'ili' yúgu'tè le raca ni.

¹⁰ Aristarco, bōnni' na' yú'ulenè' neda' tsōzxón lidxi guíè rugapè' Dios libí'ili'. Bi'i Marcos, bi'i bōnni' queènu nigula zanè' Bernabè' rugápabi' Dios ca' libí'ili'. Chigudxa' libí'ili' bi gunli' queèbi' bi'i Marcos na'. Channō huídabi' ga zóali', guli'gún-bi' bal. ¹¹ Bōnni' ni lè' Jesús, en zoa ia'tú lè' Justo lèscá' rugapè' Dios libí'ili'. Nacuá' zían bônachi judío ta'yéajlè' Cristo, pero tsónnasè' ni ladaj bônachi judío tunè' dxin que le rinná bē'è Dios tsōzxón len neda', en tu'huí' zxóndè'è neda'. ¹² Epafras, bōnni' ni nababè' ca' libí'ili' rugapè' Dios libí'ili'. Náquiè' huen dxin queè' Cristo, en idú ládxe'è rulídzè' Dios, en ráta'yutica'sé' lahuè' gácalenè' libí'ili' para gácali' idú ládxi', en sóali' ca' sina' gunli' yúgu'tè le ré'eni quézinè' Dios. ¹³ Runa' ba nalí queè' Epafras na', ruí'ida' ládxe'è libí'ili' enca' nupa nacua' yōdzō Laodicea, en nupa nacua' yōdzō Hierápolis. ¹⁴ Demas, enca' Lucas tu'gapè' Dios libí'ili'. Náquiè' Lucas bōnni' na' ruúnè' bônachi, ate' nadxi'iru'-nè'.

¹⁵ Guli'gapa Dios bōchi'ru' nacué' Laodicea, enca' Ninfas, en bônachi queè' Cristo nacua' lídxinu Ninfas na'. ¹⁶ Cate' údxi ulábalí' guichi ni ga ni' zóali', guli'gún ga ulu'laba le bônachi queè' Cristo nacua' Laodicea. Buli'laba ca' libí'ili' guichi na' ila'sól-la' bônachi Laodicea na' queéli'. ¹⁷ Guli'guíè' Arquipo: "Bè' ládxi'u' gunu' dxin na' budódè' Xanru' lu no'o."

¹⁸ Neda', Pablo, ruzúaj caza' lu guichi dídzá'do' ni, rnniá': Rugapa' Dios libí'ili'. Guli'tsōjné ca raca quia' nadzuna' lidxi guíè ni. Rinábida'-nè' Dios uzá' ládxe'è queéli' le naca dxi'a. ¡Ca' gaca!

DIDZA' ZÍ'ALÖ GUSÖL-LĒ'Ē PABLO YÖDZÖ TESALÓNICA

Pablo rugapë' Dios bönachi queë' Cristo nacua' Tesalónica

¹ Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquië' neda' Silvano, en bi'i Timoteo. Rinábida'-në' Xúziru' Dios, enca' Xanru' Jesucristo uzá' ládxë'ë queë'li', en gunë' ga soa dxi icja ládx'i'do'oli'.

Yugu' le taca bë' ta'yéajlë' bönachi Tesalónica Dios

² Rética'stu'-në' Dios: "Xclenu'" cate' röjnetu' ca naca queë'li' yúgu'të'li'. Röjnética'stu' libí'ili', bi rinábitu'-në' Dios ni'a queë'li' cate' rulidztu'-në'. ³ Röjnética'stu' lahuë' Xúziru' Dios ca naca le runli' tu' réajlë'ë'li' Cristo, en ca naca dxin runli' tu' nadxí'ili'-në', en ca na' nácatca'sili' tsutsu tu' runli' löza Xanru' Jesucristo. ⁴ Böchi' luzá'atu', Dios nadxí'inë' libí'ili', ate' nöztu' gurö cazë' Lë' libí'ili'. ⁵ Caní naca, tu' bidxín queë'li' didza' dxi'a runtu' libán que, calëga len dídza'sö, pero lësca' len yöl-la' huáca bidxín queë'li', ate' Dios Bö' Lá'ayi benë' tsutsu le, ate' idú ládx'i'li' benli' löza le. Nöz quézili' ca gúcatu' ga zóali' tu' nadxí'itu' libí'ili'.

⁶ Libí'ili' butsa' cuinli', ate' runli' ca runtu' netu', enca' ca benë' Xanru', tu' guzxi' lu ná'ali' xtídzë', ate' sal-la' gudí'i guzxacá'da'ali', budzëjali' tu' zóalenë' Dios Bö' Lá'ayi libí'ili'. ⁷ Caní naca, chinácali' tu' le naca bë' rética yúgu'të bönachi ta'yéajlë' Cristo nacua' luyú Macedonia, en luyú Acaya. ⁸ Caní naca, tu' guzë xtídzë'ë Xanru' ni'a queë'li'. Calëgasö luyú Macedonia, en luyú Acaya, pero lësca' yúgu'të lataj guzë didza' ca réajlë'ë'li' Dios. Caní naca, biti' bi run bayudxi innatu', ⁹ tu' ta'guixjö' lá' léguequisö bönachi ni' queë'tu' ca benli' netu' bal, en ca na' butsa' cuinli'. Bucá'anali' yugu' budö' guiöj budö' yaga, en böacali' queë' Dios para gunli' xichinë' Dios ban, Nu naca idú Dios. ¹⁰ Na'a, ribözali' dza huödë' Xzi'inë' Dios, írúajë' yehua' yubá. Dios busubanë' Lë' lu yöl-la' guti. Nu ni naca Jesús, Nu rusölá rë'u lu dul-la', para cabí soa le gun ga ichúguë' Dios queë'ru' dza si' za'.

2

Xichinë' Dios benë' Pablo yödzö Tesalónica

¹ Böchi' luzá'atu', nöz quézili' biti' guca nítisö dxin queë' Dios bentu' cate' ni' bidxintu' ga zóali'. ² Nözili' ca guca queë'tu' lu yödzö Filipos, ca na' gudí'i guzxacá'tu', ate' guluá' dö' bönachi ni' queë'tu'. Ní'irö cate' bidxintu' ga zóali' gúcatu' rugu ladxí' tu' guzöalenë' Dios queë'ru' netu', ate' bentu' libán loli' que didza' dxi'a le budödë' Dios lu na'tu'. Caní bentu' sal-la' gula'dá'baga'da' bönachi ládzali' netu'. ³ Cate' ni' guchízatu' icja nágali' xtídzë'ë Dios, bë'ëtu' didza', calëga tu' nazí'i ye'e netu', en calëga tu' bi guzë ládx'i'tu' le dë queë'li', en biti' guzxi' ye'etu' libí'ili'. ⁴ Tu' nuzxöni ládxë'ë Dios netu', budödë' lu na'tu' guntu' libán que didza' dxi'a queë', ate' canisö ruí'itu' didza'. ⁵ Nöz quézili' catu caz bë'lentu' libí'ili' didza' le gun zxön libí'ili', en biti' gulëaj tsahui' cuintu' ca run nu bi rizë ladxí' le dë queë'li'. Nöz quézinë' Dios naca caní. ⁶ Biti' gudí'ljatu' yöl-la' ba le naca que yödzöliö ni, lë na' cú'uli' libí'ili' netu', en calëga le ila'gú'u bönachi netu'. Sal-la' dë lu na'tu' inná bë'etu' libí'ili' tu' nácatu' gubáz nasöl-lë'ë Cristo ⁷ guzöalentu' libí'ili' dxi'i ládx'i'do', en bentu' ca runnu xiná'agacabi' bi'i huë'ënidö', run chí'ínu légacabi' dxi'i ládx'i'do'. ⁸ Caní guca, bidxí'ide'etu' libí'ili', ga bidxintë gú'unitu' udödítu' lu ná'ali', calëgasö didza' dxi'a queë' Dios, pero lá'tu'biquí' udödi caztu' yöl-la' na'bán queë'tu', tu' nadxí'ide'etu' libí'ili'. ⁹ Röjneli', böchi' luzá'atu', ca na' guca cate' ni' bentu' libán loli' que didza' dxi'a queë' Dios, ca bëntica'stu' dxin zi'i, ate' rëla, en të dza bentu' dxin para cabí usaca' zí'itu' nituli' libí'ili'.

¹⁰ Libí'ili' na' réajlë'ë'li' Cristo, huáca gunli' ba nalí, ate' nözinë' Dios ca na' gudá'lentü' libí'ili' idú ca raza ládxë'ë Dios, en idú dxi'ado', en ca na' cuntu nu gaca bi innë que. ¹¹ Lësca' caní nözili' ca bentu' ca runë' tu' bönni' quëgacabi' xzi'inë', guchízatu' icja nágali', en butípatu' ládx'i'li' tu tuli'. ¹² Busá'atu' ládx'i'li' gunli' ca ral-la' gun nu nequí queë' Dios. Lë cazë' bulidzë' libí'ili' para gaca tsú'uli' ga na' rinná bë'ë Lë' lu bení' queë'.

¹³ Que lë ni na' ca', rética'stu'-në' Dios: "Xclenu'". Caní runtu' tu' guzxi' lu ná'ali' xtídzë'ë Dios le biyönili' bë'ëtu' didza', calëga ca xtídzä' bönáchisö, pero ca le nácatë naca, xtídzë'ë Dios naca. Xtídzë'ë na' run dxin lu icja ládx'i'do'oli' libí'ili', réajlë'ë'li' Cristo. ¹⁴ Böchi' luzá'atu', raca queë'li' ca raca quëgaca bönachi queë' Dios, nupa néquiguequi queë' Jesucristo luyú Judea. Caní naca tu' chigudí'i guzxacá'da'ali' lu ná'agaca bönachi uláz queë'li', lëbisö ca na' gula'guí' gula'záquië' légaquië' lu ná'agaca bönachi uláz quëgaquië', nupa ni' náagaca bönni' judío. ¹⁵ Yugu' bönni' judío na' gulútië' Xanru' Jesús, en gulútië' ca yugu' bönni' gulu'ë didza' uláz queë' Dios. Gula'bía ládx'i'gaquië', en bulu'láguë' ca' netu'. Biti' tunë' le raza ládxë'ë Dios, tu' cabí ta'lé'enë' dxi'a yúgu'të bönachi izá'a. ¹⁶ Tu' záguë'ë ca' xinöztu', para cabí

guntu' libán lógaca bônachi izá'a na' bití' nabábagaca légaquié', tu' ruí'ilentu' léguequi didza' para ulu'lágaca. Caní raca, tu' zántica'sé' dul-la' nabága'gaquié', en chinabága'gaquié' xíguia' le run ga ichúguié' Dios quégaquié'.

Pablo ré'ëné' tsójjyé' bôchi'ru' nacu'ë Tesalónica

¹⁷ Na'a, bôchi' luzá'atu', ruhuí'initu' ca runé' tu bônni' uzébi tu' nulá'alentu' libí'ili' tu chí'ido', pero sal-la' bití' rilé'etu' libí'ili', bití' nál-la ládxi'tu' libí'ili'. Que lé ni na', ruí' ládxi'rôtu' ulé'etu' loli', tu' rizéda' ládxi'tu' guntu' caní. ¹⁸ Que lé ni na' ca' gú'unitu' guídatu' ga zóali', ate' neda', Pablo, le nácaté' bē' ládxa'a guída' chopá tsonna luzuí, pero Satanás, tu' xihui', buzaga' xinóztu'. ¹⁹ ¿Bizxi caz naca le run ga runtu' löza, o le run ga rudzéjatu', o le ral-la' idéli'tu', le uzí'tu' xibé lahué' Xanru' Jesucristo cate' huödé'? ¿Naru' cabí libí'í cázali' na'? ²⁰ Libí'í cázali' nácali' le run ga nácatu' bica' ba, en le run ga rudzéjatu'.

3

¹ Que lé ni na', cate' bití'rô guca guá' ilentu', ben xtídza'tu' ugá'anatu' chópatu' lu yödzo Atenas, ² ate' gusól-la'tu'-bi' bi'í bôchi'ru', Timoteo ga zóali'. Nácabi' bi'í huen dxin queé' Dios, en rúnlenbi' neda' tsózxón libán que didza' dxi'a queé' Cristo. Gusól-la'tu'-bi' ga zóali' para cuéqui' libí'ili' tsutsu, en ichízabi' icja nágali' ca ral-la' tséajlé'éli' Cristo, ³ para cabí soa nu gaca chopá ladxí' ni'a que le tu'saca' zí' bônachi ni netu'. Nöz quézili' zóaru' yödzoili' ni para guá' ilenru' le caní. ⁴ Lésca' cate' ni' guzóalentu' libí'ili', busiyóntu' libí'ili' ca chizóa gaca le ulu'saca' zí' rētu', le gaca ca na' chiguca queétu', ate' nöz quézili' lé na'. ⁵ Que lé ni na', cate' bití'rô guca guá' ilena', gusól-la'a-bi' bi'í Timoteo ga zóali', para ududíxjoi'ibi' neda' ca naca queéli' ca réajlé'éli'-nē' Cristo, en channō cabí gulú'u tu' xihui' libí'ili' nōza dul-la', nu na' rigú'u bônachi nōza dul-la', en channō cabí bōaca nítisō dxin na' bentu' ga zóali'.

⁶ Cate' buzá'abi' bi'í Timoteo ga zóali', en budxinbi' ga zóatu', busiyónbi' netu' le naca dxi'a. Bē'ēbi' didza' ca na' réajlé'éli' Cristo, en ca na' nadxí'igacali'-nē' yugu' bôchi' luzá'aru', en ca na', lu yól-la' dxi'í ladxí' queéli' rōjnética'sili' netu', enca' ca na' raca ládxi'li' ulé'eli' netu', ca na' netu' raca ládxi'tu' ca' ulé'etu' libí'ili'. ⁷ Que lé ni na', bôchi' luzá'atu', cate' ni' gudí' guzxáca'tu' yúgu'té lé ni, en zían le gaca queétu', bidxin didza' queétu' le buí' zxon netu' cate' biyónitu' ca réajlé'éli'-nē' Cristo. ⁸ Na'a, nuhuóaca ládxi'tu' tu' riyónitu' rō'oli' tsutsu ca réajlé'éli'-nē' Xanru'. ⁹ ¿Nacxi caz gaca guíetu'-nē' Dios: "Xclenu'" ca ral-la' guntu' ni'a que yúgu'té le run ga rudzeja ládxi'tu' lahué' Dios queéru' ni'a que le nácali' libí'ili'? ¹⁰ Bayudxi rulidztu'-nē' Dios, en rinábitu'-nē' rēla, en tē dza para gaca ulé'etu' libí'ili', en usá'atu' le riyadzaj queéli' ca naca le réajlé'éli'-nē' Cristo.

¹¹ Na'a rinábitu'-nē' Xúziru' Dios, enca' Xanru' Jesucristo, cu'ē netu' nōza ga idxintu' ga zóali'. ¹² Lésca' rinábitu'-nē' Xanru' gunē' ga gala, en gaca idú ca nadxí'ili' luzá'ali' tulí' ia'tuli', en ca nadxí'ili' yúgu'té bônachi, ca na' netu' nadxí'itu' ca' libí'ili'. ¹³ Rinábitu'-nē' guné' ga gaca tsutsu, en idú dxi'a icja ládxi'do'oli' lahué' Xúziru' Dios ca sa'yéaj le naca lá'ayi, ate' guné' caní ga idxinrō dza huödé' Xanru' Jesucristo, dzágagaca bônachi lá'ayi queé' Lé'.

4

Le runru' le raza ládxi'ë Dios

¹ Ia'stú, bôchi' luzá'atu', ni'a queé' Xanru' Jesús ráta'yutu' loli', en richízatu' icja nágali' para gunlí' ca naca le chinazédali' lu na'tu' ca ral-la' gunlí' le raza ládxi'ë Dios. Ca na' chirunlí', ca' ral-la' gúntica'sili'.

² Chinöz quézili' yugu' le gunná bé'etu' libí'ili' uláz queé' Xanru' Jesús. ³ Le ré'ëné' Dios naca gácali' idú dxi'a, en bití'rô gunlí' le cabí naca tsahui', ⁴ en inözili' tu' tuli' nacxi ral-la' sóaleni'-nu nigula que queéli' idú ca sa'yéaj le naca lá'ayi, en gunlí' légacanu bal. ⁵ Bití' ral-la' sóaleni'-nu nigula queéli' lu yól-la' rizé ladxí' le ruá' dō', ca na' tun bônachi bití' nabábagaca Dios, en bití' núbé'gaca Dios. ⁶ Ca nácgaca lé ni, cuntú nu ral-la' tōdi bē', en cabí si' y'e bôchi' luzé'e bagáchi'sō, tu' ichúguié' Lé cazé' Xanru' quégaca yúgu'té nupa tun le caní, guné' ca na' chigúdxitu' libí'ili', en bentu' ba nalí que loli'. ⁷ Dios bulidzē' rē'u, caléga para gunru' le ruá' dō', pero para gácaru' idú dxi'a. ⁸ Caní naca, nu ruzóa tsólá'aló lé ni, caléga bônáchisō ruzóa tsólá'aló, pero Dios caz ruzóa tsólá'aló, tu' gusól-lē'ë Lé cazé' Dios Bō' Lá'ayi queéru', Nu ruí' caní didza'.

⁹ Bití' run bayudxi uzúaja' queéli' lu guichi ca ral-la' idxí'igacali'-nē' bôchi' luzá'ali', tu' chinazédali' la' libí'isili' lu nē'ë Dios idxí'ili' luzá'ali' tuli' ia'tuli'. ¹⁰ Le nácaté' nadxí'igacali'-nē' yúgu'té bôchi' luzá'aru' nacu'ë luyú Macedonia. Na'a, ráta'yutu' loli', bôchi' luzá'atu', para idxí'igacaróli'-nē' ca' yúgu'té bôchi' luzá'ali'. ¹¹ Ráta'yutu' loli' ca', güí' ládxi'li' cōzali' dxí'ado', en gunlí' yugu' le dē lu ná'sili', en gunlí' dxin len na'a cuinli' ca na' chigunná bé'etu' libí'ili'. ¹² Gunná bé'etu' libí'ili' caní para gaca gunlí' le naca dxí'ado' lógaca nupa bití' nabábagaca libí'ili', en caní gaca, bití' bi yadzaj queéli'.

Ca gaca cate' huödë' Xanru' Jesucristo

¹³ Lësca', böchi' luzá'atu', rë'ënitü' inözili' ca raca quegaca nupa chinátigaca, para cabí huí'inili' ca tun ia'zica'rö bönachi bití' zoa le tun löza. ¹⁴ Channö réajlë'ëru' gütie' Jesús, en bubanë', lësca' caní ral-la' uzxöni ládxi'ru'-në' Dios gunë' ga huödälengaca tsözxön Jesús nupa ni' chigulati, en gula'yéajlë' Lë'.

¹⁵ Que lë ni na' riguixjöi'itu' libí'ili' xtídzë'ë Xanru' le rnna caní: "Rë'u ni zóaru' nabanru', en ugá'anaru' ga idxinrö dza huödë' Xanru' Jesucristo, bití' tsöjtságaru'-në' Cristo zí'alö ca nupa chigulati." ¹⁶ Caní gaca, tu' huötjé' Lë cazë' Xanru', en irúajë' yehua' yubá, atë' yön chí'ë, len yöl-la' unná bë' ulidzë', atë' yön ca' chí'ë gubáz lá'ayi lo, atë' yön ca' luzu ucödxë' Dios, atë' ulu'bán nupa na' chigulati, en gula'yéajlë' Cristo. ¹⁷ Ní'irö rë'u ni zóaru' nabanru', en nagá'anaru' luyú ni, uchisë' rë'u tsözxön len léguequi lu böaj lúzxiba para tsöjtságaru'-në' Xanru' lu bö'ös. Caní gaca, sóaléntica'siru'-në' Xanru'. ¹⁸ Que lë ni na', guli'huí' zxön luzá'ali' tuli' ia'tuli' ca nácagaca didza' ni.

5

¹ Na'a, ca naca dza na', o rëla na' cate' ilaca lë ni, bití' run bayudxi uzúaja' queéli' lu guichi, böchi' luzá'atu'. ² Libí'ili' chinöz quezili' dxi'a ca gaca dza cate' huödë' Xanru'. Idxinë' tsárido'os ca ridxinë' gubán chí'i dzö'ölö. ³ Cate' ila'nná bönachi: "Raca dxi'a queëru', en bití' bi gaca queëru'", ní'irö lá' idxintë' le usuniti léguequi, lë na' idxín queguequi ca na' ridxín le rigu' i rizáca'nu nigula na' chizóa sóabi' bí'ido' queënu, atë' cuntü nu nutsa' ladaj bönachi yödzóliö ni nu ulá cate' gaca lë na' gaca dza na'. ⁴ Na'a, böchi' luzá'atu', bití' zóali' chul-la niti, en que lë ni na' bití' idxín dza ni' queéli' bagáchi'só ca ridxinë' bönni' gubán. ⁵ Yúgu'tëli' nácali' bönachi que bení, en que lahui' dza. Bití' nácaru' bönachi que chí'i dzö'ölö, en calëga que le naca chul-la. ⁶ Que lë ni na', bití' ral-la' tödi yëla loru' ca raca quegaca nupa bití' nabábagaca rë'u, pero ral-la' usubán ládxi'ru', en cözaru' ba'a ládxi'do'. ⁷ Nupa tasi, chí'i dzö'ölö tasi, en nupa ta'zudxi, chí'i dzö'ölö ca' ta'zudxi. ⁸ Na'a, rë'u ni, nácaru' que lahui' dza, en ral-la' cözaru' ba'a ládxi'do', tu' chinácuru' zxaru' le run chí'i rë'u, le naca yöl-la' réajlë' queëru' Dios, en yöl-la' nadxí'i, atë' le runru' löza uláru' naca ca tu lu'u guié le run chí'i ícjaru'. ⁹ Caní naca, tu' nuzöë' Dios rë'u ni, calëga para idxinru' ga ichúguie' queëru', pero para uláru' tu' ruzxöni ládxi'ru'-në' Xanru' Jesucristo, ¹⁰ tu' gütie' Jesús uláz queëru' para sóaru' íbanru' tsözxön len Lë' cate' huödë', sal-la' chinátiru' o sóaru' íbanru' dza ni'. ¹¹ Que lë ni na' ral-la' utípalí' ládxi'li' tuli' ia'tuli', en gunlí' tsutsu tuli' ia'tuli' ca na' chirunlí'.

Pablo richizië' icja nágagaquië' böchi' luzë'ë ta'yéajlë'ë Cristo

¹² Ráta'yutu' loli', böchi' luzá'atu', gúnbë'ëli' nupa tun xichinë' Xanru' ga zóali', nupa na' ta'nná be'e libí'ili' uláz queë' Xanru', en tu'sá ládxi'li'. ¹³ Ráta'yutu' loli' ca', gunlí' légaquië' bal lu yöl-la' nadxí'i queéli', tu' tunë' dxin na'. Guli'cöza dxi'ado' tuli' len ia'tuli'.

¹⁴ Lësca' caní richizatu' icja nágali', böchi' luzá'atu', para usá'ali' ládxi'gaca nupa bití' túngaca dxin, en utípalí' ládxi'gaca nupa tu'huöaj ládxi'guequi, en gácalenli' nupa bití' naca tsutsu ca ta'yéajlë' Cristo, en gácali' nóxaj ládxi' lógaca yúgu'të bönachi.

¹⁵ Guli'gún chí'i cuinli' para cabí uzí' lëbi luzá'ali', en cabí guá'ali' dö' que nu ruá' dö' queéli', pero guli'güi' ládxi'li' gúntica'sili' le naca dxi'a que luzá'ali' tuli' ia'tuli', en quegaca yúgu'të bönachi.

¹⁶ Bulí'dzëjatica'sö,

¹⁷ en bulí'lidzatica'së' Dios,

¹⁸ en guli'guié' Lë: "Xclenu'."

Caní ral-la' gunlí' ni'a que yúgu'të le raca queéli', tu' nácagaca lë ni le ré'ënë' Dios gunlí' tu' nácali' queë' Jesucristo.

¹⁹ Bití' uzóa dxili' le rulídzatica'së' Dios Bö' Lá'ayi libí'ili'.

²⁰ Bití' uzóali' tsólá'alö xtídzë'ë bönni' ru'ë didza' uláz queë' Dios.

²¹ Guli'sí' bë' yúgu'të, en guli'sí' lu ná'ali' le naca dxi'a.

²² Bití' bí' gútsa'li' le ruá' dö'.

²³ Lë cazë' Dios, Nu run ga zoa dxi'icja ládxi'do'oru', gunë' ga gácali' idú dxi'a, en gun chí'ë bö' naca cázali', en icja ládxi'do'oli', en idütë le nácali', atë' cuntü nu gaca bi innë queéli' dza ni' huödë' Xanru' Jesucristo. ²⁴ Runë' Dios ca rnnë', Bönni' na' bulidzë' libí'ili'. Lë cazë' gunë' yugu' lë ni.

Pablo rigu'ë yugu' böchi' luzë'ë lu në'ë Dios

²⁵ Böchi' luzá'atu', bulí'lidzë' Dios, en inábili'-në' gácalenë' netu'.

²⁶ Bulí'gapa Dios yúgu'të böchi' luzá'aru', en unída'li' légaquië' lu yöl-la' nadxí'i queéli'.

²⁷ Ní'a queë' Xanru' Dios ruchi'a libí'ili' ulábali' guichi ni lógaca yúgu'të böchi' luzá'aru' nabábagaqueië' Cristo.

²⁸ Rinábida'-në' Xanru' Jesucristo uzá' ládxi'ë queéli' le nácagaca dxi'a queë'. ¡ca' gaca!

DIDZA' BUROPI GUSÖL-LË'Ë PABLO YÖDZÖ TESALÓNICA

Pablo rugapë' Dios bönachi queë' Cristo nacué' Tesalónica

¹ Neda', Pablo, rugapa' Dios libí'ili', zóali' Tesalónica. Nácali' queë' Xúziru' Dios, enca' queë' Xanru' Jesucristo. Silvano, en bi'i Timoteo dzágagaquië' neda'. ² Rinábitu' Xúziru' Dios, en Xanru' Jesucristo, uzá' ládxë'ë queéli', en gunë' ga soa dxi icja ládxi'do'oli'.

Dios ichúguië' quégaca bönachi dul-la' ila'nítigaca cate' huödë' Cristo

³ Ral-la' guítica'stu'-në' Dios: "Xclenu'" ca naca queéli', böchi' luzá'atu', ate' naca dxi'a guntu' caní, tu' zeaj rácarö idú ca réajlé'ëli'-në' Dios. Lësca' caní, ca nadxí'ili' luzá'ali' tulí' ia'tulí' zeaj rácarö idú. ⁴ Que lë ni na', len yöl-la' rudzeja riguixjö'ötu' ca naca queéli' lógaca bönachi queë' Dios ni, tu' ribözali' zxön ladxi', en réajlé'ëli' Dios sal-la' ta'biada' ládxi'gaca bönachi libí'ili', en riguí' rizáca'da'ali', pero ruá' rilenlí' yúgu'të. ⁵ Yugu' lë ni taca bë' naca tsahuí' ca ruchi'a rusööröë' Dios bönachi. Ru'ë lataj riguí' rizáca'li' na'a, para gácali' lesaca' tsázali' ga ni rinná bë'ë Lë'.

⁶ Naca tsahuí' ca gunë' Dios, ubi'ë quégaca nupa tu'saca' zi' libí'ili', gunë' ga ila'guí' ila'zaca' nupa na'. ⁷ Ia'stú, libí'ili' riguí' rizáca'li' na'a, ate' ubi'ë Dios queéli', gunë' ga uzí' ládxi'li' tsözxön len netu', dza ni ilá' lahuë' Xanru' Jesucristo, cate' irúajë' yehua' yubá. Yugu' gubáz lá'ayi ni'a në'ë ilunë' Lë' tsözxön, en ulu'lu'ë lahui yöl-la' huáca zxön queë'. ⁸ Ilá' lahuë' Cristo dza ni' ca tu guí' zxön cate' ni' gunë' zi' nupa bití' núbë'gaca Dios, en bití' túngaca ca rnna didza' dxi'a queë' Xanru' Jesucristo. ⁹ Yugu' bönni' caní, uzí' lëbë' légaquië', ate' tsaz tsöjtsázagaquië' lu guí' gabila. Ila'cuitë' tsaz lahuë' Xanru', ga nalá'gaca yöl-la' zxön queë', en yöl-la' huáca queë'. ¹⁰ Caní gaca dza ni' cate' huödë' para gaca queë' yöl-la' ba ni'a que le nácgaca bönachi lá'ayi queë', ate' ulu'bani ni'a que le benë' ga nácgaca yúgu'të nupa ta'yéajlë' Lë'. Caní gaca ca' queéli' tu' guyéajlë'ëli' le bentu' ba nalí que loli' ca naca queë' Jesús.

¹¹ Que lë ni na' ca', rulídzatica'stu'-në' Dios queëru', en rinábitu'-në' gácalenë' libí'ili', en gunë' ga gácali' lesaca' idéli'li' lë na' bulídzë' libí'ili' para uzí'ili' xibë. Lësca' rinábitu'-në' gunë' ga gaca idú yúgu'të le ruí' ládxi'li' gunlí' le naca dxi'a, en yúgu'të dxin runlí' lu yöl-la' réajlë' queéli' Lë'. Len yöl-la' huáca queë' Dios huáca gunlí' lë ni. ¹² Caní gaca, gaca yöl-la' ba que Lë' Xanru' Jesucristo ni'a que le runlí', ate' gácali' libí'ili' bica' ba ni'a que le gunë' Lë', gaca ca naca le buzá' ládxë'ë queéli' Dios queëru', enca' Xanru' Jesucristo.

2

Ulu'i lahuë' Bönni' Xihui'

¹ Na'a, ca naca que dza huödë' Xanru' Jesucristo, en ca gaca, udutubë' rë'u queë' Lë', ráta'yutu' loli', böchi' luzá'atu', ² para cabí guí'ili' lataj nu gun chixi libí'ili' ca nácgaca le guzxi' lu ná'ali'. Bití' cuéqui böniga icja ládxi'do'oli' ni'a que bi ta'nnë' bönni' ta'zi' yë'ë, ta'nnë' zóalenë' Dios Bö' Lá'ayi légaquië', o ni'a que bi didza' tu'i bönachi, o ni'a que bi nazúaj tu lu guichi ta'nnë' netu' gusöl-la'tu', le rnna: "Chigudödi dza huödë' Xanru'." ³ Bití' ca' guí'ili' lataj nu si' ye'e libí'ili', tu' cabí idxín dza ni' huödë' Jesús channö cabí ila'la' lahui zí'alö zían nupa ila'dá'baga' Dios, ate' ilá' lahuë' Bönni' Xihui', bönni' na' ral-la' tsázië' lu guí' gabila. ⁴ Bönni' ni uzáguë'ë, ate' lu yöl-la' run ba zxön cuinë' tá'baguë'ë yúgu'të le nequi queë' Dios, o le tun zxön bönachi lu yöl-la' run Dios bal quéguequi. Gunë' bönni' na' caní ga idxintë' cö'ë ca Dios caz lu yudo' ga naca xilatjë' Dios, en gun cuinë' ca Dios.

⁵ ¿Naru' cabí röjneli' busiyönda' libí'ili' yugu' lë ni cate' ni' zóalena' libí'ili'? ⁶ Na'a, núbë'ëli' Nu ruzaga' xinözë' Bönni' Xihui' na', para cabí ilá' lahuë' zí'alö ga idxinrö dza queë'. ⁷ Chirún dxin le nagachi' que le naca xihui', pero ná'atë zoa Nu ruzaga' xinözë' Bönni' Xihui' na' ga idxinrö dza ucuita cuini Nu na' ruzaga' xinözë'. ⁸ Ní'irö ilá' lahuë' Bönni' Xihui' na', ate' Xanru' Jesucristo ucul-lë' lë' len bö' irúaj ru'ë, en usunítie' lë' len le tsépi yösa bení' que dza huödë'. ⁹ Cate' idxinë' Bönni' Xihui' na', len yöl-la' huáca que Satanás tu' xihui' ilá' lahuë'. Len yöl-la' huáca que le cabí nácatë, gunë' yúgu'të yöl-la' huáca zxön, en yúgu'të le ilaca bë', en yúgu'të le ilún ga ulu'bani bönachi. ¹⁰ Len yöl-la' huáca que le cabí nácatë, gunë' caní lógaca nupa ila'niti tu' cabí gula'z' lu në' eguequi idú ládxi'guequi le naca idütë li, para ulu'láguequi. ¹¹ Que lë ni na' Dios gu'ë lataj idxín quéguequi tu nu run yöl-la' huáca, nu si' ye'e léguequi para ila'yéajlë' le cabí nácatë. ¹² Caní gaca para ila'baga' xíguia' yúgu'të nupa bití' gula'yéajlë' le naca idütë li, pero gula'yaza ládxi'gaca le cabí naca tsahuí'.

Nupa gurö cazë' Dios para ulu'lá'gaca

¹³ Böchi' luzá'atu', libí'ili' na' nadxí'iné' Xanru' libí'ili', ral-la' guéitica'stu'-né' Dios: "Xclenu'" ni'a que le naca queéli', tu' chiguró cazé' Dios libí'ili' dza ni'te para uláli' ni'a que le runé' Dios Bó' Lá'ayi, para gácali' idú tsahui' tu' réajlè'èli' le naca idútè li. ¹⁴ Para gaca caní queéli', Dios caz bulidzè' libí'ili', para idéli'li' gunli' tsózxón Xanru' Jesucristo lu bení' queé'. Caní gaca ni'a que didza' dxi'a runtu' libán que.

¹⁵ Que lè ni na', böchi' luzá'atu', guli'sóa tsutsu, en guli'gún chi'i didza' na' nazédali', le bé'lentu' libí'ili', en buzúajtu' queéli' lu guichi. ¹⁶⁻¹⁷ Rinábitu'-né' Xanru' Jesucristo, en Xúziru' Dios, utipé' ládxi'li', en guné' ga gácali' tsutsu ca naca yúgu'tè le naca tsahui' runli', en yúgu'tè didza' dxi'a ruí'ili'. Lè cazé' nadxí'iné' rè'u, en benné' queéru' le ruhuí' zxóntica'sò rè'u, en le naca dxi'a runru' lóza, yugu' lè na' buzá' ládxe'è Dios queéru'.

3

Le ral-la' inábiru'-né' Dios

¹ Ia'stú, böchi' luzá'atu', buli'lidzè' Dios, en inábili'-né' gácalené' netu', runtu' libán ni, para sè xtídzè'è Xanru', ate' ilún le bal bönachi, para gaca ni ca na' guca ga ni' zóali' libí'ili'. ² Inábili'-né' ca' para ulatu' lu ná'agaquié' bönni' xihui' tuá' dö', tu' cabí ta'yéajlè' yúgu'tè bönachi Dios. ³ Na'a, tu' runé' Xanru' ca rnné', guné' ga gácali' tsutsu, en gun chi'è libí'ili', para cabí idzunli' lu na' tu' xihui'. ⁴ Ruzxöni ládxi'tu'-né' Xanru' ca naca queéli', gunli' yugu' lè ni si' gunábitu' libí'ili', ca na' chirunli'. ⁵ Rinábitu'-né' Xanru' usé'è ládxi'li' para idxi'ili'-né' Dios, en cözali' zxón ladxí' ca na' bené' Cristo.

Ca run bayudxi gunru' dxin

⁶ Ni'a que Lé' Xanru' Jesucristo ruchí'atu' libí'ili', böchi' luzá'atu', icuítali' ga nacu'è böchi' luzá'aru' ta'dasé' ca', en bití' tuné' ca naca xibá buséditu' libí'ili'. ⁷ Nöz quézili' ral-la' gunli' ca runtu' netu'. Bití' gudásitu' ca' netu' ga ni' zóali'. ⁸ Bití' gudágusótu' le bénnali' queétu', pero lu yöl-la' ruúbi ruguí'i, en lu yöl-la' ricuidi' bentu' dxin rëla, en te dza para cabí usaca' zí'itu' nituli' libí'ili'. ⁹ Caní bentu' para gácatu' loli' ca tu le ruluí'i libí'ili' ca ral-la' gunli', sal-la' dè lu na'tu' inábatu' bi gunli' queétu'. ¹⁰ Lésca' cate' ni' guzóalentu' libí'ili', buchí'atu' libí'ili' caní, le rnna: "Channó cabí rë'èné' nu bönni' guné' dxin, bití' gú'ili' le gahué'." ¹¹ Canísó rnnatu' tu' riyónitu' nútsa'gaquié' ladjali' yugu' bönni' ta'dasé' ca', bití' bi dxin tuné', pero ta'dasé' ca' bi tun bi ta'nné'. ¹² Ni'a queé' Xanru' Jesucristo ruchí'atu' yugu' bönni' tuné' caní, en richízatu' icja nágagaquié' iluné' dxin lu yöl-la' ribóza dxi'ado', para gaca ilahué' le nequi quégacasé'.

¹³ Na'a, böchi' luzá'atu', bití' soa dxili', gúntica'sili' le naca dxi'a. ¹⁴ Channó núti'tés bönni' bití' guné' ca rnna xtídza'tu', le ruzúajtu' lu guichi ni, guli'gún ga gaca bé'è bönni' na', en bití' gunli' tsózxónlè' para utuf'iné'. ¹⁵ Bití' ral-la' ilé'eli'-né' ca tu bönni' bití' rilé'ené' libí'ili' dxi'a, pero guli'sá' ládxe'è ca böchi' cázali'.

Pablo rigu'è lu në'è Dios yugu' böchi'ru' nacu'è Tesalónica

¹⁶ Rinábitu'-né' Xanru' gúntica'sé' ga cuía dxi icja ládxi'do'oli' ca naca yúgu'tè le runli', en sóalené' yúgu'téli'. Lè cazé' runé' ga rō'ò dxi icja ládxi'do'oru'.

¹⁷ Neda', Pablo, len na' caza' ruzúaja' lu guichi ni le rugapa' Dios libí'ili', ate' naca tu le naca bé' yúgu'tè guichi risól-la'a. Canísó ruzúaja' lu guichi. ¹⁸ ¡Le ruzá' ládxe'è Xanru' Jesucristo queéru' gaca queéli' yúgu'téli'! ¡Ca' gaca!

DIDZA' ZÍ'ALÖ GUSÖL-LË'Ë PABLO QUEËBI' BI' TIMOTEO

Pablo rugapë' Dios bi'i Timoteo

¹ Neda', Pablo, naca' gubáz nasól-lë'ë Jesucristo. Caní naca' tu' caní gunná bë'ë Dios, Nu rusólá rë'u, enca' tu' gunná bë'ë caní Xanru' Jesucristo, Nu na' runru' löza. ² Rugapa' Dios li', bõcha'ado' Timoteo. Nacu' ca zxf'ini caza' tu' benru' tsõzxõn xichinë' Dios. Rinábida'-në' Xúziru' Dios, enca' Xanru' Jesucristo uzá' ládxë'ë quiu', en huéchi' ládxë'ë li', en gunë' ga soa dxi icja ládxí'do'o.

Pablo rusë'ë ládxí'bi' Timoteo ca naca xibá cabí naca idú

³ Ráta'yua' lo' na' a gunu' ca na' gúta'yua' lo' cate' ni' guyija' luyú Macedonia, para ugá'anu' lu yödzo Éfeso, en inná bé'enu' bal-lë' bönni' ni' cabí ulu'sédinë' tu xibá yúbölö, ⁴ en cabí ilunë' zxon yugu' didza' ridasó, en lágaca zióntërö cõ' xuz xtó'ogaca bõnachi, yugu' le tun ga tuf'i ládxí'gaca bõnachi le nácagaca nítisö. Yugu' le caní bití' tun tsutsu bõnachi queë' Dios ca naca le ta'yéajlë' Lë'.

⁵ Le rë'ëni gun lë ni rea' li', naca para ila' dxi'i bõnachi luzë'eguequi, naca idú ládxí'gaca, en gaca dxi'a le ta'zá' ládxí'gaca, en gaca idú le ta'yéajlë' Dios. ⁶ Ca nácagaca lë ni, bití' bulu'ruájë' bal-lë' bönni' dxi'a, pero gula'guélë'ë tu nõza yúbölö, en tunë' bal yugu' le bití' nácatë. ⁷ Të'ënnë' ulu'sédinë' bõnachi ca naca le rinná bë' xibá queë' Dios, sal-la' bití' ta'yéajni'inë' lë na' tu'sédinë', en bití' ta'yéajni'inë' le ta'nnë' nácatë.

⁸ Rë'u nõziru' naca dxi'a xibá gunná bë'ë Dios, channö nu rugún le dxin ca ral-la' gun. ⁹ Lë ni nõziru': Dios gudixjë' xibá queë', calëga para inná be'e bõnachi tsahui', pero para inná be'e bõnachi caní:

Nupa ta'dá'baga' le rinná bë' xibá na'.

Nupa bití' túngaca ca rinná bë' xibá na'.

Nupa tu'cá'ana Dios cá'asö.

Nupa tun le naca xihui'.

Nupa bití' túngaca Dios zxon.

Nupa tu'cá'ana le nequi queë' Dios cá'asö.

Nupa tuti xuz xiná'aguequi.

Nupa tuti bõnachi.

¹⁰ Nupa tun le ruá' dö'.

Yugu' bönni' nacuá'lenë' la' löjõdxi bönni'gaquië'.

Nupa ta'bán yugu' bí'ido'.

Nupa ta'zí' yë'.

Nupa tun tsutsu xtídza'guequi, ta'nná le cabí nácatë.

Nupa ta'dá'baga yugu' xibá tsahui'.

¹¹ Nõziru' naca caní tu' bidxín queëru' didza' dxi'a buzá' ládxë'ë Dios queëru'. Lë' náquië' lá'ayi, en budödë' lu na' a didza' dxi'a na' runa' libán que.

Pablo rë' Cristo: "Xclenu'" tu' buéchi' ládxë'ë lë'

¹² Rea'-në' Xanru' Jesucristo, Nu rutipa ládxa'a, "Xclenu'" tu' buzxoní ládxë'ë neda', en buzóë' neda' guna' xichinë'. ¹³ Caní benë' sal-la' zí'alö neda' gunné' zí'a queë', en gudxía ládxa'a bõnachi queë', en zían le bí'a dö' quéguequi, pero Cristo buéchi' ládxë'ë neda', tu' bena' caní lu yöl-la' bití' réajni' quia' cate' ni' bití' réajlë'ënida' Lë'. ¹⁴ Na'a, zxõntërö naca le buzá' ládxë'ë quia' Xanru' Jesucristo, lë na' run ga réajlë'ëru' Lë', enca' ga nadxí'iru'-në'.

¹⁵ Didza' iduté' li lë ni, en le naca lesaca' ila'z' lu ná'agaca yúgu'të bõnachi, le rna: Lë cazë' Jesucristo bidë' yödzo'lió ni para busólë' bõnachi dul-la', ate' busólë' neda' sal-la' nácara' bönni' dul-la' ca yúgu'të bõnachi. ¹⁶ Que lë ni na' buéchi' ládxë'ë neda', ate' bulu'e lahui Jesucristo ni'a quia' neda', bönni' dul-la', ca naca yöl-la' zxon ladxí' idú queë', para gaca' tu le rulu'i lógaca nupa ila'yéajlë' Lë', en gata' quéguequi yöl-la' na'bán idú. ¹⁷ Na'a rna: 'Yöl-la' ba Dios, Nu rinná bë'tica'sö, Nu catu caz údxi que, en Nu bití' gaca ilë'ëru', la's dui Dios Nu nõzi caz yúgu'të! ¡Queë' Lë' gácatica'sö yöl-la' run bal, en yöl-la' ba, na'a dza, en yúgu'të dza zá'gaca! ¡Ca' gaca!

¹⁸ Zxi'ina'do' Timoteo, rudóda' lu no'o xibá ni para gunu' xichinë' Dios ca runë' tu bönni' idú ládxë'ë rejë' gudil-la, en para uzi' u xibë' yugu' le gula'guixjõ' zí'alö nupa ni' guluf'i didza' uláz queë' Dios ca gaca quiu'. ¹⁹ Len yöl-la' réajlë' quiu' Cristo ral-la' gunu' caní, naca idú dxi'a icja ládxí'do'o. Chigula'chixi gula'nigui bal-la bõnachi, nupa bulu'zõa tsólá'alö le

réajlë'ëru' Cristo. ²⁰ Caní gulunë' Himeneo, en Alejandro, nupa na' busana' lu na' Satanás tu' xihui' para ila'zëdë' ca ral-la' ilunë', para cabiró ila'nnë' zi'ë que le nequi queë' Dios.

2

Le rusedi rë'u ulídzaru-në' Dios

¹ Que lë ni na' le naca lo le richizia' icja nágagaca bönachi naca ca ral-la' ulídzaru-në' Dios, en ca ral-la' gáta'yuru' lahuë', en ca ral-la' inábiru-në' gunnë' bi riqúniru', en ca ral-la' guiëru'-në': "Xclenu'." Yugu' lë ni ral-la' gunru' uláz quéguequi yúgu'të bönachi. ² Lësca' caní ral-la' gunru' uláz quégaca nupa ta'nná bë', en quégaca yúgu'të nupa nácagaca lo. Caní ral-la' gunru' para gaca dxi'a queëru', en gata' queëru' yöl-la' ribóza tsáhui'do'. Ral-la' gunru' caní lu yöl-la' réajlë' queëru' Dios, en lu yöl-la' ba'a ladxi' queëru'. ³ Lë ni naca dxi'a, en le raza ládxë'ë Dios, Nu rusólá rë'u. ⁴ Dios caz ré'ënë' ulu'lágaca yúgu'të bönachi, en ré'ënë' ilúnbé'e le naca iduté li. ⁵ Tuzë' náquië' Dios, en tuzë' bönni' ruúnë' dzaga Dios, en bönachi. Nu ni naca Jesucristo, Nu gulaj bönachi. ⁶ Lë cazë' budódi cuinë' lu yöl-la' guti, le benë' tu' nözi dul-la' nabága'gaca yúgu'të bönachi. Dios benë' ba nali queë' cate' bidxin dza queë' gútië'. ⁷ Ca naca lë ni, Dios buzóë' neda' para guna' libán que, en gaca' gubáz nasól-lë'ë Cristo, para usédigacada' bönachi izá'a ca naca le réajlë'ëru' Cristo, en ca naca le naca iduté li. Riliteda', en biti' ca' rizí' yë'a.

⁸ Na'a, ré'ënda' ulu'lidzë' bönni' Dios, en iláta'yuë' lahuë' gátitës, nácagaquië' idú dxi'a, en cabí ila'lenë' luzá'agaquië', en cabí ila'dil-la didza'gaquië'. ⁹ Lësca' caní, ré'ënda' ilácunu nigula le naca ba'a. Le naca lachi le ral-la' ulu'lu'ínu lahuí naca yöl-la' nöxaj ladxi', en le naca idú ladxi', en calëga le tu'pá'asinu icja lógacanu len oro, en yugu' bugá, en lari' nazáca'da'. ¹⁰ Yugu' le dxi'a tunnu ulu'lu'i lahuí le nácagacanu ca na' run le tácunu le naca ba'a. Caní ral-la' ilunnu nigula núnbë'gacanu Dios. ¹¹ Ral-la' ila'cuá'anu yugu' nigula dxisó cate' nu rusedi légacanu, en ila'cuá'anu nöxaj. ¹² Biti' runna' yugu' nigula lataj ulu'sédinu, en calëga ila'nná bé'enu yugu' bönni'. Ral-la' ila'cuá'anu dxisó ga nudúbigaca bönachi queë' Cristo. ¹³ Caní ral-la' gaca, tu' buzóë' Dios zí'aló Adán, ate' gudódi na' buzóë'-nu Eva. ¹⁴ Adán na', biti' guzxi' ye'e tu' xihui' lë', pero nigula queë', guzxi' ye'e lënu. Caní guca, gudítspanu xibá queë' Dios, ¹⁵ pero ulanu nu nigula ruzóanu-bi' b'ido' channó gúntica'sinu ca rójlöz le réajlë'ëru' Dios, en yöl-la' nadxi', en channó gácanu idú dxi'a, en idú ladxi'.

3

Ca ral-la' ilácagaquië' bönni' tapa chi'ë bönachi queë' Cristo

¹ Didza' iduté li lë ni rna: Channó ru'í ládxe'ë nu bönni' gáquië' nu gapa chi'i bönachi queë' Cristo, dxin dxi'a rizé ládxe'ë. ² Nu bönni' rapa chi'ë bönachi queë' Cristo run bayudxi gáquië':

Tu bönni' cuntu nu gaca bi inné queë'.

Zoa túzinu nigula queë'.

Ral-la' gáquië' ban ladxi', en idú ladxi', en nöxaj ladxi'.

Ral-la' gu'ë ga ila'cu'ë böchi'ru ta'dxinë' lidxë'.

Ral-la' gáquië' bönni' nazéqui'de'enë' usédinë' bönachi.

³ Biti' gáquië' bönni' re'jë', en calëga bönni' sínia'.

Biti' gáquië' bönni' rizé ládxi'së' si'ë dumí.

Ral-la' gáquië' bönni' dxi'i ladxi', en zxön ladxi'.

Biti' gáquië' bönni' ruhuídi'në'.

⁴ Ral-la' gáquië' bönni' rinná bé'enë' dxi'a bönachi nacua' lidxë'.

Ral-la' ilunbi' zxi'inë' ca rna xtidzë'ë lu yöl-la' run bal xúzgacabi'.

⁵ ¿Naru' huácatsó tu bönni' gapa chi'ë bönachi queë' Dios channó cabí raca inná bé'enë' dxi'a bönachi nacua' lidxë'? ⁶ Biti' ral-la' gáquië' tu bönni' si' gusi lahuë' t'ë'ë Cristo, para cabí tódi bë' gun ba zxön cuinë', en biti' gaca queë' ca na' guca que tu' xihui', nu ben ba zxön cuini, ate' Dios guchúguië' que tsójgá'ana lataj chul-la. ⁷ Lësca' ral-la' gáquië' bönni' ta'nná dxi'a queë' nupa cabí nabábagaca bönachi queë' Cristo, para cabí soa nu uzóla lë' tsólá'aló, en para cabí idzunë' lu yalaj que tu' xihui'.

Ca ral-la' iláquië' bönni' tácalenë' bönachi queë' Cristo

⁸ Lësca' caní ral-la' iláquië' bönni' tácalenë' bönachi queë' Cristo:

Ral-la' iláquië' bönni' idú ládxi'gáquië'.

Biti' iláquië' bönni' tu'rixë' didza'.

Biti' iláquië' bönni' té'ajë'.

Biti' iláquië' bönni' ta'zë ládxi'së' dumí.

⁹ Ral-la' gaca ilapa chi'ë iduté le réajlë'ëru' Cristo.

Ral-la' ilaca idú dxi'a icja ládxi'do'gáquië'.

¹⁰ Yugu' bönni' ni ral-la' si' bé'eli' légaquié' zí'alö, ate' ní'irö gata' lu ná'agaquié' ilácalenë' bönachi queë' Cristo, channö cabí zoa nu gaca bi innë queëgaquié'. ¹¹ Lësca' caní, nigula que queëgaquié' ral-la' ila'cuá'anu idú ládxi'gacanu, en cabí ilácanu unnë que luz'é.e. Ral-la' ilácanu zxon ladxí', en ilácanu li ladxí' lu yúgu'të le tunnu. ¹² Yugu' bönni' ilácalenë' bönachi queë' Cristo ral-la' soa túzinu nigula que queëgaquié'. Lësca' ral-la' ila'nná bé'enë' dxi'a zxi'inigaquié', enca' bönachi ulidxi que queëgaquié'. ¹³ Run bayudxi gaca caní, tu' ta'déli'në' lataj ga ilún bal bönachi xtídza'gaquié', channö tunë' dxi'a dxin tunë' tácalenë' bönachi queë' Cristo, ate' ilácarë' rugu ladxí' para ilu'ë didza' ca naca le réajlë'ëru' Jesucristo.

Le bigachi' que le reaj ládxi'ru'-në' Dios

¹⁴ Yugu' didza' ni ruzúaja' quiu' lu guichi, sal-la' runa' löza uduyútea' li'. ¹⁵ Channö huadzéda', ruzúaja' quiu' didza' ni para inózinu' naca ral-la' gunu' lógaca bönachi nacua' lidxë' Dios, nupa nácacaga bönachi queë' Dios ban, en nácacaga tsutsu, en ta'guixjö' dxi'a le naca iduté li. Nácacaga ca yugu' ya'zxon, en le nunída'gaca zö'ö, le nácacaga tsutsu, en ta'zón yu'u. ¹⁶ Le nácatë, zxöntë'rö naca le bigachi' que le reaj ládxi'ru'-në' Dios, ca na' nazúaj lu guichi le rnna:

Dios buluf'i lahuë', gúquié' bönachi.

Guca bë' náquié' tsahui' tu' guzóalenë' Dios Bö' Lá'ayi Lë'.

Gulácalenë' gubáz lá'ayi queë' Dios Lë'.

Guca libán queë' lógaca bönachi izá'a.

Gula'yéajlë' bönachi yödžolió Lë'.

Dios buchisë' Lë' xitsá' ga nayëpisëtë'rë'.

4

Nupa ulu'huöaj ládxi'gaca ca naca le réajlë'ëru'-në' Cristo

¹ Yálajdo' riguixjö'ë Dios Bö' Lá'ayi, rnnë': Dza tsójsëtë'gaca, ila'dá'baga' bal-la bönachi Cristo. Ulu'huöaj ládxi'gaquié' ca naca le réajlë'ëru' Cristo. Ulu'zë' nágagaquié' xtídza'gaca bönachi nacua'len bö' ta'zi' yë' léguequi, ate' ulu'zë' nágagaquié' yugu' xibá qué'guequi bö' xihui'. ² Ulu'zë' nágagaquié' xtídza'gaca bönachi tu'lu'isö tsahui' cuínguequi. Yugu' bönachi na' tu'i didza' le cabí nácatë, en chinazidi ládxi'do'guequi, para cabí uxösa léguequi. ³ Caní naca, tu'zágue'ë xinóžguequi nupa té'ëni ulu'tsaga ná'agaca, en ta'nná bé'enë' bönachi para cabí ilágugaca le nagu'ë Dios para uzi'iru' xibé, lë na' huáca ilágugaca nupa ta'yéajlë' Dios, nupa ná' chinünbë'gaca le naca iduté li, en té' Dios: "Xclenu'" cate' tahuë' le. ⁴ Dxi'a naca yúgu'të le benë' Dios, en biti' bi ral-la' uzóaru' tsólá'alö channö ráguru' le, en rëru'-në' Dios: "Xclenu'." ⁵ Rusedi xtídzë'ë Dios rë'u, Lë' ünë' dxi'a yúgu'të le gáguru' channö ulídzaru'-në' Dios, en inábiru'-në' gun lá'ayë' lë na' gáguru'.

Ca rurúajë' dxi'a huen dxin queë' Jesucristo

⁶ Channö usédinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queë' Jesucristo, en gaca bë' nazë'du' dxi'a ca naca didza' que le réajlë'ëru'-në' Cristo, en ca naca xibá dxi'a rapa chi'u. ⁷ Gurú'una yugu' didza' ridasö que yödžolió ca naca didza' tu'ínu yugu' nigula gula. Béntica'sö le gun ga gacu' tsutsu para gunu' ca rë'ënë' Dios. ⁸ Láti'do'os uzi'u xibé gunu' le gun ga gácaró nál-la ni'a no'o, pero idú uzi'u xibé gunu' ca rë'ënë' Dios. Cate' runru' caní, lë ni run ga runru' löza sóaru' ibanru' yödžolió ni, enca' sóaru' ibanru' dza zá'gaca, tödi uzá'aru' yödžolió ni. ⁹ Didza' iduté li lë ni, en le naca lesaca' ila'zi' lu ná'agaca yúgu'të bönachi. ¹⁰ Que lë ni na', rusáca'da' zi' cuinru' runru' dxin, tu' runru' löza Dios ban. Cristo gútië' para usölë' yúgu'të bönachi. Tu'zi' xibé le benë' nupa na' ta'yéajlë' Lë'.

¹¹ Gunná bë'e, en busesdi bönachi ilún yugu' lë ni. ¹² Cuntu nu ral-la' uzóa li' tsólá'alö tu' nacu' bi'i ra'bán, pero ral-la' gunu' le uluí'i nupa ta'yéajlë' Dios ral-la' ilún ca runu' li'. Caní uluí'ínu' légaquié':

Len didza' ru'u, en len le runu'.

Ca nadxí'ínu' luzó'o, en ca ru'u lataj zóalenë' Dios Bö' Lá'ayi li'.

Ca runu' ca rnno', en ca nacu' idú tsahui'.

¹³ Tsanni za'a idxina' quiu', bé'tica'sö ladxí' ulabu' guichi lá'ayi lógaca bönachi nacua' ga ni' zu'. Guchiza icja nágagaquié' lë ni, en busesdi légaquié'. ¹⁴ Biti' udödu' cá'asö le buzá' ládxe'ë Dios quiu', lë na' bennë' quiu' ca na' gula'nná nupa ni' guluf'i didza' uláz queë' Dios, cate' ni' bönni' gula tapa chi'ë bönachi queë' Cristo gula'xóa ná'agaquié' li', en bulu'lidzë' Dios.

¹⁵ Béntica'sö yugu' lë ni. Bé'tica'sö ládxi'u gunu' caní, para ila'lé'e yúgu'të bönachi ca na' zeaj ridéli'nu' le nequi queë' Cristo. ¹⁶ Gudapa chi'i cuinu', en gudapa chi'i xibá rusédiru'. Béntica'sö yugu' lë ni, ate' channö gunu' caní, uló' li', en ulu'lágaca ca' nupa ila'yöni li'.

5

Ca ral-la' gunbi' Timoteo ni'a queégaca bönachi queë' Cristo

¹ Biti' uzenu' bach yugu' bönni' gula, pero guchiza icja nágagaquië' didza', tsca nácacagabi' bi'i böchi' casu' xuz casu'.

Guchiza icja nágagacabi' bi'i bönni' ra'bán didza', tsca nácacagabi' bi'i böchi' casu'.

² Guchiza icja nágagacanu nigula gula didza', tsca nácacagacanu xiná' casu'.

Guchiza icja nágagacabi' bi'i nigula ra'bán didza', tsca nácacagabi' bi'i zan casu', ca na' röjlöz le naca idú dxi'a.

³ Ben bal yugu' nigula ba guti bönni' que queégacanu, nácacagacanu túzinu. ⁴ Channö zóanu tu nigula caní nacua'abi' bi'i queénu o xzí'ini xi'sóanu, ral-la' ila' zédabi' ilunbi' ca ré'éné' Dios, para ilácalenbi' zí'alö bönachi nacua'á lidxigacabi', en ulu'bi'ibi' queégaquië' xuz xiná'agacabi'. Lé ni naca dxi'a, en le raza ládxi'ë Dios. ⁵ Na'a, nigula na' nagá'ananu túzinu, runnu löza Dios, ate' rëla, en te dza rinábatica'sinu lahuë' Dios, en rulidzanu Lé' ni'a queégaca bönachi queë', ⁶ pero nigula túzinu na' runnu ca naca le rizé ládxi'nu nácanu ca tu nigula chinátinu cate' ni zóanu nabannu. ⁷ Lësca' caní, gunná be'e bönachi nacua'á ga ni' zu', para ilün ca sa'yéaj yugu' lé ni, para ilaca bönachi cuntu nu gaca bi inné queéqueui. ⁸ Channö zoa nu bönni' cabí rugahuë' yugu' di'a dza queë', en le nácarö lo, channö cabí rugahuë' bönachi nacua'á lidxé', chigudá'baguë'ë le réajlë'ëru' Cristo, en nácarë' xihui' ca nu cabí réajlë' Dios.

⁹ Túzinu nigula zoanu túzinu caní chiyú'urönu ca tsónnalalaj iz huáca ibábanu nupa gácalenli', channö cabí bucá'ananu-në' bönni' queénu para sóalennu-në' ia'tué' bönni'. ¹⁰ Run bayudxi soa nu gun ba nalí queénu ca nácacaga le dxi'a runnu.

Gácalenli'-nu channö buscúlunu-bi' yugu' bí'ido', en channö ru'ínu ga ila'cuá' böchi'ru' zá'gaquië' yödzo zi'tu', en channö ru'ínu le ilë'aj ilágugaca bönachi queë' Dios, en channö rácalennu nupa ta'guí'i ta'zaca', en channö rúntica'sinu yúgu'të le naca dxi'a.

¹¹ Yugu' nigula túzinu biti' yui'igacanu tsónnalalaj iz, biti' ibábagacanu nupa gácalenli', tu' ilunnu ca ta'zësö ládxi'gacanu, en ila'dá'baga'nu Cristo, en ilë'ëninu ulu'tsaga ná'agacanu leyúbölö. ¹² Caní gaca, ila'bága'nu dul-la' tu' tu'zóanu tsölá'alö le gula'yéajlë'ënu Cristo zí'alö. ¹³ Lësca' ilácacu nigula xöhuëdi, en nigula ta'dasö ca', en calégasö ilácacu xöhuëdi, pero lësca' ilácacu nigula unné que luzé'e, en tsöjgútsa'gacanu ga yúbölö, en ila'nnanu le cabí nácatë. ¹⁴ Que lé ni na', ré'ënda' ulu'tsaga ná'gacanu leyúbölö nigula túzinu caní yú'ugacanu iz cuidi', en ulu'scúlunu-bi' yugu' bí'ido', en ila'nná bé'ënu bi'i nacua'abi' yu'u que queégacanu, para cabí ilu'ínu nu ridá'baga' ré'u lataj bi inné queëru', ré'u na' réajlë'ëru' Cristo. ¹⁵ Caní ral-la' gaca, tu' chibulu'bíga'nu bál-lagacacnu, ate' tunnu ca ré'ëni Satanás tu' xihui'.

¹⁶ Channö nútí'tës bönni' o nigula nu réajlë' Cristo, nacua'á'anu nigula túzinu lidxigaca nupa na', ral-la' ilácalen légacanu, para cabí ulu'saca' zí' bönachi queë' Cristo. Caní gaca, bönachi queë' Cristo na' gaca ilácalen yugu' nigula nagá'anaganacu túzinu.

¹⁷ Benrö bal yugu' bönni' gula tapa chi'ë bönachi queë' Cristo, yugu' bönni' na' ta'nná bé'ë dxi'a, en béntërö ca' bal yugu' bönni' gula na' tunë' dxin, tunë' libán, en tu'sédinë' bönachi.

¹⁸ Nazúaj lu guichi lá'ayi le rnna: "Biti' cu'u du ruá'aba' bédxi na' rulíbiba' zxoá' xtila." Rnna ca: "Náquië' lesaca' nu bönni' huen dxin si'ë laxzjé'."

¹⁹ Biti' si' lu no'o didza' ru'ínu ruzegui didza' tu bönni' gula rapa chi'ë bönachi queë' Cristo, channö cabí nacua'á' chopá tsonna nupa tun ba nalí que le benë'. ²⁰ Nupa túntica'sö dul-la', busidxi léguequi lógaca yúgu'të bönachi queë' Cristo para iladxi ia'zica'rö bönachi ni' Dios. ²¹ Ni'a queë' Xanru' Dios, en Xanru' Jesucristo, en ni'a queégaquië' gubáz lá'ayi rö queë', rinná bé'eda' li' gunu' ca ta'nná didza' ni. Tuz ca ral-la' uchi'a usöröu' yúgu'të bönachi, en biti' gunu' bal tuzé' bönni'. ²² Cuntu nu bönni' ixóatë no'o, cabí gunu' ga gáquië' huen dxin queë' Cristo, para cabí ibágu'u le runë' channö gunë' bönni' na' dul-la'.

²³ Biti'rö guí'ju' nísasö. Tu' rúntica'sö bayá' lë'u ral-la' guí'ju' láti'do' xisi uva nal-la para cö' dxi'a lë'u.

²⁴ Yugu' dul-la' queéqueui bal-la bönachi ila'lá' lahui zí'alö cate' si' ila'dxin ga uchi'a usöröë' Dios léguequi, ate' tödi ni' ila'lá' lahui dul-la' nabága'gaca ia'zica'rö bönachi. ²⁵ Lësca' caní, ila'lá' lahui dxin dxi'a nungaca bönachi, ate' channö cabí nalá'gaca lahui, cuntu nu bönni' gaca ucáchë'ë tsaz dxin na' nunë'.

6

¹ Yúgu'të bönni' nadó'ogaca ral-la' ilúndë'ë bal xángaqië', para cabí gaca nu inné zí' que La lá'ayi queë' Dios, en que xibá queë'. ² Nupa ni' nacu'ë xángaca ta'yéajlë'ë Cristo, biti' ral-la' ulu'cá'ana cá'asö légaquië' tu' nácacagaquië' böchi'guequi. Ral-la' ilunrö dxi'a xichíngaqië'

tu' ta'yéajlë'ë Cristo, bönni' ni' tu'zi'ë xibé dxin dxi'a na', tu' nadxí'inë' Lë cazë' légaquië'. Ca naca lë ni, busëdi bönnachi nacua' ni', en guchiza le icja nágaqaquië'.

Le reaj lãdxi'ru'-në' Dios le ruzí'iru' xibé

³ Channö zoa nu bönni' rusëdinë' xibá yúbölö, en biti' rusëdinë' yugu' didza' dxi'a queë' Xanru' Jesucristo, ca naca xibá na' rusedi rë'u ca ral-la' gunru' ca rë'ënë' Dios, ⁴ bönni' ni run ba zxon cuinë', en biti' bi nözinë'. Didza' biti' naca dxi'a rizë lãdxë'ë ca nácgaca didza' bönniga, en didza' bizxaj, yugu' le tun ga tu'zxé'e bönnachi luzë'eguequi, en ta'díl-lalen luzë'eguequi didza'. Lësca' tun didza' caní ga ta'nnë'zi' bönnachi que luzë'eguequi, en ta'zá lãdxi'gaca que luzë'eguequi le cabí nácatë. ⁵ Lësca' caní tun ga ta'díl-latica'së' didza' bönni' biti' ta'yéajni'inë', nupa biti' nazí' lu në'eguequi le naca idútë li. Téquini huáca ila'zi' dumí zían channö ilúngaca tsözxön nupa ta'yéaj lãdxi'gaca Dios. Gucuíta ga nacua' bönnachi caní. ⁶ Zxon naca le ruzí'iru' xibé cate' len yöl-la' riböza zxon lãdxi' reaj lãdxi'ru'-në' Dios. ⁷ Biti' bi nuá'aru' cate' ridxinru' yödzölió, en lësca' caní, biti' bi uá'aru' cate' uzá'aru' yödzölió ni. ⁸ Que lë ni na', channö dësö queëru' le gáguru', en le gácuru', ral-la' udzëjaru'. ⁹ Yugu' bönni' té'ënnë' gata' quégaquië' yöl-la' tsahui', gaca quégaquië' le si' bë' légaquië' le xihui', ate' ila'yü'ë lu yalaj que tu' xihui', ate' lu yöl-la' biti' bi nözi quégaquië' zían le ila'zë lãdxi'gaquië', le ilún ditaj légaquië'. Yugu' lë ni ulu'suniti légaquië', en ilún ga ila'níti' tsaz. ¹⁰ Tu' ta'zë lãdxi'gaca bönnachi dumí, lë ni run ga tun yúgu'të le cabí naca tsahui'. Bal-lë' bönni', tu' ta'zë lãdxi'gaquië' le, bulu'cá'anë' le gula'yéajlë'ë Cristo, en chiraca quégaquië' zían le tu'saca'zi' légaquië'.

Nu run dxin queë' Cristo naca ca tu bönni' rejë' gudil-la

¹¹ Na'a, bönni' queë' Dios, gucuíta ga raca le caní. Bë'tica'sö lãdxu'u gunu' le naca tsahui', en le rë'ënë' Dios.

Guyéajlë'tica'së' Cristo, en bidxí'i yugu' luzó'o.

Bë' lãdxi' gacu' zxon lãdxi', en nöxaj lãdxi'.

¹² Ca runë' tu bönni' idú lãdxë'ë rejë' gudil-la,

ben dxin que le réajlë'ëru' Cristo, ate' beni' quiu' yöl-la' na'bán idú.

Para gaca caní bulidzë' Dios lí'. Dxi'a guca le gunnó' yalaj lulu ca réajlë'u Cristo, lë na' gunnó' lógaca zían nupa tun ba nalí que didza' bë'u. ¹³⁻¹⁴ Ní'a queë' Xanru' Dios, Nu na' nabánigaca yúgu'të le nacua', enca' ni'a queë' Jesucristo, Nu ben ba nalí le naca dxi'a le gunné' yálajdo' lahuë' Poncio Pilato, rinná bé'eda' lí' gun chí'u yugu' lë na' gunná bé'enë' Cristo rë'u. Ral-la' gacu' idú tsahui', en biti' bi gunu' le gü'i' lataj nu bi innë' quiu', ga idxintë dza ni' ulufi' lahuë' Xanru' Jesucristo. ¹⁵ Cate' idxín dza na' huödë' Jesús, Dios ulu'ë lahui Lë'.

¡Dios náquië' lá'ayi!

¡Tuzë' Lë' dë lu në'ë yöl-la' unná bë',

en rinná bé'enë' yúgu'të nupa ta'nná bë',

en náquië' ca' Xángaca yúgu'të nupa nácgaca xan!

¹⁶ ¡Tuzë' Lë' zóatica'së'!

¡Zöë' lu beni' ga biti' gaca nu idxín rácasö que!

¡Catu caz nu bilé'e Lë', en biti' gaca nu ilé'e Lë'!

¡Queë' Lë' gácatica'sö le run Lë' bal, en yöl-la' unná bë'!

¡Ca' gaca!

¹⁷ Gunná be'e yugu' bönni' dë quégaquië' yöl-la' tsahui' dza ni zóaru' na'a, para cabí ilún ba zxon cuíngaqië', en para cabí ulu'zxon lãdxi'gaquië' yöl-la' tsahui' na' biti' naca löza. ¡Ral-la' ilunë' löza Dios ban, Nu rúnnada' queëru' yúgu'të le ruzí'iru' xibé! ¹⁸ Gunná be'e légaquië' ilunë' le naca dxi'a, para ila'yanda' dxin dxi'a tunë', lë na' naca tu yöl-la' tsahui' idú. Ral-la' bi ulu'nödzjë' quégaca bönnachi yechi', en ilu'i lãdxi'gaquië' léguequi. ¹⁹ Channö ilunë' caní, ulu'tubë' yöl-la' tsahui' na' naca idú, le ulu'zi'ë xibé dza si' za', en ila'déli'në' yöl-la' na'bán idú.

Le gulu'ë Pablo lu ná'abi' bi'i Timoteo

²⁰ Böcha'ado' Timoteo, ben chí'i le nadödi lu no'o. Gucuíta ga nacua' nupa tuí'i didza' cá'asö, en yugu' didza' biti' nazaca', en yugu' didza' bizxaj, yugu' didza' na' tuí'i nupa ta'nnasö tácada', ate' nazí' yé'eguequi ca naca lë na' tun. ²¹ Bal-la bönnachi gula'zi' lu në'eguequi yugu' didza' caní, ate' gula'chixi gula'nigui ca naca le réajlë'ëru' Cristo.

Rinábida'-në' Dios uzá' lãdxë'ë quiu' le nácgaca dxi'a queë'.

¡Ca' gaca!

DIDZA ' BUROPI GUSÖL-LË'Ë PABLO QUEËBI' BI' I TIMOTEO

Pablo rugapë' Dios bi' i Timoteo

¹ Neda', Pablo, naca' gubáz nasöl-lë'ë Cristo. Caní naca' tu' rë'ënë' Dios gaca' caní, para caní gaca le guzxí' lu në'ë, gunnë' queëru' yöl-la' na'bán idú, le ruzá' ládxë'ë Jesucristo queëru'. ² Rugapa' Dios li', bócha'ado' Timoteo. Nacu' ca xzí'ini caza' tu' benru' tu' zxön xichinë' Cristo, ate' nadxí'ida' li'. Rinábida'-në' Xúziru' Dios, enca' Xanru' Jesucristo, uzá' ládxë'ë quíu', en huéchi' ládxë'ë li', en gunë' ga cò' dxi icja ládxí'do'.

Timoteo ral-la' gunbi' ba nalí queë' Jesucristo

³ Rea'-në' Dios: "Xclenu" ca naca quíu' cate' rulidza'-në' Dios. Biti' rizóa dxía' rinaba' ni'a quíu' rëla, en te dza lahuë' Dios, Nu na' runa' xichinë' idú ládxa'a ca na' gulunë' xuz xtá'ahua'. ⁴ Cate' røjneda' ca na' gurödxu', rizë ládxa'a ulé'eda' li', para gaca udzëjada' idú ládxa'a. ⁵ Rea'-në' Dios: "Xclenu" tu' zoa le run ga røjneda' ca réajlë'u Cristo idú ládxu'u. Lësca' caní, gula'yéajlë'ënu xinó'o gula Loida, enca' xinó'o Eunice Lë' zí'alò ca li', ate' runa' löza, lësca' caní réajlë'u Lë' na'a.

⁶ Tu' naca caní, rusá'a ládxu'u para usabanu' le bennë' Dios quíu', lë na' bidxín quíu' cate' ni' guxóa na'a li', en bulidza'-në' Dios. ⁷ Bö' na' bennë' Dios queëru' bití' naca tu bö' le gun ga gádxiru', pero bennë' queëru' Bö' Lá'ayi Nu run ga náparu' yöl-la' huáca, en run ga nadxí'iru' luzá'aru', en run ca' ga rinná be'e cuinru'. ⁸ Que lë ni na', bití' utuf'ínu' gunu' ba nalí queë' Xanru', en bití' utuf'ínu' ca raca quia' neda' ni, nadzuna' lidxi guié' tu' runa' xichinë', pero ben tsözxön nupa ta'guí'i ta'zaca' tu' tun libán que didza' dxi'a. Dios gunnë' yöl-la' huáca quíu' para gunu' caní. ⁹ Dios caz busölë' rë'u, en bulidzë' rë'u para gácaru' idú dxi'a. Bití' bulidzë' rë'u tu' zoa le dxi'a benru', pero bulidzë' rë'u tu' gú'uni quézinë' Lë', en tu' ruzá' ládxë'ë caní queëru'. Dza ni'te buzöë' caní queëru' zí'atëlò ca guta' yödzülió ni, tu' néquiru' queë' Jesucristo. ¹⁰ Na'a, chibuluf'i lahuí le ruzá' ládxë'ë Dios queëru', tu' buluf'i lahuë' Jesucristo Nu rusólá rë'u. Bugüë' yöl-la' guti, en bulu'e lahuí yöl-la' na'bán idú na', le cabí ca' inuti. Caní naca ca rnna didza' dxi'a.

¹¹ Cristo buzóë' neda' para guna' libán que didza' dxi'a na', en para gaca' gubáz queë' para usëdigacada' bönachi izá'a. ¹² Que lë ni na' riguf'i rizáca'a ca' yugu' le raca quia' ni, pero bití' rutuf'ida', tu' núnbë'a Nu na' réajlë'a. Runa' löza Lë', napë' yöl-la' huáca gapa chi'ë le budöda' lu në'ë ga idxintë dza ni' huödë'.

¹³ Didza' dxi'a na' biyönnu' bena' libán que ral-la' gaca quíu' tu le ruluf'i ca ral-la' usëdinu' bönachi ca réajlë'ëru' Jesucristo, en ca nadxí'iru' Lë'. ¹⁴ Ben chi'i le naca dxi'a na' nadödi lu no'o, ate' gaca gunu' caní len yöl-la' huáca queë' Dios Bö' Lá'ayi, Nu zóalen rë'u.

¹⁵ Chinöz quézinu' ca na' gulunë' zian bönni' ta'yéajlë'ë Cristo nacuf'ë luyú Asia bulu'béaj ládxí'gaquie' neda'. Figelo, en Hermógenes nabábagaquie' bönni' ni. ¹⁶⁻¹⁷ Rinábida'-në' Xanru' Dios huéchi' ládxë'ë bönachi nacuf' lidxë' Onesíforo, tu' butipë' ládxa'a bönni' ni zian luzuí. Cate' bidxinë' Roma, idú ládxë'ë buguiljë' neda', ate' budzölinë' neda'. Bití' butuf'inë' ni'a quia' neda' tu' nadzuna' lidxi guié' ni, nága'a du guié'. ¹⁸ Rinábida'-në' Xanru' huéchi' ládxë'ë lë' dza ni' idxinë' lahuë' Dios. Chinöz quézinu' ca na' gúcalenë' bönni' ni rë'u, cate' ni' guzóaru' yödzo Éfeso.

2

Ral-la' gácabí Timoteo ca tu bönni' idú ládxë'ë rejë' gudil-la

¹ Na'a, xzí'ina'do', butipa ládxu'u ca naca le ruzá' ládxë'ë Jesucristo quíu'. ² Didza' biyönnu' bë'a lógaca zían nupa tun ba nalí que, didza' ni budödi lu ná'agaquie' bönni' tunë' ca ta'nnë', bönni' gaca ulu'sëdinë' ca' ia'bal-la bönachi.

³ Ral-la' guá' ilenu' le ulu'saca' li' zí' ca na' ruá' rilën nu naca bönni' queë' Jesucristo idú ládxë'ë rejë' gudil-la. ⁴ Nu bönni' rejë' gudil-la, bití' ca' gútsë'ë yugu' le tun bönachi yödzülió ni, para tsaza ládxë'ë bönni' na' nuzóë' lë' gáquie' bönni' queë' rejë' gudil-la. ⁵ Lësca' caní, nu nutsa' lu huitaj, bití' bi'ideli' channö cabí run ca ral-la' gun. ⁶ Nu bönni' gúz gú'una runë' dxin, zí'alò lë' uzi'ë xibë lë na' razë'. ⁷ Busá' ládxu'u lë ni rea' li', ate' Xanru' caz gunë' ga tséajni'ínu' yúgu'të.

⁸ Yöjnë ca guca queë' Jesucristo. Guljë', en gúquie' xzí'ini xi'sóë David, en gudödi gútië', bubanë' lu yöl-la' guti. Caní rnna didza' dxi'a runa' libán que. ⁹ Tu' runa' libán que didza' dxi'a, riguf'i rizáca'a le raca quia', ga ridxintë nága'a lidxi guié' ni, ca raca queë' tu bönni' huía' dö', pero bití' ca' nága'të xtídzë'ë Dios. ¹⁰ Que lë ni na' ruá' rilëna' yúgu'të lë ni tu' nadxí'ida'

nupa guröë' Dios, para ulu'lë' ca' légaquië'. Jesucristo caz runë' ga ulu'lágaca bönachi na' para ila'cuá' lu bení' idú queë'. ¹¹ Catëz naca lë ni rnna:

Channö nátilenru' Lë', sóalenru'-në' ca' ibanru'.

¹² Channö guá' ilenru' le qui'i sáca'ru', inná bé'lenru' ca' Lë'.

Channö ridá'baga'ru' Lë', Lë' tá'baguë'ë ca' rë'u.

¹³ Sal-la' bití' runru' ca' rnraru', Lë' rúntica'së' ca' rnnë'.

Lë' bití' gaca tá'baguë'ë le náquië'.

Nu bönni' huen dxin queë' Cristo rurúajë' dxi'a

¹⁴ Busá' ládxi'gaca nupa nacué' ga ni' zu' ca' naca lë ni, ate' ni'a queë' Xanru' Dios gunná be'e légaquië' para cabí' ila'dil-la didzë'ë ca' nácagaca didza' cabí' nazáca'gaca. Yugu' didza' caní tun ga ila'niti nupa tu'zë ngui léguequi. ¹⁵ Bé'tica'sö ládxu'u urúaju' dxi'a lahuë' Dios para gacu' ca tu bönni' huen dxin bití' rutuí'inë' ca naca dxin nunë'. Dxi'ado' ral-la' ugunu' dxin didza' idútë li. ¹⁶ Na'a, gucuíta ga nacué' nupa tu'i didza' bití' nazaca', en didza' cá'asó, tu' tun didza' caní ga ilunrë' le cabí' ré'ënë' Dios. ¹⁷ Ila'zë didza' tu'ë ca rizxón huë' nudzu' le ridúdu' rilá. Himeneo, en Fileto nabábagaquië' nupa tu'i didza' caní. ¹⁸ Iropë' ni gula'chixi gula'níguinë' ca naca le naca idútë li, tu' ta'nnë' chigudödi dza ral-la' ulu'bán nupa chinátigaca, ate' gula'béquië' baróli bal-la bönachi ga ridxintë bítí'rö ta'yéajlë' Cristo. ¹⁹ Le benë' tsutsu Dios zóatica'sö, en dë tu le naca bé', le rnna: "Núnbë'ë Dios nupa néquiguequi queë'." Rnna ca': "Gulí'cuíta ga raca le ruá' dö', yúgu'téli' libí'ili' néquili' queë' Cristo."

²⁰ Tu lu yu'u zxón yú'ugaca le néquini, calégasó oro, en plata, pero lësca' le néquini yaga, en yu. Bal-la tu'gún bönachi léguequi dxin ga liná', ate' ia'bal-la tu'gún léguequi dxin ga bití' naca liná'. ²¹ Para gácaru' ca naca lë na' tu'gún bönachi dxin ga liná', en para gaca gunru' le naca dxi'a, en gácaru' lesaca' ugunë' Xanru' rë'u dxin, ral-la' ucuítaru' ga raca le ruá' dö'. Channö gunru' caní, gácaru' lesaca' gunru' yúgu'të dxin dxi'a.

²² Gurú'una le tun ga nu së ladxí' le ruá' dö' ca raca quégaquië' bönni' ra'bando'. Bé' ladxí' gacu' tsahui'. Ben le run ga réajlë'u Cristo, en le run ga nadxí'ínu' yugu' luzó'o, en le run ga riböz' dxi'ado'. Ca nácagaca lë ni, ben tsözxón nupa tu'lidza Xanru', naca idú dxi'a icja ládxi'do'guequi. ²³ Na'a, gurú'una yugu' didza' cá'asó, en didza' bití' nazaca', tu' chinöz' quézínu' tun didza' caní ga ta'dil-la didza' bönachi. ²⁴ Bönni' huen dxin queë' Xanru' bití' ral-la' tül-lalenë' bönachi didza', pero ral-la' gáquië' nōxaj ladxí' lógaca yúgu'të bönachi. Ral-la' gaca usédinë' bönachi, en gáquië' ca' zxón ladxí'. ²⁵ Lu yöl-la' nōxaj ladxí' ral-la' uzéajni'inë' nupa ta'dá'baga' le runë' libán que. Channö gunë' caní, nadxi ca' Dios gu'ë légaquië' lataj ulu'bí'i ládxi'gaquië' para ilúnbë'ë le naca idútë li. ²⁶ Caní ulu'lë' lu yalaj que tu' xihui' ga nadzúngaquië', ate' ulu'huóaqië' tsahui' para ilunë' ca ré'ënë' Dios.

3

Ca ilaca bönachi dza tsöjsétëgaca

¹ Lësca' ral-la' inözínu' lë ni: Dza tsöjsétëgaca ilaca dza ila'guí'i ila'zaca' bönachi. ² Yugu' dza ni' ila'cu'ë bönni' ilácagaquië' caní:

Ila'dxí'i la' cuíngacasë', en ulu'huidí'në'.

Ilún ba zxón cuíngaquië', en ulu'lui'í cuíngaquië' zxón.

Ila'nnë' zi'ë que le naca lá'ayi.

Ila'dá'baguë'ë xuz xiná'agaquië'.

Ilácagaquië' bönni' cabí ta'yaza ládxi'gaquië'.

Bití' ilunë' ca ré'ënë' Dios.

³ Bití' ila'dxí'inë' ca ral-la' ilunë'.

Ilácagaquië' zidzaj ladxí'.

Ila'nnë' que luzá'agaquië'.

Bití' ila'nná be'e cuíngaquië'.

Ilácagaquië' bönni' dza'a.

Bití' ila'lé'enë' dxi'a le naca dxi'a.

⁴ Ilácagaquië' hueti luzë'e, en bití' ila'dzáguië' dxi'a.

Ulu'lui'í cuíngaquië' ca bönni' nayépisëgaquië'.

Ila'dxí'inë' le ila'yázasó ládxi'gaquië', en calëga Dios.

⁵ Ulu'lui'í cuíngaquië' ca bönni' núnbë'gaquië' Dios.

Ila'dá'baguë'ë le ruzá' lédxë'ë Dios queéru'.

Gucuíta ga nacué' bönachi caní. ⁶ Lësca' caní, lu yöl-la' banísa quégaquië' ila'yazë' gapa naca lu yu'u, en ila'zí' yé'enë' yugu' nigula bití' bi nōzguequinu para ila'zí' lu ná'agacanu le ulu'sédinë'. Ila'bága'nu nigula na' dul-la' zían, en iluf'i ládxi'gacanu yugu' le ila'zësó ládxi'gacanu le cabí nazaca'. ⁷ Ila'yónitica'sinu nigula ni didza' ilún libán que bönachi, pero bití' ca' ila'déli'nu ila'yéajni'ininu le naca idútë li. ⁸ Ca na' guláquië' Janes, en Jambres, bönni'

ni' gula'dá'baguë'e Moisés, lësca' caní ilácaquië' bönni' ni, ila'dá'baguë'e le naca idütë li. Ilácaquië' chul-la niti, en ila'chixinë' ca naca le réajlë'ëru' Cristo. ⁹ Biti' ila'déli'rönë', pero gaca bë' nácaquië' bönni' bití' bi nózguequinë' lógaca yúgu'të bönachi, ate' gaca quégaquië' ca na' guca quégaquië' Janes, en Jambres na'.

Le rigü'ë Pablo lu ná'abi' bi'i Timoteo

¹⁰ Nöz quézinu' ca naca le rusédida' bönachi, en ca runa'. Nözinu' ca' le ru'í ládxa' a guna', en ca réajlë'a Cristo, en ca naca' nōxaj ladxi', en ca nadxi'ida' luzá'a, en ca ribōza' zxon ladxi'. ¹¹ Nōzinu' ca' yugu' le gula'bia ládxi' gaca bönachi neda', en yugu' le gudí' i guzxac'a, le gulaca quia' lu yōdzō Antioquia, en lu yōdzō Iconio, enca' lu yōdzō Listra. Yugu' le gula'bia ládxi' gaca bönachi ni' neda' biá' guléna', ate' Xanru' Jesús busölë' neda' lu yúgu'të lé na'. ¹² Yúgu'të nupa'të ëni ilaca idú dxi' a tu' néquiguequi queë' Jesucristo, lësca' ila'gu'í ila'záquië' yugu' le ila'bia ládxi' gaca bönachi légaquië'.

¹³ Na'a, bönni' tuá' dō', en bönni' ta'z'í yë'ë ilácarë' xihui'. Ila'z'í yé'enë' bönachi, ate' ila'z'í ye'e bönachi ca' légaquië'.

¹⁴ Na'a, ben chi'i yugu' le buzëdu', en le guzxi' lu no'o, tu' nunbë' casu' nupa bulu'sedi li'. ¹⁵ Ga gudela' nacu' bi'ido' nūnbë'u le nazúajgaca lu guichi lá'ayi, le huáca ulu'zéajni'ide'e li' para uló' tu' réajlë'u Jesucristo. ¹⁶ Yúgu'të le nazúajgaca lu guichi lá'ayi guchizië' Dios icja ládxi'do' gaca bönachi queë', nupa na' bulu'zúaj lu guichi didza' na' bë'ë Dios. Lë na' nazúaj lu guichi nácada' lesaca' usedi rë'u, en ubéaj ga liná' le runru', en ugú'u rë'u tu nōza, en usedi rë'u para gácaru' tsahui'. ¹⁷ Caní run, para gaca sina' nu naca queë' Dios, en gácada' gun yúgu'të le naca dxi'a.

4

¹⁻² Ni'a queë' Xanru' Dios, enca' Xanru' Jesucristo, rinná bé'eda' li' gunu' libán que xtídzë'ë Xanru'. Lë cazë' uchi'a usöröë' nupa ni nabángaca, en nupa chinátigaca, dza ni' huödë' idinná bë'ë. Bë' ladxi' gunu' lë ni channó raca dxi'a quiu' o bití' raca dxi'a. Lu yöl-la' zxon ladxi', guléaj ga liná' le tun bönachi. Busá' ládxi'gaquië', en guchiza icja nágaquië' ca naca lë na' rusédiru'. ³ Caní ral-la' gunu' tu' idxin dza cate' bití' ulu'zë' nágaquië' xibá tsahui', pero ilë'ëninë' ila'yönnë' le ta'dánisinë'. Ca ta'zësó ládxi'gaquië' ulu'tubë' quégaquië' nupa ulu'sedi légaquië'. ⁴ Ulu'cá'anë' le naca idütë li, en ila'z'í lu ná'agaquië' yugu' didza' ridasó. ⁵ Na'a, ral-la' gacu' zxon ladxi' lu yúgu'të le runu'. Biá' gulén le ulu'saca' li' z'í'. Ben libán que didza' dxi'a. Idú ládxi'u ben dxin le budödë' Cristo lu no'o gunu'.

⁶ Ca naca quia' neda', nudödi cuina' lu në'ë Dios, ate' chizóa ilütië' neda' tu' runa' xichinë', ate' dza uzá'a yōdzōlió ni chizóa idxin. ⁷ Ca runë' tu bönni' idú ládxi'ë rejë' gudil-la, lësca' caní bena' neda' dxin, en chibudxi bena' le budödë' Cristo lu na' a guna', tu' bena' idú ca sa'yéaj le réajlë'ëru' Cristo. ⁸ Iastú, naca lōza quia' idéli'da' le ral-la' ila'z'í nupa náca gaca tsahui', le gunnë' Xanru' quia' dza ni', ate' tsahui' naca ca ruchi'a rusöröë' rë'u. Calégasó quia' neda' gunnë' le, pero lësca' gunnë' le quégaca yúgu'të nupa ta'dxi'i Lë', en idú ládxi'guequi ta'bōza dza huödë'.

Le buzúajë' lu guichi Pablo gunbi' Timoteo

⁹ Bë' ladxi' guídateo' ga ni zoa' ¹⁰ tu' guléaj ládxi'ë Demas neda', tu' nadxi'inë' le ruzi'ë xibë yōdzōlió ni, ate' guyijë' yōdzō Tesalónica. Crescente guyijë' luyú Galacia, ate' bi'i Tito guyéajbi' luyú Dalmacia, tu' caní ben bayudxi ilunë'. ¹¹ Tuzë' Lucas zóalenë' neda'. Guchë'ë-bi' bi'i Marcos para guídalenbi' li' tsōzxon, tu' nácabi' gúnlenbi' neda' tsōzxon xichinë' Cristo. ¹² Gusöl-la' a-bi' bi'i Tíquico lu yōdzō Éfeso. ¹³ Cate' guídu', biá' quia' lari' guitsa' na' bucá'ana' lu yōdzō Troas lu yu'u lidxë' Carpo, en biá' ca' quia' yugu' guichi, en le naca lo, biá' quia' yugu' guichi néquiguequini guídi.

¹⁴ Alejandro, bönni' gubëdxi guíë, zían le bi'ë dō' quia'. Lë cazë' Xanru' ubi'ë queë' ca náca gaca le benë' bönni' ni quia'. ¹⁵ Ben chi'i cuinu' queë' bönni' ni, tu' ridá'baga'dë'ë didza' runru' libán que.

¹⁶ Cate' le zí'aló luzuí bidxina' lógaquië' bönni' yúlahu', cuntu nu gúcalen neda', pero bulu'béaj ládxi' gaca yúgu'të bönachi neda'. Biti' rë'ënda' uzí' lëbë' Dios légaquië'. ¹⁷ Guzóalenë' Xanru' neda', en butipë' ládxa'a para údxi guna' libán que xtídzë'ë para ila'yöni yúgu'të bönachi izá'a le. Caní guca, busölë' Xanru' neda', ate' guca quia' tscá burúaja' lu ruá'aba' bëdxi guixi'. ¹⁸ Lë cazë' Xanru' usölë' neda' lu yúgu'të le cabí raca dxi'a, en gun chi'ë neda' ga idxíntea' ga rinná bë'ë Lë' ni' yehua' yubá. ¡Gácatica'só queë' yöl-la' ba yúgu'të dza zá'gaca! ¡Ca' gaca!

Pablo rugapë' Dios bönachi queë' Cristo

¹⁹ Bugapa Dios Priscila, en Aquilo, enca' bönachi nacua' lidxë' Onesíforo. ²⁰ Bugá'anë' Erasto lu yōdzō Corinto, ate' bucá'ana'-në' Tróximo luyú Mileto tu' ré'enë'. ²¹ Bë' ladxi' guídu'

ga zoa' zí'alö cate' idxín beo' ziaga. Eubulo, en Pudente, en Lino, en Claudia, en yúgu'të böchi' luzá'aru' ni tu'gapë' Dios li'.

²² Rinábida'-në' Xanru' Jesucristo sóalenë' li'. ¡Gácalen li' le ruzá' ládxë"ë Dios quiu'! ¡Ca' gaca!

DIDZA' GUSÖL-LĚ'Ě PABLO QUEĚBI' BI'I TITO

Pablo rugapĕ' Dios bi'i Tito

¹ Neda', Pablo, naca' huen dxin queĕ' Dios, en gubáz nasöl-lĕ'ĕ Jesucristo. Gusöl-lĕ'ĕ neda' para guna' ga ila'yĕajlĕ' bönachi chiguró cazĕ' Dios, para ulu'ünbĕ' le naca idútĕ li ca ral-la' gun nu nunbĕ' Dios. ² Caní naca' tu' runa' löza uzi'a xibĕ yöl-la' na'bán idú le guzxi' lu nĕ'ĕ Dios gunnĕ' queĕru' dza ni'te, cate' si' gusi lo rata' yúgu'tĕ le dĕ, ate' run cazĕ' Lĕ' le nazí' lu nĕ'ĕ gunĕ'. ³ Cate' bidxín dza que, Dios bulu'e lahui xtídzĕ'ĕ, le gulu'ĕ lu na'a guna' libán que. Caní gunná bé'enĕ' Dios, Nu busölä rĕ'u, neda'. ⁴ Rugapa' Dios lí', bõcha'ado' Tito. Nacu' idú zxi'ini caza' tu' naca lĕbisö ca réajlĕ'ĕru' Cristo. Rinábida'-nĕ' Dios Xuz, en Xanru' Jesucristo Nu busölä rĕ'u, uzá' ládxĕ'ĕ quiu', en huĕchi' ládxĕ'ĕ lí', en gunĕ' ga soa dxi icja ládxi'do'o.

Dxin queĕ' Cristo runbi' bi'i Tito luyú Creta

⁵ Que lĕ ni na' bucá'ana' lí' luyú Creta, para usó'o le riyadzaj quégaca bönachi queĕ' Cristo nacua' ni', para ilácagaca idú bönachi queĕ' Cristo, en para ucú'u bönni' gula yúgu'tĕ yödzo para ilún chi'ĕ bönachi queĕ' Cristo nacua' tu tu yödzo ni', ca na' chigunná bé'eda' lí' gunu'.

⁶ Nu bönni' gula rapa chi'ĕ bönachi queĕ' Cristo ral-la' gáquiĕ':

Bönni' cuntu nu bi gaca innĕ queĕ'.

Zoa túzinu nigula queĕ'.

Yugu' zxi'inĕ' ral-la' ila'yĕajlĕ'ĕbi' Cristo.

Biti' soa nu gaca innĕ quégacabi' ta'dá dzágasibi' ca',

o ta'dá' бага' bi' xuz xiná'agacabi'.

⁷ Nu bönni' rapa chi'ĕ bönachi queĕ' Cristo run bayudxi:

Biti' runĕ' le gú'í lataj nu bi innĕ queĕ' ca runĕ' xichinĕ' Dios.

Biti' gáquiĕ' bönni' zidi o bönni' icja dza'a,

o bönni' re'jĕ', o bönni' ribíxjanĕ',

o bönni' rizĕ ládxi'sĕ' dumí.

⁸ Ral-la' gu'ĕ ga ila'cu'ĕ bõchi'ru' ta'dxinĕ' lidxĕ'.

Ral-la' sĕ ládxĕ'ĕ gunĕ' le naca dxi'a.

Ral-la' gáquiĕ' bönni' réajni'i, en bönni' tsahui'.

Ral-la' gádxinĕ' Dios, en inná be'e cuinĕ'.

⁹ Ral-la' gun chi'ĕ didza' idútĕ li ca chinazĕdĕ',

para gaca ichízíĕ' icja náagaca bönachi ca sa'yĕaj xibá dxi'a,

en para gaca usayjĕ' rú'agaca bönachi ta'nnĕ que.

¹⁰ Caní ral-la' gáquiĕ' tu' ta'dá'baguĕ'ĕ zían bönni', en tu'ĕ didza' biti' nazaca', en ta'zí' yĕ'enĕ' bönachi. Zían bönni' tunĕ' caní nácaqaquiĕ' judío. ¹¹ Yugu' bönni' ni, run bayudxi gunu' ga tsayaj ruá'agaquiĕ', tu' tunĕ' ga ta'chixi ta'nigui yúgu'tĕ bönachi nacua' yu'u gapa ta'yáziĕ', en tu'sedinĕ' le cabí ral-la' ulu'sedinĕ'. Caní tunĕ' para ila'zí'isĕ' dumí.

¹² Tuĕ' bönni' gubábĕ' bönachi Creta ga na' zu', bönni' na' bĕ'ĕ didza' uláz que yudo' quégaquiĕ', gunnĕ': "Ta'zí' yĕ'tica'sĕ' bönni' Creta, en nácaqaquiĕ' ca bõa' gu'a sínia'. Nácaqaquiĕ' bönni' huágulĕ'ĕ xõhuĕdi." ¹³ Didza' ni benĕ' ba nalí quégaquiĕ' naca idútĕ li. Que lĕ ni na' gudil-la légaquiĕ' para gaca idú ca ta'yĕajlĕ'ĕ Cristo, ¹⁴ en para cabí ulu'zĕ nácaqaquiĕ' yugu' didza' ridasõ quégaquiĕ' bönni' judío, en biti' ilunĕ' ca ta'nná bĕ' bönachi nucu'anagaca le naca idútĕ li.

¹⁵ Yúgu'tĕ naca dxi'a quégaca nupa nácaagaca dxi'a, pero quégaca nupa nácaagaca xihui', en biti' ta'yĕajlĕ', biti' bi naca dxi'a, pero nácaagaca xihui' ga ridxintĕ le ta'bequi ícaguequi, en le ta'zá' ládxi'gaca. ¹⁶ Ta'nnĕ' núnbĕ'gaquiĕ' Dios, pero le túngaquiĕ' biti' rójlõz le ta'nnĕ' tu' nácaqaquiĕ' bönni' tu'dí'inĕ' Dios. Ta'dá'baguĕ'ĕ xtídzĕ'ĕ, en biti' ca' gaca ilunĕ' le naca dxi'a.

2

Xibá dxi'a le ral-la' usĕdiru'

¹ Na'a, ral-la' gu'u didza' le rójlõz xibá dxi'a.

² Busedi yugu' bönni' gula:

Biti' ral-la' ilĕ'ajĕ'.

Ral-la' iláquiĕ' ba'a ladxi', en bönni' ta'yĕajni'inĕ'.

Ral-la' gaca idú ca ta'yĕajlĕ'ĕ Cristo.

Ral-la' ila'dxi'inĕ' luzá'agaquiĕ', en ila'bõzĕ' zxon ladxi'.

³ Busedi yugu' nigula gula:

Ilunnu le raza ládxĕ'ĕ Dios.

Cabí ila'nnĕnu que luzá'agacanu, en cabí ilĕ'ajnu.

Ral-la' ulu'sédinu le naca dxi'a.

⁴ Ral-la' ulu'sédinu' nigula ni' yú'ugacanu iz cuidi' para ila dxi'ínu bõnni' que queégacanu, enca' zxi'ingacanu.

⁵ Ral-la' ilácanu nigula ta'yéajni'ínu, en nigula dxi'a ladxí'.

Ral-la' ilún chí'ínu le dè lídxigacanu, en ilácanu dxi'a.

Ral-la' ilunnu bal bõnni' que queégacanu.

Ral-la' cabí bi ilunnu le gú'i' lataj nu inné zi' que xtídzë'è Dios.

⁶ Busedi yugu' bõnni' ni' nacu'è iz cuidi':

Ral-la' ilácagaquië' bõnni' ta'yéajni'inë'.

⁷ Ral-la' gúntica'su' le naca dxi'a,

ulu'i'ínu' bõnachi caní ca ral-la' ilúngaca.

Ca rusédinu' ral-la' uluf'i nacu' idú ladxí', en ba'a ladxí'.

⁸ Ral-la' usédinu' didza' dxi'a le cabí gaca nu bi inné que.

Caní gunu' ga utuí'inë' bõnni' ridá'baguë'è,

en bití' gaca bi inné' queéli' runlí' le ruá' dõ'.

⁹ Busedi bõchi'ru' ni' ta'yéajlë'è Cristo, en nadó'ogaquië':

Ral-la' ila'cu'è nõxaj lógaquië' xángaquië'.

Ral-la' ilunë' yúgu'të le ila'yaza ládxi'gaquië' xángaquië'.

Biti' ral-la' tá'baga'gaquië' le ta'nná bë'è.

¹⁰ Biti' bi ulu'cáchi'lanë'.

Ral-la' ulu'luf'i cúngaquië' tsahui' ca naca yúgu'të le tunë'.

Caní ulu'i' lo naca dxi'a xibá queë' Dios, Nu busólá rë'u.

¹¹ Cristo, bõnni' na' buzá ládxi'è Dios queëru' chibuluí' i lahuë' lógaca yúgu'të bõnachi para ulu'lágaca. ¹² Lë' rusédinë' rë'u ucá'anaru' le cabí raza ládxi'è Dios, en cabí sé ládxi'ru' le naca que yödölió ni, pero cózaru' zxõn ladxí', en gácaru' tsahui' dza ni zóaru' na'a, en gunru' ca rë'ëni quézinë' Dios. ¹³ Ral-la' cózaru' le runru' löza le gun ga gácaru' bica' ba, lë na' gaca dza ni' cate' ulu'i' lahuë' Jesucristo lu bení' idú queë'. Náquië' Dios zxõn, Nu rusólá rë'u. ¹⁴ Lë cazë' budödi cuinë' uláz queëru', para bóa'uë' rë'u lu yúgu'të le naca xihui', ate' ruunë' rë'u tsahui' para gácaru' bõnachi queë', en gú'i' ládxi'ru' gunru' le naca dxi'a.

¹⁵ Yugu' lë ni bë' didza', en guchiza icja nággaca bõnachi ni', ate' len yól-la' unná bë' gudil-la légequi. Béntica'só caní, para cabí si' lataj nu ucá'ana cá'asó xtídzú'u.

3

Le ral-la' ilún bõnachi ta'yéajlë' Cristo

¹ Busá ládxi'gaquië' bõchi'ru' ni' ilunë' ca ta'nné' bõnni' dë lu ná'agaquië', en bõnni' yúlahui', para ilunë' ca rnna xtídzá'gaquië'. Ral-la' ila'cu'è sina' ilunë' le naca dxi'a. ² Biti' bi le ruá' dõ' ral-la' ila'nné' que luzá'agaquië', en bití' ila'díl-lalenë' légaquië' didza', pero ral-la' ilácagaquië' nõxaj ladxí', en idú ladxí' lógaca yúgu'të bõnachi.

³ Lësca' rë'u, zí'aló gúcaru' yugu' bõnni' bití' ta'yéajni'inë', en gudá'baga'ru' Dios. Gudarú' nanítiru', en gúcaru' ca nupa nadó'ogaca, tu' benru' le guzë ládxi'ru' le ruá' dõ', en ia'bal-la le guyaza ládxi'ru'. Benru' ca' le ruá' dõ', en buzxé'eru' luzá'aru'. Biti' bila'lé'e bõnachi rë'u dxi'a, ate' rë'u bití' bilé'eru' dxi'a luzá'aru' turu' ia'turu'. ⁴ Ní'iró bulu'e lahui Dios, Nu rusólá rë'u. Naca bë' náquië' idú dxi'a, en nadxí'inë' yúgu'të bõnachi, ⁵ tu' busólé' rë'u, caléga tu' zoa bi le naca dxi'a benru' rë'u, pero tu' buéchi' ládxi'è rë'u. Bunë' rë'u dxi'a, en benë' ga nácaru' bõnachi cubi. Dios Bó' Lá'ayi rucubë' rë'u. ⁶ Dios gusól-lë'è Dios Bó' Lá'ayi queëru' tu' néquiru' queë' Jesucristu, Nu rusólá rë'u. ⁷ Buzá' ládxi'è queëru', en bunë' rë'u tsahui' para gata' yól-la' na'bán idú queëru', le runru' löza gunné' queëru'.

⁸ Didza' idütë li lë ni nuzúaja' lu guichi. Rë'ënda' usédide'enu' yugu' bõnni' ni' yugu' lë ni para ilu'i' ládxi'gaquië' ilúntica'sé' le naca dxi'a tu' ta'yéajlë'è Dios. Lë ni naca dxi'a, en nácada' lesaca' ila'zí' lu ná'agaca yúgu'të bõnachi. ⁹ Na'a, bití' gu'u lataj nu gú'i' didza' le cabí nazaca', o nu gú'i' ladxí' ca nácgaca lágaca zióntëro cõ' xuz xtó'ogaca bõnachi, o nu tsøjgutsa' yugu' didza' bizxaj, en yugu' le ridil-la didza' ca naca que xibá queë' Moisés, tu' cabí bi nazáca'gaca le caní, ate' cuntu nu uzí' xibé didza' caní.

¹⁰ Channó zoa nu bõnni' ni', rubéajë' choplõ bõnachi queë' Cristo, tõi usó' o ládxi'è tu ia'tú luzuí, bubéajë' bõnni' na'. ¹¹ Nõz quézinu' chibóáquië' caní nu bõnni' bití' náquië' tsahui', en runë' dul-la'. Chinabáguë'è xígua' ni'a que lë na' runë'.

Le buzúajë' Pablo lu guichi le gunbi' bi' i Tito

¹² Cate' isól-la'a-në' Artemas o Tíquico ga zu', bë' ladxí' guídu' ga ni zoa' lu yödö Nicópolis, tu' chinuna' quia' ugá'ana' ni yugu' beo' ziaga. ¹³ Zenas, bõnni' na' rudödë' didza' ca rinná bë' bõnachi yúlahui', enca' Apolos, ila'dxinë' ga ni' zóali'. Bugú' u légaquië' nõza lu yól-la' rácalen, para cabí bi yadzaj quégaquië'. ¹⁴ Busedi yugu' bõchi' luzá'aru' ilúntica'sé' le naca dxi'a, en

bi ulu'nödzejë' quégaca nupa bi riyadzaj quéquequi, para gaca bë' caní le nácaqaquië' queë' Cristo.

Pablo rugapë' Dios bönachi queë' Cristo

¹⁵Yúgu'të nupa nacua'len neda' tu'gapa Dios li'. Bugapa Dios nupa ni' nadxí'igaca rë'u tu' ta'yéajlë' Dios. Le ruzá' ládxë'ë Dios queëru' gácalen yúgu'téli'. ¡Ca' gaca!

DIDZA ' GUSÖL-LË'Ë PABLO QUEË' FILEMÓN

Pablo rugapë' Dios Filemón

¹ Neda', Pablo, dzágabi' neda' bi'i böchi'ru' Timoteo. Nadzuna' lidxi guié tu' runa' xichinë' Jesucristo. Rugapa' Dios li', Filemón. Nacu' bönni' nadxí'itu', en runu' xichinë' Cristo ca runtu' netu'. ² Rugapa' Dios Apia, nigula quiu'. Nácanu zanru' réajlë'ënu Cristo. Rugapa' Dios ca' zxi'inu', Arquipo. Nácabi' queë' Jesucristo ca tu bönni' rejé' gudil-la, tu' runbi' xichinë' Lë' ca runtu' netu'. Lësca' rugapa' Dios bönachí queë' Cristo tu' dubë' lu yu' u lidxu'. ³ Rinábida'-në' Xúziru' Dios, enca' Xanru' Jesucristo, uzá' ládxë'ë queëli', en gunë' ga soa dxi icja ládxí' do' oli'.

Ca runë' Filemón tu' réajlë'ë Cristo

⁴ Rética'sa'-në' Dios queëru' "Xclenu'", en röjnética'sida' li' cate' rulidza'-në'. ⁵ Caní runa' tu' ridxín quia' didza' ca nadxí'inu'-në' Xanru' Jesús, en réajlë' u Lë', en nadxí'inu' ca' yúgu'të bönachí rö queë'. ⁶ Rinábida'-në' Dios gunë' ga gunda' dxin libán runu' ca naca le réajlë' u Cristo, para ulu'zí' xibë nupa nacuá' ni' yúgu'të le naca dxi'a, le ruzá' ládxë'ë Jesucristo queëru'. ⁷ Rudzëjada', en ruzí' zxóna' tu' nadxí'inu' yugu' böchi'ru', en benu' li', böcha'a, ga bulu' huóaca ládxí' gaca bönachí ta' yéajlë' Cristo.

Filemón ral-la' uniti lahuë'-bi' Onésimo, bi'i nadó'o queë'

⁸ Que lë ni na', sal-la' dë lu na'a tu' naca' gubáz nasöl-lë'ë Cristo inná bé'eda' li' ca ral-la' gunu', ⁹ ráta'yua' lo' len yöl-la' nadxí'i, neda' ni chinaca' bönni' gula, en yu'a lidxi guié tu' runa' xichinë' Jesucristo. ¹⁰ Ráta'yua' lo' uláz queëbi' Onésimo, bi'i na' bena' ga böácabi' queë' Cristo, en que lë ni na' nácabi' ca zxi'ini caza' ga ni nadzuna' lidxi guié.

¹¹ Bi'i ni, zí'aló biti' gúcabí' lesaca' quiu', pero na'a nácabi' lesaca' quiu' li', enca' quia' neda'. ¹² Bi'i ni rusöl-la'-a-bi' ga zu'. Ben bal lëbi' ca neda' caz runu' bal, tu' nadxí'ida'-bi'. ¹³ Gú'unida' ugá'analenbi' neda' ni, para uláz quiu' gunbi' xichina' tsanni ni yu'a lidxi guié tu' runa' libán que didza' dxi'a, ¹⁴ pero biti' bi' rë'ënda' guna' le cabi naca didza' quiu', para cabi guna' bayudxi gácalenu' neda', pero huáca gácalenu' neda' tu' rë'ëni quézinu' ca'. ¹⁵ Nadxi ca' que lë ni na' buzá'abi' Onésimo ga zu' tu' chí'ido' para udxinbi' tsaz ga zu'. ¹⁶ Na'a, biti' rö gácabí' quiu' ca tu' bi'i nadó'o, pero gácabí' quiu' ca' bi'i böchi'cazu', tu' nácabi' bi'i böchi'ru' réajlë'ëbi' Cristo, en nadxí'iru'-bi'. Nácabi' caní quia' neda', ate' ral-la' gácaröbi' ca' caní quiu', calégasó ca böchi' luzó'o, pero lësca' ca bi'i böchu' u réajlë'ëbi' Xanru' Jesucristo.

¹⁷ Que lë ni na', channö nunu' neda' tuz, ben lëbi' bal ca neda' caz runu' bal. ¹⁸ Channö bi' xíguia' benbi' quiu' o channö bi' rál-la'bi' quiu', gunnátëz neda' ral-la'a. ¹⁹ Neda', Pablo, len na'a caza' ruzúaja' quiu' lu guichi lë ni: Neda' caz quizzxa' bi' rál-la'bi', en caléga guía' li': Lësca' ral-lu' u quia' yúgu'të le dë quiu' tu' bena' neda' ga napu' yöl-la' na'bán idú. ²⁰ Ca' gaca, böcha'a. Channö dë le uzi'a xibó' tu' néquiru' queë' Xanru', ben lë na' chigúta'yua' lo' tu' naca' böchu' u réajlë' a Cristo, ate' caní gunu' ga huóaca ládxa'a.

²¹ Ruzúaja' quiu' lu guichi ni, tu' ruzxöni ládxa'a li', gunu' ca' rnna xtídza'a, en nözda' gunu' ia'lati' ca lë na' chigúta'yua' lo'. ²² Lësca' rinaba' lo' upó'o quia' ga soa' lu yu' u lidxu', tu' runa' löza urúaja' lidxi guié ni, ate' guída' ga zóali' tu' rulídzali'-në' Dios, en rinábali' lahuë' ni' a quia' neda'.

Pablo ruzúajë' lu guichi le rugapa Dios Filemón

²³ Epafras, bönni' yu' ulenë' neda' tsözxön lidxi guié ni tu' runë' xichinë' Jesucristo, rugapë' Dios li'. ²⁴ Lësca' tu' gapë' Dios li' Marcos, en Aristarco, en Demas, en Lucas, yugu' bönni' ni túnlenë' neda' tsözxön dxin queë' Cristo.

²⁵ Rinábida'-në' Xanru' Jesucristo uzá' ládxë'ë queëli'. ¡Ca' gaca!

DIDZA' RUZÉAJNI'I YUGU' BÖNACHI HEBREO

Dios bé'lené' rē'u didza' lu ru'ë Zxí'ini cazē'

¹ Zián luzuí, en zían ca bené' Dios, bé'lené' xuz xtó'oru' didza' dza ni'te lu ruá'agaquié' bönni' gulu'ë didza' uláz queé'. ² Na'a, ga ruúdxí xtídzë'ë, dza ni zóaru' na'a, Dios bé'lené' rē'u didza' lu ru'ë Zxí'ini cazē'. Dios buzóé' Lē' para guequi queé' Zxí'iné' yúgu'tè le nequi queé' Lē', ate' lu nē'ë Zxí'iné' na', Dios bené' yödzülió ni. ³ Zxí'iné' na' náquié' ca tu le rulu'i lahui yöl-la' xzön queé' Dios, en ca náquié' Zxí'iné' rulu'i lahui idú le náquié' Dios caz. Run cazē' ga nacaú'tica'sö yúgu'té, ruguné' dxin didza' ru'ë, en yöl-la' huáca queé'. Cate' budxi bené' le ruún rē'u dxi'a que le naca dul-la' nabága'ru', yójchö'ë cuita lē'ë ibëla Dios, Nu rō'ö rinná bē' xitsá'tērö.

Zxí'iné' Dios nayépisëtéré' ca yugu' gubáz lá'ayi

⁴ Zxí'iné' Dios nayépisëtéré' ca yugu' gubáz lá'ayi queé' Dios, tu' nácaterö lo le lē', lē na' Dios gulu'ë Lē' tu' náquié' Zxí'ini cazē', ca lágaquié' gubáz lá'ayi queé' na'. ⁵ Dios catu caz gudxé' tué' gubáz lá'ayi queé' ca na' gudxé' Zxí'iné'. Gunné': Zxí'ina' nacu'. Buzóa' Li' na'a.

Catu caz bē'ë didza' queé' tué' gubáz lá'ayi ca na' bē'ë didza' ca naca queé' Zxí'iné'. Gunné':

Naca' Xuzé', ate' Lē' náquié' Zxí'ina'.

⁶ Lē'sca' caní, cate' Dios buzóé' Bi'i que cazē' lu yödzülió ni, gunné': Yúgu'té gubáz lá'ayi queé' Dios ila'yéaj ládxi'gaquié' Lē'.

⁷ Ca nácaquié' gubáz lá'ayi queé', rnna:

Lē' runé' ga nácaquié' gubáz lá'ayi queé' ca bö' recja,

ate' gubáz lá'ayi huen dxin queé', runé' ga nácaquié' ca guí'.

⁸ Na'a, ca naca cazē' Zxí'iné', rnné':

Ga rō'u rinná bē'u, inná bē'tica'su', Dios.

Tsahui' naca ca rinná bē'u.

⁹ Nadxí'inu' le naca tsahui', en caléga le ruá' dö'. Que lē ni na' Dios budödē' lu no'o yöl-la' unná bē', en bené' ga ruzí'itēru' Li' xibé yöl-la' unná bē' ca le tu'z'í' xibé luzó'o.

¹⁰ Lē'sca' caní rnné':

Li', Xan, cate' gusí lo, benu' yödzülió,

ate' len ná'asu' buzú' lúzxiba.

¹¹ Huadödi quéguequi, pero Li', tsaz idí'u.

Yúgu'té itëbigaca ca ritëbi lari',

¹² en ca lari' utubu' léguequi, en utsó'o léguequi,

pero Li', catu caz utsá' cuinu'

en catu caz igulu'.

¹³ Dios catu caz gudxé' tué' gubáz lá'ayi queé' ca gudxé' Zxí'iné', gunné':

Guró'ö cuita lē'a ibëla

cate' gunra' ga ulu'zechu xzíbigaca lo'

nupa bití' ta'lé'e Li' dxi'a.

¹⁴ Yúgu'té gubáz lá'ayi queé' Dios nácaquié' bö' huen dxin queé' Dios, ate' nasöl-lē'ë légaquié' para ilácalenē' nupa ni nulágaca.

2

Biti' ral-la' ucá'anaru' cá'asö yöl-la' rusölá

¹ Que lē ni na', ral-la' güi'i ládxi'röru' le chibiyóniru', para cabí gaca chopá ládxi'ru'. ² Guca bē' naca idüté li didza' na', le bidxín dza ni'te lu ná'agaquié' gubáz lá'ayi queé' Dios, ate' yúgu'té nupa gula'dódi bē' ca rnna didza' na', en bití' gulún ca rnna, Dios bené' léguequi xíguia' ca na' rójlöz le gulúngaca. ³ Lē'sca' caní bití' ca' uláru' rē'u lu xíguia' na' channö ucá'anaru' cá'asö yöl-la' rusölá ni, le bené' Lē' cazē' Xanru' libán que zí'alö, ate' nupa bila'yöni Lē' bulu'lu'i rē'u naca idüté li. ⁴ Lē'sca' caní Dios caz bené' tsözxön légaquié' ba nalí, tu' bené' le nácaaca bē', en le tun ga rubániru', en yugu' yöl-la' huáca xzön. Gudísi'ë ca' yugu' le runödzej' Dios Bö' Lá'ayi quéguequié' tsca gú'uni quéziné' Dios.

Dios bené' ga böáquié' Jesús idú ca nácaru' rē'u

⁵ Dios biti' budödë' yödzülió si' za' lu ná'agaquië' gubáz lá'ayi que yehua' yubá queë', lë na' ruf'iru' didza' que. ⁶ Na'a, ca naca lë ni, nazúaj lu guichi lá'ayi didza' bë' nu run ba nalí le rnna:

Dios, rubánide'eda' tu' ruf'i ládXu'u bönachi.

Rubánide'eda' tu' rácalenu' léguequi.

⁷ Ia'láti'só cá'asó ca yugu' gubáz lá'ayi que yehua' yubá quiu' benu' bönachi.

Buzú' quéguequi yöl-la' xzön, en yöl-la' run bal,

en budödu' yúgu'të le benu' Li' lu në'eguequi.

⁸ Yúgu'të budödu' lu në'eguequi para lla'nná be'e le.

Nazúaj lu guichi lá'ayi lë na' rnna: "Budödu' lu në'eguequi yúgu'të." Biti' bi buca'anë' le cabí budödë' lu në'eguequi, pero ga ridxintë na'a dza, biti' rilë'eru' yu'u lu në'eguequi yúgu'të. ⁹ Réquibe'eru' le guca queë' Jesús. Tu chí'isó, Dios benë' ga böáquië' ia'láti'só cuidi' ca yugu' gubáz lá'ayi que yehua' yubá queë'. Guljë' bönachi para gutië', ate' gudí' guzxaqué'ë Jesús lu yöl-la' guti uláz quégaca yúgu'të bönachi, tu' buzú' ládXë'ë Dios queëru' caní. Tu' benë' Jesús caní, Dios benë' ga rata' queëru' yöl-la' xzön, en yöl-la' run bal.

¹⁰ Dios benë' yúgu'të le rilë'eru', en runë' ga nacua'tica'só. Dios benë' ca ral-la' gunë' cate' benë' ga naca bë' náquië' Cristo idú tsahui' ni'a que le gudí' guzxaqué'ë. Caní benë' Dios queë' Cristo, Nu bideli' yöl-la' rusólá para gaca ichë'ë bönachi zían yehua' yubá queë'. ¹¹ Cristo ruünë' tsahui' bönachi para ilequi quez queë' Dios. Tuzë' náquië' Xúzguequi nupa na' ruünë' Cristo tsahui', en Xuz cazë'. Que lë ni na', biti' ca' rutuí'inë' Zxí'inë' Dios cate' rnnë' nácaquië' böchi' luzë'ë. ¹² Ca naca lë ni nazúaj lu guichi lá'ayi le rnna:

Usiyönda' böchi' luzá'a ca nacu' Li', Dios.

Gatsaj lálhui'lö bönachi tu'dubi quiu',

gul-la' yöl-la' ba quiu'.

¹³ Lësca' caní rnnë':

Uzxöni ládXa'a-në' Dios.

Ga yúbölö nazúaj le rnnë':

¡Buli'yútsóca' neda', en yugu' zxi'inë',

nupa na' Dios bennë' quia'!

¹⁴ Que lë ni na', tu' néquiqueuinë' bëla' en rön yugu' zxi'inë' na', lësca' caní Cristo ben cuinë' ca nácaquië'. Guljë' bëla' en rön. Caní guljë' para guca gutië', en caní guca busunitië' yöl-la' huáca unná bë' que tu' xihui', nu na' dë lu në'e guti bönachi. ¹⁵ Caní benë' Cristo para guca busanë' yúgu'të nupa gulaca ca bönni' nadó'ogaquië' tsanni ni nacua' nabángaca, tu' guladxi yöl-la' guti. ¹⁶ Naca bë' biti' benë' caní para gácalenë' yugu' gubáz lá'ayi que yehua' yubá queë' Dios, pero para gácalenë' yugu' zxi'ini xi'sóë' Abraham. ¹⁷ Que lë ni na', ben bayudxi böáquië' Cristo idú ca nácaquië' böchi' luzë'ë na', para gáquië' lahuë' Dios tu bixúz lo, tu bixúzi runë' ca rnnë', en ruhuéchi' ládXë'ë bönachi, enca' para gunë' le gun ga gata' lu në'ë ugüë' dul-la' nabága'gaca bönachi. ¹⁸ Na'a, tu' gudí' guzxaqué'ë Lë cazë' Cristo, ate' guzxi' bë' tu' xihui' Lë', que lë ni na' napë' yöl-la' huáca gácalenë' nupa ni, rizi' bë' tu' xihui' léguequi.

3

Jesús nayëpisëtërë' ca Moisés

¹ Que lë ni na', böchi' luzá'ado', libí'ili' na' nácali' quez queë' Dios tu' bulidzë' Dios libí'ili', buli'yú dxi'a ca náquië' Jesucristo. Náquië' gubáz nasól-lë'ë Dios, enca' bixúz lo que le nazí' lu ná'aru'. ² Jesús ni runë' ca rnna xtídzë'ë Dios, Nu na' buzóa Lë' xilatjë', ca na' benë' ca' Moisés, benë' ca rnna xtídzë'ë Dios lógaca yúgu'të bönachi queë' Dios. ³ Nayëpisëtërë' Jesús ca Moisés, para gaca queë' yöl-la' ba, ca na' nácárë' lo bönni' nequi queë' tu yu'u ca naca huen dxin zoë' lu yu'u na'. ⁴ Yúgu'të yu'u, zoa nu ben le, pero Dios náquië' Nu ben yúgu'të le rilë'eru'. ⁵ Le nácátë Moisés benë' ca rnna xtídzë'ë Dios lógaca bönachi queë' Dios, pero gúquië' ca tu bönni' huen dxin, ate' benë' ba nalí que didza' ral-la' gu'ë Dios, ⁶ pero Cristo runë' ca rnna xtídzë'ë Dios, en náquië' Zxí'ini cazë', ate' nacua' lu në'ë bönachi queë' Dios. Rë'u ni, nácaru' bönachi na' queë' Dios channö gácaru' tsutsu ga idxinrö dza údxi. Ral-la' gácaru' tsutsu ca ridipa ládxi'ru', enca' ca rudzëjalenru' lë na' runru' löza.

Dë lataj ga ulu'zí' ládxi'gaca bönachi queë' Dios

⁷ Que lë ni na', nazúaj lu guichi ca rnnë' Dios Bö' Lá'ayi le rnna:

Na'a, channö riyónili' didza' ru'ë Dios,

⁸ biti' gácali' zidi lu icja ládxi'do'oli'

ca na' gulaca nupa ni' gula'dá'bagá' Dios

cate' ni' gula'zí' bë' Lë' lu lataj cá'asó.

⁹ Gula'zí' bë'ë xuz xtó'oli' neda' ni'

sal-la' bila'lë'enë' le bena' idú ca choá' iz.

¹⁰ Que lè ni na' guléda' bönachi dza ni', en gunniá':

"Ta'chixitica'sinë' ca ta'zá' ládxi'gaquië'.

Biti' té'ënnë' ila'nözinë' le rë'ënda' ilunë'."

¹¹ Que lè ni na' guléda' légaquië', en bena' tsutsu xtídza'a, gunniá':

"Biti' ila'yázië' ga ulu'zí' ládxi'gaquië' tsözxón len neda'."

¹² Guli'gun chi'i cuinli', böchi' luzá'ado', para cabí gácali' nituli' libí'ili' tu bönni' xihui' cabí réajlë', en para cabí usanli'-në' Dios ban. ¹³ Na'a, buli'zéajni' i tuli' ia'tuli' yúgu'të dza, tsanni ni naca dza ni zóaru' na'a, para cabí si' ye'e le naca xihui' libí'ili', en para cabí gácali' nituli' libí'ili' zidi lu icja ládxi'do'oli'. ¹⁴ Yúgu'tëru' gunru' tsözxón Cristo channó gácaru' tsutsu ga idxinró dza údxi, ca na' gusi lo ridipa ládxi'ru'.

¹⁵ Caní ral-la' gunru' tsanni ni rnna:

Na'a, channó riyónili' chi'ë Dios,

biti' gácali' zidi lu icja ládxi'do'oli',

ca na' gulaca nupa ni' gula'dá'baga' Dios.

¹⁶ ¿Nupxi na' bila'yöni xtídzë'ë Dios, en gula'dá'baga' Lë'? Gulún caní yúgu'të nupa ni' bubéajë' Moisés léguequi luyú Egipto. ¹⁷ ¿Nupxi na' gulënë' Dios idú ca choá' iz? Gulaca nupa ni' gulún dul-la', ate' gulati lu lataj cá'asö. ¹⁸ ¿Nupxi ni' benë' tsutsu xtídzë'ë Dios, gunnë' bití' ila'yaza ga ulu'zí' ládxi'guequi tsözxón len Lë'? Gulaca nupa ni' bití' gulún ca rnna xtídzë'ë Dios. ¹⁹ Na'a, réquibe'eru' bití' guca ila'yázië' tu' cabí gula'yéajlë'ë Dios.

4

¹ Na'a, tsanni ni nagá'ana le guzxi' lu në'ë Dios queëru' para gaca tsú'uru' lataj queë' ga uzí' ládxi'ru', ral-la' gádxiru' para cabí unítiru' lataj tsú'uru' ni'. ² Biyónru' rë'u didza' dxi'a ca na' bila'yönnë' légaquië', pero légaquië' bití' bulu'zi'ë xibé didza' na' bila'yönnë', tu' cabí gula'yéajlë'ë Dios cate' bila'yönnë' le. ³ Rë'u ni réajlë'ëru' Dios, en tsú'uru' lataj queë' ga uzí' ládxi'ru'. Raca ca na' gunnë' Dios:

Que lè ni na' guléda' légaquië'

en bena' tsutsu xtídza'a, gunniá':

Biti' tsú'ugaquië' ga ulu'zí' ládxi'lenë' neda'.

Dë' lataj tsú'uru' rë'u ga uzí' ládxi'lenru'-në' Dios, sal-la' budxi benë' Dios xichinë' dza ni'te cate' ni' benë' yödzóliö ni, en chiruzi' ládxi'ë. ⁴ Nazúaj lu guichi lá'ayi ga ru'i didza' ca naca que dza igadxi, le rnna: "Buzí' ládxi'ë Dios dza igadxi yugu' lu dxin benë'." ⁵ Ga yúbölo rnna: "Biti' tsú'ugaquië' ga ulu'zí' ládxi'lenë' neda'." ⁶ Nupa ni' bila'yöni zí'alö didza' dxi'a, bití' guyú'ugaca ni' tu' cabí gulún ca rnna xtídzë'ë Dios. Que lè ni na', ral-la' tsú'ugaca bönachi yúbölo ni'. ⁷ Que lè ni na' ca', Dios bulu'e tu dza yúbölo, gunnë': "Na'a dza." Caní naca, cate' chigudödi iz zían, bë'ë didza' Dios lu ru'ë David, ca na' nazúaj lu guichi lá'ayi le rnna:

Na'a dza, channó riyónili' didza' ru'ë Dios,

biti' gácali' zidi lu icja ládxi'do'oli'.

⁸ La'tu' benë' Josué ga bulu'zi' ládxi'gaquië' cate' gula'yu'ë lu xiyúgaquië', bití' bë'ë Dios didza' gudödi ni' que ia'turö dza cate' nu uzí' ládxi'len Lë'. ⁹ Que lè ni na', nagá'ana quégaca bönachi queë' Dios lataj ila'déli'në' ga ulu'zí' ládxi'gaquië'. ¹⁰ Nupa tsú'ugaca ga ulu'zí' ládxi'lengaca Dios, ulu'zí' ládxi'gaquië' lu dxin tunë', ca na' buzí' ládxi'ë Dios yugu' lu dxin benë' Lë'. ¹¹ Que lè ni na', ral-la' güi' ládxi'ru' tsú'uru' ga ni' uzí' ládxi'lenru'-në' Dios. Biti' ral-la' tá'baga'ru' xtídzë'ë ca na' gulún nupa ni' bití' gula'yéajlë' Dios, en bití' gula'yu'ë ni'.

¹² Xtídzë'ë Dios naca ban caz, en napa caz yöl-la' huáca. Richúgurö ga rë' ca guié tuchi' natuchi' iropa ru'i. Richugu ridxin ga ta'dzaga bö' naca cázaru', en le zoa lu icja ládxi'do'oru', enca' róxaj ga ridxintë lu dxita lu bin. Run ga naca bë' le ribequi ícjaru', en le rizá' ládxi'ru'. ¹³ Biti' bi gaca ucáchi'ru' ga bití' gaca ilé'enë' Dios le. Yúgu'të le nun cazë' Dios nalá' lahui, en narúaj ga liná' lahuë' Dios. Lahuë' Lë' run bayudxi quíxjö'öru' le nunru'.

Jesús náquië' bixúz lo, Nu nácatërö zxön

¹⁴ Zoa queëru' tu bixúz lo, nácatërë' zxön, Nu na' gudödi ni' yehua' yubá, Jesús, Zxi'inë' Dios. Que lè ni na' ral-la' ugá'anaru' tsutsu ca naca le nazí' lu ná'aru'. ¹⁵ Zoa queëru' tu bixúz lo, Nu gaca huéchi' ládxi' rë'u ca nácgaca le raca queëru', tu' guzxi' bë' tu' xihui' Lë' cazë' iduté ca na' rizí' bë' tu' xihui' na' rë'u, pero bití' bi dul-la' benë' Lë'. ¹⁶ Que lè ni na', idú ládxi'ru' ral-la' ibíga'ru' gala' ga rö'ë rinná bë'ë Dios, Bönni' ruzá' ladxë'ë queëru', en inábaru' lahuë' huéchi' ládxi'ë rë'u, en uzá' ládxi'ë queëru', para gácalenë' rë'u cate' bi raca queëru'.

5

¹ Dios ribö cazë' nútí'tës bixúz lo ladaj bönachi, en ruzó'ë lë' para gunë' yugu' le runë' lahuë' Dios uláz quégaca bönachi, en cu'ë lahuë' Dios yugu' le tu'nödzej bönachi, en yugu' böa' bédxi tütigaquië'-ba' lu bucugu lá'ayi tu' nözi dul-la' nabága'gaquië'. ² Bixúz lo na', tu' raca queë'

lëbisö ca raca quegaca bönachi, gaca gáquié' zxon ladxi' len nupa nacagaca yugu' bönni' canöz, en nupa ta'chixi ta'nigui. ³ Que lë ni na', tu' náquié' bixúz lo na' bönáchisö, ral-la' cu'ë lahué' Dios böa' bëdxi na' tútigaquié'-ba' lu bucugu lá'ayi ni'a que dul-la' nabaga' cazé', ca na' runé' ca' ni'a que dul-la' nabága'gaca bönachi.

⁴ Cuntu nu gaca gun cuini bixúz lo, pero Dios rulidzé' nu ral-la' gaca bixúz lo, ca na' bulidzé' Aaron. ⁵ Lëasca' caní gaca queé' Cristo. Biti' ben cuiné' bixúz lo, pero Dios buzóé' Lë' ca bixúz lo. Ca naca lë ni, Dios gudxé' Lë':

Li' nacu' Zxi'ina'.

Buzóa' Li' na'a.

⁶ Lëasca' caní gudxé' Lë' le nazúaj ga yúbölö, gunné':

Li' nácatuca'su' bixúz,

ca na' gúquié' Melquisedec bixúz.

⁷ Cristo, cate' ni' zoa cazé' yödölió ni, bulidzé' Dios, en gúta'yué' lahué'. Guródxí'ë, en guródxé' lahué' Dios, Bönni' guca usölé' Lë' lu yöl-la' guti, ate' Dios biyönné' Lë' tu' gúdxiné' Lë' idú ládxé'ë. ⁸ Sal-la' gúquié' Zxi'iné' Dios, bizédé' guné' ca rnna xtídzé'ë Dios tu' gulaca queé' yugu' le gudí' guzqué'ë. ⁹ Cate' chigúquié' Cristo idú ca ral-la' gáquié' tu bixúz lo, Dios bené' Lë' Bönni' rusölé' tsaz yúgu'të nupa tun ca rnna xtídzé'ë. ¹⁰ Ní'irö Dios buzóé' Lë' para gáquié' bixúz lo ca na' gúquié' Melquisedec na' bixúz lo.

Zoa bönadxi queëru' huöaj ládxí'ru', en tá'bagá'ru'-né' Cristo

¹¹ Ca naca lë ni, zían le ral-la' gú'ilentu' libí'ili' didza', le naca böniga quíxjöi'tu' libí'ili', tu' cabí réajni'inili'. ¹² Chigudödi dza ral-la' gaca usédili' bönachi xtídzé'ë Dios, tu' chibiyónili' xidzé, pero riquinili' nu quíxjöi'i libí'ili' leyúbölö yugu' le cabí naca böniga nazí' lu në'e nu si' réajlé'. Nagá'anali' ca yugu' bi'i hué'énido' ta'quínibi' nidxi', en calëga la' huagu tsutsu. ¹³ Yúgu'të bönni' naquíniguequiné' nu usedi légaquié' lë na' biti' naca böniga, nacagáquié' ca yugu' bí'ido' té'ajbi' nidxi'. Biti' nazédagaquié' ca sa'yéaj le naca tsahui'. ¹⁴ La' huagu tsutsu tu'z'í' xibé nupa chinál-lágaca, nupa na' gaca iléquié'ë le naca dxi'a, en le cabí naca dxi'a, tu' nugúngaquié' dxin yöl-la' réajni'i quégaquié'.

6

¹ Que lë ni na', biti' ral-la' usédatica'siru' yugu' xibá buzédaru' cate' si' gusi lo riyóniru' ca naca queé' Cristo. Ral-la' tsöjnöröru' para gácaru' idú bönachi queé' Cristo. Biti' naquini usédaru' leyúbölö yugu' xibá biti' naca böniga:

ca ral-la' ubí'i ládxí'ru',

en ca bití'rö gunru' le ruá' dö',

en ca ral-la' tséajlé'ëru'-né' Dios,

² en ca naca xibá que le ridílaru' nisa,

en ca rixóa ná'aru' bönachi ta'yéajlé' Cristo,

en ca ral-la' ulu'bán nupa nátigaca,

en ca guné' Dios, ichúquié' quégaca bönachi tuá' dö'.

³ Caní gunru' channö gunné' Dios rë'u lataj.

⁴⁻⁶ ¿Naru' huácatsö gunru' ga ulu'bí'i ládxí'gaca leyúbölö nupa tu'huöaj ladxi', en ta'dá'bagá' Dios? Channö bidxin quéguequi bení' queé' Dios, en bulu'z'í' xibé le runödzej' Dios zoé' yehua' yubá, en gulaca tuz len Dios Bó' Lá'ayi, en channö bulu'z'í' xibé didza' dxi'a queé' Dios en yöl-la' huáca que dza si' za', en channö ní'irö tu'huöaj ladxi', en ta'dá'bagá' Dios, biti' ca' gaca nu gun ga ulu'bí'i ládxí'gaca leyúbölö, tu' gaca tsca ulu'dá' leyúbölö Zxi'iné' Dios lë'e yaga cruz en ilún tsca ulu'titaj Lë' lahui' lógaca bönachi. ⁷ Nupa tun caní nacagaca ca yu na' ruzí' xibé nisa guíöj le ribixi láhuilö zían luzuí. Channö yu na' runödzej le tu'z'í' xibé nupa tá'ana yu na', raza ládxé'ë Dios le, ⁸ pero channö ruzóasö yu na' lubá yótsi', en bësígá', naca ditaj, en nabía dö', en naca para nu uzegui le.

Le runru' löza le run ga nácaru' tsutsu

⁹ Sal-la' ru'itu' caní didza', libí'ili' na' nadxí'itu', réquitu' ruzí'ili' xibé le nacagacarö dxi'a, le tu'z'í' xibé nupa nulágaca. ¹⁰ Dios náquié' tsahui', en biti' gal-la' ládxé'ë dxin tsahui' benli', en yugu' le benli' tu' nadxí'ili' Lë'. Gacalenli' nupa néquigeequi quez queé' Dios, en runli' xichinguequi. ¹¹ Na'a, ré'ënitú' gú'i ládxí'li' luzá'ali' tu ia'tuli', en gunli' caní ga idxinrö dza údxi, para gata' idú queéli' lë na' runli' löza. ¹² Ré'ënitú' cabí gácali' xöhuédi, pero gunli' ca tun nupa ta'yéajlé' Dios, en ta'böza zxon ladxi', para idéli'li' yugu' le guzxi' lu në'ë Dios gunné' queëru'.

¹³ Caní gaca, tu' bené' tsutsu Dios xtídzé'ë cate' guzxi' lu në'ë bi gunné' queé' Abraham. Tu' cabí zoa nu nácarö lo ca Dios, que lë ni na' buzetaj cuiné', cate' ni' bené' tsutsu xtídzé'ë. ¹⁴ Caní gunné' Dios: "Le nácaté' guna' ga gaca dxi'a quiu', en guna' ga ila'yánda'abi' zxi'ini xi'sú." ¹⁵ Gulözé' Abraham zxon ladxi', ate' bidéli'né' le guzxi' lu në'ë Dios gunné' queé'.

16 Cate' tu bõnni' runë' tsutsu xtídzë'ë, ruzõtjë' nu nácatërö lo ca lë', ate' lë ni ruzóa dxisó yúgu'të didza' bizxaj, tu' nunë' tsutsu xtídzë'ë. 17 Que lë ni na' Dios benë' tsutsu le guzxi' lu në'ë gunë', en buzõtaj cuinë', tu' gú'unnë' ulu'ínë' nupa ulu'zì' xibé le guzxi' lu në'ë unödzejë' queguequi, nácada' löza, en tsaz naca le nuzóa lahuë' gunë'. 18 Le guzxi' lu në'ë Dios, en le benë' tsutsu, chopá ni catu caz idzá gaca, en ca naca quegaca chopá ni, bitì' gaca si' yë'ë Dios. Caní benë' Dios para gácada' löza queëru' tu le huë' tsahuí' rë'u. Ruzxõni ládxi'ru' Lë' idéli'ru' lë na' runru' löza le gunnë' s'íru'. 19 Lë na' runru' löza ruzóatica'sö tsutsu icja ládxi'do'oru', en naca ca tu du guíë ruzóa dxisó barco. Lë na' runru' löza run chí'ë Cristo ní'a queëru' ga ní' zoë' Dios yehua' yubá, le nadxín lu lataj lá'ayi na' zoa cúdzi'lö lari' nala' lu yudo' rō'ō yehua' yubá. 20 Guyázië' Jesús uláz queëru' ca Nu rōjnōru loru' ga ní' zoë' Dios, ate' Dios nuzóë' Lë' náquië' tsaz bixúz lo ca na' gúquië' Melquisedec bixúz lo.

7

Jesús náquië' bixúz lo ca gúquië' Melquisedec

1 Melquisedec gúquië' bõnni' na' gunná bë'ë lu yödzo Salem, enca' bixúz queë' Dios, nayëpisëtërë'. Cate' suzë'ë Abraham, söhuõjë' gudõdi guca gudil-la cate' bucul-lë' yugu' bõnni' ta'nná bë'ë, birujáje' Melquisedec na', yõjtságuie' Abraham, en gunábinë' Dios gun lá'ayë' Abraham. 2 Abraham bë'ë queë' tu cõ' tu' chí cõ' que yúgu'të le bidéli'në' lu gudil-la na'. Ca lë' Melquisedec na' rnna lu didza' xidza: "Bõnni' Unná Bë' Tshahi", en náquië' ca' Bõnni' unná bë' que yödzo Salem, le rnna lu didza' xidza: "Bõnni' Unná Bë' Ribeqi' Dxíë'." 3 Bitì' zoa lu guichi le rnna gula'cu'ë xuz xinë'ë, o xuz xtá'ahuë', en bitì' nazúaj dza guljé' o dza gütìë', pero náquië' ca náquië' Zxi'ínë' Dios tu' náquië' tsaz bixúz lo.

4 Buli'yútsõca' na'a, ca na' gúquië' zxon Melquisedec na', tu' lë cazë' xúziru' Abraham bë'ë queë' tu cõ' tu' chí cõ' que lë na' guléajé' lu ná'agaquië' bõnni' ta'nná bë'ë ní' bucul-lë' lu gudil-la. 5 Lu xibá queë' Moisés, Dios rinná bé'enë' yugu' xzi'ini xi'sóë' Leví, nupa nácacaga bixúz, ila'zì'ë tu cõ' tu' chí cõ' que le ta'zì' bõnachi Israel, sal-la' nácacaga di'a dza que'agaquië', tu' nácacagaquië' yúgu'të' xzi'ini xi'sóë' Abraham. 6 Melquisedec na' bitì' náquië' di'a dza que'agaquië', pero guzxi'ë tu cõ' tu' chí cõ' lu në'ë Abraham, nu na' bideli' yugu' le guzxi' lu në'ë Dios gunnë' queë'. Lësca' Melquisedec na' gunábinë' Dios gun lá'ayë' Abraham, 7 ate' cuntú nu gaca tá'baga' lë na' rnna: Nu nadéli'rō lahuë' Dios rinábini Dios gun lá'ayë' nu nacuídi'rō. 8 Na'a, dza ní zóaru' na'a, nupa ta'zì' tu cõ' tu' chí cõ' lu ná'agaca bõnachi nácacaga ca' bõnachi tati caz, pero Melquisedec na', zoa le run ba nalí queë' le rnna zoë' nabanë'. 9 Na'a, huáca innaru' queë' Leví, en quegaca xzi'ini xi'sóë', nupa na' ta'zì' tu cõ' tu' chí cõ' lu ná'agaca bõnachi, lësca' gula'guizjé' tu cõ' tu' chí cõ' cate' ní' Melquisedec na' guzxi'ë tu cõ' tu' chí cõ' lu në'ë Abraham, xuz gula gudõdi que'agaquië'. 10 Caní naca, tu' huáca innaru' Abraham ní' nu'ë lë'ë Leví, en yugu' xzi'ini xi'sóë' cate' ní' yõjtságuie' Melquisedec lë', tu' cabí náljaniguequinë'.

11 Ta'zì' bõnachi Israel xibá gunná bë'ë Moisés lu ná'agaca bixúz, nupa nácacaga xzi'ini xi'sóë' Leví ga nababë' ca' Aarón, bixúz lo. Na'a, la'tu' guca ulu'huóaca bõnachi idú tshahi' lahuë' Dios tu' tun ca rinná bë' xibá queë' Moisés, bitì' ben bayudxi soa ia'túë' bixúz ca gúquië' Melquisedec, en calëga ca gúquië' Aarón. 12 Channö rutsë'ë Dios ca ral-la' gáquië' bixúz, run bayudxi utsë'ë ca' ca naca xibá queë'. 13 Xanru', Nu na' nazúaj lu guichi ca naca queë' yugu' lë ni, nababë' ia'turö cõ' xzi'ini xi'sóë' Israel ca le nababë' Leví na', ate' que cõ' xzi'ini xi'sóë' ga nababë' Xanru', cuntú nu guca bixúz lahuë' Dios. 14 Naca caní tu' naca bë' guljé' Xanru' lu cõ' di'a dza queë' Judá, ate' Moisés bitì' bë'ë didza' queë' Judá na' cate' bë'ë didza' quegaca nupa ral-la' ilaca bixúz.

15 Nácatërö bë' lë ní ni'a que le raca na'a. Ca na' gúquië' Melquisedec bixúz, chibulufi' lahuë' ia'turë' bixúz, Jesús. 16 Bõnni' ni, bitì' gúquië' bixúz tu' rinná bë' xibá ca ral-la' ilaca di'a dza queë', pero náquië' bixúz tu' napë' yöl-la' huáca que yöl-la' na'bán le catu caz údxi. 17 Nazúaj lu guichi lá'ayi le run ba nalí queë' le rnna:

Tsaz nacu' bixúz

ca na' gúquië' Melquisedec bixúz.

18 Na'a, nadúa xibá gula ní', tu' cabí gudapa yöl-la' huáca unná bë', en bitì' bi guca gun. 19 Xibá queë' Moisés na' bitì' guca un bõnachi idú tshahi'. Na'a, chiguyú'u tu le runru' löza le nácarö dxi'a, le run ga gaca íbígá'ru' gala' ga zoë' Dios.

20 Cate' benë' Dios ga náquië' Jesús bixúz, benë' tsutsu xtídzë'ë. 21 Dios bitì' benë' tsutsu xtídzë'ë cate' bucu'ë bõnachi ní' ca bixúz, pero cate' benë' ga náquië' Jesús bixúz, benë' tsutsu xtídzë'ë, gunné':

Bena' tsutsu xtídzá'a neda', Xanu', gunniá':

"Bitì' utsá'a ca guna'.

Tsaz nacu' bixúz

ca na' gúquië' Melquisedec bixúz."

²² Que lê ni na', Cristo náquië' Nu run ga naca lôza didza' rucá'ana tsahui' le nácarô dxi'a ca lê na' guca zí' alô. ²³ Yugu' bixúz ni' guláquië' bönni' zían, tu' cabí guca ulu' gá'anë' yôdzôlió ni tu' gulátië', ²⁴ pero tu' zóatica'së' Jesús, tsaz náquië' bixúz, en bití' gaca nu huóáza xilatjé' para gaca bixúz. ²⁵ Que lê ni na', tsaz gaca usölë' nupa ta' biga' gala' ga zoë' Dios, nupa tu' gún dxin Lê', tu' zóatica'së' nabanë', en rnnë' dxi'a uláz quegaquië' lahuë' Dios.

²⁶ Ben bayudxi soa tu bixúz lo caní queëru'. Náquië' lá'ayi, en idú tsahui', en bití' náquië' tsözxôn bönachi dul-la', pero nayëpisëtëré' ca yúgu'të le nacua' ni' yehua' yubá. ²⁷ Jesús ni, bití' náquië' ca yugu' bixúz lo yôdzôlió ni, tu' ben bayudxi gula'gu'ë rön lahuë' Dios yugu' dza, ate' gulútië'-ba' bôa' bédxi lahuë' Lê' tu' nôzi dul-la' nabága gaca cazë', ate' gudôdi ni' gulunë' caní tu' nôzi dul-la' nabága gaca bönachi. Na'a, Jesús, tsaz gulu'ë rön lahuë' Dios, cate' ni' budôdi cuinë' lahuë' Dios, en bulaljë' xichôn cazë' tu' nôzi dul-la' nabága gaca yúgu'të bönachi. ²⁸ Lu xibá queë' Moisés bönachi bití' náca gaca idú dxi'a náca gaca bixúz, pero gudôdi bidxin xibá queë' Moisés, Dios benë' tsutsu xtídzë'ë, cate' benë' ga náquië' Zxí'ini cazë' bixúz lo, tu' náquië' idú tsahui' ca ral-la' gáquië' bixúz.

8

Jesús náquië' Bixúz Lo queëru'

¹ Na'a, ca rnna lê na' si' gunnía', naca caní: Zoa queëru' tu Bixúz Lo caní. Gurô'ë cuita lê'ë ibëla Dios, ate' rô'ë, rinná bë'ë yehua' yubá ni'. ² Lê' runë' dxin ca Bixúz Lo lu lataj nácatëro lá'ayi, le naca yudo' le naca iduté, lê na' buchisë' Xanru', en calëga bönachi. ³ Dios rucu'ë yúgu'të bixúz lo para la'gu'ë yugu' le tu' nôdzaj bönachi, enca' xichôngacaba' bôa' bédxi lahuë' Dios. Que lê ni na' ben bayudxi soa bi gulu'ë Cristo lahuë' Dios. ⁴ La' tu' zoë' luyú ni, bití' ca' gáquië' bixúz, tu' nacua'tica'së' bixúz ni, nupa ta'gú'u yugu' le tu' nôdzaj bönachi lahuë' Dios ca rinná bë' xibá queë' Moisés. ⁵ Yugu' bixúz ni tunë' dxin que tu le rulu'isô, en le naca ca tu bixin que lê na' rô'ô yehua' yubá. Caní naca, tu' gúdxidë'ë Dios Moisés cate' si' uchisë' yú'udo' na' néquini guidí, gunné': "Buyútsôca', ben yúgu'të idú ca naca lê na' bulu'ida' li' lu gu'á ni'." ⁶ Na'a, Bixúz Lo queëru' ni runë' dxin que le nácatëro lesaca', ate' ni'a que le benë' Lê' zoa tu didza' rucá'ana tsahui' queëru' le nácatëro lesaca', en le ru'í' didza' que le nácatëro lesaca' guzxi' lu në'ë Dios gata' queëru'.

⁷ La'tu' gudapa didza' na' rucá'ana tsahui' le guzóa zí'alô iduté yôl-la' huáca, bití' ben bayudxi soa didza' buropi ni rucá'ana tsahui'. ⁸ Na'a, Dios rulu'ë bití' gulaca bönachi ni' idú dxi'a cate' bë'ë didza' ca na' nazúaj lu guichi lá'ayi, gunné':

Bulí'yútsôca', gunné' Xanru': Zá' gaca dza cate' uzóa' tu didza' cubi ucá'ana tsahui', le gúnlena' bönachi Israel, en bönachi Judá.
⁹ Bití' gaca ca guca didza' rucá'ana tsahui' na', lê na' bënlena' xuz xtó'ogaquië', dza ni' gudéla'a ná'agaquië', en bubéaja' légaquië' luyú Egipto. Tu' bulu'cá'anë' didza' quia' rucá'ana tsahui', neda' bucá'ana' légaquië', rnnë' Xanru'.

¹⁰ Que lê ni na', caní gaca didza' ucá'ana tsahui' gúnlena' bönachi Israel tôdi yugu' dza ni', rnnë' Xanru'. Uchízia' icja ládxi'do'gaquië' xibá quia' en uzúaja' le lu icja ládxi'do'gaquië'. Ní'irô' gaca' Dios quegaquië' ate' légaquië' iláquië' bönachi quia'.

¹¹ Bití' gun bayudxi nu usedi luzë'e, inná: Bénbë'ë Xanru', tu' ilúnbë'ë yúgu'të' neda', ga isí lo nu naca cá'asô, ga idxintë nu naca lo.

¹² Huéchi' ládxa'a légaquië', en uniti lahua' le cabí naca tsahui' gulunë', en bití'rô tsöjnedá' dul-la' nabága'gaquië'.

¹³ Cate' ni' ru'ë Dios didza' que tu didza' cubi rucá'ana tsahui', naca tu' chibigula lê na' guzóa zí'alô, ate' chizóa idúa lê na' nagula, en chinaca gulasi.

9

Lataj lá'ayi dë luyú, en lataj lá'ayi dë yehua' yubá

¹ Na'a, didza' rucá'ana tsahui' na' guzóa zí' aló, dzágagaca xibá le ca ral-la' ila'yéaj ládxi'gaca bönachi Dios, en lataj lá'ayi bidzága le guca que luyú ni. ² Caní naca lataj lá'ayi na' néquini guídi. Lu lataj na' dē lálhulö, nazí'i le Lataj Lá'ayi, gula'cuá' le nuá' guí, en bucugu lá'ayi ga ni' gula'gu'è yugu' yóta xtildo' lahué' Dios. ³ Cúdzi'lö le buropi lari' nal-la' lu yu'u na' zoa lataj ni' nazí'i le, Lataj Idú Lá'ayi, ⁴ ate' lu lataj ni' gula'cuá' tu bucugu néquini oro ga na' bulu'zégui'è nóri, enca' tu guí'ina ga yu'ú didza' rucá'ana tsahui', en nacu guí'ina na' oro. Lu guí'ina na' gula'cuá' zxíga'do' na' néquini oro, le nadzá' yóta xtildo' na' nazí'i le maná, enca' xuyaga queé' Aarón, lē na' bubō' ni'a nē'e, enca' yugu' guíōj blaga na', nazúaj lálhulöguequi didza' rucá'ana tsahui'. ⁵⁻⁶ Lahui guí'ina na' gula'cuá' chopa gubáz lá'ayi néquiguequini oro, légaca querubín que lataj ga bulu'í lahué' Dios, ate' bulu'z'xóa xilíguequi lálhulö lataj ga ni' gulu'è bixúz lo rön tu' nōzi dul-la'. Caní bulu'cu'è yugu' lē ni. Biti' dē lataj uzúaja' na'a iduté ca nácaga lē ni.

Ta'yázatica'sē yugu' bixúz lu lataj zoa lálhulö, ga na' tunē' dxin quégaquie' que le ta'yéaj ládxi'gaquie' Dios. ⁷ Tuzē' bixúz lo guyáziē' lu lataj buropi ni' tu luzuísō tu iz, en bi'ē rön le gulu'è lahué' Dios tu' nōzi dul-la' nabaga' cazē', enca' tu' nōzi dul-la' nabága'gaca bönachi, dul-la' gulunē' le cabí guléquibe'enē'. ⁸ Caní ruzéajni'inē' Dios Bō' Lá'ayi rē'u, bití' ca' guca idxinru' lahué' Dios caz tsanni ni' tu'gunē' dxin lataj lá'ayi na' zoa lálhulö lu yu'u lá'ayi na' néquini guídi, lē na' bidzága didza' rucá'ana tsahui' le guzóa zí'aló. ⁹ Yugu' lē ni naca tu le rulu'ísō que le raca na'a dza. Yugu' le gula'gu'è lahué' Dios, en rön quégacaba' bōa' bēdxi na' gulútiē'-ba' lahué' Dios bití' guca ulu'ún idú dxi'a icja ládxi'do'gaquie' bōnni' ni' gula'yéaj ládxi'gaquie' Dios caní. ¹⁰ Yugu' lē ni bulu'í lahué' quégacasō le gulé'aj gulahué', en ca ral-la' ila'guíbi cuíngaquie', en quégaca xibá ca ral-la' gaca que idú ca zeaj naca cazē'. Yugu' lē ni buzōē' Dios quégaquie' ga bidxintē dza ral-la' utsē'è yúgu'tē.

¹¹ Na'a, chibudulu'í lahué' Cristo, en náquie' Bixúz Lo que le naca idú dxi'a, le bilá' lahui ni'a que le benē' Lē'. Lataj lá'ayi ga na' guyáziē' Lē' nácáro lo, en nácáro idú, en bití' néquini lu ni'a lu ná'agaca bönachi, en bití' naca que luyú ni. ¹² Na'a, chiguyáziē' Cristo lu lataj lá'ayi na', caléga len xichóngacaba' bēdxdido', en xichóngacaba' chivo, pero len rön queé' cazē'. Guyáziē' lu lataj idú lá'ayi tu luzuísō, ate' caní guca, benē' ga nuláru' tsaz. ¹³ Le nácatē xichóngacaba' bēdxi, en chivo, en dō queéba' bēdxdido' bulu'zégui'è-ba', yugu' le gula'gu'è lu ícagaca nupa nabága'gaca dul-la', guca ulu'gúa dul-la' na' nabága'gaca bönachi para ulu'ún légaquie' dxi'a idú ca zeaj naca cazē' ca naca que yól-la' yudo' quégaquie'. ¹⁴ Na'a, gúntērō ca' xichōnē' Cristo, tu' budōdi cuinē' queé' Dios, en gúquie' idú tsahui', ate' zóalenē' Dios Bō' Lá'ayi Lē', Nu zóatica'sō. Na'a, xichōnē' Cristo ruún idú dxi'a icja ládxi'do'oru' lu yugu' le gubága'ru' le tun ga ni' gati, para gaca gunru' xichinē' Dios ban.

¹⁵ Que lē ni na' náquie' Jesucristo Nu ben tsutsu didza' cubi rucá'ana tsahui', tu' gútiē' Lē', en bugúē' dul-la' gula'baga' bönachi cate' ni' zoa didza' gula rucá'ana tsahui'. Gútiē' ca' para gaca ila'z'è lē na' guzxi' lu nē'è Dios unódzjē' quégaquie' bōnni' bulidzē', le zóatica'sō. ¹⁶ Cate' ratiē' nu bōnni', en nucá'anē' tu didza' ca ral-la' ila'guísiē' le nequi queé', run bayudxi gaca bē' chinátiē' bōnni' na' para gaca ilunē' ca rnna didza' na' nucá'anē'. ¹⁷ Cate' chinátiē' bōnni' na', gaca ilunē' ca rnna didza' na', pero tsanni ni zoē' nabanē', bití' ca' gaca ilunē' ca rnna didza' na'. ¹⁸ Que lē ni na', didza' na' rucá'ana tsahui' le guzóa zí'aló guca lesaca' tu' bidzága rön didza' na', le rulu'ísō zoa nu gati. ¹⁹ Cate' ni' gudíxjōi'inē' Moisés bönachi ni' ca nácaga yúgu'tē xibá queé' Dios, gudélē'è rön quégacaba' bēdxdido', en quégacaba' chivo, le nutsi' nisa, ate' len tu guíxi'do' nazí'i le hisopo, en lítsa'ba' bō'cu' zxila' le nē'aj xiná, buchéajē' rön, en nisa na' lahué' guíchi ga na' nazúaj xibá na', enca' lálhugaca bönachi. ²⁰ Ní'irō gudxē' légaquie': "Lē ni naca rön le run tsutsu didza' rucá'ana tsahui' le gunná bē'enē' Dios rē'u para gunru' ca rnna." ²¹ Lē'sca' caní buchéajē' Moisés rön na' lu lataj lá'ayi néquini guídi, en lahué' yúgu'tē le tu'gunē' dxin para ila'yéaj ládxi'gaquie' Dios. ²² Ca na' rinná bē' xibá na', látu'biquí' yúgu'tē ral-la' un dxi'a rön léguequi, ate' channó cabí tu'laljē' rön, bití' udúa dul-la'.

Xichōnē' Jesucristo rugúa dul-la'

²³ Caní naca, ben bayudxi guzóa le bun dxi'a yudo' luyú ni le naca tu le rulu'ísō ca naca lē na' rō'ō yehua' yubá, pero ca naca lē na' rō'ō yehua' yubá, ben bayudxi soa le un dxi'a nupa ila'yaza le, le nácáro lesaca' ca xichóngacaba' bōa' bēdxdido' caní. ²⁴ Bití' guyáziē' Cristo lataj lá'ayi néquini lu ni'a lu ná'agaca bönachi, lē na' naca tu le rulu'ísō ca naca le naca idú, pero guyáziē' yehua' yubá caz para gaca ulu'í lahué' na'a lahué' Dios uláz queéru'. ²⁵ Bixúz lo zoē' luyú ni raziē' lataj nácatērō lá'ayi tu tu iz len rön quégacaba' bōa' bēdxi, pero bití' run bayudxi tsáziē' Cristo zían luzuí para udōdi cuinē' lahué' Dios. ²⁶ La'tu' guca caní, gun bayudxi qui'í sáquē'è Cristo, en gátiē' zían luzuí dza ni'te cate' guta' yōdzóliō ga ridxintē na'a dza, pero na'a cate' naca dza údxi, tsaz bulu'í lahué' tu luzuísō, en budōdi cuinē' lahué' Dios, cate' gútiē' para bugúē' dul-la' nabága'ru'. ²⁷ Ca na' run bayudxi ilátigaca bönachi tu luzuísō ate' tōdi ni' uchí'a usōrōē' Dios léguequi, ²⁸ lē'sca' caní, gútiē' Cristo tu luzuísō, cate' budōdi

cuinë lahuë' Dios para bugüë' dul-la' nabága'gaca bönachi zían. Na'a, ulufi lahuë' le buropi luzuí, caléga para ugüë' dul-la', pero para usölë' tsaz nupa ta'böza Lë'.

10

¹ Xibá na' gunná bë'ë Moisés guca tu le rulu'isó ca zeaj naca le tsahui' si' zá'gaca, en bití' guca idú ca nácacaga. Que lë ni na', xibá na' queë' Moisés bití' guca un idú tsahui' nupa ni' bila'dxín lahuë' Dios, en biá'gaca rön quegacaba' böa' bëdxido', lë na' gula'gú'utica'së' lahuë' Dios yugu' iz. ² La'tu' guca un légaquië' idú tsahui', bití' gula'gú'utica'së' rön ni' lahuë' Dios, tu' cabirö iléquibe'enë' bönni' guca caní quegaquië' nabága'gaquië' dul-la' channö chibulu'huóáquië' idú tsahui'. ³ Rön ni' gula'gu'ë lahuë' Dios yugu' iz busá' ládxi'gaquië' nabága'gaquië' dul-la'. ⁴ Caní guca, tu' cabí guca xichöngacaba' bëdxi, en chivo ugúa dul-la'.

⁵ Que lë ni na', cate' bidxinë' Cristo yödzülió ni, gudxë' Dios ca na' nazúaj lu guichi lá'ayi le rna:

Bití' ré'ënu' nu cu'u rön quegacaba' böa' bëdxi lo' pero benu' ga naca' bönáchisö.

⁶ Bití' raza ládxi'u nu uzegui'-ba' böa' bëdxi lo', o nu cu'u xichöngacaba' lo' tu' nözi dul-la'.

⁷ Ní'irö gunná': Ni zoa' para guna' ca ré'ënu' Li', Dios. Naca ca na' nazúaj lu guichi lá'ayi ca gaca quia'.

⁸ Lë na' nazúaj zí'aló rna: "Bití' ré'ënë' Dios nu cu'u rön quegacaba' böa' bëdxi lahuë'." Didza' ni rulu'í rë'u bití'rö raza ládxi'ë Dios lë ni sal-la' lu xibá queë' Moisés rinná bé'enë' Dios nu gun caní. ⁹ Gudödi ni' rna: "Ni zoa' para guna' ca ré'ënu' Li', Dios." Didza' ni rulu'í rë'u rugüë' Dios lë na' gula'gu'ë lahuë' zí'aló, en ruzóë' xilataj le gulu'ë Zxí'ini cazë' lahuë'. ¹⁰ Na'a, Dios ruünë' rë'u idú tsahui' tu' benë' Cristo ca ré'ënë' Dios cate' ni' budödi cuinë' lahuë' Dios uláz queëru', en gütíë' tu luzuísö.

¹¹ Le nácatë yúgu'të bixúz luyú ni zúíguequinë' yugu' dza, en tunë' xichíngaqüië', en la' tuz ca tunë', ta'gu'ë lahuë' Dios zían luzuí xichöngacaba' böa' bëdxi, yugu' le cabí gaca ulu'gúa dul-la'. ¹² Na'a, Cristo, tu le gulu'ë tsaz lahuë' Dios tu luzuísö tu' nözi dul-la', ate' ní'irö yöjchö'ë cuita lë'ë ibëla Dios. ¹³ Ribözë' ni' dza gunë' Dios ga ulu'zechu zxíbigaca lahuë' nupa bití' ta'lé'e Lë' dxi'a. ¹⁴ Ní'a que tuz le gulu'ë lahuë' Dios, tsaz benë' ga nácacaga idú tsahui' nupa na' bunë' dxi'a, en bubéajë' léguequi quez queë' Dios. ¹⁵ Lësca' caní Dios Bö' Lá'ayi runë' ba nalí loru', tu' gunné' zí'aló lë na' nazúaj lu guichi le rna:

¹⁶ Caní gaca didza' ucá'ana tsahui' gúnlena' légaquië' tódi yugu' dza ni', rnnë' Xanru'.

Uchízia' icja ládxi'do'gaquië' xibá quia', en uzúaja' le lu icja ládxi'do'gaquië'.

¹⁷ Gudödi na' gunné':

Bití'rö tsöjneda' dul-la' nabága'gaquië' en dö' biá'gaquië'.

¹⁸ Que lë ni na', channö chinadúa dul-la', bití'rö run bayudxi nu bi cu'u lahuë' Dios tu' nözi dul-la'.

Huáca ibíga'ru' gala' ga zoë' Dios

¹⁹ Na'a, yugu' böchi' luzá'ado', idú ládxi'ru' gaca idxinru' lahuë' Dios caz, ni'a que xichönë' Jesucristo. ²⁰ Tséajlenru' tu nöza cubi, en idú tsahui' le nuzóë' Cristo, le ridxín cúdzi'lö lari' na' busayaj ga nu riyaza lataj idú lá'ayi na', o huáca innaru', nöza na' gusaljë' Cristo ni'a queëru' tu' budödë' idütë le naca cazë'. ²¹ Jesús náquië' queëru' tu bixúz nayépisëtërë', en rinná bé'enë' bönachi queë' Dios. ²² Que lë ni na' huáca ibíga'ru' gala' ga zoë' Dios idú ládxi'ru', en lu yöl-la' run löza queëru', tu' réajlë'ëru' Cristo, tu' chibunë' dxi'a icja ládxi'do'oru', para cabí uxósa ládxi'do'oru' rë'u, ate' gudibë' idütë le naca cázaru' len le naca tu nisa nácatëro idú. ²³ Ral-la' gácaru' tsutsu, en cabí gaca chopá ládxi'ru' ca naca le runru' löza que le nazí' lu ná'aru', le guzxi' lu në'ë Dios gunné' queëru', ate' Lë' runë' ca rnnë'. ²⁴ Ral-la' utipa ládxi'ru' turu' ia'turu', para gunru' ga idxí'iröru' luzá'aru', en gúnröru' ca' le naca tsahui'. ²⁵ Bal-la bönachi bití'rö tu'dubi len rë'u. Bití' ral-la' gunru' ca tun bönachi na', pero ral-la' utipa ládxi'ru' turu' ia'turu', en gúnröru' caní tu' rilë'ëru' chizóá idxín dza huödë' Xanru'.

²⁶ Channö zéajlenru' runru' dul-la' tódi núnbë'ëru' le naca idütë li, bití' ca' nagá'ana bi gaca cú'uru' lahuë' Dios le ugúa dul-la'. ²⁷ Yugu' bönni' tunë' caní, lu yöl-la' radxi ridzöbi quegaquië' ta'bözë' dza ichúguië' Dios quegaquië' ila'yázië' lu guí' gabila, lë na' uzéguitica'sö nupa ta'dá'baga' Dios. ²⁸ Cate' nu bönni' buzóë' xibá queë' Moisés tsólá'aló, gulütíë' lë' channö chopá tsonna bönachi gulún ba nalí que le benë', ate' cuntú nu buéchi' ládxi' bönni' na'. ²⁹ Na'a, nu bönni' uzóë' tsólá'aló Zxí'inë' Dios, en uzóë' tsólá'aló ca' xichönë' le run tsutsu

didza' rucá'ana tsahui', le ruún rë'u dxi'a, ibága'rë' ca' xíguia'. Nu bönni' gunë' caní uca'anë' cá'asö Dios Bò' Lá'ayi, Nu ruzá' ladxí' queëru' le riquíniru'. ³⁰ Caní gaca, tu' núnbë'ëru'-në' Dios, Nu gunná: "Quia' neda' nequi yöl-la' ruzí' lëbi. Neda' ubi'a quégaca bönachi, rnnë' Xanru'." Lësca' caní gunnë': "Xanru' uchi'a usöröë' bönachi queë'." ³¹ Ral-la' gadxi idzöbi nu ral-la' si' xíguia' lu në'ë Dios ban.

³² Guli'tsöjnë' yugu' dza chigula'dödi cate' ni' si' bidxín queëli' bení', ate' biá' gulenli' zían le bulu'saca' zi'ë libí'ili'. ³³ Bulu'lidza ditaj bönachi libí'ili', en bulu'dxia libí'ili' dö' lahuí' lógaca bönachi, ate' benli' tsözxón ca' nupa gula'guí'gula'zaca' caní. ³⁴ Caní guca, tu' buéchi' ládxí'li' nupa nadzúngaca lidxi guíë, en lu yöl-la' rudzeja queëli' biá' gulenli' nupa gula'béaj lédxili' yugu' le guta' queëli'. Caní benli' tu' nözili' nequi queëli' le nácarö dxi'a, en le zóatic'a'sö ni' yehua' yubá. ³⁵ Na'a, biti' uca'anali' lë na' runli' löza, le nachë' tu' le zxön ubi'ë Dios queëli'. ³⁶ Run bayudxi cózali' zxön ladxí', para cate' chibenli' ca rë'ënë' Dios, sí'ili' le guzxi' lu në'ë gunnë' queëli', ca na' nazúaj lu guichi lá'ayi, ca gunnë' Dios le rnna:

³⁷ Ia'tú chí'ido'osó idxinë' Bönni' na' ral-la' guidë'.

Biti' ca' tsenë'.

³⁸ Ní'irö nu naca tsahui' lahua' neda',

ulá nu na' tu' réajlë' neda'.

Channö huöaj ladxí', en tá'baga' neda',

biti'rö tsaz ládxa'a na na'.

³⁹ Na'a, rë'u ni, biti' nácaru' ca nupa tu'huöaj ladxí', en ta'dá'baga' Dios, en ila'niti, pero réajlë'ëru' Cristo, en nadéli'ru' yöl-la' rusólá.

11

Ca naca yöl-la' réajlë' queëru' Dios

¹ Na'a, tu' réajlë'ëru' Dios, naca löza queëru' sí'iru' le runru' löza, ate' naca bë' zoa le cabí gaca ilë'ëru'. ² Caní gula'yéajlë'ë xuz xtó'oru' Dios, ate' que lë ni na' nazúaj lu guichi lá'ayi ca guca quégaquië' le rnna: Bulu'rúajë' tsahui' lahuë' Dios.

³ Tu' réajlë'ëru' Dios, réquibe'ëru' benë' Lë' yödzülió ni len didza' bë'ësë'. Lësca' caní, cate' benë' Dios yúgu'të le rilë'ëru', bugunë' dxin le cabi nalá'.

⁴ Tu' guyéajlë'ë Abel Dios, gulu'ë rön queëba' böa' bédxido' lahuë' Dios, tu' le nácatërö lesaca' ca le gulu'ë Caín lahuë' Dios, en que lë ni na' Dios benë' ba nali' queë' Abel na', gunnë' náquië' tsahui', en benë' bal lë na' gulu'ë lahuë'. Sal-la' chinátie' Abel na', ga ridxintë na'a dza, naca tsca ru'ë didza', tu' guyéajlë'ë Dios.

⁵ Tu' guyéajlë'ë Enoc Dios, gudödë' ni' yehua' yubá, en biti' ca' gútië', ate' bití'rö nu budzüli lë', tu' buchë'ë Dios lë', ate' nazúaj lu guichi lá'ayi ca naca queë' le rnna: "Zí'alö ca buchë'ë Dios lë', benë' Enoc le raza ládxë'ë Dios." ⁶ Na'a, channö cabí réajlë'ëru' Dios, biti' gaca gunru' le raza ládxë'ë Lë', ate' para ibíga'ru' gala' ga zoë' Dios, run bayudxi tséajlë'ëru' zoa cazë' Lë', en rubi'ë que nu ruí'li ladxí' Lë'.

⁷ Cate' ni' Dios buzéajni'inë' Noé ca ral-la' ilaca le cabí rilë'ëninë' Noé na', tu' guyéajlë'ë Noé Dios, benë' ca rnna xtídzë'ë Dios. Bupë'ë barco zxön na' nazí'i le Arca, ate' lë'ë barco na' bulu'lá bönachi dö'a dza queë' Noé. Tu' guyéajlë'ë Noé Dios, benë' ga naca bë' narugu quégaca bönachi yödzülió ilátigaca, ate' bidéli'në' gúquië' tsahui' lahuë' Dios, le ta'deli' nupa ta'yéajlë' Lë'.

⁸ Cate' ni' Dios bulidzë' Abraham, tu' guyéajlë'ë Abraham Lë', benë' ca rnna xtídzë'ë Dios, en buzë'ë ladzë' para tsejé' lataj ni' ral-la' sí'ë ca tu' le guequi tsaz queë', ate' birúajë' ladzë' sal-la' biti' nözinë' gazxi na' ral-la' tsejé'. ⁹ Tu' guyéajlë'ë Abraham Dios, gúquië' ca tu' bönni' zítu', en guzöë' luyú na' Dios guzxi' lu në'ë unödzejë' queë'. Guzöë' lu yu'u guídido', en lébisö ca gulunë' Isaac, en Jacob, xzí'ini xí'sóë' Abraham, nupa ni' guzxi' lu në'ë Dios unödzejë' queë'quei lë na' guzxi' lu në'ë unödzejë' queë' Abraham. ¹⁰ Caní benë' Abraham, tu' benë' löza idéli'në' yödzo' na' rö'ö tsaz xilibi zö'ö que, le nuzöë' Dios xilibi zö'ö que, ate' gulu'ë le ga na' zoë' Lë' cazë'.

¹¹ Lësca' caní Sara, sal-la' chinácanu nigula huödx, guyéajlë'ënu Dios, ate' Lë' bë'ë queënu yöl-la' huáca buzóanu-bí' hí'ido'. Buzóanu-bí' bi'i bönni'do' sal-la' chigudódi izi queënu, tu' guyéajlë'ënu Dios gunë' ca rnna xtídzë'ë na' guzxi' lu në'ë queënu. ¹² Que lë ni na', sal-la' chibigúlädë'ë Abraham, gula'cuá'abi' zióntëröbi' xzí'ini xí'sóë'. Gula'cuá'abi' tsca rö'öba' böljá lúxiba, en tsca rö'ö yuzxi tu' ra' nisa zxön, cuntu nu gaca ulaba légacabi'.

¹³ Yúgu'të bönni' ni gulátie', en biti' gula'zi'ë lë na' guzxi' lu në'ë Dios unödzejë' quégaquië', pero gula'yéajlë'ë Dios, ate' zítu' zítu'sö bila'lé'enë' lë na' ral-la' ila'zi'ë. Gula'yéajlë'ë Dios, en gulunë' ba nali' que lë ni. Caní guca, bulu'lu'ë nácaquië' ca bönni' zítu', en bönni' ta'dazë' yödzülió ni. ¹⁴ Yugu' bönni' tu'ë caní didza', tu'lu'ë ta'guiljë' tu lataj le gaca ládzagaquië'. ¹⁵ La'tu' gula'zä' ládxí'gaquië' caní que luyú ga ni' bila'rúajë', le nácaté ulu'dzölinë' nacxi

huóajgaquié' ni', ¹⁶ pero gula'zá' ládxi'gaquié' que luyú na' nácarò dxi'a, le rò' yehua' yubá. Que lè ni na' bitì' rutuf'iné' Dios cate' ta'nné' náquié' Dios quégaquié', tu' chinup'é è tu yòdzò quégaquié'.

¹⁷ Tu' guyéajlè'è Abraham Dios, cate' guzxi' bè'è Dios lè', budödè'-bi' bi'i Isaac queé' lahué' Dios ca na' tu'dödè'-ba' yugu' bôa' bédxi tütigaquié'-ba' lahué' Dios. Guzözé' sina' Abraham gútié'-bi' bi'i bônni' z'f'alò queé' na' lahué' Dios sal-la' nácabi' bi'i na' guzxi' lu nè'è Dios unòdzjé' queé'. ¹⁸ Caní bené' sal-la' gudxé' Dios lè', gunné': "Lu ná'abi' bi'i Isaac quiu' ichísagaca'-bi' zxi'ini xi'sú'." ¹⁹ Caní bené' Abraham, tu' gúquibe'ené' napé' Dios yòl-la' huáca usubané'-bi' lu yòl-la' guti, ate' ca tu lugá'a luséqui', huáca innaru' buzi'é-bi' lu yòl-la' guti sal-la' bitì' guti cázabi'.

²⁰ Tu' guyéajlè'è Isaac Dios, gunábiné' Dios gun lá'ayé'-bi' bi'i Jacob, enca' bi'i Esau ca zēj naca le ulu z'f'ibi' xibé dza si' za'. ²¹ Tu' guyéajlè'è Jacob Dios, cate' ni' chizóa gátié' gunábiné' Dios gun lá'ayé'-bi' tu tubi' zxi'iné' José, ate' guyéajlédè'è Dios, ni' nayéchué' lu xiyaga queé'. ²² Tu' guyéajlè'è José Dios, cate' ni' chizóa gátié', bè'è didza' que dza na' ila' rúajé' zxi'ini xi'sóé' Israel luyú Egipto, ate' gunná bè'è ca ral-la' ilu'è dxita queé' luyú ga na' tsóju'cú'.

²³ Tu' gula'yéajlè'è Dios, cate' gúljabì' bí'ido' Moisés, xuz xiná'abi' bulu'cáché'è-bi' idú ca tsonna beo', tu' bila'lé'ené' nácabi' bi'i bônni'do' na' lachi, en bitì' guládxiné' bônni' rinná b'é'ené' bônachi Egipto, bônni' na' gunná b'é'è ilútié'-bi' yugu' bi'i bônni'do' na'. ²⁴ Tu' guyéajlè'è bi' Moisés Dios, cate' guzxonbi', bitì'rò b'é'èbi' lataj nu uzóa lèbi' bi'i bônni' queénu nigula zxi'iné' Faraón, bônni' na' rinná b'é'ené' bônachi Egipto. ²⁵ Caní benbi' tu' gúquibi' nácarò dxi'a nu usaca' zì' lèbi' tsózxón len bônachi queé' Dios ca uz'ibi' xibé tu chí'isó yugu' le tu'zì' xibé nupa tun dul-la'. ²⁶ Gúquibi' nácarò lesaca' nu ulidza ditaj lèbi', ca na' gaca ca' queé' Cristo, ca idéli'bi' yugu' yòl-la' tsahui' quégaca bônachi Egipto, tu' guzá' ládxi'bi' ca naca le ubi'è Dios queé'bi'. ²⁷ Gudódi ni', tu' guyéajlè'è Moisés Dios, birúajé' luyú Egipto, en bitì' gúdxiné' yòl-la' rilé queé' bônni' rinná b'é'ené' bônachi Egipto, ate' biá' guléné' ca run nu rilé'e Dios, Nu na' bitì' gaca ilé'erru'.

²⁸ Tu' guyéajlè'è Moisés Dios, bené' Laní Pascua ca gunná b'é'ené' Dios lè', en buchéajé' rón ra' yu'u lídxiagaquié', para cabi guti zxi'inigaquié' nu na' ral-la' usuniti yugu' bi'i bônni' z'f'alò quégaca bônachi Egipto. ²⁹ Tu' gula'yéajlè'è yugu' bônni' Israel Dios, gula'dödè' luyú bidxi gatsaj láchui'lò nísado' nazì' le Nisa Xiná. Cate' gul'é'enné' ila'dödè' ca' bônni' Egipto ni', gula'yépiné' nisa, en gulátigaquié' lu Nisa Xiná na'.

³⁰ Tu' gula'yéajlè'è bônni' Israel Dios, cate' budxi gula'dödè' idú gásibi'ilò yòdzò Jericó yugu' dza idú gadxi dza, bila'guinnaj yugu' zò'ò gulún chí'ì yòdzò na'. ³¹ Tu' guyéajlè'è nu Rahab Dios, nigula ru'ínu lataj bônachi, bitì' gútinu tsózxón len bônachi Jericó na' bitì' gulún ca rnna xtídzé'è Dios, tu' bennu bal bônni' Israel na' buduyúlangaquié' le rácalen bônachi Jericó.

³² ¿Bízixrò ral-la' inniá? Riyadzaj lataj uzúaja' ca guluné' Gedeón, en Barac, en Sansón, en Jéfté, en David, en Samuel, enca' yugu' bônni' gulu'è didza' uláz queé' Dios.

³³ Tu' gula'yéajlè'è Dios, bulu'zòjté' zían yòdzò zxon.

Guluné' le naca tsahui', ate' gula'déli'né' le guzxi' lu nè'è Dios unòdzjé' quégaquié'.

Bulu'sayjé' ruá'agacaba' bédxi guixi'.

³⁴ Bulu'lé' yugu' lu gu' zxon.

Bila'rúajé' lu ná'agaca nupa gul'é'èni iluti légaquié' len guié' tuchi'.

Dios buné' légaquié' tsutsu cate' ni' gula'cuídi'né'.

Bulu'huóáquié' ca' tsutsu lu gudil-la.

Bulu'láguié' bônni' guixxi yu rójáquié' gudil-la quégaquié' bônni' zì'tu'.

³⁵ Yugu' nigula dza ni' bulu'zì'inu bi'ì que quégacanú nubángacabi' lu yòl-la' guti.

Ia'bal-lé' bônni' ni' gulátié' lu ná'agaquié' bônni' ni' bulu'saca' zì'è légaquié', en tu' cabi gul'é'enné' ulu'cá'ané' Dios, bitì' gula'zì'è lataj nu usán légaquié'. Caní guluné' para ila'déli'né' yòl-la' rubán lu yòl-la' guti, lè na' guléquiné' nazáca'rò. ³⁶ Ia'bal-lé' biá' guléngaquié' yòl-la' rutitaj, en xigua' que gubá'ayi, ate' gula'dzuné' lidxi guié, nága'gaquié' lu guié. ³⁷ Bulu'ládxi' bônachi bal-lé' guió, en gula'chözé' ia'bal-lé'. Gula'zì' b'é'è légaquié', en gulútigaca zíangaquei' len guié' tuchi'. Gula'dödè' ná'alò ní'ilò, nácugaquié' guídi zxágacaba' bô'cu' zxila', en chivo. Guláquié' yechi', en gula'guí'í gula'záqué'è, ate' bulu'dxia bônachi légaquié' dó'. ³⁸ Caní guláquié' bônni' na', ate' bitì' gulaca bônachi yòdzólió ni lesaca' ulu'zì' xibégaquié'. Gula'dasé' lu lataj cá'asò, en yugu' lu gu'fa, ate' gula'cuá'asé' yugu' zxan bulóaj, en yugu' yeru luyú. ³⁹ Yúgu'té' bulu'rúajé' tsahui' lahué' Dios tu' gula'yéajlè'è Lè', sal-la' bitì' gula'zì'è luyú ni le guzxi' lu nè'è Dios unòdzjé' quégaquié'. ⁴⁰ Caní guca, tu' nupé'è Dios ni'a queéru' tu le nácarò dxi'a para cate' uné' légaquié' idú dxi'a, rè'u ni gunru' légaquié' tsózxón.

12

Ral-la' uyuru'-në' Cristo

¹ Que lë ni na', lësca' rë'u, tu' nacua' idú gásibi'ilò ga ni zóaru' ziantërò nupa tun ba nalí ca ta'yéajlë' Dios, ral-la' ucá'anaru' yúgu'të le ruá' dö' le naca ca tu le naca zí'í nuá'aru', enca' yúgu'të dul-la' nazóngaca rë'u, ate' lu yöl-la' ribòza zxönladxi' queëru', ral-la' gunru' xichinë' Dios, le naca tsca xiti'ru' lu huitaj le zoa loru'. ² Ral-la' uyuru'-në' Jesús, Nu na' run ga gaca tséajlë'ëru' Dios, en Nu run ga raca idú yöl-la' réajlë' queëru' Lë'. Jesús gudí' guzáquë'ë lë'e yaga cruz, en biá' gulënë' yöl-la' rutuí' que, tu' gú'unnë' idéli'në' yöl-la' rudzeja na' uzi'ë xibé, ate' yöjchö'ë cuita lë'ë ibëla Dios, ga ni' rō'ë rinná bē'ë.

³ Buli'yúé' Jesús, ca na' gudí' guzáquë'ë le bulu'saca' zi'ë bönni' dul-la' Lë', para cabí icuúdi'li', en para cabí gaca chopá ládxi'li'. ⁴ Ga ridxintë' na'a dza, bití' bi biá' gulenli' ga idxintë nu gun libí'ili' huë' tu' ridá'baga'li' le naca dul-la'. ⁵ Nadxi ca' chízá' ral-la ládxi'li' lë na' ruzéajni'inë' Dios libí'ili'. Nácali' ca yugu' zxf'ini cazë', ca na' nazúaj lu guichi le rnnë': Zxf'ina', bití' uzú' tsólá'aló le gunë' Xanru',

cate' usëdi uzéajni'inë' li',
en bití' huóaj ládxi'u cate' uní'inë' li'.

⁶ Xanru' runí'inë' nu nadxi'inë',

en rusëdi ruzéajni'inë' yúgu'të nupa ta'z'í' lu në'e ilaca zxf'ini cazë'.

⁷ Ral-la' guá' ilenli' le uní'inë' Dios libí'ili', tu' runë' Dios caní queëli' tsca nácali' zxf'ini cazë'. Bití' ca' zóabi' tubi' bí'ido' bití' uní'inë'-bi' xúzibi'. ⁸ Na'a, channò cabí runí'inë' Dios libí'ili' ca na' runë' quegaca yúgu'të zxf'ini cazë', ní'irò nácali' ca yugu' bi'í lan, en bití' nácali' idú zxf'inë' Dios. ⁹ Ia stú, cate' ní' nácaru' bí'ido', gula'cu'ë xuz xiná'aru' luyú ni, bulu'ní'inë' rë'u, pero runru' légaquie' bal. Ca' naca, ral-la' gunróru' ca rnna xtdzë'ë Xúziru' zoë' yehua' yubá para sóaru' ibanru' tsaz. ¹⁰ Yugu' xuz xiná'aru', tu' chí'só bulu'ní'inë' rë'u tsca le guléquisinë' naca dxi'a, pero cate' runí'inë' Dios rë'u, naca para gaca tu le uzí'iru' xibé, para gácaru' idú lá'ayi ca naca cazë' Lë'. ¹¹ Le nácatë bití' nalá' lahuí na'a le uzí'iru' xibé que le runí'inë' rë'u, pero run ga ruhu'irinu'. Channò gú'iru' lataj usëdi rë'u le runí'inë' rë'u, gun ga cózaru' dxi'ado', en ga gácaru' tsahui'.

Soa bönadxi queëru' channò cabí uzë' nágaru' chí'ë Dios

¹² Que lë ni na' buli'ún tsutsu ná'ali' le röjxéqui'guequi, enca' xzibili' le ta'xzizi, en idipa ládxi'li' para gunli' le naca dxi'a. ¹³ Guli'sóa nõza tsahui', para cabí gunli' ga ucá'ana nu ricuidi' ladxí' nõza na', pero guli'gún ga huóaca ladxí' nu na'.

¹⁴ Guli'gúf' ládxi'li' cózalenli' dxi'a yúgu'të bönachi, en gácali' tsahui' lahuë' Dios, tu' channò cabí gunli' caní, bití' gaca ilé'eli'-në' Xanru'. ¹⁵ Guli'gún chí'í cuinli' para cabí soa nu ucá'ana le ruzá' ládxi'ë Dios queëru', en para cabí soa nu gaca ca tu guixi' silá', para cabí utsá' libí'ili', en cabí gun ga cabí gácali' tsahui' zianli' libí'ili'. ¹⁶ Guli'gún chí'í cuinli' para cabí gun nu dzaga libí'ili' le ruá' dö', o le cabí naca tsahui', ca na' benë' Esaú, zxf'inë' Isáac. Esaú na' bëti'ë le ral-la' gata' lu në'ë tu' náquie' bi'í bönni' huaca queë' xuzë' para guzxi'ë tu le do' gudahuë'. ¹⁷ Chinöz quezili' ca na' guca queë' Esaú gudödi ní' cate' gú'unnë' idéli'në' le inabë' xuzë' lahuë' Dios para gaca le tsahui' queë'. Buéchi' ládxi'ë xuzë' lë', pero bití' guta' lataj ubí'í ládxi'ë Esaú na' sal-la' gudilaj ládxi'ë le len yöl-la' ribódi' queë'.

¹⁸ Ca raca queëli' bití' naca ca guca quegaquie' bönni' Israel. Légaquie' gula'biguë'ë gala' ga zoa tu guí'a le gaca nu can, ate' guyegui guí'a ni', en bóaca chul-la lahuí dza tu' gurö'ö böaj gasaj, en guycéadu bö'. ¹⁹ Bila'yönnë' ta'bödxí lúzuba' böa', enca' chí'ë Dios Nu bë' didza'. Cate' bila'yönnë' lë ni, gulá'ta'yü' lahuë' Moisés para cabirö gú'ílenë' Dios légaquie' didza'. ²⁰ Caní gulunë' tu' cabí guca guá' iléngaquie' lë na' gunná bé'enë' Dios légaquie', gunné': "Channò tsöjlibiba' tuba' böa' guixi'do'os guí'a ni, ral-la' ulu'ládxë'ë-ba' guió, o ulu'dödë'-ba' yaga tuchi'." ²¹ Lë na' bila'lé'enë' ben gádxida' légaquie', ate' Moisés gunné': "Radxi ridzóbida' a'."

²² Na'a, libí'ili' ral-la' gádxitë'röli' tu' ribíga'li' gala' tu lu guí'a nazí'í le Sión, en ga zoa yödzö queë' Dios ban, le nazí'í le Jerusalén que yehua' yubá, ga na' nacué' gubáz lá'ayi guixzi' yu queë' Dios. ²³ Ribíga'li' gala' ga ni' nudúbigaca zxf'ini cazë' Dios lahuë' Lë', nupa na' nazúajgaca láguequi lu guichi ni' yehua' yubá, enca' ga zoë' Dios Nu ruchi'a rusöröë' yúgu'të bönachi, en ga na' nacua' yugu' bö' gulaca cazë' yugu' bönni' tsahui', tu' bunë' Dios légaquie' tsahui'. ²⁴ Ribíga'li' ca' ga zoë' Jesús, Nu ben tsutsu didza' cubi na' rucá'ana tsahui', enca' ga nagu'ë Jesús rön queë' le run ga runiti lahuë' Dios rë'u, rön na' run le nácarö dxi'a ca le ben xichönë' Abel, lë na' ben ga guchúguie' Dios queëbi' bi'í böché'ë.

²⁵ Que lë ni na', guli'gún chí'í cuinli' para cabí tá'baga'li' Nu na' ruí'í didza'. Bití' ca' bulu'lá nupa ni' gula'dá'baga' nu na' bulidza légaquie' luyú ni. Nácatë'rö löza bití' ca' uláru' rë'u channò tá'baga'ru' Nu na' rulidza rë'u, zoë' yehua' yubá. ²⁶ Dza ni' guzxi' luyú ni tu' biyön chí'ë Dios, pero na'a chiguzxf'í lu në'ë, gunné': "Ia'tú luzúisó, en calégasó luyú uxízia', pero

lúzxiba ca' uxízia.' 27 Cate' ni' rnné': "Ia'tú luzuísö", lè ni rulu'í rë'u ral-la' udúa yugu' le gaca ila'zxi, lè na' rë'ö yödzöliö ni, ate' ulu'gá'ana le cabí gaca ila'zxi, lè na' rë' yehua' yubá. 28 Que lè ni na', tu' ral-la' idéli'ru' tu lataj ga inná bé'ëru', le cabí izxizi, ral-la' guiëru'-në' Dios: "Xclenu'", ate' lu yöl-la' ba'a ladxi', en lu yöl-la' radxi Lë' tseaj lãdxi'ru' Lë' ca na' raza lãdxë'ë Lë', 29 tu' náquië' Dios queëru' ca tu guí' le rusuniti le cabí naca idú tsahui'.

13

Le ral-la' gunru' le raza lãdxë'ë Dios

1 Ral-la' idxí'tica'sili' luzá'ali' tuli' ia'tuli'. 2 Guli'tsöjné ral-la' uzóali' lãdxili' nu idxín ga zóali'. Cate' gulún caní bal-la bönachi, bulu'cuá' lãdxiguequi gubáz lá'ayi que yehua' yubá queë' Dios, sal-la' bití' gulëquibe'e nãcagaquië' gubáz lá'ayi.

3 Guli'tsöjné nupa nadzúngaca lidxi guië' tscã nunli' légaquië' tsözxön, nadzunli' ca' lidxi guië'. Guli'güi' lãdxi'li' yugu' bönni' ta'bía lãdxi'gaca bönachi légaquië', tscã libí'ili' rigü'í rizáca lenli' légaquië' tsözxön.

4 Ral-la' gunli' bal'yöl-la' nutsaga na', ate' tu tuë' bönni' ral-la' sóalenë'-nu nigula queë' lu yöl-la' ba'a ladxi' queë', tu' ichüguië' Dios quégaca nupa tun le ruá' dö', en nupa ta'guítsaj xibá que yöl-la' nutsaga na'.

5 Bití' bi' uhuí'di'li', pero guli'tsaza lãdxi'li' tscã le dë queë'li' na'a, tu' chigunnë' Dios: "Catu caz ucá'ana' li', en bití' ca' ubéaj lãdxa'a li'." 6 Caní naca, huáca innaru' idú lãdxi'ru' lè na' rnna:

Xanru' náquië' Nu rácalen neda'.

Bití' ca' gãdxida' bi gun bönachi quia'.

7 Guli'tsöjné yugu' bönni' tu'yüë' libí'ili', nupa na' tu'sedinë' libí'ili' xtídzë'ë Dios. Buli'yú ca nadéli'gaquië', en guli'gún ca tunë' lu yöl-la' réajlë' quégaquië' Dios.

8 Lëbisö ca náquië' Jesucristo, néaje, en na'a, en cá'tica'sö. 9 Bití' güi'ili' lataj yugu' xibá izá'a, en xibá nadzá' ichë'gaca libí'ili' nöza yúbölö. Naca dxi'a gunli' tsutsu icja lãdxi'do'oli' ca naca le ruzá' lãdxë'ë Dios queë'li', en calëga ca nãcagaca xibá que le rë'áj ráguru', lè na' bití' ulu'zí' xibé nupa tu'í lãdxi'gaca léguequi.

10 Zoa queëru' tu bucugu lá'ayi, le cabí ulu'zí' xibé nupa tun dxin que didza' rucá'ana tsahui' na' bilá' zí'alö. 11 Bixúz lo que yu'u lá'ayi na' gulu'ë xichóngacaba' böa' bëdxi lu lataj idú lá'ayi tu' nözi dul-la', pero bulu'zëguië' bëla' cá'asö quégacaba' ga naca ní'lö ra' yödzö. 12 Lëscã caní gudí' guzáquë'ë Jesús ní'lö ra' yödzö para bunë' bönachi dxi'a len rön queë' cazë'. 13 Tsöjtá'aru'-në' Jesús, sal-la' ila'bëaj bönachi rë'u lu yödzö, en sí'iru' tsözxön len Lë' lè na' bulu'lidza ditaj bönachi Lë'. 14 Bití' zoa tu yödzö queëru' yödzöliö ni le soa tsaz, pero rigü'jaru' lè na' sí' za'. 15 Que lè ni na', ral-la' cú'utica'siru'-në' Dios yö'l-la' ba, ungunru' dxin Lë' Jesucristo. Yöl-la' ba na' naca ca tu le rigü'uru' lahuë' Dios. Len ruá'a cuinru' guiëru'-në' Dios: "Xclenu'" ní'a que le náquië' Lë'. 16 Bití' gal-la lãdxi'li' gunli' le naca dxi'a, en gácalenli' luzá'ali' tuli' ia'tuli', tu' naca lè ni ca tu le rigü'uru' lahuë' Dios le raza lãdxë'ë Lë'.

17 Guli'gún ca rnna xtídzã'gaquië' böchi'ru' tu'yüë' libí'ili', en guli'güi' lataj ila'nná bé'enë' libí'ili', tu' tapa chi'ë bö' naca cázali', ca tunë' yugu' bönni' ral-la' ila'guíxjö'ë lahuë' Dios le núngaquië'. Guli'gún caní para ilunë' dxin na' lu yöl-la' rudzeja quégaquië', en calëga lu yöl-la' risëbi ladxi' quégaquië', tu' cabí uzí'ili' xibé dxin na' ilunë' lu yöl-la' risëbi ladxi' quégaquië'.

18 Buli'lidzë' Dios, inábili'-në' gácalenë' netu', tu' runtu' löza soa dxi icja lãdxi'do'otu', para cabí uxösa netu', ate' ru'í lãdxi'tu' gúntica'situ' le naca dxi'a. 19 Le nãcarö lo, ráta'yua' loli' inábili'-në' Dios ugu'ë neda' tu nöza para udxina' ga zóali' bayöntë.

Dios uzá' lãdxë'ë queëru' le gácalen rë'u

20 Na'a, rinábitu'-në' Dios, Nu run le rucá'ana rë'u tsahui', en Nu busubán Xanru' Jesucristo lu yöl-la' güti, Nu na' naca Bönni' Lo Uyú Bö'cu' Zxila', tu' bulaljë' rön queë' le run tsutsu didza' rucá'ana tsahui', le zoa tsaz, 21 rinábitu'-në' gunë' ga gácali' idú tsahui', para gaca gunli' yúgu'të dxin dxi'a, en gunli' ca rë'ënë' Lë', ate' gunë' queë'li' le raza lãdxë'ë Lë', tu' néquili' queë' Jesucristo. ¡Queë' Cristo gácatica'sö yö'l-la' ba! ¡Ca' gaca!

22 Ráta'yua' loli', böchi' luzá'ado', güi' lãdxi'li' didza' ni ruzëajni' libí'ili', tu' naca láti'do'os lè ni ruzúaja' queë'li'. 23 Ral-la' inözili' chiburúajbi' bi'í Timoteo, bi'í böchi'ru'do', lidxi guië', ate' channö idxintëbi' ga zoa' ni, gunbi' neda' tsözxön uduyútu' libí'ili'.

24 Buli'gapa Dios böchi'ru' tu'yüë' libí'ili', enca' yúgu'të bönachi rö queë' Dios. Tu'gapa Dios libí'ili' bönachi ta'yëajlë' Cristo nacua' luyú Italia.

25 ¡Dios uzá' lãdxë'ë queë'li' yúgu'tëli'! ¡Ca' gaca!

LE BUZÚAJË' LU GUICH SANTIAGO

Santiago rugapë' Dios bönni' judío ta' dë'ë Cristo

¹ Neda', Jacobo, naca' huen dxin queë' Dios, enca' queë' Xanru' Jesucristo. Rugapa' Dios libí'ili', nácali' idxinnu cō' di'a dza quegaca bōnachi Israel, násilasili' idú yōdzolió ni.

Yōl-la' réajni' i le runnë' Dios queëru'

² Böchi' luzá'ado', cate' gaca bi gaca queëli' le si' bē' libí'ili', ral-la' udzējali' idú lādxi'li' ³ tu' nōz quezili', cate' bi raca queëli' le rizí' bē' libí'ili' ca réajlë'ëli' Cristo, lë ni rusedi libí'ili' cōzali' xzōn lādxi'. ⁴ Guli'gūi' lādxi'li' gaca idú yōl-la' xzōn lādxi' queëli', para údxi gácali' bönni' ta' yéajni' inë', en biti' bi yadzaj queëli' ca nácgaca lë ni.

⁵ Channō zoa ladaj libí'ili' nu biti' réajni'ini, nu na' ral-la' inabi-në' Dios, ate' Dios caz gunnë' yōl-la' réajni' i que, tu' runōdzjē' yōdxi yana' quegaca yúgu'të bōnachi, en biti' ca' réqui quezínë' gunnë' queëru'. ⁶ Na'a, nu bi rinabi-në' Dios, run bayudxi tséajlë' Lë', en cabí gaca chopa lādxi'. Nu raca chopa lādxi', raca que ca raca que bidxina' que nísado' cate' rutá bö' le, ruzéaj bö' le nilō ná'alō. ⁷ Nu naca caní biti' ral-la' gun lōza si' bi unōdzjē' Xanru'. ⁸ Bönni' na' reaj bö' lādxi'da'ahuë' biti' ridzōlinë' nácalō gunë'.

⁹ Channō zoë' tu bönni' böchi'ru' réajlë'ë Cristo, en náquië' cá'asō yōdzolió ni, ral-la' udzējanë' tu' chinadéli'në' tu lataj lo lahuë' Dios. ¹⁰ Bönni' böchi'ru' na' rilé'enë' yōl-la' tsahui' queë' ral-la' udzējanë' cate' runë' Dios ga bítirō ruzxōni lādxi'ë lë na' dë' queë'. Nu ruzxōni lādxi' yōl-la' tsahui' que, gaca que nu na' ca raca que xiyija guixi'do', la' ridōditë que. ¹¹ Caní naca, tu' gaca que nu na' ca raca que xiyija guixi'do' na' cate' rilën gubidza, en rudzá'ada', la' ribídxité guixi' na', en riguinaj xiyija, en riniti yōl-la' lachi que. Lësca' caní gaca queë' bönni' rilé'enë' yōl-la' tsahui' queë', inítië' tsanni ni runë' dxin riguiljē' yōl-la' tsahui' na'.

Le ta'zì' bē' rē'u

¹² Bica' ba bönni' böchi'ru' na' ruá' rilenë' le rizí' bē' lë'. Cate' chiburúajë' tsahui', idéli'në' yōl-la' na'bán idú, ca na' rideli' nu nutsa' lu huitaj, nu rideli' tu bregui' zín. Bönni' böchi'ru' na' náquië' bica' ba tu' idéli'në' yōl-la' na'bán idú na' guzxi' lu nē'ë Dios unōdzjē' quegaca nupa nadxi'iguequi Lë'. ¹³ Cate' bi raca queëru' le run ga guë'ëniru' gunru' le ruá' dō', biti' ral-la' innaru': "Dios rizí' bē'ë rē'u len le naca xihui'." Dios biti' rizí' bē'ë nu bönni' len le cabí naca dxi'a. ¹⁴ Na'a, channō nu bi raca que le rizí' bē' le len le cabí naca dxi'a, naca tu' rizé lādxi' le ruá' dō', ate' lë ni ben ga gú'uni gun le ruá' dō'. ¹⁵ Lë na' rizé lādxi'ru' le ruá' dō' run ga gunru' dul-la', en cate' chibudxi benru' dul-la' na', la' dul-la' ná'asō rusubaga' rē'u xíguia' gátiru'.

¹⁶ Böchi' luzá'ado', biti' si' y'e la' cuínsili'. ¹⁷ Yúgu'të le naca dxi'a, en yúgu'të le naca idú le ruzí'iru' xibë, zá' gaca saca' xitsá'alō, en ta' rúaj ga zoë' Xúziru' Dios, Nu ben yugu' le ta' yēpi yōsa lúxhiba, yugu' le tu'sá' cuínguequi, pero Lë' biti' rutsá' cuinë', en biti' rutsé'ë ca runë', rúnntica'së' queëru' le naca tsahui'. ¹⁸ Ca ré'ëni quezínë' Dios, benë' ga nácaru' bōnachi cubi queë'. Bugunë' dxin didza' queë' le naca idútë li, para gácaru' ca tu gulapa zí'alō queë' ladaj yúgu'të nupa na' gurō cazë' Dios.

Le reaj lādxi'ru'-në' Dios le naca li lādxi'

¹⁹ Que lë ni na' rea' libí'ili', böchi' luzá'ado', yúgu'tëli' ral-la' sóali' sina' yōnili', pero biti' ral-la' innëtëzili', en biti' ilëtëzili'. ²⁰ Nu na' riletëz biti' run le naca tsahui' lahuë' Dios. ²¹ Que lë ni na', guli'cá'ana yúgu'të le ruá' dō', en yúgu'të le zían le cabí naca tsahui', ate' lu yōl-la' nōxaj lādxi' guli'si' lu ná'ali' didza' na' chinayaza icja lādxi'do'oli', tu' huáca gun didza' ni ga uláli'.

²² Na'a, guli'gún ca rnna didza' ni, en cabí yōnisili', tu' channō yōnisili' didza' ni, si' yé'eli' la' cuínsili'. ²³ Nu riyōnisō didza' ni, en biti' run ca rnna, nu ni naca ca tu bönni' ruyúë' lahuë' tu lu gué dxili, ²⁴ tu' ruyú cuinë', en sōhuōjē', ate' la' ral-latë lādxi'ë ca rinë'ë. ²⁵ Na'a, nu bönni' biti' ral-la lādxi'ë le riyōnnë', pero ruí' lādxi'ë xibá queë' Dios le naca idú li, en le gaca gun ga uláru', ate' ugá'anë' tsutsu, en gúntica'së' ca rinná bē' xibá na', gaquië' bica' ba ca naca yúgu'të le runë'.

²⁶ Channō nu bönni' ladaj libí'ili' réquinë' naca dxi'a ca reaj lādxi'ë Dios, pero biti' rapa chí'ë lúdxë'ë para cabí innë'së' ca', bönni' ni rizí' yé'enë' la' cuinsë', ate' biti' raza lādxi'ë Dios ca reaj lādxi'ë bönni' na' Lë'. ²⁷ Le reaj lādxi'ru'-në' Dios, le naca idú, en le naca dxi'a, naca gácalenru' yugu' bi' i uzëbido', enca' yugu' nigula nagá'ananu túzinu, cate' ta'gu'i ta'zaca' nupa na', en cabí gútsa'ru' le cabí naca tsahui' le naca yōdzolió ni.

2

Tuz ca ral-la' gunru' bönachi bal

¹ Böchi' luzá'ado', channö réajlë'ëli' Xanru' Jesucristo, Nu nácatërö lo, biti' ral-la' utsá'ali' ca gunli' bal tu tu bönachi. ² Channö tsázië' tu bönni' ga na' nudúbili, en nagu'ë xibön në'ë le néquini oro, en nácuë' lari' nazáca'da', ate' tsázië' ca' tu bönni' yéchi'do', nácuë' lari' cá'asö, ³ channö gunli' bal bönni' na' nácuë' lari' nazáca'da', en guiëli'-në': "Gurö'ölen rë'u ga ni naca dxi'a", pero guiëli' bönni' yéchi'do' na': "Ná'asö guzu", o guiëli'-në': "Gurö'i lu yu ni." ⁴ Channö caní runli', rutsá'ali' ca runli' bal tu tu luzá'ali', en run cuinli' ca nu ruchi'a rusörö luzë'e, biti' naca dxi'a ca rizá' ládxi'li'.

⁵ Böchi' luzá'ado', buli'zë nágalí' lë ni. Dios gurö cazë' yugu' bönni', sal-la' téquiguequi bönachi yödžöliö ni nácaqaquië' cá'asö, pero ilará' déli'në' yöl-la' tsahui' lahuë' Lë' tu ta'yéajlë'ë Cristo, en gata' quégaquië' lataj ga ni rinná bë'ë Lë'. Gata' quégaquië' lë na' guzxi' lu në'ë Dios unödžjë' quégaca nupa ta dxi'i Lë'. ⁶ Libí'ili' rucá'anali' cá'asö bönachi yechi' ca', en runli' bal yugu' bönni' dë' yöl-la' tsahui' quégaquië', ate' bönni' na' dë' yöl-la' tsahui' quégaquië' tu saca' zi'ë libí'ili', tu' tu'gunë' libí'ili' dxin. Lësca' tu'dödë' libí'ili' lu ná'agaquië' bönni' yúlalui'. ⁷ Yugu' bönni' na' dë' yöl-la' tsahui' quégaquië' ta'nnë' zi'ë ca' que Lë' Jesucristo le nazáca'tërö, en ca naca Lë' nazí'ili' lali': "Nupa Dá'gaca Cristo."

⁸ Runli' dxi'a channö runli' idú ca rinná bë' xibá lo, le nazúaj lu guichi, en rna caní: "Ral-la' idxi'inu' luzó'o ca nadxi'i cuinu'." ⁹ Na'a, channö rutsá'ali' ca runli' bal tu tu bönachi, runli' dul-la', en nabága'li' xíguia' lu xibá queë' Dios, tu' riguítšjali' xibá na'. ¹⁰ Channö runë' tu bönni' idú ca rinná bë' xibá queë' Dios, pero channö ichíxinë' ca naca tuz le rinná bë' xibá na', chinabáguë'ë xíguia' que idútë' le rinná bë' xibá na'. ¹¹ Lë' cazë' Dios gunnë': "Biti' gunu' dul-la' le riguítšaj xibá que yöl-la' nutsaga na'", en gunnë' ca': "Biti' gútiu' bönachi." Na'a, channö cabí runu' dul-la' le riguítšaj xibá que yöl-la' nutsaga na', pero rútiu' bönachi, nabágu'u xíguia' que idútë' xibá queë' Dios. ¹² Ca innali', en ca gunli', ral-la' gunli' ca ral-la' ilún nupa uchi'a usöröë' Dios légaquië' ca rinná bë' xibá na', le run ga uláru'. ¹³ Nupa cabí tu huéchi' ládxi'gaca luzë'eguequi, uchi'a usöröë' Dios léguequi, ate' cuntu nu huéchi' ládxi' léguequi, pero nupa na' tu huéchi' ládxi'gaca luzë'eguequi ulu'rúaj dxi'a cate' uchi'a usöröë' Dios léguequi.

Le ral-la' gunru' tu réajlë'ëru' Cristo

¹⁴ Böchi' luzá'ado', biti' bi' uzi'ë xibé tu bönni' channö innasë': "Réajlë'a Cristo", pero biti' runë' le naca tsahui'. Biti' gaca ulë' bönni' na' channö innasë' réajlë'ë Cristo. ¹⁵ Channö nacu'ë böchi' luzá'aru' ta'yéajlë'ë Cristo, en biti' dë' le ilácuë', en calëga le ilahuë', ¹⁶ ate' channö tu nu dzaga libí'ili' guiëšö légaquië': "Böaj lídxili' tsáhu'i'do'. Chibö'aj budzé'eli'", pero channö cabí unödžaj quégaquië' lë na' ta'yádzjanë', biti' ca' gúcalen légaquië'. ¹⁷ Lësca' caní raca que nu bönni' rnnasë' réajlë'ë Cristo. Channö cabí runë' le naca bë' naca idú ca réajlë'ë Lë', biti' naca lesaca' yöl-la' réajlë' queë'.

¹⁸ Nadxi' ca' guië' tu bönni' luzë'ë: "Li' réajlë'ësu' Cristo, ate' neda' runa' le naca tsahui'. Biti' gaca ulu'ínu' neda' réajlë' tu Cristo channö cabí zoa le naca tsahui' runu'. Neda' ulu'ida' li' réajlë'a Cristo ni'a que le naca tsahui' runa'." ¹⁹ Li' réajlë' tu tuzë' náquië' Dios. Naca dxi'a ca runu'. Lësca' caní ta'yéajlë' yugu' bö' xihui', en ta'zxi'zi tádxida' Lë'. ²⁰ Li', bönni' biti' bi' nözínë'. Ral-la' inözi quézínu' channö zoa nu rnnasö réajlë' Cristo, pero biti' run le naca tsahui', biti' naca lesaca' yöl-la' réajlë' Lë' que nu na'. ²¹ Naca bë' burúajë' xúziru' Abraham tsahui' lahuë' Dios ni'a que lë' na' benë', cate' ni' gulu'ë-bi' bi'i Isaac queë' lahuë' Dios. Gulu'ë-bi' ca na' tun bönachi ta'gú'u le tu'zegui' lahuë' Dios, sal-la' biti' buzegú'ë-bi'. ²² Na'a gaca inözili' ca guca queë' Abraham. Lë' na' benë' guca bë' guyéajlë'ë Dios. Ca' naca, guca bë' naca idú ca guyéajlë'ë Dios ni'a que lë' na' benë'. ²³ Caní guca lë' na' nazúaj lu guichi lá'ayi le rna: "Abraham guyéajlë'ë Dios, ate' Dios bilé'enë' lë' na' benë' ca tu le ben ga böáquië' Abraham tsahui'." Que lë' ni na' guzxi' i lë': "Luzë'ë Dios."

²⁴ Na'a, rilé'e quézili' naca bë' rurúajë' tu bönni' dxi'a ni'a que le runë', en calëgasö tu' réajlë'ë Dios. ²⁵ Lësca' caní guca queënu Rahab, nigula bë'ënu bönachi lataj. Lësca' naca bë' burúajnu dxi'a tu' zoa tu le tsahui' bennu, lë' na' bennu cate' ni' bennu bönni' tu'yulan bal, en gúcalennu légaquië' para bulu'guélë'ë yöjhuó'jgaquië' nöza yúbölo. ²⁶ Ca na' raca que idútë' le naca cázaru' channö cabí yu'u bö', chinati, lësca' caní naca que le réajlë'ëru' Cristo channö cabí nalá' yöl-la' run que, biti' naca lesaca'.

3

Yugu' le rna lúdxiru'

¹ Böchi' luzá'ado', biti' guntëz zían cuinli' bönni' tu'sédinë' bönachi, tu' chinöz quézili' zí'tërö uchi'a usöröë' Dios rë'u, núlöru' rusédiru' bönachi. ² Yúgu'tëru' runru' zían le richixi riníguiru'. Channö cabí richixi riníguinë' tu bönni' ca naca didza' ru'ë, bönni' ni náquië' idú tsahui', en

raca inná be'e cuinë' ca naca yúgu'tè le runé'. ³ Cate' rigú'uru' guié ruá'agacaba' bóa' para gunru' ga ilunba' ca ré'éniru', gaca inná bé'eru' lé'gacaba' lu idútè le tunba'. ⁴ Buli'yú' ca' ca raca que'guequi barco. Sal-la' zxóntèrö naca tu barco, en ré'cjada' bô' ruzéaj le, cuídi'do'os naca nê'e xiyáguí barco na' le ruzecaj rudxí'i barco para tseaj gátí'tès ga gué'ènnè' bônni' rusé'è le. ⁵ Lé'sca' caní naca lúdxí'ru'. Sal-la' cuídi'do'os naca, zióntèrö le rnna lúdxí'ru' na'. Buli'yútsóca' ca run guí'. Sal-la' guí'do'os ribíbiru', tu guí'a sibi huayéguí. ⁶ Lé'sca' lúdxí'ru' na' naca ca tu guí'. Yúgu'tè le ruá' dō' raca yōdzōlió ni rnna lúdxí'ru', en tu' dzaga lúdxí'ru' na' idútè le naca cázaru', que lè ni na' run ga raca xihui' idútè le nácaru'. Le rnna lúdxí'ru' ribequí guí', le ruzeguí' rē'u ca naca yúgu'tè le runru', ate' tu' rnna caní lúdxí'ru' na', naca que tsca chinaguéla'tè guí' le nabequí' tu' xihui'. ⁷ Yúgu'tèba' bóa' guixi' ta'daba' luyú, en yugu' bóa' zoa xiligacaba', en yugu' bóa' tá'ayōj lé'èba' lu yu, enca' yúgu'tèba' bóa' dzō'ōba' lu nísado', huáca ila'nná be'e bōnachi luyú ni lé'gacaba', ⁸ pero cuntu nu bōnni' gaca inná bé'ené' lúdxé'è, tu' rnna lúdxí'ru' le ruá' dō', en bití' gaca nu uzaga' xinōzi. Zióntèrö le rnna lúdxí'ru' le naca ca tu le naché' yōl-la' gati. ⁹ Len la' lúdxí'ru' ná'asō rulidza tsáhui'ru'-nè' Dios Xuz, en rulidza dítjaru' ca' yugu' bōnni', ate' benè' Dios lé'gaquié' ca naca cazé' Lé'. ¹⁰ Caní naca, len la' ruá'asiru' na' rulidza tsáhui'ru' bōnachi, en rulidza dítjaru' bōnachi. Bōchi' luzá'ado', bití' ral-la' gaca caní. ¹¹ Bití' ca' ta'lén nisa siziá', en nisa zōna' la' tuzi ga ta'lén. ¹² Bōchi' luzá'ado', tu yaga higo bití' gaca cuía le ribía yaga olivo, ate' tu lubá uva bití' gaca cuía le ribía yaga higo na'. Lé'sca' caní, nitú ga rilén nisa bití' gaca ila'lén nisa zōna', en nisa siziá'.

Yōl-la' réajni' i le naca idú

¹³ Channō zoé' tu bōnni' ládjali' rácadé'è, en réajni'de'ené', lu yōl-la' nōxaj ladxi' queé' ral-la' ulu'è náquié' caní ni'a que le naca tsahui' runé'. ¹⁴ Na'a, channō ruzxé'eli' luzá'ali', en runli' dxin para ila'gú'u bōnachi libí'ili' yōl-la' ba, bití' ral-la' gun ba zxon cuinli' ca naca yōl-la' réajni' queéli'. Nu run caní rizí' yé', en ridá'baga' le naca idútè li. ¹⁵ Yōl-la' réajni' caní bití' naca le runōdzjé' Dios, pero que yōdzōlió ni naca, enca' que'gaca bōnachi yōdzōlió ni, en que tu' xihui'. ¹⁶ Yugu' bōnni' tu' zxe'ené' luzá'agaquié', en té'ènné' ila'gú'u bōnachi lé'gaquié' yōl-la' ba, lé'sca' ta'dil-la' dídze'è, en tuné' yúgu'tè le ruá' dō'. ¹⁷ Yugu' bōnni' nápagaquié' yōl-la' réajni' na' runōdzjé' Dios:

Tuné' le naca idú tsahui', en ta'bōzè' dxí'ado'.

Nácagaquié' zxon ladxi', en nōxaj ladxi'.

Tu'huechi' ládxi'gaquié' bōnachi,
en tuné' le naca dxí'a.

Tuz ca tu'chí'a tu'sórōè' luzá'agaquié',
en bití' ta'béaj bé'è luzá'agaquié'.

¹⁸ Nupa tuí'i ládxi'gaca ila'bequi dxi le raca, ta'bōza dxí'ado', para gaca ca' dxi'a idútè le zéaj naca caz.

4

Nupa tun zxon le nacua' yōdzōlió

¹ ¿Bizx que na' ridí'l-lali', en raca didza' bizxaj queéli'? Raca caní queéli' tu' rizé ládxi'li' zían le rizé ládxi'li' tu tuli', en que lè ni na' ridí'l-lalenli' luzá'ali'. ² Zían le ruhuídi'li', en tu' cabí rizí'ili' le, que lè ni na' rútili' bōnachi. Ruzxé'eli' le dè que luzá'ali', en tu' cabí ridéli'li' le, que lè ni na' rizóa ribō'ōli', en ridí'l-lali'. Bití' rata' queéli' le ré'ènilí', tu' cabí rinábili'-nè' Dios lè na'. ³ Sal-la' zoa bi rinábali', bití' bi rizí'ili', tu' cabí naca dxi'a ca rinábali', tu' ré'ènilí' lè na' rinábali' para ugunli' le dxin ca raza ládxi'sili'. ⁴ Libí'ili', bōnachi nusanli'-nè' Dios, ¿naru' cabí nōzili' channō runli' zxon le nacua' yōdzōlió ni, chinuhuóacali' ca nu bití' rilé'e Dios dxi'a? Nútí'tés nu ré'èni gun zxon le nacua' yōdzōlió ni, nuhuóaca ca nu bití' rilé'e Dios dxi'a. ⁵ Bití' rmasó ca' le nazúaj lu guichi lá'ayi le rnna: "Dios risól-lè'è Dios Bō' Lá'ayi queé'ru", Nu zóalen ré'u, ate' Lé' nadxí'inè' ré'u, en rudúli'nè' ré'u channō rusanru'-nè'." ⁶ Na'a, zxóntèrö le ruzá' lúdxé'è Dios queé'ru', tu' nazúaj lu guichi lá'ayi le rnna: "Dios ruzágué'è xinózguequi nupa tun ba zxon cúnguequi, pero ruzá' lúdxé'è que'gaca nupa nácagaca nōxaj ladxi'." ⁷ Que lè ni na', guli'sóa nōxaj ladxi' lahué' Dios. Guli'nná be'e tu' xihui', ate' uzzunxaj ga zóali'. ⁸ Guli'gúf' ládxi'li' sóalenli'-nè' Dios, ate' Lé' idisóalené' libí'ili'. Libí'ili', bōnachi dul-la', guli'gaca tsahui', en bití'rō gunli' dul-la'. Libí'ili', núlōli' reaj bō' ládxi'do'oli', en chopa le nadxí'ili', guli'gún dxi'a icja ládxi'do'oli'. ⁹ Guli'sébi ládxi'li', en buli'huf'ini, en guli'cōdxi. Na'a ruzxídxili, pero ral-la' cōdxili'. Rudzéjali', pero ral-la' huf'inili'. ¹⁰ Guli'gaca nōxaj ladxi' lahué' Xanru', ate' Lé' guné' ga tsépiséli'.

Bití' ral-la' ichugu bé'èru' le run luzá'aru'

¹¹ Bōchi' luzá'ado', bití' innéli' que luzá'ali' tuli' ia'tuli'. Nu bōnni' rinné' que bōchi' luzé'è, en rilaga yudxé' le runé', bōnni' ni rinné' que xibá queé' Dios, en ruchi'a rusórōè' le rinná bé' xibá na'. Na'a, channō ruchi'a rusórōu' le rinná bé' xibá na', run cuinu' nu ruchi'a rusórōè'

le, en biti' runu' ca rinná bē' xibá na'. ¹² Na'a, tuzē' náquiē' Dios, Nu ben xibá na', en náquiē' ca' Nu ruchi'a rusōrōē' le runru'. Lē cazē' gaca usōlē' bōnachi o usunítíē' bōnachi na'. Na'a, ¿núzxitē run cuinu', rilaga yudxu' luzó'o?

Biti' gaca gunru' lōza le gaca cuxō huidzaj

¹³ Na'a, buli'zē nágali, núlōli' rnnali': "Cuxō huidzaj tséajtu' yōdzō ni', ate' sóatu' ni' tu iz, en zían le gá'utu', en úti'tu', ate' caní gáta'da' dumí queé'tu'." ¹⁴ Biti' nōzili' bíxzi gaca cuxō huidzaj. ¿Nacxi caz naca queé'ru, tsca zóaru' yōdzōlió ni? Nácaru' ca bōchila le nalá' tu chí'do'osó, en la' rinítitē. ¹⁵ Que lē ni na', caní ral-la' innali': "Channō guē'ēnnē Xanru', sóaru' ibanru', en tu ia'tú le gunru'." ¹⁶ Na'a, libí'ili', lu yōl-la' run ba zxon queéli' rigú'uli' yōl-la' ba la' cuínsili'. Yúgu'tē le caní le runli' zeaj naca le ruá' dō'. ¹⁷ Channō nōziru' le naca dxí'a le ral-la' gunru', en biti' gunru' lē na', runru' dul-la'.

5

Santiago rusē'ē lādxi'gaquiē' bōnni' dē yōl-la' tsahui' quegaquiē'

¹ Libí'ili', bōnni' rilé'eli' yōl-la' tsahui', guli'cōdxi, en guli'cōdxia', tu' si' za' dza ilé'eli' yōl-la' yechi'. ² Chinaca ditaj yōl-la' tsahui' queéli', ate' chinutōgacaba' le ráculi' bōljado' que. ³ Chinaca que dumí oro, en dumí plata queéli' ca naca que guié nazón yōni que, ate' yōni que na' naca ca tu le ruzegui libí'ili' didza', ate' gaca queéli' ca tu guí' le usuniti libí'ili'. Caní gaca queéli', tu' busó' butúbili' queézili' yōl-la' tsahui' dza ni zóaru' chirōjsétēgaca. ⁴ ¡Buli'yútsōca! Yúgu' bōnni' huen dxin gula'lapé' yōla queéli' chita'naba yúdxinē' lāzxiagaquiē', tu' cabí riguízxi'anili' légaquiē', ate' lē na' ta'nabē' bōnni' huen dxin na' chibidxín didza' na' lahuē' Xanru', ate' Lē rinná bé'enē' ni'a nē'ē guizxi yu. ⁵ Benli' ga buné'eli', en guí' gudágutica'sili' le rnasó queéli' lu yōdzōlió ni. Buxón cuinli', pero chizóa idxín dza údxi queéli'. Gaca queéli' ca raca queé'ba naca lēnni', chibú'u dza gútru'ba'. ⁶ Richíguli' quegaquiē' bōnni' tsahui', en rútili' légaquiē', ate' légaquiē' biti' ta'dá'baguē'ē libí'ili' cate' rútili' légaquiē'.

Cōzaru' zxon ladxí, en ulídzaru'-nē' Dios

⁷ Na'a, bōchi' luzá'ado', guli'cōza zxon ladxí' ga idxinrō dza huōdē' Xanru'. Buli'yú ca runē' tu bōnni' guz gu'una. Lu yōl-la' ribōza zxon ladxí' ribōzē' guiōjsiu', en guiōj cusu lin, ate' tōdi ni' ulapē, en utubē' yōz zían. ⁸ Lēsca' caní, libí'ili' na' réajlē'éli' Cristo, guli'cōza zxon ladxí, en buli'tipa lādxi'li', tu' chizá' gala' dza huōdē' Xanru'. ⁹ Bōchi' luzá'ado', biti' innēli' que luzá'ali' tuli' ia'tuli', para cabí ibága'li' xíguia'. ¡Buli'yútsōca! ¡Chirudzaga lo udxinē' Xanru', ate' uchi'a usōrōē' le runli'! ¹⁰ Bōchi' luzá'ado', buli'yú ca guca quegaquiē' bōnni' gulu'ē didza' uláz queē' Xanru'. Nácaqaquiē' ca tu le rulu'í rē'u ca ral-la' quí'í sáca'ru', en cōzaru' zxon ladxí'. ¹¹ Na'a, nucuá'aru' légaquiē' ca yugu' bōnni' guláquiē' bica' ba, nupa ni' gula'gu'í gula'zaca'. Chibiyōnili' ca benē' Job. Gulōzē' zxon ladxí' sal-la' gudí' guzxacá'dē'ē, ate' nōzili' ca' ca benē' Xanru' queē' ga búdxitē. Ruhuéchi'da' lādxē'ē Xanru' rē'u, en ru'í lādxē'ē rē'u.

¹² Bōchi' luzá'ado', le nácatērō lo naca lē ni rea' libí'ili': ¡Biti' uzōtjali' Nu zoa yehua' yubá, en biti' uzōtjali' le nacua' luyú ni, en biti' uzōtjali' bíti'tēs bi run tsutsu xtídza'li'! Cate' innali' "Ōn" ral-la' innásili' "Ōn." Cate' innali' "Biti'" ral-la' innásili' "Biti'." Caní ral-la' gunli', para cabí ibága'li' xíguia' lahuē' Dios.

¹³ Channō riguí' rizáca' nu dzaga libí'ili', ral-la' ulidza Dios nu na'. Channō zoa nu rudzeja, ral-la' gul-la' yōl-la' ba nu na'. ¹⁴ Channō re'e nu dzaga libí'ili', ral-la' ulidza bōnni' gula tapa chí'ē bōnachi queē' Cristo, para ulu'lidzē' Dios, en ila'nábinē' Lē' únē' bōnni' huē' na'. Ral-la' ila'gu'ē lē' le za, en ulu'gunē' dxin Lē' Xanru'. ¹⁵ Cate' ulu'lidzē' Dios, en ta'yéajlē'ē gunē' Cristo ga huóaqiē' bōnni' huē' na', ní'rō gunē' Xanru' ga huóása uzōē', en channō benē' dul-la' bōnni' huē' na', Xanru' uniti lahuē' lē'. ¹⁶ Que lē ni na', guli'xóalēpi' dul-la' nabága'li' tuli' ia'tuli', en guli'naba que luzá'ali' tuli' ia'tuli' lahuē' Dios para únē' libí'ili', para urúaj yōdzōhuē' na' ré'eli'. Le rulidzē' tu bōnni' tsahui' Dios, le runē' idú lādxē'ē, nácada' lesaca'. ¹⁷ Elías, bōnni' ni' bē'ē didza' ulaz queē' Dios, gúquiē' tu bōnni' yōdzōlió ca nácaru' rē'u, pero cate' bulidzē' Dios, en gunábinē' Lē' para cabí galaj guiōj, idú tsona iz yu' xopa beo' biti' gulaj guiōj luyú ni. ¹⁸ Gudōdi ni' bulidzē' Dios leyúbōlō, ate' bóalaj guiōj, ate' bunōdzaj le gulazē' yugu' bōnni' dza ni'.

¹⁹ Bōchi' luzá'ado', lē ni ral-la' inōzili'. Channō nunbē' nu bōnni' dzáguiē' libí'ili' le naca idútē li, en richixi riníguinē', ate' zoa nu gun ga ubí'í lādxē'ē bōnni' na' richixi riníguinē', ²⁰ nu na' gun ga ubí'í lādxē'ē bōnni' dul-la' na' gudé' ga yúbōlō, usōlē' bōnni' dul-la' na' lu yōl-la' guti, en gunē' ga uniti lahuē' Dios dul-la' zían nabáguē'ē bōnni' na'. ¡Ca' gaca!

DÍDZA 'DO' ZÍ'ALÖ BUZÚAJË' PEDRO

Pedro rugapë' Dios nupa ta'dá' Cristo

¹ Neda', Pedro, naca' gubáz nasól-lë'ë Jesucristo. Ruzúaja' queëli' lu guichi ni, libí'ili' násilasili' zí'tu' gapa dë ládzáli', zóali' luyú Ponto, en luyú Galacia, en luyú Capadocia, en luyú Asia, en luyú Bitinia. ² Guró cazë' Xúziru' Dios libí'ili' ca na' bucözë' dza ni'te, para guéquli' quez queë' lu në'ë Dios Bô' Lá'ayi, en gunli' ca rnna xtídzë'ë Cristo, en gácali' idú tsahui' ni'a que xichönë' Cristo. Rinábida'-në' Dios uzá' ládxë'ë queëli', en gunë' ga soa dxi icja ládxi'do'oli'.

Le rúntica'siru' löza

³ ¡Yöl-la' ba Dios, Xuzë' Xanru' Jesucristo! ¡Lu yöl-la' ruhuéchi' ladxi' xzön queë' bucubë' yöl-la' na'bán queëru' tu' busubanë' Jesucristo lu yöl-la' guti' ¡Lë ni run ga rúntica'siru' löza, ⁴ en gun ga idéli'ru' lë na' rapa chi'ë Dios queëru' yehua' yubá! Lë na' rapa chi'ë Dios, le unödzejë' quegaca bönachi queë', biti' initi, en biti' itëbi, en biti' igula. ⁵ Tu' réajlë'ëli' Lë', lu yöl-la' huáca xzön queë', Dios gun chi'ë libí'ili' cate' idinxrö dza ni' uzí'ili' xibë yöl-la' rusólá idú na' chinupë'ë queëru', en ulu'ë lahui dza údxi.

⁶ Que lë ni na' rudzëjade'eli', sal-la' na'a ral-la' quí'i sácali' tu chí'ido' tu' taca zían le ta'zí' bë' libí'ili'. ⁷ Tu' ruá' rilenli' yugu' lë na' ta'zí' bë' libí'ili', naca bë' naca idú ca réajlë'ëli' Cristo. Lësca' caní rizi' bë'ëru' oro, le initi, cate' ruchí'aru' le lu guí'. Que lë ni na', cate' chinazí' bë' yöl-la' réajlë' queëli' Cristo, le nácarö lesaca' ca oro, gaca queëli' yöl-la' xzön, en yöl-la' run bal dza ni' uluf'i lahuë' Jesucristo.

⁸ Libí'ili' nadxí'ili'-në' Cristo sal-la' catu caz bilé'eli' Lë'. Réajlë'ëli' Lë' sal-la' biti' rilé'eli'-në' na'a, ate' rudzëjali'. Yöl-la' rudzeja xzön queëli' le cabí gaca quíxjö'öru' tsca naca, naca iduté li. ⁹ Caní naca, tu' ridéli'li' yöl-la' rusólá que bô' naca cázali', le rata' queëli' tu' réajlë'ëli'-në' Cristo.

¹⁰ Dza ni'te yugu' bönni' gulu'ë didza' uláz queë' Dios bulu'sëdë' dxí'ado' ca naca yöl-la' rusólá na' dë queëru' na'a, ate' gulu'ë didza' ca naca le ruzá' ládxë'ë Dios queëru'. ¹¹ Bô' Lá'ayi dzáguie' Cristo buzëajini'inë' zí'atëlö bönni' na' gulu'ë didza' uláz queë' Dios, en buluf'inë' légaquie' ca ral-la' quí'i sáquë'ë Cristo, enca' ca gaca queë' yöl-la' xzön tódi na'. Que lë ni na' gulu'í' iládxí'gaquie' ila'nözínë' bátaxi gaca lë ni, en quuzi' na' gaca que lë na' buluf'inë' Bô' dzáguie' Cristo légaquie'. ¹² Dios buluf'inë' bönni' na' gulu'ë didza' uláz queë' biti' naca tu le ila'lé'enë' légaquie', pero rë'u ni rilé'ëru' lë na' gulu'ë didza' que, ate' libí'ili' riyónili' na'a ca naca que. Yugu' bönni' tunë' libán que didza' dxi'a tu'ë didza' que lë ni, ate' zóalen yöl-la' huáca queë' Dios Bô' Lá'ayi légaquie', Nu na' risól-lë'ë Dios zoë' yehua' yubá queëru', ate' té'ënnë' gubáz lá'ayi queë' Dios ila'nözínë' ca naca lë na' gulu'ë didza' que dza ni'te.

Dios rulídzë' rë'u para gácaru' lá'ayi

¹³ Que lë ni na', guli'sóa ban ladxi', en guli'cözatica'sö bá'ado'. Idú ládxi'li' buli'xzöni ládxi'li' lë na' uzá' ládxë'ë queëli' Dios dza ni' uluf'i lahuë' Jesucristo. ¹⁴ Guli'gún ca rnna xtídzë'ë Dios, en biti' güf'ili' lataj yugu' le rizë ládxi'li' ila'ché' libí'ili' ga yúbölö, ca na' benli' dza ni' biti' núnbë'ënilí'-në' Dios. ¹⁵ Ral-la' gácali' lá'ayi ca naca yúgu'të le runli', ca na' náquie' lá'ayi Dios, en bulídzë' libí'ili' para guéquli' queë'. ¹⁶ Lësca' caní nazúaj lu guichi lá'ayi, ca na' gunné' Dios le rnna: "Guli'gaca lá'ayi, tu' naca' neda' lá'ayi."

¹⁷ Réli'-në': "Xuztu'" cate' rulídzali'-në' Dios, ate' Lë', lébisö ca ruchí'a rusöröë' yúgu'të bönni' tsca naca le núngaca tu tu bönni' na'. Que lë ni na' ral-la' gádxili' Lë' tsanni ni zóali' yödžöliö ni, le cabí naca idú ládžali'. ¹⁸ Dios busölë' libí'ili' lu lë na' gúcali' dza ni' cate' benli' ca nácgaca le cá'asö bulu'dödë' xuz xtó'oli' loli'. Nöz qezili' böá'uë' libí'ili', calëga len tu le initi ca naca oro, en plata, ¹⁹ pero len xichönë' Jesucristo le nácatërö lesaca', tu' budödi cuinë', en gúquie' ca tuba' bô'cu' xzila' nácabá' idú dxi'a, böa'do' tutië'-ba' lahuë' Dios para ugúa dul-la'. ²⁰ Dios guró cazë' Cristo zí'atëlö ca benë' yödžöliö ni, ate' dza ni' zóaru' na'a benë' ga buluf'i lahuë' para uzí'ili' xibë'. ²¹ Ni'a que le benë' Cristo réajlë'ëli'-në' Dios, busubanë' Lë' lu yöl-la' guti, en benë' ga náquie' lo. Caní naca, réajlë'ëli'-në' Dios, en ruzxöni ládxi'li' Lë'.

²² Na'a, chinún cuinli' dxi'a tu' runli' ca rnna le naca iduté li, en naca idú ca nadxí'ili' yugu' böchi' luzá'ali' ta'yéajlë'ë Cristo. Que lë ni na', idú ládxi'li' ral-la' idxí'ili' luzá'ali' tuli' ia'tuli'. ²³ Chibóaljali' leyúbölö, calëga tu' nuzóagaca bönni' tati caz libí'ili', pero nuzóa Nu zoa caz libí'ili', en náljalenli' xtídzë'ë Dios, le naca ban, en le zóatica'sö. ²⁴ Caní naca, tu' nazúaj lu guichi lá'ayi le rnna:

Yúgu'të bönni' nácgaca ca naca guixi'.

Yöl-la' lachi' quéquequi naca ca xiyija guixi' na'.

Ribidxi guixi' na', en riguinnaj xiyija,

²⁵ pero xtídzë'ë Dios zóatica'só.

Didza' ni bidxín queéli' lu didza' dxi'a.

2

¹ Que lë ni na', guli' cá'ana yúgu'të le ruá' dö'. Biti'rö si' yë'ëli', en biti' ubéaj dxi'a cuinli' lógaca bönachi. Biti'rö uxzë'eli', en biti' innëli' que luzá'ali'. ² Ral-la' së ládxi'li' le naca queë' Dios Bô' Lá'ayi para gálali' ca na' tunbi' bi'i huë'ënido', ta' zë' ládxi'bi' nidxi'. Caní ral-la' gunli' ga idxinrö dza uláli', ³ channö réquibe'eli' náquië' Xanru' dxi'i ladxi'.

Cristo náquië' ca tu guiöj naca ban

⁴ Guli'biga' ga zöë' Xanru'. Náquië' ca tu guiöj naca ban. Náquië' ca tu guiöj bulu'cá'ana bönachi cá'asó pero naca tu le guró cazë' Dios le nazáca'tërö. ⁵ Lësca' caní, libí'ili' nácali' ca yugu' guiöj nabángaca. Guli'gúu' Dios lataj ungunë' libí'ili' dxin, ate' gunë' ga gácali' ca tu yudo' ga soë' Dios Bô' Lá'ayi. Lu yudo' na' gácali' ca bixúz néquiqueuinë' quez queë' Dios, ate' lu në'ë' Jesucristo gaca udödili' yugu' le runnë' Dios Bô' Lá'ayi queéli' lahuë' Dios, lë na' raza ládxië'ë Dios. ⁶ Que lë ni na' nazúaj ca' lu guichi lá'ayi le rnna:

Rigu'a lu zö'ö yödzö Sión tu guiöj lo squin zö'ö,
le guró caza' neda', en naca lesaca'.

Nu réajlë' Lë', biti' ichixi inigui.

⁷ Naca guiöj ni queéli' libí'ili' na' réajlë'ëli' Cristo tu le nazáca'da', pero quégaca nupa biti' ta'yéajlë' Cristo, naca ca na' nazúaj lu guichi lá'ayi le rnna:

Guiöj na' bulu'zöë' bönni' tu'cu'ë zö'ö tsölá'aló,
tu' guléquinë' naca cá'asó,
guiöj ni chinaca guiöj lo squin zö'ö.

⁸ Lësca' caní nazúaj lu guichi lá'ayi le rnna:

Guiöj ni gun ga tsójchégu'gaca bönachi,
en gun ga tsójtsó'ógaca.

Le nácatë yójchégu'gaquië' bönni' biti' ta'yéajlë'ë Cristo, tu' gula'chíxinë' cate' bulu'zöë' xtídzë'ë Dios tsölá'aló. Dios bucu'ë légaquië' para ilunë' caní.

Nupa néquiquequi quez queë' Dios

⁹ Libí'ili' nácali' bönachi guró cazë' Dios. Yúgu'tëli' nácali' bixúz queë' Bönni' Unná Bë' Lá'ayi. Nácali' ca tu yödzö nequi quez queë' Dios. Nácali' bönachi que cazë' Dios. Caní nácali' para gaca gunli' libán que le zxön benë' Dios, Bönni' na' bulidzë' libí'ili' para birúajli' ga naca chul-la que dul-la', en guyázali' lu bení' idú queë'.

¹⁰ Zí'atëlö biti' gúcali' bönachi queë' Dios,
pero na'a chinácali' bönachi queë'.

Zí'atëlö cuntu nu buéchi' ladxi' libí'ili',
pero na'a Dios caz ruhuéchi' ládxië'ë libí'ili'.

Zóaru' nabanru' para gunru' ca rë'ënë' Dios

¹¹ Böchi' luzá'ado', nácali' ca bönachi zí'tu', en ridásili' yödzölió ni. Que lë ni na', ráta'yua' loli', biti' güi'ili' lataj ila'nná be'e le rizësó ládxi'li' libí'ili', yugu' le ta'díl-lalen bö' naca cázali'.

¹² Guli'gún le naca dxi'a lógaca bönachi biti' núnbë'gaquië' Dios. Caní gaca, channö ulu'zegui libí'ili' didza', en ila'nná tútili' bönachi, gaca ila'lé'e bönachi yugu' le dxi'a runli', ate' dza huödë' Xanru' ila'gu'ë Dios yöl-la' ba ni'a que le naca cázali'.

¹³ Tu' néquili' queë' Xanru', guli'gún bal yúgu'të bönni' ta'nná bë'ë, bönni' na' nucuá'agaca bönachi légaquië', sal-la' náquië' bönni' rinná bé'enë' idütë yödzölió, tu' náquië' bönni' lo unná bë', ¹⁴ o channö náquië' bönni' rinná bé'enë' tu yödzö, nu na' nuzöë' bönni' lo unná bë' na' para gunë' xíguia' nupa tua' dö', en gunë' bal nupa tun le naca dxi'a. ¹⁵ Caní rë'ënë' Dios gunli' para ila'bö' dxíë' yugu' bönni' biti' bi nözgueuinë', en biti' núnbë'gaquië' Lë', cate' ila'lé'enë' le naca dxi'a na' runli'.

¹⁶ Guli'gaca ca yugu' bönni' nazánagaquië', pero biti' ugunli' dxin yöl-la' nazán queéli' para gunli' le ruá' dö'.

Guli'gaca ca yugu' bönni' nadó'ogaca' queë' Dios.

¹⁷ Guli'gún bal yúgu'të bönachi.

Guli'dxi'i yugu' böchi' luzá'ali'.

Guli'gadxi-në' Dios.

Guli'gún bal bönni' na' rinná bé'enë' idütë yödzölió.

Le gud'i guzxaquë'ë Cristo ruzéajni' i rë'u ca ral-la' gunru'

¹⁸ Núlöli' nácali' bönni' nadó'ogaca, guli'gadxi bönni' xanli', en guli'gún légaquië' bal, calégasó gunli' bal yugu' bönni' xanli' na' nácagaquië' tsahui', en tu'i ládxi'gaquië' libí'ili',

pero guli'gún bal ca' yugu' bönni' xanli' na' tu'saca' zi'è libí'ili' lu dxin runli' queégaquië'.
 19 Channó quí'í sáca'li', en bití' bi nabága'li', ate' guá' ilenli' lè na' tu' réquili' naca ca ré'ènë'
 Dios, urúajli' tsahui' lahuë' Dios. 20 Na'a, channó ruá'ali' dō', ate' yugu' bönni' yúlahui' ilunë'
 libí'ili' xíguia', çnaxci caz uzí'ili' xibé sal-la' len yöl-la' ribōza zxon ladxi' queéli' guá' ilenli' lè
 na' gaca queéli'? Channó ribōzali' zxon ladxi', en ruá' rilenli' le riguí' rizáca'li', ate' benli' le
 naca dxi'a, ní'irō urúajli' dxi'a lahuë' Dios. 21 Dios bulidzë' libí'ili' para quí'í sáca'li' caní, tu'
 gudí' guzzáquë'è Lë cazë' Cristo uláz queéli', en buzōë' queéli' tu le rulu'í libí'ili' ca ral-la'
 gunli', para quí'í sáca'li' ca na' gudí' guzzáquë'è Lë'.

22 Cristo bití' bi dul-la' benë', en catu caz guzxi' yë'ë.

23 Cate' bulu'dídza' yúdxinë' Lë',

bití' butsagui yúdxinë' légaquië'.

Cate' bulu'saca' zi'è Lë',

bití' buzenë' légaquië' le bach,

pero budōdi cuinë' lu në'ë Dios,

Nu na' ruchi'a rusörōë' le runru' ca sa'yéaj.

24 Lë cazë' Cristo guzxi'è dul-la' queéru' lu idú le naca cazë' cate' ní' gütíë' lë'e yaga cruz,
 para gácaru' ca yugu' bönni' nati, para cabirō gunru' dul-la', pero sóaru' ibanru' para gunru'
 le naca dxi'a. Lë' gúquië' huë' uláz queéru' para huóácaru' rë'u dxi'a. 25 Gúcali' ca yugu' bö'cu'
 zxila' nanítigacaba', pero na'a budxinli' queë' Cristo, Nu ruyú libí'ili', en rapa chi'ë bö' naca
 cázali'. Náquië' queéli' ca tu' bönni' uyú bö'cu' zxila'.

3

Ca ral-la' ilún nupa nutsaga ná gaca

1-2 Lësca' caní, libí'ili' nigula, ral-la' gunli' bal bönni' que queéli', en channó cabí ta'yéajlë'
 xtídzë'ë Cristo, ila'yéajlë'è Lë' cate' ila'lé'enë' le naca dxi'a runli', en ca na' nácali' ba'a ladxi',
 en runli' légaquië' bal, sal-la' bití' bi didza' ruí'ilenli' légaquië' ca naca queë' Cristo. 3 Yöl-la'
 lachi queéli' bití' naca le zoa láhuisō, tscá rupá'ali' ícjali', en tscá nacágan le néquini oro nusí'
 cuinli', en lari' nazáca'da' nácuili'. 4 Yöl-la' lachi queéli' ral-la' gaca le yu'u icja ládxi'do'oli'.
 Yöl-la' lachi le ridiá'tica'sō naca yöl-la' nōxaj ladxi', en yöl-la' ba'a ladxi', le nazáca'da'gaca
 lahuë' Dios. 5 Lësca' caní gaca yöl-la' lachi queégacanu nigula gula'yéaj ládxi'nu Dios, nigula
 na' gula'cuá'anu dza ní'te. Bulu'zxoní ládxi'nu Dios, en gulunnu bal bönni' que queégacanu.
 6 Caní bennu Sara, tu' bennu ca rnna xtídzë'ë Abraham, bönni' queénu, en bulídzanu lë',
 gunnánu: "Xan." Libí'ili' ca' gunli' ca bennu Sara na' channó gunli' le naca dxi'a, en bití' bi
 gádxili'.

7 Lësca' caní, libí'ili', bönni', ral-la' gü'í ládxi'li' nigula que queéli'. Guli'gún légacanu bal,
 calégasō tu' nōta'gacanu ca yöl-la' nál-la queéli', pero lësca' tu' nadéli'gacanu yöl-la' na'bán
 na' runnë' Dios queéru', lëbísō ca nadéli'li' libí'ili'. Guli'gún caní para cabí uzaga' tu' xihui'
 xinōzili' cate' ulídzali'-në' Dios.

Huagu'í huazáca'ru' sal-la' gunru' le naca dxi'a

8 Ga ruúdxitë, guli'gaca tuz tuli' len ia'tuli' yúgu'tëli', en guli'gü' ládxi'li' luzá'ali' tuli'
 ia'tuli'. Guli'gaca dxi'í ladxi', en zxon ladxi'. 9 Bití' ubí'ili', cabí guá'ali' dō' que nu ruá' dō'
 queéli', en bití' utsaga yúdxili' nu rutsaga yudxi libí'ili', pero caní ubí'ili', inábili'-në' Dios
 gunë' ga gaca bica' ba nu na', tu' bulidzë' Dios libí'ili' para gácali' bica' ba. 10 Caní naca le
 nazúaj lu guichi lá'ayi le rnna:

Nu bönni' ré'ènë' uzi'ë xibé yöl-la' na'bán queë', en cōzë' dxi'ado',
 ral-la' ucá'anë' didza' xihui', en cabirō si' yë'ë.

11 Ral-la' ucá'anë' le ruá' dō', en gunë' le naca dxi'a.

Ral-la' gü'í ládxi'ë cōzë' zxon ladxi', en gúntica'sé' caní,

12 Xanru' rapa chi'ë yugu' bönni' tsahui'

en ruzé náguie' le tu'lidzë' Lë',

pero ruzáguë'è xinōzguequi nupa tua' dō'.

13 ÇNuzxi' caz guá' dō' queéli' channó ruí'í ládxi'li' gúntica'sili' le naca tsahui'? 14 Sal-la' quí'í
 sáca'li' cate' runli' le naca tsahui', gácali' bica' ba. Cuntu nu gádxili', en bití' ubí' ugu'íli'
 15 pero bulí'zxoní ládxi'li'-në' Cristo, en gü'íli' Lë' lataj inná bé'enë' lu icja ládxi'do'oli'.
 Guli'sōa sina' quí'xjō'íli' yúgu'të nupa ila'nabí libí'ili' bizx que runli' lōza Cristo, en gunli'
 lë ni lu yöl-la' nōxaj ladxi' queéli', en lu yöl-la' run bal nupa na'. 16 Guli'gúntica'sō le naca
 dxi'a lahuë' Dios, en channó nacua' nupa ta'nnë xihui' que le naca tsahui' runli' tu' réajlë'ëli'
 Cristo, ní'irō ulu'tuí'í tu' nōzi le ta'nnë queéli'. 17 Channó quí'í sáca'li', dxi'arō gaca channó
 naca tu' runli' le naca dxi'a, en caléga tu' ruá'ali' dō', channó Dios ré'ènë' quí'í sáca'li' caní.

18 Lë cazë' Cristo gudí' guzzáquë'ë, en gütíë' uláz queéru' para bugúë' dul-la' nabága'ru'.
 Lë' náquië' dxi'a, pero gütíë' ní'a queéru', yugu' bönni' dul-la'. Caní benë' para bunë' rë'u tuz

len Dios. Lu yöl-la' bönachi queë' gütie' pero lu bö' naca cazë' ni zoë' nabanë' lu le cubi le naca cazë'. ¹⁹ Lu bö' naca cazë' guyijë' yöjenë' libán lógaca bö' nadzúngaca. ²⁰ Bö' ni gulaca cazë' yugu' bönni', dza ni'te gula dá'baguë'ë xtídzë'ë Dios, dza ni' zoë' Noé, cate' ni' gulözë' Dios lu yöl-la' riböza xzön ladxí' queë', en biti' busiúdxë' légaquië', tsanni ni' benë' Noé barco xzön na'. Lë'e barco na' bulu'lá nabábasö bönachi lu nisa. Gulaca xunu' bönachi, bönni', en nigula. ²¹ Nisa ni' naca tu le rulu'í ca naca nisa ga na' ridílaru' nisa, le naca bë' nulacu' lu yöl-la' guti tu' bubanë' Jesucristo lu yöl-la' guti. Lë na' ridílaru' nisa biti' naca tu le run dxi'a le nácaru' láhuisö, pero rulu'í ru'í ladxí'ru' gaca dxi'a icja ladxí'do'oru' lahuë' Dios. ²² Jesucristo bubenë' yehua' yubá, ga na' yöjchö'ë cuita lë'ë ibëla Dios, en rinná bé'enë' yugu' gubáz lá'ayi, en nupa ni' ta'nná bë', en nupa nadéli'gaca yöl-la' xzön.

4

Ral-la' ugunru' dxin yöl-la' huáca queë' Dios para gunru' xichinë' Cristo

¹ Que lë ni na', ca na' gudí' guzxaqué'ë Cristo lu le naca cazë', lëscá libí'ili' ral-la' soa cözali' quí'í sáca'li'. Nu na' riguí' rizáca'a tu' da' le naca tsahui' chibucá'ana dul-la'. ² Na'a isí lo, ral-la' gúntica'sili' ca rë'ënë' Dios, en calëga ca rizësö ladxí'li' lu yöl-la' bönachi queë'li'. ³ Tsca'ti' gaz le chibenli' chibenli'. Biti'rö gunli' ca na' tun nupa biti' núnbë'gaca Dios. Dza ni'te benli' yugu' le cabí ral-la' gunli'. Guzé ladxí'li' le ruá' dö'. Guzúdxili'. Gudödi bë' gü'í gudágu'li', en guyéaj ladxí'li' budó' guiój budó' yaga, le rigútiné' Dios. ⁴ Na'a, tu'bániné' bönni' tunë' caní tu' cabirö runli' tsözöxn légaquië' cate' tunë' le ruá' dö' caní, en que lë ni na' tu'tsaga yúdxinë' libí'ili'. ⁵ Légaquië' run bayudxi ulu'luf'í cuíngaquië' lahuë' Dios, ate' Lë' chizóa uchi'a usöröë' nupa nabángaca, en nupa chinátigaca. ⁶ Que lë ni na' guca libán que didza' dxi'a lógaca nupa chinátigaca, nupa na' Dios buchí'a busöröë' léguequi cate' ni' gula'cuá' yödzóliö ni, ca na' ruchi'a rusöröë' yúgu'të bönachi. Guca libán lóguequi para ilá'cuá' lu yöl-la' na'bán lu bö' nácacaga caz, ca na' zoa cazë' Dios lu yöl-la' na'bán.

⁷ Chizóa idxín dza údxi que yúgu'të le dë. Que lë ni na', guli'gaca ba'a ladxí', en buli'subán ladxí'li' para gaca ulídzali'-në' Dios. ⁸ Tu' runtë bayudxi, guli'dxí'í luzá'ali' tuli' ia'tuli', ate' channö dzágali' lu yöl-la' nadxí'í, gácali' sina' uniti loli' yugu' luzá'ali' tua' dö' queë'li'. ⁹ Guli'gü'í lataj ilá'cuá' böchi' luzá'ali' lídxili', en biti' innëli' queégaquië'. ¹⁰ Ral-la' ugunli' dxí'ado' dxin yugu' le buzá' ladxë'ë Dios queë'li', en gácalenli' luzá'ali' tuli' ia'tuli'. ¹¹ Nu bönni' runë' ba nalí, ral-la' gunë' ba nalí que xtídzë'ë Dios, ate' nu bönni' runë' xichinë' Cristo, ral-la' ugunë' dxin yöl-la' huáca na' runnë' Dios queë', ate' ni'a que yúgu'të le runli', gaca yöl-la' ba queë' Dios ni'a que le nunë' Jesucristo. ¡Gácatíca'sö queë' Dios yöl-la' ba, en yöl-la' unná bë'! ¡Ca' gaca!

Le ila'gu'í ila'zaca' bönachi ta'yéajlë' Cristo

¹² Böchi' luzá'ado', biti' ubánili' tu' nözi le ta'zí' bë'da' libí'ili'. Biti' naca tu le cabí núnbë'gaca bönachi. ¹³ Guli'dzëjade' tu' dë lataj queë'li' gunli'-në' tsözöxn Cristo lu le riguí' rizáqué'ë Lë' ni'a que bönachi queë' para gaca udzëjali' ca' dza na' huödë' Cristo, cate' ilé'eli' yöl-la' xzön queë'. ¹⁴ Channö tu'dzaga yudxi bönachi libí'ili' tu' dá'ali' Cristo, bica' ba libí'ili', tu' naca bë' zóalenë' Dios Bö' Lá'ayi libí'ili', Nu na' za' yehua' yubá. Bönachi yödzóliö ni tu'dzaga yudxi Lë', pero libí'ili' runli'-në' bal. ¹⁵ Channö riguí' rizáqué'ë nu bönni' dzáguie' libí'ili', ral-la' gaca caní tu' dë'ë Cristo, en calëga tu' rútië' bönachi, o ribanë', o ru'ë dö', o tu' yöjgütsë'ë ga yúbölö. ¹⁶ Na'a, channö nülöli' riguí' rizáca'li' tu' dá'ali' Cristo, biti' ral-la' utuf'ili', pero guli'cu'ë Dios yöl-la' ba tu' nazí' lali' bönachi queë' Cristo.

¹⁷ Chibídxín dza isí lahuë' Dios uchi'a usöröë' bönachi rö queë'. Channö z'falö uchi'a usöröë' rë'u, znácxitëro' gaca queégaca nupa biti' túngaca ca rnna didza' dxi'a queë' Dios? ¹⁸ Channö naca böniga ulu'lágaca nupa tun le naca dxi'a, znácxitëro' gaca queégaca nupa ta'dá'bagá' Dios, en tun dul-la'? ¹⁹ Caní naca, yugu' bönni' ni' ta'gu'í ta'zaquë'úf'í rë'ënë' Dios gaca caní, ral-la' ilúntica'së' le naca tsahui', en ulu'dödë' bö' nácacaga cazë' lu në'ë Dios, tu' ben cazë' Lë' légaquië', en runë' ca rnna xtídzë'ë.

5

Pedro ruzéajni'inë' nupa ta'yéajlë' Cristo

¹ Na'a, ruzéajni'ida' libí'ili', bönni' gula tapa chí'ili' nupa néquiguequi queë' Cristo, tu' naca' neda' ca' bönni' gula ca nácali' libí'ili', en bilé'eda' le gudí' guzxaqué'ë Cristo, ate' guna' ca' tsözöxn libí'ili', uzí'iru' xibé yöl-la' xzön na' ilá' lahui. ² Guli'gaca ca bönni' tu'yue' bö'cu' xzila', gun chí'ili' bönachi na' Dios gulu'ë lu ná'ali'. Guli'gún caní idú ladxí'li' ca rë'ënë' Dios, en calëga tu' run bayudxi queë'li', o tu' rizë ladxí'li' dumí. Guli'gún xichinli' tu rë'ënisilí', ³ en calëga tu' rë'ënilí' inná bé'esilí' nupa na' nagu'ë lu ná'ali'. Guli'gü'í ladxí'li' gácali' tu le rulu'í ca ral-la' ilaca nupa na' run chí'ili'. ⁴ Caní naca, cate' ulu'í lahuë' Cristo, bönni' lo uyú bö'cu' xzila', idéli'li' tu le uzí'ili' xibé le catu caz iníti.

⁵ Lësca' caní, bi'i cuidi', guli'gún ca ta'nné' yugu' bönni' gula. Yúgu'tëli' ral-la' gunli' bal luzá'ali', tuli' ia'tuli', lu yöl-la' nõxaj ladxi' queëli', tu' nazúaj lu guichi lá'ayi le rnna: Dios ruzáguë'ë xinõzguequi nupa tun ba zxõn cuínguequi pero rácalenë' nupa nácagaca nõxaj ladxi'.

⁶ Guli'sóa nõxaj ladxi' lu në'ë Dios, ate' Lë' uchisë' libí'ili' cate' izá'a dza. ⁷ Guli'cú'u yúgu'të le run ga ruúbi ruguf'ili' lu në'ë Dios, tu' ruf'i ládxë'ë libí'ili'.

⁸ Guli'gaca ba'a ladxi', en buli'subán ládxi'li', tu' zoa tu' xihui', nu biti' rilé'e libí'ili' dxi'a, ridá idú gásibi'ilö, en naca ca tuba' bëdxi guixi' ribõdxi'aba', riguiljba' nu gáguba'. ⁹ Guli'gaca tsutsu ca réajlë'ëli' Cristo, en guli'zága' xinõza tu' xihui', tu' nõzili' ta'guí'i ta'záquë'ë böchi' luzá'ali' idútë yõdzõlió ni ca na' riguf'i rizáca'li' libí'ili'. ¹⁰ Ní'irõ cate' chigud'í guzxáca'li' tu chí'isõ, Dios gunë' ga gácali' idú tshui', en ga gácali' tsutsu, en ga gálali', en ga sóali' tsaz. Lë cazë' Dios ruzá' ládxë'ë queëru' yúgu'të le ruzí'iru' xibë, en bulidzë' rë'u para uzí'iru' xibë yöl-la' zxõn queë' le zóatica'sõ tu' nácaru' tuz len Jesucristo. ¹¹ ¡Gácatica'sõ yöl-la' ba, en yöl-la' unná bë' queë' Lë'! ¡Ca' gaca!

Pedro ruzenë' didza' nupa ta'dá' Cristo

¹² Dídza'do' ni ruzúaja' queëli' lu guichi lu në'ë Silvano. Réquida' náquië' böchi'ru' idú ladxi'. Ré'ënda' utipa' ládxi'li', en runa' ba nalí loli', le nácátë lë ni naca le ruzá' ládxë'ë queëru' Dios. ¡Guli'gaca tsutsu tu' ruzí'ili' xibë lë ni!

¹³ Yugu' bõnachi queë' Cristo nacua' Babilonia tu'gapa Dios libí'ili'. Dios gurõ cazë' léguequi ca na' gurõë' libí'ili'. Lësca' bi'i Marcos rugápabi' Dios libí'ili'. Nácabi' ca zxf'ini caza'. ¹⁴ Guli'gapa Dios luzá'ali' tuli' ia'tuli', en lu yöl-la' nadxf'i queëli' luzá'ali' unída'li' luzá'ali' tuli' ia'tuli'.

Rinábida'-në' Dios gunë' ga soa dxi icja ládxi'do'oli', yúgu'tëli' na' néquili' queë' Jesucristo. ¡Ca' gaca!

DÍDZA'DO' BUROPI BUZÚAJË' PEDRO

Pedro rugapë' Dios nupa ta'dá' Cristo

¹ Neda', Simón Pedro, naca' huen dxin queë' Jesucristo, en gubáz nasól-lë'ë Lë'. Rugapa' Dios libí'ili', réajlë'ëli'-në' Jesús. Lëbisó ca nazáca'gaca yöl-la' réajlë' queëli' Lë', en yöl-la' réajlë' queëtu' Lë'. Dios benë' ga réajlë'ëli' Lë' tu' naca cazë' tsahui', en tu' náquië' ca' Xanru' Jesucristo, Nu na' rusóla' rë'u, tsahui'. ² Rinábida'-në' Dios gunë' ga gata' queëli' iduté le ruzá' ládxë'ë queëru', en gunë' ga soa dxi icja ládxi'do'oli' tu' núnbë'ëli'-në' Dios, enca' Xanru' Jesús.

Le nácagaca nupa ta'yéajlë' Cristo

³ Lu yöl-la' huáca zxön queë', Dios chibennë' queëru' yúgu'të le riquíniru' para gata' queëru' yöl-la' na'bán idú, en para gácaru' ba'a ladxi', tu' núnbë'ëru' Nu na' bulidza rë'u para gata' queëru' yöl-la' zxön queë', en le naca tsahui' queë'. ⁴ Tu' runë' caní, benë' ga gaca uzí'iru' xibé yugu' le zxön, en le naca tsahui' guzxi' lu në'ë gunnë' queëru', ate' tu' naca caní nuláru' lu le ruá' dö' raca yödzölió ni tu' ta'zë ládxi'gaca bönachi le cabí naca tsahui'. Nuláru' para gácaru' ca náquië' Lë' cazë' Dios. ⁵ Que lë ni na':

Channö réajlë'ëli' Cristo,

guli'güi' ládxi'li' gácali' dxi'i ladxi'.

Channö chinácali' dxi'i ladxi',

guli'güi' ládxi'li' gata' ca' queëli' yöl-la' rácada'.

⁶ Channö nápalí' yöl-la' rácada',

guli'güi' ládxi'li' inná be'e cuinli'.

Channö rinná be'e cuinli',

guli'cöza zxön ladxi'.

Channö ribózali' zxön ladxi',

guli'sóa ba'a ladxi'.

⁷ Channö zóali' ba'a ladxi',

guli'dxi'i luzá'ali'.

Channö nadxi'ili' luzá'ali',

guli'dxi'i ca' yúgu'të bönachi.

⁸ Channö caní runli', en zeaj rácarö idú ca runli' caní, lë ni gun ga bití' gaca nítisö yöl-la' réajlë' queëli' Lë', ate' tseaj gácarö idú ca núnbë'ëli'-në' Xanru' Jesucristo. ⁹ Nu bönni' bití' ruí'i ládxë'ë gunë' caní, náquië' ca tu bönni' nachul-la nanítíë', tu' chizá' ral-la ládxë'ë bunë' Cristo lë' tsahui', en bugüë' yugu' dul-la' gubáguë'ë zí'atëlö. ¹⁰ Que lë ni na', böchi' luzá'ado', ral-la' güí'itë'ö ládxi'li' guéquibe'eli' bulidzë' Dios libí'ili', en gurö cazë' libí'ili'. Channö gunli' caní, bití' ca' ichixi inigüili'. ¹¹ Caní gaca, idú ládxë'ë Dios gúnmasë' queëli' lataj tsázali' ga inná bë'tica'së' Xanru' Jesucristo, Nu rusóla' rë'u.

¹² Que lë ni na' gúntica'sa' ga tsöjnéli' yugu' lë ni sal-la' chinöz quézili' le, en rugunli' dxin le naca iduté li na' chiguzxi' lu ná'ali'. ¹³ Runi neda' ral-la' usubana' ládxi'li' ca nácagaca lë ni tsanni ni zoa' nabana'. ¹⁴ Ral-la' guna' caní tu' nözda' si' gátia'. Xanru' Jesucristo chigudxi cazë' neda' gaca caní quia'. ¹⁵ Que lë ni na' ruí'ida' ládxa'a guna' ga tsöjnélica'sili' yugu' lë ni tódi gátia'.

Nupa bila'lé'e yöl-la' zxön queë' Cristo

¹⁶ Bití' bë'lentu' libí'ili' tu didza' ridasö lu yöl-la' sina' queëtu', cate' buzéajni'itu' libí'ili' ca ral-la' idxín dza huödë' Xanru' Jesucristo, napë' yöl-la' unná bë' zxön. Netu' bilé'e quézitu' yöl-la' zxön queë'. ¹⁷ Bilé'etu' Lë' cate' Xúziru' Dios benë' Lë' bal, en bë'ë Lë' yöl-la' zxön, ate' biyón chi'ë Dios, le birúaj lataj bení' queë', cate' gunnë': "Bönni' ni náquië' Zxi'ina'. Nadxi'do'oli' Lë', en raza ládxa'a Lë'." ¹⁸ Netu' biyón quézitu' chi'ë na' le birúaj yehua' yubá cate' ni' guzóalentu'-në' Xanru' lu guí'a lá'ayi na'.

¹⁹ Lë na' guca, naca bë'da' zeaj nácatë didza' gulu'ë yugu' bönni' uláz queë' Dios, ate' ral-la' güí'i ládxi'li' didza' na', tu' naca ca tu guí' ruzení' tu ga naca chul-la ga idxintë dza uzení' lu icja ládxi'do'oli' Nu na' naca ca bôlaj hui sila queëru'. ²⁰ Lë ni runda' bayudxi tséajni'ili': Cuntu nu bönni', rácasö queë' bití' gaca tséajni'inë' didza' bë'ë tu bönni' uláz queë' Dios. ²¹ Yugu' didza' gulu'ë yugu' bönni' uláz queë' Dios bití' ca' gulu'ë tu' gulë'ëni quézinë', pero gulu'ë didza' uláz queë' Dios le guchízië' Dios Bö' Lá'ayi icja ládxi'do'gaquië'.

2

Ca nácagaca nupa tu'sédinë' le cabí nácatë

¹ Yugu' bönni' ta'zì' yë'ë gula'cuá'lenë' bönachi Israel, en gula'nnë' nácagaquië' bönni' tu'ë didza' uláz queë' Dios. Lësca' caní yugu' bönni' ila'zì' yë'ë ila'cuá'lenë' libí'ili', en ulu'sédinë' libí'ili' le cabí nácatë. Lu yöl-la' sina' quégaquië' ulu'sédinë' libí'ili' xibá quégacase' le gun ga soa bönadxi queéli' ucá'anali' le naca idütë li. Ila'dá'baguë'ë ca' Xanru', Nu busölá rë'u. Le ilunë' gun ga usunítie' Dios légaquië'. ² Zianli' libí'ili' gunli' légaquië' tsözxön le lu ruá' dö' ilunë', ate' tu' gunli' bál-lali' caní ila'nnë' xihui' bönachi que didza' dxi'a le naca idütë li. ³ Lu yöl-la' ruhuidi' quégaquië' ulu'sédinë' libí'ili' le cabí nácatë, para gata' quégaquië' dumí queéli'. Chinarugu quégaquië' bönni' ni, ate' naca löza ila'nítie' tsaz.

⁴ Dios biti' buniti lahuë' yugu' gubáz lá'ayi queë' na' gulunë' dul-la', pero gurú'unë' légaquië' lataj chul-la. Nága'gaquië' du guí' ga naca chul-la na', ga na' ta'bóze' dza usiüdxë' Dios légaquië'. ⁵ Lësca' caní, biti' buniti lahuë' bönachi gula'cuá' dza ni'te cate' gusöl-lë'ë nisa guiöj le busuniti yödzólió le beti bönachi nácagaca xihui', pero busölë' Noé lu nisa na', bönni' ni' benë' libán que le naca tsahui'. Dios busölë' ca' ia'gadxi di'a dza queë' Noé na' lu nisa. ⁶ Lësca' caní, Dios guchúguie' quégaca bönachi gula'cuá' yödzö Sodoma, en yödzö Gomorra. Busunítie' léguequi lu guí', ate' bulu'huóáca dö. Le guca quéguequi naca tu le rulu'fi le run gadxi nupa tua' dö'. ⁷ Cate' busunítie' yugu' yödzö na', Dios busölë' Lot, tu bönni' tsahui', lu guí' na'. Bu'ínida' ládxë'ë Lot cate' bilë'enë' le xihui' gulún bönachi tuá' dö' na'. ⁸ Caní guca, tu' guzóalenë' bönni' tsahui' na' léguequi, ate' bilë'enë', en biyönnë' le ruá' dö' na' gulúngaca, ate' tu' gúquië' tsahui' gusëbi ládxë'ë yúgu'të dza ni'a que yugu' le cabí naca tsahui' gulúngaca. ⁹ Caní naca, Xanru' nözínë' usölë' nupa na' tadxi Lë' lu na' nu run ga tsázagaca bönachi nöza dul-la', pero nucözë' xíguia' gunë' nupa biti' nácagaca tsahui' ga idxinrö dza ichúguie' quéguequi ila'niti tsaz.

¹⁰ Ichúguda'arö quégaquië' bönni' ni tunë' yugu' le ta'zë' ládxë'ë le ruá' dö', en ta'dá'baguie' yöl-la' unná bë' queë' Xanru'. Nácagaquië' rugu ladxí, en zidi ladxí'. Biti' tádxinë' tu'lidza ditjë' gubáz lá'ayi ta'dë' lu bení'. ¹¹ Gubáz lá'ayi na' nápagacatërë' yöl-la' unná bë', en yöl-la' huáca ca yugu' bönni' na', pero gubáz lá'ayi na' biti' tu'huázxjanë' nu ulu'zéguië' didza' lahuë' Xanru'.

¹² Yugu' bönni' ni nácagaquië' ca böa' guixi', biti' bi ta'yéajni'iba', pero náljagacaba' para nu sön légacaba', en guti légacaba'. Ta'nnë' xihuë'ë que le cabí ta'yéajni'inë', ate' ila'nítie' tsaz ca raca quégacaba' böa' guixi' na'. ¹³ Dios ubi'ë quégaquië' le ila'gu'í ila'záquë'ë, tu' bulu'saca' zì'ë bönachi. Téquinë' naca xibágaquië' tu'zì'ë xibë le raca na'a dza. Nácagaquië' ca tu huë' nudzu', en tu le run ditaj cate' ni' tahuë' tsözxön len libí'ili', ate' tu'dzéjanë' tu' ta'zì' yé'enë' libí'ili'.

¹⁴ Lu yöl-la' rizë ladxí' quégaquië' le ruá' dö' tu'yüé'-nu yugu' nigula. Biti' nacu'ë dxiö tünngaquië' dul-la'. Túngaquië' ga ta'chixi ta'nigui nupa biti' nácagaca tsutsu ca ta'yéajlë' Cristo. Ta'guilática'së' yugu' le tu'huídi'në'. Dios chinuchúguie' quégaquië' ilátigaquië'. ¹⁵ Bulu'cá'anë' le naca idütë li, ate' nachul-la nanítigaquië'. Tunë' ca benë' Balaam, xzí'inë' Beor, bönni' ni' bidxi'inë' dumí, ate' benë' le ruá' dö' tu' nazxjë'. ¹⁶ Dios buzenë' le bach Balaam na' tu' benë' le ruá' dö' na'. Tuba' búrrodo' bë'lenba' lë' didza' ca na' tu'í didza' bönachi, ate' buzága'ba' xinözë' Balaam ga na' sa'yéajë' lu yöl-la' ridá'baga' queë'.

¹⁷ Nácagaquië' bönni' ni ca tu buduá' chibu'í nisa que, enca' ca tu böaj le richë' bö' budunu'. Chinabá'a xilátjagaquië' lataj chul-la. ¹⁸ Caní nácagaquië' tu' tu'ë didza' yugu' le xzön lu yöl-la' biti' bi nözi quégaquië', en tu'gunë' dxin yugu' le ta'zë' ládxí'gaca bönachi le ruá' dö', en tunë' ga ta'chixi ta'nigui nupa si' bulu'lá ladaj nupa nácagaca chul-la niti. ¹⁹ Të' bönachi ila'deli' yöl-la' rusölá, pero légaca cazë' nadzúnagaquië', en tunë' bayudxi le ruá' dö'. Nadzúnagaquië' yúgu'të bönni' lu na' bi rinná be'e icja ládxí'do'gaquië'. ²⁰ Channö bulu'lë' lu le cabí naca tsahui' nacuá' yödzólió ni tu' gulúnbë'ë Xanru' Jesucristo, Nu rusölá rë'u, ate' ní'irö ta'röli le cabí naca tsahui' na' légaquië' leyúbölo, en ta'nná be'e légaquië', le nácatë nabága'gacatërë' xíguia' ga röjsetë ca le gula'báguë'ë zí'aló. ²¹ Dxi'arö gaca quégaquië' la'tu' catu caz ilúnbë'ë Nu ruzóa rë'u nöza tsahui' ca le gaca quégaquië' channö gulúnbë'ë Lë', ate' ní'irö bulu'cá'anë' xibá lá'ayi bë'ë Dios quégaquië'. ²² Chibudxin quégaquië' didza' na' rnna: Ruhuécjaba' bö'cu', ruhuóáguba' le si' gúbaba'. Ruyázaba' cuchi na' si' gudíbiru'-ba' lu guna'.

3

Naca löza huödë' Xanru'

¹ Didza' ni naca le buropi ruzúaja' queéli' lu guichi, böchi' luzá'ado'. Lu irópatë guichi na' rui'í ládxá'a usubana' ládxí'li' ca nácagaca lë ni. ² Guli'tsöjné yugu' didza' gulu'ë bönni' queë' Dios zí'atëlö, ca gulu'ë didza' uláz queë'. Guli'tsöjné ca' xibá na' Xanru', Nu rusölá rë'u, gunná bé'enë' rë'u, lë na' bulu'sédinë' bönni' gubáz nasöl-lë'ë Lë' libí'ili'.

³Ral-la' tsöjnéli' lè ni naca lo. Dza tsöjsétëgaca ulu'lu'í lahué' bönni' iluné' le ta'zë ládxi'è le ruá' dö'. ⁴Ulu'titjè, ila'nné': "¿Gazxi caz lè na' guzxi' lu në'è Cristo? Gunné': Huöda' leyúbölo. Dza ni'te cate' gulátiè' xuz xtó'oru', yúgu'tè raca tuz ca guca cate' gusí lo rata' yödzölió ga ridxin'tè na'a dza." ⁵Tu'zöé' tsólá'aló le guca dza ni'te. Bè'è didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láhui'ló nisa. ⁶Len nisa ca' busunítie' Dios yödzölió dza ni'te cate' ni' gusól-lè'è nisa guió'j le beti yugu' bönachi dul-la'. ⁷Lúzxiba, en yödzölió ni le nacua' na'a dza, Dios nucu'è léguequi ga idxinrö dza usunítie' léguequi lu guí'. Caní gaca tu' gunné' caní Dios caz. Uzégui'è léguequi dza ni' ichúguiè' quégaca bönachi biti' nácgaca tsahui' gátigaca.

⁸Biti' gal-la ládxi'li' lè ni, böchi' luzá'ado'. Tu dza naca queé' Xanru' ca zían gayuá' iz, ate' zían gayuá' iz nácgaca queé' ca tu dza. ⁹Biti' ridzené' Xanru' guné' le guzxi' lu në'è guné'. Téquiguequi bal-la bönachi ridzené', pero ribözè' zxön ladxi', en ruá' rilené' rë'u tu' cabí rë'ëné' initi nitú bönachi, pero rë'ëné' ulu'bí'i ládxi'gaca yúgu'tè bönachi.

¹⁰Tsálido'os idxin dza huödè' Xanru' ca ridxiné' tu bönni' gubán chi'i dzó'öló. Lu dza na' huadödi que lúzxiba len tu bö zxön. Ila'niti yúgu'tè le nacua' lu guí' zxön. Ila'yegui yödzölió ni, en le nacua' yödzölió ni.

¹¹Channó caní gaca, ila'niti yúgu'tè lè ni, ¿bizxi caz ral-la' gunli'? Ral-la' gácali' ba'a ladxi', en udödi cuinli' lu në'è Dios. ¹²Ral-la' cözali' dza huödè' Xanru', en gü'i ládxi'li' gunli' ga idxinrö bayón dza ni' cate' initi lúzxiba, ate' ila'niti yúgu'tè le nacua' ni lu guí'. ¹³Caní gaca, pero rë'u ribözaru' le guzxi' lu në'è Dios. Guné' tu lúzxiba cubi, en tu luyú cubi ga ni' soa le naca tsahui'.

¹⁴Que lè ni na', böchi' luzá'ado', tsanni ni ribözali' yugu' lè ni, guli' güi' ládxi'li' gácali' idú tsahui' lahué' Dios, ate' gunli' ga cuntú nu bi gaca inné' queéli', en cözali' dxí'ado' cate' idxinrö dza ni'. ¹⁵Ral-la' inözili' ribözè' Dios zxön ladxi' para gata' quégaca bönachi lataj ulu'lágaca, ca na' gunné' ca' böchi'ru' Pablo. Buzúajé' queéli' lu guichi, zóalen lè' yöl-la' réajni' na' bé'è Xanru' queé'. ¹⁶Yúgu'tè lu guichi ruzúajé', ru'è didza' ca nácgaca lè ni, sal-la' nútsa'gaca ca' léguequi yugu' didza' nácgaca böniga tséajni'iru'. Yugu' didza' caní tu'chixiné' bönni' biti' nözguequiné', en bönni' biti' naca idú ládxi'gaquié'. Lësca' caní tuné' quégaca ia'bal-la didza' nazúajgaca lu guichi lá'ayi, le gun ga usunítie' Dios légaquié'.

¹⁷Chinóz quézili' lè ni, böchi' luzá'ado'. Que lè ni na' guli'gún chi'i cuinli', para cabí ila'zí' ye'e bönachi biti' nácgaca tsahui' libí'ili', en para cabí ilún ga tseaj bö' icja ládxi'do'oli' ca réajlè'èli' Cristo. ¹⁸Guli' güi' ládxi'li' gácaró idú ca núnbè'èli'-nè' Xanru' Jesucristo, Nu rusóla rë'u, ate' ruzí'ili' xibé'. Yöl-la' ba Lè' na'a dza, en yúgu'tè dza zá'gaca! ¡Ca' gaca!

DÍDZA'DO' ZÍ'ALÖ BUZÚAJĚ' JUAN

Didza' nabániru'

¹ Rusiyöntu' libí'ili' ca naca queë' Bönni' na' zoa cazë' dza ni'te, le biyöñitu' bë'ë didza', en le bilé'etu' ca naca queë', en le buyutu' benë' Bönni' na'. Gudantu' Lë'. Bönni' ni náquië' Jesús, lë' ca' Didza' Nabánigaca Bönachi. ² Bönni' na' nabánigaca bönachi buluí' lahuë', ate' bilé'etu' Lë'. Runtu' ba nali' queë', en rulu'itu' libí'ili' ca naca queë' Bönni' na' nabániru'. Bönni' ni guzóalenë' Dios Xuz, en chibudulu' i lahuë' ga zóaru'. ³ Le bilé'etu', en le biyöñitu' rusiyöntu' libí'ili' para gácali' ca' libí'ili' tuz len netu'. Le nácatë naca yöl-la' tuz queëru' len Dios Xuz, enca' len Jesucristo Zxí'inë' Dios. ⁴ Ruzúajtu' queëli' lu guichi lë ni para gaca udzëjaru' idú ládxi'ru'.

Dios náquië' beni'

⁵ Lë ni naca didza' biyöñitu' bë'lenë' Jesús netu', ate' le rusiyöntu' libí'ili'. Caní rna: Dios náquië' beni', ate' nitú le naca chul-la que dul-la' biti' zóalen Lë'. ⁶ Channö innaru': "Nácaru' tuz len Dios", pero channö runru' le naca chul-la que dul-la', lë ni naca bë' rizi' yë'ëru', en biti' runru' le naca idütë li. ⁷ Na'a, channö runru' le naca tsahui', en ridaru' lu beni' ca na' Lë' náquië' tsahui', en zoë' lu beni', nácaru' tuz turu' len ia'turu', ate' xichönë' Jesucristo, Zxí'inë' Dios ruún rë'u dxi'a', en rugúa yúgu'të dul-la' nabága'ru'.

⁸ Channö runru': "Biti' bi dul-la' runru'", rizi' yë'ëru' la' cuínsiru', en biti' nazí' lu ná'aru' le naca idütë li. ⁹ Channö ixóalëpiru' lahuë' Dios dul-la' nabága'ru', Lë' runë' ca rnnë', en náquië' tsahui'. Uniti lahuë' dul-la' nabága'ru', en únë' rë'u tsahui', ugúë' yúgu'të le ruá' dö' dzaga rë'u. ¹⁰ Channö innaru': "Biti' bi dul-la' nabága'ru'", naca ca innaru': "Dios rizi' yë'ë", ate' biti' runru' ca rna xtídzë'ë.

2

Cristo náquië' Nu rudödi xtídzaru' lahuë' Dios

¹ Libí'ili', zxi'ina'do', ruzúaja' queëli' lu guichi lë ni, para cabi gunli' dul-la'. Na'a, channö nútí'tës nu gun dul-la', zoa nu rudödi xtídzaru' lahuë' Dios Xuz, Lë' Jesucristo, Nu naca tsahui'. ² Naca cazë' Bönni' budödi cuinë', en gútië' para bugúë' dul-la' nabága'ru' lahuë' Dios. Calégasó gútië' para bugúë' dul-la' nabága'ru' rë'u, pero gútië' ca' para bugúë' dul-la' nabága'gaca bönachi idütë yödölió.

³ Channö runru' ca naca le gunná bé'enë' rë'u, nöziru' chinúnbë'ëru' Lë'. ⁴ Nu rna: "Neda' núnbë'a-në' Dios" pero biti' run ca rinná bé' xibá queë', nu ni rizi' yë', en biti' run le naca idütë li. ⁵ Nu run ca rna xtídzë'ë Dios, le nácatë nadxi'i nu ni Dios ca ral-la' gun. Channö runru' caní, nöziru' néquiru' queë' Dios. ⁶ Lësca' caní, nu rna: "Neda' néquida' queë' Cristo", ral-la' gaca nu na' ca na' gúquië' Cristo cate' gudë' yödölió ni.

Tu xibá cubi

⁷ Böchi' luzá'ado', ruzúaja' queëli' lu guichi xibá ni. Biti' naca tu xibá cubi, pero xibá gula na', le zóalen libí'ili' dza ni'te. Xibá gula na' naca didza' biyöñili' dza ni'te. ⁸ Lësca' naca ca ruzúaja' queëli' lu guichi tu xibá cubi, lë na' le nácatë benë' Jesús ca rna, ate' runli' ca' libí'ili' ca rna, tu' chiriódödi que le naca chul-la que dul-la', ate' beni' idú chiruzeni'.

⁹ Nu rna: "Zoa' lu beni'", pero biti' rilé'e dxi'a böchi' luzë'e, nu ni ni run le naca chul-la que dul-la'. ¹⁰ Nu nadxi'i böchi' luzë'e zoa lu beni', ate' le run ga nu ichixi inigui biti' zóalen nu na'. ¹¹ Le naca chul-la que dul-la' run ga nu biti' rilé'e dxi'a böchi' luzë'e, en ga ridá nu na' ga chul-la. Biti' nözi ga zeaj, tu' run le naca chul-la' ga nachul-la naniti nu na'.

¹² Ruzúaja' queëli' lu guichi, zxi'ina'do', tu' chibuniti lahuë' Dios dul-la' nabága'li', tu' runë' le guxzí' lu në'ë gunë'. ¹³ Ruzúaja' queëli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Ruzúaja' queëli' lu guichi, bi'i ra'bán, tu' chibucúl-lali' tu' xihui'.

¹⁴ Chibuzúaja' queëli' lu guichi, zxi'ina'do', tu' núnbë'ëli'-në' Dios Xuz. Chibuzúaja' queëli' lu guichi, libí'ili' nácali' xuz, tu' núnbë'ëli' Nu na' zoa caz dza ni'te. Chibuzúaja' queëli' lu guichi, bi'i ra'bán, tu' nácali' bi'i nál-la, en nazí' lu ná'ali' xtídzë'ë Dios, en chibucúl-lali' tu' xihui'.

¹⁵ Biti' idxi'isili' yödölió ni, en calëga le dë yödölió ni. Channö zoa nu nadxi'i yödölió, biti' nadxi'i Dios Xuz. ¹⁶ Caní naca, tu' naca le tun bönachi yödölió ni le cabi rë'enë' Dios Xuz, pero naca le të'ëni bönachi yödölió ni.

Tunë' le riyaza ladxi' yöl-la' bönáchisó quégaquië'.

Tunë' le ruá' dö' le ridani guiój lógaquië'.

Tun ba zxon' cuíngaquië' ni'a que le dë quégaquië'.

Caní nácacaga le ruá' dó' tuné'. ¹⁷ Huadódi que yódzólió ni, enca' que le ta'zè ládxi'gaca bônachi, pero nu run ca rē'ēnē' Dios sóatica'sō.

Nu ru'í didza' iduté li, en nu rizí' yē'

¹⁸ Zxí'ina'do', chizóaru' dza údxi, en ca na' chibiyónili' huidē' bōnni' ridá'baguē'ē Cristo, lē'sca' na'a chigusí lo nacu'ē zían bōnni' ta'dá'baguē'ē Cristo. Que lē ni na' nōziru' chizóaru' dza údxi. ¹⁹ Bila'rúajē' bōnni' caní ládjaru', pero bití' guláquiē' tuz len rē'u. La'tu' guláquiē' tuz len rē'u, ila'cuá'lentica'sē' rē'u. Na'a, bila'rúajē' para gaca bē' bití' nácacaguē' yúgu'tē' tuz len rē'u.

²⁰ Na'a, Bō' Lá'ayi nagú'u Nu naca lá'ayi rē'u, chizóalen libí'ili', ate' nōz quezili' yúgu'tē'. ²¹ Buzúaja' queéli' lu guichi, tu' chinózili' le naca iduté li, en calēga tu' cabí nōzili' le. Nōzili' ca' bití' ca' rizí' yē' nu nōzi le naca iduté li.

²² ¿Nuzki caz na' nu rizí' yē'? ¿Naru' cabí naca nu na' ridá'bagu' náquiē' Jesús Nu gusól-lē'ē Dios? Naca nu ni bōnni' ridá'baguē'ē Cristo, tu' ridá'baguē'ē náquiē' Dios Xuzē' Jesús, en ridá'baguē'ē ca' náquiē' Jesús Zxí'inē' Dios. ²³ Núti'tēs nu ridá'bagu' Dios Zxí'ini, bití' ca' zóalenē' Dios Xuz nu na'. Núti'tēs nu rna yálajdo' Jesús náquiē' Zxí'inē' Dios, lē'sca' zóalenē' Dios Xuz nu na'.

²⁴ Na'a, guli'gú' lataj le biyónili' dza ni'te ugá'analentica'sō libí'ili'. Channō le biyónili' dza ni'te ugá'analentica'sō libí'ili', lē'sca' libí'ili' ugá'analentica'sili'-nē' Dios Zxí'ini, enca' len Dios Xuz. ²⁵ Le guzxi' lu nē'ē Dios naca lē ni: Gunnē' gunnē' yōl-la' na'bán idú queéru'.

²⁶ Chibuzúaja' queéli' lu guichi lē ni ca naca quegaca nupa ta'z' ye'e libí'ili'. ²⁷ Na'a, zóalenē' Dios Bō' Lá'ayi libí'ili'. Cristo gusól-lē'ē Lē' queéli', ate' Lē' cazē' zóalentica'sē' libí'ili'. Que lē ni na' bití' ríquimili' nu usedi libí'ili', tu' chizóalen Nu na' libí'ili', en rusedi libí'ili'. Didza' iduté li ru'ē Lē', en bití' rizí' yē'ē. Ca na' chinazédali', guli'sóalentica'sē' Cristo.

²⁸ Na'a, zxí'ina'do', guli'sóalentica'sē' Cristo para cate' uluí' lahuē' Lē', gácaru' rugu ladxí', en bití' utuí'iru' sóaru' lahuē' Lē' cate' huódē'. ²⁹ Channō nōzili' náquiē' Dios tsahui', ral-la' inózili' ca' yúgu'tē' nupa tun le naca tsahui' nácacaga zxí'inē' Dios.

3

Nupa nácacaga zxí'inē' Dios

¹ Buli'yú ca nadxí'ide'enē' Dios Xuz rē'u, benē' ga nazí'ilaru' zxí'inē' Dios caz. Que lē ni na' bōnachi yódzólió ni bití' ca' núnbē'gaca le nácaru', tu' cabí gulúnbe'e Jesús. ² Bōchi' luzá'ado', na'a chinácaru' zxí'inē' Dios, en bití' naca bé'eni le ral-la' gácaru'. Nōziru' cate' uluí' lahuē' Jesús, gácaru' ca náquiē' Lē', ate' ilé'eru'-nē' catēz náquiē' Lē'. ³ Núti'tēs nu run lōza gaca ca náquiē' Jesús, ru'í ladxí' nu na' gaca dxi'a ca na' náquiē' Jesús dxi'a.

⁴ Núti'tēs nu run dul-la' riguitsaj xibá queē' Dios, tu' naca dul-la' le riguitsaj xibá. ⁵ Nōzili' buluí' lahuē' Jesús para bugúē' dul-la' nabága'ru', en bití' bi dul-la' runē' Lē'. ⁶ Núti'tēs nu dzaga Lē' bití' run dul-la'. Núti'tēs nu run dul-la' catu caz bilé'e Jesús, en bití' núnbe'e Lē'. ⁷ Zxí'ina'do', guli'gún chi' cuinli' para cabí nu si' ye'e libí'ili'. Nu run le naca tsahui', naca tsahui' nu na' ca na' náquiē' Jesús tsahui'. ⁸ Nu rúntica'sō dul-la' nequi que tu' xihui', tu' run dul-la' tu' xihui' dza ni'te. Que lē ni na' budulu'í lahuē' Zxí'inē' Dios, para usunítiē' yugu' le nun tu' xihui'.

⁹ Núti'tēs nu naca zxí'inē' Dios bití' rúntica'sō dul-la', tu' zóalentica'sō le guzxi' lu nē'ē Dios Xuz nu na'. ¹⁰ Caní naca bē' nupa nácacaga zxí'inē' Dios, en nupa nácacaga zxí'ini tu' xihui'. Núti'tēs nu bití' run le naca tsahui', en bití' nadxí'í bōchi' luzé'e bití' nequi queē' Dios.

Ral-la' idxí'iru' yugu' bōchi'ru' ta'yéajlē'ē Cristo

¹¹ Lē ni naca didza' biyónili' dza ni'te, le rna: Ral-la' idxí'iru' luzá'aru' turu' ia'turu'. ¹² Bití' ral-la' gunru' ca na' benē' Cain. Gúquiē' Cain que tu' xihui', ate' bētiē'-bi' bi'í bōchē'ē. ¿Bizx que bētiē'-bi' bi'í bōchē'ē? Bētiē'-bi' tu' gulaca le benē' Cain na' le ruá' dó', pero le benbi' bi'í bōchē'ē, gulaca tsahui'.

¹³ Bōcha'ado', bití' ubánili' channō cabí ta'lé'e bōnachi yódzólió ni libí'ili' dxi'a. ¹⁴ Nōziru' chigudódiru' lu yōl-la' guti, en chidē' yōl-la' na'bán idú queéru' tu' nadxí'iru' yugu' bōchi'ru'. Nu bití' nadxí'í bōchi' luzé'e, chinatí caz nu na'. ¹⁵ Núti'tēs nu bití' rilé'e dxi'a bōchi' luzé'e, naca huēti bōnachi nu na', ate' nōzili' nu rutí bōnachi bití' dē' yōl-la' na'bán idú que. ¹⁶ Caní núnbē'iru' yōl-la' nadxí'í le naca idú. Naca ca budódē' Jesús yōl-la' na'bán queē', en gútiē' uláz queéru'. Lē'sca' caní rē'u le ral-la' udódiru' yōl-la' na'bán queéru', para gácalenru' yugu' bōchi'ru'. ¹⁷ Na'a, núti'tēs nu dē' yōl-la' tsahui' que, lē na' dē' yódzólió ni, ate' rilé'e bōchi' luzé'e, bi riyadzaj queē', en bití' ruhuéchi' ladxí' lē', bi unódzaj queē', ¿naru' nadxí'ítsō nu na' Dios? ¹⁸ Libí'ili', zxí'ina'do', ral-la' idxí'iru' luzá'aru', calēga len dídza'sō o lu yōl-la' rinnēsō queéru', pero idú ládxi'ru', enca' len iduté yōl-la' run queéru' ral-la' idxí'iru' luzá'aru'.

Le runru' lōza lahuē' Dios

¹⁹⁻²⁰ Channö caní nadxí'iru' yugu' böchi' luzá'aru', nöziru' néquiru' que Nu na' naca iduté li, ate' lahué' Dios huáca có' dxi icja ládxi'do'oru' channö ruxösa ládxi'do'oru' rë'u, tu' rácada'arë' Dios ca ládxi'do'oru', ate' Lë' nözinë' yúgu'të. ²¹ Böchi' luzá'ado', channö cabí ruxösa ládxi'do'oru' rë'u, dë le runru' löza lahué' Dios ²² tu' nöziru' gunnë' queëru' bititës bi inábaru' lahué'. Caní naca, tu' runru' ca rinná bë' xibá queë, en le raza ládxë'ë Lë'. ²³ Lë ni naca xibá queë', para tséajlë'ëru'-në' Jesucristo, Zxf'inë' Dios, en idxí'iru' luzá'aru' ca na' chigunná bé'enë' rë'u. ²⁴ Zóalen Dios nu run ca rinná bë' xibá queë', ate' Dios caz zóalenë' nu na'. Caní nöziru' dzágatica'së' Lë' rë'u, tu' chigusól-lë'ë Dios Bô' Lá'ayi queëru'.

4

Le naca bë' zóalenë' Dios Bô' Lá'ayi rë'u

¹ Böchi' luzá'ado', bitit' tséajlë'ëli' nútítës bönni' rnnë' zóalenë' Dios Bô' Lá'ayi lë', pero guli'sí' bë' bönni' na', channö zóalenë' Dios Bô' Lá'ayi lë', tu' ta'dë' zían bönni' ta'z'í' yë'ë yödžolió ni. Ta'nnë' tu'ë' didza' uláz queë' Dios. ² Caní gúnbë'ëli'-në' nu bönni' zóalenë' Dios Bô' Lá'ayilë'. Nequi queë' Dios bönni' na' rnnë' yálajdo' ca bidë' Jesucristo, Nu gusól-lë'ë Dios, rnnë' guca cazë' bönachi. ³ Lësca' caní, bitit' nequi queë' Dios nu bönni' bitit' rnnë' yalaj lulu ca bidë' Jesucristo, rnnë' bitit' guca cazë' bönachi. Bönni' ni néquinë' que nu na' ridá' бага' Cristo, bönni' na' chibiyónili' ral-la' guidë', ate' na'a chiridë' yödžolió ni.

⁴ Zxf'ina'do', néquili' queë' Dios, en chibucúl-lali' nupa na' ta'z'í' yë', tu' náparö Nu na' zóalen libí'ili' yöl-la' huáca unná bë' ca nu na' ridá' yödžolió ni. ⁵ Légaquie' nácaquie' bönachi yödžolió. Que lë ni na' tu'ë' didza' que le naca que yödžolió, ate' bönachi yödžolió ni tu'zë' nága gaca légaquie'. ⁶ Néquiru' rë'u queë' Dios. Nu nunbë' Dios ruzë' nagui rë'u. Nu bitit' nequi queë' Dios bitit' ruzë' nagui rë'u. Caní núnbë'ëru' nu na' yu'u le Bô' ru'í' didza' le naca iduté li, enca' nu na' yu'u le tu' bô' rizí' yë'.

Náljalén Dios yöl-la' nadxí'i

⁷ Böchi' luzá'ado', ral-la' idxí'iru' luzá'aru', tu' náljalén Dios yöl-la' nadxí'i, ate' nútítës nu nadxí'i luzë' e náljalén ca' Dios, en núnbë' e Dios. ⁸ Nu bitit' nadxí'i luzë' e, bitit' núnbë' e Dios, tu' náljalén Dios yöl-la' nadxí'i. ⁹ Caní bulu' e lahui Dios ca nadxí'inë' rë'u, gusól-lë'ë la's dui Zxf'ini cazë' yödžolió ni, para gata' yöl-la' na' bán idú queëru' ni'a queë' Lë'. ¹⁰ Caní naca bë' yöl-la' nadxí'i idú, calëga ca nadxí'iru'-në' Dios, pero ca na' Lë' bidxí'inë' rë'u, en gusól-lë'ë Zxf'ini cazë' para gútië', en caní bugúë' dul-la' nabágaru'.

¹¹ Böchi' luzá'ado', channö caní bidxí'ide'enë' Dios rë'u, lësca' rë'u ral-la' idxí'iru' luzá'aru'. ¹² Catu caz nu bilé' e Dios, pero channö nadxí'iru' luzá'aru', Dios zóalenë' rë'u, ate' naca bë' nadxí'iru'-në' Dios idú ládxi'ru'. ¹³ Nöziru' zóalenru'-në' Dios, ate' Lë' zóalenë' rë'u, tu' guchizië' Dios Bô' Lá'ayi rë'u. ¹⁴ Netu' bilé'etu' le benë' Dios Xuz, en runtu' ba nalí que. Lë' gusól-lë'ë Zxf'ini cazë' Nu rusólá bönachi yödžolió. ¹⁵ Nu bönni' rnnë' yálajdo' náquie' Jesús Zxf'inë' Dios, Dios zóalen cazë' bönni' na', ate' lë' zóalenë' Dios.

¹⁶ Rë'u ni nöziru', en réajlë'ëru' nadxí'inë' Dios rë'u. Yöl-la' nadxí'i náljalén Dios, ate' nu bönni' nadxí'inë' luzë'ë, zóalenë' bönni' na' Dios, ate' Dios zóalenë' lë'. ¹⁷ Caní run dxin yöl-la' nadxí'i lu icja ládxi'do'oru', run ga bitit' rō rādxiru' dza ichúguie' Dios quégaca bönachi ilátigaca. Ca náquie' Jesús, nácaru' ca' rë'u yödžolió ni. ¹⁸ Channö nadxí'iru'-në' Dios, bitit' bi gádxiru'. Cate' nadxí'iru'-në' Dios idú ládxi'ru', runë' ga bitit' rādxiru'. Nu radxi, riguí' rizáca'a. Nu na' radxi, bitit' nadxí'i Dios idú ladxi'.

¹⁹ Rë'u ni nadxí'iru'-në' Dios, tu' z'í' alō bidxí'i quézinë' Lë' rë'u. ²⁰ Channö nu inná: "Neda' nadxí'ida'-në' Dios", pero bitit' rilé' e dxi' a böchi' luzë' e, nu ni rizí' yë'. Nu bitit' nadxí'i böchi' luzë' e nu rilé' e caz, ¿nacxi' caz gaca idxí'i Dios, en catu caz bilé' e Lë'? ²¹ Caní gunná bé'enë' Jesús rë'u. Gunnë': Nu nadxí'i Dios, ral-la' idxí'i ca' böchi' luzë' e.

5

Ca gaca idéli'ru' lu le raca queëru' yödžolió ni

¹ Nútítës bönni' réajlë'ë Jesús náquie' Cristo, náquie' zxf'inë' Dios, ate' nútítës bönni' nadxí'inë' Dios Nu buzóa lë', ral-la' idxí'inë' ca' luzë'ë nu naca bi'i queë' Dios. ² Caní réquibe'ëru' nadxí'iru' yugu' bi'i queë' Dios. Naca caní channö nadxí'iru'-në' Dios, en runru' ca rinná bé'enë' rë'u. ³ Caní naca bë' nadxí'iru'-në' Dios. Naca caní channö runru' ca rinná bé'enë' rë'u, ate' lë na' rinná bé'enë' rë'u bitit' naca böniga. ⁴ Nútítës bönni' náquie' bi'i queë' Dios ridéli'në' lu le raca yödžolió ni. Chibidéli'ru' lu le raca yödžolió tu' réajlë'ëru'-në' Dios. ⁵ ¿Nuzxi na' rideli' lu le raca yödžolió? Run caní nu réajlë' náquie' Jesús Zxf'inë' Dios.

Dios Bô' Lá'ayi runë' ba nalí queë' Cristo

⁶ Caní blë'ë Jesucristo. Bidë' bidilë' nisa, en bulaljë' xichönë'. Calégasö bidilë' nisa, pero lësca' bulaljë' xichönë'. Dios Bô' Lá'ayi náquie' Nu run ba nalí queë', tu' naca iduté li didza'

ru'ë Dios Bö' Lá'ayi. ⁷ Tsonna nupa tun ba nali queë' Jesús yehua' yubá ni', Dios Xuz, en Dios Zxí'ini, lë' ca' Didza', en Dios Bö' Lá'ayi. Yonnë' ni nácaquië' tuz. ⁸ Lë'sca' caní, tsonna le tun ba nali queë' luyú ni, ca na' zóalenë' Dios Bö' Lá'ayi Lë', en le bidilë' Jesús nisa, en rôn ni' bulaljë' lë'e yaga cruz, ate' yonna ni, tuz ca ta'nná. ⁹ Channö si' lu ná'aru' le tun ba nali bônachi, le runë' ba nali Dios nácatë'rö lesaca'. Lë na' benë' ba nali Dios naca le benë' ba nali queë' Jesús, gunné' náquië' Zxí'ini cazë'. ¹⁰ Nu réajlë' Zxí'inë' Dios, nazí' lu në'e le nunë' ba nali Dios. Nu cabí réajlë' Dios, naca ca rnna nu na': Dios rizí' yë'ë. Caní naca, tu' cabí guyéajlë' le benë' ba nali Dios queë' Zxí'inë'. ¹¹ Lë ni naca le benë' ba nali Dios. Gunnë' chibennë' yöl-la' na'bán idú queëru', ate' Zxí'inë' na' náquië' Nu nabániru' caní. ¹² Nu bönni' zóalenë' Zxí'inë' Dios lë', dë yöl-la' na'bán idú queë'. Nu bönni' bití' zóalenë' Zxí'inë' Dios lë', bití' dë yöl-la' na'bán idú queë'.

Ca nöziru' dë yöl-la' na'bán idú queëru'

¹³ Libí'ili' na' réajlë'ëli'-në' Zxí'inë' Dios, ruzúaja' queëli' lu guichi lë ni para inözili' chidë yöl-la' na'bán idú queëli', en para gaca idú ca réajlë'ëli'-në' Zxí'inë' Dios.

¹⁴ Lë ni naca le ruzxöni ládxi'ru' Lë'. Channö bi inábiru' Lë' ca rë'enë' Lë', Lë' riyönnë' rë'u. ¹⁵ Channö nöziru' riyönnë' rë'u ca naca bi rinábiru' Lë', nöziru' ca' ideli' quéziru' lë na' rinábaru'.

¹⁶ Channö ilë'eru' böchi' luzá'aru' runë' dul-la' le cabí nachë' yöl-la' guti, ral-la' inábaru' queë' lahuë' Dios, ate' Lë' unödzjë' yöl-la' na'bán queë'. Caní rnnia': Ral-la' inábali' quégaca nupa tun dul-la' le cabí nachë' yöl-la' guti. Dë dul-la' le nachë' yöl-la' guti. Bití' rnnia' inábali' que nu run dul-la' caní. ¹⁷ Yúgu'të le cabí naca tsahui' naca dul-la', pero dë dul-la' le cabí nachë' yöl-la' guti. ¹⁸ Nöziru' bití' rúntica'sö dul-la' nu naca zxi'inë' Dios, tu' rapa chi'ë Zxí'ini cazë' Dios nu na', ate' tu' xihui' bití' sequi' bi gun que.

¹⁹ Nöziru' yú'uru' lu në'ë Dios, ate' yúgu'të bônachi tu'í ládxi'gaca le dë yödzöliö ni yú'ugaca lu na' tu' xihui'.

²⁰ Na'a, nöziru' chibidë' Zxí'inë' Dios, en bennë' yöl-la' réajni'i queëru', para gúnbë'ëru' Nu na' naca idútë li. Zóalenru' Nu na' naca idútë li tu' zóalenru'-në' Jesucristo, Zxí'inë' Dios. Nu ni naca Dios idú, en Nu runna yöl-la' na'bán idú queëru'. ²¹ Zxí'ina'do', guli'gún chi'i cuinli' para cabí tseaj ládxi'li' yugu' budó' guió' budó' yaga. ¡Ca' gaca!

DÍDZA'DO' BUROPI BUZÚAJĚ' JUAN

Núnbě'ëru' le naca idútë li, en yöl-la' nadxí'i

¹ Neda', bõnni' gula run chi'a bõnachi queë' Cristo, rugapa' li' Dios, nigula rö queë' Dios, tsõzxõn len yúgu'të zxi'inu'. Nadxi'ida' libí'ili' tu' núnbě'ëru' le naca idútë li, en calégasõ neda', pero lësca' yúgu'të nupa chinúnbě'gaca le naca idútë li ta'dxi'i libí'ili'. ² Nadxi'itu' libí'ili' tu' núnbě'ëru' le naca idútë li, le zóalenta'sõ rë'u. ³ Rinábida'-në' Dios Xuz, en Xanru' Jesucristo, Zxi'ini cazë' Dios, uzá' lãdxë'ë queë'li', en huéchi' lãdxë'ë libí'ili', en gunë' ga soa dxi icja lãdxi'do'oli' tu' núnbě'ëli' le naca idútë li, en nadxi'ili' luzá'ali'.

⁴ Budzëjade'eda' cate' biyõnda' tunbi' zxi'inu' ca naca le naca idútë li, tu' tunbi' ca na' gunná bé'enë' Dios Xuz rë'u. ⁵ Na'a, ráta'yua' lo', nigúlado', gunu' ca rinná bë' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lëbisõ lë na' gunná bé'enë' rë'u dza ni'te. Gunnë' ral-la' idxi'iru' luzá'aru'. ⁶ Caní naca bë' nadxi'iru'-në' Dios. Naca caní channõ runru' ca rnna le gunná bé'enë' rë'u. Lë na' gunná bé'enë' rë'u naca para idxi'iru' luzá'aru' ca na' chibiyõnili' dza ni'te.

Nupa tē'ëni ila'zì ye'e rë'u

⁷ Lë ni rigü'xjöi'ida' libí'ili', tu' chita'dá zían nupa ta'zì yë' yõdzölió ni, nupa na' bitì' ta'zì' lu në'eguequi ca bidë' Jesucristo, gúquië' idú bõnachi. Nu na' run caní, naca nu rizì' yë', en nu ridá'baga' Cristo. ⁸ Guli'gún chi'i cuinli' para cabí initi le nadé'li'li' tu' guzxi' lu na'li' Cristo, pero guli'güi' lãdxi'li' idé'li'li' idútë le ral-la' sí'ili' lu në'ë Dios.

⁹ Núti'tës nu riguela' nõza yúböLö, en rucá'ana xtídzë'ë Cristo, bitì' zóalenë' Dios nu na'. Nu dá'tica'sõ xtídzë'ë Cristo, zóalenë' Dios Xuz, enca' Zxi'inë' nu na'. ¹⁰ Channõ núti'tës nu za' ga zóali', en rusedi xibá yúböLö, bitì' ulëbili' nu na' lídxili', en bitì' guië'li' le: "Guyú'u len netu'." ¹¹ Nu rë le: "Guyú'u len netu'", run tsõzxõn nu na' ca naca le ruá' dö' run nu na'.

Runë' Juan löza idxinë' ga nacu'ë böchi' luzë'ë

¹² Sal-la' le zían ral-la' uzúaja' queë'li' lu guichi, bitì' rë'ënda' uzúaja' yúgu'të lu guichi. Runa' löza guída' ga zóali', ate' güi'iru' didza' ruá'a cuinru', para gaca udzëjaru' idú lãdxi'ru'.

¹³ Zxi'ininu nigula zxilu', nigula rö queë' Dios, tu' gápabi' Dios li'. ¡Ca' gaca!

DÍDZA'DO' BUNNI BUZÚAJĚ' JUAN

Le naca tsahui' runě' bōnni' lě' Gayo

¹ Neda', bōnni' gula run chí'a bōnachi queě' Cristo, rugapa' Dios li', Gayo dxi'i ladxi'. Nadxi'ida' li' tu' núnbě'ěru' le naca idútě li.

² Bōcha'ado', rinábida'-ně' Dios guně' ga gaca dxi'a quiu' lu yúgu'tě le runu', en su' ca' dxi'a, ca na' raca dxi'a que bō' naca cazu'. ³ Rudzėjada' tu' ta'dxině' yugu' bōchi'ru' ga zoa', en tuně' ba nalí quiu', ta'nně' nacu' li ladxi', en runu' ca naca le naca idútě li. ⁴ Biti' bi' dē le runrō ga rudzėjada' ca lě ni, riyōnda' tun nupa nácagaca ca bi' i que caza' ca rna le naca idútě li.

⁵ Bōcha'ado', runu' le naca tsahui', rácalenu' bōchi'ru', en runu' ca' le nácarō lesaca', rácalenu' bōchi'ru' bití' núnbe'enu' légaquiě'. ⁶ Yugu' bōchi'ru' ni tuně' ba nalí quiu' lógaca bōnachi queě' Cristo ni, ta'guíxjō'ě ca na' nadxi'ínu' légaquiě'. Runu' le naca dxi'a, rugú'u légaquiě' nōza, en rácalenu' légaquiě' ca na' sa'yéaj gunu' quégaca nupa tun xichině' Dios, para ulu'ú'ě nōza. ⁷ Légaquiě' bila'ruájě' ni tu' nadxi'ígaquiě' Jesús, en bití' bi' ta'zi'ě lu ná'agaca bōnachi bití' ta'dá' Cristo. ⁸ Que lě ni na' ral-la' gunru' bal bōnachi tun caní, para gúnlenru' légaquiě' dxin que le naca idútě li.

Le cabí naca tsahui' runě' Diótrefes

⁹ Chibuzúaja' lu guichi le uzéajni' i bōnachi queě' Cristo ni', pero Diótrefes, bōnni' ni' raza lădxě'ě gáquiě' lo lădjagaquiě', bití' runě' netu' bal. ¹⁰ Que lě ni na', channō huida' ga zóali', usá'a lădxi'li' cate' udúbili' ca nácagaca le runě'. Rizí' quídzě'ě netu', en rnně' queětu' le cabí nácatě. Bití' rizxōn lădxě'ě tsa lě nisō, pero lěsca' bití' runě' bal bōchi'ru' ta'dxině' ni', ate' ruzáguě'ě xinōzguequi nupa ni' tē'ěni ilún légaquiě' bal, en rubéajě' nupa na' ladaj bōnachi queě' Cristo.

¹¹ Bōcha'ado', bití' gunu' ca tun nupa tua' dō', pero ca tun nupa tun le naca tsahui' gunu'. Nu run le naca tsahui' nequi queě' Dios, pero nu ruá' dō' catu caz benbě' Dios.

Le naca tsahui' runě' Demetrio

¹² Yúgu'tě bōchi'ru' tuně' ba nalí queě' Demetrio, ate' naca bē' runě' le naca idútě li. Lěsca' netu' runtu' ba nalí queě', ate' nōzili' nácatě lě ni runtu' ba nalí queě'.

Le rinabě' Juan lahuě' Dios

¹³ Ziánrō ca' le gú'unida' uzúaja' quiu' lu guichi, pero bití' rě'enda' uzúaja' le lu guíchisō. ¹⁴ Na'a, runa' lōza ilé'eteda' li', ate' guí'iru' didza' ruá'a cuinru'.

¹⁵ Rinábida'-ně' Dios guně' ga soa dxi icja lădxi'do'o. Nupa ni ta'dxi'i rě'u tu'gapa Dios li'. Lěsca' li', bugapa Dios tu tu nupa ni' ta'dxi'i rě'u. ¡Ca' gaca!

DÍDZA 'DO' BUZÚAJĚ' JUDAS

Judas rugapě' Dios nupa nulidzě' Dios

¹ Neda', Judas, tsaz naca' run dxin queě' Jesucristo, en naca' ca' bõchě'ë Jacobo. Rugapa' Dios libí'ili', nulidzě' Dios Xuz libí'ili', en nadxí'ině' libí'ili', en rapa chi'ë libí'ili' tu' nácali' tuz len Jesucristo. ² Ré'ënda' inõzili' ca ruhuéchi'da' ládxě'ë Dios libí'ili', en nadxí'ide'eně' libí'ili', enca' ruzóadě'ë dxi icja ládxí'do'oli'.

Nupa tu'sedi le cabí nácatě

³ Libí'ili', bõchi' luzá'ado', gúcada' ládxa'a uzúaja' queěli' lu guichi ca naca yõl-la' rusólá nadchí'ru', pero run bayudxi uchízia' icja nágalí' para idú ládxí'li' tıl-lalenli' nupa ta'dá'baga' le réajlě'ëru'-ně' Dios, lě na' budödě' Dios tsaz lu ná'agaca nupa néquiguequi quez queě' para ulu'zě didza' que lógaca yúgu'tě bõnachi. ⁴ Caní run bayudxi guna' tu' bagáchi'sõ chigula'yázaleně' bal-lě' bõnni' rě'u, Dios buzõě' quégaquiě' dza ni'te ichúguiě' quégaquiě' ila'nitiě' tsaz. Biti' ta'yéaj ládxí'gaquiě' Dios bõnni' caní. Tu' zoa le ruzá' ládxě'ë Dios queěru', téquině' huáca iluně' le ruá' dõ'. Ta'dá'baguě'ë Xanru' Jesucristo. Tuzě' Lě' rinná bé'eně' rě'u.

⁵ Chinõz quézili' lě ni, pero rě'ënda' usá'a ládxí'li' ca beně' Xanru' Dios. Sal-la' busölě' bõnachi Israel cate' bubéajě' léguequi luyú Egipto, gudõdi ni' busunítie' nupa bitsa'gaca ládjaguequi, en bití' gula'yéajlě' Lě'. ⁶ Lěsca' caní, yugu' gubáz lá'ayi queě' Dios, nupa ni' bití' gulún xichingaquie', pero bulu'cá'aně' xilátjagaquiě', Dios busayjě' légaquiě' tu lataj chul-la. Nága'gaquiě' tsaz ni' ga idxinrõ dza usiúdxě' Dios yõdzõliõ ni'. ⁷ Lěsca' caní guágaca yõdzõ Sodoma, en yõdzõ Gomorra, enca' yugu' yõdzõ dzágagaca léguequi. Ca na' guluně' gubáz lá'ayi na', gula'dá'baguě'ë Dios, lěsca' caní guluně' bõnni' yugu' lu yõdzõ na'. Bulu'dõdi cuíngaquie' para guluně' le ruá' dõ', en le gula'zěsõ ládxí'gaquiě' le tun ga nu rutufi'. Na'a, tu' busaca' zí'ë Dios légaquiě' lu guí' le cabirõ ulu, lě na' guca quégaquiě' naca tu le run gadxi yúgu'těru', para cabí gunru' la' lěbisõ.

⁸ Sal-la' gulaca lě ni, la' canisõ tuně' bõnni' ni, bõnni' rõjácaleně' yěla ta'něně'. Tun dítjaně' idutě' le naca cazě'. Ta'dá'baguě'ë le rinná bé'eně' Dios rě'u, en ta'nně' zí'ë quégaca nupa ta'nná bě' yehua' yubá. ⁹ Miguel caz, gubáz lá'ayi lo, cate' gudí' laleně' tu' xihui' para gaca u'ě idú le naca cazě' Moisés, bití' burúguině' udxie' dõ' tu' xihui' ná, pero gudxě' le: "Xanru' uzeně' li' bach." ¹⁰ Yugu' bõnni' ni ta'nně' zí'ë quégaca le runě' Dios, yugu' le bití' ta'yéajni'ině', ate' yugu' le ta'yéajni'ině' rácasõ quégaquiě' ca na' tunba' bõa' guixi' bití' ta'yéajni'iba', lě ni tu'guně' dxin, en caní tu'dxia dõ' cuíngaquie'.

¹¹ Bica' bayechi' légaquiě' tu' chiguluně' dul-la' ca na' beně' Cain, ate' lu yõl-la' ruhuidi' quégaquiě' chigula'chixi gula'niguině' ca na' guchixi guniguině' Balaam para si'ë dumí, ate' chinarugu quégaquiě' ilátie' ca na' gútie' Coré cate' gudá'baguie' Moisés. ¹² Yugu' bõnni' ni táguleně' tsõzxõn libí'ili' cate' ráguli' yugu' gúii' huagu lu yõl-la' nadxí'i queěli'. Tuně' ga ta'chixi ta'nigui nupa dzágagaca libí'ili', tu' těj' tagu lizě'. Nácagaquiě' ca yugu' bõnni' ral-la' ulu'gágugaquiě'-ba' bõ'cu' zxila', pero la' cuíngacasě' tu'gahuě'. Nácagaquiě' ca bõaj lúzxiba bití' nachě' gaca nisa, ate' ruá' bõ' léguequi ná'alõ ní'ilo. Nácagaquiě' ca' ca yugu' yaga chibidxín dza bi ila'yáca, pero bití' bi ta'bía. Nácagaquiě' ca' ca yugu' yaga chigula'bidxi idú lú, en chinaládzu'gaca. ¹³ Nácagaquiě' ca' ca nísado' cate' riyasa ridxia, ate' ribõ' bidxina' que, lě na' rulufi' ca naca yõl-la' stu' tuně'. Nácagaquiě' ca yugu' bõaj lúzxiba nucá'anagacaba' xinõz'gacaba'. Dios chinuně' quégaquiě' ila'yáziě' tsaz lataj chul-la.

¹⁴ Ca naca quégaquiě' bě'ë ca' didza' Enoc uláz queě' Dios. Enoc na' gúquiě' tu bõnni' gubábaleně' le igadxi cõ' zxi'ini xi'sóě' Adán. Gunně': "Buli'yútsõca, zě'ë Xanru', ate' dzágagaca Lě' zían gayuá' bõnachi néquiguequi quez queě'. ¹⁵ Zě'ë para guně' xíguia' yúgu'tě bõnachi, en ichúguiě' quégaca yúgu'tě nupa tua' dõ' ila'niti tsaz." Caní guně' tu' nõzi yúgu'tě didza' zí' gula'nně' bõnni' dul-la' na' queě' Lě'. ¹⁶ Yugu' bõnni' caní ta'nně' queě', en ta'zí' quidzě'ë, en tuně' ca naca le ta'zěsõ ládxí'gaquiě'. Tu'ě didza' lu yõl-la' run ba zxõn cuíngaquie', en para ulu'zě'ë xiběguequi, tu'ě didza' le ta'gú'u bõnachi yõl-la' zxõn.

Judas rusě'ë ládxí'gaca nupa ta'yéajlě' Cristo

¹⁷ Na'a, bõchi' luzá'ado', guli'tsõjně' yugu' didza' gulu'ë bõnni' gubáz queě' Xanru' Jesucristo dza ni'te. ¹⁸ Yugu' bõnni' na' gulě' libí'ili': "Yugu' dza tsõjsětégaca ulu'lufi' lógaguie' bõnni' ulu'titjě' le naca lá'ayi, en iluně' ca naca le ta'zěsõ ládxí'gaquiě' le ruá' dõ'." ¹⁹ Yugu' bõnni' ni tuně' ga irúajli' choplõ. Tu'ě didza' lu yõl-la' bõnáchisõ quégaquiě', en bití' zóalենě' Dios Bõ' Lá'ayi légaquiě'.

²⁰ Na'a, bõchi' luzá'ado', guli'sõa tsutsu lu yõl-la' réajlě' queěli' Dios le naca idú lá'ayi. Buli'lidzě' Dios, ugunli' dxin yõl-la' huáca queě' Dios Bõ' Lá'ayi. ²¹ Buli'gá'analeně' Dios, Nu

nadxí'i rē'u, en guli'cōza dza ni' ulu'i lahuē' Xanru' Jesucristo, Nu ruhuéchi' ládxi'ē rē'u para gata' yöl-la' na'bán idú queēru'.

²² Guli'gún ga ila'dipa ládxi'gaca nupa raca chopa ládxi'gaca. ²³ Guli'gún ga ulu'lē', le gaca tsca ubéajli' légaquiē' lu guf'. Lu yöl-la' radxi queēli' buli'huéchi' ládxi'li' ia'zica'rō bōnachi. Guli'gún chi'i cuinli', para cabí gunli' tsōzxōn légaquiē', en cabí gútsa'li' le ruá' dō' tunē'.

Le rigú'uru' Dios yöl-la' zxōn

²⁴⁻²⁵ Dios la's dui, Nu nōzi caz yúgu'tē, en Nu busölá rē'u ni'a que le benē' Xanru' Jesucristo, napē' yöl-la' huáca gun chi'ē libí'ili', para cabí ichixi iníguili', en usudxinē' libí'ili' lahuē' Lē' ga zoē' lu bení' idú. Gunē' ga gácali' idú tsahui', en ga udzējade'eli'. ¡Gaca caz queē' Dios yöl-la' ba, en yöl-la' zxōn, en yöl-la' naca lo, en yöl-la' unná bē', na'a dza, en yúgu'tē dza zá gaca! ¡Ca' gaca!

LE BULU'INĒ' DIOS JUAN

Apocalipsis

Le bulu'e lahui Dios ca naca queē' Jesucristo

¹ Lē ni naca le bulu'e lahui Jesucristo, le bē'ē Lē' lataj Dios ulu'inė' yugu' huen dxin queē' ca naca le run bayudxi ilacatē. Jesucristo gusól-lē'ē tuē' gubáz lá'ayi queē', nu na' buzéajni'i neda', Juan, huen dxin queē' Cristo. Gubáz lá'ayi na' bulu'inė' neda' ca naca lē ni. ² Neda', Juan, ruzúaja' lu guichi ni le naca idútē li ca naca yúgu'tē le bilé'eda', en runa' ba nalí que xtdídzē'ē Dios, en que le benē' ba nalí Jesucristo.

³ Bica' ba nu ulaba didza' ni, ate' bica' bágaca nupa ulu'zē nágagaca nu na' ulaba xtdídzē'ē Dios ni, en ilún ca rnna lē ni nazúaj lu guichi, tu' chízóa gaca.

Juan ruzúajē' le uzéajni'i gadxi cō' bōnachi queē' Cristo

⁴ Neda', Juan, ruzúaja' lu guichi didza' ni le uzéajni'i gadxi cō' bōnachi queē' Cristo nacua' luyú Asia. Dios, Bōnni' zoa cazē', en guzóatica'sē', en ral-la' huödē', rinábida'-nē' uzá' ládxē'ē queēli', en gunē' ga cō'ō dxi icja ládxi do'oli', ate' dzágagaca gadxi bō' Lē' nacua' lahuē' Lē' ga ni' rō'ē rinná bē'ē. ⁵ Dzáguiē' ca' Jesucristo Lē'. Jesús ni runē' ca rnnē', en runē' ba nalí queē' Dios. Zí'alō Lē' bubanē' tsaz lu yól-la' guti, en rinná bē'enē' bōnni' ta'nná bē'ē yōdzólíō ni. Lē' nadxí'inė' rē'u, en gudibē' rē'u, tu' bugtūē' dul-la' nabága'ru' len xichónē' le bulaljē' lē'e yaga cruz, cate' gútiē' uláz queēru'. ⁶ Jesucristo benē' ga rinná bē'ēru', en ga nácaru' yugu' bixúz, para cú'uru'-nē' Dios, Xuzē' Jesús, yól-la' ba. ¡Yól-la' ba Lē', en gácatica'sō queē' yól-la' unná bē'! ¡Ca' gaca!

⁷ ¡Buli'yútsōca'! ¡Zē'ē Cristo lu bōaj lúzxiba! ¡ila'lé'e Lē' yúgu'tē bōnachi, enca' nupa ni' gulún Lē' huē', en bētīgaca Lē'! ¡ila'bōdxi yechi' yúgu'tē bōnachi yōdzólíō ni cate' ila'lé'e Lē'! ¡La'tu' gácatē caní! ¡Ca' gaca!

⁸ Caní rnnē' Lē': "Neda' naca' Bōnni' zoē' zí'alō, enca' Bōnni' rōjsétiē' ca naca le risí lo, en le ruúdxité." Caní rnnē' Xanru', Bōnni' napa cazē' yól-la' huáca. ¡Zoa cazē' Lē', en guzóatica'sē', en si' ulē'ē!

Rilē'enē' Juan yól-la' xzōn queē' Jesucristo

⁹ Neda', Juan, naca' bōchi' luzá'ali', en tsōzxōn riguí' rizáca'lena' libí'ili', en tsōzxōn len libí'ili' ruzi'a xibé le rinná bē'ē Dios, en nadéli'da' yól-la' ribōza xzōn ladxi' na' rnnē' Jesucristo queēru'. Nadzuna' tu luyú bidxi ni gatsaj lāhui'lō nísado', nazí'i le Patmos. Nadzuna' tu' bena' libán que xtdídzē'ē Dios, en tu' bena' ba nalí queē' Jesucristo. ¹⁰ Lu dza lá'ayi queē' Xanru', guzóalenē' Dios Bō' Lá'ayi neda', ate' biyōnda' cúdzu'la' chí'ē tu bōnni' rulidzē' zidzaj. Biyōn chí'ē ca ribōdxi lúzuba' bōa' bēdxi. ¹¹ Bōnni' ni gudxē' neda': "Neda' naca' Bōnni' zoē' zí'alō, en Bōnni' rōjsétiē' ca naca le risí lo, en le ruúdxité. Buzúaj lu guichi le riyōnu', en rilē'enu', ate' gusól-la' le quéquequi gadxi cō' bōnachi quia' nacua' luyú Asia, nupa nacua':

Lu yōdzō Éfeso,

lu yōdzō Esmirna,

lu yōdzō Pérgamo,

lu yōdzō Tiatura,

lu yōdzō Sardis,

lu yōdzō Filadelfia,

lu yōdzō Laodicea."

¹² Buécja' para ilé'eda' Bōnni' na' rulidzē' neda'. Cate' buécja', bilé'eda' gadxi le nuá'gaca guí' le néquiquequini oro. ¹³ Ladaj gadxi le nuá'gaca guí' na' bilé'eda' tu Bōnni' rinē'ē ca tu bōnni'. Nácue' tu lari' tunna le ridxín xini'ē, en luchu'ē nasíē' tu le néquini oro. ¹⁴ Chiguíchido'os naca guitsa' icjē' ca naca xzila' o ca riná' bōgui', ate' rēpi yōsa bení' guiōj lahuē' ca guí'. ¹⁵ Rēpi yōsa bení' ni'ē ca guíē' bronce dxílido', le nudzē'eda' lu guí' ca bo' yalaj. Zidzaj biyōn chí'ē ca riyón tu yegu xzōn. ¹⁶ Lu nē'ē ibēla xzōagacaba' gadxi bōlaj bení', ate' rirúaj didza' ru'ē le naca ca tu guíē' tuchi' natuchi' iropa la'a. Rēpi yōsa bení' lahuē' ca gubidza cate' rudzá'a.

¹⁷ Cate' bilé'eda' Lē' gudzō'a xini'ē ca tu bōnni' nati. Ní'irō Lē' guxóa nē'ē neda' len nē'ē ibēla, en gudxē' neda': "Biti' gádxinu'. Neda' naca' Bōnni' zoē' zí'alō, en rōjsétiē'." ¹⁸ Naca' Nu nabán caz. Gútia', ate' na'a zóatic'a'sa' nabana'. Dē lu na'a inná bē'eda' yól-la' guti, en lataj ga nacua' nupa nátīgaca. ¹⁹ Buzúaj lu guichi lē na' chibilé'enu', en le raca na'a, enca' le ral-la' gaca tōdi na'a. ²⁰ Lē ni naca le nagachi' ca naca quégacaba' gadxi bōlaj bení' na' bilé'enu' xzōagacaba' lu na'a ibēla, en ca naca gadxi le nuá'gaca guí' le néquiquequini oro. Gadxi bōlaj

bení' na' sa'yéajgacaba' gadxi gubáz queéga gadxi cō' bōnachi quia', ate' gadxi le nuá'gaca guí' na' sa'yéajgaca gadxi cō' bōnachi quia' na'."

2

Didza' gusōl-lē'ē yōdzō Ēfeso

¹ Gunnē' ca' Bōnni' na': "Buzúaj lu guichi didza' ni isōl-lu'u queē' gubáz quia' zóalenē' bōnachi quia' lu yōdzō Ēfeso. Caní uzúaju' lu guichi: Ru'ē didza' Bōnni' na' zxóagacaba' gadxi bōlaj bení' lu nē'ē ibēla, en ridé' gatsaj lāhui'lō gadxi le nuá'gaca guí' na' néquiguequini oro. ² Caní rnniá': Neda' nōz quezida' yugu' le runli', en ca rúnda'ali' dxin. Nōzda' ribōzali' zxōn ladxi', en bití' gaca guá' ilenli' nupa tua' dō'. Nōzda' chiguzxí' bē'ēli' nupa ta'nná' nácagaca gubáz quia' pero bití' ca' nácagaca, ate' na'a nōzili' ta'z'í' yē'. ³ Ribōzali' zxōn ladxi', en chigudí' guzxacá'li' tu' dá'ali' neda', pero bití' gucuidi' lādxi'li'. ⁴ Na'a, dē tu le ruzegui libí'ili' didza': Bití'rō nadxí'ili' neda' ca na' bidxí'ili' neda' zí'alō. ⁵ Que lē ni na', guli'tsōjnē ca na' benli' zí'alō, lē na' busanli', ate' na'a, buli'bí'í lādxi'li', en guli'gūn ca na' benli' zí'alō. Channō cabí ubí'í lādxi'li', guídatia' queēli', ate' ugúa' le nuá' guí' queēli' xilataj. ⁶ Na'a, zoa tu le rácalen libí'ili'. Bití' rilé'eli' dxi'a le tunē' bōnni' nicolaíta, nupa na' ta'yéaj lādxi'gaca budó' guiōj budó' yaga, en tun le ruá' dō', lē na' lēasca' bití' rilé'eda' dxi'a. ⁷ Nu riyōni ral-la' uzē nagui lē ni rnnē' Dios Bō' Lá'ayi, ru'ilenē' yugu' cō' bōnachi quia' neda', Cristo, didza', rnnē': Nupa ila'deli' lu le raca yōdzōlió, guna' ga ilágugaca le ribía yaga da' gatsaj lāhui'lō luyú lachi queē' Dios, le gun ga ila'cuá'tica'sō nabán."

Didza' gusōl-lē'ē yōdzō Esmirna

⁸ Gunnē' ca': "Lēasca' caní, buzúaj lu guichi didza' ni isōl-lu'u queē' gubáz quia' zóalenē' bōnachi quia' lu yōdzō Esmirna. Caní uzúaju' lu guichi: Ru'ē didza' Bōnni' na' zoē' zí'alō, en náquiē' ca' Nu rōjsete, Bōnni' na' gūtiē', en bubanē' tsaz. ⁹ Caní rnniá': Neda' nōz quezida' le runli', en ca rígu'í rízaca'li'. Nōzda' nácali' yechi', pero le nácate' rilé'eli' yōl-la' tsahui' le naca idú. Nōzda' ca' ca ta'nnē' queēli' nupa ni' ta'nná' nácagaca bōnachi judío, pero bití' ca' nácagaca caní. Nupa ni ta'dá' Satanás, tu' xihui'. ¹⁰ Bití' ca' gádxili' le ral-la' quí'í sáca'li'. Tu' xihui' na' gun ga idzunli' bál-lalí' libí'ili' lidxi' guíē'. Caní si' bē' libí'ili', ate' quí'í sáca'li' idú ca chi dza. Guli'tséajlē' neda' ga idxintē dza gátili', ate' neda' gunna' yōl-la' na'bán idú queēli'. ¹¹ Nu riyōni ral-la' uzē nagui lē ni rnnē' Dios Bō' Lá'ayi, ru'ilenē' didza' yugu' cō' bōnachi quia' neda', Cristo, rnnē': Nupa ila'deli' lu le raca yōdzōlió, bití' bi gun yōl-la' guti' queéqueui, lē na' gaca le buropi luzuí queéga nupa ila'cuá'tica'sō lu guí' gabila."

Didza' gusōl-lē'ē yōdzō Pérgamo

¹² Gunnē' ca': "Lēasca' caní buzúaj lu guichi didza' ni isōl-lu'u queē' gubáz quia' zóalenē' bōnachi quia' lu yōdzō Pérgamo. Caní uzúaju' lu guichi: Ru'ē didza' Bōnni' na' nu'ē' guíē' tuchi' na' natuchi' iropa la'a. ¹³ Neda' nōz quezida' le runli'. Nōzda' ca' zóali' ga ni' rinná' bē' Satanás, tu' xihui', pero ni ruzxōni lādxi'li' neda'. Bití' ca' nusanli' ca' réajlē'ēli' neda'. Bití' busanli' le yugu' dza ni' cate' guíutiē' Antipas, bōnni' ni' bēntica'sē' ba nalí' quia', en gūtiē' ga ni' zoa Satanás, tu' xihui'. ¹⁴ Na'a, dē tu chopa le tu'zegui libí'ili' didza': Nacua'len libí'ili' bal-la bōnachi lu yōdzō Pérgamo, nazí' lu nē'eguequi xibá queē' Balaam, bōnni' ni' busédinē' Balac benē' ga gula'chixi gula'nigui bōnachi Israel, ate' gulahuē'-ba' yugu' bōa' bēdxido' gulútigaquiē'-ba' lógaca budó' guiōj budó' yaga, en gulunē' le ruá' dō'. ¹⁵ Lēasca' caní nacua'len libí'ili' nupa ni' nazí' lu nē'eguequi xibá queéga bōnachi nicolaíta, lē na' bití' rilé'eda' neda' dxi'a. ¹⁶ Que lē ni na', buli'bí'í lādxi'li' na'a. Channō cabí ubí'í lādxi'li', guídatea' ga zóali', en tíl-lalena' légaquiē' len didza' rirúaj ruá'a, le naca ca tu guíē' tuchi'. ¹⁷ Nu riyōni ral-la' uzē nagui lē ni rnnē' Dios Bō' Lá'ayi, ru'ilenē' yugu' cō' bōnachi quia' neda', Cristo, didza', rnnē': Nupa ila'deli' lu le raca yōdzōlió, guna' ga ilágugaca yōta maná' nagachi'. Unōdzja' ca' tu guiōj chigui'chido' queégaquiē', ate' lu guiōj na' nazúaj tu la cubi, cuntu nu nunbē' le, pero nupasó na' ila'z'í' le, ilunbē'e la na'."

Didza' gusōl-lē'ē yōdzō Tiatira

¹⁸ Gunnē' ca': "Lēasca' caní, buzúaj lu guichi didza' ni isōl-lu'u queē' gubáz quia' zóalenē' bōnachi quia' lu yōdzō Tiatira. Caní uzúaju' lu guichi: Ru'ē didza' Zxi'inē' Dios, Bōnni' na' dxía guiōj lahuē' nácagaca ca guí', ate' ni'ē' nácagaca ca guíē' bronce dxílido'. ¹⁹ Caní rnnē': Neda' nōz quezida' le runli'. Nōzda' ca' nadxí'ili' neda', en ca réajlē'ēli' neda'. Nōzda' ca' ca runli' xichina' lu yōl-la' ribōza zxōn ladxi' queēli'. Nōzda' nácara' idú ca runli' yugu' lē ni ca benli' zí'alō. ²⁰ Nacua' tu chopa le tu'zegui libí'ili' didza': Ru'ili'-nu lataj nigula na' lēnu Jezabel, rnnanu ru'ínu didza' uláz queē' Dios, ate' ni'a que le rusédinu rizí' yé'enu bōnni' tunē' xichina'. Rusédinu légaquiē' le run ga tunē' le ruá' dō', en tahuē'-ba' bōa' bēdxido' ta'gu'ē' légacaba' lógaca budó' guiōj budó' yaga. ²¹ Neda' bē'a-nu lataj ubí'í lādxi'nu, pero bití' ré'ēninu ucá'ananu le ruá' dō' na' runnu. ²² Que lē ni na' chú'una'-nu tu le gátí'nu

ga na' quí'i sáca'nu lu xihué'enu tsözxón len nupa gulún tsözxón len lënu le ruá' dö'. Caní guna' na'a channó cabí ulu'bf'i ládxi'guequi para cabiró ilún dul-la' na'. ²³ Guna' ga ilátibi' zxi'ininu. Caní gaca, iléquibe'e yúgu'tè cö' bönachi quia' ruyúa' le ta'bequi ícaguequi, en le ta'zá' ládxi'gaca bönachi, ate' ubí'a queéli' tsa naca le runli'. ²⁴ Ia'zica'li' zóali' yödzö Tiatira, núlöli' bití' nazí' lu ná'ali' lè na' rusédinu, en bití' nazédali' lè na' ta'nná bönachi ni' naca le nayéajni' idú, pero le nácaté' naca xtídza' Satanás, tu' xihui', rea' libí'ili': Bití' usubága'a libí'ili' ia'tú le ral-la' gunli'. ²⁵ Na'a, lè na' chinazí' lu ná'ali', guli'gún chi'i ga idxinté dza huöda'. ²⁶ Bönni' ni' ila'déli'né' lu le raca yödzölió, en iluné' ca ré'enda' neda' ga údxité, neda' guna' ga ila'nná bé'ené' bönachi iduté yödzölió. ²⁷ Ca na' budödé' Xuza' Dios yöl-la' unná bé' lu na'a, neda' ca' guna' ga ila'nná bé'ené' yugu' yödzö, ate' gata' lu ná'agaquié' tu xiyaga guié, ate' ulu'zuxzjé' bönachi na' ca nu ruzuxzaj zxiga' yó'óna néquini yu. ²⁸ Gu'a ca' le naca ca bölaj hui sila queégaquié'. ²⁹ Nu riyóni ral-la' uzé nagui lè ni rnné' Dios Bö' Lá'ayi, ru'ilené' yugu' cö' bönachi quia' neda', Cristo, didza'."

3

Didza' gusöl-lë'ë yödzö Sardis

¹ Gunné' ca': "Lësca' caní buzúaj lu guichi didza' ni isól-lu'u queé' gubáz quia' zóalené' bönachi quia' lu yödzö Sardis. Caní uzúaju' lu guichi: Ru'è didza' Bönni' na' nacua'len Lè gadxi bö' na', ate' zxóagacaba' gadxi bölaj bení' lu né'è íbèla, rnné': Neda' nöz quézida' le ruá' dö' runli', en nözda' chinati cázali' sal-la' téquiguequi bönachi zóali' nabanli'. ² Buli'subán ládxi'li'. Guli'gún tsutsu le nacua'len libí'ili', le chizóa ílátigaca, tu' réquibe'eda' le runli' bití' naca idú tsahui' lahué' Dios. ³ Guli'tsójné na'a xibá na' biyónili' le guzxi' lu ná'ali'. Guli'gún ca rna xtídzé'è Dios, en buli'bf'i ládxi'li'. Channó cabí usubán ládxi'li', guída' ga zóali' tsárido'os ca na' ridxiné' tsárido'os gubán, en bití' inözili' bizxi dza na' guída' ga zóali'. ⁴ Nacuá'len bal-la bönachi libí'ili' lu yödzö Sardis, nupa bití' nácacaca xihui'. Ila'dalen nupa ni neda', nácacaca lari' chiguichido'os le ruluí' nuhuóacagaca idú tsahui', en nácacaca lesaca' gaca caní queéqueui. ⁵ Nupa ila'deli' lu le raca yödzölió ugácu'a' léguequi lari' chiguichido'os, en bití' usúlúa' láguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Si' lu na'a nupa ni lahué' Xuza' Dios, enca' lógaquié' gubáz lá'ayi queé'. ⁶ Nu riyóni ral-la' uzé nagui lè ni rnné' Dios Bö' Lá'ayi, ru'ilené' yugu' cö' bönachi quia' neda', Cristo, didza'."

Didza' gusöl-lë'ë yödzö Filadelfia

⁷ Gunné' ca': "Lësca' caní buzúaj lu guichi didza' ni isól-lu'u queé' gubáz quia' zóalené' bönachi quia' lu yödzö Filadelfia. Caní uzúaju' lu guichi: Ru'è didza' Bönni' na' náquié' lá'ayi, en ru'è didza' iduté li, en dè lu né'è zxi'ini guié queé' David, bönni' gunná bé'è. Bönni' na' ru'è didza' risálajé' ga nu riyaza, ate' cantu nu gaca usayaj le, en rusayjé' ga nu riyaza, ate' cantu nu gaca isalaj le. ⁸ Bönni' ni rnné': Neda' nöz quézida' le runli'. Nözda' nápalí' láti'do'os yöl-la' huáca, pero runli' ca rna xtídza'a, en bití' rutuí'ili' rnnali' néquili' quia'. Que lè ni na' nuzóa' lolí' tu ga nu tsaz le nayalaj, ate' cantu nu gaca usayaj le. ⁹ Buli'yútsöca', ta'dé' bönni' ni' Satanás, tu' xihui', en ta'zi' yé'è, ta'nné' nácacagacié' bönachi judío ta'yéaj ládxi'gaca Dios, pero bití' nácacagacié' caní, guna' ga ila'dxiné' lolí', en ulu'zechu xzíbigaquié' xini'ali'. Ní'iró iléquibe'ené' nadxi'ida' libí'ili'. ¹⁰ Tu' benli' ca rna xtídza'a, en gulözali' zxón ladxi', gun chi'a libí'ili' dza na' ila'guí' ila'zaca' yúgu'tè bönachi lu yödzölió ni, lè na' gaca para si' bé' léguequi. ¹¹ Jsi' guída'! Que lè ni na' guli'gún chi' le nápalí', para cabí gaca nu gun ga cabí si'ili' lè na' ral-la' gunna' queéli'. ¹² Núlöli' ni' idéla'li' lu le raca yödzölió, neda' guna' ga gácali' tsutsu ca nácacaca ya'zxón, ate' sóali' yudo' ga na' zoé' Dios, en catu caz irúajli' ni'. Uda'a libí'ili' ca lè' Dios quia', enca' ca lè yödzö queé' Dios le naca Jerusalén cubi, le huötaj irúaj yehua' yubá lu né'è Dios. Lësca' udá'a libí'ili' La' cubi. ¹³ Nu riyóni ral-la' uzé nagui lè ni rnné' Dios Bö' Lá'ayi, ru'ilené' yugu' cö' bönachi quia' neda', Cristo, didza'."

Didza' gusöl-lë'ë yödzö Laodicea

¹⁴ Gunné' ca': "Lësca' caní buzúaj lu guichi didza' ni isól-lu'u queé' gubáz quia' zóalené' bönachi quia' lu yödzö Laodicea. Caní uzúaju' lu guichi: Ru'è didza' Bönni' na' zoé' tsaz, Bönni' runé' ca rnné', en ru'è didza' iduté li ca rnné' ba nalí, en náquié' ca' Bönni' na' gulén lu né'è yúgu'tè le bené' Dios. ¹⁵ Caní rnné': Neda' nöz quézida' le runli'. Ca runli' naca ca nisa bití' naca ziaga, tu' cabí rucá'anali' tsaz neda', en bití' naca ca nisa zögui', tu' cabí dá'ali' neda' idú ládxi'li'. Dxi'aró gaca la' gácali' ca nisa ziaga o ca nisa zögui'. ¹⁶ Na'a, tu' nácali' ca nisa nati yulasó, en bití' nácali' ca nisa ziaga, en bití' nácali' ca nisa zögui', chü'una' libí'ili' ca run nu ruhuébi nisa nati yula na'. ¹⁷ Libí'ili' rnnali' rilé'eli' yöl-la' tsahui' queéli', en raca dxi'a queéli', en bití' bi riyadzaj queéli', pero bití' réquibe'eli' le nácali'. ¡Bayechi' nácali'! ¡Nácali' xizí'! ¡Nácali' yechi', en lo chul-la, en ridali' xiguídisó! ¹⁸ Que lè ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxi'a lu guí', para gata' yöl-la' tsahui' idú

queëli'. Ral-la' gá'uli' ca' lari' chiguichi quia' le gáculi' para igachi' yöl-la' xiguídidö queëli' le run ga nu rufuf'i. Ral-la' gá'uli' ca' quia' le gun ga ulu'huóaca guiójol' loli' para gaca ilé'eli' le naca quia'. ¹⁹ Neda' ruzeda' bach, en run zí'a yúgu'té nupa nadxí'ida' channö cabí tun le naca dxí'a. Que lè ni na', buli'bí'í ládxi'li', en guli'gún xichina' idú ládxi'li'. ²⁰ Buli'yútsöca', neda' caz zuína' ga nu riyaza, en rulidza'. Channö núti'tès nu yöni chi'a, en isalaj quia', tsázia', en gágulena' nu na', ate' nu na' gágulen neda'. ²¹ Núlöli' idéli'li' lu le raca yödzölió, neda' guna' ga cö'öli' tsözxön len neda' ga na' rö'a rinná bë'a, ca na' benë' ca' Xuza' quia' neda'. Bidéli'da' neda' lu le guca quia', ate' guró'lena' Xuza' tsözxön ga na' rö'è rinná bë'è. ²² Nu riyöni, ral-la' uzé nagui lè ni rnnë' Dios Bö' Lá'ayi, ru'ílenë' didza' yugu' cö' bönachi quia' neda', Cristo."

4

Yöl-la' ba ta'gu'ë Dios yehua' yubá

¹ Gudödi gulaca yugu' lè ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chi'è bönni' na' biyönda' zí'alö, ate' bulidza zidzaj ca ribödxí lúzuba' böa' bëdxi. Chi'í ni bulidza neda', gunná: "Gudá xitsá'alö ni, ate' neda' uluf'ida' li' le run bayudxi ilaca tödi ni."

² La' ní'isö guzóalenë' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bë', en bilé'eda' ca' Nu na' rö'ö lataj na'. ³ Répi yösa bení Nu na' rö'ö lataj na', ca na' répi yösa bení guiójl' jaspe, en guiójl' cornalina, yugu' guiójl' nazáca'da'. Idú gásibi'ilö lataj na' zoa biguita' le naca lachi ca naca guiójl' esmeralda, le répida' yösa bení'. ⁴ Idú gásibi'ilö lataj na' nacua' ca' ia'tapa uruá' lataj gapa ta'bö' nupa ta'nná bë', ate' yugu' lataj na' rö'ögauqië' tapa uru'è bönni' gula, nácugaquië' lari' chiguíchido'os, en dxíagaca ícagaquië' le néquiqueuini oro. ⁵ Ta' rúaj yösa, en guziú' rinnë lu lataj lo ga ni' rö'ö Nu na', ate' bö zxön ru'u. Lahui' lo lataj na' tu'zeni' gadxi le ta'gú'u bení', le nácagaca gadxi bö' dzágagaca Dios. ⁶ Ca dödilö lahui lataj ni dë tu ca naca tu nísado' le répi yösa bení' ca guiójl' jara.

Nacuá' tapa nupa nabángaca cuiti lataj na', tsölä'a huéaj, ate' zían guiójl' lógaca dxíagaca zaca' cúdzi'löguequi, en láchuilöguequi. ⁷ Tu nu nutsa' ladaj tapa ni nalá' ca nácaba' bëdxi guixi'. Nu na' buropi nalá' ca nácaba' bëdxi, ate' nu na' bunni nalá' lahui ca naca lo bönni', ate' nu budapi nalá' ca nácaba' bisia' ruzuba'. ⁸ Idápatë nupa ni, nacua' xopa xíligaca que queëguequi, ate' idá'löguequi, en lë'elöguequi xiliguequi dxíada'gaca zían guiójl' löguequi. Rëla, en te' za' biti' ta'cuá' dxisö, ta'nná:

¡Lá'ayi! ¡Lá'ayi! ¡Lá'ayi náquië' Xanru' Dios!

¡Napa cazë' yöl-la' huáca!

¡Guzóa cazë' Lë', en zoa cazë', en chizóa ulë'!

⁹ Nupa na' nabángaca ta'gú'u yöl-la' ba Nu na' rö'ö rinná bë', en zóatica'sö nabán. Tun bal Nu na', en té Nu na': "Xclenu'." Bátati'tès tun idapa na' caní, ¹⁰ tu'tsaga lógaca tapa uru'è bönni' gula na' lu yu lahui' lo Nu na', en ta'yéaj ládxi'gaca Nu na' zóatica'sö, en tu'cu'è le néquiqueuini oro dxía ícagaquië' lahui' lo lataj ga ni' rö'ö rinná bë' Nu na', ta'nnë':

¹¹ ¡Xantu' Dios, nacu' lesaca'

cú'utu' Li' yöl-la' ba, en guntu' Li' bal,

en gata' quiu' yöl-la' unná bë' tu' benu' yúgu'té le dë!

¡Ca rë'ëni quézinu' nacua', en gula'sí lo nacua'!

5

Tu guichi, en Bönni' náquië' Bö'cu' Zxíla'do'

¹ Ní'irö bilé'eda' tu guichi lu na' ibëla Nu na' rö'ö lataj lo. Guichi na' naca tu guichi nudubi, en dá'gaca didza' lë'elö, en láchuilö. Naguela' guichi na' gadxi le nusáyajgaca le. ² Bilé'eda'-në' tuë' gubáz lá'ayilo, ate' bë'è zidzaj didza', gunné': "¿Nuzzi naca lesaca' uladzu' le naguéla'gaca guichi ni, en usalaj le?"

³ Cuntu nu guca usalaj guichi na', en biti' guca nu uyú le, calëga nu zoa yehua' yubá, en calëga nu zoa luyú, en calëga nu zoa zxánilö luyú. ⁴ Ní'irö gurödxá' tu' cabí bidzöli nu naca lesaca' usalaj guichi na', en biti' bidzöli nu naca lesaca' ulaba le, en cuntu nu naca lesaca' uyú le. ⁵ Ní'irö tuë' bönni' gula ni' gudxë' neda', gunné': "Biti' cödxu'. Bönni' na' náquië' ca bëdxi guixi', en nabábalenë' zxf'ini xi'söë' Judá, en náquië' ca' zxf'ini xi'söë' David, chibidéli'në' lu yúgu'té le raca, en séqui'në' uladzu' è le naguéla'gaca guichi ni, en usalaj le."

⁶ Ní'irö bilé'eda'-në' Bönni' náquië' Bö'cu' Zxíla'do', zuinë' lahui' lo lataj lo na' zoa gatsaj láchuilö nupa na' nabángaca, en gatsaj láchuilé' ca' yugu' bönni' gula na'. Dxíé' huë' ca naca que tu bö'cu' zxíla' zoa nu bëti lëba' lahuë' Dios, nacua' gadxi lúzuba', en gadxi guiójl' loba', le tu'lu'í ca nácagaca gadxi bö' na' dzágagaca Dios, nasöl-lë'è léguequi iduté yödzölió. ⁷ Gudöë' Bönni' náquië' Bö'cu' Zxíla'do', en gudélë'ë' guichi na' lu na' ibëla Nu na' rö'ö lataj lo na'. ⁸ Cate'

chigudélë'ë guichi na', bulu'zóa xzíbiguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bó'cu' Zxíla'do'. Tu tuë' bönni' gula na' zóngaqüië' le rul-la nazí'i le arpa, en nuá'agaquië' ca' yugu' xzíga'do' néquiquequini oro, yugu' le yúdzugaca yalaj, lë na' rulu'í yöl-la' ruldza Dios queégaca bönachi queë'. ⁹ Tul-lë' tu le rul-la yöl-la' ba, le naca cubi, le rnna caní:

Nacu' lesaca' quélu'u guichi na',
en uládzu'u le naguéla gaca le,
tu' bë'u lataj yugu' bönni' gulútië' Li',
ate' len xichónu' böá'uu' bönachi para ilequi queë' Dios,
nupa nácacaga bönachi izá'a nacua' idútë yödzölió,
bönachi tu'í yúgu'të didza' yúbölö,
en nabábagaca yúgu'të yödzö,
en yúgu'të luyú nacua' idútë yödzölió.

¹⁰ Benu' ga nácacagüië' bönni' ta'nná bë'ë
en ga nácacagüië' bixúz queë' Dios queëru'.
Benu' ga ta'nná bë'ë lu yu yödzölió.

¹¹ Ní'irö buyúa', en biyönda' chí'igaquië' gubáz lá'ayi zían. Zían gáyu'ë, en gáyu'ë nacu'ë.
Nacu'ë idú gásibi'ílö lataj lo na' tsózxón len nupa na' nabángaca, enca' yugu' bönni' gula na'.

¹² Tu'ë zidzaj didza' yúgu'të, ta'nnë':
¡Bönni' na' náquië' Bó'cu' Zxíla'do' gulútië',
náquië' lesaca' gata' yöl-la' unná bë' lu në'ë,
en yöl-la' tsahui', en yöl-la' réajni', en yöl-la' huáca!
¡Náquië' lesaca' gunru-në' bal, en tseaj ládxi'ru' Lë',
en cú'uru-në' yöl-la' ba!

¹³ Ní'irö biyönda' tul-la yúgu'të le benë' Dios yehua' yubá, en lu yu yödzölió, en xzánilö luyú, en lu nísado'. Tul-la yúgu'të le nacua' yugu' lataj na', ta'nná:

¡Yöl-la' ba Nu na' rö'ö lataj lo,
enca' Bönni' na' náquië' Bó'cu' Zxíla'do'!
¡Gúntica'siru-në' bal
en cú'utica'siru-në' yöl-la' ba,
ate' inná bë'tica'së' Lë'!

¹⁴ Idápatë nupa na' nabángaca ta'nná: "¡Ca' gaca!"

Ní'irö idapa uru'ë bönni' gula na' bulu'tsaga lógaquië' lu yu, en gula'yéaj ládxi'gaquië' Nu na' zóatica'sö.

6

Yugu' le naguéla gaca guichi

¹ Ní'irö bilé'eda-në' Bönni' náquië' Bó'cu' Zxíla'do', ate' buládzu'ë tu le naguela' guichi na', ate' biyönda' tu nu nutsa' ladaj idapa na' nabángaca, ate' biyón chí'i ca guziú' rinnë, gunná: "¡Gudá uyú!"

² Buyúa', en bilé'eda-ba' tuba' böa' chiguichi, ate' nu na' dxía lëba' zón tu uxiti' yaga. Gulu'ë lë' tu le néquini oro udxíë' icjé', ate' birúajé' ca tu nu nácatërö lo para idéli'në' lu gudil-la.

³ Cate' buládzu'ë le buropi le naguela' guichi na', biyönda' nu buropi na' nabán, ate' gunná: "¡Gudá uyú!"

⁴ Ní'irö birúajba' ia' tuba' böa', nácaba' xiná. Bulu'dödë' lu në'e nu na' dxía lëba' yöl-la' huáca unná bë' tsójtúa yöl-la' riböza dxi'a tsáhui'do' queégaca bönachi, en gun ga iluti luzé'eguequi. Bulu'nödzjé' queë' tu guië tuchi' zxón.

⁵ Cate' buládzu'ë le bunny le naguela' guichi na', biyönda' nu bunny na' nabán, ate' gunná: "¡Gudá uyú!"

Buyúa', en bilé'eda-ba' tuba' böa' gasaj, ate' nu na' dxía lëba' zón tu zxigóns. ⁶ Biyönda' ru'í' didza' tu chí'i gatsaj láhu'i'lö tapa na' nabángaca, ate' gunná: "Chopa guië xzoa' xtila len lazzaj que tu dza huen dxin tu' gaca gubín, en xopa guië xzoa' cebada len lazzaj que tu dza huen dxin, pero biti' gunu' gaj yadzaj le naca za, en biti' bi' gunu' que xisi uva nal-la."

⁷ Cate' buládzu'ë le budapi le naguela' guichi na', biyönda' ru'í' didza' nu budapi na' nabán, ate' gunná: "¡Gudá uyú!"

⁸ Buyúa', en bilé'eda-ba' tuba' böa' gulaj, ate' nu na' dxía lëba' nazí'i le Yöl-la' Guti, ate' zéajlen nu na' nu nazí'i le Lataj Chul-la. Bulu'dödë' lu në'e nu na' inná be'e gatsaj tu gatsaj bönachi nacua' yödzölió para guti léguequi len guië tuchi', en len yöl-la' ridún, en len yugu' yödzöhuë', en len yugu' böa' guixi' sinia' dzö'öba' luyú.

⁹ Cate' buládzu'ë le guyu' le naguela' guichi na', bilé'eda' zxan bucugu yehua' yubá ni' yugu' bö' gulaca cazë' bönni' ni' gulútië' légaquië' tu' gulunë' libán que xtídzë'ë Dios, en tu' gulunë' ba nalí queë'. ¹⁰ Gulufi' zidzaj didza' yugu' bö' ni, gula'nná: "¡xantu' Lá'ayi, runu'

ca rnno! ¿Bátaxi caz uchi'a usöröu' queétu', en uzí'i lëbu' yugu' bönni' nacu'è yödölió tu' gulútié' netu'?"

¹¹ Bulu'nödzejë' quéguequi yugu' lari' chiguíchido'os ilácuë', en gulé' léguequi: "Ral-la' uzí' ládx'i'li' ia'tú chí'ido'osó, ga idxinrö dza ila'dxín yúgu'të luzá'ali' huen dxin queë' Cristo ni, yugu' bönni' na' ral-la' iluti bönnachi légaquië' ca' ca' na' bétigaca libí'ili'."

¹² Cate' buládu'è le buzxopi le naguela' guichi na', buyúa', en bilé'eda' gudödida' budó' zxu' luyú. Bóaca gasaj gubidza, en guca ca tu lari' guitsa' gasaj, ate' bóaca beo' xiná ca naca rón. ¹³ Gula'guinnaj bólaj lúzxiba lu yu, le guca ca raca que yaga higo, cate' ta'guinnaj le ribía cate' rutá le bö' budunu'. ¹⁴ Gudödi que lúzxiba, ate' guca que ca raca que tu guichi cate' nu rutubi le. Bulu'tsá' xilátjagaca yúgu'të guí'ado', enca' yúgu'të gapa zoa luyú bidxi lu nísado'. ¹⁵ Ní'irö yugu' bönni' ta'nná bē'è luyú, en yugu' bönni' lo, en yugu' bönni' ta'lé'ené' yöl-la' tsahui', en yugu' bönni' ta'nná bē'ené' bönni' röjáquië' gudil-la, en yugu' bönni' dë lu ná'agaquië', en yúgu'të nupa nadó'ogaca, en yúgu'të nupa biti' nadó'ogaca bulu'cachi' lógaquië' gapa naca zxan bulóaj, en gapa naca lē'e guió'j lu guí'ado'. ¹⁶ Gulé' yugu' guí'ado' na', en yugu' lē'e guió'j na': "Guli'dubága' netu', en buli'cachi' netu', para cabí ilé'e Nu na' rö'ö lataj lo ni' netu', en para cabí ideli' yöl-la' rilé queë' Bönni' na' náquië' Bö'cu' Zxíla'do' netu'. ¹⁷ Chibidxín dza uluí'i lahui yöl-la' rilé quéguaquië', ate' ¿nuzxi caz sequi' guá' ilén le?"

7

Tu gayuá' yu' tapa-un milë' bönni'

¹ Gudödi gulaca yugu' lë ni bilé'eda' tapa gubáz lá'ayi zuíguequinë' idapa la'a yödölió. Tu'záguë'è xinó'z'gaca idapa bö' recja tsólá'a huéaj luyú, para cabí tsecja bö' luyú yödölió, en para cabí tsecja lu nísado', en para cabí utá yaga. ² Bilé'eda' ca' ia'tuë' gubáz lá'ayi zē'è rirujajë' ga rilén gubidza. Nu'è tu le udé'è nupa ná'cagaca queë' Dios ban le gaca bē' léguequi. Bē'è zidzaj didza', en bulidzë' idapë' gubáz lá'ayi ni' nadödi lu ná'agaquië' yöl-la' huáca unná bē' ilún dí'tjanë' luyú, en nísado'. ³ Gudxë' légaquië': "Biti' gun dí'tjali' luyú, en nísado', en yugu' yaga cate' udá'arötu' tu le gaca bē' ra' xigágaquië' bönni' huen dxin queë' Dios queëru'."

⁴ Biyönda' tsca ná'cagacaquië' bönni' da' légaquië' lë na' naca bē'. Ná'cagacaquië' idú tu gayuá' yu' tapa-un milë' ladaj yúgu'të cö' zxi'ini xi'sóë' Israel. ⁵ Yugu' bönni' na' da' légaquië' lë na' naca bē' ná'cagacaquië':

Chinnu milë' di'a dza queë' Judá.

Chinnu milë' di'a dza queë' Rubén.

Chinnu milë' di'a dza queë' Gad.

⁶ Chinnu milë' di'a dza queë' Aser.

Chinnu milë' di'a dza queë' Neftalí.

Chinnu milë' di'a dza queë' Manasés.

⁷ Chinnu milë' di'a dza queë' Leví.

Chinnu milë' di'a dza queë' Isacar.

⁸ Chinnu milë' di'a dza queë' Zabalón.

Chinnu milë' di'a dza queë' Josë.

Chinnu milë' di'a dza queë' Benjamín.

Bönnachi guí'zxi yu' ná'cagaca lari' chiguíchido'os

⁹ Gudödi guca lë ni buyúa', en bilé'egacada' bönnachi zían, cuntú nu gaca ulaba léguequi. Nabábagaquië' yúgu'të yödö tu'í didza' yúbölö iduté yödölió. Zuíguequinë' ca dödölö lahui lataj lo, ga na' rö'è ca' Bönni' na' náquië' Bö'cu' Zxíla'do', en ná'cagacaquië' lari' chiguíchido'os, en zöngaquië' zin. ¹⁰ Tu'è zidzaj didza' yúgu'të, ta'nné':

¡Yöl-la' rusólá za' lu nē'è Dios queëru', rö'è lataj lo ni,
en za' ca' lu nē'è Bönni' na' náquië' Bö'cu' Zxíla'do'!

¹¹ Zuíguequinë' yúgu'të gubáz lá'ayi idú gásibi'ilö lataj lo na', enca' idú gásibi'ilö ga nacu'è bönni' gula, enca' idú gásibi'ilö ga nacuá' idapa na' nabángaca, ate' tu'tsaga lógaquië' lu yu ca dödölö lahui lataj lo na', en ta'yéaj lá'axi'gaquië' Dios, ¹² ta'nné':

¡Ca' gaca! ¡Yöl-la' ba Li', Dios queétu'!

¡Napu' yöl-la' zXön, en yöl-la' réajni'!

¡Rëtu' Li': "Xclenu'", en runtu' Li' ball!

¡Napu' yöl-la' unná bē', en yöl-la' huáca!

¡Gácatíca'só caní quiu', Dios queétu'!

¡Ca' gaca!

¹³ Ní'irö gunábinë' neda' tuë' bönni' gula na', gunné': "¿Nupxi na' ná'cagaca lari' chiguíchido'os, en gapxi bönni' légaquië'?"

¹⁴ Neda' gudxa' lë': "Xan, lí' nöz quézínu'."

Lë' gudxë' neda': "Nupa ni gula'gu'i gula'záca'da'. Gula'guíbë' lari' nácugaquië', en bulu'ún léguequi chiguichido'os len xichönë' Bönni' na' náquië' Bò'cu' Zxíla'do'. ¹⁵ Que lë'ni na' nacu'ë ca dódilò lahui lataj lo ga rō'ë rinná bē'ë Dios, en tunë' dxin lahuë' Lë' rëla, en tē dza lu yudo' queë'. Nu na' rō'ò lataj lo ni gun chi'í légaquië' tu' zóalenticá'sò légaquië'. ¹⁶ Biti'rō' ila'dunë', en bití'rō' ila'bidxë' nisa, en bití'rō' ila'yéguinë' gubidza, en bití'rō' iléquinë' xilá ¹⁷ tu' uyúë' Bönni' na' náquië' Bò'cu' Zxíla'do' légaquië' ca nu uyú bō'cu' zxíla'. Zoë' gatsaj láhui'lò lataj lo na'. Ichë'ë légaquië' gapa ralaj nisa le ruí'i yöl-la' na'bán, ate' Dios uzxië' lógaquië' nisa ta'bòdxë'."

8

Le igadxi le naguela' guichi

¹ Cate' buládu'ë le igadxi le naguela' guichi na', gurō'ò dxi yehua' yubá idú gatsaj hora. ² Ní'irō bilé'egacada'-në' gadxi gubáz lá'ayi na' zuíguequinë' lahuë' Dios, ate' bulu'dodë' lu ná'agaquië' gadxi lúzuba' bōa' bēdxi. ³ Ní'irō bidë' ia'túë' gubáz lá'ayi, nu'ë tu' zxíga'do' néquini oro, en guzuinë' ra' bucugu yehua' yubá ni'. Gulú'udë'ë yalaj lu nē'ë para ugutsë' le len yöl-la' rulidza Dios le gulún yúgu'të bönachi queë' Cristo, en uzégui'ë le lu bucugu na' néquini oro, le zoa lahui lo lataj lo na'. ⁴ Gurén dzön que yalaj na' zoa lu nē'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' rō'ë Dios. ⁵ Ní'irō gubáz lá'ayi na' bulfé' zxíga'do' na' len bō' yalaj dxia lu bucugu na', ate' gurú'unë' le luyú. Gunnë' guziú', ate' bō zidzaj biyón. Guyëpi yōsa, en gudödi budó' zxu'.

Tu'cödxë' lúzuba' bōa' bēdxi

⁶ Ní'irō igádxitë' gubáz lá'ayi na' zóngaqueië' gadxi lúzuba' bōa' bēdxi na' gula'cu'ë sina' ulu'cödxë' léguequi.

⁷ Bucödxë' gubáz lá'ayi zí'alò lúzuba' bōa' bēdxi, ate' gurō'ò guiój bögui' yōla sunna, en guí' nutsí'í rön, ate' bulu'huòxaj luyú. Guyegui tu cō' tsa tu tsonna cō' le dē luyú ni, ate' guyegui ca' tu cō' tsa tu tsonna cō' yaga. Guyegui ca' yúgu'të guixi' ya'a.

⁸ Bucödxë' gubáz lá'ayi buropi na' lúzuba' bōa' bēdxi, ate' gubixi tu le naca ca tu guí'á zxön régui lu nísado', ate' ia'láti'do'os ca gatsaj tu gatsaj nísado' na' bōáca rön. ⁹ Guti tu cō' tsa tu tsonna cō' le nabángaca dzō'ò lu nisa zxön na', ate' guca ditaj tu cō' tsa tu tsonna cō' le ta'dòdi láhui'lò nisa na'.

¹⁰ Bucödxë' gubáz lá'ayi bunní lúzuba' bōa' bēdxi, ate' bōxaj tu bōlaj lúzxiba, le régui ca tu guí' yōri gapa dē nisa yegu, enca' gapa ralaj nisa, ate' guca caní que ia'láti'do'os ca gatsaj tu gatsaj nisa na' rō'ò luyú. ¹¹ Bōlaj ni lēba' Ajenjo, le naca tu le silá', ate' bōáca silá' ia'láti'do'os ca gatsaj tu gatsaj nisa gapa na' dē nisa, en guca ca naca le silá' na', ate' gulati bönachi zían ni'a que nisa na' bōáca silá'.

¹² Bucödxë' gubáz lá'ayi budapi lúzuba' bōa' bēdxi, ate' bōáca chul-la ia'láti'do'os ca gatsaj tu gatsaj gubidza, en lēsa' caní guca que beo', ate' bōáca chul-la tu cō' tsa tu tsonna cō' bōlaj. Caní guca, bití' buzení' gubidza ia'láti'do'os ca gatsaj tu gatsaj dza, en bití' bulu'zeni' bōlaj, en beo' ia'láti'do'os ca gatsaj tu gatsaj rëla.

¹³ Ní'irō buyúa', en biyönda' ru'ë zidzaj didza' tuë' gubáz lá'ayi ridödë' gatsaj láhui'lò lúzxiba, en rnnë': "¡Bica' bayechi' libí'ili'! ¡Bica' bayechi' libí'ili'! ¡Bica' bayechi' libí'ili' zóali' luyú ni cate' ulu'cödxë' ia'tsonné' gubáz lá'ayi na' lúzuba' bōa' bēdxi!"

9

¹ Bucödxë' gubáz lá'ayi guyu' lúzuba' bōa' bēdxi, ate' bilé'eda' nu naca ca tu bōlaj lúzxiba bōxaj luyú, ate' bulu'nödzejë' nu na' zxi'ini guié que lataj chul-la. ² Gusaljë' lataj chul-la na', ate' gurén dzön que lataj chul-la, le guca ca dzön ríru'aj ga tu'zégui'ë bulá'do', ate' gula'chul-la gubidza, en lúzxiba ni'a que dzön na'. ³ Lu dzön na' bila'rúajba' bōchi'zu, yugu' le gula'zxoásiba' luyú, ate' Dios bē'ë légacaba' lataj iládu'ba' bönachi ca tunba' xójnō' dzō'oba' luyú. ⁴ Gunná bé'enë' légacaba' bití' ilún dí'jtaba' guixi' rō'ò luyú, en bití' ilún dí'jtaba' yugu' le naca ya'a, en caléga yugu' yaga, pero gacásō iládu'ba' bönachi na' bití' da' lē na' naca bē' nu nequi queë' Dios ra' xigágaquië'. ⁵ Bití' bē'ë légacaba' lataj ilútiba' légaquië', pero ulu'saca' zí'isiba' légaquië' idú ca gayu' beo'. Riláda' ga tádu'ba' ca na' rilá ga rádu'ba' xójnō'. ⁶ Yugu' dza na' ilē'ënë' yugu' bönni' iluti cuíngaquië', pero bití' ila'zéqui'në'. Ilē'ëninë' ilátië', pero ucuíta cuini yöl-la' guti.

⁷ Nalá'gacaba' bōchi'zu na' ca nácagacaba' bōa' nácugacaba' le néquiguequini guíë, para tsójácaba' gudil-la. Dxiágaca' ícjagacaba' le nácagaca ca tu le néquini oro. Naca lógacaba' ca naca lógaca bönachi. ⁸ Naca guitsa' ícjagacaba' ca naca guitsa' ícjanu nígula. Nácagaca láyi'gacaba' ca nácagaca láyi'ba' bēdxi guixi'. ⁹ Nácagaca luchú'ugacaba' le néquini guíë. Ta'gú' u bō xilgacaba' ca na' ta'gú' u bō carreta ná'ayó'gacaba' bōa' ta'xíti'ba' lu gudil-la. ¹⁰ Nácagaca xibángacaba' ca naca xibángacaba' xójnō', zoa lí'gacaba'. Lu xibángacaba' na' zoa le tu'dí'iniba', para ailunba'

zi' bönachi idú ca gayu' beo'. ¹¹ Zoa nu rinná be'e légacaba', nu na' naca gubáz xihui' que lataj chul-la. Gubáz ni nazí'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

¹² Chigudödi tu le rusuniti bönachi, le za' zí'alö, pero zá'gaca ia'chopa le ulu'suniti bönachi.

¹³ Bucödxé' gubáz lá'ayi buzxopi lúzuba' böa' bédxi, ate' biyönda' tu chí'i ruí'i didza' gatsaj láhui'lö tapa le nácgaca ca lúzuba' bédxi dá'gaca tapa squin buccugu na' néquini oro, le rö' lahué' Dios. ¹⁴ Chí'i ni ruí'ilen didza' gubáz lá'ayi buzxopi na' si' bucödxé' lúzuba' böa' bédxi, en rnna: "Busedxi idápaté' gubáz xihui' na' nága'gaca ra' yegu Eufrates."

¹⁵ Ní'irö bulu'sedxé' tapa gubáz xihui' na', chinucözé' Dios léguequi para la' ná'asö, le naca dza na', en beo' na', en izi na', para ilútgaca tu cö' tsa tu tsonna cö' bönachi nacua' yödzölió.

¹⁶ Biyönda' tsca nácgaguíe' bönni' röjáquié' gudil-la dxíagaguíe'-ba' böa', en dzágaguíe' tapa gubáz xihui' na'. Nácgaguíe' idú chopa gayuá' mil milé'.

¹⁷ Bilé'egacada'-ba' böa' ca tu lu bixín, ate' nupa ta' bía légacaba' nacu luchú'guequi le naca gui'do'os, en ya' ca lúzuba, en gulaj. Nácgaca ícgagacaba' böa' na' ca ícgaba' bédxi guixi', ate' lu ruá'agacaba' ta'ruáj guí', en dzön, en tu le ruzégui'da', nazí'i le azufre. ¹⁸ Yugu' lé na' ta'ruáj ruá'agacaba' bétigaca tu cö' tsa tu tsonna cö' bönachi nacua' luyú, lé na' nácgaca gui', en dzön, en lé na' ruzégui'da'. ¹⁹ Yugu' le tu dí'iniba' böa' na' ta'ruáj ruá'agacaba', en dzö'ö lu xibángacaba', tu' nácgaca xibángacaba' ca yugu' bëla zoa ícgagacaba' le tu dí'iniba'.

²⁰ Ia'zica' rö bönachi, nupa biti' gulati lu chopa ni tu'suniti, biti' bulu'bí'i ládxi'guequi para cabirö ilúngaca ca na' túngaca, en biti' bulu'sán ta'yéaj ládxi'guequi yugu' bö' xihui', en yugu' budó' guíj budó' yaga, yugu' budó' na' biti' ta'lé'e, en biti' ta'yöni, en biti' gaca sá'gaca. ²¹ Biti' bulu'bí'i ládxi'guequi para cabirö iluti bönachi, en caléga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

10

Gubáz lá'ayi, nuá' lu në'è tu guichido'

¹ Ní'irö bilé'eda'-nè' ia'tué' gubáz lá'ayi nál-la, böjté' birúajé' yehua' yubá, nácué' böaj lúzuba, en zoa ca tu biguíta' ícjale'. Répi yösa bení' lahué' ca ruu' gubidza, ate' nácgaca ni'é ca ya'zxon ta'yegui. ² Zoa lu në'è tu guichido' nyalaj, ate' tu ni'é ibëla nulibé' lu nísado', en ia'tú ni'é yögöla nulibé' luyú bidxi. ³ Ní'irö bë'é zidzaj didza', ate' biyön chí'e ca riyön cate' ribödxí'aba' bédxi guixi', en cate' budxi bë'é zidzaj didza' na', bila'yöni chí'igaca gadxi guziú'. ⁴ Cate' budxi bila'yöni chí'igaca guziú' na', neda' si' uzúaja' lu guichi, pero biyönda' nu ruí'i didza' yehua' yubá, ré neda': "Bucáchi'sö didza' ni gulu'i' gadxi guziú' na'. Biti' uzúaju' didza' na' lu guichi."

⁵ Ní'irö gubáz lá'ayi na' bilé'eda'-nè' zuiné' lu nísado', en luyú bidxi, guchisa në'è ibëla zaca' lúzubilö, ⁶ ate' ben tsutsu xtídzé'è ni'a que Nu na' zoa caz, Nu na' ben yehua' yubá, en le nacua' ni', enca' yödzölió, en le nacua' ni', enca' nísado', en le nacua' ni', ate' gunné': "¡Bíti'rö tse! ⁷ Cate' u'cödxé' gubáz lá'ayi igadxi lúzuba' böa' bédxi, usudxiné' Dios le nagachi' queé', lé na' buluf'iné' yugu' huen dxin queé', bönni' ni' gulu'è didza' uláz queé'."

⁸ Ní'irö chí'i na' biyönda' rirúaj yehua' yubá bë'len neda' didza' leyübölö. Gunná: "Guyéaj, yöjxi' guichido' nyalaj na' zöné' gubáz lá'ayi na' nulibé' lu nísado', en luyú bidxi."

⁹ Guyija' ga na' zoé' gubáz lá'ayi na', en gunábida'-nè' gunné' guichido' na' quia'. Gubáz lá'ayi na' gudxé' neda', gunné': "¡Guzxi', gudagu! Lu ru'u' gaca zxixi ca naca bidxína'do' queéba' buz, pero lé'u huóaca silá'."

¹⁰ Guzzi'a guichido' na' zöné', en gudahua' le. Lu ruá'a guca zxixi ca naca bidxína'do' na', pero cate' budxi gudahua' le, böaca silá' lé'a. ¹¹ Ní'irö gudxé' neda': "Ral-la' gu'u didza' leyübölö uláz queé' Dios lógaca zían cö' bönachi izá'a, en gapa nacua' yúgu'té yödzö, en gapa tuí'i zían didza' yúbölö, en lógaca zían bönni' unná bë'."

11

Chopé' bönni' tuné' ba nali

¹ Ní'irö bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queé' Dios. Burixi ca' buccugu lá'ayi que, en bulaba nupa nacua' ni' ta'yéaj ládxi'gaca Dios. ² Bucá'ana ca' lö'a que yudo' na' dè ní'ilö, en biti' urixu' le, tu' nadödi lu ná'agaca bönachi izá'a, ate' ulu'libi ulu'léaj yödzö lá'ayi na' idú ca chopa-un beo'."

³ Gudxé' ca' neda': "Isöl-la'a chopé' bönni' iluné' ba nali quia', ate' ilu'è didza' uláz quia' idú ca chinnu gayuá' yu' tsónnalalaj dza, nácgaguíe' lari' le naca bödzádzado'." ⁴ Chopé' bönni' ni tuné' ba nali, nácgaguíe' chopa yaga olivo na' nazúaj lu guichi lá'ayi ca naca quégaquié', en nácgaguíe' ca' chopa le nuá'gaca gui' na' nacua' lahué' Dios, Xani yödzölió. ⁵ Channö gué'èni nu guá' dö' quégaquié', irúaj guí' ruá'agaquié' le usuniti nu na' ré'èni guá' dö' quégaquié', en guti nu na', enca' nupa ta'dá'baga' légaquié'. ⁶ Chopé' ni dè lu ná'agaquié' ulu'zágué' è xinöza

nisa guiöj lúzxiba, para cabí galaj guiöj tsca dza na' ral-la' ilu'ë didza' uláz queë' Dios, ate' dë lu ná'agaquië' ca' ilunë' ga huôaca nisa rön, en ilunë' ga gatsaj yödzhüë' yödzhölió. Ilunë' caní bálati'tës luzuí ilë'ënnë'. ⁷ Cate' údxi ilunë' ba nali, irúajba' böa' sínia' lataj chul-la, en til-lalenba' légaquië', en ucúl-laba' légaquië', en gútiba' légaquië'. ⁸ Le gulaca cazë' ila'túlusó ca' la' nóa lu yödzhó zxon, ga ni' gudë'ë ca' Xanru' lë'e yaga cruz, en ca rucúdz'u'ru' didza', nazí' le ca' Sodoma, enca' Egipto. ⁹ Idú ca tsonna dza yu' gatsaj bönachi yúgu'të yödzhó, en yúgu'të bönachi izá'a, en bönachi tu'í zían didza' yúbölö, en bönachi yúgu'të luyú, ila'lé'eni le gulaca cazë', en bití' iluí' lataj nu ucache' légaquië' yeru ba. ¹⁰ Ulu'dzéjade'e nupa nacua' yödzhölió tu' gulatië', ate' lu yöl-la' rudzeja queéquequi ila'söl-la' le ulu'nödzej quegaca luzë'eguequi, tu' bulu'saca' zi'ë chopë' ni gulu'ë didza' uláz queë' Dios bönachi nacua' yödzhölió.

¹¹ Ní'iró cate' chibizá'a tsonna dza yu' gatsaj na', Dios busubanë' légaquië', ate' gula'yasë' gulazuínë', ate' guladxi gula'dzöbi yúgu'të nupa bila'lé'e légaquië'. ¹² Ní'iró bë' zidzaj didza' tu' chi'í yehua' yubá, en gudxi légaquië': "Gulí'cuén ni."

Gula'benë' lu böaj lúzxiba zaca' yehua' yubálo, ate' nupa na' gula'dá'baga' légaquië' bila'lé'e légaquië'. ¹³ La' ní'isó gudödida' budó' zxu', ate' biguinaj tu' cö' tsa tu' chi' cö' yugu' yu'u dzö'ö lu yödzhó na', ate' lu budó' zxu' na', gulati tsónnalalaj yu' chi' gayuá' bönachi. Guladxi gula'dzöbi nupa ni' nagá'anagaca, ate' gula'gú'u yöl-la' ba Dios zoë' yehua' yubá.

¹⁴ Chigudödi le buropi le rusuniti bönachi, ate' chizóa idxín le bunni le usuniti léguequi.

Rucödxë' gubáz lá'ayi igadxi lúzuba' böa' bëdxi

¹⁵ Bucödxë' gubáz lá'ayi igadxi lúzuba' böa' bëdxi, ate' guluf'í zidzaj didza' yugu' chi'í yehua' yubá, ta'nná:

Gapa ta'nná bë' bönachi yödzhölió nadódigaca lu në'ë Xanru' Dios, en lu në'ë Cristo.

Lë' inná bë'tica'së'.

¹⁶ Ní'iró idapa uru'ë bönni' gula na' ró'ögaquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ládxi'gaquië' Dios. ¹⁷ Ta'nnë':

¡Xantu' Dios, napa cazu' yöl-la' huáca!

¡Guzóa cazu', en zoa cazu', en ral-la' guída cazu'!

¡Xclenu', tu' chibugunu' dxin yöl-la' huáca zxon quiu',

en risí lo' rinná bë'u!

¹⁸ ¡Gula'lé bönachi yugu' yödzhó

pero chibidxín dza gunu' léguequi xíguia'!

¡Naca dza uchi'a usöröu' nupa chinátigaca!

¡Ubi'u quegaquië' huen dxin quiu',

yugu' bönni' gulu'ë didza' uláz quiu',

nupa néquiquequi quez quiu', en gulún bal Lo',

nupa nácacaca cá'asó, en nupa nácacaca lo!

¡Chibidxín dza usunítu' nupa bulu'suniti yödzhölió!

¹⁹ Ní'iró guyalaj yudo' queë' Dios rö'ö yehua' yubá, ate' bilá' lahui gu'ina lá'ayi ga yu'u didza' rucá'ana tsahuí' le nunë' Dios. Guyëpi yösa, en gulú'u bö zidzaj, en gunné' guziú' luyú. Gudödi budó' zxu', en gurö'ö guiöj böguí' yöla sunna.

12

Tunu nigula, en tuba' bëla zxon xitsiní'

¹ Ní'iró bilá' lahui yehua' yubá tu le naca bë'da', buluí' lonu tu nigula nácumu le naca ca gubidza, en zoa zxan ní'anu beo'. Dxiá ícjanu tu le néquini oro ga dxíagacaba' chinnu böljaj bení'. ² Nigula ni chizóa soa bí'ido' queénu, en ribödxdinu tu' rúdia' lé'ënu. Riguf'í rizáca'nu ruzóanu bí'ido' queénu. ³ Ní'iró ia'tú le naca bë' bilá' lahui yehua' yubá. Buluí' loba' tuba' bëla zxon xitsiní'. Nácaba' xiná guí'is, ate' dxíagaca gadxi ícjabá, en chí lúzuba', ate' dxía tu le néquini oro tu tu ícjabá' na'. ⁴ Len xibanba' gú'uyöjba' tu cö' tsa tu tsonna cö' böljaj lúzxiba, en gurú'unaba' légacaba' luyú. Guzuí'ba' bëla zxon xitsiní' na' lonu nigula na' chizóa sóabi' bí'ido' queénu. Zóaba' sina' gáguba'-bí' bí'ido' queénu na' ca gáljabi' na'. ⁵ Buzóanu-bi' tubi' bi'í bönni' do' ral-la' inná bé'ebi' yúgu'të yödzhó len tu xiyaga guíë. La' bucuítatë'ë-bi' Dios bí'ido' queénu na', en buchisë'-bi' ga ni' zoa cazë' Lë', rö'ë lataj lo ga na' rinná bë'ë. ⁶ Buzxúnmajnu nigula na', zéajnu lu lataj cá'asó, ga ni' chinupë'ë Dios lataj queénu. Ulu'gahuë'-nu ni' idú ca chinnu gayuá' yu' tsónnalalaj dza.

⁷ Gudödi gulaca lë ni, gúcada' gudil-la yehua' yubá. Gubáz lá'ayi lo lë' Miguel, en yugu' gubáz lá'ayi dá'gaquië' lë' gula'díl-lalenë'-ba' bëla zxon xitsiní' na'. Gula'díl-la bëla zxon na', en yugu' gubáz xihui' dá'gaca lëba' ⁸ pero bití' bila'deli' lu gudil-la na'. Que lë ni na' bití'rö bidzhöli xilátjagaca yehua' yubá. ⁹ Caní guca, gula'rú'unë'-ba' bëla zxon xitsiní' na' ní'lló.

Nácaba' bëla na' zóaba' dza ni'te, lëba' tu' xihui'. Gula'ru'unë' tu' xihui' yödžölió, dzágagaca le gubáz xihui' na' dá'gaca le.

¹⁰ Ní'irö biyönda' tu' chi'i ruf'i zidzaj didza' yehua' yubá, rnna: "Na'a chibidxin dza nulu'ë lahui yöl-la' rusólá nunë' Dios, en yöl-la' huáca queë', en le rinná bë'ë, enca' le rinná bë'ë Cristo, tu' chigula'ru'unë' ni'lö nu na' buzegui yugu' böchi' luzá'aru' didza'. Rëla, en tã dza buzegui légaquië' didza' lahuë' Dios queëru'. ¹¹ Yugu' böchi' luzá'aru' ni bulu'cul-lë' nu na', tu' bulu'gunë' dxin xichönë' Bönni' na' náquië' Bö'cu' Zxíla'do' queë' Dios, en tu' bulu'gunë' dxin didza' na' gulunë' ba nalí queë'. Biti' gulu'i ládxi'gaquië' yöl-la' na' bán queégaquië', pero gulatië'. ¹² Que lë ni na' gaca yöl-la' rudzeja yehua' yubá. ¡Buli'dzeja libí'ili', zóali' ni'! ¡Bica' bayechi' libí'ili' zóali' yödžölió, en lu nísado', tu' chibötaj tu' xihui', en bidxin ga zóali'! Riléde'e tu' xihui' na' tu' chiréquite'e ia tã chí'isó dë lataj que."

¹³ Cate' gúquite'eba' bëla zxon xitsini' na' chigula'ru'unë'-ba' luyú, ní'irö yöjsóa régu'ba'-nu nigula na' buzóanu bi'i bönni'do' na' queënu. ¹⁴ Ní'irö Dios bë'ë-nu nigula na' chopa xiliba' bisia' nácacaga zxon para gaca sunu, en icúitanu ga na' zóaba' bëla zxon xitsini' na', en idxinnu xilátjanu lu lataj cá'asó. Ní' ulu'gahuë'-nu idú tsonna iz yu' gatsaj. ¹⁵ Bëla zxon xitsini' na' gúbaba' nisa zile zaca' cúdzulönu, le guca ca tu nisa yegu, en gú'uniba' gua'të nigula na'. ¹⁶ Ní'irö luyú gúcalen nigula na'. Guyalaj luyú na', en güi'i nisa yegu na' gúbaba' bëla zxon xitsini' na'. ¹⁷ Ní'irö bëla zxon xitsini' na' guléde'eba'-nu nigula na', ate' guyéjba' yöjtíl-lalenba' nupa nagá'anagaca queënu di'a dza queënu, nupa na' tun ca rnna le gunná bë'ë Dios, en nazí' lu né'eguequi le nunë' Jesucristo ba nalí.

13

Chópaba' böa' s'nia'

¹ Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' s'nia' dxíagaca gadxi ícjaba', en chi lúzuba'. Dxiagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rilé'e Dios dxi'a. ² Böa' s'nia' na' bilé'eda'-ba' riná'aba' ca nácaba' tu bédxito', nacua' ní'aba' ca nácacaga ní'aba' oso, ate' ruá'aba' naca ca naca ruá'aba' bédxi guixi'. Bëla zxon xitsini' na' budó diba' lu na'aba' böa' s'nia' ni yöl-la' huáca queëba', enca' xilátjaba' ga rinná bë'ëba', en yöl-la' unná bë' zxon queëba'. ³ Dxiá huë' tu ícjaba' böa' s'nia' na', le naca le guti lëba', pero buniti huë' na', ate' bulu'bani yúgu'të bönachi yödžölió, en yöjdá'gaca böa' s'nia' na'. ⁴ Gula'yéaj ládxi'gaquië'-ba' bëla zxon xitsini' na', tu' budó diba' yöl-la' unná bë' queëba' lu ná'aba' böa' s'nia' na'. Gula'yéaj ládxi'gaquië'-ba' böa' s'nia' na', en gula'nnë': "¿Nuzxi caz naca zxon ca naca zxon böa' s'nia' na', en nuzxi caz sequí' tíl-lalen lëba'?"

⁵ Guta' lu ná'aba' böa' s'nia' na' bë'ëba' didza' ba zxon, en didza' xihui' le rinnëba' queë' Dios. Idú ca chopa-un beo' guta' lu ná'aba' yöl-la' unná bë'. ⁶ Gusí loba' rinnëba' queë' Dios, en rinnë' xihui'ba' que Lë' Dios, en que lataj lá'ayi queë', en quégaca nupa nacua' yehua' yubá. ⁷ Guta' lu ná'aba' gudíl-lalenba' nupa néquiquequi quez queë' Dios, en bucúl-laba' légaquië'. Guta' ca' lu ná'aba' gunná bë'eba' yúgu'të bönachi izá'a, bönachi yúgu'të yödžö, en bönachi tu'i yúgu'të didza' yúbölo, en bönachi idútë yödžölió. ⁸ Yúgu'të bönachi nacua' yödžölió gula'yéaj ládxi'gaca böa' s'nia' na', nupa na' bití' nazúajgaca láguequi lu guichi que yöl-la' na' bán, guichi na' buzúajë' Bönni' na' náquië' Bö'cu' Zxíla'do' queë' Dios cate' si' guta' yödžölió. Buzóa cazë' Dios gütië' Bönni' na' ni'a quégaca bönachi queë'.

⁹ Channö nu riyöni, ral-la' uzé nagui. ¹⁰ Nupa nucu'ë Dios idžungaca, ral-la' idžungaca, ate' nupa nucu'ë Dios para nu guti léguequi len guíë' tuchi', len guíë' tuchi' ilátigaca. Que lë ni na', ral-la' ila'bóza zxon ladxí' nupa néquiquequi queë' Dios, en ta'yéajlë' Lë'.

¹¹ Gudódi na' bilé'eda'-ba' ia'tuba' böa' s'nia' gurenba' birúajba' lu yu. Dxiagaca chopa lúzuba' ca naca lúzuba' bö'cu' zxíla', en ruí'iba' didza' ca na' ruí'iba' didza' bëla zxon xitsini' na'. ¹² Dë lu ná'aba' böa' s'nia' ni yúgu'të yöl-la' unná bë' queëba' böa' s'nia' bidxinba' zí'aló, cate' dzágaba' lëba'. Runba' böa' s'nia' buropi ni ga ta'yéaj ládxi'gaca yúgu'të bönachi nacua' yödžölió böa' s'nia' zí'aló na', böa' na' buniti huë' le guti lëba'. ¹³ Böa' buropi na' runba' ca' le nácacaga bë' ga ridxintë runba' ga ruhuóxaj guí' le za' lúzxiaba, en ruhuóxaj luyú lógaca yúgu'të bönachi. ¹⁴ Rizí' ye'eba' bönachi nacua' yödžölió len le nácacaga bë' dë lu ná'aba' runba' loba' böa' s'nia' zí'aló na'. Rinná bë'eba' bönachi nacua' yödžölió ilunë' tu budó' ca nácaba' böa' s'nia' na' gúcaba' huë' que guíë' tuchi', ate' nabanba'. ¹⁵ Dë lu ná'aba' runba' ga soa ibán budó' na' naca ca nácaba' böa' s'nia' zí'aló na', en güi'i didza' budó' ni, en gun ga nu guti yúgu'të nupa bití' ila'yéaj ládxi'gaca le. ¹⁶ Benba' ga gudá' yúgu'të bönachi tu le naca bë' dá'gaca lëba', nupa nácacaga cá'asó, en nupa nácacaga lo, nupa ta'lé'e yöl-la' tsahui', en nupa nácacaga yechi', nupa bití' nadó'ogaca, en nupa nadó'ogaca. Budá'aba' le lu ná'agaca ibëla o ra' xigágaca bönachi na'. ¹⁷ Cuntu nu gaca bi ga'u o bi guti' channó cabí da' nu na' lë na' naca bë', o channó cabí da' nu na' laba' böa' s'nia' na', o le nabábaba' nuá'aba'. ¹⁸ Na'a riquinnu'

yöl-la' réajni'i. Nu napa yöl-la' réajni'i ral-la' ulábatëz tsca le nabábaba' nuá'aba' böa' sínia' na', le naca ca le nababé' tu bönni', ate' le nabábaba' na' naca xopa gayuá' yu' tsónnalalaj yu' xopa.

14

Le tul-lé' tu gayuá' yu' tapa-un milé' bönni'

¹ Gudödi ni' buyúá', en bilé'eda-né' Bönni' na' náquié' Bö'cu' Xzila'do' zuíné' lu guí'ado' nazí'i le Sión. Nacuá'lené' Lé' tu gayuá' yu' tapa-un milé' bönni', da' ra' xigágaquié' Lé' Bönni' na' náquié' Bö'cu' Xzila'do', enca' Lé' Xuzé'. ² Ní'irö biyönda' tu le rigú'u bö' yehua' yubá, le rinné zidzaj ca rinné tu yegu zxön, en ca rinné guziú'. Biyönda' le riyön cate' ta' guínnié' lé'e tu le rul-la zé zían du que. ³ Tul-lé' tu le rul-la cubi, nacu'ë ca dödilö lahui lataj lo ni', enca' ca dödilö lahui ga na' nacuá' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légacasé' tu gayuá' yu' tapa-un milé' bönni' ni, bönni' na' böa'ué' Cristo légaquié' ladaj bönachi yödzülió. ⁴ Nácagaquié' bönni' ni idú ladxi'. Biti' gula'cuá'lené' nigula, tu' nácagaquié' idú bönni' ra'bán. Sójácalené' Bönni' na' náquié' Bö'cu' Xzila'do' gátí'tés ga sa'yéajé'. Cristo caz böa'ué' légaquié' ládjagaca bönachi, ate' nácagaca nupa bulu'dödi cuíngaqüié' zí'alö queé' Dios, enca' queé' Bönni' na' náquié' Bö'cu' Xzila'do'. ⁵ Catu caz gula'z'í' yé'ë, ate' cuntu nu gaca bi inné' quégaquié' ga na' nacu'ë ca dödilö lahui lataj lo ga rö'ë Dios.

Didza' röjuá'gaquié' tsonna gubáz lá'ayi

⁶ Ní'irö bilé'eda' ia'tué' gubáz lá'ayi, ridödé' lu bö'ös lúzxiba, en röju'ë didza' dxi'a zóatica'sö para guné' libán que lógaca nupa nacuá' yödzülió, bönachi iduté' luyú, yúgu'té bönachi izá'a, en bönachi tuí'í yúgu'té didza' izá'a, en bönachi yúgu'té yödzo. ⁷ Ru'ë zidzaj didza', rnné': "¡Gulí'gádxí Dios, en gulí'cu'ë yöl-la' ba tu' chizó'a uchi'a usöröé' bönachi! ¡Gulí'tséaj ládx'é Dios, nuné' lúzxiba, en luyú, en nísado', en gapa ralaj nisa!"

⁸ Ia'tué' gubáz lá'ayi söjnáhué' gubáz lá'ayi ni, en rnné': "¡Chibudxi que yödzo Babilonia! ¡Chibudxi que yödzo zxön na'! Caní guca que, tu' gulún nupa nacuá' ní' ga gula'z'í' lu ná'agaquié' bönni' yúgu'té yödzo iluné' ca nácagaca le ta'z'é ládx'í'gaquié' le ruá' dö'."

⁹ Ia'tué' gubáz lá'ayi söjnáhué' gubáz lá'ayi buropi ni, en ru'ë zidzaj didza', rnné': "¡Channö nu tseaj ládx'í'-ba' böa' sínia' na', enca' budó' queé'ba', en guí'í' lataj ta' ra' xigué' o lu né'e le naca bé' da' lé'ba', ¹⁰ guné' Dios nu ni xíguia' lu yöl-la' rilé' queé'! ¡Qui'í' saca' nu na' lu guí', en lu lé' na' ruzégui'da', lógaca gubáz lá'ayi, en lahué' Bönni' na' náquié' Bö'cu' Xzila'do'! ¹¹ Cuéntica'sö dzön que guí' ga ni' quí'í' saca' nu na'. Réla, en te dza qui'í' saca', ate' catu caz gata' lataj ulu'z'í' ládx'í'gaca nupa ila'yéaj ládx'í'gaca-ba' böa' sínia' na', en budó' queé'ba'. Biti' ulu'z'í' ládx'í'gaca nupa iluf'í' lataj ta' laba' léguequi. ¹² Que lé' ni na' nupa na' néquiquequi queé' Dios, en tun ca rnna le gunná' bé'ë, en ta'yéajlé' Jesús, ral-la' ila'bóza zxön ladxi'."

¹³ Ní'irö biyönda' chi'í' nu ruí'í' didza' yehua' yubá, en rë neda': "Buzúaj lu guichi lé' ni: ¡Bica' bágaca nupa ilátigaca na'a si lo, nupa na' ta'yéajlé' Xanru'!"

Dios Bö' Lá'ayi rnné': "¡Ca' gaca! ¡Ulu'z'í' ládx'í'gaquié' lu dxin guluné', en ulu'z'í'ë xibé' ca sa'yéaj le guluné'!"

Tu'z'í'ë le rulá' luyú

¹⁴ Ní'irö buyúá', en bilé'eda' tu böaj lúzxiba chiguí'chido'os, ate' lu böaj na' rö'ë tu bönni' náquié' ca náquié' Bönni' Guljé' Bönachi, ate' dxía icjé' tu le néquini oro, ate' zöné' tu guié' tuchi' lu né'ë. ¹⁵ Birúajé' tué' gubáz lá'ayi lu yudo' rö'ö yehua' yubá, ate' bé'ë zidzaj didza', en gudxé' Nu na' rö'ö lu böaj na', gunné': "¡Bugún dxin guié' tuchi' quiu', en guchugu xzoa' xtila, tu' chibidxin dza nu uzí' le! ¡Chinabídx du que le dé' yödzülió!"

¹⁶ Ní'irö Nu na' rö'ö lu böaj na' bugún dxin guié' tuchi' iduté' yödzülió, ate' buzi'ë le rulá' luyú.

¹⁷ Ní'irö birúajé' tu gubáz lá'ayi lu yudo' zoa yehua' yubá. Nu'ë ca' tu guié' tuchi'. ¹⁸ Birúajé' ia'tué' gubáz lá'ayi ra' bucugu ni', dé' lu né'ë inná' bé'ené' guí', ate' bé'ë zidzaj didza', en bulidzé' gubáz lá'ayi zí'alö na' nu'ë guié' tuchi', gunné': "¡Bugún dxin guié' tuchi' quiu', en butubi tu' xó'a huéaj le ta'bía lubá uva rö'gaca yödzülió, tu' chiná' le ta'bía lubá uva!"

¹⁹ Ní'irö gubáz lá'ayi ni buguné' dxin guié' tuchi' iduté' yödzülió, en butubé' le ta'bía lubá uva rö'gaca luyú, ate' yójchú'uné' le ta'bía lubá uva na' lu yeru zxön ga izí xisi. Yugu' lé' ni ruluf'í' ca guné' Dios, guné' xíguia' bönachi nacuá' yödzülió. ²⁰ Bulu'libé' le ta'bía lubá uva na' lu lerui zoa ní'ilö ra' yödzo, ate' lu lerui na' birúaj rön, en gurén ga bidxinté' ruá'agacaba' böa', en gudödi rön na' idú tsca gaca sá'aru' idú chinu dza.

15

Yugu' gubáz lá'ayi nuá'gaquié' gadxi yödzühué'

¹ Bilé'eda' ia'tú le nácada' bē' yehua' yubá, le run ga nu rubani. Bila'rúajé' gadxi gubáz lá'ayi, nuá'agaquié' gadxi yödzhóhué' rōjsétegaca, le uguné' dxin Dios, údxi guné' xígua' bōnachi yödzhólió.

² Bilé'eda' ca' tu le naca ca tu nísado' le rēpi yōsa bení' ca guiōj jara le nuts'i guí'. Nupa na' bulu'xicia lu bōa' sínia' na', en lu budó' queéba', en lu laba', zuígaca lu lē na' naca ca tu nísado', en nuá'agaquié' le tul-la, yugu' le bē'ē Dios queégaquié'. ³ Tul-lé' le rul-la na' bil-lé' Moisés, bōnni' huen dxin queé' Dios. Naca tu le rul-la queé' Bōnni' na' náquié' Bō'cu' Zxíla'do'. Ta'nné':

¡Li', Xantu' Dios, zxóntērō nacu' Li'!

¡Zxóntērō naca yúgu'tē le benu',
le tun ga rubánitu'!

¡Li' rinná bé'enu' yugu' yödzhó!

¡Idú dxí'ado', en idú tsahui' naca ca bi runu'!

⁴ ¿Nuzxi caz cabí gadxi Li', Xantu'?

¿Nuzxi caz cabí cu'u Li' yōl-la' ba?

¡Tuzu' Li' nacu' lá'ayi!

¡Ila'dxín bōnachi yúgu'tē yödzhó,

en ila'yéaj lādxi'guequi Li'

tu' ta'lé'e naca tsahui' yúgu'tē le runu'!

⁵ Gudōdi guca lē ni, buyúa', en bilé'eda' gualaj yudo' yehua' yubá ga ni' dē lataj lá'ayi que le naca bē' zóalené' Dios bōnachi queé'. ⁶ Bila'rúajé' gadxi gubáz lá'ayi lu lataj lá'ayi na', nuá'agaquié' gadxi yödzhóhué' na'. Nácugaquié' lari' nazáca'da' le rēpi yōsa bení', en nuga'gaca luchú'ugaquié' le néquiqueuini oro. ⁷ Ní'irō tu nu nutsa' ladaj idapa nupa na' nabángaca, bē' que queégaquié' gadxi gubáz lá'ayi na' gadxi zxíga'do' néquiqueuini oro, en yúdzugaca le rulu'i yōl-la' rilé queé' Dios, Bōnni' zoa cazé'. ⁸ Lu lataj lá'ayi na' bidzá'a dzōn, tu' zoa ni' yōl-la' bení', en yōl-la' huáca zxōn queé' Dios. Cuntu nu sequi' tsaza lu lataj lá'ayi na' cate' gátsjarō gadxi yödzhóhué' na' nuá'agaquié' gadxi gubáz lá'ayi na'.

16

Yugu' zxíga'do' yúdzugaca le rulu'i yōl-la' rilé queé' Dios

¹ Ní'irō biyōnda' chí'i nu ru'i zidzaj didza' lataj lá'ayi na', en rē gadxi gubáz lá'ayi na', rnna: "¡Guli'tséaj! ¡Guli'tsōjlálaj gadxi zxíga'do' na' lu yödzhólió, le yúdzugaca lē na' rulu'i yōl-la' rilé queé' Dios!"

² Guyijé' gubáz lá'ayi zí'aló, en yōjlaljé' le yudzu zxíga'do' na' zōné' lu yödzhólió. Lē na' yudzu zxíga'do' na' ben ga gutsaj yudzu' ya'a le riláda' iduté le naca caz nupa na' da' léguequi le naca bē' dá'gaca bōa' sínia' na', enca' nupa na' ta'yéaj lādxi'gaca budó' queéba'.

³ Ní'irō guyijé' gubáz lá'ayi buropi, en yōjlaljé' le yudzu zxíga'do' na' zōné' lu nísado', ate' nisa na' bōaca rōn ca naca rōn queé' tu bōnni' nati, ate' gulati yúgu'tē nupa nabángaca nacuá' lu nísado' na'.

⁴ Guyijé' gubáz lá'ayi bunny, en yōjlaljé' le yudzu zxíga'do' na' zōné' gapa dē yegu, en gapa ralaj nisa, ate' gapa dē nisa na' bulu'huóaca rōn. ⁵ Ní'irō biyōnda' ru'ē didza' gubáz lá'ayi na' dē lu nē'ē rinná bé'ené' nisa na', rnné': "¡Xantu' Dios Lá'ayi! ¡Zoa cazu', en guzóa cazu'! ¡Tshahui' nacu' tu' richugu' caní quegaca bōnachi ⁶ tu' bulu'laljé' rōn quegaca nupa néquiquequi quez quiu', en quegaca nupa gulu'i didza' uláz quiu'! ¡Na'a, Li' runu' ga ilé'ajé' rōn, tu' caní ral-la' gaca queégaquié'!"

⁷ Ní'irō biyōnda' ru'i didza' tu nu zoa ra' bucugu yehua' yubá ni', rnna: "¡Ca' gaca, Xantu' Dios, napa cazu' yōl-la' unná bē'! ¡Iduté li, en tsahui' naca ca richugu' quegaca bōnachi!"

⁸ Guyijé' gubáz lá'ayi budapi na', en yōjlaljé' le yudzu zxíga'do' na' zōné' lu gubidza, ate' gubidza na', bē'ē Dios le lataj uzégui'da' bōnachi len guí' que. ⁹ Gula'yégui'da' yúgu'tē bōnachi tu ruzégui'da' gubidza, pero bití' bulu'bí' lādxi'gaca, en bití' gula'gú'u Dios yōl-la' ba. Gula'nné' zí'i queé' Dios, Bōnni' dē lu nē'ē inná bé'ené' yugu' lē ni tu'saca' zí' bōnachi.

¹⁰ Guyijé' gubáz lá'ayi guryu' na', en yōjlaljé' le yudzu zxíga'do' zōné' lu xilataj bōa' sínia' ga na' rinná bē'ēba', ate' guro'ō chul-la gapa rinná bē'ēba'. Ní'irō, tu' gula'gú'i gula'zaca' bōnachi, guláguya'a lúdx'iquequi, ¹¹ pero bití' bulu'bí' lādxi'gaca para cabirō ilúngaca le ruá' dō' tuné'. Gula'nné' zí'i queé' Dios zoé' yehua' yubá tu' ta'guí'i ta'zaca', en tu' dxiagaca yudzu' ya'a na'.

¹² Guyijé' gubáz lá'ayi buzxopi na', en yōjlaljé' le yudzu zxíga'do' na' zōné' lu yegu zxōn nazí'i le Eufrates, ate' gubidxi nisa yegu na' para íbá'a nōza ga ila'dōdi nupa ta'nná bē', nupa ila'rúaj zaca' ga rilén gubidza.

¹³ Ní'irō bilé'eda' bēla zxōn xitsiní' na', en bōa' sínia' na', en bōnni' ru'ē didza' uláz quegacaba'. Bila'rúaj tsonna bō' xihui' tun ditaj bōnachi lu ruá'agaca nupa na'. Nalá'gaca

ca nalá'gacaba' buludzu. ¹⁴ Nácagaca yonna bö' ni bö' que tu' xihui', bö' na' tun le nácagaca bē' le ilún ga ulu' bani bōnachi. Yōjaca bö' xihui' na' idú yōdzōlió, en yōjtúbigaca nupa ta'nná bē', para tsōjajúie' lu gudil-la na' gaca lu dza zxōn queē' Dios, Bōnni' napa cazē' yōl-la' unná bē'. ¹⁵ Cani rnnē' Dios: "¡Buli'yútsōca! Guída' tsárido'os ca ridxinē' tu bōnni' gubán. Bica' ba nu zoa ban ladxi', en run chi'i le nacu nu na', en rúntica'sō dxi'a, para cabi gun bayudxi ta xiguidisó, en para cabi utuf'i nu na' lahui' lógaca bōnachi." ¹⁶ Yugu' bö' xihui' na' bulu'tubi yugu' bōnni' ta'nná bē'ē, ate' bulu'dubē' tu lataj nazí' le lu didza' hebreo: Armagedón.

¹⁷ Guyjē' gubáz lá'ayi igadxi na', en yōjlanjē' le yudzu zxíga'do' na' zōnē' lu bō'os, ate' bē' zidzaj didza' tu nu zoa lu lataj lá'ayi zoa yehua' yubá ga dē' lataj lo na', rna: "Chinaca."

¹⁸ Ní'irō guyēpi yōsa, en gurō'oda' bō, en gunnē' guziú'. Gudōdida' budó' zxu', le gudōdida'rō ca gudōdi tsanni ni nacuá' bōnachi yōdzōlió. ¹⁹ Birúaj tsonna cō'olō yōdzō zxōn na', ate' gula'guinnaj yōdzō nacuá' yōdzōlió. Yōjnenē' Dios le naca xihui' gulún bōnachi yōdzō zxōn na' nazí' le Babilonia, ate' lu yōl-la' rilé queē' benē' xígua' nupa nacuá' ni'. ²⁰ Bila'gachi' yugu' luyú bidxi dzō'ō lu nísado', ate' bití'rō gula'lá' yugu' guí'ado'. ²¹ Bōxaj ca' guió'j bōgui' yōla sunna, le za' lúzxiba, en yōjsóa ícagaca bōnachi, ate' nál-li' tu tu guió'j bōgui' na' ca tu gayuá' guiē, ate' yúgu'tē bōnachi gula'nnē xihui' queē' Dios tu' nōzi guió'j bōgui' na' tu bulu'sáca'da' zi'i léguequi.

17

Dios richúquiē' queēnu nigula udá dzaga

¹ Ní'irō bidxinē' tuē' gubáz lá'ayi ga zoa', nababē' gadxi gubáz lá'ayi na' gula'zōnē' gadxi zxíga'do' na' néquiquequini oro. Bē'lenē' neda' didza', gunnē': "Gudá ni, ate' ulu'ida' li' ca gunē' Dios, gunē'-nu xígua' nigula udá dzaga na', rō'ōnu lu nísado' zlán. ² Gula'cua'len lēnu nupa ta'nná bē' luyú yōdzōlió, en gulún le ruá' dō', ate' gula'zudxi nupa nacuá' yōdzōlió ni, tu' gulunlen lēnu le bití' naca dxi'a."

³ Dios Bö' Lá'ayi guzóalenē' neda', ate' gubáz lá'ayi na' guchē'ē neda' tu lu lataj cá'asō, ate' bilé'eda'-nu tu nigula ni' dxianu cúdzu'ba' tuba' bōa' sinya', nácaba' xiná guí'ido'os. Dxiagaca gadxi ícjabá', en chi lúzuba', en dá'gaca ca' lēba' le ta'nnē xihui' queē' Dios. ⁴ Nigula na' dxianu lēba' nácumulari' xiná chul-la, en lari' xiná guí'ido'os. Nazí' biquitaj queēnu le néquiquequini oro, en yugu' guió'j nazaca', en yugu' bugá. Lu ná'anu rō'ō tu zxíga'do' néquini oro, en yudzu le nácagaca xihui', en le ruá' dō' rrunnu. ⁵ Ra' xigánu dá'gaca ca lēnu, le tu'lu'í tu le nagachi', en ta'nná caní: "Yōdzō Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzō'ō Yōdzōlió." ⁶ Gúquibe'eda' nazúdxinu nigula na' tu' bennu ga gulaj rōn quégaca nupa néquiquequi queē' Dios, en quégaca nupa na' zoa nu bēti léguequi tu' gulún ba nalí queē' Jesús. Cate' bilé'eda'-nu, bubánide'eda'. ⁷ Gudxē' gubáz lá'ayi na' neda', gunnē': "¿Bixx que rubáninu? Uzéajni'ida' li' lē na' nagachi', le rulu'í ca naca nigula ni, enca' le rulu'í ca naca bōa' sinya' na' dxianu-ba', bōa' na' dxiagaca gadxi ícjabá', en chi lúzuba". ⁸ Bōa' sinya' na' bilé'enu' guzóaba' zí'alō, pero bití' zóaba' na'a. Bōa' ni chizóa irúajba' lataj chul-la, ate' tséajba' ga nitiba' tsaz. Ulu'bánide'eda' nupa nacuá' luyú cabi nazúajgaca láguequi lu guichi que yōl-la' na'bán, le buzúajē' Dios dza ni'te quez cate' si' gata' yōdzōlió. Cate' ila'lé'eni bōa' sinya' na' guzóaba' zí'atēlō, pero bití' zóaba' na'a, ulu'bani tu' nubanba'.

⁹ Lē ni naca tu le uzéajni'í nu gaca tséajni'í: Gadxi ícjabá' na' tu'lu'í gadxi guí'ado' gapa rō'ōnu nigula ni'. ¹⁰ Lēsa' caní gadxi ícjabá' na' tu'lu'í gadxē' bōnni' ta'nná bē'ē. Gáyu'ē bōnni' ni chigudōdi quegaquiē'. Tuē' bōnni' ni rinná bē'ē na'a, ate' ia'tuē' bití' ridxínninē', pero cate' guidē', inná bē'ē tu chí'ido'osó. ¹¹ Bōa' sinya' na' guzóaba', pero bití' zóaba' na'a, rulu'í tu bōnni' izxunu', inná bē'ē. Nunē' tsózxōn bōnni' gadxi na', ate' tōdi ni nítíē' tsaz.

¹² Chi lúzuba' na' bilé'enu' tu'lu'í chiē' bōnni' ila'nná bē'ē. Bití' ta'z'ínninē' yōl-la' unná bē', pero ila'zi'ē yōl-la' unná bē' tu chí'ido'osó, en ila'nná bē'ē tsózxōn len bōa' sinya' na'. ¹³ Chiē' bōnni' ni, lēbisó nácagaquiē', ate' ulu'dōdē' yōl-la' unná bē' quégaquiē', en le nazí' lu ná'agaquiē' lu ná'aba' bōa' sinya' na'. ¹⁴ Ila'díl-lalenē' Bōnni' na' náquiē' Bō'cu' Zxíla'do', pero Lē' ucul-lē' légaquiē', tu' náquiē' Xángaca yúgu'tē nupa nácagaca xan, en náquiē' Bōnni' rinná bē'enē' yúgu'tē nupa ta'nná bē'. Nupa nacuá' len Lē', bulidzē' Dios léguequi, en gurōē' léguequi, ate' tsaz dá'gaca Lē'."

¹⁵ Gubáz lá'ayi na' gudxē' ca' neda', gunnē': "Yugu' nísado' na' bilé'enu' gapa ni' rō'ōnu nigula udá dzaga na', tu'lu'í bōnachi yugu' yōdzō, en yugu' bōnachi izá'a, en bōnachi tu'í yugu' didza' yúbólō, en bōnachi yugu' luyú. ¹⁶ Chi lúzuba' bōa' sinya' na' bilé'enu', en tu'lu'í chiē' bōnni', bití' ila'lé'enē'-nu nigula udá dzaga na' dxi'a, ate' ulu'cá'anē'-nu cá'asō, en xiguidisó. Ilahuē' xipēla'nu, en ulu'zégui'ē-nu len guí'. ¹⁷ Dios uchíziē' ícja lādxi'do'gaquiē' chiē' bōnni' na' le gun ga ilunē' ca rē'ēni quézinē' Lē', ate' ilácagaquiē' tuz, en ulu'dōdē' yōl-la' unná bē' quégaquiē' lu ná'aba' bōa' sinya' na' para gaca ca rna xtídzē'ē. ¹⁸ Nigula na' bilé'enu'-nu rulu'í yōdzō zxōn na' rinná be'e nupa ta'nná bē' yōdzōlió ni."

18

Riguinnaj yödzo Babilonia

¹ Gudödi na' bilé'eda-né' ia'túé' gubáz lá'ayi ruhuötjé' rirúajé' yehua' yubá, en dē lu nē'ē yöl-la' unná bē' zxon, ate' guyēpi yōsa bení' luyú ni'a que yöl-la' bení' queé' gubáz lá'ayi na'.

² Bē'ē zidzaj didza' gubáz lá'ayi na', gunné':

¡Chibiguinnaj! ¡Chibiguinnaj Babilonia, yödzo zxon na'!

¡Chibóaca xilataj tu' xihui', en xilátjagaca bō' xihui' tun ditaj bōnachi!

¡Yugu' biguinni xitsini', en yugu' biguinni xihui' tu' zóaba' xilátajagacaba' ni'!

³ Caní guca que yödzo na' ni'a que le gulún bōnachi nacua' ni'.

Guluné' ga gulún bōnachi yúgu'tē yödzo ca nácagaca le ta'zēsō ladxí' le ruá' dō'.

Nupa ta'nná bē' luyú yödzo'lió gulunlen légaquié' le ruá' dō',

ate' guta' yöl-la' tsahui' quégaquié' bōnni' to'o tuti' nacu'ē yödzo'lió

tu' guyánda' yugu' le nazaca' gula'zē ladxí' bōnachi ni'.

⁴ Ní'irō biyōnda' ruí' didza' ia'tú nu zoa yehua' yubá, rnna:

Gulí'ruaj lu yödzo na', libí'ili' néquili' quia'

para cabí'gunli' dul-la' tsōzxon len légaquié',

en para cabí'quí' i sáca'li' le gaca quégaquié'.

⁵ Nayánda' dul-la' nabága'gaquié',

en chinayasa nadxín caz lúxiba,

pero Dios rōjmené' le ruá' dō' nūngaquié'.

⁶ Bulí'bí' quégaquié' ca na' guluné' queéli'.

Bulí'bí' quégaquié' chopa có' tsca le guluné'.

Bulí'bí' quégaquié' chopa có' tsca le naca xihui' guluné' queéli'.

⁷ Gulí'gún ga ila'guí' ila'záquié', en ila'bōdxi yéché'ē

tsca guca yöl-la' ba, en yöl-la' zxon guluf'í cúngaquié'.

Ta'zá' ladxí'gaquié', ta'nné':

Rō'ōtu' ni, rinná bē'ētu'.

Biti' nácatu' uzēbi, en catu caz cōdxi yéchi'tu'.

⁸ Que lē ni na', tu dzasō ila'dxín quégaquié' le ila'guí' ila'záquié',

yöl-la' guti, en yöl-la' ribōdxi yechi', en yöl-la' ridún.

Iléguié' lu guí', tu' napa cazē' yöl-la' huáca zxon Xanru' Dios.

Lē cazē' usiúdxé' quégaquié'.

⁹ Ní'irō gunné': "Ila'bōdxi nupa ta'nná bē' luyú yödzo'lió, en gulún le ruá' dō' tsōzxon len

légaquié', en bulu'z'í' xibé le nequi quégaquié'. Ila'bōdxé', en ila'bōdxi yéché'ē cate' ila'lé'ené'

dzōn que yödzo zxon na' régui. ¹⁰ Zi'tu' z'í'tu'sō ila'cu'ē tu' iládxiné' ca gaca xíguia' le gaca que

yödzo na', ate' ila'nné': ¡Bica' bayechi' Babilonia, yödzo zxon ni, le gúcada' lo! ¡Tu dzasō guca

xíguia' que!"

¹¹ Ní'irō gunné': "Ila'bōdxé' ca' bōnni' to'o tuti' nacu'ē yödzo'lió, en ila'bōdxi yéché'ē ni'a que

yödzo na' tu' cabirō soa nu ga'u bi ilúti'ē ni'." ¹² Cúnturō nu ga'u ni':

Le néquiguequini oro, en plata,

en yugu' guió'j zaca', en yugu' bugá,

en yugu' lari' nazáca'da', en lari' xiná chul-la,

en lari' dxí'ado', en lari' xiná guí'ido'os,

en yugu' yaga rilá' zxixi,

en le néquiguequini dxita nazáca'da',

en le néquiguequini yaga nazáca'da',

en le néquiguequini guié' cobre,

en le néquiguequini guié',

en le néquiguequini guió'j jara.

¹³ Cúnturō nu ga'u ni':

Canel, en yugu' le rilá' zxixi, en yalaj,

en le rilá' zxixi que mirra, en que yōj olíbano,

en xisi uva nál-la, en le naca za,

en yiōzja dxí'ado', en xzoa' xtila,

en yugu' búrrodo', en yugu' bō'cu' zxila',

en yugu' bōa', en yugu' carreta,

en yugu' bōnni' huen dxin, en ia'bal-la bōnachi.

¹⁴ Nupa na' to'o tuti' ilé légaquié', ila'nná:

Nadúagaca le guzē ladxí'li'.

Chigudōdi quégaca yöl-la' tsahui',

en le nácagaca lachí' queéli',

ate' bítirō idzōlilil' léguequi.

¹⁵ Ní'irō gunnē: "Ila'bōdxē' bōnni' to'o tuti' na', tu' guta' quégaquiē' yōl-la' tsahui' tu' gulúti'ē lu yōdzō na', ate' ila'cu'ē zítu' zítu'sō tu' iládxinē' ca gaca xigua' le gaca que yōdzō na', en ila'bōdxi yéché'ē." ¹⁶ Ila'nnē':

¡Bica' bayechi' yōdzō ni guca zxōn!

Guca ca tu nigula náccunu lari' nazáca'da',
en lari' xiná chul-la, en lari' xiná gu'ido'os,
en nazí'i biquitaj queēnu le néquiguequini oro
en le néquiguequini guiōj zaca', en yugu' bugá.

¹⁷ Tu dzasō guniti yōl-la' tsahui' que yōdzō ni.

Ní'irō gunnē: "Yúgu'tē bōnni' xan barco, en nupa nacua' lé'egaca barco na', en nupa tu'sá' yugu' barco na', en nupa tun dxin lu nísado', ila'cu'ē zítu' zítu'sō." ¹⁸ Cate' ila'lé'enē' dzōn que yōdzō na' régui, ila'bōdxē', en ila'nnē': "¿Bízxilō yōdzō guca zxōn ca naca yōdzō ni?"

¹⁹ Ní'irō gunnē':

Ulu'dxíē' bēchtō ícjagaquiē'.

Ila'bōdxē', en ila'bōdxi yechē'ē, ila'nnē'.

¡Bica' bayechi' yōdzō ni guca zxōn!

Yōl-la' tsahui' que yōdzō ni ben ga guta' yōl-la' tsahui'
quégaca yúgu'tē nupa náccagaca xan barco lu nísado'.

Tu dzasō guniti yōdzō ni.

²⁰ Buli'dzeja ca gaca que yōdzō ni, libí'ili' zóali' yehua' yubá,

enca' libí'ili' néquili' queē' Dios,

libí'ili', bōnni' gubáz queē',

en libí'ili', bōnni' ruí'ili' didza' uláz queē'.

Buli'dzeja, tu' chiguchúguiē' Dios que yōdzō ni

ni'a que bi gulún queéli' nupa nacua' lu yōdzō ni.

²¹ Ní'irō tuē' gubáz lá'ayi nál-la buchisē' tu guiōj zxōn le naca ca tu guichi riyētu, ate' gurú'unē' le lu nísado', gunnē':

La' canisō gaca que yōdzō Babilonia,

tu' iguinnaj yōdzō na' guca lo,

ate' bítirō nu udzōli le.

²² Bítirō nu yōni lu yōdzō na' nupa ta'guínni lē'e le rul-la,

en calēga nupa tu'cōdxi gui

en calēga nupa tu'cōdxi lúzuba' bōa' bēdxi.

Bítirō udzōli bōnni' huen dxin ni',

en bítirō yōni bō rigú'u le rutu ni'.

²³ Bítirō uzení' nitú gu' lu yōdzō na',

en bití' yōni chí'ē bōnni' rutsaga nē'ē ni',

en calēga chí'ibi' bi'i nigula rutsaga ná'abi'.

Caní gaca sal-la' nácali' lo, libí'ili' rá'uli', en rúti'li' lu yōdzō ni,

en guzxi' yé'eli' bōnachi idútē yōdzōlió len yōl-la' gudzá' queéli'.

²⁴ Lu yōdzō ni gulaj xichōngaquiē' bōnni' gulu'ē didza' uláz queē' Dios,

en xichōngaca nupa néquiguequi queē' Dios,

enca' xichōngaca yúgu'tē bōnachi yōdzōlió,

tu' bētigaca nupa nacua' yōdzō ni léguequi.

19

¹ Gudōdi lē ni biyōnda' tu'i zidzaj didza' bōnachi zían nacua' yehua' yubá, ta'nná:

¡Yōl-la' ba Dios! ¡Yōl-la' rusólá runē',

ate' yōl-la' zxōn, en yōl-la' unná bē' napē' Dios queēru'!

² ¡Naca idútē li, en tsahui' ca rusiúdxē'!

¡Guchúguiē' que yōdzō na' naca ca tu nigula udá dzaga,

en quégaca bōnachi lu yōdzō na' ila'niti tsaz!

¡Gulún ditaj bōnachi yōdzōlió tu' nōzi le ruá' dō' gulunē'!

¡Dios buzí' lēbē' légaquiē'

tu' gulútiē' yugu' huen dxin queē'!

³ Leyúbōlō gula'nnē': "¡Yōl-la' ba Dios! ¡Cuéntica'sō dzōn ga régui yōdzō na'!"

⁴ Idapa uru'ē bōnni' gula ni' bulu'tsaga lógaquiē' lu yu tsōzxōn len idapa nupa ni' nabángaca, en ta'yéaj ládxi'gaquiē' Dios, Bōnni' rō'ē lataj lo queē'. Gula'nnē': "¡Ca' gaca! ¡Yōl-la' ba Dios!"

⁵ Ní'irō biyōnda' ruí'i didza' tu nu zoa lataj lo na', rnna:

¡Guli'cu'ē Dios queēru' yōl-la' ba

yúgu'tèli' runli' xichinë', libí'ili' na' rádxili' Lè',
nácali' bônachi cá'asò, en bônachi lo!

Lani que yöl-la' rutsaga na' queë Bönni' náquië' Bò'cu' Zxíla'do'

⁶ Biyönda' ca' nu ruí' i zidzaj didza', le biyón ca riyón cate' tuí' didza' bônachi zían, en biyón ca' ca riyón ga ridódi tu yegu zxón, o ca riyón cate' rinnë guziú', ate' rnna:

¡Yöl-la' ba Dios tu' risí lahuë' rinná bē'è!

¡Napa cazë' yöl-la' huáca!

⁷ ¡Ral-la' udzeja ládxi'ru', en uzí'iru' xibë',

en cú'uru'-né' yöl-la' ba

tu' chibidxín dza lani que yöl-la' rutsaga na'

queë' Bönni' na' náquië' Bò'cu' Zxíla'do'!

¡Si' lu në'ë Cristo nupa néquiguequi queë'!

¡Chinabá'a queébi' bi' i utsaga ná'alenbi' Lè'!

¡Nácabi' le ruluí' nupa na' néquiguequi queë'!

⁸ ¡Dios ru'ë-bi' lataj gácubi' lari' nazáca'da'

le naca idú, en rëpi yösa bení'!

Lari' nazáca'da' na' ruluí' le naca tsahui' núngaca nupa néquiguequi queë' Dios.

⁹ Ní'irò gubáz lá'ayi na' gudxë' neda', gunnë: "Buzúaj lu guichi didza' ni: ¡Bica' bágaca nupa na' nulidzë' Dios légaquië' para ila'cu'ë lani que yöl-la' rutsaga na' queë' Bönni' náquië' Bò'cu' Zxíla'do'!"

Gudxë' ca' neda': "¡Yugu' didza' idútë li ni ru'ë didza' Dios cazí!"

¹⁰ Buzó'a zxiba' xini'ë gubáz lá'ayi na' para tseaj ládxa'a lë', pero gudxë' neda': "¡Biti' gunu' caní! Neda' ca' naca' huen dxin queë' Dios ca nacu' li', en ca nácagaquië' böchi' luzó'o nazi' lu ná'agaquië' le naca idútë li ca naca queë' Jesús. ¡Guyéaj ládxe'ë Dios!"

Nupa tuí' didza' uláz queë' Dios, tuí' didza' le naca idútë li ca naca queë' Jesús.

Bönni' dxíë'-ba' bóa' chiguichi

¹¹ Ní'irò bilé'eda' nayalaj lúzxiba, ate' buluf' i loba' tuba' bóa' chiguichi, ate' lë' Bönni' dxíë'-ba', Nu Run Ca Rnna, enca' Nu Ruí' i Didza' Le Nácate. Caní lë' tu' ruchi'a rusóroë' ca naca le naca idútë li, enca' caní tsej' gudil-la. ¹² Rëpi yösa bení' guiöj lahuë', le nácagaca ca guí, en dxíagaca icjé' zían le néquiguequi oro. Nazúaj lahuë' tu le lë', le cuntu nu nōzi, pero tuzë' Lë' nōzinë. ¹³ Nácüë' tu lari' në'aj rön, en lë' ca' "Nu Naca Xtídzë'ë Dios." ¹⁴ Rōjnógaquië' Lë' ni'a në'ë guizxi yu nacu'ë yehua' yubá, dxíagaquië'-ba' bóa' chiguichi, en nácagaquië' lari' nazáca'da', le naca chiguichido'os, en bití' naca bōsaj. ¹⁵ Rirúaj ru'ë le naca ca tu guíë tuchi' le gúninë' zí' bônachi yugu' yödzo. Inná bé'enë' légaquië' len tu xiyaga guíë, en gunë' légaquië' xiguaí, le gaca quegaquië' ca raca que le ribía lubá uva, zoa nu ruli' léguequi, tu' riléde'enë' Dios, Bönni' napa cazë' yöl-la' unná bē'. ¹⁶ Nazúaj lu lari' nácüë', enca' lu xigatsjé' ca lë', "Bönni' Rinná Bé'enë' Nupa Ta'nná Bē'", enca' "Bönni' Náquië' Xángaca Nupa Nácagaca Xan."

¹⁷ Ní'irò bilé'eda'-në' tuë' gubáz lá'ayi zuínë' lu gubidza, ate' bē'ë zidzaj didza', en gudxë'-ba' bóa' ta'daba' lúzxiba, rnnë': "¡Guli'dá, buli'dubi ga ni gáguli' lani zxón queë' Dios! ¹⁸ Gáguli' xipéla'gaca nupa ta'nná bē', en xipéla'gaca nupa ta'nná be'e bönni' rōjáquië' gudil-la, en xipéla'gaca nupa nál-lagaca, en xipéla'gacaba' bóa', en xipéla'gaca nupa ta'bia légacaba', en xipéla'gaca yúgu'të bônachi, nupa bití' nadó'ogaca, en nupa nadó'ogaca, nupa nácagaca cá'asò, en nupa nácagaca lo."

¹⁹ Ní'irò bilé'eda'-ba' bóa' sínia' na', enca' yugu' bönni' ta'nná bē'ë yödzo'lió, en bönni' rōjáquië' gudil-la guizxi yu quegaquië', nudúbigaquië' para ilúnlenë' gudil-la Bönni' dxíë'-ba' bóa' chiguichi, dzágagaca Lë' ni'a në'ë guizxi yu. ²⁰ Bidzunba' bóa' sínia' na', enca' bönni' na' bē'ë didza' uláz queéba', bönni' na' benë' yugu' le nácada' bē' loba', en guzxi' yé'enë' nupa ni' guluí' lataj nu uzúaj láhuiguequi lë na' naca bē' dá'gaca lëba', en gula'yéaj ládxi'gaca budó' queéba'. Bóa' sínia' na', enca' bönni' na' bē'ë didza' uláz queéba', gula'ru'unë' léguequi nabángacasó ca' ga rō'ó guí' zxón le réguilen lë na' ruzégui'da'. ²¹ Bönni' na' dxíë'-ba' bóa' chiguich bētië' yúgu'të nupa na' gudá'gaca léguequi len guíë tuchi' na' rirúaj ru'ë, ate' bulu'huóljaba' yúgu'tëba' bóa' na' ta'daba' lúzxiba, tu' gulá'guba' xipéla'guequi.

20

Chi gayuá' iz

¹ Gudódi lë ni bilé'eda' ruhuötjé' tu gubáz lá'ayi, zë'ë yehua' yubá, en zönë' zxí'ini guíë que lataj chul-la, ate' nu'ë tu du guíë yödx. ² Guzxönë'-ba' bëla zxón xitsiní' na', nácaba' bëla guzóaba' dza ni'te, bëla na' lëba' Tu' Xihui', enca' Satanás, ate' béguë'ë-ba', en bucá'anë'-ba' caní chí gayuá' iz. ³ Yójchú'unë'-ba' lataj chul-la, en busayjé' lataj na', ate' budë'ë tu le riguela' le rusayaj lataj na' para cabiró si' yé'eba' bônachi yugu' yödzo ga izá'aró chí gayuá' iz na', ate' tódi ni' ral-la' yédxiba' tu chí'ido'.

⁴ Ní'irō bilé'eda' yugu' lataj gapa ta'bō' nupa ta'nná bē', ate' nupa bila'deli' ulu'chi'a ulu'sōrō le raca ta'bō' yugu' lataj na'. Bilé'eda' ca' yugu' bō' gulaca caz bōnachi bulu'rixē' yénguequi yugu' bōnni' bití' nácagaequi' tsahui' tu' gulún ba nali' queē Jesús, en tu' gulún libán que xtidzé'ē Dios. Yugu' bōnachi ni bití' gula'yéaj lādxi'gaca bōa' sínia' na', en budó' queēba', en bití' guluí' lataj nu uzúaj ra' xigáuequi, o lu nē'eguequi lē na' naca bē' nu da' lēba'. Bulu'bán nupa ni lu yōl-la' guti, ate' gula'nná bē'len Cristo chi gayuá' iz, ⁵ pero ia' zica'rō bōnachi nátigaca bití' bulu'bán. Cate' izá'arō chi gayuá' iz na' ulu'bán. Yōl-la' rubán lu yōl-la' guti guca ni naca le raca zí'alō. ⁶ ¡Bica' ba, en bica' lá'ayi nupa ta'deli' yōl-la' rubán na' raca zí'alō! ¡Yōl-la' guti le raca burópilō bití' bi gaca gun quéguequi, pero ilácagaca bixúz queē' Dios, enca' queē' Cristo, ate' ila'nná bē'len Lē' chi gayuá' iz na'!

⁷ Cate' izá'a chi gayuá' iz na', ulu'sanē' Satanás ga na' nadzún. ⁸ Urúaj Satanás, en tsōjzxi' ye'e bōnachi yugu' yōdzō nacuá' idapa la'a yōdzōlió. Si' ye'e ca' bōnachi yōdzō Gog, en yōdzō Magog, ate' utubi léguequi lu gudil-la. Tsca nácagaca nupa ni, nácagaca ca naca yuzxi rō'ō tu ra' yegu xzōn. ⁹ Guizxi yusō gula'dōdē' iduté luyú, ate' gula'cu'ē lē'ajlō lataj ga na' nacuá' bōnachi néquiequequi queē' Cristo, le naca yōdzō na' nadxi'inē' Dios. Ní'irō benē' Dios ga bōxaj guí' le birúaj yehua' yubá, le buzeguí' légaquie'. ¹⁰ Tu' xihui' na' nazí' ye'e légaquie', yōjchú unagaquie' le ga rō'ō guí' xzōn que lē na' ruzégui'da', ga na' chizóaba' bōa' sínia' na', enca' bōnni' na' bē'ē didza' uláz queēba'. Ila' guí' ila'zaca' ni' rēla, en te dza yúgu'tē iz zá'gaca.

Ta' dxín bōnachi lahuē' Dios ga rō'ē ruchi'a rusōrōē'

¹¹ Ní'irō bilé'eda' tu lataj lo chiguichi, en bilé'eda' ca' Nu rō'ō ruchi'a rusōrōē' lataj na'. Lahui' lo Nu ni gula'nitité yōdzōlió, en lúxiba, ate' bití'rō budzōli xilátjaguequi. ¹² Bilé'eda' ca' nupa chinátigaca, nupa nácagaca lo, en nupa nácagaca cá'asō, zuíguequinē' lahuē' Dios. Gula'yéaj guichi, en guyalaj ca' ia'tú guichi ga na' nazúajgaca lágaca nupa nadéli'gaca yōl-la' na'bán idú. Buchi'a busōrōē' Dios nupa na' chinátigaca tsca naca le nazúaj yugu' lu guichi na', lē na' gulúngaca. ¹³ Lu nísado' bulu'rúaj nupa chinátigaca, nacuá' lu nísado'. Lu yōl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busōrōē' Dios tu tu tsca naca le gulúngaca. ¹⁴ Ní'irō yōjtsázagaca yōl-la' guti, en lataj chul-la ga ni' rō'ō guí' xzōn le naca lataj que yōl-la' guti le raca burópilō. ¹⁵ Nupa bití' nazúajgaca lu guichi quégaca nupa nadéli'gaca yōl-la' na'bán idú yōjtsázagaca lataj na'.

21

Tu lúxiba cubi, en tu luyú cubi

¹ Gudōdi na' bilé'eda' tu lúxiba cubi, en tu luyú cubi, tu' chigudōdi quégaca lúxiba na', en luyú na' gula'cuá' zí'alō. Bití'rō dē nísado'. ² Neda', Juan, bilé'eda' yōdzō lá'ayi na', le naca Jerusalén cubi, ruhuótaj, rirúaj yehua' yubá ga zoē' Dios, en chinaba' a que ca nabá'a queēbi' bi'í nigula chizóa utsaga ná'alēnbi' tu bōnni'. ³ Biyōnda' rufi' didza' nu rnna yehua' yubá: "¡Buli'yútsōca! ¡Ga zoē' Dios zóalen bōnachi! ¡Sóalenē' léguequi, ate' léguequi ilácagaca bōnachi queē'! ¡Dios caz sóalenē' léguequi, en gáquie' Dios quéguequi! ⁴ Dios uzxié' nisa ribōdxi zoa guiōj lóguequi. Cúnturō nu gati, en cúnturō nu cōdxi, en cúnturō nu cōdxi yechi', en cúnturō nu qui'í saca', tu' chigudōdi quégaca lē na' gulaca zí'alō."

⁵ Ní'irō Nu na' rō'ō lataj lo ni' gunná: "¡Buyútsōca! ¡Yúgu'tē ruúna' cubi!"

Gudxi ca' neda': "¡Buzúaj lu guichi lē ni, tu' naca iduté li didza' ni, en naca lōza!"

⁶ Ní'irō gudxi neda': "¡Chinaca caz! ¡Neda' naca' Nu zoa zí'atēlō, enca' Nu rōjsete ca naca le risi lo, en le ruúdxité! ¡Nu ribidxi nisa, neda' guna' ga guí'aj nisa na' runna yōl-la' na'bán! ⁷ Nupa ila'deli' lu le raca yōdzōlió, gaca quéguequi yúgu'tē lē ni. Neda' gaca' Dios quéguequi, ate' léguequi ilácagaca xzi'ini caza', ⁸ pero nupa tadxi, en nupa bití' ta'yéajlē' neda', en nupa nácagaca xihui', en nupa tuti bōnachi, en nupa tun le bití' naca tsahui', en nupa nácagaca udzá', en nupa ta'yéaj lādxi'gaca budó' guiōj budó' yaga, en yúgu'tē nupa ta'z'í yē', chizóa ribōza xilátjaguequi lu guí', ga ni' rō'ō guí' xzōn que lē na' ruzégui'da', lē na' naca yōl-la' guti le raca burópilō."

Yōdzō Jerusalén le naca cubi

⁹ Ní'irō tuē' gubáz lá'ayi nababē' gadxē' gubáz lá'ayi ni' gula'zōnē' gadxi xzígá'do' yúdxugaca gadxi yōdzōhuē' yōjsétegaca, bidé' ga zoa'. Gudxē' neda': "¡Gudá ni! ¡Uluf'ida' li' bi'í nigula na' si' utsaga ná'alēnbi' Bōnni' na' náquie' Bō'cu' Xzila'do'!"

¹⁰ Guzóalenē' Dios Bō' Lá'ayi neda', ate' guché'ē gubáz lá'ayi na' neda' tu lu guí'a sibi, en buluf'inē' neda' yōdzō lá'ayi Jerusalén, ruhuótaj, rirúaj yehua' yubá ga zoē' Dios. ¹¹ Yōdzō ni rēpi yōsa bení' tu' zóalen le yōl-la' bení' queē' Dios. Rēpi yōsa bení' ca rēpi yōsa bení' tu guiōj nazáca'da' ca naca guiōj guí'do'os nazí'i le jaspe. Naca yōdzō na' yení'ido' ca naca guiōj jara. ¹² Zoa tu zō'ō xzōn, en sibi idú gásibi' ilō yōdzō na'. Lē'e zō'ō na' nacuá' chinnu gapa nu riyaza. Ra' gapa nu riyaza na' nacu'ē chinnuē' gubáz lá'ayi tapa chí'ē. Tu tu ga nu riyaza na' nazúaj tu tu lágaca idxinnu cō' di'a dza xzi'ini xi'sóē' Israel. ¹³ Lē'e zō'ō le ruyú saca' ga

rilén gubidza nacua' tsonna gapa nu riyaza, en saca' ga za' bö' ziaga nacua' tsonna gapa nu riyaza, en saca' tsölä'a ga ridödi gubidza beo' ziaga nacua' tsonna gapa nu riyaza, en saca' ga ribía gubidza nacua' ca' tsonna gapa nu riyaza. ¹⁴ Zxan zö'ö que yödzö na' nacua' chinnu xilibi zö'ö, ate' lë'egaca xilibi zö'ö na' nazúajgaca lágaquië idxinmutë' bönni' gubáz queë' Bönni' na' náquië' Bö'cu' Zxíla'do'.

¹⁵ Gubáz lá'ayi na' ru'ilenë' neda' didza' zönë' tu yaga urixi le néquini oro para urixë' tsca naca yödzö na', en tsca nácacaga gapa nu riyaza, en tsca naca zö'ö que. ¹⁶ Yödzö na', lédi'i nácacaga idapa la'a. Lédi'i naca yöl-la' tunna que, en yöl-la' blaga' que. Len yaga na' burixë' tsca naca yödzö na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' böläga' que. ¹⁷ Burixë' ca' yöl-la' yödx que zö'ö na', naca tu gayua' yu' tapa-un dxita, tsca naca dxita que na' bönnachi, lé na' rurixinë' gubáz lá'ayi na'.

¹⁸ Zö'ö na' néquini guiöj jaspe, ate' yödzö na' néquini órotëz, le naca yení'ido' ca naca guiöj jara. ¹⁹ Yugu' xilibi zö'ö que yödzö na' nazí'gaca biquitaj guiöj nazáca'da'gaca.

Xilibi zö'ö zí'alö néquini guiöj jaspe.

Le buropi néquini guiöj zafiro.

Le bunni néquini guiöj ágata.

Le budapi néquini guiöj esmeralda.

²⁰ Le guyu' néquini guiöj ónice.

Le buzxopi néquini guiöj cornalina.

Le igadxi néquini guiöj crisólito.

Le izxunu' néquini guiöj berilo.

Le igá néquini guiöj topacio.

Le idxi néquini guiöj crisoprassa.

Le idxinéaj néquini guiöj jacinto.

Le idxinnu néquini guiöj amatista.

²¹ Chinnu gapa nu riyaza na' ta'yáyjani chinnu bugá. Tu tu ga nu riyaza na' riyáyjani tuz bugá. Luyú la' nöza lo que yödzö na' néquini órotëz, le naca yení'ido' ca naca guiöj jara.

²² Biti' bilé'eda' tu yudo' lu yödzö na', tu' náquië' Xanru' Dios yudo' que, napa cazë' iduté yöl-la' unná bë', en lësca' caní náquië' Bönni' náquië' Bö'cu' Zxíla'do', náquië' yudo' que yödzö na'. ²³ Biti' run bayudxi tsení'gaca gubidza, en beo' lu yödzö na', tu' uzení' yöl-la' bení' queë' Dios lu yödzö na', ate' lësca' Bönni' náquië' Bö'cu' Zxíla'do' náquië' le uzení' ni'. ²⁴ Bönnachi yugu' yödzö, nupa nulágaca, ila'dá lu bení' que yödzö na', ate' yugu' bönni' ta'nná bë'ë yödzólió idiguá'agaquië' yöl-la' tsahui' quégaquië' lu yödzö na'. ²⁵ Catu caz tsáyajgaca gapa nu riyaza lu yödzö na' lahui' dza, ate' lataj na' catu caz gaca rëla. ²⁶ Bönnachi yugu' yödzö idiguá'agaquië' ni' le nácacaga lesaca', en yöl-la' tsahui' quéguequi. ²⁷ Tu le ruá' dö' bití' ca' tsaza ni', en calëga tu le naca xihui', en calëga nu rizi' yë', pero tsázagacasö ni' nupa nazúajgaca láguequi lu guichi queë' Bönni' náquië' Bö'cu' Zxíla'do', ga na' nazúajgaca lágaca nupa nadéli'gaca yöl-la' na'bán.

22

¹ Ní'irö gubáz lá'ayi na' buluí'inë' neda' tu yegu yení'ido', le naca nisa yegu le runna yöl-la' na'bán. Rëpi yösa bení' yegu na' ca rëpi yösa bení' guiöj jara. Rirúaj yegu na' lu lataj lo ga rö'ë Dios, en ga rö'ë ca' Bönni' náquië' Bö'cu' Zxíla'do'. ² Rizá' yegu ni gatsaj láhui'lö nöza lo que yödzö na'. Tsölä'a huéaj ra' yegu na' rö'ö tu yaga le runna yöl-la' na'bán, ate' ta'bia chinnu luzuí tu iz. Tu tu beo' ta'bia yaga na'. Xilágui'gaca yaga na' nácacaga le tu'ún bönnachi yugu' yödzö. ³ Biti' soa ni' nitú le dxía dö'. Soa lu yödzö na' lataj lo ga rö'ë Dios, enca' ga rö'ë Bönni' náquië' Bö'cu' Zxíla'do', ate' yugu' huen dxin queë' ila'yéaj ládxi'gaquië' Lë'. ⁴ Ila'lë'enë' lahuë' Lë', ate' le nazí'i Lë' nazúaj ra' xigágaquië'. ⁵ Biti' gaca rëla ni', ate' nupa nacua' ni' bití' ila'quínna tu le cu'u bení', en calëga bení' que gubidza, tu' gáquië' Xanru' Dios bení' quégaquië'. Nupa nacua' ni' ila'nná bë'tica'sö.

Chizóa huödë' Cristo

⁶ Ní'irö gubáz lá'ayi na' gudxë' neda', gunné': "Didza' ni naca iduté li, en naca löza. Xanru' Dios, Nu ruchiza Bö' Lá'ayi icja ládxi'do'gaquië' yugu' bönni' tu'ë didza' uláz queë', chigusöl-lë'ë gubáz lá'ayi queë' para uluí'inë' yugu' huen dxin queë' le ral-la' gácatë. ⁷ Caní rnnë' Jesucristo: ¡Chizóa huöda'! ¡Bica' ba nu run ca rnna didza' ruá'a uláz queë' Dios, le nazúaj lu guichi ni!"

⁸ Neda', Juan, biyönda', en bilé'eda' yugu' lë ni. Gudödi biyönda', en bilé'eda' yugu' lë ni, buzóa zxiba' xini'ë gubáz lá'ayi na' buluí'inë' neda' yugu' lë ni para guna' lë' zxon. ⁹ Ní'irö lë' gudxë' neda': "Biti' gunu' caní, tu' naca' neda' huen dxin queë' Dios ca nacu' li, en ca nácacagaquië' böchi' luzó'o na' tu'ë didza' uláz queë' Dios, enca' ca nácacaga yúgu'të nupa tun ca rnna le nazúaj lu guichi ni. ¡Ben zxon Dios!"

¹⁰ Gudxë' ca' neda: "Biti' ucachu'u xtídzë'ë Dios ni, didza' ruá'a uláz queë', en nazúaj lu guichi ni, tu' chizóa ilaca yugu' lë ni. ¹¹ Nu ruá' dö' guá'tica'sö dö'. Nu run le cabí naca tsahui' gúntica'sö le cabí naca tsahui'. Nu run dxi'a, gúntica'sö dxi'a, ate' nu nequi quez queë' Dios, guéquitica'sö quez queë'." ¹² Rnnë' Jesús: "¡Chizóa huóda! Nu'a lu na'a le nadéli' gaca bönachi, ate' ubi'a que queë'guequi tsca naca le gulúngaca. ¹³ Neda' naca' Nu zoa zí'atëlö, enca' Nu röjsete, ca naca le risí lo, en le ruúdxitë. Naca' ca' Nu run ga risí lo, en Nu rusiúdxí."

¹⁴ Ní'irö gunné': "¡Bica' ba nupa nayari le nácgaca, en tun le naca dxi'a! ¡Nazí'guequi lataj ilahuë' le ribía yaga le runna yöl-la' na'bán, en gaca ila'yaza gapa nu riyaza lu yödzö na'!
¹⁵ Nupa nácgaca xihui', en nupa nácgaca udzá', en nupa tun le ruá' dö', en nupa tuti bönachi, en nupa ta'yéaj ládxi' gaca budó' guiój budó' yaga, en nupa ta'yaza ládxi' gaca ta'z' yë' ila'cuá' ní'ilö ra' yödzö na'. ¹⁶ Neda', Jesús, gusöl-la'a gubáz lá'ayi quia', ate' buluf'inë' libí'ili' yugu' lë ni, libí'ili' na' dzágali' yugu' cö' bönachi quia'. Neda' naca' di'a dza queë' David, enca' zxf'ini xi'sóë'. Naca' ca' bôlaj hui sila."

¹⁷ Tu'ë didza' Dios Bö' Lá'ayi, enca' bi'i nigula utsaga ná'aleni'-në' Bönni' náquië' Bö'cu' Zxíla'do', ta'nnë': "¡Gudá!"

Nu riyöni didza' ni ral-la' inná: "¡Gudá!"

¡Nu ribidxi nisa, en nu rizë ladxi' le, ral-la' guídi, en guí'aj nisa le runna yöl-la' na'bán!

¹⁸ Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnní'a: Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúajgaca lu guichi ni. ¹⁹ Lë'sca' caní, channö nu cúa bítitës didza' ni ruá'a uláz queë' Dios, en nazúaj lu guichi ni, Dios ugüë' ca' xilataj nu na' lu guichi ga nazúajgaca lágaca nupa nadéli' gaca yöl-la' na'bán idú, enca' lu yödzö lá'ayi, ca na' nazúaj queë'guequi lu guichi ni.

²⁰ Xanru', Nu run ba nalí queë'guequi lë ni rnnë': "¡Ön! ¡Huódatea!"

¡Ca' gaca! ¡Gudá, Xantu' Jesús!

²¹ Rinábida'-në' Xanru' Jesucristo uzá' ládxe'ë queë'li' yúgu'tëli'. ¡Ca' gaca!